


Tuhun tsaꝗ tsa nacoꝗ jutu mañi yo Jesucristo

tsi yo



New Testament in Mixtec, San Juan Colorado (MX:mjc:Mixtec,
San Juan Colorado)

Tuhun tsaá tsa nacoq jutu mañi yo Jesucristo tsi yo New Testament in Mixtec, San Juan Colorado (MX:mjc:Mixtec, San Juan Colorado)

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, San Juan Colorado

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
c270ec54-172a-541f-83e6-7760f619c744

Contents

San Mateo	1
Marcos	66
Lucas	109
Juan	179
Los Hechos	230
Romanos	293
I Corintios	318
II Corintios	341
Gálatas	358
Efesios	367
Filipenses	376
Colosenses	382
I Tesalonicenses	388
II Tesalonicenses	394
I Timoteo	397
II Timoteo	404
Tito	409
Filemón	412
Hebreos	414
Santiago	433
I San Pedro	439
II San Pedro	446
I San Juan	450
II San Juan	457
III San Juan	458
San Judas	459
El Apocalipsis	462

Tuhun Nyoo Tsa Tyaa Ra Mateo

Nyivi ra Jesucristo tsa tsicoo tsa ndi cumañi ca cacu ra
(Lc. 3.23-38)

¹ Ihya nyecú tandihí sivi nyivi ra Jesucristo tsa tsicoo tsa ndi cumañi ca cacu ra. Nyivi ra David tan nyivi ra Abraham cuvĭ tsi ra.

² Sehe ra Abraham cuvĭ tsi ra Isaac, tan sehe ra Isaac cuvĭ tsi ra Jacob. Tan sehe ra Jacob cuvĭ tsi ra Judá tshin tandihí ra yañi ra. ³ Tan ra Fares tshin ra Zara sehe ra Judá tshin ña Tamar cuvĭ tsi ra naha. Tan sehe ra Fares cuvĭ tsi ra Esrom, ra cuvĭ jutu ra Aram. ⁴ Tan sehe ra Aram cuvĭ tsi ra Aminadab, jutu ra Naasón. Tan sehe ra Naasón cuvĭ tsi ra Salmón. ⁵ Tan ra Booz, sehe ra Salmón tshin ña Rahab cuvĭ tsi ra. Tan sehe ra Booz tshin ña Rut cuvĭ tsi ra Obed, jutu ra Isaí. ⁶ Tan ra David, ra cuvĭ rey, sehe ra Isaí cuvĭ tsi ra. Tan sehe ra rey David tshin ñaha tsa cuvĭ ñasihí ra Urías cuvĭ tsi ra Salomón.

⁷ Tan sehe ra Salomón cuvĭ tsi ra Roboam, ra cuvĭ jutu ra Abías. Tan sehe ra Abías cuvĭ tsi ra Aza. ⁸ Tan sehe ra Aza cuvĭ tsi ra Josafat, ra cuvĭ jutu ra Joram. Tan sehe ra Joram cuvĭ tsi ra Uzías. ⁹ Tan sehe ra Uzías cuvĭ tsi ra Jotam, ra cuvĭ jutu ra Acaz. Tan sehe ra Acaz cuvĭ tsi ra Ezequías. ¹⁰ Tan sehe ra Ezequías cuvĭ tsi ra Manasés, ra cuvĭ jutu ra Amón. Tan sehe ra Amón cuvĭ tsi ra Josías. ¹¹ Tan sehe ra Josías cuvĭ tsi ra Jeconías tshin tandihí ra yañi ra. Tsicoo ra naha quivi tñin ra ñuu Babilonia naha ra tsi nyivi Israel, tsa cua cahun ñi cuvĭ ñi musu ra ñuu Babilonia can naha ra.

¹² Tsa yaha can, tan tsicoo sehe ra Jeconías, tan ra ican cuvĭ ra Salatiel, jutu ra Zorobabel. ¹³ Tan sehe ra Zorobabel cuvĭ tsi ra Abiud, ra cuvĭ jutu ra Eliaquim. Tan sehe ra Eliaquim cuvĭ tsi ra Azor. ¹⁴ Tan sehe ra Azor cuvĭ tsi ra Sadoc, ra cuvĭ jutu ra Aquim. Tan sehe ra Aquim cuvĭ tsi ra Eliud. ¹⁵ Tan sehe ra Eliud cuvĭ tsi ra Eleazar, ra cuvĭ jutu ra Matán. Tan sehe ra Matán cuvĭ tsi ra Jacob. ¹⁶ Tan ra Jacob cuvĭ jutu ra José, yí ña María. Juvín ña cuvĭ sibi ra Jesús ra cuvĭ Cristo, o cuñí tsi catyí, ra tsa jaquitsi Nyoo tyin quihí ndaha tsi yo.

¹⁷ Tacan tsicoo utsi cumi taahan tata ra Abraham nda cuanda cacu ra David. Tan ra David, tsicoo utsi cumi tata ra nda cuanda quivi tñin ra ñuu Babilonia naha ra tsi nyivi Israel. Tan nda cuanda quivi can tsicoo utsi cumi ca tata ñi nda cuanda quivi cacu ra Cristo.

Nu cacu ra Jesucristo
(Lc. 2.1-7)

¹⁸ Tyehen cuvĭ tan cacu ra Jesucristo: tsa yaha cundaq̄ tyiñu tsa cua tindaha ña María tshin ra José. Tan tsa ndi cumañi ca naquihin ra tsi ña, ñihj sehe ña tsa cuenda Tatyí li Nyoo. ¹⁹ Tan ra José, ra cua cuvĭ yí ña, vaha xaan iñi ra. Ña cuñí ra cuhva ra ticanuu tsi ña. Yacan cuenda tsicá iñi ra tsa nacoo xeehe ra tsi ña tan ña cua tindaha ca ra tshin ña. ²⁰ Tan tsitsi tsa tsicá iñi ra yacan, quituvĭ iin ángel Jutu Mañi yo nuu ra nu quixí ra. Tan nyehé ra ñumaahna, tan catyí ángel can tshin ra:

—José, tata ra David, ña çaça iñi un quihin un tsi ña María cuvĭ ña ñasihí un, tyin sehe ña tsa cua cacu, sehe Tatyí li Nyoo cuvĭ tsi. ²¹ Tan tsa yaha cacu lee can, cua jacunañi un tsi ra: Jesús. Tacan cua cunañi ra tyin cua jacacu ra tsi nyivi ra tsa iyó cuatyí ñuu ñayivi —catyí ángel can tshin ra José.

²² Tacan cuvĭ tyin tacan tan cundaa tsa cah̄an ra cuvĭ ndusu yuhu Jutu Mañi yo tah̄an tsanaha.

²³ Tan catyĭ ra tyehen:

Ñaha yoco tsa ñaha ca coo yĭi, cua cuhun sehe ña.
Tan cua coo iin sehe ña. Tan cua cunañi ra: Emanuel.
Tan sivi can cuñi tsi catyi: “Nyoo iyó ra tshin yu.”

²⁴ Tan tsa ndotoĭ ra José, javahaĭ ra tumaa catyĭ ángel can tshin ra. Quih̄in ra tsi ña María tyin cuvĭ ña ñasiihi ra. ²⁵ Maa tyin ña quixĭ ra tshin ña nda cuanda tsa yah̄a cacuĭ sehe ña. Tan jacunañi ra tsi lee can: Jesús.

2

Nu cuahán ra tsitó xaan, ra cuvĭ rey, cua nyehe ra naha nu cacuĭ ra Jesús

¹ Cacū ra Jesús ñuu Belén tsa canyĭi nu cuvĭ Judea. Tan quivi can ra cuvĭ rey Judea nañi ra Herodes. Tacan tan tsaĭ juhva ra naha nda ñuu Jerusalén. Quee ra naha ityi nu caná ñicanyii. Tan ra tsitó xaan cuvĭ ra naha. ² Tsiĉa tuhun ra naha tsi nyivi tan catyĭ ra naha:

—¿Nu maa nyii ra cuvĭ rey cuenda nyivi Israel? Tyin ityi nu caná ñicanyii nyehe ndi tiñuu tsa tsahá cuenda tyin cacū ra ityi ihya. Tan vatsi ndi vatsi jacahnu ndi tsi ra —catyĭ ra naha.

³ Quivi tsa tsitoĭ ra rey Herodes tsa cah̄an ra can naha ra, tuñu xaan cuñi ra cuvĭ. Tacan tucu tandihi nyivi ñuu Jerusalén can. ⁴ Tacan tan canaĭ ra Herodes tsi tandihi ra jutu tsa cuvĭ ityi nuu tshin ra cuvĭ jutu tan tshin tandihi ra cuvĭ maestro cuenda ley vehe ñuhu naha ra. Tan tsiĉa tuhun ra tsi ra naha numaa nda taahán tsi cacu ra Cristo. ⁵ Tan nacah̄an ra can naha ra tan catyĭ ra naha:

—Ñuu Belén tsa canyĭi Judea, ndacan taahán tsi cacu ra tyin tyehen tyaĭ ra cuvĭ ndusu yuhu Nyoo nu tutu tah̄an tsanaha:

⁶ Tan yooho Belén ñavin iin ñuu luhlu ñi cuvĭ un tsa nuu tandihi maa ñuu tsa cayucuĭ Judá tyin nuu yooho cua quita ra cua quihi ndaha tsi nyivi ñuu yu Israel. Maa ra cua jaha cuenda ra tsi ñi.

Tacan catyĭ nu tutu Nyoo, —catyĭ ra can naha ra tshin ra Herodes.

⁷ Tacan tan canaĭ xeehe ra Herodes tsi ra tsitó xaan can naha ra, tan tsiĉa tuhun ra tsi ra naha náa quivi tan náa hora quituvi tiñuu can. ⁸ Tacan tan jacuhun ra tsi ra naha nda ñuu Belén, tan catyĭ ra tshin ra naha:

—Cuaahan ndo, tan ndaca tuhun vaha ndo tsa cuenda ra lee can. Tatun nañihi ndo tsi ra, quitsi catyĭ tuhun ndo tshin yu, tyin cuhun ndihi yu cujacahnu yu tsi ra —catyĭ ra Herodes tshin ra naha.

⁹ Tsa tsiñĭ ra tsa tsitó xaan can naha ra tsa cah̄an ra Herodes, tan quih̄in ra naha ityi cuahán ra naha. Tan tiñuu tsa nyehe ra naha ityi nu caná ñicanyii can, cuahán tsi ityi nuu ra naha. Tan tsiĉuiñi tsi maa maa siqui nu canyĭi ra lee can. ¹⁰ Tan tsa nyehe ra tsitó xaan can naha ra tyin tsiĉuiñi tiñuu can, sii xaan cuñi ra naha. ¹¹ Tan quihvi ra naha tsitsi vehe nu canyĭi lee can. Tan nyehe ra naha tsi ra tshin ña María, sihi ra. Tan tsiĉuiñi tsiti ra naha tyin jacahnu ra naha tsi lee can. Tacan tan nuñá ra naha yuhu caja tsa ndahá ra naha. Tan tavaĭ ra naha regalo tsa cuvĭ xuhun cuaan, tan cutu vixi, tan ndutyĭ tami tsa nañi mirra. Tan tsahaĭ ra naha tsi lee can. ¹² Tsa yah̄a tsa nduĭ ra naha tsi ra Jesús tan cuanuhuĭ ra naha. Tan tsa cuanuhuĭ ra naha nyehe ra naha ñumaahna tan catyĭ tsi tyin ña taahán tsi cuhun ra naha cucatyĭ tuhun ra naha tshin ra Herodes. Yacan cuenda siin ityi cuanuhuĭ ra naha.

Nu tsinü xeehe ra José tan ña María tsihin lee sehe ñi nda Egipto

¹³ Tsa yaha cuahán ra tsa tsitó xaan can naha ra, tacan tan iin ángel Jutu Mañi yo quituvü nuu ra José tsitsi ñumaahna. Tan catyí ángel can tsihin ra:

—Nduvita, quihin tsi lee ihya, tsihin sihi ra, tan cuhun ndo nda ñuhu Egipto. Ndo ndo ndacan nda cuanda cahan nyico yu tsihin un. Tyin ra Herodes cua nanduco ra tsi ra lee ihya tyin cuñi ra cahñi ra tsi ra —catyí ángel can tsihin ra José.

¹⁴ Tacan tan nduvita ra José tsacuaa can. Tan quihin ra tsi lee can tsihin sihi tsi. Tan cuahán ñi nda Egipto. ¹⁵ Ndacan tsicoo ñi nda cuanda tsa tsihi ra Herodes. Tacan cuvü tyin cundaä tsa cahan ra cuvü ndusu yuhu Jutu Mañi yo tahan tsanaha jahä Nyoo. Tyehen catyí ra: “Nda Egipto canä yu tsi Sehe yu”, catyí ra.

Nu tava tyiñu ra Herodes na cahñi ra naha tsi ra nyihi

¹⁶ [Tsa ndi cumañi ca cúu ra Herodes tan ndi ndatú ra tsa quitsi nyico ra tsitó xaan can naha ra] tan tsa tuvü iñi ra Herodes tyin ra tsitó xaan can naha ra jandavü ñaha ra naha tsi ra, tan nduxaan xaan ra. Tan tava tyiñu ra na cahñi andaru tsi tandihi ra nyihi tsa iyó ñuu Belén can tan inga ñuu tsa cayucú yatyin ñi, ra nyihi tsa ndi cacü nda cuanda ra nyihi tsa uvi cuiya. Tacan javahä ra tyin tsicá iñi ra tyin tacan cuiya ra Jesús tumaa catyí ra tsitó xaan can naha ra tsihin ra. ¹⁷ Tacan cuvü tyin cundaä tsa cahan Nyoo tan tyaa ra Jeremías, ra cuvü ndusu yuhu ra tahan tsanaha. Tyaa ra tyehen:

¹⁸ Tsiñi yo iin ndusu ñuu Ramá, tsacú tsa nyivi, tan iyo taahán ñi.

Juvin ñi nyivi cuvü tata ña Raquel, nyivi Israel, tsacú tsa ñi tsa cuenda sehe ñi. Maa tyin ña cuñi ñi tsa naquihin ndaahvi nyivi tsi ñi tyin tsa yaha tsihi sehe ñi, catyí tsi nu tutu Nyoo.

¹⁹ Maa tyin tsa yaha tsa tsihi ra Herodes, tacan tan quituvü nyico iin ángel Jutu Mañi yo nuu ra José nu quixí ra nda Egipto. Tan catyí ra tsihin ra:

²⁰ —Nduvita, quihin tsi lee ihya tsihin sihi ra. Tan cunuhu nyico ndo nda Israel, tyin tsa tsihi nyivi nducu cahñi tsi ra lee ihya.

²¹ Tacan tan nduvita ra José, tan quihin ra tsi lee can tan tsihin sihi ra. Tan cuanuhü ñi nda Israel. ²² Maa tyin quivi tsito ra José tyin ra Arquelao, sehe ra Herodes, cuvü ra rey nda Judea, nayuhvi ra tan ña cuñi ra cuhun ra ndacan. Tan cuanuhü ñi nda Galilea tyin tacan jacoü Nyoo tsi ra tsitsi ñumaahna. ²³ Tsa tsaä ñi ican, tan cuahán ñi nda ñuu Nazaret, cua coo ñi. Tan ican tsicoo ñi. Tacan cuvü tyin cundaä tsa cahan ra cuvü ndusu yuhu Nyoo tahan tsanaha. Tyin catyí ra naha tyin ra Jesús ra ñuu Nazaret cua cuvü ra.

3

Nu cahan ra Juan tuhun Nyoo tsihin nyivi
(Mt. 1.1-8; Lc. 3.1-9, 15-17; Jn. 1.19-28)

¹ Quivi tsa ndi iyó ñi ñuu Nazaret, ra Juan, ra jacoondutyá tsi nyivi, cuahán ra nu tsiqui tsa iyó Judea. Tan quitsahä caahán ra tuhun Nyoo tsihin nyivi tsa tsaá nu nyii ra. ² Tan catyí ra:

—Ndu uvi iñi ndo cuatyí ndo tyin tsa cuñi tsa quivi cundaca ñaha Nyoo tsi yo.

³ Juvin ra Juan cuvü ra tsa cahan ra Isaías ra cuvü ndusu yuhu Nyoo tahan tsanaha. Tan tyaa ra tsa tsahä Nyoo tsi ra tyehen: Cua tyaa soho yo ndusu ra nu caná tsa ra nu tsiqui tan catyí ra:

“Nuña ndo iin ityi cuiti.

Tan natyiso vaha ndo tsi ndo tyin tsa vatsi Jutu Mañi yo,” catyí tuhun tsa tyaa ra Isaias.

⁴ Tan ra Juan nditsí ra jahma tsinu tsihin ixi camellu. Tan cinturón ra, ñi# cuví tsi. Tan tica xama tsatsí ra tan tsihi ra ndutya ñuñu. ⁵ Quitsí nyivi ñuu Jerusalén tan tandihi ñuu tsa cayucú Judea, tan nyivi tsa iyó yatyin ñi ityi yutya cahnu Jordán can; quitsí tyaa soho ñi tuhun caahán ra. ⁶ Tan tsa yaha nahma ñi cuatyí ñi, ra Juan jacoondutya ra tsi ñi yutya cahnu Jordán ican.

⁷ Maa tyin nyehe ra Juan tyin cuaha xaan ra fariseo, ra tsa tyaa yahvi xaan ley vehe ñuhu, tan cuaha xaan ra saduceo, quitsí ra naha tyin coondutya ra naha. Tan catyí ra tsihin ra naha:

—iNyooho, tumaa tata coo xaan cuví ndo! ¿A cuñí maa ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuví. ⁸ Nasama ndo kuhva iyó ndo, na nyehe yo tyin tsa ndu uví iñi ndo cuatyí ndo nuu Nyoo. ⁹ Maa tyin ña nduyaa ndo tan catyí ndo tyin nyivi tata ra Abraham cuví ndo. Tyin vasu tsihin yuu ihya, Nyoo cuví jananduví ra nyivi ra Abraham. ¹⁰ Tsa ndatú yatsa Nyoo tsi tandihi ndo tsa cuví ndo tumaa yutun tsa ña tsahá tsiti vaha. Cua tyahnya tun tan cua cayu tun, tacan cua javaha Nyoo tsihin ndo —catyí ra Juan—. ¹¹ Tsa nditsa tyin yuhu jacoondutya yu tsi nyivi tsihin ndutya, tan cuví tsi iin seña tyin tsa ndu uví iñi ñi cuatyí ñi. Maa tyin tsa yaha jacoondutya yu tsi ñi tsihin ndutya, vatsí inga ra cua jacoondutya tsi ñi tsihin Tatyí Ii Nyoo tan tsihin ñuhú ihñi. Iyó ca tunyee iñi Nyoo tsi maa ra tan ñavin ca yuhu. Tan ndi tsa cuiso yu nditsan ra tan nduve yahvi nyaá yu, tyin maa ra cahnu ca cuví ra. ¹² Tan ra ican ndahá ra pala tyin cua jandava ra trigu. Cua tava sán ra trigu vaha, tan cua natyihí vaha ra itsi. Tan cua cahmi ra tsahan tsa quita tsihin trigu can tsihin ñuhú tsa ña cua ndahva maa —catyí ra Juan.

*Nu tsicoondutya ra Jesús
(Mr. 1.9-11; Lc. 3.21-22)*

¹³ Tacan tan quitá ra Jesús Galilea tan tsaá ra yutya cahnu Jordán nu nyíi ra Juan, tyin cuñí ra tsa jacoondutya ra Juan tsi ra. ¹⁴ Tsa jihna ñi ña cuñí ra Juan jacoondutya ra tsi ra, tan quitsaha catyí ra tsihin ra:

—Cuñí un tsa jacoondutya yu tsi un, maa tyin ña taahán tsi tsa jacoondutya yu tsi un. Maa un taahán tsi jacoondutya tsi yu —catyí ra.

¹⁵ Maa tyin ra Jesús catyí ra tsihin ra:

—Tsa vityin, na cuví tsi kuhva catyí yu tsihin un. Tyin cuñí tsi tsa javaha yo tandihi tsa vaha tsa cuñí Nyoo —catyí ra tsihin ra Juan.

Tacan tan ndoo ra Juan vaha.

¹⁶ Tsa yaha tsicoondutya ra Jesús tan quitá ra tsitsi ndutya. Tan nuña andivi, tan ra Jesús nyehe ra vatsí nuú Tatyí Ii Nyoo, tumaa iin paloma. Tan tsaá tsi siqui ra. ¹⁷ Tacan tan cahan iin ndusu ityi andivi, tan catyí tsi tyehen:

—Ra ihya cuví Sehe yu, tan cuñí xaan yu tsi ra. Tan si# xaan cuñí yu tsihin ra —catyí ndusu can.

4

*Nu nducu kuhva nu ña vaha tsi ra Jesús
(Mr. 1.12-13; Lc. 4.1-13)*

¹ Tacan tan tsindaca Tatyí Ii Nyoo tsi ra Jesús iin nu tsiqui, tyin cua nducu kuhva nu ña vaha tsi ra.

² Tsiicoꝝ nyitya ra uvi xico nduvi tan uvi xico tsacuaa. Tsa yahā can tan quitsi socó tsi ra. ³ Tacan tan natuhvā nu ña vaha nu nyaá ra, tyin cuñi nu nducu cuhva nu tsi ra. Tan catyí nu tsihin ra:

—Tatun Sehe Nyoo cuví tsi un, cahān tsihin yuu ihya, na nanduvi tsi paan —catyí nu ña vaha tsihin ra Jesús.

⁴ Maa tyin ra Jesús nacahān ra tan catyí ra:

—Tuhun Nyoo tsa nyaá nu tutu catyí tsi tyin: “Ña maa ñi tsihin tsa catsi nyivi tan coonyito ñi, tyin coonyito ñi tsihin tandihi tuhun caahán Nyoo” —catyí ra Jesús tsihin nu ña vaha.

⁵ Tacan tan quihin nu ña vaha tsi ra. Tan cuahán ra tsihin nu nda ñuu ii Jerusalén. Tan jandaā nu tsi ra jiñi vehe ñuhu cahnu. ⁶ Tan catyí nu tsihin ra:

—Tatun Sehe Nyoo cuví tsi un, ndava nu nyaá un nu sucun ihya nda cuanda nu ñuhu. Tyin catyí tsi nuu tutu Nyoo tyehen:

Nyoo cua tava tyiñu ra tsi ángel naha ra, cua jaha cuenda ra naha tsi un. Cua janahndi ra naha tsi un, tan ña cua nañi tsaha un nuu yuu.

⁷ Tan nacahān ra Jesús tan catyí ra:

—Tan juvin ñi catyí tuhun Nyoo: “Ña nducu cuhva un tsi Nyoo un” —catyí ra Jesús tsihin nu ña vaha.

⁸ Tacan tan quihin nu ña vaha tsi ra inga tsaha, tan cuahán ra tsihin nu iin jiñi yucu sucun. Tan janahā nu tandihi tsa cahnu cuví nu ndacá ñaha rey tan ra cumí tyiñu naha ra tsi nyivi iyó nu ñuhu ñayivi. ⁹ Tan catyí nu tsihin ra:

—Yuhu cuhva yu tandihi maa tsa janahā yu tsi un, tatun yooho tan cuiñi tsiti un nuu yu tan jacahnu un tsi yu.

¹⁰ Tacan tan nacahān ra Jesús tan catyí ra tsihin nu:

—Cuaahan, cuihna. Tyin nyaá tuhun Nyoo catyí: “Jacahnu tsi intuhun ñi maa Jutu Nyoo, tan jaha tyiñu tyiñu ra.”

¹¹ Tacan tan cuahán nu ña vaha, tan ndoo ra Jesús. Tan tsaā ángel tan jatyinyee ra naha tsi ra.

Nu quitsahā caahán ra Jesús tuhun Nyoo tsihin nyivi tsa iyó ñuu tsa cayucú Galilea

(Mr. 1.14-15; Lc. 4.14-15)

¹² Quivi tsa tsito ra Jesús tyin ra Juan nyii ra vehe caa, cuahán ra nda Galilea.

¹³ Maa tyin ña ndoo ra ñuu Nazaret, nu tsahnu ra. Cuahán ra cua coo ra nda ñuu Capernaum, iin ñuu tsa canyí yatin ñi yuhu miñi, nu ñuhu ra Neftalí yatin yuhu ra Zabulón. ¹⁴ Tacan tan cundaā tsa cahān ra Isaías, ra cuví ndusu yuhu Nyoo, tahān tsanaha. Tan catyí ra:

¹⁵ Ñuhu ra Zabulón tan ñuhu ra Neftalí tsa cayucú yuhu miñi inga tsiyo yutya cahnu Jordán, tsa cuví Galilea nu iyó nyivi tsa ñavin nyivi Israel cuví.

¹⁶ Nyivi iyó nu naa, ñi iyó nu iyó tixahñu tuhun tsihi, nyehé ñi iin ñuhu nditsin tsa jandunditsin nu yucu ñi, catyí ra Isaías.

¹⁷ Nda cuanda quivi can, tan quitsahā caahán ra Jesús tuhun Nyoo tsihin nyivi, tan catyí ra tsihin ñi:

—Ndu uvi iñi ndo cuatyí ndo tyin tsa cuñi tsa quivi cundaca ñaha Nyoo tsi ndo —catyí ra Jesús tsihin nyivi.

Nu canā ra Jesús tsi cumi taahan ra tsa tñin tyaca

(Mr. 1.16-20; Lc. 5.1-11)

¹⁸ Ra Jesús tsicá ra yuhu miñi tsa nañi Nduitya Ñuhu Galilea. Tan nyehe ra tsi uvi taahan ra tsihin yañi ra, ra Simón tsa nañi tucu Pedro, tan ra Andrés. Ra tñn tyaca cuví ra naha. Tan cañi ra naha traya ra naha nu ndutyá. ¹⁹ Tacan tan catyi ra Jesús tsihin nduvi taahan ra naha:

—Naha ndo, quitsi nyicun ndo tsi yu. Tan yuhu cua jatyinyee tsi ndo tyin tumaa tsa tñn ndo tyaca, tacan cua ñihi ndo nyivi cua cuví nyivi Nyoo —catyi ra Jesús tsihin ra naha.

²⁰ Juvín ñi cuhva can nacoq ra naha traya can, tan cuahán ra naha tsihin ra Jesús.

²¹ Luxu ñi tsicá ra naha ityi nuu, tan nyehe ra Jesús tsi inga uvi ca ra tsihin yañi ra: ra Jacobo tan ra Juan. Sehe ra Zebedeo cuví tsi ra naha. Yucú ra naha tsitsi iin yutun ndoo tsihin jutu ra naha naquicú ra naha traya. Tan caná ra Jesús tsi ra naha. ²² Juvín ñi cuhva can tan nacoq ra naha tsi jutu ra naha tan yutun ndoo can, tan cuahán ra naha tsihin ra.

Nu cuaha xaan nyivi jacuahá ra Jesús
(Lc. 6.17-19)

²³ Cuahán ra Jesús tsicá ra tandihi ñuu cuenda Galilea jacuahá ra tsi nyivi tsitsi vehe ñuhu tan iin tan iin ñuu. Caahán ra tuhun vaha nácaa ndacá ñaha Nyoo tsi yo. Tan janduvahá ra tsi nyivi cuuhví tsihin tandihi ñi nuu cuehe tsa yihí tsi ñi. ²⁴ Tacan tan tsitó tandihi nyivi ñuu cuenda Siria tuhun ra Jesús. Tan tsindacá ñi tandihi nyivi cuuhví tsi ra: juhva ñi yihí tatyí ña vaha. Tan yihí ñi tsihi naaha ñi. Tan yihí ñi ndohó ñi cuehe xii. Tan janduvahá ra Jesús tsi tandihi ñi. ²⁵ Cuaha xaan nyivi nyicún tsi ra Jesús: nyivi iyó ñuu tsa cayucú Galilea, nyivi tsa quee nu utsi taahan ñuu tsa nañi Decápolis, nyivi iyó ñuu Jerusalén tan tandihi ca ñuu tsa cayucú Judea, tan nyivi iyó inga tsiyo yutya cahnu Jordán.

5

Nu cahan ra Jesús tsihin nyivi nu tsiqui
(Lc. 6.20-23)

¹ Nyehe ra Jesús tyin cuaha xaan nyivi, tan ndaa ra iin nuu yucu. Tan tsicunyaá ra ican. Tacan tan nyivi tsicá tsihin ra, tsinunduví ñi tsi ra. ² Tacan tan quitsahá jacuahá ra tsi ñi tan catyi ra:

³ Nasocó Nyoo tsi tandihi nyivi tsa tsitó tyin tsiñi ñuhu ra tsi ñi, tan tsa cuenda ñi cuví nu ndacá ñaha ra.

⁴ Tan tandihi nyivi tsa cuihya cuñi tsa cuenda cuatyí ñi, nasocó Nyoo tsi ñi tan ña cua coo ca ñi tucuihya iñi.

⁵ Tan tandihi nyivi tsa ña cahnu jahá ñi tsi ñi, nasocó Nyoo tsi ñi, tan cua naquihin cuenda ñi ñuhu ñayivi tsa catyi Nyoo tyin cuhva ra tsi ñi.

⁶ Tan tandihi nyivi tsa cuñi xaan javaha cuhva catyi Nyoo, nasocó Nyoo tsi ñi, tan cua jatyinyee ra tsi ñi tan cua cuví javaha ñi cuhva cuñi maa ra.

⁷ Tan tandihi nyivi tsa cundaahví iñi tsi inga nyivi, nasocó Nyoo tsi ñi, tan cua cundaahví iñi ra tsi ñi.

⁸ Tan tandihi nyivi tsa janduvahá Nyoo añima, nasocó ra tsi ñi, tan cua nyehe ñi tsi ra.

⁹ Tan nyivi tsa nducú cuhva tsa coo vaha nyivi tsihin Nyoo tan tsihin inga nyivi, nasocó ra tsi ñi tan cua catyi ra tyin sehe ra cuví tsi ñi.

¹⁰ Tan tandihi nyivi tsa javahá cuhva cuñi Nyoo tan ndasi cuñi nyivi nyehe ñi tsi ñi, nasocó Nyoo tsi ñi, tan tsa cuenda ñi cuví nu ndacá ñaha ra. ¹¹ Nasocó

Nyoo tsi nyooho tsa caahán nyivi ndavaha ñi tsata, tan javahá ñi tsa uhvi tsi ndo, tan caahán ñi cuendu tsa ña nditsa síqui ndo tsa cuenda tsa tsinú iñi ndo tsi yu. ¹² Cusii iñi ndo tun tacan javahá nyivi tsihin ndo; sii cuñi ndo, tyin cahnu xaan tan sii xaan caá tsa cua ñihi ndo nda gloria. Tyin juvin ñi tacan javahá nyivi tsa ña vaha tsihin tandihi ra cuvı ndusu yuhu Nyoo tahañ tsanaha.

Tatun jandihı yo tsa tsinú iñi yo tsi Nyoo cuvı yo tumaa ñı tsa ndihı tsa uhva (Mr. 9.50; Lc. 14.34-35)

¹³ Nyooho tsa tsinú iñi tsi yu, tumaa ñı vaha cuvı ndo. Maa tyin tatun ñı, tan ndihı tsa uhva tsi, ña cua jandu uhva ca tsi tsa catsı yo. Ña vaha ca ñı can. Tacan tan javıta yo can, tan cuañi nyivi tsata can.

Tatun tyaá yahvi vaha yo tuhun caahán Nyoo, cuvı yo tumaa ñuhı tsa jandunditsın nu tsicá nyivi nu naa

¹⁴ Nyooho cuvı ndo tumaa ñuhı tsa jandunditsın nu tsicá nyivi. Iin ñuu tsa canyıi jiñi iin yucu, ña cua cuvı quihı xeehe tsi. ¹⁵ Ña tuhvá yo tyaá ñuhı tyuma, tan tyihı xeehe yo itsı tsitsı iin caja. Tyin tuhvá yo tyaá ñuhı tan tinyıı yo itsı iin nu sucun tyin tacan tan jandunditsın tsi nu yucú yo tsitsı vehe yo. ¹⁶ Tan tacan taahán tsi jandunditsın tucu nyooho tsihin ñuhı Nyoo tsa iyó añima ndo nu tsicá nyivi. Tacan tan nyehe ñi tsa vaha tsa javahá ndo, tan jacahnu ñi tsi Jutu yo Nyoo, ra nyaá gloria.

Nu jacuahá ra Jesús tyin ñiñi xaan javaha yo tandihı tuhun tsa tsahá Nyoo tsi yo tan jacuahá yo itsı tsi nyivi

¹⁷ Ña cuñi ndo tyin yuhu vatsı janaa yu ley tsa tsahá Nyoo tsi ra Moisés tyin tyaá ra. Tan ndi ña vatsı janaa yu tuhun tsa tyaá tandihı ra cuvı ndusu yuhu Nyoo tahañ tsanaha. Ñavin tyiñu can vatsı yu. Yuhu vatsı yu vatsı tyaá yahvi yu tsa caahán ley can, tan catyı tuhun yu tsihin ndo náa cuñi tsi catyı ley can. ¹⁸ Tsa nditsa catyı yu tsihin ndo tyin tsitsı tsa ndi iyó ñuhu ñayıvi tan andıvi, ña cua naa ndi luxu ley tsa tyaá ra Moisés tyin tandihı maa tsa tyaá ra naha tan cua cundaa tsi. ¹⁹ Yacan cuenda, ra tsa ña tyaá yahvi cuhva catyı Nyoo, vasu iin tsa luhlu ñi; tan janahá ra tsi nyivi na javaha ñi tacan, luxu cuii ñi cua cuvı ra nu ndacá ñaha Nyoo. Maa tyin ra tsa tyaá yahvi tandihı, tan janahá ra tsi inga nyivi, cahnu xaan cua cuvı ra nu ndacá ñaha Nyoo. ²⁰ Catyı yu tsihin ndo tyin tun ña tyaá yahvi vaha ca ndo tsi Nyoo tan ñavin ca tumaa javahá ra cuvı maestro cuenda ley vehe ñuhu naha ra, tan ra cuvı fariseo naha ra, ña cuvı quihı ndo nu ndacá ñaha Nyoo.

Nu caahán ra Jesús tsihin yo tyin ña taahán tsi cahan yo tsi nyivi

²¹ Nyooho tsa cuaha tsaha tsiñi ndo tsa catyı Nyoo tsihin nyivi tsicoq tahañ tsanaha. Catyı ra: “Ña cahñi ndo tsi nyivi, tyin tatun cahñi ndo nyivi, taahán tsi tsa cutuñi ndo.” ²² Maa tyin yuhu, catyı yu tsihin ndo, tyin vasu tsa cuxaán ñi ndo tsi iin nyivi, vasu tsa caahán nyaa ñi ndo tsi ñi, taahán tsi tsa cutuñi ndo nu ra cumi tyiñu. Tan tatun catyı ndo tyin soho xaan caá ñi, taahán tsi cahun ndo anyaya tsa cuenda cuatyı can.

²³ “Tan yacan cuenda quıvi cuahán un vehe ñuhu, tan ndahá un tsa cua jamañi un tsi Nyoo, tan nducuhún iñi un tyin iyó tsa javahá un tsi yañi un, ²⁴ ñacoo tsa cuahán tsihin un ityi nu altar vehe ñuhu. Tan cahun jihna un ndacan un tucahnu iñi tsi yañi un. Tacan tan cahun un nda vehe ñuhu inga tsaha, tan cuhva cuenda un tsa cua jamañi un tsi Nyoo.

²⁵ Tatum iin ra tsicán cuatyí tsaha un, tan cuahán un tsihin ra nda nu nyaá ra cumí tyiñu, nducu cuhva cahan un tsihin ra tyin tacan tan ña cundaca ra tsi un nu nyaá ra cumí tyiñu, tyin ra cumí tyiñu can cua nacuhva cuenda ra tsi un tsi ra juez. Tan ra juez can cua nacuhva cuenda ra tsi un tsi ra vitya naha ra. Tan ra vitya can cua tyihi ra naha tsi un vehe caa. ²⁶ Tan tsa nditsa catyí yu tsihin un tyin tun ña javaha un tacan ña cua tava ra naha tsi un vehe caa tun ña cua tyahví un tandíhi xuhun tsa cua ndacan ra naha.

Nu caahán ra Jesús tyin ndi tsa tsicá iñi yo tsa coo inga ñaha, o inga rayí tsi yo, tan ña vaha

²⁷ Nyooho tsa tsiñi ndo tyin catyí Nyoo tahañ tsanaha tyin nyooho tsa iyó ñasihi, ña cua coo inga ñaha tsi ndo, tan ndi ñaha tsa iyó yí tan ña taahán tsi coo inga rayí tsi ña. ²⁸ Maa tyin yuhu catyí yu tsihin ndo, nyooho tsa nyehé iin ñaha tan cuñi ndo coo ndo tsihin ña, tsa tsicoo cuatyí ndo.

²⁹ Tatum tinuu cuaha un janacavá tsi un tsitsi cuatyí, vaha taxin ca tava un tinuu un tan javita un can. Tyin vaha ca quihví un nu ndacá ñaha Nyoo tsihin intuhun ñi tinuu un, tan ñavin ca tsa cuhun un anyaya tsihin nduvi taahan tsi. ³⁰ O tatum iin ndaha un janacavá tsi un tsitsi cuatyí, vaha taxin ca cahnya un ndaha un tan javita un can. Tyin vaha ca tsa quihví un nu ndacá ñaha Nyoo tsihin tsa lundu ndaha un, tan ñavin ca tsa naní un tan cuhun un anyaya.

Nu caahán ra Jesús tyin ña vaha tsa nacoo ihñi rayí tsi ñasihi ra (Mt. 19.9; Mr. 10.11-12; Lc. 16.18)

³¹ Tan juvin ñi catyí Nyoo tsihin nyivi tsicoo tahañ tsanaha tyin yóo ra nacoo ihñi ñasihi ra, cuñi tsi tsa caní ra tutu tsa tindaha ra tsihin ña. ³² Maa tyin catyí yu tsihin ndo tyin nduve ndatu iyó tsi rayí tsa nacoo ra ñasihi ra tatun ña quituví ña tsihin inga rayí. Tyin tatun nacoo ra tsi ña, tan ñavin tsa cuenda cuatyí can, cua coo cuatyí ra nuu Nyoo. Tan tatun quihin ña inga rayí ra cua coo ndíhi cuatyí ña. Tan tacan ra tsa cua quihin tsi ña cua coo ndíhi cuatyí ra.

Ña cahan yo “naha Nyoo maa”

³³ Tan tsiñi ndíhi ndo, tyin catyí tucu Nyoo tsihin nyivi tsicoo tahañ tsanaha: “Tatum catyí ndo ‘naha Nyoo maa’ tyin cua javaha ndo iin tsa cua javaha ndo nuu ra, taahán tsi tsa javaha ndo can tan ña jandavi ñaha ndo.”

³⁴ Maa tyin yuhu catyí yu tsihin ndo tyin ña cahan ndo “naha Nyoo maa”. Tan ña cahan ndo tuhun andívi, tyin yacan cuví nu nyaá Nyoo. ³⁵ Tan ndi tuhun ñuhu ñayívi ihya ña cahan ndo, tyin ihya cuví nu tsañi Nyoo. Tan ndi ña cahan ndo tuhun ñuu Jerusalén, tyin ican cuví ñuu maa Nyoo tsa cuví ra Rey cahnu ca. ³⁶ Tan ndi ña cahan ndo tuhun jiñi ndo, tyin ña cuví janducuitsin ndo tan ndi tsa jandutuun ndo ndi intuhun ixi jiñi ndo. ³⁷ Vaha ca cahan ndo iin ndaha ñi tun nditsa o tun ña nditsa tsa caahán ndo. Tyin tsa catyí ndo “naha Nyoo maa” nu ña vaha jacahán tsi ndo tsa cahan ndo tacan.

Nu caahán ra Jesús tyin tatun javahá nyivi tsa ña vaha tsihin yo, na javaha yo tsa vaha tsihin ñi

(Lc. 6.29-30)

³⁸ Tan tsiñi tucu ndo tsa catyí Nyoo tahañ tsanaha: “Tatum cañi nyivi tsi ndo, tan tavá ñi iin nuhu ndo, o iin tinuu ndo, taahán tsi tyin javaha ndíhi ra cumí tyiñu tacan tsihin ñi, tumaa tsa javahá ñi tsihin ndo.” ³⁹ Maa tyin yuhu catyí yu tsihin ndo, tyin ña javaha ndo tsa ña vaha tsa javahá nyivi xaan cuñi nyehe tsi ndo. Tyin tun yóo cañi iin tsiyo nuu ndo, taahán tsi tsa cuhva ndíhi

ndo inga tsiyo na cañi ndihí ñi, tan ña cuxaan ndo tsi ñi. ⁴⁰ O tatun tsicán ñi cuatyí tsaha ndo, tan cuñí ñi quihin nyaa ñi iin camisa ndo. Taahán tsi cuhva ndihí ndo chamarra ndo tsi ñi tan ña cua cuxaan ndo tsi ñi. ⁴¹ O tatun yóo cuñí cundaca ndo ndaha tyiñu ñi iin kilómetro, taahán tsi cundaca ndo can uvi kilómetro. ⁴² Tatun yóo nyívi tsicán tumañi iñi tsi ndo, cuhva ndo tsa nducu ñi. Ña catyi ndo tyin ña javaha ndo tumañi iñi can tsi ñi.

Na cuñi yo tsi nyívi xaan iñi tsi yo
(Lc. 6.27-28, 32-36)

⁴³ Tan tsiñi tucu ndo tyin catyi Nyoo tahán tsanaha: “cuñi ndo tsi ra vaha iñi tsi ndo. Tan xaan cuñi ndo nyehe ndo tsi ra xaan iñi tsi ndo.” ⁴⁴ Maa tyin yuhu catyi yu tsihin ndo, cuñi ndo tsi nyívi xaan iñi tsi ndo. Tan javaha ndo tsa vaha tsihin nyívi caahán tsi ndo, tan tsi nyívi ña cuñí nyehe tsi ndo. Tan ndacan tahvi ndo tsi Nyoo tsa cuenda nyívi tsa caahán nyaa tsi ndo tan tsa cuenda ñi tsa jacuvi tsa uhvi tsi ndo. ⁴⁵ Tatun javahá ndo tacan, cuví ndo sehe Jutu yo ra nyaá gloria. Tyin maa ra jacaná ra ñicanyii, tan jacuún ra savi nuu tyiñu jahá nyívi vaha tan nyívi ña vaha. ⁴⁶ Tatun nyooho tan cuñí ndo tsi nyívi vaha iñi tsi ndo tan ndasi cuñí ndo nyehe ndo tsi nyívi xaan iñi tsi ndo, nduve tsa vaha cua ñihí ndo. Tyin juvin ñi tacan javahá tucu ra tavá xuhun cuenda ra ndacá ñaha nda ñuu Roma. Tan cuñí maa ndo tyin quiñi xaan iyó ra can naha ra. ⁴⁷ Tatun tsahá ndo nacumi tsi maa ñi ra tsa vaha iñi tsi ndo tan ña jacuu ndo tacan tsihin inga ca nyívi, nduve tsa vaha xaan javahá ndo. Tyin juvin ñi tacan javahá nyívi tsa ña tsitó tuhun Nyoo. ⁴⁸ Tumaa Jutu yo tsa nyaá gloria cuiti xaan iyó ra, tacan taahán tsi coo tucu nyooho.

6

Nu caahán ra Jesús nácaa javaha yo tumañi iñi

¹ Jaha ndo cuenda tan ña nduyaa ndo náa tumañi iñi javaha ndo tsi nyívi. Tyin tatun javaha ndo tumañi iñi tyin nyehe nyívi, Jutu yo, ra nyaá gloria, nduve náa cua cuhva ra tsi ndo. ² Tun cua javaha ndo tumañi iñi, ña cua jacoto ndo tsi inga nyívi tyin javahá ndo tumañi iñi. Ña javaha ndo tumaa icá ra tsa jahá tyin vaha xaan ra tan tsicá nuu ra naha nuyahvi tan tsitsi vehe ñuhu. Javahá ra naha tumañi iñi tyin na catyi nyívi tyin vaha xaan iñi ra naha. Yacan ñi ñihí ra can naha ra, tan nduve náa cua cuhva Nyoo tsi ra naha. ³ Yacan cuenda quívi javahá ndo tumañi iñi tsi nyívi ndaahvi, ña jacoto ndo ndi tsi ra tsa vaha xaan ca iñi tsi ndo. ⁴ Xeehe ñi jatyinyee ndo tsi ñi ndaahvi. Tan Jutu yo Nyoo cua nyehe ra tsa javahá ndo tacan. Tan cua cuhva ra tsa vaha tsi ndo.

Nu caahán ra Jesús nácaa ndacan tahvi yo tsi Jutu yo Nyoo
(Lc. 11.2-4)

⁵ Tatun cua ndacan tahvi ndo tsi Nyoo, ña javaha ndo tumaa javahá ra tsa jahá tyin vaha xaan ra naha. Tyin ra ican naha ra tuhvá ra naha tsicán tahvi tsi Nyoo nu tui nyívi, tan nyecú nyityi ra naha tsitsi vehe ñuhu o ityi cahnu tyin taahán iñi ra naha tsa cahan nyívi tyin vaha xaan ra naha. Tsa nditsa catyi yu tsihin ndo tyin yacan ñi ñihí ra naha. ⁶ Maa tyin nyooho quívi tsa ndacan tahvi ndo tsi Nyoo, ña ndacan tahvi ndo tsi ra nu nyehe nyívi tsi ndo. Quihvi ndo tsitsi vehe ndo tan nacasi ndo yuvehe ndo tan ndacan tahvi ndo tsihin tsa ñi iñi añima ndo. Tan intuhun ñi maa Nyoo Jutu yo cua nyehe ra tsa javahá ndo tacan tyin nuu maa ra tsicán tahvi ndo, tan ñavin nuu nyívi. Tan cua cuhva ra tsa vaha tsi ndo.

7 Tatum cua cahan ndo tsihin Nyoo, ñavin juvin ñi tuhun tsa nduve yahvi nyaa cahan ndo. Tacan javahá nyívi tsa ña tsitó tsi Nyoo. Cuñí maa ñi tyin tacan tan cua tyaa soho Nyoo tsa caahán ñi, tyin cuaha xaan tsaha caahán ñi juvin ñi tuhun tsa tsa yahá cahan ñi. 8 Ña javaha ndo tacan. Tyin Nyoo tsa tsitó ra náa tsiñí ñuhu tsi ndo tsa ndi cumañi ca ndacan ndo tsi ra. 9 Yacan cuenda nyooho, tatum cua ndacan tahvi ndo tsi Nyoo, tyehen catyi ndo: Jutu Mañi ndi, tsa nyaá un gloria.

Jacahnú xaan ndi tsi un.

10 Na quitsi tsa ndaca ñaha un nu ñuhu ñayívi ihya, tan na javaha tandihí nyívi tandihí cuhva cuñí maa un, tumaa cuví nda gloria.

11 Cuhva tsa catsi ndi tahan tahan quívi.

12 Jaha tucahnu iñi tsi ndi náa tsa ña vaha javahá ndi, tumaa tsa jahá maa ndi tucahnu iñi tsi nyívi tsa javahá tsa ña vaha tsi ndi.

13 Ña cuhva un tsa nducu cuhva nu ña vaha tsi ndi, coto javaha ndi cuatyí nuu un. Tyin maa un cuví ra jacacú tsi ndi ndaha nu ña vaha.

Tan maa un cuví ra ndacá ñaha tsi ndi. Tan iyó tandihí tunyee iñi tsi un. Tan taahán tsi tyin jacahnu tandihí nyívi tsi maa ñi un tandihí maa quívi tan na ña cundihi tsi. Na cuví tsi tacan ñi.

Tyehen taahán tsi ndacan tahvi ndo tsi Nyoo.

14 Tyin tatum nyooho tan jahá ndo tucahnu iñi tsi nyívi tsa javahá tsa ña vaha tsi ndo, tacan tucu Jutu yo ra nyaá gloria, cua jaha ra tucahnu iñi tsi maa ndo. 15 Maa tyin tatum ña jaha ndo tucahnu iñi tsi nyívi tsa javahá tsa ña vaha tsi ndo, tacan tucu Jutu yo, ña cua jaha ra tucahnu iñi cuatyí maa ndo —catyi ra Jesús.

Tatum cua coo nyitya yo tyin nanducú yo tsi Nyoo, ña cua jacoto yo tsi inga ca nyívi

16 Tan catyi tucu ra Jesús tsihin nyívi:

—Quívi tsa iyó nyitya ndo tyin nanducú ndo tsi Nyoo, ña cuihya nyehe ndo, tumaa javahá nyívi jahá tyin vaha xaan ñi. Tyin cahyí ñi nyaa nuu ñi tyin cuñí ñi tsa nyehe nyívi tyin iyó nyitya ñi tan nanducú ñi tsi Nyoo. Catyi yu tsihin ndo tyin yacan ñi ñihí ñi. Nduve ca naa cua cuhva Nyoo tsi ñi. 17 Maa tyin nyooho quívi tsa iyó nyitya ndo tyin nanducú ndo tsi Nyoo, nacatya ndo nuu ndo. Tan tyihí ndo cuca jiñi ndo. 18 Tacan tan ña cua tuvi iñi nyívi tyin iyó nyitya ndo tan nanducú ndo tsi Nyoo. Tyin intuhun ñi maa Nyoo nyehé tsa javahá ndo tsa xeehe ñi. Tan cuaha tsa vaha cua cuhva ra tsi ndo.

Tsa vaha tsa iyó nda gloria

(Lc. 12.33-34)

19 Ña jacaya ndo tsa cuca tsa iyó nu ñuhu ñayívi ihya. Tyin coto tiví tsi jaha tiquixin o jaha cuxi. O cuví quihvi ñasuhu, tan suhu nu tandihí tsa jacaya ndo. 20 Vaha ca jacaya ndo tsa cuca tsa iyó nda gloria. Tyin ña cua cundihi tsi ndacan. Tyin ña cuví tiví tsi ndacan, tan nduve quiti jativí itsi, ndi nduve ñasuhu. 21 Tyin nu natyihí vaha ndo tsa cuca, ican cua cunyaa ndihí añima ndo.

Nu caahán ra Jesús tyin na jaha yo cuenda ñuhu nditsin tsa tyihí ra añima yo

(Lc. 11.34-36)

22 Tinuu ndo cuví ñuhu nditsin tsi ndo. Tatum vaha tinuu ndo, tanñi cuñu ñuhu ndo tan iyó ñuhu nditsin. [Tan tuhun ihya cuñí tsi catyi tyin tatum iyó

ñuhu nditsin Nyoo aña ndo cuví ndo nyívi vaha.] ²³ Maa tyin tatun ña vaha tinuu ndo, tandihi cuñu ñuhu ndo tan nyíi tsi nu naa. Tan tacan tucu tatun nduve ñuhu Nyoo iyó aña ndo, [cuví ndo tumaa iin ra cuaa. Nu naa cuahán ndo tan ña cuví nyehé ndo ityi vaha tsa cuahán nu nyaá Nyoo].

Nu caahán ra Jesús tyin ña cuvi tyaa yahvi yo tsi Nyoo tatun cuñi xaan ca yo xuhun

(Lc. 16.13)

²⁴ Tin musu ña cuvi coo uvi tsitoho ra. Tyin musu can cuñi ca ra tsi iin ra tan ñavin ca tsi inga ra. Tan tyaá yahvi ra tsi iin ra, tan ñavin ca tsi inga ra. Tan tacan tucu nyooho, ña cuví cuñi ndo tsi Nyoo, tan cuñi tucu ndo xuhun.

Nu caahán ra Jesús tyin ña caca xaan iñi yo náa ndihi tsa tsiñi ñuhu tsi yo
(Lc. 12.22-31)

²⁵ Yacan cuenda catyí yu tsihin ndo, tyin ña çaca xaan iñi ndo nácaa ñihi ndo tsa catsi ndo tan tsa coho ndo. Ndi ña çaca iñi ndo nácaa cua ñihi ndo jahma ndo. Tyin nu Nyoo nyaá yahvi ca ñayívi tsa iyó yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca jahma yo. [Tyin maa ra tsahá ra ñayívi iyó yo. Tan ña yíi cuhva ra inga tsa tsiñi ñuhu tsi yo]. ²⁶ Nyehé ndo cuhva iyó saa. Ña tatsí ti itu. Tan ña jahá tyiñu ti. Tan ndi ña tyihí vaha ti tsa catsi ti. Maa tyin tsatsí ti tyin Jutu yo Nyoo ra nyaá gloria tsahá ra tsa catsi ti naha ti. Tan nuu Nyoo cahnu ca cuví nyooho tan ñavin ca saa can naha ti. ²⁷ Tan vasu ndi maa tsicá xaan iñi ndo maa tyin ña cua cuvi jandusucun ca ndo ndi luxu ca tsi ndo.

²⁸ Tan tatun ndi luxu can ña cuví tsi ndo, ¿nácaa tsa tsicá xaan iñi ndo tsa cuenda jahma ndo? Nyehé ndo nácaa iyó yutun ita tsitsi huhu, tyin ña jahá tyiñu tun tan ndi ña tavi tun yuhva. ²⁹ Maa tyin catyí yu tsihin ndo tyin ndi ra cuví rey Salomón sihin tandihi tsa cuca ra, tan ña tsinditsi ra jahma sii ca caá tan ñavin ca tsa jacunditsí Nyoo tsi yutun ita can. ³⁰ Tatun tacan ñi jacunditsí Nyoo tsi yutun ita tsa iyó tsitsi huhu vityin, tan tyaan cua cuvi tun nducu tan cayu tun. ¿A ña cua jatyinyee cuaha ca ra tsi ndo? Tyin nyooho cahnu ca cuví ndo nuu ra tan ñavin ca yutun ita can. Maa tyin maa ndo ña tsinú vaha iñi ndo tsi ra. ³¹ Yacan cuenda ña cua caca xaan iñi yo tan catyí yo: “¿Náa cua catsi yo, o náa cua coho yo, o nácaa cua ñihi yo jahma cunditsí yo?” ³² Tyin nyívi tsa ña tsitó tsi Nyoo tsicá xaan iñi ñi yacan. Maa tyin nyooho ña çaca iñi ndo yacan tyin iyó Jutu yo Nyoo, ra nyaá gloria. Tan tsitó ra náa ndihi tsa tsiñi ñuhu tsi ndo. ³³ Yacan cuenda, çaca iñi ndo maa ñi maa tuhun Nyoo. Tan nanducu jihna ndo nácaa nacuhva cuenda ndo tsi ndo tsi ra na cundaca ñaha ra tsi ndo, tan na coo tsa vaha ra tsi ndo. Tyin tacan tan cua ñihi ndo tandihi tsa tsiñi ñuhu tsi ndo. ³⁴ Jahá cuenda Nyoo tsi ndo vityin tan ityaan. Yacan ña caca iñi ndo tsa tsiñi ñuhu tsi ndo ityaan. Çaca iñi ndo tan nyehé ndo nácaa yahá ndo quívi vityin jahá Nyoo.

7

Ña cahan yo tsa caá inga nyívi
(Lc. 6.37-38, 41-42)

¹ Ña cahan ndo tsa caá inga nyívi, tacan tan Nyoo ña cua cahan ra tsa caá ndo. ² Tyin tumaa caahán ndo tsa caá inga nyívi, tacan cua javaha Nyoo tsihin ndo. Tan tumaa tsa javahá ndo tsihin inga nyívi, juvin ñi tacan cua javaha Nyoo tsihin ndo. ³ ¿Nacaa tyin nyehé un tsahan luhlu tsa nyíi tinuu yañi un, tan ña jahá un cuenda yutun cahnu tsa nyíi tinuu maa un? ⁴ Tatun tinuu

maa un nyíi iin yutun cahnu, ¿nácaa cuví catyi un tsihin ra yañi un: “Ñaha, na tava yu tsahan luhlu tsa nyíi tinuu un”? ⁵ ¡Yooho tsa jahá tyin vaha xaan un! Tava jihna yutun cahnu tsa nyíi tinuu un. Tyin tacan tan cuví nyehe vaha un tsahan luhlu tsa cua tava un tinuu yañi un.

⁶ Ña jañihi ndo cahan ndo tuhun Nyoo tsihin nyivi ña cuñí coto tyin coto cañi ñi tsi ndo. Tyin cuví ñi tumaa ina tsa caán xaan tsi ndo, tan tumaa quini tsa tsacá tsaha iin ndaha tyiñu tsa yahvi nyaá, tyin caahán ñi tsa ndavaha ñi siqui tuhun Nyoo.

Ña cujutsan yo ndacan yo tsa ndacan yo tsi Nyoo, tyin tacan tan cua cuhva ra tsi yo

(Lc. 11.9-13; 6.31)

⁷ Ndacan ndo tsa tsiñí ñuhu tsi ndo tsi Nyoo. Tan cua cuhva ra tsi ndo. Nanducu ndo, tan cua nañihi ndo. Cañi ndaha ndo yuvehe, tan cua nuña. ⁸ Tyin tandihi nyivi tsa tsicán tsi ra, cua cuhva ra tsa tsicán ñi. Tan ra tsa cua nanducu, cua nañihi ra. Tan ra tsa cañi ndaha yuvehe, cua nuña yuvehe nuu ra.

⁹ Tacan tucu nyooho tsihin sehe ndo. Tsahá ndo tsa vaha itsi naha tsi. Tun tsicán tsi paan, ¿a cua cuhva ndo iin yuu itsi? ¹⁰ O tatun tsicán tsi tyaca, ¿a cua cuhva ndo iin coo itsi? ¹¹ Nyooho vasu ndi maa quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu yo, ra nyaá gloria, cuaha ca tsa vaha cua cuhva ra tsi ndo tatun ndacan ndo tsi ra.

¹² Tumaa cuñí ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi. Tyin tacan caahán ley tsa tsaha Nyoo tsi ra Moisés tan tacan tucu nyaá nu tandihi libru tsa tyaa ra cuví ndusu yuhu Nyoo tahan tsanaha.

Yuvehe tihin tan ityi cuiñi tsa cuahán nu nyaá Nyoo

(Lc. 13.24)

¹³ Nducu ndo cuhva quihvi ndo yuvehe tihin. Tyin quiihin yuvehe, tan quiihin ityi tsa cuahán nda nu cunaa nyivi anyaya. Tan cuaha xaan nyivi cuahán ityi can. ¹⁴ Maa tyin tihin yuvehe tan cuiñi ityi tsa cuahán nu cuahán nyivi tsa ñihí ñayivi nyito coo ñi. Maa tyin ña cuaha nyivi nañihi ityi can.

Tsihin tsa javahá nyivi, tan nacotó yo tatun nyivi vaha, a nyivi ña vaha cuví ñi

(Lc. 6.43-44)

¹⁵ Jaha ndo cuenda tsi ndo tsihin ra vatya naha ra. Tyin catyi ra naha tyin ndusu yuhu Nyoo cuví ra naha, maa tyin ña nditsa. Tyin vatsí ra naha tumaa mbee nu yucú ndo, jahá ra naha tyin ra vaha cuví ra naha. Maa tyin tumaa quití xaan cuví ra naha. ¹⁶ Nyooho cuví nacoto ndo tsi ra naha tsihin tsa javahá ra naha. Tumaa iin yutun ña vaha ña tsahá tun tsiti vaha, tacan cuví ra naha. Tyin iin tinyata ña cua cuhva tun mangu, tan ndi iñu nduhva ña cuví cuhva tsi yucu vixi. ¹⁷ Tan tacan tucu tandihi yutun vaha. Tsahá tun tsiti vaha. Tan tandihi yutun ña vaha, tsahá tun tsiti ña vaha. ¹⁸ Tyin yutun vaha, ña cuví cuhva tun tsiti ña vaha. Tan ndi yutun ña vaha ña cuví cuhva tun tsiti vaha. ¹⁹ Tan tandihi yutun tsa ña tsahá tsiti vaha, cahnya yo tsi tun. Tan cayu tun. ²⁰ Tan tacan tsihin tsa javahá nyivi, cuví nacoto ndo tsi ñi tatun nyivi vaha o nyivi ña vaha cuví ñi.

Nu catyi ra Jesús tyin ña tandihi nyivi tan cua quihvi ñi nu ndacá ñaha Nyoo
(Lc. 13.25-27)

²¹ Ña tandihí nyívi tsa catyí tsihin yu: “Jutu Mañi yu, Jutu Mañi yu”, cua quíhvi ñi nu ndacá ñaha Nyoo nda gloria. Maa tyin nyívi tsa javahá tsa catyí maa Nyoo Jutu yu, juvin ñi can cua quíhvi nu ndacá ñaha ra. ²² Quiví tatsi tuñi Nyoo tsi nyívi, cuaaha xaan ñi cua catyí ñi tsihin yu tyehen: “Jutu Mañi yu, nyuhu cahan ndi tuhun cun tsihin nyívi. Tan tsihin sívi un tava ndi tatyí ña vaha tsa yihí tsi ñi. Tan cuaaha xaan tsa iyo javahá ndi tsihin sívi un”, cua catyí ñi tsihin yu. ²³ Tacan tan yuhu cua catyí yu tsihin ñi: “Ña nacotó yu tsi nyooho. Çatsiyo nyaha ndo nu nyaá yu tandihí nyooho tsa javahá maa maa ñi tsa ña vaha”, cua catyí yu tsihin ñi.

Nu caahán ra Jesús nácaa cua cacu nyívi tsa tyaá yahvi tuhun caahán ra, tan nyívi tsa ña tyaá yahvi tsa caahán ra, ña cua cacu ñi
(Lc. 6.47-49; Mr. 1.22)

²⁴ Tacan catyí yu tsihin ndo, tyin nyívi tsa tsiñí tsa caahán yu tan javahá ñi cuhva cuñi yu, cuví ñi tumaa iin ra tsiñi tuñi tsa janduvita tyihyo tsaha vehe ra tsata cava. ²⁵ Tan quitsahá cuún ñihi savi. Tan cuaaha xaan ndutya ñuhu yahá tsata vehe can. Tan ñihi xaan quitsahá yihí tatyí. Maa tyin ña cuví janduva tsi vehe can, tyin vaha sama tyihyo tsaha tsi tsata cava. ²⁶ Maa tyin nyívi tsa tsiñí tuhun caahán yu, tan ña javahá ñi cuhva cuñi yu; cuví ñi tumaa iin ra soho, ra tsa javahá vehe nu nyíti. ²⁷ Tan quitsahá cuún ñihi savi. Tan cuaaha xaan ndutya ñuhu yahá nu nyaá vehe ra. Tan ñihi xaan yihí tatyí. Tan vehe can iin yaha cuii ñi nduva tsi tan cunaá tsi —catyí ra Jesús tsihin ñi tsa nyicún tsi ra.

²⁸ Cuhva tsa ndihí cahan ra Jesús tsihin ñi, iyo xaan cuñi ñi tsihin tsa caahán ra, ²⁹ tyin caahán ra tumaa caahán iin ra ndacá ñaha. Tan ña caahán ra tumaa caahán ra maestro cuenda ley vehe ñuhu naha ra.

8

Nu janduvahá ra Jesús tsi iin ra ndohó cuehe tyaahyú
(Mr. 1.40-45; Lc. 5.12-16)

¹ Cuhva tsa nuu ra Jesús yucu can, cuaaha xaan nyívi nyicún tsi ra. ² Tan tsaá iin ra ndohó cuehe tyaahyú, tan tsiicuíñi tsiiti ra nuu ra Jesús, tan catyí ra tsihin ra:

—Jutu Mañi yu, tatun yooho tan cuñi un, cuví janduvaha un tsi yu —catyí ra tsihin ra.

³ Tacan tan tyiso ndaha ra Jesús jiñi ra cuuhví can, tan catyí ra tsihin ra:

—Cuñi yu janduvaha yu tsi un. Cua nduvaha un vityin —catyí ra.

Tan iin yaha ñi nduvahá ra. ⁴ Tacan tan catyí ra Jesús tsihin ra:

—Jihna, coto ñahñi catyí tuhun un tsihin nyívi. Maa tyin cuaahan nu nyaá ra cuví jutu, tan janaha un tsi un tsi ra. Tan cuhva un tsa taahán tsi jamañi un nuu Nyoo tumaa catyí ley Nyoo tsa tyaá ra Moisés. Tan cua cuví tsi iin tsa ndaa tsi ra jutu can tan tsi nyívi tyin tsa nduvahá un.

Nu janduvahá ra Jesús tsi musu iin ra cuví capitán
(Lc. 7.1-10)

⁵ Quiví tsa tsaá ra Jesús ñuu Capernaum, iin ra cuví capitán, ra ñuu Roma, tsaá ra nu nyíi ra Jesús tan caahán ndaahvi ra tsihin ra, ⁶ tan catyí ra:

—Jutu Mañi yu, musu yu ñihi xaan cuuhví ra, canyí ra nu cama. Ña cuví nduvita ra tyin nduxij ra, tan yaha xaan cuhva cuñi ra.

⁷ Tan catyí ra Jesús tsihin ra:

—Cuhun maa yu tan cujanduvaha yu tsi ra —catyí ra tsihin ra.

⁸ Nacahan ra capitán can tan catyí ra:

—Jutu Mañi yu, ña cahnu cuví yu tan cuhun un yuvehe yu; tsihin tuhun cahán ñi un tan musu yu cua nduvaha ra. ⁹ Tyin juvin ñi iyó ra yihí ndaha tsi yu. Tan iyó andaru tsa yihí ndaha tucu maa yu. Tan tatun cua tava tyiñu yu tsi iin ra can, cua cuhun ra. Tan tatun cana yu tsi inga ra, cua quitsi ra. Tan tatun tava tyiñu yu tsi musu yu, cua javaha ra cuhva cuñi yu.

¹⁰ Tan tsa tsiñi ra Jesús tsa cahán ra can, tan iyo xaan cuñi ra. Tan catyí ra tsihin nyívi tsa nyicún tsi ra:

—Tsa nditsa catyí yu tsihin ndo, tyin ñaha ca nañihi yu iin ra Israel tsa tsinú xaan iñi tumaa tsinú iñi ra ihya. ¹¹ Tan catyí yu tsihin ndo tyin cuaha nyívi inga ñuu cua quitsi ityi nu caná ñicanyii, tan ityi nu tyisó ñicanyii, tan cua cunyecu ñi catsi ñi tsihin ra Abraham, ra Isaac tan ra Jacob nu ndacá ñaha Nyoo. ¹² Tan nyívi tsa taahán tsi cuhun gloriá, ña cua cuhun ñi, tyin cua cuhun ñi nu naa. Tan cua vacu tsaa ñi tan catsan ña cua cuví nuhu ñi tsa cuenda tsa xaan cuñi ñi tyin nyehe ñi tundoho —catyí ra Jesús tsihin nyívi nyicún tsi ra.

¹³ Tacan tan catyí ra tsihin ra capitán can:

—Çuaahan, tan na nduvaha musu un tsa cuenda tyin tsinú iñi un tsi yu —catyí ra Jesús tsihin ra capitán.

Tan juvin ñi cuhva can nduvahá musu ra.

Nu janduvahá ra Jesús tsi tyiso ra Pedro
(Mr. 1.29-31; Lc. 4.38-39)

¹⁴ Tsa yahá can, tan cuahán ra Jesús yuvehe ra Pedro. Tan nyehe ra tsi ña tyiso ra, canyii ña nu tsito tyin yihí cahñi tsi ña. ¹⁵ Tan tññ ra ndaha ña, tan iin yaha ñi quitá cahñi tsi ña. Tan nduvitá ña, tan quitsahá nanducú ña tsa catsi ra naha.

Nu cuaha xaan nyívi cuuhví janduvahá ra Jesús
(Mr. 1.32-34; Lc. 4.40-41)

¹⁶ Tan tsa cunaaha, cuaha xaan nyívi yihí tatyí ña vaha tsindacá nyívi tsi ra Jesús. Tan tsihin intuhun ñi tuhun cahán ra Jesús tan quitá tatyí ña vaha tsi ñi. Tan tandihí ñi cuuhví iin yaha ñi nduvahá ñi. ¹⁷ Tacan cuví tyin tacan tan cundaq tsa cahán Jutu Mañi yo tsihin yuhu ra Isaías, ra cuví ndusu yuhu ra tahán tsanaha. Tan catyí ra tyehen: “Maa ra quihñ ra cuehe tsa yihí tsi yo, tan quihñ nyaa ra tsa uhvi tsi yo.”

Nyívi tsa cuñi quihvi cuenda ra Jesús
(Lc. 9.57-62)

¹⁸ Tan tsa nyehe ra Jesús tyin cuaha xaan nyívi tsinú nduvi nu nyíi ra, catyí ra tsihin ra tsicá tsihin ra tyin cua yaha ra naha inga tsiyo miñi. ¹⁹ Tacan tan tsaq iin ra maestro cuenda ley vehe ñuhu tan catyí ra tsihin ra:

—Maestro, cuñi yu cunyicun yu tsi un tandihí ñi ityi nu cuahán un —catyí ra.

²⁰ Tan ra Jesús catyí ra tsihin ra:

—Ñacuii iyó vehe ti. Tan saa iyó taca ti. Maa tyin yuhu Rayii tsa quee nda gloria, nduve nu maa cunyanaa luxu jiñi yu iyó —catyí ra.

²¹ Inga ra tsa tsicá tsihin ra nacahan ra tsihin ra:

—Taa, cuhva na cuhun jihna yu cucutsi yu tsi jutu yu, —catyí ra.

²² Tan catyí ra Jesús tsihin ra:

—Ñaha yoocho quitsi nyicun un tsi yu. Tan nyívi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi —catyí ra.

Nu jacutaxín ra Jesús tatyí xaan nu miñi

(Mr. 4.35-41; Lc. 8.22-25)

²³ Tacan tan quihví ra tsitsi yutun ndoo tan ra tsicá tsihin ra cuahán ra naha tsihin ra. ²⁴ Tan ñihi xaan quitsahá yihí tatyí nu miñi can, tan cuaha xaan ndutya quihví tsitsi yutun ndoo ra naha. Maa tyin ra Jesús quixí ra. ²⁵ Tan ra tsicá tsihin ra jandotó ra naha tsi ra, tan catyí ra naha:

—¡Jutu Mañi yu, ¡acacu tsi yo, tyin cuñi cunaa yo!

²⁶ Tan catyí ra Jesús tsihin ra naha:

—¿Nacuenda yuuhví xaan ndo? ¡Nyooho tsa luxu xaan tsinú iñi tsi yu!
—catyí ra Jesús.

Tacan tan nduvitá ra tan cahan ra tsihin tatyí tan tsihin ndutya, tan cutaxín tsi. ²⁷ Tan iyo xaan cuñi ra naha tan catyí ra naha:

—¿Yóo ra cuví ra ihya? Tyin nda cuanda tatyí tan nda cuanda ndutya tan tyaá yahvi tsi ra —catyí ra naha.

Nu nduvahá uvi ra ñuu Gadara ra yihí tatyí ña vaha naha ra

(Mr. 5.1-20; Lc. 8.26-39)

²⁸ Tacan tan tsaá ra naha inga tsiyo miñi nda nu ñuhu Gadara. Tan tsaá uvi taahan ra yihí tatyí ña vaha. Tan quitá ra naha nu ñaña cumí sandu. Xaan xaan ra naha, tan yoñi maa cuví yaha ityi can. ²⁹ Tan caná tsaá ra naha, tan catyí ra naha:

—¿Náa cuñi un tsihin ndi, yooho Jesús Sehe Nyoo? ¿A vatsí un vatsí janyehe un tundoho tsi ndi tsa ndi cumañi ca tsaá quivi? —catyí ra naha jahá tatyí ña vaha can.

³⁰ Tan yatyin ñi can yucú cuaha quini tsatsí ti naha ti. ³¹ Tan catyí nu tatyí ña vaha can tsihin ra Jesús:

—Tatun cua tava un tsi ndi, cuhva tsa quihví ndi tsitsi quini can naha ti —catyí nu tatyí ña vaha can nahnu.

³² —Vaha. Quihvi ndo —catyí ra Jesús.

Tan quitá nu tatyí ña vaha can nahnu, tan quihví nahnu tsitsi tandihí quini tsa nyecú can. Tan tandihí quini can tsinu ti naha ti tan cucoyo ti naha ti iin xahva yuhu miñi can, tan tsihí ti naha ti tsihin ndutya can.

³³ Tan ra jahá cuenda tsi quini can, tsinú xaan ra naha cuahán ra naha tsitsi ñuu, tan nacatyí tuhun ra naha tandihí tsa cuví tsi ra tsa yihí tatyí ña vaha can naha ra. ³⁴ Tacan tan tandihí nyivi ñuu can, tsaahan ñi tsinyehé ñi tsi ra Jesús, tan cahan ndaahvi ñi tsihin ra na quita ra ñuu can.

9

Nu janduvahá ra Jesús tsi iin ra xii

(Mr. 2.1-12; Lc. 5.17-26)

¹ Tacan tan quihví ra Jesús tsitsi iin yutun ndoo tan yahá ra miñi, tan tsaá ra nda ñuu nu iyó ra. ² Nu nyii ra ican, tsindacá nyivi tsi iin ra cuuhví tsa ña cuví nacanda tyin nduxii ra, tan canyii ra nu tsito. Tan tsa nyehe ra Jesús tyin tsinú xaan iñi ñi tsi ra, quitsaha caahán ra tsihin ra cuuhví can:

—Jandu iin iñi un, sehe yu, tyin tsa tsicoo tucahnu iñi cuatyí un —catyí ra Jesús tsihin ra.

³ Tacan tan quitsahá tsicá iñi juhva ra maestro cuenda ley vehe ñuhu tsa yucú ican naha ra: “Ra ihya tsicoo cuatyí ra nu Nyoo tsihin tuhun caahán ra”, cuñi ra naha tsicá iñi ra naha.

⁴ Maa tyin ra Jesús tsitó ra náa tsicá iñi ra naha, tan catyí ra tsihin ra naha:

—¿Nacuenda tsicá iñi ndo tsa ña vaha? ⁵ Tyin ¿ndáa tsa yii ca catyí yo: a yii ca catyí yo: “Cuatyí un tsa yaha ndatsi”, o yii ca catyí yo: “Nduvita tan çaça un”? ⁶ Vityin cua janaha yu tsi ndo tyin yuhu Rayii tsa quee nda gloria, iyó ndatu tsi yu nu ñuhu ñayivi ihya tyin jaha yu tucahnu iñi cuatyí ndo —catyí ra Jesús.

Tacan tan catyí ra tsihin ra cuuhví can:

—Nduvita, naquihín tsito un tan cuanuhu nda yuvehe un —catyí ra.

⁷ Tacan tan nduvita ra tan cuanuhu ra nda yuvehe ra. ⁸ Tan nyivi tsa nyehe tsa cuví, nayuhví xaan ñi. Tan quitsaha jacahnú ñi tsi Nyoo tyin tsaha ra tunyee iñi tsi nyivi.

Nu cana ra Jesús tsi ra Mateo

(Mr. 2.13-17; Lc. 5.27-32)

⁹ Yaha can tan quita ra Jesús ican. Tan nyehe ra tsi iin ra tsa nañi Mateo, nyaá ra naquihín ra xuhun tsa tyahví nyivi Israel tsi ra ndacá ñaha. Tan catyí ra tsihin ra:

—Cohon tsihin yu.

Tacan tan nduvita ra Mateo tan cuahán ra tsihin ra Jesús.

¹⁰ Tacan tan cuví tsi iin tsaha, ra Jesús cuahán ra nda vehe ra Mateo, cua catsi ra ixta. Tan cuaha xaan ra tavá xuhun cuenda ra ndaca ñaha tsaa, tan tsihin inga ca ra iyó cuatyí naha ra. Tan tsinyecu ra naha iin ñi nu mesa tsihin ra Jesús tan tsihin ra tsicá tsihin ra. ¹¹ Tan tsa nyehe ra fariseo naha ra tyin nyaá ra Jesús tsihin ra iyó cuatyí naha ra, tan tsicá tuhun ra naha tsi ra tsicá tsihin ra, tan catyí ra naha tsihin ra naha:

—¿Nacuenda tyin tsatsí ra maestro ndo tsihin ra tavá xuhun naha ra tan ra iyó cuatyí naha ra? —catyí ra naha.

¹² Tsa tsiñi ra Jesús tsa caahán ra naha, tan catyí ra tsihin ra naha:

—Ña tsiñi ñuhu doctor tsi nyivi iyó vaha, ñi ña cuuhví. Maa tyin nyivi cuuhví tsiñi ñuhu doctor tsi ñi. ¹³ Cuaahan ndo tan cutuhva ndo cuhva catyí nu tutu Nyoo, nu catyí tsi tyehen: “Yuhu cuñi yu tsa cundaahvi iñi ndo tsi nyivi, tyin yacan cuví tsa ñiñi xaan ca tan ñavin ca tsa cahñi ndo quiti tan cuhva cuenda ndo tsi yu.” Yuhu ña vatsí yu jatyinyee yu tsi nyivi tsa tsicá iñi tyin vaha ñi, vatsí yu jatyinyee yu tsi nyivi tsitó tyin iyó cuatyí ñi, na ndu uvi iñi ñi cuatyí ñi.

Nu tsicá tuhun nyivi tsi ra Jesús tatun taahán tsi tsa coo nyitya ñi

(Mr. 2.18-20; Lc. 5.33-35)

¹⁴ Tacan tan ra nyicún tsi ra Juan, ra jacoondutya tsi nyivi, natuhvá ra naha nu nyaá ra Jesús tan tsicá tuhun ra naha tsi ra tan catyí ra naha:

—¿Nacuví tyin nyuhu tan ra cuví fariseo naha ra, tuhvá ndi tsicoó nyitya tan ra tsicá tsihin yooho ña tuhvá ra naha coo nyitya?

¹⁵ Tan nacahan ra Jesús tan catyí ra:

—¿A cuví cunyecu cuiihya nyivi yucú vico tindaha tun nyii ra cua tindaha tsihin ñi? Maa tyin coo quivi cua quita ra tindaha ican nu yucú ñi. Tacan tan cua coo ñi tucuihya iñi tan cua coo nyitya ñi.

Nu caahán ra Jesús tyin ña nacatsí tahan tuhun tsahnu tsa iyó nyivi tsihin tuhun tsaa tsa jacuahá ra tsi ñi

(Mr. 2.21-22; Lc. 5.36-39)

¹⁶ Ña tuhvá nyivi naquicú iin jahma tuuhu tsihin iin jahma tsaa, tyin cua nandiyi nu naquicú ñi tsihin tsa tsaa can, tan cua tyahnya tsi inga tsaha.

¹⁷ Tan tacan tucu, ña cuví tyihí nyivi vinu tsaa tsitsi ñi saahnu tyin tatun

tacan javaha ñi, cua tyahnya ñi can, tan cua tiví vinu can tan cua tiví ndihi tucu ñi can. Yacan cuenda taahán tsi tyihi yo vinu tsa tsitsi ñi tsa. Tyin tacan tan ña tyahnya ñi can tan ndi vinu can ña tiví tsi.

*Nu nduvaha ñaha sehe ra Jairo tan ñaha tsa tñin jahma ra Jesús
(Mr. 5.21-43; Lc. 8.40-56)*

¹⁸ Tsitsi tsa caahán ra Jesús tuhun ihya, tsaq iin ra cumí tyiñu cuenda vehe ñuhu nyívi Judea tan tsicuiñi tsiti ra nuu ra Jesús, tan catyí ra:

—Ndi tsihi cuii ñi sehe yu, maa tyin tatun yooho tan cuhun un tan tyiso ndaha un jiñi ña, cua nandoto ña —catyí ra tsihin ra Jesús.

¹⁹ Nduvita ra Jesús tsihin ra tsicá tsihin ra tan cuahán ra naha tsihin ra.

²⁰ Tacan tan iin ñaha cuuhví natuhvā ña tsata ra Jesús. Tan ñaha can tsa iyó utsi uvi cuiya ndohó ña cuehe tsa cuún niñi ña. Tan tyanaq ña ndaha ña jahma ra, ²¹ tan cuñi ña tsicá iñi ña: “Tun nañi ndaha yu jahma ra cua nduvaha yu”, cuñi ña.

²² Maa tyin ra Jesús nanyico coo ra tan nyehe ra tsi ña, tan catyí ra tsihin ña:

—Janduní iñi un, xihí, tsa nduvaha un tyin tsinú iñi un —catyí ra.

Tan juvin ñi cuhva can tan tsicuiñi tsa cuún niñi ña.

²³ Yahá can tan tsaq ra Jesús vehe ra cumí tyiñu can, tan nyehe ra tyin ra música ndatú ra naha tsa cucutsi ra naha tsi ndiyi can. Tan nyívi tsa yucú can iyo xaan tsacú ñi. ²⁴ Tan catyí ra Jesús tsihin ñi:

—Quita ndo ihya. Ñaha luhlu ihya, ña tsihi ña. Quixí ña —catyí ra.

Tan tsa cahán ra tacan quitsaha tsacú naaha ñi. ²⁵ Tan ra Jesús tavá ra tsi ñi ityi tsata vehe. Tacan tan quihví ra tsitsi vehe nu canyí ñaha can, tan tñin ra ndaha ñaha luhlu can, tan nduvita ña. ²⁶ Tan tandihí nyívi iyó ityi ñuu can tsito ñi tsa nandoto ñaha luhlu can.

Nu janduvaha ra Jesús tsi uvi taahan ra cuaa

²⁷ Tsa quita ra Jesús ican, tan uvi taahan ra cuaa nyicún tsi ra, caná tsa ra naha tan catyí ra naha:

—¿Cundahvi iñi tsi ndi, yooho ra cuví tata ra David! —catyí ra naha.

²⁸ Tan tsa yahá quihví ra Jesús tsitsi vehe, ra cuaa can, natuhvā ra naha nu nyaá ra, tan maa ra Jesús quitsaha tsicá tuhun ra tsi ra naha tan catyí ra:

—¿A tsinú iñi ndo tyin cuví janduvaha yu tsi ndo?

Tan nacahán ra cuaa can naha ra tan catyí ra naha:

—Tsinú iñi ndi tsi un, Jutu Mañi yu —catyí ra naha.

²⁹ Tacan tan tyanaq ra Jesús ndaha ra tinuu ra naha tan catyí ra tsihin ra naha:

—Na cuví maa tumaa cuhva tsinú iñi ndo —catyí ra.

³⁰ Tan nduvahá tinuu ra naha. Tan catyí ra Jesús tsihin ra naha:

—Coto ñahñi catyí tuhun ndo tsihin ndi intuhun nyívi.

³¹ Maa tyin cuahán ra naha tan quitsaha catyí tuhun ra naha tsa javaha ra Jesús tsihin ra naha tsihin tandihí nyívi iyó ityi ñuu can.

Nu janduvaha ra Jesús tsi iin ra ñihí

³² Tsa cuahán ra naha, juhva nyívi tsindaca ñi tsi iin ra ñihí tsa yihí tatyí ña vaha nu nyí ra Jesús. ³³ Tan tsa tavá ra Jesús tatyí ña vaha can, tacan tan nacahán ra can. Tan iyo xaan cuñi nyívi, tan catyí ñi:

—Ñaha ca maa nyehe yo ñuu Israel ihya ndi intuhun ra tavá tatyí ña vaha tsi nyívi —catyí ñi.

³⁴ Maa tyin ra cuví fariseo naha ra, catyí ra naha:

—Ra ihya tavá ra tatyí ña vaha tsihin tunyee iñi nu ña vaha tsa cuví ityi nuu tsihin nahnu —catyí ra naha.

Nu caahán ra Jesús tyin ña cuaaha maa nyívi jahá tyiñu cuenda Nyoo iyó

³⁵ Ra Jesús tsahan ra tandihi ñuu jacuahá ra tsi nyívi tsitsi vehe ñuhu intuhun intuhun ñuu. Caahán ra tuhun Nyoo nácaa ndacá ñaha ra tsi nyívi. Tan janduvahá ra tandihi nuu cuehe tsa ndohó ñi. ³⁶ Tan tsa nyehé ra tsi nyívi, cundaahví xaan iñi ra nyehe ra tsi ñi, tyin nyehé ñi tundoho tan iyó ñi tucuihya iñi, tumaa mbee ticatyí tsa nduve tsitoho iyó. ³⁷ Tacan tan catyí ra tsihin ra tsicá tsihin ra:

—Tsa nditsa, cuaaha xaan tyiñu iyó, maa tyin ra jahá tyiñu, ña cuaaha ra naha. ³⁸ Yacan cuenda, ndacan ndo tsi Ra Jatsii tyiñu ihya, na jaquitsi ca ra musu naquihin vaha cosecha ra.

10

Nu nacatsj ra Jesús tsa utsi uvi ra cua cacá tyiñu ra

(Mr. 3.13-19; Lc. 6.12-16)

¹ Tacan tan cana ra Jesús tsi tsa utsi uvi ra tsicá tsihin ra tan tsaḥa ra ndatu tsi ra naha na tava ra naha tatyí ña vaha tsa yihí añima nyívi, tan na janduvaha ra naha tsi nyívi cuuhví náa ndihi ca nu cuehe tan tsa uhvi.

² Ihya nyaá sivi tsa utsi uvi ra tsicá tyiñu ra: jihna ca, ra Simón, tsa nañí tucu Pedro, tan ra yañi ra, ra Andrés; ra Jacobo tan ra Juan yañi ra, sehe ra Zebedeo cuví tsi ra naha; ³ tan ra Felipe; ra Bartolomé; ra Tomás; tan ra Mateo ra tava xuhun cuenda ra ndacá ñaha; ra Jacobo sehe ra Alfeo; ra Lebeo tsa nañí tucu Tadeo; ⁴ tan ra Simón ra nyii cuenda partido tsa cuñi cuhun cuatyí siqui ñuu Roma tsa ndacá ñaha tsi ñi; tan ra Judas Iscariote, ra tsa xico tsi ra Jesús.

Nu tava tyiñu ra Jesús tsi tsa utsi uvi ra tsicá tsihin ra tyin cahan ra naha tuhun Nyoo

(Mr. 6.7-13; Lc. 9.1-6)

⁵ Tan tava tyiñu ra Jesús tsi tsa utsi uvi ra can naha ra, tan catyí ra tsihin ra naha:

—Ña cūhun ndo nu iyó nyívi tsa ñavin nyívi Israel cuví, tan ndi ña quihvi ndo ñuu tsa cayucú Samaria. ⁶ Cuaahan ndo nu yucú mbee tsa tsinaa tsa cuví nyívi Israel. ⁷ Cuaahan ndo cua cahan ndo tyin tsa saaq quivi tsa cua cundaca ñaha Nyoo tsi nyívi. ⁸ Janduvaha ndo tsi nyívi cuuhví, nyívi ndohó cuehe tyaahyú, tan nyívi yihí inga cuehe tsi. Janandoto ndo ndiyi. Tava ndo tatyí ña vaha yihí tsi nyívi. Tyin nyooho naquihín ndo tunyee iñi ihya tsa cuatu ñi, janduvaha ndo nyívi tsihin tsi, tan ña ndacan ndo xuhun tsi ñi.

⁹ Ña cuiso ndo xuhun; ndi xuhun cuaan, ndi xuhun cuitsin, ndi xuhun cuaaha. ¹⁰ Tan ña cuiso ndo ndi yunu tsa cuenda tsa cacá ityi ndo. Intuhun ñi camisa tsa nditsin ndo cuhun tsihin ndo. Tan ña cuiso ndo inga pari nditsan. Tan ndi ña cundaha ndo yutun. Tyin ra jahá tyiñu, iyó ndatu tsi ra tsa coo yahvi ra.

¹¹ Tatun tsaan ndo iin ñuu cahnu o iin ñuu luhlu, nducu ndo iin nyívi vaha iñi, tan ndoo ndo yuvehe ñi nda cuanda quita ndo ñuu can. ¹² Tatun cua quihvi ndo iin vehe, cūhva ndo nacumi tsi nyívi iyó yuvehe can. Tan catyí ndo tsihin ñi: “Na coo tsa vaha Nyoo añima ndo”. ¹³ Tan tatun nyívi iyó yuvehe can tan nacotó ñi tyin tsiñi ñuhu tsa vaha can tsi ñi, cua ndoo can

tshihin ñi. Maa tyin tatun ña tsitó ñi tyin tsiñí ñuhu tsa vaha can tsi ñi, naquihin nyico ndo can. ¹⁴ Tan tatun ña cuñí nyivi quihin cuenda ñi tsi ndo, tan ndi ña cuñí ñi tyaa soho ñi tsa caahán ndo, tacan tan quita ndo yuvehe ñi, ñuu can, tan naquisi ndo nyaca ñuhu tsaha ndo tyin ndoo maa cuatyi ñi siqui ñi. ¹⁵ Tsa nditsa catyi yu tshihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra.

Nu catyi tuhun tsi náa ndihi tundoho cua nyehe nyivi tsicá tyiñu Nyoo

¹⁶ Nyihe ndo! Tumaa mbee ticatyi cuví ndo, tan jacuhún yu tsi ndo nu yucú quiti xaana. Nyityi jaha ndo tsi ndo, tumaa coo. Maa tyin janduvita ndo ñi ndo tumaa paloma, ña xaana ti. ¹⁷ Jaha ndo cuenda tsi ndo tshihin nyivi tyin cua cuhva cuenda ñi tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu. ¹⁸ Tan tsa cuenda yuhu, cua cundaca ñi tsi ndo nuu ra ndacá ñaha tan nuu rey. Tacan tan cuví cahan ndo tuhun yu nuu ra naha tan nuu nyivi tsa ñavin nyivi Israel cuví. ¹⁹ Maa tyin tatun nacuhva cuenda ñi tsi ndo tsi ra cumí tyiñu naha ra, ña caca ñi ndo náca cua cahan ndo, tyin tatun tsaa cuhva tsa cua cahan ndo, Nyoo cua cuhva ra tuhun cahan ndo. ²⁰ Tyin ñavin maa ndo cua cahan, tyin maa Tatyí Ii Jutu yo Nyoo tsa iyó añima ndo cua cuhva ra tsa cahan ndo.

²¹ Yihí rayii cua xico ra naha juven ñi tsi ra yañi ra naha na cahñi ra naha tsi ra. Tan yihí ra cua xico ra sehe ra. Tan yihí nyivi cua cuxaan ñi tsi jutu ñi tan sihi ñi, tan cua cuhva cuenda ñi jutu ñi tan sihi ñi tsi nyivi na cahñi nyivi can tsi ñi. ²² Tandihí nyivi, ndasi cua cuñi ñi nyehe ñi tsi ndo tsa cuenda yuhu. Maa tyin tatun ña jandihí ndo tsa tsinú ñi ndo tsi yu, tacan tan cua cacu ndo. ²³ Tatun nyaa ndaha ñi tsi ndo iin ñuu, cahun ndo inga ñuu. Tyin tsa nditsa catyi yu tshihin ndo tyin tsa ndi cumañi ca cahun ndo tandihí ñuu nu iyó nyivi Israel tan cua quitsi nyico yuhu, Rayii tsa quee nda gloria.

²⁴ Iin ra luhlu tsa tsicá escuela, ña cahnu cuví ra tan ñavin ca ra jacuahá tsi ra. Tan iin musu, ña cahnu ca cuví ra tan ñavin ca tsitoho ra. ²⁵ Ra tsicá escuela, ña cuví coto cuaha ca ra tan ñavin ca ra jacuahá tsi ra. Tan iin musu ña cuví cuu ra iin ra cahnu ca tan ñavin ca tsitoho ra. Yacan cuenda tatun maa yu, ra jatsii vehe, tan catyi nyivi tyin cuví yu Beelzebú, nu cuví ityi nuu tshihin nu ña vaha, tacan tucu cua catyi ñi tshihin nyivi cuenda yu.

¿Yóo tsii taahán tsi nayuhvi yo, a tsii nyivi o tsii Nyoo?

(Lc. 12.2-7)

²⁶ Yacan cuenda ña nayuhvi ndo tsi nyivi, tyin nduve tsa nyii xeehe tsa ña cua quituvi. Tan nduve tsa xeehe tsa ña cua coto nyivi. ²⁷ Tandihí tsa caahán yu tshihin ndo tsacuaa, cahan ndo can tsinu cahñi. Tan tandihí tsa caahán xeehe yu tshihin ndo, ndāa ndo jiñi vehe çana tsaa ndo can, na coto tandihí nyivi. ²⁸ Ña nayuhvi ndo tsi nyivi tsahñí cuñu ñuhu yo, tyin ña cuví cahñi ñi añima yo. Vaha ca nayuhvi ndo tsi maa Nyoo, ra cuví janaa cuñu ñuhu ndo tan añima ndo tsitsi anyaya.

²⁹ Saa ña yahvi nyaá ti. Cuví jata yo uvi taahan ti tshihin intuhun xuhun luhlu. Maa tyin ndi intuhun ti ña canacava ti nu ñuhu tatun ña cuhva maa Nyoo Jutu yo. ³⁰ Tyin nda cuanda ixi jiñi ndo tan tsitó Nyoo najava taahan tsi iyó, tyin tsa nacahvi ra intuhun intuhun tsi. ³¹ Yacan cuenda ña nayuhvi ndo. Nyoocho, nyaá yahvi ca ndo nu Nyoo tan ñavin ca tsa cuaha saa.

Ña cua nayuhvi yo cahan yo tuhun ra Jesucristo tshihin nyivi
(Lc. 12.8-9)

³²Tandihí nyívi tsa caahán catsi tsihin nyívi yóo ra cuví yu, tacan tucu yuhu cua cahan catsi yu tsihin Jutu yu ra nyaá gloriá tyin nacotó yu tsi ñi. ³³Maa tyin nyívi cua tyihí xeehe tsi yu nuu inga nyívi, tacan tucu yuhu cua tyihí xeehe yu tsi ñi nuu Jutu yu ra nyaá gloriá.

Nu caahán ra Jesús tyin tsa cuenda ra tan cua cañi tahan nyívi tsihin tahan ñi
(Lc. 12.51-53; 14.26-27)

³⁴Ña cuñi ndo tyin yuhu vatsí cuhva yu tsa coo taxin nyívi nu ñuhu ñayívi ihya. Yuhu vatsí yu vatsí cahan yu tuhun Nyoo tsihin ñi, tan cua natahvi ñi tsa cuenda yacan. ³⁵Tyin yihí ñi cua tsinu iñi ñi tsi yu, maa tyin inga ñi ña cua tsinu iñi ñi. Tan yacan cuenda, iin ra cua cañi tahan ra tsihin jutu ra. Tan iin ñaha cua cañi tahan ña tsihin sihi ña. Tan inga ña cua cañi tahan ña tsihin tyiso ña. ³⁶Tan yacan cuenda juvin ñi maa nyívi vehe ndo cua cuxaan iñi tsi ndo.

³⁷Nyívi tsa cuñi ca tsi jutu ñi a tsi sihi ñi tan ñavin ca tsi yuhu, ña cuví cuví ñi nyívi cuenda yu. Tan nyívi cuñi ca tsi sehe yí ñi a sehe sihi ñi, tan ñavin ca tsi yuhu, ña cuví cuví ñi nyívi cuenda yu. ³⁸Tan nyívi tsa ña cuñi nyehe tundoho tan ndi ña cuñi ñi cuhva ñi ñayívi iyó ñi tsa cuenda yu, ña taahán tsi cuví ñi nyívi cuenda yu. ³⁹Tyin nyívi cuñi xaan ca ñayívi iyó ñi, cua cunaa ñi. Maa tyin nyívi cua cuhva ñayívi iyó ñi tsa cuenda yu, cua ñihi ñi ñayívi nyito coo ñi.

Nu caahán ra Jesús nácaa cua ñihi yo tsa vaha Nyoo

(Mr. 9.41)

⁴⁰Nyívi tsa naquihín cuenda tsi nyoocho, tsi yuhu naquihín cuenda ñi, tan ñi naquihín cuenda tsi yuhu, quihín cuenda ñi tsi ra tsa jaquitsí tsi yu. ⁴¹Nyívi naquihín cuenda tsi iin ra cuví ndusu yuhu Nyoo tyin Nyoo jaquitsí tsi ra, cua ñihi ndihí ñi tsa vaha tsa cua ñihi ra cuví ndusu yuhu Nyoo can. Tan nyívi naquihín cuenda tsi iin ra vaha tsa cuenda tyin ra vaha cuví ra, juvin ñi tsa vaha tsa cua ñihi ra vaha can cua ñihi ñi. ⁴²Tan yóo nyívi tsa cuhva intuhun vasu ndutya vitsin coho nyívi tsa nyicún tsi yu, cua ñihi ndihí ñi tsa cua cuhva Nyoo tsi ñi tsa nyicún tsi yu —catyí ra Jesús.

11

Nu jacuhun ra Juan tsi ra tsicá tsihin ra nu nyíi ra Jesús

(Lc. 7.18-35)

¹Tsa ndihí cahan ra Jesús tsihin tsa utsi uvi ra tsicá tsihin ra, tacan tan quita ra tsa, tyin cua cahan ra tuhun Nyoo tsihin nyívi tsa iyó ñuu tsa cayucú ityi can.

²Tan ra Juan nyíi ra vehe caa quívi can, tan ñihí tuhun ra tsa javahá ra Cristo. Tacan tan jacuhun ra tsi uvi taahan ra tsicá tsihin ra, na ndaca tuhun ra naha tsi ra Jesús. Tan cuahan ra naha nu nyíi ra. ³Tan catyí ra naha tsihin ra:

—¿A juvin yoocho cuví ra Cristo tsa nyaá tsa cua quitsi jacacu tsi ndi? O tatun ñavin un cuví, cuatu ndi tsi inga ra —catyí ra naha tsihin ra Jesús.

⁴Nacahan ra Jesús tan catyí ra:

—Cuaahan ndo tan catyí tuhun ndo tsihin ra Juan tandihí tsa nyehé ndo, tan tsa tsiñí ndo. ⁵Tan catyí ndo tsihin ra: nyívi cuaa nanyehé ñi, nyívi coxo nacacá ñi, nyívi ndohó cuehe tyaahyú nduvahá ñi, nyívi soho nacuñí ñi, tan nandotó nyívi tsa tsa tsihí, tan nyívi ndaahvi tsiñí ñi tuhun Nyoo nácaa cua cacu ñi.

6^o Tan catyi ndo tsihin ra tyin sii xaan cua cuvi tsi nyivi tsa nyicún tsi yu tun ña ndu uvi iñi ñi —catyi ra Jesús tsihin ra naha.

7 Tsa cuahán ra naha, tan quitsahá caahán ra Jesús tuhun ra Juan tsihin nyivi, tan catyi ra:

—Quivi tsa tsahan ndo tsinyehé ndo nu tsiqui, ¿náa cua nyehe ndo cuñi maa ndo? ¿A nyehe ndo iin ndoo tsa janduvá tatyí? 8 ¿O náa cuvi tsa tsinyehé ndo? ¿A iin ra nditsí jahma vaha cua nyehe ndo? Ñavin. Tyin tsitó ndo tyin ra nditsí jahma vaha, iyó ra vehe ra cuví rey. 9 ¿A ña tsahan ndo tsinyehé ndo tsi iin ra cuví ndusu yuhu Nyoo? Juvín. Tyin ra ican cahnu ca cuví ra tan ñavin ca tandihí ra cuví ndusu yuhu Nyoo. 10 Juvín ñi tuhun ra Juan cuví tsa nyaá nuu tutu Nyoo. Tan catyi tsi tyehen:

Yuhu cua jacuhun yu iin ra cahan tuhun yu tsa ndi cumañi ca cahun yu. Tyin natyiso vaha ra ityi nu cua cahun un.

11 Tsa nditsa catyi yu tsihin ndo, tyin tsitsi tsa tandihí nyivi tsa tsicoq tan nyivi iyó vityin, tan ña cahnu ca cuví ñi tan ñavin ca ra Juan, ra jacoondutyá tsi nyivi. Maa tyin ra tsa ndaca ñaha Nyoo añima, vasu ra lihli ñi cuví ra, cahnu ca ra cuví ra tan ñavin ca ra Juan.

12 Nda cuanda quivi tsa tsaa ra Juan tan nda vityin, nyivi ñihi iñi, nducú xaan ñi cuhva ñihi ñi tsa cundaca ñaha Nyoo tsi ñi. 13 Ra Moisés cahan ra tuhun nácaa cua cundaca ñaha Nyoo tsi nyivi, tan tacan tucu tandihí ra cuví ndusu yuhu Nyoo. Tacan tan quitsj ra Juan jacoto ra tsi nyivi tyin tsa tsaa quivi tsa cua cundaca ñaha Nyoo. 14 Tan ra Juan cuví ra Elías ra tsa nyaá tsa cua quitsi, tun nyooho tan cuñi ndo tsinu iñi ndo tsa caahán yu. 15 Nyooho tsa iyó soho, tyaa soho ndo tsa caahán yu.

16 ¿Náa tsihin jandu inducu yu tsi nyooho, nyivi tsa iyó quivi ihya? Tumaa ra nyihí cuví nyooho. Tyin ra nyihí jasiqui nuyahvi. Caná tsaa tahan ra naha tan catyi ra naha: 17 “Tiviñi ndi tiyoo tan ña tsañi ndo yaa. Tan tsitañi ndi yaa cuiihya, tan ña tsacu ndo”, catyi ra nyihí. [Tan tacan cuví nyooho tyin ndi intuhun cuhva ña taahán iñi ndo.] 18 Tyin ra Juan, ra jacoondutyá, quitsj ra tan ña tsatsj vaha ra, tan ña tsihí ra vinu. Tan nyooho catyi ndo tyin tatyí ña vaha yihí tsi ra. 19 Yahá can tan tsaa tucu yuhu Rayi tsa quee nda gloria. Tan tsatsi yu tan tsihí yu. Tan catyi ndo tyin tsatsi xaan yu tan tsihí xaan yu vinu, catyi ndo. Tan ña taahán iñi ndo tsa cutahán yu tsihin ra iyó cuatyí naha ra tan tsihin ra tavá xuhun cuenda ra ndacá ñaha naha ra. Tan vasu ña naquihín cuenda ndo tuhun caahán ndi, maa tyin Nyoo tsahá ra tsa tsiñi tuñi ra tsi nyivi naquihín tuhun caahán yu tan tuhun cahan ra Juan, tan ñi ican cua janaha ñi tsi ndo tyin vaha tsa tsiñi tuñi Nyoo —catyi ra Jesús.

Nyivi ña cuñi naquihin cuenda tuhun caahán ra Jesús cua nyehe ñi tundoho (Lc. 10.13-15)

20 Tacan tan quitsahá caahán ra Jesús tsihin nyivi tandihí ñuu nu javahá ra cuaha tsa iyo, tyin ña nasamá ñi cuhva iyó ñi, tan catyi ra:

21 —¡Ndahvi nyooho, nyivi ñuu Corazin! ¡Ndahvi nyooho nyivi ñuu Betsaida! Tyin nyehé ndo tsa iyo tsa javahá yu tan ña nasamá ndo cuhva iyó ndo. Tan ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehé nyooho vityin, numi xaan cua cunditsi ñi jahma tucuiihya iñi tan cua coso ñi nyaá nuu ñi: tyin ndu uvi iñi ñi cuatyí ñi. 22 Maa tyin catyi yu tsihin ndo tyin ñihi ca cua tatsi tuñi Nyoo tsi ndo tan ñavin ca ñi ñuu Tiro tan ñi ñuu Sidón. 23 Tan nyooho nyivi ñuu Capernaum, cuñi maa ndo tyin cundaa ndo nda gloria, maa tyin cua nuu ndo nda cuanda nu yucú nyivi tsihí anyaya. Tun

tsatyin tsicoq tsa iyo nyehe ñi ñuu Sodoma tumaa tsa nyehé ndo ihya, ñuu can ña tsinaa tsi tan iyó tsi nda cuanda vityin. ²⁴ Maa tyin catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi nyooho tan ñavin ca nyivi ñuu Sodoma.

“Cuhva ndo tsi ndo tsi yu, tan cuhva yu tsa quitatu ndo”, catyí ra Jesucristo (Lc. 10.21-22)

²⁵ Quivi can catyí ra Jesús tsihin Nyoo:

—Jacahnú yu tsi un, Jutu yu, ra ndaca ñaha gloriá tan ñuhu ñayivi. Tyin tyihí xeehe un tuhun ihya nuu ra tsitó xaan tan ra nyityi xaan naha ra. Tan jandunditsí un tuhun ihya nuu ra nyihi. ²⁶ Tacan Tyaa, tyin tacan cuñí maa un —catyí ra Jesús.

²⁷ Tacan tan catyí tucu ra tsihin nyivi:

—Jutu yu nacuhva cuenda ra tandihí tsa iyó tsi ra tsi yu. Yoñi maa nacotó tsi yu tsa nditsa, intuhun ñi maa Jutu yu nacotó vaha tsi yu. Tan Jutu yu yoñi nacotó tsi ra tsa nditsa. Intuhun ñi maa yu, tsa cuví Sehe ra tsi yu, tsitó yu tsi ra. Tan nyivi tsa cuñí yu tsa nacoto tsi Jutu yu, cua janaha yu tsi ra tsi ñi. ²⁸ Tandihí nyooho tsa tatú tyin jahá tyiñu ndo, tan tsihin tundoho tsa iyó ndo, ñaha ndo nu nyaá yu, tan yuhu cua cuhva yu tsa quitatu ndo. ²⁹ Cuhva ndo tsa cundaca ñaha yu tsi ndo tan cutuhva ndo cuhva iyó yu. Tyin yuhu ña xaan yu tan ña cahnu jahá yu tsi yu. Tacan tan cua quitatu aña ndo. ³⁰ Ña yí tsa cuhva ndo tsi ndo tsa cundaca ñaha yu. Tyin tsa tsahá yu cuiso ndo, yama tsi.

12

Quivi quitatú nyivi cuví tsi tan ra tsicá tsihin ra Jesús tuhún ra naha yoco itya trigu

(Mr. 2.23-28; Lc. 6.1-5)

¹ Iin quivi quitatú nyivi, yaha ra Jesús mahñu nu iyó tsa tatsi nyivi. Tan tsaá soco tsi ra tsicá tsihin ra. Tan quitsaha tuhún ra naha yoco trigu can tan tsatsi ra naha. ² Tan tsa nyehe ra fariseo naha ra yacan, catyí ra naha tsihin ra Jesús:

—Jihna, ra tsicá tsihin un javahá ra naha iin tyiñu tsa ña taahán tsi javahá yo quivi quitatú yo —catyí ra naha tsihin ra.

³ Tan ra Jesús catyí ra tsihin ra naha:

—¿A ñaha ca cahvi ndo tsa javahá ra David tsihin ra cutahan tsihin ra quivi tsa tsaá soco tsi ra naha? ⁴ Quihví ra tsitsi vehe Nyoo, quihín ra paan ii, tan tsatsi ra naha. Tan ña taahán tsi catsi ra naha, ndi maa ra, tan ndi ra tsicá tsihin ra, tyin maa ñi maa ra cuví jutu naha ra taahán tsi catsi paan can. ⁵ ¿O ñaha ca cahvi ndo nu ley nu catyí tsi tyin ra cuví jutu naha ra, jahá tyiñu ra naha tsitsi vehe ñuhu quivi quitatú yo? Tan ñavin cuatyí cuví can. ⁶ Tan catyí yu tsihin ndo, tyin ihya nyaá ra tsa cahnu ca cuví tan ñavin ca vehe ñuhu. ⁷ Nyooho, ñaha ca cutuñi iñi ndo nu catyí tsi nu tuhun Nyoo tyehen: “Tsa cuñí ca yu javaha ndo cuví tsa cundaahvi iñi ndo nyehe ndo tsi nyivi tahan ndo, tan ñavin ca tsa cahñi ndo quiti tan jamañi ndo nuu yu.” Tun tsatyin cutuñi iñi ndo tuhun ihya, ña cua tyaa ndo cuatyí tsata nyivi tsa nduve cuatyí. ⁸ Yuhu, Rayí tsa quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quivi quitatú yo —catyí ra Jesús.

Nu janduvaha ra Jesús tsi iin ra na ityi ndaha (Mr. 3.1-6; Lc. 6.6-11)

⁹ Tacan tan quitã ra Jesús ican, tan cuahán ra vehe ñuhu. ¹⁰ Tan ican nyíi iin ra tsa na ityi ndaha. Tan yucú tucu juhva ra nducú cuhva nácaa tan tyaa ra naha cuatyí tsi ra Jesús. Yacan cuenda tsicã tuhun ra naha tsi ra tan catyí ra naha:

—¿A catyí ley tyin vaha janduvaha yo tsi nyívi cuuhví quívi quitatú yo? —catyí ra naha tsihin ra Jesús.

¹¹ Tan nacahan ra Jesús tan catyí ra:

—¿Ndáa nyooho, tatun canacava iin mbee jana ndo tsitsi iin yavi quívi quitatú yo, a ña cua cuhun ndo tan tava ndo tsi ti? ¹² Tan ¿a ña nyaá yahvi ca iin nyívi tan ñavin ca mbee? Yacan cuenda taahán tsi javaha yo tsa vaha quívi quitatú yo —catyí ra.

¹³ Tacan tan catyí ra Jesús tsihin ra tsa na ityi ndaha can:

—Janacaa ndaha un —catyí ra.

Tan cuhva tsa janacaa ra ndaha ra, iin yaha ñi nduvaha tsi tumaa inga tsiyo. ¹⁴ Tacan tan quitã ra fariseo naha ra cua natuhun tahan ra naha nácaa cua cahñi ra naha tsi ra Jesús.

Tsa cahan ra Isaías, ra cuví ndusu yuhu Nyoo, tsa cuenda ra Jesús tahan tsanaha

¹⁵ Tsa tsitó ra Jesús tyin nducú ra naha tsi ra, quitã ra ican. Tan cuaha nyívi tsinyicun tsi ra. Tan maa ra janduvaha ra tsi tandihí ñi cuuhví. ¹⁶ Tan catyí ra tsihin ñi tyin na ña catyí tuhun ñi yóo ra cuví ra. ¹⁷ Tacan cuví tyin tacan cahan ra Isaías, ra cuví ndusu yuhu Nyoo tahan tsanaha. Tan tyehen tyaa ra tuhun Nyoo:

¹⁸ Ra ihya cuví musu yu, ra tsa nacatsj vaha yu.

Cuñi xaan yu tsi ra, tan sii xaan cuñi yu tsihin ra.

Cua cuhva yu Tatyí li yu tsi ra.

Tan cua jacoto ra tsi nyívi tsa ñavin nyívi Israel cuví, nácaa cua janduvaha yu tsi ñi nuu yu.

¹⁹ Tan ña cua cahan yuhu ra tan ndi ña cua cana tsaa ra, tan ña cua cahan ñihi ra ityi cahnu.

²⁰ Tan ndi intuhun ndoo yacua, tan ña cua cahnu ndihí ra.

Tan ndi ña cua ndahva ndihí ra tiñuhu lihli nu caná luxu yuhma.

Nda cuanda coto tandihí nyívi tyin maa ra cuví ra ndacá ñaha tsi ñi.

²¹ Tan tandihí nyívi, tan cua cuita iñi ñi tsi ra.

Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo

(Mr. 3.20-30; Lc. 11.14-23; 12.10)

²² Tacan tan tsindacã nyívi tsi iin ra yihí tatyí ña vaha nu nyíi ra Jesús, cuaa ra tan ñihi ra. Tan ra Jesús janduvaha ra tsi ra. Tacan tan nacahan ra, tan nanyehe ra. ²³ Iyo xaan cuñi tandihí nyívi, tan catyí ñi:

—¿A ñavin ra ihya cuví tata ra rey David? —catyí ñi.

²⁴ Tan cuhva tsa tsiñi ra fariseo naha ra tsa caahán ñi, catyí ra naha:

—Tsihin tunyee iñi nu Beelzebú, nu cuví ityi nuu tsihin nu ña vaha nahnu, tavá ra ihya tatyí ña vaha —catyí ra naha.

²⁵ Maa tyin ra Jesús tsitó ra tsa tsicá iñi ra naha, yacan cuenda catyí ra tsihin ra naha:

—Tatun ra ndacá ñaha naha ra tan cua natahvi ra naha, tan cua cañi tahan ra naha, tacan tan cundihí tyiñu tsa ndacá ñaha ra naha. Tan tatun iin nuu o tandihí nyívi iin vehe tan cusin ñi, tacan tan cua tiví nu yucú ñi. ²⁶ Tan tacan

tucu tatun nu ña vaha tan tava nu juvin ñi tahan maa nu, cuñí tsi catyi tyin ña iin ñi cuví nahnu, tan cundihi tunyee iñi tsa iyó tsi nahnu. ²⁷Tan nyooho catyi ndo tyin tsihin tunyee iñi nu Beelzebú tavá yu tsi nu tatyí ña vaha nahnu. Tun tsatyin tavá yu tsi nahnu tumaa cuhva catyi ndo, yóo tsahá tunyee iñi tsi ra nyicun tsi ndo tan tavá ra naha tsi nahnu. Maa ra naha cua cahan tsa nditsa tsihin ndo, tyin nyooho soho xaan tsicá iñi ndo. ²⁸Yacan cuenda catyi yu tsihin ndo, tyin yuhu tavá yu tatyí ña vaha tsihin tunyee iñi Tatyí Ii Nyoo. Tan cuñí tsi catyi yacan tyin nditsa tyin tsa tsaꝯ cuhva ndacá ñaha Nyoo nu yucú ndo.

²⁹Tan ¿yóo cuví quihvi tsitsi vehe iin ra xaan, tan quihin nyaa ra ndaha tyiñu ra? Yoñi. Maa tyin tatun cuhñi jihna ra tsi ra can, tacan tan cuví quihin nyaa ra tandihí tsa iyó tsi ra.

³⁰Nyivi tsa ña nyaá tumañi iñi tsihin yu, ñi xaan iñi tsi yu cuví ñi. Ñi tsa ña jatyinyeé tsi yu tsa caahán yu tuhun Nyoo tsihin nyivi, cuñí tsi catyi tyin ña tsahá ñi tsa coto nyivi tuhun caahán yu.

³¹Yacan cuenda catyi yu tsihin ndo tyin Nyoo jahá ra tucahnu iñi cuatyí nyivi, tan tsihin náa tsa ña vaha caahán ñi, maa tyin tatun cua cahan ñi ndavaha ñi siqui Tatyí Ii Nyoo, yacan nditsa, ña cua jaha Nyoo tucahnu iñi tsi ñi. ³²Tan yóo nyivi tsa caahán tsa ndavaha ñi siqui yuhu Rayii tsa quee nda gloria, Nyoo cua jaha ra tucahnu iñi tsi ñi tsa cuenda can. Maa tyin nyivi tsa caahán tsa ndavaha ñi siqui Tatyí Ii Nyoo, ña cua coo tucahnu iñi tsi ñi tsa cuenda cuatyí can, ndi ñuu ñayivi ihya, tan ndi inga ñuu ñayivi tsa cua coo.

Tsihin tsa javahá nyivi tan nacoto yo tsi ñi tatun vaha ñi a ña vaha ñi
(Lc. 6.43-45)

³³Iin yutun vaha tsahá tun tsiti vaha. Tan iin yutun ña vaha tsahá tun tsiti ña vaha. Nacotó yo tatun yutun vaha cuví tun tsa cuenda tsiti tun. ³⁴¡Nyooho, nyivi caquiñi tumaa tata coo xaan cuví ndo! ¿Nacaa cuví quitá tsa vaha yuhu ndo, tan nyivi caquiñi cuví ndo? Tyin tsa quitá tsitsi añima yo, yacan caahán yo. ³⁵Nyivi vaha, vaha caahán ñi tyin yihí tsa vaha añima ñi. Tan nyivi caquiñi, tsa caquiñi caahán ñi, tyin tsa caquiñi yihí tsitsi añima ñi. ³⁶Tan yuhu catyi yu tsihin ndo tyin quivi cua tatsi tuñi Nyoo tsi tandihí nyivi, cua cuhva cuenda ñi tandihí tuhun tsa ña vaha cahan ñi. ³⁷Tyin tsa cuenda tsa caahán ndo, tan cua catyi Nyoo tun vaha ndo o ña vaha ndo.

Nyivi ña vaha, tsa iyo ñi cuñí ñi nyehe ñi
(Mr. 8.12; Lc. 11.29-32)

³⁸Tacan tan juhva ra fariseo tan ra maestro cuenda ley vehe ñuhu catyi ra naha tsihin ra Jesús:

—Maestro, cuñí ndi tyin javaha un iin tsa iyo tyin tacan tan coto ndi tun Sehe Nyoo cuví tsi un.

³⁹Tan nacahan ra Jesús tan catyi ra:

—Nyivi ña vaha tan nyivi tsa nyicún inga nyoo cuñí ñi nyehe ñi tsa iyo. Maa tyin ña cua nyehe ñi tsa iyo, intuhun ñi tsa cua nyehe ñi, tumaa tsa javahá Nyoo tsihin ra Jonás ra cuví ndusu yuhu ra tahan tsanaha. ⁴⁰Tyin tumaa tsinyii ra Jonás tsitsi tyaca cahnu uñi quivi tan uñi tsacuaa, tacan cua cunyií yuhu Rayii tsa quee nda gloria tsitsi ñuhu uñi quivi tan uñi tsacuaa. ⁴¹Tan quivi cua tatsi tuñi Nyoo tsi tandihí nyivi, cua nduvita nyivi tsa tsiicoꝯ ñuu Nínive tahan tsanaha tan cua catyi ñi na tatsi tuñi Nyoo tsi nyooho nyivi tsa iyó vityin. Tan cua catyi ñi tyin cua cunaa ndo, tyin maa ñi tsa cuví ñi ñuu Nínive, nasamá ñi cuhva iyó ñi quivi cahan ra Jonás tuhun Nyoo tsihin ñi. Tan ihya

nyii ra cahnu ca cuví tan ñavin ca ra Jonás. [Tan ña cuñí ndo tyaa soho ndo tsa caahán yu.] ⁴² Tan tacan tucu ñaha tsa tsindacá ñaha ityi Sur, cua nduvita ña quivi cua cutuñi nyivi tan cua catyi ña tyin cua cunaa nyooho nyivi iyó vityin, tyin maa ña, vasu cañi ñuu ña maa tyin quitsi ña, quitsi tyaa soho ña tsa nyityi tsa cahan ra Salomón. Tan vityin cahnu ca ra caahán tsihin ndo tan ñavin ca ra Salomón.

Nu caahán ra Jesús tsihin yo nácaa quihvi nu tatyí ña vaha añima yo inga tsaha tatun naa iñi yo tsi Nyoo

(Lc. 11.24-26)

⁴³ Tatun iin nu tatyí ña vaha quita nu tsitsi añima iin nyivi, tsicá nuu nu ñuhu ityi, nanducú nu iin nu quitatu nu. Tan ña nañihi maa nu nu quitatu nu. Tacan tan tsicá iñi nu: ⁴⁴ “Cunuhu yu nda vehe yu nu quee yu.” Tacan tan cuahán nyico nu añima nu quee nu. Tan nyehe nu tyin ndii xaan, tan yofii iyó, tan sii xaan caá. ⁴⁵ Tacan tan cua quihin nu utsa taahan ca tatyí ña vaha, tsa yaha ca caquiñi tan ñavin ca maa nu. Tacan tan iin caa ñi quihvi tandihi tatyí ña vaha can añima ñi can. Yacan cuenda, yaha ca ndasi cua coo ñi tan ñavin ca tsa ndi cumañi ca quita nu. Tan tacan cua cuvi tsi nyivi quiñi iyó —catyí ra Jesús.

Nu tsaha cuenda ra Jesús tyin tumaa cuví yañi ra, tan tumaa cuví sihi ra, cuví tsi nyivi tsa javahá cuhva cuñi Nyoo

(Mr. 3.31-35; Lc. 8.19-21)

⁴⁶ Ndi caahán ca ra Jesús tsihin nyivi, tan tsaa sihi ra tan yañi ra, tan nyecú ñi ityi tsata vehe, tan cuñi ñi cahan ñi tsihin ra. ⁴⁷ Tacan tan jacoto iin ra tsi ra Jesús, tan catyí ra:

—Sihi un tsihin ra yañi un naha ra nyecú ñi tsata vehe. Tan cuñi ñi cahan ñi tsihin un.

⁴⁸ Tan nacahan ra Jesús tan catyí ra tsihin ra can:

—¿Yoo cuví sihi yu tan yoo cuví yañi yu? —catyí ra.

⁴⁹ Tacan tan janaha ndaha ra nu nyecú ra tsicá tsihin ra, tan catyí ra:

—Ra ihya naha ra cuví sihi yu tan yañi yu. ⁵⁰ Tyin tandihi nyivi tsa javahá cuhva cuñi Jutu yu, ra nyaá gloria, juvin ñi can cuví yañi yu, tan cuhva yu, tan sihi yu —catyí ra Jesús.

13

Nu caahán ra Jesús tyin tumaa iin ra tatsí, tacan cuví ra caahán tuhun Nyoo

(Mr. 4.1-9; Lc. 8.4-8)

¹ Quivi can quita ra Jesús vehe nu nyii ra tan cuahán ra, tsicunyaá ra yuhu miñi. ² Tan cuaha xaan nyivi ndu iin nu nyaá ra, yacan cuenda quihvi ra tsitsi iin yutun ndoo tan tsinyaá ra. Tan tandihi nyivi ndoo ñi yuhu ndutya. ³ Tacan tan quitsaha jacuahá ra tsi ñi tan caahán ra tsihin ñi tsihin iin cuhva, tan catyí ra:

—Quita iin ra vehe ra. Cuahán ra nu iyó tyiñu jahá ra, cuatatsí ra tsiti trigu ra. ⁴ Tan cuhva tsa quití ra tsiti can, cucoyo juhva tsi yuhu ityi. Tan quitsi saa tan tsatsi ti tsiti can. ⁵ Tan juhva ca tsiti can cucoyo tyañu yuu nu ña cuaha nyahyu yihí. Tan ican caná tsiti can tsa numi ñi tyin ña cuaha nyahyu yihí tyañu yuu can. ⁶ Maa tyin cuhva tsa caná ñicanyii, numi ñi na ityi tsi, tyin ña cunu yihí yoho tsaha tsi. ⁷ Juhva ca tsiti can cucoyo tyañu iñu. Tan quivi caná trigu can tsahnú tsi iin caa ñi tsihin iñu can, tan iñu can numi xaan ca tsahnú tsi tan tsahnú tsi trigu can. ⁸ Maa tyin juhva ca tsiti can cucoyo nu ñuhu vaha.

Tan quivi tsahnu tsi, vaha xaan tsaha tsi tsiti. Tyin tsa iin tsiti can, cientu tsiti quita tsihin tsi. Tan inga tsiti can, uñi xico, tan inga tsi oco utsi tsiti tsaha tsi.
⁹ ¡Tatun nyaá soho ndo, tyaa soho ndo tuhun caahán yu! —catyí ra Jesús.

Nu catyí tuhun ra Jesús nacuenta jacuahá ra tsi nyivi tan ña catyí tuhun catsi ra tsihin ñi

(Mr. 4.10-12; Lc. 8.9-10)

¹⁰ Tacan tan natuhva ra tsicá tsihin ra Jesús, tan tsica tuhun ra naha tsi ra, tan catyí ra naha:

—¿Nacuenta tyin tsihin cuhva ñi jacuahá un tsi nyivi, tan ña catyí tuhun catsi un tsihin ñi? —catyí ra naha.

¹¹ Tan nacahan ra Jesús tan catyí ra:

—Tsi nyooho jacotó Nyoo tuhun xeehe, cuhva ndacá ñaha ra, maa tyin nyivi ihya ña cuví coto ñi tsa tsaha Nyoo tsi nyooho. ¹² Tyin tandihi nyivi tsa cutuñi iñi tsa caahán yu tan javahá ñi, cuaha ca cua cutuñi iñi ñi. Tan nyivi tsa ña cutuñi iñi, tan ña cuñi ñi javaha ñi, cua quihin nyaa ndihi yu tsa luxu ñi tsa tsitó ñi. ¹³ Yacan cuenta caahán yu tsihin ñi tsihin cuhva, tyin nyehé ñi tan cuví tsi tumaa tsa ña nyehé ñi. Tsiñi ñi maa tyin ña cutuñi iñi ñi, tumaa tsa ña tsiñi ñi cuví can. ¹⁴ Tyin tacan tan cundaa tsa cahan ra Isaías ra cuví ndusu yuhu Nyoo tahañ tsanaha, tan catyí ra:

Tsa nditsa tyin nyooho tsiñi ndo tuhun yu, maa tyin ña cutuñi iñi ndo.

Cua nyehé ndo tsa javahá yu, tan ña cua cutuñi iñi ndo.

¹⁵ Tyin tsa ndundava xaan añima nyivi ihya,

tan ña catsi vaha tsiñi ñi.

tan ndasi tinuu ñi,

na ña cua nyehé ñi tsihin tinuu ñi,

tan ña cua cuñi ñi tsihin soho ñi.

Tan ndi ña cua cutuñi iñi ñi tsihin añima ñi.

Tan ndi ña cua nanducu ñi tsi yu, na janduvaha yu tsi ñi.

¹⁶ Maa tyin si xaan cuví tsi nyooho, tyin nyehé ndo tsihin tinuu ndo, tan tsiñi ndo tsihin soho ndo. ¹⁷ Tsa nditsa catyí yu tsihin ndo, tyin cuaha xaan ra cuví ndusu yuhu Nyoo tan cuaha xaan nyivi vaha, cuñi ñi nyehé ñi tsa nyehé nyooho tsa javahá yu, maa tyin ña nyehé ñi. Tan cuñi ñi tyaa soho ñi tandihi tsa tsiñi nyooho vityin, maa tyin ña tsiñi ñi.

Nu catyí tuhun ra Jesús tsa cuñi tsi catyí cuhva tsa cahan ra tsihin nyivi tsa cuenta ra tatsi can

(Mr. 4.13-20; Lc. 8.11-15)

¹⁸ Tyaa soho ndo tsa cuñi tsi catyí cuhva tsa cahan yu tsa cuenta ra tsa tatsi tsiti trigu can: ¹⁹ Nyivi tsa tsiñi tuhun nácaa cuñi Nyoo cundaca ñaha ra añima ñi, tan ña cutuñi iñi ñi, cuví ñi tumaa nu cucoyo tsiti trigu yuhu ityi. Tan quitsi nu ña vaha tan quihin nyaa nu tuhun Nyoo tsa iyó añima ñi. ²⁰ Tan tumaa nu cucoyo tsiti can tyañu yuu, juvin ñi nyivi tsa tsiñi tuhun Nyoo cuví can. Tan si xaan naquihin vaha ñi itsi juhva ñi quivi. ²¹ Tyin nduve ñuhu cunu ican, yacan cuenta cana tsiti can, maa tyin ña cuví cuhun yoho tsi. Tan tacan cuví nyivi can. Juhva ñi quivi tsinú iñi ñi. Maa tyin quivi tsa quitsahá nyehé ñi tundoho, tan caahan ndasi nyivi tsata ñi tsa cuenta tuhun Nyoo, tacan tan jandihí ñi tsa tsinú iñi ñi. ²² Tan tumaa nu cucoyo tsiti can tsitsi iñu, juvin ñi nyivi tsa tsiñi tuhun Nyoo cuví can. Tsiñi ñi, maa tyin ña cuñi ñi javaha ñi tumaa tsiñi ñi. Tyin tyaa xaan ca iñi ñi tundoho ñayivi tan ñavin ca tuhun Nyoo. Tan nyiyo ca iñi ñi tsa cuca. Tan tandihi tuhun can jatyañu tsi tsi ñi,

tan cuví ñi tumaa yutun tsa ña tsahá tsiti. ²³ Tan ñuhu vaha nu cucoyo tsiti can, yacan cuví inga nyívi tsa tsiñi tuhun Nyoo, tan cutuñi ñi ñi, tan javahá ñi tandihi tuhun caahán ra. Yihí ñi cuví ñi tumaa tsiti tsa caná tan tsahá tsi iin cientu tsiti, tan inga ñi cuví ñi tumaa tsiti tsa tsahá uñi xico, o tumaa tsiti tsa tsahá oco utsi tsiti intuhun intuhun.

Nu caahán ra Jesús nácaa cuahán tuhun trigu tan cuhu ña vaha

²⁴ Tan cahan tucu ra Jesús inga cuhva ihya tsihin ñi; tan catyí ra:

—Tsa ndacá ñaha Nyoo tsi nyívi cuví tsi tumaa iin ra tsa tatsj tsiti trigu nu ñuhu ra. ²⁵ Tan cuhva tsa quixí tandihi ra jahá tyiñu naha ra, quihvi iin ra xaan ñi tsi ra jatsii can, tan quití ra tsiti cuhu ña vaha, tan cuahán ra. ²⁶ Tan quivi caná tsiti trigu can, tan caná yoco tsi, caná ndihi tucu cuhu ña vaha can. ²⁷ Tacan tan ra cuví musu can naha ra, tsahan ra naha tsicatyí tuhun ra naha tsihin tsitoho ra naha: “Tata, maa ñi tsiti trigu tatsj ndi, ¿tan nacuenda tyin caná cuhu ña vaha can?” catyí ra naha. ²⁸ Tan nacahan ra can tan catyí ra: “Iyó iin ra xaan ñi tsi yu javahá tsehe, tun cuví.” Tacan tan musu can, catyí ra naha tsihin tsitoho ra: “¿A cuñi un tyin cuhun ndi tan tuhun ndi cuhu ña vaha can?” ²⁹ Tan tsitoho ra naha catyí ra: “Ña tuhun ndo, tyin coto tuhun ndihi ndo trigu can. ³⁰ Jaña ndo, na cuahnu maa tsi iin caa ñi tsihin trigu can, tatun tsa tsitsa tsi, tacan tan cua tava tyiñu yu na tuhun jihna ra naha cuhu ña vaha can, tan cuhñi ra naha cuenda jucun, tan cahmi ra naha. Tan yaha can tan natyihí vaha ra naha tsa vaha can tsitsi yaca yu.”

Nu caahán ra Jesús tyin tumaa tsiti mostaza cuví tsa ndacá ñaha Nyoo tsi yo (Mr. 4.30-32; Lc. 13.18-19)

³¹ Tacan tan cahan ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyívi cuví tsi tumaa iin tsiti mostaza tsa tatsj iin ra nu ñuhu ra. ³² Tyin tsiti can lihli ñi tsi tan ñavin ca tandihi ca tsiti. Maa tyin quivi tsahnú tsi cuví tsi iin yutun. Tan quitsj saa, tan javahá ti taca ti soco tun —catyí ra Jesús.

Nu caahán ra Jesús tyin tumaa yutsan iya tacan cuví tsa ndacá ñaha Nyoo tsi yo (Lc. 13.20-21)

³³ Tan cahan ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyívi cuví tsi tumaa yutsan iya tsa nasaca nuu iin ñaha tsihin uñi jahma yutyi paan. Tyin tumaa ndacá tandihi yutsan paan can jahá tsa luxu ñi yutsan iya can, tacan cuví tsa ndacá ñaha Nyoo tsi yo —catyí ra.

Nu catyí tuhun ra Jesús nacuenda jacuahá ra tsi nyívi tsihin cuhva (Mr. 4.33-34)

³⁴ Tandihí tuhun can cahan ra Jesús tsihin nyívi tsihin cuhva. Tan tandihí tsa cahan ra tsihin ñi ña cahan catsi maa ra, maa ñi maa tsihin cuhva cahan ra. ³⁵ Tacan cuví tyin tacan tan cundaa tsa cahan Jutu Mañi yo tsihin yuhu ra cuví ndusu yuhu ra tahanan tsanaha tan tyaá ra tyehen: Tsihin cuhva cua cahan yu tsihin nyívi.

Cua cahan yu tsihin ñi tuhun tsa yihí xeehe nda cuanda tsa javahá Nyoo ñuhu ñayivi.

Nu caahán ra Jesús náa cuñi tsi catyí cuhu ña vaha tsa caná tsihin tsiti trigu can

³⁶ Tacan tan jacunuhu ra Jesús tsi nyívi, tan quihvi ra tsitsi vehe nu nyii ra. Tan natuhvá ra tsicá tsihin ra nu nyaá ra, tan catyí ra naha tsihin ra:

—Catyi tuhun tsihin ndi náa cuñí tsi catyi tsa cahān un tsihin nyivi tsa cuenda huhu ña vaha tan trigu can.

³⁷ Tacan tan quitsahā catyí ra Jesús tsihin ra naha:

—Ra tsa tatsj tsiti trigu can cuví yuhu Rayí tsa quee nda gloria. ³⁸ Tan ñuhu can cuví nyivi iyó nu ñuhu ñayivi. Tan tsiti trigu can cuví nyivi tsa ndacá ñaha Nyoo. Tan huhu ña vaha can cuví nyivi tsa nyicún tsi nu ña vaha. ³⁹ Tan nu tsa tatsj huhu ña vaha can, nu can cuví nu ña vaha juvin ñi nu tsa xaan iñi tsi yu. Tan quivi cua naquihin yu tyiñu jahá yu, yacan cuñí tsi catyí quivi cua cundihi ñuhu ñayivi. Tan ra tsa cua naquihin tsiti can, cuví ra ángel naha ra. ⁴⁰ Tumaa jataca ra naha huhu ña vaha can tyin cayu tsi, tacan cua cuví quivi cua cundihi ñayivi. ⁴¹ Yuhu Rayí tsa quee nda gloria cua jaquitsi yu ángel tan jataca ra naha tsi nyivi natyuhu tsi inga nyivi na javaha ñi tsa ña vaha tan inga nyivi tsa iyó cuatyí. ⁴² Tan cua tyihi ra naha tsi ñi tsitsi ono nu cayú ñuhu. Tan ican cua vacu tsaa ñi tan cahyu ña cua cuví huhu ñi. ⁴³ Nyooho tan nyivi javahá huhu cuñí Nyoo cua quituvi ndo nuu Jutu yo. Tan cua cuví ndo tumaa tsa nditsin ñuhu ñicanyii, nu ndacá ñaha Jutu yo. Tatun iyó soho ndo, tyaa soho ndo tsa caahán yu.

Xuhun cuaan tsa yihí xeehe

⁴⁴ Tsa ndacá ñaha Nyoo tsi nyivi cuví tsi tumaa xuhun cuaan tsa yihí xeehe tsitsi ñuhu. Tan iin ra nañihí ra xuhun cuaan can, tan tyihj xeehe nyico ra inga tsaha, tan sii xaan cuñí ra cuanuhu ra tan xico ra tandihí tsa iyó tsi ra. Tacan tan jata ra ñuhu nu yihí xeehe xuhun cuaan can.

Iin huhu tsa cahān ra Jesús cuenda iin yuu xiñu tsa yahvi xaan nyaá

⁴⁵ Tan tsa ndacá ñaha Nyoo tsi nyivi, cuví tucu tsi tumaa iin ra najatá yuu xiñu tan naxico nyico ra, ⁴⁶ tan tsa ñihj ra iin tsa yahví xaan nyaá, xico ra tandihí maa tsa cumj ra, tan jata ra yuu xiñu vaha can.

Nu caahán ra Jesús iin huhu cuenda traya

⁴⁷ Tan juvin ñi cuví tucu tsa ndacá ñaha Nyoo tsi nyivi tumaa iin traya tsa cañi ra naha nu ndutya ñuhu, tan ñihí ra naha tandihí nuu tyaca. ⁴⁸ Tan tsa tsitu traya can tsihin tyaca, tavá ra naha traya can nu ityi. Tan ican nacatsi ra naha tsi ti, naquihin vaha ra naha quiti vaha tsitsi iin tyica, tan javitá ra naha quiti ña vaha can. ⁴⁹ Tan tacan cua cuví quivi naa ñayivi, cua quitsi ángel, quitsi tava siin ra naha tsi nyivi vaha tan nyivi ña vaha. ⁵⁰ Tan cua tyihi ra naha tsi nyivi ña vaha can anyaya nu cayú ñuhu, nu cua vacu tsaa ñi tan cahyu ña cua cuví huhu ñi.

Nu caahán ra Jesús tyin vaha tuhun tsahnu Nyoo tan tuhun tsaa Nyoo

⁵¹ Tacan tan ra Jesús tsica tuhun ra tsi ra tsicá tsihin ra, tan catyí ra tsihin ra naha:

—¿A cutuñi iñi ndo tandihí tsa cahān yu?

Tan nacahān ra naha tan catyí ra naha:

—Cutuñi iñi ndi, Jutu Mañi yu.

⁵² Tacan tan catyí ra Jesús tsihin ra naha:

—Iin ra cuví maestro cuenda ley tsa tsitó maa ra tuhun tsahnu tan tatun cua coto ndihí ra nácaa ndacá ñaha Nyoo tsihin tandihí tuhun tsaa tsa caahán yu, cua cuví ra tumaa iin ra jatsii vehe tan cua jacuaha ra nduvi taahan tuhun vaha can tsi nyivi —catyí ra Jesús.

Nu tsinuhu ra Jesús ñuu Nazaret nu tsañu ra
(Mr. 6.1-6; Lc. 4.16-30)

⁵³ Tsa ndih̄i cahan ra Jesús cuhva ihya tan quit̄a ra cuahán ra. ⁵⁴ Tan tsaag nyico ra ñuu ra. Tan quitsahā jacuahá ra tsitsi vehe ñuhu ñuu can. Tan iyó cuñi nyivi tan catyi ñi:

—¿Nu maa tahan cutuhvā ra ihya tsa tsitó xaan ra? ¿Tan nácaa cuví javaha ra tsa iyó? ⁵⁵ Tyin sehe ra tahví yutun can cuví tsi ra. Tan ña María cuví sihi ra. Tan yañi ra cuví tsi ra Jacobo, ra José, ra Simón tan ra Judas. ⁵⁶ Tan cuhva ra iyó tucu ñi ityi nu iyó yo. Tun tacan, ¿nu maa tahan cutuhvā ra tandih̄i tsa tsitó ra? —catyi ñi.

⁵⁷ Tan yacan cuenda ña cuñi ñi tyaa yahvi ñi tsi ra. Maa tyin ra Jesús catyi ra tsihin ñi:

—Tandih̄i nyivi tandih̄i ñi ityi jahá ñi tsa ñayivi tsi ra ndusu yuhu Nyoo, maa tyin nyivi ñuu ra ña tyaá yahvi ñi tsi ra tan ndi nyivi vehe ra —catyi ra Jesús.

⁵⁸ Tan ña cuaha tsa iyó javahā ra ñuu ra tsa cuenda tyin ña tsinú iñi ñi tsi ra.

14

Nu catyi tsi nácaa tsihi ra Juan, ra jacoondutyā tsi nyivi
(Mr. 6.14-29; Lc. 9.7-9)

¹ Quīvi can ra Herodes, ra ndacá ñaha nicahnu nu cuví Galilea, ñih̄i tuhun ra tsa javahá ra Jesús. ² Tan catyi ra tsihin ra yucú tsihin ra:

—Ra ican cuví ra Juan, ra jacoondutyā tsi nyivi, ra tsa tsihi tan vityin nandotó nyico ra. Yacan cuenda iyó tunyee iñi tsi ra tsa javahá ra tsa iyó.

³⁻⁴ Tacan catyi ra tyin juvin ñi maa ra tavā tyiñu tyin tñin ra naha tsi ra Juan. Tan cuhñi ra naha tsi ra tsihin cadena, tan tyih̄i ra naha tsi ra vehe caa. Tacan javahā ra Herodes tyin xaan cuñi ra tyin catyi ra Juan tyin ña vaha tsa cumí ra tsi ña Herodías tyin ña ican cuví ñasiihi ra Felipe, yañi ra.

⁵ Yacan cuenda ra Herodes cuñi ra cahñi ra tsi ra Juan, maa tyin yuuhvi ra tsi nyivi, tyin tandih̄i ñi tsinú iñi ñi tyin ra Juan, ndusu yuhu Nyoo cuví ra.

⁶ Tan iin quīvi iyó vico ra Herodes, tan sehe ña Herodías quitsahā tsañi ña yaa nu yucú ñi vico can. Tan tahañ xaan iñi ra Herodes. ⁷ Tan catyi ra:

—Naha Nyoo tyin cua cuhva yu náa cua ndacan ñaha tyuvaa ihya tsi yu —catyi ra Herodes.

⁸ Tacan tan natyuhū sihi ña tsi ña, na cahan ña tsihin ra Herodes. Tacan tan catyi ña tyehen tsihin ra:

—Cuhvā jiñi ra Juan, ra jacoondutyā tsi nyivi, tsi yu nu iin coho —catyi ña.

⁹ Tsa tsiñi ra rey Herodes tsa cahan ña, nducuihyā cuñi ra. Maa tyin tsa cuenda tsa cahan ra tyin tandih̄i tsa cua ndacan ña tan cua cuhva ra, yacan cuenda ña cuví jandaví ñaha ra tyin tandih̄i nyivi yucú vico can tan tsiñi ñi tsa cahan ra. Yacan cuenda tavā tyiñu ra na cuhva ra naha jiñi ra Juan tsi ña nu iin coho. ¹⁰ Tan tavā tyiñu ra na cucahnya ra naha jucun ra Juan nu nyii ra vehe caa. ¹¹ Tacan tan tsindacā ra naha jiñi ra Juan tsi ña, nyii tsi nu iin coho. Tan tsañi ra naha tsi ñaha tyuvaa can. Tan maa ña nacuhvā cuenda ña tsi sihi ña.

¹² Tacan tan tsaag ra nyicun tsi ra Juan naha ra tan naquih̄in ra naha cuñu ñuhu ra, tan tyih̄i ra naha tsitsi ñuhu. Yahā can tan tsañan ra naha tsijacoto ra naha tsi ra Jesús.

Nu jacatsi ra Jesús tsi uhun mil rayi
(Mr. 6.30-44; Lc. 9.10-17; Jn. 6.1-14)

¹³ Tsa tsiṭo ra Jesús tsa taḥan ra Juan, quiḥin ra iin yutun ndoo, tan cuahán intuhun ñi maa ra nu taxin caa. Tan tsa tsiṭo nyivi, quiṭa ñi ñuu ñi, tan cuahán tsihin tsaha ñi nu nyii ra. ¹⁴ Tsa quiṭa ra Jesús tsitsi yutun ndoo can, tan nyeḥe ra tyin cuaha xaan nyivi nyicún tsi ra. Tan cundaahvj iñi ra nyeḥe ra tsi ñi. Tan janduvaha ra tsi nyivi cuuhvi tsa tsaḡ tsihin ñi. ¹⁵ Tan tsa cuñi cuaḡ, tacan tan tanuhva ra tsicá tsihin ra Jesús nu nyaá ra, tan catyí ra naha tsihin ra:

—Tsa cueñi xaan, tan yoñi nyivi iyó yatyin ñi ihya. Yacan cuenda vaha ca caḥan un tsihin nyivi ihya na cunuhu ñi nda ñuu cujata ñi tsa catsi ñi —catyí ra naha tsihin ra Jesús.

¹⁶ Tan ra Jesús catyí ra:

—Nduve náa nducu ñi cuhun ñi. Cuhva nyooḥo tsa catsi ñi.

¹⁷ Tan nacahaḥan ra naha tan catyí ra naha:

—Nduve maa náa iyó ihya. Uhun taahan ñi paan, tan uvi taahan ñi tyaca iyó.

¹⁸ Tan catyí ra Jesús:

—Ndaca ndo can tsi yu.

¹⁹ Tacan tan catyí ra tsihin nyivi tyin na cunyecu ñi nu cuhu can. Yaha tsa tsinyecu ñi tan quiḥin ra uhun taahan paan can, tan nduvi tyaca can. Tan nanyehē ndaa ra ityi siqui, tan nacuhva ra tyahvi nyoo tsi Nyoo tan tsahnū catyí ra paan can. Tan tsaha ra tsi ra tsicá tsihin ra, na tsatsa ra naha tsi nyivi can. ²⁰ Tan tandiḥi nyivi tsatsi ñi tan ndaha vaha iñi ñi. Yaha can tan ndoo ca tsa ñahñu, tan jacutu ra naha utsi uvi tyica tsihin tsa ñahñu ican. ²¹ Tan tsa tandiḥi ñi tsa tsatsi can, quiṭa maa tumaa uhun mil tsa maa ñi maa rayii. Tan siin maa ñiñaha tan tsa nyiḥi.

*Nu tsicá ra Jesús nu ndutya
(Mr. 6.45-52; Jn. 6.16-21)*

²² Tsa yaha can tan catyí ra Jesús tsihin ra tsicá tsihin ra, na quiḥvi ra naha tsitsi yutun ndoo, tan na yaha sava ra naha nu miñi can tan cuhun ra naha inga tsiyo. Tan tsitsi tsa cuahán ra can naha ra, ra Jesús ndoo ra tan catyí ra tsihin nyivi tyin na cuhun ñi. ²³ Tsa yaha tsa jacunuhu ra tsi ñi, tan ndaḡ ra yucu can cua ndacan tahvi intuhun ñi maa ra tsi Nyoo. Maa tyin tsitsi tsa nyii ra can tan cuaḡ. ²⁴ Tan tsitsi tsa tsicán tahvi ra tsi Nyoo, yutun ndoo can tsa cuahán cuii tsi nda mahñu miñi. Tan ndutya miñi can cañi tsi tsi yutun ndoo can tsa cuenda tyin ñiḥi xaan yiḥi tatyí nu cuahán ra naha. ²⁵ Tan tsa cua tuvi cuahán ndiḥi ra Jesús nu cuahán ra naha tsihin yutun ndoo can, tan tsicá tsihin tsaha ra cuahán ra nu ndutya. ²⁶ Tan cuhva tsa nyeḥe ra naha tsi ra, tsicá ra nu ndutya can, nayuhvi xaan ra naha. Tan caná tsa ra naha, tan catyí ra naha:

—Jihna ndo xin. Tatyí vatsí can!

²⁷ Maa tyin nacahaḥan ra Jesús tsihin ra naha, tan catyí ra:

—Ña nayuhvi ndo tyin maa yu cuvii! —catyí ra.

²⁸ Tacan tan nacahaḥan ra Pedro tan catyí ra:

—Jutu Mañi yu, tatun maa un vatsí juvin, cuhva tsa quitsi ndiḥi yu nu vatsí un.

²⁹ Tan ra Jesús catyí ra tsihin ra:

—Naha jiin.

Tacan tan quiṭa ra Pedro tsitsi yutun ndoo can, tan quitsaha tsicá ra nu ndutya tan cuahán ra nda nu vatsí ra Jesús. ³⁰ Maa tyin cuhva tsa tuvi iñi ra

tyin ñihi xaan quitsahā yihí tatyí, nayuhví xaan ra, tacan tan quitsahā cuñí nyee ra, tan quitsahā caná tsaá ra tan catyí ra:

—j̄acacu tsi yu, Jutu Mañi yu!

³¹ Tan iin yaha ñi t̄in ra Jesús ndaha ra, tan catyí ra tsihin ra:

—¿Nacuenda tsa nayuhví un, yoocho tsa luxu xaan tsinú iñi tsi yu? —catyí ra Jesús tsihin ra.

³² Tan cuhva tsa quihví ra naha tsitsi yutun ndoo can, cutaxin tatyí can.

³³ Tacan tan ra yucú tsitsi yutun ndoo can tsicuiñi t̄iti ra naha nuu ra Jesús, tan catyí ra naha tsihin ra:

—Nditsa nditsa tyin Sehe Nyoo cuví tsi yoocho —catyí ra naha.

Nu janduvahā ra Jesús tsi nyivi cuuhví tsa iyó Genesaret

(Mr. 6.53-56)

³⁴ Tsa yaha sava ra naha miñi can, tsaā ra naha ñuhu Genesaret. ³⁵ Tan cuhva tsa nacoto nyivi iyó ican tsi ra Jesús tyin juvin ra cuví, jacoto ñi tsi tandihí nyivi iyó tanñi cahnu can. Tan tsindacā ñi tandihí nyivi cuuhví nu nyii ra. ³⁶ Tan caahán ndaahví ñi tsihin ra, na cuhva ra tsa t̄in ñi vasu luxu jahma ra. Tan tandihí ñi tsa t̄in jahma ra, nduvahā ñi.

15

Tsa jativi tsi nyivi nuu Nyoo

(Mr. 7.1-23)

¹ Tacan tan juhva ra cuví fariseo tan ra cuví maestro cuenda ley vehe ñuhu quee ra naha ñuu Jerusalén. Tan tsahān ra naha nu nyii ra Jesús tan tsica tuhun ra naha tsi ra, tan catyí ra naha:

² —¿Nacuenda ña javahá ra tsicá tsihin un naha ra cuhva nacoq̄ tsii tsaahnu yo?, tyin catyí ra ican naha ra tyin iyó iin cuhva ndoo ndaha yo tsa ndi cumañi ca catsi yo, maa tyin ra tsicá tsihin un ña tyaá yahvi ra naha tuhun tsaahnu can —catyí ra naha.

³ Tan tsicā tuhun ra Jesús tsi ra naha, tan catyí ra:

—¿Nacuenda tyaá yahvi xaan ca ndo tuhun tsaahnu tsa iyó ndo tan ña cuñí ndo tyaa yahvi ndo tsa caahán Nyoo? ⁴ Tyin Nyoo catyí ra: “Tyaa yahvi ndo tsi jutu ndo tan tsi sihi ndo, tyin tandihí nyivi tsa caahán ndavaha ñi siqui jutu ñi o sihi ñi, cua cúu ñi”, catyí Nyoo. ⁵ Maa tyin nyoocho catyí ndo tyin cuví catyí ndo tsihin jutu ndo o tsihin sihi ndo tyehen: “Ña cuví jatyinyee yu tsi un tyin tsa tsahā yu tandihí tsa iyó tsi yu tsi Nyoo.” ⁶ Tatun tsa catyí ndo yacan, ña cuñí tsi tsa jatyinyee ndo tsi jutu ndo o tsi sihi ndo, catyí ndo. Tan yacan cuví tsa javahá ndo vityin, tyaá tsiyo ndo tsa caahán Nyoo tan tyaá yahvi xaan ca ndo tuhun tsaahnu tsa iyó ndo. ⁷ ¡Nyoocho cuñí ndo tyin vaha xaan ndo, maa tyin ña nditsa ndo! Nditsa tsa caahān ra Isaías, ra cuví ndusu yuhu Nyoo, siqui ndo jahā Nyoo. Tan catyí ra tyehen:

⁸ Nyivi ihya, jacahnú ñi tsi yu tsihin yuhu ñi.

Maa tyin ñavin tsihin tsa ñi iñi ñi.

⁹ Yacan cuenda nduve yahvi nyaá jacahnú ñi tsi yu.

Tyin maa ñi tuhun caahán jacuahá ñi, tan ñavin tuhun yu jacuahá ñi.

Catyí ra Isaías tuhun ndo jahā Nyoo, catyí ra Jesús tsihin ra ican naha ra.

¹⁰ Tacan tan canā ra Jesús tsi nyivi tan catyí ra tsihin ñi:

—Tyaa soho ndo tsa caahán yu, tan ndūcu ndo cuhva cutuñi iñi ndo. ¹¹ Tyin nyivi tsa tiví nuu Nyoo, ñavin tsa quihví yuhu ñi jativi tsi ñi. Tyin tiví ñi jahá tsa quitá yuhu ñi.

¹² Tacan tan natuhvꝫ ra tsa tsicá tsihin ra Jesús tan catyí ra naha tsihin ra: —¿A tsitó un? Ra fariseo naha ra ndasi xaan cuñi ra naha tsa tsiñi ra naha tsa cahꝫ un.

¹³ Tan maa ra Jesús nacahꝫ ra tan catyí ra:

—Tandihí yutun tsa ña tatsi Jutu yu, ra nyaá gloria, cua tuhun ra nda cuanda yoho tun. ¹⁴ Jaña ndo tsi ra fariseo naha ra tyin ra cuaa cuví ra naha, tan janahá ra naha ityi tsi inga ra cuaa. Tan tatun iin ra cuaa tan janahá ra ityi tsi inga ra cuaa, nduvi taahan ra naha cua nacava ra naha tsitsi yavi —catyí ra Jesús.

¹⁵ Tacan tan quitsahaꝫ catyí ra Pedro tsihin ra Jesús:

—Catyí tuhun tsihin ndi náa cuñi tsi catyí tsa cahꝫ un nañi.

¹⁶ Tacan tan ra Jesús catyí ra tsihin ra naha:

—Ndi nyooho tan ña cutuñi ndihí iñi ndo. ¹⁷ ¿A ña cutuñi iñi ndo tyin tsa tsatsi yo, tsitsi yo cuahán tsi? Yahaꝫ can tan cua quita nyico tsi. ¹⁸ Maa tyin tuhun tsa quitá yuhu yo, tsitsi añima yo queé can tan nyivi tiví ñi nuu Nyoo jahá tsa caahán ñi. ¹⁹ Tyin tsa caquiñi tsicá iñi ñi tsitsi añima ñi quitá can, tan cuñi ñi cahñi ñi nyivi. Cuñi ñi suhu ñi. Yihí nyivi caahán ñi cuendu, o jacuñi nyaá ñi tsi inga ca nyivi. Yihí ra cuñi ra coo inga ñaha ra, o ñiñaha iyó y# tsicá nuu ñi tsihin inga ray#i. Yihí ra tsicoó ra tsihin ñaha tan ña tindaha ra tsihin ña. Tan yihí ray#i quixí ra tsihin juven ñi maa ray#i. Tan ñiñaha yihí ñi quixí ñi tsihin juven ñi maa ñaha. Tan tandihí ca maa tsa caquiñi tsa javahá ñi tsihin cuñu ñuhu ñi. ²⁰ Yacan cuví tsa jatíví tsi nyivi nuu Nyoo. Tyin tsa ña nacatyá ñi ndaha ñi tsa ndi cumañi ca catsi ñi, ña jatíví can tsi ñi —catyí ra Jesús.

Nu tsinu iñi iin ñaha inga ñuu tsi ra Jesús

(Mr. 7.24-30)

²¹ Quitá ra Jesús ñuu can tan cuahán ra ityi ñuu Tiro tan Sidón. ²² Tan ityi can iyó iin ñaha Canaán. Tan tsa nyehé ña tsi ra Jesús natuhvꝫ ña nu nyaá ra tan caná tsa ña tan catyí ña:

—Jutu Mañi yu, tata ra David, cundaahvi iñi tsi yu, tyin sehe yu yihí tatyí ña vaha tsi ña, tan nyehé xaan ña tundoho jahá nu —catyí ña tsihin ra Jesús.

²³ Maa tyin tumaa tsa ña tsiñi ñi ra Jesús jahá ra tsi ra tan ña nacahꝫ ra tsa iin yaha ñi. Tacan tan natuhvꝫ ra tsicá tsihin ra tan catyí ra naha tsihin ra:

—Cahan tsihin ña na cunuhu ña tyin utsan xaan yo tsa caná tsa ña tsata yo.

²⁴ Tacan tan catyí ra Jesús tsihin ra naha:

—Vatsí yu jahꝫ Nyoo ñuu Israel tyin naquihin ndaahvi yu nyivi ñuu can tsa cuví ñi tumaa mbee tsa cuanaá. Tan tsa cuenda nyivi can vatsí yu.

²⁵ Tan ñaha can natuhvꝫ ña nu nyaá ra tan tsicuñi tsiti ña nuu ra, tan catyí ña tsihin ra:

—Jutu Mañi yu, jꝫatyinyee tsi yu!

²⁶ Tan ra Jesús catyí ra tsihin ña:

—Ña vaha tsa quihin nyaá yo paan yuhu sehe yo, tan cuhva yo catsi ina —catyí ra tsihin ña.

²⁷ Maa tyin ña ndasi cuñi ña tsa cahꝫ ra, tan catyí ña tsihin ra:

—Nditsa, Jutu Mañi yu. Maa tyin nda cuanda ina tan tsatsi ti titsehe tsa cucoyoꝫ xuu mesa tsitoho ti —catyí ña.

²⁸ Tacan tan catyí ra Jesús tsihin ña:

—Yooho ñaha, tsinú xaan iñi un tsi yu. Na cuví maa cuhva tsicá iñi un.

Tan juvin ñi cuhva can tan nduvahā sehe ña.

Nu cuaha xaan nyivi cuuhví janduvahā ra Jesús

²⁹ Tsa yahā yacan tan ra Jesús cuahán ra ityi yuhu miñi Galilea, tan ndaa ra iin jiñi yucu tan ican tsinyaā ra. ³⁰ Tan cuaha xaan nyivi cuahán ñi nu nyaā ra cuandacá ñi nyivi cuuhví tyin janduvaha ra tsi ñi. Yihí ñi coxo ñi, cuaa ñi, ñiñi ñi, lundu ñi. Tan yihí ñi yihí inga ca nu cuehe tsi ñi. Tan tsaquñ nyecu ñi tsi tandihí ñi cuuhví can nu nyaā ra Jesús. Tan janduvahā ra tsi ñi. ³¹ Tan iyo xaan cuñi nyivi can nyehé ñi tyin nacahan ñi ñiñi tan nduvahā ñi lundu, tan nacacá ñi coxo, tan nanyehé ñi cuaa. Tan quitsahā jacahnu xaan ñi tsi Nyoo ñi, tsa cuví ñi nyivi Israel.

Nu tsahá ra Jesús tsa catsi cumi mil rayi

(Mr. 8.1-10)

³² Tacan tan canā ra Jesús tsi ra tsicá tsihin ra, tan catyí ra tsihin ra naha:

—Ndaahvi xaan cuñi yu nyehé yu tsi nyivi ihya, tyin tsa uñi quivi yucu ñi ihya tsihin yo, tan nduve náa catsi ñi. Tan ña cuñi yu jacunuhu yu tsi ñi yuvehé ñi tyin ñaha ca catsi ñi, tan coto cúu naaha ñi ityi cuanuhú ñi —catyí ra Jesús.

³³ Tacan tan ra tsicá tsihin ra catyí ra naha tsihin ra:

—¿Tan numaa cua ñiñi yo tsa catsi nyivi cuaha ihya, tyin ihya nduve nyivi iyó?

³⁴ Tacan tan ra Jesús tsicā tuhun ra tsi ra naha tan catyí ra:

—¿Najava taahan paan ndahá ndo?

Tan catyí ra naha:

—Utsa taahan ñi, tan uvi taahan ñi tyaca nyihi.

³⁵ Tan catyí ra tsihin nyivi na cunyecu ñi nu ñuhu. ³⁶ Tacan tan quihñ ra tsa utsa paan can tan tyaca can, tan nacuhvā ra tyahvi nyoo tsi Nyoo. Tan quitsahā tsahnú cuatyí ra paan tsihin tyaca, tan tsahā ra tsi ra tsicá tsihin ra tyin na tsatsa ra naha tsi nyivi. ³⁷ Tandihí ñi tsatsí ñi, tan ndahā vaha iñi ñi. Tan tsa ndihí tsatsí ñi tan naquihñ ra naha tsa ñahñu tsa ndoo can tan quitā utsa tyica cuví tsi. ³⁸ Tan ra tsa tsatsí can naha ra quitā maa cumi mil ra naha tan siñ maa ñiñaha tan tsa nyihi. ³⁹ Yahā can tan jacunuhu ra tsi ñi, tan quihvñ ra tsitsi yutun ndoo, tan cuahán ra ityi Magdala.

16

Ra cuví fariseo naha ra tan ra cuví saduceo naha ra tsicán ra naha tsi ra Jesús na javaha ra iin tsa iyo

(Mr. 8.11-13; Lc. 12.54-56)

¹ Tacan tan ra fariseo naha ra tan ra saduceo naha ra tsahan ra naha nu nyii ra Jesús, tyin cuñi ra naha nducu cuhva ra naha tsi ra. Tan catyí ra naha na javaha ra iin tsa iyo tsihin tunyee iñi Nyoo. ² Maa tyin nacahan ra Jesús tan catyí ra tsihin ra naha:

—Tsa cueñi, tuhvá ndo catyí: “Siñ xaan caa ityaan cua cuvi tyin cuaaha xaan nu vico”. ³ Tan tsa tuvi catyí tucu ndo tyin ña siñ maa caa cua cuvi, tyin iñi naaha xaan tan cuaaha xaan vico, catyí ndo. ¿Nacuenda tyin tsitó tucu ndo yacan tan tsa cuví vityin ña cuví nacoto ndo, nyooho ra jandaví ñaha? ⁴ Nyivi tsa iyó vityin, quiñi xaan iyó ñi tan ña tsinú iñi ñi tsi Nyoo. Maa ñi tsa iyo cuñi ñi nyehe ñi. Maa tyin yuhu ña cua javaha yu tsa iyo nyehe ñi, tyin tumaa tsa

cuvj tsi ra Jonás, yacan ña cua nyehe ñi —catyí ra Jesús tsihin ra naha; tsahan cuahán ra.

Tuhun caahán ra fariseo naha ra cuví tsi tumaa yutsan iya
(Mr. 8.14-21)

⁵ Cuhva tsa yahá ra tsicá tsihin ra Jesús inga tsiyo miñi can, nducuhun iñi ra naha tyin nduve paan tsa catsi ra naha ndahá ra naha. ⁶ Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo tan ra saduceo naha ra —catyí ra tsihin ra naha.

⁷ Tacan tan quitsahá natuhún tahan ra naha tan catyí ra naha:

—¿A ñavin tyin nduve paan ndahá yo catsi yo, yacan cuenda caahán ra tyehen tsihin yo? —catyí ra naha.

⁸ Tan tsa tuvj iñi ra Jesús tsa tsicá iñi ra naha, catyí ra tsihin ra naha:

—Nyooho tsa luxu ñi tsinú iñi tsi yu, ¿nacuenda tyin tsicá xaan iñi ndo tyin nduve tsa catsi ndo ndahá ndo? ⁹ ¿A ñaha ca cutuñi iñi ndo? ¿A ña nducuhún iñi ndo quivi tsa jacatsj yu tsi uhun mil rayii tsihin uhun taahan ñi paan, tan najava taahan tyica jacutu ndo tsihin tsa ñahñu tsa ndoo can? ¹⁰ ¿A tsa naá ndihi tucu iñi ndo quivi tsa jacatsj yu cumi mil rayii, tan najava taahan tyica jacutu ndo tsihin tsa ndoo tsa utsa taahan ñi paan? ¹¹ ¿Nacuenda ña tuví iñi ndo tyin ñavin tuhun paan caahán yu tsa catyí yu tyin na jaha ndo cuenda tsi ndo tsihin yutsan iya ra fariseo tan ra saduceo naha ra? —catyí ra Jesús tsihin ra naha.

¹² Tacan tan cutuñi iñi ra naha tyin ñavin tsa cuenda yutsan iya paan can caahán ra, maa tyin na jaha ra naha cuenda tsi ra naha tsihin tsa jacuahá ra fariseo tan ra saduceo naha ra.

Nu catyí ra Pedro tyin ra Jesús cuví ra Cristo, ra jacacú tsi yo
(Mr. 8.27-30; Lc. 9.18-21)

¹³ Cuhva tsa tsaá ra Jesús itiyi ñuu Cesarea Filipa, tsicá tuhun ra tsi ra tsicá tsihin ra tan catyí ra:

—¿Náa catyí nyivi? ¿Yoo ra cuví yu, Rayii tsa quee nda gloria? —catyí ra.

¹⁴ Tan nacahan ra naha tan catyí ra naha:

—Yihí nyivi catyí ñi tyin ra Juan ra jacoondutya tsi nyivi cuví un. Tan inga nyivi catyí ñi tyin ra Elías cuví un, tan yihí tucu ñi catyí ñi tyin ra Jeremías, o inga ra cuví ndusu yuhu Nyoo tahan tsanaha cuví un.

¹⁵ Tacan tan catyí ra tsihin ra naha:

—Tan nyooho, ¿yoo ra cuví yu, catyí ndo?

¹⁶ Tacan tan nacahan ra Simón Pedro tan catyí ra:

—Yooho cuví ra Cristo, Sehe Nyoo nyitó —catyí ra.

¹⁷ Tan nacahan ra Jesús tan catyí ra:

—Sii xaan cuví tsi yooho, Simón, sehe ra Jonás, tyin ñavin nyivi janahá tuhun ihya tsi un, tyin maa Jutu yu, ra nyaá gloria janahá tsi un. ¹⁸ Tan yuhu catyí yu tsihin un tyin yooho cuví ra Pedro. Tan siqui cava ihya, cua javaha yu vehe ñuhu yu. Tan ña cua tani tsi jaha tuhun tsihi. ¹⁹ Yuhu cua cuhva yu ndaha tucu tsa cuenda nu ndacá ñaha Nyoo tsi un. Tan tandihi tsa cuhñi un ihya nu ñuhu ñayivi, tsa nuuhñi jahá Nyoo nda gloria. Tan tandihi tsa ndatsi un ihya nu ñuhu ñayivi, tsa ndatsi maa Nyoo nda gloria.

²⁰ Tacan tan catyí ra Jesús tsihin ra tsicá tsihin ra tyin ña cahan ra naha tsihin nyivi tun juvin ra cuví ra Cristo ra tsa quee nu nyaá Nyoo.

*Nu caahán ra Jesús tyin cua cahñi nyivi tsi ra
(Mr. 8.31—9.1; Lc. 9.22-27)*

²¹ Nda quivi can quitsaha catyí ra Jesús tsihin ra tsicá tsihin ra, tyin cuñi tsi tsa cuhun ra ñuu Jerusalén. Tan ra cuví mandoñi naha ra, tan ra jutú tsa cuví ityi nuu naha ra, tan ra maestro cuenda ley vehe ñuhu naha ra, tan cua janyehe xaan ra naha tundoho tsi ra. Tan catyí ra tyin cua cahñi ra naha tsi ra, maa tyin tsa tsinu uñi quivi cua nandoto ra inga tsaha. ²² Tacan tan quihin ra Pedro tsi ra tan quitá sñin ra tsihin ra tan quitsaha caahán ra tsihin ra Jesús tyin ña vaha tsa caahán ra tan catyí ra:

—Na ña cuhva Nyoo tsa tahan un tacan, Jutu Mañi yu —catyí ra.

²³ Tan nanyico coo ra Jesús, tan quitsaha caahán ra tsihin ra Pedro:

—¡Jatsiyo nyaha tsi un, cuihna! Tyin cuñi un casi un tsi yu. Tyin yooho ña tsicá ñi un cuhva cuñi Nyoo, tyin cuhva cuñi nyivi tsicá ñi un —catyí ra.

²⁴ Tacan tan ra Jesús catyí ra tsihin ra tsicá tsihin ra:

—Tatun ndáa nyooho cuñi cunycun tsi yu, cahnya ñi ndo tsa cuñi maa ndo javaha ndo, tacan tan cuví javaha ndo tsa cuñi Nyoo. Tan ña cua ndu uvi ñi ndo tsa yihí ndo cuenda yu, vasu tandihí quivi nyehé ndo tundoho. Tyin yacan cuví cruu tsa taahán tsi cuiso ndo tatun cua cunycun ndo tsi yu.

²⁵ Tan nyooho tsa ña cuñi nyehé tundoho, tan ña cuñi ndo cuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi ndo tsa cuenda yu, cua cacu ndo. ²⁶ Tyin nduve yahvi nyaá tsa cua ñihi ndo tandihí tsa iyó nu ñuhu ñayivi tun aña ndo tan ña cua cacu tsi. Tyin nduve maa náa tsihin tan cuví tyahvi ndo tan ña cua cunaa aña ndo. ²⁷ Tyin yuhu, Rayi tsa quee nda gloria, cua quitsi nyico yu inga tsaha, maa tyin tsihin tsa cahnu cuví Jutu yu, tan cua quitsi ángel tsihin yu. Tacan tan cua tyahvi yu tsi intuhun intuhun ndo tsa cuenda tsa javaha ndo. ²⁸ Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehe ndo nu vatsí yu tsa cua cundaca ñaha yu, tsa ndi cumañi ca cúu ndo —catyí ra Jesús.

17

*Nu nyehe uñi taahán ra tsicá tsihin ra Jesús nácaa tsa sñi caá xiñu ra Jesús nu ndacá ñaha ra nda gloria
(Mr. 9.2-13; Lc. 9.28-36)*

¹ Tan tsa yaha ñu quivi, tan quihin ra Jesús tsi ra Pedro tan ra Jacobo, tan ra Juan yañi ra Jacobo. Tan cuahán ra iin yucu sucun xaan tsihin ra naha.

² Tan ican nasama cuhva caá ra Jesús nuu ra yucú tsihin ra. Tan xiñu xaan nuu ra cuví tumaa xiñu ñicanyii. Tan jahma ra cuitsin xaan tsi cuví tumaa cuitsin ñuhú. ³ Tacan tan nyehe ra naha tsi ra Moisés tan ra Elías, natuhún ra naha tsihin ra Jesús. ⁴ Tan quitsaha caahán ra Pedro tsihin ra Jesús, tan catyí ra:

—Jutu Mañi yu, vaha xaan tyin yucú ndi ihya. Tatun cuñi un, javaha ndi uñi taahan tyahva, iin tsi tsi maa un, tan inga tsi tsi ra Moisés, tan iin tsi tsi ra Elías —catyí ra Pedro tsihin ra Jesús.

⁵ Tsitsi tsa caahán ra Pedro, quitsi iin vico tsa xiñu xaan siqui ra naha. Tan tyasí tsi tsi ra naha. Tan tsifñi ra naha iin ndusu tsa caahán tsitsi vico can tan catyí tsi tyehen:

—Ra ihya cuví Sehe yu, tan cuñi xaan yu tsi ra. Tan sñi xaan cuñi yu tsihin ra. Tyaa yahvi ndo tsa caahán ra —catyí ndusu can.

⁶ Tsa tsiñi ra tsicá tsihin ra Jesús tuhun ihya, tsicava tsihin nuu ra naha nda nu ñuhu, tyin nayuhvi xaan ra naha. ⁷ Tacan tan natuhva ra Jesús nu cayucú ra naha, tan tñin ra tsi ra naha, tan catyí ra:

—Ndúvita ndo, tan ña nayuhvi ndo.

⁸ Tan cuhva tsa nanyehé ra naha, intuhun ña ra Jesús nyaá, tan nduve inga uvi ca ra naha.

⁹ Tan cuhva tsa vatsí nuu ra naha yucu can, catyí ra Jesús tsihin ra naha:

—Ña cahan ndo tsa nyehe ndo ihya tsihin nyivi. Tsa yaha tsa cúu Rayi tsa quee nda gloria tan nandoto ra, tacan tan cua cahan ndo can —catyí ra.

¹⁰ Tacan tan tsicá tuhun ra tsicá tsihin ra tsi ra, tan catyí ra naha:

—¿Nacuenda tyin ra maestro cuenda ley vehe ñuhu naha ra caahán ra naha tyin jihna ca ra Elías taahán tsi quitsi?

¹¹ Tan nacahan ra Jesús tan catyí ra:

—Tsa nditsa tyin jihna ca ra Elías cua quitsi tan cua janduvaha ra tandihi.

¹² Maa tyin yuhu catyí yu tsihin ndo tyin tsa yaha quitsi ra Elías, tan ña nacoto nyivi tsi ra, tan javaha ñi tsihin ra tandihi cuhva cuñi maa ñi. Tan tacan tucu yuhu, Rayi tsa quee nda gloria, cua janyehé ñi tundoho tsi yu —catyí ra tsihin ra naha.

¹³ Tacan tan cutuñi iñi ra naha tyin tuhun ra Juan, ra jacoondutya, caahán ra Jesús.

Nu janduvaha ra Jesús tsi iin ra luhlu tsa tsiihi naaha jahá tatyí ña vaha (Mr. 9.14-29; Lc. 9.37-43)

¹⁴ Cuhva tsa tsaá ra naha nu yucú nyivi, natuhva iin ra tan tsi cuiñi tsi ti ra nuu ra Jesús, tan catyí ra tsihin ra:

¹⁵ —Tata, cundaahvi iñi tsi sehe yu, tyin yihí cuehe tsiihi naaha tsi ra, tan tuhvá ra nduva ndasava, tan cuaha xaan tundoho nyehé ra jahá cuehe can. Tan yihí tsaha nduvá ra nu ñuhu tan cayú ra, tan nduvá tucu ra nu yihí ndutya. ¹⁶ Tan tsindaca yu tsi ra tsi ra tsicá tsihin un, maa tyin ña cuví janduvaha ra naha tsi ra —catyí ra.

¹⁷ Tan nacahan ra Jesús tan catyí ra:

—¿Nyooho, nyivi tsa ña tsinú iñi cuví ndo! ¿Tan caquiñi ndo! ¿Ndáa nda quivi cua cunyi yu tsihin ndo? ¿Tan ndáa nda quivi cua cunyeé iñi yu tsihin ndo, tyin nyooho ña tsinú vaha maa iñi ndo tsi yu? Tñindaca ndo tsi ra luhlu tsi yu —catyí ra.

¹⁸ Tacan tan tava ra Jesús tsi nu tatyí ña vaha can, tan quitá nu tsi ra luhlu can. Tan juvin ñi cuhva can nduvaha ra.

¹⁹ Tsa yaha can tan tsicá tuhun siin ra tsicá tsihin ra Jesús tsi ra tan catyí ra naha:

—¿Nacuenda tyin nyuhu ña cuví tava ndi tatyí ña vaha can?

²⁰ Tan ra Jesús nacahan ra tan catyí ra:

—Tyin luxu cuiñi ñi tsinú iñi ndo tsi yu. Tsa nditsa catyí yu tsihin ndo tyin tun tsinú iñi ndo tsi yu, tumaa iin tsi ti mostaza, cuví catyí ndo tsihin yucu ihya na catsiyo tsi tan cuhun tsi inga ityi, tan yucu ihya cuhun tsi inga ityi. Tan nduve tsa ña cua cuví javaha ndo tatun nditsa tsa tsinú iñi ndo tsi yu.

²¹ Maa tyin tahan tatyí ña vaha can, quita nu maa ñi tsihin tsa coonyitya yo tan ndacan tahvi yo tsi Nyoo —catyí ra Jesús tsihin ra naha.

Inga tsaha cahan ra Jesús tsa cua cahñi nyivi tsi ra (Mr. 9.30-32; Lc. 9.43-45)

²² Yucú ra naha Galilea can, tan ra Jesús catyí ra tsihin ra naha:

—Yuhu, Rayi tsa quee nda gloria, iin ra cua nacuhva cuenda ra tsi yu tsi ra xaan iñi tsi yu naha ra. ²³ Tan cua cahñi ra naha tsi yu. Maa tyin tsa tsinu uñi quivi tan cua nandoto yu —catyí ra.

Tsa tsiñi ra naha tuhun ihya, cuiihya xaan cuñi ra naha cuvi.

Nu tyahvi ra naha cuenda tsa nduvaha vehe ñuhu cahnu

²⁴ Cuhva tsa tsaq ra Jesús tan ra tsicá tsihin ra ñuu Capernaum, ra tavá xuhun cuenda vehe ñuhu naha ra, tsaḥan ra naha tsinyeḥe ra naha nu nyii ra Pedro tan tsicá tuhun ra naha tsi ra tan catyí ra naha:

—¿A ña tuhvá ra jacuahá tsi ndo tyahvi xuhun tsa cuenda vehe ñuhu cahnu? —catyí ra naha tsihin ra Pedro.

²⁵ Tan nacahān ra Pedro tan catyí ra:

—Tuhvá ra.

Tan tsa quihvi ra Pedro tsitsi vehe nu iyó ra naha, jihna ca ra Jesús nacahān tan catyí ra:

—¿Nacaa cuñi yooho, Simón? ¿Yóo tsi quihín ra cuvi rey tsa iyó nu ñuhu ñayivi ihya yahvi? ¿A tsi nyivi ñuu maa ra o tsi inga nyivi?

²⁶ Nacahān ra Pedro tan catyí ra:

—Tsi inga nyivi.

Tan catyí ra Jesús tsihin ra:

—Tun tacan, nyivi ñuu maa ra ña taahán tsi tyahvi ñi. ²⁷ Maa tyin ña cuñi yo tsa cahān ra naha siqui yo, yacan cuenda vaha ca tsa cuhun un yuhu miñi can, tan jacuhun un yiqui tucu un tsitsi ndutya. Tan tyaca tsa cua ñihi un tsa jihna ñi, tsitsi yuhu ti cua ñihi un xuhun. Tan tsihin yacan ñi cua tyahvi un tsa cuenda yo —catyí ra Jesús tsihin ra Pedro.

18

Nu janahq ra Jesús yóo ra cahnu ca cuvi nuu tandihi nyivi tsa ndacá ñaha Nyoo

(Mr. 9.33-37; Lc. 9.46-48)

¹ Quivi can natuhva ra tsicá tsihin ra Jesús nu nyaá ra, tan tsicá tuhun ra naha tsi ra tan catyí ra naha:

—¿Yóo ra cahnu ca cuvi nu ndacá ñaha Nyoo?

² Tacan tan ra Jesús canq ra tsi iin ra luhlu, tan tyaaq ra tsi ra mahñu ra naha.

³ Tan catyí ra:

—Tsa nditsa catyí yu tsihin ndo, tyin tatun nyooho tan ña cua nasama ndo cuhva iyó ndo tan ña janduluhlu ndo tsi ndo tumaa ra nyihi, ña cua cuvi quihvi ndo nu ndacá ñaha Nyoo. ⁴ Tyin ra tsa cahnu ca cuvi nuu Nyoo, juvin ra cuvi ra tsa janduhlú tsi, tumaa ra luhlu ihya. ⁵ Nyivi tsa naquihín tsi iin nyivi tumaa ra luhlu ihya, tyin tsinú iñi ñi tsi yu, yuhu naquihín cuenda ñi.

Nu caahán ra Jesús tsihin yo nácaa jaha cuenda yo tsi yo coto javaha yo tsa ña vaha

(Mt. 5.29-30; Mr. 9.42-48; Lc. 17.1-2)

⁶ Tatun yóo nyivi natyuhú tsi iin nyivi tsa ñaha ca tsinú vaha iñi tsi yu, na javaha ñi tsa caquiñi, vaha ca na cunuhñi iin yuu yoso vee jucun ñi natyuhú can, tan cujanehñi nyivi tsi ñi nu cunu ndutya ñuhu. ⁷ ¡Ndahvi nyivi ñuu ñayivi, tyin tacan iyó tsa jativi tsi ñi! ¡Tan ndahvi tucu ra ndaahvi tsa jativi tsi ñi!

⁸ Yacan cuenda tatun ndaha un o tsaha un javahá tsa ña vaha, cahnya can tan javita un. Tyin vaha ca quihvi un nu coo un tsihin ñahu tsihin tsa lundu ndaha un o lundu tsaha un, tan ñavin ca tsa nani un tan jacuhun Nyoo tsi un

nu cayú ñuhu tsa ña cua ndahva maa. ⁹ Tun javahá un tsa ña vaha jahá tinuu un, tava can tan javita un. Tyin vaha ca quihvi un nu coo un tsihin Nyoo tsihin intuhun tinuu un, tan ñavin ca tsa jacahun Nyoo tsi un tsihin nduvi tinuu un nu cayú ñuhu tsitsi anyaya.

*Nu cahān ra Jesús tyin tumaa mbee tsa cunaq, tacan cuví yo
(Lc. 15.3-7)*

¹⁰ Ña caca iñi ndo tyin ra nyihi cuenda yu ihya nduve yahvi nyaá ra naha nuu Nyoo, tyin yuhu catyí yu tsihin ndo tyin cahnu ca cuví ra naha tyin ángel jahá cuenda tsi ra naha nduvi tan niñu, nyecú ra naha nuu Jutu yu, ra nyaá gloria. ¹¹ Tyin yuhu, Rayi tsa quee nda gloria, vatsí jacacu yu tsi nyivi tsa cuanaa.

¹² ¿Nacaa cuñi nyooho? Tatun iin ra tan iyó iin cientu mbee jana ra, tan cunaa intuhun ti, ¿a ña nacoo ra tsa cumi xico tsahun cumi ti nu yucú ti, tan cuhun ra cunanducu ra tsi quití tsa cuanaa can? ¹³ Tan tatun nañihi ra tsi ti, tsa nditsa tyin sii ca cua cuñi ra tsihin quití can, tan ñavin ca tsihin tsa cumi xico tsahun cumi quití tsa ña tsinaa. ¹⁴ Tan tacan tucu, Jutu yo ra nyaá gloria, ña cuñi ra tsa cunaa ndi intuhun nyivi tsa cuví tumaa ra nyihi ihya.

*Nacaa taahán tsi jahá tahan yo tucahnu iñi tsi yo
(Lc. 17.3)*

¹⁵ Tatun ra yañi un tan javahá ra tsa ña vaha tsi un, cahān tsihin intuhun ñi maa ra tan catyí un tsihin ra tyin ña vaha cuhva javahá ra. Tan tatun tyaa yahvi ra tuhun caahán un, tsa jahá canaa un tsi ra inga tsaha cuenda Nyoo cuví can. ¹⁶ Maa tyin tatun ña tyaa yahvi ra tsi un, tacan tan çana un tsi iin o uvi ra tyin cuví ra naha tsa ndaa tsa cuenda tsa cua cahān un tsihin ra can. ¹⁷ Tatun ña tyaa yahvi ra ndi maa tsi ra tsa tsahān tsihin un naha ra, tacan tan cahān tsihin tandihi nyivi yucú vehe ñuhu. Tan tatun ña tyaa yahvi ra tsi ñi vehe ñuhu, tacan tan jaha ndo tumaa tsa ñavin ra yihí tuhun Nyoo cuví ra tan cuví ra tumaa ra caquiñi tsa tavá xuhun cuenda ra ndacá ñaha nda ñuu Roma.

¹⁸ Tsa nditsa catyí yu tsihin ndo, tyin tandihi tsa cuhñi ndo ihya nu ñuhu ñayivi, tsa nuuhñi tsi jahá maa Nyoo nda gloria. Tan tandihi tsa ndatsi ndo ihya nu ñuhu ñayivi, tsa ndatsi maa Nyoo nda gloria.

¹⁹ Tan juvin ñi catyí tucu yu tsihin ndo, tatun uvi ndo ihya nu ñuhu ñayivi, tan tsa natuhun tahan ndo tan tsicán ndo tsi Jutu yu, ra nyaá gloria, cua cuhva ra yacan tsi ndo. ²⁰ Tyin nu yucú uvi o uñi nyivi tan jacahnú ñi tsi yu, ican nyaá yu mahñu ñi —catyí ra Jesús.

²¹ Tacan tan tsahān ra Pedro tsindacá tuhun ra tsi ra Jesús tan catyí ra: —Jutu Mañi yu, tatun ra yañi yu tan javahá ra tsa ña vaha tsihin yu, ¿najava taahan tsaha taahán tsi jaha yu tucahnu iñi tsi ra? ¿A utsa taahan tsaha?

²² Tan nacahān ra Jesús tan catyí ra:

—Catyí yu tsihin un tyin ñavin utsa taahan ñi tsaha; nda cumi cientu cumi xico utsi tsaha taahán tsi jaha un tucahnu iñi.

Nu cahān ra Jesús iin cuhva cuenda iin ra tsa ña cuñi jaha tucahnu iñi

²³ Yacan cuenda tsa ndacá ñaha Nyoo tsi nyivi cuví tsi tumaa iin rey tsa nacanā tsi tandihi musu ra tyin cua nyehe ra nácaa nyaá cuenda ra naha tsi ra. ²⁴ Tan cuhva tsa quitsahā natavá ra cuenda, tan tsindacá ra tsi iin musu tsa cuaha millón pesu nyaá cuenda tsi ra. ²⁵ Tan musu can nduve náa tsihin tyahvi ra tsi tsitoho ra, yacan cuenda tsitoho ra catyí: “Xico ndo tsi ra iin cahnu ñi tsihin ñasiihi ra, tan tsihin sehe ra tan tandihi tsa iyó tsi ra tan tsihin

xuhun quita can cua tyahvi ra tsa nyaá cuenda ra tsi yu.”²⁶ Tacan tan musu can tsicuiñi tsiiti ra nuu tsitoho ra, tan cahān ndaahvi ra tsihin ra, tan catyí ra: “Tata, jaha tumañi iñi, cuatu un luxu, tan tyahvi yu tandihi tsa nyaá cuenda yu tsi un nda ñihi yu xuhun”, catyí ra.²⁷ Tan cundahvi iñi tsitoho ra tsi ra, tan jahā ra tucahnu iñi tsi ra, tan janaā ra tandihi tsa nyaá cuenda ra, tan jandoo nuña ra tsi ra.²⁸ Maa tyin cuhva tsa quita musu can, nañihi ra tsi iin ra vaha iñi tsi ra tsa cuví musu tumaa maa ra. Tan ra vaha iñi can nyaá cuenda ra luxu ñi tsi ra. Tan tiñ ra tsi ra can, tan quitsaha tiñ ra jucun ra, tan catyí ra tsihin ra: “Tyahvi tsa nyaá cuenda un tsi yu.”²⁹ Tacan tan tsicuiñi tsiiti ra can nuu ra, tan cahān ndaahvi ra tsihin ra tan catyí ra: “Cuatu luxu tan nda ñihi yu xuhun tan cua tyahvi yu tandihi tsa nyaá cuenda yu tsi un”, catyí ra.³⁰ Maa tyin maa ra ña cuñi ra cuatu ra, tan tsahān ra tsityihi ra tsi ra can vehe caa nda cuanda tsa tyahvi ra tsa nyaá cuenda ra tsi ra.³¹ Tsa nyehe inga ca musu tsa javahā ra, cuiihya xaan cuñi ra naha, tan tsahān ra naha tsinacatyí tuhun ra naha tsihin tsitoho ra naha tsa ña vaha tsa javahā ra can.³² Tacan tan tsitoho ra can tava tyiñu ra na quitsi ra can. Tan tsa tsaā ra, tan catyí ra tsihin ra: “Musu ña vaha cuví un. Yuhu jahā yu tucahnu iñi tandihi tsa nyaá cuenda un tsi yu, tyin cahān ndaahvi un tsihin yu.”³³ Tacan cuñi tsi tsa cundaahvi iñi un tsi ra vaha iñi tsi un tumaa tsa cundaahvi iñi maa yu nyehe yu tsi un”, catyí ra tsihin ra.³⁴ Tan cuxaān xaan tsitoho ra, tan tava tyiñu ra na tatsi tuñi ra naha tsi ra nda cuanda tsa tyahvi ra tandihi tsa nyaá cuenda ra.

³⁵ Tan nu ndihi cahān ra Jesús, tan catyí ra tyehen:

—Tacan cua javaha tucu Jutu yu, ra nyaá gloria, tsihin nyooho tatun ña jaha ndo tucahnu iñi tsi nyivi ndo tsihin tsa ñi iñi aña ndo.

19

*Nu caahán ra Jesús tyin ña vaha tsa nacoo ihñi rayi tsi ñasihi ra
(Mr. 10.1-12; Lc. 16.18)*

¹ Tsa yahā tsa cahān ra Jesús tuhun ihya, tan quita ra cuenda Galilea can, tan cuahán ra cuenda Judea inga tsiyo yutya cahnu Jordán, ityi nu caná ñicanyii.² Cuaha xaan nyivi tsinyicun tsi ra, tan janduvahā ra tsi nyivi cuuhvi.

³ Tacan tan juhva ra fariseo naha ra natuhva ra naha nu nyaá ra Jesús, tyin cuñi ra naha nducu cuhva ra naha tsi ra tyin tacan tan cuví tyaa ra naha cuatyí siqui ra. Tan tsicā tuhun ra naha tsi ra tan catyí ra naha:

—¿A vaha tsa nacoo rayi tsi ñasihi ra tsa cuenda náa ñi tsihi tsañā ña tsi ra?

⁴ Tan nacahān ra tan catyí ra:

—¿A ña tuhvá ndo cahví nu tutu Nyoo nu catyí tsi tyin ra tsa javahā tsi ndo nda quivi jihna ñi, javahā ra rayi tan ñaha?⁵ Tan catyí tsi tyehen: “Taahán tsi nacoo rayi tsi jutu ra tan sihi ra, tan ndu iin ra tsihin ñasihi ra. Tan tsa nduvi taahan ñi cua cuví ñi tumaa tsa intuhun ña nyivi.”⁶ Yacan cuenda, ñavin ca uvi taahan ñi, maa tyin nduvi ñi intuhun ña nyivi cuví ñi. Yacan cuenda, ña taahán tsi tsa nacoo tahan ñi tsi ñi tyin maa Nyoo tsa jandu iin tsi ñi —catyí ra.

⁷ Tacan tan tsicā tuhun ra naha tsi ra Jesús tan catyí ra naha:

—¿Nacuenda tsa tyaa ra Moisés tyin cuví can iin rayi tutu cuenda ley ra tan nacoo ra ñasihi ra?

⁸ Tan ra Jesús catyí ra tsihin ra naha:

—Tsa cuenda tsa ndava añima ndo, yacan cuenda, tsaḡa ra Moisés ndatu tsa nacoo ndo ñasihi ndo. Maa tyin quivi jihna ñi ñavin tacan tsicoo nyivi.
 9 Yuhu catyí yu tshin ndo tyehen: Ra tsa nacoo ñasihi, tan ñavin tsa cuenda tsa quituví ña tshin inga rayí, tan tindaha ra tshin inga ñaha, tsicoo cuatyí ra nuu Nyoo. Tan ra tsa tindaha tshin ñaha tsa nacoo rayí can, juvin ñi tsicoo tucu cuatyí ra can —catyí ra.

10 Tacan tan ra tsicá tshin ra, catyí ra naha tshin ra:

—Tatun tacan taahán tsi coo rayí tshin ñasihi ra, vaha ca ña tindaha yo.

11 Tan ra Jesús catyí ra tshin ra naha:

—Ña tandiḡi nyivi cuví naquihin cuenda tuhun ihya. Maa tyin nyivi tsa tsaḡa Nyoo cuví naquihin cuenda ñi can. 12 Tsa ña tindaha nyivi, cuaha ñi cuenda cuví tsi. Yihí ñi ña cuñí ñi tindaha ñi tyin iin cuhva caa maa ñi nda cacú ñi. Tan inga ñi ña cuñí ñi tindaha ñi tyin tsa nducapun ñi jaha nyivi. Tan yihí ñi ña tindaha ñi tsa cuenda tsa cuñí ñi javaha ñi maa ñi maa tyiñu Nyoo, na nducuaha ca añima tsa ndacá ñaha Nyoo. Tandihí nyivi tsa cuví javaha yacan na javaha ñi —catyí ra Jesús.

Nu nasocó ra Jesús tsi tsa nyihi

(Mr. 10.13-16; Lc. 18.15-17)

13 Tacan tan quitsi ndaca nyivi juhva tsa nyihi tsi ra Jesús tyin na tyiso ndaha ra jiñi tsí naha tsi, tan ndacan tahvi ra tsa cuenda tsi. Maa tyin ra tsicá tshin ra quitsaha caahán ra naha tsi nyivi tsa cuahán tshin tsa nyihi can. 14 Maa tyin ra Jesús catyí ra:

—Jaña ndo tsi tsa nyihi na quitsi maa tsi naha tsi nu nyaá yu. Tan ña casi ndo. Tyin nyivi ndacá ñaha Nyoo cuví ñi tumaa tsa nyihi ihya —catyí ra.

15 Tacan tan tyiso ndaha ra jiñi tsi naha tsi. Yahá can tan cuahán ra.

Nu tsaḡa ra Jesús cuhva tyin yí xaan nacuhva cuenda iin ra cuca tsi ra tsi Nyoo

(Mr. 10.17-31; Lc. 18.18-30)

16 Iin ra tyuvaa tsaḡan ra tsindaca tuhun ra tsi ra Jesús tan catyí ra:

—Maestro, vaha xaan un. ¿Náa taahán tsi javaha yu tan cuví coo yu ñayivi nyito tsa ña cua naa maa?

17 Tan ra Jesús catyí ra tshin ra:

—¿Nacuenda catyí un tyin ra vaha cuví yu? Intuhun ñi maa Nyoo cuví ra vaha. [Tan tsa catyí un tyin vaha yu, nacotó un tyin Nyoo cuví yu.] Maa tyin tatun cuñí un coo un ñayivi tsa ña cua naa maa, javaha tandiḡi tuhun tsa tsaḡa Nyoo tyin javaha yo —catyí ra tshin ra.

18 Tan ra tyuvaa can catyí ra:

—¿Ndáa tsa cuví can?

Tan ra Jesús catyí ra tshin ra:

—Ña cañi un nyivi. Ña coo inga ñaha tsi un. Ña suhu un tsa tsii nyivi. Ña cañan un cuendu siqui nyivi. 19 Tyaá yahvi tsi jutu un tan tsi sihi un. Tan cuñi tsi nyivi, tumaa tsa cuñí un tsi maa un.

20 Tan ra tyuvaa can, catyí ra tshin ra:

—Tandiḡi maa yacan tan tyaá yahvi yu nda tahan luhlu yu tan nda cuanda vityin. ¿Náa ca cumañi tsi yu?

21 Tan ra Jesús catyí ra tshin ra:

—Tatun cuñi un tsa iin ndaha ñi cuvi un iin ra cuiñi nuu Nyoo, cūaahan tan xico un tsa iyó tsi un, tan cūhva un tsi nyivi ndaahvi, tan quitsi nyicun un tsi yu. Tacan tan coo tsa cuca tsi un nda gloria —catyí ra.

²² Maa tyin cūhva tsa tsiñi ra tyuvaa can tsa cañan ra Jesús tsihin ra, cuiihya xaan cuñi ra cuvi tan cuanuhu ra tyin cuca xaan ra.

²³ Tacan tan ra Jesús catyí ra tsihin ra tsicá tsihin ra:

—Tsa nditsa catyí yu tsihin ndo tyin yii xaan tan cuvi nacuhva cuenda nyivi cuca tsi ñi na cundaca ñaha Nyoo tsi ñi. ²⁴ Catyí yu tsihin ndo inga tsaha, tyin vasu yii xaan yaha iin camellu xuu iin yiqui tucu, maa tyin yii xaan ca tsa quihvi iin nyivi cuca nu ndacá ñaha Nyoo —catyí ra Jesús.

²⁵ Tsa tsiñi ra tsicá tsihin ra Jesús tsa cañan ra, iyo xaan cuñi ra naha, tan quitsaha tsicá tuhun tahan ra naha, tan catyí ra naha:

—Tun tacan, yofii cua cuvi cacu

²⁶ Tacan tan nanyehē ra Jesús nu nyecú ra naha tan catyí ra:

—Nyivi ña cuvi javaha ñi yacan, maa tyin Nyoo cuvi javaha ra tandihi.

²⁷ Tacan tan quitsaha caahán ra Pedro tsihin ra:

—Jutu Mañi yu, nyuhu tandihi maa tsa iyó tsi ndi nacoō ndi tan nyicún ndi tsi un. ¿Náa cua ñihi ndi? —catyí ra tsihin ra.

²⁸ Tan nacahán ra Jesús tan catyí ra:

—Tsa nditsa catyí yu tsihin ndo, tyin quivi tsa cua ndutsaa tandihi tsa iyó, yacan cuvi quivi cua cunyaa yuhu Rayii tsa quee nda gloria nu tyayu sii xaan caá tan cua cundaca ñaha yu. Tan nyooho tsa nyicún tsi yu, cua cunyecu ndihi ndo nu utsi uvi taahan tyayu sii caá. Tan cua cundaca ñaha ndo tsi tandihi nyivi cuvi tata tsa utsi uvi taahan sehe ra Israel. ²⁹ Tan tandihi nyooho tan tandihi inga yaha tsi nacoō vehe, o yañi ñi, o cuhva ñi, o jutu ñi, o sihi ñi, o ñashihi ñi, o sehe ñi, o ñuhu ñi, tsa cuenda yuhu, cua ñihi ñi iin cientu ca tsaha siqui can, tan cua ñihi tucu ñi ñayivi nyito tsa ña cua naa maa coo ñi. ³⁰ Cuaha xaan nyivi cuahán ityi nuu vityin, ñi ican cua cahun nu ndihi ña. Tan cuaha xaan nyivi cuahán nu ndihi vityin, ñi ican cua cahun ityi nuu.

20

Nu jacuahā ra Jesús iin cūhva cuenda ra jahá tyiñu

¹ Tsa ndacá ñaha Nyoo tsi nyivi, cuvi tsi tumaa iin ra iyó cora uvas. Tan tuvi ñi quitā ra cuahán ra cuanducú ra musu jaha tyiñu nu tyiñu jahá ra. ² Tan ndoō ra tuhun tsihin musu can tyin cua tyahvi ra yahvi tsa iin quivi. Tan jacuhun ra tsi ra naha cua jaha tyiñu ra naha nu iyó tyiñu jahá ra. ³ Yahā can tan cuahán ra inga tsaha cūhva caa iin tsa tuvi. Tan nyehe ra tsi juhva ca ra yucú taxin nuyahvi can. ⁴ Tan catyí ra tsihin ra naha: “Cūaahan ndihi tucu nyooho jaha tyiñu ndo nu tyiñu jahá yu, tan cua tyahvi maa yu tsi ndo nácaa taahán tsi tsi ndo.” Tacan tan cuahán ndihi tucu ra can naha ra. ⁵ Tan tsitoho cora can quitā ra inga tsaha tsa ora. Tan juvin ñi musu nducú ra. Tan caa uñi tsa tseñi, quitā ra inga tsaha nducú ra musu. ⁶ Yahā can tan quitā nyico ra caa uhun tsa tseñi tan nyehe ra yucú taxin juhva ca ra naha nuyahvi can. Tan catyí ra tsihin ra naha: “¿A nduve tyiñu jahá ndo? tyin nduvi nduvi yucú taxin ndo nuyahvi ihya.” ⁷ Tan nacahán ra can naha ra tan catyí ra naha: “Yucú taxin maa ndi tyin nduve tyiñu jahá ndi tan yofii tavá tyiñu tsi ndi.” Tacan tan catyí ra tsihin ra naha: “Cūaahan ndihi ndo jaha tyiñu ndo nu tyiñu jahá yu. Tan tyahvi maa yu tsi ndo nácaa taahán tsi tsi ndo”, catyí ra. ⁸ Tan cūhva tsa cua cuaa, tsitoho tyiñu can catyí ra tsihin ra yihí ndaha

musu can: “Na cana un tsi musu, tan tyahvi un tsi ra naha. Quitsaha tyahvi un tsi ra tsa quihvi nu ndihi naha ra, tan nu cua ndihi tan tyahvi un tsi ra tsa quihvi tsa jihna ni naha ra”, catyi ra. ⁹ Tacan tan tsaq ra tsa quihvi caa uhun tsa tseñi can naha ra. Tan intuhun intuhun ra naha quihin ra naha yahvi nani iin quivi. ¹⁰ Yahq maa ra naha tyin cuaha ca cua tyahvi ra tsi ra naha. Maa tyin inducu ni yahvi iin quivi quihin ra naha. ¹¹ Tan cuhva tsa quihin ra naha, quitsaha caahan ra naha tsi tsitoho tyiñu can. ¹² Tan catyi ra naha: “Ra tsa tsaq nu ndihi ihya naha ra, intuhun ni hora jahq tyiñu ra naha. Tan iin ni yahvi tyahvi un tsi ra naha tsihin tucu nyuhu tan nduvi nduvi jahq tyiñu ndi nu ihni”, catyi ra naha. ¹³ Maa tyin nacahan tsitoho tyiñu can, tan catyi ra tsihin iin ra can: “iTsaa!, nduve tsa na vaha javaha yu tsihin un. iA ñavin yahvi tsa iin quivi ndoo yo tuhun tyin cua tyahvi yu tsi un? ¹⁴ Quihin yahvi un, tan cunahu. iA nduve ndatu iyó tsi yu tsa tyahvi yu tsi ra tsa quihvi nu ndihi iin ni cuhva tsa tyahvi yu tsi yooho? ¹⁵ iA nduve ndatu iyó tsi yu tsa javaha yu naa cuñi maa yu tsihin xuhun yu? iA ndasi cuñi un tyin vaha iñi yu tsihin inga ra can naha ra?” catyi ra. ¹⁶ Tacan nyivi quihvi nu ndihi, cuhun ni ityi nuu. Tan nyivi cuahan ityi nuu, nda nu ndihi na cua cuhun ni. Tyin cuaha xaan nyivi nacaná Nyoo, maa tyin juhva ni ni nacatsi ra.

Inga tsaha jacotó ra Jesús cuhva cua cahni nyivi tsi ra
(Mr. 10.32-34; Lc. 18.31-34)

¹⁷ Cuhva tsa cuñi cuhun ra Jesús nda nuu Jerusalén, canq sin ra tsi tsa utsi uvi ra tsicá tsihin ra tan catyi ra tsihin ra naha:

¹⁸ —Nyehe ndo tyin cuahan yo Jerusalén vityin. Tan ndacan cua nacuhva cuenda nyivi tsi yuhu, Rayi tsa quee nda gloria, tsi ra jutu tsa cuví ityi nuu naha ra, tan tsi ra maestro cuenda ley vehe ñuhu naha ra, tan cua catyi ra naha tyin taahan tsi cúu yu. ¹⁹ Tan cua nacuhva cuenda ra naha tsi yu tsi ra nuu Roma naha ra, tyin vacu nducu ra naha tsi yu. Tan cañi ra naha tsi yu. Tan cahni ra naha tsi yu nu cruu. Maa tyin tsa tsinu uñi quivi cua nandoto yu —catyi ra Jesús tsihin ra naha.

Nu tsicán sihi ra Jacobo tan ra Juan iin tumañi iñi tsi ra Jesús
(Mr. 10.35-45)

²⁰ Tacan tan ñasihi ra Zebedeo natuhva na nu nyií ra Jesús tsihin nduvi sehe na, ra Jacobo tan ra Juan. Tan tsicuiñi tsiti na nuu ra tyin cua ndacan na iin tumañi iñi tsi ra. ²¹ Tan tsicq tuhun ra Jesús tsi na tan catyi ra:

—iNaa cuñi un?

Tan catyi na:

—Quivi tsa cunyaa un nu ndacá ñaha un nda gloria, cuhva tsa cunyaa nduvi sehe yu xiin un. Na cunyaa iin ra tsiyo cuaha un, tan inga ra tsiyo satyin un.

²² Maa tyin nacahan ra Jesús tan catyi ra:

—Nyooho na tsitó ndo tsa tsicán ndo. iA cuví nyehe nyooho tundoho tsa cua nyehe yuhu? iA cuví cuhun ndo tuhun tsihi tumaa cua cuhun yuhu? —catyi ra.

Tan nacahan ra naha tan catyi ra naha:

—Cuví maa.

²³ Tan catyi ra Jesús tsihin ra naha:

—Tsa nditsa tyin cua nyehe ndo tundoho, tan cua cuhun ndo tuhun tsihi tumaa cuhun yuhu tuhun tsihi. Maa tyin tsa cunyaa ndo tsiyo cuaha yu tan

tsiyo satyin yu, ñavin yuhu taahán tsi cuhva yacan tsi ndo, tyin tsa tsitó maa Jutu yu yóo cua cuhva ra can —catyí ra Jesús tsihin ra naha.

²⁴ Tan tsa tsiñi tsa utsi ca ra tsicá tsihin ra Jesús yacan, cuxaan ra naha tsi nduvi ra can naha ra. ²⁵ Maa tyin cana ra Jesús tsi ra naha tan catyí ra tsihin ra naha:

—Tsa tsitó maa ndo, tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. Tan ra cuví ityi nuu tsihin ra naha nduyaa xaan ra naha. ²⁶ Maa tyin ñavin tacan taahán tsi javaha nyooho. Tyin ra tsa cuñi nducahnu ca cuví nu Nyoo, cuñi tsi cuví ra musu tandihi nyooho. ²⁷ Tan ndáa nyooho tsa cuñi ndo cuví ndo ityi nuu, cuñi tsi cuví ndo musu tandihi ca ra naha. ²⁸ Tumaa yuhu, Rayi tsa quee nda gloria, ña vatsí yu tyin jatyinyee nyivi tsi yu. Maa tyin yuhu vatsí yu vatsí jatyinyee yu tsi maa ñi, tan cua cuhva yu ñayivi yu tsa cuenda ñi. Tyin tsihin yacan cua tyahvi yu cuatyí tandihi ñi.

Nu janduvaha ra Jesús tsi uvi taahan ra cuaa
(Mr. 10.46-52; Lc. 18.35-43)

²⁹ Cuhva tsa cua quita ra Jesús ñuu Jericó tsihin ra tsicá tsihin ra, cuaha xaan nyivi cuahán cua nyicun tsi ra naha. ³⁰ Tan yuhu ityi can nyecú uvi taahan ra cuaa. Tan cuhva tsa tsiñi ra naha tyin cua yaha ra Jesús, quitsaha caná tsaa ra naha. Tan catyí ra naha:

—Jutu Mañi yu, tata ra David, cundaahvi iñi tsi ndi! —catyí ra naha.

³¹ Tan nyivi quitsaha caahán ñi tsihin ra naha na casi ra naha yuhu ra naha. Maa tyin ñihi ca cana tsaa ra naha:

—Jutu Mañi yu, tata ra David, cundaahvi iñi tsi ndi!

³² Tacan tan tsicuiñi ra Jesús tan cana ra tsi nduvi taahan ra cuaa can, tan tsicá tuhun ra tsi ra naha tan catyí ra:

—¿Náa cuñi ndo javaha yu tsi ndo?

³³ Tan nacahan ra naha tan catyí ra naha:

—Jutu Mañi yu, jananyehe tsi ndi.

³⁴ Tacan tan cundaahvi iñi ra Jesús tsi ra naha, tan tñin ra tinuu ra naha. Tan iin yaha ñi nanyehe ra naha, tan cuiti cuanyicún ndihi ra naha tsi ra Jesús.

21

Nu cuahán ra Jesús ñuu Jerusalén
(Mr. 11.1-11; Lc. 19.28-40; Jn. 12.12-19)

¹ Tsa cua tsaa ra naha ñuu Jerusalén, tan tsaa ra naha ñuu Betfagé, yatyin ñi yucú Olivo nu iyó yutun olivo. Tacan tan tava tyiñu ra Jesús tsi uvi ra tsicá tsihin ra. ² Tan catyí ra tsihin ra naha:

—Cuaahan ndo ñuu tsa canyí ityi nuu ihya. Tan ican cua ñihi ndo iin urru sñihi, nuuhñi ti. Tan ndacá ti iin urru luhlu. Ndatsi ndo tsi ti, tan quitsi ndaca ndo tsi ti naha ti tsi yu. ³ Tan tatun yóo tsicá tuhun tsi ndo: “¿Náa cuú ndo tsi ti naha ti?”, tan catyi ndo tsihin ñi: “Tyin tsiñi ñuhu ti naha ti tsi maa ra ndacá ñaha, maa tyin numi ñi cua quitsi ndaca nyico ndi tsi ti naha ti”, catyi ndo tsihin ñi —catyí ra.

⁴ Tacan cuví tyin cundaa tsa cahan ra cuví ndusu yuhu Jutu Mañi yo tahañ tsanaha nu catyi ra tyehen:

⁵ Cahan ndo tsihin nyivi ñuu Sión:

“Nyehé ndo, vatsí rey ndo nu iyó ndo.

Ndaahvi ñi vatsí ra yosó ra iin urru luhlu, sehe iin quiiti tsa tuhvá nyisó carga”, catyí ra cuví ndusu yuhu Nyoo can.

⁶ Tacan tan cuahán ra tsicá tsihin ra Jesús, tan javaha ra naha tumaa tsa cahan ra tsihin ra naha. ⁷ Quitsj ndaca ra naha tsi ti tsihin sihi ti. Tan tyiso ra naha jahma ra naha tsata ti, tan ndaa ra Jesús tsi ti. ⁸ Tan cuaha xaan nyivi tsaquín ñi jahma ñi nu ñuhu ityi nu cuahán ra, tan inga ñi tsahnyá ñi ndaha yutun tsaquín ñi tsitsi ityi. ⁹ Tan nyivi tsa cuahán ityi nuu tan ityi tsata, quitsaha caná tsaá ñi tan catyí ñi:

—¡Cahnu xaan cuví ra cuví tata ra rey David! ¡Cahnu xaan cuví ra tsa jaquitsj Jutu Mañi yo Nyoo! ¡Tan na jacahnu yo tsi Nyoo ra nyaá gloria! —catyí ñi.

¹⁰ Cuhva tsa tsaá ra Jesús ñuu Jerusalén can, tandihi maa nyivi ñuu quitsaha cuvaá jahá ñi, tan cuaha xaan ñi tsicá tuhun tahan ñi tsi ñi, tan catyí ñi:

—¿Yóo ra cuví ra ihya?

¹¹ Tan catyí ñi:

—Ra Jesús, ra cuví ndusu yuhu Nyoo, ra ñuu Nazaret tsa canyii Galilea cuví ra —catyí ñi.

Nu tava ra Jesús tsi nyivi xicó tsitsi vehe ñuhu cahnu

(Mr. 11.15-19; Lc. 19.45-48; Jn. 2.13-22)

¹² Yahá can tan quihvi ra Jesús tsitsi vehe ñuhu cahnu Nyoo. Tan tava ra tsi tandihi nyivi jatá tan xicó ican. Tan janduvá ra mesa nu nasamá ñi xuhun. Tan janduvá ra tyayu nu xicó ñi paloma. ¹³ Tan catyí ra tsihin nyivi:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi, tan tacan cua cunañi tsi. Tan nyooho jananduví ndo vehe ihya, vehe ñasuhu —catyí ra tsihin ñi.

¹⁴ Tan tsa tsito juhva ra cuaa tan ra coxo naha ra tyin nyii ra Jesús tsitsi vehe ñuhu cahnu, quihvi ra naha tan janduvaha ra Jesús tsi ra naha. ¹⁵ Tan nyehe ra jutu tsa cuví ityi nuu naha ra tan ra maestro cuenda ley vehe ñuhu cahnu naha ra tyin javaha ra Jesús tsa iyo. Tan tsiñi ra naha tyin caná tsaá tsa nyihi tsitsi vehe ñuhu, tan catyí tsa nyihi can:

—¡Cahnu xaan cuví ra cuví tata ra rey David! —catyí tsi naha tsi.

Tacan tan cuxaagn ra naha tsa tsiñi ra naha tsa caahán tsa nyihi can. ¹⁶ Tan catyí ra naha tsihin ra Jesús:

—¿A tsiñi un tsa caahán tsa nyihi can?

Tan nacahan ra Jesús tan catyí ra:

—Tsiñi yu. Maa tyin ¿a ñaha ca cahvi nyooho nu tutu Nyoo nu catyí tsi tyehen?

Jutu Mañi yu, tsa nyihi tan lee tsa ndi tyaxín sñi xaan tsitá tsi naha tsi jahá un. Tan vaha xaan jacahnú tsi tsi un, catyí tsi, —catyí ra Jesús.

¹⁷ Tacan tan nacoq ra tsi ra naha, tan quitá ra ñuu can cuahán ra ñuu Betania. Tan ican ndoq ra tsacuaa can.

Nu cahan ra Jesús tsi yutun higo tsa ña tsahá tsiti

(Mr. 11.12-14, 20-26)

¹⁸ Tan tsa tuvi cuii ñi inga quivi can, vatsí nyico ra Jesús nda ñuu Jerusalén, tan tsaá soco tsi ra. ¹⁹ Tan nyehe ra nyaá iin yutun higo yatyin ñi yuhu ityi can. Tan natuhvá ra nu nyaá tun, maa tyin nduve maa náa nañihí ra nuu tun. Maa ñi ndaha tun iñi. Tacan tan catyí ra tsihin tun:

—¡Ndi inga tsaha ña cua cuhva ca un tsiti!

Tan juvin ñi cuhva can na ityi tun. ²⁰ Tan tsa nyehe ra tsicá tsihin ra tsa javahá ra tsi tun, iyo xaan cuñi ra naha, tan tsicá tuhun ra naha tsi ra tan catyi ra naha:

—¿Nacuenda tsa numi xaan na ityi yutun higo can?

²¹ Tan nacahan ra Jesús tan catyi ra:

—Tsa nditsa catyi yu tsihin ndo, tyin tatun tsinú iñi ndo tan ña ndu uvi iñi ndo, ñavin tsa javahá yu tsihin yutun higo ihya ñi cuví javaha tucu nyooho, tyin cuví ndihí tucu catyi ndo tsihin yucu ihya: “Cuatsiyo ihya tan cuhun un nda tsitsi ndutya ñuhu.” Tan cua cuhun tsi. ²² Tan tandihí tsa cua ndacan ndo nu cua ndacan tahvi ndo tsi Nyoo, tatun tsinú iñi ndo tyin cua cuhva ra, cua ñihí ndo —catyi ra Jesús.

Nu tsicá tuhun ra cumi tyiñu vehe ñuhu naha ra tsi ra Jesús yóo tavá tyiñu tsi ra tyin cahan ra tsihin nyivi

(Mr. 11.27-33; Lc. 20.1-8)

²³ Yahá can tan quihvi ra Jesús tsitsi vehe ñuhu cahnu, tan tsitsi tsa jacuahá ra ican, natuhvá ra jutu tsa cuví ityi nuu naha ra nu nyaá ra, tan ra cuví mandoñi ñuu Israel naha ra. Tan tsicá tuhun ra naha tsi ra tan catyi ra naha:

—¿Yóo tavá tyiñu tsi un tsa javahá un tyehen? —catyi ra naha.

²⁴⁻²⁵ Tan nacahan ra Jesús tan catyi ra:

—Yuhu tucu cuñi yu ndaca tuhun yu tsi nyooho. ¿Yóo jaquitsi tsi ra Juan tyin jacoondutya ra tsi nyivi? ¿A Nyoo jaquitsi tsi ra, o nyivi? Tatun catyi tuhun ndo tsihin yu, cua catyi tuhun tucu yuhu tsihin ndo yóo tavá tyiñu tsi yu tsa javahá yu tyehen —catyi ra Jesús tsihin ra naha.

Tacan tan ra ican naha ra quitsahá caahán yuhu tahan ra naha, tan catyi ra naha:

—Tatun catyi yo tyin Nyoo jaquitsi tsi ra Juan, cua catyi ra tsihin yo: “Tun tacan, ¿nacuenda ña tsinú iñi ndo tsi ra?” ²⁶ Tan tatun catyi yo tyin nyivi jaquitsi tsi ra, yuuhvi yo coto cuxaan nyivi tsi yo, tyin tandihí ñi tsinú iñi ñi tyin ra Juan, cuenda Nyoo cahan ra —catyi ra naha.

²⁷ Tacan tan catyi ra naha tsihin ra Jesús:

—Ña tsitó ndi.

Tacan tan ra Jesús catyi ra tsihin ra naha:

—Tan ndi yuhu, tan ña catyi tuhun yu tsihin ndo yóo tavá tyiñu tsi yu.

Nu caahán ra Jesús iin cuhva cuenda uvi taahan sehe iin rayii

²⁸ Ra Jesús catyi ra tsihin ra cumi tyiñu vehe ñuhu naha ra:

—¿Nacaa catyi ndo cuenda tsa cua cahan yu ihya? Iin rayii, iyó uvi taahan sehe ra. Tan catyi ra tsihin iin sehe ra: “Cuahaan cua jaha tyiñu nu iyó tyiñu jahá yu.” ²⁹ Tan nacahan sehe ra tan catyi ra: “¿Ña cuhun yu!” Maa tyin yaha can tan nasama cuhva tsicá iñi ra tan tsahan ra tsijahá tyiñu ra. ³⁰ Yahá can tan jutu ra cahan ra tsihin inga sehe ra. Tan catyi tucu ra tsihin ra na cuhun ra cujaha tyiñu ra. Tan ra ican numi ñi quihin ra tyiñu tan catyi ra: “Vaha, tyaa, cuhun maa yu.” Maa tyin ña tsahan ra. ³¹ Tsitsi tsa nduvi taahan ra can naha ra, ¿ndáa ra javahá tsa cahan jutu ra? —catyi ra Jesús.

Tan nacahan ra naha tan catyi ra naha:

—Ra tsa cahan ra tsihin tsa jihna ñi.

Tan catyi ra Jesús tsihin ra naha:

—Tsa nditsa catyi yu tsihin ndo, tyin nyivi caquiñi tumaa ra tsa tavá xuhun cuenda ra ndacá ñaha tan ñi sii iñi caca nuu, jihna ca ñi cua quihvi nu ndacá ñaha Nyoo tan ñavin ca nyooho. ³² Tyin ra Juan, ra jacoondutya tsi nyivi, quitsi

ra jacuahā ra tsi ndo nácaa taahán tsi coo cuiti ndo, tan nyooho ña tsinū iñi ndo tsi ra. Maa tyin ra tavá xuhun naha ra tan ñi sii iñi caca nuu tsinū iñi ñi tsi ra. Tan nyooho vasu ndi maa nyehe ndo yacan, maa tyin ña nasama ndo cuhva iyó ndo, tan ña tsinū iñi ndo tsi ra.

Nu caahán ra Jesús tyin tumaa cuví juhva nu caquiñi nahnu, tacan cuví ra tsa cua cahñi tsi ra

(Mr. 12.1-12; Lc. 20.9-19)

³³Tyaa soho ndo inga cuhva ihya: Tsi coo iin rayii, tan iyó ñuhu ra. Tan tatsi ra yoho yucu vixi tsa nañi uvas, tan tyihj ra cora. Tan javahā ra iin nu cua tava ra ndutya uvas can. Tan javahā tucu ra iin vehe sucun tyin cuví jaha cuenda ra tandihi.

Yahā can tan tsaḥā nuu ra ñuhu can tsi juhva ra cua jaha tyiñu naha ra, tan cuahán ra inga ñuu. ³⁴Tan tsa tsaā quivi tsa iyó uvas can, jacuhun ra tsi juhva musu ra, na ndacan ra naha tsi ra jahá tyiñu can naha ra, na cuhva ra naha juhva uvas tsa taahán tsi tsi ra. ³⁵Maa tyin ra jahá tyiñu can tñin ra naha tsi musu can naha ra, tan cañi ra naha tsi iin ra. Tan inga ra tsaññi ra naha, tan cañi ra naha yuu tsi inga ra. ³⁶Tacan tan tsa inga tsaha, cuaha ca musu jacuhun tsitoho cora can tan ñavin ca tsa jihna ñi. Maa tyin tumaa tsa javahā ra naha tsihin ra tsa tsaḥan jihna naha ra, tacan ñi javahā nyico ra naha tsihin ra ihya naha ra.

³⁷Nu ndihi jacuhun ra tsi maa maa sehe ra, tyin cuñi maa ra tyin cua tyaa yahvi ra naha tsi sehe ra. ³⁸Maa tyin cuhva tsa nyehe ra jahá tyiñu can naha ra tsi sehe ra, natuhun tahan ra naha tan catyí ra naha: “Ra ihya cua ndoo tsihin tandihi tsa iyó ihya. Na cahñi yo tsi ra tan ndoo maa yo tsihin cora ihya”, catyí ra naha. ³⁹Tacan tan tñin ra naha tsi ra, tan tavā ra naha tsi ra ityi tsata cora can, tan tsaññi ra naha tsi ra —catyí ra Jesús.

⁴⁰Tacan tan tsi ca tuhun ra Jesús tsi ra naha tan catyí ra:

—Quivi cua quiti ra jatsii ñuhu can, ¿náa cua javaha ra tsihin ra jahá tyiñu can naha ra?

⁴¹Tan nacahān ra naha tan catyí ra naha:

—Ña cua cuatu ra, tyin cua cahñi ra tsi ra caquiñi can naha ra. Tan cua cuhva nuu ra ñuhu can tsi inga ra jaha tyiñu naha ra, tan quivi coo uvas, cua nacuhva cuenda ra naha juhva tsa taahán tsi tsi ra cuví tsitoho cora can.

⁴²Tacan tan catyí ra Jesús tsihin ra naha:

—¿A ñaha ca cahvi nyooho nu tutu Nyoo nu catyí tsi tyehen?

Yuu tsa javitā ihñi ra javahā vehe,

Yacan cuví yuu tsa ñiñi ca.

Jutu yo Nyoo cuví ra tsa javahā tandihi can.

Tan iyo xaan cuñi yo nyehe yo, catyí tsi.

⁴³Yacan cuenda catyí yu tsihin ndo tyin ña cua cuhva Nyoo cuhun ndo nu ndacá ñaha ra. Tan cua cuhva ra tsi nyivi tsa javahā cuhva cuñi ra tyin nditsa tsahá ñi tsi ñi cundaca ñaha ra. ⁴⁴Tan tsa cuenda yuu can, yoo nyivi tsa nduva siqui tsi, cua tahnu cuatyí ñi. Tan tatun yuu can tan canacava tsi siqui yoo nyivi, cua taxin nyihi ñi —catyí ra Jesús.

⁴⁵Cuhva tsa tuvj iñi ra jutu tsa cuví ityi nuu can naha ra tan ra fariseo naha ra tyin cuenda maa ra naha caḥan ra Jesús cuhva ihya, ⁴⁶cuñi ra naha tñin ra naha tsi ra, maa tyin yuuhvi ra naha tsi nyivi tyin tsinú iñi ñi tyin ra Jesús caahán ra cuenda Nyoo.

22

*Nu cahan ra Jesús iin cuhva cuenda vico tindaha
(Lc. 14.15-24)*

1 Quitsahā caahán ra Jesús tsihin nyivi inga tsaha tsihin cuhva, tan catyí ra:

2—Tsa ndacá ñaha Nyoo tsi nyivi cuví tsi tumaa iin rey tsa javahā iin vico tsa cuenda tsa cua tindaha sehe ra. ³Tan jacuhun ra tsi musu ra na cucana ra naha tsi nyivi tsa jacoto ra tyin cuhun ñi, maa tyin ñi ican, ña cuñi ñi cuhun ñi.

⁴Tan jacuhun nyico ra inga ca musu ra, tan catyí ra tsihin ra naha: “Cahan ndo tsihin ñi na quitsi ñi, tyin tsa iyó vaha tsa cua catsi yo. Tan tsa tsahñi yu indiqui tan inga quiti xaahan. Tan tsa iyó vaha tandihi. Yacan na quitsi ñi”, catyí ra. ⁵Maa tyin ñi ican ña tyaā yahvi ñi tsa cahan ra. Iin ra tsahan ra nu iyó cora ra, inga ra tsahan ra nu jahá tyiñu ra. ⁶Tan inga ra naha tñn ra naha tsi musu rey can naha ra tan cañi xaan ra naha tsi ra naha nda cuenda tsahñi ra naha tsi ra naha. ⁷Tacan tan ra rey can cuxaan xaan ra, tan jacuhun ra tsi andaru ra na cucahñi ra naha tsi ra tsa tsahñi tsi musu can naha ra, tan cahmi ra naha ñuu ra naha. ⁸Tacan tan catyí ra rey can tsihin musu ra: “Tandihí tan tsa iyó vaha tsa cuenda vico tindaha, maa tyin ñi canā yu, ña taahán tsi tsa quitsi ñi. ⁹Cuaahan ndo ityi cahnu tan cana ndo tsi tandihí nyivi tsa nañihi ndo na quitsi ñi vico tindaha”, catyí ra rey can. ¹⁰Musu can cuahán ra naha tandihí ñi ityi, tan jandu iin ra naha tsi tandihí nyivi nañihi ra naha: ñi caquiñi tan ñi vaha iñi. Tacan tan tsitu tsitsi vehe ra tsihin nyivi.

¹¹Tacan tan quihvi ra rey can cua nyehe ra tsi tandihí nyivi tsa yucú vico yuvehe ra. Tan nyehe ra tyin nyaá iin ra tsa nduve jahma vico tindaha nditsí. ¹²Tan catyí ra rey tsihin ra: “Tsa, ¿nacuenda nyii un ihya tan nduve jahma vico tindaha nditsi un?” Tan ña nacahan maa ra can. ¹³Tacan tan catyí ra rey can tsihin ra tyihí mesa can naha ra: “Cuhñi ndo tsaha ra tan ndaha ra, tan tava ndo tsi ra nu naa ityi tsata vehe. Ican cua vacu ra, tan catsan ña cua cuvi nuhu ra”, catyí ra. ¹⁴Tyin cuaha xaan nyivi nacana Nyoo, maa tyin juhva ñi ñi nacatsi ra —catyí ra Jesús.

*Nu caahán ra Jesús tsa cuenda tsa tyahvi nyivi xuhun tsi ra ndacá ñaha nda
ñuu Roma*

(Mr. 12.13-17; Lc. 20.20-26)

¹⁵Tacan tan cuahán ra fariseo naha ra tan ndoo ra naha tyiñu tyin cua jacahan ra naha tsi ra Jesús iin tsa ña vaha, tyin tacan tan cuvi tyaa ra naha cuatyí siqui ra. ¹⁶Tan jacuhun ra naha tsi juhva ra yihí cuenda ra naha, iin caa ñi tsihin juhva ra yihí cuenda ra Herodes. Tan catyí ra naha tsihin ra Jesús:

—Maestro, tsitó ndi tyin tsa nditsa caahán un. Tan tsihin tsa nditsa janahá un ityi Nyoo. Tan inducu ñi cuñi un nyehe un tsi nyivi cuca tan nyivi ndaahvi.

¹⁷¿Nacaa tsicá tucu iñi yooho: A vaha tyahvi yo tsa tsicán ra ndacá ñaha nda ñuu Roma, o ña vaha?

¹⁸Tan ra Jesús tuvji iñi ra tyin ña vaha cuhva tsicá iñi ra naha, tan catyí ra tsihin ra naha:

—Nyooho tsa jahá tyin vaha xaan ndo, tan ña nditsa. ¿Nacuvi tyin nducú cuhva ndo tsi yu? ¹⁹Janaha jihna ndo iin xuhun tsa tuhvá yo tyahvi tsi ra ndacá ñaha tsi yu —catyí ra.

Tan tsindacā ra naha iin xuhun tsa nañi denario tsi ra. ²⁰Tan tsa nyehe ra Jesús xuhun can, tsicā tuhun ra tsi ra naha tan catyí ra:

—¿Yóo nuu tan yóo sivi nyaá ihya?

²¹ Tan nacahan ra naha tan catyí ra naha:

—Nuu ra ndacá ñaha.

Tacan tan catyí ra Jesús tshin ra naha:

—Tun tacan jiin, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi maa ra —catyí ra.

²² Tsa tsiñi ra naha tsa cahan ra Jesús, iyo xaan cuñi ra naha. Tan cuahán ra naha.

*Nu cuñi ra cuví saduceo naha ra jandavi ñaha ra naha tsi ra Jesús
(Mr. 12.18-27; Lc. 20.27-40)*

²³ Juvín ñi quivi can juhva ra cuví saduceo naha ra tshahán ra naha nu nyii ra Jesús. Tan ra cuví saduceo can ña tsinú iñi ra naha tsa cua nandoto ndiyi quivi tsa cua naa ñuu ñayivi. Yacan cuenda tsicá tuhun ra naha tsi ra Jesús, tan catyí ra naha:

²⁴—Maestro, ra Moisés catyí ra tyin tatun iin ra tindaha tan tshihí ra tan ña tsicoq sehe ra, taahán tsi tsa tindaha yañi ra tshin ñasiihi ra. Tacan tan cua coo sehe ra tshin ña tsa cuenda ra yañi ra tsa tshihí. ²⁵ Vaha. Tun iin ra tan iyó utsa sehe yii ra, tan ra tsa jihna ñi tindaha ra. Tan nduve sehe ra tsicoq tshin ñasiihi ra tan tshihí ra. Ndoq ñasiihi ra tsi yañi ra tsa tsinu uvi. ²⁶ Tan juvín ñi tshihí ndihi ra can. Tan ndoo ñaha can tshin ra tsa tsinu uñi, maa tyin juvín ñi tacan tshahán ndihi ra. Tan inducu ñi tshahán tandihi tsa utsa ra naha. ²⁷ Tan nu ndihi ña tshihí ndihi maa ñaha can. ²⁸ Tatun nditsa tsa cua nandoto nyivi tshihí, ¿ndáa tsa utsa taahan ra can naha ra cua cuví yii ña? Tyin tandihi maa ra naha tindaha tshin ña —catyí ra naha.

²⁹ Tan nacahan ra Jesús tshin ra naha tan catyí ra:

—Nyooho, caahán soho ñi maa ndo, tsa cuenda tyin ña tsitó ndo tsa nyaá nu tutu Nyoo, tan ndi ña tsitó ndo nácaa tsa cahnu cuví tunyee iñi tsa iyó tsi Nyoo. ³⁰ Tyin quivi cua nandoto nyivi tshihí, ndi ña cua tindaha ñi, tan ndi ña cua cuhva ñi sehe siihi ñi tindaha, tyin cua cuví ñi tumaa cuví ángel tsa iyó gloria. ³¹ Tyin tuhun Nyoo tsahá cuenda tsi nácaa cuví tuhun tsa cua nandoto nyivi tsa tshihí. ¿O ñaha ca cahvi ndo nu tsahá cuenda Nyoo tuhun can tsi ndo? tan catyí tsi tyehen:

³² “Yuhu cuví Nyoo cuenda ra Abraham, tan ra Isaac tan ra Jacob.”

Ihya nyehé yo tyin nyito añima ra can naha ra, vasu tsanaha tshihí ra naha. Tyin Nyoo ñavin Nyoo cuenda nyivi tshihí cuví ra, tyin Nyoo cuví ra Nyoo cuenda nyivi nyito —catyí ra.

³³ Tan tsa tsiñi nyivi tsa caahán ra Jesús, iyo xaan cuñi ñi.

*Ley tsa ñiñi ca tsa tsaha Nyoo
(Mr. 12.28-34)*

³⁴ Tsa tsító ra fariseo naha ra tyin ra Jesús tyasi ra yuhu ra saduceo naha ra, ndu iñ ra naha. ³⁵ Tan iin ra tsa nyii tshin ra naha cuví ra maestro cuenda ley vehe ñuhu tan cuñi ra nducu cuhva ra tsi ra Jesús. Tan tsicá tuhun ra tsi ra, tan catyí ra:

³⁶—Maestro, ¿ndáa ley cuví tsa ñiñi ca?

³⁷ Tan catyí ra Jesús tshin ra:

—“Cuñi tsi Jutu Mañi yo Nyoo tshin tsa nñi iñi un tan tshin tsa nñi iñi añima un, tan tshin tandihi tsa tsiñi tuñi jiñi un.” ³⁸ Ley ihya cuví tsa ñiñi ca, tan tsa jihna ñi taahán tsi javaha yo. ³⁹ Tan tsa tsinu uvi, tsa yatyin inducu ñi caahán tsi tumaa caahán tsa jihna ñi tan catyí tsi tyehen: “Cuñi tsi nyivi tahan un tumaa cuñi un tsi maa un.” ⁴⁰ Tatun tyaá yahvi ndo nduvi taahan ley ihya, tsa

tyaá yahvi ndihi ndo tandihi ca ley tsa tyaa ra Moisés jahá Nyoo, tan tandihi tuhun tsa jacuahá ra cuví ndusu yuhu Nyoo tahān tsanaha.

Ra Cristo cuví ra Sehe Nyoo tan juvin ñi cuví ra tata ra David
(Mr. 12.35-37; Lc. 20.41-44)

⁴¹ Tsitsi tsa ndi yucú ra fariseo naha ra nu ndu iin ra naha, ⁴² ra Jesús tsica tuhun ra tsi ra naha, tan catyí ra:

—¿Nacaa tsicá iñi nyooho cuenda ra cuví Cristo? ¿Yóo tata cuví ra, cuñí maa ndo?

Tan nacahān ra naha tan catyí ra naha:

—Tata ra David cuví ra.

⁴³ Tacan tan ra Jesús catyí ra tsihin ra naha:

—Tun tacan, ¿nacuenta jacahān Tatyí li Nyoo tsi ra David tyin ra ndacá ñaha tsi ra cuví ra Cristo tan catyí ra tyehen?:

⁴⁴ Nyoo cahān tsihin Jutu Mañi yu, ra Cristo, tan catyí ra tsihin ra:

“Cunyaa xiin cuaha yu nda cuanda caquin yu tsi ra xaan iñi tsi un naha ra tsaha un”, catyí ra David.

⁴⁵ ¿Nacaa cuví cuú tucu ra Cristo tata ra David, tan juvin ñi maa ra David catyí ra tyin ra Cristo Jutu Mañi ra cuví tsi ra? —catyí ra Jesús.

⁴⁶ Tan yoñi maa cuví nacahān nu cahān ra ndi intuhun maa tuhun. Tan nda quívi can, yoñi ca maa cuñí nducu tuhun tsi ra.

23

Nu caahán ra Jesús tyin cuaha xaan cuatyí ra maestro cuenda ley vehe ñuhu naha ra tan ra fariseo naha ra

(Mr. 12.38-40; Lc. 11.37-54; 20.45-47)

¹ Tacan tan ra Jesús catyí ra tsihin tandihi nyívi, tan tsihin ra tsicá tsihin ra:

²—Ra cuví maestro cuenda ley naha ra tan ra cuví fariseo naha ra taahán tsi tsa jacuahá ra naha cuhva catyí ley tsa tyaa ra Moisés. ³ Yacan cuenda tyaa yahvi ndo tsa caahán ra naha tan javaha ndo tandihi cuhva caahán ra naha tsihin ndo. Maa tyin ña javaha ndo cuhva javahá ra naha, tyin maa ra naha, siin tsa jacuahá ra, tan siin tsa javahá ra naha. ⁴ Janducuahá ca ra naha ley tsa tsahā Nyoo tahān tsanaha. Tan cuñí ra naha tsa javaha nyívi tandihi can. Maa tyin ña cunyeé ñi javahá ñi tandihi can, tan ndi maa ra naha tan ña cuñí ra naha javaha ra naha can. ⁵ Tyin maa ra naha tyaá ra naha caja ñi nu yihí tuhun Nyoo nutyaan ra naha tan soco ra naha, maa tyin nahnu ca can tan ñavin ca tsa nyecú tsi inga ca nyívi. Tan tsinditsí ra naha jahma nañi ca tan ñavin ca tsa iyó tsi inga ca nyívi. Javahá ra naha tandihi can tyin na nyehe nyívi tyin vaha xaan ca ra naha. ⁶ Tan nu vaha ca, cuñí ra naha cunyecu ra naha nu iyó vico tan catsi ra naha. Tan nu vaha ca cuñí ra naha cunyecu ra naha tsitsi vehe ñuhu. ⁷ Tan nu tsicá nuu ra naha cuñí ra naha tyin cuhva nyívi nacumi tsi ra naha tyin jahá ñi tsa ñayívi tsi ra naha. Tan cuñí tucu ra naha tsa catyí ñi “maestro” tsihin ra naha.

⁸ Maa tyin nyooho, ña cuhva ndo tsa cahan nyívi “maestro” tsihin ndo. Tyin intuhun ñi maa ra Cristo cuví maestro tsa nyívi tsihin ndo, tan tandihi ca maa ra naha yañi ndo cuví tsi ra naha. ⁹ Tan ña cahan ndo Jutu ndo tsihin ndi intuhun rayíi ñuu ñayívi ihya, tyin intuhun ñi ra nyaá gloria cuví Jutu ndo. ¹⁰ Tan ña cahan ndo tyin ra cuví ityi nuu cuví ndo, tyin intuhun ñi maa ra Cristo cuví nuu tsihin ndo. ¹¹ Ra tsa jahá tyiñu tyiñu tandihi ca ra naha, ra ican

cuví ra cahnu ca nu yucú ndo. ¹² Tyin ra cahnu jahá tsi ra, cua janduluhlu Nyoo tsi ra. Tan ra ña cahnu jahá tsi ra cua nducahnu ra jaha Nyoo.

¹³ ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo tyin jahá ndo tyin vaha xaan ndo, tan ña nditsa! Tyin tyasí ndo yuvehe nu ndacá ñaha Nyoo, tan ña cuví quihví nyívi. Tan ndí maa ndo ña quihví ndo, tan ndí ña tsahá ndo tsa quihví nyívi tsa cuñí quihví.

¹⁴ ¡Ndahvi nyooho ra cuví maestro cuenda ley tan nyooho ra cuví fariseo. Jahá ndo tyin vaha xaan ndo, tan ña nditsa! Iyo ña cuahán tucu ndo cua ndacan tahví ndo tsi Nyoo nu tuví nyívi tyin jahá ndo tyin vaha xaan ndo. Maa tyin nduve náa catyí tyin quihín nyaa ndo vehe ñi ndaahví tsa tsihí yí tyin ña cuví tyahví ñi xuhun tsa tsicán ndo tsi ñi. Yacan cuenda cahnu ca tundocho cua nyehe ndo jaha Nyoo.

¹⁵ ¡Ndahvi nyooho ra maestro cuenda ley vehe ñuhu tan nyooho ra fariseo! ¡Jahá ndo tyin vaha xaan ndo, tan ña nditsa! Tyin nanducú ndo ñi cahnu nu ñuhu ñayívi tyin cuñí ndo ñañihi ndo vasu intuhun nyívi cunyicun tsi ndo. Tatun tsa quihví ñi cuenda ndo, quiñi ca iyó ñi jahá ndo, tan ñavin ca maa ndo. Tan cua cuhun ñi anyaya tsihin ndo.

¹⁶ ¡Ndahvi nyooho ra ndaahví! Tyin cuñí ndo jaquihin ityi ndo tsi nyívi, ¡maa tyin cuaa ndo! Caahán ndo tyin yóo nyívi cua cahan “Naha Nyoo” tsa cuenda vehe ñuhu, nduve ñi náa cua cuví tsi ñi tun ña tyaa yahví ñi tsa cahan ñi. Maa tyin tun cua cahan ñi “Naha Nyoo” tsa cuenda xuhun cuaan tsa iyó vehe ñuhu, tacan tan taahán tsi javaha ñi tsa cahan ñi, catyí ndo. ¹⁷ ¡Soho xaan ndo tan cuaa ndo! ¿Ndáa tsa cahnu ca cuví? ¿A xuhun cuaan can, a vehe ñuhu tsa jandu í tsi xuhun cuaan can? ¹⁸ Tan juvin ñi catyí tucu ndo tyin yóo nyívi cua cahan “Naha Nyoo” tsa cuenda altar tsa iyó vehe ñuhu, nduve ñi náa cua cuví tsi ñi tun ña tyaa yahví ñi tsa cahan ñi. Maa tyin tun cua cahan ñi “Naha Nyoo” tsa cuenda tsa jamañí ñi nu altar, tacan tan taahán tsi javaha ñi tsa cahan ñi, catyí ndo. ¹⁹ ¡Soho xaan ndo tan cuaa ndo! ¿Ndáa tsa cahnu ca cuví? ¿A tsa jamañí ndo nu altar can, o maa altar tsa jandu í tsa jamañí ndo? ²⁰ Tyin nyívi caahán “Naha Nyoo” tsa cuenda altar can, ñavin cuenda altar ñi caahán ñi tuhun, tyin caahán ndihi ñi tsa cuenda tandihi tsa yosó nu altar can. ²¹ Tan nyívi caahán “Naha Nyoo” tsa cuenda vehe ñuhu cahnu, ñavin cuenda vehe ñuhu ñi caahán ñi tuhun, tyin nda cuanda cuenda Nyoo caahán ñi tuhun, tyin iyó ra ican. ²² Tan tacan tucu nyívi tsa caahán “Naha Nyoo” tsa cuenda gloria; nda cuanda tyayu Nyoo tan cuanda maa Nyoo caahán ñi tuhun, tyin maa ra cuví ra nyaá ndacá ñaha ndacan.

²³ ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! Jahá ndo tyin vaha xaan ndo tyin cahví ndo ndaha menta tan tsiti anis tsihin tsiti comino, tacan tan tavá ndo intuhun tsi tsa iin iin utsi, tan tsahá ndo tsi Nyoo. Maa tyin ña tyaa yahví ndo ley nahnu ca tsa taahán tsi javaha yo: tsa javahá yo tsa vaha tsihin tandihi nyívi, tsa cundaahví iñi yo tsi ñi, tsa tsinú iñi yo tsi Nyoo tan ña nacoo yo tsi ra. Cuñí tsi javaha ndo tandihi can, tan ña cua jandihí ndo tsa cuhva ndo diezmo can. ²⁴ Nyooho ra cuaa, cuñí ndo jaquihin ityi ndo tsi nyívi, maa tyin ña cuví, tyin maa ndo ña jahá ndo cuenda cuatyí nahnu tsa javahá ndo, tan numi xaan nyehé ndo cuatyí nyihi ñi. Tan cuví tsi tumaa tsa tavá ndo tyucun luhlu nu tsa tsatsí ndo tan coco ndo iin camellu.

²⁵ ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin tumaa nacatyá ndo

vasu tan coho, tan ityi tsata ñi tsi nacatyá ndo tan ña nacatyá ndo ityi tsitsi, tyin ityi tsitsi can, nu ña nacatyá ndo, ican cuví añima ndo tan tsitu tsi tsihin tsa caquiñi: tsa suhú ndo tan tsa tsicá iñi ndo tsa coo cuaha ndaha tyiñu ndo. ²⁶ ¡Nyooho ra fariseo cuaa! Nacatyá jihna ndo ityi tsitsi vasu tan coho, tacan tan cua ndoo ndihi ityi tsata.

²⁷ ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha ndo, tan ña nditsa! Tyin cuví ndo tumaa iin ñaña ndiyi tsa nacahyi, tyin ityi tsata tsi si# xaan caá, maa tyin ityi tsitsi tsitu yiqui ndiyi, tan tandihi nuu tsa caquiñi. ²⁸ Tacan cuví nyooho, tyin cuñi nyivi tyin vaha xaan iñi ndo, maa tyin añima ndo ican quitá tsa jandaví ñaha ndo tan tandihi tsa caquiñi ndo.

²⁹ ¡Ndahvi nyooho ra cuví maestro cuenda ley vehe ñuhu, tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin jandutyacuñi ndo ñaña ra cuví ndusu yuhu Nyoo, tan nacahyi ndo ñaña nyivi vaha tsicoo tahan tsanaha. ³⁰ Tacan tan catyi ndo: “Tun tsatyin tsicoo yo quivi tsicoo tsi tsaahnu yo, ña cua jatyinyee yo tsi ra tsahñi tsi ra cuví ndusu yuhu Nyoo”, catyi ndo. ³¹ ¡Tsihin yacan ñi tan nacotó ndo tyin cuví ndo tata nyivi tsahñi tsi ra cuví ndusu yuhu Nyoo! ³² ¡Yacan vityin nyehe maa ndo na jaha ndo, javaha ndihi ndo tsa javaha tsi tsaahnu ndo, tun cuñi ndo!

³³ ¡Nyooho nyivi caquiñi cuví ndo, tan nyivi cuví tata coo! ¿Nacaa cua cacu ndo tan ña cua cuhun ndo anyaya? Ña cua cuví. ³⁴ Yacan cuenda cua jaquitsi yu tsi ra cuví ndusu yuhu Nyoo nu yucú ndo, cua jaquitsi tucu yu tsi ra tsitó xaan naha ra nu yucú ndo, tan ra maestro naha ra cua tsaa ra naha nu yucú ndo. Maa tyin nyooho cua cahñi ndo tsi juhva ra, tan cua tyaa ndo tsi inga ra naha nu cruu. Tan inga ra naha cua cañi ndo tsi ra naha tsitsi vehe ñuhu. Tan cunyaa ndaha ndo tsi ra naha tan iin tan iin ñuu. ³⁵ Yacan cuenda, tsata nyooho cua cunyaa cuatyí tsa cuenda tandihi ra vaha tsa tsahñi tsi tsaahnu ndo nda cuanda tsihi ra Abel tan nda cuanda quivi tsihi ra Zacarías, sehe ra Berequías, tsa tsahñi ra naha tsitsi vehe ñuhu yatyin nu nyaá altar tsa yosó tsa jamañi yo tsi Nyoo. ³⁶ Tsa nditsa catyi yu tsihin ndo, tyin tandihi cuatyí can cua coso siqui nyooho, nyivi tsa iyó vityin —catyi ra Jesús tsihin ra naha.

*Nu nducuihya cuñi ra Jesús nyehe ra tsi nyivi ñuu Jerusalén
(Lc. 13.34-35)*

³⁷ ¡Ñuu Jerusalén! ¡Ndahvi nyooho nyivi ñuu Jerusalén! Tyin tsahñi ndo tsi ra cuví ndusu yuhu Nyoo. Tan cañi ndo yuu tsi tandihi ra tsa jaquitsi Nyoo nu yucú ndo. Tan yuhu cuaha xaan tsaha cuñi yu jaha cuenda yu tsi ndo, tumaa iin ndivi sihi tsa jahá cuenda tsi sehe ti, tan naquihín vaha ti sehe ti tsitsi nditsin ti, maa tyin ña cuñi ndo. ³⁸ Nyehe ndo vityin, tyin tsa nacoo ihñi Nyoo tsi ndo. ³⁹ Tan catyi yu tsihin ndo, tyin ña cua nyehe ca ndo tsi yu nda cuanda quita quivi tsa cua catyi ndo tyin cahnu xaan cuví ra vatsí tsihin siivi Nyoo Jutu yo —catyi ra Jesús.

24

*Nu caahán ra Jesús tyin cua tani vehe ñuhu cahnu
(Mr. 13.1-2; Lc. 21.5-6)*

¹ Quitá ra Jesús tsitsi vehe ñuhu cahnu can, tan tsa cuñi cuhun ra, tan natuhva ra tsicá tsihin ra nu nyaá ra, tan quitsaha caahán ra naha cuhva caá vehe ñuhu can tsihin ra. ² Maa tyin nacahan ra Jesús tan catyi ra:

—¿A nyehé ndo tandihi tsa iyó ihya? Tsa nditsa catyí yu tshihin ndo, tyin ihya ndi intuhun ca yuu tan ña cua coso tsata inga tsi. Tandihi maa can tan cua tani —catyí ra.

Nu caahán ra Jesús náa cua cuvi tsa ndi cumañi ca naa ñuhu ñayivi
(Mr. 13.3-23; Lc. 21.7-24; 17.22-24)

³ Tacan tan cuahán ra naha yucu Olivo. Tan cuhva tsa nyaá ra Jesús ican, ra tsicá tshihin ra tsahán ra naha nu nyaá ra tan nducú tuhun xeehe ra naha tsi ra tan catyí ra naha:

—Cuñi ndi tsa catyí tuhun un tshihin ndi, ama cua cuvi tandihi tsa cahan un. ¿Nacaa tan coto ndi tatun tsa cuyatyin tsa cua quitsi un inga tsaha tan tsa cua naa ñuhu ñayivi?

⁴ Tacan tan nacahan ra Jesús:

—Jaha vaha ndo cuenda coto jandavi ñaha nyivi tsi ndo. ⁵ Tyin cuaha xaan ra cua quitsi, tan cua cutyiñu ra naha sivi yu, tan cua catyí ra naha: “Yuhu cuví ra Cristo, ra tsa jaquitsi Nyoo.” Tan cuaha nyivi cua jandavi ñaha ra naha. ⁶ Tan cua ñihi tuhun ndo tyin iyó cuatyí tan cañi tahan nyivi ityi can tan ityi ihya. Maa tyin ña nayuhvi ndo, tyin tacan taahán maa tsi cua cuvi tsa ndi cumañi ca naa ñuhu ñayivi. ⁷ Tyin nyivi iin ñuu cua cañi tahan ñi tshihin nyivi inga ñuu. Tan cua coo cuatyí iin ñuu tshihin inga ñuu. Tan cua coo tama, tan cua coo cuehe, tan cuaha ñi ityi cua taan ñihi. ⁸ Tandihi yacan cua cuvi nu ndi cua quitsaha nyehe nyivi tundoho.

⁹ Tacan tan cua cuhva cuenda nyivi tsi ndo tsi ra cumi tyiñu naha ra na tatsi tuñi ra naha tsi ndo. Tan cua cahñi ra naha tsi ndo. Tan tandihi nyivi iyó nu ñuhu ñayivi ndasi cua cuñi ñi nyehe ñi tsi ndo tsa cuenda yuhu. ¹⁰ Quivi can cuaha xaan nyivi cua jaña ñi tsa tsinú iñi ñi tsi yu, tan ndasi cua cuñi ñi nyehe tahan ñi tsi ñi. Tan cua naxico ñaha tahan ñi tsi ñi. ¹¹ Tan cuaha xaan ra caahán cuendu cua coo, tan cua catyí ra naha tyin cuenda Nyoo caahán ra naha. Tan cuaha xaan nyivi cua jandavi ñaha ra naha. ¹² Tan cuaha xaan tsa caquiñi cua coo. Yacan cuenda cua jandahi ñi tsa cuñi tahan ñi tsi ñi. ¹³ Maa tyin nyivi tsa tsinú iñi tsi yu nda cuenda nu ndihi, tan ña cua ndu uvi iñi ñi, cua cacu ñi. ¹⁴ Tan tani cahnu ñuhu ñayivi cua nacutya tuhun vaha tsa cuenda cuhva tsa ndacá ñaha Nyoo. Tan quivi cua coto nyivi tandihi ñuu tuhun vaha ihya, tacan tan cua naa ñayivi.

¹⁵ Ra Daniel, ra cuví ndusu yuhu Nyoo, tyaq ra nu tutu Nyoo tyin coo tsa cua janducaquiñi, tsa cua jativi. Quivi tsa cua nyehe ndo can tsitsi vehe ñuhu Nu Ii, (nyooho tsa cahví, na cutuñi iñi ndo). ¹⁶ Tyin quivi can, nyivi tsa iyó Judea taahán tsi tsa quita ñi ican tan cuhun ñi ityi yucu. ¹⁷ Tan nyivi yucú jiñi vehe, cua nuu ñi, maa tyin ña cua quihvi ñi tsitsi vehe ñi tan tava ñi tsa iyó tsitsi vehe ñi. ¹⁸ Tan nyivi yucú tsitsi cuhu ña cua cunuhu jihna ñi cunaquiñin ñi jahma ñi. ¹⁹ Ndahvi ñiñaha tsa ñuhú shehe quivi can! O tatun iyó shehe ñi tsa tyaxín, jndahvi ñi can! ²⁰ Ndacan ndo tsi Nyoo na ña tahan tsi cunu ndo quivi vitsin, tan ndi quivi quitatú yo. ²¹ Tyin tundoho tsa cua nyehe nyivi quivi can, ñaha ca maa coo can nda quivi tsa tsinú ñuhu ñayivi. Tan ndi ityi nuu ca ña cua nyehe nyivi tundoho tacan inga tsaha. ²² Tyin tatun ña cua janducuti Nyoo quivi can, yoñi maa cua cacu. Maa tyin cua janducuti ra tsa cuenda tsa cuñi ra tsi nyivi nacatsi maa ra.

²³ Tatun yoo cua cahan tshihin ndo: “Jihna ndo, ihya nyaá ra Cristo” o “Nyehe ndo, ndacan nyaá ra Cristo”, ña tsinu iñi ndo. ²⁴ Tyin cua quitsi ra jandavi ñaha naha ra tan cua catyí ra naha tyin ra Cristo cuví ra naha. Cua

catyi ra naha tyin ndusu yuhu Nyoo cuví ra naha. Tan cua javaha ra naha seña tan tsa iyo nahnu tyin cua jandavi ñaha ra naha nda cuanda nyivi tsa nacatsi maa Nyoo tun tsatyin cuvi jaha ra naha. ²⁵ Vaha tyin tsa tsitó ndo vityin ihya, jaha ndo cuenda tsi ndo quivi can. ²⁶ Yacan cuenda tatun catyi nyivi tsihin ndo: “Nyehe ndo, va ra Cristo nyii nu tsiqui can”, Ña cuhun ndo. O tatun catyi ñi tsihin ndo: “Nyehe ndo, nyii ra tsitsi cuartu ihya”, ña tsinu ñi ndo. ²⁷ Tyin tumaa tsa cañi tatsa savi nyehé yo xifnu xaan nda ityi nu caná ñicanyii tan nda cuanda ityi nu tyisó ñicanyii, tacan cua cuvi quivi quitsi yuhu, Rayii tsa quee nda gloria. ²⁸ Tumaa natacá nditsii nu cayucú tsa ñi, tacan cua nataca nyivi yihí cuenda yu quivi quitsi yu inga tsaha.

*Nacaa cua quitsi Rayii tsa quee nda gloria inga tsaha
(Mr. 13.24-37; Lc. 21.25-33; 17.26-30, 34-36)*

²⁹ Tan tsa yaha tsa cua nyehe nyivi tundoho, ñicanyii cua ndunaa tsi, yoo ña cua jandunditsin ca tsi, tan tiñuu cua cucoyo tiñuu, tan tandihi tsa iyó andivi cua nacanda. ³⁰ Tacan tan cua quituvi seña ityi andivi tyin vatsi yuhu Rayii tsa quee nda gloria. Cua quitsi yu nu vico ityi andivi tsihin tunyee ñi cahnu tan tsihin tsa cahnu cuví Nyoo. Tan tandihi nyivi iyó nu ñuhu ñayivi, cua vacu tsa xaan ñi tsa cua nyehe ñi tsi yu. ³¹ Tan cuaha ángel cuenda yu cua jaquitsi yu tyin ñihi cua tivi ra naha cutu tan cua jandu iin ra naha tsi nyivi nacatsi maa Nyoo. Cua quita ñi tanii cahnu nu ñuhu ñayivi, nda cuanda nu ndihi ñuhu ñayivi tan nda cuanda nu ndihi andivi.

³² ‘Cutuñi ñi ndo iin cuhva yutun tsa nañi higo: Tatun tsa yutya soco tun, tan tsa cana ndaha yutya tun, nyooho tsitó ndo tyin tsa cua coo tsiti tun. ³³ Tan juvin ñi tacan, tatun tsa cuví tandihi yacan nyehé ndo, cua coto ndo tyin tsa cuyatyin quitsi yu; tan tsa nyanaá yu yuvehe cuví tsi. ³⁴ Tsa nditsa catyi yu tsihin ndo tyin tandihi yacan cua cuvi jihna, tsa ndi cumañi ca cúu nyivi iyó nu ñuhu ñayivi. ³⁵ Tan coo quivi cua cunaa andivi tan tsihin ñuhu ñayivi, maa tyin tuhun caahán yuhu, ña cua cundihi tsi tyin cua cundaa tandihi tsi.

³⁶ Maa tyin quivi tan hora tsa cua cuvi yacan, yoñi tsitó, ndi ángel iyó gloria tan ña tsitó ra naha. Intuhun ñi maa Nyoo Jutu yo tsitó.

³⁷ Tumaa cuví quivi tsa tsicoo ra Noé, tacan cua cuvi quivi tsa cua quitsi nyico yuhu Rayii tsa quee nda gloria. ³⁸ Quivi tsa ndi cumañi ca cuun savi xaan, nyivi can, tsatsi ñi, tsihi ñi, tindahá ñi, tan tsahá ñi tsi sehe sihi ñi tindaha nda cuanda quivi quihvi ra Noé tsitsi yutun ndoo. ³⁹ Tan sana ñi ñi tan tsa savi tan tañi tandihi ñi. Tan tacan sana ñi ñi tan cua tahan tsi quivi quitsi nyico yuhu Rayii tsa quee nda gloria. ⁴⁰ Tan tatun yucú uvi taahan rayii tsitsi cuhu quivi can, intuhun ñi ra cua quihin yu, tan cua nacoo yu tsi inga ra. ⁴¹ Tan quivi can uvi taahan ñaha cua nyico ñi. Intuhun ña cua naquihin yu, tan inga ña cua ndoo ña. ⁴² Cuatu vaha ndo tyin ña tsitó ndo náa hora cua quitsi ra ndacá ñaha tsi ndo. ⁴³ Tan coto ndo tuhun ihya tyin tatun iin tsitoho vehe tan tsitó ra náa cuhva cua quihvi ñasuhu tsitsi vehe ra, cua cuatu vaha ra tan ña cua cuhva ra tsa quihvi ñasuhu can. ⁴⁴ Yacan cuenda nyooho, cuatu vaha ndo. Tyin sana ñi ndo, tan cua quitsi nyico yuhu Rayii tsa quee nda gloria.

*Musu vaha tan musu ña vaha
(Lc. 12.41-48)*

⁴⁵ Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha hora tsahá ra tsa catsi tandihi ca

musu. ⁴⁶ Tan sii xaan cuñi ra cuví musu vaha can, tatun cuhva tsa jahá tyiñu ra tan tsa tsitoho ra. Tyin tyaá yahvi ra tandihi tsa taahán tsi ica ra. ⁴⁷ Tan tsa nditsa catyí yu tsihin ndo, tyin tsitoho ra cua nacuhva ra tandihi cuíi tsa cumí ra, cua quíhi ndaha ra, tyin vaha tyaá yahvi ra tsihin tyiñu jahá ra. ⁴⁸ Maa tyin iin musu ña vaha tsicá iñi ra tyin cua cucuee tsitoho ra. ⁴⁹ Tacan tan quítsaha cañi ra tsi inga musu, tan tsatsi ra tan tsihi ra nyixi tsihin ra tsiñi naha ra. ⁵⁰ Tacan tan sana iñi ra tan cua tsa tsitoho ra quívi tsa ña ndatú ra tsi ra, tan hora tsa ña tsitó ra. ⁵¹ Tacan tan tsitoho ra ñihi xaan cua tatsi tuñi ra tsi ra tumaa tuhvá maa ra icá tsihin nyívi tsa jahá tyin vaha xaan ñi tan ña icá ñi tsa vaha. Tacan tan cua vacu ra cuví musu ña vaha can tan cahyu ña cua cuví nuhu ra tsa nyehé ra tundoho.

25

Nu cahán ra Jesús iin cuhva cuenda utsi taahan ñaha yoco

¹ Tsa ndacá ñaha Nyoo tsi nyívi cuví tsi tumaa utsi taahan ñaha yoco tsa quihín lámpara tsa yihí acetye tan cuahán ñi iin vico tindaha tyin cua jatahan ñi tsi ra tsa cua tindaha. ² Uhun taahan ñi, soho xaan ñuhú iñi ñi, tan inga uhun taahan ñi can catsi xaan tsicá iñi ñi. ³ Ñi tsa soho ñuhú iñi can, nyisó ñi lámpara ñi maa tyin ña quihín ñi juhva ca acetye tsa natyihí ñi tsitsi lámpara ñi tatun ndihí tsi. ⁴ Tan ñi tsa catsi tsicá iñi can, nyisó sñn ñi inga yutyi acetye tsa cua natyihí ñi tsitsi lámpara can tatun ndihí acetye tsa yihí tsitsi lámpara can. ⁵ Tan ra tsa cua tindaha can cucueé xaan ra, tacan tan tñn ñumaahna tsi tandihi ñi, tan quixi ñi. ⁶ Tacan tan maa ñuu tsiñi ñi iin ndusu tsa catyí tyehen: “¡Tsa vatsi ra tsa cua tindaha! ¡Quita ndo, jatahan ndo tsi ra!” ⁷ Tandihí ñi can nduvitá ñi tan quítsaha janduvahá ñi lámpara ñi. ⁸ Tacan tan quítsaha caahán tsa uhun ñi soho ñuhú iñi can tsihin inga uhun ñi can tan catyí ñi: “Cuhva ndo juhva acetye ndahá ndo tsi ndi, tyin cuñi ndahva lámpara ndi”, catyí ñi. ⁹ Maa tyin ñi yoco tsa catsi tsicá iñi can nacahán ñi tyehen: “Ña cua cuhva ndi tyin coto ña cua cutahan tsi tsa cuenda ndi tan ndi tsa cuenda nyooho. Vaha ca huhun maa ndo cuyata ndo nu cuyahví tsi.” ¹⁰ Maa tyin tsitsi tsa cuahán tsa uhun ñi soho ñuhú iñi can cuajata ñi acetye, tan tsaá ra tsa cua tindaha can. Tan ñi yoco tsa ndatú vaha can, quihví ñi tsihin ra tsitsi vehe nu cua coo vico tindaha. Tan tsicundasí yuvehe can. ¹¹ Yahá can tan tsaá nyico ñi soho ñuhú iñi can, tan catyí ñi: “¡Yooho tata! ¡Nuña yuvehe na quihvi ndi!”, catyí ñi. ¹² Maa tyin maa ra nacahán ra, tan catyí ra: “Tsa nditsa catyí yu tsihin ndo tyin ña nacotó yu tsi ndo.”

¹³ Tacan tan quítsaha caahán ra Jesús:

—Cuatu vaha ndo, tyin ña tsitó ndo ndáa quívi tan náa hora cua quítsi nyico yuhu Rayi tsa quee nda gloria.

Nu caahán ra Jesús tsihin yo na jaha tyiñu yo tsihin tsa tsahá Nyoo tsi yo (Lc. 19.11-27)

¹⁴ Tsa ndacá ñaha Nyoo tsi nyívi cuví tsi tumaa iin rayi tsa nyaá cua quita huhun inga ñuu nu cañi. Tan caná ra tsi musu ra, tan tsahá cuenda ra xuhun ra tsi ra naha tyin jaha cuenda ra naha.

¹⁵ Iin ra tsahá ra uhun mil xuhun, tan inga ra tsahá ra uvi mil xuhun, tan inga ra tsahá ra iin mil. Tsahá ra tsi intuhun intuhun ra nácaa cuhva tsitó ra jaha tyiñu ra naha tan cua nandaa siqui xuhun can. Tacan tan cuahán ra.

¹⁶ Musu tsa quihín uhun mil xuhun can, ñihi jahá tyiñu ra tsihin xuhun can,

tan jahā canaa ra inga uhun mil ca siqui tsi. ¹⁷ Tan juven ñi tacan tucu ra tsa quihñ uvi mil can, jahā canaa ra uvi mil ca tsihin xuhun can. ¹⁸ Maa tyin ra tsa quihñ intuhun ñi mil can, tsahān ra tan tsatyā ra iin yavi tsitsi ñuhu tan tyihñ xeehe ra xuhun tsitoho ra.

¹⁹ Cuaha quivi yahā tan tsaā nyico tsitoho musu can. Tan quitsahā natavā cuenda ra tsihin intuhun intuhun ra naha. ²⁰ Jihna ca ra tsa quihñ uhun mil xuhun can tsaā, tan nacuhvā cuenda ra uhun mil ca siqui can, tan catyí ra: “Taa, uhun mil tsahā un tsi yu, juhun inga uhun mil ihya tsa jahā canaa yu siqui tsi.” ²¹ Tan tsitoho ra catyí ra tsihin ra: “Vaha. Iin musu vaha xaan cuví un. Tan javahā un tandihñ tsa cañan yu tsihin un. Luxu ñi xuhun tsahā yu tsi un tan vaha xaan tsatyññu un itsi. Vityin cuaha ca cua cuhva cuenda yu tsi un. Quihñi nu vaha ihya, tan sñ cuññi un tsihin yu.” ²² Yahā can tan tsaā musu tsa quihñ uvi mil xuhun can, tan catyí ra: “Taa, uvi mil ñi tsahā un tsi yu, juhun uvi mil ca ihya tsa jahā canaa yu siqui tsi.” ²³ Tan catyí tsitoho ra tsihin ra: “Vaha. Iin musu vaha xaan cuví un, tan javahā un tandihñ tsa cañan yu tsihin un. Luxu ñi xuhun tsahā yu tsi un tan vaha xaan tsatyññu un itsi. Vityin cuaha ca cua cuhva cuenda yu tsi un. Quihñi nu vaha ihya, tan sñ cuññi un tsihin yu”, catyí ra. ²⁴ Tan cuhva tsa tsaā musu tsa quihñ intuhun ñi mil xuhun can, catyí ra tsihin tsitoho ra: “Taa, yuhu tsitó yu tyin xaan xaan un tan cuññi un naquihñ un xuhun nu ña jahā tyiññu un, tan cuññi un naquihñ un cosecha nu ña tatsi un. ²⁵ Yacan cuenda nayuhvñ yu tan tsahān yu tan tyihñ xeehe yu xuhun un tsitsi ñuhu. Juhun xuhun ihya tsa tsahā un tsi yu”, catyí ra. ²⁶ Tacan tan nacahān tsitoho ra, tan catyí ra tsihin ra: “Musu ña vaha cuví un, tan musu jutsan cuví yooho. Tatun tsitó un tyin naquihñ yu nu ña jahā tyiññu yu, tan quihñ yu cosecha nu ña tatsi yu, ²⁷ ¿nácaa tyin ña tsityihñ un xuhun yu nu banco? Tun tsatyin tacan javahā un, tsa cua quitsi nyico yu cuví naquihñ yu xuhun can tsihin xuhun siqui tsa jahā canaa tsi”, catyí ra. ²⁸ Tacan tan quitsahā caahān ra tsihin ra tsa yucú can naha ra: “Quihñ nyaa ndo tsa iin mil tsa ndahā ra, tan cuhva ndo tsi ra tsa ndahā utsi mil. ²⁹ Tyin nyivñ jahā tyiññu vaha tsihin tsa iyó tsi ñi, cua cuhva ca yu tsi ñi, tan cua coo cuaha tsi ñi, nda cuanda ndoo ca. Maa tyin nyivñ tsa ña cuññi jahā tyiññu tsihin tsa tsahā yu, nda cuanda tsa luxu tsa cumí ñi, cua quihñ nyaa ndihñ yu. ³⁰ Tan musu tsa ña tsiññi ñuhu tsi yu ihya, tava ndo tsi ra nacuhun ra nu naa ityi tsata, tan ndacan cua vacu tsaā ra, tan cahyu ña cua cuví nuhu ra tsihin tsa nyehé ra tundo ho.”

Nu cañan ra Jesús tyin cua cutuññi tandihñ nyivñ

³¹ Quivñ cua quitsi nyico yuhu Rayññ tsa queeñ nda gloria, cua quitsi yu tsihin cuaha ángel cuenda yu. Tan cua cunyya yu tyayu sñ caá tan cua cundaca ñaha yu. ³² Tandihñ cuivñ nyivñ iyó naniñ cahnu nu ñuhu ñayivñ cua nataca ñi nuu yu. Tan cua natava sññ yu tsi intuhun intuhun ñi, tumaa ra jahā cuenda mbee tavá sññ ra tsi mbee ticatyñ tan tavá sññ tucu ra tsi mbee chivo. ³³ Tan cua tyaa yu tsi mbee ticatyñ can tsiyo cuaha yu, tan inga mbee can cua tyaa yu tsiyo satyñ yu. ³⁴ Tacan tan yuhu tsa cuví yu Rey cua catyí yu tsihin nyivñ nyecú tsiyo cuaha yu: “Ñaha nyooho nyivñ tsa nasoco Jutu yu. Na quihñ cuenda ndo nu cua cunyecu ndo nu ndacá ñaha Nyoo, tyin tsa cuenda maa ndo javahā ra ihya quivñ javahā ra ñuhu ñayivñ. ³⁵ Tyin quivñ tsiyoco yu, nyooho tsahā ndo tsa tsatsy yu. Quivñ na ityiññi yu, tsahā ndo ndutyá tsihñ yu. Tan quivñ tsiyá nuu yu cuví yu ra inga ñuhu, tsahā ndo nu quixñ yu. ³⁶ Quivñ cumaññi jahma yu, tsahā ndo jahma tsinditsñ yu. Quivñ cuhvñ yu, tsinyehē ndo nu canyññi yu. Tan quivñ tsinyññi yu vehe caa, tsinyehē ndo nu nyivñ yu”. Tacan

cua cahan yu tsihin ñi. ³⁷ Tan ñi tsa vaha iñi can cua ndaca tuhun ñi tsi yu, tan catyi ñi: “Jutu Mañi yu, ¿ama nyehe ndi tsioco un, tan tsaḥa ndi tsa tsatsi un? ¿Ama nyehe ndi na ityi iñi un tan tsaḥa ndi tsa tsihi un? ³⁸ ¿Ama nyehe ndi tsi un tsicā nuu un cuví un ra inga ñuu tan tsaḥa ndi vehe nu quixi un? ¿Ama cumañi jahma un, tan tsaḥa ndi jahma tsinditsi un? ³⁹ ¿Ama nyehe ndi cuhví un, o tsinyi un vehe caa, tan tsaḥan ndi tsinyeḥe ndi tsi un?” cua catyi ñi. ⁴⁰ Tan yuhu tsa cuví Rey cua catyi yu tsihin ñi: “Tsa nditsa catyi yu tsihin ndo, tyin tandihi tumañi iñi tsa javaha ndo tsi ra ndaahvi, ra yañi yu, tsi yuhu javaha ndo tumañi iñi”, cua catyi yu tsihin ñi.

⁴¹ Tacan tan yuhu tsa cuví Rey cua cahan yu tsihin nyivi tsa yucú tsiyo satyin yu tyeḥen: “Çatsiyo ndo nuu yu, nyooḥo, nyivi taahán tsi cuhun anyaya. Çaqaahan ndo nu ñuhú tsa ña cua ndahva maa. Tsinu anyaya can tyin ican cua coo nu ña vaha tan tatyí ña vaha cuenda nu. ⁴² Tyin tsioco yu tan nyooḥo ña tsaḥa ndo tsa catsi yu. Na ityi iñi yu tan ña tsaḥa ndo ndutya coho yu. ⁴³ Tsiacā nuu yu cuví yu iin ra inga ñuu, tan ña tsaḥa ndo nu cusu yu. Cumañi jahma yu tan ña tsaḥa ndo jahma cunditsi yu. Nacuhvi yu tan tsinyi yu vehe caa, maa tyin ña tsaḥan ndo tsinyeḥe ndo tsi yu nu tsinyi yu”, cua catyi yu tsihin ñi. ⁴⁴ Tacan tan cua catyi ñi tsihin yu: “Jutu Mañi yu, ¿ama nyehe ndi tsioco un, o na ityi iñi un, o tsicā nuu un cuví un ra inga ñuu, o nduve jahma un, o nacuhvi un, o tsinyi un vehe caa, tan ña jatinyeḥe ndi tsi un?” cua catyi ñi. ⁴⁵ Tan yuhu tsa cuví yu Rey cua catyi yu tsihin ñi: “Tsa nditsa caahán yu tsihin ndo tyin tandihi maa tsa ña javaha ndo tsihin nyivi ndaahvi ihya, ña javaha ndihi ndo tsihin yu, cuví can”, cua catyi yu tsihin ñi. ⁴⁶ Tacan tan ñi can cua cuhun ñi nu cayú ñuhú tsa ña cua ndahva maa. Tan nyivi vaha can cua cuhun ñi coo ñi ñayivi nyito tsa ña cua naa maa.

26

Nu nducú ra mandoñi naha ra cuhva nácaa tan tiin ra naha tsi ra Jesús
(Mr. 14.1-2; Lc. 22.1-2; Jn. 11.45-53)

¹ Cuhva tsa ndihi caḥan ra Jesús tandihi tuhun can, tan quitsaḥa catyi ra tsihin ra tsicá tsihin ra:

²—Nyooḥo tsitó ndo tyin ndi cumañi uvi ca quivi tan tahan tsi vico pascua. Tan yuhu, Rayi tsa quee nda gloria, cua cuhva cuenda nyivi tsi yu na tyaa ra cumi tyiñu tsi yu nu cruu —catyi ra.

³ Quivi can jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra mandoñi ñuu naha ra, ndu iin ra naha nuquehe vehe tyiñu ra Caifás, ra jutu tsaahnu tsa cuví ityi nuu. ⁴ Tan jandaḡa ra naha tyiñu nácaa cua jandavi ñaha ra naha tsi ra Jesús tan tiin ra naha tsi ra tan cañi ra naha tsi ra. ⁵ Tan catyi ra naha:

—Ña cua cañi yo tsi ra quivi maa vico, coto nduvaa xaan nyivi —catyi ra naha.

Nu tyosó iin ñaha ndutya tami jiñi ra Jesús
(Mr. 14.3-9; Jn. 12.1-8)

⁶ Ra Jesús nyii ra ñuu Betania, vehe ra Simón, ra tsa yihí cuehe tyaahyu. ⁷ Tan natuhvḡ iin ñaha nu nyaá ra Jesús, ndahá ña iin yutyi yuu vaha tsitú can yihí ndutya tami. Tan yahvi xaan nyaá ndutya tami can. Tan ra Jesús nyaá ra yuhu mesa, tan ñaha can tyosó ña ndutya can jiñi ra. ⁸ Tsa nyehe ra tsicá tsihin ra, nduxaḡan ra naha tan catyi ra naha:

—¿Nacuenda jativi ña ndutya tami can? ⁹ Vaha ca tun tsatyin xico ña can, tan ñihi cuaha ña xuhun tsihin can. Tan cuvi jatyinyee ña tsi nyivi ndaahvi tsihin xuhun can —catyí ra naha.

¹⁰ Tan tsa tsiñi ra Jesús tsa caahán ra naha, tacan tan catyí ra tsihin ra naha:

—¿Nacuenda cuñi ndo jandu uvi iñi ndo tsi ñaha ihya? Tan tsa javahá ña tsihin yu, tsa vaha cuví tsi. ¹¹ Tyin nyivi ndaahvi tandihi ñi quivi cua coo ñi tsihin ndo, maa tyin yuhu, ña naha ca cua cunyi yu tsihin ndo. ¹² Tyoso ña ndutya tami siqui cuñu ñuhu yu, tyin janduvahá ña itsi tyin cua cuhun tsi tsitsi ñuhu. ¹³ Tsa nditsa catyí yu tsihin ndo, tyin tandihi ñi nu cua cahan nyivi tuhun Nyoo tani cahnu ñuhu ñayivi, cua nacatyí tuhun tucu ñi tsa javahá ñaha ihya, na nducuhun iñi nyivi tsi ña —catyí ra Jesús.

Nu xico ra Judas Iscariote tsi ra Jesús

(Mr. 14.10-11; Lc. 22.3-6)

¹⁴ Tacan tan iin ra tsicá tsihin ra Jesús, ra tsa nañi Judas Iscariote, tsañan ra tsicahán ra tsihin ra jutu tsa cuví ityi nuu naha ra. ¹⁵ Tan catyí ra tsihin ra naha:

—¿Nacaa cua tyahvi ndo tsi yu tatun cuhva cuenda yu tsi ra Jesús tsi ndo?

Tacan tan ra jutu can naha ra tsañá ra naha oco utsi xuhun cuitsin tsi ra.

¹⁶ Tan nda quivi can tan quitsahá nducú ra Judas cuhva cua nacuhva cuenda ra tsi ra Jesús tsi ra jutu can naha ra.

Nu cuxiñi ra Jesús tsihin ra tsicá tsihin ra

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Quivi jilna ñi tsa quitsahá vico nu tsatsi nyivi paan tsa nduve yutsan iya yihí, ra tsicá tsihin ra Jesús natuhvá ra naha nu nyaá ra tan quitsahá tsicá tuhun ra naha tsi ra tan catyí ra naha:

—¿Numaa cuñi un tsa kujanduvaha ndi tsa cuxiñi un cuenda vico pascua ihya?

¹⁸ Tan catyí ra Jesús tsihin ra naha:

—Cuaahan ndo tsitsi ñuu nda vehe rayi ihya. Tan catyí ndo tsihin ra: “Ra Maestro catyí ra tyin tsa yatyin cua cúu ra, tan vehe maa un cua jacahnu ndi vico pascua”, catyí ndo tsihin ra —catyí ra Jesús.

¹⁹ Tacan tan javahá ra naha cuhva cañan ra Jesús tsihin ra naha. Tan janduvahá ra naha tsa cuxiñi ra naha vico pascua can.

²⁰ Tsa cunaaha tan tsicunyaá ra Jesús nu mesa tsihin tandihi utsi uvi ra tsicá tsihin ra. ²¹ Tan tsitsi tsa tsatsi ra naha, catyí ra Jesús tsihin ra naha:

—Tsa nditsa catyí yu tsihin ndo tyin iin nyoocho cua xico ndo tsi yu tsi ra xaan iñi tsi yu.

²² Tan nducuihyá xaan cuñi ra naha, tan quitsahá tsicá tuhun tan iin tan iin ra naha tsi ra tan catyí ra naha:

—Jutu Mañi yu, ¿a ñavin yuhu cuví can?

²³ Tan nacahán ra Jesús tan catyí ra:

—Ra tsa tsatsi iin ñi coho tsihin yu, ra ican cua xico tsi yu. ²⁴ Yuhu, Rayi tsa quee nda gloria, cua tahan yu tumaa tsa caahán nu tutu Nyoo. Maa tyin ndaahvi ra ndaahvi tsa cua xico tsi yu. Vaha vihi ca tun tsatyin ña cacú ra —catyí ra Jesús.

²⁵ Tacan tan nacahán ra Judas, ra tsa xico tsi ra, tan catyí ra:

—Maestro, ¿a yuhu cuví can?

Tan nacahán ra Jesús, tan catyí ra:

—Juvin un.

²⁶ Tsitsi tsa tsatsí ra naha, ra Jesús quih̄in ra paan tan nacuhv̄a ra tyahvi nyoo tsi Nyoo, tan tsahn̄u sava ra, tan tsaḥa ra tsi ra tsicá tsihin ra, tan catyí ra tsihin ra naha:

—Cats̄i ndo. Paan ihya cuví tumaa cuñu ñuhu yu.

²⁷ Yah̄a can tan quih̄in tucu ra vasu vinu, tan nacuhv̄a ra tyahvi nyoo tsi Nyoo, tan jayah̄a ra tsi tandih̄i ra naha tan catyí ra:

—Coho tandih̄i ndo vinu ihya. ²⁸ Tyin cuví tsi tumaa ñiñi yu. Tan tsihin ñiñi yu cua cundaa tyiñu tsa ndoo Nyoo tsihin ndo, tyin cua cati ñiñi yu tsa cuenda tsa vaha tsi nyivi cuaha, tyin tsihin ñiñi yu cua coo tucahn̄u iñi cuatyí ñi. ²⁹ Tan catyí yu tsihin ndo, tyin ña cua coho ca yu tahan vinu tsa cuví ndutya uvav ihya, nda cuanda tsa coho yu vinu tsa tsihin ndo nda nu ndacá ñaha jutu yu gloria —catyí ra.

Nu caḥan ra Jesús tyin cua caḥan ra Pedro tyin ña nacotó ra tsi ra
(Mr. 14.26-31; Lc. 22.31-34; Jn. 13.36-38)

³⁰ Tsa yah̄a tsa tsit̄a ra naha iin yaa Nyoo, tan cuahán ra naha yucu Olivo.

³¹ Tacan tan quitsah̄a caahán ra Jesús tsihin ra naha:

—Tandih̄i nyooho tan cua nacoo ih̄ni ndo tsi yu vityin tsacuaa ihya. Tyin nu tutu Nyoo catyí tsi tyeheh: “Cua cañi yu tsi ra jahá cuenda mbee ticatyí jana yu, tan mbee can cua natsatsa ti naha ti”, catyí tsi. ³² Maa tyin tsa yah̄a nandoto yu, jihna ca yu cua cuhun Galilea, tsa ndi cumañi ca cuhun nyooho.

³³ Tacan tan nacah̄an ra Pedro tan catyí ra:

—Vasu ndi maa tandih̄i ra tan ndu uvi iñi ra naha tsa nyicún ra naha tsi un, maa tyin yuhu ña cua ndu uvi iñi yu.

³⁴ Tacan tan catyí ra Jesús tsihin ra:

—Tsa nditsa catyí yu tsihin un tyin juvin ñi maa tsacuaa vityin, tsa ndi cumañi ca vacu tsitooho, uñi tsaha cua caḥan un tyin ña nacotó un tsi yu —catyí ra Jesús.

³⁵ Tan ra Pedro catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra.

Tan juvin ñi tacan catyí tandih̄i ca ra tsicá tsihin ra.

Nu tsic̄an tahvi ra Jesús tsi Nyoo nda Getsemani
(Mr. 14.32-42; Lc. 22.39-46)

³⁶ Tacan tan tsaḥa ra Jesús tsihin ra tsicá tsihin ra iin nu iyó cuaha yutun nu nañi Getsemani, tan catyí ra tsihin ra naha:

—Cunyecu ndo ihya tsitsi tsa cuahán yu ndacan cua ndacan tahvi yu.

³⁷ Tan quih̄in ra tsi ra Pedro tan nduvi sehe ra Zebedeo cuahán tsihin ra. Tan quits̄j tucuih̄ya iñi cañu tsi ra, tan tsa tuñu cuñi ra. ³⁸ Tacan tan catyí ra tsihin ra naha:

—Cañu xaan tucuih̄ya iñi nyaá añima yu, nda cuanda cuñi cañi ña can tsi yu. Ndoo ndo ihya tan coo nyito ndo tsihin yu —catyí ra.

³⁹ Tacan tan cuahán ra Jesús luxu ca ityi nuu tan tsicuiñi tsiti ra tan tsaqūin ra nuu ra nda nu ñuhu, tan tsicán tahvi ra tsi Nyoo tan catyí ra:

—Tyaa, tun tsatyin cuví jatsiyo nyaha un tundoho ihya siqui yu, vaha xaan. Maa tyin na ña cuví cuhva cuñi maa yu, tan na cuví cuhva cuñi maa un —catyí ra.

⁴⁰ Tacan tan tsaḥa ra nu yucú ra tsicá tsihin ra, tan nyehe ra tyin quixí ra naha. Tan catyí ra tsihin ra Pedro:

—¿A ña cuví coo nyito ndo tsihin yu vasu tan intuhun hora? ⁴¹ Coo nyito ndo, tan ndacan tahvi ndo tsi Nyoo; tacan tan ña cua javaha ndo cuhva cuñi nu ña vaha. Tsa nditsa tyin añima ndo, cuñi xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñi —catyí ra Jesús.

⁴² Tan tsa tsahan ra tsa tsinu uvi tsaha, tsican tahvi ra tyehen:

—Tyaa, tatun ña cuví tsa jatsiyo nyaha un tundoho ihya siqui yu, na cuví cuhva cuñi maa un —catyí ra.

⁴³ Tacan tan tsaq ra inga tsaha tan nyehe ra tyin quixí nyico ra tsicá tsihin ra, tyin tsicundasí maa tinuu ra naha tsihin tsa cuñi xaan ra naha cusu ra naha. ⁴⁴ Tacan tan nacoq ra tsi ra naha, tan cuahán ra tsa tsinu uñi tsaha cua ndacan tahvi ra. Tan tsican tahvi ra tsi Nyoo juvin ñi maa tsihin tuhun tsa tsa yaha cahan ra. ⁴⁵ Tacan tan tsaq nyico ra nu yucú ra tsicá tsihin ra, tan catyí ra tsihin ra naha:

—Vityin cusu ndo tan quitatu ndo. Tyin tsa tsaq cuhva tsa cua nacuhva cuenda ra can tsi Rayi tsa quee nda gloria tsi ra iyó cuatyí naha ra. ⁴⁶ Nduvita ndo, cohon ndo. Tyin tsa vatsí ra tsa xico tsi yu —catyí ra Jesús.

Nu tsaha cuenda ra Judas tsi ra Jesús tsi nu xaan iñi tsi ra nahnu
(Mr. 14.43-50; Lc. 22.47-53; Jn. 18.2-11)

⁴⁷ Ndi caahán ca ra Jesús yacan, tan tsaq ra Judas, ra tsa cuví iin ra tsicá tsihin ra Jesús. Tan tsihin ra Judas tsaq tucu cuaha xaan nyivi ndahá mityi tan yutun jacuhun ra cuví jutu tsa cuví ityi nuu naha ra tan ra cuví mandoñi nyivi Israel naha ra. ⁴⁸ Tan ra Judas, ra tsa tsahá cuenda tsi ra Jesús, tsa yaha tsaha ra iin seña tsi ra can naha ra, tyin coto ra naha yóo cua tiin ra naha. Tyin tsa yaha cahan ra tsihin ra naha:

—Ra tsa cua tyayuhu yu, ra ican cuví ra tsa cua tiin ndo.

⁴⁹ Tacan tan natuhva ra Judas nu nyaá ra Jesús tan catyí ra:

—Nacumi tsi un, Maestro.

Tan tyayuhu ra tsi ra.

⁵⁰ Tacan tan nacahan ra Jesús tan catyí ra tsihin ra:

—¿Náa tyiñu vatsí un ñih?

Tacan tan natuhva ra can naha ra tan tiin ra naha tsi ra Jesús.

⁵¹ Tacan tan iin ra cutahán tsihin ra Jesús, tava ra mityi tan tsahnya ra soho musu jutu tsahnu tsa cuví ityi nuu. ⁵² Tan catyí ra Jesús tsihin ra:

—Natyihí mityi un tsitsi vena un. Tyin tandihí nyivi tsa cañi tahan tsihin mityi, juvin ñi tsihin mityi cua cúu ñi. ⁵³ ¿A ña tsitó un tyin tatun yuhu tan cuñi yu, cuví ndacan yu tsi Jutu yu, tan maa ra cua jaquitsi ra vityin vityin yaha ca uñi xico utsi mil ángel, tan jacacu ra naha tsi yu? ⁵⁴ Maa tyin tatun tacan javaha yu, ¿náca cua cundaa tsa nyaá nu tutu Nyoo nu catyí tsi tyin taahán maa tsi tsa tahan yu tyehen? —catyí ra.

⁵⁵ Tacan tan catyí ra Jesús tsihin tandihí nyivi:

—¿A vatsí tiin ndo tsi yu tumaa cua tiin ndo iin ñasuhu? tyin ndahá ndo mityi tan yutun. Tandihí quivi tsinyi yu jacuhá yu tsi ndo tsitsi vehe ñuhu cahnu, tan ña tiin ndo tsi yu. ⁵⁶ Tandihí yacan cuví tyin tacan tan cundaa cuhva catyí tuhun Nyoo, tsa tyaa ra cuví ndusu yuhu Nyoo tahan tsanaha.

Tacan tan tandihí ra tsicá tsihin ra, tsinu ra naha. Tan ndoq intuhun ña maa ra.

Nu tsicq tuhun ra mandoñi naha ra tsi ra Jesús tatun Sehe Nyoo cuví tsi ra
(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Tan ra tsa t̄in tsi ra Jesús, tsindac̄a ra naha tsi ra nuu ra Caifás, ra jutu tsaahnu tsa cuví ityi nuu. Tan iin cahnu ñi yucú ra maestro cuenda ley vehe ñuhu naha ra ican tan ra mandoñi naha ra. ⁵⁸ Tan ra Pedro cuahán ra tsata ra naha, tan tsāa ra nda nuquehe vehe ra Caifás can. Tan quihvi ra tan ndōo ra nyi ra tsihin vitya can naha ra, tyin cua nyehe ra nácaa cua quita tuhun can.

⁵⁹ Ra jutu tsa cuví ityi nuu naha ra, tan ra mandoñi naha ra, tan tandih̄i ra cumi tyiñu naha ra, nduc̄u ra naha tsi ra cahan cuendu siqui ra Jesús. Tyin tacan tan cuvi cahñi ra naha tsi ra. ⁶⁰ Maa tyin ña ñih̄i maa ra naha cuatyí tyaa ra naha siqui ra, vasu ndi maa cuaha nyivi tsah̄an ñi tsicah̄an ñi cuendu siqui ra. Tan nu ndih̄i tuhun, tsāa uvi ca tsa ndaa tsa caahán cuendu. ⁶¹ Tan catyí ra naha:

—Ra ihya, catyí ra tyin cuví cani ra vehe ñuhu cahnu Nyoo, tan tsitsi tsa uñi quivi cua janduvita ra tsi inga tsaha —catyí ra naha.

⁶² Tacan tan ra jutu tsa cuví ityi nuu can, nduvit̄a ra, tan catyí ra tsihin ra Jesús:

—¿A ña nacahan un nu caahán ra ihya naha ra? ¿A nditsa tsa caahán ra ihya naha ra, o ña nditsa?

⁶³ Maa tyin ra Jesús ña nacah̄an ra. Tacan tan catyí ra jutu tsaahnu tsa cuví ityi nuu tsihin ra:

—Tsihin sivi Nyoo nyitó, catyí yu tsihin un tyin catyí un tsa nditsa vaha. ¿A ra Cristo Sehe Nyoo cuví tsi un? —catyí ra.

⁶⁴ Tan catyí ra Jesús tsihin ra:

—Juv̄in yu cuví. Tan catyí tucu yu tsihin ndo, tyin cua nyehe ndo tsi yuhu, Rayi tsa quee nda gloria, cunyaa yu xiin cuaha Nyoo ra iyó tandih̄i tunyee iñi, tan cua nyehe ndo nu cua quitsi yu nu vico ityi andivi inga tsaha —catyí ra.

⁶⁵ Tacan tan ra jutu tsaahnu tsa cuví ityi nuu can tsahnya ra jahma ra tumaa iin seña tyin cuñi maa ra tyin ña vaha tsa caahán ra Jesús, tan catyí ra tsihin tandih̄i ca ra naha:

—Ra ihya tsicōo cuatyí ra nuu Nyoo tsihin tsa caahán ra. ¡Nyehe ndo vityin! Ña cuñi ca tsi tsa nducu yo inga tsa ndaa tyin tsa tsiñi maa ndo tsa ña vaha tsa cah̄an ra. ⁶⁶ ¿Naa catyí ndo vityin?

Tan nacah̄an ra naha tan catyí ra naha:

—Iyó cuatyí ra, yacan taahán tsi tsa cúu ra.

⁶⁷ Tacan tan tiv̄i si ra naha nuu ra tan cañi ra naha tsi ra. Inga ra cañi ra naha nuu ra tsihin tsiqui. ⁶⁸ Tan catyí ra naha tsihin ra:

—Tatun nditsa tyin ra Cristo cuví un, ¡nacoto yóo cañi tsi un!

*Nu cahan ra Pedro tyin ña nacotó ra tsi ra Jesús
(Mr. 14.66-72; Lc. 22.56-62; Jn. 18.15-18, 25-27)*

⁶⁹ Tsitsi tsa ndi nyi ra Pedro nuquehe ityi tsata vehe can, tan iin ñaha tsa cuví musu jutu can, natuhva ña nu nyaá ra tan catyí ña tsihin ra:

—Yooho tucu tsic̄a un tsihin ra Jesús, ra Galilea can.

⁷⁰ Tan ra Pedro catyí ra nuu tandih̄i nyivi yucú can:

—Ña tsic̄a yu tsihin ra can. Ña tsitó yu náa caahán un.

⁷¹ Tacan tan cuahán ra Pedro ityi yuvehe nu cuví yuhu cora, tan nyehe inga ña tsi ra, tan catyí ña tsihin ra yucú can:

—Juv̄in ñi tsic̄a ndih̄i tucu ra ihya tsihin ra Jesús, ra ñuu Nazaret —catyí ña.

⁷² Tan inga tsaha tyih̄i xeehe ra Pedro tsa nacotó ra tsi ra tan catyí ra:

—Naha Nyoo tyin ña nacotó yu tsi ra can.

⁷³ Tañi cuii ca, tan ra yucú can natuhvꝫ ra naha nu nyaá ra Pedro tan catyí ra naha tsihin ra:

—Nditsa tyin ra vaha iñi tsi ra can cuví yooho, tyin cuhva caahán ra Galilea naha ra, caahán un.

⁷⁴ Tacan tan iyo xaan caahán ra tan catyí ra:

—Tsitó vaha Nyoo tyin ña nacotó yu tsi ra can, tan na cahñi maa Nyoo tsi yu tatun ña nditsa tsa caahán yu —catyí ra.

Tan juvin ñi cuhva can navacu tsitooho. ⁷⁵ Tacan tan nducuhun iñi ra Pedro tsa cahán ra Jesús tsihin ra: “Tsa ndi cumañi ca vacu tsitooho, yooho tsa yahá cahán un uñi tsaha tyin ña nacotó un tsi yu”, catyí ra Jesús, nducuhun iñi ra. Tacan tan quita ra ícan, tan tsacu xaan ra tsa cuihya cuñi ra tsa javahá ra tacan.

27

Nu nacuhvꝫ cuenda ra naha tsi ra Jesús tsi ra Pilato

(Mr. 15.1; Lc. 23.1-2; Jn. 18.28-32)

¹ Tan tsa tuví inga quivi, tandihí ra jutu tsa cuví ityi nuu naha ra tan ra mandoñi ñuu can naha ra, ndoo ra naha tyiñu tsa cua cahñi ra naha tsi ra Jesús. ² Tan nuuhñi ra jahá ra naha. Tan tsahan ra naha tsinacuhvꝫ cuenda ra naha tsi ra nuu ra Poncio Pilato, ra ndacá ñaha tsa quee nda ñuu Roma.

Nu tsihi ra Judas

³ Tsa nyehe ra Judas, ra tsa xico tsi ra Jesús, tyin cua cúu ra, tan ndu uví iñi ra tsa javahá ra, tan nacuhvꝫ ra tsa oco utsi xuhun cuitsin can tsi ra jutu tsa cuví ityi nuu naha ra, tan tsi ra mandoñi ñuu naha ra. ⁴ Tan catyí ra:

—Tsicoo cuatyí yu, tyin tsahá cuenda yu tsi iin ra nduve cuatyí na cúu ra.

Tan nacahán ra naha tan catyí ra naha:

—¿Nacuenda nyuhu? ¡Nyehe maa yooho!

⁵ Tacan tan tyoso ihñi ra Judas xuhun can tsitsi vehe ñuhu cahnu, tan quita ra cuahán ra tsityihí ra yoho jucun ra tan ticaá ra tsi ra iin nu yutun, tan tsihi ra.

⁶ Ra cuví ityi nuu tsihin jutu can naha ra naquihin ra naha xuhun can tan catyí ra naha:

—Ña cuví tyihi yo xuhun ihya tsitsi caja nu yihí xuhun tsa tsahá nyivi tsi Nyoo tyin xuhun tsa cuyahvꝫ ra tsa cua cati niñi cuví can.

⁷ Tacan tan ndoo ra naha tyiñu, tyin cua jata ra naha ñuhu tsa nañi “Ñuhu Ra Javahá Quisi” tsihin xuhun can. Tyin coo nu cucutsi ra naha tsi nyivi inga ñuu tun tsihi ñi ñuu can. ⁸ Yacan cuenda nañi ñuhu can nda cuanda vityin “Ñuhu Cuenda Tsa Tsañi Niñi Nyivi”. ⁹ Tacan cuví tyin cundaa tsa tyaá ra Jeremías, ra cuví ndusu yuhu Nyoo tahañ tsanaha nu catyí tsi tyehen: “Juvín ñi maa ra naha quihin nyico tsa oco utsi xuhun cuitsin, tsa jata ra naha tsi ra Cristo.

¹⁰ Tan tsihin can, jata ra naha ñuhu tsa nañi “Ñuhu Ra Javahá Quisi”, tacan catyí Jutu Mañi yo tsihin yu”, catyí tsi.

Nu nyehe ra Pilato tyin nduve cuatyí ra Jesús

(Mr. 15.2-5; Lc. 23.3-5; Jn. 18.33-38)

¹¹ Tsindacá ra mandoñi can naha ra tsi ra Jesús nuu ra ndacá ñaha, tan ra can tsicá tuhun ra tsi ra, tan catyí ra:

—¿A yooho cuví rey cuenda nyivi Israel?

Tan ra Jesús catyí ra tsihin ra:

—Juvín yu, tumaa cuhva catyí maa un.

12 Tan cuhva tsa tyaa ra jutu can naha ra tan ra mandoñi naha ra cuatyí siqui ra, ña nacahañ maa ra. 13 Tacan tan catyí ra Pilato tsihin ra:

—¿A ña tsiñi un tandihi tsa caahan ra naha siqui un?

14 Maa tyin ra Jesús ña nacahañ maa ra. Tan iyo xaan cuñi ra ndacá ñaha can tyin ña nacahañ ra.

*Nu cahañ ra cumí tyiñu tyin taahan tsi cúu ra Jesús
(Mr. 15.6-20; Lc. 23.13-25; Jn. 18.38—19.16)*

15 Tan vico pascua tuhvá ra ndacá ñaha jaña intuhun ra yucú vehe caa. Ndáa ra tsa nacatsi maa nyivi, juvin ra cua quita nuña. 16 Tan quivi can nyii iin ra tsa nañi Barrabás vehe caa. Tan tandihi nyivi tsitó tuhun ra. 17 Tan cuhva tsa ndu iin nyivi, ra Pilato tsicá tuhun ra tsi ñi, tan catyí ra:

—¿Ndáa ra cuñi ndo tsa tava nuña yu? ¿A ra Barrabás, o ra Jesús, ra tsa nañi Cristo? —catyí ra.

18 Tyin tsitó ra tyin tsa cuenda tsa ndasi cuñi ra jutu can naha ra nyehe ra naha tsi ra Jesús, yacan cuenda tsañá cuenda ra naha tsi ra tsi ra Pilato.

19 Tsitsi tsa nyaá ra Pilato nu tyayu ra, nu jahá tyiñu ra, jacuhun ñasihi ra tyiñu tsi ra tan catyí ña: “Ña tyihi un tsi un tsihin ra vaha can. Tyin cuñi nyehe yu ñumaahna tsa cuenda ra. Tan jayuhvi xaan tsi tsi yu”, catyí ña.

20 Maa tyin ra jutu can naha ra tan ra mandoñi naha ra, cuñihí ra naha natyuhú ra naha tsi nyivi na ndacan ñi tsa jaña ra Pilato tsi ra Barrabás, tan na cúu ra Jesús. 21 Tacan tan naha ra ndacá ñaha catyí ra tsihin ñi inga tsaha:

—Tsitsi tsa nduvi ra na, ¿ndáa ra cuñi ndo tsa jaña yu?

Tan nacahañ ñi, tan catyí ñi:

—Jaña tsi ra Barrabás.

22 Tan ra Pilato tsicá tuhun ra tsi ñi, tan catyí ra:

—¿Tan náa cua javaha yu tsihin ra Jesús tsa nañi Cristo ihya?

Tandihi ñi nacahañ ñi tan catyí ñi:

—¿Tyaa tsi ra nu cruu na cúu ra!

23 Tacan tan catyí ra Pilato tsihin ñi:

—Tan ¿náa tsa ña vaha javaha ra?

Maa tyin maa ñi caná tsaa ñi inga tsaha tan catyí ñi:

—¿Tyaa tsi ra nu cruu na cúu ra!

24 Tsa nyehe ra Pilato tyin ña cuví jaha ra tsi nyivi, tyin ñihi xaan cuvaá jahá ñi. Tacan tan tsican ra ndutya, tan nacatyá ra ndaha ra nuu nyivi can, tan catyí ra:

—Ña cua ndoo cuatyí tsa cua cúu ra vaha ihya siqui yuhu, tyin siqui nyooho cua ndoo cuatyí can.

25 Tan tandihi nyivi nacahañ ñi, tan catyí ñi:

—Na ndoo maa tsi siqui ndi tan siqui sehe ndi.

26 Tacan tan ra Pilato jaña ra tsi ra Barrabás, tan tava tyiñu ra na ndoho ra Jesús, tan nacuhva cuenda ra tsi ra tsi ra andaru naha ra na cúu ra nu cruu.

27 Tacan tan ra andaru cuenda ra Pilato, ra ndacá ñaha can tsindacá ra naha tsi ra Jesús nda vehe tyiñu ra Pilato, tan jandu iin ra naha tsi tandihi ca andaru nu nyaá ra. 28 Tacan tan tava ra naha jahma ra tan jacunditsi ra naha iin jahma cuaaha tsi ra. 29 Tan tyihí ra naha iin corona tsa tsinu tsihin iñu jiñi ra. Tan tsaha ra naha iin yutun tatun na cundaha ra tsihin ndaha cuaaha ra. Tacan tan tsicuiñi tsiti ra naha nuu ra, tan tsacu nducu ra naha tsi ra tan catyí ra naha:

—¿Nacumi tsi un, yooho Rey cuenda nyivi Israel!

³⁰ Tan tiví sîi ra naha tsi ra. Tan quihîin ra naha yutun tatun can tan cañî ra naha jiñî ra. ³¹ Tsa yahâ tsa tsacû nducu ra naha tsi ra tan tavâ ra naha jahma cuaaha tsa nditsî ra, tan jacunditsî nyico ra naha jahma maa ra tsi ra. Tacan tan cuahân ra naha tsihin ra cua cahñî ra naha tsi ra nu cruu.

Nu tyaq ra naha tsi ra Jesús nu cruu
(Mr. 15.21-32; Lc. 23.26-43; Jn. 19.17-27)

³² Tsa quita ra naha ican, tahañ ra naha tsi iin ra ñuu Cirene, tsa nañî Simón. Tan jañîñî ra naha tsi ra na cuišo ra cruu ra Jesús.

³³ Tan tsaq ra naha iin nu nañî Gólgota, tan cuñî tsi catyî “Yîqui Jiñî Ndiyî”.

³⁴ Tan ican tsahâ ra naha vinu nasacâ tsihin ndutya uva xaan coho ra Jesús. Tan tsa yahâ tsa tsihî ra luxu can, ña cuñî ca ra coho ra. ³⁵ Tan tsa yahâ tsa tyaq ra naha tsi ra nu cruu, tacan tan ra andaru can quihîin ra naha jahma ra tan tavâ cuenda ra naha tyin cua nyehe ra naha ndâa ra jaha canaa intuhun intuhun jahma ra. Tacan cuvî tyin cundaq tuhun tsa tyaq iin ra cuvî ndusu yuhu Nyoo tahañ tsanaha nu catyî tsi tyehen: “Tavâ cuenda ra naha tan tsatsâ ra naha jahma yu”, catyî tsi. ³⁶ Tacan tan tsinyecu ra naha ican tyin jaha cuenda ra naha tsi ra. ³⁷ Tan ityî jiñî ra tyaq ra naha letra tsa catyî nacuenda cua cúu ra. Tan catyî tsi tyehen: “Ra ihya cuvî ra Jesús, rey cuenda nyîvî ñuu Israel.”

³⁸ Tan tyaq tucu ra naha uvi taahan ra suhu tsihin ra nu uvi taahan ca cruu. Iin ra tyaq ra naha xiin cuaaha ra, tan inga ra xiin satyin ra. ³⁹ Tan nyîvî tsa yahâ ican, caahân ñî tsi ra, tan javicó ñî jiñî ñî tsa tsacú nducu ñî tsi ra. ⁴⁰ Tan catyî ñî tsihin ra:

—îYooho tsa cahân un tyin cua canî un vehe ñuhu cahnu, tan tsitsi tsa uñî quivî tan cua janduvaha nyico un itsi, jacacu tsi maa un vityin nu cruu juvin, tatun nditsa tyin Sehe Nyoo cuvî tsi un! —catyî ñî tsihin ra.

⁴¹ Tan juvin ñî tacan tsacú nducu ra jutu tsa cuvî ityî nuu naha ra tsi ra, tan ra maestro cuenda ley vehe ñuhu naha ra tan ra fariseo naha ra, tan ra mandofñî ñuu naha ra. Tan natuhún tahan ra naha tan catyî ra naha:

⁴² —Jacacû ra tsi inga nyîvî, maa tyin ña cuvî jacacu ra tsi maa ra. Tun nditsa tyin Rey cuenda nyîvî Israel cuvî ra, na nuu ra nu cruu can, tan cua tsinu iñî yo tsi ra. ⁴³ Nditá xaan iñî ra tsi Nyoo, vityin na jacacu Nyoo tsi ra, tatun nditsa tyin cuñî ra tsi ra. Tyin catyî ra tsihin yo tyin Sehe Nyoo cuvî tsi ra.

⁴⁴ Tan nda cuanda nu ñasuhu nahnu tsa nyaá nu cruu xiin ra tan tsacû nducu ndihî nahnu tsi ra.

Nu tsihî ra Jesús
(Mr. 15.33-41; Lc. 23.44-49; Jn. 19.28-30)

⁴⁵ Tacan tan ndunaq taniî cahnu ñuhu ñayivî tsa ora tan nda cuanda caa uñî tsa tseñî. ⁴⁶ Tan juvin ñî cuhva can, ñihi xaan canâ tsa ra Jesús. Tan catyî ra: —Elí, Elí, ¿lama sabactani? —tan cuñî tsi catyî: Nyoo Jutu yu, Nyoo Jutu yu, ¿nacuenta nacoq ihñî un tsi yu?

⁴⁷ Juhva ra yucú can naha ra, tsiñî ra naha tsa cahân ra, tan catyî ra naha: —Ra Elías, ra cuvî ndusu yuhu Nyoo tsanaha, canâ tsa ra.

⁴⁸ Tan juvin ñî cuhva can, cuahân iin ra cua quihîin ra iin yahma cuhva caá catyî, tan jatyî ra tsihin vinu iya, tan tyaq ra nu yutun, tan jatuhvâ ra yuhu ra Jesús tyin na coho ra. ⁴⁹ Maa tyin inga ra naha catyî ra naha:

—Ña cuhva naha un can tsi ra; na nyehe jihna yo tatun cua quitsi jacacu ra Elías tsi ra.

⁵⁰ Inga tsaha cana tsaã ñihi ra Jesús, tacan tan tsih̄j ra. ⁵¹ Tan juvin ñi cuhva can ndata sava jahma tsa ticaá tsitsi vehe ñuhu cahnu tyasi Nu Ii Xaan, nda cuanda ityi siq̄u tan nda cuanda ityi tsaha. Tan ñihi xaan tañ. Tan tahv̄j cuatyí cava nahnu. ⁵² Tan nuñā yuhu ñaña. Tan cuaha nyivi tsa tsinú ñi tsi Nyoo tan tsih̄j ñi, nandoto ñi. ⁵³ Tan tsa yahā nandoto ra Jesús quita ñi nu ñaña tan quih̄v̄j ñi tsitsi ñuu Jerusalén, tan cuaha nyivi nyehe tsi ñi. ⁵⁴ Tacan tan ra capitán tan ra andaru tsa jahá cuenda tsi ra Jesús, nayuhv̄j xaan ra naha tsa tañ, tan tsa nyehe ra naha inga ca tsa cuv̄j. Tan catyí ra naha:

—Ndit̄sa ndit̄sa cuii, tyin Sehe Nyoo cuv̄j tsi ra ihya.

⁵⁵ Cuaha ñiñaha tsa tsinyicun tsi ra Jesús nda Galilea tan jatyinyee ñi tsi ra, yucú ñi nyehé ñi ndasava. ⁵⁶ Tan juhva ñi ican cuv̄j ñi ihya: ña María tsa quee Magdala, tan ña María sihi ra Jacobo tan ra José, tan ñasihi ra Zebedeo.

Nu tsicutsj ra naha tsi ra Jesús

(Mr. 15.42-47; Lc. 23.50-56; Jn. 19.38-42)

⁵⁷ Cuhva tsa cuñi cuaa, quitsj̄ iin ra cuca tsa nañi José, ra ñuu Arimatea. Tan tsinú ñi ra tsi ra Jesús. ⁵⁸ Tan tsahan ra tsicahan ra tsihin ra Pilato, tan tsican ra cuñu ñuhu ra Jesús. Tacan tan tavā tyiñu ra Pilato na cuhva ra andaru naha ra cuñu ñuhu ra Jesús tsi ra. ⁵⁹ Tacan tan quih̄jn ra José cuñu ñuhu ra, tan cavā nuu ra iin jahma cuitsin vaha tsi ra. ⁶⁰ Tan tyih̄j ra cuñu ñuhu ra Jesús tsitsi iin ñaña tsaã tsa cuv̄j iin yavi yuu tsa tavā tyiñu ra tsatyā ra naha. Tan tsa yahā tsa nacasj̄ ra yuhu ñaña can tsihin iin yuu cahnu, tan cuahán ra. ⁶¹ Tan ña María tsa quee Magdala, tan inga ña María, ndoo ñi yucú ñi yuhu ñaña can.

Nu jahá cuenda ra andaru ñaña ra Jesús

⁶² Tan tsa inga quivi, quivi quitatú nyivi cuv̄j can, tan ra jutu tsa cuv̄j ityi nuu naha ra, tan ra fariseo naha ra tsahan ra naha tsicahan ra naha tsihin ra Pilato. ⁶³ Tan catyí ra naha tsihin ra:

—Yooho taa, nducuhun̄ ñi ndi tyin ra vatya can, catȳj ra tahan nyito ra tyin tsa yahā tsa uñi quivi tsa cua cúu ra tan cua nandoto ra. ⁶⁴ Yacan cuenda tavā tyiñu na jaha cuenda vaha ra andaru naha ra ñaña can, nda yaha tsa uñi quivi, coto cahun ra tsicá̄ tsihin ra tsa tsacuaa, tan suhu ra naha cuñu ñuhu ra. Yaha can tan cua catyí ra naha tsihin nyivi tyin tsa nandoto ra. Tatun tacan cua cuv̄j, yaha ca cuhva cua cuv̄j tan ñavin ca tsa jihna ñi —catyí ra naha.

⁶⁵ Tan ra Pilato catyí ra:

—Quihin̄ ndo andaru ihya. Cuaahan̄ ndo, tan jaha cuenda vaha ndo ñaña can, nácāa cunyēe maa ndo jaha cuenda ndo —catyí ra.

⁶⁶ Tacan tan cuahán ra naha, tan jahá cuenda vaha ra naha ñaña can, tan tyaā ra naha iin tsa tyaā ra naha tsata yuu tsa ndasí can tyin tatun nacanda yuu can coto ra naha. Tan nacoq̄ ra naha tsi ra andaru jahá cuenda ra naha ican.

28

Nu nandoto ra Jesús

(Mr. 16.1-8; Lc. 24.1-12; Jn. 20.1-10)

¹ Tsa yahā quivi tsa quitatú nyivi, cuhva tsa cuñi cunditsin, nu quitsaha tsaha vitya, tan ña María tsa quee Magdala can, tan inga ña María tsahan ñi nu ñaña. ² Tan ñihi xaan tañ tyin quitsj̄ iin ángel Jutu Mañi yo quee ra andivi, tan tsaã ra nu ñaña can. Tan jatsiyq̄ ra yuu tsa ndasí yuhu can, tan tsicunyaã ra tsata can. ³ Tan xiñu xaan ra, tumaa tsa cañi tatsa. Tan cuitsin xaan jahma ra. ⁴ Cuhva tsa nyehe ra andaru can naha ra tsi ra, nayuhv̄j xaan ra naha tan

quitsahā nihi ra naha, tan nda cuanda tsihi naaha ra naha tsihin tsa yuuhvi ra naha. ⁵ Tacan tan catyi ángel can tsihin ñiñaha can:

—Ña nayuhvi ndo. Yuhu tsitó yu tyin ra Jesús tsa tsihi nu cruu nanducú ndo. ⁶ Yoñi ca ra nyii ihya, tyin tsa nandoto ra, tumaa catyi ra. Naha ndo tan nyehē ndo nu tinyi ra naha tsi ra. ⁷ Janumi xaan ndo cuhun ndo cucatyi tuhun ndo tsihin ra tsica tsihin ra tyin tsa nandoto ra, tan tsa cuahán ra nda Galilea, cua cuatu ra tsi ra naha ndacan. Yacan cuví tsa catyi tuhun yu tsihin ndo —catyi ángel can tsihin ñi.

⁸ Tacan tan numi ñi quita ñi nu ñaña can. Yuuhvi ñi, tan sii xaan cuñi tucu ñi. Tan tsinú xaan ñi cuahán ñi cua catyi tuhun ñi tsihin ra tsica tsihin ra Jesús. ⁹ Tan cuhva can quituvi ra Jesús nuu ñi tan tsahā ra nacumi tsi ñi. Tacan tan natuhvā ñi nu nyaá ra tan tsicuiñi tsi ñi nuu ra tan jacahnū ñi tsi ra, tan tsicunumi nyaá ñi tsaha ra. ¹⁰ Tan catyi ra tsihin ñi:

—Ña nayuhvi ndo. Cuaahan ndo cujacoto ndo tsi yañi yu tyin na cuhun ra naha nda Galilea, tan ndacan cua ñihi tahan ndi —catyi ra tsihin ñi.

Tuhun tsa nacatyí tuhun ra andaru naha ra

¹¹ Tsitsi tsa cuahán ñi can, juhva andaru tsa jahā cuenda ican, cuahán ra naha nda ñuu, cua nacatyí tuhun ra naha tsa cuví can tsihin ra jutu tsa cuví ityi nuu naha ra. ¹² Tacan tan ra jutu can naha ra tsahan ra naha tsicahan ra naha tsihin ra mandofi ñuu naha ra na natuhun tahan ra naha nácaa cua javaha ra naha. Tacan tan cuaha xaan xuhun tsahā ra naha tsi ra andaru can naha ra. ¹³ Tan catyi ra naha tsihin ra naha:

—Nyooho cua cahan ndo tyin tsa tsacuaa tsitsi tsa quixí ndo, tsahan ra tsica tsihin ra Jesús tan quihñ ra naha cuñu ñuhu ra. ¹⁴ Tan tatun cua coto ra ndacá ñaha tuhun ihya, cua nyehe maa ndi nácaa cua cahan ndi tsihin ra, tan nyooho ña caca iñi ndo. Nduve náa cua tahan ndo. ¹⁵ Tacan tan quihñ ra andaru can xuhun can, tan cuahán ra naha cuajavahá ra naha cuhva catyi ra naha tsihin ra naha. Tan nda quivi vityin tan tacan caahán nyivi ñuu Israel.

Nu tava tyiñu ra Jesús tsi ra tsicá tyiñu ra

(Mr. 16.14-18; Lc. 24.36-49; Jn. 20.19-23)

¹⁶ Tan tacan, tandihi tsa utsi iin ra tsica tsihin ra, cuahán ra naha nda Galilea nda yucu nu catyi maa ra Jesús tsihin ra naha tyin cuhun ra naha.

¹⁷ Tan cuhva tsa nyehē ra naha tsi ra Jesús, jacahnū ra naha tsi ra, maa tyin juhva ra naha uvi ñi tsicá iñi ra naha. ¹⁸ Tacan tan natuhvā ra Jesús nu nyecú ra naha tan catyi ra tsihin ra naha:

—Nyoo tsahā ra tsa cundaca ñaha yuhu tandihi andivi tan nu ñuhu ñayivi ihya. ¹⁹ Yacan cuenda, cuaahan ndo tandihi nu iyó nyivi, tandihi ñi ñuu, tan catyi ndo tsihin ñi na cunyicun ñi tsi yu. Tan jacoondutya ndo tsi ñi tsihin sivi Jutu yo Nyoo tan tsihin sivi yuhu Sehe ra, tan tsihin sivi Tatyí li ra. ²⁰ Tan jacoaha ndo tsi ñi na tyaa yahvi ñi tandihi tsa catyi yu tyin javaha ndo. Tan coto ndo tyin yuhu cunyaa yu tsihin ndo tandihi quivi nda cuanda naa ñayivi —catyi ra Jesucristo tsihin ra tava tyiñu ra.

Tan na cuví tsi tacan ñi.

Tuhun Nyoo Tsa Tyaa ra Marcos

*Nu caahán ra Juan, ra jacoondutya tsi nyívi, tuhun Nyoo
(Mt. 3.1-12; Lc. 3.1-9, 15-17; Jn. 1.19-28)*

¹ Tyehen quítsaha tuhun ra Jesucristo, Sehe Nyoo. ² Tsanaha ra Isaías, ra cuví ndusu yuhu Nyoo, tyaa ra nácaa ca quítsi ra Jesucristo, Sehe Nyoo. Tan catyí tsi tyehen:

Cua jacuhun yu iin ra cua jacoto tsi nyívi

na janduvaha ñi tsi ñi tsa ndi cumañi ca cuhun un nu yucú ñi, catyí Nyoo tsihin ra Cristo.

³ Cua tyaa soho yo ndusu ra nu cana tsa ra nu tsiqui, tan catyí ra:

“Nuña ndo iin ityí cuií

tan natyiso vaha ndo tsi ndo tyin tsa vatsí Jutu Mañi yo”, catyí tuhun tsa tyaa ra Isaías.

⁴ Tacan cuví; quítsi ra Juan nu tsiqui, tan javaha ra cuhva tyaa ra Isaías. Catyí ra tsihin nyívi tyehen: “Ndu uvi iñi ndo cuatyí ndo tan cõondutya ndo tyin tacan tan jaha Nyoo tucahnu iñi tsi ndo tsa cuenda cuatyí ndo.”

⁵ Tan tandihí nyívi iyó ñuu tsa cayucú Judea tumaa ñuu Jerusalén tan inga ca ñuu tsahan ñi tsityaa soho ñi tuhun caahán ra Juan. Tsa tsiñi ñi tsa caahán ra, ndu uvi iñi ñi cuhva iyó ñi tan nahma ñi cuatyí ñi nu Nyoo. Tacan tan tsicoondutya ñi yutya Jordán.

⁶ Tan jahma ra Juan tsinu tsi tsihin ixi camellu. Tan cinturón ra cuví ñi. Tan maa ñi tica xama tsatsí ra, tan tsihí ra ndutya ñuñu tsa iyó tsitsi cuhu.

⁷ Caahán ra tuhun Nyoo tsihin nyívi tan catyí ra:

—Tsa yatyin cuií quítsi ra tsa cahnu ca cuví tan ñavin ca yuhu. Tan ndi ña taahán tsi tsi yu tsa ndatsi yu ñi nditsan ra, tyin cahnu ca cuví maa ra tan ñavin ca yuhu. ⁸ Yuhu jacoondutya yu tsi ndo tsihin ndutya ñi. Maa tyin maa ra cua jacoondutya ra tsi ndo tsihin Tatyí Ii Nyoo —catyí ra Juan.

*Nu tsicoondutya ra Jesús
(Mt. 3.13-17; Lc. 3.21-22)*

⁹ Quívi can quita ra Jesús ñuu Nazaret, tsa canyí Galilea, tan cuahán ra nu nyíi ra Juan yutya Jordán tyin jacoondutya ra tsi ra. ¹⁰ Tsa quita ra Jesús tsitsi ndutya tsa yaha tsicoondutya ra, nuña andívi tan nyehe ra vatsí nuú Tatyí Ii Nyoo siqui ra tan caá tsi tumaa caá iin paloma. ¹¹ Tan nacahan iin ndusu ityí andívi tan catyí tsi tsihin ra tyehen:

—Yooho cuví Sehe yu tan cuñi xaan yu tsi un. Tan sñi xaan cuñi yu nyehé yu tsi un —catyí ndusu can.

*Nu nducu cuhva nu ña vaha tsi ra Jesús
(Mt. 4.1-11; Lc. 4.1-13)*

¹² Tsa yaha tsa tsicoondutya ra Jesús tan tsindaca Tatyí Ii Nyoo tsi ra nu tsiqui. ¹³ Tan tsinyí ra ican uvi xico quívi nu nduve nyívi iyó, maa ñi quiti xaan iyó. Tan nducu cuhva nu ña vaha tsi ra. Yaha can tan tsaá ángel Nyoo tan jatyinye ra naha tsi ra.

*Nu quítsaha caahán ra Jesús tuhun Nyoo tsihin nyívi iyó Galilea
(Mt. 4.12-17; Lc. 4.14-15)*

¹⁴ Tsa yaha tsa tyihí nyívi tsi ra Juan vehe caa, tan tsinuhu ra Jesús Galilea tan caahán ra tsihin nyívi nácaa ndacá ñaha Nyoo. ¹⁵ Tan catyí ra:

—Tsa tsaꝯ quivi tsa cua cundaca ñaha Nyoo tsi nyivi iyó nu ñuhu ñayivi ihya. Yacan cuenda ndu uvi iñi ndo cuatyí ndo, tan tsjnu iñi ndo tuhun tsa jacacú Nyoo tsi nyivi —catyí ra Jesús.

*Nu canꝯ ra Jesús cumi taahan ra tñn tyaca
(Mt. 4.18-22; Lc. 5.1-11)*

¹⁶Iin quivi cuahán ra Jesús tsicá ra yuhu miñi tsa nañi Ndutya Ñuhu Galilea. Tan nyehe ra tsi ra Simón tan ra Andrés, yañi ra Simón, cañi ra naha traya ra naha nu ndutya, tyin ra tñn tyaca cuví ra naha. ¹⁷Tan catyí ra Jesús tsihin ra naha:

—Ñaha ndo, quitsi nyicun ndo tsi yu, tan yuhu cua jatyinyee yu tsi ndo tyin tumaa tsa tñn ndo tyaca ihya, tacan cua ñihi ndo nyivi cua cuví nyivi Nyoo —catyí ra Jesús tsihin ra Simón tan tsihin ra Andrés.

¹⁸Juvin ñi kuhva can tan nacoꝯ ra naha traya can, tan cuahán ra naha cuanyicún ra naha tsi ra.

¹⁹Ña cuaha ñi tsicá ra naha, tan nyehe ra Jesús tsi uvi taahan sehe ra Zebedeo, ra Jacobo tan ra Juan. Yucú ra naha tsitsi iin yutun ndoo naquicú ra naha traya. ²⁰Canꝯ ra tsi nduvi taahan ra naha. Tan nacoꝯ ra naha tsi ra Zebedeo, jutu ra naha, tsitsi yutun ndoo can tsihin ra cuví musu ra naha. Tan cuahán ra naha tsihin ra Jesús.

Nu quita tatyí ña vaha tsi iin rayi
(Lc. 4.31-37)

²¹Tsa tsaꝯ ra Jesús ñuu Capernaum tsihin ra tsicá tsihin ra, quihvi ra Jesús tsitsi vehe ñuhu quivi quitatú nyivi. Tacan tan quitsaha jacuahá ra tuhun Nyoo tsi nyivi. ²²Tan iyo xaan cuñi ñi tsa tsifiñi ñi tsa caahán ra, tyin jacuahá ra tumaa iin ra iyó vaha ndatu. Ña caahán ra kuhva caahán ra maestro cuenda ley vehe ñuhu naha ra. ²³Tan tsitsi vehe ñuhu can nyii iin ra yihí tatyí ña vaha. Tan canꝯ tsa ra tan catyí ra:

²⁴—¿Nacuvi tyihí un tsi un tsihin nyuhu, yooho Jesús, ra ñuu Nazaret? ¿A vatsí un vatsí janaa un tsi ndi? Yuhu nacotó vaha yu tsi un, tan tsitó yu tyin Sehe Ii Nyoo cuví un —catyí ra can tsihin ra Jesús jahꝯ nu tatyí ña vaha can.

²⁵Tacan tan nduxaꝯ ra Jesús tsi nu tan catyí ra tsihin nu:

—¡Ña cahan ca un! ¡Quita tsi ra ihya! —catyí ra tsihin nu.

²⁶Tacan tan quitsaha ñihi rayi can jahꝯ nu. Tan ñihi xaan canꝯ tsa ra jahꝯ nu, tan quita nu tsi ra. ²⁷Tandihí nyivi iyo xaan cuñi ñi tan tsicá tuhun tahan ñi tsi ñi, tan catyí ñi:

—¿Náa cuví tsa nyehé yo ihya? ¿Náa tuhun tsa jacuahá ra ihya? ¡Tyin iyó vaha tunyee iñi tsi ra, nda cuanda tatyí ña vaha tan tyaá yahvi tsi ra! —catyí ñi.

²⁸Tan numi ñi tsitó nyivi iyó tandihí ñuu tsa cayucú Galilea tuhun ra Jesús.

*Nu nduvaha tyiso ra Simón Pedro
(Mt. 8.14-15; Lc. 4.38-39)*

²⁹Tsa ndihí jacuahꝯ ra Jesús tsi nyivi tsitsi vehe ñuhu, quita ra cuahán ra vehe ra Simón tan ra Andrés. Tan cuahán ndihí ra Jacobo tan ra Juan tsihin ra. ³⁰Tan ña tyiso ra Simón cuuhvi ña tsihin cahñi canyiñi ña nu tsito. Tan catyí tuhun nyivi ña tsihin ra Jesús tyin cuuhvi ña. ³¹Tacan tan natuhvꝯ ra Jesús yuhu tsito nu canyiñi ña, tñn ra ndaha ña, tan cañihí ra tsi ña. Juvin ñi kuhva can, quita cahñi tsi ña, tan quitsaha nanducú ña tsa catsi ra naha.

*Nu cuaha xaan nyivi cuuhví janduvahā ra Jesús
(Mt. 8.16-17; Lc. 4.40-41)*

³² Tsa tsa cuñi cuaa tsa tsa yahā tyiso ñicanyii, tandihi nyivi cuuhví tan nyivi yihí tatyí ña vaha tsindacā nyivi tsi ñi nu nyii ra Jesús. ³³ Tan ndu iin tandihi nyivi ñuu can nu yucú ra naha. ³⁴ Tan janduvahā ra tsi tandihi ñi tsa yihí siin siin cuehe, tan cuaha tatyí ña vaha tavā ra. Maa tyin ña tsahā ra tsa cahan tatyí ña vaha can, tyin tsitó nahnu yóo ra cuví ra.

*Nu tsicá ra Jesús caahán ra tuhun Nyoo tandihi ñuu tsa cayucú Galilea
(Lc. 4.42-44)*

³⁵ Ra Jesús nduvitā ra tsa ndi naa ca inga quivi, quitā ra ñuu can tan cuahán ra iin nu taxin caá cuandacán tahvi ra tsi Nyoo. ³⁶ Tsa nyehe ra Simón tyin nduve ra, tacan tan cuahán ra tsihin tandihi ca ra naha cuananducú ra naha tsi ra. ³⁷ Tan tsa nañihí ra naha tsi ra, catyí ra naha tsihin ra:

—Tandihi nyivi tan nanducú ñi tsi un —catyí ra naha.

³⁸ Maa tyin catyí ra tsihin ra naha:

—Cohon ndo ñuu tsa cayucú yatyin ñi ihya, tyin cuñí tsi cahan ndihi yu tuhun Nyoo ican, tyin yacan tyiñu vatsí yu —catyí ra Jesús tsihin ra naha.

³⁹ Tan tacan tsicā ra Jesús caahán ra tuhun Nyoo tsihin nyivi tsitsi vehe ñuhu tan iin tan iin ñuu tsa cayucú Galilea. Tan tavā ra tatyí ña vaha tsi nyivi.

*Nu janduvahā ra Jesús tsi ra ndohó cuehe tyaahyú
(Mt. 8.1-4; Lc. 5.12-16)*

⁴⁰ Tsa ndi cuahán ra Jesús tsicá ra tan quitā iin ra ndohó cuehe tyaahyú tsicuiñi tsiti ra nuu ra, tan catyí ra tsihin ra:

—Tun yooho tan cuñí un, cuví janduvaha un tsi yu —catyí ra.

⁴¹ Tan cundaahví iñi ra Jesús nyehe ra tsi ra, tan tyiso ndaha ra jiñi ra, tan catyí ra tsihin ra:

—Cuñí yu janduvaha yu tsi un. Tan vityin tsa nduvahā un —catyí ra tsihin ra.

⁴² Tsa cahan ra Jesús tacan tsihin ra, juvin ñi cuhva can tan nduvahā ra.

⁴³ Tacan tan catyí ra Jesús tyin tsa cuví cunuhu ra, maa tyin cahan vaha xaan ra tsihin ra na javaha ra tyehen:

⁴⁴ —Coto catyí tuhun un tsihin nyivi yóo janduvahā tsi un. Maa tyin cuaahan nu nyaá ra cuví jutu, tan janaha un tsi un tsi ra. Tan cuhva tsa catyí ra Moisés tyin cuhva ndo tsa cuenda tsa nduvahā ndo tun cuhví ndo. Yacan cua cuví tsa ndaa tsi ra jutu tan tsi nyivi tyin tsa nduvahā un —catyí ra Jesús tsihin ra.

⁴⁵ Maa tyin ra ican cuahán ra, tan quitsahā catyí tuhun ra tsihin tandihi nyivi nácaa nduvahā ra. Yacan cuenda ña cuví ca quihvi nditsin ra Jesús tsitsi ndi intuhun maa ñuu. Tan tsicá ra ityi tsata ñuu ñi nu nduve nyivi iyó, maa tyin tandihi ñi ityi tan quitā nyivi, tan tsinyehe ñi tsi ra.

2

*Nu janduvahā ra Jesús tsi iin ra xii
(Mt. 9.1-8; Lc. 5.17-26)*

¹ Tsa yahā juhva quivi tan cuahán ra Jesús ñuu Capernaum inga tsaha. Tan tsa tsito nyivi tyin tsaā nuhu ra yuvehe ra, ² iin yaha ñi ndu cuaha ñi yuvehe ra tan ña tsitahan maa ñi tsitsi vehe tan ndi yuvehe. Tan caahán ra tuhun Nyoo tsihin ñi. ³ Tacan tan tsaā cumi taahan rayi nyisó ra naha iin ra xii. Cuñí ra naha cahun ra naha tsihin ra nda nu nyaá ra Jesús. ⁴ Maa tyin ña cuví

yaha ra naha yuvehe tan cuhun ra naha nu nyaá ra Jesús tyin cuaha xaan nyívi nyecú yuvehe can. Yacan cuenda ndaa ra naha jiñi vehe, tan jatsiyó ra naha juhva tyiyo ndihi cuhva nu nyaá ñi ra Jesús. Tacan tan januu ra naha tsi ra cuuhví can nu nyaá ra Jesús tsihin iin tsito. ⁵Tsa nyehe ra Jesús tyin tsinú xaan iñi ra can naha ra, catyí ra tsihin ra cuuhví can:

—Vityin, tsa jahá yu tucahnu iñi tsi un tsa cuenda tandihi cuatyí un —catyí ra Jesús tsihin ra.

⁶Tan nyecú juhva ra cuví maestro cuenda ley vehe ñuhu naha ra ican, tacan tan quitsahá tsicá iñi ra naha tuhun ihya: ⁷“¿Nacuenda tyin caná iñi ra ihya caahán ra tyehen? Tan intuhun ñi maa Nyoo cuví ra jahá tucahnu iñi tsi yo. Tsicoo cuatyí ra nuu Nyoo tsa cuenda tsa caahán ra tacan”, cuñí ra naha, tsicá iñi ra naha. ⁸Maa tyin ra Jesús iin yaha ñi tuví iñi ra cuhva tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan? ⁹¿Náa yí ca cahan yo; “Cuatyí un tsa yaha ndatsí”, o catyí yo: “Nduvita, naquihin tsito un tan caca”? ¹⁰Vaha. Cua janaha yu tsi ndo tyin yuhu, tsa cuví yu Rayí quee nda gloria, iyó ndatu tsi yu nu ñuhu ñayívi ihya tsa jaha yu tucahnu iñi tsi nyívi tsa cuenda cuatyí ñi —catyí ra Jesús tsihin ra naha.

Tacan tan nacahan ra tsihin ra cuuhví can:

¹¹—Catyí yu tsihin un; nduvita, naquihin tsito un, tan cuanuhu yuvehe un —catyí ra Jesús tsihin ra.

¹²Tan iin yaha ñi nduvita ra cuuhví can, naquihin ra tsito ra, tan cuanuhu ra. Tan iyo xaan cuñí tandihi maa nyívi tsa nyehe can, tan quitsahá jacahnú ñi tsi Nyoo, tan catyí ñi:

—Ndi iin tsaha maa tan ñaha ca nyehe yo tsehe —catyí ñi.

Nu cana ra Jesús tsi ra Leví

(Mt. 9.9-13; Lc. 5.27-32)

¹³Tsa yaha yacan tan cuahán ra Jesús yuhu miñi inga tsaha. Tacan tan tsaa cuaha nyívi nu nyíi ra, tan quitsahá jacuahá ra tsi ñi. ¹⁴Tsa ndihi jacuahá ra tsi ñi, tan cuanuhú ra. Tan tsa cuahán ra yaha ra nu nyaá vehe nu tyahví nyívi xuhun cuenda ra ndacá ñaha ñuu Roma, tan ican nyaá ra Leví, sehe ra Alfeo, naquihin cuenda ra xuhun can. Nyehe ra Jesús tsi ra, tan catyí ra tsihin ra: —Cohon tsihin yu.

Tacan tan nduvita ra Leví, tan cuahán ra tsihin ra.

¹⁵Yaha can tan cuahán ra Jesús cuacatsí ra yuvehe ra Leví tsihin ra tsicá tsihin ra. Tsinyaá ra nu mesa tan tsinyecu ndihi tucu ra tavá xuhun cuenda ra ndacá ñaha tan inga ca nyívi iyó cuatyí. Tyin cuaha xaan nyívi nyicún tsi ra. ¹⁶Maa tyin tsa nyehe ra cuví maestro cuenda ley vehe ñuhu tan ra cuví fariseo naha ra tyin tsatsí ra Jesús tsihin ra tavá xuhun tan ra iyó cuatyí, catyí ra naha tsihin ra tsicá tsihin ra:

—¿Nacuenda tyin tsatsí tan tsihí ra maestro ndo tsihin ra tavá xuhun tan ra iyó cuatyí?

¹⁷Tsa tsiñi ra Jesús tsa cahan ra naha tan catyí ra:

—Yuhu ña vatsí yu vatsí jatinyee yu tsi nyívi cuñí tyin vaha iyó ñi; vatsí yu vatsí jatinyee yu tsi nyívi tsitó tyin iyó cuatyí ñi tumaa nyívi cuuhví, tyin nyívi cuuhví tsiñi ñuhu doctor tsi ñi. Maa tyin nyívi vaha cuñí, ña tsiñi ñuhu doctor tsi ñi —catyí ra Jesús tsihin ra naha.

Nu tsica tuhun nyívi tsi ra Jesús tun taahán tsi coo nyitya ñi

(Mt. 9.14-15; Lc. 5.33-35)

¹⁸ Iin tsaha tsa iyó nyitya ra tsicá tsihin ra Juan tan ra tsicá tsihin ra fariseo naha ra, tsahan juhva nyivi nu nyii ra Jesús, tan tsicá tuhun ñi tsi ra, tan catyí ñi:

—¿Nacuenda tyin tsicoó nyitya ra tsicá tsihin ra Juan tan ra tsicá tsihin ra fariseo naha ra, tan ra tsicá tsihin yooho ña tsicoó nyitya ra naha? —catyí ñi.

¹⁹ Nacahan ra Jesús tan catyí ra:

—¿A cuví coo nyitya nyivi yucú nu iyó vico tindaha tun ndi nyii ra cua tindaha tsihin ñi? Ña cuví coo nyitya ñi tun ndi nyii ra tsihin ñi. ²⁰ Maa tyin coo quivi ña cua cunyii ca ra tsihin ñi. Tacan tan cua coo nyitya ñi —catyí ra Jesús tsihin ñi.

Nu caahán ra Jesús tyin ña nacatsi tahan tuhun tsahnu tsa iyó nyivi tsihin tuhun tsaa tsa jacuahá ra tsi ñi
(Mt. 9.16-17; Lc. 5.36-39)

²¹ Tan catyí ra Jesús:

—Ña tuhvá nyivi nayaá jahma tsaa iin jahma tuuhu, tyin jahma tsaa can cua nandiyi can tan cua nducahnu ca nu ndata jahma tuuhu can jaha can.

²² Tacan tucu ñi ñii yihí vinu tun tyihí yo vinu tsaa tsitsi ñii tsahnu cua ndata ñii can, tan cua cati vinu can tan cua tiví can. Yacan cuenda cuñi tsi tsa tyihí yo vinu tsaa tsitsi ñii tsaa —catyí ra Jesús.

Nu jocón ra tsicá tsihin ra Jesús yoco trigu quivi quitatú nyivi
(Mt. 12.1-8; Lc. 6.1-5)

²³ Iin tsaha yahá ra Jesús tsitsi tsa tatsj nyivi tan cuví tsi quivi quitatú ñi. Tan tsa yahá ra tsicá tsihin ra quitsahá tuhun ra naha yoco trigu. ²⁴ Tacan tan tsa nyehé ra fariseo naha ra can quitsahá caahán ra naha tsihin ra Jesús:

—¿Nyehé tsa javahá ra tsicá tsihin un naha ra! Jahá tyiñu ra naha tan ña taahán tsi jahá tyiñu yo quivi ihya —catyí ra naha.

²⁵ Tan nacahan ra Jesús tsihin ra naha:

—¿A ñaha ca cahvi ndo nu tutu nu tsahá cuenda tsi tsa javahá ra David tan ra cutahán tsihin ra quivi tsisoco ra naha? ²⁶ Ra David quihvi ra tsitsi vehe Nyoo quivi cuví ra Abiatar jutu tsahnu cuví ityi nuu. Tan quihin ra paan ii, tsa taahán tsi catsi maa ñi maa ra jutu naha ra. Maa ra tan tandihí ra cutahán tsihin ra tsatsj ra naha paan can —catyí ra Jesús.

²⁷ Tacan tan catyí ra Jesús tsihin ra naha:

—Nyoo javahá ra quivi quitatú yo tyin tacan tan cuví quitatu cuñu ñuhu yo; tan ñavin maa yo tsinu tsa cuenda quivi quitatú yo. ²⁸ Yacan cuenda yuhu tsa cuví yu Rayii quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quivi quitatú yo —catyí ra Jesús.

3

Nu nduvahá ra na ityi iin ndaha
(Mt. 12.9-14; Lc. 6.6-11)

¹ Tsa quihvi ra Jesús inga tsaha tsitsi vehe ñuhu, nyii iin ra na ityi iin ndaha ican. ² Tan ra cuví fariseo naha ra nducú cuhva ra naha tsi ra Jesús tan nducú ra naha cuhva nyehé ra naha tun cua janduvaha ra tsi ra na ityi ndaha can tyin cuví tsi quivi quitatú nyivi. Tyin tun cua janduvaha ra tsi ra can, tacan tan cua cuví tyaa ra naha cuatyí siqui ra. ³ Tacan tan catyí ra Jesús tsihin ra na ityi ndaha can:

—Nduvita nyityi tan cunyaa un mahñu ihya.

⁴ Tacan tan tsicá tuhun ra tsi ra tsa yucú ican naha ra, tan catyí ra tsihin ra naha:

—¿Náa taahán tsi javaha yo quiví quitatú yo? ¿A taahán tsi javaha yo tsa vaha o tsa ña vaha? ¿A taahán tsi janduvaha yo nyiví, o cahñi yo tsi ñi? —catyí ra Jesús.

Maa tyin ña nacahān ra naha. ⁵ Tacan tan nanyehe xaan ra Jesús nuu ra naha, tan nducuihya cuñí ra tyin ña cuñí ra naha cutuñi iñi ra naha. Tan catyí ra tsihin ra cuuhví can:

—Jandundoo ndaha un.

Tacan tan jandundoo ra can ndaha ra, tan iin yaha ñi nduvaha ndaha ra.

⁶ Tacan tan quitá ra fariseo naha ra, tan quitsaha natuhún tahan ra naha tsihin ra yihí cuenda ra rey Herodes, nácaa cua cahñi ra naha tsi ra Jesús.

Nu cuaha xaan nyiví cuahán cuanyehé nu nyii ra Jesús yuhu miñi

⁷ Maa tyin ra Jesús tan ra tsicá tsihin ra cuahán ra naha yuhu miñi, tan cuaha nyiví iyó Galilea cuahán cuanyicún tsi ra naha. ⁸ Tsa tsitō nyiví tyin nahnu xaan tsa iyo javahá ra, cuaha ñi tsahan nu nyii ra tyin cuñí ñi nyehe ñi tsi ra. Quee ñi ñuu tsa cayucú Judea tumaa ñuu Jerusalén tan inga ca ñuu, tan ñuu tsa cayucú Idumea, tan ñuu tsa cayucú inga tsiyo yutya Jordán. Tan quee tucu juhva ñi ñuu Tiro tan ñuu Sidón tan tandihí ca ñuu tsa cayucú yatyin nu cayucú nduvi ñuu can. ⁹ Tsa nyehe ra Jesús tsaá nyiví, catyí ra tsihin ra tsicá tsihin ra na caquin nyaa vaha ra naha iin yutun ndoo tyin tun cua ndutuví ca nyiví, cuví quihví ra tsitsi yutun ndoo can tyin tacan tan ña cua tindahñi ñi tsi ra. ¹⁰ Tsa cuaha xaan nyiví janduvaha ra, yacan cuenda tsahan cuaha ca nyiví cuuhví nu nyii ra. Tsicá iñi maa ñi tyin tun nañi luxu ndaha ñi tsi ra tan cua nduvaha ñi. ¹¹ Yihí ñi cuuhví can yihí tatyí ña vaha tsi ñi. Tan tsa natuhvá ñi tsa yihí tatyí ña vaha nu nyaá ra Jesús tsicuiñi tsiti ñi, tan nu tatyí ña vaha tsa yihí tsi ñi cana tsa nu tan catyí nu tsihin ra:

—¡Yooho cuví Sehe Nyoo!

¹² Tan tandihí ñi cuhva tsa caahán tatyí ña vaha yoo ra cuví ra, tyasí ra nu cahan nu.

*Nu nacatsj ra Jesús tsi utsi uvi ra caca tyiñu ra
(Mt. 10.1-4; Lc. 6.12-16)*

¹³ Tsa yaha yacan tan ndaa ra Jesús iin yucu tan cana ra tsi ra tsa cuñi maa ra cana ra. Tacan tan cuahán ra naha nu nyii ra. ¹⁴ Tan tsitsi tsa tandihí ra tsa cana ra, nacatsj ra utsi uvi ra naha tyin caca ra naha tsihin ra, tan caca ra naha cahan ra naha tuhun Nyoo. ¹⁵ Tan tsaha ra ndatu tsi ra naha tsa janduvaha ra naha tsi nyiví cuuhví, tan tava ra naha tatyí ña vaha yihí tsi nyiví. ¹⁶ Ihya nyecú sivi ra naha: ra Simón, tsa jacunañi tucu ra Jesús Pedro; ¹⁷ tan nduvi sehe ra Zebedeo, ra Jacobo tan ra Juan. Juvín ra tsa jacunañi ra Jesús Boanerges. Tan tuhun ihya cuñi tsi catyí: “ra caahán tumaa ñihi caahán savi”. ¹⁸ Tan tandihí ca ra naha nañi ra naha tyehen: Andrés; Felipe; Bartolomé; Mateo; Tomás; tan ra Jacobo, sehe ra Alfeo; ra Tadeo; tan inga ra nañi tucu Simón, iin ra tsa cuñi cohun cuatyí siqui ñuu Roma tsa ndacá ñaha tsi ñi; ¹⁹ tan ra Judas Iscariote, tsa xico tsi ra Jesús.

Tsa yaha yacan tan cuahán ra Jesús tsitsi iin vehe tsihin ra tsicá tsihin ra.

*Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo
(Mt. 12.22-32; Lc. 11.14-23; 12.10)*

²⁰ Tan nducuahā nyiví nu yucú ra naha inga tsaha, tan nda cuanda ña cuyatyí ca ra naha catsi ra naha. ²¹ Tsa tsitō nyiví ra Jesús tyin nyíí ra ican, tsahan ñi tsiquihin ñi tsi ra tyin cunuhu ra tsihin ñi, tyin catyí nyiví tsihin ñi tyin ndusaná iñi ra.

²² Juhva ra maestro cuenda ley vehe ñuhu naha ra quee ra naha nda ñuu Jerusalén tan tsaā ra naha nu nyíí ra Jesús tan catyí ra naha:

—Ra ihya tavá ra tatyí ña vaha tsi nyiví tsihin tunyee iñi nu Beelzebú, tsa cuví ityi nuu tsihin tandihí tatyí ña vaha —catyí ra naha.

²³ Tsa tuví iñi ra Jesús tyin tacan caahán ra naha, canā ra tsi ra naha tan tsahā ra iin cuhva tsi ra naha, tan catyí ra tsihin ra naha:

—¿A cuví tavá nu ña vaha juven ñi maa tahan nu? Ña cuví. ²⁴ Tyin tun ra ndacá ñaha naha ra tan cua natahvi sava ra naha, tan cua quitsaha cañi tahan ra naha, cua cundihi tsa ndacá ñaha ra naha. ²⁵ Tacan tucu ñi tun nyiví iyó iin caa ñi iin vehe tan cañi tahan ñi, cua cusiin ñi tan ña cua cuví coo vaha ñi. ²⁶ Tan tun nu ña vaha tan ndusiin nu tan nduvita iin nu siqui inga nu, ¿náa cua tahan nahnu? Cua ndusiin nahnu tan cua cundihi nahnu.

²⁷ Yoñi cuví quihví tsitsi vehe iin ra xaan tan suhu ra tsa iyó tsi ra, tun ña cuhñi jihna ra tsi ra. Maa ñi cuñí tsi cuhñi jihna ra tsi ra jatsii vehe can tan cuví quihví ra suhu ra tsa tsii ra.

²⁸ Tsa nditsa catyí yu tsihin ndo tyin cuví coo tucahnu iñi tsi nyiví tsa cuenda tandihí nuu cuatyí javahá ñi, tan tsa cuenda tucu tsa caahán ñi tsa ña vaha. ²⁹ Maa tyin tun cahan ñi ndavaha ñi siqui Tatyí Ii Nyoo, ña cua jaha maa Nyoo tucahnu iñi tsi ñi; cua coo cuatyí ñi yoso cuahan quiví —catyí ra Jesús.

³⁰ Tacan cahān ra Jesús tsihin ra maestro cuenda ley vehe ñuhu naha ra, tyin catyí ra naha tyin tatyí ña vaha yihí tsi ra.

Nu catyí ra Jesús tyin nyiví tyaá yahvi tuhun Nyoo, juven ñi cuví yañi ra, tan sihi ra

(Mt. 12.46-50; Lc. 8.19-21)

³¹ Tacan tan tsaā sihi ra Jesús tan yañi ra nu nyíí ra, maa tyin ndoo ñi ityi tsata vehe, tan catyí ñi tsihin ra nyecú ican naha ra tyin cana ra naha tsi ra Jesús. ³² Tan catyí nyiví nyecú nani canduvi xiin ra Jesús tsihin ra:

—Sihí un, yañi un tan cuhva un nanducú ñi tsi un nyecú ñi tsata vehe can —catyí ñi tsihin ra.

³³ Maa tyin catyí ra:

—¿Yóo cuví sihi yu tan yañi yu?

³⁴ Tacan tan nanyehē ra nani canduvi nu nyaá ra, tan catyí ra:

—Nyiví nyecú ihya cuví sihi yu, yañi yu tan cuhva yu. ³⁵ Tyin tandihí nyiví javahá cuhva cuñí Nyoo, juven ñi cuví yañi yu, cuhva yu tan sihi yu —catyí ra Jesús.

4

Nu caahán ra Jesús tyin ra caahán tuhun Nyoo cuví ra tumaa iin ra tatsí

(Mt. 13.1-9; Lc. 8.4-8)

¹ Quitsahā jacuahá ra Jesús inga tsaha yuhu miñi. Tan cuaha xaan nyiví ndu iin nu nyíí ra. Tan tsa cuenda tsa cuaha xaan ñi cuví, quihví ra tsitsi yutun ndoo tsa canyíí nu ndutya yuhu miñi can, tan tsinyaā ra tsitsi can. Tan ndoo tandihí maa nyiví nu nyiti. ² Tacan tan cuaha xaan tsa jacuahā ra tsi ñi tsihin cuhva. Tan tsitsi tsa jacuahá ra tsi ñi, catyí ra tsihin ñi:

³—Tyaa soho ndo tsa cua cahan yu. Iin ra quitã ra yuvehe ra. Tan cuahán ra cua tatsi ra trigu nu ñuhu ra. ⁴Tan cuhva tsa quitã ra tsiti trigu can, cucoyo juhva tsi yuhu ityi. Maa tyin quitsj saa tan tsatsj ti naha ti itsi. ⁵Tan juhva ca tsiti can cucoyo tsi nu yuu nu ña cuaha nyahyu yihí. Tan numi ñi canã tsiti can tyin ña cuaha nyahyu yihí tyañu yuu can. ⁶Maa tyin tsa canã ñicanyii, iin yaha ñi na ityi tsi tyin ña cunu cuahán yoho tsi. ⁷Tan juhva ca tsiti can cucoyo tsi tyañu iñu. Quivi canã tsiti can, tsahnũ tsi iin caa ñi tsihin iñu can. Maa tyin iñu can numi ca tsahnũ can tan tsahnũ can trigu can. Yacan cuenda ña tsaha trigu can tsiti. ⁸Maa tyin juhva ca tsiti can cucoyo tsi nu ñuhu vaha. Canã tsi tan tsahnũ tsi, tan cuaha tsiti tsaha tsi. Tyin tsa intuhun tsiti can, tsaha tsi oco utsi tsiti tsitsi yoco tsi. Tan inga tsiti can tsaha tsi uñi xico, tan inga tsi tsaha tsi iin cientu —catyí ra Jesús tsihin ñi.

⁹Tan catyí nyico ra tsihin ñi:

—Nyooho tsa iyó soho, tyaa soho ndo tsa caahán yu.

Nu tsahá cuenda ra Jesús nacuenda jacuahá ra tsi nyivi tsihin cuhva
(Mt. 13.10-17; Lc. 8.9-10)

¹⁰Tsa yaha yacan tan ndoo maa ña ra Jesús tsihin ra tsicã tsihin ra tan nyivi nyicun tsi ra. Tan tsicã tuhun ñi:

—¿Náa cuñi tsi catyí tsa cahã un nañi?

¹¹Tan catyí ra tsihin ñi:

—Maa Nyoo catyí tyin jacotó yu tsi ndo tuhun xeehe nácaa ndacã ñaha ra. Maa tyin inga ca nyivi jacotó yu can tsi ñi tsihin cuhva ñi tyin ña cuñi ñi cunyicun vaha ñi tsi yu. ¹²Tyin vasu ndi maa nyehé ñi tsa javahá yu, cua cuví tsi tumaa tsa ña nditsin nyehé ñi; vasu ndi maa tsiñi ñi, ña cua cutuñi iñi ñi tsa caahán yu. Tan ndi ña cua nasama ñi cuhva iyó ñi tan ndi ña cua jaha Nyoo tucahnu iñi tsi ñi tsa cuenda cuatyí ñi —catyí ra Jesús tsihin ñi.

Nu tsahá cuenda ra Jesús tsa cuñi tsi catyí tuhun ra tatsi
(Mt. 13.18-23; Lc. 8.11-15)

¹³Tan catyí ndihí ra tsihin ñi:

—Tun ña cutuñi iñi ndo tuhun cahã yu nañi, ndi ña cua cutuñi iñi ndo tandihí ca tsa cua jacuaha yu tsi ndo tsihin cuhva ñi. ¹⁴Ra tatsi trigu can cuví ra caahán tuhun Nyoo. ¹⁵Yihí nyivi cuví ñi tumaa nu cucoyo tsiti trigu yuhu ityi tyin tsiñi ñi tuhun Nyoo, maa tyin yaha can, tan iin yaha ñi naá nyico iñi ñi tsa caahán Nyoo tsihin ñi tyin quihín nyaa nu ña vaha tuhun Nyoo tsa tatsj ra añaima ñi. ¹⁶Tan juhva nyivi cuví ñi tumaa nu cucoyo tsiti trigu tsata yuu tyin sii xaan cuñi ñi tsiñi ñi tuhun Nyoo juhva ñi quivi. ¹⁷Maa tyin ña ndoo tsi añaima ñi tan ña cuví cuahnu ñi tan juhva ñi quivi tsinú iñi ñi, yacan cuenda cuví ñi tumaa nu cucoyo tsiti tsata yuu tyin tsata yuu can luxu cuii ñi nyahyu yihí. Yacan cuenda ña tsahnũ tsi tyin ña ñihí tsi nu cuhun yoho tsi. Tacan cuví nyivi can, tyin quivi vatsi tundoho siqui ñi, tan caahán nyivi tsi ñi tsa cuenda tuhun Nyoo, ndu uvi iñi ñi tan jandihí ñi tsa tsinú iñi ñi tsi Nyoo. ¹⁸Tan juhva nyivi cuví ñi tumaa nu cucoyo tsiti tyañu iñu tyin tsiñi ñi tuhun Nyoo, ¹⁹maa tyin tsicã xaan iñi ñi tundoho ñayivi ihya tan ña tsicã iñi ñi tuhun Nyoo. Nyiyo iñi ñi tsa cua, tan cuñi ñi coo tandihí tsa iyó nu ñuhu ñayivi ihya tsi ñi. Tan tandihí yacan jatyañu can tsi ñi, tan cuví ñi tumaa cuví yutun tsa ña tsaha tsiti. ²⁰Maa tyin nyivi tsa tsiñi tuhun Nyoo tan naquihín vaha ñi itsi, tan javahá ñi tandihí tsa caahán tsi, juvin ñi cuví tumaa ñuhu vaha nu cucoyo

tsiti can tyin tsiti tsa cucoyo can cana vaha tsi, tsahnú tsi, tan yihí tsi tsaha tsi oco utsi tsiti. Inga tsi tsaha tsi uñi xico tsiti, tan inga tsi tsaha tsi cientu tsiti.

Nu cahān ra Jesús tyin ña taahán tsi tyihí xeehe yo ñuhu Nyoo tsa jandun-ditsín añima yo coto quihin nyaa ra itsi

(Lc. 8.16-18)

²¹ Tan catyí tucu ra tyehen tsihin ñi:

—¿A tsicán yo ñuhu tyuma tan tyihí xeehe yo can tsitsi iin caja o xuu tsito? Ñavin. Tyin tyuma can tinyí yo can iin nu sucun tyin tacan tan janditsin can naní tsitsi vehe. ²² Tyin nduve tsa yihí xeehe tan ña cua quituvi, tan ndi tsa xeehe tan ña cua coto nyivi. Tyin tandihí maa tan cua quita nu nditsin tan coto yo can. ²³ Nyooho tsa iyó soho, tyaa soho ndo tsa caahán yu —catyí ra Jesús tsihin ñi.

²⁴ Tan catyí tucu ra:

—Tyaa soho vaha ndo tsa caahán yu tyin tun tyaá yahvi ndo tuhun tsiñi ndo, cuaha ca tsa cua cuhva Nyoo tsi ndo. ²⁵ Tyin nyivi tyaá soho tsa caahán yu, cuaha ca cua cuhva Nyoo tsi ñi. Maa tyin nyivi tsa ña tyaá soho, cua quihin nyaa ra nda cuanda tsa luxu tsa iyó tsi ñi tsa tsa yaha ñihí ñi.

Nu tsahá ra Jesús iin cuhva nácaa tsahnú iin tsiti

²⁶ Tan catyí tucu ra Jesús:

—Tsa ndacá ñaha Nyoo tsi nyivi cuví tsi tumaa tsiti tsa tatsí nyivi. ²⁷ Tyin nyivi tatsí ñi maa ñi tsiti can tan cuanuhú ñi yuvehe ñi. Tan tatun tsa yaha cuaha quivi tsa tatsí ñi, tacan tan cuahán ñi cuanyehé ñi inga tsaha. Tsa tsaá ñi tsa caná tsi, tsa tsahnú tsi. Maa tyin ña tsitó ñi nácaa caná tsi tan tsahnú tsi, ²⁸ tyin juvin ñi maa ñuhu jacuahnú itsi. Tsa jihna ñi caná nuu tsi, yaha can tan quitá yoco tsi. Tsa yaha quita yoco tsi, tacan tan tsahá tsi tsiti. ²⁹ Tan tatun tsa tsitsa tsiti tsi, tacan tan jocón ñi itsi tyin tsa tahañ maa tsi quivi coyo tsi —catyí ra Jesús.

Nu caahán ra Jesús tyin tumaa cuví tsiti mostaza, tacan cuví tsa ndacá ñaha Nyoo tsi yo

(Mt. 13.31-32; Lc. 13.18-19)

³⁰ Tan catyí tucu ra Jesús:

—¿Nacaa cuví tsa ndacá ñaha Nyoo tsi nyivi? ¿A cuví jandu inducu yo itsi tsihin náa tsihin? Cuví. ³¹ Tyin cuví tsi tumaa iin tsiti mostaza tsa tatsí nyivi. Tsiti can cuví tsa nyihí ca tan ñavin ca tandihí ca tsiti tsa iyó nu ñuhu ñayivi. ³² Maa tyin tsa yaha tatsí tsi, caná tsi tan ndunahnú tsi, tan cuví tsi yutun tumaa nducuyaya. Ndunahnú soco tun, tan cuahán saa cua quitatu ti naha ti nuu tun.

Nu tsahá cuenda ra Jesús nacuenda jacuahá ra tsi nyivi tsihin cuhva ñi

(Mt. 13.34-35)

³³ Tacan jacuahá ra Jesús tsi nyivi, tsihin cuaha cuhva, ndihí cuhva cuví cutuñi iñi ñi. ³⁴ Tan tandihí tsaha tsa cahān ra tsihin ñi maa ñi maa tsihin cuhva cahān ra. Maa tyin cahān catsi ra tsihin ra tsicá tsihin ra.

Nu jacutaxín ra Jesús tatyí xaan nu miñi

(Mt. 8.23-27; Lc. 8.22-25)

³⁵ Tsa tseñi juvin ñi maa quivi can, catyí ra Jesús tsihin ra tsicá tsihin ra:

—Cohon ndo inga tsiyo miñi.

³⁶ Tacan tan ra Jesús tan ra tsicá tsihin ra nacoq ra naha tsi nyivi tan quihvi ra naha tsitsi yutun ndoo nu nyaá maa ra Jesús, tan cuahán ra naha. Tan

cuanyicún tucu inga ca yutun ndoo nu yihí juhva nyivi tsi ra naha. ³⁷ Tan quitsaha yihí tatyí xaan nu miñi can, tan jacuhún tsi ndutya tsitsi yutun ndoo nu yucú ra naha, tan quitsaha cuñi cutu yutun ndoo can. ³⁸ Tan ra Jesús canyii ra quixi ra tsa yatyin xuu yutun ndoo can, tan nyanaa iin jahma jiñi ra. Jandotō ra naha tsi ra, tan catyí ra naha tsihin ra:

—¡Maestro! ¿a ña jahá un cuenda tyin cuñi nyee yo?

³⁹ Tacan tan nduvitā ra Jesús tan jacutaxin ra tatyí xaan can. Tan catyí ra tsihin ndutya:

—¡Taxin ñi!

Tan cutaxin tatyí can tan ndutya can. Tacan tan taxin cuñi ñi cuví. ⁴⁰ Tacan tan catyí ra Jesús tsihin ra tsicá tsihin ra:

—¿Nacuenda yuuhví xaan ndo? ¿A ña tsinu iñi ndo? —catyí ra tsihin ra naha.

⁴¹ Maa tyin iyo xaan cuñi ra naha tsa nyehe ra naha tsa cuví. Tan tsicá tuhun tahan ra naha tan catyí ra naha:

—¿Yóo ra cuví ra ihya? Tyin nda cuanda tatyí tan ndutya tyaá yahvi tsi naha tsi tsi ra —catyí ra naha.

5

Nu caahán ra Jesús tyin ra caahán tuhun Nyoo cuví ra tumaa iin ra tatsi Nu nduvaha iin ra Gadara tsa yihí tatyí ña vaha
(Mt. 8.28-34; Lc. 8.26-39)

¹ Tsaā ra naha inga tsiyo miñi nda nu ñuhu cuenda Gadara. ² Tsa quitā ra Jesús tsitsi yutun ndoo, tan quitā iin ra yihí tatyí ña vaha nu ndaa cumi santu, tan tsaā ra nu nyaá ra. ³ Tan nu ndaa can iyó maa ra can. Tsaahñi ñi tsi ra, maa tyin ña cuví maa ndoo taxin ra. Ndi tsihin cadena tan ña cuví cunuhñi ra. ⁴ Cuaha xaan tsaha tsahñi nyivi tsaha ra tan ndaha ra tsihin cadena, maa tyin tsaahnyá cuatyí ra can. Tan yoñi maa cuví cunye tsi ra. ⁵ Tan tsicá nuu maa ra caná tsaā ra jiñi yucu tan nu ndaa cumi santu tsa tsa cuaa tan tsa tsinu cahñi. Tan jañicueehé ra tsi ra tsihin yuu. ⁶ Maa tyin ndi cañi ca quitā ra Jesús, tan nyehe ra can tsi ra, tan tsinú xaan ra tsahān ra, tsicuiñi tsi ti ra nuu ra. ⁷ Tan canā tsaā ra tan catyí ra:

—¿Nacuenda tyihí un tsi un tsihin yuhu, yooho Jesús, Sehe Nyoo, nyaá gloria? Tsihin sivi Nyoo caahán ndaahvi yu tsihin un, ña janyehe un tundoho tsi yu.

⁸ Tacan catyí nu tatyí ña vaha can tsihin ra Jesús tyin tsa yaha cahan ra tsihin nu tyehen:

—¡Yooho tatyí ña vaha, jaña tsi ra ihya! —catyí ra.

⁹ Tan ra Jesús tsicā tuhun ra tsi nu, tan catyí ra:

—¿Náa nañi un?

Tan catyí nu tatyí ña vaha can tsihin ra:

—Yuhu nañi yu Legión, tyin cuaha xaan ndi.

¹⁰ Tan caahán ndaahvi nu tsihin ra Jesús na ña jacuhun cañi ra tsi nahnu.

¹¹ Yatyin ñi yucu can yucú cuaha quini tsatsi ti naha ti. ¹² Tacan tan catyí tandihí nahnu tsihin ra Jesús:

—Jacuhun tsi ndi tsitsi nyecú ican, tan cūhva ndatu tsa quihvi ndi tsitsi ti naha ti —catyí nahnu.

¹³ Tacan tan tsahā ra Jesús ndatu tsi nahnu, tan quihvi nahnu tsitsi quini can. Quitā nahnu tsi ra can tan quitā tumaa uvi mil quini yucú can. Tsa

quihvi nahnu tsitsi ti naha ti, quitsahā tsinú ti naha ti, tan yaha ti naha ti yuhu xahva tan cucoyo ti naha ti tsitsi miñi, tan tsihi ti naha ti tsitsi ndutya.

¹⁴ Tacan tan ra jahá cuenda quini can naha ra, nayuhvi xaan ra naha tan tsinú xaan ra naha cuahán ra naha cuanuhú ra naha cuacatyí tuhun ra naha tsa cuví can tsihin nyivi ñuu can tan inga ca nyivi tsa taahán ra naha ityi cuhu. Tan tandihi nyivi tsa cahan ra naha tsihin, tsahan ñi tsinyehé ñi tsa cuví can.

¹⁵ Cuhva tsa tsaā ñi nu nyii ra Jesús, nayuhvi xaan ñi tsa nyehe ñi tsi ra tsa yihí tatyí ña vaha can. Nyaá taxin ra, nditsí ra jahma, tan vaha cuñí ra. ¹⁶ Tan tandihi maa nyivi tsa nyehe tsa tahañ ra can tan tsa tahañ quini can, catyi tuhun ñi can tsihin inga ca nyivi. ¹⁷ Tacan tan quitsahā caahán ndaahvi ñi tsihin ra Jesús, na ña ndoo ra nu ñuhu ñi.

¹⁸ Tsa tsa cua quihvi nyico ra Jesús tsitsi yutun ndoo can, ra tsa yihí tatyí ña vaha can caahán ndaahvi ra tsihin ra Jesús na cuhva ra cuhun ra tsihin ra.

¹⁹ Maa tyin ña tsahā ra Jesús cuhun ra tsihin ra, tan catyi ra tsihin ra:

—Cuanuhu yuvehe un nu iyó nyivi un, tan catyi tuhun tsihin ñi tandihi tsa javahā Jutu Mañi yo Nyoo tsihin un, tan nácaa cundaahvi iñi ra tsi un.

²⁰ Tacan tan cuanuhú ra tan quitsahā catyi tuhun ra tsihin nyivi iyó tandihi ñuu tsa cayucú Decápolis tandihi tsa javahā ra Jesús tsihin ra. Tan iyo xaan cuñí ñi.

Nu nduvahā sehe ra Jairo tan ñaha tsa tñin jahma ra Jesús

(Mt. 9.18-26; Lc. 8.40-56)

²¹ Tsa tsaā ra Jesús tsihin yutun ndoo nda inga tsiyo miñi can, tsaā cuaha nyivi nu tsaā ra. Tan ndoo ra yuhu miñi ican. ²² Tacan tan tsaā iin ra nyisó tyiñu vehe ñuhu, nañi ra Jairo. Cuhva tsa nyehe ra tsi ra Jesús, tsicuiñi tsiti ra nuu ra. ²³ Tan caahán ndaahvi ra tsihin ra tan catyi ra:

—Cohon tsihin yu yuvehe yu tan tyiso ndaha un jiñi ñaha sehe yu, na nduvaha ña tyin tsa cuñí cúu cuii ña ña.

²⁴ Tacan tan cuahán ra Jesús tsihin ra, tan cuaha xaan nyivi cuahán cuanyicún tsi ra, nda cuanda catyihí tahan ña maa ñi. ²⁵ Tsihin nyivi can cuahán ndihi iin ñaha cuuhvi. Ñaha ihya tsa quitá maa utsi uvi cuiya ndoho ña cuehe tsa cuún niñi ña. ²⁶ Tan cuaha xaan tundoho nyehe ña tsihin tsa cuaha doctor. Tandihi xuhun ña janaā ña tsihin ra naha, maa tyin nduve maa náa catyi janaā ña xuhun ña tyin vihi ca nduñihí cuuhvi ña. ²⁷ Tsa tsiñi ña caahán nyivi tyin tsaā ra Jesús, natuhvā ña ityi tsata ra tan tñin ña jahma ra. ²⁸ Tyin tsicá iñi maa ña: “Tatun tñin yu vasu tan jahma ra, cua nduvaha yu”. ²⁹ Tsa tñin ña jahma ra iin yaha ñi cutaxin tsa cuún niñi ña. Tan tuví iñi cuñu ñuhu ña tyin tsa janduvahā ra tsi ña. ³⁰ Tsa tuví iñi ra Jesús tyin nduvahā iin nyivi tsihin tunyee iñi tsa iyó tsi ra. Tacan tan nanyico coo ra ityi tsata ra tan tsicá tuhun ra tan catyi ra:

—¿Yóo tñin jahma yu?

³¹ Tacan tan catyi ra tsicá tsihin ra:

—¿Nacuenda tsicá tuhun ca un: yóo tñin jahma un? tan nyehé vaha un tyin cuaha xaan nyivi nyicún tsi un tan tyañu xaan jahá ñi —catyi ra naha tsihin ra.

³² Maa tyin ra Jesús nanyehé ra naniñi ñi tyin cuñí ra coto ra yóo tñin jahma ra. ³³ Tacan tan ñaha can tsahan ña tsicuiñi tsiti ña nuu ra Jesús tyin tsitó vaha ña tyin tsa nduvahā ña. Yuuhvi ña tan niñi ña tsahan ña tsicatyí tuhun ña tandihi tsa nditsa tsihin ra. ³⁴ Tan catyi ra Jesús tsihin ña:

—Nduvaha un tyin tsinú iñi un. Na cuhun vaha un, tan na ña cuhvi ca un —catyí ra Jesús tsihin ña.

³⁵ Ndi caahán ca ra Jesús tan tsaá nyivi quee yuvehe nu cuahán ra, tan catyí ñi tsihin ra jatsii vehe can, ra nyisó tyiñu vehe ñuhu:

—Tsa tsihi ñaha luhlu sehe un. Ña çahan yuhu ca un tan ña jatyañu ca un tsi ra Maestro ihya —catyí ñi tsihin ra.

³⁶ Maa tyin ra Jesús ña tyaá yahvi ra tsa caahán ñi, tan catyí ra tsihin ra nyisó tyiñu vehe ñuhu:

—Ña nayuhvi un; tsinu iñi yooho —catyí ra tsihin ra.

³⁷ Tan ña tsaḥa ra cuhun cuaha nyivi tsihin ra. Tan quih̄in ra tsi ra Pedro tan ra Jacobo tan ra Juan, yañi ra Jacobo cuahán ra naha tsihin ra. ³⁸ Tsa tsaá ra naha yuvehe ra nyisó tyiñu vehe ñuhu, nyehe ra Jesús tyin tsacú xaan nyivi tan caná tsaá ñi. ³⁹ Quihv̄i ra tsitsi vehe tan tsicá tuhun ra tsi ñi:

—¿Nacuvi tyin iyo xaan jacuvaá ndo, tan tsacú xaan ndo? Ñaha luhlu ihya quixí ña; ñavin tsihi ña —catyí ra tsihin ñi.

⁴⁰ Maa tyin ña tsinú iñi ñi tan tsacú naaha ñi nyehé ñi tsi ra. Tacan tan tava ra tsi tandih̄i ñi nuquehe, tan quih̄in ra tsi jutu ñaha luhlu tsa tsihi can tan sihi ña tan ra tsa tsaá tsihin ra, tan quih̄v̄i tandih̄i ñi nu canyii ña. ⁴¹ Tan t̄in ra ndaha ña, tan catyí ra tsihin ña:

—Talita cumi —tan cuñí tsi catyí tsi tyehen: Catyí yu tsihin yooho ñaha luhlu, j̄nduvita!

⁴² J̄vin ñi cuhva can tan nduvit̄a ña, tan nacacá ña. Utsi uvi cuiya ña. Tan tsa nyehe nyivi tsa iyo tsa javah̄a ra Jesús, iyo xaan cuñí ñi cuv̄i. ⁴³ Maa tyin ra Jesús ñihi tsaḥa cuenda ra tsi ñi tyin na ña cahan ñi tsa nyehe ñi tsihin ndi intuhun maa nyivi. Tan tava tyiñu ra tsi sihi ña na cuhva ña tsa catsi ña.

6

Nu tsinuh̄u ra Jesús ñuu Nazaret nu tsañu ra (Mt. 13.53-58; Lc. 4.16-30)

¹ Tacan tan quit̄a ra Jesús ican, tan cuanuh̄u ra nda ñuu ra. Tan ra tsicá tsihin ra cuahán ndih̄i ra naha tsihin ra. ² Tan tsa tahañ tsi quivi quitatú nyivi, tacan tan cuahán ra naha vehe ñuhu tan quitsah̄a jacuahá ra Jesús tsi nyivi. Tan cuaha ñi yucú tyaá soho ñi tsa caahán ra. Iyo cuñí ñi tsa tsiñí ñi tsa caahán ra, tan catyí ñi:

—¿Numaa tahan cutuhv̄a ra ihya tandih̄i tsa tsitó ra? ¿Yóo tsaḥa tsa tsiñi tuñi iñi ra? ¿Tan nácaa cutuhv̄a ra javahá ra tsa iyo? ³ Tan ra tahví yutun cuv̄i ra. Tan sehe ña María cuv̄i ra. Tan yañi ra cuv̄i ra Jacobo, ra José, ra Judas, tan ra Simón, tan ñiñaha cuhva ra iyó ñi nu iyó yo ihya —catyí ñi.

Tan ña cuñi ñi tyaá yahvi ñi tsi ra. ⁴ Maa tyin catyí ra tsihin ñi:

—Tandih̄i ñi ityi tan jahá tandih̄i nyivi tsa ñayivi tsi ra cuv̄i ndusu yuhu Nyoo, maa tyin nyivi ñuu ra, tan nyivi ra, tan nyivi vehe ra ña tyaá yahvi ñi tsi ra —catyí ra Jesús.

⁵ Tan tyiso ndaha ra jiñi juhva nyivi cuuhví, tan janduvaha ra tsi ñi, maa tyin ña cuv̄i javah̄a ra inga ca tsa iyo. ⁶ Tan iyo cuñí ra tyin ña tsinú iñi ñi tsi ra. Tacan tan cuahán ra cuajacuahá ra tsi nyivi iyó tandih̄i ñi ñuu nyihi tsa cayucú yatyin ñi ñuu can.

Nu jacuh̄un ra Jesús tsi ra tsicá tsihin ra cucahan ra naha tuhun Nyoo (Mt. 10.5-15; Lc. 9.1-6)

⁷ Tsa yaha yacan tan cana ra tsi tsa utsi uvi ra tsicá tsihin ra, tyin jacuhun ra tsi ra naha cucahan ra naha tuhun Nyoo. Tacan tan quitsaha jacuhún ra uvi uvi ra naha. Tan tsaha ra ndatu tsi ra naha tsa tava ra naha tatyí ña vaha tsi nyivi. ⁸ Tan catyí ra tsihin ra naha tyin ña cundaha ra naha tsa cundaha ra naha; ndi marali, ndi tsa catsi ra naha, tan ndi xuhun. Nduve náa cundaha ra naha; maa tyin cuví cundaha ra naha yutun ñi. ⁹ Tan cunyaan nditsan tsaha ra naha. Tan ña cundaha ra naha inga nditsi jahma, na cuhun ra naha tsihin cuhva nditsi ñi maa ra naha. ¹⁰ Tan catyí ra tsihin ra naha:

—Cuhva tsa tsaa ndo iin ñuu, quihvi ndo iin vehe, tan ndoo ndo ican nda cuanda quita ndo ñuu can. ¹¹ Tan tatun tsaa ndo iin ñuu tan ña naquihin cuenda nyivi iyó ñuu can tsi ndo, tan ña cuñi ñi tyaa soho ñi tsa cua caahan ndo, quita ndo ican tan naquisi ndo nyaca tsaha ndo tan yacan janaha tyin ndoo cuatyí ñi siqui ñi. Tsa nditsa catyí yu tsihin ndo, tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra —catyí ra Jesús tsihin ra naha.

¹² Tacan tan cuahán ra naha cuacahán ra naha tuhun Nyoo tsihin nyivi. Tan catyí ra naha tyin na ndu uvi iñi ñi cuatyí ñi, tan na nanducu ñi tsi Nyoo. ¹³ Tan cuaha ñi nyivi tava ra naha tatyí ña vaha. Tan tyihí ra naha acetye tsi nyivi cuuhví tan nduvaha ñi.

Nu tsahá cuenda tsi nácaa tsihi ra Juan, ra jacoondutyá tsi nyivi (Mt. 14.1-12; Lc. 9.7-9)

¹⁴ Ra rey Herodes tsitó ra tsa javahá ra Jesús tyin tandihi nyivi tan caahán ñi tsa javahá ra, tan tsicá iñi ra tyehen:

—Ra ihya cuví ra Juan, ra jacoondutyá tsi nyivi, ra tsa tsihi. Vityin nandoto ra. Juvín ra cuví can, yacan cuenda iyó tunyee iñi tsi ra —cuñi ra Herodes, tsicá iñi ra.

¹⁵ Yihí nyivi catyí ñi:

—Ra Elías, ra cuví ndusu yuhu Nyoo tahañ tsanaha, cuví ra.

Tan catyí tucu inga ñi:

—Ndusu yuhu Nyoo cuví ra, tumaa ra tsicoo tahañ tsanaha naha ra —catyí ñi.

¹⁶ Tsa tsiñi ra Herodes tandihi tsa caahán nyivi, tan catyí ra:

—Ra ihya cuví ra Juan tsa tava tyiñu yu tyahnya jucun. Vityin nandoto ra —catyí ra Herodes.

¹⁷ Tacan catyí ra tyin juvin ñi maa ra tava tyiñu na tyihi ra naha tsi ra Juan vehe caa tan cuhñi ra naha tsi ra tsihin carena. Tacan javaha ra Herodes tsihin ra Juan tsacatyí ña Herodías tsa cuví ñasihi ra Felipe yañi ra. Ra Herodes quihin ra tsi ña Herodías tyin cuví ña ñasihi ra ¹⁸ Tan tsa tacan javaha ra, catyí ra Juan tsihin ra tyin ña vaha tsa quihin ra tsi ña Herodías tyin ñasihi yañi ra cuví ña.

¹⁹ Yacan cuenda ndasi cuñi ña Herodías nyehé ña tsi ra Juan. Cuñi ña cahñi ña tsi ra, maa tyin ña cuví, ²⁰ tyin ña tsahá ra Herodes tyin tsitó ra tyin ra vaha cuví ra Juan tan cuiti iyó ra nuu Nyoo, tan yuuhví ra Herodes tsi ra. Yacan cuenda jahá cuenda vaha ra tsi ra. Vasu ndi maa ña cutuñi iñi ra Herodes tandihi tsa caahán ra Juan, maa tyin vaha cuñi ra tyaá soho ra tsa caahán ra.

²¹ Maa tyin tsa tahañ tsi quivi cacu ra Herodes javaha ra iin vico. Tan cana ra tsi ra cumí tyiñu naha ra, tan ra yihí ndaha andaru naha ra, tan nyivi cuca tsa iyó ityi Galílea. Quivi ihya tsican ña Herodías tsa cuñi ña tsi ra Herodes.

²² Tyin ñaha sehe ña tsahañ ña tsicuañi ña yaa nu iyó vico ra Herodes. Tan

tahān xaan iñi ra Herodes tan ra nyecú cuxiñi tsihin ra cuhva tsañi ña. Tacan tan catyí ra Herodes tsihin ña:

—Ndācan tsi yu náa cuñi maa un. Náa tahan ñi maa tsi cua ndacan un tsi yu cua cuhva maa yu can tsi un. ²³Tsitó maa Nyoo tyin cua cuhva yu tsa cua ndacan un. Tun ndacan un sava ñuhu tsa ndacá ñaha yu, cua cuhva yu can tsi un —catyí ra tsihin ña.

²⁴Tacan tan quitā ña, cuahán ña cuandacá tuhun ña tsi sihi ña tan catyí ña:

—¿Náa ndacan yu tsi ra?

Tan catyí sihi ña:

—Ndācan jiñi ra Juan, ra jacoondutyā tsi nyivi tsi ra —catyí ña.

²⁵Tacan tan numi ñi quihvi nyico ñaha tyuvaa can nu nyii ra rey Herodes, tan catyí ña tsihin ra:

—Cuñi yu jiñi ra Juan, ra jacoondutyā tsi nyivi. Čahnya jucun ra tan tinyii un jiñi ra nuu iin coho, cuhva un tsi yu vityin vityin ñi —catyí ña tsihin ra.

²⁶Tacan tan cuiihya xaan cuñi ra rey can cuvī. Maa tyin tsa cuenda tsa cahān ra tyin cua cuhva maa ra tsa cua ndacan ña, ña cuñi ra jandaví ñaha ra tsi ña tyin tandihī maa nyivi yucú vico can tan tsiñi ñi tsa cahān ra, yacan cuenda tsahā ra tsa tsican ña. ²⁷Numi ñi tavā tyiñu ra rey can tsi iin andaru na cuquihin ra jiñi ra Juan. ²⁸Tsahān andaru can tsitsi vehe caa, tan tsahnya ra jucun ra Juan. Tan tsindacā ra jiñi ra Juan tsi ñaha tyuvaa can, nyii tsi nu iin coho. Tan nacuhvā cuenda ña can tsi sihi ña.

²⁹Tsa tsitó ra nyicún tsi ra Juan tsa cuvī, tsahān ra naha tsiquihin ra naha cuñu ñuhu ra, tan tsicutsi ra naha can.

Nu jacatsi ra Jesús uhun mil rayi

(Mt. 14.13-21; Lc. 9.10-17; Jn. 6.1-14)

³⁰Tsa yahā yacan tan ndu iin ra tsicá tyiñu ra Jesús tsihin ra, tan catyí tuhun ra naha tsihin ra tandihī tsa javahā ra naha, tan tsa jacuahā ra naha nu tsahān ra naha tsicahān ra naha tuhun Nyoo tsihin nyivi. ³¹Tan catyí ra Jesús tsihin ra naha:

—Čohon ndo iin nu taxin caa, quitatu yo luxu.

Tacan catyí ra tsihin ra naha tyin cuaha xaan nyivi cuahán tan vatsí, tan ndi ña cuyatyí ra naha catsi ra naha jahá ñi. ³²Tacan tan quihvi ra Jesús tsihin ra naha tsitsi iin yutun ndoo tan cuahán ra naha iin nu taxin caa. ³³Maa tyin cuaha xaan nyivi nyehē ñi cuahán ra naha. Tan nacotó ñi tsi ra Jesús. Tacan tan cuahán ñi tsihin tsaha ñi, quitā ñi tandihī ñi ñuu tan jihna ca ñi tsaā nu cua tsaā ra Jesús. ³⁴Cuhva tsa tsaā ra naha, quitā ra Jesús tsitsi yutun ndoo tan nyehē ra tyin cuaha xaan nyivi yucú ican. Tan cundaahvi iñi ra nyehē ra tsi ñi, tyin yucú ñi tumaa tsiyucú mbee tun nduve ra jahá cuenda tsi ti naha ti. Tacan tan quitsahā jacuahá ra cuaha xaan tuhun vaha tsi ñi. ³⁵Tsa tsa cua cuiso ñicanyii, tan natuhvā ra tsicá tsihin ra Jesús xiin ra tan catyí ra naha tsihin ra:

—Tsa cueñi xaan, tan nduve nyivi iyó yatyin ñi ihya. ³⁶Vaha ca jacunuhu un tsi nyivi tyin ihya nduve tsa catsi ñi. Tan na kujata ñi paan catsi ñi vehe tsa iyó tsitsi cuhu ihya tan ñuu tsa cayucú yatyin ñi —catyí ra naha tsihin ra.

³⁷Maa tyin nacahān ra Jesús, tan catyí ra:

—Čuhva nyoocho tsa catsi ñi.

Tacan tan nacahān ra naha tan catyí ra naha:

—Vasu ndi maa jaha tyiñu ndi iñu yoo, ña cua ñihi ndi xuhun jata ndi paan catsi tandihī nyivi ihya.

³⁸Tan catyí ra Jesús tsihin ra naha:

—Nyehē jihna ndo najava paan ndahá ndo —catyí ra.

Cuhva tsa tsito ra naha najava paan ndahá ra naha, tacan tan tsicahān ra naha tsihin ra tan catyí ra naha:

—Ndahá ndi uhun taahan ñi paan tan uvi taahan ñi tyaca.

³⁹ Tacan tan catyí ra tsihin nyivi na cunyecu ñi nu cuhu can. ⁴⁰ Tan tsinyecu cuenda cientu tan cuenda uvi xico utsi ñi tsa iin cuhva tsinyecu ñi. ⁴¹ Tacan tan quihñin ra Jesús tsa uhun paan can tan nduvi tyaca can. Tan nanyehe ndaa ra ityi siqui, tan nacuhvā ra tyahvi nyoo tsi Nyoo, tsa yaha tan tsahnū cuatyí ra paan can, tan tsahā ra can tsi ra tsicá tsihin ra tyin tsatsa ra naha can tsi nyivi. Tsa ndihi tsatsa ra naha paan can, tan tsatsa ndihi ra naha tyaca. ⁴² Tsatsi tandihi ñi tan ndahā iñi ñi. ⁴³ Tan jacutu ra naha utsi uvi tyica tsihin paan tan tyaca tsa ndoo. ⁴⁴ Tan uhun mil rayi tsatsi paan can.

Nu tsicá ra Jesús nu ndutya
(Mt. 14.22-27; Jn. 6.16-21)

⁴⁵ Tacan tan catyí ra Jesús tsihin ra tsicá tsihin ra na yaha sava ñi ra naha nu miñi can tan cuhun cuee ñi ra naha nda ñuu Betsaida tsitsi tsa ndi jacunuhu ra tsi nyivi yuvehe ñi. ⁴⁶ Tsa yaha cuanuhū nyivi, tacan tan cuahán ra Jesús cuandacán tahvi ra tsi Nyoo iin jiñi yucu. ⁴⁷ Tsa tsa cuñi cuaa, yutun ndoo nu cuahán ra tsicá tsihin ra Jesús tsa cuahán can nda mahñu miñi, tan maa ra ndi nyii ra yuhu miñi can. ⁴⁸ Tan tsa nyehe ra tyin ña cuvī jacacá vaha ra naha yutun ndoo jahá tatyí, tacan tan cuahán tsihin tsaha ra nu ndutya nu cuahán ra naha tsa tsa cuñi tuvi, nyicún tsicá nyicún tsicá ñi ra tsi ra naha. Tan tsa cua yaha tsiyo ra nu cuahán ra naha. ⁴⁹ Maa tyin tsa nyehe ra naha tsicá ra nu ndutya, tsicā iñi ra naha tyin tatyí cuvī ra, tacan tan quitsahā caná tsa ra naha ⁵⁰ tyin tandihi ra naha nyehe ra naha tsi ra tan nayuhvī ra naha. Maa tyin nacahan ra tan catyí ra tsihin ra naha:

—¡Ña nayuhvi ndo tyin maa yu cuvī!

⁵¹ Tacan tan quihvī ra tsitsi yutun ndoo nu yucú ra naha, tan tsa yaha quihvī ra, iin yaha ñi cutaxñin tatyí can. Tan iyo xaan cuñi ra naha cuvī ⁵² tyin ñaha ca cutuñi iñi ra naha tsa iyo tsa javahā ra tsihin paan, tyin ndi ndava añima ra naha.

Nu janduvahā ra Jesús nyivi cuuhvī tsa iyó nduhva tsa nañi Genesaret
(Mt. 14.34-36)

⁵³ Yaha sava ra naha nu miñi can tan tsaā ra naha Genesaret inga tsiyo yuhu miñi can, tan tsahñi ra naha yutun ndoo can yatyin ñi yuhu ndutya. ⁵⁴ Cuhva tsa quitā ñi ra naha tsitsi yutun ndoo can, tan nacoto nyivi tsi ra Jesús. ⁵⁵ Tacan tan tsinú xaan ñi cuahán ñi cuajacotó ñi tsi nyivi iyó nani cahnū ityi can tyin tsaā ra Jesús. Tan tsaā cuaha nyivi quee tandihi ñi ñuu nu nyii ra, tan yucú nyivi cuuhvī nu tsitó tsaā tsihin ñi. ⁵⁶ Tan tandihi ñi ityi nu cuahán ra tsitsi ñuu nyihi o tsitsi ñuu nahnu, o tsitsi cuhu, tsaquín nyivi nyivi cuuhvī yuhu ityi. Tan caahán ndaahvi ñi tsihin ra na cuhva ra tñin ñi cuuhvī can vasu tan yuhu jahma ra tan nduvaha ñi. Tan tandihi maa nyivi tsa tñin jahma ra nduvahā ñi.

7

Tsa jatvī tsi nyivi nu Nyoo
(Mt. 15.1-20)

¹ Tacan tan tsaā juhva ra fariseo tan juhva ra maestro cuenda ley vehe ñuhu tsa quee ñuu Jerusalén naha ra nu nyii ra Jesús. ² Ra ihya naha ra nyehe ra

naha tyin juhva ra tsicá tsihin ra Jesús ña nacatya ra naha ndaha ra naha tan tsatsí ra naha tumaa catyí maa costumbre ra naha. Tsa cuenda yacan catyí ra naha tyin ña vaha javahá ra can naha ra. ³ Tyin ra fariseo naha ra javahá ra naha tumaa catyí costumbre tsii tsaahnu ra naha tacan tucu ñi tandihí ca nyívi Israel ña cuví catsi ñi tun ña nacatya ñi ndaha ñi cuaha tsaha tumaa iyó maa ñi. ⁴ Tan tatun ña nacatya ñi ndaha ñi tsa tsáá ñi quee ñi nuyahvi, ña cuví catsi ñi. Iyó cuaha ca costumbre tsa tuhvá ñi javahá tumaa tsa nacatya ñi vasu, jarra, tan tandihí ndaha tyiñu tsa tsinú tsihin caa tsa iyó tsi ñi tan nda cuanda cama ñi. ⁵ Tacan tan tsicá tuhun ra fariseo tan ra maestro cuenda ley naha ra tsi ra Jesús, tan catyí ra naha:

—¿Nacuenda tyin ña javahá ra tsicá tsihin un naha ra cuhva nacoó tsii tsaahnu yo naha ra? Tyin ña nacatya jíhna ra naha ndaha ra naha tumaa iyó maa yo tan tsatsí ra naha —catyí ra naha tsihin ra.

⁶ Tan nacahan ra Jesús, tan catyí ra:

—Nditsa tsa cahan ra Isaías, ra cuví ndusu yuhu Nyoo tuhun nyooho tsa jahá ndo tyin vaha xaan ndo tan ña nditsa ndo. Tyin catyí ra tyehen:

Nyívi ihya jacahnú ñi tsi yu tsihin yuhu ñi.

Maa tyin ñavin tsihin tsa ñi ñi añima ñi.

⁷ Yacan cuenda nduve yahvi nyaá jacahnú ñi tsi yu,

tyin maa ñi maa tuhun caahán nyívi jacuahá ñi tan ñavin tuhun yu jacuahá ñi, catyí ra Isaías tuhun ndo jahá Nyoo, catyí ra Jesús tsihin ra naha.

⁸ Tyin nyooho nacoó ndo cuhva caahán Nyoo, tan nyicún ndo cuhva caahán nyívi ñi, tumaa tuhvá ndo nacatya ndaha tyiñu ndo, tan inga ca tsa tuhvá ndo javahá. ⁹ Nyooho tyaá tsiyo ndo tuhun caahán Nyoo, tacan tan javahá ndo tuhun tsahnu tsa nacoó tsii tsaahnu ndo. ¹⁰ Tyin catyí ley Nyoo tsa tyaá ra Moisés: “Tyaá yahvi ndo tsi jutu ndo tan tsi síhi ndo, tyin tandihí nyívi tsa cua cahan ndavaha ñi tsi jutu o tsi síhi, cua cúu ñi” catyí ley Nyoo tsa tyaá ra Moisés. ¹¹ Maa tyin nyooho catyí ndo tyin cuví catyí iin nyívi tsihin jutu ñi o síhi ñi tyehen: “Ña cuví jatinyee yu tsi un tyin tandihí tsa iyó tsi yu cuví tsi Corbán.” (Tuhun ihya cuñí tsi catyí: “Tsa ndihí can tsahá cuenda yu tsi Nyoo.”) ¹² Tan tatun catyí nyívi tacan, ña cuñí ca tsi jatinyee ñi tsi jutu ñi o tsi síhi ñi, catyí ndo. ¹³ Yacan cuví tsa javahá ndo vityin, tyaá tsiyo ndo tuhun caahán Nyoo, tsahan tyaá yahvi ca ndo tuhun tsahnu cuhva iyó maa ndo. Tan cuaha ca tsa tacan caá javahá ndo —catyí ra Jesús.

¹⁴ Tacan tan caná nyico ra Jesús tsi nyívi tan catyí ra tsihin ñi:

—Tyaá soho vaha tandihí ndo tsa cua cahan yu, tan nducu ndo cuhva cutuñi ñi ndo. ¹⁵ Tsa quihví yuhu nyívi, ña cuví jatívi tsi tsi ñi. Tsa jatívi tsi ñi cuví tsa quitá añima ñi. ¹⁶ Nyooho tsa iyó soho, tyaá soho ndo tsa caahán yu —catyí ra Jesús tsihin ñi.

¹⁷ Tsa yaha nacoó ra Jesús tsi nyívi, tan quihví ra tsitsi vehe, tacan tan tsicá tuhun ra tsicá tsihin ra náa cuñí tsi catyí tsa cahan ra. ¹⁸ Tan catyí ra tsihin ra naha:

—¿A ndi nyooho tan ña cutuñi ñi ndo? ¿A ña tsitó ndo tyin tsa quihví tsitsi yo ña cuví jatívi tsi tsi yo? ¹⁹ Tyin tsitsi yo quihví tsi tan ñavin añima yo. Yaha can tan quitá tsi tsitsi cuñu ñuhu yo —catyí ra Jesús.

Tsihin tsehe janahá ra tyin tandihí nyayu tan vaha catsi yo itsi. ²⁰ Tan catyí tucu ra:

—Tsa quitá añima nyívi, yacan jatívi tsi ñi. ²¹ Tyin tsa caquiñi tsa tsicá ñi ñi tsitsi añima ñi quitá can, tacan tan rayí cuñí ra coo inga ñaha tsi ra, o ñiñaha

cuñí ñi coo inga rayi tsi ñi. Yihí ra tsicoó ra tsihin inga ñaha tan ña tindaha ra tsihin ña. Yihí rayi tsicoó ra tsihin ra ndusihi. Tan yihí ñiñaha tsicoó ñi tsihin ñi nduyi. Tan yihí ñi cuñí ñi cahñi ñi nyivi, ²² o cuñí ñi suhu ñi. Yihí ñi cuñí ñi coo tsa tsii inga nyivi tsi ñi; yihí ñi javahá ñi tsa caquiñi; yihí ñi jandaví ñaha ñi; yihí ñi iyó inga viciu tsi ñi; yihí ñi nyiyo iñi ñi; yihí ñi caahán ñi cuendu; yihí ñi cahnu jahá ñi tsi ñi; yihí ñi soho javahá ñi. ²³ Tandihí tsa ña vaha ihya, quitá can tsitsi añima nyivi, tan jatíví can tsi ñi —catyí ra Jesús tsihin ra naha.

*Nu tsinu iñi iin ñaha inga ñuu tsi ra Jesús
(Mt. 15.21-28)*

²⁴ Tsa yaha yacan tan quitá ra Jesús ñuu can, tan cuahán ra ñuhu nu canyíi ñuu Tiro tan ñuu Sidón. Tsa tsaá ra ican, quihví xeehe ra tsitsi iin vehe tyin ña cuñí ra coto nyivi numaa nyii ra. Maa tyin ña cuví cunyíi xeehe ra ²⁵ tyin yatyi xaan tsitó sihi iin ñaha tyuvaa tsa yihí tatyí ña vaha nu nyii ra. Tacan tan cuahán ña nu nyii ra. Tsa tsaá ña tan tsicuiñi tsi ña nuu ra. ²⁶ Ñaha can, ñavin ñaha Israel cuví ña, tyin ñaha ñuu Sirofenicia cuví ña. Tsaá ña nu nyii ra Jesús tan caahán ndaahvi ña tsihin ra tyin na tava ra tatyí ña vaha yihí tsi sehe ña. ²⁷ Maa tyin catyí ra Jesús tsihin ña:

—Ña cahan yuhu ca un; na catsi jihna nyivi Israel, ñi cuví sehe Nyoo, tyin ña vaha quihin nyaa yo paan yuhu sehe yo tan cuhva yo itsi catsi ina —catyí ra Jesús tsihin ña.

²⁸ Tan nacahan ña tan catyí ña:

—Nditsa, Jutu Mañi yu, maa tyin nda cuando ina cuví ndatú ti tan tsatsi ti titsehe tsa cucoyó xuu mesa jahá sehe tsitoho ti —catyí ña tsihin ra.

²⁹ Tacan tan catyí ra Jesús tsihin ña:

—Vaha caahán un. Tan tsa cuenda tsa caahán un tacan tsa yaha quitá tatyí ña vaha tsi sehe un. Cuanuhu vityin —catyí ra tsihin ña.

³⁰ Tan cuhva tsa tsaá ña yuvehe ña, canyíi taxin sehe ña nu cama, tyin tsa yaha quitá tatyí ña vaha tsi ña.

Nu janduvaha ra Jesús tsi ra soho tan ñiñi

³¹ Quitá nyico ra Jesús ñuhu nu canyíi ñuu Tiro, tan yaha ra ñuu Sidón, tan cuahán ra inga ca ñuu tsa cayucú Decápolis. Yaha ra ican tan tsaá ra miñi Galilea. ³² Tsa tsaá ra Jesús ican, tsahan nyivi tsindaca ñi iin ra soho tsa ña cuví cahan nu nyii ra. Cahan ndaahvi ñi tsihin ra na tyiso ra ndaha ra jiñi ra can. ³³ Tacan tan quihin ra tsi ra can cuahán tsiyo tsihin ra nu nduve nyivi. Tan tyaxin ra nundaha ra tsitsi soho ra can, tan tiví sii ra, tan tñin ra nu yaa ra can. ³⁴ Tacan tan nanyehé ndaa ra ityi andivi. Tan ixtá tatyí ra, tan catyí ra:

—¡Efata! —tan tuhun ihya cuñí tsi catyí: ¡Nuuña!

³⁵ Tan tsihin can nuña soho ra can, tan nduvaha yaa ra, tan cuví nacahan ra. ³⁶ Tan catyí ra Jesús tsihin ñi tyin ña cahan ñi can tsihin nyivi, maa tyin vasu ndi maa caahán ra tacan tsihin ñi, cuñihí ca ñi caahán ñi tsa javaha ra.

³⁷ Iyo cuñí ñi tan catyí ñi:

—Tandihí tsa javahá ra tan vaha javahá ra itsi. Nyivi soho nacuñí ñi jahá ra tan nyivi ñiñi nacahan ñi.

8

*Nu tsaha ra Jesús tsa catsi cumi mil nyivi
(Mt. 15.32-39)*

¹ Quiví can natacā cuaha nyico nyívi nu nyíi ra Jesús. Tan nduve maa tsa catsi ñi iyó. Tacan tan canā ra Jesús tsi ra tsicá tsihin ra, tan catyí ra tsihin ra naha:

²—Ndaahvi xaan cuñi yu nyehé yu nyívi ihya, tyin tsa uñi quiví yucú ñi tsihin yo, tan nduve ca tsa catsi ñi. ³Tyin tun jacuhun yu tsi ñi yuvehe ñi tsa ndi cumañi ca catsi ñi, cua cúu naaha ñi ityi cuhun ñi, tyin yihí ñi cañi xaan quee ñi —catyí ra Jesús tsihin ra naha.

⁴Tan nacahan ra tsicá tsihin ra, tan catyí ra naha:

—¿Maa tyin nácaa cuhva yo tsa catsi nyívi ihya, tan nduve nyívi iyó ihya tan xico ñi tsa catsi yo?

⁵Tan tsicā tuhun ra Jesús tsi ra naha, tan catyí ra:

—¿Najava paan ndahá ndo?

Tan catyí ra naha:

—Utsa taahan ñi.

⁶Tacan tan catyí ra tsihin nyívi na cunyecú ñi nu ñuhu. Tsa yahā cahan ra yacan, tacan tan quihñin ra tsa utsa paan can, tan nacuhva ra tyahvi nyoo tsi Nyoo tsa cuenda can. Tsahan tsahnū cuatyí ra can tan tsahā ra can tsi ra tsicá tsihin ra, tyin tsatsa ra naha can tsi nyívi. ⁷Tan ndahá tucu ra naha juhva tyaca nyihí. Tsahā ndihí ra Jesús tyahvi nyoo tsi Nyoo tsa cuenda can, tacan tan tsahā ra can tsi ra naha tyin tsatsa ra naha tsi nyívi. ⁸Tandihí ñi tsatsi ñi, tan ndahā vaha iñi ñi. Tsa ndihí tsatsi ñi tan jacutū ra naha utsa tyica tsihin tsa ndoo. ⁹Tan quitā maa cumi mil nyívi jacatsi ra. Yahā can tan jacunuhu ra tsi ñi. ¹⁰Tsa yahā cuanuhu ñi, tacan tan quihvi ra tsihin ra tsicá tsihin ra tsitsi iin yutun ndoo. Tan cuahán ra naha ityi Dalmanuta.

Nu tsicán ra fariseo naha ra tsi ra Jesús tyin javaha ra iin tsa iyo
(Mt. 16.1-4; Lc. 12.54-56)

¹¹Tsaā ra fariseo naha ra nu nyíi ra Jesús, tan quitsahā caahán yuhu tahan ra naha tsihin ra. Nducú cuhva ra naha tsi ra tun nditsa tyin Nyoo jaquitsi tsi ra, yacan cuenda catyí ra naha tsihin ra tyin javaha ra iin tsa iyo nyehe ra naha. ¹²Tacan tan ra Jesús ñihí xaan ixtā tatyí ra, tan catyí ra:

—¿Nacuenda tyin tsicán nyívi iyó vityin tsa iyo? Tsa nditsa catyí yu tsihin ndo tyin ña cua nyehe ndo ndi intuhun tsa iyo —catyí ra tsihin ra naha.

¹³Tacan tan nacoō ra tsi ra naha, tan quihvi nyico ra tsitsi yutun ndoo tan cuahán ra inga tsiyo miñi.

Nu catyí ra Jesús tyin tsa jacuahá ra fariseo naha ra cuví can tumaa yutsan iya

(Mt. 16.5-12)

¹⁴Ra tsicá tsihin ra Jesús naā iñi ra naha cundaha ra naha tsa catsi ra naha. Tan intuhun ñi paan ndahá ra naha yucú ra naha tsitsi yutun ndoo can.

¹⁵Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo naha ra tan ra Herodes —catyí ra tsihin ra naha.

¹⁶Tan ra tsicá tsihin ra quitsahā natuhún tahan ra naha tan catyí ra naha:

—Caahán ra tyehen tsihin yo tyin nduve paan ndahá yo catsi yo —catyí ra naha.

¹⁷Tsa tuvji iñi ra Jesús tsa tsicá iñi ra naha, tan catyí ra tsihin ra naha:

—¿Nacuenda tsicá xaan iñi ndo tyin nduve tsa catsi ndo ndahá ndo? ¿A ñaha ca cutuñi iñi ndo? ¿A ñaha ca coto ndo? ¿Nacuenda ndi ndava xaan añaima ndo?

¹⁸Nyecú tinuu ndo, tan ña nyehé ndo. Nyecú soho ndo, tan ña tsiñi ndo. ¿A

ña nducuhún iñi ndo tsa javahā yu ¹⁹ quiví tsa jacatsj yu uhun mil rayii tsihin uhun taahan ñi paan? ¿A ña ñuhú iñi ndo najava tyica jacutu ndo tsihin tsa ndoo? —catyí ra Jesús, tsicā tuhun ra tsi ra tsicá tsihin ra.

Nacahan ra naha tan catyí ra naha:

—Utsi uvi tyica.

²⁰ Tan catyí nyico ra Jesús tsihin ra naha:

—Tan quiví jacatsj yu cumi mil nyiví tsihin utsa taahan ñi paan, ¿najava tyica jacutu ndo tsihin tsa ndoo?

Nacahan ra naha tan catyí ra naha:

—Utsa taahan tyica.

²¹ Tacan tan catyí ra Jesús tsihin ra naha:

—¿A ñaha ca cutuñi iñi ndo? —catyí ra tsihin ra naha.

Nu janduvahā ra Jesús iin ra cuaa nda ñuu Betsaida

²² Tsa yahā yacan tan cuahán ra Jesús tsihin ra tsicá tsihin ra nda ñuu Betsaida. Tsa tsaā ra naha ican, tsindacā nyiví ñuu can iin ra cuaa nu yucú ra naha. Tan cahan ndaahvi ñi tsihin ra Jesús tyin tñin ra tsi ra cuaa can tan janduvaha ra tsi ra. ²³ Tacan tan tñin ra ndaha ra cuaa can, tan quihñ ra tsi ra cuahán tsihin ra ityi tsata ñuu. Tyaā sñi ra nu ndaha ra tan tñin ra tinuu ra can, tan tñisō ra ndaha ra soco ra can, tan tsicā tuhun ra tsi ra tun nditsin nyehé ra luxu. ²⁴ Ra cuaa can nanyehē ra tan catyí ra:

—Nyehé yu juhva nyiví, tan caá ñi tumaa caá yutun, maa tyin tsicá ñi —catyí ra.

²⁵ Tacan tan tñin nyico ra Jesús tinuu ra inga tsaha, tan nanyehē vaha ra tan nduvahā ra. Nanyehē catsi vaha ra tandihí tsa iyó. ²⁶ Tacan tan jacunuhū ra Jesús tsi ra yuvehe ra, tan catyí ra tsihin ra:

—Ña quihvi un tsitsi ñuu ihya tan ña ñacatyí tuhun tsehe tsihin nyiví —catyí ra Jesús tsihin ra.

Nu cahan ra Pedro tyin ra Jesús cuví Cristo, ra jacacú tsi yo

(Mt. 16.13-20; Lc. 9.18-21)

²⁷ Yahā can tan cuahán ra Jesús tsihin ra tsicá tsihin ra ñuu tsa cayucú yatyin ñi ñuu Cesarea tsa javahā ra Felipe. Tsitsi tsa cuahán ra naha, tan tsicā tuhun ra Jesús tsi ra naha, tan catyí ra:

—¿Náa caahán nyiví tuhun yu? ¿Yóo ra cuví yu catyí ñi? —catyí ra tsihin ra naha.

²⁸ Nacahan ra naha tan catyí ra naha:

—Yihí nyiví catyí ñi tyin ra Juan, ra jacoondutyā tsi nyiví, cuví un. Inga ñi catyí ñi tyin ra Elías. Yihí ñi catyí tucu ñi tyin inga ra cuví ndusu yuhu Nyoo cuví un —catyí ra naha tsihin ra.

²⁹ Tacan tan tsicā tuhun ra tsi maa ra naha, tan catyí ra:

—Tan nyooho, ¿yóo ra cuví yu, cuñí ndo?

Tan nacahan ra Pedro tsihin ra:

—Yooho cuví ra Cristo, ra jacacú tsi nyiví.

³⁰ Maa tyin cahan ra Jesús tsihin tandihí ra naha tyin ña cahan ra naha can tsihin ndi intuhun maa nyiví.

Nu cahan ra Jesús tyin cua cúu ra

(Mt. 16.21-28; Lc. 9.22-27)

³¹ Tacan tan quitsahā jacuahá ra tyin Rayii tsa queē nda gloria cua nyehe xaan ra tundoho. Tan ña cua tsinu iñi ra mandoñi naha ra tan ra jutu cuví ityi nuu tsihin ra jutu naha ra tsi ra tan ndi ra maestro cuenda ley vehe ñuhu naha

ra tan ña cua naquihin cuenda ra naha tsi ra. Catyí ra Jesús tsihin ra naha tyin cua cahñi nyivi tsi ra maa tyin cua nandoto ra tsa tsinu uñi quivi. ³² Tacan cañan catsi ra tsihin ra naha. Tacan tan quihin ra Pedro tsi ra cuahán tsihin ra tsata vehe tan quitsaha caahán ra tsihin ra Jesús tyin ña vaha tsa cañan ra. ³³ Maa tyin ra Jesús nanyico coo ra, tan nanyehé ra nu nyecú inga ra tsicá tsihin ra. Tan quitsaha caahán ra tsihin ra Pedro, tan catyí ra:

—¡Cuatsiyo nuu yu ihya, cuihna! Tyin yooho ña tsicá iñi un tumaa tsicá iñi Nyoo, tyin tsicá iñi un tumaa tsicá iñi nyivi —catyí ra Jesús tsihin ra Pedro.

³⁴ Tacan tan cana ra Jesús tsi nyivi tan tsi ra tsicá tsihin ra tan catyí ra:

—Tatun ndáa nyooho cuñi cunycun tsi yu, cahnya iñi ndo nacoo ndo tsa cuñi maa ndo javaha ndo, tyin tacan tan cuvi javaha ndo cuhva cuñi Nyoo. Tan ña cua ndu uvi iñi ndo tsa yihí ndo cuenda yu, vasu ndi maa tandihi quivi nyehé ndo tundoho tsa cuenda yu. Tyin yacan cuví cruu tsa taahán tsi cuiso ndo tun cunycun ndo tsi yu. ³⁵ Tyin nyooho tsa ña cuñi nyehé tundoho tan cuhva ndo ñayivi ndo tsa cuenda yu, cua nyehé ndo tundoho anyaya. Maa tyin nyooho tsa cua cuhva ñayivi tsa cuenda yu tan tsa cuenda tuhun Nyoo, cua cacu ndo. ³⁶ Tyin nduve yahvi nyaá cua ñihi ndo tandihi tsa iyó nu ñuhu ñayivi ihya tun ña cua cacu añima ndo. ³⁷ Tyin nduve maa náa tsihin tyahvi ndo tan cuvi cacu añima ndo tan ña cunaa tsi. ³⁸ Tyin nyivi cua nducahan nuu tsa cuenda yu tan tsa cuenda tuhun caahán yu quivi cahan ñi tsihin nyivi caquiñi tsa ña tyaá yahvi tuhun Nyoo, yuhu Rayi tsa quee nda gloria cua nducahan nuu yu nyehé yu tsi ñi quivi quitsi yu tsihin ángel cuenda Nyoo Jutu yu tan tsihin tsa sii caá ra.

9

¹ Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehé ndo nácaa ndacá ñaha Nyoo tsihin tunyee iñi ra tsa ndi cumañi ca cúu ndo.

Nu nyehé uñi ra tsicá tsihin ra Jesús nu nasama cuhva caá ra (Mt. 17.1-13; Lc. 9.28-36)

² Tsa yahá iñu quivi, tacan tan quihin ra Jesús tsi ra Pedro, ra Jacobo, tan ra Juan cuahán tsihin ra iin yucu sucun. Ican nasama cuhva caá ra tan nyehé ra yucú tsihin ra can. ³ Xiñu xaan tan cuitsin xaan jahma ra cuví tumaa cuitsin vico. Ndi intuhun maa nyivi iyó nu ñuhu ñayivi ihya tan ña cuví janducuitsin ñi jahma tumaa cuitsin jahma ra. ⁴ Tan nyehé ra naha tyin nyaá ra Elías tan ra Moisés tsihin ra, natuhún ra naha tsihin ra. ⁵ Tacan tan catyí ra Pedro tsihin ra Jesús:

—Maestro, ¡vaha xaan tyin yucú ndi ihya! Cua javaha ndi uñi taahan tyahva; iin tsa cuenda un, iin tsa cuenda ra Moisés, tan iin tsa cuenda ra Elías —catyí ra Pedro. ⁶ Cahán ra tacan tyin ña tsitó ra náa cahan ra tyin maa ra tan ra yucú tsihin ra nayuhvi xaan ra naha.

⁷ Tacan tan nuu iin vico siqui ra naha tan tyasi tsi tsi ra naha. Tan tsitsi vico can nacahan iin ndusu tan catyí tsi:

—Ra ihya cuví Sehe yu, tan cuñi xaan yu tsi ra. Tyaa yahvi ndo tsa caahán ra —catyí ndusu can.

⁸ Tan cuhva tsa nanyehé ra naha, nduve ca ra Elías tan ra Moisés nyaá, intuhun ña maa ra Jesús nyaá.

⁹ Tan cuhva tsa vatsi nuu ra naha yucu can, catyí ra Jesús tsihin ra naha tyin ña cahan naha ra naha tsa nyehé ra naha. Cuví cahan maa ra naha can

nda yaha nandoto Rayⁱⁱ quee nda gloria, tan rayⁱⁱ can cuví maa ra. ¹⁰ Yacan cuenda ña cahān maa ra naha tuhun can, tan natuhún tahan ra naha náa cuñi tsi catyí tuhun tsa cua nandoto ra. ¹¹ Tacan tan tsicā tuhun ra naha tsi ra Jesús tan catyí ra naha:

—¿Nacuenda tyin catyí ra cuví maestro cuenda ley vehe ñuhu naha ra tyin jihna ca ra Elías taahán tsi quitsi nu ñuhu ñayivi ihya inga tsaha?

¹² Tan nacahān ra, tan catyí ra:

—Nditsa tyin jihna ca ra Elías taahán tsi quitsi tsa ndi cumañi ca quitsi yuhu tyin janduvaha ra tandihi. ¿Tan náa catyí tuhun Nyoo cuenda yuhu Rayⁱⁱ quee nda gloria? Catyí tsi tyin cua nyehe yu tundoho, tan ña cua cuñi nyivi nyehe ñi tsi yu. ¹³ Maa tyin yuhu catyí yu tsihin ndo tyin tsa yahā quitsi ra Elías. Tan nyivi javahā ñi tsihin ra cuhva cuñi maa ñi, tumaa catyí maa tutu Nyoo tyin cua tahan ra —catyí ra Jesús tsihin ra naha.

Nu janduvahā ra Jesús iin ra tyuvaa tsa yihí tatyí ña vaha
(Mt. 17.14-21; Lc. 9.37-43)

¹⁴ Tsa yahā yacan tan cuahán ra naha nu yucú tandihi ca ra tsicá tsihin ra naha. Tsa tsaā ra naha ican, nyehe ra naha tyin yucú cuaha nyivi nanii canduvi. Tan yucú tucu ra maestro cuenda ley vehe ñuhu naha ra, tan caahán yuhu tahan ra naha tsihin ra tsicá tsihin ra Jesús. ¹⁵ Tsa nyehe nyivi can tsi ra Jesús, iyo xaan cuñi tandihi ñi cuví. Tacan tan tsahān ñi nu nyaá ra tsicuhvā ñi nacumi tsi ra. ¹⁶ Tacan tan tsicā tuhun ra tsi ñi tan catyí ra:

—¿Nacuenda caahán yuhu tahan ndo? —catyí ra.

¹⁷ Tacan tan nacahān iin ra tsa nyaá tyañu tandihi nyivi can, tan catyí ra:

—Maestro, vatsí yu vatsí ndacá yu sehe yu tsi un tyin yihí tatyí ña vaha tsi ra tan nduñihí ra jahā nu. ¹⁸ Tyin tandihi ñi nu tiín tatyí can tsi ra, janduvá nu tsi ra, tan quita tiñuu yuhu ra, tan jacahyú ra nuhu ra, tan janduyutún nu tsi ra. Tsa yahā cahān yu tsihin ra tsicá tsihin un naha ra tyin tava ra naha tatyí ña vaha can, maa tyin ña cuví tava ra naha tsi nu —catyí ra can tsihin ra Jesús.

¹⁹ Nacahān ra Jesús tan catyí ra:

—iNyooho nyivi ña tsinú iñi tan caquiñi! ¿Ndáa nda quivi cua cunyii yu tsihin ndo? ¿Tan najava ca quivi cua cunyeet iñi yu nyehe yu tsi ndo tyin ña tsinú vaha iñi ndo tsi yu? Ndāca ndo tsi ra luhlu can tsi yu ihya —catyí ra.

²⁰ Tacan tan tsindacā jutu ra luhlu can tsi ra tsi ra Jesús. Tan cuhva tsa nyehe nu tatyí ña vaha can tsi ra Jesús, janduvā nu tsi ra luhlu can tan quitsahā tsicó tuvi ra nu ñuhu jahā nu. Tan quita tiñuu yuhu ra. ²¹ Tacan tan tsicā tuhun ra Jesús tsi jutu ra luhlu can tan catyí ra:

—¿Ama quitsahā taahán ra tyehen?

Tan nacahān jutu ra luhlu can, tan catyí ra:

—Nda ndi luhlu xaan ra. ²² Tan cuaha tsaha tyihí tatyí ña vaha can tsi ra nu cayú ñuhu, tan nu ndutya. Cuñi nu cahñi nu tsi ra. Maa tyin tun cuví javaha un náa javaha un tsihin ra, cūndaahvi iñi tsi ndi, tan jatyinyee tsi ndi —catyí jutu ra luhlu can tsihin ra Jesús.

²³ Tan catyí ra Jesús tsihin ra:

—Tun tsinú iñi un, tandihi tan cua cuví tyin tsa cuenda ra tsa tsinú iñi tandihi tan cuví —catyí ra Jesús.

²⁴ Tacan tan canā tsaā jutu ra tan catyí ra tsihin ra Jesús:

—iTsinú iñi yu! ¡jatyinyee tsi yu na tsinu ca iñi yu! —catyí ra tsihin ra.

²⁵ Cuhva tsa nyehe ra Jesús tyin cuaha nyivi ndu iin nu nyaá ra, tacan tan tava ra tatyí ña vaha can, tan catyí ra tsihin nu:

—Yooho tatyí ña vaha tsa janduñihí tan jasohó tsi ra ihya, quita tsi ra catyí yu tsihin un. Jaña tsi ra, tan ña quihvi ca un tsi ra —catyí ra Jesús tsihin nu tatyí ña vaha can.

²⁶ Tacan tan quiñi xaan cana tsa nu tatyí can tan janduva nu tsi ra inga tsaha, tan quita nu tsi ra. Tan jacúu naaha nu tsi ra. Tan cuñí maa nyivi tyin tsa tsihi ra. ²⁷ Maa tyin ra Jesús tñin ra ndaha ra luhlu can, tan cañihí ra tsi ra, tan tsinyaá nyityi ra.

²⁸ Tacan tan quihvi ra Jesús tsitsi iin vehe, tan tsica tuhun ra tsicá tsihin ra tsi ra tan catyí ra naha:

—¿Nacuenda tyin ña cuví tava nyuhu tatyí ña vaha can?

²⁹ Tacan tan catyí ra Jesús:

—Tsa cuenda tyin tahan tatyí ña vaha ihya ña cuví quita nu jaha yo tun ña coonyitya yo tan ña ndacan tahvi yo tsi Nyoo —catyí ra tsihin ra naha.

Nu cahan ra Jesús inga tsaha tyin cua cahñi nyivi tsi ra
(Mt. 17.22-23; Lc. 9.43-45)

³⁰ Quivi tsa quita ra Jesús ican, tan ra tsicá tsihin ra yaha ra naha ñuhú Galilea. Tan ña cuñí ra Jesús tsa coto nyivi iyó ican tyin nyii ra nu iyó ñi.

³¹ Tyin jacuahá ra tsi ra tsicá tsihin ra tan catyí ra tsihin ra naha:

—Yuhu Rayii tsa quee nda gloria cua nacuhva cuenda nyivi tsi yu tsi ra xaan iñi tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quivi. ³² Maa tyin ra ican naha ra ña cutuñí iñi ra naha tsa caahan ra tsihin ra naha. Tan ña cuñí ra naha ndaca tuhun ra naha tsi ra tyin yuuhvi ra naha.

Nu janahá ra Jesús yoo ra cahnu ca cuví tsitsi tsa tandihí nyivi tsa ndacá ñaha Nyoo
(Mt. 18.1-5; Lc. 9.46-48)

³³ Tan tsa tsaá ra Jesús ñuu Capernaum tan ra tsicá tsihin ra, tsa tsa yucú ra naha tsitsi vehe, tan tsica tuhun ra Jesús tsi ra naha tan catyí ra:

—¿Náa natuhún xaan ndo ityi vatsí yo? —catyí ra tsica tuhun ra.

³⁴ Tsa cahan ra Jesús tacan, taxin ña cuví ra naha, tyin ityi vatsí ra naha natuhun ra naha yoo ra cahnu ca cuví tsa nuu tandihí ra naha. ³⁵ Tacan tan tsinyaá ra Jesús tan cana ra tsi tandihí tsa utsi uvi ra tsicá tsihin ra, tan catyí ra tsihin ra naha:

—Nyooho tsa cuñí cuví ityi nuu, cuñí tsi cuví ndo nda nu ndihí ña tsa nuu tandihí ndo, tan jatyinyee ndo tsi tandihí nyivi —catyí ra Jesús tsihin ra naha.

³⁶ Tacan tan quihin ra iin ra luhlu tyaá ra mahñu ra naha. Tan tyihí jucun ndaha ra tsi ra luhlu can, tan catyí ra:

³⁷ —Nyivi naquihin iin nyivi tumaa ra luhlu ihya, yuhu naquihin cuenda ñi. Tyin naquihin cuenda ñi tsi ñi tsa cuenda tsa cuñí ñi tsi yu. Tan nyivi naquihin cuenda tsi yuhu, naquihin cuenda tucu ñi tsi ra tsa jaquitsí tsi yu tan ñavin maa ñi maa yu naquihin cuenda ñi.

Nyivi tsa ña cuxaán tsi yo, juven ñi ican jatyinyee tsi yo
(Mt. 10.42; Lc. 9.49-50)

³⁸ Tacan tan catyí ra Juan tsihin ra Jesús:

—Maestro, nyehe ndi iin ra tava tatyí ña vaha tsi nyivi tsihin sivi un. Maa tyin tyasí ndi nu javaha ra tacan tyin ñavin tsihin yo tsicá ra —catyí ra Juan tsihin ra Jesús.

³⁹ Maa tyin catyí ra Jesús tsihin ra:

—Ña çasi ndo nu javaha nyívi tacan. Tyin ndi intuhun ñi tsa javaha tsa iyo tsihin sívi yu tan ña cua cana iñi ñi cahan ñi ndavaha ñi tsi yu. ⁴⁰ Tyin nyívi tsa ña xaan iñi tsi yo, tsihin yo cutahán ñi. ⁴¹ Tan nyívi tsa cua cuhva vasu tan iin yatsin ndutyá coho ndo tyin tsinú iñi ndo tsi yu, cua cuhva Nyoo tsa cua cuhva ra tsi ñi.

Nu tsahá cuenda ra Jesús tsi yo nácaa jaha cuenda yo tsi yo tan ña javaha yo tsa ña vaha

(Mt. 18.6-9; Lc. 17.1-2)

⁴² Nyívi cua natyuhu tsi iin nyívi tsa ñaha ca tsinú vaha iñi tsi yu tyin javaha ñi tsa caquiñi, vaha ca cuhñi nyívi yuu yoso vee jucun ñi tan cujanehñi ñi tsi ñi tsitsi nu cunu ndutyá ñuhu. ⁴³ Tatun ndaha un javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca quihvi un coo un tsihin Nyoo tsihin tsa nduve iin ndaha un tan ñavin ca tsa cuhun un anyaya nu cayú ñuhu tsa ña cua ndahva maa tsihin nduvi ndaha un. ⁴⁴ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha. ⁴⁵ Tatun tsaha un tan javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca cuhun un coo un tsihin Nyoo tsihin tsa intuhun ñi tsaha un tan ñavin ca tsa cuhun un tsihin nduvi tsaha un anyaya nu ña cua ndahva maa ñuhu. ⁴⁶ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha. ⁴⁷ Tun tinuu un javahá tsa ña vaha, çasi nu javahá can tacan. Tatun ña cuví, tava can tan javita un tyin vaha ca quihvi un nu ndacá ñaha Nyoo tsihin iin tinuu un tan ñavin ca tsa jacuhun Nyoo tsi un anyaya tsihin nduvi tinuu un. ⁴⁸ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

⁴⁹ Maa tyin tandihí nyívi nyicún tsi yuhu, ñi tsa nyehé tundoho tsa cuenda yu cuví tsi tumaa tsa cayú ñi tsihin ñuhu, tyin tsihin yacan cua nduvaha ñi jahá Nyoo, tumaa tuhvá nyayu nduvahá tsihin ñi. ⁵⁰ Vaha xaan ñi. Maa tyin tun ndihí tsa uhva tsi, ña jandu uhva ca tsi tan ña cuví ca cuatyínu nyívi ítsi. Yacan cuenda nyooho, ña jandihí ndo tsa coo tuhun Nyoo añima ndo tyin cuví tsi tumaa ñi. Tyin tacan tan cuví coo taxin ndo tsihin tahan ndo.

10

Nu caahán ra Jesús tyin ña vaha nacoo rayíi ñasíhi ra

(Mt. 19.1-12; Lc. 16.18)

¹ Quita ra Jesús ñuu Capernaum tan cuahán ra cuenda Judea inga tsiyo yutya Jordán. Tan ndu iin cuaha nyico nyívi nu nyíi ra, tacan tan quitsaha jacuahá ra tsi ñi tumaa tuhvá maa ra javahá. ² Tacan tan natuhva juhva ra fariseo naha ra nu nyaá ra Jesús, tan nducú ra naha cuhva tyaa ra naha cuatyí tsi ra. Tan tsicá tuhun ra naha tsi ra tatun vaha nacoo rayíi ñasíhi ra.

³ Tacan tan nacahan ra Jesús tan catyí ra:

—¿Náa catyí ra Moisés tyin javahá ndo?

⁴ Tan nacahan ra naha tan catyí ra naha:

—Ra Moisés catyí ra tyin cuví cani ndi tutu cuenda ley ndi, tacan tan cuví nacoo ndi ñasíhi ndi —catyí ra naha tsihin ra.

⁵ Tacan tan catyí ra Jesús tsihin ra naha:

—Catyí ra Moisés tyin cuví javaha ndo tacan tsa cuenda tsa ndava añima ndo. ⁶ Maa tyin quívi jihna ñi, quívi javaha Nyoo tandihí maa tsa iyó, catyí nu tutu ra tyin javaha ra rayíi tan ñaha. ⁷ “Yacan cuenda taahán tsi nacoo rayíi

jutu ra tan sihi ra tan ndu iin ra tsihin ñasihi ra. ⁸ Tan nduvi ñi cua cuvi ñi tumaa intuhun ña nyivi.” Yacan cuenda ñavin ca uvi taahan ñi, tyin intuhun ña nyivi cua cuvi ñi. ⁹ Yacan cuenda, ña cuvi jasiin nyivi tsa jandu iin Nyoo —catyí ra Jesús tsihin ra naha.

¹⁰ Yaha can tan cuanuhu ra nda yuvehe, tan quitsaha nducú tuhun nyico ra tsicá tsihin ra siqui tuhun can. ¹¹ Tan catyí ra Jesús tsihin ra naha:

—Ra tsa cua nacoo ñasihi tan quihin ra inga ñaha, cua coo cuatyí ra nu Nyoo. ¹² Tacan tucu ñi ñaha: Tun nacoo ña tsi yí ña tan tindaha ña tsihin inga rayi, juvin ñi cua coo tucu cuatyí ña —catyí ra Jesús.

Nu nasoco ra Jesús tsi tsa nyihi
(Mt. 19.13-15; Lc. 18.15-17)

¹³ Tacan tan tsindaca nyivi juhva tsa nyihi tsi ra Jesús tyin tyiso ra ndaha ra jiñi tsi naha tsi tan nasoco ra tsi naha tsi. Maa tyin ra tsicá tsihin ra quitsaha cuxaán ra naha tsi nyivi cuahán cuandaca tsa nyihi. ¹⁴ Maa tyin tsa nyehe ra Jesús tsa javahá ra naha tacan, cuxaán ra tsi ra naha, tan catyí ra:

—Cuhva ndo tsa quitsi tsa nyihi nu nyaá yu. Ña casi ndo itsi naha tsi tyin nyivi ndacá ñaha Nyoo cuví ñi tumaa cuví tsa nyihi tyin tsinú iñi ñi tsi Nyoo.

¹⁵ Tan tsa nditsa catyí yu tsihin ndo tun ña cuita iñi nyivi tsi Nyoo tumaa nyitá iñi iin ra luhlu tsi jutu ra, ña cua cuvi quihvi ñi nu ndacá ñaha Nyoo —catyí ra Jesús tsihin ra naha.

¹⁶ Tacan tan quihin ra intuhun intuhun tsa nyihi can tan tyiso ndaha ra jiñi tsi naha tsi, tan tsican tahvi ra tsi Nyoo na nasoco ra itsi naha tsi.

Nu tsa cuenda ra Jesús tyin yí xaan nacuhva cuenda iin ra cuca tsi ra tsi Nyoo
(Mt. 19.16-30; Lc. 18.18-30)

¹⁷ Yaha yacan tan cuahán ra Jesús. Tan tsinú xaan iin rayi cuahán ra cuanyicún ra tsi ra. Tsa tahañ ra tsi ra, tsicuiñi tsi ra nuu ra, tan tsica tuhun ra tsi ra, tan catyí ra:

—Maestro, vaha xaan un. ¿Naa taahán tsi javaha yu tan cuvi coo yu ñayivi nyito tsa ña cua naa maa? —catyí ra tsihin ra Jesús.

¹⁸ Tan catyí ra Jesús tsihin ra:

—¿Nacuenta catyí un tyin ra vaha cuví yu? Tan intuhun ñi ra vaha iyó tan ra ican cuví Nyoo. Tan tsa catyí un tyin vaha yu, nacotó un tyin Nyoo cuví yu. ¹⁹ Yooho tsitó un tsa catyí Nyoo tyin javaha yo: “Ña coo inga ñaha tsi un. Ña cahñi un nyivi. Ña suhu un. Ña cahan un cuendu. Ña jandavi ñaha un tsi nyivi. Tyaá yahvi tsi jutu un tan tsi sihi un” —catyí ra Jesús tsihin ra.

²⁰ Nacahañ ra tan catyí ra:

—Maestro, tandihi tuhun ihya tan tyaá yahvi yu itsi nda ndi luhlu yu tan nda cuanda vityin —catyí ra.

²¹ Tacan tan sii cuñi ra Jesús nyehé ra tsi ra. Tan catyí ra tsihin ra:

—Intuhun ña tsa cumañi javaha un. Cuaahan yuvehe un tan xico un tandihi tsa iyó tsi un, tan cuhva un xuhun can tsi nyivi ndaahvi. Tacan tan coo tsa cuca tsi un nda gloria. Yaha can tan quitsi un quitsi nyicun un tsi yu vasu ndi maa nyehe un tundoho tan cahñi nyivi tsi un —catyí ra Jesús tsihin ra.

²² Tsa tsiñi ra tyuvaa can tsa cahañ ra Jesús tacan, cuihya xaan cuñi ra cuví, tan tsihin tucuihya iñi cuanuhu ra yuvehe ra tyin cuca xaan ra.

²³ Tacan tan nanyehé ra Jesús nanñi canduvi nu nyaá ra, tan catyí ra tsihin ra tsicá tsihin ra:

—jYi# xaan tan cuvi nacuhva cuenda nyivi cuca tsi ñi tsi Nyoo na cundaca ñaha ra tsi ñi! —catyí ra tsihin ra naha.

²⁴ Tsa tsiñi ra tsicá tsihin ra tsa caahán ra, iyo xaan cuñi ra naha cuvi. Maa tyin catyí tucu ra tsihin ra naha inga tsaha:

—jSehe yu, nyivi tyaá xaan jiñi tandihi tsa cuca, yi# xaan tan quihvi ñi nu ndacá ñaha Nyoo! ²⁵ Yatyí ca cuvi yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra Jesús.

²⁶ Tsa tsiñi ra naha tuhun ihya, iyo xaan cuñi ra naha cuvi, tan quitsaha tsicá tuhun tahan ra naha, tan catyí ra naha:

—Tun tacan, ¿yóo cua cacu? —catyí ra naha.

²⁷ Tacan tan nanyehé ra Jesús tsi ra naha tan catyí ra tsihin ra naha:

—Nyivi ña cuví javaha ñi tsehe, maa tyin Nyoo cuví javaha ra tyin tsa cuenda Nyoo nduve maa tsa yi#.

²⁸ Tacan tan catyí ra Pedro tsihin ra:

—Jutu Mañi yu, tandihi maa tsa iyó tsi ndi nacoq ndi can tan nyicún ndi tsi un.

²⁹ Nacahan ra Jesús tan catyí ra:

—Tsa nditsa catyí yu tsihin ndo tyin tandihi nyooho tan tandihi inga ca nyivi tsa cua nacoq vehe, o yañi, o cuhva, o jutu, o sihi, o ñasihi, o sehe, o ñuhu, tsa cuenda yuhu tan tsa cuenda tsa jacoto ñi tsi nyivi tyin cuñi Nyoo jacacu ra tsi ñi, ³⁰ cua ñihi ñi cientu ca tsaha siqui tsa nacoq ñi nu ñuhu ñayivi ihya. Cua ñihi ñi vehe, cua ñihi ñi nyivi cua cuví yañi ñi, cuhva ñi, sihi ñi, sehe ñi, tan cua ñihi tucu ñi ñuhu ñi, vasu ndi maa cua janyehe nyivi tundoho tsi ñi. Tan nu inga ñuhu ñayivi tsaa tsa vatsí, cua ñihi ñi ñayivi nyito tsa ña cua naa maa coo ñi. ³¹ Cuaha ñi nyivi cuahán ityi nuu vityin, cua cuhun ñi nda nu ndihi ña. Tan nyivi cuahán nu ndihi ña vityin, cuaha ñi cua cuhun ityi nuu —catyí ra Jesús.

Nu jacotó nyico ra Jesús nácaa cua cahñi nyivi tsi ra
(Mt. 20.17-19; Lc. 18.31-34)

³² Tsa tsa cuñi cuhun ra Jesús tan ra tsicá tsihin ra ñuu Jerusalén, cuahán ra Jesús ityi nuu tandihi nyivi tsa cuahán cuanyicún tsi ra. Iyo xaan cuñi ñi tan tsihin tsa yuuhvi ñi cuahán ñi. Tacan tan tava sijn ra tsi tsa utsi uvi ra tsicá maa tsihin ra. Tan quitsaha catyí tuhun ra tsihin ra naha tsa cua tahan ra.

³³ Tan catyí ra:

—Vityin tsa cua cuyatyn yo ñuu Jerusalén nu cua nacuhva cuenda nyivi tsi yuhu, Rayi# quee nda gloria. Cua cuhva cuenda ñi tsi yu tsi ra jutu cuví ityi nuu naha ra, tan tsi ra maestro cuenda ley vehe ñuhu naha ra. Ra ihya naha ra cua catyí ra naha tyin taahán tsi cúu yu tan cua nacuhva cuenda ra naha tsi yu tsi ra ñuu Roma naha ra. ³⁴ Cua vacu nducu ra naha tsi yu, cua cañi ra naha tsi yu, cua tiví si# ra naha tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quivi —catyí ra Jesús.

Nu tsicán ra Jacobo tan ra Juan iin tumañi iñi tsi ra Jesús
(Mt. 20.20-28)

³⁵ Tacan tan ra Jacobo tan ra Juan, sehe ra Zebedeo, natuhva ra naha nu nyaá ra Jesús, tan catyí ra naha tsihin ra:

—Maestro, jaha tumañi iñi tan javaha un tsa cua ndacan ndi tsi un —catyí ra naha.

³⁶ Tacan tan tsicá tuhun ra Jesús tsi ra naha tan catyí ra:

—¿Náa cuñi ndo javaha yu?

³⁷ Tan nacahān ra naha tan catyí ra naha:

—Cuñí ndi tsa cuhva un cunyecu ndi tsihin un nu ndacá ñaha un, iin ndi xiin cuaha un, tan inga ndi xiin satyin un —catyí ra naha tsihin ra Jesús.

³⁸ Tacan tan catyí ra Jesús tsihin ra naha:

—Nyooho ña tsitó ndo náa tsicán ndo. ¿A cuví nyehe ndo tundoho tsa cua nyehe yuhu? ¿A cuví cúu ndo tumaa cua cúu yu? —catyí ra tsihin ra naha.

³⁹ Tan nacahān ra naha:

—Cuví maa.

Tan catyí ra Jesús

—Nditsa tyin cua nyehe ndo tundoho tan cua cúu ndo tumaa cua tahan yuhu. ⁴⁰ Maa tyin tsa cunyaa iin ndo xiin cuaha yu tan iin ndo xiin satyin yu, ñavin yuhu taahán tsi cuhva yacan, tyin maa Nyoo cua catyí yóo cua ñihi can —catyí ra Jesús tsihin ra naha.

⁴¹ Tsa tsiñi tsa utsi ca ra tsicá tsihin ra Jesús yacan, cuxaān ra naha tsi ra Jacobo tan ra Juan. ⁴² Maa tyin canā ra Jesús tsi ra naha tan catyí ra tsihin ra naha:

—Tsa tsitó ndo tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. ⁴³ Maa tyin ñavin tacan taahán tsi javaha nyooho tyin ra tsa cuñí cuví ra cahnu ityi nuu Nyoo, cuñí tsi cuví ra musu tandihi ndo. ⁴⁴ Tan nyooho tsa cuñí cuví ityi nuu, cuñí tsi cuví ndo musu tandihi ca ndo. ⁴⁵ Tyin yuhu, Rayi tsa quee nda gloria, ña vatsí yu tyin cuñí yu jatyinyee nyivi tsi yu. Yuhu vatsí yu vatsi jatyinyee yu tsi maa ñi tan cuhva yu ñayivi yu tsa cuenda ñi tumaa iin tsa tyahvi yu tan jacacu yu cuaha ñi —catyí ra Jesús.

Nu jananyehe ra Jesús tsi ra Bartimeo

(Mt. 20.29-34; Lc. 18.35-43)

⁴⁶ Tacan tan tsaā ra naha ñuu Jericó. Tan yaha ñi ra naha ñuu can. Tan cuhva tsa cua quita ra Jesús ñuu can tsihin ra tsicá tsihin ra, cuaha nyivi cuahán cua nyicun tsi ra naha. Tan ityi yahā ra naha nyaá iin ra cuaa nañí Bartimeo, sehe ra Timeo, tsicán ra caridaa. ⁴⁷ Tan cuhva tsa tsitó ra cuaa can tyin tsa cua cuyatyin yaha ra Jesús, ra ñuu Nazaret, nu nyaá ra, quitsahā canā tsaa ra, tan catyí ra:

—¡Jesús, tata ra David, cūndaahvi iñi tsi yu! —catyí ra canā tsaa ra.

⁴⁸ Tacan tan quitsahā cuxaan nyivi tsi ra tan catyí ñi tsihin ra na cutaxin ra, maa tyin cuñihí ca ra canā tsaa ra tan catyí ra:

—¡Tata ra David, cūndaahvi iñi tsi yu! —catyí ra.

⁴⁹ Tacan tan tsicuiñi ra Jesús tan catyí ra:

—Cūaquihin ndo tsi ra.

Tan tsiquihin ra naha tsi ra cuaa can tan catyí ra naha tsihin ra:

—Jandu iin iñi un. Nduvita, cohon tyin caná ra tsi un —catyí ra naha tsihin ra.

⁵⁰ Tacan tan janehñi ra jahma ndasi ra nda sava. Tan cuahan ra iin yaha ñi nda nu nyaá ra Jesús. ⁵¹ Tacan tan tsicā tuhun ra Jesús tsi ra:

—¿Náa cuñí un javaha yu?

Tan nacahān ra cuaa can tan catyí ra:

—Maestro, cuñí yu janduvaha un tinuu yu na nanyehe nyico yu —catyí ra.

⁵² Tan catyí ra Jesús tsihin ra:

—Cūanuhu. Tsa nduvahā un tyin tsinú iñi un tsi yu.

Juvin ñi cuhva can tan nanyehe ra can. Tan cueta cuahán ra cuanyicún ra tsi ra Jesús.

11

Nu quihvi ra Jesús ñuu Jerusalén (Mt. 21.1-11; Lc. 19.28-40; Jn. 12.12-19)

¹ Tsa tsa cuñi tsa ra Jesús tan nyivi nyicún tsi ra nda ñuu Jerusalén, yatyin nu canyíi ñuu Betfagé tan ñuu Betania, tan yatyin ñi yucu nu iyó yutun Olivo, tan catyi ra Jesús tsihin uvi ra tsicá tsihin ra:

² —Cuaahan ndo ñuu tsa canyíi ityi nuu ihya. Tsa tsa ndo ican cua nañihi ndo iin urru. Quiti yoco cuví ti, nyaá ti nuuhñi ti, tan ñaha ca quihí tyayu ti. Ndátsi ndo tsi ti, tan quihin ndo tsi ti quitsi ndaca ndo tsi yu. ³ Tatan cusana ndaca tuhun nyivi tsi ndo: “¿Nacuu ndo urru ihya?” Tacan tan catyi ndo tsihin ñi: “Tsiñi ñuhu ti tsi Jutu Mañi yo, maa tyin cua jaquitsi nyico ñi maa ra tsi ti”, catyi ndo tsihin ñi —catyi ra Jesús tsihin ra naha.

⁴ Tacan tan cuahán ra naha, tan tsa tsaá ra naha, nañihí ra naha urru can nuuhñi ti tsitsi ityi tsata yuhu iin cora. Tan ndatsí ra naha tsi ti. ⁵ Tan catyi juhva ra yucú ican naha ra tsihin ra naha:

—¿Náa javahá ndo? ¿Nacuenda ndatsí ndo urru can? —catyi ra naha tsihin ra naha.

⁶ Tacan tan nacahan ra naha tumaa cahan ra Jesús tsihin ra naha. Tan tsahá ra can naha ra quihin ra naha urru can. ⁷ Tacan tan tsindaca ra naha urru can tsi ra Jesús. Tyiso ra naha jahma ra naha tsata ti, tan tsicoso ra Jesús tsi ti. ⁸ Tan tsaquín cuaha nyivi jahma ñi tsitsi ityi nu yahá ra, tan inga ñi tsahnya ñi ndaha yutun tan tsaquín ñi tsitsi ityi.

⁹ Tacan tan nyivi tsa cuahán ityi nuu ra tan ityi tsata ra, quitsahá caná tsaá ñi tan catyi ñi:

—¡Cahnu xaan cuví Nyoo! ¡Na jacahnu yo tsi Jutu Mañi yo, ra tsa jaquitsi Nyoo! ¹⁰ ¡Na jacahnu yo tsi ra vatsí cundaca ñaha tumaa tsindaca ñaha ra David, tsi tsaahnu yo! ¡Cahnu xaan cuví ra nyaá gloria! —catyi ñi.

¹¹ Tacan tan quihvi ra Jesús tsitsi ñuu Jerusalén, tan cuahán ra vehe ñuhu cahnu. Tan tsa yahá nyehe ra tandihí tsa iyó nuquehe vehe ñuhu can, cuahán ra ñuu Betania tsihin tsa utsi uvi ra tsicá tsihin ra tyin tsa cueñi xaan.

Nu cahan ra Jesús tsi yutun higo tsa ña tsahá tsiti (Mt. 21.18-19)

¹² Tsa tuvi inga quivi tsa quita ra Jesús tan ra tsicá tsihin ra ñuu Betania, tsaá soco tsi ra Jesús. ¹³ Tsa quita ra naha ndasava nyehe ra Jesús nu nyaá iin yutun higo tsa iyó numa. Tsaahan ra tsinyehe ra tun iñi tsiti tun, maa tyin nduve tsiti tun, maa ñi maa ndaha tun iñi, tyin ñaha ca tahan tsi quivi cuhva tun tsiti. ¹⁴ Tacan tan cahan ra Jesús tsi tun, tan catyi ra:

—Ndi iin sava ca quivi ña cua quee ca tsiti catsi nyivi nuu un —catyi ra tsihin tun.

Tan tsiñi ra tsicá tsihin ra tsa caahán ra.

Nu jacunu ra Jesús nyivi xicó nuquehe vehe ñuhu cahnu (Mt. 21.12-17; Lc. 19.45-48; Jn. 2.13-22)

¹⁵ Tsa tsaá ra naha ñuu Jerusalén, cuahán nyico ra Jesús vehe ñuhu cahnu tan quitsahá jacunú ra nyivi xicó tan jatá tsa yucú nuquehe yuvehe ñuhu can. Janduvá ra mesa nu nyecú nyivi samá xuhun nyivi. Tan janduvá tucu ra tyayu nu nyecú nyivi xicó paloma. ¹⁶ Tan ña tsahá ca ra yaha sava ñi nuquehe vehe ñuhu can tsihin ndaha tyiñu. ¹⁷ Tan quitsahá jacuahá ra tsi nyivi, tan catyi ra:

—¿A ña tsitó ndo tyin nu tutu Nyoo catyí tsi tyin vehe Nyoo cua cunañi tsi tyehen: “vehe nu cua ndacan tahvi nyivi queé nani nu ñuhu ñayivi tsi Nyoo”? Tan nyooho jananduví ndo itsi vehe ñasuhu —catyí ra tsihin ñi.

¹⁸ Tsa tsiñi ra jutu cuví ityi nuu naha ra tan ra maestro cuenda ley vehe ñuhu naha ra tsa caahán ra, tan quitsahá nducú ra naha cuhva cahñi ra naha tsi ra tyin yuuhví ra naha nyehe ra naha tsi ra tsa cuenda tsa janahá ra tsi nyivi tan yuuhví tucu ra naha tyin tsa cuaha xaan nyivi nyicún tsi ra. ¹⁹ Maa tyin tsa tsa cuñi cuaa, quita ra Jesús ñuu can tsihin ra tsicá tsihin ra.

Nu na ityi yutun higo

(Mt. 21.20-22)

²⁰ Tsa tuvi inga quivi, yaha nyico ra naha nu nyaá yutun higo tsa cahan ra Jesús. Tan nyehe ra naha tyin na ityi tun tan nda cuanda yoho tun na ityi. ²¹ Tacan tan tsa nyehe ra Pedro yutun higo can, nducuhun ñi ra tsa javahá ra Jesús tan catyí ra tsihin ra Jesús:

—¡Maestro, jihna! Tsa na ityi yutun tsa cahan un —catyí ra.

²² Nacahan ra Jesús, tan catyí ra:

—Tsinu ñi ndo tsi Nyoo. ²³ Tyin tsa nditsa catyí yu tsihin ndo tyin nyivi cua cahan tsihin yucu ihya tyehen: “Cuatsiyo ihya tan cuaahan tsitsi ndutya ñuhu”, tan tatun tsinú ñi ñi tyin cua cundaa tsa cahan ñi tan ña uvi tsicá ñi ñi, cua cundaa tsi. ²⁴ Yacan cuenda catyí yu tsihin ndo tyin tandihí tsa cua ndacan ndo tsi Nyoo tsa cua ndacan tahvi ndo tsi ra, tun tsinú ñi ndo tyin tsa naquihin cuenda ndo can, cua naquihin ndo can. ²⁵ Tan tsa cua ndacan tahvi ndo tsi Nyoo, tun nducuhún ñi ndo tyin xaan cuñi ndo tsihin nyivi, jaha ndo tucahnu ñi tsi ñi, tyin tacan tan jaha Jutu ndo, ra nyaá gloria, tucahnu ñi tsi maa ndo tsa cuenda cuatyí ndo. ²⁶ Maa tyin tun ña jaha ndo tucahnu ñi tsi nyivi, ndi Jutu ndo, ra nyaá gloria, tan ña cua jaha ra tucahnu ñi tsi maa ndo.

Nu tsicá tuhun ra cumí tyiñu vehe ñuhu naha ra tsi ra Jesús yóo tava tyiñu tsi ra tsa cahan ra tsihin nyivi

(Mt. 21.23-27; Lc. 20.1-8)

²⁷ Tacan tan tsa nyico ra naha ñuu Jerusalén. Tsa nyii ra Jesús tsicá nuu ra nuquehe vehe ñuhu cahnu, natuhva ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra nu nyaá ra. ²⁸ Tan tsicá tuhun ra naha tsi ra tan catyí ra naha:

—¿Yóo tava tyiñu tsi un tsa javahá un tyehen? —catyí ra naha.

²⁹⁻³⁰ Tan nacahan ra Jesús, tan catyí ra:

—Cuñi tucu yuhu ndaca tuhun yu tsa ndaca tuhun yu tsi nyooho. ¿Yóo jaquitsi tsi ra Juan tyin jacoondutya ra tsi nyivi? ¿A Nyoo o nyivi? Tatun catyí tuhun ndo tsihin yu yóo jaquitsi tsi ra, cua catyí tuhun tucu yuhu tsihin nyooho yóo tava tyiñu tsi yu javahá yu tyehen —catyí ra Jesús tsihin ra naha.

³¹ Tacan tan quitsahá caahán yuhu tahan ra naha, tan catyí ra naha:

—Tun catyí yo tyin Nyoo jaquitsi tsi ra Juan, cua catyí ra tsihin yo tyehen: “Tun Nyoo jaquitsi tsi ra, ¿nacuenta ña tsinú ñi ndo tsa cahan ra?” ³² ¿A vaha tun catyí yo tyin nyivi jaquitsi tsi ra? Ña cuvi —catyí ra naha, tyin yuuhví ra naha tsi nyivi, tyin tandihí ñi tan tsinú ñi ñi tyin ndusu yuhu Nyoo cuví ra.

³³ Tacan tan catyí ra naha tsihin ra Jesús:

—Ña tsitó ndi.

Tacan tan catyí ra Jesús tsihin ra naha:

—Tun ña tsitó ndo, ndi yuhu tucu, tan ña cua catyi tuhun yu tsihin ndo yóo tavá tyiñu tsi yu tsa javahá yu tyehen —catyí ra Jesús tsihin ra naha.

12

Nu caahán ra Jesús tuhun ra ña vaha jaha tyiñu

(Mt. 21.33-46; Lc. 20.9-19)

¹ Tacan tan quitsahá caahán ra Jesús tsihin ra naha tsihin cuhva ihya, tan catyí ra:

—Tsicoo iin rayii tsa tatsi yoho yucu vixi tsa nañi uva, ra ican tyasi ra iin cora nani canduvi nu tatsi ra yucu vixi can. Tan javahá ra iin nu cua tava ra ndutya uvas can. Tan javahá tucu ra iin vehe sucun tyin tacan tan cuví jaha cuenda ra nani cahnu nu ndaha tyiñu ra.

² Tsa yaha yacan tan tsahá nuu ra ñuhu can tsi juhva rayii tyin jaha tyiñu ra naha tsihin tsi. Tacan tan cuahán ra inga ñuu. ³ Tsa tahán tsi quivi iyó uvas can, jacuhun ra iin musu ra tyin ndacan ra juhva tsa taahán tsi tsi ra tsi ra jahá tyiñu can naha ra. ⁴ Maa tyin ra ican naha ra tñin ra naha tsi ra. Tan cañi ra naha tsi ra. Tan jacuhun ra naha tsi ra tsihin ndaha ndii ra. ⁵ Tacan tan tsitoho ñuhu can jacuhun nyico ra inga musu, maa tyin cañi ra naha tsi ra can tsihin yuu, tan tahvi ra naha jiñi ra, tan cahan nyaa ra naha tsi ra. ⁶ Tsiitoho ñuhu can jacuhun nyico ra inga musu. Tan tsahñi ra naha tsi ra. Yaha yacan tan cuaha ca ra naha jacuhun ra. Maa tyin cañi ra naha tsi juhva ra naha tan tsahñi ra naha juhva ca ra naha.

⁷ Tan cumañi intuhun ña ra tsa cuví jacuhun ra. Tan ra ican cuví sehe ra tsa cuñi xaan ra. Nu ndiñi tuhun jacuhun ra sehe ra tyin cuñi maa ra tsicá iñi ra: “Tun jacuhun yo sehe yo, cua tyaa yahvi ra naha tsi ra tyin sehe yo cuví ra”, cuñi ra. ⁸ Maa tyin tsa nyehé ra jahá tyiñu can naha ra tsi ra sehe ra, natuhun tahan ra naha tan catyí ra naha: “Ra ihya cua naquihin cora ihya. Yacan vaha ca cahñi yo tsi ra, tan ndoo maa yo tsihin can”, catyí ra naha. ⁹ Tacan tan tñin ra naha tsi ra tan tsahñi ra naha tsi ra. Tan tavá ra naha cuñu ñuhu ra ityi tsata cora can —catyí ra Jesús.

¹⁰ Tacan tan tsicá tuhun ra Jesús tsi ra naha tan catyí ra:

—¿Náa cua javaha tsitoho ñuhu can? Cua cuhun ra tan cua cahñi ra tsi ra jahá tyiñu can naha ra. Tan cua cuhva nuu ra ñuhu can tsi inga ca ra naha tyin jaha tyiñu ra naha tsihin can. ¹¹ ¿A ñaha ca cahví ndo nu tutu Nyoo nu catyí tsi tyehen?

Yuu tsa javitá ra javahá vehe naha ra, yacan cuví yuu tsa tsiñi ñuhu ca.

¹² Maa Nyoo Jutu yo jahá tsa cahnu ca cuví yuu ihya. Tan iyo xaan cuñi yo nyehé yo can, catyí tsi —catyí ra Jesús tsihin ra naha.

¹³ Tacan tan ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi naha ra nducu ra naha cuhva tyihi ra naha tsi ra Jesús vehe caa tyin tsitó ra naha tyin tuhun maa ra naha caahán ra tsa tsatyiñu ra cuhva can. Maa tyin ña tñin ra naha tsi ra tyin yuuhvi ra naha nyehé ra naha tsi nyivi. Nacoq ra naha tsi ra, tan cuahán ra naha.

Nu caahán ra Jesús siqui tuhun tsa tyahvi nyivi xuhun tsi ra ñuu Roma tsa ndacá ñaha tsi nyivi Israel

(Mt. 22.15-22; Lc. 20.20-26)

¹⁴ Tacan tan jacuhun ra naha juhva ra yihí cuenda ra Herodes tan juhva ra fariseo naha ra nu nyii ra Jesús tyin nducu ra naha cuhva cahan ra Jesús iin

tsa ña vaha tyin tacan tan cuvi tyaa ra naha cuatyí tsi ra. ¹⁴ Tsa tsaá ra can naha ra tan quitsahá caahán ra naha tsihin ra Jesús tan catyí ra naha:

—Maestro, tsító ndi tyin tsa nditsa caahán un. Tan inducu ñi cuñí un nyehe un nyívi cuca tan nyívi ndaahvi. Tan nditsa tyin ityi Nyoo janahá un. Yacan cuenda cuñí ndi ndaca tuhun ndi tsehe tsi un: ¿A vaha cuhva yo tsa tsicán ra ndacá ñaha tsi yo, ra tsa nyaá nda ñuu Roma, o ña vaha? ¿A taahán tsi tyahvi yo can, o ña taahán tsi? —catyí ra naha tsihin ra Jesús.

¹⁵ Tan tsító ra Jesús tyin ñavin tsa vaha tsicá iñi ra naha, yacan cuenda catyí ra tsihin ra naha:

—¿Nacuvi tyin nducú cuhva ndo tsi yu? Ndáca ndo iin xuhun tsi yu ihya, na nyehe yu —catyí ra.

¹⁶ Tsindacá ra naha xuhun can tsi ra. Tsa nyehe ra can tan tsicá tuhun ra tsi ra naha, tan catyí ra:

—¿Yóo nuu tan yóo sívi nyaá tsata xuhun ihya? —catyí ra tsihin ra naha.

Nacahan ra naha tan catyí ra naha:

—Nuu ra ndacá ñaha tan sívi ra.

¹⁷ Tacan tan catyí ra Jesús tsihin ra naha:

—Tun tacan, cuhva ndo tsa tsi ra ndacá ñaha tsi ra, tan cuhva ndo tsa tsi Nyoo tsi Nyoo —catyí ra Jesús tsihin ra naha.

Tan iyo xaan cuñí ra naha tsihin tsa nacahan ra.

*Nu cuñi ra saduceo naha ra jandavi ñaha ra naha tsi ra Jesús
(Mt. 22.23-33; Lc. 20.27-40)*

¹⁸ Tacan tan cuahán juhva ra saduceo naha ra nu nyií ra Jesús. Tan ra saduceo can naha ra catyí ra naha tyin ña cua nandoto nyívi. Yacan cuenda cahan ra naha tyehen tan catyí ra naha tsihin ra Jesús:

¹⁹ —Maestro, ra Moisés tyaá ra nácaa taahán tsi javaha yo tatun iin rayíi tsihi tan ndoo ñasihi ra tan nduve sehe ña tsicoo tsihin ra. Catyí ra tyin taahán tsi tindaha yañi ra tsihin ñaha can. Tyin tacan tan cua coo sehe ra tsihin ña tsa cuenda ra yañi ra tsa tsihi. ²⁰ Iin tsaha iin rayíi tsicoo utsa sehe yíi ra. Ra tsa jihna ñi tindaha ra tsihin iin ñaha, maa tyin nduve sehe ra tsicoo tsihin ña, tan tsihi ra. ²¹ Tacan tan tindaha ra yañi ra tsa tsinu uvi tsihin ñaha tsa ndoo can. Maa tyin juvin ñi ña tsicoo sehe ra tsihin ña tan tsihi ra. Juvin ñi tacan tahan tucu ra tsa tsinu uñi. ²² Tandihí tsa utsa ra naha tindaha ra naha tsihin ñaha can. Tan ndi intuhun ra naha tan ña tsicoo sehe ra naha tsihin ña. Tan nu ndihí tuhun, tsihi ndihí maa ña. ²³ Tan vityin, tun nditsa tsa cua nandoto nyívi, ¿ndáa tsa utsa taahan ra can naha ra cua cuvi yíi ña quívi cua nandoto ñi? Tyin tandihí maa ra naha tan tindaha ra naha tsihin ña —catyí ra naha tsihin ra Jesús.

²⁴ Tacan tan nacahan ra Jesús tan catyí ra tsihin ra naha:

—Caahán soho ñi maa nyooho, tyin ña tsító ndo tsa catyí tuhun Nyoo, tan ndi ña tsító ndo nácaa tsa cahnu cuví tunyee iñi tsa iyó tsi Nyoo. ²⁵ Quívi cua nandoto nyívi, ndi ña cua tindaha ñi tan ndi ña cua tindaha sehe ñi, tyin cua cuví ñi tumaa ángel iyó gloria. ²⁶ Tan tuhun tsa cua nandoto nyívi, ¿a ñaha ca cahvi ndo nu libru tsa tyaá ra Moisés nu catyí tsi nácaa cahan Nyoo tsihin ra nu cayú yutun iñu? Tyin catyí ra tsihin ra tyehen: “Yuhu cuví Nyoo ra Abraham, ra Isaac, tan ra Jacob”, catyí Nyoo tsihin ra Moisés. ²⁷ Ihya nyehé yo tyin nyito añima ra can naha ra vasu ndi maa tsanaha tsihi ra naha tyin Nyoo ñavin Nyoo nyívi tsihi cuví ra, tyin Nyoo cuví ra Nyoo nyívi nyito. Yacan cuenda catyí yu tyin nyooho caahán soho ñi maa ndo —catyí ra Jesús tsihin ra naha.

Ley tsa ñiñi ca tsa tsaha Nyoo
(Mt. 22.34-40)

²⁸ Ña naha ñi tan tsaq iin ra maestro cuenda ley vehe ñuhu, tan tsiñi ra tsa caahán ra Jesús tshin ra saduceo can naha ra. Tan cuhva tsa tsito ra tyin ra Jesús vaha nacahan ra tshin ra naha, tsica tuhun ra tsi ra tan catyí ra:

—Tsitsi tsa tandihi ley, ¿ndáa tsa ñiñi ca cuñi tsi javaha yo? —catyí ra.

²⁹ Tan nacahan ra Jesús tan catyí ra:

—Ley tsa jihna ñi tan ñiñi ca cuñi tsi javaha yo tsa nuu tandihi ley, cuví ley ihya: “Nyooho nyivi Israel, tyaa soho ndo: intuhun ñi maa Nyoo Jutu yo iyó.

³⁰ Cuñi ndo tsi Jutu Mañi yo Nyoo tshin tsa ñi ñi ndo, tan tshin tsa ñi ñi ñi ñi ndo, tan tshin tandihi tsa tsiñi tuñi jiñi ndo, tan tshin tandihi tunyee ñi tsa iyó tsi ndo.” Ley ihya cuví tsa ñiñi ca tan tsa jihna ñi taahán tsi javaha yo. ³¹ Tan tsa tsinu uvi tsa yatyin inducu ñi caahán tsi tshin tsa jihna ñi tan catyí tsi tyehen: “Cuñi tahan ndo tsi ndo tumaa cuñi ndo tsi maa ndo.” Nduve ca ley tsa ñiñi ca javaha yo tsa nuu nduvi tsehe —catyí ra Jesús.

³² Tacan tan ra maestro cuenda ley can catyí ra tshin ra:

—Vaha xaan nacahan un, Maestro. Nditsa tsa caahán un. Intuhun ñi Nyoo iyó, tan nduve inga ca Nyoo iyó. ³³ Tan tsa cuñi yo tsi Nyoo tshin tsa ñi ñi yo, tan tshin tandihi tsa tsiñi tuñi jiñi yo, tan tshin tsa ñi ñi ñi ñi ñi yo, tan tshin tandihi tunyee ñi iyó tsi yo, tan tsa cuñi tahan yo tsi yo tumaa cuñi yo tsi maa yo, tandihi yacan tan cahnu ca cuví can tan ñavin ca tsa jamañi yo tsi Nyoo, tsa tsahñi yo quití tan tsahmí yo can nu altar —catyí ra maestro cuenda ley can tshin ra Jesús.

³⁴ Tsa nyehe ra Jesús tyin vaha nacahan ra tshin tsa catsi jiñi ra, tan catyí ra tshin ra:

—Luxu cuñi ña tan ñihi un cuhva nácaa nacuhva cuenda un ñiñi un tsi Nyoo na cundaca ñaha ra tsi un —catyí ra Jesús tshin ra.

Ndi intuhun ca maa nyivi tan ña cana ca ñi ñi ndaca tuhun ñi náa ndaca tuhun ñi tsi ra Jesús.

Ra Cristo Sehe Nyoo tsi ra tan juvin ñi cuví tucu ra tata ra David
(Mt. 22.41-46; Lc. 20.41-44)

³⁵ Jacuahá ra Jesús tsitsi vehe ñuhu cahnu, tan catyí ra:

—¿Nacuenda tyin catyí ra maestro cuenda ley vehe ñuhu naha ra tyin tata ra David cuví ra Cristo? ³⁶ Tan juvin ñi maa ra David catyí tuhun ra Cristo tyehen:

Nyoo cahan ra tshin Jutu Mañi yu, tan catyí ra:

“Cunyaa xiin cuaha yu ihya nda cuanda caquin yu tsi ra xaan ñi tsi un naha ra tsaha un”, catyí ra David tahan tsanaha jahá Tatyí li Nyoo.

³⁷ ¿Nacaa cuví cuú tucu ra Cristo tata ra David, tan juvin ñi maa ra David catyí tyin ra Cristo cuví Jutu Mañi ra? —catyí ra Jesús.

Tan cuaha nyivi yucú tyaa soho tsa caahán ra tan sii xaan cuñi ñi.

Nu caahán ra Jesús tyin iyó cuaha cuatyí ra maestro cuenda ley vehe ñuhu naha ra

(Mt. 23.1-36; Lc. 11.37-54; 20.45-47)

³⁸ Quitsaha jacuahá ra Jesús tan catyí ra tyehen:

—Jaha ndo cuenda tsi ndo tshin ra maestro cuenda ley vehe ñuhu naha ra, tyin taahán xaan ñi ra naha cunditsi ra naha jahma nañi tan caca nuu ra naha nuyahvi na jaha ndo tsa ñayivi tsi ra naha, tan cuhva ndo nacumi tsi ra naha. ³⁹ Tan nanducú ra naha tyayu vaha ca cunyecu ra naha tsitsi vehe ñuhu. Tan tsa cua catsi ra naha nu iyó vico, nanducú ra naha nu vaha

ca cunyecu ra naha. ⁴⁰ Tan quihín nyaá ra naha vehe ñi ndaahvi tsa tsihí yíi tyin ña cuví tyahví ñi xuhun tsa tsicán ra naha tsi ñi. Tan cuñí ra naha tsa vaha cahan nyívi tuhun ra naha. Yacan cuenda naha tsicán tahvi ra naha tsi Nyoo nu tuvi nyívi. Maa tyin nduve náa catyi javahá ra naha tacan tyin ñihi ca cua tatsi tuñi Nyoo tsi ra naha —catyi ra Jesús.

Tsa tsahá ñaha ndaahvi tsihí yíi
(Lc. 21.1-4)

⁴¹ Iin tsaha nyíi ra Jesús tsitsi vehe ñuhu cahnu tan nyaá ra yatyin ñi nu nyíi tsatun nu tyihí nyívi xuhun tsa tsahá ñi tsi Nyoo. Tan nyehé ra nu tyihí nyívi xuhun tsitsi tsatun can. Tan cuaha nyívi cuca tyihí ñi cuaha xaan xuhun. ⁴² Tsitsi tsa nyaá ra ican tsaá iin ñaha ndaahvi tsihí yíi, tan tyihí ña uvi taahan ñi xuhun nyíhi tsa caaha xaan nyaá. ⁴³ Tacan tan caná ra Jesús tsi ra tsicá tsihin ra, tan catyi ra tsihin ra naha:

—Tsa nditsa catyi yu tsihin ndo Nyoo cuaha ca xuhun tsahá ñaha ndaahvi ihya tan ñavin ca inga nyívi. ⁴⁴ Tyin tsahá ñi tsa ndoo síqui xuhun ñi. Maa tyin ñaha ihya tyihí ña tandihí tsa iyó tsi ña —catyi ra Jesús.

13

Nu caahán ra Jesús tyin cua taní vehe ñuhu cahnu
(Mt. 24.1-2; Lc. 21.5-6)

¹ Cuhva tsa cua quita ra Jesús tsitsi vehe ñuhu cahnu can, iin ra tsicá tsihin ra catyi ra tsihin ra:

—¡Maestro, nyehé jihna tsa síi caá yuu yihí vehe ihya! ¡Nyehé tsa nahnu vehe ihya! —catyi ra tsihin ra Jesús.

² Maa tyin nacahan ra Jesús, tan catyi ra tsihin ra:

—Nditsa nahnu vehe ihya tan síi caá tsi nyehé yo vityin. Maa tyin catyi yu tsihin un tyin coo quívi nduve ca maa náa cua ndoo ihya. Ndi intuhun yuu tan ña cua coso tahan tsi tsihin inga tsi, tyin tandihí maa tsi tan cua taní tsi —catyi ra Jesús.

Nu tsahá cuenda ra Jesús náa cua cuví tsa ndi cumañi ca naa ñuhu ñayívi
(Mt. 24.3-28; Lc. 21.7-24; 17.22-24)

³ Tacan tan cuahán ra Jesús tsihin ra tsicá tsihin ra yucu yutun Olivo tsa canyí inga tsiyo nu nditsin nyehé tsi vehe ñuhu cahnu. Tsa tsinyaa ra Jesús ican, ra Pedro, ra Jacobo, ra Juan, tan ra Andrés tsicá tuhun xeehe ra naha tsi ra tan catyi ra naha:

⁴ —Cuñí ndi tsa catyi tuhun un tsihin ndi ama cua cuví tandihí tsa cahan un. ¿Nacaa tan coto ndi tatun tsa cuyatyin cundaa tandihí can? —catyi ra naha.

⁵ Nacahan ra Jesús tan catyi ra:

—Jaha ndo cuenda tsi ndo coto jandavi ñaha nyívi tsi ndo. ⁶ Tyin cuaha xaan nyívi cua quítsi, tan cua cuatyíñu ñi sívi yu, tan cua catyi ñi: “Yuhu cuví ra Cristo, ra tsa jaquítsi Nyoo.” Tan cuaha xaan nyívi cua jandavi ñaha ñi.

⁷ Maa tyin tun ñihi tuhun ndo tyin iyó cuatyí tan cañí tahan nyívi ityi can tan ityi ihya, ña nayuhvi ndo tyin tacan taahán maa tsi cuví tsa ndi cumañi ca naa ñuhu ñayívi. ⁸ Tyin nyívi iin ñuu cua cañi tahan ñi tsihin nyívi inga ñuu, tan cua coo cuatyí iin ñuu tsihin inga ñuu. Tan cuaha ñi ityi cua taan ñihi, tan cua coo tama, tan cua nduvaa nyívi. Vasu ndi maa nyehé nyívi tundoho ihya, ña cua naa naha ñuhu ñayívi tyin ndi nyaa ca cua nyehé ñi tundoho.

⁹ Maa tyin jaha ndo cuenda tsi ndo tyin cua cuhva cuenda nyivi tsi ndo tsi ra cumi tyiñu naha ra. Tan cua cañi ñi tsi ndo tsitsi vehe ñuhu. Cua cuhva cuenda ñi tsi ndo tsi ra cumi tyiñu tan tsi ra cuví rey tsacaty yuhu. Tyin tacan tan cuví cahan ndo tuhun yu nuu ra naha. ¹⁰ Tyin tsa ndi cumañi ca naa ñuhu ñayivi, cuñi tsi coto tandihi nyivi inga ñuu tyin Nyoo jacacú ra tsi nyivi. ¹¹ Tan cuhva tsa cua cundaca ñi tsi ndo nuu ra cumi tyiñu naha ra, ña çaca iñi ndo náa cua cahan ndo. Tyin juvin ñi maa hora can tan cua cuhva Nyoo tsa cahan ndo. Tyin ñavin maa ndo cua cahan; tyin maa Tatyí li Nyoo cua cahan. ¹² Yihí ra naha cua nacuhva cuenda ra naha juvin ñi maa yañi ra naha tan cua ndacan ra naha tsa cúu ra can naha ra. Yihí nyivi cua nacuhva cuenda ñi juvin ñi maa sehe ñi. Tan yihí ñi cua nacuhva cuenda ñi nda cuanda jutu ñi tan sihi ñi tyin cúu ñi. ¹³ Tandihi nyivi iyó nu ñuhu ñayivi ndasi cua cuñi ñi nyehe ñi tsi ndo tsacaty yuhu. Maa tyin nyooho tsa cua cunyeé iñi tsinú iñi tsi yu nda nu ndihi, cua cacu ndo.

¹⁴ Tandihi nyooho tsa cahví nu tutu Nyoo nu tyaq ra Daniel, ra cuví ndusu yuhu Nyoo tsa tsicoq tahan tsanaha, çutuñi iñi ndo tyin iyó tsa janducaquiñi tan tsa jativi. Quivi tsa nyehe ndo tyin tsa nyii yacan nu ña taahán tsi cunyií can, nyooho nyivi iyó Judea, quita ndo ñuu ndo tan cahun ndo ityi yucu. ¹⁵ Nyooho tsa cua cuyucu jiñi vehe quivi can, cua nuu ndo, maa tyin ña cua nuu ndo tsa quihvi ndo tsitsi vehe ndo tan tava ndo tsa iyó tsi ndo. ¹⁶ Nyooho tsa cua cuyucu tsitsi cuhu, ña cua cunuhu jihna ndo cuquihin ndo jahma ndo. ¹⁷ ¡Ndahvi ñiñaha tsa ñuhú sehe quivi can! ¡Tan ndahvi ñi iyó sehe lee tsa ndi tyaxín! ¡Ndahvi ñi! ¹⁸ Ndacan tahvi ndo tsi Nyoo na ña tahan tsi cunu ndo quivi vitsin. ¹⁹ Tyin tundoho tsa cua nyehe nyivi quivi can, ñaha ca maa coo can ndaha tsinú maa ñuhu ñayivi nda cuanda vityin. Tan ndi ityi nuu ca tan ña cua nyehe nyivi tahan tundoho can inga tsaha. ²⁰ Tun tsatyin Jutu Mañi yo tan ña jandihí ra tsa cua nyehe yo tundoho quivi can, yoñi maa cua cacu. Maa tyin cua jandihí ra can tsa cuenda tsa cuñi ra tsi nyivi yihí cuenda ra, nyivi nacatsj vaha maa ra.

²¹ Tatun catyi nyivi tsihin ndo: “Jihna ndo, ihya nyaá ra Cristo” o “Nyehe ndo, ican nyaá ra Cristo”, ña tsinu iñi ndo. ²² Tyin cua quitsi nyivi jandavi ñaha tan cua catyi ñi tyin ra Cristo cuví ñi. Cua catyi ñi tyin ndusu yuhu Nyoo cuví ñi. Maa tyin ña nditsa ñi. Cua javaha ñi tsa nyityi, tan tsa iyo nahnu tyin cua jandavi ñaha ñi nda cuanda nyivi nacatsj maa Nyoo, tatun cunyeé ñi javaha ñi tacan. ²³ Maa tyin nyooho jaha cuenda vaha ndo tsi ndo vityin tsa tsa tsitó ndo tandihi yacan tsa ndi cumañi ca tahan tsi quivi can —catyi ra Jesús.

Nu jacoto ra Jesús nácaa cua quitsi nyico ra inga tsaha

(Mt. 24.29-35, 42-44; Lc. 21.25-36)

²⁴ Tan catyi nyico ra Jesús tyehen:

—Maa tyin tsa cua yaha nyehe nyivi tundoho quivi can, cua ndunaa ñicanyii, yoo ña cua jandunditsin ca tsi, ²⁵ tan cua cucoyo tiñuu. Tan tandihi tsa iyó andivi tan cua nacanda tsi naha tsi. ²⁶ Tacan tan cua nyehe ndo tsi yuhu, Rayii tsa quee nda gloria, vatsí yu nu vico tsihin tunyee iñi cahnu tan tsihin tsa cahnu cuví Nyoo. ²⁷ Tan cuaha ángel cuenda yu cua jaquitsi yu tyin jandu iin ra naha nyivi nacatsj maa Nyoo. Cua quita ñi nanii cahnu nu ñuhu ñayivi, nda nu ndihi ñuhu ñayivi tan nda nu ndihi andivi.

²⁸ Çutuñi iñi ndo cuhva iyó yutun tsa nañi higo: Tun tsa nduyutyá soco tun tan cana ndaha yutya tun, tsitó ndo tyin tsa cua quee tsiti tun. ²⁹ Tan juvin

ñi tacan, tatun tsa cuví tandihi tsa iyo tsa caahán yu tuhun tsihin ndo, cua coto ndo tyin tsa cuyatyin quitsi yu; tan tsa nyanaá yu yuvehe cuví tsi. ³⁰ Tsa nditsa catyí yu tsihin ndo tyin tsa ndi cumañi ca cúu nyívi iyó nu ñuhu ñayívi ihya tan cua cuví tandihi tsa caahán yu tuhun tsihin ndo. ³¹ Tan coo quívi cua cundihi andívi tan cua cundihi ñuhu ñayívi, maa tyin tuhun caahán yuhu, ña cua cundihi maa tsi tyin tandihi tsi tan cua cundaa tsi.

³² Maa tyin quívi tan hora tsa cua cuví tandihi yacan, yoñi maa tsitó can, ndi maa ca ángel tan ña tsitó ra naha, ndi yuhu tsa cuví yu Sehe Nyoo tan ña tsitó yu. Intuhun ñi maa Nyoo Jutu yo tsitó ama cua javaha ra tandihi.

³³ Yacan cuenda ço nyito vaha ndo, tan jáha cuenda ndo tsi ndo, tan ndaçan tahvi ndo tsi Nyoo, tyin ña tsitó ndo náa quívi tan náa cuhva cua quitsi nyico yu. ³⁴ Tumaa iin rayí tsa cua cahun nu cañi. Ra ican tsa ndi cumañi ca cahun ra, tsahá cuenda ra vehe ra tsi musu ra. Tan tsahá ra tyiñu tsi intuhun intuhun ra naha. Tan tava tyiñu ra tsi ra jáhá cuenda yuvehe na jaha cuenda vaha ra. ³⁵ Yacan cuenda nyooho ço nyito ndo tyin ña tsitó ndo náa cuhva cua quitsi yu tsa cuví yu tumaa tsitoho vehe can, tyin cuví quitsi yu tsa cua cunaaha, maa ñuu, o cuhva tsacú tsitooho, o tsa cua cana ñicanyii. ³⁶ Yacan cuenda çoonyito vaha ndo tan ña cusu ndo tyin sana iñi ndo tan cua quitsi yu. ³⁷ Tsa caahán yu tsihin nyooho, caahán tucu yu tsihin tandihi ca nyívi: Ço nyito ndo.

14

*Nu nducu ra jutu cuví ityi nuu naha ra cuhva tñn ra naha tsi ra Jesús
(Mt. 26.1-5; Lc. 22.1-2; Jn. 11.45-53)*

¹ Tsa ndi cumañi uvi quívi ca tan tahan tsi vico pascua tan vico nu tuhvá nyívi tsatsí paan tsa nduve yutsan iya yihí. Ra jutu tsa cuví ityi nuu naha ra tan ra maestro cuenda ley vehe ñuhu naha ra nducú ra naha cuhva tñn xeehe ra naha tsi ra Jesús tan cahñi ra naha tsi ra. ² Maa tyin natuhun tahan ra naha tan catyí ra naha:

—Ña cua tñn naha yo tsi ra quívi maa vico tyin coto nduuaa xaan nyívi —catyí ra naha.

*Nu tyihí iin ñaha ndutya tami jiñi ra Jesús
(Mt. 26.6-13; Jn. 12.1-8)*

³ Tsa ndi cumañi ca tahan tsi vico can, nyíi ra Jesús ñuu Betania, vehe ra Simón, ra tsa tsindohó cuehe tyaahyu. Tsitsi tsa nyaá ra Jesús tsatsí ra, tsaq iin ñaha ndahá ña iin yutyi tsa tsinú tsihin yuu tsa nañí alabastro. Tsiñu can yihí ndutya tami tsa nañí nardo. Tan yahvi xaan nyaá ndutya tami can. Nuñá ña yuhu yutyi can tan tavá ña ndutya tami can tan tyihí ña can jiñi ra Jesús.

⁴ Maa tyin juhva ra tsa yucú ican naha ra nduxaän ra naha tan catyí ra naha: —¿Nacuenda tyin jatívi ñaha ihya ndutya tami can? ⁵ Tun tsatyin xico ña can, cuaha xaan xuhun cua ñihi ña tsihin can, tan cuví jatyinyee ña tsi nyívi ndaahvi tsihin xuhun can —catyí ra naha.

Tan cuxaän ra naha tsi ña.

⁶ Maa tyin ra Jesús catyí ra:

—Jáña ndo tsi ñal! ¿Nacuenda cuñi ndo jandu uvi iñi ndo tsi ña? Tan tsa vaha javahá ña tsihin yu. ⁷ Tyin nyívi ndaahvi tandihi ñi quívi cua cuyucu ñi tsihin ndo, maa tyin yuhu, ña naha ca cunyii yu tsihin ndo. ⁸ Ñaha ihya javahá ña ndihi cuhva cuví ñi javahá ña. Tyihí ña ndutya tami cuñu ñuhu yu, tumaa

tuhvá maa yo javahá tsihin cuñu ñuhu nyivi tsa ndi cumañi ca quihvi ñuhu ñi. ⁹Tsa nditsa catyí yu tsihin ndo, tyin tandihi ityi nu cua cahan nyivi tuhun Nyoo nanii cahnu nu ñuhu ñayivi, cua cahan ñi tuhun ñaha ihya tan tsa javahá ña, tyin tacan tan ña naa iñi nyivi tsi ña —catyí ra Jesús.

Nu xico ra Judas tsi ra Jesús

(Mt. 26.14-16; Lc. 22.3-6)

¹⁰Tsa yahá yacan tan quita iin ra tsitsi tsa utsi uvi ra tsicá tsihin ra Jesús. Ra ihya cuví ra Judas Iscariote. Tsañan ra tsicahan ra tsihin ra jutu cuví ityi nuu naha ra, tan jandaa ra tyiñu tsihin ra naha tyin cua cuhva cuenda ra tsi ra Jesús tsi ra naha. ¹¹Cuhva tsa tsiñj ra naha tsa caahán ra, sii xaan cuñí ra naha cuví, tan catyí ra naha tsihin ra tyin cuhva ra naha xuhun tsi ra. Tacan tan quitsahá nducú ra Judas cuhva cuhva cuenda ra tsi ra Jesús tsi ra naha.

Nu cuxiñj ra Jesús tsihin ra tsicá tsihin ra

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹²Quivi jihna ñi tsa quitsahá vico nu tsatsi nyivi paan tsa nduve yutsan iya yihí tan quivi tuhvá ñi tsahñi mbee lee tan jamañi ñi tsi Nyoo, ra tsicá tsihin ra Jesús tsicá tuhun ra naha tsi ra, tan catyí ra naha:

—¿Numaa cuñí un cahun ndi janduvaha ndi tsa cuxiñi un cuenda vico pascua ihya?

¹³Tacan tan tava tyiñu ra tsi uvi taahan ra naha tan catyí ra tsihin ra naha:

—Cuaahan ndo tsitsi ñuu, tan ican cua nañihi ndo iin rayi yosó soco iin quiyi ndutya. Tsa nyehe ndo tsi ra, cuanyicun ndo tsi ra. ¹⁴Tsa tsaa ndo yuvehe nu cua quihvi ra, catyí ndo tyehen tsihin tsitoho vehe can: “Ra Maestro cuñí ra coto ra numaa nyaá cuarto nu cua jacahnu ra vico tsihin ra tsicá tsihin ra”, catyí ndo. ¹⁵Tan cua janaha ra iin cuarto cahnu nu tsinu uvi pisu tsi ndo. Tsa nduvahá maa tsitsi tsi jahá ra, Javaha ndo tsa cuxiñi yo tsivi vehe can—catyí ra Jesús tsihin ra naha.

¹⁶Tacan tan cuahán ra naha. Tsa tsaa ra naha tsitsi ñuu can, nañihi ra naha tandihi maa cuhva catyí ra Jesús tsihin ra naha. Tan javahá ra naha tsa cua cuxiñi ra naha cuenda vico pascua. ¹⁷Tsa ndihi javahá ra naha tsa cua cuxiñi ra naha, tacan tan cuahán nyico ra naha nu nyii ra Jesús. Tan tsa cunaaha, cuahán ra Jesús, cuacuxiñi ra tsihin tsa utsi uvi ra tsicá tsihin ra. ¹⁸Tan cuhva tsa nyecú ra naha tsatsí ra naha nu mesa, tan catyí ra Jesús:

—Tsa nditsa catyí yu tsihin ndo tyin iin nyooho tsa tsatsí tsihin yu cua xico tsi yu tsi ra xaan iñi tsi yu.

¹⁹Tacan tan nducuihya xaan cuñí ra naha, tan quitsahá tsicá tuhun tan iin tan iin ra naha tsi ra, tan catyí ra naha:

—¿A yuhu?

Tacan tan tsicá tuhun tucu inga ra tan catyí ra:

—¿A yuhu?

²⁰Tan nacahan ra Jesús tan catyí ra:

—Ña tandihi ndo. Intuhun ñi ra tsitsi tsa utsi uvi ndo. Tan ra ican cuví ra tsa jatyi paan iin ñi tsitsi coho tsihin yu. ²¹Tyin yuhu, Rayi tsa quee nda gloria, cua tahan yu tumaa caahán maa nu tutu Nyoo tyin cua tahan yu. Maa tyin jndahvi ra ndaahvi tsa cua xico tsi yu! Vaha ca tun tsatyin ña cacu ra —catyí ra Jesús.

²²Tan tsitsi tsa tsatsí ra naha, tacan tan quihin ra Jesús iin paan tan nacuhvá ra tyahvi nyoo tsi Nyoo tsa cuenda can, tan tsahnú sava ra can, tan tsahá ra can tsi ra tsicá tsihin ra, tan catyí ra:

—Catsi ndo paan ihya tyin tsehe cuví tumaa cuñu ñuhu yu —catyí ra tsihin ra naha.

²³ Tsa yaha yacan quihñin ndihi ra vasu nu yihí vinu. Tsa yaha tsaha ra tyahvi nyoo tsi Nyoo, facan tan tsaha ra can tsi ra naha. Tandihí ra naha tan tsihi ra naha vinu tsa yihí tsitsi vasu can. ²⁴ Tan catyí ra tsihin ra naha:

—Vinu ihya cuví tumaa ññi yu tyin tsihin ññi yu cua ndoo Nyoo tuhun tsa tsihin ndo tyin cua cati ññi yu tsa cuenda tsa vaha tsi nyooho tan tsa vaha tsi cuaha nyivi. ²⁵ Tsa nditsa catyí yu tsihin ndo tyin ña cua coho ca yu vinu tsa cuví ndutya yucu vixi uva, nda cuanda coho yu vinu tsa nda nu ndacá ñaha Nyoo quivi tsa yu ndacan —catyí ra Jesús tsihin ra naha.

Nu jacotó ra Jesús tyin cua cahan ra Pedro tyin ña nacotó ra tsi ra
(Mt. 26.30-35; Lc. 22.31-34; Jn. 13.36-38)

²⁶ Tsa ndihí tsita ra naha yaa Nyoo, tan cuahán ra naha yucu yutun Olivo. ²⁷ Tacan tan catyí ra Jesús tsihin tandihí ra naha:

—Tandihí maa ndo tan cua nacoo ihñi ndo tsi yu tsa cuaa vityin tyin catyí nu tutu Nyoo tyehen: “Tandihí mbee ticatyí jana yu cua cuhun tsiyo ti naha ti siin siin ityi tyin cua cahñi yu tsi ra jahá cuenda tsi ti naha ti”, catyí tsi. ²⁸ Maa tyin tsa yaha nandoto yu, jihna ca yu cua cuhun Galilea tsa ndi cumañi ca cuhun nyooho —catyí ra Jesús tsihin ra naha.

²⁹ Tacan tan catyí ra Pedro tsihin ra:

—Vasu ndi maa nacoo ihñi tandihí ra naha tsi un, maa tyin yuhu ña cua nacoo ihñi maa yu tsi un —catyí ra tsihin ra Jesús.

³⁰ Maa tyin ra Jesús catyí ra tsihin ra:

—Tsa nditsa catyí yu tsihin un, tyin tsa cuaa vityin, tsa ndi cumañi ca vacu tsitooho tsa tsinu uvi tsaha, uñi tsaha cua cahan un tyin ña nacotó un tsi yu —catyí ra Jesús tsihin ra Pedro.

³¹ Maa tyin jañiñj ra Pedro tan catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra Pedro.

Tan juvin ñi tacan catyí tandihí ca ra naha.

Nu nyii ra Jesús Getsemaní tsicán tahvi ra tsi Nyoo
(Mt. 26.36-46; Lc. 22.39-46)

³² Tacan tan tsa ra Jesús tan ra tsicá tsihin ra iin nu nañi Getsemaní. Tan catyí ra Jesús tsihin ra naha:

—Ndo ndo ihya tsitsi tsa cuahán yu ndacan cua ndacan tahvi yu tsi Nyoo —catyí ra Jesús.

³³ Tan quihñin ra tsi ra Pedro, ra Jacobo tan ra Juan cuahán tsihin ra. Tan tsa tucuiihya iñi cahnu tsi ra tan tuñu cuñi ra. ³⁴ Tan catyí ra tsihin ra naha:

—Cuiihya xaan cuñi yu; cahñi ña maa tucuiihya iñi ihya tsi yu, cuñi yu. Ndo ndo ihya, tan ña cusu ndo —catyí ra.

³⁵ Tacan tan cuahán ra luxu ca ityi nuu. Tan tsicuiñi tsiti ra nu ñuhu tan tsaquin ra nuu ra nda nu ñuhu. Tan tsicān tahvi ra tsi Nyoo tan catyí ra:

—Tun tsatyin cuvi ña cuhva un nyehe yu tundoho tsa cua nyehe yu —catyí ra tsicān tahvi ra.

³⁶ Tan tsa tsicān tahvi ra, catyí ra:

—Jutu Mañi yu, tsa cuenda yooho nduve tsa ña cuví javaha un. Tun yooho tan cuñi un cuví jatsiyo un tundoho ihya siqui yu. Maa tyin na cuví maa cuhva cuñi maa un, tan ñavin cuhva cuñi maa yu —catyí ra Jesús tsicān tahvi ra.

³⁷ Tacan tan cuahán ra nu nacoq ra tsi uñi ra tsicá tsihin ra. Tsa tsaq ra nu yucú ra naha, nyehe ra tyin quixí ra naha. Tan catyí ra tsihin ra Pedro:

—Simón, ¿a quixí un? ¿Nacuenda ña cunyeē iñi un coo nyito un tsihin yu ndi intuhun hora? ³⁸ Ña cusu ndo; ndacan tahvi ndo tsi Nyoo, tyin tacan tan ña cua javaha ndo cuhva cuñi nu ña vaha. Tsa nditsa tyin añima ndo cuñi xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñi —catyí ra Jesús tsihin ra naha.

³⁹ Tacan tan cuahán nyico ra inga tsaha. Tan tsican tahvi ra tsi Nyoo juvin ñi tsihin tuhun tsa cahan ra tsa jihna ñi. ⁴⁰ Tacan tan tsaq nyico ra inga tsaha, nu yucú ra naha tan nyehe ra tyin quixí nyico ra naha, tyin tsindasí maa tinuu ra naha jahá ñumaahna. Tan ña tsitó ra naha náa nacahan ra naha tsihin ra. Ndi maa ra tan ña cahan ca ra. ⁴¹ Tan cuahán nyico ra. Tsa tsaq ra nu yucú ra naha tsa tsinu uñi tsaha, catyí ra:

—Cusu vaha ndo vityin, tan quitatu ndo tyin tsa cundaq tyiñu. Ra tsa cua cuhva cuenda tsi yu tsi ra xaan iñi tsi yu naha ra tsa vatsí ra tyin tsa tahañ tsi hora tsa cua cuhva cuenda ra tsi yuhu, Rayi tsa quee nda gloria. ⁴² Nduvita ndo, çohon ndo tyin tsa vatsí ra tsa xico tsi yu —catyí ra Jesús tsihin ra naha.

Nu tsaha cuenda ra Judas tsi ra Jesús tsi nu xaan iñi tsi ra nahnu
(Mt. 26.47-56; Lc. 22.47-53; Jn. 18.2-11)

⁴³ Ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra; cuaha xaan nyivi jacuhun ra naha tsihin ra Judas, iin ra tsicá tsihin ra Jesús, tyin tiin ñi tsi ra Jesús. Juhva ñi ndahá mityi tan juhva ñi ndahá yutun. Ndi caahan ca ra Jesús nyaá ra tan tsaq ra Judas tsihin nyivi cuaha can. ⁴⁴ Tsa ndi cumañi ca cuhun ra Judas, ra tsa xico tsi ra Jesús, tsa catyí maa ra tsihin nyivi náa cua javaha ra tan coto ñi ndáa ra cuví ra Jesús. Tan cahan ra tyehen:

—Ra tsa cua tyaa yuhu yu, ra ican cuví ra Jesús tsa cua quihin ndo. Quihin ndo tsi ra tan jaha cuenda vaha ndo coto cunu ra —catyí ra nu quitsi tsi.

⁴⁵ Tsa tsaq ra Judas nu nyii ra Jesús natuhva ra nu nyaá ra tan catyí ra tsihin ra:

—Maestro.

Tan tyaa yuhu ra tsi ra. ⁴⁶ Tacan tan quihin ra naha tsi ra Jesús cuahán tsihin ra naha.

⁴⁷ Maa tyin iin ra nyii tsihin ra Jesús, tava ra mityi ra tan tsahnya ra soho musu ra jutu tsaahnu cuví ityi nuu. ⁴⁸ Tacan tan catyí ra Jesús tsihin ra quihin tsi ra:

—¿A ñasuhu cuví yuhu? tyin vatsí ndo vatsí quihin ndo tsi yu tsihin mityi tan yutun. ⁴⁹ Ndihi quivi tsinyii yu jacuahá yu tsi ndo tsitsi vehe ñuhu cahnu, tan ña quihin ndo tsi yu. Tandihí tsehe cuví tyin tacan tan cundaa tsa catyí nu tutu Nyoo —catyí ra Jesús tsihin ra naha.

⁵⁰ Tacan tan tsinu tandihí ra tsicá tsihin ra, tan ndoq intuhun ña maa ra jahá ra naha. ⁵¹ Maa tyin ndoq intuhun ca ra tyuvaa tan cuahán ra cuanyicún ra tsi ra, ndasi ra tsihin iin ticatyí tan tiin ndihí ra naha tsi ra. ⁵² Maa tyin nacoq ihñi ra ticatyí can tan tsinu tandi ra.

Nu tsicá tuhun ra mandoñi naha ra tsi ra Jesús tun juvin Sehe Nyoo tsi ra
(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Tacan tan tsindaca ra naha tsi ra Jesús tsi ra jutu tsaahnu cuví ityi nuu tan ndu iin tucu tandihí ra jutu cuví ityi nuu naha ra tan ra cuví mandoñi nyivi Israel naha ra, tan ra maestro cuenda ley vehe ñuhu naha ra. ⁵⁴ Ra Pedro

nyicún tsica nyicún tsica ñi ra tsi ra naha cuahán ra. Tan tsaꞗ ra nda nuquehe yuvehe ra jutu tsaahnu cuví ityi nuu can. Tan ndoo ra tuñú ra ñuhu tsihin ra vitya naha ra.

⁵⁵ Ra cuví jutu ityi nuu naha ra, tan tandihí ca ra cumí tyiñu naha ra nducú ra naha cuatyí tyaa ra naha siqui ra Jesús, tyin tacan tan cuví cahñi ra naha tsi ra. Maa tyin ña ñihí maa ra naha cuatyí tyaa ra naha tsi ra. ⁵⁶ Cuaha xaan nyívi cahán cuendu siqui ra, maa tyin ña nacatsí tahan maa tuhun caahán ndi intuhun ñi. ⁵⁷ Yihí ñi nduvitá ñi tan cahán ñi maa ñi maa cuendu siqui ra, tan catyí ñi:

⁵⁸ —Nyuhu tsiñi ndi tsa cahán ra tan catyí ra tyehen: “Yuhu cua cani yu vehe ñuhu cahnu tsa javahá nyívi. Tan cua janduvita yu inga vehe ñuhu tsitsi tsa uñi quívi ñi. Maa tyin ñavin tahan vehe ñuhu tsa javahá nyívi” catyí ra —catyí ñi.

⁵⁹ Vasu ndi maa tacan caahán ñi, maa tyin ña nacatsí tahan maa tsa cahán ñi.

⁶⁰ Tacan tan nduvitá ra jutu tsaahnu cuví ityi nuu mahñu tandihí ra yucú ican naha ra, tan tsicá tuhun ra tsi ra Jesús, tan catyí ra:

—¿A ña cua nacahan un nu caahán nyívi ihya? ¿A nditsa tsa caahán ñi, o ña nditsa? —catyí ra

⁶¹ Maa tyin ña nacahan maa ra Jesús tan nduve maa náa cahán ra. Tacan tan ra jutu tsaahnu cuví ityi nuu tsicá tuhun ra tsi ra inga tsaha, tan catyí ra:

—¿A yooho cuví ra Cristo, Sehe Nyoo ii tsa tsahá tsa vaha?

⁶² Tan ra Jesús catyí ra tsihin ra:

—Juvin. Nyooho cua nyehe ndo tsi yuhu, Rayí tsa quee nda gloria, nyaá yu xiin cuaha Nyoo, ra iyó tandihí tunyee iñi, tan cua nyehe tucu ndo nu quítsi yu nu vico ityi andívi —catyí ra tsihin ra.

⁶³ Tacan tan tsahnya ra jutu tsaahnu cuví ityi nuu jahma ra tumaa iin seña tyin ña taahán iñi ra tsa caahán ra Jesús tyin cuñi maa ra tyin ña vaha tsa caahán ra, tan catyí ra:

—Ña tsiñi ñuhu ca tsa nducu yo tsi ra cuví tsa ndaa. ⁶⁴ Tyin tsa tsiñi maa ndo tsa cahán ra. Tsicoo cuatyí ra nuu Nyoo tsihin tuhun cahán ra. ¿Náa catyí ndo vityin? —catyí ra.

Tacan tan nacahan tandihí ra naha tan catyí ra naha tyin taahán tsi cúu ra.

⁶⁵ Tacan tan quítsahá tiví sii juhva ra naha tsi ra. Tyasi ra naha nuu ra, tan cañi ra naha tsi ra tsihin tsiqui tan catyí ra naha tsihin ra:

—¡Cahan tsihin ndi yóo cañi tsi un! —catyí ra naha tsihin ra.

Tan cañi tucu ra vitya naha ra nuu ra.

*Nu cahán ra Pedro tyin ña nacotó ra tsi ra Jesús
(Mt. 26.69-75; Lc. 22.56-62; Jn. 18.15-18, 25-27)*

⁶⁶ Tsitsi tsa ndi nyíi ra Pedro nuquehe tsata vehe ra jutu tsaahnu cuví ityi nuu, tsaꞗ iin ñaha cuví musu ra jutu can. ⁶⁷ Cuhva tsa nyehe ñaha can tsi ra Pedro nyaá ra tuñú ra ñuhu, quítsahá nyehé xaan ña tsi ra, tan catyí ña tsihin ra:

—Tsicá tucu yooho tsihin ra Jesús, ra ñuu Nazaret can —catyí ña tsihin ra.

⁶⁸ Maa tyin ra Pedro tyihí xeehe ra, tan catyí ra:

—Yuhu ña nacotó yu tsi ra can, tan ndi ña tsitó yu náa caahán un —catyí ra tsihin ña.

Tacan tan quitā ra ityi yuhu cora. Tan tsacu ñi tsitooho. ⁶⁹ Tacan tan ñaha can nanyehē nyico ña nu nyaá ra inga tsaha tan catyí ña tsihin ra nyecú ican naha ra:

—Ra vaha iñi tsi ra can cuví ra ihya —catyí ña.

⁷⁰ Maa tyin tyihí xeehe nyico ra inga tsaha. Tacan tan ña naha ñi tan catyí ra yucú ican naha ra tsihin ra Pedro:

—Nditsa tyin ra vaha iñi tsi ra can cuví yooho, tyin ra Galilea cuví un, tan caahán un tumaa caahán nyivi Galilea —catyí ra naha tsihin ra.

⁷¹ Tacan tan iyo xaan caahán ra Pedro, tan catyí ra:

—¿Tsitó vaha maa Nyoo tyin ña nacotó yu tsi ra tsa caahán ndo tuhun! ¡Na cahñi maa Nyoo tsi yu tun ña nditsa yu tsa caahán yu! —catyí ra.

⁷² Juvín ñi cuhva can navacu tsitooho tsa tsinu uvi tsaha. Tacan tan nducuhun iñi ra Pedro tsa cahan ra Jesús tsihin ra: “Tsa ndi cumañi ca vacu tsitooho uvi tsaha, yooho tsa yahá cahan un uñi tsaha tyin ña nacotó un tsi yu.” Tsa nducuhun iñi ra Pedro tsehe, quitsaha ra tsacú ra.

15

Nu jaqueé yuhu ra Pilato tsi ra Jesús (Mt. 27.1-2, 11-14; Lc. 23.1-5; Jn. 18.28-38)

¹ Tan tsa tuví inga quivi ndu iin ra jutu cuví ityi nuu naha ra tsihin ra mandoñi naha ra tsihin ra maestro cuenda ley vehe ñuhu naha ra, tan tandihi ca ra cumí tyiñu tsa yihí ndaha tsi nyivi Israel. Nuuhñi ñi maa ra Jesús tan tsindaçá ra naha tsi ra nuu ra Pilato. ² Tan tsicá tuhun ra Pilato tsi ra, tan catyí ra:

—¿A juvín un cuví rey nyivi Israel?

Nacahan ra Jesús tan catyí ra:

—Juvín yu, tumaa caahán maa un.

³ Tan cuaha xaan cuendu cahan ra cuví jutu ityi nuu naha ra siqui ra Jesús.

⁴ Tacan tan tsicá tuhun nyico ra Pilato tsi ra inga tsaha, tan catyí ra:

—¿A ña cua nacahan maa un? Nyehe, cuaha xaan cuatyí tyaá ra naha siqui un —catyí ra.

⁵ Maa tyin ra Jesús ña nacahan maa ra. Yacan cuenda ña ñihí ra Pilato náa cahan ra.

Nu tsahá ra Pilato ndatu tsa cúu ra Jesús (Mt. 27.15-31; Lc. 23.13-25; Jn. 18.38—19.16)

⁶ Vico pascua tuhvá ra Pilato nacoó nuña iin ra yucú vehe caa. Tan tavá ra ndáa ra cuñi maa nyivi tyin tava ra. ⁷ Quivi can nyíi iin ra nañi Barrabás vehe caa, tsihin inga ca ra tsahñi nyivi nu cuvaá nyivi siqui ra ndacá ñaha.

⁸ Tan tsahan nyivi tsicahan ñi tsihin ra Pilato na jaña ra iin ra yucú vehe can tumaa tuhvá maa ra javahá. ⁹ Tan nacahan ra Pilato, tan catyí ra:

—¿A cuñi ndo tsa jaña yu tsi ra cuví Rey ndo?

¹⁰ Tacan cahan ra tyin tuví iñi ra tyin tsahá cuenda ra jutu cuví ityi nuu naha ra tsi ra Jesús tsi ra tsa cuenda tsa ndasi cuñi ra naha nyehe ra naha tsi ra tyin cuaha nyivi nyicún tsi ra. ¹¹ Maa tyin ra jutu cuví ityi nuu can naha ra natyuhú ra naha tsi nyivi tsa cahan ñi na tava ra Pilato tsi ra Barrabás vehe caa. ¹² Tacan tan tsicá tuhun ra Pilato tsi ñi, tan catyí ra:

—¿Tun tacan, náa cuñi ndo javaha yu tsihin ra tsa jacunañi ndo Rey cuenda ndo? —catyí ra tsihin ñi.

¹³ Tacan tan caná tsaa ñi, tan catyí ñi:

—¡Tyaa tsi ra nu cruu na cúu ra! —catyí ñi.

¹⁴ Tan catyí ra Pilato tsihin ñi:

—Maa tyin, ¿náa tsa ña vaha javahá ra? —catyí ra.

Ñi ican quitsahá caná tsa nyico ñi tan catyí ñi:

—¡Tyaa tsi ra nu cruu na cúu ra! —catyí ñi.

¹⁵ Tacan tan tsa cuñí ra Pilato ndoo vaha ra nuu nyívi, tavá ra tsi ra Barrabás vehe caa. Tsa yahá tavá ra tsi ra can, tavá tyiñu ra na ndoho ra Jesús. Tsa yahá ndoho ra Jesús, tan tsaahá cuenda ra tsi ra tsi andaru na ticaa ra naha tsi ra nu cruu.

¹⁶ Tacan tan tsindacá ra andaru can naha ra tsi ra nuquehe vehe tyiñu. Tan jandu iin ra naha tandihi ca andaru. ¹⁷ Tan jacunditsí ra naha iin jahma cuaaha tuun tsi ra. Tan javahá ra naha iin corona iñu. Tan tyihí ra naha can jiñi ra. ¹⁸ Tsa yahá yacan tan quitsahá caná tsa ra naha tsata ra tan tsacú nducu ra naha tsi ra, tan catyí ra naha:

—¡Nacumi tsi un, yooho Rey nyívi Israel! —catyí ra naha.

¹⁹ Tan cañi ra naha jiñi ra tsihin yutun, tan tiví sii ra naha tsi ra. Tan tsicuiñi tsiti ra naha nuu ra jahá ra naha tyin jacahnú ra naha tsi ra. ²⁰ Tsa yahá tsacú nducu ra naha tsi ra, tavá ra naha jahma cuaaha tuun tsa jacunditsí ra naha tsi ra. Tacan tan jacunditsí nyico ra naha jahma maa ra tsi ra. Tan cuahán ra naha tsihin ra cuaticáa ra naha tsi ra nu cruu.

*Nu tyaa ra naha tsi ra Jesús nu cruu
(Mt. 27.32-44; Lc. 23.26-43; Jn. 19.17-27)*

²¹ Ityi cuahán ra naha tahan ra naha iin ra ñuu Cirene tsa nañi Simón. Tan cuví ra jutu ra Alejandro tan ra Rufo. Ndi vatsí nuhu ra quee ra cuhu. Cuhva tsa cua yaha ra, jañiñi ra andaru naha ra tsi ra na cuiso ra cruu ra Jesús.

²² Tan tsindacá ra naha tsi ra Jesús iin nu nañi Gólgota, tan cuñí tsi catyí Yiquí Jiñi Ndiyí. ²³ Tan ican jacoho ra naha vinu sacá nuu tsihin numeri tsa nañi mirra tsi ra. Maa tyin ra Jesús ña cuñi ra coho ra can. ²⁴ Tsa yahá tyaa ra andaru naha ra tsi ra nu cruu, quihñ ra naha jahma ra tan tavá cuenda ra naha tyin cuñi ra naha coto ra naha yoo cua jaha canaa intuhun intuhun jahma can.

²⁵ Tyaa ra naha tsi ra nu cruu caa iin tsa tuvi. ²⁶ Tan letra tsa tyaa ra naha jiñi cruu ra, catyí tsi nacuenda cua cúu ra. Tan catyí tsi tyehen: “Ra ihya cuví Rey nyívi Israel.” ²⁷ Tan tyaa ndihi ra naha uvi taahan ñasuhu tsihin ra. Iin iin ra naha tsa iin nu cruu. Iin ra xiin cuaha ra, tan inga ra xiin satyin ra. ²⁸ Tacan cuví tan cundaá cuhva catyí nu tutu Nyoo tyehen: “Javahá nyívi tsihin ra tumaa javahá ñi tsihin ra caquiñi.” ²⁹ Tan nyívi yahá ican jacuñi nyaa ñi tsi ra, tan javicó ñi jiñi ñi tsa tsacú nducu ñi tsi ra, tan catyí ñi:

—¡Jaan! ¡Yooho tsa cahán tyin cua caní un vehe ñuhu cahnu, tan tsitsi tsa uñi quívi cua janduvaha nyico un itsi, ³⁰ jacacu tsi un vityin tan nuu nu cruu juven! —catyí ñi.

³¹ Tan juven ñi tacan tsacú nducu tucu ra jutu cuví ityi nuu naha ra tsi ra tan ra maestro cuenda ley vehe ñuhu naha ra, tan natuhun tahan ra naha tan catyí ra naha:

—¡Jacacú ra tsi inga ca nyívi, maa tyin ña cuví jacacu ra tsi maa ra! ³² Tun nuu ra nu cruu vityin nyehe yo, tacan tan cua tsinu iñi yo tyin juven ra cuví ra Cristo, Rey cuenda yo tsa cuví yo nyívi Israel —catyí ra naha.

Tan nda cuanda nu ñasuhu tsa ticaá nu cruu nduvi tsiyo xiin ra tan tsacú nducu ndihi nahnu tsi ra.

*Nu tsihi ra Jesús**(Mt. 27.45-56; Lc. 23.44-49; Jn. 19.28-30)*

³³ Cuhva tsa cua tahan hora, ndunaq nanii cahnu nda cuanda caa uñi tsa tseñi. ³⁴ Tan juvin ñi cuhva can cana tsaa ra Jesús tsihin tandihi tunyee iñi ra, tan catyí ra:

—Eloi, Eloi, ¿lama sabactani? —tan cuñi tsi catyí: Nyoo Jutu yu, Nyoo Jutu yu, ¿nacuenda nacoq ihñi un tsi yu? —catyí ra.

³⁵ Juhva ra yucú ican naha ra tsiñi ra naha tsa cañan ra tan catyí ra naha: —¿jihna ndo! Caná tsaa ra tsi ra Elías, ra cuvi ndusu yuhu Nyoo tahan tsanaha —catyí ra naha.

³⁶ Tacan tan tsinú xaan iin ra tsiquihin ra iin yahma tsa caá tumaa caá catyí, tan jatyií ra can tsihin vinu íya. Tan tyaá ra can iin nu yutun tan jatuhva ra yuhu ra Jesús tyin coho ra vinu can, tan catyí ra:

—Na cuatu nuu yo. Nyehe yo tun quitsi ra Elías januu ra tsi ra nu cruu can —catyí ra.

³⁷ Tacan tan ñihi xaan cana tsaa ra Jesús, tan tsihi ra. ³⁸ Tan jahma tsa ticaá tsitsi vehe ñuhu cahnu ndatá sava tsi, nda siqui tan nda cuanda ityi tsaha.

³⁹ Tan ra capitán tsa yihí ndaha andaru tsa nyaá yatyin ñi nu ticaá ra Jesús nyehe ra nácaa cana tsaa ra, tan nácaa tsihi ra, tacan tan catyí ra:

—Nditsa nditsa cuí tyin Sehe Nyoo tsi ra ihya —catyí ra.

⁴⁰ Tan ndasava ñi nyecú tucu juhva ñiñaha nyehé ñi. Tan mahñu ñi can nyii ña María tsa quee ñuu Magdala, tan ña María sihi ra José tan ra Jacobo ra tyuvaa ca. Tan nyii tucu ña Salomé. ⁴¹ Ñiñaha ihya tsinyicun ñi tsi ra Jesús, tan jatyinyee ñi tsi ra quivi tsicá nuu ra ityi Galilea. Tan yucú cuaha tucu ñiñaha inga ñuu tsa tsaa tsihin ra ñuu Jerusalén ican.

*Nu tsicutsi ra naha tsi ra Jesús**(Mt. 27.57-61; Lc. 23.50-56; Jn. 19.38-42)*

⁴² Quivi tsa tuhvá nyivi janduvaha tsa catsi ñi cuenda inga quivi tuhvá ñi quitatu, juvin ñi tseñi can ⁴³ tsaa ra José ra ñuu Arimatea nu nyii ra Pilato. Ra José can cuvi ra iin ra nyisó tyiñu cahnu vehe tyiñu, tan ndatu tucu maa ra tsi ra tsa cua jaquitsi Nyoo tyin cundaca ñaha nu ñuhu ñayivi. Ña nayuhvi ra tan tsahan ra tsindacñan ra cuñu ñuhu ra Jesús tsi ra Pilato. ⁴⁴ Tsa tsito ra Pilato tyin tsa yaha tsihi ra Jesús, iyo xaan cuñi ra. Tacan tan cana ra tsi iin capitán tan tsicá tuhun ra tsi ra tun nditsa tyin tsa tsihi ra Jesús. ⁴⁵ Tan tsa tsito vaha ra Pilato tyin tsa yaha tsihi ra Jesús, tava tyiñu ra na cuhva ra andaru naha ra cuñu ñuhu ra tsi ra José. ⁴⁶ Tacan tan tsijata ra José iin jahma cuitsin tsa tsinu tsihin jahma vaha tsa nañi linu, tan januu ra cuñu ñuhu ra Jesús nu cruu. Yaha can tan cava nuu ra jahma can cuñu ñuhu ra. Tacan tan tyihí ra cuñu ñuhu ra tsitsi iin ñaña tsa nyaá nduhava tsitsi iin cava. Tan tyasi ra yuhu ñaña can tsihin iin yuu cahnu. ⁴⁷ Tan ña María, tsa quee ñuu Magdala, tan ña María, sihi ra José, tsahan ñi, tsinyehe ñi nu tinyii ra José can cuñu ñuhu ra Jesús.

16*Nu nandoto ra Jesús**(Mt. 28.1-10; Lc. 24.1-12; Jn. 20.1-10)*

¹ Tsa yaha quivi quitatu nyivi, ña María ñuu Magdala, tan ña María sihi ra Jacobo, tan ña Salomé jata ñi ndutya tami tyin cuñi ñi cuhun ñi cutyihí ñi can cuñu ñuhu ra Jesús. ² Tacan tan cuahán ñi nu nyaá ñaña ra tsa cunditsin cuí

ñi quiví quitsahá vitya. Tan tsaá ñi ican cuhva tsa cua caná cuii ñi ñicanyii.

³ Tan ityi cuahán ñi natuhun tahan ñi tan catyí ñi:

—¿Yoo cua jatsiyo yuu yuhu ñaña can? —catyí ñi.

⁴ Maa tyin cuhva tsa tsaá ñi nyehe ñi tyin tsa catsiyo yuu cahnu tsa ndasí yuhu ñaña can. ⁵ Tan cuhva tsa quihví ñi tsitsi cava nu nyaá ñaña can, nyehe ñi nyaá iin ángel tsiyo cuaha. Tan caá ra tumaa caá iin ra tyuvaa. Ndsítí ra jahna cuitsin cañi. Tan nayuhví xaan ñi. ⁶ Maa tyin catyí ra tsihin ñi:

—Ña nayuhvi ndo. Tsitó yu tyin nanducú ndo tsi ra Jesús, ra ñuu Nazaret, ra tsa tsihí nu cruu. Maa tyin nduve ca ra nyí ihya vityin tyin tsa nandoto ra. Nyehe ndo nu tinyí ra naha tsi ra. ⁷ Cuaahan ndo tan jacoto ndo tsi ra Pedro tan tsi inga ca ra tsicá tsihin ra Jesús. Tan catyí ndo tsihin ra naha tyin tsa cuahán ra Galilea tan cua cuatu ra tsi ra naha ndacan, tumaa catyí maa ra tsihin ra naha tsa ndi cumañi ca cúu ra —catyí ángel can tsihin ñi.

⁸ Tacan tan tsinú xaan ñi cuahán ñi, tyin nihí ñi jahá tsa yuuhví ñi. Tan ña cahán maa ñi tsa cahan ñi tsihin ndi intuhun maa nyivi tyin yuuhví xaan ñi.

Nu quituví ra Jesús nuu ña María quee ñuu Magdala
(Jn. 20.11-18)

⁹ Ra Jesús nandoto ra quiví quitsahá vitya. Tan quituví ra jihna cuii ca nuu ña María ñuu Magdala. Juvín ña cuví ña tsa tavá ra utsa tatyí ña vaha.

¹⁰ Tsañan ña tsijacoto ña tsi ra tsicá tsihin ra, tyin yucú ra naha tsihin tucuihya iñi tan tsacú ra naha. ¹¹ Maa tyin cuhva tsa tsiñi ra naha tyin nyito ra Jesús tan nyehe ña tsi ra, ña tsinu iñi ra naha.

Nu quituví ra Jesús nuu uvi ra tsicá tsihin ra
(Lc. 24.13-35)

¹² Tsa yaha yacan, tan quituví ra Jesús nuu uvi ra tsa cuahán ityi cuhu naha ra. Maa tyin sin cuhva caá ra nyehe ra naha. ¹³ Tan tsinuhu ra naha tsijacoto ra naha tsi tandihí ca ra naha. Maa tyin juvín ñi ña tsinu iñi ra naha tsa cahán ra can naha ra.

Nu tsañá ra Jesús tyiñu tsi ra tsa tsicá tsihin ra
(Mt. 28.16-20; Lc. 24.36-49; Jn. 20.19-23)

¹⁴ Yaha yacan tan quituví ra Jesús nuu tandihí tsa utsi iin ra tsa tsicá tsihin ra, tsitsi tsa nyecú ra naha nu mesa. Tan cuxaan ra tsi ra naha tsa cuenda tsa ña tsinu iñi ra naha, tan tsa cuenda tucu tsa ndava añima ra naha tan ña tsinu iñi ra naha tsa cahán nyivi tsa nyehe tsi ra tsa yaha nandoto ra. ¹⁵ Tan catyí ra tsihin ra naha:

—Cuaahan ndo naní cahnu nu ñuhu ñayivi, tan cahán ndo tuhun Nyoo tsihin tandihí nyivi, tan catyí ndo tsihin ñi nácaa jacacú Nyoo tsi ñi. ¹⁶ Tan nyivi tsa cua tsinu iñi tan coondutya ñi, cua cacu ñi. Maa tyin ñi tsa ña cua tsinu iñi cua ndoo cuatyí ñi siqui ñi tan cua cunaa ñi. ¹⁷ Tan tandihí tsa iyo ihya cua javaha nyivi tsa cua tsinu iñi tsi yu: Tsihin sivi yu cua tava ñi tatyí ña vaha, tan cua cahan ñi inga yuhu tsa ña tuhvá ñi cahan. ¹⁸ Cua tñin ñi coo, tan tatun coho ñi o catsi ñi tsa yihí venenu, ña cua jacuehe can tsi ñi. Cua tyiso ndaha ñi jiñi nyivi cuuhví, tan cua nduvaha nyivi.

Nu ndaa ra Jesús andivi
(Lc. 24.50-53)

¹⁹ Tsa ndihí cahán Jutu Mañi yo Jesús tsihin ra naha, tacan tan ndaa ra andivi, tan tsinyaa ra xiin cuaha Nyoo. ²⁰ Tacan tan ra tsicá tsihin ra quita ra naha tan tsañan ra naha tandihí ñi ityi tsicahán ra naha tuhun Nyoo nácaa

jacacú ra tsi yo. Juvín ñi maa Jutu Mañi yo jatyinyee tsi ra naha tyin tsaha ra tsa javaha ra naha cuaha tsa iyo. Tan tsihin yacan nyehe nyivi tyin nditsa tsa caahán ra naha.

Tan na cuvi tsi tacan ñi.

Tuhun Nyoo Tsa Tyaa Ra Lucas

Nu quitsahaq jacotó ra Lucas tuhun ra Cristo tsi ra Teófilo

¹ Cuaha ñi nyivi nducu ñi cuhva tyaa ñi nuu tutu tandihi tsa cuvı nu yucu ndi ihya. Tyaa ñi cuhva ² nacatyı tuhun nyivi tsihin yo, ñi tsa nyehe tan cahān tuhun ra Jesús nda quivi jihna ñi. ³ Tan yuhu tucu tsa yahā cahvi yu tan nducu tuhun vaha yu tandihi tsa cuvı nda nu quitsahaq. Yacan cuenda cuñi yu tyaa yu tuhun ihya tsa cuenda un, yooho Teófilo, nda nu quitsahaq tan nda nu ndihi. ⁴ Tyin tacan tan coto un tyin nditsa tsa jacuahā nyivi tsi un.

Nu jacotó iin ángel tsi ra Zacarías ama cua cacu ra Juan, ra cua jacoondutya tsi nyivi

⁵ Quivi tsa cuvı ra Herodes rey taniı cahnu cuenda Judea, tsicoq iin ra cuvı jutu, nañi ra Zacarías. Tan yihı ra cuenda ra cuvı jutu naha ra tsa nañi Abías. Tan ñasihi ra nañi ña Elisabet. Tata ra Aarón, ra cuvı jutu tahān tsanaha, cuvı ña. ⁶ Tan nduve maa cuatyı ñi nuu Nyoo. Tyin vaha xaan tyaa yahvi ñi tuhun caahān Nyoo Jutu yo. Tan yoñi maa cuvı tyaa cuatyı tsi ñi. ⁷ Tan nduve maa sehe ñi tsicoq. Tyin ña Elisabet, ña cuvı coo sehe ña. Tan tsa tsahnu xaan nduvi taahan ñi.

⁸ Iin quivi taahān tsi tandihi ra jutu tsa cutahan tsihin ra Zacarías, tsa jaha tyiñu ra naha tyiñu Nyoo. ⁹ Tan cuhva iyó maa ra cuvı jutu naha ra, tava ra naha suerte, ndaa ra cua tahan tsi quihvi tsitsi vehe ñuhu Jutu Nyoo, tyin cahmi ra cutu. Quivi can tahān tsi tsi ra Zacarías. ¹⁰ Tan cuaha nyivi yucu ityi tsata vehe ñuhu tsicán tahvi ñi tsi Nyoo, tsitsi tsa tsahmi ra cutu can. ¹¹ Tan tsitsi tsa ndi nyiı ra ican tan quituvı iin ángel Jutu Nyoo nu nyiı ra. Tan nyaá nyityi ángel can ityi xiin cuaha nu nyaá altar nu tsahmi ra cutu. ¹² Tan tsa nyehe ra Zacarías tsi ángel ican, iyo xaan cuñi ra. Tan nayuhvi xaan ra. ¹³ Tan ángel ican catyı ra tsihin ra:

—Zacarías, ña nayuhvi un. Tyin Nyoo tsiñj ra tsa cahān un tsihin ra. Tan cua coo iin sehe ña Elisabet ñasihi un. Tan cua cunañi ra Juan. ¹⁴ Sii xaan cua cuñi un. Tan cuaha xaan nyivi cua cusii ndihi iñi quivi cua cacu ra. ¹⁵ Tyin sehe un, cahnu xaan cua cuvı ra nuu Nyoo Jutu yo. Ña cua coho ra vinu tan ndi nyixi. Tan ñihi xaan cua quihı Tatyı İ Nyoo tsi ra tsa ndi cumañi ca cacu ra tan tandihi tyembu tsa cua coo ra. ¹⁶ Tan cuaha xaan nyivi Israel cua cunyicun ñi tsi Jutu yo Nyoo jaha ra. ¹⁷ Juvın ra cua cuhun ityi nuu Jutu Mañi yo. Tan cua coo tunyee iñi Nyoo tsi ra. Tan cua quihı xaan Tatyı İ Nyoo tsi ra. Tyin cua cuvı ra tumaa ra Elías, ra cuvı ndusu yuhu Nyoo tahān tsanaha. Tan cua cuhva cuenda ra nácaa coo vaha nyivi iyó sehe tsihin sehe ñi. Tan cua janaha ra tsi nyivi caquiñi, na tyaa yahvi ñi tuhun caahān Nyoo. Tacan cua janduvaha ra tsi nyivi tan cua cuatu vaha ñi tsi Nyoo —catyı ángel tsihin ra Zacarías.

¹⁸ Tan tsicā tuhun ra Zacarías tsi ángel can, tan catyı ra:

—¿Nacaa tan coto yu tyin nditsa tsa cua coo sehe ñasihi yu? Tyin yuhu tsa tsahnu xaan yu. Tan tacan tucu ñasihi yu —catyı ra.

¹⁹ Tan ángel can nacahān ra tan catyı ra:

—Yuhu Gabriel nañi yu. Tan tsicá yu tyiñu Nyoo. Maa ra tava tyiñu tsi yu tyin jacoto yu tyiñu ihya tsi un tan jacoto yu tuhun vaha ihya tsi un. ²⁰ Tan

vityin cua nduñhi un. Tyin ña tsinú iñi un tsa caahán yu tsihin un. Tan ña cua cuví cahan un nda cuanda tsa yaha cacu sehe ñasiihi un. Tan nda quivi cundaa tandihi tsa cahan yu tsihin un —catyí ángel ican tsihin ra.

²¹ Tan nyivi tsa ndatú tsi ra Zacarías ityi tsata vehe ñuhu, iyo xaan cuñí ñi tyin cucuee xaan ra tsitsi vehe ñuhu can. ²² Tan cuhva tsa quita ra Zacarías, ña cuví maa cahan ra tsihin ñi. Tan tuví iñi ñi tyin iyó tsa nyehe ra tsitsi vehe ñuhu can. Tacan tan quitsaha caahán ra tsihin ñi tsihin ndaha ra. Tyin ña cuví cahan ra.

²³ Tan quivi ndihi tyiñu jahá ra Zacarías vehe ñuhu can, tan cuanuhu ra yuvehe ra. ²⁴ Tsa yaha quivi can tan tsihuhun sehe ñasiihi ra, ña Elisabet. Tan ña quita maa ña tsata vehe tsa tandihi tsa uhun yoo. Tan tsicá iñi ña: ²⁵ “Tyeheñ javaha Jutu Mañi yu tsihin yu, tyin tacan tan ña cahan nyaa ca nyivi tsi yu”, cuñí ña tsicá iñi ña.

Nu jacoto in ángel tsi ña María tyin cua cacu ra Jesús

²⁶ Tsa quita iñu yoo tsa ñuhú sehe ña Elisabet, tan jacuhun Nyoo tsi ra ángel Gabriel ñuu Nazaret tsa canyií Galilea. ²⁷ Tyin cahan ra tsihin iin ñaha yoco tsa nañí María. Tan tsa nyaá maa tsa cua tindaha ña tsihin ra nañí José, ra cuví tata ra rey David. ²⁸ Tan quihvi ángel ican nu iyó ña María. Tan catyí ra tsihin ña:

—Nacumi tsi un, María. Ñihí un tumañi iñi nuu Nyoo. Maa ra iyó tsihin un. Tan nasocó xaan ca ra tsi un tan ñavin ca tandihi ca ñaha —catyí ángel ican tsihin ña.

²⁹ Tan tsa tsiñi ña tsa cahan ra, iyo xaan cuñí ña tsa cahan ra. Tan tsicá iñi ña: “¿Nacuenta tacan caahán ra ihya nacumi tsi yo?” tsicá iñi ña.

³⁰ Tan catyí ángel ican:

—Ña ngayhvi un, María, tyin ñihí un tumañi iñi Nyoo. ³¹ Vityin cua cuhun sehe un. Tan cua cunañi ra Jesús. ³² Cahnu xaan ra cua cuví ra. Tan Sehe Nyoo cahnua cua cuví ra. Tan cua cuví ra rey jaha Nyoo Jutu yo, tumaá cuví ra David, tsi tsaahnu ra. ³³ Tyin cua cundaca ñaha ra tsi nyivi Israel tandihi maa tyambu. Tan ña cua ndihi maa tsa cundaca ñaha ra —catyí ángel can tsihin ña.

³⁴ Tacan tan tsicá tuhun ña María tsi ángel, tan catyí ña:

—¿Nacaa cua cuví can? Tyin yuhu, ñaha ca coo yi yu.

³⁵ Tan nacahan ángel tan catyí ra:

—Maa Tatyí Ii Nyoo cua quitsi siqui un. Tan tunyee iñi Nyoo, ra nyaá gloria, cua quitsi tan cua casi tsi siqui un tumaa iin vico. Yacan cuenda Ra Ii tsa cua cacu cua cunañi ra Sehe Nyoo. ³⁶ Tacan tucu ña Elisabet ña tsatsin un cua cacu iin sehe ña vasu tsa tsahnu ña. Tan catyí nyivi tyin ñaha can ña cuví coo sehe ña. Maa tyin vityin tsa ñuhú sehe ña. Tsa iñu yoo tsa ñuhú sehe ña. ³⁷ Tyin Nyoo nduve tsa ña cuví jaha ra —catyí ángel tsihin ña.

³⁸ Tan catyí ña María:

—Yuhu cuví yu musu Jutu Mañi yo. Na javaha maa ra cuhva catyí un —catyí ña.

Tacan tan cuahán ángel can.

Nu cuahán ña María cuanyehé ña nu nyii ña Elisabet

³⁹ Tan iin quivi can, numi ñi cuahán ña María iin ñuu tsa canyií Judea nu maa ñi maa yucu iyó. ⁴⁰ Tan quihvi ña tsitsi vehe ra Zacarías. Tan nacuhva ña nacumi tsi ña Elisabet. ⁴¹ Tan tsa tsiñi ña Elisabet tsa cahan ña María, tan

natuñu sehe ña tsitsi ña. Tan ñihi nyaá Tatyí Ii Nyoo tsihin ña. ⁴² Tan ñihi xaan nacahan ña, tan catyí ña:

—Nyoo nasocó xaan ra tsi un, María, tan ñavin ca tandihi ca ñiñaha. Tan nasocó ra tsi sehe un. ⁴³ ¿Tan yóo cuví yuhu? Tyin quítsj sihi Jutu Mañi yu quítsj nyehe ña nu nyaá yu. ⁴⁴ Cuhva tsa tsiñi yu tsa cahan un, tan natuñu sehe yu tsitsi yu. Tyin sii xaan cuñí ra. ⁴⁵ Tan sii xaan cuñí tucu maa añima un tyin tsinú iñi un. Tyin cua cuví kuhva tsa cahan Nyoo tsihin un —catyí ña Elisabet.

⁴⁶ Tan catyí ña María:

—Jacahnú yu tsi Nyoo tsihin tandihi añima yu.

⁴⁷ Tan sii xaan cuñí añima yu tsihin Nyoo ra jacacú tsi yu.

⁴⁸ Tyin cuví yuhu iin ñaha ndaahvi tan Nyoo nyehe ndaahvi ra tsi yu. Tan vityin tandihi quivi cua cahan nyivi tyin cahnu xaan tumañi iñi ñihí yu.

⁴⁹ Tyin Nyoo, cahnu xaan cuví ra. Tan cahnu tsa javahá ra tsihin yu.

Tan ii xaan sivi ra.

⁵⁰ Tan ndaahvi cuñí ra tsihin tandihi nyivi tsa cua coo tan tyaa yahvi ñi tsi ra.

⁵¹ Cahnu xaan tsa javahá ra tsihin tunyee iñi tsa iyó tsi ra.

Jatsiyó ra tsi nyivi tsa cahnu xaan tsicá iñi ñi.

⁵² Quinyaá ra tunyee iñi iyó tsi nu cuví rey.

Tan cua janducahnu ra tsi nyivi ndaahvi.

⁵³ Tshá Nyoo tsa vaha tsi nyivi cuñí coto tsa vaha.

Tan nyivi cuca tsa cuñí tyin nduve tsa tsiñi ñuhu tsi ñi, tsihin ndaha ndi ñi, jacuhún ra tsi ñi.

⁵⁴ Jatyinyeé ra tsi nyivi Israel tsa cuví ñi musu ra.

Tan ña naá iñi ra tsi ñi. Nyehé ndaahvi ra tsi ñi.

⁵⁵ Tumaa kuhva catyí Nyoo tsihin ra Abraham, tsi tsaahnu yo, tan tsihin sehe ra, tacan ñi javahá maa Nyoo —catyí ña María.

⁵⁶ Tan ña María ndoo ña tsihin ña Elisabet uñi yoo. Tan tsa yahá uñi yoo can tan cuanuhú ña nda yuvehe ña.

Quivi cacu ra Juan, ra tsa jacoondutyá tsi nyivi

⁵⁷ Tsa tsaá quivi tsa cacu sehe ña Elisabet, jacacu ña iin rayii. ⁵⁸ Tan nyivi vehe ña tsihin nyivi tsa iyó yatyin ñi yuvehe ña, sii xaan cuñí ñi. Tacan tucu maa ña. Tyin vaha xaan tsa javahá Nyoo tsihin ña. ⁵⁹ Tan tsa quitá una quivi tsa cacu ra, tan tyaa ra naha tuñi Nyoo tsi ra tumaa kuhva iyó maa ñi. Tan cuñí ra naha tsa cunañi ra Zacarías tumaa nañi maa jutu ra. ⁶⁰ Maa tyin sihi ra catyí ña:

—Ña cuví. Tyin Juan cua cunañi ra.

⁶¹ Tan catyí ra naha:

—¿Nacuenda jacunañi un Juan tsi ra? Tan yoñi nyivi ndo nañi tacan —catyí ra naha.

⁶² Tan quítsaha tsicá tuhun ra naha tsihin ndaha ra naha tsi jutu ra. Tyin coto ra naha náa sivi cuñí ra tsa cunañi ra. ⁶³ Tan tsicán jutu ra iin vitu, tan nuu vitu ican tyaa ra: “Juan cua cunañi ra”, tyaa ra.

Tan tandihi maa ra ican naha ra iyo xaan cuñí ra naha tsa tacan. ⁶⁴ Juvín ñi maa hora can nacahan ra Zacarías. Tan quítsaha jacahnú ra tsi Nyoo. ⁶⁵ Tan tandihi maa nyivi iyó yatyin yuvehe ñi, iyo xaan cuñí ñi cuví. Tan tandihi maa nyivi tsa iyó yucu iyó Judea ican nacatyí tuhun tahan ñi tsa cuví can. ⁶⁶ Tan tandihi maa nyivi tsa tsitó can, tsicá iñi ñi, tan tsicá tuhun tahan ñi tsi ñi:

—¿Yóo ra cua cuvi ra lee ihya? —catyí ñi.
Tyin nditsa, Nyoo nasocó xaan ra tsi ra.

Nu jacahnü ra Zacarías tsi Nyoo

⁶⁷ Ra Zacarías jutu ra Juan, ñihi nyaá Tatyí Ii Nyoo tsihin ra. Tan tsaḥa cuenda ra tsa caahán Nyoo tsihin ra, tan catyí ra:

⁶⁸—Cahnu xaan ra cuví Jutu yo Nyoo cuenda yo nyívi Israel.

Tyin quítsi ra nu yucú yo, tsa cuví yo nyívi maa ra. Tan jacacú ra tsi yo.

⁶⁹ Tan tsaḥa ra iin ra tsa cahnu xaan cuví tsi yo, ra cua jacacu tsi yo.

Tata ra David, ra tsa cuví musu Nyoo cuvi ra.

⁷⁰ Tacan cua javaha ra, catyí Nyoo taḥan tsanaha, quívi caḥan ra cuví ndusu yuhu ra, tan catyí ra naha tyehen:

⁷¹ Cua jacacu Nyoo tsi yo ndaha nu xaan iñi tsi yo, tan nuu tandihi nu tsa ndasi cuñí nyehe tsi yo.

⁷² Tan cua cundaahvi iñi ra nyehe ra tsi nyívi yo tsa tsicoo taḥan tsanaha.

Tan cua nducuhun iñi ra tsa caḥan ra tsihin ñi taḥan tsanaha.

⁷³ Caḥan maa Nyoo tsihin ra Abraham, tsii tsaahnu yo,

⁷⁴ tan catyí ra tyin cua jacacu ra tsi yo ndaha nu xaan iñi tsi yo.

Tyin ña cua nayuhvi ca yo jacahnü yo tsi ra.

⁷⁵ Tan maa ra cua janaha ra cuhva coo yo.

Tan vaha cua coo yo nuu ra tan coo yo maa ñi tsa cuenda maa ra tandihi quívi tsa cua coo yo ñayívi —catyí ra Zacarías.

⁷⁶ Tan catyí ra Zacarías tsihin lee can:

—Sehe luhlu yu, yooho cua cuvi un ndusu yuhu Nyoo, ra nyaá gloria.

Tyin cuhun un ityi nuu Jutu Mañi yo. Tan cua cahan un tuhun ra tsihin nyívi tyin tsa cuñí quítsi ra.

⁷⁷ Tan cua jacoto un tsi nyívi tyin cua jaha Nyoo tucahnu iñi tsi ñi.

Tacan tan cacu añima ñi.

⁷⁸ Tyin Jutu yo Nyoo cuñí ra tsi yo. Tan cundaahvi xaan iñi ra tsi yo.

Tan cua jaquitsi ra iin ra jatyinyee tsi yo. Tan cuvi ra tumaa ñuhú ñicanyii.

⁷⁹ Tyin cua janaha ra ñuhü nditsin nu iyó nyívi nu naa, nu ndatú tuhun tsiihí tsi ñi.

Cua janaha ra ityi ra tsi yo, ityi vaha —catyí ra Zacarías.

⁸⁰ Tan ra luhlu can cua cuahnu ca ra. Ñihi xaan tsicoo tunyee iñi tsi ra tsihin Tatyí Ii Nyoo. Tan tsicoo ra iin tsiquí ndi nda cuanda quívi tsa nacoto nyívi Israel tsi ra.

2

Quívi cacu ra Jesús (Mt. 1.18-25)

¹ Quívi ican tsicoo iin ra ndacá ñaha, ra cuví rey cahnu, nañi ra Augusto. Tava tyiñu ra tsi ra nyisó tyiñu naha ra na tyaa ra naha sívi tandihi nyívi taniñi cahnu ñuu ñayívi. ² Ihya cuví tsa jihna ñi tsinyaa sívi nyívi. Tan ra Cirenio cuví ra ra ndacá ñaha tandihi ñuu nu cuví Siria. ³ Tan tandihi nyívi cuanuhü ñi ñuu ñi, tyin cua ndaca ñi sívi ñi. ⁴ Yacan quee ra José ñuu Nazaret tsa canyii Galilea. Tan cuahán ra ñuu Belén tsa canyii Judea, nu cacu ra rey David, tyin tata ra David cuví ra. ⁵ Cuahán ra cuandacá ra sívi ra tsihin ña María, tan tsa nyaá maa tsa cua tindaha ñi. Tan ñuhú sehe ña. ⁶ Tan tsa ndi yucú ca ñi ñuu Belén ican tan quítsahá cuuhvi tsitsi ña tyin tsa cua cacu sehe ña. ⁷ Tan ican cacu sehe nuu ña. Tan cava nuu ña jahma tsi ra. Tan nacaquin ña tsi ra tsitsi iin canuva nu tsatsi quiti itya. Tyin ña ñihí ñi iin vehe coo ñi.

Cuhva cahān ángel tsihin ra jahá cuenda mbee

⁸Yatyin ñi ñuu Belén can yucú ra jahá cuenda mbee tsa tsacuaa. ⁹Tan sana iñi ra naha quituvj iin ángel Nyoo. Tan jandunditsin Jutu yo Nyoo tanñi cahnu nu yucú ra naha. Tan nayuhvj xaan ra naha.

¹⁰—Ñā nayuhvi ndo —catyí ángel can—. Tyin vatsí cahan yu iin tsa vaha xaan tsihin ndo. Si xaan cua cuñi tandihí cuii maa nyivi tsa cuenda tsi. ¹¹Vityin nda ñuu ra David cacú iin ra cua jacacu tsi nyivi. Cuví ra Cristo, ra cuví Jutu Mañi yo. ¹²Tan tsihin cuhva ihya cua nacoto ndo tsi ra: cua nañihi ndo tsi ra lee ican, cavá nuu ra jahma tan canyí ra tsitsi iin canuva nu tsatsi quití —catyí ángel can tsihin ra jahá cuenda mbee can.

¹³Tan juvin ñi cuhva ican quituvj cuaha xaan ángel tsihin ángel can, tan jacahnú xaan ra naha tsi Nyoo, tan catyí ra naha:

¹⁴Cahnu xaan cuví Nyoo, ra nyaá gloria.

Tan nu ñuhu ñayivi, na coo tsa vaha añima nyivi tsa ñihí tumañi iñi Nyoo, catyí ra ángel naha ra.

¹⁵Tacan tan tsa cuanuhú ángel ican nda gloria. Tan catyí iin tan inga ra jahá cuenda mbee can naha ra:

—Cohon ndo Belén. Cunehe yo náa cuví. Tyin maa Jutu yo Nyoo jacotó tsi yo —catyí ra naha.

¹⁶Tacan tan numi xaan cuahán ra naha, tan nañihí ra naha tsi ra lee can tsihin ña María tan tsihin ra José. Tan canyí ra lee can tsitsi iin canuva nu tsatsí quití itya. ¹⁷Tan cuhva tsa nyehe ra naha tsi ra, quitsahá natuhún ra naha tandihí tuhun cahān ángel tsihin ra naha tsa cuenda lee ican tsihin ñi. ¹⁸Tan tandihí nyivi tsa tsiñi tuhun caahán ra naha, iyo xaan cuñi ñi. ¹⁹Maa tyin ña María naquihin cuenda ña tuhun ican tsitsi añima ña, tan tandihí tuhun ican tsicá iñi ña. ²⁰Tan cuanuhú ra jahá cuenda mbee ican naha ra. Tan jacahnú xaan ra naha tsi Nyoo tsa cuenda tandihí tsa nyehe ra naha tan tsa tsiñi ra naha. Tyin cundaá cuhva tsa catyí ángel ican tsihin ra naha.

Nu tyaa cuenda ñi tsi ra Jesús ndaha Nyoo tsitsi vehe ñuhu cahnu

²¹Tsa ndu uná quivi ra Jesús, tan tyaa ñi tuñi Nyoo tsi ra tyin tacan catyí tuhun tsahnu maa ñi. Tan jacunañi ñi Jesús tsi ra. Juvin ñi maa sivi tsa catyí ángel tsihin ña María quivi tsa ndi cumañi ca cahun ra Jesús tsitsi ña.

²²Tan tsa yahá quivi cuhva catyí ley Nyoo tsa tyaa ra Moisés tsa cuenda tsa nduvaha ña nuu Nyoo tsa cacú sehe ña; tacan tan cuahán ñi tsihin ra lee nda ñuu Jerusalén, tyin tyaa cuenda ñi tsi ra ndaha Nyoo. ²³Tacan ñi javahá ñi tyin catyí ley Nyoo tyin: “Tandihí sehe nuu ñi tsa cuví rayii, cua tyaa cuenda ñi tsi ra ndaha Jutu yo Nyoo”, catyí ley ican. ²⁴Tan tsahan ñi tsijamañi ñi uvi taahan quití, tyin tacan catyí maa ley Jutu yo Nyoo, nu catyí tsi tyehen: “Cuhva ndo uvi taahan curuu a uvi taahan paloma”, catyí ley can.

²⁵Tan quivi can iyó iin ra ñuu Jerusalén nañi ra Simeón. Iin ra cuii xaan cuví ra, tan jacahnú ra tsi Nyoo. Ndatú ra nda cacú ra cua jacacu tsi ra tsihin tandihí ca nyivi ñuu Israel ican. Tan nyaá Tatyí Ii Nyoo tsihin ra Simeón. ²⁶Tan jacotó Tatyí Ii tsi ra tyin ña cúu naha ra tsa ndi cumañi ca nyehe ra tsi ra Cristo, ra cua jaquitsi Jutu yo Nyoo. ²⁷Tan Tatyí Ii jacuhun ra tsi ra Simeón can nda vehe ñuhu. Tan juvin ñi cuhva can tsaá jutu ra tan sihi ra Jesús tsihin maa ra nu cuví vehe ñuhu cahnu can, tyin javaha ñi cuhva catyí maa ley. ²⁸Tan cuhva tsa tsaá ñi nu nyaá ra Simeón tan quihin ra Simeón tsi

ra Jesús. Tan tyihí jucun ndaha ra tsi ra. Tacan tan quitsahá jacahnú ra tsi Nyoo, tan catyí ra:

²⁹—Jutu Mañi yu, vityin tsa cundaq cuhva tsa catyí maa un tsihin yu, tsa cuví yu musu un,

cuví jaña ndaha un tsi yu vityin, tan na cúu yu tsihin tsa vaha.

³⁰ Tyin tsa nyehe tsihin nuu yu tsi ra cua jacacu tsi ndi.

³¹ Tsa iyó ra ihya ityi nuu tandihí nyívi.

³² Tan cua cuví ra ñuhu tsa cua jandunditsin añima nyívi tsa ñavin nyívi Israel cuví.

Tan cahnu ca cua jaha ra tsi nyívi Israel, tsa cuví ndi nyívi cuenda maa un —catyí ra Simeón.

³³ Tan ra José tsihin sihi ra Jesús, iyo xaan cuñí ñi tsa tsiñí ñi tsa cahán ra Simeón tsa cuenda lee ican. ³⁴ Tacan tan tsicán tahvi ra Simeón tsa cuenda ñi. Tan catyí ra tsihin ña María sihi ra Jesús:

—Nyehe tsi lee ihya. Cuaha xaan nyívi Israel ñuu Nyoo cua tsinu iñi tsi ra quívi coto ñi tuhun ra, tan cua cacu ñi. Maa tyin cuaha ñi ña cua tsinu iñi ñi tsi ra. Nyoo tsahá ra tsi ra tan cuví ra tumaa seña tsa cuenda yo. ³⁵ Tacan tan coto tandihí yo náa tsicá iñi nyívi tun tsinú iñi ñi o ña tsinú iñi ñi tsi ra. Maa tyin tsa cuenda yooho, María, tsehe cuví tumaa iin mityi xaan tsa cua yaha añima un —catyí ra Simeón tsihin ña.

³⁶ Tan ican, tsitsi vehe ñuhu cahnu can, nyíi tucu iin ñaha tsa cuví ndusu yuhu Nyoo. Nañi ña Ana, tan sehe ra Fanuel, iin ra cuví tata ra Aser, cuví tsi ña. Tan tsa tsahnu xaan ña. Tan nda luhlu ña tan tindahá ña, maa tyin utsa cuiya ñi tsicoq ña tsihin yí ña tan tsihí ra. ³⁷ Tan vityin tsa cumi xico cumi cuiya ña. Tan ña quitá maa ña tsitsi vehe ñuhu cahnu can, tyin nduvi tan ñiñu jacahnú ña tsi Nyoo, tan tsicán tahvi ña tan iyó nyitya ña. ³⁸ Tan juven ñi tsa ndi nyíi ca ra José tan ña María tsihin lee ican, tan tsaq ña Ana nu yucú ñi. Tan quitsahá nacuhvá ña tyahvi nyoo tsi Nyoo. Tan cahán ña tuhun ra Jesús tsihin tandihí nyívi tsa yucú ican, nyívi tsa ndatú tsa cacu ñuu Jerusalén.

Nu cuanuhú ñi nda ñuu Nazaret

³⁹ Tacan tan tsa yahá tsa javahá ñi tandihí maa tsa taahán tsi javaha ñi cuhva catyí ley Jutu yo Nyoo, tan cuanuhú ñi nda ñuu Nazaret tsa canyí Galilea nu cuví ñuu maa ñi. ⁴⁰ Tan ra luhlu Jesús vatsí cuahnu ca ra. Tan cua ndunyeec ca ra, tan tsihin tsa tsiñi tuñi tsi maa ra. Tan Nyoo nasocó xaan ra tsi ra.

Nu cahán ra luhlu Jesús tsihin ra maestro cuenda ley vehe ñuhu naha ra

⁴¹ Ra José tsihin sihi ra Jesús tuhvá ñi tsicá vico pascua nda ñuu Jerusalén ndihí ñi cuiya. ⁴² Tan tsa quitá tsa utsi uvi cuiya ra Jesús, tan tsahán tandihí ñi nda ñuu Jerusalén, cuhva tuhun tsa iyó maa ñi. ⁴³ Tan quívi ndihí vico, tan vatsí nuhu ñi, maa tyin ra luhlu Jesús ndoo ra ñuu Jerusalén can. Tan ña jahá jutu ra tan sihi ra cuenda. ⁴⁴ Tsicá iñi maa ñi tyin vatsí maa ra tyañu tandihí nyívi ican. Tan ndihí iin quívi tsicá ityi ñi. Tacan tan quitsahá nanducú ñi tsi ra tyañu nyívi nacotó tsi ñi. ⁴⁵ Maa tyin ña nañihí ñi tsi ra. Tacan tan cuahán ñi nda ñuu Jerusalén inga tsaha cuananducú ñi tsi ra.

⁴⁶ Tan tsa yahá uñi quívi tan nañihí ñi tsi ra tsitsi vehe ñuhu cahnu ican. Nyaá ra tyañu ra cuví maestro cuenda ley vehe ñuhu naha ra. Tyaá soho ra tuhun caahán ra naha. Tan tsicá tuhun ra tsi ra naha. ⁴⁷ Tan tandihí nyívi tsiñí tsa caahán ra, iyo xaan cuñí ñi tsihin tsa tsiñi tuñi tsa iyó tsi ra, tan tsihin tsa

nacatyí tuhun ra. ⁴⁸ Cuhva tsa nyehe jutu ra tan sihi ra tsi ra, iyo xaan cuñi ñi, tan sihi ra catyí ña tsihin ra:

—Sehe luhlu yu. ¿Nacuvi tyin javaha un tyeheh? Jutu un tan yuhu tuñu xaan cuñi ndi tan nanducú xaan ndi tsi un —catyí ña.

⁴⁹ Tacan tan catyí ra Jesús:

—¿Nacuenda nanducú ndo tsi yu? ¿A ña tsitó ndo tyin ñiñi ca cuñi tsi nyehe yu tyiñu Jutu yu? —catyí ra.

⁵⁰ Maa tyin ña cutuñi iñi ñi tsa caahán ra tsihin ñi.

⁵¹ Tacan tan cuanuñu ra tsihin ñi nda ñuu Nazaret. Tan vaha javahá ra tyin tyaá yahvi ra tsi ñi. Tan sihi ra naquihñin vaha ña tandihí tuhun ihya tsitsi añima ña. ⁵² Tan ra Jesús cua cuahnu ca ra tan tsaá ca tsa tsiñi tuñi jiñi ra. Tan sñi xaan cuñi Nyoo tsihin ra, tacan tucu nyivi, sñi xaan cuñi ñi tsihin ra.

3

Nu cahan ra Juan, ra jacoondutyá tsi nyivi, tuhun Nyoo nuu tsiqui (Mt. 3.1-12; Mr. 1.1-8; Jn. 1.19-28)

¹ Tsa quitá tsahun cuiya tsa cuví ra Tiberio rey cahnu, tan ra Poncio Pilato ndacá ñaha Judea. Tan ra Herodes ndacá ñaha ra Galilea. Tan yañi ra, ra Felipe ndacá ñaha ra Iturea tsihin Traconite. Tan ra Lisaniás ndacá ñaha ra Abilinia quivi can. ² Tan ra Anás tsihin ra Caifás cuví ra naha jutu tsaahnu tsa cuví ityi nuu. Quivi can cahan Nyoo tsihin ra Juan sehe ra Zacarías iin nu tsiqui. ³ Tan ra Juan tsiá nuu ra tandihí ñuu tsa cayucú yatyin ñi yutya cahnu Jordán, caahán ra tuhun Nyoo tsihin nyivi. Tan catyí ra tsihin ñi tyin na ndu uvi iñi ñi cuatyí ñi tan coondutyá ñi. Tacan tan Nyoo cua jaha ra tucahnu iñi cuatyí ñi, catyí ra. ⁴ Tumaa caahán tuhun tsa nyaá nu libru tsa tyaá ra Isaías, ra cuví ndusu yuhu Nyoo tahañ tsanaha. Tan catyí ra:

Cua tyaá soho yo ndusu ra nu caná tsaá ra nu tsiqui tan catyí ra:

“Nuñá ndo iin ityi cuñi tan natyiso vaha ndo tsi ndo tyin tsa vatsi Jutu Mañi yo.

⁵ Tumaa tsa tahví ndo yucu tan jandutú ndo xahva cunu, jandoó ndo ityi yacua, tan janduvahá ndo nu quiñi.

⁶ Tacan tan tandihí nyivi cua nyehe ñi tsi ra tsa cua jaquitsi Nyoo tyin jacacu ra tsi yo.”

Tacan tan cahan ra Juan tsihin nyivi.

⁷ Tan tsa cuahán nyivi tsa cuñi ñi jacoondutyá ra tsi ñi, tan catyí ra tsihin ñi:

—iNyooho cuví ndo tumaa tata coo! ¿A cuñi ndo tyin tsihin tsa coondutyá ñi ndo tan ña cua tatsi tuñi ca Nyoo tsi ndo? Ña cuvi. ⁸ Yacan nqasama ndo cuhva iyó ndo, na nyehe yo tyin tsa ndu uvi iñi ndo cuatyí ndo nuu Nyoo. Tan ña nduyaa ndo cahan ndo tyin nyivi tata ra Abraham cuví ndo. Tyin cuanda tsihin yuu ihya, Nyoo cuví jananduvi ra iin nyivi ra Abraham. ⁹ Tsa ndatú yatsa Nyoo tsi tandihí ndo tyin cuví ndo tumaa yutun tsa ña tsahá tsiti vaha, cua tyahnya tun tan cua cayu tun, tacan cua javaha Nyoo tsihin ndo —catyí ra Juan.

¹⁰ Tacan tan nducú tuhun ñi tsi ra tan catyí ñi:

—¿Tan nácaa javaha ndi? —catyí ñi.

¹¹ Tacan tan nacahan ra Juan:

—Ra tsa iyó uvi taahan jahma, taahán tsi cuhva ra intuhun tsi tsi ra tsa nduve jahma. Tan ra tsa iyó tsa catsi, taahán tsi cuhva ra luxu catsi ra tsa nduve tsa catsi —catyí ra.

¹²Tan tsaá tucu ra tsa tavá xuhun cuenda ra ndacá ñaha nda ñuu Roma, tsa cuñi ra naha coondutya ra naha. Tan nducú tuhun ra naha tsi ra Juan:

—Maestro, ¿nácaa javaha tucu nyuhu? —catyí ra naha.

¹³Tan catyí ra Juan tsihin ra naha:

—Cuhva catyí ley ñi tava ndo xuhun. Tan ña jandaa ca ndo yahvi.

¹⁴Tacan tan tsicá tuhun tucu andaru naha ra tsi ra:

—Tan nyuhu tucu, ¿nácaa javaha ndi? —catyí ra naha.

Tan nacahan ra Juan tan catyí ra:

—Ña quinyaa ca ndo tsa tsii nyivi. Tan ña jayuhvi ca ndo tsi ñi. Ña tyaa ndo cuatyí tsi ñi tatun nduve cuatyí ñi. Tan ndoqo ndo vaha tsihin yahvi ndo —catyí ra Juan.

¹⁵Tan quivi can tandihi nyivi ndatú ñi tsi ra Cristo. Tan tsicá iñi ñi tun juvin ra Juan cuví Cristo. ¹⁶Maa tyin ra Juan catyí ra tsihin tandihi ñi:

—Tsa nditsa tyin jacoondutyá yu tsi ndo tsihin ndutya. Maa tyin vatsi inga ra tsa cahnu ca cuví, tan iyó ca tunyee iñi Nyoo tsi ra tan ñavin ca yuhu. Yacan cuenda ña taahán tsi tsi yu ndi tsa cuví yu musu ra tan ndatsi yu ñi nditsan ra. Tan ra ican cua jacoondutya ra tsi ndo tsihin Tatyí Ii Nyoo, tan tsihin ñuhú ihñi. ¹⁷Tan ra ican ndahá ra pala tyin cua jandava ra trigu. Cua natava siin ra trigu vaha tan cua naquihvi vaha tsi jaha ra. Tan cua cahmi ra tsahan tsa quita tsihin trigu can tsihin ñuhú tsa ña cua ndahva maa —catyí ra Juan tsihin ñi.

¹⁸Tan tacan cahán ra Juan tsihin nyivi can. Tan náa ndihi ca maa cuhva cahán ra tan jacoto ra tsi ñi nácaa tsa cua quitsi Sehe Nyoo. ¹⁹Tacan tucu ñi nduxaán ra Juan tsi ra Herodes, ra ndacá ñaha Galilea, tsa cuenda tsa naquihin ra tsi ña Herodías, ñasihi ra Felipe, yañi ra, tsihin tsa cuenda náa ndihi tsa ña vaha javahá ra. ²⁰Maa tyin ña tyaa yahvi maa ra Herodes tuhun cahán ra Juan. Nu ndihi tuhun tinyi ra tsi ra Juan tsitsi vehe caa.

Nu jacoondutya ra Juan tsi ra Jesucristo

(Mt. 3.13-17; Mr. 1.9-11)

²¹Tsa ndi cumañi ca cahun ra Juan vehe caa tan jacoondutya ra tsi tandihi nyivi. Tan jacoondutya ndihi ra tsi ra Jesús. Tsa yaha tsicoondutya ra, tsican tahvi ra tsi Nyoo, tacan tan nuña andivi. ²²Tan nuu Tatyí Ii Nyoo siqui ra tumaa iin paloma. Tan cahán iin ndusu ityi siqui andivi, tan catyí tsi tyehen:

—Yooho cuví Sehe yu, tan cuñi xaan yu tsi un. Tan sii xaan cuñi yu nyehé yu tsi un —catyí ndusu ican tsihin ra.

Cuhva quitsi tata ra Jesucristo

(Mt. 1.1-17)

²³Tan tsa iyó maa tan oco utsi cuiya ra Jesús tan quitsahá jahá tyiñu ra tyiñu Nyoo. Tan tandihi nyivi cuñi maa ñi tyin sehe ra José cuví tsi ra. Tan ra José, sehe ra Elí cuví tsi ra. ²⁴Tan ra Elí, sehe ra Matat cuví tsi ra. Tan ra Matat, sehe ra Leví cuví tsi ra. Tan ra Leví, sehe ra Melqui cuví tsi ra. Tan ra Melqui, sehe ra Jana cuví tsi ra. Tan ra Jana, sehe ra José cuví tsi ra. ²⁵Tan ra José, sehe ra Matatías cuví tsi ra. Tan ra Matatías, sehe ra Amós cuví tsi ra. Tan ra Amós, sehe ra Nahum cuví tsi ra. Tan ra Nahum, sehe ra Esli cuví tsi ra. Tan ra Esli, sehe ra Nagai cuví tsi ra. ²⁶Tan ra Nagai, sehe ra Maat cuví tsi ra. Tan ra Maat, sehe ra Matatías cuví tsi ra. Tan ra Matatías, sehe ra Semei

cuvî tsi ra. Tan ra Semei, sehe ra José cuvî tsi ra. Tan ra José, sehe ra Judá cuvî tsi ra. ²⁷ Tan ra Judá, sehe ra Joana cuvî tsi ra. Tan ra Joana, sehe ra Resa cuvî tsi ra. Tan ra Resa, sehe ra Zorobabel cuvî tsi ra. Tan ra Zorobabel, sehe ra Salatiel cuvî tsi ra. Tan ra Salatiel, sehe ra Neri cuvî tsi ra. ²⁸ Tan ra Neri, sehe ra Melqui cuvî tsi ra. Tan ra Melqui, sehe ra Adi cuvî tsi ra. Tan ra Adi, sehe ra Cosam cuvî tsi ra. Tan ra Cosam, sehe ra Elmodam cuvî tsi ra. Tan ra Elmodam, sehe ra Er cuvî tsi ra. ²⁹ Tan ra Er, sehe ra Josué cuvî tsi ra. Tan ra Josué, sehe ra Eliezer cuvî tsi ra. Tan ra Eliezer, sehe ra Jorim cuvî tsi ra. Tan ra Jorim, sehe ra Matat cuvî tsi ra. ³⁰ Tan ra Matat, sehe ra Levî cuvî tsi ra. Tan ra Levî, sehe ra Simeón cuvî tsi ra. Tan ra Simeón, sehe ra Judá cuvî tsi ra. Tan ra Judá, sehe ra José cuvî tsi ra. Tan ra José, sehe ra Jonán cuvî tsi ra. Tan ra Jonán, sehe ra Eliaquim cuvî tsi ra. ³¹ Tan ra Eliaquim, sehe ra Melea cuvî tsi ra. Tan ra Melea, sehe ra Mainán cuvî tsi ra. Tan ra Mainán, sehe ra Matata cuvî tsi ra. Tan ra Matata, sehe ra Natán cuvî tsi ra. ³² Tan ra Natán, sehe ra David cuvî tsi ra. Tan ra David, sehe ra Isaí cuvî tsi ra. Tan ra Isaí, sehe ra Obed cuvî tsi ra. Tan ra Obed, sehe ra Booz cuvî tsi ra. Tan ra Booz, sehe ra Salmón cuvî tsi ra. Tan ra Salmón, sehe ra Naasón cuvî tsi ra. ³³ Tan ra Naasón, sehe ra Aminadab cuvî tsi ra. Tan ra Aminadab, sehe ra Aram cuvî tsi ra. Tan ra Aram, sehe ra Esrom cuvî tsi ra. Tan ra Esrom, sehe ra Fares cuvî tsi ra. Tan ra Fares, sehe ra Judá cuvî tsi ra. ³⁴ Tan ra Judá, sehe ra Jacob cuvî tsi ra. Tan ra Jacob, sehe ra Isaac cuvî tsi ra. Tan ra Isaac, sehe ra Abraham cuvî tsi ra. Tan ra Abraham, sehe ra Taré cuvî tsi ra. Tan ra Taré, sehe ra Nacor cuvî tsi ra. ³⁵ Tan ra Nacor, sehe ra Serug cuvî tsi ra. Tan ra Serug, sehe ra Ragau cuvî tsi ra. Tan ra Ragau, sehe ra Peleg cuvî tsi ra. Tan ra Peleg, sehe ra Heber cuvî tsi ra. Tan ra Heber, sehe ra Sala cuvî tsi ra. ³⁶ Tan ra Sala, sehe ra Cainán cuvî tsi ra. Tan ra Cainán, sehe ra Arfaxad cuvî tsi ra. Tan ra Arfaxad, sehe ra Sem cuvî tsi ra. Tan ra Sem, sehe ra Noé cuvî tsi ra. Tan ra Noé, sehe ra Lamec cuvî tsi ra. ³⁷ Tan ra Lamec, sehe ra Matusalén cuvî tsi ra. Tan ra Matusalén, sehe ra Enoc cuvî tsi ra. Tan ra Enoc, sehe ra Jared cuvî tsi ra. Tan ra Jared, sehe ra Mahalaleel cuvî tsi ra. Tan ra Mahalaleel, sehe ra Cainán cuvî tsi ra. ³⁸ Tan ra Cainán, sehe ra Enós cuvî tsi ra. Tan ra Enós, sehe ra Set cuvî tsi ra. Tan ra Set, sehe ra Adán cuvî tsi ra. Tan ra Adán, sehe Nyoo cuvî tsi ra.

4

Nu nducu cuhva nu ña vaha tsi ra Jesús (Mt. 4.1-11; Mr. 1.12-13)

¹ Tan ñihi nyaá Tatyí Ii Nyoo tsihin ra Jesús tsa yaha tsicoondutyá ra, quita ra yutya Jordán tan cuanuhu ra. Tan quihñ Tatyí Ii Nyoo tsi ra, tan tsañan ra iin nu cuvî nu tsiqui ² nu tsinyij ra uvi xico nduvi. Tan ña tsatsj maa ra tandihî quivî ican. Yaha can tan quitsj tsa tsisocó ra. Tan nducú cuhva nu ña vaha tsi ra. ³ Tan catyí nu tsihin ra:

—Tatun juvin Sehe Nyoo cuvî tsi un, çahan tsihin yuu ihya, na nanduvi tsi paan catsi un.

⁴ Tan ra Jesús nacahan ra tan catyí ra:

—Tuhun Nyoo coonyá nu tutu, catyí tsi tyin ña maa ñi tsihin tsa catsi nyivi coonyito ñi, tyin coonyito ñi tsihin tandihî tuhun caahán Nyoo—catyí ra Jesús tsihin nu ña vaha.

⁵ Tacan tan quihñ nu ña vaha tsi ra Jesús, cuahán ra iin jiñi yucu sucun. Tan iin yaha ñi janaha nu tandihî tsa cuca nu ndacá ñaha nu ñuu ñayivi ihya tsi ra Jesús. ⁶ Tan catyí nu tsihin ra:

—Cuhva yu tandihi tsa nyehé un tun cuñí un tyin maa Nyoo tsaḥa tsa cundaca ñaha yu tandihi can, tan ndáa ra cuñí yu cuhva yu can, cuvi tsi ra. ⁷Tatun yooḥo tan cuiñi tsiṭi un nuu yu ihya tan jacahnu un tsi yu, tandihi can cua cuhva yu tsi un —catyí nu ña vaha tsihin ra.

⁸Tan nacahan ra Jesús, tan catyí ra:

—Jatsiyo nyaha tsi un nuu yu, cuihna. Tyin nu tutu Nyoo catyí: “Jacahnu tsi intuhun ñi maa Jutu Nyoo. Tan tyiñu intuhun ñi maa ra taahán tsi javaha un.”

⁹Tacan tan quihñ nu ña vaha tsi ra Jesús inga tsaha. Tan cuahán nu tsihin ra nda ñuu Jerusalén. Tan jandaḥ nu tsi ra iin nu sucun xaan nda jiñi vehe ñuhu cahnu. Tan catyí nu tsihin ra:

—Tatun Sehe Nyoo cuví tsi un, ndava nu nyaá un ihya nda cuando nu ñuhu.

¹⁰Tyin catyí tsi nu tutu Nyoo tyin:

Nyoo cua tava tyiñu ra tsi ángel ra tan jaha cuenda ra naha tsi un.

¹¹Cua janahndi ra naha tsi un. Tan ña cua nañi tsaha un nu yuu.

¹²Tacan tan nacahan ra Jesús tan catyí ra:

—Tan juvin ñi catyí tuhun Nyoo: “Ña nducu cuhva xaan un tsi Nyoo un” —catyí ra Jesús.

¹³Tan tsa ndihí nducu cuhva nu ña vaha tsi ra Jesús, tacan tan nacoḡ nuu nu tsi ra.

Nu quitsaha caahán ra Jesús tuhun Nyoo tsihin nyivi

(Mt. 4.12-17; Mr. 1.14-15)

¹⁴Tan tsa yaha tsa nducu cuhva nu ña vaha tsi ra Jesús tan cuanuhḡ ra nda Galilea tsihin tsa tsitú tunyee iñi Tatyí Ii Nyoo tsi ra. Tan tsitó nyivi tuhun ra ñi cahnu Galilea can. ¹⁵Tan jacuahḥ ra tsi nyivi nu cuví vehe ñuhu tandihi ñi ñuu. Tan tandihi ñi jacahnḡ ñi tsi ra.

Tsa tsaḡ nyico ra Jesús ñuu Nazaret nu tsahnḡ ra

(Mt. 13.53-58; Mr. 6.1-6)

¹⁶Tacan tan tsaḡ nyico ra Jesús ñuu Nazaret nu tsahnḡ ra. Tan iin quivi quitatú nyivi, quihvi ra tsitsi vehe ñuhu, tumaa tsa tuhvá maa ra tsicá. Tan nduvitḥ ra cua cahvi ra tuhun Nyoo. ¹⁷Tan tsaḥḥ ra naha iin libru tsa tyaḡ ra Isaías ra cuví ndusu yuhu Nyoo. Tan cuhva tsa nuñḡ ra, nañihí ra iin nu catyí tsi:

¹⁸Iyó Tatyí Ii Nyoo tsihin yu, tyin maa Nyoo tava tyiñu tsi yu cahan yu tuhun ra tsihin nyivi ndaahvi.

Tan janduvaha yu tsi nyivi tsa uhvi añima.

Tan maa ra tava tyiñu tsi yu tyin jacoto yu tsi nyivi yihí ndaha nu ña vaha, tyin tsa cua quita nuña ñi tan maa ra cua jacacu tsi ñi.

Tan cua jananyehe yu tsi nyivi cuaa.

Tan cua nacoḡ nuña yu tsi nyivi tsa iyó tundoho.

¹⁹Tan jacoto yu tsi nyivi tyin tsa quitḥ quivi tsa nyaá Nyoo tumañi iñi tsihin ñi.

²⁰Tacan tan ndihí cahvi ra tan nacasí ra nuu libru can. Tan nacuhvaḡ ra tsi iin ra tsa jatyinyee tsihin tyiñu vehe ñuhu can. Tan tsinyaḡ ra Jesús. Tacan tan tandihi nyivi tsa nyecú ican, ndoḡ ñi tsa nyehé ñi tsi ra. ²¹Tacan tan catyí ra tsihin ñi:

—Vityin quivi ihya tsa cundaḡ cuhva catyí tuhun Nyoo tsa cahvi yu tsiñi ndo —catyí ra Jesús tsihin ñi.

²² Tan tandihí nyívi tsa nyecú can, vaha xaan cahān ñi tuhun ra. Tan iyo xaan cuñí ñi tsihin tandihí tsa vaha tsa cahān ra. Tacan tan quitsahā tsicá tuhun tahan ñi:

—¿A ñavin ra ihya cuví sehe ra José?

²³ Tan nacahān ra Jesús:

—Tsa nditsa tyin tyehen tsicá iñi ndo nyehé ndo tsi yu: “Yooho ra janduvahá tsi nyívi, janduvaha jihna tsi maa un.” Tan cuñí tucu ndo catyí ndo: “Tandihí tsa javahā un ñuu Capernaum tsitó ndi, javaha ndihí tucu can ñuu maa un ihya.”

²⁴ Tan cahān ra Jesús inga tsaha, tan catyí ra:

—Tsa nditsa tyin ndi intuhun ra cuví ndusu yuhu Nyoo, tan ña tsinú iñi nyívi ñuu ra naha tsi ra naha. ²⁵ Tan tsa nditsa tyin cuaha xaan ñi ndaahvi tsa tsihí yíi tsicoo Israel ihya quívi tsa tava Nyoo tyiñu tsi ra Elías, ra cuví ndusu yuhu ra, tan ra ican cuví iin ra Israel ihya tsicā ra cahān ra tuhun Nyoo. Tan quívi can ña cuun maa savi uñi cuiya sasava. Tan tsicoo tama cahnu xaan.

²⁶ Tan ñavin tsa cuenda ndi intuhun maa ñi Israel ihya tava Nyoo tyiñu tsi ra Elías cuahán ra. Maa tyin tsahān ra jatyinyee ra tsi iin ñaha ndaahvi tsihí yíi tsa tsicoo ñuu Sarepta tsa canyíi Sidón.

²⁷ Tacan tucu quívi tsicā inga ra cuví ndusu yuhu Nyoo cuenda nyívi Israel, ra Eliseo. Cuaha xaan ra cuuhví tsihin cuehe tyaahyú tsicoo Israel ihya, tan ndi intuhun ra naha tan ña nduvahā ra naha. Nduvahā intuhun ñi ra Naamán ra quee ñuu Siria —catyí ra Jesús.

²⁸ Tsa yahā tsiñi ñi tandihí tuhun can, tandihí nyívi tsa yucú tsitsi vehe ñuhu can xaan xaan cuñí ñi cuví. ²⁹ Tan nduvitá ñi. Tan tava ñi tsi ra Jesús nda jiñi yucu sucun nda yuhu ñuu, tsa cuñí ñi janacava ñi tsi ra ican. ³⁰ Maa tyin ra Jesús yahā ra tyañu ñi tan cuahán ra.

Nu quitā tatyí ña vaha tsa yihí tsi iin rayi#
(Mr. 1.21-28)

³¹ Tan cuahán ra Jesús ñuu Capernaum tsa canyíi Galilea. Tan jacuahá ra tsi nyívi tsitsi vehe ñuhu tandihí sauru, quívi tuhvá nyívi quitatú. ³² Tan iyo xaan cuñí ñi tsihin tsa cahān ra. Tyin ñihi xaan cahān ra tumaa tuhvá ra cumí tyiñu caahán. ³³ Tan iin quívi nyíi ra Jesús vehe ñuhu tan iin ra yihí tatyí ña vaha catyí ra caná tsaa ra jahā tatyí ña vaha can:

³⁴ —Yooho Jesús, ra ñuu Nazaret, jaña tsi ndi. ¿Náa nducú un tyihí un tsi un tsihin ndi? ¿A vatsí un vatsí janaa un tsi ndi? Yuhu nacotó vaha yu tsi un. Yooho cuví Sehe li Nyoo.

³⁵ Tacan tan nduxaān ra Jesús tsi tatyí ña vaha tsa yihí tsi ra can tan catyí ra:

—Tāxin ñi coo yooho. Quitā tsi ra ihya —catyí ra Jesús tsihin nu.

Tacan tan nyehé ñi nyívi nduva ra can nu ñuhu jahā tatyí ña vaha can, tan nduve ca náa javahā nu tsi ra can. Tan quitā nu cuahán nu. ³⁶ Tandihí nyívi tsa nyehē can, iyo xaan cuñí ñi tan yuuhví ñi cuví. Tan quitsahā tsicá tuhun tahan ñi:

—¿Náa tuhun cuví tsa caahán ra ihya? Tyin nda cuenda tsihin tatyí ña vaha tan ñihi caahán ra, tan quitā tatyí ña vaha ican —catyí ñi.

³⁷ Tacan tan tandihí ñi ityi quitā natuhun nyívi tuhun ra Jesús.

Nu janduvahā ra Jesús tsi ña tyiso ra Simón Pedro
(Mt. 8.14-15; Mr. 1.29-31)

³⁸ Tacan tan quita ra Jesús tsitsi vehe ñuhu can. Tan cuahán ra vehe ra Simón. Tan nu tsaá ra can, canyii ña tyiso ra Simón cuuhví ña tan ñihi xaan yihí cahñi tsi ña. Tacan tan caahán ndaahvi ñi tsihin ra na janduvaha ra tsi ña. ³⁹ Tacan tan natuhva ra nu canyii ña tan nacañi nuu ra jiñi ra tan cahan ra tsihin cahñi can na quita tsi. Tacan tan quita cahñi can iin yaha ñi, tan nduvita ña can, quitsaha nanducú ña tsa catsi ra Jesús.

Nu cuaha xaan nyivi cuuhví janduvaha ra Jesús
(Mt. 8.16-17; Mr. 1.32-34)

⁴⁰ Tan tsa tyiso ñicanyii, tandihi nyivi tsa iyó ñi cuuhví vehe ñi tsihin siin siin nuu cuehe, quitsi ndaca ñi tsi ñi can tsi ra Jesús. Tan tyiso ndaha ra jiñi intuhun intuhun ñi cuuhví can tan janduvaha ra tsi ñi. ⁴¹ Tan cuaha xaan nyivi quita tyati ña vaha tan caná tsa nahnu, tan catyí nahnu:

—Yooho cuví Sehe Nyoo.

Maa tyin ra Jesús nduxaan ra tsi nahnu tan ña tsaá ra tsa cahan nahnu, tyin tsitó nahnu tyin juvin ra cuví Cristo.

Nu tsica ra Jesús cahan ra tuhun Nyoo tandihi ñuu cayucú Galilea
(Mr. 1.35-39)

⁴² Tsa tuvi inga quivi, tan quee ra Jesús ñuu can. Tan cuahán ra iin nu taxin caá. Tan nyivi nanducú ñi tsi ra. Tan tsaá ñi nda nu nyii ra ican. Tan cuñi ñi tsa ña cahun ca ra. ⁴³ Tacan tan catyí ra Jesús tsihin ñi:

—Ndi cuñi ca tsi jacoto yu tsi nyivi tandihi ca ñuu nácaa tan quihvi Nyoo añima ñi tan cundaca ñaha ra tsi ñi. Tyin yacan cuenda vatsi yu nu ñuhu ñayivi ihya.

⁴⁴ Tan tacan ñi tsicá ra Jesús caahán ra tuhun Nyoo vehe ñuhu tandihi ñi ñuu tsa cayucú Galilea.

5

Nu tsaá ra Jesús ndatu tsa cuaha xaan tyaca ñihí ra naha
(Mt 4.18-22; Mr. 1.16-20)

¹ Iin quivi nyaá ra Jesús yuhu miñi nu cuví Genesaret. Tan tsaá cuaha xaan nyivi, tyin cuñi ñi tyaa soho ñi tuhun Nyoo. Tan tihin xaan nyii ra Jesús tyañu ñi. ² Tan nyehe ra uvi taahan yutun ndoo yatyin ñi yuhu miñi ican. Yoñi yucú tsitsi yutun ndoo can tyin tsa quita ra tiin tyaca. Tan nacatyá ra naha traya.

³ Tacan tan quihvi ra Jesús tsitsi iin yutun ndoo tsa cuví tsii ra Simón. Tan catyí ra Jesús tsihin ra Simón tyin na jacuhun ra can nda mahñu miñi. Tacan tan tsinyaá ra Jesús tsitsi yutun ndoo can. Tan quitsaha caahán ra tsihin nyivi. ⁴ Cuhva tsa ndihí cahan ra tsihin ñi, tan catyí ra tsihin ra Simón:

—Jacuhun yutun ndoo nda nu cunu ca. Tan jacuhun traya tyin tacan tan tiin ndo tyaca.

⁵ Tan nacahan ra Simón tan catyí ra:

—Maestro, tsa jahá tyiñu xaan ndi ñiñu maa tan ndi intuhun maa tyaca ña ñihí ndi. Maa tyin tatun maa un catyí, cua jacuhun nyico ndi traya.

⁶ Cuhva tsa jacuhun nyico ra naha traya ra, tan cuaha xaan tyaca ñihí ra naha. Ndihi maa traya can quitsaha tyahnyá tsihin tsa vee tyaca can.

⁷ Tacan tan jandaha ra naha tsi ra tsa yucú inga yutun ndoo tyin quitsi ra naha cutahan ra naha tsihin ra naha. Tacan tan tsaá ra can naha ra. Tan jacutú ra naha nduvi taahan yutun ndoo can tsihin tyaca. Tan cuñi nyee yutun ndoo ra naha tsihin tsa tsitú tyaca. ⁸ Tsa nyehe ra Simón Pedro tsa cuví tacan, tan tsicuiñi tsiti ra nuu ra Jesús, tan catyí ra tsihin ra:

—Jatsiyó tsi un nuu yu, Jutu Mañi yu, tyin yuhu ra iyó cuatyi cuví yu —catyí ra Simón.

⁹Tyin ra Simón tshih tandihí ra yucú tshih ra, nayuhví xaan ra naha tsa cuenda tsa cuaha xaan tyaca ñihí ra naha. ¹⁰Tacan tucu ra cutahán tshih ra Simón: ra Jacobo tan ra Juan, sehe ra Zebedeo, nayuhví xaan ra naha. Tan ra Jesús catyí ra tshih ra Simón:

—Ña nayuhví un, tyin vityin tan nda nu cuahán ca tsi ityi nuu, tumaa tsa tñin ndo tyaca ihya, tacan cua ñihi un nyívi cua cuvi nyívi Nyoo, tan cua tava un tsi ñi nu caquiñi, na quihvi ñi cuenda Nyoo —catyí ra Jesús tshih ra Simón.

¹¹Tacan tan tava ra naha yutun ndoo can nda nu ñuhu ityi. Tan nacoq ra naha tandihí tsa iyó tsi ra naha. Tan cuahán ra naha tshih ra Jesús.

Nu janduvahá ra Jesús tsi iin ra ndohó cuehe tyaahyú
(Mt 8.1-4; Mr. 1.40-45)

¹²Iin quívi nyíi ra Jesús iin ñuu nu iyó iin ra ndohó cuehe tyaahyú. Tan tsa nyehe ra tsi ra Jesús, tan tsicuiñi tsi ra nuu ra. Tan nacañi nuu ra jiñi ra nda nu ñuhu. Tan caahán ndaahvi ra tshih ra Jesús, tan catyí ra:

—Jutu Mañi yu, tun yooho tan cuñi un, cuví janduvaha un tsi yu —catyí ra.

¹³Tacan tan tisyó ndaha ra Jesús jiñi ra cuuhví can, tan catyí ra:

—Cuñi yu janduvaha yu tsi un. Cua nduvaha un vityin —catyí ra Jesús tshih ra cuuhví can.

Tan iin yaha ñi nduvahá ra. ¹⁴Tacan tan catyí ra Jesús tshih ra:

—Coto catyí tuhun un tshih nyívi. Intuhun ñi tsa cua cahan yu tshih un, cyaahan nu nyaá ra cuví jutu. Tan janaha tsi un tsi ra. Tan cuhva tsa taahán tsi jamañi un tumaa tsa caahán ley tsa tyaá ra Moisés, tan cua cuvi tsi iin tsandaa tsi ra jutu can tan tsi nyívi tyin tsa nduvahá un —catyí ra Jesús tshih ra.

¹⁵Vasu ndi maa tsa ña cuñi ra Jesús tsa coto nyívi, ñihi ca quitá tuhun ra. Tan cuaha xaan nyívi ndu iin tyin cuñi ñi tyaa soho ñi tsa caahán ra tan janduvaha ra tsi ñi. ¹⁶Maa tyin ra Jesús, jatsiyó, jatsiyó ñi ra tsi ra nu iyó nyívi. Tan cuahán ra nu taxin caá, cua ndacan tahvi ra tsi Nyoo Jutu ra.

Nu janduvahá ra Jesús tsi iin ra xii
(Mt. 9.1-8; Mr. 2.1-12)

¹⁷Iin quívi jacuahá ra Jesús tsi nyívi. Tan yucú juhva ra fariseo, ra tyaá yahvi xaan ley Nyoo tsa tyaá ra Moisés tsanaha. Tan yucú tucu juhva ra maestro cuenda ley vehe ñuhu ican. Quitá ra naha ñuu Jerusalén, tan inga ñuu nyihi tanñi cahnu Galilea tan Judea. Tan iyó xaan tunyee iñi Nyoo tsi ra Jesús tsa janduvaha ra tsi nyívi cuuhví. ¹⁸Tacan tan tsaá ra naha tan nyisó ra naha iin ra cuuhví tshih cuehe xii nu tsito. Tan cuñi ra naha quihvi ra naha tsitsi vehe tan caquin ra naha tsi ra cuuhví can nu nyíi ra Jesús. ¹⁹Maa tyin ña ñihí ra naha nu quihvi ra naha tyin tuvi xaan nyívi. Tacan tan ndaq ra naha ityi jiñi vehe. Tan jatsiyó ra naha tyiyo. Tacan tan januu ra naha tsi ra cuuhví can nuu nyíi ra Jesús tyañu nu tuvi nyívi can. ²⁰Tan nyehe ra Jesús tyin tsinú xaan iñi ra naha tsi ra. Tan catyí ra tshih ra cuuhví can:

—Tsa tsicoq tucahnu iñi tsi un, tsa cuenda cuatyi un —catyí ra Jesús tshih ra can.

²¹Tacan tan ra maestro cuenda ley vehe ñuhu tshih ra cuví fariseo, quitsahá tsicá iñi ra naha: “¿Yóo ra cuví ra ihya? Tsicoq cuatyi ra nuu Nyoo tsa cuenda tsa caahán ra. Tyin catyí ra tyin tsa tsicoq tucahnu iñi tsi ra can,

tan intuhun ñi maa Nyoo cuví jaha tucahnu iñi tsi yo”, cuñí ra naha tsicá iñi ra naha.

²² Maa tyin ra Jesús tsitó ra tsa tsicá iñi ra naha. Tan catyí ra tsihin ra naha: —¿Nacuenda tsicá iñi ndo tacan? ²³ ¿Náa tsa yí ca catyí yo? ¿A yí catyí yo: “Cuatyí un tsa yaha ndatsi”, a yí ca catyí yo tsihin iin nyívi xii: “Nduvita tan caca un”? ²⁴ Maa tyin vityin cua janaha yu tsi ndo tyin yuhu Rayí tsa quee nda gloria iyó ndatu tsi yu tsa jahá yu tucahnu iñi tsi ndo —catyí ra Jesús.

Tsa yaha cahan ra tacan, tan catyí ra tsihin ra cuuhví can:

—Nduvita. Naquihin tsito un tan cuanuhu yuvehe un.

²⁵ Tan nduvita ra can, tan naquihin ra tsito ra. Tan cuanuhu ra yuvehe ra, juven ñi jacahnú ra tsi Nyoo. ²⁶ Tandíhi nyívi iyo xaan cuñí ñi. Tan yuuhví xaan ñi. Tan jacahnú ñi tsi Nyoo, tan catyí ñi:

—Vityin nditsa nyehé yo tsa iyo xaan —catyí ñi.

Nu cana ra Jesús tsi ra Leví

(Mt. 9.9-13; Mr. 2.13-17)

²⁷ Yaha can tan quita ra Jesús vehe can. Tan nanyehé ra tsi iin ra tsa tavá xuhun cuenda ra ndacá ñaha iyó nda ñuu Roma. Tan nañi ra Leví. Tan nyaá ra nu tyahví nyívi. Tan catyí ra Jesús tsihin ra:

—Cohon tsihin yu —catyí ra.

²⁸ Tacan tan nduvita ra Leví. Tan nacoó ra tandíhi tsa iyó tsi ra. Tan cuahán ra tsihin ra Jesús.

²⁹ Tacan tan javaha ra Leví iin vico cahnu vehe ra cuenda ra Jesús. Tan cuaha xaan ra tavá xuhun cuenda ra ndacá ñaha nyecú ra naha nu mesa. Tan nyecú tucu inga nyívi. ³⁰ Tan ra fariseo naha ra tsihin ra cuví maestro cuenda ley vehe ñuhu naha ra, quitsaha caahán nyaa ra naha tsi ra tsicá tsihin ra Jesús:

—¿Nacuví tsatsí ndo tan tsihí ndo tsihin ra tavá xuhun naha ra tan tsihin ra iyó cuatyí naha ra? —catyí ra naha.

³¹ Tan ra Jesús nacahan ra, tan catyí ra:

—Ña tsiñí ñuhu doctor tsi ra tsa vaha maa. Ra cuuhví, cuví ra tsiñí ñuhu doctor. ³² Yuhu ña vatsi yu jatyinyee yu tsi nyívi tsa tsicá iñi tyin vaha ñi, vatsi yu jatyinyee yu tsi nyívi tsitó tyin iyó cuatyí ñi, tan cuví nasama ñi cuhva iyó ñi —catyí ra Jesús tsihin ra naha.

Nu janaha ra Jesús tyin tatun tsa cuahán ra cua coo nyitya nyívi nyicún tsi ra

(Mt. 9.14-15; Mr. 2.18-20)

³³ Tacan tan tsicá tuhun ra naha tsi ra Jesús, tan catyí ra naha:

—Ra tsicá tsihin ra Juan tsooó nyitya ra naha, tan ña tsatsí ra naha tan nanducú ra naha tsi Nyoo, tan tacan tucu ra cuví fariseo naha ra. Maa tyin ra tsicá tsihin yooho, ndíhi quívi tsatsí ra naha tan tsihí ra naha. ¿Nacuví? —catyí ra naha.

³⁴ Tan nacahan ra Jesús, tan catyí ra:

—¿A cuví coonyitya nyívi yucú vico tindaha jaha ndo tatun nyí ra tsa cua tindaha tsihin ñi? Ña cuvi. [Tyin sñi cuñí ñi, tan cuñí ñi catsi ñi.] ³⁵ Maa tyin cua quita quívi tsa cua jatsiyo ra tindaha ican tsi ra nu yucú ñi. Tacan tan cua coonyitya ñi.

Nu jacuahá ra Jesús tyin ña nacatsí tahan tuhun tsahnu tsa iyó nyívi tsihin tuhun tsaa tsa jacuahá ra

(Mt. 9.16-17; Mr. 2.21-22)

³⁶ Tacan tan cahān tucu ra Jesús iin cuhva tsihin nyivi, tan catyí ra:

—Yoñi tsaahnyá iin jahma tsaá, tan naquicú ñi tsihin jahma tuuhu. Tyin tatun javaha ñi tacan, nandiyi jahma tsaá can. Tan ña ndoo vaha tsi tsihin jahma tuuhu can.

³⁷ Tan tacan tucu, ña cuví tyihi nyivi vinu tsaá tsitsi ñi tsaahnu. Tyin cua tyahnya ñi can tsihin vinu tsaá can. Tan cua tiví vinu can tan tiví ndihi tucu ñi tsaahnu can. ³⁸ Yacan cuenda taahán tsi tyihi yo vinu tsaá tsitsi ñi tsaá. Tyin tacan tan nduvi taahan tsi tan cua jaha cuenda tahan tsi itsi. ³⁹ Tan yoñi tsihi vinu tsahnu, tan cuñi ñi coho ñi vinu tsaá. Tyin catyí ñi, vaha ca vinu tsahnu. [Vinu tsahnu can cuñi tsi catyí tyin cuví tsi cuhva iyó maa ñi.]

6

Nu tuhun ra tsicá tsihin ra Jesús yoco itya trigu quivi quitatú nyivi
(Mt. 12.1-8; Mr. 2.23-28)

¹ Iin quivi quitatú nyivi, yaha ra Jesús mahñu tsa tatsi nyivi. Tan ra tsicá tsihin ra tuhun ra naha yoco trigu. Tan jocoñ ra naha can tsihin ndaha ra naha. Tan tsatsi ra naha tsiti can. ² Tacan tan catyí ra fariseo naha ra tsihin ra naha:

—¿Nacuenda javahá ndo iin tyiñu tsa ña taahán tsi javaha yo quivi quitatú yo? ³ Tan nacahan ra Jesús, tan catyí ra:

—¿A ñaha ca cahví ndo nu tsahá cuenda tsi tsa javaha ra David tan ra cutahán tsihin ra quivi tsa tsisoco ra naha? ⁴ Quihví ra tsitsi vehe Nyoo. Tan quihñ ra paan tsa tyiso nyivi nuu altar Nyoo. Tan tsatsi ra. Tan tsahá ndihi ra tsi ra tsa cutahán tsihin ra. Tan maa ñi maa ra cuví jutu naha ra taahán tsi catsi paan can —catyí ra Jesús.

⁵ Tacan tan catyí ra Jesús:

—Rayi tsa quee nda gloria iyó ndatu tsi ra tsa cahan ra tsihin intuhun intuhun ndo náa taahán tsi javaha ndo quivi quitatú yo —catyí ra.

Nu janduvaha ra Jesús tsi iin ra na ityi ndaha
(Mt. 12.9-14; Mr. 3.1-6)

⁶ Inga quivi quitatú nyivi quihví ra Jesús tsitsi vehe ñuhu. Tan quitsaha jacuahá ra tsi nyivi. Tan nyehe ra tsi iin ra tsa na ityi ndaha cuaha. ⁷ Tan ra cuví maestro cuenda ley vehe ñuhu naha ra tsihin ra cuví fariseo naha ra, nducú cuhva ra naha tsi ra Jesús, tatun janduvaha ra tsi ra cuuhví ican quivi quitatú nyivi, tyin tacan tan cuví tyaa ra naha cuatyí tsi ra Jesús. ⁸ Maa tyin ra Jesús tsitó ra tsa tsicá iñi ra naha. Tan catyí ra tsihin ra na ityi ndaha can: —Nduvita. Cunya nyityi mahñu ra naha ihya.

Tacan tan ra na ityi ndaha can nduvita ra. Tan tsinya nyityi ra mahñu ra naha. ⁹ Tacan tan catyí ra Jesús tsihin ra nyecú ican naha ra:

—Cua nducu tuhun yu iin cuhva tsi ndo. ¿Náa taahán tsi javaha yo quivi quitatú yo? ¿A taahán tsi javaha yo tsa vaha, a tsa ña vaha? ¿A taahán tsi jacacu yo tsi nyivi, o cahñi ndihi yo tsi ñi?

¹⁰ Tacan tan ra Jesús nyehé ra intuhun intuhun ra naha. Yaha can tan catyí ra tsihin ra tsa na ityi ndaha can:

—Cañihi ndaha un.

Tacan tan ra na ityi ndaha ican cañihí ra ndaha ra. Tan nduvaha ndaha ra.

¹¹ Maa tyin ra yucú ican naha ra, cuxaḡn ra naha. Tan quitsaha tsicá tuhun tahan ra naha tsi ra naha:

—¿Nacaa javaha yo tan cuví casi yo nu caahán ra Jesús ihya? —catyí ra naha.

Nu nacatsi ra Jesús tsa utsi uvi taahan ra cua caca tyiñu ra
(Mt. 10.1-4; Mr. 3.13-19)

¹² Quivi ican ndaaq ra Jesús iin yucu. Tan ñiñu maa tsican tahvi ra tsi Nyoo. ¹³ Tan tsa tuvi, cana ra tsi tandihi ra nyicún tsi ra. Tan nacatsi ra utsi uvi taahan ra naha. Tan jacunañi ra tsi ra naha apóstol, tan cuñi tsi catyi tsi “ra tsa tava tyiñu Nyoo”. ¹⁴ Tan ihya nyaá sivi tandihi tsa utsi uvi ra naha: ra Simón, ra tsa jacunañi ra Cristo “Pedro”; tan yañi ra, ra Andrés; tan ra Jacobo; ra Juan; ra Felipe; ra Bartolomé; ¹⁵ ra Mateo; ra Tomás; ra Jacobo, sehe ra Alfeo; tan ra Simón ra nyanaá cuvi ra cuenda partido tsa cuñi cahun cuatyi siqui ñuu Roma tsa ndacá ñaha tsi ñi; ¹⁶ tan ra Judas, yañi ra Jacobo; tan ra Judas Iscariote, ra tsa xico tsi ra Jesús.

Nu jacuaqa ra Jesús tsi nyivi cuaha
(Mt. 4.23-25)

¹⁷ Tacan tan nuu ra Jesús yucu ican tshin tsa utsi uvi ra naha. Tan ndu iin nyivi tsa nyicún tsi ra tsaha yucu can. Tan tsaq cuaha tucu nyivi quee ñuu Jerusalén tshin tandihi ca ñuu cayucú Judea, tshin tucu nyivi quee ityi yuhu ndutya ñuhu tsa cayucú yatyin ñi ñuu Tiro tshin ñuu Sidón. Tan tsaq ñi tyin tyaa soho ñi tuhun caahán ra Jesús. Tan tandihi nyivi cuuhvi cuñi ñi tsa janduvaha ra tsi ñi. ¹⁸ Tan tandihi nyivi tsa yihí tatyí ña vaha janduvaha ra tsi ñi. ¹⁹ Tan tandihi ñi cuñi ñi tiin ñi tsi ra, tyin janduvaha ra tsi ñi tshin tunyee iñi tsa iyó tsi ra.

Tsehe cahan ra Jesús tshin nyivi tsa naquihin ndaahvi ra
(Mt. 5.1-12)

²⁰ Tacan tan nanyehę ra Jesús tsi ra tsicá tshin ra. Tan catyi ra tshin ra naha:

—Tandihí nyooho tsa ndaahvi, sii xaan cua cuñi ndo, tyin taahán tsi cundaca ñaha Nyoo tsi ndo.

²¹ Tandihí nyooho tsa tsisocó vityin, sii xaan cua cuñi ndo. Tyin coo quivi ña cua cusoco ca maa ndo. Tan tandihí nyooho tsa tsacú tsa cuiihya cuñi ndo, sii xaan cua cuñi ndo tyin ña cua coo ca ndo tucuiihya iñi. Tan cua vacu naaha xaan ndo tshin tsa sii cuñi ndo.

²² Cusiñi iñi ndo, quivi ndasi cuñi nyivi nyehe ñi tsi ndo, quivi tava ñi tsi ndo nu iyó ñi, quivi nduxaan ñi tsi ndo, quivi catyi ñi tyin nyivi ña vaha cuvi ndo tyin tsinú iñi ndo tsi maa yu tsa cuvi yu Rayi quee nda gloria. ²³ Sii cuñi ndo quivi can tyin tacan tucu javaha nyivi ñi tahān tsanaha. Cuxaān ñi tsi ra cuvi ndusu yuhu Nyoo. Ndava ndo tshin tsa sii cuñi ndo. Tyin cahnu xaan ndatu cua ñihi ndo nda gloria.

Tsehe cahan ra Jesús tshin nyivi ña tsinú iñi tsi ra

²⁴ Maa tyin ndahvi nyooho, ñi cuca. Tyin vityin sii xaan cuñi ndo tshin tandihí tsa cuca ndo. Maa tyin cua coo quivi maa ñi maa tundoho cua nyehe ndo. Tyin nduve tsa cua ñihi ndo nu nyaá Nyoo.

²⁵ Tan ndahvi nyooho tsa cuñi maa ndo tyin nduve tsa cumañi tsi ndo tsa vityin, tyin coo quivi cua cusoco ndo. Nyooho tsa sii cuñi vityin, ndahvi nyooho, tyin coo quivi cua coo ndo tucuiihya iñi. Tan cua vacu xaan ndo.

²⁶ Tan ndahvi nyooho tsa vaha caahán nyivi tuhun ndo. Tyin tacan caa tucu nyivi tsicoq tsanaha, vaha xaan cahan ñi tuhun ra tsa cahan tsa ña nditsa tshin ñi.

Cuñi ndo tsi nyivi xaan iñi tsi ndo
(Mt. 5.38-48; 7.12)

²⁷ Tandihí nyooho tsa tsiñí tsa caahán yu, catyí yu tsihin ndo tyin: Cufñí ndo tsi nyívi xaan iñi tsi ndo. Javaha ndo tsa vaha tsihin nyívi tsa ndasi cuñí nyehe tsi ndo. ²⁸ Cahán ndo tsa vaha tsihin nyívi tsa caahán ndavaha ñi tsi ndo. Tan ndacan tahvi ndo tsi Nyoo tsa cuenda nyívi caahán nyaa tsi ndo. ²⁹ Tatun iin ra cañi iin tsiyo nuu ndo, cuhva ndihí ndo inga tsiyo, nacañi ndihí maa ra. Tatun iin ra quinyaá tsaqueta nditsí ndo, cuhva ndihí ndo camiseta ndo. ³⁰ Cuhva ndo náa ndihí tsiacán nyívi tsi ndo. Tatun quinyaá ñi náa tsa iyó tsi ndo, ña ndacan ca ndo can tsi ñi. ³¹ Tumaa cuñí ndo tsa javaha nyívi tsa vaha tsihin ndo, tacan javaha tucu maa ndo tsa vaha tsihin ñi.

³² Tatun cuñí ndo tsi maa ñi maa nyívi tsa cuñí tsi ndo, nduve tsa vaha javahá ndo. Tyin tacan icá tucu nyívi quiñi iyó. ³³ Tan tatun tsihin nyívi tsa vaha icá tsihin ndo, tan icá ndo tsa vaha, tan ña icá ndo tsa vaha tsihin inga nyívi, nduve tsa vaha icá ndo cuví can, tyin nyívi caquiñi, tacan icá tucu ñi can. ³⁴ Tatun javahá ndo tumañi iñi tsi iin nyívi, tan nyitá iñi ndo tyin cua javaha tucu ñi can tumañi iñi tsi ndo, nduve tsa vaha icá ndo. Tyin nyívi caquiñi, tacan icá ñi. Tatun náa tumañi iñi javahá ñi tsi nyívi vaha iñi tsi ñi, ndatú ñi tsa nacuhva tucu ñi can tumañi iñi tsi ñi. ³⁵ Maa tyin nyooho, cuñi ndo tsi nyívi xaan iñi tsi ndo. Tan javaha ndo tsa vaha tsihin ñi. Tan cuhva nuu ndo náa nducú ñi. Maa tyin ña cuatu ndo náa tumañi iñi cua nacuhva ñi tsi ndo. Tacan tan cahnu xaan tsa cua ñihí ndo nuu Nyoo tan cua cuví ndo sehe maa Nyoo, ra nyaá gloria. Tyin Nyoo vaha iñi ra nda cuanda tsihin nyívi tsa ña nacuhvá tyahvi nyoo tsi ra, tan tsihin nyívi caquiñi. ³⁶ Cú uhvi iñi ndo tsi nyívi, tumaa uhvi cuñí Nyoo Jutu yo nyehé ra tsi yo.

Ña cahan nyaa yo tsi inga nyívi
(Mr. 7.1-5)

³⁷ Ña cahan nyaa ndo tsi nyívi, tacan tan Nyoo ña cua cahan nyaa ra tsi maa ndo. Ña catyí ndo tsa cahun ñi anyaya, tacan tan ña cua jacuhun Nyoo tsi ndo anyaya. Jaha ndo tucahnu iñi tsi nyívi. Tan Nyoo cua jaha ra tucahnu iñi tsi maa ndo. ³⁸ Cuhva ndo tsa tsiñí ñuhu tsi nyívi. Tacan tan cua cuhva tucu maa Nyoo tsa tsiñí ñuhu tsi maa ndo. Cuaha cua cuhva ra tsi ndo. Tyin tumaa cuhva cua cuhva ndo tsi nyívi, tacan cuhva cua cuhva Nyoo tsi ndo —catyí ra Jesús.

³⁹ Tan tsahá ra Jesús cuhva ihya tsi ñi, tan catyí ra:

—Iin ra cuaa ña cuví janaha ra ityi tsi inga ra cuaa. Tyin nduvi taahan ra naha ña nyehé ra naha ityi cuahán ra naha. Tan cuví canacava ra naha tsitsi iin xahva. ⁴⁰ Ndi intuhun ra cutuhvá ña cua cuví coto ra tsa tsitó ra jacuahá tsi ra. Tyin ndi quitsahá cahví ra. Cua coto ra nda ndihí cahvi ra.

⁴¹ ¿Nacaa tyin nyehé un tsahan luhlu tsa nyíi tinuu yañi un, tan ña jahá un cuenda yutun cahnu tsa nyíi tinuu maa un? ⁴² Tatun tinuu maa un nyíi iin yutun cahnu, ¿nácaa cua cuví catyí un tsihin ra yañi un: “Ñaha, na tava yu tsahan luhlu tsa nyíi tinuu un.”? ¡Yooho tsa jahá tyin vaha xaan un! Tava jihna yutun cahnu tsa nyíi tinuu maa un. Tyin tacan tan cuví nyehe vaha un tsahan luhlu tsa cua tava un tinuu yañi un.

Tsihin tsa javahá nyívi tan nacoto yo tsi ñi tatun ñi vaha, a ñi ña vaha cuví
ñi

(Mt. 7.17-20; 12.34-35)

⁴³ Iin yutun vaha tsahá tun yucu vixi, yucu vaha. Tan iin yutun ña vaha tsahá tun yucu ña vaha. ⁴⁴ Tandihí yutun nacotó yo tsi tun tsihin tsiti tun. Tyin tiñata, ña cua cuhva tun mangu. Tan ndi intuhun iñu nduuhva ña cua

cuhva tun uvas [tsa cuví yucu vixi]. ⁴⁵ Tan tacan tandihí nyívi vaha, vaha caahán ñi, tyin yihí tsa vaha añima ñi. Maa tyin nyívi ña vaha, maa ñi maa tsa ña vaha caahán ñi tyin yihí tsa caquiñi añima ñi. Tyin tsihin yuhu yo caahán yo tandihí tsa quitá tsitsi añima yo.

Cua cacu nyívi tsa tyaá yahvi tuhun caahán ra Jesús, tan nyívi ña tyaá yahvi tsa caahán ra, ña cua cacu ñi
(Mt. 7.24-27)

⁴⁶ ¿Nacuenda catyí ndo tsihin yu, “Jutu Mañi yu, Jutu Mañi yu”, tan ña javahá ndo tsa caahán yu? ⁴⁷ Vityin cua catyí yu tsihin ndo yóo ndacú nyooho tsa vatsí ndo tsi maa yu, tan tyaá soho ndo tsa caahán yu, tan javahá ndo cuhva catyí yu. ⁴⁸ Cuví ndo tumaa cuví iin ra tsitó janduvita vehe. Tyin jihna ca tahví cunu xaan ra tan tahañ ra yuu. Tan tyaá ra tyihyo tsaha vehe can tsata yuu can. Tan quívi nduñihí cuún savi, ndutya can tsatya xaan tsi tsaha vehe, maa tyin vehe can ña taní maa tsi tyin vaha xaan quitá tyihyo tsaha tsi. ⁴⁹ Maa tyin nyívi tsa tsiñí tsa caahán yu tan ña javahá ñi tsa caahán yu, cuví ñi tumaa iin ra javahá vehe tan ña vaha javahá ra itsi. Tyin nduve tyihyo tsaha tsi javahá ra. Tan quívi tsaá savi, tan cuñihí cuún savi, tan yahá ndutya cuaha tsaha vehe can. Tan vehe can, iin yaha ñi taní tsi —tacan catyí ra Jesús.

7

Nu janduvahá ra Jesús musu iin ra capitán andarú
(Mt. 8.5-13)

¹ Ndhí cahan ra Jesús tsihin nyívi, tacan tan cuanuhu ra inga tsaha nda ñuu Capernaum. ² Tan ñuu can iyó iin ra capitán. Tan iyó iin musu ra tsa cuñí xaan ra. Tan cuhví ra can. Tan tsa cuñí cúu ra. ³ Tan tsa tsitó ra capitán can tuhun ra Jesús, tacan tan tavá tyiñu ra tsi juhva ra cuví ra tsahnu ñuu Israel naha ra na cahan ra naha tsihin ra Jesús, tyin na quitsi ra janduvaha ra tsi musu ra. ⁴⁻⁵ Tacan tan tsaá ra tsahnu ican naha ra nu nyí ra Jesús. Tan quitsahá caahán ndaahvi ra naha tsihin ra tan catyí ra naha:

—Iyó iin ra capitán cuenda ñuu Roma. Tan vaha xaan nyívi cuví ra tsihin yo tsa cuví yo nyívi Israel. Nda cuanda javahá ña ra iin vehe ñuhu yo. Tan taahán tsi tyin jatyinyee un tsi ra. Tyin cuhví xaan musu ra. Tan cuñí ra tyin janduvaha un tsi ra.

⁶ Tacan tan cuahán ra Jesús tsihin ra naha. Maa tyin tsa ndi cumañi ca tsaá ra nda vehe ra capitán can, tan ra capitán can tavá tyiñu ra tsi ra vaha iñi tsi ra. Tacan tan tsaá ra naha nu nyí ra Jesús. Tan catyí ra naha tsihin ra Jesús:

—Taa, catyí ra capitán tyin ña jatyañu un tsi un tsa cuhun un nda yuvehe ra. Tyin ña cahnú cuví ra tan cuhun un vehe ra, catyí ra. ⁷ Yacan ña cana iñi ra quitsi ra nu nyí un. ¿A ña jaha un tumañi iñi tsi ra, tyin ihya cahan un iin tuhun, tan cua nduvaha musu ra, catyí ra? ⁸ Tyin maa ra, capitán cuví ra. Tan ndacá ñaha rey tsi ra. Tan maa ra ndacá ñaha ra tsi ra cuatyí cutahán tsihin ra. Tatun tavá tyiñu ra tsi iin ra cuatyí ican, na cuhun ra, cuahán ra. Tatun catyí ra tsihin inga ra, na quitsi ra, vatsí ra. Tatun jacuhún ra tsi inga ra, na jaha tyiñu ra, cua jaha tyiñu ra. Tan tacan tucu yooho, tatun catyí un na nduvaha musu ra, tacan tan cua nduvaha ra —catyí ra vaha iñi tsi ra capitán can naha ra tsihin ra Jesús.

⁹ Tsa tsiñí ra Jesús tsa cahan ra can naha ra, tan iyo xaan cuñí ra. Tan nanyehé ra tsi nyívi tsa nyecú tsihin ra, tan catyí ra:

—Nditsa nditsa tyin tsinú xaan iñi ra capitán can. Ñaha ca nañihi yu tsi ndi intuhun ra Israel tsa tsinú xaan iñi tumaa ra ican —catyí ra Jesús.

¹⁰ Tacan tan cuanuhú ra vaha iñi tsi ra capitán can naha ra. Tan tsa tsaá ra naha nda yuvehe, tan nyehe ra naha tyin tsa nduvahá musu ra.

Nu janandotó ra Jesús tsi sehe iin ñaha ndaahvi tsihi yí

¹¹ Tsa yaha yacan tan cuahán ra Jesús iin ñuu tsa nañi Naín. Tan cuahán tucu ra tsicá tsihin ra. Tan cuahán ndihi tucu cuaha xaan nyívi. ¹² Tacan tan cuhva tsa cua tsaá ra yatyin ñuu ican, nyehe ra tyin cuaha xaan nyívi quitá ñi ñuu ican. Tan nyisó ra naha iin ndiyi, cua cutsi ra naha sehe iin ñaha ndaahvi tsa tsihi yí. Tan intuhun ñi maa ra cuví sehe ña, tan tsihi ra. ¹³ Tan tsa nyehe ra Jesús tsi ña, tan cundaahvi iñi ra nyehe ra tsi ña. Tan catyí ra tsihin ña:

—Ña vacu un.

¹⁴ Tsahan natuhvá ra tan tñin ra tsatun tsa nyii ndiyi can. Tacan tan ra nyisó tsi ndiyi can naha ra tsicuñi ra naha. Tan catyí ra Jesús tsihin ndiyi can:

—Nduvita, yooho ra tyuvaa —catyí ra.

¹⁵ Tacan tan nduvitá ndiyi can. Tan nacunyaá ra. Tacan tan quitsahá caahán ra. Tan ra Jesús nacuhvá cuenda ra tsi ra tsi sihi ra. ¹⁶ Tsa nyehe ñi tsa tacan nandotó ra jahá ra Jesús tan yuuhví xaan ñi, tan quitsahá jacahnú ñi tsi Nyoo. Tan catyí ñi:

—Cahnu xaan ra cuví ndusu yuhu Nyoo tsaá nu yucú yo ihya.

Tan catyí tucu ñi:

—Maa Nyoo cuví ra vatsí nu iyó yo, vatsí jatyinyee ra tsi yo —catyí ñi.

¹⁷ Tan tandihi maa nyívi tanñi cahnu Judea, tsitó ñi tsa javahá ra Jesús.

Nu jacuhun ra Juan uvi taahan ra tsa tsicá tsihin ra nu nyii ra Jesús (Mt. 11.2-19)

¹⁸ Tan ra tsicá tsihin ra Juan naha ra nacatyí tuhun ra naha tsa javahá ra Jesús. Tacan tan caná ra Juan tsi uvi taahan ra naha. ¹⁹ Tan tava tyiñu ra tsi ra naha na cuhun ra naha nu nyii ra Jesús, tan ndaca tuhun ra naha tsi ra tatun juvin ra cuví Cristo, ra tsa cua jaquitsi Nyoo. Tyin tatun ñavin ra Cristo cuví ra, cuatu ra naha tsi inga ra. ²⁰ Tacan tan ra tsa jacuhun ra Juan, cuahán ra naha. Tan tsaá ra naha nu nyii ra Jesús. Tan catyí ra naha:

—Ra Juan, ra jacoondutyá, tava tyiñu ra tsi ndi tyin ndaca tuhun ndi tsi un tatun juvin un cuví Cristo, ra tsa cua jaquitsi Nyoo. Tyin tatun ñavin un, cuatu ndi tsi inga ra —catyí ra naha tsihin ra Jesús.

²¹ Tan tsa ndi yucú ra tsa jacuhun ra Juan naha ra tan cuaha xaan nyívi cuuhví janduvahá ra Jesús. Tan tacan tucu nyívi yihí tatyí ña vaha. Tan cuaha tucu nyívi cuaa nanyehe ñi jahá ra. ²² Tacan tan catyí ra Jesús tsihin ra tsa jacuhun ra Juan naha ra:

—Cuaahan ndo. Tan nacatyí tuhun ndo tsihin ra Juan tandihi tsa nyehe ndo, tan tandihi tsa tsiñi ndo. Tan catyí ndo tsihin ra: ra cuaa nanyehe ra, ra coxo nacaá ra, ra ndohó cuehe tyaahyú nduvahá ra, ra soho nacuñi ra, ndiyi nandoto, tan caahán yu tuhun Nyoo tsihin ñi ndaahvi nácaa cacu ñi. Tan catyí ndo tsihin ra tyin ²³ sñi xaan cuñi ñi nyicún tsi yu tun ña ndu uví iñi —catyí ra Jesús tsihin ra naha.

²⁴ Cuahán ra tsa jacuhun ra Juan naha ra, tan quitsahá caahán ra Jesús tuhun ra Juan tsihin nyívi. Tan catyí ra:

—¿Náa nyehe ndo quivi tsahan ndo nuu tsiqui ndi ican? ¿A nyehe ndo iin ndoo tsa janduvá tatyí? ²⁵ ¿A iin ra tsa nditsí jahma vaha nyehe ndo? Ñavin.

Tyin tsitó ndo tyin ra nditsi jahma vaha, iyó ra tsihin tsa vaha tan iyó ra vehe ra cuví rey. ²⁶ ¿A ña nyehe ndo tsi iin ra cuví ndusu yuhu Nyoo? Juvín. Cahnu ca cuví ra tan ñavin ca ra ndusu yuhu Nyoo. ²⁷ Juvín ñi tuhun ra Juan cuví tsa nyaá nuu tutu tsa tyaq̄ ra Isaiás tahān tsanaha. Tan caahán Nyoo tuhun ra tyehen:

Yuhu ca jacuhun yu iin ra cua cahan tuhun yu tsa ndi cumañi ca cuhun un. Na natyiso vaha ra ityi nu cua cuhun un.

²⁸ Tan catyí yu tsihin ndo tyin tsitsi tsa tandihí ra tsa cacu jahā ñiñaha, yoñi ra cuví ndusu yuhu Nyoo tsa cahnu ca tumaa ra Juan, ra jacoondutyá. Maa tyin ra tsa ndacá ñaha Nyoo añima vasu iin ra luhlu cuii ñi cuví ra, maa tyin cahnu xaan ca cuví ra tan ñavin ca ra Juan.

²⁹ Tandihí nyivi tan ra tavá xuhun naha ra, tsa tsicoondutyá jahā ra Juan, nacoto ñi tyin cuhva javahá Nyoo, cuii xaan tsi. ³⁰ Maa tyin tandihí ra fariseo tsihin ra maestro cuenda ley vehe ñuhu, ña cuñi ra naha tsa jacoondutyá ra Juan tsi ra naha, tyin ña cuñi ra naha quihin ra naha tsa tsahá Nyoo tsi ra naha —catyí ra Jesús. ³¹ Tan catyí tucu ra:

—¿Náa cua jandu inducu yu tsihin nyooho, nyivi iyó quivi ihya? ¿Yóo caá tumaa caá ndo? ³² Tumaa ra nyihi cuví nyooho. Tyin ra nyihi jasiquí nuyahvi. Tan caná tsaá tahan ra naha, tan catyí ra naha: “Tivi ndi tiyoo tan ña tsañi ndo yaa. Tan tsitá ndi yaa cuiihya, tan ña tsacu ndo”. catyí ra nyihi. [Tan tacan ñi cuví nyooho tyin ndi intuhun cuhva ña taahán iñi ndo.] ³³ Tyin ra Juan, ra jacoondutyá, quitsi ra tan ña tsatsí vaha ra. Tan ña tsihi ra vinu. Tan nyooho catyí ndo tyin tatyí ña vaha yihí tsi ra. ³⁴ Tan quitsi tucu yuhu tan cuví yu Rayi tsa quee nda gloria. [Tan tsatsi yu tan tsihi yu.] Tan nyooho catyí ndo tyin tsatsí xaan yu tan tsihi xaan yu vinu. Tan ña taahán iñi ndo tsa cutahán yu tsihin ra iyó cuatyí naha ra, tan tsihin ra tavá xuhun naha ra. ³⁵ Maa tyin catyí yu tsihin ndo tyin tsa tsiñi tuñi Nyoo tsahá ra tsi nyivi naquihín tuhun caahán yu tan tuhun caahán ra Juan. Tan maa ñi cua janaha tsi ndo tyin vaha tsa tsiñi tuñi Nyoo —catyí ra Jesús.

Nu nyii ra Jesús vehe ra Simón ra cuví fariseo

³⁶ Iin ra fariseo tsa nañi Simón jacoto ra tsi ra Jesús tyin cuhun ra cucatsi ra nda yuvehe ra. Tan tsaq̄ ra Jesús vehe ra, tan tsicunyaq̄ ra nu mesa. ³⁷ Tacan tan iin ñaha sñi iñi ñuu ican tsito ña tyin nyii ra Jesús ican. Tan tsaq̄ ña tsihin iin yutyi yuu xiñu tsitú tsi ndutyá tami. ³⁸ Tan tsinyaq̄ ña yatyin ñi tsaha ra. Tan quitsahā tsacu ña tyin ndu uví iñi ña cuatyí ña. Tan cuún ndutyá nuu ña. Tan tsihin ndutyá nuu ña nacatyá ña tsaha ra Jesús. Yahā can tan jana ityi ña tsaha ra tsihin ixi jiri ña. Tan tyayuhu ña tsaha ra. Tacan tan tyosoq̄ ña ndutyá tami ican tsata tsaha ra. ³⁹ Tsa nyehe ra fariseo can tsa tacan icā ña, tan tsicá iñi ra: “Tatun nditsa tsa Nyoo jaquitsi tsi ra ihya, cua nacoto ra yóo ñaha tñn tsaha ra, tyin ñaha ican, ñaha iyó cuatyí cuví ña.”

⁴⁰ Tacan tan ra Jesús catyí ra tsihin ra fariseo ican:

—Yooho Simón, iyó iin tsa cua cahan yu tsihin un —catyí ra tsihin ra.

Tacan tan nacahān ra Simón, tan catyí ra:

—Vaha, cahan tsihin yu, Maestro —catyí ra.

⁴¹ Tan catyí ra Jesús tyehen tsihin ra:

—Uvi taahan rayi nyaá cuenda ra xuhun tsi iin ra tsa tuhvá tsahá nuu xuhun. Tan iin ra ican nyaá cuenda ra uhun cientu denario. Tan inga ra nyaá cuenda ra uvi xico utsi ñi denario. ⁴² Tan nduvi taahan ra, ña cuví tyahvi

ra naha. Tan ra tuhvá tsahá nuu xuhun ican, jahá ra tucahnu iñi tsi nduvi taahan ra naha. Tan vityin çatyi tsihin yu, yooho Simón, ¿ndáa ra cua cuñi ca tsi ra tsa tsahá nuu xuhun ican? —catyi ra Jesús.

⁴³ Tacan tan nacahán ra Simón, tan catyi ra:

—Ra tsa cuaha ca jahá ra tucahnu iñi tsi —catyi ra.

Tacan tan catyi ra Jesús:

—Nditsa tsa caahán un —catyi ra.

⁴⁴ Tacan tan nanyehé ra Jesús tsi ñaha ican, tan catyi ra tsihin ra Simón:

—¿A nyehé un tsi ñaha ihya? Yuhu quihvi yu tsitsi vehe un, tan ña tsahá un ndutya tsa ndoo tsaha yu tumaa cuhva tsa iyó yo. Tan ñaha ihya nacatya ña tsaha yu tsihin ndutya nuu ña. Tan jana ityi ña tsihin ixi jiñi ña. ⁴⁵ Yooho ña tyayuhú un ndaha yu, tumaa cuhva tsa iyó yo, maa tyin maa ña nda cuanda tsa quihvi yu ihya tan ña jandihí ña tsa tyayuhú ña tsaha yu. ⁴⁶ Tan yooho ña tyihí un acetye jiñi yu, maa tyin ñaha ihya tyihí ña ndutya tami tsaha yu.

⁴⁷ Tan catyi yu tsihin un, yooho Simón, vasu cahnu xaan cuatyi ña, maa tyin jahá yu tucahnu iñi tsi ña. Yacan cuenda cuñi xaan ña tsi yu. Tan nyivi tsa jahá yu tucahnu iñi luxu ñi cuatyi ñi, luxu ñi cuñi ñi tsi yu —catyi ra Jesús.

⁴⁸ Tacan tan catyi ra Jesús tsihin ña can:

—Cuatyi un tsa yahá catsiyo, tyin tsa jahá Nyoo tucahnu iñi tsi un —catyi ra Jesús tsihin ña.

⁴⁹ Tacan tan ra yucú tsihin ra quitsahá tsicá iñi ra naha: “¿Yóo ra cuví ra ihya? tyin jahá ra tucahnu iñi cuatyi nyivi.”

⁵⁰ Tacan tan catyi ra Jesús tsihin ñaha ican:

—Cuaahan vityin, tsa cacú un tyin tsinu iñi un tsi yu. Cuaahan tsihin tsa vaha —catyi ra tsihin ña.

8

Ñiñaha tsa jatyinyeé tsi ra Jesús

¹ Tsa yahá can, tan cuahán ra Jesús tsicá ra iin iin ñuu nahnu tan iin iin ñuu nyihí. Tan caahán ra tsihin nyivi. Tan jacotó ra tsi ñi tuhun vaha nácaa cuñi Nyoo cundaca ñaha ra tsi ñi. Tan tsa utsi uvi taahan ra tsa tavá tyiñu ra, cuahán ra naha tsihin ra. ² Tan cuahán tucu juhva ñiñaha tsa janduvahá ra: ñi cuhví tan ñi yihí tatyí ña vaha. Tan tsihin ñi cuahán ña María tsa queé ñuu Magdala, tan juvin ña cuví ña yihí utsa tatyí ña vaha tan nduvahá ña. ³ Tan cuahán tucu ña Juana, ñasihi ra Chuza, ra cumí tyiñu cuenda ra Herodes, tan ña Susana tsihin tandihí ca ñiñaha tsa jatyinyeé tsi ra Jesús tsihin tsa iyó tsi ñi.

Nu caahán ra Jesús tyin tumaa iin ra tatsí tacan cuví ra caahán tuhun Nyoo (Mt. 13.1-9; Mr. 4.1-9)

⁴ Tan cuaha xaan nyivi queé ñi iin iin ñuu, tyin cua nyehé ñi nu caahán ra Jesús tuhun Nyoo. Tan tuvi xaan ñi nyecú, tan quitsahá caahán ra tsihin ñi tsihin iin cuhva tsahá cuenda ra, tan catyi ra:

⁵ —Quitá iin ra vehe ra. Cuahán ra nu iyó tyiñu jahá ra, tyin cua tatsi ra tsiti trigu nu ñuhu ra. Tan cuhva tsa tatsí ra quitá ra tsiti can, tan cucoyo juhva yuhu ityi. Tan tsañi nyivi tsata can. Tan quitsí saa tan tsatsj ti. ⁶ Tan juhva ca tsiti can cucoyo tyañu yuu. Caná tsiti ican. Maa tyin na ityi tsi tyin luxu cuí ñi ñuhu yihí tsaha tsi. Tan nduve catsin. ⁷ Tan juhva ca tsiti cucoyo tyañu iñu. Maa tyin quivi caná trigu iin caa ñi tsihin iñu can, iñu can tsahñi tsi trigu can. ⁸ Maa tyin juhva ca tsiti cucoyo nu ñuhu vaha. Tan quivi tsahnú tsi, vaha

xaan tsaḥa tsi tsiti. Tyin tsa iin ñi tsiti ican, cientu tsiti quita tsihin tsi —catyí ra Jesús.

Tan tsa yaha tsaḥa ra cuhva can, tan quitsaha caná tsa ra tyin na tyaa soho nyivi, tan catyí ra:

—Tatun iyó soho ndo, tyaa soho ndo tuhun caahán yu —catyí ra.

Nu jacoto ra Jesús nacuenta jacuahá ra tsi nyivi tsihin cuhva caahán ra tsihin ñi

(Mt. 13.10-17; Mr. 4.10-12)

⁹Yaha can tan ra tsicá tsihin ra, nducu tuhun ra naha tsi ra náa cuñi tsi catyí cuhva tsa caḥan ra tsihin nyivi. ¹⁰Tacan tan catyí ra tsihin ra naha:

—Tsi nyooḥo jacoto Nyoo tuhun xeehe, nácaa ndacá ñaha ra. Maa tyin tandihí ca ñi ican, tsihin cuhva ñi caahán yu tsihin ñi. Tacan tan nyehé ñi tan cuví tsi tumaa tsa ña nditsin nyehé ñi, tan tsiñi ñi maa tyin ña cua cutuñi ñi ñi náa tuhun cuví can.

Nu tsaḥa cuenda ra Jesús cuenda ra tsa tatsí

(Mt. 13.18-23; Mr. 4.13-20)

¹¹Cuhva tsa tsaḥa yu tsi ñi, cuñi tsi catyí tsi tyehen: tsiti can, tuhun Nyoo cuví tsi. ¹²Tan nu cucoyo tsiti trigu ican yuhu ityi, nyivi tsa tsiñi tuhun Nyoo cuví can. Maa tyin quitsi nu ña vaha tan quinyaa nu tuhun Nyoo tsi ñi tan coto tsinu ñi ñi tan cacu ñi. ¹³Tan nu cucoyo tsiti can tyañu yuu, juvin ñi nyivi tsa tsiñi tuhun Nyoo cuví can. Si xaan naquihin vaha ñi itsi juhva ñi quivi. Maa tyin ña yihí vaha yoho ñi, juhva ñi quivi tsinu ñi ñi, tan quivi tsa quitsaha nyehé ñi tundoho, tan jandihí ñi tsa tsinu ñi ñi. ¹⁴Tan nu cucoyo tsiti tyañu ñu, juvin ñi nyivi tsiñi tuhun Nyoo cuví can. Tsiñi ñi tuhun Nyoo maa tyin ña nasama ñi cuhva iyó ñi. Tyin yihí ñi, tyaá ca ñi ñi tuhun tundoho tan ñavin ca tuhun Nyoo. Tan inga ñi, nyiyo ca ñi ñi tsa cuca. Tan inga tucu ñi si ca cuñi ñi tsihin tsa si caá tsa iyó nu ñuhu ñayivi. Tan cuví ñi tumaa cuví yutun tsa ña tsaḥa tsiti. ¹⁵Maa tyin nu cucoyo tsiti nu ñuhu vaha, yacan cuví nyivi tsa tsiñi tuhun Nyoo, tan vaha añima ñi tyin tsinu ñi ñi tsihin tan añima ñi. Tan vaha tyaá soho ñi tuhun Nyoo, tan ña naá maa ñi ñi tuhun ra. Tan javahá ñi tandihí tuhun caahán ra.

Nu caḥan ra Jesús tyin ña cua tyihí xeehe yo ñuhu tsa jandunditsin Nyoo añima yo coto quinyaa ra itsi

(Mr. 4.21-25)

¹⁶Ndi intuhun yo ña tyaá yo ñuhu tyuma tan tyihí xeehe yo xuu tsito a inga nu xeehe. Tyaá yo ñuhu tyuma maa tyin tsaquin nyaa yo can iin nu sucun, tacan tan quihvi nyivi tsitsi vehe maa tyin nditsin. ¹⁷Tyin nduve iin tsa nyii xeehe, tan ña cua quituvi can. Tan ndi intuhun tsa xeehe, tan ña cua quita tsi nu nditsin, tan tsahan nacoto yo. ¹⁸Yacan cuenda tyaa soho ndo tuhun caahán yu. Tyin tatun tyaá yahvi ndo tuhun caahán yu, cuaha ca cua janaha yu tsi ndo. Maa tyin tatun ña cua tyaa soho ndo, tacan tan cua quinyaa Nyoo nda cuanda tsa luxu ñi tsa cuñi maa ndo tyin cumí ndo.

Nu tsaḥa cuenda ra Jesús tyin tumaa yañi ra, tan tumaa sihi ra, tacan cuví nyivi tyaá yahvi tuhun Nyoo

(Mt. 12.46-50; Mr. 3.31-35)

¹⁹Tacan tan tsaḥa sihi ra Jesús tsihin yañi ra nu nyii ra. Maa tyin ña cuví tsaá ñi tyin tuvi xaan nyivi. ²⁰Tacan tan jacoto nyivi nyecú ican tsi ra Jesús, tan catyí ñi:

—Sihí un tsihin ra yañi un naha ra nyecú ñi tsata vehe. Tan cuñí ñi cahan ñi tsihin un.

²¹ Tacan tan nacahan ra Jesús, tan catyí ra:

—Tandihí maa nyívi tsa tyaá soho tuhun Nyoo tsa caahán yu tan tyaá yahvi ñi itsi, juven ñi cuví sihi yu, tan juven ñi cuví yañi yu —catyí ra Jesús.

Nu jacutaxin ra Jesús tatyí ñihi nu miñi
(Mt. 8.23-27; Mr. 4.35-41)

²² Cuví tsi iin quívi quihví ra Jesús tsitsi iin yutun ndoo tsihin ra tsicá tsihin ra. Tan catyí ra tsihin ra naha:

—Cohon ndo inga tsiyo miñi ihya.

Tacan tan cuahán ra naha tsihin yutun ndoo ican. ²³ Tan tsa ndi cuahán ca ra naha mahñu miñi ican, quixí ra Jesús. Tacan tan sana iñi ra naha tan tsaá tatyí ñihi xaan. Tan quitsahá tyihí tsi ndutya tsitsi yutun ndoo ican. Tan cuñí nyee yutun ndoo can tyin cuaha xaan ndutya quihví. ²⁴ Tacan tan jandoto ra naha tsi ra Jesús. Tan catyí ra naha tsihin ra:

—¡Maestro! ¡Maestro! Tsa cuñí nyee yo tsitsi ndutya —catyí ra naha.

Tacan tan nduvitá ra Jesús. Tan caahán ra tsihin tatyí can tan tsihin ndutya can, na cutaxin tsi. Tan cutaxin tsi. ²⁵ Tacan tan catyí ra tsihin ra tsicá tsihin ra:

—[¿Nacuvi yuuhví ndo?] ¿Numaa cuahán tsa tsinú iñi ndo? —catyí ra tsihin ra naha.

Maa tyin ra ican naha ra, nayuhví xaan ra naha. Tan iyo xaan cuñí ra naha. Tan quitsahá tsicá tuhun tahan ra naha:

—¿Yóo ra cuví ra ihya? Tyin nda cuanda tatyí tan ndutya tan tyaá yahvi tsi tsa caahán ra.

Nu nduvahá iin ra yihí tatyí ña vaha nda Gadara
(Mt. 8.28-34; Mr. 5.1-20)

²⁶ Tacan tan tsaá ra naha nda Gadara tsa canyíi yuhu miñi ityi nuu Galilea tsa canyíi inga tsiyo miñi can. ²⁷ Tan quita ra Jesús tsitsi yutun ndoo ican. Tan ican tsaá iin ra ñuu tsa canyíi Gadara can tsijatahan ra tsi ra. Tan tsanaha xaan yihí tatyí ña vaha tsi ra, tan ña nditsí ca maa ra jahma. Tan ña iyó ra vehe ra. Tsicá nuu ñi maa ra nu ñaña cumi santu. ²⁸⁻²⁹ Tan tuhvá tatyí ña vaha ican jacunú sana nu tsi ra. Tan yacan cuenda tuhvá ñi tsaahñi ndaha ra tan tsaha ra tsihin cadena. Maa tyin tatyí ña vaha ican tsahá tunyee iñi tsi ra tsa cahnya ra can. Tan jacunú nu tsi ra. Tan tsindacá nu tsi ra iin nu nduve maa nyívi iyó. Ra ican tsaá ra nu nyíi ra Jesús. Tan cuhva tsa nyehé ra can tsi ra Jesús, tsicuiñi tsi ra nuu ra. Tan caná tsaá ra tan catyí ra:

—¿Nacuvi tyihí un tsi un tsihin yuhu, yooho Jesús, Sehe Nyoo nyaá gloria? Tsicán yu tsi un ña janyehe un tundoho tsi yu —catyí ra yihí tatyí ña vaha ican tsihin ra Jesús, tyin ra Jesús tavá tyiñu ra tsi nu tsa quita nu tsi ra ndaahvi ican.

³⁰ Tan nducu tuhun ra Jesús tsi tatyí ña vaha ican, tan catyí ra:

—¿Náa nañi un?

Tan tatyí ña vaha ican jacahan nu tsi ra can, tan catyí ra:

—Nyuhu nañi ndi, Legión.

Tacan catyí ra tyin cuaha xaan tatyí ña vaha yihí tsi ra. [Cuenda mil nahnu yihí tsi ra.] ³¹ Tacan tan catyí nahnu tsihin ra Jesús tyin ña jacuhun ra tsi nahnu tsitsi Yavi Cunu nu cua nyehé nahnu tundoho tan ña cuví maa quita nahnu. ³² Tan tsican nahnu tsi ra Jesús na cuhva ra quihví nahnu tsitsi quini

tsa yucú yuhu miñi ican tsatsi ti naha ti. Tacan tan tsaha ra Jesús ndatu tsa quihvi nahnu tsitsi quini ican naha ti. ³³Tan quitā nahnu tsi ra ndaahvi can. Tan quihvi nahnu tsitsi quini ican naha ti. Tacan tan tsinū quini can naha ti. Tan yatyin ican nyaá iin xahva cunu yuhu miñi ican. Ican cucoyo ti naha ti tsitsi miñi ican. Tan tshij ti naha ti tsitsi ndutya.

³⁴Tacan tan ra jahá cuenda tsi quini ican naha ra, nayuhvi xaan ra naha. Tan tsinú ra naha cuahán ra naha cua nacatyí tuhun ra naha tsa cuvī can tshin nyivi nda űuu. Tan tandihi ñi nyivi tsa nyehe ra naha, tan nacatyí tuhun ra naha tsa cuvī ican. ³⁵Tacan tan tsahan nyivi tsinyehe ñi náa tsa cuvī, tan tsaá ñi nu nyii ra Jesús. Tan nañihī ñi tsi ra tsa tsa yaha quitā tatyí ña vaha can. Nyaá ra tsaha ra Jesús. Tan tsa űuhú ra jahma. Tan tsa vaha cuñi jiñi ra. Tan nayuhvi xaan ñi cuvī. ³⁶Tacan tan tandihi ñi tsa nyehe tsa cuvī ican, nacatyí tuhun ñi tshin tandihi ca nyivi nácaa quitā tatyí ña vaha tsi ra ndaahvi can, tan nduvahā ra. ³⁷⁻³⁹Tacan tan tandihi nyivi iyó Gadara can quitsahā caahán ñi tshin ra Jesús na cunuhu ra ityi nu quee ra. Tyin nayuhvi xaan ñi tsa javahā ra tshin nu tatyí ña vaha ican. Tacan tan ra tsa quitā nu tatyí ña vaha can nahnu, cahān ndaahvi ra tshin ra Jesús, na kuhva ra cahun ndihi ra tshin ra. Maa tyin catyí ra Jesús tshin ra:

—Cuanuhu yuvehe un. Tan cūhva cuenda un tsi nyivi vehe un náa ndihi tsa javahā Nyoo tshin un —catyí ra.

Tacan tan ra Jesús quihvi ra tsitsi yutun ndoo ican. Tan cuanuhu ra tshin ra tsicá tshin ra. Tacan tan ra ndaahvi tsa nduvahā ican, cuanuhu ra nda űuu ra. Tan ityi cuahán ra nacatyí tuhun ra tshin tandihi nyivi űuu ican nácaa janduvahā ra Jesús tsi ra.

*Nu nduvahā ña sehe ra Jairo tan ñaha tsa tññ jahma ra Jesús
(Mt. 9.18-26; Mr. 5.21-43)*

⁴⁰Quivi tsa tsaá ra Jesús inga tsaha tsa tsahan ra inga tsiyo miñi can, cuaha xaan nyivi ndatu tsi ra. Tan sii xaan cuñi ñi tyin tsaá nyico ra. ⁴¹Tacan tan tsaá iin ra tsa nañi Jairo, ra cuvī ityi nuu vehe űuhu, tan tsicuiñi tsiti ra nuu ra Jesús. Tan quitsahā caahán ndaahvi ra tshin ra na cahun ra vehe ra. ⁴²Tyin iyó iin ñaha sehe ra, tan iyó utsi uvi cuiya ña. Tan tsa cuñi cúu ña jahá cuehe. Tacan tan cuahán ra Jesús vehe ra. Tan cuaha xaan nyivi cuahán tshin ra, tan tyañu xaan nu cuahán ra tyañu ñi. ⁴³Tan tshin nyivi ican cuahán iin ñaha cuuhvi. Tsa iyó utsi uvi cuiya ndohó ña cuehe tsa cuún niñi ña. Tan tsa ndihi maa xuhun ña janaa ña tshin doctor tan ña nduvahā ña. ⁴⁴Maa tyin tsaá ña nu cuahán ra Jesús, ityi tsata ra. Tan tññ ña jahma ra. Tan iin yaha ñi, tan tsicuiñi tsa cuún niñi ña.

⁴⁵Tacan tan catyí ra Jesús:

—¿Yóo tññ jahma yu?

Tan tandihi ñi cuahán tshin ra catyí ñi:

—Yoñi.

Tan ra Pedro tshin ra cutahan tshin ra, catyí ra naha tshin ra Jesús:

—Maestro, cuaha xaan nyivi cuahán tshin un, tan tyañu xaan nu cuahán un. Tan juvin ñi maa ñi tyandahñi tsi un. Tan nducú tuhun ca un “¿Yóo tññ jahma yu?” —catyí ra naha.

⁴⁶Maa tyin ra Jesús catyí ra:

—Tsitó maa yu tyin iyó iin nyivi tññ jahma yu, tyin tuvī iñi yu cuahán juhva tunyee iñi tsa iyó tsi yu —catyí ra.

⁴⁷ Tacan tan ñaha can nyehé ña tyin tsa tsitó ra. Tan quitsahā nihí ña tsihin tsa yuuhví ña. Tan tsicuiñí tsiiti ña nuu ra. Tan nacatyí tuhun ña tsihin ra nacuenda tñin ña jahma ra, tan nácaa nduvahā ña iin yaha ñi ican. Tan tsiñí tandihí nyiví tsa nacatyí tuhun ña. ⁴⁸ Tacan tan catyí ra Jesús tsihin ña:

—Tsa nduvahā un tyin tsinú iñi un tsi yu. Cyaahan tsihin tsa vaha —catyí ra.

⁴⁹ Ndi caahán ca ra Jesús, tan tsaā ñi iin ra quee vehe ra Jairo, ra cuví ityí nuu vehe ñuhu. Tan catyí ra tsihin ra Jairo:

—Sehe un tsa yahā tsihí ña. Ña cuhva ca un tsihi tsi ra Maestro ihya —catyí ra.

⁵⁰ Maa tyin tsa tsiñí ra Jesús tsa cahan ra ican, tan catyí ra tsihin ra Jairo:

—Ña nayuhví un. Tsiñu iñi. Tan ña sehe un cua nduvaha ña —catyí ra.

⁵¹ Tan cuhva tsa tsaā ra Jesús vehe ra Jairo, ña tsaḥa ra quihví nyiví tsitsi vehe. Maa ñi maa ra Pedro tan ra Jacobo tan ra Juan tan jutu ñaha luhlu can tsihin sihi ña quihví ñi tsitsi vehe nu canyii ñaha luhlu tsa tsihí can. ⁵² Tan tandihí ñi tsacú xaan ñi tsa cuenda tyin tsihí ña. Maa tyin ra Jesús catyí ra tsihin ñi:

—Ña vaçu ca ndo. Tyin ña tsihí ña. Quixí ña —catyí ra.

⁵³ Maa tyin tsacú naaha ñi tsa caahán ra tacan. Tan ña tsinú iñi ñi, tyin tsitó ñi tyin tsa tsihí ña. ⁵⁴ Tacan tan tñin ra Jesús ndaha ña. Tan tsaā nacahan ra tan catyí ra tsihin ña:

—Nduvita, ñaha luhlu —catyí ra.

⁵⁵ Tacan tan nandoto ña. Tan iin yaha ñi nduvitā ña. Tan catyí ra Jesús:

—Cuhva ndo tsa catsi ña.

⁵⁶ Tan jutu ña tsihin sihi ña, iyo xaan cuñí ñi. Maa tyin catyí ra Jesús tsihin ñi tyin yofi maa tsihin cua cahan ñi tsa cuví ican.

9

Nu tavā ra Jesús tyiñu tsi tsa utsi uvi taahan ra tsicá tsihin ra tyin cahan ra naha tuhun Nyoo

(Mt. 10.5-15; Mr. 6.7-13)

¹ Canā ra Jesús tsa utsi uvi taahan ra tsicá tsihin ra. Tan tsaḥa ra tunyee iñi cahnu tsi ra naha tyin cuví tava ra naha tatyí ña vaha tsi nyiví, tan cuví janduvaha ra naha tsi nyiví cuuhví.

² Tan tavā tyiñu ra tsi ra naha na cahan ra naha nácaa ndacá ñaha Nyoo tsi nyiví. Tan tavā tucu ra tyiñu tsi ra naha na janduvaha ra naha tsi nyiví cuuhví. ³ Tan catyí ra tsihin ra naha:

—Nduve tsa cuiso ndo ityí cuhun ndo, ndi tatun ña cundaha ndo. Ndi maralí tan ndi tsa catsi ndo tan ña cundaha ndo. Tan ndi xuhun ña cundaha ndo. Tan iin nditsi ñi jahma ñuhú ndo cuhun tsihin ndo. ⁴ Tan ndáa cuví ñi vehe tsaā ndo, ndo ndo ican nda cuanda quita quiví tsa cuhun ndo inga ñuu.

⁵ Tan nu ña cuñí nyiví tyaa soho ñi tsa caahán ndo, quita ndo ñuu ican. Tan naquisi ndo nyaca ñuhu tsaḥa ndo. Tan yacan janahá tyin ndoó cuatyí ñi siquí ñi —catyí ra Jesús tsihin ra naha.

⁶ Tacan tan cuahán ra naha tandihí maa ñuu. Tan caahán ra naha tuhun Nyoo tan nácaa cuñí tsi tan cacu ñi. Tan janduvahā ra naha tsi nyiví cuuhví.

Nu cuñí ra Herodes coto ra yóo ra cuví ra tsicá nuu caahán tuhun Nyoo tan janduvahá ra nyiví

(Mt. 14.1-12; Mr. 6. 14-29)

⁷ Ra Herodes, ra cuví ra ndacá ñaha [tan# cahnu Galilea], ñihí tuhun ra tsa javahá ra Jesús. Tan ña ñihí vaha ra cuhva yóo ra cuví ra. Tyin yihí nyívi catyí ñi tyin ra Juan nandoto. ⁸ Tan yihí ñi catyí ñi tyin ra Elías quituví nyico. Tan yihí ñi catyí ñi tyin inga ra cuví ndusu yuhu Nyoo tsanaha nandoto. ⁹ Maa tyin catyí ra Herodes:

—Maa maa yu tyihí tyiñu tsa tyahnya jucun ra Juan. Tun tacan, ¿yóo ra cuví ra tsa caahán xaan nyívi tuhun catyí ñi tsiñí yu tyin cuaha xaan tsa iyo javahá ra? —catyí ra.

Tan ra Herodes can nducú xaan ra cuhva nyehe ra tsi ra.

Nu tsaḥa ra Jesús tsa catsi uhun mil ray#
(Mt. 14.13-21; Mr. 6.30-44; Jn 6.1-14)

¹⁰ Tan cuhva tsa tsaḥ nyico ra tava tyiñu ra Jesús, tan nacatyí tuhun ra naha tsihin ra Jesús tandíhi maa tsa cuví nu tsaḥan ra naha. Tacan tan tava siin ra Jesús tsi ra naha tan cuahán ra naha yatyin ñi iin ñuu tsa nañí Betsaida. ¹¹ Maa tyin cuhva tsa ñihí tuhun nyívi tyin cuahán ra Jesús ndacan, tan cuahán ñi nda nu nyíi ra. Tan naquihin cuenda ra tsi ñi. Tacan tan quitsahá caahán ra tsihin ñi nácaa ndacá ñaha Nyoo tsi ñi. Tan janduvahá ra tsi nyívi cuuhví.

¹² Tan tsa tseñi cuii ña, tsa utsi uvi taahan ra tsicá tsihin ra Jesús catyí ra naha tsihin ra:

—Cahan tsihin nyívi ihya, na cunuhu ñi na quitatu ñi, na nanducu ñi tsa catsi ñi ñuu tsa canyíi yatyin ñi ihya, tyin ihya nduve maa tsa catsi yo iyó —catyí ra naha.

¹³ Tacan tan catyí ra Jesús tsihin ra naha:

—Cuhva nyooḥo tsa catsi ñi —catyí ra.

Tacan tan catyí ra naha:

—Nduve maa tsa iyó ihya. Uhun taahan ñi paan, tan uvi taahan ñi tyaca iyó. Maa tyin ña ñihí tsa catsi tandíhi nyívi ihya. Ndi maa cuhun ndi cujata ndi, maa tyin ña cua ñihí tsa catsi ñi tyin cuaha xaan ñi —catyí ra naha.

¹⁴ Tyin vasiqui quitá maa uhun mil ray# yucú ican. Tan siin maa ñiñaha tsihin sehe ñi. Tacan tan ra Jesús catyí ra tsihin ra naha:

—Na cunyecu nyívi tsa uvi xico utsi taahan ñi iin iin nu cunyecu ñi.

¹⁵ Tacan tan tsicunyecu tandíhi ñi jahá ra naha. ¹⁶ Tan quihín ra Jesús uhun taahan paan ican tsihin uvi taahan tyaca ican. Tan nanyeḥe ndaa ra ityi andívi, fan nacuhvá ra tyahvi nyoo tsi Nyoo tsa cuenda can. Tan tsahnyá sava ra paan tan tyaca ican. Tan tsaḥa ra tsi ra tsicá tsihin ra, na tsatsa ra naha can tsi nyívi. ¹⁷ Tacan tan tandíhi ñi tsatsj ñi, tan ndaha vaha iñi ñi. Yahá can tan ndoḥ ca tsa ñahñu, tan jacutu ra naha utsi uvi taahan tyaca tsihin tsa ñahñu ican.

Nu catyí ra Pedro tyin ra Jesús cuví ra Cristo, ra jacacú tsi yo
(Mt. 16.13-19; Mr. 8.27-29)

¹⁸ In quívi quitá siin ra Jesús tsihin ra tsicá tsihin ra. Tan tsican tahvi ra tsi Nyoo. Tan nu ndihí tsican tahvi ra, tan tsicá tuhun ra tsi ra tsicá tsihin ra tan catyí ra tsihin ra naha:

—¿Náa catyí nyívi tuhun yu, yóo ra cuví yu, catyí ñi?

¹⁹ Tan nacahán ra tsicá tsihin ra, tan catyí ra naha:

—Yihí ñi catyí ñi tyin ra Juan, ra jacoondutyá tsi nyívi, cuví un. Tan yihí ñi catyí ñi tyin ra Elías cuví un. Tan yihí ñi catyí ñi tyin inga ra cuví ndusu yuhu Nyoo taħan tsanaha cuví un —catyí ra naha.

²⁰ Tacan tan nducú tuhun ra Jesús tsi ra naha, tan catyí ra:

—Tan nyooħo, ¿yóo ra cuví yuhu, cuñí maa ndo?

Tan nacahañ ra Pedro, tan catyí ra:

—Yoħo cuví ra Cristo, ra tsa quee nu nyaá Nyoo.

²¹ Tan catyí ra Jesús tsihin ra naha tyin ña cahan ra naha can tsihin nyívi.

Nu jacoto ra Jesús nácaa cua cahñi nyívi tsi ra
(Mt. 16.20-28; Mr. 8.30—9.1)

²² Tacan tan catyí ra tsihin ra naha inga tsaha:

—Yuhu Rayí tsa quee nda gloria cuví yu. Tan taahán tsi tyin cuaħa xaan tundoho cua nyehe yu. Tan ra cuví mandoñi naha ra, tan ra cuví jutu tsa cuví ityí nuu naha ra, tsihin ra maestro cuenda ley naha ra ña cua tsinu iñi ra naha tsi yu. Tan cua cahñi ra naha tsi yu. Maa tyin tsa tsinu uñi quívi cua nandoto yu —catyí ra Jesús.

²³ Tacan tan catyí ra tsihin ra naha:

—Nyooħo tsa cuñí cunycicun tsi yu, caħnya iñi ndo tsa cuñí maa ndo javaha ndo, tacan tan cuví javaha ndo tsa cuñí Nyoo. Ña ndu uvi iñi ndo tsa yihí ndo cuenda yu vasu tandihí quívi nyehé ndo tundoho. Tyin yacan cuví tumaa cruu tsa taahán tsi cuiso ndo tatun cua cunycicun ndo tsi yu. ²⁴ Tan nyooħo tsa ña cuñí nyehe tundoho tan ña cuñí ndo cuħva ndo ñayívi iyó ndo tsa cuenda yu, cua nyehe ndo tundoho anyaya. Maa tyin nyooħo tsa cua cuħva ñayívi iyó ndo tsa cuenda yu, cua cacu ndo. ²⁵ Nduve yahvi nyaá cua ñihí ndo tandihí tsa iyó nu ñuhu ñayívi ihya, tun ña cua cacu añima ndo. ²⁶ Tyin tatun cahan nuu ndo tsa xaan cuñí nyívi nyehé ñi tsi ndo tsacatyí yuhu, tan tsacatyí tuhun caahán yu, cua nducahan tucu nuu maa yu nyehe yu tsi ndo na tsaa quívi quítsi yu inga tsaha. Tyin cua quítsi nyico yuhu Rayí tsa quee nda gloria tsihin tsa cahnu cuví yu, tan tsa cahnu cuví Nyoo Jutu yo, tan ángel tsa cuenda ra. ²⁷ Tan tsa nditsa catyí yu tsihin ndo tyin yihí ndo tsa nyecú ndo ihya vityin, ña cua cúu ndo nda cuanda yaha nyehe ndo nácaa cuví nu ndacá ñaha Nyoo.

Nu uñi taahan ra tsicá tsihin ra Jesús nyehé ra naha nácaa cuví nu ndacá ñaha Nyoo

(Mt. 17.1-8; Mr. 9.2-8)

²⁸ Una quívi yaha tsa cahañ ra Jesús yacan, tan ndaħ ra iin yucu tyin cua ndacan tahvi ra tsi Nyoo. Tan cuaħán ra Pedro, ra Jacobo tan ra Juan tsihin ra. ²⁹ Tan tsa ndi tsicán tahvi ca ra Jesús, tan nasama quħva caá nuu ra tan jahma ra. Sií xaan cuítsin tsi tan xiñu tsi. ³⁰ Tacan tan quítuví uvi taahan ra natuhún tsihin ra, ra Moisés tan ra Elías. ³¹ Tan nditsin xaan nu yucú ra naha. Tan caahán ra naha cuenda tsa cua nyehe ra Jesús tundoho ñuu Jerusalén tan cua cúu ra. ³² Tan vasu cuñí xaan ra Pedro naha ra cusu ra naha, maa tyin ña quixj maa ra naha tyin nyehé ra naha tsa nditsin cuví nu nyaá ra Jesús tsihin ra nyecú tsihin ra. ³³ Cuhva tsa cuaħán ra tsinyecu tsihin ra Jesús, tan catyí ra Pedro:

—Maestro, vaha xaan tsa yucú ndi ihya. Na javaha ndi uñi taahan tyahva, iin tsi maa un, iin tsi ra Moisés, tan iin tsi ra Elías —catyí ra Pedro, maa tyin ña tsitó ra tsa caahán ra.

³⁴ Tan tsa ndi caahán ca ra tan quítsi iin vico siqui ra naha. Tan nayuhvi xaan ra naha tsa quihvi ra naha tsitsi vico ican. ³⁵ Tacan tan tsitsi vico ican tsiñi ra naha iin ndusu tsa catyí:

—Juvín ra ihya cuví Sehe yu, tan cuñí xaan yu tsi ra. Tyaa soho ndo tsa caahán ra —catyí ndusu ican.

³⁶ Tan tsa yaha cahan ndusu ican, tan nanyehé ra naha tyin intuhun ña maa ra Jesús nyaá ican. Tan yoñi maa tsihin cahan ra naha tsa nyehe ra naha.

Nu janduvaha ra Jesús tsi iin ra luhlu tsa yihí tatyí ña vaha
(Mt. 17.14-21; Mr. 9.14-29)

³⁷ Tan tsa inga quivi tsa nuu ra Jesús yucu ican, cuaha xaan nyivi tsijatahan tsi ra. ³⁸ Tacan tan cana tsa iin ra cuahán tsihin nyivi cuaha tsa tsijatahan tsi ra Jesús, tan catyí ra:

—Maestro, jaha tumañi iñi. Cundaahvi iñi tsi sehe yu. Tyin intuhun ñi maa ra cuví sehe yu. ³⁹ Tan tuhvá tatyí ña vaha quihvi tsi ra. Tan tuhvá ra caná tsa jahá nu. Tan janduvá nu tsi ra ndasava. Tan quitá tiñuu yuhu ra. Quiñi xaan taahán ra jahá nu. Tan ña cuñí maa nu tatyí ña vaha ican jaña nu tsi ra. ⁴⁰ Tsa cahan yu tsihin ra tsicá tsihin un na tava ra naha tsi nu tatyí ña vaha ican, maa tyin ña cuví tava ra naha tsi nu —catyí ra.

⁴¹ Tacan tan nacahan ra Jesús tan catyí ra:

—Nyooho, nyivi ña tsinú vaha iñi. Tan caquiñi ndo. ¿Najava taahan ca quivi cunyaa yu tsihin ndo tan cunyeé iñi yu nyehe yu tsi ndo nda cuanda cutuhva ndo tan tsinu iñi ndo tsi yu?

Tan catyí ra tsihin ra ican:

—Ndaca sehe un tsi yu.

⁴² Tan cuhva tsa natuhva ra luhlu can nu nyaá ra Jesús, tan janduva nu tatyí ña vaha ican tsi ra ndasava. Maa tyin ra Jesús tava ra tsi nu tatyí ña vaha ican. Tan janduvaha ra tsi ra. Tacan tan nacuhva cuenda ra tsi ra tsi jutu ra. ⁴³ Tan tandihí nyivi, iyo xaan cuñí ñi tsa cahnu tsa javaha Nyoo nu yucú ñi.

Tsitsi tsa iyo cuñí nyivi tsa javaha ra Jesús, tan catyí ra tsihin ra tsicá tsihin ra:

Nu cahan ra Jesús inga tsaha tyin cua cahñi nyivi tsi ra
(Mt. 17.22-23; Mr. 9.30-32)

⁴⁴—Tyaa soho vaha ndo tuhun caahán yu. Tan ña naa iñi ndo. Tyin Rayi tsa quee nda gloria, cua cuhva cuenda nyivi tsi ra tsi ra xaan iñi tsi ra —catyí ra Jesús.

⁴⁵ Maa tyin ra tsicá tsihin ra ña cutuñi iñi ra naha nacuenta cahan ra tacan. Tyin Nyoo ña tsaha ra tsa cutuñi iñi ra naha. Tan yuuhví ra naha nducu tuhun ra naha tsi ra Jesús naa cuví tsa caahán ra.

Nu janaha ra Jesús yoo ra tsa cahnu ca cuví nu ndacá ñaha Nyoo
(Mt. 18.1-5; Mr. 9.33-37)

⁴⁶ Tacan tan ra tsicá tsihin ra quítsaha caahán yuhu tahan ra naha, ndáa ra cahnu ca cuví tsitsi tsa utsi uvi taahan ra naha. ⁴⁷ Tan tsitó ra Jesús tsa tsicá iñi ra naha, tan quihín ra iin ra luhlu. ⁴⁸ Tan catyí ra tsihin ra naha:

—Tatun tsihin sivi yu naquihín cuenda ndo tsi iin nyivi tsa ña cahnu jahá ñi tsi ñi tumaa ra luhlu ihya, tsi yuhu naquihín cuenda ndo cuví can. Tan tatun naquihín cuenda ndo tsi yu, tsi maa Nyoo tsa jaquítsi tsi yu, naquihín cuenda ndo. Tyin nu yucú ndo, ra tsa ña cahnu cuví, juvín ra cuví ra cahnu cuví nuu Nyoo —catyí ra Jesús.

*Nyivi tsa ña cuxaán tsi yo, juvin ñi ican jatyinyeé tsi yo
(Mr. 9.38-40)*

⁴⁹ Tacan tan ra Juan catyí ra tsihin ra Jesús:

—Maestro, nyehe ndi tsi iin ra tavá tatyí ña vaha. Caahán ra sivi un tan tavá ra tatyí ña vaha. Maa tyin ña tsaḥa ca ndi javaha ra tacan. Tyin ñavin tsihin yo tsicá ra —catyí ra.

⁵⁰ Tacan tan catyí ra Jesús tsihin ra:

—Ña casi ndo tsi ra. Tyin ra ican, ñavin ra xaan iñi tsi yo cuví ra, juvin ra cutahán tsihin yo cuví ra —catyí ra.

Nu cahañ ra Jesús tsihin ra Juan tan tsihin ra Jacobo tyin ña vaha tsa tsicá iñi ra naha

⁵¹ Tuví iñi ra Jesús tyin tsa nyaa naa yatyin quivi tsa cunuhu ra gloria. Tan jandu iñ ra iñi ra, tan quihñ ra ityi tan cuahán ra ñuu Jerusalén. ⁵² Tan tava tyiñu ra na cuhun ra tsicá tsihin ra ityi nuu ca. Tan cuahán ra naha nda iin ñuu cuenda Samaria, tyin nducú ra naha nu quitatu ra Jesús. ⁵³ Maa tyin nyivi Samaria ican, ña cuñi ñi tsa ndoo ra ndacan, tyin tuví iñi ñi tyin Jerusalén cuahán ra, tan nyivi Samaria ndasi cuñi ñi nyehe ñi tsi nyivi ñuu Jerusalén. ⁵⁴ Tan tsa tsitó ra Jacobo tan ra Juan tsa ña tsaḥá ñi Samaria ican tsa ndoo ra ican, catyí ra naha tsihin ra Jesús:

—Jutu Mañi ndi, ¿A cuñi un tsa ica yo tumaa ica ra Elías? Cua ndacan yo tsi Nyoo na jaquitsi ra ñuhu andivi tyin cayu ñi Samaria ican tyin ña cuñi ñi tsa ndoo yo ñuu ñi —catyí ra naha.

⁵⁵ Tacan tan nyehe ra Jesús nuu ra naha. Tan cuxaḥa ra tsi ra naha tan catyí ra:

—Taxin ñi ndo. Ña vaha tsicá iñi ndo tyin ña cutuñi iñi ndo náa tyiñu vatsi yuhu. ⁵⁶ Tyin Rayi tsa quee nda gloria, ña vatsi ra tyin janaa ra tsi nyivi, maa tyin vatsi ra tyin jacacu ra tsi ñi —catyí ra.

Tacan tan cuahán ra naha inga ñuu.

*Nyivi tsa cuñi quihvi cuenda ra Jesús
(Mt. 8.19-22)*

⁵⁷ Tan tsitsi tsa tsicá ityi ra naha, quita iin ra, tan catyí ra tsihin ra Jesús:

—Jutu Mañi yu, cuñi yu cunyicun yu tsi un. Tan cuhun yu tsihin un tandihi ñi ityi cuhun un —catyí ra.

⁵⁸ Tacan tan catyí ra Jesús tsihin ra:

—¿A nditsa un? Tyin ñicuii iyó vehe ti. Tan saa iyó taca ti. Maa tyin Rayi tsa quee nda gloria ndi nu cava jiñi ra tan nduve iyó —catyí ra tsihin ra ican.

⁵⁹ Tacan tan catyí ra Jesús tsihin inga ra:

—Cohon tsihin yu.

Tacan tan nacahañ ra ican, tan catyí ra:

—Taa, cūatu nuu tsi yu, na cuhun jihna yu cucutsi yu tsi jutu yu —catyí ra.

⁶⁰ Tacan tan ra Jesús nacahañ ra tan catyí ra tsihin ra:

—Naçoo tsi nyivi ña iyó Nyoo añaima na cucutsi tahan maa ñi tsi ñi tsitsi ñuhu tun tsihi ñi. Maa tyin yooho cūaahan cahan un tuhun Nyoo tsihin nyivi na cuhva cuenda ñi tsi ñi tsi Nyoo na cundaca ñaha ra tsi ñi —catyí ra.

⁶¹ Tacan tan catyí inga ra tsihin ra Jesús:

—Cuñi yu cunyicun yu tsi un, tata. Maa tyin cūhva na cuhun jihna yu cucahan yu tsihin nyivi vehe yu —catyí ra.

⁶² Tan ra Jesús catyí ra tsihin ra:

—Tumaa iin ra tahví ñuhu tsihin indíqui, tatun nanyehe tsata ra, ña quita vaha yucun nu jahá tyiñu ra. Tan tacan cuví iin ra nyicún tsi yu, tatun cuñí nyico ra tsa tsa nacoq ra, ña cuví cuhva ra tsi ra cundaca ñaha Nyoo —catyí ra Jesús tsihin ra.

10

Nu tavq ra Jesús tyiñu tsi uñi xico utsi taahan ra cua cahan tuhun Nyoo tsihin nyivi

¹ Tsa yaha can tan nacatsí Jutu Mañi yo Jesús tsi inga uñi xico utsi ca ra naha. Tan jacuhun ra tsi ra naha tandihí ñi ñuu, uvi uvi ra cuahan tsa iin nu cuahán ra nu cua cuhun ra Jesús. ² Tan catyí ra tsihin ra naha:

—Tumaa iin itu cahnu xaan, tacan cuví tyiñu jahá yu. Maa tyin cumañi xaan musu. Yacan cuenda ndacan ndo tsi Nyoo na jaquitsi ca ra musu, tyin jatyinyee ra naha tsi ndo cahan ndo tuhun Nyoo tsihin nyivi. ³ Tan cuaahan ndo tan nyehe ndo tyin cua jacuhun yu tsi ndo tumaa mbee mahñu lobo tsa cuví quiti xaan. Tyin lobo tuhvá ti tsahñi tsi mbee. Tan tacan tucu cua cuñí nyivi cahñi ñi tsi ndo. ⁴ Tan ña cua cuiso ndo ndi marali tan ndi nu yihí xuhun ndo, tan ndi inga pari nditsan ndo ña cuiso ndo. Janumi ndo. Tun taahán ndo nyivi ityi cuahán ndo cuhva ndo nacumi tsi ñi tan ña cucuñi ndo natuhun ndo tsihin ñi. ⁵ Cuhva tsa quihví ndo tsitsi vehe iin nyivi, cahan ndo tsihin ñi. Tan catyí ndo, na coo tsa vaha añima ñi. ⁶ Tan tacan tucu tatun iyó nyivi vaha iñi vehe ican, cua ndoo tsa vaha can tsihin ñi. Maa tyin tatun yofi ñi vaha añima, ña cua ndoo tsa vaha tsihin ñi. ⁷ Tan ndoo ndo juvin ñi maa vehe ican. Tatun tsahá ñi tsa catsi ndo, catsi ndo. Tatun tsahá ñi tsa coho ndo, coho ndo itsi. Tyin ra jahá tyiñu, iyó ndatu tsi ra tsa catsi ra tsa jahá canaa ra. Iin ñi maa vehe ican cuyucu ndo nda cuanda tsa tsaa quivi tsa cuhun ndo inga ñuu. ⁸ Tan nu tsaa ndo iin ñuu tan vaha cahan ñi tsihin ndo, catsi ndo tandihí tsa cuhva ñi catsi ndo. ⁹ Tan janduvaha ndo tsi ñi cuuhví ñuu ican. Tan catyí ndo tsihin ñi: “Tsa nyanaá yatyin Nyoo, ra cuñí quihví añima ndo cundaca ñaha ra tsi ndo.” ¹⁰ Maa tyin tatun tsaa ndo iin ñuu tan ña cuñí nyivi tyaa soho ñi tsa caahán ndo, quita ndo ityi cahnu. Tan catyí ndo tsihin ñi: ¹¹ “Nda cuanda nyaca ñuhu ñuu ndo tsa iñi tsaha ndi, tan cua naquisi ndi. Tyin cuñí tsi catyí tyin cuatyí ndo ndoo can siqui ndo. Tyin Nyoo nyanaá yatyin ra tsihin ndo tan ña tyaa soho ndo tsa caahán ra nácaa cuñí tsi tsa cundaca ñaha ra tsi ndo.” Tacan catyí ndo tsihin ñi —catyí ra Jesús tsihin ra tsa uñi xico utsi can naha ra.

¹² Tan catyí tucu ra tsihin ra naha:

—Quivi cua tatsi tuñi Nyoo tsi nyivi, yaha ca cuhva cua nyehe nyivi ñuu ican tundoho tan ñavin ca nyivi tsicoq taħan tsanaha ñuu Sodoma, —catyí ra Jesús.

Nyivi ña tyaa soho tuhun caahán ra Jesús cua nyehe ñi tundoho

(Mt. 11.20-24)

¹³ Tan catyí ra Jesús:

—ñDahvi nyooho, nyivi ñuu Corazin! Tan jndahvi nyooho nyivi ñuu Betsaida! Tyin nyehé ndo tsa iyo javahá yu, tan ña cuñí ndo nasamá ndo cuhva iyó ndo. Maa tyin nyivi ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehé nyooho vityin, numi xaan ca cunditsi ñi jahma tucuiihya iñi tan cunyecu ñi nu nyaa: tsa ndu uvi iñi ñi cuatyí ñi cuví can. ¹⁴ Yacan cuenda, nyooho nyivi ñuu Corazin tsihin ñuu Betsaida, ñihi ca cua tatsi tuñi Nyoo tsi ndo tan ñavin ca nyivi ñuu Tiro tan nyivi ñuu Sidón can. ¹⁵ Tan nyooho nyivi ñuu Capernaum, cuñí maa ndo tyin cundaa ndo nda

cuanda andivi. Maa tyin cua nuu ndo nda cuanda nu yucú ndiyi anyaya, tyin ña tyaá yahvi ndo tuhun Nyoo —catyí ra Jesús.

¹⁶ Tan catyí ra tsihin tsa uñi xico utsi taahan ra can naha ra:

—Nyivi tsa tyaá soho tsa caahán nyoocho, tsa caahán yuhu tyaá soho ñi. Tan nyivi ña tyaá soho tsa caahán nyoocho, tsa caahán yuhu ña tyaá yahvi ñi. Tan ñi ña tyaá yahvi tsa caahán yuhu, tsa caahán ra tsa jaquitsi tsi yu, ña tyaá yahvi ñi —catyí ra Jesús tsihin ra naha.

Nu tsaq nyico tsa uñi xico utsi ra tsa tsahan tsicahan tuhun Nyoo

¹⁷ Ihya cuví nu tsaq nyico tsa uñi xico utsi ra tsa tsahan tsicahan tuhun Nyoo tsihin nyivi. Tan sii xaan cuñi ra naha. Tan catyí ra naha tsihin ra Jesús:

—Jutu Mañi nyuhu, nda cuanda nu tatyí ña vaha tan tyaá yahvi nahnu tsa cahan ndi tsihin sivi un —catyí ra naha.

¹⁸ Tacan tan catyí ra Jesús tsihin ra naha:

—Tacan tyin yuhu nyehe yu andivi nu canacava nu ña vaha, nu nañi Satanás. Tumaa cañi iin tatsa savi, tacan canacava nu. ¹⁹ Tan maa yuhu, tsaha tunyee iñi tsi ndo tyin cuví cañi tahan ndo tsihin nu ña vaha. Tan cuví cuañi ndo tsata coo tan tujuhma, tan nduve tsa cua jaha ti naha ti tsi ndo.

²⁰ Maa tyin ña cusii xaan iñi ndo tyin cuví tava ndo tatyí ña vaha ican. Cusii ca iñi ndo tyin nyaá sivi ndo nu libru Nyoo nda gloria —catyí ra Jesús tsihin ra naha.

Nu jacahnú ra Jesús tsi Nyoo tsa sii cuñi ra tyin janahá Nyoo tsa vaha tsi nyivi ndaahvi

(Mt. 11.25-27; 13.16-17)

²¹ Tacan tan sii xaan cuñi ra Jesús jahá Tatyí Ii Nyoo, tan catyí ra:

—Jacahnú yu tsi un, Jutu yu, tyin yooho cuví ra ndacá ñaha andivi tan nu ñuhu ñayivi ihya. Tyin maa un janahá un tuhun maa un tsi nyivi ndaahvi ihya. Tan ña janahá un tsi un tsi ra tsitó tan ra nyityi. Tacan cuví tsi Jutu yu tyin tacan cuñi maa un —catyí ra Jesús.

²² Tan catyí ra Jesús tsihin tandihi ra naha:

—Tandihí maa tsaha Jutu yu tsi yu. Yoñi tsitó tsi yu, intuhun ñi maa Jutu yu tsitó tsi yu. Tan yoñi tsitó yóo ra cuví Sehe Nyoo, intuhun ñi maa Jutu ra tsitó tsi ra. Tan yoñi tsitó yóo ra cuví Nyoo Jutu, intuhun ñi Sehe ra tsitó tsi ra. Tan coto tucu nyivi tsa cuñi Sehe Nyoo jacoto ra tsi ñi —catyí ra Jesús.

²³ Tacan tan nanyehé ra nu nyecú ra tsicá tsihin ra. Tan caahán xeehe ra tsihin ra naha:

—Sii xaan cuñi nyoocho tan nyivi tsa iyó vityin tyin nyehé ndo tsa javahá yu. ²⁴ Tyin cuaha xaan rey tan ra cuví ndusu yuhu Nyoo tahañ tsanaha, cuñi ra naha nyehe ra naha tsa nyehé nyoocho vityin. Maa tyin ña nyehe ra naha. Tan cuñi ra naha tyaá soho ra naha tsa tsiñi nyoocho vityin. Maa tyin ña tsiñi ra naha —catyí ra Jesús tsihin ra tsa tsicá tsihin ra.

Nu jacuahá ra Jesús tsi yo tyin taahán tsi jatyinyee yo tsi tandihí ñi maa nyivi

²⁵ Tacan tan tsaq iin ra maestro cuenda ley vehe ñuhu. Tan quitsahá tsicá tuhun ra tsi ra Jesús, tyin nducú cuhva ra tsi ra. Tan catyí ra:

—Maestro, ¿nácaa cua javaha yu tan cuhun yu coo yu ñayivi nyito tsa ña cua naa maa?

²⁶ Tacan tan nacahan ra Jesús, tan catyí ra tsihin ra:

—¿Náa catyí nu ley? ¿Nacaa catyí tsa cahvi un?

²⁷ Tacan tan nacahan ra maestro cuenda ley ican tan catyí ra:

—Catyí ley tyin cuñi yo tsi Nyoo tsihin tan# añima yo tan tsihin tandihi cuhva tsicá iñi yo, tan tsihin tandihi tunyee iñi tsa iyó tsi yo, tan tsihin tandihi tsa tsiñi tuñi tsa iyó tsi yo. Tan cuñi yo tsi nyivi tumaa tsa cuñi yo tsi maa yo. Tacan catyí ley —catyí ra ican.

²⁸ Tacan tan catyí ra Jesús tsihin ra:

—Nditsa tsa caahán un. Tacan javaha un tan coo un ñayivi nyito tsa ña cua naa maa —catyí ra Jesús.

²⁹ Maa tyin ra maestro cuenda ley can cuñi ra cuvi ra ra vaha nuu ra Jesús, tan catyí ra tsihin ra:

—¿Tan yóo nyivi cuñi yu? —catyí ra.

³⁰ Tacan tan nacahan ra Jesús, tan catyí ra:

—Iin ra quee ñuu Jerusalén cuahán ra nda ñuu Jericó. Tan tahan ra tsi nu ñasuhu nahnu. Tan suhu nahnu tandihi maa tsa nyisó ra, nda cuanda jahma ra. Tan cañi nahnu tsi ra nda cuanda tsaquín taxin ña nahnu tsi ra. Tan nacoq ihñi nahnu tsi ra ican. ³¹ Tacan tan yaha iin ra cuvi jutu ityi can. Maa tyin tsa nyehe ra tsi ra canyií ican, ndasava ñi yaha tsiyo ra. ³² Tacan tan yaha tucu iin ra yihí cuenda vehe ñuhu, ra cuvi tata ra Leví. Maa tyin tsa nyehe ra tsi ra canyií ican, juvin ñi ndasava yaha ra. ³³ Tacan tucu iin ra Samaria yaha ra juvin ñi ityi can. Tan nyehe ra tsi ra canyií ican, tan quitsi tsa ndaahvi cuñi ra nyehe ra tsi ra. ³⁴ Tan natuhva ra nu canyií ra, tan quitsaha tyaá ra numeri tsi ra, tyihí ra acetye tsihin vinu nu uhvi can. Tan tyaa ra iin jahma vita nu uhvi can. Yaha can tan jandaq ra tsi ra tsata burru jana ra, tan quihin ra tsi ra, cuahán tsihin ra nu nyaá iin vehe. Tan jahq cuenda ra tsi ra. ³⁵ Tan tsa inga quivi tsa cuñi cuhun ra Samaria. Tan tavq ra uvi taahan xuhun. Tan tsaha ra tsi ra jatsii vehe can. Tan catyí ra tsihin ra: “Jaha cuenda vaha tsi ra ihya. Tan cuhva tsa catsi ra. Tan jata un numeri tsi ra na nduvaha ñi ra. Tatun cuñi ca tsi xuhun, tyahvi maa yu tsi un tsa quitsi nyico yu”, catyí ra. Tacan tan cuahán ra —catyí ra Jesús.

³⁶ Nu ndihí nacatyí tuhun ra Jesús, tan nducu tuhun ra tsi ra maestro can, tan catyí ra:

—Vaha. ¿Tsa uñi taahan ra naha, tan ndaa ra cuvi ra vaha iñi tsi ra ndaahvi tsa tsinyaa ndaha nu ñasuhu nahnu? —catyí ra Jesús.

³⁷ Tacan tan catyí ra maestro ican:

—Ra tsa cundaahvi iñi tsi ra —catyí ra.

Tacan tan catyí ra Jesús:

—Cuaahan tan ica tucu yooho tacan tsihin nyivi tsa nyehé tundoho —catyí ra.

Nu tsinyaa ra Jesús vehe ña Marta tsihin ña María

³⁸ Tan quihin ra Jesús ityi cuahán ra. Tan tsaa ra iin ñuu. Tan ican iyó iin ñaha tsa nañi Marta. Tan tsaa ra vehe ña. Tan tsaha ña quihvi ra tsitsi vehe ña. ³⁹ Tan ña Marta, iyó iin tahan ña nañi María. Tan ña María tsicunyaq ña yatyin ñi tsaha ra Jesús, tyin tyaa soho ña tsa caahán ra. ⁴⁰ Tan ña Marta cuaha xaan tyiñu javahá ña. Tan tsaa ña nu nyaá ra Jesús, tan catyí ña tsihin ra:

—Yooho tata. ¿A ña tsicá iñi yooho tyin ña tahan yu nacoq ña tsi intuhun ñi maa yu tsihin tyiñu ihya? Cahán tsihin ña na jatyinyee ña tsi yu —catyí ña tsihin ra.

⁴¹ Maa tyin ra Jesús catyí ra tsihin ña:

—Marta, Marta, tsicá xaan iñi un tan tuñu xaan cuñi un tsihin tyiñu can.

⁴² Maa tyin iyó intuhun tsa ñiñi ca taahán tsi caca iñi yo. Tan ña María ihya

nacatsi ña tyiñu vaha ca javahá ña. Tan yoñi cuví quinyaa can tsi ña —catyí ra Jesús tsihin ña Marta.

11

Nu jacuahá ra Jesús tsi ra tsicá tsihin ra nácaa ndacan tahvi ra naha tsi Nyoo (Mt. 6.9-15; 7.7-11)

¹ Cuví iin tsaha tsa tsicán tahvi ra Jesús. Tsa ndihí tsicán tahvi ra, tan catyí iin ra tsicá tsihin ra:

—Janaha nácaa ndacan tahvi ndi tsi Nyoo, tumaa janahá ra Juan tsi ra tsica tsihin ra —catyí ra.

² Tacan tan catyí ra Jesús tsihin ra:

—Cua huhva yu huhva tsi ndo nácaa. Tyehen ndacan tahvi ndo, catyí ndo: Jutu Mañi ndi, yooho tsa nyaá un gloria. Jacahnú xaan ndi tsi un.

Na quitsi quivi tsa ndaca ñaha un nu ñuhu ñayivi ihya.

Na javaha nyivi nu ñuhu ñayivi ihya tandihí huhva cuñi maa un, tumaa huhva cuví nda gloria.

³ Cuhva tsa catsi ndi tan yaha ndi iin iin quivi.

⁴ Jaha tucahnu iñi tsi ndi tsa cuenda cuatyí ndi. Tyin nyuhu jahá tucu maa ndi tucahnu iñi tsi nyivi xaan iñi tsi ndi.

Ña cua huhva un tsa nducu huhva nu ña vaha tsi ndi. Tan jacacu tsi ndi tan ña cua cunyeen nu ña vaha tsihin ndi.

Tacan ndacan tahvi ndo —catyí ra Jesús.

⁵ Tan catyí tucu ra:

—Na catyí yo tyin iin nyooho iyó iin ra vaha iñi tsi ndo, tan tsaá ra vehe ndo tsa tsa cuaa tan catyí ra tsihin ndo: “Jaha tumañi iñi tsi, xin. Cuhva nuu uñi taahán paan tsi yu. ⁶ Tyin iin ra vaha iñi tsi yu ndi tsaá ra yuvehe yu. Tan cañi xaan quee ra. Tan nduve tsa huhva yu catsi ra.” ⁷ Tan nyooho cua

nacahan ndo tan catyí ndo tsihin ra: “Ña jatyañu un tsi yu, xin. Tyin ndasí yuvehe yu. Tan ndi quixí yu tsihin sehe yu. Tan ña cuví nduvita yu tan huhva yu tsa huhva yu tsi un tsa vityin.” Tacan cua catyí ndo tsihin ra. ⁸ Tan catyí yu tsihin ndo. Vasu ra vaha iñi ndo cuví tsi ra can, ña cua nduvita ndo tan huhva ndo tsa nducú ra tsa numi ñi. Maa tyin tatun caahán yuhu ra tsihin

ndo, jandatsan ra yuvehe ndo tan caná tsaá ra tsi ndo tsa ña cua cuví cusu ndo, tacan tan cua nduvita ndo tan huhva ndo tsa nducú ra. Tacan tan ña cua jatyañu ca ra tsi ndo. ⁹ Tan tacan tucu nyooho tsihin Nyoo, ndacan ndo tsi ra. Tan cua huhva ra tsi ndo. Nanducu ndo tan cua ñihi ndo. Jandatsan ndo yuvehe tan cua nuña. ¹⁰ Tyin tatun ndacan ndo, cua ñihi ndo. Tatun nanducu ndo, cua nañihi ndo. Tatun cua jandatsan ndo yuvehe, cua nuña tsi.

¹¹ Tacan tucu nyooho tsa iyó sehe. Tuhvá ndo tsahá tsa vaha tsi sehe ndo. Ña tuhvá ndo huhva iin yuu itsi tun tsicán tsi paan. Tan ña tuhvá ndo huhva iin coo itsi tun tsicán tsi tyaca. ¹² Tan ña tuhvá ndo huhva tujuhma tsi sehe ndo tatun tsicán tsi ndivi catsi tsi. ¹³ Nyooho quiñi iyó ndo, maa tyin tsitó ndo nácaa huhva ndo tsa vaha tsi sehe ndo. Tan vihi ca maa Jutu Mañi yo, ra nyaá gloria, huhva ra Tatyí li ra cunyaa añima ndo tun ndacan ndo tsi ra.

Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo

(Mt. 12.22-30; Mr. 3.20-27)

14 Ra Jesús tavá ra tatyí ña vaha tsa janduñihí tsi iin rayíi. Tsa quita nu tatyí can tsi ra can, cuví nacahan ra. Tacan tan iyo xaan cuñí nyívi tsa nyehé ñi tsa cuví. 15 Tan yihí ñi catyí ñi:

—Ra ihya, tavá ra tatyí ña vaha tsihin tunyee iñi nu Beelzebú nu cuví ityi nuu tsihin tandihí tatyí ña vaha —catyí ñi.

16 Tan yihí ñi cuñí ñi nducu huhva ñi tsi ra, tan tsicán ñi tsi ra Jesús na javaha ra iin tsa iyo tsa quita andívi. 17 Maa tyin ra Jesús tsitó ra tsa tsicá iñi ñi. Tan catyí ra tsihin ñi:

—Tatun ra ndacá ñaha naha ra tan natahvi ra naha, tan cañi tahan ra naha, tacan tan cundihi tyiñu tsa ndacá ñaha ra naha. Tan tatun iin vehe tan natahvi nyívi tsihin tahan ñi, tacan tan cua tiví nu yucú ñi. 18 Tan tacan tucu nu ña vaha, tatun natahvi nahnu, cua cundihi tunyee iñi tsa iyó tsi nahnu. Caahán yu tyehen tsihin ndo, tyin catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu. 19 Maa tyin tun tsatyin tavá yu tsi nahnu tumaa huhva catyí ndo, ndaca tuhun ndo tsi ra nyecú tsihin ndo yóo tsahá tunyee iñi tsi ra naha tan tavá ra naha tsi nahnu. Maa ra naha cua cahan tsa nditsa tsihin ndo tyin nyooho soho xaan tsicá iñi ndo. 20 Maa tyin catyí yu tsihin ndo tyin yuhu tavá yu tatyí ña vaha tsihin tunyee iñi Nyoo. Tan cuñí tsi catyí yacan tyin nditsa tyin Nyoo, ra taahán tsi cundaca ñaha tsi nyívi, tsa tsaá ra nu yucú ndo.

Nu jacuahá ra Jesús tyin ñihi ca tunyee iñi Nyoo tan ñavin ca tunyee iñi nu ña vaha

21 Tatun iin ra tan iyó xaan tunyee iñi tsi ra tan nyisó ra mityi ra, tan jahá cuenda ra vehe ra, nu yihí xeehe vaha ndaha tyiñu ra tsitsi vehe ra, tsa ña cua cuví quinyaa ñasuhu. 22 Maa tyin tatun quitsi iin ra tsa cuaha ca tunyee iñi iyó, tan cañi tahan ra tsihin ra, tan cuví jaha canaa ra tsi ra, tacan tan quinyaa ra ndaha tyiñu ra tan natsatsa ra tsi ra vaha iñi tsi ra.

23 Nyívi ña jahá tyiñu tsihin yu, jativí ñi tyiñu jahá yu. Tan tatun ña caahán ñi tuhun Nyoo tsihin nyívi, tyin cunyicun ñi tsi yu; cuñí tsi catyí tsi tyin ña tsahá ñi tsa cunyicun nyívi tsi yu.

Nu jacuahá ra Jesús tsi yo nácaa quihvi tatyí ña vaha tsi yo inga tsaha tatun naa iñi yo

24 Tatun iin nu tatyí ña vaha quita nu tsi iin nyívi, tsicá nuu nu iin ñuhu ityi, nanducú nu nu quitatu nu. Maa tyin ña nañihí maa nu nu quitatu nu, tacan tan tsicá iñi nu: “Cunuhu nyico yu nda vehe yu nu quee yu.” 25 Tacan tan tsaá nyico nu añima nu quee nu. Tan nyehé nu tyin ndíi xaan tan síi xaan caá. 26 Tacan tan cua quihin nu utsa taahan ca tatyí ña vaha tsa yaha ca caquiñi tan ñavin ca maa nu. Tacan tan iin caa ñi cua quihvi tandihí nahnu añima ñi ican. Yacan cuenda yaha ca caquiñi ñi tan ñavin ca tsa jihna ñi —catyí ra Jesús.

Nyívi tsa nditsa iyó vaha ñi nu ñuhu ñayívi

27 Tsitsi tsa ndi caahán ca ra Jesús yacan, tan caná tsa iin ñaha tsa nyíi mahñu nyívi ican. Tan catyí ña:

—¡Náa tsa síi cuñí ñaha tsa jacacú tsi un, ñaha tsa jacaxin tsi un! —catyí ña.

28 Maa tyin ra Jesús catyí ra:

—Síi xaan ca cuñi nyívi tsa tsiñi tuhun caahán Nyoo tan tyaá yahvi ñi itsi —catyí ra.

Nyivi ña vaha, maa ñi maa tsa iyo cuñí ñi nyehe ñi
(Mt. 12.38-42; Mr. 8.12)

²⁹ Tacan tan tsaꞗ ca nyivi nu nyii ra Jesús. Tan catyí ra tsihin ñi:

—Nyivi tsa iyó vityin quiñi xaan iyó ñi. Tan nyiyo xaan iñi ñi. Cuñí ñi nyehe jihna ñi tsa iyo. Maa tyin intuhun ñi tsa iyo cua nyehe ñi, yacan cuví tsa javahꞗ Nyoo tsihin ra Jonás, ra cuví ndusu yuhu Nyoo tsanaha. Nduve inga ca tsa iyo cua nyehe ñi. ³⁰ Tumaa tsa janahꞗ ra Jonás tsi nyivi ñuu Nínive tahañ tsanaha tyin ii Nyoo, tacan tucu yuhu, Rayñi tsa quee nda gloria, janahꞗ yu tsi nyivi tsa iyó vityin tyin ii Nyoo. ³¹ Quivi cua tatsi tuñi Nyoo tsi nyivi, cua nandoto ñaha cuví reina ityi sur tahañ tsanaha, tan cua catyi ña tyin cuhun ndo anyaya tyin maa ña vasu cañi ñuu ña, maa tyin quitsi ña, quitsi tyaa soho ña tsa tsiñi tuñi tsa cahañ ra Salomón. Tan vityin cahnu ca cuví ra nyaá tsihin ndo tan ñavin ca ra Salomón. ³² Tan quivi cua cutuñi tandihí nyivi, cua nandoto nyivi tsicoo ñuu Nínive tahañ tsanaha, tan cua catyi ñi tyin nyoocho nyivi tsa iyó vityin cuhun ndo anyaya, tyin nyivi Nínive ican, nasamañ ñi cuhva iyó ñi quivi cahañ ra Jonás tuhun Nyoo tsihin ñi. Tan vityin cahnu ca cuví ra nyaá tsihin ndo tan ñavin ca ra Jonás.

Nu janahꞗ ra Jesús tyin na jaha yo cuenda añima yo na coo tsa nditsin jahá Nyoo

(Mt. 5.15; 6.22-23)

³³ Ndi intuhun ndo tan ña tuhvá ndo tyaa ñuhꞗ tyuma tan tyihí xeehe ndo can, a tinyii ndo can tsitsi iin caja. Tyin ñuhꞗ can taahán tsi cunyi can nu sucun. Tyin tatun quihvi nyivi tsitsi vehe ndo, nditsin. ³⁴ Tinuu yo, iin ñuhꞗ nditsin cuví tsi tsa cuenda cuñu ñuhꞗ yo. Tan tacan tucu tsa nditsin Nyoo, tsa cuenda añima yo. Tatun iyó tsa nditsin jahá Nyoo añima yo, vaha nyivi cuví yo. Tatun nduve tsa nditsin jahá Nyoo añima yo, tumaa iin ra cuaa cuví yo, ña cuví nyehe yo ityi vaha tsa cuahán nu nyaá Nyoo. ³⁵ Yacan cuenda jaha ndo cuenda tsi ndo, na coo tsa nditsin jahá Nyoo añima ndo, tan ña coo tsa naa. ³⁶ Tatun tsitú añima ndo tsihin tsa nditsin jahá Nyoo, nduve ca maa tsa naa iyó tsihin ndo, tyin jandunditsín tsi tanñi cahnu ndo. Tumaa tsa nyaá iin ñuhꞗ tyuma jandunditsín tsi tanñi cahnu ndo cuví can —catyí ra Jesús.

Nu cuxaꞗ ra Jesús tsihin ra maestro cuenda ley vehe ñuhu naha ra tan tsihin ra fariseo naha ra

(Mt. 23.1-36; Mr. 12.38-40; Lc. 20.45-47)

³⁷ Tsa ndihí cahañ ra Jesús tsihin nyivi, iin ra fariseo, catyí ra tsihin ra, na cuhun ra cucatsi ra yuvehe ra. Tan tsaꞗ ra Jesús vehe ra. Tan quihvi ra tsicunyaꞗ ra nu mesa.

³⁸ Tacan tan ra fariseo ican iyo cuñí ra tyin ña nacatyꞗ ra Jesús ndaha ra tsa ndi cumañi ca catsi ra, tumaa cuhva iyó maa ra naha. ³⁹ Maa tyin Jutu Mañi yo Jesús catyí ra tsihin ra:

—Nyoocho, ra cuví fariseo, tumaa tsa tsata ñi vasu tan coho nacuhvá ndo. Maa tyin ityi tsitsi, quiñi xaan caá can tyin ña nacatyá ndo can. Tacan cuví nyoocho. Tyin cuñi nyivi tyin vaha ndo. Maa tyin xeehe ñi suhú ndo tan javahꞗ ndo tsa ña vaha. ⁴⁰ Ndava xaan iñi ndo. ¿A ña tsitó ndo tyin ra tsa javahꞗ ityi tsata ndo, juvin ñi maa ra javahꞗ ityi tsitsi ndo? ⁴¹ Taahán tsi javahꞗ ndo tumañi iñi tsi nyivi ndaahvi, tan jatyinyee ndo tsi ñi tsihin tanñi añima ndo. Javaha ndo tsa vaha tsihin ñi, tacan tan nduvaha tucu ityi tsitsi ndo.

⁴² ¡Ndahvi nyooho ra fariseo! tyin nyooho, cahví ndo ndaha menta tan ndaha lura tan náa ndíhi ca yucu tsa tsatsí ndo, tan tavá ndo intuhun tsi tsa iin iin utsi tan tsahá ndo tsi Nyoo, maa tyin ña tyaa yahvi ndo tsa vaha tsa cuñí Nyoo javaha yo tan tsa cuñí yo tsi ra. Taahán tsi tsa cuñí vaha ca ndo tsi Nyoo tan javaha ndo cuhva cuñí ra, tan ña jandíhi ndo tsa cuhva ndo diezmo can. ⁴³ ¡Ndahvi nyooho tsa cuví ndo fariseo! tyin cuñí ndo cunyaa ndo nu tyayu vaha tsitsi vehe ñuhu. Tan cuñí ndo tsa tyaa yahvi nyívi tsi ndo nuyahví. ⁴⁴ ¡Ndahvi nyooho ra maestro cuenda ley, tan nyooho ra fariseo! Vaha xaan jahá ndo tsi ndo tan ña ndítsa ndo. Cuví ndo tumaa iin ñaña ndiyi tsa ña ndítsin ca canyíi. Tyin tsañi nyívi tsata can tan ña tsitó ñi tyin nyíi ndiyi tsitsi ñaña ican. Tyin nduve ca cuhva canyíi nu nyíi ndiyi ican. Cuñí maa nyívi tyin vaha ndo, tan ña tsitó ñi tyin ña vaha añima ndo —catyí ra Jesús.

⁴⁵ Tacan tan nacahan iin ra maestro cuenda ley vehe ñuhu, tan catyí ra:
—Maestro, tsa catyí un tacan, caahán nyaa ndíhi un tsi ndi —catyí ra.

⁴⁶ Tacan tan catyí ra Jesús tsihin ra naha:

—¡Ndahvi tucu nyooho ra maestro cuenda ley vehe ñuhu! tyin jacuahá ca ndo ley tsa tsahá Nyoo tahan tsanaha. Tan ña taahán tsi. Tan yoñi ndoyó carga can, tan jañíhi ca ndo na javaha nyívi can, tan maa ndo ndi luxu ña jatyinyeé ndo tsi ñi. ⁴⁷ ¡Ndahvi nyooho! tyin janduvahá vaha ndo ñaña nu ñuhú yiqui ra cuví ndusu yuhu Nyoo tsa tsahñi ra cuví tsi tsaahnu ndo tahan tsanaha. ⁴⁸ Yacan cuñí tsi catyí tyin ndoó ndo vaha tsa javahá tsi tsaahnu ndo naha ra. Tyin tsi tsaahnu ndo tsahñi ra naha tsi ra cuví ndusu yuhu Nyoo. Tan nyooho janduvahá ca ndo ñaña ra naha. ⁴⁹ Yacan cuenda catyí Nyoo tahan tsanaha tsihin tsa tsiñi tuñi ra tyin cua jaquitsi ra tsi ra cua cuví ndusu yuhu ra tan ra caca tyíñu ra nu iyó ndo. Tan cua cahñi ndo juhva ra naha tan inga ra cua jacunu ndo tsi ra naha. ⁵⁰ Tan ndítsa tyin tacan javahá ndo. Nyoo cua tatsi tuñi ra tsi ndo tan tsi nyívi iyó vityin tsa cuenda tandíhi ra cuví ndusu yuhu ra tsa tsahñi tsi tsaahnu ndo naha ra nda cuanda tsinú ñuhu ñayívi tan nda cuanda vityin. ⁵¹ Nda cuanda ñiñi ra Abel tsa tsatí tsa tsahñi ra Caín yañi ra tsi ra, tan nda cuanda ñiñi ra Zacarías tsa tsahñi nyívi tsitsi vehe ñuhu yatyin nu nyaá altar. Yacan cuenda catyí Nyoo tyin cua tatsi tuñi ra tsi nyívi tsa iyó vityin tsa catyí cuatyí nyívi tsa tsicoq tahan tsanaha. ⁵² ¡Ndahvi nyooho ra maestro cuenda ley vehe ñuhu! tyin tumaa tsa tyihí xeehe ndo ndaha tucu yuvehe nu quihví nyívi ityi nu nyaá Nyoo. Tan ndi maa ndo ña quihví ndo nu nyaá Nyoo. Tan ndi ña tsahá ndo tsa quihvi inga nyívi tsa cuñi quihvi —catyí ra Jesús.

⁵³ Ndíhi cahan ra Jesús tacan. Tan ra maestro cuenda ley vehe ñuhu naha ra tsihin ra fariseo naha ra, nduxaḡn xaan ra naha tan quitsahá nducú tuhun xaan ra naha tsi ra Jesús. ⁵⁴ Tyin cuñí ra naha tsa cahan ra Jesús iin tsa ña vaha, tyin tacan tan cuví tyaa ra naha cuatyí tsi ra.

12

Nu jacuahá ra Jesús tyin ña cuví tyihí xeehe yo cuatyí yo

¹ Cuenda mil nyívi ndu iin nda cuanda catyihí tahan ña ñi, tyin cuaha xaan ñi. Tacan tan ra Jesús cahan jihna ra tsihin ra tsicá tsihin ra:

—Jaha ndo cuenda tsi ndo tsihin ra fariseo naha ra tsihin cuatyí ra tsa cuví tumaa yutsan iya. Tyin ndaá paan jahá yutsan iya, tan tacan cuví cuatyí ra can naha ra. Tyin jahá ra naha tyin vaha ra. Maa tyin ña cuví tyihí xeehe ra naha cuatyí ra naha. ² Tyin nduve iin tsa yihí xeehe tan cuñí yo, tyin ña

cua quituvi. Tan nduve tsa xeehe tan cuñi yo, tyin ña cua coto nyivi. ³ Yacan cuenda, náa ndihi tsa caahán ndo nu xeehe, cua quita tsi nu nditsin. Tan náa ndihi tsa caahán ndo tsitsi vehe ndo, cua cana tsaa nyivi jiñi vehe.

¿Yóo taahán tsi nayuhvi yo, a tsi nyivi a tsi Nyoo?

(Mt. 10.28-31)

⁴ Tan catyí yu tsihin ndo tsa cuví ndo ra vaha iñi tsi yu, tyin ña nayuhvi ndo tsi nu tsahñi cuñu ñuhu yo. Tyin yaha can tan nduve ca tsa cuví javaha nu tsi yo. ⁵ Maa tyin cua catyí yu tsihin ndo yóo taahán tsi nayuhvi ndo. Nayuhvi ndo tan tyaa yahvi ndo tsi Nyoo, ra cuví quinyaa tsa nyito ndo. Tan yaha yacan tan cuví tyihi ra tsi ndo anyaya.

⁶ Saa, ña yahvi nyaá ti. Cuví jata yo uhun taahan ti tsihin uvi ñi xuhun. Vasu ndi maa nyihi ñi ti, Nyoo ña naá iñi ra tsi ndi intuhun ti. ⁷ Tan nyooho, nyaá yahvi ca ndo nu Nyoo tan ñavin ca tsa cuaha saa can, tan nda cuenda ixi jiñi ndo tan tsitó Nyoo najava taahan tsi iyó tyin tsa nacahvi ra intuhun intuhun tsi. Yacan cuenda ña nayuhvi ndo.

Na ña nayuhvi yo cahan yo tuhun ra Jesucristo tsihin nyivi

(Mt. 10.32-33; 12.32; 10.19-20)

⁸ Catyí yu tsihin ndo tyin tandihi nyooho tsa janahá ndo tsi nyivi tyin tsinú iñi ndo tsi yu, tacan tucu maa yu, cua cahan yu tuhun ndo nuu ángel Nyoo nda gloria. Tyin yuhu Rayii nda gloria quee yu. ⁹ Maa tyin nyooho tsa janahá ndo tyin ña tsinú iñi ndo tsi yu, tacan tucu maa yu, cua cahan yu nuu ángel Nyoo tyin ñavin nyivi cuenda yu cuví ndo. ¹⁰ Tan vasu cuxaan nyivi tsi yuhu, Rayii tsa quee nda gloria, Nyoo cua jaha ra tucahnu iñi tsi ñi. Maa tyin nyivi caahán tsa ndavaha ñi siqui Tatyí Ii Nyoo ña cua coo tucahnu iñi tsi ñi cuenda yacan.

¹¹ Quivi tsa cua cundaca nyivi tsi ndo tsitsi vehe ñuhu, nu juez, a nuu ra cumí tyiñu naha ra, ña caca iñi ndo náa tuhun cua nacahan ndo. ¹² Tyin cuhva tsa cua nacahan ndo, cua cuhva maa Tatyí Ii Nyoo náa tuhun taahán tsi cahan ndo —catyí ra Jesús.

Nu tsaha cuenda ra Jesús tyin ña taahán tsi nyiyo iñi yo tsa cuca

¹³ Iin ra tsa nyii tsihin nyivi cuaha tsa ndu iin nu nyii ra Jesús, catyí ra tsihin ra Jesús:

—Maestro, cahan tsihin ra yañi yu na natahvi ra tsa tsii jutu ndi, cuhva ra tsa taahán tsi tsi yu.

¹⁴ Tacan tan catyí ra Jesús tsihin ra:

—¿Tsaa, yóo tsaha tsi yu tsa cuví yu juez tan natahvi yu ndaha tyiñu ndo? —catyí ra.

¹⁵ Tan yahá can tan catyí ra nuu nyivi cuaha can:

—Jaha xaan ndo cuenda tan ña nyiyo xaan iñi ndo tyin ña tsiñi ñuhu tsa coo cuaha ndaha tyiñu yo tan coonyito yo.

¹⁶ Tacan tan tsaha cuenda ra Jesús iin cuhva tsi tandihi nyivi, tan catyí ra:

—Tsicoo iin ra cuca. Tan cuaha xaan ndaha tyiñu ñihí ra nu jaha tyiñu ra.

¹⁷ Tacan tan tsicá iñi ra: “¿Nacaa javaha yu? Nduve nu quihí tandihi ndaha tyiñu ihya.” ¹⁸ Tan catyí ra: “Tsa tsitó yu nácaa cua javaha yu. Cua caní yu tandihi yaca nyihi yu, tan cua javaha yu tsa nahnu ca, tan natyihí yu tandihi ndaha tyiñu can tsihin tandihi ca tsa iyó tsi yu tsitsi can. ¹⁹ Tacan tan cua catyí yu tsihin yu: Cuaha xaan ndaha tyiñu naquihñin vaha un, tan vityin cuahán maa cuiya, quitatu, çatsi vaha, çoho vaha, tan çusi iñi.” ²⁰ Tan Nyoo catyí ra tsihin ra can: “Ra soho, tsacuaa vityin cua cúu un, tan tsa naquihñin vaha un

¿Yóo tsii cua cuví yacan?” catyí Nyoo tsihin ra can. ²¹ Tacan cuví iin ra tsa jatacá tan tyihí vaha ra tsa cuca tsi ra; maa tyin nuu Nyoo ra ndaahvi cuví ra —catyí ra Jesús.

Ña caca xaan iñi yo náa ndihi tsa tsiñi ñuhu tsi yo
(Mt. 6.25-34)

²² Tacan tan catyí ra Jesús tsihin ra tsicá tsihin ra:

—Tacan ñi catyí yu tsihin ndo, ña caca xaan iñi ndo nácaa ñihi ndo tsa catsi ndo, tan ndi jahma tsa cunditsi ndo. ²³ Tyin nyaá yahvi ca ñayivi tsa nyito yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca tsa nditsi yo. ²⁴ Jaha ndo cuenda saa tyin ña jahá tyiñu ti. Tan ndi ña tyihí vaha ti tsa catsi ti. Maa tyin tsatsi ti, tyin Nyoo tsahá ra tsa catsi ti. Tan nuu Nyoo nyaá yahvi ca nyooho tan ñavin ca saa. ²⁵ Tan vasu ndi maa tsicá xaan iñi ndo maa tyin ña cuví jandusucun ndo luxu ca tsi ndo. ²⁶ Tatun ndi luxu can tan ña cuví jahá ndo, ¿nacuenta tsa tsicá xaan iñi ndo tandihi ca tsa tsiñi ñuhu tsi ndo?

²⁷ Jaha ndo cuenda nácaa iyó yutun ita tyin ña jahá tyiñu tun tan ndi ña tavi tun yuhva. Maa tyin catyí yu tsihin ndo tyin ndi ra rey Salomón tsihin tandihi tsa cuca ra tan ña sii caá tsa tsinditsi ra tumaa tsa jacunditsi Nyoo tsi yutun ita ican. ²⁸ Tatun tacan ñi jacunditsi Nyoo tsi yutun ita tsa iyó nu tsiqui vityin, tan ityaan cua cayu tun tsitsi horno, tan nyooho cahnu ca cuví ndo nuu ra tan ñavin ca yutun ita. ¿A ña cua cuhva ra tsa cunditsi ndo? Maa tyin maa ndo ña tsinú vaha iñi ndo tsi ra. ²⁹ Ña caca xaan iñi ndo tuhun tsa catsi ndo tan tsa coho ndo. ³⁰ Tyin nyivi tsa ña tsinú iñi tsi Nyoo tsicá iñi ñi yacan. Maa tyin Jutu yo Nyoo tsitó ra náa tsiñi ñuhu tsi ndo. ³¹ Vaha ca tsa nducu ndo nácaa cuhva cuenda ndo tsi ndo tsi Nyoo na cundaca ñaha ra tsi ndo. Tan cuhva tucu ra tandihi tsa tsiñi ñuhu tsi ndo.

Tsa vaha tsa iyó gloria
(Mt. 6.19-21)

³² Ña nayuhvi nyooho, mbee jana yu. Ña cuaha ndo maa tyin Jutu yo Nyoo cuñi ra tsi ndo. Yacan cuenda cua cuhva ra quihvi ndo nu ndacá ñaha ra. ³³ Xico ndo tsa iyó tsi ndo. Tan jatyinyee ndo tsi nyivi ndaahvi. Tatun javahá ndo tacan, jacayá ndo tsa vaha nuu nyaá Nyoo. Tyin nuu nyaá Nyoo ña ndihi tsa vaha. Tyin yoñi yóo jativi can ndacan, ndi nu ñasuhu, tan ndi quití. ³⁴ Tyin nuu iyó tsa cuca ndo, ican cuví nu nyita iñi ndo. Tan ndacan cua coo ndihi añima ndo —catyí ra.

Nu jacuahá ra Jesús tsi yo nácaa cuatu yo tsi ra quivi quitsi ra inga tsaha

³⁵ Cuatu vaha ndo tsi yu tsihin ñuhu nditsin Nyoo quivi quitsi yu inga tsaha. ³⁶ Tan cuvi ndo tumaa musu tsa ndatú tsi tsitoho ra naha náa cuhva quitsi ra tsa cuahán ra iin vico tindaha. Tan ndatú ra naha, tyin tacan tan numi ñi cua nuña ra naha yuvehe cuhva tsa jandatsan tsitoho ra naha tsa tsaa ra. ³⁷⁻³⁸ Tan sii xaan cua cuñi ra naha nyehe ra naha tsi ra cuví tsitoho ra naha. Tyin ndatú ra naha tsi ra nda cuanda tsa tsaa ra, vasu ñuu taxin, vasu tsa naha ca. Tan cua tyaa ra tsi ra musu ican naha ra yuhu mesa tan cuhva ra tsa catsi ra naha. Tacan tan sii xaan cua cuñi musu can naha ra. ³⁹ Tan coto ndo tyin tatun tsitoho vehe, tan tsitó ra náa cuhva cua quihvi ñasuhu vehe ra, cua jaha ra cuenda vehe ra. Tan ña cua cuhva ra quihvi nu ñasuhu ican tsitsi vehe ra. ⁴⁰ Tan tacan cuví tucu nyooho, cuatu ndo. Tyin yuhu, Rayii tsa quee nda gloria, sana iñi ndo tan cua quitsi yu —catyí ra Jesús.

*Musu vaha tan musu ña vaha
(Mt. 24.45-51)*

⁴¹ Tacan tan quitsahą nducú tuhun ra Pedro tsi ra Jesús:

—Jutu Mañi yu, ¿yóo cuenda caahan un yacan? ¿A tsa cuenda maa ñi maa ndi, a tsa cuenda tandihi nyivi?

⁴² Tacan tan nacahąn ra Jesús, tan catyí ra tsihin ra:

—Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha cuhva tsahá ra tsa catsi tandihi ca musu ican. ⁴³ Tan sii xaan cuñi musu ican tatun cuhva tsa jahá tyiñu ra, tan cua tsa tsitoho ra. Tyin tyaá yahvi ra tandihi tsa taahán tsi ica ra. ⁴⁴ Tan catyí yu tsihin ndo tyin tsa nditsa. Tyin tsitoho ra cua nacuhva ra tandihi tsa cumí ra, cua quihí ndaha ra. Tyin vaha tyaá yahvi ra tsihin tyiñu jahá ra. ⁴⁵ Maa tyin tatun tsicá iñi musu ican tyin naha xaan cuahán tsitoho ra, tan quitsahą cañi ra tsi inga musu tsa cutahán tsihin ra tan ñiñaha jahá tyiñu ican, tan ña cuñi ra jaha tyiñu ra. Tyiñu tsatsí ñi tan tyiñu tsiñi nyixi ñi iyó ra. ⁴⁶ Tacan tan sana iñi ra cua tsa tsitoho ra quivi tsa ña ndatú ra tsi ra, tan cuhva tsa ña tsitó ra. Tacan tan ñihi xaan cua tatsi tuñi tsitoho ra tsi ra, tumaa tuhvá maa ra icá tsihin nyivi tsa ña tsiñú iñi tsa caahán ra.

⁴⁷ Tan iin musu tsa tsitó nácaa iyó tsitoho ra tan ña javahá ra cuhva cuñi tsitoho ra, cuaha xaan tundoho cua nyehe ra. ⁴⁸ Maa tyin tatun iin musu tsa ña tsitó, tan javaha ra tsa ña vaha, cua tatsi tuñi tsitoho ra tsi ra, maa tyin luxu ñi. Tyin ña tsitó ra can, tan javahą ra. Tatun iin musu tan cuaha tsa tsahą tsitoho ra tsi ra, cuaha tyiñu taahán tsi nacuhva cuenda ra tsi tsitoho ra. Tan ra tsa cuaha xaan yihí ndaha can, cuaha xaan tyiñu taahán tsi nacuhva cuenda ra tsi tsitoho ra.

*Nu cahąn ra Jesús tyin tsacatyí ra cua cañi tahan nyivi tsihin nyivi ñi
(Mt. 10.34-36)*

⁴⁹ Tumaa tsa jatahán yu ñuhu nu ñuhu ñayivi, tacan cuví tyiñu vatsí yu. ¡Tan cuñi xaan yu tsa nacayu catyín ña ñuhu ihya! ⁵⁰ Tyin nyaá cua yaha yu iin tundoho cahnu, tan cahnu xaan tundoho iyó yu nda cuenda ndihi tyiñu jahá yu. ⁵¹ Cuñi maa ndo tyin tsa vatsí cuhva yu tsa taxin coo ndo nu ñuhu ñayivi ihya. Maa tyin yuhu vatsí yu tyin jasiin yu tsi ndo. ⁵² Tyin tsa vityin tan ityi nuu ca, uhun taahan nyivi iin vehe ñi cua cusiiñ ñi. Uñi taahan ñi cua cañi tahan tsihin uvi taahan ñi. Tan uvi taahan ñi cua cañi tahan tsihin uñi taahan ñi. ⁵³ Tan ra iyó sehe, cua cañi tahan ra tsihin sehe ra. Tan ra cuví sehe can cua cañi tahan ra tsihin jutu ra. Tan ñaha iyó sehe sihi cua cañi tahan ña tsihin sehe sihi ña. Tan ña cuví sehe sihi can cua cañi tahan ña tsihin sihi ña. Tan ñaha cuví tyiso cua cañi tahan ña tsihin tsanu ña. Tan ñaha cuví tsanu can cua cañi tahan ña tsihin tyiso ña —catyí ra Jesús.

*Nu cahąn ra Jesús tsihin nyivi tyin ña nacotó ñi tyin tsa tsaą Sehe Nyoo nu yucú ñi
(Mt. 16.1-4; Mr. 8.11-13)*

⁵⁴ Catyí tucu ra Jesús tsihin nyivi cuaha tsa yucú ican:

—Tatun nyehé ndo tyin tsa yihí vico, catyí ndo tyin tsa cua cuun savi. Tan tacan tsa cuui cuví. ⁵⁵ Tatun tsa nyehé ndo tyin tsa yihí tatyí quee ityi ndutya ñuhu, catyí ndo tyin tsa cua ndu ihñi. Tan quita tsa cuui nu caahán ndo. ⁵⁶ Nyooho jahá ndo tsa tsitó xaan ndo, tan nacotó ndo tandihi tsa cuví andivi, tan tandihi tsa cuví nu ñuhu ñayivi ihya. Tan ¿nacuenda tsa ña nacotó ndo náa tyembu iyó ndo vityin?

Nducu yo cuhva nácaa coo vaha yo tsihin ra tsicán cuatyí tsaha yo coto cuhun yo anyaya
(Mt. 5.25-26)

⁵⁷ ¿Nacuenda ña jahá ndo cuenda, ndáa tsa vaha tan ndáa tsa ña vaha? ⁵⁸ Tatun iin ra tsicán cuatyí tsaha ndo tan cuahán ndo tsihin ra nu nyaá ra cumí tyiñu, ityi cuahán ndo nducu ndo cuhva coo vaha ndo tsihin ra tsa ndi cumañi ca tsa ndo nu nyaá ra cumí tyiñu. Coto nacuhva cuenda ra tsi ndo tsi juez. Tan juez ican cua nacuhva cuenda ra tsi ndo tsi ra vitya naha ra. Tan ra vitya naha ra cua tyihi ra naha tsi ndo tsitsi vehe caa. ⁵⁹ Tatun tacan cua cuvi, catyí yu tsihin ndo tyin ña cua quita ndo nda cuanda tyahvi ndo tandihi tsa taahán tsi tyahvi ndo —catyí ra Jesús.

13

Cuñí tsi tsa nasama yo cuhva iyó yo, tun ña cuñí yo cuhun yo anyaya

¹ Tacan tan juvin ñi quivi can nyecu juhva ra naha. Tan quitsahá nacatyí tuhun ra naha tsihin ra Jesús tsa javahá ra Pilato tsihin juhva ra Galilea naha ra. Tyin tava ra tyiñu na cahñi andaru naha ra tsi ra Galilea tsa tsijamañi quiti jana ra naha tsi Nyoo. Tan tacan sacá nuu niñi ra ican naha ra tsihin niñi quiti tsa tsijamañi ra ican naha ra. ² Tan nacahan ra Jesús tan catyí ra tsihin ra naha:

—¿A tsicá iñi nyooho tyin cahnu xaan ca cuatyí ra Galilea ican naha ra tan ñavin ca tandihi ca ra ñuu ra naha, tan yacan tsihi ra naha? ³ Ñavin. Tyin tatun nyooho tan ña nasama ndo cuhva iyó ndo, tacan cua cunaa ndo. ⁴ Tan tsa tsahun uñi taahan ra tsihi can naha ra tsa canacava torre Siloé ican tsata ra naha, ¿a cuaha ca cuatyí ra naha tan ñavin ca inga ra tsa tsicoq ñuu Jerusalén, cuñí maa ndo? ⁵ Ñavin. Tyin tatun nyooho tan ña nasama ndo cuhva iyó ndo, cua cunaa ndo.

Nu tsahá cuenda ra Jesús iin cuhva nácaa ndatú Nyoo tsa nasama yo cuhva iyó yo

⁶ Tacan tan tsahá cuenda ra Jesús iin cuhva ihya. Tan catyí ra: —Iin ra iyó yutun tsa nañi higuera tsi ra. Tan nya tun nu ñuhu ra. Tan tsahan ra tsinyehé ra tatun iñi tsiti tun. Tan nyehe ra tyin nduve. ⁷ Tan catyí ra tsihin ra jahá cuenda tsi tun: “Tsa uñi cuiya tsa tyito ñi quitsi nyehe yu tatun iyó tsiti tun. Tan nduve maa tsiti tun iñi. Cahnya tsi tun. Tyin nyaá cuatu ñi maa tun nu ñuhu ihya. Tyin nduve tsiti tsahá tun”, catyí ra. ⁸ Maa tyin ra tsa jahá cuenda ñuhu ican catyí ra: “Taa, ña cua cahnya naha yo tsi tun vityin. Na cunyaá nuu maa tun inga cuiya ihya. Cua janduvita yu ñuhu tsaha tun tan cua tyihi yu ñuhu tyaaahyú. ⁹ Vasiqi tacan tan cua cuhva tun tsiti. Maa tyin tatun ña cuhva tun tsiti, tacan tan cahnya yo tsi tun”, catyí ra tsa jahá cuenda ñuhu can —catyí ra Jesús.

Quivi quitatú nyivi janduvahá ra Jesús tsi iin ñaha tihí tsata

¹⁰ Iin quivi tsa quitatú nyivi, jacuahá ra Jesús tsi nyivi tsitsi vehe ñuhu. ¹¹ Tan ican nyaá iin ñaha tsa yihí tatyí ña vaha. Tan tsa tsahun uñi cuiya cuhvhi ña tsa tihí tsata ña. Tan ña cuvi ndundoo ña. ¹² Tacan tan nyehe ra Jesús tsi ña. Tan caná ra tsi ña. Tan quitsahá caahán ra tsihin ña, tan catyí ra: —Tsa nduvahá un. Nduve ca cuehe ndohó un —catyí ra tsihin ña.

¹³ Tacan tan tyisó ra ndaha ra jiñi ña. Tan iin yaha ñi tan ndundoo ña. Tacan tan quitsahá jacahnú ña tsi Nyoo. ¹⁴ Maa tyin ra cuvi ityi nuu vehe ñuhu,

cuxaḡan xaan ra tsi ra. Tyin quivi quitatú janduvahaḡ ra tsi ña. Tan catyí ra tsihin nyivi nyecú ican:

—Iyó iñu taahan quivi taahán tsi jaha tyiñu yo. Tacan quivi quitsi ndo cuvi ndo numeri. Tan ña quitsi ndo quivi quitatú yo —catyí ra.

¹⁵ Tacan tan Jutu Mañi yo Jesús catyí ra tsihin ra:

—Nyooho tsa jahá ndo tyin vaha ndo. ¿A ña ndatsí tucu nyooho quiti jana ndo tan jacobó ndo ndutya tsi ti quivi quitatú yo? ¹⁶ Tan tacan tucu ñaha ihya, tata ra Abraham cuví tsi ña. Tan tsa tsahun uñi cuiya tsa nuuhñi ña tsihin cuehe ihya jahá nu ña vaha. Tan yoñi ndatsi tsi ña. ¿A ña taahán tsi ndatsi yo tsi ña vasu ndi maa quivi quitatú yo cuví vityin? —catyí ra Jesús.

¹⁷ Tacan tan cuhva tsa caḡan ra Jesús yacan, tandihí maa nu xaan iñi tsi ra nducahan nuu nahnu. Maa tyin tandihí ca maa nyivi sii xaan cuñi ñi tsihin tsa cahnu tsa iyo javahaḡ ra Jesús.

Nu caḡan ra Jesús tyin tumaa iin tsiti mostaza cuví tsa ndacá ñaha Nyoo tsi yo

¹⁸ Tacan tan catyí ra Jesús:

—¿Náa cuví tsa ndacá ñaha Nyoo tsi yo? ¿Tan náa tsihin jandu inducu yo itsi? ¹⁹ Tumaa iin tsiti mostaza, tacan cuví tsi. Tyin iin ra tatsj ra iin tsiti ican nu ñuhu ra, tan canḡ iin yutun luhlu, tan tsahnḡ tun. Tan cuví tun iin yutun cahnu xaan. Tacan tan tsaḡ saa naha ti nuu yutun ican. Tan javahaḡ ti taca ti nuu tun.

Nu caḡan ra Jesús tyin tumaa yutsan iya, tacan cuví tsa ndacá ñaha Nyoo tsi yo

(Mt. 13.33)

²⁰ Tacan tan catyí ra Jesús inga tsaha:

—¿Náa ca tsihin jandu inducu yu nácaa ndacá ñaha Nyoo tsi yo? ²¹ Cuví tsi tumaa yutsan iya tsa nasacá nuu iin ñaha tsihin uñi jahma yutyi paan. Tyin tumaa ndaá tani yutsan paan ican jahá yutsan iya ican, tacan cuví tsa ndacá ñaha Nyoo tsi yo —catyí ra.

Yuvehe tihin tan ityi cuiñi tsa cuahán nu nyaá Nyoo

(Mt. 7.13-14, 21-23)

²² Ityi cuahán ra Jesús ñuu Jerusalén caahán ra tuhun Nyoo tsihin nyivi tandihí ñi ñuu nu yahá ra. ²³ Tan iin ra tsicá tuhun ra tsi ra:

—Jutu Mañi yu, ¿a cuaha maa nyivi cua cacu? —catyí ra.

Tacan tan nacahan ra Jesús, tan catyí ra:

²⁴ —Nḡnducu ndo cuhva quihvi ndo yuvehé tihin. Tyin tacan cuví quihvi ndo nu ndacá ñaha Nyoo. Tyin cuaha xaan ndo cuñi ndo quihvi ndo ndacan, tan ña cuví. ²⁵ Tyin tumaa tsitoho iin vehe, tacan cuví Nyoo. Tan tsitoho vehe ican cua nacasi ra yuvehé. Tacan tan nyooho tsa nyecú ndo ityi tsata cua jandatsan ndo yuvehé, tan cua catyi ndo: “Nuña yuvehé.” Tan ra ican cua catyi ra tsihin ndo: “Ña tsitó yu ndáa ityi quee nyooho.” ²⁶ Tacan tan nyooho cua catyi ndo: “Nyuhu tsatsj ndi tan tsihi ndi tsihin un. Maa un jacuahḡ un tuhun Nyoo tsi ndi ityi nu nyecú vehe ndi”, cua catyi ndo tsihin ra. ²⁷ Maa tyin ra ican cua nacahan ra tsihin ndo tan cua catyi ra: “Tsa catyi yu tsihin ndo tyin ña tsitó yu ndáa ityi quee ndo. Çatsiyo nyaha ndo nu nyaá yu tandihí nyooho nyivi javahá tsa ña vaha” ²⁸ Tacan tan cua vacu ndo tan catsan ña cua cuví nuhu ndo tsa cua nyehé ndo tsi ra Abraham tsihin ra Isaac tan ra Jacob, tan tsihin tandihí ra cuví ndusu yuhu Nyoo tsa tsicoḡ tahaḡ tsanaha. Tyin nyecú ra naha nu ndacá ñaha Nyoo. Tan nyooho ndoḡ ndo ityi tsata. ²⁹ Tan

cua quitsi nyivi ityi ndutya ñuhu, tan ityi norte, tan ityi nu caná ñicanyii, tan ityi nu tyisó ñicanyii. Tan cua cunyecu ñi catsi ñi tsihin Nyoo nu ndacá ñaha ra. ³⁰ Tan juhva nyivi tsa cuahán ityi nuu vityin, ñi can cuhun nu ndihi. Tan juhva nyivi tsa cuahán nu ndihi ña, ñi can cua cuhun ityi nuu —catyí ra.

Nu cuihya xaan cuñi ra Jesús nyehé ra tsi nyivi ñuu Jerusalén

(Mt. 23.37-39)

³¹ Juvín ñi maa quivi can tsaá juhva ra fariseo. Tan catyí ra naha tsihin ra Jesús:

—Quita ihya tyin ra Herodes cuñi ra cahñi ra tsi un —catyí ra naha.

³² Tan catyí ra Jesús tsihin ra naha:

—Cuaahan ndo tan cahan ndo tsihin ra tsa cuví tumaa ñicuii, tyin nda cuanda quita quivi tsa ndihi tyiñu jahá yu tsa tavá yu tatyí ña vaha tsi nyivi tan tsa janduvahá yu tsi nyivi cuuhví tsihin cuehe, tacan tan cundihi tyiñu jahá yu. ³³ Maa tyin nda cuanda tahan tsi tsa ndihi maa tyiñu jahá yu, tacan tan cuhun maa yu cua cúu yu nda ñuu Jerusalén. Tyin ña cuví cúu iin ra cuví ndusu yuhu Nyoo ityi tsata ñuu Jerusalén.

³⁴ ¡Ndahvi nyooho nyivi Jerusalén! tyin tsañi ndo tsi ra cuví ndusu yuhu Nyoo. Tan cañi ndo yuu tsi tandihi ra tsa jaquitsi Nyoo nu yucú ndo. Tan yuhu cuaaha xaan tsaha cuñi yu jaha cuenda yu tsi ndo, tumaa jahá cuenda iin ndivi sihi sehe ti, tan naquihín vaha ti tsi ti naha ti tsitsi nditsin ti. Maa tyin maa ndo ña cuñi ndo. ³⁵ Nyehe ndo vityin tyin tsa nacoq yu tsi ndo. Tan catyí yu tsihin ndo tyin ña cua nyehe ca ndo tsi yu nda cuanda quita quivi tsa cua catyí ndo tyin cahnu xaan ra vatsi tsihin sivi Nyoo Jutu yo —catyí ra Jesús.

14

Nu janduvahá ra Jesús tsi iin ra cuuhví tsa iyó cuiñu quivi quitatú nyivi

¹ Cuví tsi iin quivi quitatú nyivi. Tan ra Jesús cuahán ra cua catsi ra vehe iin ra cuví ityi nuu tsihin ra fariseo naha ra. Tan juhva ca ra fariseo ican ndatú ra naha nyehé ra naha náa cuatyí cuví tyaa ra naha tsi ra Jesús. ² Tacan tan yatyin ñi nuu ra Jesús nyaá iin ra cuuhví tsa iyó cuiñu. ³ Tan catyí ra Jesús tsihin ra maestro cuenda ley vehe ñuhu naha ra tan tsihin ra fariseo naha ra:

—¿A vaha janduvaha yo nyivi cuuhví quivi quitatú yo? ¿Náa catyí ley Nyoo? —catyí ra.

⁴ Tacan tan tandihi ra naha, taxin ña tsinyecu ra naha. Tacan tan tyisó ndaha ra Jesús jiñi ra cuuhví can. Tan janduvahá ra tsi ra. Tan catyí ra tsihin ra na cunuhu ra. ⁵ Tacan tan catyí ra Jesús tsihin ra fariseo naha ra:

—Tatun nyooho tan canacavá iin burru jana ndo, a inga quiti jana ndo, tsitsi xahva, ¿a ña cua tava ndo tsi ti tsa numi ñi, vasu ndi maa quivi quitatú yo cuví? —catyí ra.

⁶ Tacan tan taxin ña tsinyecu ra fariseo naha ra. Tyin ña ñihí ca ra naha náa nacahan ra naha.

Nu jacuahá ra Jesús tsi yo tyin ña vaha tsa cahnu jaha yo tsi yo

⁷ Nyehe ra Jesús tyin tandihi ra nyecú vico ican nacatsi ra naha tyayu vaha ca cunyecu ra naha. Tacan tan tsahá cuenda ra tyehen tsi ra naha:

⁸ —Ndáa quivi cuhun ndo vico tindaha, ña nanducu ndo tyayu vaha ca cunyecu ndo. Tyin coto quitsi inga ra tsa cahnu ca cuví tan ñavin ca maa ndo, ⁹ tan coto quitsi ra tsa caná tsi ndo tan catyí ra tsihin ndo: “Cuhva tyayu can tyin cunyaa ra ihya.” Tacan tan nyooho tsihin tsa cahan nuu ndo, tan

cua cuhva ndo tyayu can. Tacan tan cua cunyecu ndo nu ndihí ña. ¹⁰ Maa tyin catyí yu tsihin ndo, tyin ndáa quiví cana ra tsi ndo, cūaahan ndo, tan ñavin nu vaha cunyecu ndo. Tyin tacan tan cua quítsi maa ra tsa cana tsi ndo tan cua cahan ra tsihin ndo: “Amigos, ñaha ndo, cūyecu ndo nu tyayu vaha ihya.” Tan tacan cua jacahnu ca ra tsi ndo nu nyívi nyecú yuhu mesa tsihin ndo. ¹¹ Tyin ra tsa cahnu jahá tsi maa ra, cua tahan ra ticanuu. Tan ra tsa ndaahvi jahá tsi ra, cahnu ca cua cuví ra —catyí ra Jesús.

¹² Tacan tan catyí tucu ra tsihin ra cana tsi ra nu iyó vico can:

—Ndáa quiví coo vico vehe un, ña cua cana un tsi ra vaha iñi tsi un, ndi tsi ra yañi un, ndi tsi ra cuví nyívi un, ndi tsi nyívi nyecú yuvehe un, ñi cuca. Tyin ñi ican cuví cana tucu ñi tsi maa un, na coo tucu vico vehe maa ñi. Tacan tan nacahnya ñi cuenda tsa tsahan ñi vico vehe un. ¹³ Maa tyin catyí yu tsihin un tyin ndáa quiví coo vico vehe un, cana tsi nyívi ndaahvi, nyívi cuuhví, nyívi coxo, tan tsihin nyívi cuaa. ¹⁴ Tacan tan sii cua cuñí un, tyin ñi ican ña cua cuví natyahvi ñi tsi un. Maa tyin cua natyahvi Nyoo tsi un quiví cua nandoto un tsihin nyívi vaha.

Nu tsaha cuenda ra Jesús iin cuhva nácaa cana ra tsi yo na quihvi yo nu ndacá ñaha Nyoo
(Mt. 22.1-10)

¹⁵ Tan tsiñi iin ra tsa nyaá yuhu mesa ican tsa caahán ra Jesús. Tan catyí ra tsihin ra:

—Sii xaan cua cuñi nyívi tsa cua catsi nu ndacá ñaha Nyoo —catyí ra.

¹⁶ Tacan tan catyí ra Jesús tsihin ra:

—Iin ra ican jacoy ra iin vico cahnu xaan vehe ra. Tan cana ra cuaaha xaan nyívi. ¹⁷ Tacan tan tsaq cuhva tsa cua cuxiñi ñi, tan jacuhún ra tsi musu ra na cuquihin ra tsi ñi, tyin tsa tahañ tsi cuhva cuxiñi ñi. ¹⁸ Maa tyin tandihí ñi ican quítsaha caahán ñi tyin ña cua cuhun ñi. Tan iin ra ican catyí ra: “Ndi jatá yu iin ñuhu. Tan cuñí tsi cuhun yu cunyehe yu itsi. Yacan tsicán yu na jaha ra tucahnu iñi tsi yu tyin ña cua cuhun yu.” ¹⁹ Tacan tan inga ra ican catyí ra: “Ndi jatá ñi yu uhun taahan yunta. Tan cuhun yu cunyehe yu tatun vaha ti naha ti. Yacan tsicán yu tumañi iñi tsi ra na jaha ra tucahnu iñi tsi yu, tyin ña cua cuví cuhun yu.” ²⁰ Tacan tan inga tucu ra ican catyí ra: “Ndi tindaha cuñi ñi yu, tan ña cua cuví cuhun yu”, catyí ra. ²¹ Tacan tan musu ra ican cuanuhú ra. Tan catyí tuhun ra tandihí tsa cuví ican tsihin ra tsitoho ra. Tsa tsiñi tsitoho ra tsa tacan, tan cuxaān xaan ra. Tan catyí ra tsihin musu ra: “Cūaahan vityin tandihí maa ityi. Tan quítsi ndaca un tsi nyívi ndaahvi, nyívi cuuhví, nyívi coxo, tan tsihin nyívi cuaa”, catyí ra. ²² Tan tsa yaha tsaā nyico musu ican tan catyí ra tsihin ra tsitoho ra: “Tsa javaha yu tandihí maa tsa cahan un tsihin yu. Tan nuña ca tsitsi vehe”, catyí ra. ²³ Tacan tan tsitoho ra catyí ra tsihin ra: “Cūaahan cua nducu ca nyívi tandihí maa ityi. Tan jañiñi un tsi ñi na quítsi ñi, tyin na cutu tsitsi vehe yu. ²⁴ Tyin catyí yu tsihin un tyin ndi intuhun ñi tsa cana yu tsa jihna, ña cua catsi ñi tsihin yu”, catyí ra —catyí ra Jesús.

Cuaaha xaan tundoho nyehé yo tatun cuenda ra Jesús yihí yo
(Mt. 10.37-38)

²⁵ Cuaaha xaan nyívi nyicún tsi ra Jesús. Tacan tan nanyehé ra tsi ñi, tan catyí ra tsihin ñi:

²⁶ —Tandihí nyoocho tsa nyicún tsi yu, tatun cuñi ca ndo tsi nyívi ndo tan ñavin ca tsi yuhu, ñavin cuenda yu yihí ndo. Tan tatun cuñi ca ndo tsi maa

ndo tsa nuu yuhu, ñavin cuenda yu yihí ndo. ²⁷ Tyin nyooho tsa ña cuñi nyehe tundoho tsa cunyicun ndo tsi yu, ña taahán tsi cuvi ndo nyivi cuenda yu, tyin tsa nyehé ndo tundoho, yacan cuví cruu tsa taahán tsi cuiiso ndo. ²⁸ Tyin tun cua javaha ndo iin vehe, nacañi nuu jihna ndo jiñi ndo tan tyihi tuñi iñi ndo tun quita vehe cahnu can tsihin xuhun tsa nyii tsi ndo. ²⁹ Tyin tatun quitsaha jandaá ndo vehe ican, tan ña cuvi jandihí ndo tyin nduve ca xuhun ndo, cua vacu nducu nyivi tsi ndo. ³⁰ Tan cua catyi ñi: “Ra ican quitsaha javahá ra vehe ra, tan ndi ña cuvi jandihí ra can”, cua catyi ñi. ³¹ A tatun iin rey tan cuñi ra cañi tahan ra tsihin inga rey ¿a ña cunyaa jihna ra tan nyehe ra tatun ñihi tsa utsi mil ñi andaru tsa cuahán tsihin ra cua cañi tahan ra naha tsihin inga rey tsa vatsi tsihin oco mil andaru ican? ³² Tan tatun tsitó ra tyin ña cua cuvi jaha canaa ra tsi inga rey ican, tacan tan cañi ca vatsi inga rey ican, tan cua jacuhun ra tsi musu ra tyin na catyi tuhun ra naha tsihin inga rey ican na jandihí taxin ra itsi. ³³ Tan tacan cuvi nyooho. Tatun ña cahnya iñi ndo tandihí maa tsa cuñi ndo tan tandihí tsa cumi ndo, ña cua cuvi cunyicun ndo tsi yu.

Nu jacuahá ra Jesús tyin tumaa ñi tsa ndihí tsa uhva, tacan cuví yo tatun ndu uvi iñi yo tsa tsinú iñi yo tsi ra
(Mt. 5.13; Mr. 9.50)

³⁴ Vaha ñi tyin jacu uhvá tsi tsa catsi yo. Maa tyin tatun ndihí tsa uhva tsi, ña vaha ca tsi. ³⁵ Nduve ca tyiñu cuvi javaha tsi. Ndi ña cuvi jatyinyee tsi tsi ñuhu. Tan javitá yo itsi tyin ña vaha ca tsi. Nyooho tsa iyó soho, tyaa soho ndo tuhun caahán yu —catyi ra Jesús.

15

Nu jacuahá ra Jesús tyin tumaa mbee tsa cuanaá tacan cuví yo
(Mt. 18.10-14)

¹ Tandihí ra tavá xuhun cuenda ra ndacá ñaha nda ñu Roma, tan ra iyó cuatyí naha ra, natuhvã ra naha nu nyii ra Jesús, tan tyaa soho ra naha tsa caahán ra. ² Tacan tan ra fariseo naha ra tsihin ra maestro cuenda ley vehe ñuhu naha ra quitsaha caahán nyaa ra naha tsi ra Jesús, tan catyi ra naha:

—Ra ihya, caahán ra tsihin ra iyó cuatyí naha ra. Tan tsatsí ra tsihin ra naha —catyi ra naha.

³ Tacan tan ra Jesús tsahã cuenda ra cuhva ihya, tan catyi ra:

⁴ —Nyooho tsa iyó iin cientu mbee jana, tun cunaa intuhun ti, ¿a ña cua nacoo ndo tsi tandihí ca ti, tan cunanducu ndo tsi mbee tsa cunaa can nda cuanda tsa nañihi ndo tsi ti? ⁵ Tan tsa yaha nañihi ndo tsi ti, tyiso soco ndo tsi ti. Tan sii xaan cua cuñi ndo. ⁶ Tan tsa tsaa nyico ndo vehe ndo, tan ndu iin ndo tsihin ra vaha iñi tsi ndo tan tsihin nyivi iyó yatyin yuvehe ndo, tacan tan catyi ndo tsihin ñi tyin na cusii ndihí iñi ñi tsihin ndo tyin nañihí ndo mbee jana ndo tsa tsinaq. ⁷ Tan catyi yu tsihin ndo, tyin tacan tucu sii xaan ca cuñi ángel Nyoo tsa iyó gloria tsacatyí intuhun ra tsa iyó cuatyí tan nasamá ra cuhva iyó ra, tan ñavin ca tsa cumi xico tsahun cumi taahan nyivi tsa nduve cuatyí tan ña cuñi ca tsi tsa nasama ñi cuhva iyó ñi.

Ñaha tsa tsinaq xuhun tan nañihí ña

⁸ Tan catyi yu tsihin ndo, tyin tatun iin ñaha tan iyó utsi taahan xuhun ña, tan cuanaá iin xuhun ña, cua tyaa ña iin candili. Tan cua tihvi ña tani tsitsi vehe ña. Tan cua nanducu ña xuhun can nda cuanda tsa nañihi ña can. ⁹ Tan tsa yaha nañihi ña, cua cuhun ña cunanducu ña tsi ñi vaha iñi tsi ña, tsihin

nyivi tsa iyó yatyin yuvehe ña, tan cua cahan ña tsihin ñi: “Cusii ndihi iñi ndo tsihin yu tyin tsa nañihí yu xuhun yu tsa tsinaa”, cua catyi ña. ¹⁰ Tan catyi yu tsihin ndo tyin tacan tucu sii cuñi ángel Nyoo tsacatyí intuhun ra iyó cuatyí tan ndu uvi iñi ra cuatyí ra —catyi ra Jesús.

Nu jacuahá ra Jesús nácaa cuñi Nyoo tsi iin ra ndu uvi iñi cuatyí

¹¹ Tacan tan tsahá cuenda ra Jesús inga cuhva ihya tan catyi ra:

—Iin ra, iyó uvi taahan sehe ra. ¹² Tan ra tsa luhlu ca caahán ra tsihin jutu ra tyin na nacuhva ra tsa taahán tsi tsi ra. Tacan tan jutu ra natahvi sava ra tsa tsii ra tan tsaha ra tsi nduvi taahan sehe ra. ¹³ Tan ña cuaha ñi quivi tan ra luhlu ícan xico ra tandihí maa tsa tsaha jutu ra tsi ra. Tan jandu iin ra xuhun ra, tan quihín ra ityi, cuahán ra iin ñuu cañi xaan. Tan ndacan tsicoo ra tan janaa ra tandihí maa xuhun ra tsihin tusii iñi. Tan quíñi xaan icá ra tsicá nuu ra. ¹⁴ Tacan tan tsaá tama ityi nu iyó ra. Tan quitsaha tsisocó ra tyin tandihí xuhun ra janaa ra. ¹⁵ Tacan tan tsahan ra tsinducú ra tyiñu jaha ra tsihin iin ra ñuu ícan. Tan ra can jacuhun ra tsi ra iin nu iyó quini jana ra, tyin jaha cuenda ra tsi ti naha ti. ¹⁶ Tan cuvi tsi iin tsaha tsisocó xaan ra can. Tan nduve maa tsa catsi ra iyó, ndacua cuñi ra catsi ra tsa tsatsí quini ícan naha ti. Tan yoñi maa tsaha tsa catsi ra. ¹⁷ Tacan tan nducuhun iñi ra tsi jutu ra. Tan nacañi jíñi ra: “¿Náa tsa cuaha ra naha jahá tyiñu tsihin jutu yo? Tan nduve tsa cumañi tsi ra naha. Tan yoo vityin cuñi cúu yo jahá soco. ¹⁸ Vityin cua cunuhu yo nu nyaá jutu yo. Tan cua catyi yo tsihin ra tyin tsicoo cuatyí yo nuu Nyoo tan tacan tucu nuu maa ra. ¹⁹ Tan ña taahán ca tsi tsi yo tsa cuvi yo sehe ra, tan na jaha ra tyin iin musu ña ra cuvi tsi yo” cuñi ra tsicá iñi ra.

²⁰ Tacan tan quihín ra ityi cuanuhú ra nda vehe jutu ra. Tan cañi ca vatsí ra tan nyehé jutu ra tsi ra, tan cundaahvi iñi ra nyehé ra tsi sehe ra. Tan tsinú xaan ra tsijatahan ra tsi ra. Tan tsinumí nyaá ra tsi ra. ²¹ Tacan tan catyi ra tsihin jutu ra: “Tyatya, tsicoo cuatyí yu nuu Nyoo tan tsicoo cuatyí yu nuu tucu maa un. Tan yacan ña taahán ca tsi tsi yu tsa cuvi yo sehe un”, catyi ra tsihin jutu ra. ²² Maa tyin jutu ra tava tyiñu ra, tan catyi ra tsihin musu ra: “Tava ndo jahma vaha tan jacunditsi ndo tsi ra ihya. Tan tyihi ndo iin xehe nundaha ra. Tan tyihi ndihi ndo zapatu tsaha ra. ²³ Tan cahñi ndo iin becerru tsa xaahan vaha ca, tyin catsi yo tsi ti. Tyin vityin cua coo yo vico. ²⁴ Tyin ra sehe yu ihya tsa tsihi ra cuñi maa yu, tsicá iñi yu. Cuñi maa yu tyin ña cua nyehé ca yu tsi ra, tan tsaá nyico ra”, catyi jutu ra can. Tacan tan quitsaha tsicoo ñi vico. Tan sii xaan cuñi ñi tyin tsaá nuhu nyico ra.

²⁵ Tacan tan inga sehe ra, ra tsa tsitsa, nyii ra tsicuhu. Tan tsa cua tsaa nuhu ra nda yuvehe ra, tan tsiñi ra tyin iyó yaa. Tan tuví iñi ra tyin tsañi ñi yaa. ²⁶ Tacan tan tsa cuyatyin ra nda yuvehe ra tan cana ra tsi iin musu ra. Tan tsicá tuhun ra tsi ra can náa cuvi xaan can. ²⁷ Tacan tan musu can catyi ra: “Ra yañi un tsaá nuhu ra. Tan yacan tava jutu un tyiñu tyin na cahñi ra naha iin becerru xaahan. Tyin vaha tsaá ra yañi un, tan nduve náa tahaan ra”, catyi musu can tsihin ra. ²⁸ Tacan tan nduxaan xaan cuñi ra can. Tan ña cuñi ra quihvi ra tsitsi vehe. Tan jutu ra tsahan ra tsicahan ndaahvi ra tsihin ra, tyin na quihvi ra tsitsi vehe. ²⁹ Tacan tan nacahan ra can tan catyi ra tsihin jutu ra: “¿Náa tsa cuaha cuiya jahá tyiñu yu tsihin un? Tan tyaá yahvi xaan yu tsa caahán un. Maa tyin ndi intuhun mbee luhlu ñaha ca cuhva un tsi yu tyin coo vico jaha yu tsihin ra vaha iñi tsi yu. ³⁰ Maa tyin vityin tsaá nuhu nu sehe un ihya, nu tsa janaa xuhun tsihin ñaha sii iñi. Tan tsaha un iin becerru quiti xaahan tsi nu”, catyi ra tsihin jutu ra. ³¹ Tacan tan nacahan jutu ra tan

catyí ra tsihin ra: “Sehe yu, yooho tsihin maa yu nyaá un tandihí quivi. Tan tandihí tsa cumí yu, tsii un cuví can. ³² Tan vityin taahán tsi tyin javaha yo vico ihya, tan cusii iñi yo. Tyin tsaá nuhu ra yañi un, ra tsa tsihi, cuñi maa yu. Tumaa tsa nandoto nyico ra cuví can, tyin tsinaa ra, tan nañihí yo tsi ra inga tsaaha”, catyí ra tsihin sehe ra —catyí ra Jesús.

16

Nu jacuahá ra Jesús tsi yo nácaa javaha yo tumañi iñi tsihin tsa iyó tsi yo

¹ Tacan tan catyí ra Jesús tsihin ra tsicá tsihin ra:

—Iyó iin ra, cuca xaan ra. Tan iyó iin ra yihí ndaha tandihí tyiñu jahá ra cuca can. Tan tsahañ iin musu ra tsicatyí tuhun ra tsihin ra cuca ican, tyin ra yihí ndaha tyiñu ican, janaa ra tandihí tsa iyó tsi ra. ² Tacan tan cana ra cuca ican tsi ra tan catyí ra tsihin ra: “Tsa cuaha xaan cuatyí javahá un quitsi nu nyaá yu. Vaha ca načuhva cuenda un tandihí tyiñu tsa javahá un tsi yu. Tyin ña cua jaha tyiñu ca un tsihin yu”, catyí ra cuca can tsihin ra. ³ Tacan tan ra yihí ndaha tyiñu can tsicá iñi ra: “¿Nacaa cua javaha yu vityin? Tsitoho yu ña cuñi ca ra tsa jaha tyiñu yu tsihin ra. Tan nduve tunyee iñi iyó tsi yu tsa jaha tyiñu yu tsihin ñuhu. Tan cahán xaan nuu yu caya yu tsitsi ñuu. ⁴ Maa tyin tsa tsitó yu nácaa cua javaha yu, tacan tan vaha cua cuñi nyivi tsihin yu quivi tsa nduve ca tyiñu cua jaha yu, tan vaha cua tsaá yu vehe ñi”, tsicá iñi ra can. ⁵ Tacan tan cana ra tsi intuhun intuhun ra tsa nyaá cuenda tsi tsitoho ra. Tan catyí ra tsihin iin ra ican: “¿Náa nyaá cuenda un tsi tsitoho yu?” catyí ra. ⁶ Tacan tan nacahañ ra ican tan catyí ra: “Yuhu nyaá cuenda yu cumi mil litru acetye.” Tacan tan ra yihí ndaha tyiñu ican catyí ra tsihin ra: “Quihin un inga tutu ihya. Tan tyaa un uvi mil ñi. Tan javita un tutu tsaahnu ican”, catyí ra. Tacan ica ra can, tan cuahán ra. ⁷ Tacan tan tsaá inga ra. Tan tsicá tuhun tucu ra tsi ra ican: “¿Náa nyaá cuenda un tsi tsitoho yu?” Tan nacahañ ra ican: “Nyaá cuenda yu iin mil arroba trigo”, catyí ra. Tacan tan catyí ra yihí ndaha tyiñu ican: “Quihin inga tutu, tan tyaa un una cientu ñi arroba. Tan javita un tutu tsaahnu can”, catyí ra. ⁸ Tacan tan tsitó tsitoho ra tsa ña vaha tsa javahá ra. Tan iyo xaan cuñi ra cuca can, tyin yatyi xaan ñihí ra cuhva ica ra —catyí ra Jesús.

Tan catyí ra tsihin ra tsicá tsihin ra:

—Nyivi nu ñuhu ñayivi ihya tsa ña tyaá yahvi tsi Nyoo yatyi xaan ca jahá ñi tsi ñi tan ñavin ca nyivi tsa iyó ñuhu nditsin Nyoo añima.

⁹ Tan catyí yu tsihin ndo, tyin cuatyíñu ndo tsa cuca tsa iyó nu ñuhu ñayivi ihya, tan jatyinyee ndo tsi nyivi. Tan quivi tsa cua ndihí tsa cuca, cua ñihí ndo coo ndo nu ña cua naa maa.

¹⁰ Tatun tsitó ndo cuatyíñu vaha ndo tsa luxu ñi tsa iyó tsi ndo, tacan tucu tatun cuaha coo tsi ndo cua cuatyíñu vaha ndo itsi. Tyin tatun ña tsitó ndo cuatyíñu ndo tsa luxu ñi tsa iyó tsi ndo, tacan ña cua coto tucu ndo cuatyíñu ndo tatun cuaha coo tsi ndo. ¹¹ Tan catyí yu tsihin ndo, tatun ña javahá ndo tsa vaha tsihin tsa iyó tsi ndo nu ñuhu ñayivi ihya, Nyoo ña cua cuhva ra tsa vaha tsa iyó gloria tsi ndo. ¹² Tyin tandihí tsa iyó tsi ndo, maa Nyoo tsaah nuu itsi tsi ndo. Tan tatun ña javahá ndo tumañi iñi tsihin tsi, ña cua cuhva ra tsa cuví tsii ndo.

¹³ Iin musu ña cuví coo uvi taahan tsitoho ra. Tyin musu ican cua cuñi ca ra tsi iin ra, tan ñavin ca tsi inga ra. Tan vaha ca cua tyaa yahvi ra tsa cahan iin ra, tan inga ra, ña cua tyaa yahvi ra tsa cahan ra can. Ña cua cuví cuñi

ndo tsi Nyoo tatun cuñi tucu ndo tsa cuca —catyí ra Jesús. ¹⁴ Tan tsa tsiñi ra fariseo naha ra tandihi tsa cahān ra Jesús, tacan tan quitsaha tsacú nducu ra naha tsi ra. Tyin maa ra fariseo naha ra cuñi xaan ra naha xuhun. ¹⁵ Tacan tan catyí ra Jesús tsihin ra naha:

—Vaha xaan jahá maa ndo tsi ndo nuu nyivi. Maa tyin tsa tsitó Nyoo tyin ña vaha añima ndo. Tandihí tsa cahnu cuñi maa nyivi, Nyoo ña cuñi ra nyehe ra yacan.

Ley Nyoo tsa tyaa ra Moisés, tan tsihin tsa ndacá ñaha Nyoo tsi yo

¹⁶ Ley tsa tsaha Nyoo tsi ra Moisés tyin tyaa ra, tan tsihin tuhun tsa tyaa ra cuví ndusu yuhu Nyoo tahañ tsanaha, yacan cuví tsa janaha ityi tsi nyivi nda cuanda quivi tsa quitsi ra Juan. Tan ra Juan quitsaha caahán ra tuhun vaha tyin tsa cuñi quitsi Nyoo tyin cua cundaca ñaha ra. Tan tandihí nyivi nducú xaan ñi cuhva tsa quihvi ñi nu ndacá ñaha ra.

¹⁷ Tan catyí yu tsihin ndo, tyin vasu cunaa andivi tan nu ñuhu ñayivi ihya, maa tyin tsa cuví ley Nyoo tsa tyaa ra Moisés, ña cua cunaa tsi tyin cua cundaa tandihí tsi.

Nu jacuahā ra Jesús tyin ña vaha tsa nacao ihñi rayi ñasihi ra (Mt. 19.1-12; Mr. 10.1-12)

¹⁸ Tatun iin rayi tan iyó ñasihi ra, tan nacao ihñi ra tsi ña, tan tindaha ra tsihin inga ñaha, coo cuatyí ra nuu Nyoo. Tan tatun tindaha inga rayi tsihin ñaha tsa nacao yii, coo tucu cuatyí ra can nuu Nyoo.

Nu jacuahā ra Jesús tsi nyivi cuenda ra cuca tsihin ra Lázaro

¹⁹ Tsioco iin ra cuca. Tan vaha xaan jahma tsinditsi ra. Tan tandihí quivi iyó vico jahá ra tan tsatsi vaha ra. ²⁰ Tan tsioco tucu iin ra ndaahvi tsa tsinañi Lázaro. Tan ra ihya cuaha xaan ndihyi iñi tsi ra. Tan nyaá ra yuvehe ra cuca ican. ²¹ Ra ndaahvi can, cuñi ra catsi ra, vasu tsa cucoyó xuu mesa ra cuca can. Tan nda cuanda ina tan tsaá ti naha ti nu nyaá ra, tan tsacayaá ti nu uhvi ra. ²² Tan iin quivi tsihi ra ndaahvi can. Tan ángel maa Nyoo na quihin tsi ra tan tsindaçā ra naha tsi ra nda nu nyaá ra Abraham gloria. Tacan tan tsihi tucu ra cuca can. Tan tsicutsi ñi tsi ra. ²³ Tacan tan ra cuca ican nyehé xaan ra tundoho nu nyii ra anyaya. Tan nanyehé ra nu cañi xaan nu nyaá ra Abraham tsihin ra Lázaro. ²⁴ Tacan tan canā tsaa ra cuca can tan catyí ra: “Tyatya Abraham, cundaahvi iñi tsi yu. Jaquitsi tsi ra Lázaro tan na jatyii ra luxu nundaha ra. Tan na jatoo ra ndutya nu yaa yu. Tyin nyehé xaan yu tundoho nu cayú ñuhu ihya”, catyí ra. ²⁵ Tan ra Abraham catyí ra tsihin ra: “Ndūcuhun iñi tyin vaha xaan tsioco un nu ñuhu ñayivi. Tan ra Lázaro, tuhun ndaahvi tsioco ra. Tan vityin vaha iyó ra ihya, tan yooho nyehé un tundoho. ²⁶ Tan inga tucu tuhun, tyin mahñu nu yucú yo ihya cunu xaan xahva. Tan ra yucú nyehe ña cuví cuhun ra naha nu nyii un. Tan ndi ra yucú nu nyii un, ña cuví quitsi ra naha nyehe”, catyí ra Abraham tsihin ra cuca can. ²⁷ Tacan tan catyí ra cuca ican: “Tyatya Abraham, jaha tumañi iñi tsi yu. Jacuhun tsi ra Lázaro nda vehe jutu yu. ²⁸ Tyin iyó uhun taahan ca ra yañi yu naha ra. Tan cuñi yu tyin catyi tuhun ra Lázaro tsihin ra naha nácaa nyii yu nyehé yu tundoho ihya, coto quitsi ndihí ra naha ihya”, catyí ra. ²⁹ Tacan tan catyí ra Abraham: “Iyó ley tsa tyaa ra Moisés. Tan iyó tuhun tsa tyaa ra cuví ndusu yuhu Nyoo tahañ tsanaha. Na tyaa yahvi ra yañi un naha ra, tun cuñi ra naha”, catyí ra Abraham. ³⁰ Tacan tan catyí ra cuca ican: “Tyatya Abraham. Ña cua tyaa yahvi ra naha. Maa tyin tatun yóo

tsa nandoto, tan cuhun cucahan tsihin ra naha, tacan tan cua tyaa soho ra naha tan cua nasama ra naha cuhva iyó ra naha”, catyí ra cuca ican. ³¹ Tan ra Abraham catyí ra: “Tatun ña cuñi ra naha tyaa yahvi ra naha tuhun tsa tyaa ra Moisés tan tuhun tsa tyaa ra cuví ndusu yuhu Nyoo taħan tsanaha, vasu ndi maa nandoto iin nyivi tan cahan ñi tsihin ra naha ña cua tsinu iñi ra naha.”

17

Nu jacuahá ra Jesús tsi yo nácaa jaha cuenda yo tsi yo coto javaha yo tsa ña vaha

(Mt. 18.6-7, 21-22; Mr. 9.42)

¹ Tyehen catyí ra Jesús tsihin ra tsicá tsihin ra:

—Tacan ñi iyó tsa quiñi caá tsa jatívi tsi nyivi. Maa tyin ndahvi ra ndaahvi tsa jatívi tsi nyivi. ² Vaha taxin ca na cunuhñi iin yuu jucun ra, tan jacuhun nyivi tsi ra nu ndutya ñuhu. Coto jatívi ca ra tsi nyivi ndi nasama cuhva iyó.

³ Jaha vaha ndo cuenda tsi ndo. Tatun iin ra cutahán tsihin ndo tan javaha ra tsa ña vaha tsihin ndo, cahan ndo tsihin ra tyin ña vaha tsa javaha ra. Tun nasama ra cuhva iyó ra, jaha ndo tucahnu iñi tsi ra. ⁴ Tan ndi maa javaha ra tsa ña vaha tsihin ndo utsa tsaha tsa iin quiñi, tatun tandihí tsa utsa tsaha tan catyí ra tsihin ndo tyin ndu uvi iñi ra tsa javaha ra; tandihí tsa utsa taahan tsaha can, jaha ndo tucahnu iñi tsi ra.

Nu jacuahá ra Jesús tsi yo tyin tatun tsinú iñi yo tsi ra, cuví javaha yo cuaha tsa vaha

⁵ Tacan tan catyí ra tava tyiñu ra Jesús tsihin ra:

—Cuhva tsa tsinu ca iñi ndi tsi un —catyí ra naha.

⁶ Tan catyí ra Jesús tsihin ra naha:

—Tatun tsinú iñi ndo tsi yu vasu tumaa cuhva iin tsiti mostaza tsa luhlu cuii ñi tsi, cua cahan ndo tsihin yutun cahnu tsa nañi sicómoro tsa nyaá ihya: “Na tuhun tsi un, tan cunyaa un nda nu ndutya ñuhu.” Tan cua tyaa yahvi tun tsa cua cahan ndo —catyí ra Jesús.

Nacaa taahán tsi tyaa yahvi yo tsi Nyoo

⁷ Tan catyí ra Jesús:

—Tatun iin nyooho tan iyó iin musu ndo, tan tsaa ra tsa tsahan ra tsicuhu tsijahá tyiñu ra, a tsijahá cuenda ra quiñi jana ndo, ¿a catyí ndo tsihin ra: “Cunyaan tan catsi un”? Ña tuhvá ndo cahan tacan tsihin ra. ⁸ Maa tyin tyehen tuhvá ndo caahán tsihin ra: “Javaha tsa cuxiñi yu. Tan tyihí un tsa catsi yu. Tsa yaha tsa catsi yu, tacan tan catsi tucu maa un”, tacan tuhvá ndo caahán tsihin ra. ⁹ Ndi ña tuhvá ndo nacuhvá tyahvi nyoo tsi ra tyin javaha ra náa tyiñu tava ndo tsi ra. ¹⁰ Tacan tucu maa ndo tsihin Nyoo. Quiñi ndihí javaha ndo tandihí tsa cahan ra tsihin ndo, taahán tsi catyí ndo tsihin ra: “Nyuhu nduve náa ca tyiñu cuaha xaan javaha ndi. Tyiñu tsa tava ñi un tsi ndi, yacan ñi javaha ndi. Tan ña yaha ca javaha ndi.”

Nu janduvahá ra Jesús tsi utsi taahan ra ndohó cuehe tyaa hyú

¹¹ Cuahán ra Jesús ityi ñuu Jerusalén tan yaha ra nu cuví xahñu Samaria tsihin Galilea. ¹² Tan nu tsaá ra iin ñuu, quiñi utsi taahan ra cuhví tsihin cuehe tyaa hyú. Tan tsicuiñi ra naha ndasava. ¹³ Tan caná tsaa ra naha tan catyí ra naha:

—Yooho, Maestro Jesús, cundaahvi iñi tsi ndi —catyí ra naha.

¹⁴ Tan tsa nyehe ra Jesús tsi ra naha tan catyí ra tsihin ra naha:

—Cuaahan ndo, cujanaha ndo tsi ndo tsi ra jutu tyin tsa nduvaha ndo.

Tacan tan cuahan ra naha. Tan ityi cuahan ra naha tan nduvaha ra naha.

¹⁵ Tacan tan tsa nyehe iin ra ican tyin tsa nduvaha ra, vatsí tsihin tsata nyico ra nu nyíí ra Jesús. Tan quitsaha caná tsa ra, jacahnú ra tsi Nyoo. ¹⁶ Tan tsa tsaá ra nu nyíí ra Jesús, tsicuiñi tsiti ra, tan nacañi nuu ra jiñi ra nda nu ñuhu nuu ra Jesús. Tan nacuhva ra tyahvi nyoo tsi ra. Ra tsa nduvaha ihya, ra Samaria cuví ra.

¹⁷ Tacan tan catyí ra Jesús:

—¿A ñavin utsi taahan ndo nduvaha? ¿Náa inga iin taahan ca ra naha? ¹⁸ ¿A intuhun ñi maa ra inga ñuu ihya vatsí, vatsí jacahnú tsi Nyoo? —catyí ra Jesús.

¹⁹ Tacan tan catyí ra tsihin ra tsa nduvaha ican:

—Nduvita, cuaahan. Nduvaha un tyin tsinú iñi un tsi Nyoo —catyí ra Jesús tsihin ra.

Cuhva cua quitsi Nyoo cua cundaca ñaha ra nu iyó yo ihya
(Mt. 24.23-28, 36-41)

²⁰ Tsiçá tuhun ra fariseo naha ra tsi ra Jesús, tan catyí ra naha:

—¿Ama cua quitsi Nyoo cua cundaca ñaha ra?

Tacan tan catyí ra Jesús:

—Ñavin tsa nyehé yo cuví tsa ndacá ñaha Nyoo ihya nu ñuhu ñayivi. ²¹ Ña cua cuví catyí nyívi: “Juvín ra nyíí ihya, juvín ra nyíí ityi ican.” Tyin Nyoo tsa tsaá ra mahñu ndo, tan ndacá ñaha ra tsi nyívi yihí cuenda ra —catyí ra tsihin ra naha.

²² Yaha yacan tan catyí ra tsihin ra tsicá tsihin ra:

—Cua tsaá quívi tsa cua cuñi ndo nyehe ndo tsi yuhu Rayi quee nda gloria. Maa tyin ña cua nyehe ndo tsi yu. ²³ Yihí ñi cua catyí ñi tsihin ndo: “Thya nyíí ra.” Inga ñi cua catyí ñi: “Ndacan nyíí ra.” Maa tyin coto cuhun ndo cunyehe ndo. Tan ña cunyicun ndo tsi ra can tyin ñavin yu cuví can. ²⁴ Tyin tandihí nyívi cua nyehe tsi yuhu, Rayi tsa quee nda gloria, quívi cua quitsi nyico yu inga tsaha. Tumaa tsa nyehé tandihí nyívi nu cañi tatsa savi tan quituvi ñuhu tatsa can ñi canduvi andivi, tacan cua cuví quívi cua quitsi yu inga tsaha.

²⁵ Maa tyin cua nyehe jihna yu tundoho cahnu xaan. Tyin nyívi tsa iyó tyin, ndasi cua cuñi ñi nyehe ñi tsi yu. ²⁶ Tumaa quívi tsa tsicoo ra Noé, tacan cua cuví quívi cua quitsi nyico yuhu Rayi quee nda gloria.

²⁷ Quívi tsicoo ra Noé, tsatsí nyívi. Tsihí ñi. Tindahá ñi. Tan tsaha ñi sehe sihi ñi tindaha, nda cuanda quívi quihvi ra Noé tsitsi yutun ndoo tan cuñ savi xaan. Tan tandihí ñi can tsihi ñi jahá ndutya. ²⁸ Tacan tucú quívi tsicoo ra Lot. Tsatsí ñi. Tsihí ñi. Jatá ñi. Xicó ñi. Tatsí ñi itu. Tan javahá ñi vehe ñi. ²⁹ Tan quívi tsa quitá ra Lot ñuu Sodoma ican, cuñ ñuhu tsihin azufre tsa quee nda andivi. Tan tsahñi ñuhu can tandihí nyívi Sodoma. ³⁰ Tacan cua cuví quívi quitsi nyico yu tsa cuví yu Rayi quee nda gloria.

³¹ Tatun nycú ndo nuquehe quívi quitsi yu, ña quihvi ndo tsitsi vehe tan tava ndo ndaha tyiñu ndo. Tan tatun yucú ndo tsitsi cuhu, ña cunuhu ca ndo yuvehe ndo. ³² Nducuhun iñi ndo tsa tahan ñasihí ra Lot. ³³ Tandihí nyooho tsa cuñi tsa iyó nu ñuhu ñayivi ihya, cua cunaa ndo. Tan tandihí nyooho tsa ña tyaá yahvi tsa iyó nu ñuhu ñayivi ihya, cua cacu ndo.

³⁴ Tan catyí yu tsihin ndo tyin tsacuaa can, uvi taahan nyívi cua cava iin nu tsito. Iin ñi cua naquihin yu. Tan inga ñi cua ndoo ñi. ³⁵ Tan uvi taahan

ñiñaha, iin caa ñi cua nyico ñi quiví can. Intuhun ña cua naquihin yu. Tan inga ña cua ndoo ña. ³⁶Tan catyí yu tshin ndo tyin uvi taahan ra cua cuyucu tsicuhu. Intuhun ra cua naquihin yu, tan inga ra cua ndoo ra —catyí ra Jesús.

³⁷Tsa tsiñi ra naha tsa cahan ra Jesús tacan, tsicā tuhun ra naha tsi ra:

—¿Numaa tahan cua cuvi yacan, Jutu Mañi yu? —catyí ra naha.

Tacan tan nacahan ra Jesús, tan catyí ra:

—Nu canyí ndiyí, ican cua nataca nditsii.

18

Nu jacuahā ra Jesús tyin tumaa tsa cahan yuhu iin ñaha tsihi y# tshin juez, tacan taahán tsi ndacan yo tsi Nyoo

¹Tsahá cuenda ra Jesús iin cuhva ihya. Tyin iin nyita ñi cuñí tsi tsa ndacan tahvi ra naha tan ña cundihi iñi ra naha. ²Tan catyí ra:

—Iyó iin ñuu tsa nyaá iin ra cuví juez. Tan juez ican ña tyaá yahvi maa ra tsi Nyoo. Tan ndi nyiví tan ña tyaá yahvi ra. ³Tan juvin ñuu ican iyó iin ñaha ndaahvi tsa tsihi y#. Tan tsaahán ña tsicahán ña tshin ra can, tyin tsicán ña cuatyí tsaha iin nu xaan iñi tsi ña. ⁴Tan juez ican ña tyaá yahvi nu tsa caahán ña. Ña jandaā maa nu tyiñu tsicán ña. Tan tsanaha xaan tsicán ña. Tacan tan quitsahā tsicá iñi nu juez can: “Vasu ndi maa ña tsinú iñi yu tsi Nyoo, tan nduve náa cuenda yu tsi nyiví, ⁵maa tyin ñaha ihya tsahá xaan ña tsihi tsi yu. Tan yacan cuenda vaha ca cua jacacu yu tsi ña. Tyin coto ña jaña ña tsa vatsi ña, tan cuhva ca ña tsihi tsi yu”, cuñí ra tsicá iñi ra.

⁶Tacan tan catyí Jutu Mañi yo, ra Jesús:

—Tacan catyí ra juez caquiñi can. Ra juez can ra caquiñi xaan cuví ra maa tyin jatyinyee ra tsi ñaha ndaahvi ican. ⁷Tan vihi ca cuví Nyoo tshin yo, ¿a ña cua jatyinyee ra tsi nyiví tsa nacatsj ra tsa tsicán ñi tsi ra nduvi tan ñiñu? ¿A cuatu xaan ca ra tan jatyinyee ra tsi ñi? ⁸Catyí yu tshin ndo, tyin numi ca cua jatyinyee ra tsi ñi. Maa tyin quiví tsa cua quitsi nyico yu tsa cuví yu Ray# tsa quee nda gloria, tsitó Nyoo tun nañihi ca yu tsi nyiví tsa tsinú tsa cuñi iñi tsi yu —catyí ra Jesús.

Iin cuhva cuenda ra tavá xuhun cuenda ra ndacá ñaha nda ñuu Roma tan cuenda ra fariseo naha ra

⁹Tacan tan tsahā cuenda ra Jesús iin cuhva cuenda ra tsa vaha xaan jahá tsi maa ra naha, tan ndasi cuñí ra naha nyehé ra tsi inga nyiví. Tan catyí ra:

¹⁰—Iyó uvi taahan ra cuahán vehe ñuhu cua ndacan tahvi ra naha tsi Nyoo. Iin ra ican ra fariseo cuví ra. Tan inga ra can ra tavá xuhun cuenda ra ndacá ñaha nda ñuu Roma cuví ra. ¹¹Tan ra fariseo ican nduvitā nyitya ra, tan quitsahā caahán ra tshin Nyoo. Tan catyí ra: “Jutu Mañi yu, nacuhvá yu tyahvi nyoo tsi un tyin yuhu ñavin tumaa inga nyiví cuví yu. Tyin iyó ñi suhú ñi. Quiñi icá ñi. Tan yihí ra naha iyó ñasihi ra tan iyó inga ñaha ra naha. Tan ña cuví yu tumaa ra tavá xuhun ihya. ¹²Tyin yuhu uvi tsaha tsicoó nyitya yu tsa iin vitya. Tan tsahá yu utsi taahan xuhun tsa iin iin cientu tsa jahá canaa yu tsi un”, catyí ra can. ¹³Tan ra tsa tavá xuhun can tsa cañi luxu nyaá ra. Tan ña canā iñi ra nanyehé ndaa ra. Tan cañi ndaha ra yiqui nyica ra tyin ndu uví iñi ra cuatyí ra. Tan catyí ra: “Jutu Mañi yu, cundaahvi iñi tsi yu tyin cuaha xaan cuatyí yu iyó”, catyí ra —catyí ra Jesús.

¹⁴Tan catyí nyico ra Jesús tyehen:

—Catyí yu tsihin ndo tyin Nyoo jahá ra tucahnu ifi tsi ra tavá xuhun ican. Janaa Nyoo cuatyí ra tan cuanuhu ra nda yuvehe ra. Maa tyin ra fariseo ican, nduve tucahnu ifi tscioq tsi ra, tyin nyivi tsa cahnu xaan jahá ñi tsi ñi, ña cahnu cuví ñi jahá Nyoo, tan nyivi tsa ndaahvi jahá tsi, cua jacahnu Nyoo tsi ñi —catyí ra Jesús.

Nu nasocó ra Jesús tsi tsa nyihi
(Mt. 19.13-15; Mr. 10.13-16)

¹⁵ Tacan tan quitsi ndaca nyivi tsa nyihi tsi ra Jesús tyin tyiso ndaha ra jiñi tsi naha tsi. Maa tyin cuhva tsa nanyehé ra tsi cá tsihin ra tyin cuaha tsa nyihi tsaá nu nyaá ra, cuxaan ra naha tan ña tsaahá ra naha cuhun tsa nyihi can.

¹⁶ Tacan tan cana ra Jesús tsi ra naha, tan catyí ra tsihin ra naha:

—Jaña ndo na quitsi maa tsi naha tsi nu nyaá yu. Tan ña casi ndo. Tyin nyivi tsa ndacá ñaha Nyoo, cuví ñi tumaa tsa nyihi ihya. ¹⁷ Tan catyí yu tsihin ndo tyin tatun ña nyitá ifi ndo tsi Nyoo, tumaa nyitá ifi iin tsa luhlu ihya tsi jutu tsi, ña cua cuví quihvi ndo nu ndacá ñaha Nyoo.

Nu tsaahá ra Jesús cuhva tyin yí xaan nacuhva cuenda iin ra cuca tsi ra tsi Nyoo
(Mt. 19.16-30; Mr. 10.17-31)

¹⁸ Tacan tan iin ra tsa cuví ityi nuu cuenda vehe ñuhu tsi cá tuhun ra tsi ra Jesús, tan catyí ra:

—Maestro, ra vaha cuví un. ¿Nacaa cua javaha yu tan coo yu ñayivi tsa ña cua naa maa? —catyí ra.

¹⁹ Tacan tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi maa Nyoo cuví ra vaha. ²⁰ Yooho tsitó un tandihi tuhun tsa tsaahá Nyoo tyin javaha yo: “Tsa ña coo inga ñaha tsi un. Ña cahñi un nyivi. Ña suhu un. Ña cahan un cuendu siqui nyivi. Tan tyaa yahvi un tsi jutu un tan sihi un” —catyí ra Jesús.

²¹ Tacan tan ra ican catyí ra:

—Tandihí maa yacan tan tyaa yahvi yu nda tahañ luhlu yu tan nda cuanda vityin —catyí ra.

²² Tsa tsiñi ra Jesús tsa cahañ ra can, tacan tan catyí ra tsihin ra:

—Maa tyin cumañi javaha un inga tsa taahán tsi javaha yo. Xico tandihí tsa iyó tsi un. Tan cuhva un xuhun can tsi nyivi ndaahvi. Tan quitsi nyicun un tsi yu. Tacan tan coo tsa cuca tsi un nda gloria —catyí ra.

²³ Maa tyin tsa tsiñi ra tsa cahañ ra Jesús, nducuiihya xaan cuñi ra, tyin cuca xaan ra. ²⁴ Tan tsa nyehe ra Jesús tyin nducuiihya cuñi ra, tan catyí ra:

—Yí xaan tan cuví nacuhva cuenda nyivi cuca tsi ñi na cundaca ñaha Nyoo tsi ñi. ²⁵ Yatyí xaan ca cuví yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra.

²⁶ Tan nyivi tsa tsiñi tsa cahañ ra catyí ñi:

—Tatun tacan, ¿yóo cua cuví cacu? —catyí ñi.

²⁷ Tacan tan ra Jesús catyí ra:

—Tandihí tsa ña cuví javahá nyivi, Nyoo cuví javahá ra tandihí —catyí ra.

²⁸ Tacan tan ra Pedro catyí ra:

—Jutu Mañi yu, nyuhu tandihí maa tsa iyó tsi ndi nacoq ndi, tan nyicún ndi tsi un —catyí ra.

²⁹ Tacan tan catyí ra Jesús tsihin ra:

—Tsa nditsa catyí yu tsihin ndo, tyin tandíhi nyooho tsa nacoq vehe, a ñasíhi ndo, a yañi ndo, a jutu ndo, a sehe ndo tsacatyí tsa tsahá ndo tsa cundaca ñaha Nyoo tsi ndo, ³⁰ cuaha xaan tsa vaha cua ñihi ndo ñuu ñayivi ihya tan inga ñayivi tsa cua coo, cua ñihi ndo ñayivi tsa ña cua naa maa —catyí ra Jesús.

Inga tsaha jacoto ra Jesús cuhva cua cahñi nyivi tsi ra
(Mt. 20.17-19; Mr. 10.32-34)

³¹ Tan cana sñin ra Jesús tsi tsa utsi uvi taahan ra tsicá tsihin ra, tan catyí ra tsihin ra naha:

—Vityin cahun yo nda ñuu Jerusalén. Tyin ndacan cua cundaa tyiñu Rayíi tsa quee nda gloria: tandíhi tyiñu tsa tyaq ra cuví ndusu yuhu Nyoo tahañ tsanaha. ³² Tyin ra xaan iñi tsi yu naha ra cua nacuhva cuenda ra naha tsi yu tsi ra inga ñuu, ra tsa ñavin ra ñuu Israel cuví. Tan cua vacu nducu ra naha tsi yu. Tan cua cahan nyaa ra naha tsi yu. Tan cua tivi sii ra naha nuu yu. ³³ Tan cua cañi ra naha tsi yu, tan cua cahñi ra naha tsi yu, maa tyin tsa tsinu uñi quivi tan cua nandoto yu inga tsaha —catyí ra Jesús.

³⁴ Maa tyin ña cutuñi iñi ra tsicá tsihin ra tsa cahan ra, tan ndi ña tsitó ra naha náa tuhun cahan ra tsihin ra naha. Tyin ña cuví cutuñi iñi ra naha.

Nu janduvaha ra Jesús iin ra cuaa ñuu Jericó
(Mt. 20.29-34; Mr. 10.46-52)

³⁵ Cuhva tsa cua tsaa ra Jesús ñuu Jericó, tan yuhu ityi ican nyaá iin ra cuaa, cayá ra. ³⁶ Tacan tan tsiñj ra cuvaa tsa yahá cuaha nyivi. Tan tsicá tuhun ra náa cuenda ñihi xaan cuvaa. ³⁷ Tan catyí tuhun nyivi tsihin ra tyin ra Jesús, ra ñuu Nazaret, vatsí. ³⁸ Tacan tan quitsaha caná tsaa ra tan catyí ra:

—¡Yooho Jesús, tata ra rey David! ¡Cundaahvi iñi tsi yu! —catyí ra.

³⁹ Tan ra tsa cuahán ityi nuu ican naha ra, catyí ra naha tsihin ra, nacasi ra yuhu ra. Maa tyin tsaa ca cana tsaa ra, tan catyí ra:

—¡Yooho, tata ra rey David! ¡Cundaahvi iñi tsi yu! —catyí ra.

⁴⁰ Tacan tan tsicuiñi ra Jesús. Tan tava tyiñu ra na cahun ra naha cuquihin ra naha tsi ra. Tan cuhva tsa tsaa ra nu nyaá ra Jesús, tan nducú tuhun ra Jesús tsi ra:

⁴¹ —¿Náa cuñi un javaha yu tsihin un?

Tacan tan ra cuaa ican nacahan ra, tan catyí ra:

—Jutu Mañi yu, cuñi yu nanyehe yu —catyí ra.

⁴² Tacan tan catyí ra Jesús tsihin ra:

—Nanyehe. Tsa nduvaha tinuu un tyin tsinú iñi un tsi yu —catyí ra.

⁴³ Tan iin yaha ñi, nanyehe ra cuaa can. Tan cueta cuahán ra nyicún ra tsi ra Jesús. Tan jacahnú ra tsi Nyoo. Tan tandíhi nyivi tsa nyehe tsa cuví can, jacahnú ndíhi tucu maa ñi tsi Nyoo.

19

Nu cuahán ra Jesús vehe ra Zaqueo

¹ Tacan tan quihvi ra Jesús ñuu Jericó. Tan cua yaha ra tsitsi ñuu. ² Tan ñuu can iyó iin ra cuca xaan, nañi ra Zaqueo. Tan cuví ra ityi nuu tsihin ra tava xuhun cuenda ra ndacá ñaha nda ñuu Roma. ³ Ra ihya cuñi xaan ra nacoto ra tsi ra Jesús. Tan ña cuví nyehe ra tsi ra tyin cuaha xaan nyivi cuahan tsihin ra. Tan maa ra ndiqui xaan ra. ⁴ Tacan tan tsinú xaan ra cuahán ra ityi nuu, tan ndaa ra iin nu yutun cahnu tsa nañi sicómoro tsa nyaá yuhu ityi nu cua

yaha ra Jesús, tan cuví nyehe ra tsi ra Jesús. ⁵ Tan cuhva tsa quitá ra Jesús nu nyáá yutun can, nanyehę ndaa ra ityi síqui tan nyehe ra tsi ra Zaqueo. Tan catyí ra tsihin ra:

—Zaqueo, janumi nuu un nu yutun juvin. Tyin vityin cuñí tsi tsa cuhun yu yuvehę un —catyí ra tsihin ra.

⁶ Tacan tan numi xaan nuu ra Zaqueo. Tan sii xaan cuñí ra. Tan quihin ra tsi ra Jesús cuahán tsihin ra yuvehę ra. ⁷ Tan tsa nyehe nyivi tsa tacan cuví, tandihí ñi quitsaha caahán nyaa ñi tsi ra Jesús. Tan catyí ñi tyin ndoó ra vehe iin ra iyó cuatyí. ⁸ Tan nu nyecú ra naha tsitsi vehe, ra Zaqueo tsinyaá nyityi ra. Tan catyí ra tsihin ra Jesús:

—Jutu Mañi yu, yuhu cua cuhva yu sava tsa iyó tsi yu tsi nyivi ndaahvi. Tan tatun jandaví ñaha yu tsi nyivi tan suhu yu tsa tsii ñi, vityin cua nacuhva cuenda yu cumi taahan ca tsaha tsi ñi —catyí ra tsihin ra.

⁹ Tacan tan catyí ra Jesús:

—Vityin cacu un, tan nyivi ra Abraham cuví tsi un. [Tyin nacuhva cuenda un tsi un tsi Nyoo tumaa nacuhva cuenda ra Abraham tsi ra tsi Nyoo.] ¹⁰ Tyin yuhu, Rayii tsa queę nda gloria, vatsi yu vatsí nanducu yu tan vatsí jacacu yu tsi nyivi tsa cuanaq maa —catyí ra Jesús.

Nu jacuahá ra Jesús tsi yo na jaha tyiñu yo tsihin tsa tsahá Nyoo tsi yo (Mt. 25.14-30)

¹¹ Tan tsitsi tsa tsiiñi nyivi tsa caahán ra Jesús, tan quitsaha tsahá cuenda ra inga cuhva ihya tsi ñi. Tyin tsa cuñí tsa ra ñuu Jerusalén. Tan nyivi cuñí maa ñi tyin tsa cua quitsaha cundaca ñaha ra ndacan. ¹² Tacan tan catyí ra:

—Tsicoq iin ra cuca tan tsa cuñí cuhun ra iin ñuu cañi. Tyin ndacan cua quihin cuenda ra tyiñu tsa cuví ra rey, tyin tacan tan cua quitsi nuhu nyico ra ñuu ra. ¹³ Tsa ndi cumañi ca cuhun ra, cana ra utsi taahan musu ra. Tan tsaha cuenda ra iin xuhun tsi iin ra naha. Tan catyí ra tsihin ra naha: “Jaha tyiñu ndo tsihin xuhun ihya nda cuanda quitsi nyico yu”, catyí ra. ¹⁴ Maa tyin nyivi ñuu ra, ndasi cuñí ñi nyehé ñi tsi ra tan ña cuñí ñi tsa cundaca ñaha ra tsi ñi. Tan jacuhun ñi tsi ra cuhun cunyicun tsi ra, tyin cahan ra naha tyin ña cuñí ñi tsa cundaca ñaha ra tsi ñi. ¹⁵ Maa tyin ra ican cuví maa ra rey. Tacan tan tsaq nyico ra nda ñuu ra. Tan quivi tsa tsaq ra, cana ra tsi musu ra, ra tsa nacoq ra xuhun tsihin. Tyin cuñí ra coto ra nácaa xuhun jaha canaa xuhun ra tsa nacoq ra. ¹⁶ Tan tsaq iin ra ican. Tan catyí ra: “Yooho taa, jaha canaa yu utsi taahan ca síqui xuhun tsa nacoq un tsi yu”, catyí ra. ¹⁷ Tacan tan catyí ra rey can tsihin ra: “Vaha xaan. Yooho cuví musu vaha. Tyin javaha un ndihí tyiñu tsa tava yu tsi un. Tan vityin cua cundaca ñaha un utsi taahan ñuu”, catyí ra rey can tsihin ra. ¹⁸ Tacan tan tsaq tucu inga ra tsa tsahá ra xuhun. Tan catyí ra: “Juhun xuhun ihya. Jaha canaa yu uhun taahan ca síqui xuhun tsa nacoq un tsi yu”, catyí ra. ¹⁹ Tacan tan catyí ra rey tsihin ra: “Yooho cua cundaca ñaha un uhun taahan ñuu”, catyí ra. ²⁰ Tacan tan tsaq tucu inga ra can. Tan catyí ra: “Juhun xuhun tsa tsahá un tsi yu. Yuhu naquihin vaha yu itsi tsitsi pañitu. ²¹ Tyin yuuhví xaan yu tsi un, tyin yooho xaan xaan un. Tyin tuhvá un naquihin tsa ñavin tsa tatsi un. Tan naquihín un ndaha tyiñu quitá nu jaha tyiñu inga nyivi”, catyí ra can. ²² Tacan tan ra rey ican catyí ra tsihin ra: “Yooho musu ña vaha cuví un. Vityin juvin ñi tsihin tsa cahan un tsi yu, cua cahan yu tsi un. Tatun tsitó un tyin yuhu xaan yu, tan tsitó un tyin naquihín yu tsa ña tatsi yu, tan naquihín yu ndaha tyiñu inga nyivi, ²³ nacuvi tyin ña tsityihí un xuhun yu banco tyin tsa yu maa tyin tsa nandaa

xuhun yu?” catyí ra rey can. ²⁴ Tan catyí ra tsihin ra nyecú ican: “Quinyaa ndo xuhun tsa tsaḥa yu tsi ra ihya, tan cuhva ndo tsi ra tsa jahā canaa utsi taahan ca siqui tsa tsaḥa yu tsi ra”, catyí ra. ²⁵ Tacan tan catyí ra naha tsihin ra rey can: “Maa tyin ra ican, tsa iyó utsi taahan tsi ra”, catyí ra naha. ²⁶ Tacan tan ra rey ican catyí ra: “Maa tyin catyí yu tsihin ndo tyin ra tsa vaha ca jahā tyiñu tsihin tsa tsaḥa yu tsi ra, cuaha ca cua cuhva yu tsi ra. Tan ra tsa tsaḥa yu luxu ñi, tan ña cuñí ra jahá tyiñu ra tsihin tsi, cua quinyaa yu tandihí can tsi ra. ²⁷ Tan tandihí nyivi xaan iñi tsi yu, ñi tsa ña cuñí tsa cundaca ñaha yu tsi ñi, ndaca ndo tsi ñi nyehe, tan cahñi ndo tsi ñi nuu yu ihya”, catyí ra rey can —catyí ra Jesús.

*Nu tsaq ra Jesús ñuu Jerusalén
(Mt. 21.1-11; Mr. 11.1-11; Jn. 12.12-19)*

²⁸ Tsa yaha caḥan ra Jesús yacan, tan jañihí ra cuahán ra ñuu Jerusalén. ²⁹ Tacan tan tsa cuñí tsa ra ñuu Betfagé tsihin ñuu Betania, yatyin ñi iin yucu tsa nañí Olivo, [tyin maa ñi maa yutun olivo iyó ican]. Tava tyiñu ra tsi uvi taahan ra tsicá tsihin ra. ³⁰ Tan catyí ra tsihin ra naha:

—Cuaahan ndo ñuu tsa canyí yatyin ñi ihya. Ican cua nañihí ndo iin burru luhlu, quiñi tsa ñaha ca quiñi tyayu. Nuuhñi ti. Ndatsi ndo tsi ti. Tan quiñi ndaca ndo tsi ti tsi yu. ³¹ Tatun yóo tsicá tuhun tsi ndo: “¿Nacuenda ndatsí ndo tsi ti?” catyí ndo tsihin ñi: “Ndatsí ndi tsi ti tyin tsiñí ñuhu ti tsi ra ndacá ñaha.”

³² Tacan tan ra tsicá tsihin ra, cuahán ra naha. Tan nañihí ra naha tsi ti tumaa tsa caḥan maa ra tsihin ra naha. ³³ Tan cuhva tsa ndatsí ra naha tsi ti, tsaq tsitoho ti. Tan nducú tuhun ra can naha ra tsi ra naha tan catyí ra:

—¿Nacuenda ndatsí ndo burru ihya? —catyí ra naha. ³⁴ Tacan tan nacahān ra can naha ra:

—Ndatsí ndi tsi ti tyin tsiñí ñuhu ti tsi ra ndacá ñaha —catyí ra naha.

³⁵ Tacan tan quiñin ra naha tsi ti. Tan tsindaca ra naha tsi ti nu nyíi ra Jesús. Tan tyiso ra naha jahma ra naha tsata ti. Tacan tan jandaq ra naha tsi ra Jesús tsata ti. ³⁶ Tacan tan cuahán ra Jesús. Tan cuaha xaan nyivi cuahán tsihin ra tsaquiní ñi jahma ñi nu ñuhu ityí nu cua yaha ra, yosó ra burru ican. ³⁷ Tsa tsa cua cuyatyin tandihí nyivi tan ra Jesús nu iñi nuu yucu Olivo, quitsaha caná tsa tandihí ñi tsinú iñi tsi ra tsihin tsa siñi cuñí ñi. Tan jacahnú ñi tsi Nyoo tyin cuaha xaan tsa iyo javaha ra nyehe ñi. ³⁸ Tan catyí ñi:

—¡Na jacahnu yo tsi ra Rey ihya tyin vatsí ra tsihin siñi Nyoo Jutu yo! ¡Tan na coo tsa taxin andiví! ¡Tan na jacahnu yo tsi Nyoo! —catyí ñi.

³⁹ Tacan tan juhva ra fariseo tsa cuahán tsihin ñi, catyí ra naha:

—Maestro, jacutaxin tsi nyivi ihya —catyí ra naha.

⁴⁰ Tan nacahān ra Jesús tan catyí ra:

—Tatun nyivi ihya tan cutaxin ñi, yuu cua cana tsa, tan cua jacahnu tsi tsi yu —catyí ra Jesús.

⁴¹ Tacan tan tsa tsaq ra Jesús yatyin ñi yuhu ñuu Jerusalén, nanyehe ra ñuu can tan quitsaha tsacú ra tsa cuihya cuñí ra. ⁴² Tan catyí ra:

—Vaha xaan tun tsatyin cuvi coto ndo tan cutuñí iñi ndo nácaa ñihí ndo tsa taxin coo añima ndo vityin ihya. Maa tyin xeehe xaan yihí tsa vaha can, tan ña cuví nañihí ndo can. ⁴³ Coo quiñi cua nyehe ndo tundoho jaha nu xaan iñi tsi ndo cua tyihí cutu nahnu tsi ndo. Tandihí ityí cua quiñi nahnu. Tan cañi tahan nahnu tsihin ndo. ⁴⁴ Tan cua caquin nahnu tsi ndo nu ñuhu tan cua cahñi nahnu tsi ndo. Tan ndi intuhun ca yuu tsa yosó toto tan ña cua naco

ca nahnu. Tacan cua cuvi tyin maa ndo ña cuñí ndo nacoto ndo tyin tsa vatsí Nyoo, vatsí jacacu ra tsi ndo.

Nu tava ra Jesús tsi nu xicó tsitsi vehe ñuhu cahnu nahnu
(Mt. 21.12-17; Mr. 11.15-19; Jn. 2.13-22)

⁴⁵ Tacan tan quihvi ra Jesús tsitsi cora vehe ñuhu cahnu. Tan quitsaha tava ra tandihí nyívi xicó tan nyívi jatá tsa yucú nu quehe. ⁴⁶ Tan catyí ra tsihin nahnu:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi. Tan nyooho jananduví ndo itsi vehe ñasuhu —catyí ra Jesús.

⁴⁷ Tan tandihí quivi tsaahán ra Jesús tsijacuahá ra tsi nyívi tsitsi vehe ñuhu cahnu can. Maa tyin ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra cuví mandoñi ñuu Jerusalén can, nducú ra naha cuhva cahñi ra naha tsi ra. ⁴⁸ Maa tyin ña ñihí maa ra naha nácaa javaha ra naha tyin tandihí nyívi tan vaha tyaá soho ñi tsa caahán ra Jesús.

20

Nu tsicá tuhun ra cumi tyiñu vehe ñuhu naha ra tsi ra Jesús yóo tava tyiñu tsi ra tsa cahan ra tsihin nyívi
(Mt. 21.23-27; Mr. 11.27-33)

¹ Iin quivi jacuahá ra Jesús tsi nyívi tsitsi vehe ñuhu cahnu, tan caahán ra nácaa jacacú Nyoo tsi ñi. Tan tsaá ra jutu tsa cuví ityi nuu naha ra tsihin ra maestro cuenda ley vehe ñuhu naha ra, tan tsihin tucu ra cuví mandoñi naha ra. ² Tan catyí ra naha tsihin ra Jesús:

—Catyí tuhun tsihin ndi ¿yóo tava tyiñu tsi un javaha un tyiñu ihya? —catyí ra naha.

³ Tacan tan ra Jesús catyí ra tsihin ra naha:

—Yuhu cuñí tucu yu nducu tuhun yu tsi ndo. ⁴ ¿Yóo jaquitsí tsi ra Juan tyin jacoondutya ra tsi nyívi? ¿A Nyoo jaquitsí tsi ra, a nyívi?

⁵ Tacan tan ra ican naha ra quitsaha caahán yuhu tahan ra naha tan catyí ra naha:

—Tun catyí yo tyin Nyoo jaquitsí tsi ra Juan, cua catyí ra tsihin yo nacuenda ña tsinu iñi yo tsa cahan ra Juan. ⁶ Tun catyí tucu yo tyin nyívi jaquitsí tsi ra, tandihí nyívi cua cahñi ñi tsi yo tsihin yuu. Tyin tandihí ñi, tan cuñí ñi tyin ndusu yuhu Nyoo cuví ra Juan —catyí ra naha.

⁷ Tacan tan nacahan ra naha tsihin ra Jesús tyin ña tsitó ra naha yóo tava tyiñu tsi ra Juan jacoondutya ra tsi nyívi. ⁸ Tacan tan ra Jesús catyí ra tsihin ra naha:

—Ndi yuhu, tan ña cua catyí tuhun yu tsihin ndo yóo tava tyiñu tsi yu tsa javaha yu tyiñu ihya.

Nu jacuahá ra Jesús tyin tumaa cuví juhva ra caquiñi naha ra, tacan cuví ra tsa cua cahñi tsi ra
(Mt. 21.33-44; Mr. 12.1-11)

⁹ Tacan tan tsaahá cuenda ra Jesús iin cuhva ihya tsi nyívi:

—Iin ra, tatsí cuaha ra nu ñuhu ra yoho tsiti yucu tsa cua cuví vinu. Yaha can tan tsaá nuu ra ñuhu can tsi juhva ra jahá tyiñu. Tacan tan naha cuahán ra inga ñuu. ¹⁰ Tan quivi tsa iñi tsiti nu yoho can, tacan tan jacuhun ra iin musu tyin naquihin ra juhva tsiti tsa taahán tsi tsi maa ra. Maa tyin cañi xaan ra jahá tyiñu ican naha ra tsi musu can. Tan nundi ra jacunuhú ra naha tsi ra. ¹¹ Tacan tan tsitoho yoho can jacuhun ra inga musu. Juvín ñi cañi xaan ra can naha ra tsi ra. Tan cahan nyaa ra naha tsi ra. Tan jacunuhú ra naha

tsi ra. Tan juvin ñi nduve tsa tsahã ra naha cuiso ra cunuhu ra. ¹² Tacan tan ra cuví tsitoho yoho can jacuhun nyico ra inga ra. Maa tyin juvin ñi tacan javahã nyico ra naha tsihin ra can. Tan jañicuehe ra naha tsi ra. Tan tavã ra naha tsi ra.

¹³ Yaha can tan catyí tsitoho ñuhu ican: “¿Nacaa cua javaha yu vityin? Vaha ca cua jacuhun yu sehe yu, ra tsa cuñí xaan yu. Vasiqúi cua tyaa yahvi ra naha tsi ra, tyin sehe yu cuví tsi ra”, catyí ra. ¹⁴ Maa tyin tsa nyehe ra jahá tyiñu can naha ra tsi ra sehe ra, natuhún tahan ra naha: “Juvín ra ihya cua ndoo tsihin ñuhu ihya tatun cúu jutu ra. Vaha ca na cahñi yo tsi ra. Tacan tan ndoo maa yo tsihin ñuhu ihya”, catyí ra naha. ¹⁵ Tacan tan tavã ra naha tsi sehe tsitoho ñuhu ican ityi tsata cora, tan tsahñi ra naha tsi ra —catyí ra Jesús.

Tacan tan catyí ra Jesús tsihin nyivi nyecú ican:

—¿Náa cua javaha tsitoho ñuhu ican tsihin ra can naha ra tyin tsahñi ra naha sehe ra? ¹⁶ Catyí yu tsihin ndo tyin cua quitsi ra tan cua cahñi ra tsi ra jahá tyiñu ican naha ra. Tan cua cuhva ra ñuhu ican tsi inga ra naha —catyí ra Jesús.

Tan tsa tsiñi nyivi tsa caahán ra, nayuhvi xaan ñi cuví. Tan catyí ñi:

—¿Ña cuñi Nyoo tahan yo tacan! —catyí ñi.

¹⁷ Maa tyin ra Jesús nanyehe ra nuu ñi tan catyí ra:

—Tun tacan tsicá iñi ndo ¿náa cuñi tsi catyí tsa nyaá nu tutu Nyoo? Tyin catyí tsi tyehen:

Yuu tsa ña cuñi ra javahã vehe cuatyíñu ra, yacan cuví yuu tsa tsiñi ñuhu ca.

¹⁸ Yóo nyivi cua canacava tsata yuu can, cua tahnu cuatyí ñi. Tan tatun maa yuu can canacava tsata ñi can taxin nyihi ñi —catyí ra Jesús.

¹⁹ Tan ra jutu tsa cuví ityi nuu naha ra tan ra maestro cuenda ley vehe ñuhu naha ra, tuvj iñi ra naha tyin tsa cahã ra Jesús tacan, tsi maa ra naha nañi can. Tan cuñi ra naha tsiin ra naha tsi ra tyin cahñi ra naha tsi ra. Maa tyin ña tsitó maa ra naha náca javaha ra naha, tyin nayuhvi ra naha tsi nyivi.

Nu jacuahã ra Jesús tsa cuenda tsa tyahvi nyivi xuhun tsi ra ndacá ñaha ñuu Roma

(Mt. 22.15-22; Mr. 12.13-17)

²⁰ Tacan tan jacuhun ra naha tsi juhva ra nducu cuhva tsi ra Jesús. Tan jahã ra naha tyin ra vaha cuví ra naha. Tyin tacan tan coto ra naha náa tsa ña vaha cua cahã ra Jesús tan cuví tsiin ra naha tsi ra. Tan cuhva cuenda ra naha tsi ra tsi ra ndacá ñaha. ²¹ Yacan tsicã tuhun ra naha tsi ra Jesús:

—Maestro, tsitó ndi tyin vaha tsa caahán un. Tan jacuahá un tsa vaha tsi nyivi. Tan ñavin cuhva iyó ñi nyehé un maa tyin nyehé un cuhva iyó añima ñi. Tan maa ñi maa tsa nditsa tyin ityi Nyoo janahá un. ²² Catyí tsihin ndi ¿a vaha tsa tyahvi yo tsa tsicán ra ndacá ñaha nda ñuu Roma tsi yo, a ña vaha? —catyí ra naha.

²³ Tan ra Jesús tuvj iñi ra tyin nducu cuhva ra naha tsi ra. Tan catyí ra tsihin ra naha:

—¿Nacuenda cuñi ndo nducu cuhva ndo tsi yu? ²⁴ Janaha jihna ndo iin xuhun tsi yu, na nyehe yu. ¿Yóo nuu nyaá xuhun can tan yóo sivi nyaá can? —catyí ra.

Tacan tan nacahã ra naha:

—Nuu ra ndacá ñaha, ra cuví rey cahnu, nyaá can tan juvin ñi sivi ra nyaá can —catyí ra naha.

²⁵ Tacan tan catyí ra Jesús:

—Tun tacan, cūhva ndo xuhun can tsi ra ndacá ñaha tyin tsii maa ra cuví tsi. Tan cūhva ndo tsi Nyoo tsa taahán tsi tsi ra —catyí ra Jesús tsihin ra naha.

²⁶ Tan ña cuví maa jandavi ñaha ra naha tsi ra Jesús tsihin tsa caahán ra tacan tsihin nyívi. Tan iyo xaan cuñí ra naha tsa nacahán ra. Tan taxin ña cuví ra naha.

*Nu cuñí ra cuví saduceo naha ra jandavi ñaha ra naha tsi ra Jesús
(Mt. 22.23-33; Mr. 12.18-27)*

²⁷ Tsa yahā can tan tsaā juhva ra cuví saduceo nu nyíi ra Jesús. Maa ra naha cuví ra tsa catyí tyin ña nandoto nyívi tun tsa tsihí ñi.

²⁸ Tacan tan catyí ra naha tsihin ra Jesús:

—Maestro, jandoq ra Moisés tyiñu ihya tyin tatun iin ra tsihí tan nandoq ñasihi ra, tatun nduve sehe ra tsicoq tsihin ña, taahán tsi tsa tindaha ra cuví yañi ra tsihin ña, tan coo sehe ra tsihin ña tsa cuenda ra yañi ra. ²⁹ Maa tyin cuñí ndi coto ndi nácaa, tyin tsicoq iin ra tan tsicoq utsa sehe ra. Tan ra tsa ñihi ca tsicoq ñasihi ra, maa tyin nduve sehe ñi tsicoq, tan tsihí ra. ³⁰ Tacan tan naquihín ra tsa tsinu uvi tsi ña can. Tan nduve tucu sehe ñi tsicoq. Tan tsihí tucu ra can. ³¹ Tan juvin ñi tacan javahā ra tsinu uñi. Tandihí tsa utsa ra naha javahā tacan. Ndi intuhun ra tan ña tsicoq sehe ra tsihin ña. ³² Tan nu ndihí tuhun tsihí ndihí maa ña. ³³ Tan cuñí ndi coto ndi yóo ra cua cuví yíi ña tsitsi tsa tandihí tsa utsa taahan ra naha quívi cua nandoto nyívi —catyí ra saduceo naha ra.

³⁴ Tacan tan nacahán ra Jesús, tan catyí ra:

—Ihya nu ñuhu ñayívi, rayíi tan ñaha tindahá ñi. ³⁵ Maa tyin nyívi tsa nacatsí Nyoo tyin nandoto ñi tan coo ñi nu ndacá ñaha ra, ña tindaha ca ñi tan ndi ña cua cuhva ca ñi sehe ñi tindaha. ³⁶ Tan nduve tuhun tsihí iyó ndacan tyin cua cuví ñi tumaa ángel. Tan cua cuví ñi sehe Nyoo tyin nandoto ñi. ³⁷ Tan tsa cuenda tuhun tsa nandoto ndiyi. Tsa nditsa cuví tsi tyin yacan jacoto ra Moisés nu nacatyí tuhun ra nácaa cayú taca iñu can. Tsihin can jacoto ra tsi yo tyin nyívi tsihí cua nandoto ñi. Tyin catyí ra: “Jutu yo Nyoo cuenda ra Abraham, tan cuenda ra Isaac, tan cuenda ra Jacob”, catyí ra Moisés. ³⁸ Tacan catyí ra tyin Nyoo, ñavin Nyoo cuenda nyívi tsihí cuví ra. Nyoo cuenda nyívi nyíto cuví ra. Tyin tsa cuenda Nyoo tandihí yo tan nyito añima yo vasu tsa tsihí cuñu ñuhu yo —catyí ra Jesús.

³⁹ Tacan tan juhva ra maestro cuenda ley vehe ñuhu naha ra catyí ra naha:

—Vaha xaan nacahán un, Maestro —catyí ra naha.

⁴⁰ Tacan tan ña caná ca maa iñi ra naha nducu tuhun ra naha náa inga ca nducu tuhun ra naha tsi ra.

*Ra Cristo cuví ra tata ra David, tan juvin ñi cuví tucu ra Sehe Nyoo
(Mt. 22.41-46; Mr. 12.35-37)*

⁴¹ Tacan tan tsicā tuhun ra Jesús tsi ra naha:

—¿Nacuenda catyí yo tyin ra Cristo tata ra David cuví tsi ra? ⁴²⁻⁴³ Tyin juvin ñi maa ra David catyí ra nu libru Salmo:

Caahán Nyoo Jutu yu tsihin Jutu Mañi yu, ra Cristo, tan catyí ra tsihin ra:

“Cūnyaa xiin cuaha yu nda cuanda cuhva yu tsi nu xaan iñi tsi un tyin cuhvi tsaha un tsi nahnu”, catyí Nyoo tsa tsatyíñu ra yuhu ra David tahān tsanaha.

⁴⁴ ¿Nacaa tsa tata ra David cuví tucu ra Cristo, tan juvin ñi maa ra David catyí tyin Jutu Mañi ra cuví tsi ra Cristo? —catyí ra Jesús.

Nu cahān ra Jesús tyin cuaha xaan cuatyí ra maestro cuenda ley vehe ñuhu iyó

(Mt. 23.1-36; Mr. 12.38-40, Lc. 11.37-54)

⁴⁵ Tandihí nyívi tsiñí ñi tsa cahān ra Jesús tsihin ra tsicá tsihin ra nu cahān ra tyehen:

⁴⁶—Jaha ndo cuenda tsi ndo tsihin ra maestro cuenda ley vehe ñuhu naha ra. Tyin taahán xaan iñi ra naha cunditsi ra naha jahma nañi. Tan cuahan ra naha nuyahvi, cuñí ra naha tsa cuhva nyívi yucú nuyahvi nacumi tsi ra naha tsihin tsa jaha ñi tsa ñayívi tsi ra naha. Tan nanducú ra naha tyayu vaha cunyecu ra naha tsitsi vehe ñuhu, tan nu cuahán ra naha vico. ⁴⁷ Tan naha tsicán tahvi ra naha tsi Nyoo nu tuví, tsa cuñí ra naha tsa nyehe nyívi tan catyí ñi tyin vaha xaan nyívi cuví ra naha. Maa tyin juvin ñi maa ra naha cuví ra quinyaá vehe ñi ndaahvi tsa tsihí yí tyin ña cuví tyahvi ñi xuhun tsa tavá ra naha tsi ñi. Yacan ñihi xaan cua tatsi tuñi Nyoo tsi ra naha —catyí ra Jesús.

21

Tsa jamañi iin ñaha ndaahvi tsa tsihí yí

(Mr. 12.41-44)

¹ Tan nyehe ra Jesús tyin cuaha xaan nyívi cuca tyihí ñi xuhun tsitsi caja tsa nyíi tsitsi vehe ñuhu cahnu. ² Tan nyehe tucu ra tsi iin ñaha ndaahvi tsa tsihí yí. Tan tyihí ña uvi taahan ñi xuhun nyíhi. ³ Tan catyí ra:

—Tsa nditsa catyí yu tsihin ndo tyin nuu Nyoo cuaha ca xuhun tyihí ñaha ndaahvi ihya tan ñavin ca tandihí ñi cuca can. ⁴ Tyin tsa ndoo ña tyihí ñi. Tan ñaha ihya tyihí ña tandihí tsa iyó tsi ña —catyí ra.

Nu cahān ra Jesús tyin cua tani vehe ñuhu cahnu

(Mt. 24.1-2; Mr. 13.1-2)

⁵ Tacan tan juhva nyívi natuhún ñi tuhun cuenda vehe ñuhu cahnu ican. Tan catyí ñi tyin sii xaan caá yuu. Tan sii xaan caá tsa jamañi nyívi. Tacan tan catyí ra Jesús:

⁶—Coo quívi tan cua tani tandihí tsa nyehé ndo ihya. Tan ndi intuhun ca yuu tan ña cua coso ca siquí inga tsi. Ndihi tsi cua caní nu xaan iñi tsi ndo.

Tsa cua cuvi tsa ndi cumañi ca naa ñuhu ñayívi

(Mt. 24.3-28; Mr. 13.3-23)

⁷ Tacan tan nducú tuhun nyívi tsi ra Jesús, tan catyí ñi:

—Maestro, ¿ama cua cuvi tandihí tsa caahán un ihya? ¿Naca tan coto ndi tatun tsa cuyatyin tsa naa ñuhu ñayívi? —catyí ñi.

⁸ Tacan tan catyí ra Jesús:

—Jaha vaha ndo cuenda, coto jandavi ñaha nyívi tsi ndo. Tyin cuaha xaan ra cua quitsi, tan cua cuatyíñu ra naha sívi yu, tan cua catyí ra naha: “Yuhu cuví Cristo, ra tsa jaquitsí Nyoo. Tyin tsa cuñí naa ñuu ñayívi”, cua catyí ra. Maa tyin ña cunyicun ndo tsi ra naha. ⁹ Tan quívi cua ñihi tuhun ndo tyin tsa iyó cuatyí tan ñihi cañi tahan nyívi, ña nayuhvi ndo. Tyin tandihí can taahán tsi cuví tsa jihna ñi. Maa tyin cumañi ca tsa quívi tsa cua naa ñuhu ñayívi.

¹⁰ Tan catyí tucu ra:

—Nyívi iyó iin ñuu cua cañi tahan ñi tsihin nyívi inga ñuu. Tan cua coo cuatyí. ¹¹ Tan ñihi xaan cua taan. Tan cua coo tama. Tan cua coo cuehe tandihí ñi ityi. Tan cua nyehe nyívi tsa yuuhví ityi andívi. Tan cuaha xaan tsa iyo nahnu tsa ña tuhvá nyívi nyehe tan cua nyehe ñi. ¹² Maa tyin tsa ndi

cumañi ca cuvi yacan, cua cuxaan iñi nyivi tsi ndo. Tan cua ndacan ñi cuatyí tsaha ndo. Tyin cua cutuñi ndo tan cua cuhva cuenda ñi tsi ndo tsi ra jutu. Tan cua tyihí ñi tsi ndo tsitsi vehe caa. Tan cua cundaca ñi tsi ndo nuu rey tan nuu ra ndacá ñaha tsacatyí sivi yuhu. ¹³ Tacan tan cuví cahan ndo tuhun yu tsihin ñi. ¹⁴ Maa tyin jaha ndo cuenda tan ña cua caca iñi ndo náa tuhun cua nacahan ndo tsihin ra ndacá ñaha ican. ¹⁵ Tyin yuhu cua cuhva yu tuhun cua cahan ndo. Tan cua cuhva yu tsa nyityi jiñi ndo nu cua cahan ndo. Ndi intuhun nu xaan iñi tsi ndo tan ña cuvi jaha nahnu tsi ndo. ¹⁶ Maa tyin nyivi cua cuhva cuenda ñi tsi ndo tsi nu xaan iñi tsi ndo. Nda cuanda jutu ndo tan sihi ndo, ra cuví yañi ndo, nyivi ndo, tan ra vaha iñi tsi ndo cua cuhva cuenda ra naha tsi ndo tsi nu xaan iñi tsi ndo. Tan yihí nyooho cua cahñi nyivi tsi ndo. ¹⁷ Tandihí nyivi tan ndasi cua cuñi ñi nyehe ñi tsi ndo tsacatyí yuhu. ¹⁸ Maa tyin ndi intuhun ixi jiñi ndo tan ña cua cunaa. ¹⁹ Tatun ña ndu uvi iñi ndo tsa nyicun ndo tsi yu, cua cacu ndo.

²⁰ Quivi cua nyehe ndo tyin ñi canduvi yuhu ñuu Jerusalén ihya nyecú andaru, coto ndo tyin tsa cuñi naa ñuu ihya. ²¹ Tan nyivi iyó ñuu tsa cayucú Judea, cua cunu ñi tan cuhun xeehe ñi ityi yucu. Tan nyivi iyó ñuu Jerusalén ihya, cua quita ñi. Tan nyivi iyó tsitsi cuhu, ña cua quitsi nuhu ñi ñuu ihya. ²² Tyin yacan cuví quivi tsa cua tatsi tuñi Nyoo tsi nyivi ñuu ihya. Tyin tsa cua cuvi tandihí cuhva catyí nu tutu Nyoo. ²³ Tan ndahvi ñiñaha tsa ñuhú sehe quivi can. Tan ndahvi ñi tsa iyó sehe lee tsa ndi tyaxín. Tyin cuaha xaan tundoho cua nyehe ñi tan tandihí nyivi. Tyin cahnu xaan tsa uhvi cua nyehe nyivi ñuu Jerusalén ihya cua jaha Nyoo. ²⁴ Andaru cua cahñi ra naha tsi juhva nyivi tsihin mityi. Tan cua tñn ra naha juhva ñi tan cundaca ra naha tsi ñi ñuu nahnu. Tan nyivi tsa ñavin nyivi Israel cuví, cua cuyucu ñi ñuu Jerusalén ihya nda cuanda quivi tsa catyí maa Nyoo.

*Nacaa cua quitsi Rayii tsa quee nda gloria inga tsaha
(Mt. 24.29-35, 42-44; Mr. 13.24-37)*

²⁵ Tacan tan cuaha tsa iyo cua nyehe nyivi nu ñicanyii, tan nu yoo, tan nu tiñuu. Tan ihya nu ñuhu ñayivi cua nayuhvi ñi tsihin tsa iyo cua nacatyin ndutya ñuhu. ²⁶ Tan cua cúu naaha ñi tsihin tsa yuuhvi ñi tsa tsicá iñi ñi náa ndihí tsa cua cuvi ihya nu ñuhu ñayivi. Tyin nda cuanda tsa iyó andivi cua nacanda tan taan. ²⁷ Tacan tan cua nyehe ñi tsi yuhu, Rayii tsa quee nda gloria, vatsí nuu yu tsitsi vico tsihin tunyee iñi Nyoo, tan tsihin tsa cahnu cuví ra. ²⁸ Tan cuhva tsa cua quitsaha yacan tan jandu iin ndo iñi ndo tan cusi iñi ndo tyin numi xaan cua cacu ndo —catyí ra.

²⁹ Tacan tan tsahá cuenda ra Jesús iin cuhva ihya, tan catyí ra:

—Jaha ndo cuenda yutun higuera, tsihin tandihí ca yutun. ³⁰ Tatun tsa nduyutya numa tun tsa cuyatyin cuun savi. ³¹ Tan tacan tucu nyooho, tatun tsa nyehe ndo tyin tsa quitsahá cuví tandihí tsa cahan yu tsihin ndo, coto ndo tyin tsa nyanaa quivi tsa cundaca ñaha Nyoo nu ñuhu ñayivi ihya.

³² Maa tyin tsa nditsa catyí yu tsihin ndo tyin yacan cua cuvi jihna tsa ndi cumañi ca cúu nyivi tsa iyó nu ñuhu ñayivi. ³³ Coo quivi cua naa andivi tan ñuhu ñayivi, maa tyin tuhun caahán yu, ña cua cundihi tsi.

³⁴ Tan jaha ndo cuenda tsi ndo coto ndundava iñi ndo tsihin tsa cua javaha ndo tsa caquiñi, a tsa coho ndo nyixi, a tsa caca xaan iñi ndo tundoho ñayivi ihya. Jaha ndo cuenda coto ndundava iñi ndo tsihin yacan. Tan coto sana iñi ndo tan quita quivi cua quitsi yu tan cua quitsi tundoho cua nyehe ndo.

³⁵ Tyin tacan cua cuvi, tandihí nyivi iyó nu ñuhu ñayivi, sana iñi ñi tan tumaa

iin tsa cua nacasi Nyoo nu yucú ñi tan ña cua cuvi quita ñi. ³⁶ Maa tyin nyooho cuatu ndo. Ndaçan tahvi ndo tsi Nyoo tandihi quivi, na jacacu ra tsi ndo. Tan ña nyehe ndo tandihi tundoho tsa cua coo. Ndaçan tahvi ndo, tacan tan cua cuvi tsaá ndo nu nyaá yuhu, Rayii tsa quee nda gloria —catyí ra Jesús.

³⁷ Tan tandihi quivi jacuahá ra Jesús tsi tandihi nyivi tsitsi vehe ñuhu cahnu. Tan tsa tsacuaa tsicá ra yucu Olivo. ³⁸ Tan tandihi nyivi tsaá ñi tsitsi vehe ñuhu cahnu ndihi tsa tuvi, tyin tyaa soho ñi tsa caahán ra.

22

Nu cua xico ra Judas Iscariote tsi ra Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Tan tsa nyanaá yatyin quivi tsa cua coo vico pascua, vico nu tuhvá nyivi tsatsí paan tsa nduve yutsan iya yihí. ² Tan ra jutu tsa cuví ityi nuu naha ra tsihin ra maestro cuenda ley vehe ñuhu naha ra, nducú xaan ra naha cuhva cahñi ra naha tsi ra Jesús. Maa tyin yuuhví ra naha tsi nyivi.

³ Tacan tan quihvi nu ña vaha tsi nu Judas Iscariote. Tan nu ihya cuví iin tsa utsi uvi taahan ra tsa nacatsí ra Jesús. ⁴ Tan nu ihya, tsaçan nu tsicahán nu tsihin jutu tsa cuví ityi nuu tan tsihin ra yihí ndaha tsi ra jahá cuenda vehe ñuhu cahnu naha ra. Tan natuhun tahan ra naha nácaa cua cuhva cuenda nu Judas tsi ra Jesús tsi ra naha. ⁵ Tan ra ican naha ra sii xaan cuñi ra naha. Tan tyihí ra naha cuhva tyin cuhva ra naha xuhun tsi ra Judas. ⁶ Tan ra Judas ndoo ra vaha. Tan quitsahá nducú ra cuhva ama cua nacuhva cuenda ra tsi ra Jesús tsi ra can naha ra, cuhva tsa nduve nyivi yucú tsihin ra Jesús.

Nu cuxiñi ra Jesús tsihin ra tsicá tsihin ra

(Mt. 26.17-29; Mr. 14.12-25; Jn. 13.21-30; I Co. 11.23-26)

⁷ Tan tsaá quivi tsa cuví vico tsa tsatsí nyivi paan tsa nduve yutsan iya yihí. Tan juvin ñi quivi ican tuhvá ñi tsañi iin mbee luhlu tsa vico pascua can. Tyin catsi ñi tsi ti. ⁸ Tan ra Jesús jacuhun ra tsi ra Pedro tsihin ra Juan, tan catyí ra tsihin ra naha:

—Çuaahan ndo cujanduvaha ndo mbee tsa cua cuxiñi yo cuenda vico pascua —catyí ra.

⁹ Tacan tan nducú tuhun ra naha tsi ra:

—¿Numaa cuñi un javaha ndi tsa cuxiñi yo? —catyí ra naha.

¹⁰ Tacan tan catyí ra Jesús tsihin ra naha:

—Çuaahan ndo tsitsi ñuu. Ican cua nañihi ndo tsi iin ra nyisó iin quivi ndutya. Çuaahan ndo tsata ra tan quihvi ndo vehe nu quihvi ra. ¹¹ Tan catyí ndo tsihin tsitoho vehe can: “Ra cuví Maestro, cuñi ra coto ra numaa nyaá cuarto nu cua cuxiñi ra tsihin ra tsicá tsihin ra, tyin jacahnu ra vico pascua.” Tacan catyí ndo tsihin ra. ¹² Tacan tan cua janaha ra iin cuarto cahnu ityi siqui, nu tsinu uvi pisu tsi ndo. Tan tsa nduvahá maa tsi. Tan ndacan cua javaha ndo tsa cuxiñi yo —catyí ra tsihin ra naha. ¹³ Tacan tan caahán ra naha. Tan nañihí ra naha tandihi tumaa tsa çahán ra Jesús. Tacan tan na icá vaha ra naha tsa cuxiñi ra naha cuenda vico pascua.

¹⁴ Tacan tan tsa taçan tsi cuhva tsa cuxiñi ra Jesús tsihin tandihi ra tava tyiñu ra, tsinyecu ra naha yuhu mesa. ¹⁵ Tacan tan catyí ra Jesús:

—Cuñi xaan yu cuxiñi yu tsihin ndo cuenda vico pascua ihya tsa ndi cumañi ca nyehe yu tundoho tan cúu yu. ¹⁶ Tan catyí yu tsihin ndo tyin ña cua catsi ca yu inga tsaha tsa cuenda vico ihya, nda cuanda tahan tsi inga tsaha nda nu ndacá ñaha Nyoo —catyí ra.

¹⁷ Tacan tan quih̄in ra iin vasu vinu. Nacuhv̄a ra tyahvi nyoo tsi Nyoo. Yah̄a can tan catyí ra tsihin ra nyecú tsihin ra:

—Quih̄in ndo tsehe. Tan coh̄o ndo luxu luxu. ¹⁸ Tyin catyí yu tsihin ndo tyin ña cua coh̄o ca yu vinu nda cuanda quitsi Nyoo tan quitsaha cundaca ñaha ra nu ñuhu ñayiv̄i ihya —catyí ra.

¹⁹ Yah̄a can tan quih̄in ra paan, tan tsah̄a ra tyahvi nyoo tsi Nyoo, tan tsahn̄ya sava ra can. Tsahan tsah̄a ra can tsi ra naha. Tan catyí ra tsihin ra naha:

—Paan ihya cuví tumaa cuñu ñuhu yu. Tyin cua cuhva cuenda yu tsi yu tan cúu yu tsa cuenda tsa vaha tsi maa ndo. Tacan cuñí tsi nducuhun iñi ndo tsi yu tan cuxiñi ndo tyehen —catyí ra.

²⁰ Tan tsa yah̄a cuxiñ̄j ra naha, tacan tan quih̄in ra vasu vinu, tan catyí ra:

—Tsihin vinu ihya ndoó Nyoo tyiñu tsihin ndo vityin. Tyin vinu tsa yihí tsitsi vasu ihya, tumaa niñi yu cuví tsi. Tan tsa vaha tsi nyooho tan cua cati niñi yu. Tan cua cúu yu.

²¹ Maa tyin vityin, ra tsa cua nacuhva cuenda tsi yu tsi ra xaan iñi tsi yu, iin ñi nu yosó ndaha ra tsihin ndaha yu nu mesa ihya. ²² Tyin yuhu, Raȳi tsa quee nda gloria, cua tahan yu tumaa tsa nyaá maa tsa cua tahan yu. Maa tyin ðdahvi ra tsa cua nacuhva cuenda tsi yu! —catyí ra Jesús.

²³ Tacan tan ra tsicá tsihin ra Jesús quitsah̄a nducú tuhun tahan ra naha, ndáa ra cua nacuhva cuenda tsi ra Jesús tsi ra xaan iñi tsi ra.

Nu cah̄an yuhu tahan ra tsicá tsihin ra Jesús, yoo ra cahnu ca cuví

²⁴ Yah̄a can tan quitsah̄a caah̄an yuhu tahan ra tsicá tsihin ra Jesús, ndáa ra cahnu ca cuví. ²⁵ Tan ra Jesús catyí ra:

—Tsitó nyooho tyin ra ndacá ñaha tsi nyiv̄i iyó nu ñuhu ñayiv̄i, ñihi xaan ndacá ñaha ra naha tsi ñi. Tan cuñí ra naha tyin catyí nyiv̄i tyin jatyinyeé ra naha tsi ñi. ²⁶ Maa tyin nyooho ña taah̄an tsi javaha ndo tumaa javahá ra ican naha ra. Tyin tatun cuñí ndo cuví ndo ra cuví ityi nuu, taah̄an tsi janduluhlu ndo tsi ndo. Tan tatun cuñí ndo cundaca ñaha ndo, cuñí tsi tsa cuví ndo musu tandih̄i ndo. ²⁷ Tyin nu ñuhu ñayiv̄i ihya, ra cuví ityi nuu cuví ra tsa ña jahá tyiñu. Tan nyaá ra yuhu mesa tan musu ra tsahá tsa catsi ra. Maa tyin yuhu, ra cuví ityi nuu cuví yu, tan cuví yu musu ndo.

²⁸ Tan nyooho cuví ndo tsa nyecú tsihin yu tandih̄i nu nyehe yu tundoho.

²⁹ Yacan cuenda, yuhu tsah̄a yu iin nu cua cundaca ñaha ndo tumaa tsa tsah̄a Jutu yu tsa cundaca ñaha yu. ³⁰ Tyin cua catsi ndo tan cua coh̄o ndo nu mesa tsihin yu nda nu ndacá ñaha yu. Tan ndacan cua cunyecú ndo cundaca ñaha ndo nyiv̄i cuví tata tsa utsi uvi sehe ra Israel.

Nu caah̄an ra Jesús tyin cua catyí ra Pedro tyin ña nacoto ra tsi ra (Mt. 26.31-35; Mr. 14.27-31; Jn. 13.36-38)

³¹ Tacan tan catyí ra Jesús tsihin ra Pedro:

—Nyehe vaha un, yooho Simón. Tyin nu ña vaha tsa tsican ndatu nu tsi Nyoo tsa nducu cuhva nu tsi ndo tyin cuñí nu tsa ndu uvi iñi ndo tsa tsinú iñi ndo tsi Nyoo. ³² Maa tyin tsican tahvi xaan yu tsi ra tsa cuenda un, na ña jandih̄i un tsa tsinú iñi un tsi yu. Tan tsa ndu uvi iñi un cuatyí un, tan natsinu vaha nyico iñi un tsi yu, cua jatyinyee un tsi ra yañi un naha ra tsa ña cua jandih̄i ra naha tsa tsinú iñi ra naha tsi yu —catyí ra Jesús tsihin ra Simón.

³³ Tan ra Simón catyí ra tsihin ra:

—Jutu Mañi yu, tsa ndu iin vaha iñi yu tsa cuhun yu tsihin un vasu vehe caa, vasu cúu yu tsihin un —catyí ra.

³⁴ Tacan tan catyí ra Jesús tsihin ra:

—Pedro, catyí yu tsihin un tyin vityin tsa ndi cumañi ca vacu tsitooho, yooho cua catyí un uñi tsaha tyin ña nacoto un tsi yu —catyí ra Jesús tsihin ra.

Nu tsa cuñi tsa cuhva tsa cua nacuhva cuenda ra Judas tsi ra Jesús

³⁵ Tacan tan tsicá tuhun ra Jesús tsi ra tsicá tsihin ra tan catyí ra tsihin ra naha:

—Nducuhun iñi ndo quivi tsa jacuhun yu tsi ndo tsa cahán ndo tsihin nyivi, tan nduve tsa tsindahá ndo, ndi marali, ndi xuhun, ndi inga pari nditsan ndo. ¿A cumañi tsa cumañi tsi ndo quivi can? —catyí ra Jesús.

—Nduve —catyí ra naha.

³⁶ Tacan tan catyí ra Jesús tsihin ra naha:

—Maa tyin vityin, tatun iyó marali ndo, cundaha ndo. Tan tatun iyó xuhun ndo, cundaha ndo. Tatun nduve mityi ndo, xico ndo iin jahma ndo tan jata ndo mityi ndo. ³⁷ Tyin catyí yu tsihin ndo, tyin tandihi tuhun yu tsa nyaá nu tutu Nyoo cua cundaa tsi, tyehen catyí tsi: “Cua tatsi tuñi nyivi tsi ra tumaa tsa cuví ra iin ra caquiñi.” Tacan catyí tuhun yu nu tutu Nyoo. Tan tandihi tsa catyí tsi tsa cuenda yu cua cundaa tsi —catyí ra.

³⁸ Tacan tan catyí ra tsicá tsihin ra:

—Ihya nyecú uvi taahan mityi —catyí ra naha.

—Tsa iyó vaha ñi —catyí ra Jesús.

*Nu tsican tahvi ra Jesús tsi Nyoo nda Getsemani
(Mt. 26.36-46; Mr. 14.32-42)*

³⁹ Tacan tan quitá ra Jesús vehe nu nyí ra. Tan cuahán ra yucu Olivo, cuhva tuhvá maa ra tsicá. Tan ra tsicá tsihin ra cuahán ra naha nyicún ra naha tsi ra. ⁴⁰ Tan tsa tsaá ra naha ndacan, catyí ra tsihin ra naha:

—Ndacan tahvi ndo tsi Nyoo tyin tacan tan ña cuví jaha canaa nu ña vaha tsi ndo.

⁴¹ Tacan tan cuahán ra Jesús tsa cañi luxu ca, tumaa tsa cañi tsaá iin yuu tun cañi yo can. Tacan tan tsicuiñi tsiti ra. Tan quitsahá caahán ra tsihin Nyoo, ⁴² tan catyí ra:

—Tyatya Jutu yu, tun yooho tan cuñi un, jatsiyo tundoho tsa cua nyehe yu ihya. Maa tyin na ña cuví cuhva cuñi maa yu. Na cuví cuhva cuñi maa un —catyí ra Jesús.

⁴³ Tacan tan quituvi iin ángel Nyoo, tyin cuhva ra tunyee iñi tsi ra Jesús.

⁴⁴ Tan tsitsi tsa nyehé xaan ra Jesús tundoho tsa cuiihya xaan cuñi ra, tan ñihi ca tsican tahvi ra tsi Nyoo. Tan cuaha xaan tyeen ra quitá tan tsatí tsi nu ñuhu, tan caá tsi tumaa caá ñiñi.

⁴⁵ Tacan tan nduvitá ra tsa ndihí cahán ra tsihin Nyoo. Tan cuahán nyico ra nu yucú ra tsicá tsihin ra. Tan nyehé ra tyin quixí ra naha, tsa cuenda tsa cuiihya xaan cuñi ra naha, ña cunyeé iñi ra naha ñumaahna tan quixí ra naha.

⁴⁶ Tacan tan catyí ra Jesús tsihin ra naha:

—¿Nacuenda quixí ndo? Nduvita ndo. Tan ndacan tahvi ndo tsi Nyoo, tyin tacan tan ña cuví jaha canaa nu ña vaha tsi ndo.

*Nu tsaha cuenda ra Judas tsi ra Jesús tsi nu xaan iñi tsi ra
(Mt. 26.47-56; Mr. 14.43-50; Jn. 18.2-11)*

⁴⁷ Ndi caahán ca ra Jesús yacan, tan tsaꞗ cuaha ra catsaꞗ. Tan ityi nuu, vatsí nu Judas, iin ra tsicá tsihin ra Jesús. Tan natuhvꞗ nu nu nyaá ra Jesús tyin tyayuhu nu tsi ra. ⁴⁸ Tacan tan cahan ra Jesús tsihin nu:

—Yooho Judas, ꞗa tsihin tsa cua tyayuhu un tsi yu, tan cua nacuhva cuenda un tsi yuhu Rayii tsa queꞗ nda gloria tsi nu xaan iñi tsi yu nahnu? —catyí ra Jesús.

⁴⁹ Tan ra nyecú tsihin ra Jesús quitsahꞗ nducú tuhun ra naha tsi ra:

—Jutu Mañi ndi ꞗa vaha cahnya ndi tsi ra naha tsihin mityi? —catyí ra naha.

⁵⁰ Tacan tan iin ra can, tsahnyꞗ ra soho tsiyo cuaha iin ra tsa cuví musu ra jutu tsaahnu tsa cuví ityi nuu.

⁵¹ Maa tyin ra Jesús catyí ra tsihin ra:

—Jaña ndo. Vaha ñi —catyí ra.

Tacan tan tñin ra Jesús soho ra ican tan janduvahꞗ ra itsi. ⁵² Tan ra jutu tsa cuví ityi nuu naha ra tsihin ra yihí ndaha tsi ra jahá cuenda vehe ñuhu naha ra, tan ra cuví mandoñi naha ra, juvin ra naha cuví ra tsahan tsitiin tsi ra Jesús. Tan catyí ra Jesús tsihin ra naha:

—ꞗa vatsí tñin ndo tsi yu tumaa tñin ndo iin ñasuhu? tyin ndaha ndo mityi tan yutun. ⁵³ Ndihi quivi tsinyii yu tsitsi vehe ñuhu cahnu, tan ña tñin ndo tsi yu ndacan. Maa tyin vityin tsaꞗ cuhva tsa ndunaꞗ tyin nu ña vaha ndacá ñaha. Yacan cuenda vatsí tñin ndo tsi yu.

Nu cahan ra Pedro tyin ña nacotó ra tsi ra Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Tacan tan tñin ra naha tsi ra Jesús. Tan tsindacꞗ ra naha tsi ra nda vehe ra jutu tsaahnu tsa cuví ityi nuu. Tan ra Pedro ndasava ñi cuahán ra nyicún ra. ⁵⁵ Tan tsa tsaꞗ ra naha vehe ra jutu tsaahnu tsa cuví ityi nuu, jatahan ra tsa cuví musu naha ra ñuhꞗ nuquehe. Tan tsinyecu ra naha tani canduvi nu cayú ñuhꞗ can. Tan tsinyaꞗ ndihi ra Pedro tyañu ra naha. ⁵⁶ Tan tsa ndunditsín tsa cayú ñuhꞗ ican, tacan tan iin ñaha tsa cuví musu jutu can, nyehe ña tsi ra Pedro. Tan catyí ña:

—Ra ihya tsicá tucu ra tsihin ra can —catyí ña.

⁵⁷ Maa tyin ra Pedro catyí ra:

—Yuhu ña nacotó yu tsi ra can.

⁵⁸ Tañi ñi tan nyehe tucu inga nyivi tsi ra Pedro, tan catyí ñi tsihin ra:

—Yooho, cuenda ra ican cuví un —catyí ra.

Tan ra Pedro catyí ra:

—Ña nditsa

⁵⁹ Tan tsa yaha iin hora, tan nyehe tucu inga ra tsi ra Pedro tan catyí ra tsihin ra:

—Tsa nditsa tyin juvin ra ihya cuví iin ra tsa tsicá tsihin ra can. Tyin juvin ra Galilea cuví ra —catyí ra.

⁶⁰ Tacan tan catyí ra Pedro:

—Ña tsitó yu náa caahán un —catyí ra.

Tan juvin ñi cuhva can, tsitsi tsa ndi caahán ca ra Pedro tan navacu ñi iin tsitooho.

⁶¹ Tacan tan ra Jesús nanyehe ra nuu ra Pedro. Tan ra Pedro nducuhun iñi ra tsa cahan ra Jesús tsihin ra: “Tsa ndi cumañi ca navacu tsitooho, yooho tsa cahan un uñi tsaha tyin ña nacotó un tsi yu.”

⁶² Tacan tan quitã ra Pedro ityi tsata vehe. Tan tsacũ xaan ra tsa cuiihya cuñi ra.

Nu tsacũ nducu nyaa ra naha tsi ra Jesús tan cañi ra naha tsi ra
(Mt. 26.67-68; Mr. 14.65)

⁶³ Tacan tan ra jahá cuenda tsi ra Jesús, quitsahã tsacũ nducu ra naha tsi ra. Tan cañi ra naha tsi ra. ⁶⁴ Tсахñi ra naha jahma nuu ra, tan quitsahã cañi ra naha nuu ra. Tan catyí ra naha tsihin ra:

—Nacoto yoo ra cañi tsi un —catyí ra naha tsihin ra.

⁶⁵ Tan cuaha xaan ca maa tsa cahã nyaa ra naha tsi ra.

Nu tsicã tuhun mandoñi naha ra tsi ra Jesús tatun Sehe Nyoo cuví tsi ra
(Mt. 26.59-66; Mr. 14.55-64; Jn. 18.19-24)

⁶⁶ Tan tsa cunditsin inga quivi, tan ndu iin ra cuví mandoñi tsahnu ñuu can tsihin ra jutu tsa cuví ityi nuu naha ra, tan tsihin ra maestro cuenda ley vehe ñuhu naha ra. Tan quihin ra naha tsi ra Jesús, cuahán tsihin ra nda nu cua coo Junta Cahnu. Tan nducu tuhun ra naha tsi ra Jesús:

⁶⁷ —Catyi tuhun tsihin ndi tun juvin ra Cristo cuví un —catyí ra naha tsihin ra.

Tan ra Jesús nacahan ra tan catyí ra:

—Tatun catyi yu tsihin ndo tyin juvin yu cuví, ña cua tsinu iñi ndo tsa cahã yu. ⁶⁸ Tan tatun nducu tuhun tucu maa yu tsi ndo, ña cua nacahan ndo, tan ndi ña cua jaña ndo tsi yu. ⁶⁹ Maa tyin vityin tan ityi nuu ca, Rayi tsa quee nda gloria cua cunyaa ra xiin cuaha Nyoo, ra tsa iyó tandihí tunyee iñi —catyí ra Jesús.

⁷⁰ Tacan tan tandihí ra naha tsicã tuhun ra naha tsi ra:

—Tun tacan, Sehe Nyoo cuví tsi un —catyí ra naha.

Tacan tan nacahan ra Jesús tan catyí ra:

—Juvín, sehe Nyoo tsi yu tumaa catyí maa ndo.

⁷¹ Tacan tan natuhun tahan ra naha:

—Tsiñi ndo tsa caahán ra. Ña cuñi ca tsi tsandaa. Tyin tsa tsiñi maa yo tsa cahã ra —catyí ra naha.

23

Nu nyehe ra Pilato tyin nduve cuatyí ra Jesús
(Mt. 27.1-2, 11-14; Mr. 15.1-5; Jn. 18.28-38)

¹ Tacan tan nduvitã tandihí ra naha. Tan tsindacã ra naha tsi ra Jesús nda nu nyaá ra Pilato, [ra ndacã ñaha quee nda ñuu Roma]. ² Tacan tan quitsahã tyaa ra naha cuatyí tsi ra Jesús nuu ra Pilato tan catyí ra naha tsihin ra:

—Ra ihya, jativí ra tsi nyivi tsihin tsa caahán ra tsihin ñi, tyin caahán ra tyin ña vaha tsa tyahví ndi xuhun tsi ra ndacã ñaha nda ñuu Roma. Tan caahán tucu ra tyin cuví ra Cristo, ra tsa jaquitsi Nyoo tyin cuví ra rey —catyí ra naha tsihin ra Pilato.

³ Tacan tan ra Pilato tsicã tuhun ra tsi ra Jesús:

—¿A yooho cuví Rey cuenda nyivi Israel? —catyí ra.

Tan nacahan ra Jesús tan catyí ra:

—Juvín, tumaa catyí maa un.

⁴ Tacan tan catyí ra Pilato tsihin ra jutu tsa cuví ityi nuu naha ra, tan tsihin nyivi:

—Nduve cuatyí ra ihya —catyí ra tsihin ñi.

⁵ Maa tyin jañihí ca ñi caahán ñi. Tan catyí nyico ñi:

—Cahnu xaan cuatyi ra. Tyin cuaha xaan tsihi tsahá ra, tyin jacuahá ra tsi nyívi. Tsa jihna ñi quitsahá caahán ra tshin nyívi iyó ñuu tsa cayucú Galilea. Tan nani ityi vatsí ra, jacuahá ra tsi nyívi. Tan vityin tsa tsaá ra Judea ihya tan juvin ñi yacan javahá ra —catyi ñi.

Nu jacuhun ra Pilato tsi ra Jesús nu nyaá ra Herodes, ra cuví rey nyívi iyó Galilea

⁶ Cuhva tsa tsiñj ra Pilato yacan, tan nducu tuhun ra tatun ra Galilea cuví ra Jesús. ⁷ Tan catyi nyívi tshin ra tyin juvin. Tacan tan jacuhun ra Pilato tsi ra nda nu nyaá ra Herodes. Tyin ra Herodes cuví ra ndacá ñaha Galilea can. Tan quivi can nyíi ra ñuu Jerusalén. ⁸ Tan cuhva tsa nyehe ra Herodes tsi ra Jesús, si xaan cuñi ra. Tyin tsanaha xaan cuñi ra nyehe ra tsi ra. Tyin ñihj tuhun ra tyin cuaha xaan tsa iyo javahá ra. Tan cuñi xaan ra nyehe ra iin tsa iyo tsa cua javaha ra Jesús. ⁹ Tan cuaha xaan tsa nducu tuhun ra Herodes tsi ra Jesús. Maa tyin ra Jesús ña nacahan maa ra. ¹⁰ Ican nyecú ndihi tucu ra jutu tsa cuví ityi nuu naha ra, tan ra maestro cuenda ley vehe ñuhu naha ra. Tan tyaá xaan ra naha cuatyi tsi ra Jesús. ¹¹ Tacan tan ra Herodes tshin andaru cuenda ra, tsacu nducu ra naha tsi ra. Tan jacunditsi nuu ra naha iin jahma yahvi tan si caá tsi ra Jesús, tumaa caá tsa tuhvá rey tsinditsí. Tacan tan jacuhun nyico ra Herodes tsi ra nda nu nyaá ra Pilato. ¹² Tan quivi can ra Pilato tshin ra Herodes nduvahá iyó ra naha. Tyin nu quitsi quivi, ña cuví nyehé tahan ra naha tsi ra naha.

Nu cutuñj ra Jesús tyin cua cúu ra (Mt. 27.15-26; Mr. 15.6-15; Jn. 18.39-19.16)

¹³ Tacan tan ra Pilato jandu iin ra tsi ra jutu tsa cuví ityi nuu naha ra, tan ra cumi tyiñu vehe ñuhu naha ra, tan tshin tandihi nyívi. ¹⁴ Tan catyi ra tshin ñi:

—Nyooho quitsi ndaca ndo tsi ra ihya nu nyaá yu. Tan catyi ndo tyin jativí ra tsi nyívi. Maa tyin yuhu tsa jacutuñj yu tsi ra nuu ndo. Tan nduve cuatyi ra tumaa cuhva cahan ndo can nañihj yu. ¹⁵ Tan ndi ra Herodes tan ña nañihj ra ndi intuhun cuatyi ra. Yacan jaquitsi nyico ra tsi ra inga tsaha nu nyaá yu. Nyehe ndo tyin nduve cuatyi ra. Tan yacan ña taahán tsi tsa cúu ra. ¹⁶ Yacan cuenda cua tatsi tuñi yu tsi ra. Yaha can tan cua jaña yu tsi ra —catyi ra Pilato.

¹⁷ Tacan catyi ra Pilato tyin tsitsi vico ican, taahán tsi tsa jaña ra iin ra yucú vehe caa, tumaa tuhvá maa ra icá. ¹⁸ Maa tyin tandihi nyívi iin caa ñi cana tsa ñi tan catyi ñi:

—Cahñi tsi ra Jesús. Tan jaña tsi ra Barrabás —catyi ñi.

¹⁹ Tan ra Barrabás can nyíi ra vehe caa tsa cuenda tsa cañi tahan ra tshin ra cumi tyiñu ñuu can. Tan inga tuhun tyin tsahñj ra nyívi. ²⁰ Tan ra Pilato cuñi ra jaña ra tsi ra Jesús. Tan quitsahá caahán ra tshin nyívi can inga tsaha tyin cua jaña ra tsi ra. ²¹ Maa tyin nyívi tsa ca cana tsa ñi:

—iTyaa tsi ra nu cruu. Na cúu ra nu cruu!

²² —¿Náa tsa ña vaha javahá ra ihya? Tan nyehe yu tyin ña taahán tsi tsa cúu ra. Cua tatsi tuñi ñi yu tsi ra, tan cua jaña yu tsi ra —catyi ra Pilato.

²³ Maa tyin nyívi cana tsa ca ñi, tan catyi ñi tyin nacahñi ra tsi ra Jesús nu cruu. Tan maa ñi tan tshin ra jutu tsa cuví ityi nuu naha ra, ñihj ñi tsa cuñi ñi tyin cana tsa xaan ñi. ²⁴ Tacan tan javahá ra Pilato cuhva cahan ñi.

²⁵ Tan jaña ra tsi ra Barrabás, ra tsa nyíi vehe caa tsa cuenda tsa cañi tahan ra

tsihin ra cumí tyiñu tan tsa cuenda tsa tsahñi ra nyivi. Tan nacuhva cuenda ra Pilato tsi ra Jesús tsi ñi cuhva cuñi maa ñi.

*Nu tyaa ra naha tsi ra Jesús nu cruu
(Mt. 27.32-44; Mr. 15.21-32; Jn. 19.17-27)*

²⁶ Tacan tan quihñ andaru tsi ra Jesús. Tan cuahán ra tsihin ra naha. Tan tiñ tucu ra naha tsi iin ra ñuu Cirene nañi Simón. Ra ican ndi vatsi nuhu ra quee ra cuhu. Tan jaññi ra naha tsi ra tsa cuiso ra cruu ra Jesús. Tan cuhun ra ityi tsata ra.

²⁷ Tan cuaha xaan nyivi cuahán ityi tsata ra Jesús. Tan cuaha xaan ñiñaha tsacú xaan ñi tsa cuihya cuñi ñi tsacatyí tundofo tahan ra. ²⁸ Maa tyin ra Jesús nanyehé ra nuu ñi. Tan catyí ra tsihin ñi:

—Tandihi nyoofo, ñiñaha ñuu Jerusalén ihya, ña vacu ndo tsacatyí yuhu. Vacu ndo, tsacatyí maa ndo tan tsacatyí sehe ndo. ²⁹ Tyin cua quitsi quivi cua nyehé xaan ndo tundofo. Tan cua cahan nyivi tsi tandihi ndo tsa cuví ndo ñaha tsa ña cuví coo sehe. Tan cua cahan ñi tsihin ndo: “Vaha xaan tyin nduve sehe ndo tsicoo tyin cuaha xaan tundofo nyehé yo vityin”, cua catyí ñi tsihin ndo. ³⁰ Tyin quivi can cua cuñi ñi nduva yucu tsata ñi tan quihvi xeehe ñi. ³¹ Tyin tatun tyehen icá nyivi tsihin iin yutun vaha, yaha ca cuhva cua ica ñi tsihin yutun ityi —catyí ra Jesús tsihin ñiñaha ñuu Jerusalén can.

³² Tan quihñ tucu andaru can naha ra tsi uvi taahan ra iyó cuatyí, tyin cahñi ndihi ra naha tsi ra naha iin caa ñi tsihin ra Jesús. ³³ Tacan tan tsaá ra naha iin nu nañi Yiqui Jiñi Ndiyí. Tan ican tyaa ra naha tsi ra Jesús nu cruu. Tan tacan tyaá ndihi tucu ra naha tsi nduvi taahan ra iyó cuatyí can naha ra. Iin ra tyaá ra naha nuu cruu xiin cuaha ra Jesús. Tan inga ra can tyaá ra naha nuu cruu xiin satyin ra. ³⁴ Tan cuhva tsa nyaá ra Jesús nu cruu can, tan catyí ra:

—Tyatya, Jutu yu, jaha tucahnu iñi tsi ra naha. Tyin ña tsitó ra naha náa javahá ra naha tsihin yu —catyí ra.

Tacan tan andaru can naha ra tavá ra naha suerte tsihin jahma ra Jesús, tyin nyehé ra naha ndáa ra cua jaha canaa jahma can. ³⁵ Tan nyivi nyecú ñi nyehé ñi. Tan ra cumí tyiñu vehe ñuhu naha ra, tsacú nducu ra naha nyehé ra naha tsi ra Jesús. Tan catyí ra naha:

—Jacacu ra tsi inga nyivi. Na jacacu ndihi tucu maa ra tsi ra vityin, tun nditsa tsa ra Cristo, ra tsa jaquitsi Nyoo, cuví ra —catyí ra naha.

³⁶ Tan juvin ñi cahan nyaá ra andaru can naha ra tsi ra. Tan natuhvá ra naha nu ticaá ra. Tan tsaha ra naha vinu iya tsihi ra. ³⁷ Tan catyí ra naha tsihin ra:

—Tatun rey cuenda nyivi Israel cuví un, jacacu tsi un —catyí ra naha.

³⁸ Tan jiñi cruu nu nyaá ra Jesús nyaá iin tsa tyaá ra Pilato tsihin sahan griego, sahan latín, tan sahan hebreo. Tyehen caahán letra can: “Juvín ra ihya cuví Rey cuenda nyivi ñuu Israel” —catyí letra can.

³⁹ Tan iin ra tsa iyó cuatyí tsa nyaá nu cruu xiin ra Jesús, quitsaha caahán nyaa ra tsi ra:

—Tatun nditsa tyin ra Cristo cuví un, jacacu tsi un. Tan jacacu ndihi tsi nyuhu —catyí ra can.

⁴⁰ Maa tyin inga ra can catyí ra tsihin ra:

—¿A ña yuuhví un tsi Nyoo? Tyin juvin ñi tundofo tsa taahán ra ihya, tan taahán un vityin. ⁴¹ Maa yo nyehé yo tundofo maa tyin iyó cuatyí yo. Tan ra ihya nduve cuatyí ra iyó —catyí ra can.

⁴² Tacan tan catyí ra can tsihin ra Jesús:

—Yooho Jesús, nduçuhun iñi tsi yu quiví cundaca ñaha un —catyí ra.

⁴³ Tacan tan ra Jesús nacahan ra tsihin ra tan catyí ra:

—Tsa nditsa caahán yu tsihin un tyin juvin ñi vityin tan cua cunyaa un tsihin yu nda paraíso [nu yucú añima nyiví tsinú iñi tsi Nyoo] —catyí ra Jesús tsihin ra.

Nu tsihi ra Jesús

(Mt. 27.45-56; Mr. 15.33-41; Jn. 19.28-30)

⁴⁴ Tacan tan cuhva ora quitsaha ndunaá nu ñuhu ñayiví, nda cuanda caa uñi tsa tseñi. ⁴⁵ Tyin ndunaá ñicanyii. Tan jahma tsa ticaá tsitsi vehe ñuhu cahnu, ndata sava tsi. ⁴⁶ Tacan tan cana tsaa ra Jesús tan catyí ra:

—Tyatya, Jutu yu, tyaa cuenda yu añima yu ndaha un —catyí ra.

Tan cuhva tsa cahan ra tacan, tan tsihi ra.

⁴⁷ Tan ra cuví capitán cuenda andaru can naha ra, nyehe ra tandihi tsa cuví. Tan jacahnú ra tsi Nyoo, tan catyí ra:

—Nduve tsa cuii cuatyí ra ihya tsicoo —catyí ra.

⁴⁸ Tan tandihi nyiví tsa nyecú ican, nyehe ñi tsa cuví. Tan cuahán ñi tan quitsaha cañi ndaha ñi yiqui nyica ñi. Tyin tsitó ñi tyin ña vaha tsa javaha ñi tsihin ra Jesús. ⁴⁹ Tan tandihi nyiví tsa nacotó tsi ra Jesús, tan ñiñaha tsa tsinyicun tsi ra nda Galilea, nyecú ñi ndasava. Tan nyehe ñi tandihi tsa cuví can.

Nu cua cutsi ra naha tsi ra Jesús

(Mt. 27.57-61; Mr. 15.42-47; Jn. 19.38-42)

⁵⁰ Tan iyó iin ra vaha, nañi ra José. ra ñuu Arimatea tsa canyii Judea. Tan cuví ra iin ra cuví ityi nuu cuenda Junta Cahnu nyiví Israel. ⁵¹ Tan ra José can ndatú ra quiví tsa cua cundaca ñaha Nyoo. Tan ña ndoo ra vaha tsihin tsa javaha ra cutahán tsihin ra, ra cuví jutu tsa cuví ityi nuu naha ra. ⁵² Tacan tan tshahan ra José can tsindacan ra cuñu ñuhu ra Jesús tsi ra Pilato. ⁵³ Tan yaha tsa januu ra José can cuñu ñuhu ra Jesús nu cruu, cava nuu ra iin jahma tsi ra. Tan cuahán ra cua cutsi ra tsi ra tsitsi iin ñaña tsaa tsa cuví yavi yuu tsa javaha nyiví tan ñaha ca quihví ndiyi tsitsi can. ⁵⁴ Tan viernes cuví can, quiví tsa janduvahá nyiví tsa catsi ñi tsa sabaru, quiví quitatú ñi. Tan tsa cua tahan tsi quiví can.

⁵⁵ Tan tandihi ñiñaha tsa quee tsihin ra Jesús Galilea, cuahán ñi cua nyehe ñi tsitsi yavi yuu can. Tan nyehe ñi cuhva canyii cuñu ñuhu ra. ⁵⁶ Tan cuanuhu ñi nda yuvehe ñi. Tan janduvahá ñi ndutya tami tyin cua tyihi ñi cuñu ñuhu ra Jesús. Tacan tan quitatú ñi inga quiví can tumaa catyí maa tuhun tsa tsaha cuenda Nyoo tsi yo.

24

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

¹ Tsa tuví tumingu quiví nu quitsahá vitya, cuahán ñiñaha can nu ñaña ra Jesús. Tan nyisó ñi ndutya tami tsa janduvahá ñi. ² Tan cuhva tsa tsaa ñi, nyehe ñi tyin tsa cuatsiyó yuu tsa ndasí yuhu ñaña can. ³ Tan quihví ñi tsitsi ñaña can, maa tyin ña nañihí ñi cuñu ñuhu Jutu Mañi yo Jesús. ⁴ Tan yucú ñi tsihin tsa yuuhví ñi. Tan ña tsitó ñi náa cua javaha ñi. Tan sana iñi ñi quituví uvi taahan rayi nuu ñi. Tan xiñu xaan jahma nditsí ra naha. ⁵ Tan tsihin tsa

yuuhví ñi, tan tsaquín ñi jiñi ñi nda nu ñuhu. Tacan tan catyí ra can naha ra tsihin ñi:

—¿Nacuenda nanducú ndo tsi ra nyito nu yucú ndiyi? ⁶ Nduve ca ra nyii ihya, tyin tsa nandoto ra. Nducuhun iñi ndo tsa cahán ra tsihin ndo quivi tsiçá ra Galilea. ⁷ Catyí ra tyin taahán tsi nacuhva cuenda nyivi tsi ra ndaha ra iyó cuatyí naha ra. Tyin cuví ra Rayi tsa quee nda gloria. Tan taahán tsi tyin cahñi ra can naha ra tsi ra nu cruu. Maa tyin tsa tsinu uñi quivi cua nandoto ra. Tacan catyí ra tsihin ndo —catyí ángel can naha ra tsihin ñi.

⁸ Tacan tan nducuhun iñi ñi tsa cahán ra Jesús quivi can. ⁹ Tan cuanuhu ñi. Tan nacatyí tuhun ñi tsihin tsa utsi iin ra tsa tavá tyiñu ra Jesús tan tsihin tandihi ca nyivi tsa tsinyicun tsi ra. ¹⁰ Tan ñiñaha tsa tsiçatyí tuhun tsihin ra naha cuví ñi: ña María Magdalena, ñaha quee Magdala, tan ña Juana, tsihin ña María sibi ra Jacobo, tan tsihin juhva ca ñiñaha. ¹¹ Maa tyin ra tavá tyiñu ra Jesús cuñi maa ra naha tyin caahán ñi maa ñi. Tan ña tsinú iñi ra naha tsa caahán ñi.

¹² Maa tyin ra Pedro nduvita ra tan tsinú xaan ra cuahán ra cua nyehe ra tsitsi ñaña nu tinyi ra naha ra Jesús tatun nditsa. Tan nyehe ra tsitsi yavi yuu can tyin jahma tsa tsindasi ña ra canyí nda sava. Tacan tan cuanuhu ra yuvehe nu yucú tandihi ca ra naha. Tan iyo xaan cuñi ra tsa cuví.

Tsa cuví ityi cuahán ñuu Emaús
(Mr. 16.12-13)

¹³ Juvín ñi maa quivi can, uvi taahan ra tsinyicun tsi ra Jesús cuahán ra naha ñuu Emaús, tumaa utsi iin kilómetro tsa quee yo ñuu Jerusalén. ¹⁴ Tan cuahán ra naha tan natuhún tahan ra naha náa ndihi tsa cuví. ¹⁵ Tan tsitsi tsa natuhún ra naha, tan ra Jesús tahañ ra tsi ra naha ityi cuahán ra naha. ¹⁶ Maa tyin vasu nyehé ra naha tsi ra Jesús, maa tyin ña nacotó ra naha tsi ra. Tyin tumaa iin tsa tyasí tsi nuu ra naha, tan ña cuví nacoto ra naha tsi ra Jesús. ¹⁷ Tacan tan nducú tuhun ra Jesús tsi ra naha:

—¿Náa natuhún xaan ndo? ¿Nacuenda cuihiya xaan cuñi ndo? —catyí ra tsihin ra naha.

¹⁸ Tan iin ra tsa nañi Cleofas nacahañ ra tan catyí ra:

—Tandihi nyivi tsitó tsa cuví ñuu Jerusalén. ¿A ra inga ñuu cuví yooho tyin ña tsitó un tsa cuví? —catyí ra.

¹⁹ Tacan tan catyí ra Jesús tsihin ra naha:

—¿Náa cuví?

Tan nacatyí tuhun ra naha tsihin ra:

—Tuhun ra Jesús ra ñuu Nazaret. Tyin cuví ra iin ra cuví ndusu yuhu Nyoo. Tan tsihin tunyee iñi cahnu Nyoo javaha ra tsa cahnu tan cahán ra tsa vaha nuu Nyoo tan nuu tandihi nyivi. ²⁰ Maa tyin ra jutu tsa cuví ityi nuu naha ra tan ra cumí tyiñu cuenda vehe ñuhu, tsaha cuenda ra naha tsi ra tsi ra ndacá ñaha cuenda ñuu Roma. Tan tsahñi ra naha tsi ra. Tan tsihi ra nu cruu. ²¹ Tan vityin tsa quitá uñi quivi tsa cuví yacan. Tan nyuhu cuñi maa ndi tyin juvín ra cua jacacu tsi yo tsa cuví yo nyivi Israel. ²² Maa tyin vityin iyo xaan cuñi ndi tsa nacatyí juhva ñiñaha tsihin ndi. Tyin maa ñi tsahañ ñi nu ñaña ra tsa tuví. ²³ Tan nduve ca cuñu ñuhu ra canyí. Tan nacatyí tuhun ndihi ñi tyin nyehe ñi uvi taahan ángel. Tan catyí ángel can naha ra tsihin ñi tyin ra Jesús nyito ra. ²⁴ Yaha yacan tan tsahañ tucu juhva ra cutahán tsihin ndi tsinyehé ra naha nu ñaña. Tan nyehe ra naha tyin tsa nditsa cuví tsa cahán ñiñaha can. Maa tyin ña nyehe ra naha tsi ra Jesús —catyí ra naha tsihin ra Jesús.

²⁵ Tacan tan catyí ra Jesús tsihin ra naha:

—Luxu xaan cutuñí iñi ndo. Tan cuee xaan tan tsinu iñi ndo tuhun tsa caħan ra cuvı ndusu yuhu Nyoo taħan tsanaha. ²⁶ ¿A ña tsitó ndo tyin taahán tsi tsa nyehe ĵihna ra Cristo tundoho? Yaha can tan taħan tsi cua ñihi ra tyiñu tsa cua cundaca ñaha ra —catyí ra Jesús tsihin ra naha.

²⁷ Tacan tan quitsaha tsahá cuenda ra nácaa cuahán tuhun maa ra nu tutu Nyoo. Tan quitsaha caħán ra tuhun tsa tyaa ra Moisés taħan tsanaha. Tan yaha can tan caħan ra tuhun tandihi libru tsa tyaa ra cuvı ndusu yuhu Nyoo.

²⁸ Tan cuhva tsa tsaá ra naha nda ñuu Emaús, nu cuahán ra naha, tan jahá ra Jesús tyin cañi ca cuahán ra. ²⁹ Tacan tan catyí ra naha tsihin ra na ndoo ra tsihin ra naha. Tan catyí ra naha:

—Ndoq tsihin ndi tyin tsa cua cuiso ñicanyii —catyí ra naha.

Tacan tan cuahán ra Jesús tsihin ra naha. ³⁰ Tan cuhva tsa tsinyaá ra yuhu mesa tsihin ra naha, quihın ra paan. Tan tsaha ra tyahvi nyoo tsi Nyoo. Tan tsahnı sava ra, tan tsaha ra tsi ra naha. ³¹ Tan iin yaha ñi nuñá nuu ra naha tan nacoto ra naha tsi ra Jesús. Maa tyin ra Jesús naá ihñi ñi ra. ³² Tacan tan quitsaha natuhın taħan ra naha tan catyí ra naha:

—Yacan cuenda vaha xaan cuñi añima yo tsa vatsı ra tsihin yo, tan tsahá cuenda ra tuhun Nyoo tsa nyaá nu tutu Nyoo tsi yo —catyí ra naha.

³³ Ña ndatu ca ra naha, tan cuanuhu ra naha nda ñuu Jerusalén. Tan ñihi taħan ra naha tsihin tsa utsi iin ra tsa tava tyiñu ra Jesús, ndu iin ra naha tsihin juhva ra nyecú tsihin ra naha. ³⁴ Tacan tan tsa utsi iin ra can naha ra nacatyı tuhun ra naha tsihin ra tsa ndi tsaá can naha ra:

—Nditsa tyin Jutu Mañi yo nandoto ra. Tyin ra Simón nyehe ra tsi ra —catyí ra naha.

³⁵ Tacan tan ra tsa ndi tsaá can nacatyı tuhun ndihi ra naha nácaa natuhın ra Jesús tsihin ra naha ityi cuahán ra naha ñuu Emaús, tan nácaa nacoto ra naha tsi ra nu tsahnı sava ra paan.

*Nu quituvi ra Jesús nu yucú ra tsica tsihin ra
(Mt. 28.16-20; Mr. 16.14-18; Jn. 20. 19-23)*

³⁶ Ndi natuhın ca ra naha yacan tan quituvi ra Jesús tyañu ra naha. Tan tsaha ra nacumi tsi ra naha, tan catyí ra:

—Na coo tsa vaha añima ndo.

³⁷ Tacan tan nayuhı xaan ra naha. Tan cuñi ra naha tyin tatyı ndiyı cuvı can. ³⁸ Tacan tan catyí ra Jesús tsihin ra naha:

—¿Nacuenda yuhuvı xaan ndo? ¿Tan nacuenda tsicá xaan iñi ndo? ³⁹ Nyehe ndo ndaha yu. Tan nyehe ndo tsaha yu. Tyin juvin ñi maa yu cuvı. Tıin ndo tsi yu tan coto ndo. Tyin tatyı ndiyı nduve cuñu ñuhu can iyó. Tan nduve yiqui can tumaa tsa nyehé ndo tsi yuhu —catyí ra Jesús.

⁴⁰ Tan cuhva tsa caħan ra yacan, tan janaha ra ndaha ra tsihin tsaha ra tsi ra naha. ⁴¹ Maa tyin maa ra naha, tsa cuenda tsa iyo cuñi ra naha tan sıi cuñi ra naha, nda cuanda ña cuvı ca tsinú vaha iñi ra naha. Yacan nacahañ ra Jesús tsihin ra naha:

—¿A iyó tsa catsı yo? —catyí ra.

⁴² Tacan tan tsaha ra naha luxu tyaca tyihyo tsihin ndutya ñuñu tsi ra.

⁴³ Tan quihın ra. Tan quitsaha tsatsı ra nu nyecú ra naha. ⁴⁴ Tan catyí ra tsihin ra naha:

—Tandihi tsa taħan yu, yacan cuvı tsa catyı yu tsihin ndo quıvi can. Tan catyı yu tsihin ndo tyin tacan cua cuvı, tumaa cuhva nyaá tuhun tsa tyaa ra Moisés tan ra cuvı ndusu yuhu Nyoo tan tsihin tsa nyaá nu libru salmo —catyí ra tsihin ra naha.

⁴⁵ Tacan tan tsahā cuenda ra Jesús cuhva catyí nu tutu Nyoo. Tan cutuñj iñi tandihí ra naha jahā ra. ⁴⁶ Tacan tan catyí ra Jesús tsihin ra naha tyin tacan nyaá nu tutu Nyoo tyin taahán tsi tsa cúu ra Cristo. Tan tsa tsinu uñi quiví cua nandoto ra. ⁴⁷ Tan taahán tsi coto nyiví tuhun ra Cristo, tyin tatun ndu uvi iñi ñi cuatyí ñi, cua coo tucahnu iñi tsi ñi. Tan jihna ñi cua cahan ra naha tsihin siví ra Cristo ñuu Jerusalén, yaha can tan tandihí ca ñuu tanñi cahnu nu ñuhu ñayiví.

⁴⁸ Tan catyí tucu ra Jesús tsihin ra naha:

—Tan nyooho cuví tsandaa tsa cuenda tandihí tsehe. ⁴⁹ Tan cua jaquitsi maa yu Tatyí Ii Nyoo siqui ndo tumaa tsa catyí Jutu yu tyin cuhva ra tsi ndo. Maa tyin ndo ndo Jerusalén ihya. Tan ña quita ndo nda cuanda tsa ñihi ndo tunyee iñi Nyoo tsa cua quitsi tsi ndo —catyí ra Jesús.

Nu cuanuhu ra Jesús gloria
(Mr. 16.19-20)

⁵⁰ Tacan tan ra Jesús cuahán ra tsihin tandihí ra tsicā tsihin ra nda ñuu Betania. Tan cañihj ra ndaha ra. Tan nasocō ra tsi ra naha. ⁵¹ Tan tsitsi tsa nasocō ra tsi ra naha, nandaā ra andiví. ⁵² Tacan tan tandihí ra naha quitsahā jacahnú ra naha tsi ra. Tan sii xaan cuñí ra naha, cuanuhu ra naha nda ñuu Jerusalén. ⁵³ Tan tandihí quiví tsiyucū ra naha tsitsi vehe ñuhu cahnu, jacahnú xaan ra naha tsi Nyoo.

Tan na cuví tsi tacan ñi.

Tuhun Nyoo tsa Tyaa Ra Juan

Tuhun tsa Caahán Nyoo nanduvj tsi iin ray#i, tan ray#i can cuví ra Cristo

¹ Nda quivi jihna ñi, nda ndi cumañi ca coo tandihi tsa iyó, tan tsa iyó maa ra cuví Tuhun tsa Caahán Nyoo. Nyí ra tsihin Nyoo. Tan Nyoo cuví ra. ² Tan iyó ra tsihin Nyoo nda quivi jihna ñi. ³ Tan tsihin ra, javahá Nyoo tandihi cuii maa tsa iyó. Tan nduve tsa javahá Nyoo tsa intuhun ñi maa ra. ⁴ Ra tsa cuví Tuhun tsa Caahán Nyoo iyó ñayivi nyito tsa ña cua naa maa tsi ra. Tan juvin ñayivi can, cuví ñuhu tsa jandunditsín añima nyivi. ⁵ Tan ñuhu can, jandunditsín tsi nu naa. Tan tsa naa can ña cuví jandahva can ñuhu nditsin can.

⁶ Tsicoo iin ra tsa jaquitsj Nyoo, nañi ra Juan. ⁷ Quitsj ra cuví ra tsa ndaa. Tyin cahán ra tumañi iñi cuenda ra cuví ñuhu can, tyin tacan tan tsinu iñi tandihi nyivi tsi ra. ⁸ Ra Juan, ñavin ñuhu can cuví ra. Iin tsa ndaa cuenda ra cuví ñuhu can cuví ra. ⁹ Tyin ñuhu nditsa can, ndi cua quitsi tsi nu ñuhu ñayivi, tan cua jandunditsín tsi añima tandihi nyivi tsa iyó nu ñuhu ñayivi ihya.

¹⁰ Ra cuví Tuhun tsa Caahán Nyoo quitsj ra nu ñuhu ñayivi. Tan juvin ñi maa ra tsihin Jutu ra javahá ra naha ñuhu ñayivi. Maa tyin nyivi iyó nu ñuhu ñayivi ihya, ña nacoto ñi tsi ra tsa ra Cristo cuví ra. ¹¹ Quitsj ra nu iyó nyivi ñuu ra, nyivi Israel, tan ña naquihñ vaha ñi tsi ra. ¹² Maa tyin tandihi nyivi tsa naquihñ vaha tsi ra, tan tsinú iñi ñi tyin ra Cristo cuví ra, tsahá ra ndatu tsi ñi tsa cuví ñi sehe Nyoo. ¹³ Juvin ñi nacacü tsa. Maa tyin ñavin tumaa tsa cacü ñi tsa culee ñi cuenda cuñu ñuhu ñi. Tan ndi ñavin tsa cuenda tsa cuñi iin ray#i coo ra tsihin iin ñaha. Ñavin tsa cuenda tsa cuñi nyivi coo sehe ñi. Maa tyin nacacü tsa ñi jahá maa Nyoo.

¹⁴ Tan ra cuví Tuhun tsa Caahán Nyoo nanduvj ra iin ray#i. Tan tsicoo ra tsihin yo. Tan nyehé ndi tsa cahnu cuví ra. Tan cahnu cuví ra tyin Sehe mañi Jutu Nyoo cuví tsi ra. Tsitu ra tsihin tsa nditsa tan tsa vaha. ¹⁵ Tan ra Juan can cahán ra tumañi iñi tsa cuenda ra, tan catyí ra:

—Juvín ra ihya cuví ra tsa cahán yu tuhun quivi can, tyin ra tsa vatsi ityi tsata yu, cahnu ca cuví ra tan ñavin ca maa yu. Tyin nda quivi cacü yu tan tsa iyó maa ra —catyí ra Juan.

¹⁶ Tandihí yo naquihñ yo tumañi iñi cahnu tsa tsahá ra tsi yo, tyin nasoco xaan ra tsi yo. ¹⁷ Ra Moisés tsahá cuenda ra ley Nyoo tsi yo. Maa tyin ra Jesucristo tsahá ra tsa naquihñ yo tsa vaha Nyoo. Tan caahán ra tsa nditsa tsihin yo. ¹⁸ Tan nduve maa yóo nyehé tsi Nyoo. Intuhun ñi maa Sehe mañi maa ra tsa iyó iin caa ñi tsihin ra nyehé tsi ra. Juvín ra cuví ra tsa tsahá tsa coto yo tsi Jutu ra.

Nu caahán ra Juan, ra jacoondutyá, tumañi iñi cuenda ra Jesucristo (Mt. 3.11-12; Mr. 1.7-8; Lc. 3.15-17)

¹⁹ Ra cuví ityi nuu tsihin nyivi Israel tsa iyó ñuu Jerusalén, tavá tyiñu ra naha tsi ra jutu naha ra tsihin inga ca ra cuenda vehe ñuhu naha ra, ra cuví tata ra Leví, na cahun ra naha nu nyí ra Juan tan ndaca tuhun ra naha tsi ra yóo ra cuví ra. ²⁰ Tan tsicá tuhun ra naha tsi ra Juan tan catyí ra tsihin ra naha:

—Yuhu ñavin ra Cristo ra tsa cua jaquitsi Nyoo cuví yu —catyí ra tan ña tyihj xeehe ra.

²¹ Tacan tan tsicá tuhun nyico ra naha tsi ra Juan:

—¿Yóo ra cuví un? ¿A ra Elías, ra cuví ndusu yuhu Nyoo taħan tsanaha cuví un? —catyí ra naha tsihin ra.

Tan ra Juan nacahan ra:

—Ñavin ra ican cuví yu.

Tan cuñihí ca ra naha tsicā tuhun ra naha tsi ra, tan catyí ra naha:

—Tun tacan, ¿a ra cuví ndusu yuhu Nyoo tsa nyaá tsa cua quítsi cuví un?

Tan nacahan nyico ra Juan tan catyí ra:

—Ñavin.

²² Tan tsicā tuhun nyico ra naha tsi ra Juan inga tsaha:

—¿Yóo ra cuví un? Tyin cuñí tsi catyí tuhun ndi tsihin ra tsa tava tyiñu tsi ndi yóo ra cuví un —catyí ra naha tsihin ra.

²³ Tan nacahan ra Juan:

—Yuhu cuví ndusu iin ra tsa cana tsaá nu tsiquí, tsa catyí: “Nuña ndo tsitsi añima ndo tyin tsa vatsí Jutu Mañi yo.” Tumaa caħan ra Isaías ra cuví ndusu yuhu Nyoo tuhun yu taħan tsanaha —catyí ra Juan tsihin ra naha.

²⁴ Ra fariseo naha ra cuví ra tava tyiñu tsi ra can naha ra, na ndaca tuhun ra naha tsi ra Juan. ²⁵ Tan tsicā tuhun nyico ra naha tsi ra:

—Tatun ñavin ra Cristo, ra tsa cua jaquítsi Nyoo cuví un, ¿nacuvi tyin jacoondutyá un tsi nyívi? tan ndi ñavin ra Elías cuví un, tan ndi ñavin ra cuví ndusu yuhu Nyoo cuví un —catyí ra naha tsihin ra Juan.

²⁶ Tan nacahan ra Juan tan catyí ra:

—Yuhu jacoondutyá yu tsi nyívi tsihin ndutyá. Maa tyin mahñu ndo nyíi iin ra tsa ña nacotó ndo. ²⁷ Tan cahnu ca cuví ra can tan ñavin ca yuhu. Ña cahnu cuví yuhu ndi tsa cuví yu musu ra tan cuví ndatsi yu ñi nditsan ra —catyí ra Juan.

²⁸ Tandihí yacan cuví nu nañí Betábara tsa canyíi inga tsiyo yutya cahnu Jordán nu tsinyíi ra Juan jacoondutyá ra.

Ra Jesucristo, Mbee Ticatyi Luhlu jana Nyoo

²⁹ Tsa inga quívi nyehe ra Juan tsi ra Jesús cuahán ra nu nyíi ra, tacan tan catyí ra Juan:

—Nyehe jihna ndo, ra ihya cuví Mbee Ticatyi Luhlu jana Nyoo ra tsa quihín nyaa cuatyí nyívi iyó nu ñuhu ñayívi ihya. ³⁰ Tuhun ra caħan yu quívi catyí yu tsihin ndo tyin ityí tsata yu vatsí inga ra tsa cahnu ca cuví tan ñavin ca maa yu, tyin tsa iyó maa ra tan tsicoo yu. ³¹ Ndi yuhu tan ña nacotó yu tsi ra quívi can. Maa tyin vityin vatsí yu jacoondutyá yu tsihin ndutyá tyin tacan tan nacoto nyívi Israel ñuu yu tsi ra —catyí ra Juan.

³² Tan catyí nyico ra Juan:

—Yuhu nyehe yu Tatyí Ii Nyoo tsa quítsi ityí andívi tan quítsi tsi tumaa iin paloma, tan ndoo tsi tsihin ra. ³³ Yuhu ñaha ca nacoto yu yóo ra cuví ra quívi can. Maa tyin Nyoo, ra tsa tava tyiñu tsi yu jacoondutyá yu tsi nyívi tsihin ndutyá, catyí ra tsihin yu: “Quívi nyehe un Tatyí Ii, vatsí nuú tsi siquí iin rayíi, tan ndoo tsi tsihin ra, juven ra can cuví ra tsa cua jacoondutyá tsi nyívi tsihin Tatyí Ii yu”, catyí Nyoo tsihin yu. ³⁴ Yuhu tsa yahá nyehe yu tsi ra. Tan cuví yu tsa ndaa tyin juven ra cuví Sehe Nyoo —catyí ra Juan.

Ra tsa quitsaha nyicún jihna tsi ra Jesús

³⁵ Tsa inga quívi nyíi nyico ra Juan nu nyíi ra tan yucú ndihí uvi taahan ra tsicá tsihin ra. ³⁶ Tan nyehe ra naha, yahá ra Jesús, tan catyí ra Juan:

—Nyehe jihna ndo, ra ican cuví Mbee Ticatyi Luhlu jana Nyoo —catyí ra.

³⁷ Tsa tsiñi nduvi taahan ra nyicún tsi ra Juan tsa cahān ra, tacan tan cuahan ra naha cuanyicun ra naha tsi ra Jesús. ³⁸ Tacan tan nanyehe ra Jesús ityi tsata ra, tan nyehe ra tyin nyicún ra naha tsi ra, tan catyí ra:

—¿Náa nanducú ndo?

Tacan tan nacahān ra naha tan catyí ra naha:

—Maestro, ¿numaa iyó un?

³⁹ Tan catyí ra Jesús tsihin ra naha:

—Cohon ndo tsihin yu, tan nyehe ndo —catyí ra tsihin ra naha.

Tacan tan cuahān ra naha tsihin ra. Tan nyehe ra naha nu iyó ra. Tan ican yucu ra naha tan cuaa, tyin tsaā ra naha ndacan tumaa caa cumi tsa tseñi.

⁴⁰ Iin ra tsa tsiñi tsa cahān ra Juan tan tsinyicun ra tsi ra Jesús ra ican cuví ra Andrés, yañi ra Simón Pedro. ⁴¹ Tan ra Andrés numi xaan tsinanducú ra tsi yañi ra, ra Simón Pedro, tan catyí ra tsihin ra:

—Nañihí ndi tsi ra tsa cuví Mesías —catyí ra.

Tan tuhun Mesías can cuñi tsi catyí, ra Cristo, o cuñi tucu tsi catyí, ra tsa nacatsi vaha Nyoo tyin quitsi ra cuví ra rey tsa cuenda yo.

⁴² Tacan tan quihin ra Andrés tsi ra Simón yañi ra cuahān tsihin ra nu nyii ra Jesús. Tsa nyehe ra Jesús tsi ra Simón, tan catyí ra tsihin ra:

—Yoohe Simón, sehe ra Jonás cuví tsi un. Maa tyin cua cunañi un Cefas —catyí ra tsihin ra.

Tan Cefas cuví tsi yuhu griego, tan cuñi tsi catyí tsi “Pedro”, tan tsa nduvi siví can, cuñi tsi catyí tsi “cava”, [tumaa iin yuu cahn].

Nu canā ra Jesús tsi ra Felipe tan ra Natanael

⁴³ Tsa inga quivi tyaa ra Jesús cuhva tsa cahun ra Galilea. Tacan tan nañihí ra tsi ra Felipe. Tan catyí ra tsihin ra:

—Naha quitsi nyicun un tsi yu —catyí ra.

⁴⁴ Ra Felipe ihya, ra ñuu Betsaida cuví ra. Tan ican iyó tucu ra Andrés tan ra Pedro. ⁴⁵ Tacan tan tsaahān ra Felipe tsinanducú ra tsi ra Natanael. Tan catyí ra tsihin ra:

—Nyehe ndi tsi ra tsa tyaa ra Moisés tuhun nu libru ley Nyoo, ra tsa cahān tucu ra cuví ndusu yuhu Nyoo tuhun tañan tsanaha. Tan nañi ra Jesús. Sehe ra José ra ñuu Nazaret cuví tsi ra —catyí ra Felipe tsihin ra Natanael.

⁴⁶ Tan catyí ra Natanael:

—¿A cuví quita tsa vaha ñuu Nazaret can? —catyí ra tsihin ra Felipe.

Tan nacahān ra Felipe tan catyí ra:

—Naha tan nyehe un —catyí ra.

⁴⁷ Tacan tan tsa cua cuyatyn ra Natanael nu nyii ra Jesús. Tan nanyehe ra Jesús tyin vatsi ra, tan quitsaha catyí ra:

—¡Ijhna ndo! Ihya vatsi iin ra tsa nditsa nditsa tyin ra ñuu Israel cuví ra, tyin ña tuhvá ra jandaví ñaha —catyí ra Jesús.

⁴⁸ Tacan tan tsicā tuhun ra Natanael tsi ra:

—¿Nacaa tsa tsitó un tsi yuhu?

Tan nacahān ra Jesús tan catyí ra:

—Yuhu tsa nyehe maa yu tsi un tsa ndi cumañi ca cana ra Felipe tsi un, tsa ndi nyii un tsaha yutun higo can —catyí ra Jesús tsihin ra.

⁴⁹ Tacan tan quitsaha catyí ra Natanael:

—Jutu Mañi yu, yoohe cuví Sehe Nyoo. Tan juvin un cuví rey cuenda nyuhu tsa cuví yo nyivi Israel.

⁵⁰ Tan catyí ra Jesús tsihin ra Natanael:

—¿A tsinú iñi un tsi yu tsa cuenda tyin catyí yu tyin nyehe yu tsi un tsaha yutun higo? Maa tyin nahnu ca tsa cua nyehe un tan ñavin ca yacan —catyí ra tsihin ra.

⁵¹ Tan catyí ra Jesús tsihin ra naha:

—Tsa nditsa catyí yu tsihin ndo tyin nyooho cua nyehe ndo cua nuña andivi tan cuaha xaan ángel Nyoo cua ndaa, tan cua nuu ra naha siqui yuhu Rayii tsa quee nda gloria —catyí ra Jesús tsihin ra naha.

2

Nu iyó vico tindaha ñuu Caná iin ñuu tsa canyii Galilea

¹ Tsa yaha uñi quivi tan tsicoo iin vico tindaha ñuu Caná tsa canyii Galilea. Tan ican nyii sihi ra Jesús. ² Tan nyivi javaha vico can cana ndihi ñi tsi ra Jesús tan tsihin tandihi ra tsicá tsihin ra tyin cuhun ra naha. ³ Tacan tan cuahán ra naha. Tan tsitsi tsa yucú ra naha nu iyó vico can, tan ndihi vinu ñi javaha vico can. Tacan tan catyí sihi ra Jesús tsihin ra:

—Nduve ca vinu ñi —catyí ña.

⁴ Tan catyí ra Jesús tsihin ña:

—¿Náa tsa ndihi iñi yo yacan, Miyan? Tyin ñaha ca tsa hora yu —catyí ra tsihin ña.

⁵ Maa tyin sihi ra cahan ña tsihin ra tsa tyihí mesa nu iyó vico can naha ra:

—Javaha nyooho tandihi tsa cua cahan ra tsihin ndo —catyí ña tsihin ra naha.

⁶ Tan nyecú iñu quisí yuu nahnu tsa yihí ndutya tsa tuhvá ra Israel naha ra tsatyiñú nu nacatyá xaan ra naha ndaha ra naha cuhva tsa iyó maa ra naha. Tan intuhun intuhun quisí can tsitahan uvi xico utsi, a uñi xico utsi, litru ndutya tsitsi can. ⁷ Tacan tan catyí ra Jesús tsihin ra tsa tyihí mesa can naha ra:

—Jacutu ndo quisí ihya tsihin ndutya —catyí ra tsihin ra naha.

Tacan tan tsitú cuii quisí can jaha ra naha. ⁸ Tacan tan catyí ra Jesús tsihin ra naha:

—Vityin tava ndo juhva tan cundaca ndo tsi ra cuví ityi nuu cuenda vico ihya —catyí ra Jesús tsihin ra naha.

Tan tacan icá ra naha. ⁹ Ra cuví ityi nuu cuenda vico can tsihi ra naha ndutya tsa nanduvj vinu. Maa tyin ña tsitó ra naha nu maa quee can. Maa ñi maa ra tsa tyihí mesa can naha ra tsitó, tyin maa ra naha tava ndutya can. Tacan tan ra cuví ityi nuu cuenda vico can cana ra tsi ra tsa tandaha can.

¹⁰ Tan catyí ra tsihin ra:

—Tandihí nyivi, jihna ca vinu vaha tuhvá ñi tava. Yaha can tan tatun tsa tsihi xaan nyivi, tacan tan tava ñi vinu ndaahvi. Maa tyin yooho tsicumj vaha un vinu vaha. Tan nda vityin tava un can —catyí ra tsihin ra.

¹¹ Tsa javaha ra Jesús ñuu Caná tsa canyii Galilea, yacan cuví tsa iyo tsa jihna ñi javaha ra tan janaha ra tsa cahnu cuví ra tsi nyivi. Tan ra tsicá tsihin ra tsinú iñi ra naha tsi ra tyin ra ican cuví ra tsa jaquitsj Nyoo.

¹² Tsa yaha yacan tan cuahán ra ñuu Capernaum tsihin sihi ra tan tsihin yañi ra. Tan cuahan ndihi ra tsicá tsihin ra. Tan ican tsiyucú ñi juhva quivi.

Nu jacunu ra Jesús tsi nyivi xicó nuquehe yuvehe ñuhu cahnu

(Mt. 21.12-13; Mr. 11.15-18; Lc. 19.45-46)

¹³ Tsa cua tahan tsi quivi vico pascua tsa jacahnú nyivi Israel. Yacan cuenda cuahán ra Jesús ñuu Jerusalén. ¹⁴ Tsa tsaá ra ñuu can, quihvi ra nuquehe vehe ñuhu cahnu, tan nyehe ra yucú cuaha nyivi xicó ñi nuquehe

can. Yihí ñi xicó ñi indiqui, mbee ticatyí, tan paloma. Tan yucú ndihí tucu nyívi nasamá xuhun. ¹⁵ Tsa nyehe ra Jesús tandihí yacan, tacan tan javaha ra iin yoho. Tan tshin yoho can jacunú ra tsi tandihí nyívi nuquehe vehe ñuhu iin cahnu ñi tshin mbee tan tshin indiqui jana ñi. Tan ñi nasamá xuhun can, jatucuatyí ra xuhun ñi nu ñuhu tan janduvá ra mesa ñi. ¹⁶ Tan catyí ra tshin ñi xicó paloma:

—¡Tava ndo paloma can ihya! ¡Ña javaha ndo vehe Jutu yu tumaa iin nuyahvi! —catyí ra tshin ñi.

¹⁷ Tacan tan ra tsicá tshin ra, nducuhun iñi ra naha tsa catyí nu tutu Nyoo tyeheh: “Cuiñu xaan yu vehe un”, catyí tsi, nducuhun iñi ra naha.

¹⁸ Tacan tan ra cuví ityí nuu tshin nyívi Israel quitsahá tsicá tuhun ra naha tsi ra Jesús:

—¿Náa seña javaha un nyehe ndi tan janaha un tyin nditsa tsa tsahá Nyoo ndatu tsi un tsa javaha un yacan? —catyí ra naha tshin ra.

¹⁹ Tan nacahan ra Jesús tan catyí ra:

—Cani ndo vehe ñuhu ihya, tan tsitsi tsa uñi quívi ñi tan cua janduvita nyico yu itsi inga tsaha —catyí ra tshin ra naha.

²⁰ Tacan tan quitsahá catyí ra nyecú ican naha ra tshin ra:

—Uvi xico iñu cuiya jahá tyiñu ra naha tan tsinú vehe ñuhu ihya. ¡Tan yooho catyí un tyin tsitsi tsa uñi quívi ñi tan cua janduvita un itsi inga tsaha! —catyí ra naha tshin ra.

²¹ Maa tyin ñavin tuhun vehe ñuhu can cahan ra Jesús, tyin cahan ra tuhun cuñu ñuhu ra. ²² Yacan cuenda tandihí ra tsicá tshin ra nducuhun iñi ra naha yacan quívi nandoto ra. Tan cutuñi iñi ra naha tyin tuhun tsa nyaá nuu tutu Nyoo caahán tsi cuenda ra Jesús. Tan tsinú iñi ra naha tsa cahan ra Jesús tan tsa nyaá nu tutu Nyoo.

Ra Jesús tsitó ra tsa iyó añima nyívi

²³ Tsitsi tsa ndi nyí ra Jesús ñuu Jerusalén, quívi iyó vico pascua, cuaha xaan nyívi quitsahá tsinú iñi tsa caahán ra tsa cuenda tsa cuaha tsa iyo javaha ra. ²⁴ Maa tyin ra Jesús ña nñi cuñi ra nyehé ra tsi tandihí ñi tyin tsitó ra cuhva tsicá iñi ñi. ²⁵ Ña tsñiñuhú tsa nacatyí tuhun yo tshin ra nácaa iyó nyívi, tyin tsa tsitó maa ra náa iyó tsitsi añima yo.

3

Nu jacuahá ra Jesús tsi ra Nicodemo

¹ Tsicoq iin ra cuví fariseo tsa nañi Nicodemo. Tan cuví ra iin ra cuví ityí nuu tshin ra Israel naha ra. ² Ra Nicodemo ihya, tsahan ra nu nyí ra Jesús iin tsacuaa. Tan catyí ra tshin ra:

—Maestro, tsitó ndi tyin Nyoo tava tyiñu tsi un tsa quitsi un jacuaha un tsi ndi. Tyin yoñi nyívi tan cuví javaha ñi tsa iyo tsa javahá un, tatun nduve Nyoo iyó tshin ñi —catyí ra tshin ra Jesús.

³ Tacan tan catyí ra Jesús tshin ra:

—Tsa nditsa catyí yu tshin un tyin tatun ña cua nacacu tsa nyívi inga tsaha, ña cua cuví nyehe ñi nu ndacá ñaha Nyoo —catyí ra.

⁴ Tacan tan tsicá tuhun ra Nicodemo tsi ra Jesús tan catyí ra tshin ra:

—¿Nacaa cuví cacu iin rayi inga tsaha tatun tsa tsahnu ra? ¿A cuví quihvi nyico ra tsitsi sihi ra tan nacacu tsa ra inga tsaha? —catyí ra.

⁵ Nacahan ra Jesús tan catyí ra:

—Tsa nditsa catyí yu tsihin un tyin ñavin tsihin tsa cacu nyívi tsihin cuñu ñuhu ñi tan cuví quihvi ñi nu ndacá ñaha Nyoo. Maa tyin ñiñi xaan cuñi tsi nacacu tsa ñi tsihin Tatyí Ii Nyoo. ⁶ Tyin nyívi cacu tsihin cuñu ñuhu, cuñu ñuhu ñi cuví ñi. Tan nyívi nacacu tsa tsihin Tatyí Ii Nyoo, Tatyí Ii Nyoo iyó aña ñi. ⁷ Ña cu iyo iñi un tsa caahán yu tsehe tsihin un tyin tandihí nyívi cuñi tsi nacacu tsa ñi. ⁸ Tumaa tsa yihí tatyí tandihí ñi ityi tan tsiñi un cucayú vatsi tsi, maa tyin ña tsitó un numaa ityi quee tsi, tan ndáa ityi cuahán tsi; tacan cuví tandihí nyívi nacacu tsa tsihin Tatyí Ii Nyoo —catyí ra Jesús tsihin ra.

⁹ Tacan tan nducú tuhun nyico ra Nicodemo tsi ra inga tsaha tan catyí ra: —¿Nacuenda caahán un tacan? —catyí ra tsihin ra.

¹⁰ Nacahan ra Jesús tan catyí ra:

—Yooho tsa cuví un maestro cuenda nyívi Israel, taahán tsi coto un tsehe.

¹¹ Tsa nditsa catyí yu tsihin un tyin caahán ndi tsa tsitó ndi tan cuví ndi tsa ndaa tsa cuenda tsa nyehe ndi. Maa tyin nyooho ña tsinú iñi ndo tsa caahán ndi tsihin ndo. ¹² Tatun ña tsinú iñi ndo tsa caahán yu tuhun nu ñuhu ñayívi ihya tsihin ndo, ¿nácaa cua tsinu iñi ndo tatun cua cahan yu tuhun gloria tsihin ndo?

¹³ Yoñi tsahan gloria tsinyehe nácaa iyó. Intuhun ñi maa yuhu Rayi tsa quee nda gloria nyehé yu nácaa iyó gloria, tyin ndacan quee yu. ¹⁴ Tumaa tsa tícaā ra Moisés iin coo tsa tsinu tsihin caa nu yutun iin nu tsiqui, tacan cua tícaa nyívi tsi yuhu Rayi tsa quee nda gloria nuu cruu. ¹⁵ Tacan tan tandihí nyívi tsa tsinú iñi tsi yu, ña cua cunaa ñi. Tan cua coo ñi ñayívi nyito tsa ña cua naa maa.

Nyoo cuñi xaan ra tsi tandihí nyívi

¹⁶ Nyoo cuñi xaan ra tsi tandihí nyívi iyó nu ñuhu ñayívi. Yacan cuenda tsahā ra tsa cúu Sehe mañi ra nu cruu tsa cuenda ñi. Tyin tacan tan tandihí ñi tsa tsinú iñi tsi Sehe ra, ña cunaa ñi, tan coo ñi ñayívi nyito tsa ña cua naa maa. ¹⁷ Tyin Nyoo jaquitsi ra tsi Sehe ra nu ñuhu ñayívi tyin jacacu ra tsi nyívi, tan ña jaquitsi ra tsi ra tsa jacunaa ra tsi ñi.

¹⁸ Yacan cuenda nyívi tsa tsinú iñi tsi yu tsa cuví yu Sehe Nyoo ña cua cunaa ñi, maa tyin nyívi tsa ña tsinú iñi tsi yu, tsa cunaa ñi tyin ña tsinú iñi ñi tsi yu tsa cuví yu Sehe mañi Nyoo. ¹⁹ Nyívi ña tsinú iñi, tsa cunaa ñi. Tyin quívi quitsi yu jandunditsin yu nu ñuhu ñayívi, ña naquihin cuenda ñi tsi yu tyin taahán xaan ca maa iñi maa ñi iyó ñi nu naa tyin maa ñi tsa ña vaha javahá ñi. ²⁰ Tandihí nyívi javahá tsa ña vaha, ña taahán iñi ñi coo ñi nu nditsin, tyin ña cuñi ñi tsa quituvi tsa ña vaha javahá ñi. ²¹ Maa tyin nyívi taahán iñi tsa nditsa, naquitá ñi nu nditsin tyin tacan tan nyehe nyívi tyin javahá ñi cuhva cuñi Nyoo tyin nyaá ra tsihin ñi —catyí ra Jesús.

Nu caahán ra Juan, ra jacoondutyá tsi nyívi, tuhun ra Jesús inga tsaha

²² Tsa yahā yacan, ra Jesús tan ra tsicá tsihin ra cuahán ra naha nu cuví Judea. Tan ndoo ra naha ican juhva quívi, tyin jacoondutyá ra naha tsi nyívi.

²³ Tacan tucu ra Juan nyí ra jacoondutyá ra tsi nyívi nu cuví Enón yatyin ñi nu cuví Salim, tyin ican ñuhu cuaha ndutyá. Tan tsaá nyívi tan tsicoondutyá ñi. ²⁴ Yacan javahā ra Juan tsa ndi cumañi ca quihvi ra vehe caa.

²⁵ Tacan tan quitsahā caahán yuhu tahan juhva ra tsicá tsihin ra Juan tsihin inga ca ra naha tsa cuenda tsa janduvaha nyívi tsi ñi nuu Nyoo.

²⁶ Tacan tan cuahán ra naha nu nyí ra Juan. Tan catyí ra naha tsihin ra:

—Maestro, ra tsa tsinyij tsihin un inga tsiyo yutya cahnu Jordán, ra tsa cahan un tuhun tsihin ndi, vityin jacoondutyá ndihi ra tsi nyivi tan tandihi nyivi nyicún tsi ra —catyi ra naha tsihin ra.

²⁷ Tacan tan catyi ra Juan tsihin ra naha:

—Ndi intuhun yo tan nduve náa cuví javaha yo, tun tsatyin ña tsahá Nyoo tunyee iñi ra tsi yo. ²⁸ Nyooho tsa tsitó maa ndo tyin ñavin yuhu cuví ra Cristo tyin tsiñi maa ndo tsa cahan yu quivi catyi catsi yu tyin ra jaquitsi Nyoo ityi nuu ra Cristo cuví yu. ²⁹ Tyin nu iyó vico tandaha, ra tsa nyaá xiin ñaha yoco can, juvin ra cuví ra cua tindaha tsihin ña. Tan ra vaha iñi tsi ra nyii ra ican. Tan cusii iñi ra tsiñi ra tsa caahán ra tsa cua tindaha. Tan tacan tucu yuhu, sii cuñi yu tyin naquihín nyivi tuhun caahán ra Jesús tan nyicún ñi tsi ra. ³⁰ Maa ra cuví ra cahnu ca cuví. Tan yuhu cua nduluhlu yu nuu ra tyin tacan taahán maa tsi.

Ra quee nda gloria tan quitsi ra nu ñuhu ñayivi

³¹ Ra tsa quee nda gloria, cahnu ca cuví ra tan ñavin ca tandihi nyivi. Tyin nyivi iyó nu ñuhu ñayivi ihya, cuenda nu ñuhu ñayivi cuví ñi. Tan caahán ñi tuhun tsa iyó nu ñuhu ñayivi. Maa tyin ra tsa quee nda gloria, cahnu cuví ra. ³² Tan caahán ra tsa nyehé ra tan tsa tsiñi ra, maa tyin yoñi tsinú iñi tsa caahán ra. ³³ Tatum yoo tan tsinú iñi yo tsa caahán ra, cua cuví yo tsa ndaa tyin Nyoo ña vatya ra. ³⁴ Tyin ra tsa jaquitsi Nyoo, tuhun Nyoo caahán ra tyin Nyoo ña tyihí cuhva ra Tatyí li ra tan tsahá ra itsi tsi ra. Tsahá ra nani Tatyí li ra tsi ra. ³⁵ Nyoo Jutu yo cuñi ra tsi Sehe ra. Tan nacuhva cuenda ra tandihi maa tsi ra. ³⁶ Nyivi tsa tsinú iñi tsa caahán Sehe Nyoo, iyó ñi ñayivi nyito tsa ña cua naa maa. Maa tyin nyivi tsa ña cuñi tsinu iñi tsi ra, ña cua coo ñi ñayivi nyito. Tan cua tatsi tuñi Nyoo tsi ñi.

4

Nu natuhun ra Jesús tsihin iin ñaha Samaria

¹ Tsa tsitó ra cuví fariseo naha ra tyin cuaha xaan ca nyivi nyicún tsi ra Jesús tan ñavin ca ra Juan. Tan cuaha xaan ñi tsiicoondutyá. ² Maa tyin ñavin maa ra Jesús jacoondutyá tsi ñi, tyin ra tsicá tsihin ra jacoondutyá tsi ñi. ³ Tan quivi tsa tsitó ra Jesús tyin tsitó ra naha yacan, quee ra Judea can tan cuanuhu ra nda nu cuví Galilea.

⁴ Tsa cuahán ra, yaha ra nu cuví Samaria tyin cuñi tsi yaha ra ican. ⁵ Tacan tan tsaá ra iin ñuu tsa canyí Samaria tsa nañi Sicar yatyin ñi nu cuví ñuhu ra Jacob nu tsahá ra tsi ra José sehe ra. ⁶ Ican nyaá iin soco pila tsa catyi nyivi tyin tsii ra Jacob cuví. Tsa quitá ra Jesús nu nyaá soco can tan tsinyaá ra yuhu soco can tyin tatu xaan ra tyin cañi xaan ityi tsicá ra tan maa hora cuví. ⁷⁻⁸ Ra tsicá tsihin ra, yoñi ra naha nyecú tsihin ra tyin cuahán ra naha tsitsi ñuu, cua jata ra naha tsa catsi ra naha. Juvin ñi cuhva can tan tsaá iin ñaha Samaria tyin cua tava ña ndutya tsitsi soco can. Tacan tan catyi ra Jesús tsihin ña:

—Cuhva luxu ndutya coho yu —catyi ra tsihin ña.

⁹ Tacan tan ñaha Samaria can catyi ña tsihin ra:

—Yooho tsa cuví un iin ra ñuu Israel, ¿nacuvi tyin tsicán un ndutya coho un tsi yuhu tsa cuví yu ñaha Samaria? —catyi ña.

(Tacan catyi ña tyin nyivi Israel ña vaha iyó ñi tsihin nyivi Samaria.)

¹⁰ Tacan tan nacahan ra Jesús tan catyi ra:

—Tun tsatyin tsitó un tsa tsahá Nyoo, tan tsitó un yóo ra cuví ra tsicán ndutya tsi un, maa un cua ndacan ndutya tsi yu. Tan cua cuhva yu ndutya nyito tsi un —catyí ra tsihin ña.

¹¹ Tacan tan catyí ña tsihin ra:

—Tatta, cunu xaan soco ihya. ¿Nacaa tava tucu un ndutya cuhva un tsi yu? tan ndi nduve náa ndaha un ¿Nu maa cua quihin un ndutya nyito can cuhva un coho yu? ¹² Ra Jacob tsii tsahnu yo, nacoo ra soco ihya tsi ndi. Juvín ihya tsihí maa ra ndutya tan tsihin tandíhi sehe ra. Tan juvín ñi ihya tsihí tucu quiti jana ra naha. ¿A cahnu ca ra cuví yoocho tan ñavin ca ra can? —catyí ña tsihin ra.

¹³ Tacan tan nacahan ra Jesús tan catyí ra tsihin ña:

—Tandíhi nyivi tsihí ndutya ihya, cua na ityi nyico iñi ñi. ¹⁴ Maa tyin nyivi tsihí ndutya tsa tsahá yuhu, ña cua na ityi ca iñi ñi. Tyin ndutya tsa tsahá yuhu cua cana tsi tsitsi añima ñi tumaa caná ndutya iin ndohyo, tyin iin ndohyo ña tuhvá tsi ndoco. Tan tacan cua coo ñi ñayivi nyito —catyí ra tsihin ña.

¹⁵ Tacan tan quitsahá caahán ña tsihin ra:

—Yoocho tatta, cuhva ndutya can coho yu na ña na ityi ca iñi yu, tan ndi ña quitsi ca yu quitsi tava yu ndutya tsitsi soco ihya —catyí ña tsihin ra.

¹⁶ Tacan tan catyí ra Jesús tsihin ña:

—Cuaahan cua quihin yí un tan quitsi ndo —catyí ra tsihin ña.

¹⁷ Tan nacahan ña tan catyí ña:

—Nduve yí yu iyó.

Tacan tan catyí ra Jesús tsihin ña:

—Nditsa tsa caahán un, tyin nduve yí un iyó. ¹⁸ Tyin tsa uhun yí un tsicoo, tan ra cumi tsi un vityin ñavin yí un tsi ra. —catyí ra tsihin ña.

¹⁹ Tsa tsiñí ña tsa cahán ra tacan, quitsahá catyí ña tsihin ra:

—Yoocho tatta, tuví iñi yu tyin ra cuví ndusu yuhu Nyoo cuví un. ²⁰ Tsii tsahnu ndi, ra ñuu ihya naha ra, jacahnú ra naha tsi Nyoo yucu ihya. Maa tyin nyoocho tsa cuví nyivi Israel catyí ndo tyin nda Jerusalén taahán tsi jacahnu yo tsi Nyoo —catyí ña tsihin ra.

²¹ Tacan tan nacahan ra Jesús tan catyí ra tsihin ña:

—Tsinu iñi tsa caahán yu tsihin un. Tyin vatsí hora tsa cua jacahnu ndo tsi Jutu yo Nyoo. Maa tyin ña tsiñíñuhú ca tsa quitsi ndo yucu ihya, a cuhun ndo nda Jerusalén. ²² Nyoocho nyivi Samaria, ña tsitó ndo yóo jacahnú ndo. Maa tyin nyuhu tsitó ndi yóo jacahnú ndi. Tan tsitó ndi tyin cua jacacu iin ra Israel tsi nyivi jaha Nyoo. ²³ Maa tyin cua tsaa hora, tan hora can iyó yo vityin tyin nyivi tsa nditsa jacahnú tsi Nyoo Jutu yo, cua jacahnu ñi tsi ra tsihin añima ñi tan tsihin tsa nditsa. Tumaa jaquihín ityi maa Tatyí li Nyoo tsi ñi. Tyin Nyoo Jutu yo tacan cuñi ra javaha ñi tsa jacahnú tsi ra. ²⁴ Tyin Nyoo Tatyí li cuví ra. Tan nyivi jacahnú tsi ra cuñi tsi jacahnú ñi tsi ra tsihin tsa nditsa tumaa jaquihín ityi maa Tatyí li tsi ñi —catyí ra tsihin ña.

²⁵ Tan nacahan ña tan catyí ña tsihin ra:

—Yuhu tsitó yu tyin cua quitsi ra cuví Mesías, ra Cristo, ra cuví rey tsi yo. Tan quivi quitsi ra, maa ra cua nacatyí tuhun tandíhi tsihin yo —catyí ña tsihin ra.

²⁶ Tacan tan nacahan ra Jesús tan catyí ra tsihin ña:

—Ra tsa caahán un tuhun can, juvín ra caahán tsihin un —catyí ra tsihin ña.

²⁷ Tacan tan tsaꝯ nyico ra tsicá tshin ra, tan iyo xaan cuñí ra naha tyin natuhún ra Jesús tshin iin ñaha. Maa tyin ndi intuhun ra naha tan ña caná iñi ra naha ndaca tuhun ra naha náa cuñí ra, o ndaca tuhun ra naha tsi ra nacuenda natuhún ra tshin ñaha can. ²⁸ Tacan tan nacoꝯ ña quiyi ña tan cuanuho ña nda ñuu. Tan catyí ña tshin nyivi:

²⁹ —Cohon ndo cunyehe ndo tsi iin ra tsa cahān tandihi cuhva iyó yu. ¿A ñavin ra Cristo tsa cua jaquitsi Nyoo cuví ra? —catyí ña tshin ñi.

³⁰ Tacan tan quita nyivi ñuu can tan cuahán ñi cua nyehe ñi nu nyii ra Jesús.

³¹ Tan tsa ndi cumañi ca tsa ñi nu nyii ra, ra tsicá tshin ra, jañiñí ra naha tsi ra na catsi ra luxu. Tan catyí ra naha tshin ra:

—Maestro, catsi luxu —catyí ra naha.

³² Maa tyin catyí ra Jesús tshin ra naha:

—Yuhu iyó iin tsa tsatsí yu tan nyooho ña tsitó ndo náa cuví can —catyí ra tshin ra naha.

³³ Tacan tan ra tsicá tshin ra, quitsahā natuhún tahan ra naha, tan catyí ra naha:

—¿A iyó yóo quitsi quitsi ndaca tsa catsi ra? —catyí ra naha.

³⁴ Maa tyin ra Jesús catyí ra tshin ra naha:

—Tsa tsatsí yuhu juvin tsi cuví tsa javahá yu cuhva cuñí ra tsa jaquitsi tsi yu, tan javahá yu tyiñu tsaḥā ra tsi yu. ³⁵ Nyooho catyí ndo: “Ndi cumañi cumi yoo ca tan tahan tsi naquihin vaha yo tsa tatsi yo.” Maa tyin yuhu catyí yu tshin ndo: Nyehe ndo tyin tsa ndihi tsa tatsi ndo cuaan tan tsa nyecú vaha tsi tsa cua naquihin vaha yo itsi. ³⁶ Ra tsa naquihin vaha can ñihí ra yahvi ra. Tan tsa naquihin vaha ra, cuví tsi nyivi tsa cua coo ñayivi nyito tsa ña cua naa maa. Tacan tan ra tsa tatsi tan ra tsa naquihin cusii iñi ra naha.

³⁷ Tan iyó iin cuhva tuhvá nyivi caahán tan catyí ñi tyin siin nyivi tatsi tan siin nyivi naquihin vaha. Tan nditsa yacan. ³⁸ Yuhu jacuhun yu tsi ndo tyin cua cahnu ndo ñiñi tsa iyó nu ña jahā tyiñu ndo, nu jahā tyiñu inga ra. Tan nyooho cucahnu ndo tan cua naquihin vaha ndo ñiñi can —catyí ra Jesús tshin ra naha.

³⁹ Tan cuaha xaan nyivi ñuu Samaria can quitsahā tsinú iñi ñi tsi ra Jesús tsa cuenda tsa cahān ñaha can, tyin catyí ña: “Cahān ra tshin yu tandihi cuhva iyó yu”, catyí ña. ⁴⁰ Cuhva tsa tsaḥā ñi nu nyii ra Jesús, tan cahān ndaahvi ñi tshin ra na ndoo ra tshin ñi. Tan ndoo ra tshin ñi uvi quivi. ⁴¹ Tan cuaha ca nyivi quitsahā tsinú iñi ñi tsa tsiñi ñi tsa caahán ra. ⁴² Tacan tan quitsahā catyí ñi tshin ñaha can:

—Vityin tsinú iñi ndi, maa tyin ñavin tsa cuenda tsa cahān un tshin ndi, tyin tsiñi maa ndi tshin soho ndi tsa caahán ra, tan tsitó vaha ndi tyin juvin ra cuví ra Cristo ra jacacú tsi nyivi iyó nu ñuhu ñayivi ihya —catyí ñi.

Nu janduvahā ra Jesús sehe iin ra cumi tyiñu

⁴³ Tsa yahā uvi quivi tan quee ra Jesús nu cuví Samaria tan cuahán ra ityi nu cuví Galilea, nu cacú ra. ⁴⁴ Vasu ndi maa juvin ñi maa ra cahān tyin iin ra cuví ndusu yuhu Nyoo, nyivi ñuu ra ña jahā ñi tsa ñayivi tsi ra. ⁴⁵ Tacan tan tsa tsaḥā ra Galilea, nyivi iyó ican, vaha caahán ñi tshin ra, tyin tsaḥān ñi vico Jerusalén, tan nyehe ñi tsa vaha tsa javahā ra.

⁴⁶ Tacan tan cuanuho nyico ra Jesús nda ñuu Caná tsa canyii Galilea nu nanduví ndutya vinu jahā ra. Tan iyó iin ra nyisó tyiñu cahnu nuu rey. Ra ican iyó iin sehe ra tsa cuuhví nda ñuu Capernaum. ⁴⁷ Quivi tsa tsitó ra can tyin tsa tsaḥā nyico ra Jesús nda Galilea tsa tsaḥān ra nda Judea, tsaḥān ra

tsinyehę ra tsi ra Jesús. Tan tsicān ra tumañi iñi tsi ra na cuhun ra vehe ra tan janduvaha ra tsi sehe ra, tyin tsa cuñi cúu cuii ña sehe ra. ⁴⁸ Tacan tan catyí ra Jesús tsihin ra:

—Nyooho ña cua tsinu iñi ndo tatun ña nyehe jihna ndo tsa iyo —catyí ra tsihin ra.

⁴⁹ Maa tyin ra can catyí ra tsihin ra Jesús:

—Yooho taa, çohon ñi tsihin yu tsa ndi cumañi ca cúu sehe yu —catyí ra tsihin ra Jesús.

⁵⁰ Tacan tan catyí ra Jesús tsihin ra:

—Cuānuhu yuvehe un. Sehe un nyito ra, tsa nduvahā ra —catyí ra tsihin ra.

Tacan tan ra can tsinū iñi ra tsa cahān ra Jesús tan cuanuħū ra. ⁵¹ Tsa tsa cuyatyin ra yuvehe ra, quitā musu ra tan caahān ra naha tsihin ra:

—¡Taa, sehe un nyito ra; tsa nduvahā ra!

⁵² Tacan tan quitsahā tsicā tuhun ra tsi ra naha náa hora quitsahā vaha cuñi ra. Tan catyí ra naha tsihin ra:

—Icu cuhva caa iin tsa yahā quitā cahñi tsi ra —catyí ra naha.

⁵³ Tacan tan tsitō ra can, tyin hora can cahān ra Jesús tsihin ra, “Cuānuhu tyin sehe un nyito ra, tsa nduvahā ra.” Tan maa ra can tsihin tandihī nyivi ra quitsahā tsinú iñi ñi tsi ra Jesús.

⁵⁴ Yacan cuví tsa iyo tsa tsinu uvi javahā ra Jesús tsa tsaā nyico ra Galilea tsa yaha tsahān ra Judea.

5

Nu janduvahā ra Jesús iin ra cuuhví

¹ Tsa yahā can tan cuahān ra Jesús ñuu Jerusalén inga tsaha tyin nyivi ñuu Israel jacahnú ñi iin vico. ² Tan yuhu cora cahnu ñuu can iyó iin yuvehe tsa nañi Yuvehe Cuenda Mbee Ticatyí. Tan yatyin ñi nyaá iin vehe cahnu. Tan tsitsi vehe can ñuhú ndutya. Tan tsa tsihin yuhu hebreo nañi vehe can Betesda. Tan iyó uhun corredor. ³ Tan ican yucú cuaha nyivi cuuhví: ñi cuaa, ñi coxo, tan ñi ndohó cuehe xii. Ndatú ñi náa hora nacanda ndutya can. ⁴ Tyin nda naha nda naha ñi tan nuú iin ángel tan jacandá ra ndutya can. Tan nyivi tsa quihví jihna tsa yahā ñi nacandá ndutya can, nduvahá ñi vasu ndi maa cuehe cahnu ndohó ñi. ⁵ Tan ican canyí iin ra cuuhví tan tsa iyó oco tsahun uñi cuiya cuuhví ra. ⁶ Tsa nyehe ra Jesús tsi ra ican canyí ra, tuví iñi ra tyin tsa cuaha xaan cuiya cuuhví ra. Tan tsicā tuhun ra tsi ra ndaahví can, tan catyí ra:

—¿A cuñi un nduvaha un?

⁷ Tan ra cuuhví can nacahān ra tan catyí ra:

—Tata, yoñi maa tyihí tsi yu tsitsi ndutya ihya tatun tsa nacandá tsi. Tyin tahān ñi tsaha tsa cuñi yu quihví yu, inga nyivi quihví jihna —catyí ra cuuhví can tsihin ra Jesús.

⁸ Tacan tan catyí ra Jesús tsihin ra:

—Ndūvita, naquihin yuvi un tan çaca un —catyí ra tsihin ra.

⁹ Juvín ñi hora can tan nduvahā ra, naquihñin ra yuvi ra, tan nacacā ra. Maa tyin quivi quitatú nyivi cuví quivi can. ¹⁰ Yacan ra cuví ityí nuu tsihin nyivi Israel catyí ra naha tsihin ra tsa nduvahā can:

—Quivi quitatú yo cuví vityin, yacan cuenda ña taahān tsi cuiso un yuvi un —catyí ra naha tsihin ra.

¹¹ Tan ra tsa nduvahā can nacahān ra tan catyí ra:

—Ra tsa janduvahā tsi yu, catyí ra tsihin yu: “Naquihin yuvi un tan caca un”, catyí ra tsihin yu.

¹² Tacan tan quitsahā tsicá tuhun ra naha tsi ra, tan catyí ra naha:

—¿Yóo ra cahān tsihin un tyin naquihin un yuvi un tan caca un? —catyí ra naha.

¹³ Maa tyin ra tsa nduvahā can ña tsitó ra yóo janduvahā tsi ra. Tyin cuaha xaan nyívi nyecú ican, tan ra Jesús nduve ca ra nyaá tyin tsa cuahán ra.

¹⁴ Yahā can tan nañihí ra Jesús tsi ra tsa nduvahā can tsitsi vehe ñuhu cahnu, tan catyí ra tsihin ra:

—Jihna, vityin tsa nduvahā un, ña javaha ca un tsa ña vaha, tyin coto quitsi inga tundoho cahnu ca siqui un —catyí ra tsihin ra.

¹⁵ Tacan tan tsahān ra tsicahān ra tsihin ra Israel naha ra tyin ra Jesús cuví ra janduvahā tsi ra. ¹⁶ Tsa cuenda tsa janduvahā ra Jesús tsi ra can quívi quitatú nyívi, xaan xaan cuñí ra Israel naha ra nyehe ra naha tsi ra. Tan cuñí ra naha cahñi ra naha tsi ra. ¹⁷ Maa tyin ra Jesús catyí ra tsihin ra naha:

—Maa Jutu yu, nda vityin tan jahá tyiñu ra. Tan jahá tyiñu tucu yuhu —catyí ra.

¹⁸ Tan tsa cuenda tsa cahān ra yacan, xaan ca cuñí ra Israel can naha ra. Tan ñihi ca cuñí ra naha cahñi ra naha tsi ra tyin cuñí maa ra naha tyin ña jahá ra Jesús tsa cahnu cuví quívi quitatú nyívi, tan inga tucu tuhun, iin ñi cuví ra tsihin Nyoo jahá ra tsi ra tyin catyí ra tyin jutu ra cuví tsi Nyoo.

Sehe Nyoo iyó xaan ndatu tsi ra cundaca ñaha ra

¹⁹ Tacan tan catyí ra Jesús tsihin ra naha:

—Tsa nditsa caahán yu tsihin ndo tyin yuhu, Sehe Nyoo cuví tsi yu, tan nduve tsa javahá yu tsa maa ñi maa yu. Tyin javahá yu tsa nyehé yu javahá Jutu yu. Tandihí tsa javahá Jutu yu tan javahá tucu maa yu. ²⁰ Tyin cuñí xaan ra tsi yu, tyin Sehe ra cuví tsi yu, tsa cuenda yacan janahá ra tandihí tsa javahá ra tsi yu. Tan nahnu ca tsa cua janaha ra tsi yu, tan nyooho iyo cua cuñi ndo nyehe ndo can. ²¹ Tumaa janandotó Nyoo Jutu yu ndiyí, tan tsahá ra ñayívi coo ñi, tacan tucu yuhu tsa cuví yu Sehe ra, tsahá yu ñayívi coo nyívi cuñí maa yu cuhva yu. ²² Tacan Nyoo Jutu yu, ña jandaa ca ra catyí ndi intuhun nyívi tyin tsa tsahā ra ndatu tsi yuhu tsa cuví yu Sehe ra tyin jandaa yu cuatyí nyívi. ²³ Tacan icá Nyoo Jutu yu tsa cuñí ra jacahnu nyívi tsi Sehe ra tumaa tsa jacahnú maa ñi tsi maa ra. Nyívi tsa ña jacahnú tsi yuhu tsa cuví yu Sehe Nyoo, ndi Jutu yu tan ña jacahnú ñi. Tyin maa ra jaquitsí tsi yu.

²⁴ Tan tsa nditsa caahán yu tyin nyívi tyaá soho tsa caahán yu tan tsinú iñi ñi tsi ra tsa jaquitsí tsi yu, iyó ñi ñayívi nyito tsa ña cua naa maa. Tan ña cua cuhuh ca ñi anyaya tsa catyí cuatyí ñi tyin tsa jacacu Nyoo tsi ñi tan ña yihi ndaha ca tuhun tsiihí tsi ñi, tan tsahā ra ñayívi nyito iyó ñi. ²⁵ Nyívi; tumaa ndiyí cuví ñi. Tan tsa nditsa caahán yu tsihin ndo tyin vatsí quívi cua cuñi ñi ndusu Sehe Nyoo. Tan nyívi tsa cua tyaá yahvi tsa caahán ra, cua coo ñi ñayívi nyito tsa ña cua naa maa. Tan vityin cuví quívi tsa caahán yu tuhun. ²⁶ Tyin Nyoo Jutu yu iyó ra ñayívi nyito tsa ña cua naa maa. Tan tsahā ra ndatu can tsi yuhu tsa cuví yu Sehe ra tyin cuhva yu ñayívi can coo nyívi. ²⁷ Tan tsahā tucu Nyoo ndatu tsi yu tsa jandaa yu cuatyí nyívi, tyin Rayíi quee nda gloria cuví yu. ²⁸ Ña iyo cuñi ndo tsa caahán yu tyehen, tyin cua tsaq quívi tsa cuñi ndiyí yucú tsitsi ñaña ndusu Sehe Nyoo. ²⁹ Tan cua quita ñi tsitsi ñaña ñi. Tacan tan nyívi tsa javahā tsa vaha cua nandoto ñi tyin coo ñi ñayívi nyitó. Maa tyin

nyivi tsa javahá tsa ña vaha cua nandoto ñi tyin cuhun ñi anyaya nu cua tatsi tuñi Nyoo tsi ñi.

Nu janahá tsi tyin ra Jesús iyó ndatu tsi ra tsa cuhva ra ñayivi nyito coo nyivi

³⁰ Yuhu ña cuví javaha yu tsa javahá yu tsa intuhun ñi maa yu. Yuhu jandaá yu cuatyí nyivi tumaa cuhva tavá tyiñu maa Jutu yu tsi yu. Tan cuhva jandaá yu cuatyí, vaha tsi, tyin ña javahá yu cuhva cuñí maa yu, tyin javahá yu cuhva caahán maa Jutu yu, ra tsa jaquitsj tsi yu. ³¹ Tan tatun juvin ñi maa yu cuví tsa ndaa tsa cuenda yu, nduve yahvi nyaá tsa ndaa can. ³² Maa tyin iyó inga ra cuví tsa ndaa cuenda yu. Tan yuhu tsitó yu tyin tsa caahán ra cuenda yu, yacan cuví tsa ndaa tan tsa nditsa. ³³ Nyooho tavá tyiñu ndo na ndaca tuhun ra naha tsi ra Juan. Tan tuhun tsa cahan ra, tsa nditsa cuví tsi. ³⁴ Maa tyin yuhu ña tsiñiñuhú tsa cuví rayi tsa ndaa tsa cuenda yu. Maa tyin caahán yu tuhun tsa cahan ra Juan tsihin ndo tsa cuenda tsa vaha tsi maa ndo, tyin tacan tan tsinu iñi ndo tsi yu tan cacu ndo. ³⁵ Ra Juan cuví ra tumaa iin lámpara tsa cayú tan jandunditsín tsi. Tan nyooho juhva ñi quivi cusii iñi ndo tsihin ñuhú nditsin can. ³⁶ Maa tyin yuhu iyó iin tsa ndaa vaha ca tsi yu tan ñavin ca tsa caahan ra Juan. Tyin tandihi tsa javahá yuhu, maa Jutu yu catyí tsihin yu na javaha yu can. Tan yacan cuví tsa ndaa tsa nyehé ndo tyin nditsa tyin maa Jutu yu jaquitsj tsi yu. ³⁷ Tacan tucu Jutu yu, ra tsa jaquitsj tsi yu, cuví ra tsa ndaa tsa cuenda yu. Nyooho ñaha ca cuñi ndo ndusu ra, tan ndi ñaha ca nyehe ndo tsi ra. ³⁸ Tan ña ndoó tuhun ra tsa caahán yu tsihin ndo tsitsi añima ndo tyin ña tsinú iñi ndo tyin Nyoo jaquitsj tsi yu. ³⁹ Nyooho tsihin cuenda xaan cahví ndo nu tutu Nyoo, tyin cuñí maa ndo tyin nuu tsi cua ñihi ndo ñayivi nyito tsa ña cua naa maa coo ndo. Maa tyin tutu Nyoo can, tuhun yuhu caahán tsi. ⁴⁰ Tan nyooho ña cuñi ndo quitsi ndo nu nyaá yu tan cuhva yu ñayivi nyito coo ndo.

⁴¹ Yuhu ña nducú yu tsa jacahnu nyivi tsi yu. ⁴² Tyin yuhu tsitó yu tsi ndo tan tsitó yu tyin ña cuñi ndo tsi Nyoo. ⁴³ Yuhu vatsi yu cuenda Jutu yu tan nyooho ña naquihín ndo tsa caahán yu. Maa tyin tatun inga ra cua quitsi tsa cuenda maa ra, ra ican cua tsinu iñi ndo. ⁴⁴ Nyooho ña cuví tsinu iñi ndo tsi yu tyin cuñi ndo nduvaha ndo nuu nyivi tahan ndo. Tan ña nducú ndo nduvaha ndo nuu Nyoo, tan intuhun ñi maa ra cuví Nyoo tsa iyó. ⁴⁵ Ña caca iñi ndo tyin cua ndacan yu cuatyí tsaha ndo nuu Jutu yu. Nyooho cuñí maa ndo tyin ley tsa tyaá ra Moisés cua cundaca tsi ndo gloria. Maa tyin ra Moisés cuví ra tsicán cuatyí tsaha ndo tyin ña jacuví ndo ley tsa tyaá ra. ⁴⁶ Tyin tun tsatyin nditsa tsa tsinú iñi ndo tsa cahan ra Moisés, tacan cua tsinu ndihi iñi ndo tsa caahán yuhu. Tyin tuhun yuhu cuví tsa tyaá ra. ⁴⁷ Maa tyin tatun ña tsinú iñi ndo tuhun tsa tyaá ra, ¿nácaa cua tsinu iñi ndo tsa caahán yuhu? —catyí ra Jesús tsihin ra cuví ityi nuu tsihin ra Israel naha ra.

6

Nu jacatsi ra Jesús uhun mil rayi

(Mt. 14.13-21; Mr. 6.30-44; Lc. 9.10-17)

¹ Tsa yahá yacan, tan cuahán ra Jesús inga tsiyo miñi cahnu tsa nañi Nduitya Ñuhu Galilea. Tan juvin ñi nañi tucu tsi Miñi Tiberias. ² Cuaha xaan nyivi cuahán nyicun tsi ra tyin nyehé ñi tsa iyo tsa javahá ra tyin janduvahá ra tsi nyivi cuuhví. ³ Tacan tan ra Jesús ndaa ra iin yucu tan tsinyaá ra ican tsihin ra tsicá tsihin ra. ⁴ Tan tsa cuyatyin cuii tahan tsi quivi vico pascua tsa jacahnú

nyivi Israel. ⁵ Tan nyehe ra Jesús tyin cuaha xaan nyivi nyicún tsi ra, tacan tan quitsaha caahán ra tshin ra Felipe:

—¿Numaa cua jata yo tsa catsi nyivi cuaha ihya? —catyí ra tshin ra.

⁶ Caahán ñi maa ra tshin ra Felipe tyin nducú cuhva ra tsi ra náa cua cahan ra, tyin tsa tsitó maa ra Jesús náa cua javaha ra. ⁷ Tacan tan nacahan ra Felipe tan catyí ra:

—Xuhun tsa quihin yo tsa jahá tyiñu yo tsa uvi cientu quivi, ndi ña cua cutahan can jata yo luxu tsa catsi nyivi ihya —catyí ra Felipe.

⁸ Tan inga ra tsa nyicún tsi ra Jesús, ra Andrés, yañi ra Simón Pedro, catyí ra tshin ra Jesús:

⁹ —Ihya nyii iin ra luhlu ndaha uhun taahan paan cebada tan uvi taahan tyaca. Maa tyin ndi nduve náa cuví yacan tyin cuaha xaan nyivi ihya —catyí ra Andrés.

¹⁰ Tacan tan catyí ra Jesús tshin ra naha:

—Cahan ndo tshin tandihi nyivi na cunyecu ñi —catyí ra.

Tan cuaha xaan itya ícan tan tsinyecu ñi, uhun mil rayii, [tan siin maa ñi ñaha tshin tsa nyihi]. ¹¹ Tacan tan quihin ra Jesús paan can tan tsa yaha tsaha ra tyahvi nyoo tsi Nyoo, tan tsaha ra can tsi ra tsicá tshin ra. Tan ra can naha ra, tsaha ra naha can tsi tandihi nyivi tsa nyecu can. Juvín ñi tacan ícá nyico ra tshin tyaca can. Tan tsatsi ndaha iñi ñi. ¹² Tan cuhva tsa ndaha iñi ñi, ra Jesús catyí ra tshin ra tsicá tshin ra:

—Naquihin vaha ndo tsa ñahñu tsa ndoo tyin tacan tan ña tiví tsi —catyí ra tshin ra naha.

¹³ Naquihin vaha ra naha can, tan jacutu ra naha utsi uvi tyica tshin tsa ñahñu tsa ndoo tsa uhun taahan paan can. ¹⁴ Tacan tan tsa yaha nyehe nyivi can tsa iyo tsa javaha ra Jesús, tan catyí ñi:

—Nditsa tsa cuii tyin ndusu yuhu Nyoo cuví ra ihya, juvín ra nyaá tsa quitsi maa nu ñuhu ñayivi ihya —catyí ñi.

¹⁵ Maa tyin tsa tuvji iñi ra Jesús tyin cuñí ñi tsa quihin ñi tsi ra tshin tsa ñiñi tyin cuví ra rey cuenda ñi, tacan tan cuahán nyico ra jiñi yucu nu sucun ca tyin cunyiñi tuhun ñi maa ra.

Nu tsicá ra Jesús nu ndutya (Mt. 14.22-27; Mr. 6.45-52)

¹⁶ Tsa cunaaha, nuu ra tsicá tshin ra Jesús yuhu miñi can. ¹⁷ Tan quihvi ra naha tsitsi yutun ndoo tyin cua yaha sava ra naha mahñu miñi can tan cua tsaá ra naha ñuu Capernaum. Tsa cunaaha tan ra Jesús ñaha ca maa tsaá ra. ¹⁸ Tacan tan tsaá tatyí ñihi. Tan iyo nduvita ndutya miñi can. ¹⁹ Tsa tsa yaha ra naha uhun a iñu kilómetro tshin yutun ndoo can tan nyehe ra naha vatsí ra Jesús tsicá ra nu ndutya. Tsa nyehe ra naha tyin tsa cua cuyatyn ra nu cuahán yutun ndoo can, nayuhvi xaan ra naha. ²⁰ Maa tyin catyí ra Jesús tshin ra naha:

—¡Maa yu cuví, ña nayuhvi ndo!

²¹ Tacan tan tsaha ra naha quihvi ra Jesús tsitsi yutun ndoo can. Tan iin yaha ñi tsaá ra naha yuhu miñi nu cuahán ra naha.

Nu nanducú nyivi tsi ra Jesús

²² Tsa tuvi inga quivi tan tsito nyivi tsa ndoo inga tsiyo miñi can tyin ra tsicá tshin ra Jesús tsa cuahán ra naha tshin iin yutun ndoo tsa iyó ícan. Intuhun ñi maa can iyó. Tan tsito ñi tyin ña cuahán ra Jesús tshin ra naha. ²³ Maa tyin tsaá taahan ca yutun ndoo tsa quee ñuu Tiberias yatyn ñi nu nacuhva Jutu

Mañi yo tyahvi nyoo tsi Nyoo tan tsatsj nyivi paan. ²⁴ Tacan tan tsa nyehe nyivi tyin nduve ra Jesús tan ndi ra tsicá tsihin ra, quihvi ñi tsitsi yutun ndoo tsa tsaq tan cuahán ñi nda ñuu Capernaum cua nanducu ñi tsi ra.

Ra Jesús cuví paan tsa tsahá ñayivi nyito coo yo

²⁵ Tsa tsaq ñi inga tsiyo miñi can, nañihí ñi tsi ra Jesús. Tan tsicá tuhun ñi tsi ra:

—Maestro, ¿náa cuhva tsaq un ihya? —catyí ñi tsihin ra.

²⁶ Maa tyin catyí ra Jesús tsihin ñi:

—Tsa nditsa catyí yu tsihin ndo tyin nyoocho nanducú ndo tsi yu maa tyin ñavin cuenda tsa nyehe ndo tsa iyo tsa javahá yu. Nanducú ndo tsi yu tyin tsatsj ndo tan ndaha iñi ndo. ²⁷ Ña jaha tyiñu ndo cuenda tunyee iñi tsa tsatsi ndo tsa cua ndihí ñi maa, jaha tyiñu ndo cuenda tunyee iñi tsa catsi ndo tsa ña cua ndihí tan tsahá tsi ñayivi nyito tsa ña cua naa maa coo ndo. Yacan cuví tsa catsi ndo tsa cua cuhva yuhu tsi ndo tyin Nyoo Jutu yu tavá tyiñu ra tsi yu tyin yuhu cuví Rayi tsa quee nda gloria —catyí ra Jesús.

²⁸ Tacan tan quitsahá tsicá tuhun ñi tsi ra tan catyí ñi:

—¿Náa taahán tsi javaha ndi tan cuví javaha ndi cuhva cuñi Nyoo? —catyí ñi.

²⁹ Tacan tan catyí ra Jesús tsihin ñi:

—Tsa cuñi Nyoo javaha ndo, cuví tsa tsinu iñi ndo tsa caahán yuhu, ra tsa jaquitsj ra —catyí ra Jesús tsihin ñi.

³⁰ Tan tsicá tuhun nyico ñi tsi ra, tan catyí ñi:

—¿Náa tsa iyo javaha un nyehe ndi tan tsinu iñi ndi tsa caahán un? ³¹ Tsii tsahnu ndi tsatsj ñi maná nu tsiqui, tumaa tsa caahán tuhun Nyoo tyehen: “Andivi quee paan tsatsj nyivi jahá Nyoo” —catyí ñi tsihin ra Jesús.

³² Tan nacahán ra Jesús tan catyí ra:

—Tsa nditsa caahán yu tsihin ndo. Ñavin ra Moisés tsahá paan tsa quee andivi tsatsj ñi, tyin maa Nyoo Jutu yu cuví ra tsahá paan nditsa tsa quee andivi. ³³ Tyin paan tsa tsahá Nyoo, yacan cuví ra tsa quee andivi. Tan juvin ra cuví ra tsahá ñayivi nyito coo nyivi iyó nu ñuhu ñayivi —catyí ra Jesús.

³⁴ Tacan tan quitsahá catyí ñi tsihin ra:

—Taa, cuhva paan can catsi ndi tandihí ñi quivi —catyí ñi.

³⁵ Tan nacahán ra Jesús tan catyí ra tsihin ñi:

—Yuhu cuví paan tsa tsahá tsa coo nyito añima ndo. Nyivi nyicún tsi yu ña cua cusoco ca ñi, tan ñi tsinu iñi tsa caahán yu ña cua na ityi iñi ñi. ³⁶ Maa tyin tumaa tsa caahán yu tsihin ndo, nyehe vaha ndo tsi yu, maa tyin ña cuñi ndo tsinu iñi ndo tyin juvin yu cuví ra tsa cuví jatyinyee tsi ndo ³⁷ Tandihí nyivi tsa tsahá Nyoo Jutu yu tsi yu, nyicún ñi tsi yu, tan ñi tsa nyicún tsi yu, naquihín vaha yu tsi ñi. ³⁸ Tyin yuhu tsa quee andivi; vatsí yu vatsí javahá yu cuhva cuñi ra tsa jaquitsj tsi yu. Ña vatsí yu vatsí javaha yu cuhva cuñi ñi maa yu.

³⁹ Tan cuhva cuñi ra tsa jaquitsj tsi yu, yacan cuví tsehe: tsa ña cunaa ndi intuhun nyivi tsa tsahá ra tsi yu, tan janandoto yu tsi ñi nu cua cundihí quivi.

⁴⁰ Jutu yu, ra tsa jaquitsj tsi yu, cuñi ra tyin tandihí nyivi tsa cutuñi iñi tyin Sehe Nyoo cuví tsi yu, tan tsinu iñi ñi tsa caahán yu, cua coo ñi ñayivi nyito tsa ña cua naa maa. Tan juvin ñi yu cua janandoto tsi ñi nu cua cundihí quivi —catyí ra Jesús tsihin ñi.

⁴¹ Tsa cuenda tsa caahan ra Jesús yacan, tan quitsahā caahán nyaa nyivi Israel tsi ra tyin catyí ra: “Yuhu cuví paan tsa quee andivi”, catyí ra. ⁴² Tacan tan quitsahā catyí ñi:

—¿A ñavin ra Jesús sehe ra José cuví ra ihya? Yoo tsitó vaha yo tsi jutu ra tan tsi sihi ra. ¿Nacaa tsa catyí ra tyin andivi quee ra? —catyí ñi.

⁴³ Tacan tan catyí ra Jesús tsihin ñi:

—Jandihí ndo tsa caahán nyaa ndo. ⁴⁴ Yoñi maa nyivi cuví quitsi quitsi nyicún tsi yu tatun ñavin Jutu yu, ra tsa jaquitsí tsi yu, caná tsi ñi. Tan cua janandoto yu tsi ñi nu cua cundihi quivi. ⁴⁵ Nu libru tsa tyaá ra cuví ndusu yuhu Nyoo caahán tsi tyehen: “Nyoo cua jacuaha ra tsi tandihí nyivi” catyí tsi. Yacan cuenda nyivi tsa tyaá soho tuhun tsa caahán Nyoo Jutu yu tan cutuhvá ñi tsa caahán ra, juvin ñi nyicún tsi yu.

⁴⁶ Ñavin tsa tyin nyehe ñi tsi Nyoo Jutu yu, tyin yoñi nyehe tsi ra. Intuhun ñi maa yu nyehé tsi ra. Tan juvin yu cuví ra tsa quee nu nyaá ra. ⁴⁷ Tsa nditsa catyí yu tsihin ndo tyin nyivi tsa tsinú iñi tsa caahán yu tsa iyó ñi ñayivi nyito tsa ña cua naa maa. ⁴⁸ Yuhu cuví paan tsa tsahá tsa coo nyito añima ñi. ⁴⁹ Tsii tsaahnu ndo tsatsí ñi maná nu tsiqui, maa tyin juvin ñi tsihi ñi. ⁵⁰ Maa tyin yuhu, tuhun paan tsa quee andivi caahán yu tsihin ndo, tyin nyivi tsa cua catsi paan can, ña cua cúu ñi. ⁵¹ Juvin ñi maa yu cuví paan nyito tsa quee andivi. Nyivi tsa cua catsi paan ihya ña cua cundihi tsa coo ñi, tyin paan tsa cua cuhva yu, yacan cuví cuñu ñuhu yu. Tan cua cuhva yu ñayivi tsa iyó yu tsa cuenda tandihí nyivi iyó nu ñuhu ñayivi —catyí ra Jesús tsihin ñi.

⁵² Tacan tan nyivi Israel can quitsahā natuhún tahan ñi tan catyí ñi:

—¿Nacaa cua cuhva ra tsa catsi yo cuñu ñuhu ra?

⁵³ Tan catyí ra Jesús:

—Tsa nditsa catyí yu tsihin ndo, tyin yuhu cuví Rayi tsa quee nda gloria, tan tatun nyooho tan ña cua catsi ndo cuñu ñuhu yu, tan ña coho ndo niñi yu, ña cuví coo ndo ñayivi nyitó. ⁵⁴ Nyivi tsatsí cuñu ñuhu yu tan tsihi ñi niñi yu, iyó ñi ñayivi nyito tsa ña cua naa maa. Tan yuhu cua janandoto yu tsi ñi nu cua cundihi quivi. ⁵⁵ Tyin cuñu ñuhu yu yacan cuví paan tsa nditsa tsa taahán tsi catsi ñi, tan niñi yu cuví vinu tsa nditsa tsa taahán tsi coho ñi. ⁵⁶ Nyivi tsatsí cuñu ñuhu yu tan tsihi ñi niñi yu, iin ñi cuví ñi tsihin yu. Tan iin ñi cuví yu tsihin ñi. ⁵⁷ Jutu yu, ra tsa jaquitsí tsi yu, Nyoo nyito cuví ra. Tan yuhu iyó yu tsihin tunyee iñi ra. Tan juvin ñi tacan tucu nyivi tsatsí cuñu ñuhu yu, cua coo ñi tsihin tunyee iñi tsa iyó tsi yu. ⁵⁸ Tuhun paan tsa quee andivi caahán yu. Paan ihya ñavin tumaa maná tsa tsatsí tsii tsaahnu yo cuví tsi, tyin juvin ñi tsihi ñi. Nyivi tsatsí paan tsa cuví cuñu ñuhu yu, ña cua cundihi maa tsa coo ñi —catyí ra Jesús.

⁵⁹ Juvin yacan jacuaha ra Jesús nu ndu iin nyivi tsitsi vehe ñuhu ñuu Capernaum.

⁶⁰ Cuaha xaan nyivi nyicún tsi ra Jesús. Tan cuhva tsa tsiñi ñi yacan catyí ñi:

—Tuhun tsa caahán ra ihya, yñi xaan naquihin vaha yo itsi. Yoñi maa cua tsinu iñi tsa caahán ra —catyí ñi.

⁶¹ Tacan tan tuví iñi ra Jesús tyin ña cuñi ñi naquihin ñi tsa caahán ra. Tan tsica tuhun ra tsi ñi:

—¿A ndasi cuñi ndo tsa caahán yu ihya? ⁶² Tan ¿náa cua javaha ndo tatun nyehe ndo tsi yuhu Rayi tsa quee nda gloria nandaa nyico yu inga tsaha ityi nu quee yu? ⁶³ Tatyí li Nyoo tsahá ñayivi nyito. Tan cuñu ñuhu, ña jatinyeé

tsi tsa coo yo ñayivi can. Tan tsa caahán yuhu tsihin ndo, Tatyí li Nyoo cuví tsi tan tsahá tsi tsa coo nyitó añima ndo. ⁶⁴ Maa tyin yihí ndo ña tsinú iñi ndo tsi yu —catyí ra Jesús.

Tyin nda quivi jihna tan tsa tsitó maa ra yóo ña cua tsinú iñi tsi ra tan yóo cua xico tsi ra. ⁶⁵ Tan catyí ra:

—Yacan cuenda catyí yu tsihin ndo tyin yoñi nyivi cuví quitsi nyicun tsi yu tatun ñavin maa Nyoo Jutu yu caná tsi ñi —catyí ra Jesús.

⁶⁶ Nda quivi can, tan cuaaha xaan nyivi nyicún tsi ra Jesús nacoó ñi tsi ra. Tan ña tsicá ca ñi tsihin ra. ⁶⁷ Tacan tan tsicá tuhun ra Jesús tsi tsa utsi uvi ra tsicá tsihin ra, tan catyí ra:

—¿A cuñi ndihi tucu nyoooho cuhun ndo? —catyí ra tsihin ra naha.

⁶⁸ Maa tyin nacahan ra Simón Pedro tan catyí ra:

—Jutu Mañi yu, ¿yóo cunyicun ndi? Tan intuhun ñi maa un caahán tuhun ñayivi nyito tsa ña cua naa maa. ⁶⁹ Nyuhu tsinú iñi ndi, tan tsitó ndi tyin yooho cuví ra Cristo Sehe Nyoo nyito.

⁷⁰ Tan nacahan ra Jesús tan catyí ra:

—¿A ñavin yuhu nacatsj tsi tandihi tsa utsi uvi ndo? Tan intuhun ndo yihí nu ña vaha —catyí ra.

⁷¹ Tuhun tsa caahán ra Jesús ihya, tuhun ra Judas Iscariote sehe ra Simón cuví can. Tyin ra Judas cuví ra cua cuhva cuenda tsi ra Jesús tsi nu xaan iñi tsi ra, vasu iin ra tsa utsi uvi can cuví ra.

7

Nu ña tsinú iñi yañi ra Jesús tsi ra

¹ Tsa yaha yacan, tan nyíí ra Jesús tsicá nuu ra nu cuví Galilea. Ña cuñi ra cuhun ra nu cuví Judea tyin ra cuví ityi nuu tsihin nyivi Israel can naha ra cuñi ra naha cahñi ra naha tsi ra. ² Tan tsa cuyatyin quivi vico tsa jacahnú nyivi Israel ndihi ñi cuiya. Tan nañi tsi Vico Tyahva. ³ Yacan cuenda catyí ra yañi ra Jesús tsihin ra:

—Ña ndoo un ihya. Cuaahan Judea tyin nyivi nyicún tsi un tsa iyó ndacan nyehe ñi tyiñu javahá un. ⁴ Tyin tatun cuñi yo tsa coto nyivi tsi yo, ña javahá xeehe yo tsa javahá yo. Tan yooho tatun nditsa tsa javahá un, javaha can nuu tandihi nyivi —catyí tandihi yañi ra.

⁵ Tacan catyí ra naha tyin ndi tsa cuví ra naha yañi ra tan ña tsinú iñi ra naha tsi ra. ⁶ Tacan tan catyí ra Jesús tsihin ra naha:

—Ñaha ca tsaa hora tsa cuhun yuhu. Maa tyin nyoooho ndáa quivi ñi cuví cuhun ndo. ⁷ Tyin vaha cuñi nyivi nyehé ñi tsi ndo, maa tyin yuhu ndasi cuñi ñi nyehé ñi tsi yu tsa cuenda tyin caahán catsi yu tsihin ñi tyin ña vaha tsa javahá ñi. ⁸ Cuaahan nyoooho vico can. Yuhu ña cuhun yu tyin ñaha ca tsaa hora tsa taahán tsi cuhun yu —catyí ra.

⁹ Yaha can tan ndoq ra nu cuví Galilea.

Nu nyíí ra Jesús nu iyó vico Tyahva

¹⁰ Tsa yaha cuahán yañi ra Jesús vico can, tsahan cuahán ndihi ra, maa tyin cuahán xeehe ñi ra. ¹¹ Tan ra cuví ityi nuu tsihin nyivi Israel nanducú ra naha tsi ra nu iyó vico can, tan nducú tuhun tahan ra naha tsi ra naha:

—¿Numaa nyíí ra can? —catyí ra naha.

¹² Tan caahán nyívi yucú vico can tuhun ra. Yihí ñi catyí ñi: “In ra vaha cuví ra.” Tan inga ñi catyí ñi: “Ña vaha ra, jandaví ñaha ra tsi nyívi”, catyí ñi.

¹³ Maa tyin yoñi caahán nditsin tuhun ra tsa cuenda tsa yuuhví ñi tsi ra cuví ityi nuu can naha ra.

¹⁴ Tsa cusava iyó vico tan tsaq ra Jesús tsitsi vehe ñuhu cahnu tan quitsaha jacuaha ra tsi nyívi. ¹⁵ Tan ra cuví ityi nuu can iyó cuñi ra naha tan quitsaha natuhun tahan ra naha:

—¿Nacaa tyin tsitó ra ihya tan ña cahví ra? —catyí ra naha.

¹⁶ Tan nacahan ra Jesús tan catyí ra:

—Tuhun tsa jacuahá yu, ñavin tsa cuenda maa yu cuví tsi, maa tyin cuenda ra tsa jaquitsi tsi yu cuví tsi. ¹⁷ Tatun yihí nyooho tsa cuñi javaha cuhva cuñi Nyoo, cua coto ndo tyin cuenda Nyoo jacuahá yu tan ñavin tsa cuenda maa yu. ¹⁸ Nyívi tsa caahán cuenda maa ñi, caahán ñi tyin cuñi ñi tsa jacahnu nyívi tsi ñi. Maa tyin ra nducú tsa jacahnu nyívi tsi Nyoo, ra tsa jaquitsi tsi ra, ra ican caahán tsa nditsa. Tan ña jandaví ñaha ra.

¹⁹ ¿A ña nditsa tyin ra Moisés tsaḥa ra ley tsi ndo? Maa tyin ndi intuhun nyooho tan ña tyaá yahvi ndo ley can. ¿Nacuenda cuñi ndo cahñi ndo tsi yu? —catyí ra.

²⁰ Tan nacahan nyívi tan catyí ñi tsihin ra:

—Tatyí ña vaha yihí tsi yooho. Yoñi cuñi cahñi tsi un —catyí ñi tsihin ra.

²¹ Tan catyí ra Jesús:

—Tsacatyí tsa javahá yu tsa iyo quívi quitatu yo, yacan ndasi cuñi ndo nyehé ndo tsi yu. ²² Maa tyin ra Moisés catyí ra tsihin ndo tyin coo ndo tsihin tsa cunyaa tuñi Nyoo tsi sehe yíi ndo. Vasu ñavin ra quitsaha tsihin tuhun can, maa tyin nyívi cuví nyívi ra ityi tsata, jihna ca ñi javahá tacan. Yacan cuenda javahá ndo can vasu taahán tsi quívi quitatu yo. ²³ Tan vityin, vaha tatun tsa cuenda tsa ña cuñi ndo cumañi ndo ley ra Moisés tan javahá ndo tuhun can vasu quívi quitatú yo cuví. Maa tyin tatun tacan javahá ndo, ¿nacuenta tyin cuxaan ndo tsi yu tsa janduvahá yu tsi ra can quívi quitatú yo? ²⁴ Ña tyaá ndo cuatyí siqui nyívi tatun ña tsitó vaha ndo náa javahá ñi. Cuatu ndo nda nyehe vaha ndo, tacan tan coto ndo nácaa tatsi tuñi ndo tsi ñi tsihin tsa ndaa tan tsihin tsa nditsa.

Nu cahan ra Jesús tuhun maa ra

²⁵ Tacan tan juhva nyívi iyó Jerusalén, quitsaha tsicá tuhun ñi:

—¿A ñavin ra ihya nanducú xaan ra naha tyin cua cahñi ra naha tsi ra?

²⁶ Caahán nditsin ra tsihin nyívi. Tan yoñi caahán náa caahán tsihin ra. Vasiqui tsinú ndihí maa iñi ra cuví ityi nuu naha ra tyin juven ra ihya cuví ra Cristo ra cuví rey tsa jaquitsi Nyoo. ²⁷ Yoo tsitó vaha yo nu quee ra ihya, tan quívi quitsi ra Cristo yoñi maa cua coto numaa ityi cua quee ra —catyí ñi.

²⁸ Ra Jesús nyíi ra tsitsi vehe ñuhu jacuahá ra, tan tsitó ra tsa natuhún nyívi, yacan cuenda ñihi cahan ra tan catyí ra:

—¿Nyooho cuñi maa ndo tyin nacotó ndo tsi yu tan tsitó ndo numaa quee yu! Maa tyin yuhu ña vatsí yu cuenda maa yu. Yuhu vatsí yu cuenda ra tsa jaquitsi tsi yu, ra tsa cuví tsa nditsa. Nyooho ña nacotó ndo tsi ra. ²⁹ Yuhu nacotó yu tsi ra tyin cuenda ra vatsí yu, tan maa ra jaquitsi tsi yu —catyí ra Jesús.

³⁰ Tacan tan cuñi ra naha tyihí ra naha tsi ra tsitsi vehe caa. Maa tyin ndi intuhun ra naha tan ña caná iñi ra naha tñin ra naha tsi ra tsa cuenda tyin

ñaha ca tahan tsi quivi tsa taahán maa tsi t̄in ra naha tsi ra. ³¹ Maa tyin cuaha xaan nyivi tsinú iñi tsi ra. Tan catyí ñi:

—Ra ihya cuví ra Cristo. ¿A cuaha ca tsa iyo cua javaha inga ra tatun quitsi ra tan ñavin ca ra ihya? —catyí ñi.

Nu jacuhun ra cuví fariseo naha ra tsi ra vitya tyin t̄in ra naha tsi ra Jesús

³² Tsa tsiñi ra fariseo naha ra tsa caahán nyivi tuhun ra Jesús, maa ra naha tan ra cuví ityi nuu tsihin ra jutu naha ra, jacuhun ra naha vitya cuenda vehe ñuhu, na t̄in ra naha tsi ra Jesús. ³³ Tacan tan catyí ra Jesús:

—Juhva cuii ña quivi cua cunyaa yu tsihin ndo. Yahá can tan cuacunuhu yu nu nyaá ra tsa jaquitsi tsi yu. ³⁴ Nyooho cua nanducu ndo tsi yu. Maa tyin ña cua nañihi ndo tsi yu. Tyin ña cua cuvi cuhun ndo nu cua cunyaa yu —catyí ra Jesús.

³⁵ Tacan tan quitsahá natuhún tahan ra cuví ityi nuu tsihin nyivi Israel naha ra:

—¿Numaa cua cuhun ra ihya tsa ña cua nañihi yo tsi ra? ¿A cuhun ra nu iyó ra Israel ñuu Grecia naha ra tyin jacuaha ra tsi nyivi iyó Grecia can? ³⁶ ¿Náa cuñi tsi catyí tsa caahán ra tsihin yo? Tyin catyí ra: “Cua nanducu ndo tsi yu maa tyin ña cua nañihi ca ndo tsi yu tyin ña cua cuví cuhun ndo nu cua cunyaa yu” —tacan caahán yuhu tahan ra naha tuhun ra Jesús.

Nyivi tsinú iñi tsi Nyoo cua coo Tatyí Ii ra añima ñi

³⁷ Quivi ndihi tsicoq vico, yacan cuví quivi tsa ñiñi ca. Tan quivi can nduvitá ra Jesús tan ñihi caahán ra tan catyí ra:

—Tatun ndáa nyooho na ityi iñi ndo, ñaha ndo tan ts̄inu iñi ndo tsa caahán yu. ³⁸ Tyin nyivi tsa tsinú iñi tsa caahán yu, cua cunu ndutya nyito tsitsi añima ñi tumaa tsinú ndutya iin yutya, tumaa catyí maa nu tutu Nyoo —catyí ra Jesús.

³⁹ Maa tyin tsihin yacan cuñi ra catyí ra tyin ñi tsinú iñi tsi ra cua ñihi ñi Tatyí Ii Nyoo, tyin quivi can ñaha ca quitsi Tatyí Ii Nyoo tyin ra Jesús, ñaha ca cunuhu ra nda gloria nu cua jacahnú jutu ra tsi ra.

Nu natahvi sava nyivi tsa cuenda ra Jesús

⁴⁰ Juhva nyivi tsa tsiñi yacan, catyí ñi:

—Nditsa tsa cuii tyin ra ihya cuví ndusu yuhu Nyoo tsa nyaá tsa cua quitsi —catyí ñi.

⁴¹ Tan inga ñi catyí ñi:

—Ra ican cuví ra Cristo ra tsa jaquitsi Nyoo —catyí ñi.

Maa tyin inga nyivi catyí ñi:

—¿Nacaa tyin ra Galilea cua cuví ra Cristo? ⁴² Tyin nu tutu Nyoo catyí tsi tyin ra Cristo cua cuví ra nyivi tata ra rey David, tan ra ñuu Belén tsa canyí nu cuví Galilea cua cuví ra, tumaa ra David —catyí ñi.

⁴³ Tacan tan nyivi can natahvi sava ñi tsa cuenda ra Jesús. ⁴⁴ Yihí ñi cuñi ñi quihin ñi tsi ra tan tyihí ñi tsi ra tsitsi vehe caa. Maa tyin yoñi t̄in tsi ra.

Ra cuví ityi nuu vehe ñuhu naha ra ña tsinú iñi ra naha tsi ra Jesús

⁴⁵ Tacan tan ra vitya tsa iyó vehe ñuhu cahnú can, cuanuhu ra naha nu yucú ra fariseo naha ra tsihin ra cuví ityi nuu tsihin ra jutu naha ra. Tan tsicá tuhun ra naha tsi ra vitya can naha ra tan catyí ra naha:

—¿Nacuenda ña quihin ndo tsi ra?

⁴⁶ Tan catyí ra vitya can naha ra:

—¿Ndi intuhun tsaha tan yoñi tuhva caahán tumaa caahán ra can! —catyí ra naha.

⁴⁷ Tacan tan catyí ra fariseo naha ra tsihin ra vitya can naha ra:

—¿A jandaví ñaha ndihi ra can tsi nyooho? ⁴⁸ Nyehe ndo tyin ndi intuhun ra cuví ityi nuu tsihin ndi, tan ra cuví fariseo naha ra, tan ña tsinú iñi ra naha tsi ra can. ⁴⁹ Maa ñi maa nyivi ña tsitó ley nyicún tsi ra. Tan ña vaha ñi nuu Nyoo —catyí ra naha.

⁵⁰ Tacan tan ra Nicodemo, ra tsa tsahan nu nyii ra Jesús tsa tsacuaa, cuví ndihi tucu ra fariseo, tan catyí ra tsihin ra naha:

⁵¹ —Catyí ley tyin ña cuví tatsi tuñi yo tsi iin nyivi tatun ñaha ca cuñi jihna yo tsa caahán ra, tan coto yo náa javahá ra —catyí ra tsihin ra naha.

⁵² Tacan tan nacahan ra naha tan catyí ra naha tsihin ra:

—¿A juvin ñi ra Galilea cuví ndihi tucu yooho? Cahvi nu tutu Nyoo tan nyehe un, tyin ndi intuhun ra cuví ndusu yuhu Nyoo tan ña nyaá tsi tsa quitsi ra nda Galilea —catyí ra naha.

Ñaha tsa quituvi tsihin rayi tsa ñavin yñi ña cuví

⁵³ Tacan tan cuanuhu intuhun intuhun ra naha nda yuvehe ra naha.

8

¹ Maa tyin ra Jesús cuahán ra yucu Olivo. ² Tsa cunditsin inga quivi, cuahán nyico ra Jesús inga tsaha vehe ñuhu cahnú. Tan tandihi nyivi natuhvá ñi nu nyii ra. Tan tsinyaá ra tan quitsahá caahán ra tsihin ñi. ³ Tacan tan ra jacuahá ley vehe ñuhu tan ra cuví fariseo naha ra tsaá ra naha tsihin iin ñaha iyó yñi tyin ña ra naha tsi ña nu tsicoo cuatyí ña tsihin inga rayi. Tan tyaa ra naha tsi ña mahñu nyivi tsa nyecú can. ⁴ Tan quitsahá catyí ra naha tsihin ra Jesús:

—Maestro, tñin ndi tsi ñaha ihya nu tsicoo cuatyí ña tsihin inga rayi. ⁵ Tyin ley tsa tyaa ra Moisés catyí tsi tyin ñiñaha tsa javahá tacan taahán tsi cahñi yo tsi ñi tsihin yuu. Tan yooho, ¿nácaa catyí un? —catyí ra naha tsihin ra.

⁶ Caahán ra naha yacan tsihin ra Jesús tsa cuenda tsa nducú cuhva ra naha tsi ra tan tyaa ra naha cuatyí siqui ra. Tacan tan tsinyaá tyayñi ra Jesús nu ñuhu tan quitsahá tyaa ra letra nu ñuhú tsihin nundaha ra. ⁷ Maa tyin nducú tuhun ca ra naha tsi ra, tacan tan nduvita nyityi ra tan catyí ra tsihin ra naha:

—Nyooho tsa nduve cuatyí jihna ca ndo quihñin yuu tan cañi ndo tsi ña —catyí ra tsihin ra naha.

⁸ Tan tsinyaá tyayñi nyico ra tan quitsahá jañihí ca ra tyaa ra letra nu ñuhu. ⁹ Tsa tsiñi ra naha tsa caahán ra tacan, tuvi iñi ra naha tyin iyó tucu cuatyí maa ra naha. Tan quitsahá quitá intuhun intuhun ra naha, jihna ca ra tsahnú naha ra quita. Cuhva tsa ndihí ra naha quita cuahán tan ndoo intuhun ña maa ra Jesús tsihin ñaha can mahñu nu nyecú nyivi can. ¹⁰ Tacan tan nduvita nyityi ra Jesús tan nyehe ra tyin tsa cuahán ra naha tan ndoo intuhun ña ñaha can. Tacan tan catyí ra tsihin ña:

—¿Numaa cuahán ra tsa tyaa cuatyí siqui un naha ra vityin? ¿Yoñi, ndi intuhun ca ra tsa catyí tyin taahán tsi cúu un? —catyí ra tsihin ña.

¹¹ Tan nacahan ña tan catyí ña:

—Ndi intuhun ra, Tatta.

Tacan tan catyí ra Jesús tsihin ña:

—Ndi yuhu tan ña catyí yu tyin taahán tsi cúu un. Cuaahan vityin. Tan ña javaha ca un cuatyí —catyí ra tsihin ña.

Ra Jesús cuví tsa nditsin tsa jandunditsin añima nyivi

¹² Tacan tan cahān nyico ra Jesús tsihin nyivi inga tsaha, tan catyí ra tsihin ñi:

—Yuhu cuví ra tsa jandunditsín añima nyivi iyó nu ñuhu ñayivi. Yóo nyivi tsa nyicún tsi yu, cua coo ñi iin ñayivi nyito nu nditsin. Tan ña cua caca nuu ñi nu naa —catyí ra Jesús tsihin ñi.

¹³ Tacan tan ra cuví fariseo naha ra catyí ra naha tsihin ra:

—Yooho, caahán un tumañi iñi tsa cuenda maa un. Yacan cuenda nduve yahvi nyaá can —catyí ra naha tsihin ra.

¹⁴ Nacahān ra Jesús tan catyí ra:

—Vasu juvin ñi maa yu caahán tumañi iñi tsa cuenda yu, maa tyin tsa caahán yu iyó yahvi tsi tyin yuhu tsitó yu numaa ityi quee yu tan numaa ityi cua cuhun yu. Maa tyin nyooho ña tsitó ndo numaa ityi quee yu tan numaa ityi cua cuhun yu. ¹⁵ Nyooho yatyi xaan caahán ndo tsa caa nyivi. Maa tyin yuhu, ña caahán yu tsa caa ñi. ¹⁶ Tyin tatun cahan yu tsa caa nyivi, tsa nditsa cua cahan yu. Tyin ñavin intuhun ñi maa yu nyehé tsa iyó añima ñi, tyin Jutu yu ra tsa jaquitsi tsi yu, ra ican nyehé iin caa ñi tsihin yu. ¹⁷ Nu ley nyooho nyaá tyin tatun uvi ra tsahá tsa ndaa, cuñi tsi tsinú iñi yo tsa caahán ra naha. ¹⁸ Tan vityin vaha tyin juvin ñi maa yu cuví tsa ndaa tsa cuenda maa yu. Tan Jutu yu, ra tsa jaquitsi tsi yu, cuví inga tsa ndaa —catyí ra Jesús tsihin ra naha.

¹⁹ Tacan tan tsicá tuhun ra naha tsi ra:

—¿Numaa nyii jutu un?

Tan catyí ra Jesús:

—Nyooho ña tsitó ndo tsi yuhu. Tan ndi Jutu yu tan ña tsitó ndo. Tun tsatyin tsitó ndo tsi yu, coto ndihi ndo tsi Jutu yu —catyí ra.

²⁰ Tuhun ihya cahān ra Jesús tsitsi tsa jacuahá ra tsitsi vehe ñuhu cahnu, nu nyii caja nu tyihí nyivi xuhun. Maa tyin yoñi tyihí tsi ra vehe caa, tyin ñaha ca tahan tsi quivi tsa taahán tsi cuhun ra.

“Nu cuhun yuhu ña cua cuvi cuhun ndo”, catyí ra Cristo

²¹ Tacan tan quitsahā caahán nyico ra Jesús tsihin ra Israel naha ra tan catyí ra:

—Yuhu cua cuhun yu, tan cua nanducu ndo tsi yu, maa tyin cua cúu ndo tan cua ndoo cuatyí ndo siqui ndo. Tyin nu cua cuhun yuhu, nyooho ña cua cuví cuhun ndo —catyí ra Jesús tsihin ra naha.

²² Tacan tan catyí ra Israel naha ra:

—¿A cua cahñi maa ra tsi ra? tyin catyí ra tyin ña cua cuvi cuhun yo nu cuahán ra —catyí ra naha.

²³ Tacan tan catyí ra Jesús:

—Nyooho ra cuenda nu ñuhu ihya cuví ndo. Maa tyin yuhu nda ityi siqui quee yu. Nyooho cuenda ñuhu ñayivi ihya cuví ndo. Maa tyin yuhu ñavin cuenda nu ñuhu ñayivi ihya cuví yu. ²⁴ Yacan cuenda catyí yu tsihin ndo tyin cua cúu ndo tan cua ndoo cuatyí ndo siqui ndo. Tyin tatun ña tsinú iñi ndo tsa yuhu cuví ra jatsiyó cuatyí ndo, cua ndoo cuatyí ndo siqui ndo quivi cúu ndo —catyí ra Jesús tsihin ra naha.

²⁵ Tacan tan quitsahā tsicá tuhun ra naha tsi ra, tan catyí ra naha:

—¿Yóo ra cuví yooho?

Nacahān ra Jesús tan catyí ra:

—Tsa yaha cahān yu tsihin ndo nda quivi jihna. ²⁶ Cuaha xaan ca tsa ndi cumañi cahan yu tsihin ndo, tan ndi cumañi cahan yu cuhva iyó ndo. Maa

tyin tsa caahán yu tsihin nyívi iyó nu ñuhu ñayívi, cuví tsi tsa tsiñí yu tsa caahán ra tsa jaquitsí tsi yu. Tan maa ra caahán tsa nditsa —catyí ra Jesús.

²⁷ Maa tyin ra Israel naha ra ña cutuñí iñi ra naha tatun tuhun Nyoo Jutu yo cahán ra tsihin ra naha. ²⁸ Yacan cuenda catyí ra tsihin ra naha:

—Cua tyaa ndo tsi yuhu, ra cuví Rayíi tsa quee nda gloria, nu cruu. Tacan tan cua coto ndo tyin yuhu cuví yu tsa caahán yu tyin cuví yu, tan cua coto ndo tyin tyíñu jahá yu ñavin tsa cuenda maa yu javahá yu can, maa tyin caahán yu tsa janahá Jutu yu tsi yu. ²⁹ Tyin Jutu yu, ra tsa jaquitsí tsi yu, nyíi ra tsihin yu. Tan ña nacoó ra tsi yu tsa maa ñi maa yu. Tyin yuhu javahá yu maa ñi maa cuhva cuñí ra —catyí ra Jesús.

³⁰ Tsa cahán ra Jesús yacan, cuaha xaan ra naha quitsahá tsinú iñi tsi ra.

Nyívi cuví sehe Nyoo tan nyívi javahá tsa caquiñi

³¹ Tacan tan catyí ra Jesús tsihin nyívi Israel, tsa quitsahá tsinú iñi tsi ra:

—Tatun nyooho tan jañihi ca ndo tyaa yahvi ndo cuhva jacuahá yu tsi ndo, cua tsa ndo cuví ndo nyívi tsa nditsa yíhi cuenda yu. ³² Tan cua coto ndo tsa nditsa. Tan tsa nditsa can cua tava nuña tsi ndo —catyí ra.

³³ Tan nacahan ra naha tan catyí ra naha:

—Nyuhu nyívi tata ra Abraham cuví ndi. Ndi iin tsaha tan ñaha ca cuví ndi musu nyívi. ¿Nacaa tsa catyí yooho tyin quita nuña ndi? —catyí ra naha tsihin ra.

³⁴ Tan catyí ra Jesús:

—Tsa nditsa catyí yu tsihin ndo tyin tandíhi nyívi javahá tsa caquiñi, musu cuenda tsa caquiñi cuví ñi. ³⁵ Iin musu ña ndoo cuii ra vehe tsitoho ra. Maa tyin ra cuví sehe tsitoho vehe can, ndoo cuii ra vehe jutu ra. ³⁶ Yacan cuenda tatun yuhu tsa cuví yu Sehe Nyoo tan jacacu yu tsi ndo, tsa nditsa cuii tyin ña cua cundaca ñaha ca tsa ña vaha tsi ndo. ³⁷ Tsa tsitó yu tyin tata ra Abraham cuví ndo. Maa tyin yíhi ndo cuñí ndo cahñi ndo tsi yu, tyin ña naquihín vaha ndo tsa caahán yu. ³⁸ Yuhu caahán yu tsa janahá Jutu yu tsi yu. Tan nyooho javahá ndo tsa caahán ra cuví jutu ndo tsihin ndo —catyí ra tsihin ra naha.

³⁹ Tan nacahan ra naha tan catyí ra naha:

—Jutu ndi cuví tsi ra Abraham —catyí ra naha.

Maa tyin ra Jesús catyí ra tsihin ra naha:

—Tun tsatyin nditsa tsa tata ra Abraham cuví tsi ndo, cua javaha ndo tsa javahá ra. ⁴⁰ Maa tyin nyooho, vasu caahán yu tsihin ndo tsa nditsa tsa janahá Nyoo tsi yu, nyooho cuñí ndo cahñi ndo tsi yu. ¡Ra Abraham ña javahá ra tacan! ⁴¹ Nyooho javahá ndo tumaa javahá jutu ndo —catyí ra tsihin ra naha.

Tacan tan nacahan ra naha tan catyí ra naha:

—Nyuhu ñavin sehe ndaahvi tsi ndi. Iyó intuhun jutu ndi tan ra ican cuví Nyoo —catyí ra naha.

⁴² Tacan tan catyí ra Jesús:

—Tun tsatyin nditsa tyin Nyoo cuví jutu ndo, cua cuñi ndo tsi yu. Tyin yuhu quee yu nu nyaá ra tan tsaq yu ihya. Ña vatsí yu cuenda maa yu, tyin maa Nyoo jaquitsí tsi yu. ⁴³ ¿Nacuenda ña cutuñí iñi ndo tsa caahán yu tsihin ndo? Tsa cuenda tyin ña cuñí ndo tyaa soho ndo tsa caahán yu. ⁴⁴ Cuihna cuví jutu ndo. Tan sehe nu tsi ndo. Tan cuñí ndo javaha ndo cuhva cuñí nu. Tan nu ña vaha can cuví nu tsahñí nyívi nda quívi jihna. Tan ña javahá nu tsa nditsa. Ndi iin tsaha ña caahán nu tsa nditsa. Maa ñi maa tsa jandavi

ñaha nu tsi nyivi tyin cuñí nu tsa coo ñi cuhva iyó nu tyin vatya xaan nu. Tan jutu nyivi vatya cuví nu. ⁴⁵ Tan yuhu caahán yu tsa nditsa, maa tyin nyooho ña tsinú ñi ndo tsa caahán yu. ⁴⁶ ¿Ndáa nyooho tan cuví janaha ndo tyin iyó cuatyí yu? Ndi intuhun ndo. Tan tsa tacan caahán yu tsa nditsa, ¿nácaa tsa ña tsinú ñi ndo tsi yu? ⁴⁷ Nyivi cuenda Nyoo tyaá soho ñi tuhun caahán ra. Maa tyin nyooho ñavin nyivi cuenda Nyoo cuví ndo, yacan cuenda ña cuñí ndo tyaá soho ndo tsa caahán yu —catyí ra Jesús.

Ra Cristo, tsa iyó maa ra nda ndi cumañi ca coo ra Abraham,

⁴⁸ Tacan tan catyí ra Israel naha ra tshin ra:

—¿A ña nditsa tyin yooho ra ñuu Samaria cuví un, tan yihí tatyí ña vaha tsi un? —catyí ra naha tshin ra.

⁴⁹ Tan nacahan ra Jesús tan catyí ra:

—Nduve tatyí ña vaha yihí tsi yuhu. Tsi Jutu yu jacahnú yu. Tan nyooho caahán ndo ndavaha ñi tsi yu. ⁵⁰ Yuhu ña nducú yu tsa jacahnu nyivi tsi yu, maa tyin iyó iin ra nanducú tsa jacahnu ñi tsi yu. Tan maa ra cua jandaa cuatyí ndo tatun ña jacahnú ndo tsi yu. ⁵¹ Tsa nditsa catyí yu tyin nyivi tsa tyaá yahvi tsa caahán yu ña cua tsa tuhun tsihihí añima ñi —catyí ra Jesús tshin ra naha.

⁵² Tacan tan nacahan ra Israel can naha ra tan catyí ra naha:

—Vityin tsitó vaha ndi tyin yihí tatyí ña vaha tsi un. Tyin ra Abraham tan tandihí ca ra cuví ndusu yuhu Nyoo tsihí ra naha. Tan yooho catyí un tyin nyivi tyaá yahvi tsa caahán un ña cua cúu ñi. ⁵³ ¿A cahnu ca ra cuví yooho tan ñavin ca ra Abraham jutu yo? Maa ra tsihí ra tan tacan tucu ra cuví ndusu yuhu Nyoo. ¿Yóo ra cuví yooho cuñí maa un? —catyí ra naha tshin ra.

⁵⁴ Tan nacahan ra Jesús tan catyí ra:

—Tatun juvin ñi maa yu jacahnú tsi yu, nduve yahvi nyaá yacan. Maa tyin ra jacahnú tsi yu, juvin ra cuví Jutu yu. Tan juvin ra cuví ra tsa caahán nyooho tuhun tyin Nyoo ndo cuví tsi ra. ⁵⁵ Maa tyin ña nacotó ndo tsi ra. Tan yuhu, nacotó yu tsi ra. Tun tsatyin catyí yu tyin ña nacotó yu tsi ra, cuví yu iin ra vatya tumaa nyooho. Maa tyin yuhu nditsa tsa nacotó yu tsi ra, tan tyaá yahvi yu tsa caahán ra. ⁵⁶ Ra Abraham tsii tsaahnu yo sñi xaan cuñí ra tyin cua nyehe ra quivi cua quitsi yuhu nu ñuhu ñayivi. Nyehe ra quitsí yu tan sñi xaan cuñí ra —catyí ra Jesús tshin ra naha.

⁵⁷ Tacan tan catyí ra Israel can naha ra tshin ra Jesús:

—Ndi ñaha ca quita uvi xico utsi cuiya un, ¡tan catyí un tyin nyehe un tsi ra Abraham!

⁵⁸ Tan nacahan ra Jesús tan catyí ra:

—Tsa nditsa catyí yu tshin ndo tyin nda ndi cumañi ca coo ra Abraham tan tsa iyó maa yuhu —catyí ra Jesús tshin ra naha.

⁵⁹ Tacan tan quihñ ra naha yuu tyin cua cañi ra naha tsi ra Jesús. Maa tyin iin yaha ñi quihvi xeehe ra tan yahá ra mahñu ra naha tan quita ra tsitsi vehe ñuhu can cuahán ra.

9

Nu janduvahá ra Jesús tsi iin ra cuaa nda cacu ra

¹ Cuhva tsa yahá ra Jesús iin nu yahá ra, nyehe ra tsi iin ra cuaa nda cacu ra. ² Tan quitsahá tsicá tuhun ra tsicá tshin ra tsi ra:

—Maestro, ¿nacavi tyin cuaa ra ihya cacu ra? ¿A tsa cuenda cuatyí jutu ra tan sihi ra, o tsa cuenda cuatyí maa ra? —catyí ra naha tshin ra.

³ Tan nacahan ra Jesús tan catyí ra:

—Ñavin tsa cuenda cuatyí maa ra, tan ndi ñavin tsa cuenda cuatyí jutu ra tan sihi ra. Cuaa maa ra tyin tacan tan cuví janaha Nyoo tunyee iñi ra tsi nyivi tsa cuenda ra can. ⁴ Tsa tsinu cahñi, cuñí tsi tsa javaha yu tyiñu ra tsa jaquitsi tsi yu. Tyin tsa yatyin cuii cua cuaa tan ña cua cuví ca jaha tyiñu yo.

⁵ Tsa ndi nyii yu nu ñuhu ñayivi ihya, ñuhu jandunditsin [cuenda nyivi iyó] nu ñuhu ñayivi ihya cuví yu.

⁶ Tsa yahá tsa cahan ra Jesús tacan, tan tiví sii ra nu ñuhu. Tan jatyií ra luxu nyahyu tsihin sii ra tan tyaá ra tinuu ra cuaa can. ⁷ Tacan tan catyí ra tsihin ra cuaa can:

—Cuaahan cua nacatya nuu un nda tanque Siloé. —Sivi can cuñí tsi catyí: “Jacuhun Yu Tsi Un.”

Tacan tan ra cuaa can tsahan ra tsinacatyá ra nuu ra. Tan cuhva tsa tsaa nyico ra, tsa nyehé ra. ⁸ Tacan tan nyivi iyó yatyin yuvehe ra, tan nyivi tsa nyehé tsi ra tsa ndi cuaá ra catyí ñi:

—¿A ñavin ra ihya cuví ra tuhvá tsinyaá tsicán xuhun? —catyí ñi.

⁹ Tan yihí ñi catyí:

—Juvín ra.

Inga ñi catyí ñi:

—Ñavin ra cuví can, maa tyin tacan caá ra.

Maa tyin maa ra catyí ra:

—Juvín yu cuví —catyí ra.

¹⁰ Tacan tan quitsahá tsicá tuhun ñi tsi ra:

—¿Tan nácaa tyin cuví nyehé un vityin? —catyí ñi.

¹¹ Tan catyí ra:

—Ra tsa nañí Jesús, ra ican jatyií nyahyu tan tyaá ra tinuu yu tan catyí ra tsihin yu: “Cuaahan cua nacatya nuu un nda tanque Siloé.” Tacan tan tsahan yu. Tan tsa yahá nacatya yu nuu yu tan nanyehé yu —catyí ra tsihin ñi.

¹² Tacan tan quitsahá tsicá tuhun ñi tsi ra:

—¿Tan numaa nyii ra can vityin?

Tan catyí ra tsihin ñi:

—Ña tsitó yu —catyí ra.

Nu janahma ra cuví fariseo naha ra tsi ra cuaa tsa nduvaha

¹³ Tacan tan tsindaca ñi tsi ra tsa nduvaha can nuu ra cuví fariseo naha ra.

¹⁴ Tyin quivi tsa jatyií ra Jesús nyahyu tan janduvaha ra tsi ra can, cuví tsi quivi quitatú nyivi. ¹⁵ Yacan cuenda ra cuví fariseo naha ra tsicá tuhun nyico ra naha tsi ra nácaa tyin nyehé ra. Tan catyí ra tsihin ra naha:

—Tyaá ra nyahyu tinuu yu, tan nacatya nuu yu tan vityin nditsin nyehé yu —catyí ra tsihin ra naha.

¹⁶ Tacan tan catyí juhva ra fariseo naha ra:

—Ra tsa javaha yacan ñavin cuenda Nyoo cuví ra, tyin ña tyaá yahvi ra quivi quitatú yo —catyí ra naha.

Maa tyin catyí inga ra naha

—¿Nacaa tsa cuví javaha ra tsa iyo ihya tatun ra iyó cuatyí cuví ra? —catyí ra naha.

Tan siin siin tsa caahán ra naha. Tan natahvi sava ra naha. ¹⁷ Tan tsica tuhun nyico ra naha tsi ra nduvaha can inga tsaha, tan catyí ra naha tsihin ra:

—¿Tan yooho, náa catyí un tuhun ra tsa janduvahā tinuu un? —catyí ra naha.

Tan nacahan ra tan catyí ra:

—Yuhu catyí yu tyin ra cuví ndusu yuhu Nyoo cuví ra —catyí ra.

¹⁸ Maa tyin ra cuví ityi nuu tsihin nyívi Israel ña cuñi ra naha tsinu iñi ra naha tsa cuaa ra can tan nanyehē ra. Nda cuanda canā ra naha tsi jutu ra tan tsi sihi ra. ¹⁹ Tan tsicā tuhun ra naha tsi ñi, tan catyí ra naha:

—¿A ra ihya cuví sehe ndo tsa catyí ndo tyin cuaa ra cacū ra? ¿Nacaa tsa cuví nyehé ra vityin? —catyí ra naha.

²⁰ Nacahan jutu ra tan sihi ra tan catyí ñi:

—Tsitó ndi tyin ra ihya cuví sehe ndi. Tan cuaa ra quívi cacū ra. ²¹ Maa tyin ña tsitó ndi nácaa tsa cuví nyehé ra vityin. Tan ndi ña tsitó ndi yóo janduvahā tinuu ra. Ndāca tuhun maa ndo tsi ra. Tsa iyó tucu maa cuiya ra. Tan cuví nacatyí tuhun maa ra tsihin ndo —catyí ñi tsihin ra naha.

²² Jutu ra tan sihi ra caahán ñi tacan tsa cuenda tyin yuuhví ñi tsi ra cuví ityi nuu tsihin nyívi Israel naha ra, tyin tsa natuhun tahan ra naha tyin cua tava cuii ra naha tsi nyívi vehe ñuhu, tun cahan ñi tyin ra Jesús cuví ra Cristo, ra tsa jaquitsi Nyoo. ²³ Yacan cuenda catyí ñi: “Ndāca tuhun ndo tsi maa ra. Ra tsa ñihi cuví ra.”

²⁴ Tacan tan canā nyico ra naha tsi ra tsa nduvahā can inga tsaha. Tan catyí ra naha tsihin ra:

—Nda nuu Nyoo cahan tsa nditsa tsihin ndi. Tyin nyuhu tsitó ndi tyin ra ican, ra iyó cuatyí cuví ra —catyí ra naha.

²⁵ Tacan tan nacahan ra tsa nduvahā can tan catyí ra:

—Yuhu ña tsitó yu tatun ra iyó cuatyí cuví ra, a ñavin. Intuhun ñi tsa tsitó yu tyin yuhu ra cuaa cuví yu, maa tyin vityin nditsin nyehé yu —catyí ra.

²⁶ Tan tsicā tuhun nyico ra naha tsi ra inga tsaha tan catyí ra naha:

—¿Náa icā ra tsihin un? ¿Nacaa icā ra tan nanyehē un? —catyí ra naha tsihin ra.

²⁷ Tan catyí ra:

—Tsa cahan yu tsihin ndo, tan ña tyaá yahvi ndo tsi yu. ¿Náa cuenda cuñi ndo tsa cahan yu inga tsaha? ¿A cuñi ndihi ndo cunycun ndo tsi ra can?

²⁸ Tacan tan nduxaḡan ra naha tsi ra, tan catyí ra naha:

—Yooho tsa yihí un cuenda ra, maa tyin nyuhu cuenda ra Moisés ra tsa tsicoḡ tsa naha yihí ndi. ²⁹ Nyuhu tsitó ndi tyin Nyoo cahan tsihin ra Moisés tahan tsa naha. Maa tyin ra can, ndi ña tsitó ndi numaa queḡ ra —catyí ra naha.

³⁰ Tacan tan nacahan ra tsa nduvahā can tan catyí ra:

—¡Naa tsa iyo cahnú cuví tsehe! Nyooho ña tsitó ndo numaa queḡ ra, tan jananyehē ra tsi yu. ³¹ Tsitó vaha yo tyin Nyoo ña tyaá soho ra nu caahán ra iyó cuatyí. Maa tyin ra jacahnú tsi ra tan icā ra cuhva cuñi ra, tyaá soho Nyoo tsa caahán ra. ³² Ndi iin tsaha tan ñaha ca cuñi yo tatun iyó iin ra jananyehē tsi iin ra cuaa nda cacū ra. ³³ Tun tsatyin ra ihya tan ñavin cuenda Nyoo vatsí ra, nduve tsa cuví javaha ra —catyí ra tsihin ra naha.

³⁴ Tacan tan catyí ra naha tsihin ra:

—Yooho ra iyó cuatyí cuví un nda cacū un. ¿Tan cuñi un jacuaha un tsi nyuhu? —catyí ra naha.

Tan tavaḡ cuii ra naha tsi ra vehe ñuhu.

Nyívi tsa nduve tuhun Nyoo iyó añima tumaa tsa cuaa ñi

³⁵ Tsitó ra Jesús tyin tavā ra naha tsi ra tsa janduvahā ra vehe ñuhu. Tan tsa ñihj tahan ra tsihin ra tan catyí ra tsihin ra:

—¿A tsinú iñi yooho tsa caahán Rayi tsa quee nda gloria? —catyí ra tsihin ra.

³⁶ Tan nacahan ra tan catyí ra:

—Catyí tuhun tsihin yu, taa, yóo ra cuví ra tyin tsinú iñi yu tsi ra —catyí ra tsihin ra.

³⁷ Tan catyí ra Jesús:

—Tsa nyehe un tsi ra. Tan juvin ra natuhún tsihin un —catyí ra tsihin ra.

³⁸ Tacan tan tsicuiñj tsi ra tsaha ra Jesús tan catyí ra tsihin ra:

—Tsinú iñi yu tsi un, Jutu Mañi yu —catyí ra tsihin ra Jesús.

³⁹ Tan catyí ra Jesús:

—Yuhu vatsí yu tyin catyí tuhun yu tsa iyó ñima nyivi iyó nu ñuhu ñayivi ihya. Tyin nyivi cuaa, ñi ña tsitó tuhun Nyoo cua nanyehe ñi tyin coo tuhun Nyoo ñima ñi. Tan nyivi cuñi tyin nditsin nyehe ñi, catyí ñi tyin tsitó ñi tuhun Nyoo, coto ñi tyin cuaa ñi tyin ña tsinú iñi ñi tsi yu —catyí ra Jesús.

⁴⁰ Tacan tan juhva ra fariseo tsa nyecú tsihin ra Jesús tsiñj ra naha tsa caahán ra, tan catyí ra naha tsihin ra:

—¿A cuaa ndihi tucu nyuhu? —catyí ra naha.

⁴¹ Tacan tan catyí ra Jesús tsihin ra naha:

—Tun tsatyn cuaa ndo cua coto ndo tyin tsiñi ñuhu tuhun Nyoo tsi ndo, tan ña cua coo cuatyí ndo. Maa tyin catyí ndo tyin nyehe ndo tan tsitó ndo, yacan cuenda ndoó cuatyí ndo siqui ndo —catyí ra tsihin ra naha.

10

Mbee ticatyí jana Nyoo cuví nyivi yihí cuendará, tan tsitó ñi tsi ra tsa jaquitsí Nyoo tyin jahá cuenda ra tsi ñi

¹ Caahán nyico ra Jesús tan catyí ra:

—Tsa nditsa catyí yu tsihin ndo, tatun iin ra cua quihvi tsitsi cora mbee ticatyí, tan ñavin yuhu cora quihvi ra, ra ican cuví ñasuhu. ² Maa tyin ra tsa quihvi ityi yuhu cora, ra jahá cuenda mbee can cuví ra. ³ Ra nyí yuhu cora can nuña ra tyin quihvi ra jahá cuenda mbee can. Tan mbee can nacotó ti naha ti ndusu ra. Intuhun intuhun ti tan iyó sivi ti jahá ra, caná ra tsi ti tan tavá ra tsi ti ityi tsata cora. ⁴ Tsa yahā tavā ra tsi ti, tan cuahán ra ityi nuu tan nyicún ti naha ti tsi ra, tyin nacotó ti ndusu ra. ⁵ Maa tyin tatun nyivi tsa ña nacotó ti ndusu, tsinú ti nuu ñi tan ña cuahán ti cuanyicún ti tsi ñi.

⁶ Tyehen cahān ra Jesús tsihin nyivi. Maa tyin maa ñi ña cutuñi iñi ñi náa tuhun caahán ra tsa caahán ra tacan.

Ra Jesús cuví ra jahá cuenda vaha mbee ticatyí

⁷ Tacan tan catyí ra Jesús tsihin nyivi inga tsaha:

—Tsa nditsa catyí yu tsihin ndo, yuhu cuví tumaa iin yuhu cora nu quihvi nyivi yihí cuenda yu tan cuví ñi tumaa mbee ticatyí jana yu. ⁸ Tandihí ra tsa quitsí tsa ndi cumañi quitsi yu, ra suhu cuví ra naha. Maa tyin mbee jana yu ña tyaā yahvi ti naha ti tsa cahān ra naha. ⁹ Yuhu cuví yuvehe gloria. Nyivi tsa cua quihvi yuvehe can, cua cacu ñi tan ña cua cuhun ca ñi anyaya. Tan cuví ñi tumaa mbee tsa quihvi tan quitá tsitsi cora can. Tan ñihí ti cuhu tsatsi ti.

10 'Iin ra ñasuhu, vatsí ra, vatsí suhu ra, vatsí cahñi ra, vatsí jatívi ra. Maa tyin yuhu vatsí yu tyin coo vaha ndo ñayívi nyitó tsa ña cua naa maa. 11 Yuhu cuví ra vaha jahá cuenda mbee. Tyin ra jahá cuenda mbee tsahá ra ñayívi ra tsa cuenda mbee can. 12 Maa tyin ra cuví musu, tatun nyehé ra vatsí lobo tsa cuví quití xaan, nacoó ra mbee jana tsitoho ra. Tan tsinú ra. Tyin ñavin jana maa ra cuví tsi ti naha ti. Tacan tan cua tñn quiti xaan can tsi mbee can. Tan jacunu ti tsi mbee can ityi can tan ityi ihya. 13 Musu can tsinú ra tyin jahá tyiñu ra tsa cuenda xuhun ñi. Tan ña jahá cuenda vaha ra tsi mbee can, tyin ñavin jana ra cuví tsi ti naha ti.

14 'Yuhu cuví ra jahá cuenda vaha mbee jana yu. Tan nacotó yu tsi ti naha ti. Tan nacotó tucu maa ti naha ti tsi yu, 15 tumaa tsa nacotó Jutu yu tsi yu, tan yuhu nacotó yu tsi ra. Yuhu tsahá yu ñayívi yu cuenda mbee jana yu. 16 Iyó tucu inga mbee jana yu tsa ña yihí tsitsi cora ihya. Cuñí tsi tsa cahun yu cunaquihin yu tsi ti naha ti. Tan cua tyaa yahvi ti tsi yu. Tan iin ñi nu cua quihí tandihí ti. Tan cua coo intuhun ñi ra cua jaha cuenda tsi ti naha ti.

17 'Jutu yu cuñí ra tsi yu tyin tsahá yu ñayívi yu tsacatyí nyivi. Maa tyin yaha can, tan cua nacuhva nyico ra ñayívi yu. 18 Yoñi cuví quihin nyaá ñayívi yu, tyin tsa iyó iñi maa yu tan tsahá yu can. Iyó ndatu tsi yu tsa cuhva yu ñayívi yu tan cúu yu, tan iyó tucu ndatu tsi yu tsa naquihin nyico yu can inga tsaha. Yacan cuví tyiñu tsa tyaa Jutu yu tsi yu —catyí ra Jesús.

19 Tsa tsiñj nyico ra tsa cuví ityi nuu tsihin nyivi Israel naha ra tsa caahán ra Jesús tacan, natahvj sava nyico ra naha inga tsaha. 20 Tan cuaha xaan ra naha catyí:

—¿Nacuenda tyaa yahvi ndo tsi ra can? Tan tatyí ña vaha yihí tsi ra, sana jiñi ra —catyí ra naha.

21 Tan inga tucu ra naha catyí:

—Yoñi nyivi yihí tatyí ña vaha tan cuví cahan ñi tacan. ¿A cuví jananyehe tatyí ña vaha can tsi iin ra cuaa? —catyí ra naha.

Nu ña cuñí ra cuví ityi nuu tsihin nyivi Israel tyaa yahvi ra naha tsi ra Jesús

22 Yoo vitsin cuví tan nyivi iyó ñuu Jerusalén jacahnú ñi vico tsa cuenda nu natsinú cuiya nu nacuhva cuenda ñi vehe ñuhu cahnú. 23 Tan ra Jesús tsicá nuu ra vehe ñuhu can ityi nu nañi corredor ra Salomón. 24 Tan tsinu nduvi ra cuví ityi nuu tsihin nyivi Israel naha ra tsi ra Jesús. Tan quitsaha tsicá tuhun ra naha tsi ra:

—¿Ama cua cahan catsi un tsihin ndi tatun juven un cuví ra Cristo ra tsa jaquitsi Nyoo? Cahan catsi tsihin ndi vityin ihya —catyí ra naha.

25 Tan catyí ra Jesús:

—Tsa yaha cahan yu tsihin ndo, tan ña tsinu iñi ndo tsa cahan yu. Tyiñu javahá yu nuu Jutu yu yacan cuví tsa ndaa tsa cuenda yu. 26 Maa tyin nyooho ña tsinú iñi ndo tsi yu tyin ñavin mbee jana yu cuví tsi ndo. Tumaa cuhva tsa cahan jihna yu tsihin ndo. 27 Mbee jana yu nacotó ti naha ti ndusu yu, tan yuhu nacotó yu tsi ti naha ti. Tan nyicún ti tsi yu. 28 Yuhu tsahá yu ñayívi nyito tsa ña cua naa maa coo ti. Tan ña cua cunaa ti. Tan ndi yoñi cuví quihin nyaá tsi ti naha ti tsitsi ndaha yu. 29 Maa Jutu yu tsaha tsi ti naha ti tsi yu. Tan cahnú ca cuví maa ra tan ñavin ca tandihí nyivi. Tan yoñi cuví quihin nyaá tsi ti tsitsi ndaha ra. 30 Yuhu tan Nyoo Jutu yu, iin ñi cuví ndi —catyí ra Jesús.

31 Tacan tan ra cuví ityi nuu tsihin nyivi Israel can quihin nyico ra naha yu tyin cañi ra naha tsi ra. 32 Tan catyí ra Jesús tsihin ra naha:

—Cuaha xaan tsa vaha javahá yu nuu ndo tsihin tunyee iñi Jutu yu. ¿Tan ndáa tsa ña taahán iñi ndo tyin cua cañi ndo tsi yu tsihin yuu? —catyí ra Jesús tsihin ra naha.

³³ Tan catyí ra cuví ityi nuu tsihin nyívi Israel can naha ra:

—Ñavin tsa cuenda tsa vaha javahá un cua cañi ndi tsi un tsihin yuu, cua cañi ndi tsi un tsa cuenda tyin tsicoo cuatyí un nuu Nyoo tsihin tsa caahán un. Tyin iin rayi ñi cuví un, tan jahá un tumaa tsa Nyoo cuví un —catyí ra naha tsihin ra.

³⁴ Tacan tan catyí ra Jesús tsihin ra naha:

—Nu tutu Nyoo nyaá tyin Nyoo catyí ra: “Nyooho nyoo cuví ndo”, catyí Nyoo. ³⁵ Tsitó yo tyin tsa caahán tuhun Nyoo, ña cua cuví catyí yo tyin ña nditsa. Tan Nyoo jacunañi ra nyoo tsi nyívi naquihín tsa caahán ra. ³⁶ Tatun maa Nyoo nacatsí tsi yuhu tan jaquitsí ra tsi yu nu ñuhu ñayivi ihya ¿nácaa tsa catyí nyooho tyin iyó cuatyí yu nuu Nyoo tsa caahán yu tyin Sehe Nyoo cuví tsi yu? ³⁷ Tatun ña javahá yu tsa javahá Jutu yu, ña tsinu iñi ndo tsi yu. ³⁸ Maa tyin tatun javahá yu, vasu ña cua tsinu iñi ndo tsi yu, maa tyin tsinu iñi ndo tyiñu javahá yu. Tacan tan coto catsi ndo tyin Nyoo Jutu yu iin ñi cuví ra tsihin yu. Tan iin ñi cuví yu tsihin Nyoo Jutu yu —catyí ra Jesús.

³⁹ Inga nyico tsaha cuñi ra naha tyihi ra naha tsi ra vehe caa, maa tyin ra Jesús cuahán ñi ra.

⁴⁰ Tacan tan cuanuhu ra ityi nu caná ñicanyii inga tsiyo yutya cahnu Jordán nu jacoondutya ra Juan tsa jihna, tan ndoo ra ican. ⁴¹ Cuaha nyívi tsahan tsinyehe tsi ra, tan catyí ñi:

—Nditsa, vasu ndi intuhun tsa iyo ña javahá ra Juan, maa tyin tandihi tsa cahán ra cuenda ra ihya tan nditsa —catyí ñi.

⁴² Tan cuaha xaan nyívi tsa iyó ityi can tsinu iñi tsa caahán ra Jesús.

11

Nu tsihi ra Lázaro

¹ Ñuu Betania tsicoo iin ra cuuhvi tsa nañi Lázaro. Tan ñuu can iyó ña María tsihin ña Marta tahan ña. ² Ña María, cuhva ra Lázaro, juvin ña cuví ñaha tsa tyoso ndutya tami tsaha Jutu Mañi yo, tan jana ityi ña tsaha ra tsihin ixi jiñi ña. ³ Tacan tan nduvi taahan ñi, ña María tan ña tahan ña, jacoto ñi tsi ra Jesús tan catyí ñi:

—Ra vaha iñi tsi un, cuuhví xaan ra.

⁴ Tsa tsiñi ra Jesús yacan tan catyí ra:

—Cuehe can ña cua cahñi can tsi ra. Cuuhví ra tyin quívi nduvaha ra cua nyehe nyívi tyin cahnu xaan cuví Nyoo tan tacan tucu Sehe ra —catyí ra Jesús.

⁵ Cuñi xaan ra Jesús tsi ña Marta tan ña tahan ña, tan ra Lázaro cuhva ñi.

⁶ Maa tyin quívi tsa tsiñi ra tyin cuuhví ra Lázaro, ndoo ra uvi quívi ca nu nyíi ra. ⁷ Tacan tan catyí ra tsihin ra tsicá tsihin ra:

—Cohon nyico ndo inga tsaha nda Judea —catyí ra.

⁸ Tacan tan ra tsicá tsihin ra catyí ra naha tsihin ra:

—Maestro, ñaha ca ndunaha tsa cuñi ra cuví ityi nuu tsihin nyívi Israel naha ra cahñi ra naha tsi un tsihin yuu. Tan vityin, cuñi nyico un cuhun un inga tsaha ¿Nacuenda?

⁹ Tan catyí ra Jesús:

—¿A ñavin utsi uvi hora iyó tsa iin quivi? Tyin tatun tsinu cahñi tsicá nuu iin ra, ña cua nduva ra tyin nditsin nyehé ra ñuhü tsa jandunditsín nu ñuhu ñayivi ihya. ¹⁰ Maa tyin tatun tsacuaa tsicá nuu ra, cuvi nduva ihñi ra tyin nduve ñuhü Nyoo jandunditsín nu cuahan ra.

¹¹ Tacan tan quitsahā catyí nyico ra Jesús:

—Ra vaha iñi tsi yo, ra Lázaro, quixí ra. Maa tyin cuhun yu jandoto yu tsi ra —catyí ra tsihin ra naha.

¹² Tacan tan catyí nyico ra tsicá tsihin ra:

—Taa, tatun quixí ra, cuñi tsi catyí can tyin cua nduvaha ra —catyí ra naha.

¹³ Maa tyin ra Jesús cuñi ra catyí ra tyin ra Lázaro tsa tsihi ra. Tan ra tsicá tsihin ra, cuñi maa ra naha tyin nditsa tsa quixí ra. ¹⁴ Tacan tan cahān catsi ra Jesús tsihin ra naha:

—Ra Lázaro tsa tsihi ra. ¹⁵ Tan cusí iñi yu tyin yoñi yu nyii ndacan. Tyin tacan vaha ca tsa cuenda nyooho na tsinu iñi ndo tsa caahán yu. Cōhon ndo cunyehe yo tsi ra —catyí ra Jesús tsihin ra naha.

¹⁶ Tacan tan ra Tomás, tsa jacunañi ra naha “tinihi”, catyí ra tsihin inga ra tsicá tsihin ra Jesús:

—Cōhon ndihi yo tyin cúu yo iin caa ñi tsihin ra —catyí ra.

Ra Jesús cuvi ra janandotó tsi yo tan tsahá ra ñayivi nyito coo yo

¹⁷ Tsa tsaā ra Jesús Betania, ñihí tuhun ra tyin tsa cumi quivi nyii ra Lázaro tsitsi ñuhú. ¹⁸ Ñuu Betania can canyíi tsi yatyin ñi nu canyíi ñuu Jerusalén, tumaa iin cuhva tsa uvi kilómetro sasava. ¹⁹ Tan cuaha ra cuvi ityi nuu tsihin nyivi Israel cuahan cua nyehé nu nyii ña Marta tan ña María cua jatyinyee ra naha tsi ñi tyin tsihi cuhva ñi. ²⁰ Tan ñihí tuhun ña Marta tyin tsa cua tsaā ra Jesús. Tan cuahán ña cua jatahán ña tsi ra. Maa tyin ña María ndoo ña yuvehe.

²¹ Tan catyí ña Marta tsihin ra Jesús:

—Jutu mañi yu, tun tsatyin ihya nyii maa un, ña cua cúu cuhva yu. ²² Maa tyin yuhu tsitó yu tyin Nyoo cua javaha ra tandihi tsa ndacan un tsi ra —catyí ña tsihin ra.

²³ Tan catyí ra Jesús tsihin ña:

—Cuhva un cua nandoto ra.

²⁴ Tan catyí ña Marta:

—Nditsa, tsitó yu tyin cua nandoto ra quivi nandoto ndiyi nu cua cundihi quivi —catyí ña.

²⁵ Tacan tan catyí ra Jesús tsihin ña:

—Yuhu cuvi ra janandotó ndiyi. Tan tsahá yu tsa coo nyitó nyivi. Nyivi tsinú iñi tsa caahán yu, vasu tsa tsihi ñi maa tyin coo nyico ñi. ²⁶ Tan tandihi ñi nyitó tan tsinú iñi ñi tsi yu, ña cua cúu ñi. ¿A tsinú iñi un tsa caahán yu ihya? —catyí ra tsihin ña.

²⁷ Tan catyí ña:

—Tsinú iñi yu, Jutu Mañi yu, tyin yooho cuvi ra Cristo Sehe Nyoo, ra tsa nyaá tsa quitsi nu ñuhu ñayivi ihya —catyí ña.

Nu tsacu ra Jesús nu ñaña ra Lázaro

²⁸ Tsa yahā tsa cahān ña Marta tacan, tan tsahān ña tsiquihñi ña tsi ña María tahañ ña, tan xeehe ñi cahān ña tsihin ña:

—Tsa tsaā Ra Maestro ihya. Tan caná ra tsi un —catyí ña.

²⁹ Tsa tsiñi ña María tsa caahán ña, numi xaan ña nduvita ña, tan cuahán ña nu nyii ra Jesús. ³⁰ Tan ñaha ca quihvi ra Jesús tsitsi ñuu hora can, ndi nyii ra

nu nañihĩ ña Marta tsi ra. ³¹ Tan nda yuvehe ña María, yucú ra cuví ityi nuu tsihin nyívi Israel jatyinyeé ra naha tsi ñi. Tan nyehe ra naha tyin numi quita ña. Tan cuñí maa ra naha tyin cuahán ña nu ñaña cua vacu ña. Tan cuahán ndihĩ ra naha tsata ña.

³² Tan cuhva tsa tsaq ña María nu nyíi ra Jesús tsicuiñĩ tsiti ña tsaha ra, tan catyí ña:

—Jutu Mañi yu, tun tsatyin nyíi un ihya, ña tsihi ra cuhva yu —catyí ña.

³³ Tsa nyehe ra Jesús tyin tsacú ña María tan tsacú ra Israel tsa cuahan tsihin ña, nducuihya xaan cuñí ra. ³⁴ Tan tsicq tuhun ra tsi ñi:

—¿Nu maa tinyi ndo tsi ra? —catyí ra.

Tan catyí ñi:

—Jutu Mañi yu, çohon tan nyehe un —catyí ñi tsihin ra.

³⁵ Tan tsacú ra Jesús.

³⁶ Tacan tan catyí ra Israel can naha ra:

—Nyehe ndo tyin yahq xaan cuñi ra tsi ra —catyí ra naha.

³⁷ Maa tyin catyí juhva ra naha:

—Ra ihya jananyehé ra tsi ra cuaa. ¿Nacuvi tyin ña cuví ica ra iin cuhva tan ña cúu ra Lázaro ihya? —catyí ra naha.

Nu janandoto ra Jesús tsi ra Lázaro

³⁸ Nducuihya xaan cuñi nyico ra Jesús inga tsaha tan natuhva ra nu ñaña can. Tyin tsitsi yavi yuu cuví can. Tan ndasí iin yuu yuhu can. ³⁹ Tan catyí ra Jesús:

—Jatsiyo ndo yuu can —catyí ra.

Tan ña Marta, cuhva ndiyi can, catyí ña:

—Maa tyin tsa caná xico iñi, Jutu Mañi yu, tyin tsa cumi quívi tsa nyíi ra ican —catyí ña.

⁴⁰ Maa tyin catyí ra Jesús tsihin ña:

—¿A ña caahán yu tsihin un tyin tatun tsinú iñi un, cua nyehe un tsa cahnu cuví Nyoo? —catyí ra tsihin ña.

⁴¹ Tacan tan jatsiyo ra naha yuu can. Tan nanyehé ndaa ra Jesús ityi andivi, tan catyí ra:

—Tyatya, Jutu Mañi yu, tyahvi nyoo tsi un tyin tsiñi un tsa caahán yu.

⁴² Yuhu tsitó yu tyin maa ñi maa tsiñi un tsa caahán yu. Maa tyin tyehen caahán yu tsa cuenda tsa vaha tsi nyívi nyecú ihya, na tsinu iñi ñi tyin maa un jaquitsj tsi yu —catyí ra Jesús tsihin Nyoo.

⁴³ Tsa yahq tsa cahán ra tacan, canq tsa ra, tan catyí ra:

—¡Lázaro, quita nu nyíi un juvin!

⁴⁴ Tan quita ra tsa tsihi can, cavá nuu iin jahma tsi ra, tan nuuhñi ndaha ra tan tsaha ra tsihin jahma. Tan nuuhñi nuu ra tsihin iin jahma tumaa javahá nyívi Israel tsihin ndiyi. Tan catyí ra Jesús tsihin nyívi nyecú ican:

—Ndatsi ndo tsi ra. Tan jaña ndo tsi ra na cuhun ra —catyí ra Jesús tsihin ñi.

Nu nducú cahñi ra naha tsi ra Jesús

(Mt. 26.1-5; Mr. 14.1-2; Lc. 22.1-2)

⁴⁵ Tan cuaha xaan ra cuví ityi nuu tsihin nyívi Israel tsa tsahan tsihin ña María quitsahq tsinú iñi ra naha tsa nyehe ra naha tsa javahá ra Jesús. ⁴⁶ Maa tyin juhva ra naha tsahan ra naha tsijacoto ra naha tsi ra fariseo naha ra tsa javahá ra Jesús. ⁴⁷ Tacan tan ra fariseo can naha ra tan ra cuví ityi nuu tsihin

ra jutu naha ra jatitahan ra naha tsi ra tuhvá ndu iin naha ra tan catyí ra naha:

—¿Nacaa cua javaha yo? Tyin cuaha xaan tsa iyo javahá ra can. ⁴⁸ Tatun cuhva yo tsa javaha ca ra tacan, tandihí nyívi tan cua tsinu iñi ñi tsi ra. Tan ra cumí tyiñu nda ñuu Roma cua quitsi ra naha tan cua caní ra naha vehe ñuhu yo tan ñuu yo —catyí ra naha.

⁴⁹ Maa tyin ra Caifás ra tsahnu tsa cuví ityi nuu tshin ra jutu naha ra cuiya can, cahān ra tan catyí ra tshin ra naha:

—Nyooho nduve maa náa tsitó ndo. ⁵⁰ Ndi ña cutuñí iñi ndo tyin vaha ca tsa cúu intuhun ñi rayíi tsa cuenda tandihí nyívi ñuu, tan ñavin ca tsa cúu tandihí yo —catyí ra Caifás.

⁵¹ Ra Caifás can ñavin tsa cuñí maa ra tan caahán ra, tyin ra cuví ityi nuu tshin tandihí jutu cuví ra cuiya can, yacan cuenda maa Nyoo jacahan tsi ra nu catyí ra tyin ra Jesús cua cúu ra tsa cuenda tandihí nyívi ñuu Israel. ⁵² Tan ñavin tsa cuenda maa ñi maa nyívi can, maa tyin cua jandu iin ra tsi tandihí nyívi cuví sehe Nyoo tsa iyó tandihí ca ñuu. ⁵³ Tacan tan nda quívi can tan ra cuví ityi nuu tshin nyívi Israel can naha ra, nducú ra naha cuhva cahñi ra naha tsi ra Jesús.

⁵⁴ Yacan cuenda ña tsicá nuu nditsin ca ra Jesús nu iyó nyívi Israel. Quee ra Judea can. Tan cuahán ra iin ñuu tsa nañí Efraín tsa canyíi yatyin ñi nu tsiqui, nu cuví ñuhu ityi. Tan ndoó ra ican tshin ra tsicá tshin ra.

⁵⁵ Ña cuaha ca quívi tan tahan tsi vico cuenda nyívi Israel, vico tsa nañí pascua. Tan cuaha xaan nyívi quee ñi ñuu ñi tan cuahán ñi nda ñuu Jerusalén cua javaha ñi tsa tuhvá maa ñi javahá tsa janduvahá ñi tsi ñi nuu Nyoo tsa ndi cumañi ca tahan tsi quívi vico can. ⁵⁶ Nanducú ñi tsi ra Jesús. Tan cuhva tsa nyecú ñi tsitsi vehe ñuhu cahnu can tan tsicá tuhun tahan ñi, tan catyí ñi:

—¿Nacaa cuñí nyooho? ¿A cua quitsi ra can vico ihya, o ña cua quitsi ra? —catyí ñi.

⁵⁷ Tan ra cuví fariseo tan ra cuví ityi nuu tshin jutu, catyí ra naha tyin tatun ndáa nyívi tsitó nu nyíi ra Jesús, na catyí tuhun ñi. Tyin cuquihin ra naha tsi ra tyin cunyi ra vehe caa.

12

Nu tyosó ña María ndutya tami tsaha ra Jesús (Mt. 26.6-13; Mr. 14.3-9)

¹ Cumañi iñu quívi ca tsa tahan tsi vico pascua, tan tsaq ra Jesús ñuu Betania nu iyó ra Lázaro, ra tsa janandoto ra. ² Ican javahā ñi tsa cuxiñí ra Jesús. Ña Marta tyihí ña coho nu mesa. Tan tsinyaā ra Jesús nu mesa. Tan nyaá ndihí tucu ra Lázaro tshin ra. ³ Tacan tan quihin ña María tumaa sava litru ndutya tami tsa tsinú tshin maa ñi maa yucu tsa nañí nardo, iin tsa yahvi xaan nyaá. Tan tyiso ña ndutya tami can tsaha ra Jesús. Yahā can tan jana ityi ña tsaha ra tshin ixi jiñi ña. Nanií cahnu maa tsitsi vehe can tsitu xico ndutya tami can. ⁴ Tan ican nyíi tucu ra Judas Iscariote, sehe ra Simón. Cuví ra iin ra tsicá tshin ra Jesús. Tan juvin ñi maa ra cuví ra tsa cua xico tsi ra Jesús tsi nu xaan iñi tsi ra nahnu. Tan quitsahā catyí ra Judas can tshin ñi can:

⁵ —¿Nacuenta ña xico ndo ndutya tami ihya tsi nyívi, tan cuhva ñi cuenda mil tsi ndo tsa cuenda can, (uñi cientu denario) tan jatyinyee ndo tsi nyívi ndaahvi? —catyí ra.

⁶ Caahán ra Judas yacan tyin ra ñasuhu cuví ra, ñavin tsa cundaahví iñi ra nyehé ra tsi nyívi ndaahvi. Tyin maa ra yihí ndaha yitin nu yihí xuhun ra naha, tan tuhvá ra suhu tsa tyihí ra naha tsitsi yitin can. ⁷ Tacan tan catyí ra Jesús tshin ra:

—Jaña tsi ña, tyin ñaha ihya javahá ña tyehen tsa cuenda tsa cua quihvi cuñu ñuhu yu tsitsi ñuhu. ⁸ Nyívi ndaahvi tacan ñi nyecú maa ñi tshin ndo, maa tyin yuhu ña cua cunyaa ca yu tshin ndo tacan —catyí ra Jesús tshin ra Judas.

Nu nducú cahñi ndihi ra Israel naha ra tsi ra Lázaro

⁹ Cuaha xaan nyívi Israel ñihí tuhun ñi tyin ra Jesús nyíi ra Betania, tan tsahan ñi ican. Ñavin intuhun ñi ra Jesús cuñí ñi nyehé ñi tyin cuñí ndihi tucu ñi nyehé ñi tsi ra Lázaro, ra tsa janandoto ra Jesús. ¹⁰ Tacan tan ra cuví ityi nuu tshin jutu natuhun tahan ra naha tyin cua cahñi ndihi ra naha tsi ra Lázaro. ¹¹ Tyin tsa cuenda ra tan cuaha xaan nyívi Israel quitá tsiyo ñi tan quitsahá tsinú iñi ñi tsi ra Jesús.

*Nu quihvi ra Jesús ñuu Jerusalén
(Mt. 21.1-11; Mr. 11.1-11; Lc. 19.28-40)*

¹² Cuaha xaan nyívi tsaá ñi ñuu Jerusalén tsa cuví vico pascua. Tan tsa inga quívi tsito ñi tyin ra Jesús cua tsaá ra ñuu can. ¹³ Tacan tan tsahnyá ñi ndaha ndicaha tan cuahán ñi cua jatahan ñi tsi ra Jesús. Tan caná tsaá ñi, tan catyí ñi:

—¡Cahnu xaan cuví Nyoo! ¡Nasoco xaan Nyoo tsi ra vatsí ihya tshin tunyee iñi Nyoo! ¡Nasoco xaan Nyoo tsi Rey cuenda yo nyívi Israel! —catyí ñi, caná tsaá ñi.

¹⁴ Tan ñihí ra Jesús iin burru tan tsicoso ra tsi ti tumaa catyí maa nu tutu Nyoo tyehen:

¹⁵ Ña nayuhvi ndo nyívi ñuu Sión
Nyehé ndo, vatsí Rey ndo.

Yosó ra iin burru —catyí tsi nu tutu Nyoo.

¹⁶ Quívi can ra tsicá tshin ra Jesús, ña cutuñí iñi ra naha tsa nyaá nu tutu Nyoo. Maa tyin tsa yahá cuanuhu ra Jesús nda gloria, nducuhun iñi ra naha tyin tandihí yacan nyaá can nu tutu Nyoo tyin tacan cua tahan ra. Tan tacan tsa cuii tahan ra.

¹⁷ Nyívi tsa nyehé quívi tsa caná ra Jesús tsi ra Lázaro tsitsi ñaña, quívi janandoto ra tsi ra, nacatyí tuhun ñi tsa nyehé ñi. ¹⁸ Yacan cuenda cuaha xaan nyívi tsijatahan tsi ra Jesús, tyin tsito ñi tsa iyo tsa javahá ra. ¹⁹ Tacan tan ra cuví fariseo catyí ra naha natuhun tahan ra naha:

—Tsa nyehé maa ndo tyin nduve maa náa cuví javahá yo, tyin tandihí nyívi tan cuahán ñi cuanyicún ñi tsi ra —catyí ra naha.

Nu nanducú juhva ra tsa quee Grecia tsi ra Jesús

²⁰ Yucú tucu juhva ra Grecia mahñu nyívi tsa tsahan tsijacahnu vico ñuu Jerusalén. ²¹ Tacan tan natuhvá ra Grecia can naha ra nu nyaá ra Felipe, ra quee ñuu Betsaida tsa canyí Galilea, tan cahán ndaahvi ra naha tshin ra tan catyí ra naha:

—Taa, cuñí ndi cahan ndi tshin ra Jesús —catyí ra naha.

²² Tan tsahan ra Felipe tsicahan ra tshin ra Andrés. Tan tsahan nduvi ra naha tsicatyí tuhun ra naha tshin ra Jesús tyin ra Grecia can cuñí ra naha cahan ra naha tshin ra. ²³ Tan nacahan ra Jesús, tan catyí ra:

—Vityin tsa tsaá hora tsa cunuhu nyico yu nda nu quee yu, tan cua jacahnu jutu yu tsi yu, tsa cuví yu Rayí tsa quee nda gloria. ²⁴Tsa nditsa catyí yu tsihin ndo tyin tatun iin tsiti tan ña cua quihví tsi ñuhu tan ña tyahyu tsi, intuhun ñi tsiti cua cuví tsi. Maa tyin tatun tyahyu tsi, ndutsaa tsi inga tsaha tan cua coo cuaha ca tsiti tsi. ²⁵Nyivi tsa cuñi xaan ñayivi iyó ñi, cua cunaa ñi. Maa tyin nyivi ña cuñi ñayivi iyó ñi nu ñuhu ñayivi ihya, cua ñihi ñi ñayivi nyitó tsa ña cua naa maa coo ñi. ²⁶Ndáa nyooho nyivi cuñi javaha tyiñu nuu yu, naha ndo quitsi nyicun ndo tsi yu. Tan nu cunyaa yu, cunyaa ndihi nyooho tsa jahá tyiñu tyiñu yu. Tyin nyivi jahá tyiñu tyiñu yu, cua jacahnu jutu yu tsi ñi.

Nu caahán ra Jesús nácaa cua cúu ra

²⁷Vityin tsicá xaan iñi yu. Tan ¿náa cua cahan yu? ¿A catyí yu tsihin Jutu yu na jatsiyo ra tundoho tsa nyaá cua nyehe yu? Ña cua cahan yu tacan tyin tsa cuenda yacan vatsí yu nu ñuhu ñayivi ihya. ²⁸Vaha ca cahan yu tsihin Jutu yu tan catyí yu: “Jutu Mañi yu, jacahnu sivi un” —catyí ra Jesús.

Tacan tan cahán iin ndusu ityi andivi tan catyí tsi tyehen:

—Tsa yahá jacahnú yu sivi yu, tan cua jacahnu nyico yu inga tsaha —catyí ndusu can.

²⁹Tan nyivi nyecú ican, tsiñi ñi ndusu can, tan catyí ñi tyin savi cahán. Tan inga ñi catyí tyin iin ángel cahán tsihin ra.

³⁰Tacan tan catyí ra Jesús tsihin ñi:

—Ñavin tsa cuenda tsa vaha tsi yuhu cahán ndusu can, tyin tsa cuenda tsa vaha tsi maa ndo cuví can. ³¹Vityin cuví cuhva tsa cua tatsi tuñi Nyoo tsi nyivi iyó nu ñuhu ñayivi. Tan vityin cuví cuhva cua tava cuñi Nyoo tsi nu ndacá ñaha nu ñuhu ñayivi ihya. ³²Tan cuhva tsa cua ticaa nyivi tsi yu nu cruu, yacan cuví cuhva cua ixta yu tandihi nyivi cuhun ñi tsihin yu —catyí ra Jesús.

³³Caahán ra tacan tsa cuenda tsa cuñi ra cutuñi iñi ñi tyin tacan cua cúu ra. ³⁴Tan nacahán nyivi tan catyí ñi tsihin ra:

—Tuhvá ndi tsiñi cahví ra naha nu libro ley yo tyin ra cuví Cristo cua coo nyitó ra tan ña cua cúu maa ra. ¿Nacaa tsa catyí yooho tyin cua ticaa nyivi tsi Rayí quee nda gloria nu cruu? Tan ¿yóo ra cuví Rayí tsa quee nda gloria tsa caahán un tuhun? —catyí ñi, tsicá tuhun ñi tsi ra.

³⁵Tacan tan catyí ra Jesús tsihin ñi:

—Ñuhu tsa jandunditsín nu nyecú ndo, juhva ña quivi iyó tsi. Caca ndo ityi nu nditsin tsitsi tsa ndi iyó tsa nditsin. Coto sana iñi ndo tan ndunaa. Tyin nyivi tsicá nu naa ña tsitó ñi nu maa cuahán ñi. ³⁶Tsñu iñi ndo tsi yuhu ra cuví ñuhu nditsin, tsitsi tsa ndi nyí yu tsihin ndo. Tacan tan cuví ndo nyivi iyó nu nditsin.

Tsa yahá cahán ra Jesús tacan tan jatsiyo ñi ra tsi ra nuu ñi.

Nu caahán tsi náa cuenda ña tsinú iñi ra cuví ityi nuu tsihin nyivi Israel naha ra tsi ra Jesús

³⁷Vasu ndi maa cuaha xaan tsa iyo javahá ra Jesús nuu nyivi maa tyin ña tsinú maa iñi ñi tsa caahán ra. ³⁸Tyin taahán tsi tsa cuví tumaa tsa cahán ra Isaías ra cuví ndusu yuhu Nyoo, nu cahán ra tyehen:

Jutu Mañi yu, yoñi cuñi tsinu iñi tsa caahán ndi.

Yoñi cutuñi iñi tunyee iñi tsa iyó tsi un, Jutu Mañi yu, catyí ra Isaías tahán tsanaha.

³⁹Tsa cuenda tsa nyaá nu tutu, yacan cuenda ña cuví tsinu iñi ñi tyin juvin ñi tyaá nyico tucu ra Isaías tyehen:

⁴⁰ Nyoo jacuaa ra tsi ñi. Tan jandundava ra añima ñi, tan ña cua nyehe ñi tsihin tinuu ñi, tan ña cua cutuñi iñi ñi tsihin añima ñi, tan ndi ña cua nacuhva cuenda ñi tsi ñi tsi ra tan janduvaha ra tsi ñi.

⁴¹ Ra Isaías cahan ra tyehen tyin nyehe ra tsa cahnu cuví Jutu Mañi yo Jesús, tan cahan ra tuhun ra.

⁴² Cuaha xaan nyivi Israel tsinú iñi tsi ra Jesús. Tan nda cuenda juhva ra cuví ityi nuu naha ra. Maa tyin ña jandunditsin ra naha tsi ra naha nuu nyivi tyin yuuhví ra naha tsi ra cuví fariseo naha ra. Coto tava cuí ra can naha ra tsi ra naha vehe ñuhu. ⁴³ Tyin cuñí ra naha nduvaha ra naha nuu nyivi tan ñavin nuu Nyoo.

Tuhun cahan ra Jesús cua tatsi tuñi tsi nyivi

⁴⁴ Ñihi caahán ra Jesús, tan catyí ra:

—Nyivi tsa tsinú iñi tsi yu, ñavin tsi maa ñi maa yu tsinú iñi ñi, tyin tsinú ndihi iñi ñi tsi ra tsa jaquitsj tsi yu. ⁴⁵ Tan nyivi tsa nyehé tsi yu, nyehé ndihi ñi tsi ra tsa jaquitsj tsi yu. ⁴⁶ Yuhu cuví tumaa ñuhu nditsin tan vatsí yu jandunditsin yu nu ñuhu ñayivi ihya, tyin nyivi tsinú iñi tsi yu ña cua ndoo ñi nu naa. ⁴⁷ Maa tyin tatun yihí ndo tsiñí ndo tsa caahán yu, tan ña javahá ndo tsa caahán yu, ñavin yuhu tatsi tuñi tsi ndo. Tyin ña vatsí yu nu ñuhu ñayivi ihya tyin tatsi tuñi yu tsi nyivi. Vatsí yu tyin vatsí jacacú yu tsi ñi. ⁴⁸ Nyivi tsa ña cuñí naquihin vaha tsa caahán yu tan ña cuñí ñi javaha ñi tumaa cuhva cuñí yu, iyó tsa cua tatsi tuñi tsi ñi. Tuhun tsa caahán yu, yacan cua tatsi tuñi tsi ñi nu cua cundihi quivi. ⁴⁹ Tyin ñavin cuenda maa yu caahán yu. Jutu yu, ra tsa jaquitsj tsi yu, tsaha ra tyiñu tsi yu caahán ra náa cua cahan yu tan náa cua jacuaha yu. ⁵⁰ Tan tsitó yu tyin tyiñu tsa tsaha ra, tsahá tsi ñayivi nyitó tsa ña cua naa maa coo nyivi. Yacan cuenda, tandihi tsa caahán yu, caahán yu cuhva catyí maa Jutu yu tsa cahan yu.

13

Nu nacatyá ra Jesús tsaha ra tsicá tsihin ra

¹ Tsa ndi cumañi ca iin quivi tan tahan tsi vico pascua, tsa tsitó maa ra Jesús tyin tsa cua tsaa hora tsa cua quita ra nu ñuhu ñayivi ihya tan cunuhu ra nu nyaá Jutu ra. Tacan ñi maa cuñí xaan ra tsi nyivi cuenda ra tsa iyó nu ñuhu ñayivi ihya. Tan vityin cua janaha ra tsi ñi tyin cuñí xaan ra tsi ñi tyin cua cúu ra tsa cuenda ñi.

² Tan cuxiñi ra Jesús tsihin ra tsicá tsihin ra. Tan quihví nu ña vaha añima ra Judas Iscariote sehe ra Simón tan natyuhú nu tsi ra na xico ra tsi ra Jesús tan cuhva cuenda ra tsi ra Jesús tsi nu xaan iñi tsi ra. ³ Maa tyin ra Jesús tsitó ra tyin tsaha Jutu ra tandihi tyiñu tsi ra tyin quihí ndaha ra. Tan tsitó ra tyin nu nyaá Nyoo quee ra tan juvin ñi ndacan cua cunuhu nyico ra. Tan nyaá ra Jesús cuxiñi ra. ⁴ Tacan tan nduvitá ra tan tavá ra jahma tsa nditsí ra ityi tsata, tan tsahñi ra iin toalla tsitsi ra. ⁵ Tacan tan tyihí ra ndutya tsitsi iin tsicoho tan quitsaha nacatyá ra tsaha ra tsicá tsihin ra. Tan jana ityi ra tsaha ra naha tsihin toalla can.

⁶ Tan tsa cua nacatya ra tsaha ra Simón Pedro tan catyí ra Simón tsihin ra: —Jutu Mañi yu, ¿a yooho cua nacatya tsaha yu?

⁷ Tacan tan catyí ra Jesús:

—Vityin ña cutuñi iñi un tsa javahá yu, maa tyin cutuñi iñi maa un nu cuahán ca tsi quivi.

⁸ Maa tyin ra Pedro catyí ra tsihin ra:

—Ndi iin tsaha tan ña cua cuhva yu nacatya un tsaha yu.

Tan catyí ra Jesús tsihin ra:

—Tatun ña cua nacatya yu tsaha un, ñavin ca cuenda yu cua cuvi un.

⁹ Tacan tan catyí ra Pedro tsihin ra Jesús:

—Tun tacan, Jutu Mañi yu, ñavin tsaha ñi yu nacatya un. Nacatya nda cuanda ndaha yu tan jiñi yu —catyí ra.

¹⁰ Maa tyin catyí ra Jesús tsihin ra:

—Nyivi tsa ndi tsityi, ña cuñi tsi tsa ndoo nanñi cahnu cuñu ñuhu ñi. Tsaha ña ñi cuñi tsi ndoo, tyin tsa ndoo maa nanñi ñi. Nyooho tsa ndoo maa ndo, vasu ña tandihi ndo ndoo —catyí ra Jesús.

¹¹ Cahñan ra tsa ña tandihi ra naha ndoo tyin tsitó ra yóo cua xico tsi ra tsi nu xaan iñi tsi ra nahnu.

¹² Tsa yahā nacatya ra Jesús tsaha ra tsicá tsihin ra, tan tsinditsj nyico ra jahma ra, tan tsinyaā nyico ra inga tsaha nu mesa tan catyí ra tsihin ra naha:

—¿A cutuñi iñi nyooho tsa javahā yu tsihin ndo? ¹³ Nyooho caahán ndo tsihin yu, “Maestro tan Jutu Mañi yu”, tan nditsa tyin yacan cuvi yu. ¹⁴ Yuhu tsa cuvi yu Ra Jacuahá tan Jutu Mañi ndo, nacatya yu tsaha ndo, tan tacan cuñi tsi tsa nacatya tahan maa ndo tsaha ndo. ¹⁵ Yuhu tsahā yu iin cuhva tsi ndo tyin javahā ndo tumaa cuhva javahā maa yu. ¹⁶ Tsa nditsa catyí yu tsihin ndo tyin ndi iin musu tan ña cahnu ca cuvi ra tan ñavin ca tsitoho ra. Tan ndi iin ra tsa cuahán tyiñu, tan ña cahnu ca cuvi ra tan ñavin ca ra tsa tavā tyiñu tsi ra. ¹⁷ Tatun cutuñi iñi ndo yacan, tan javahá ndo can, siñ xaan cua coo ndo.

¹⁸ Ñavin tsa cuenda tandihi ndo caahán yu. Yuhu tsitó maa yu yóo nacatsj yu. Maa tyin cuñi tsi tsa cuvi tumaa caahán tuhun Nyoo tyehen: “Ra tsa tsatsj paan tsihin yu, juvin ra cua xico ñaha tsi yu tsi nu xaan iñi tsi yu”, catyí tsi nu tutu Nyoo. ¹⁹ Caahán yu tyehen tsihin ndo tsa ndi cumañi ca cuvi can tyin quivi ca cuvi yacan, cua tsinu iñi ndo tyin yuhu cuvi ra tsa iyó nda ndi cumañi ca coo tandihi tsa iyó. ²⁰ Tsa nditsa catyí yu tsihin ndo tyin nyivi naquihin vaha tsi nyivi tsa jacuhún yu tsi ñi, maa yu naquihin vaha ñi cuvi can. Tan nyivi tsa naquihin vaha tsi yuhu, naquihin vaha ndihi ñi tsi ra tsa jacuitsj tsi yu —catyí ra Jesús.

Nu jacotó ra Jesús tyin cua xico ra Judas tsi ra tsi nu xaan iñi tsi ra nahnu (Mt. 26.20-25; Mr. 14.17-21; Lc. 22.21-23)

²¹ Tsa yahā tsa cahñan ra Jesús yacan, tan quitsahā nducuihyá xaan cuñi añima ra, tan catyí catsi ra:

—Tsa nditsa catyí yu tsihin ndo, tyin iin nyooho cua xico ndo tsi yu tsi nu xaan iñi tsi yu —catyí ra Jesús.

²² Tacan tan ra tsicá tsihin ra, quitsahā nyehé nuu tahan ra naha, tan ña tsitó ra naha yóo tuhun caahán ra Jesús. ²³ Iin ra tsicá tsihin ra Jesús nyanaá ra tsi ra nu nyaá ra cuxiñi ra. Tan ra ican cuvi ra tsa cuñi xaan ra Jesús. ²⁴ Tan ra Simón Pedro javahā ra seña tsi ra can, na ndaca tuhun ra yoo tuhun caahán ra Jesús. ²⁵ Tacan tan ra ican tsinyaá naa ca ra tsi ra Jesús, tan tsicā tuhun ra tsi ra:

—Jutu Mañi yu, ¿yoó ra cuvi ra tsa caahán un tuhun?

²⁶ Tan nacahñan ra Jesús tan catyí ra:

—Cua jatyii yu luxu paan, tan ra tsa cua cuhva yu itsi, ra ican cuvi ra —catyí ra.

Tacan tan quih̄in ra luxu paan tan jatyīj ra, tan tsah̄a ra tsi ra Judas Iscariote, sehe ra Simón. ²⁷ Tsa quih̄in ra Judas paan can tan quih̄vi nu ña vaha añima ra. Tacan tan ra Jesús catyí ra tsihin ra:

—Tsa tsicá iñi un javaha un, j̄anumi javaha can —catyí ra Jesús tsihin ra Judas.

²⁸ Maa tyin ndi intuhun ra tsa nycéu nu mesa can, ña cutuñi iñi ra naha nacuenta cah̄an ra tacan tsihin ra can. ²⁹ Ra Judas cuví ra yihí ndaha yit̄in nu yihí xuhun, yacan cuenda yihí ra naha cuñi maa ra naha tyin cuñi ra Jesús tsa cujata ra tsa tsiñi ñuhu tsi ra naha tsa cuenda vico can, a cuhva ra juhva xuhun can tsi nyiv̄i ndaahvi, cuñi maa ra naha. ³⁰ Tsa yah̄a quih̄in ra Judas paan can, tacan tan quit̄a ra. Tan tsacuaa cuví can.

Tyiñu tsa tsa tavā ra Jesús tsi yo: tsa cuñi tahan yo tsi yo

³¹ Tsa yah̄a tsa cuah̄an ra Judas, tan catyí ra Jesús:

—Vityin cua nyehe nyiv̄i tsa cahnu cuví yuhu Rayīi tsa queē nda gloria. Tan cua nyehe ñi tsa cahnu cuví Nyoo tsa cuenda yu. ³² Tatun Rayīi tsa queē nda gloria jacahnú ra tsi Nyoo, tacan tucu Nyoo cua jacahnú ra tsi ra. Tsa tsā quiv̄i cua jacahnú ra tsi ra. ³³ Sehe yu, ña naha ca cua cunyī yu tsihin ndo. Nyooho cua nanducu ndo tsi yu, maa tyin tumaa tsa cah̄an yu tsihin ra cuví ityí nuu tsihin yo nyiv̄i Israel can naha ra, caah̄an yu tsihin ndo vityin, tyin ña cua cuví cuhun ndo nu cua cuhun yu. ³⁴ Tсахá yu iin tyiñu tsa tsi ndo: Cuñi tahan ndo tsi ndo. Tumaa tsa cuñi maa yu tsi ndo, tacan cuñi tsi tsa cuñi tahan ndo tsi ndo. ³⁵ Tatun cuñi tahan ndo tsi ndo, tandih̄i nyiv̄i tan cua coto ñi tyin nyiv̄i nyicún tsi yu cuví ndo.

Nu caah̄an ra Jesús tyin ra Pedro cua cah̄an ra tyin ña nacotó ra tsi ra (Mt. 26.31-35; Mr. 14.27-31; Lc. 22.31-34)

³⁶ Ra Simón Pedro tsic̄a tuhun ra tsi ra Jesús tan catyí ra:

—Jutu Mañi yu, ¿nu maa cua cuhun un? —catyí ra.

Tan nacah̄an ra Jesús tan catyí ra:

—Nu cuhun yuhu, ña cua cuví cunycún un tsi yu vityin. Maa tyin nu cuah̄an ca tsi quiv̄i, tan cunycun un tsi yu —catyí ra Jesús.

³⁷ Tacan tan catyí ra Pedro tsihin ra:

—Jutu Mañi yu, ¿nácaa tsa ña cua cuví cunycun yu tsi un vityin? Tan tsa iyó vaha iñi yu tsa cuhva yu ñayiv̄i yu tsa cuenda un —catyí ra.

³⁸ Tan nacah̄an ra Jesús tan catyí ra:

—¿A nditsa tsa cuhva un ñayiv̄i un tsa cuenda yu? Tsa nditsa catyí yu tsihin un, tyin tsa ndi cumañi ca vacu tsa tsitooho, yooho cua cah̄an un uñi tsaha tyin ña nacotó un tsi yu —catyí ra Jesús tsihin ra Pedro.

14

Ra Jesús cuví ityí cuhun yo nu nyaá Nyoo Jutu yo

¹ Tan catyí ra Jesús:

—Ña caca xaan iñi ndo. Ts̄inu iñi ndo tsi Nyoo, tan ts̄inu ndih̄i iñi ndo tsi yu.

² Vehe Jutu yu cuaha xaan nu coo ndo iyó. Tun tsatyin ñavin tacan, tsa naha catyí tuhun yu tsihin ndo. Tan cua cuhun yu cua janduvaha yu iin nu coo ndo. ³ Tsa yah̄a tsa cuhun yu janduvaha yu nu coo ndo, tan cua quitsi nyico yu inga tsaha, quitsi naquih̄in yu tsi ndo tyin cuyucu ndo nu cua cunyyaa yu.

⁴ Nyooho tsa tsitó maa ndo nu maa cuhun yu, tan tsa tsitó ndo ityí.

⁵ Tan catyí ra Tomás tsihin ra:

—Jutu Mañi yu, ña tsitó ndi nu maa cua cuhun un. Tan ¿nácaa coto ndi itiyi? —catyí ra.

⁶ Tan catyí ra Jesús:

—Yuhu cuví itiyi tsa cuahán gloria. Tan yuhu cuví tsa nditsa. Tan juvin ñi yuhu cuví ra tshá ñayivi coo ndo. Tan tsa cuenda yuhu ñi, tan cuví tsa ndo nu nyaá Jutu yu. ⁷ Tan tsa nacotó ndo tsi yu, tan tsa cuenda yacan nacotó ndihi ndo tsi Jutu yu. Nda vityin tan nu cuahán ca tsi itiyi nuu, cua nacotó ndihi ndo tsi ra, tyin tsa nyehé ndo tsi ra —catyí ra Jesús.

⁸ Tacan tan catyí ra Felipe tshin ra:

—Jutu Mañi yu, cuhva jihna nyehe ndi tsi Nyoo Jutu yo, tan tshin yacan ñi tan ndoo ndi vaha.

⁹ Tan nacahan ra Jesús, tan catyí ra:

—Yooho Felipe, tsa naha xaan nyí yu tshin ndo, tan ¿nácaa tsa caahán un tsa ña nacotó un tsi yu? Nyivi tsa nyehé tsi yu, nyehé ndihi ñi tsi Nyoo Jutu yu. Tan ¿nácaa tsa caahán un tshin yu: “Cuhva jihna nyehe ndi tsi Nyoo Jutu yo”? ¹⁰ ¿A ña tsinú iñi un tyin iin ñi cuví yu tshin Nyoo Jutu yu? Tan maa ra iin ñi cuví ra tshin yu. Tsa caahán yu tshin ndo, ñavin yuhu caahán yacan. Jutu yu tsa iyó tshin yu, maa ra javahá tyiñu ra tshin yu. ¹¹ Tsjinu iñi ndo tsi yu tyin iin ñi ra cuví yu tshin Nyoo Jutu yu. Tan Nyoo Jutu yu iin ñi cuví ra tshin yu. Tatun ña tsinú iñi ndo yacan, cuví tsinu iñi ndo tsi yu tsa cuenda tyiñu Nyoo Jutu yu tsa javahá yu. ¹² Tsa nditsa caahán yu tshin ndo tyin nyivi tsinú iñi tsi yu, cua javaha ndihi ñi tsa javahá yu. Tan cahnu ca tsa cua javaha ñi, tyin yuhu cuhun yu nu nyaá Nyoo Jutu yu. ¹³ Tan tandihi tsa cua ndacan ndo tsi jutu yu tshin sivi yu, cua ñihi ndo can tyin tacan tan jacahnu cuaha ca nyivi tsi Nyoo Jutu yu tsa cuenda yuhu tsa cuví yu Sehe ra. ¹⁴ Yuhu cua javaha yu náa ndihi tsa ndacan ndo tsa cuenda yu.

Nu caahán ra Jesús tyin cuhva ra Tatyí Ii ra tsi yo

¹⁵ Tatun cuñí ndo tsi yu, tyaa yahvi ndo tsa caahán yu. ¹⁶⁻¹⁷ Tan ndacan tahvi maa yu tsi Nyoo Jutu yu na jaquitsi ra iin ra cua cuhva tunyee iñi tsi ndo. Tan ra ican cuví Tatyí Ii Nyoo, ra tsa caahán tsa nditsa. Tan iin nyita ñi maa cua cunyaa ra tshin ndo. Maa tyin nyivi tsa taahán ca iñi tsa iyó nu ñuhu ñayivi ihya, ña cua cuví naquihin ñi Tatyí Ii Nyoo tyin ña nyehe ñi tsi ra. Tan ndi ña tsitó ñi tsi ra. Maa tyin nyooho tsitó ndo tsi ra tyin nyaá ra tshin ndo tan tacan ñi cua ndoo ra tshin ndo. ¹⁸ Ña cua nacoo cuii yu tsi ndo. Cua quitsi nyico yu nu yucú ndo. ¹⁹ Juhva cuii ña quivi, tan nyivi cuenda nu ñuhu ñayivi ña cua nyehe ca ñi tsi yu. Maa tyin nyooho cua nyehe ndo tsi yu. Tyin yuhu nyito yu, yacan cuenda nyooho cua coo ndihi ndo. ²⁰ Quivi can cua coto ndo tyin yuhu iin ñi cuví yu tshin Jutu yu. Tan nyooho iin ñi cuví ndo tshin yu. Tan yuhu iin ñi cuví yu tshin ndo. ²¹ Nyivi tsa tyaa yahvi tsa caahán yu, tan javahá ñi cuhva caahán yu, ñi ican cuví ñi tsa cuñí tsi yu. Tan ñi tsa cuñí tsi yu, Jutu yu cua cuñi ra tsi ñi. Tan cuñí ndihi tucu maa yu tsi ñi tan cua janaha yu tsi ñi yóo ra cuví yu —catyí ra Jesús.

²² Tan catyí ra Judas, ñavin ra Judas Iscariote, inga ra.

—Jutu Mañi yu, ¿nácaa tsa nyuhu ñi cua janaha un tsi un, tan ñavin tsi tandihi nyivi iyó nu ñuhu ñayivi?

²³ Nacahan ra Jesús tan catyí ra:

—Nyivi cuñí tsi yu, javahá ñi tsa caahán yu. Tan Jutu yu cuñi ra tsi ñi. Tan quitsi ndi nu yucú ñi tan coo ndi tshin ñi. ²⁴ Nyivi ña cuñí tsi yu, ña javahá ñi

tsa caahán yu. Tan tuhun tsa caahán yu tsa tyaá soho ndo, ñavin tuhun maa yu cuví tsi, tyin tuhun caahán Jutu yu, ra tsa jaquitsi tsi yu, cuví tsi.

²⁵Caahán yu tandihi tuhun ihya tsihin ndo tsitsi tsa ndi nyíi yu tsihin ndo.

²⁶Maa tyin nu cuahán ca tsi ityi nuu cua jaquitsi Jutu yu Tatyí lí ra tsihin sivi yu. Tan cua jatyinyee ra ican tsi ndo, tan cua cuhva ra tunyee ñi tsi ndo, tan cua janaha ra tandihi tsi ndo. Tan cua janducuhun ñi ra tsi ndo tsa tsa yaha cahan yu tsihin ndo.

²⁷Jandoó yu iin tsa taxin coo añima ndo, tumaa tsa taxin cuñí añima maa yu. Yacan tsahá yu tsi ndo. Ñavin tumaa tsa taxin tsa ñihí ndo nu ñuhu ñayivi ihya. Ña çaça xaan ñi ndo tan ña ñayuhvi ndo. ²⁸Tsiñi ndo tsa cahan yu nu catyi yu tyin cua cuhun yu tan cua quitsi nyico yu nu yucú ndo. Tatun cuñí ndo tsi yu, cua cusii ñi ndo tyin catyi yu tyin cuahan yu nu nyaá Jutu yu. Tyin cahnu ca cuví Jutu yu tan ñavin ca maa yu. ²⁹Caahán yu tyehen tsihin ndo tsa ndi cumañi ca cuhun yu, tyin quivi cuhun yu, cua tsinu ñi ndo tsi yu.

³⁰Ña cuaha ca cua cahan yu tsihin ndo. Tyin vatsi nu ndacá ñaha nu ñuhu ñayivi ihya. Maa tyin ña ndacá ñaha nu tsi yu. ³¹Tyin tacan tan coto nyivi iyó nu ñuhu ñayivi, tyin yuhu cuñí yu tsi Nyoo Jutu yu, tan javahá yu tyiñu tava ra tsi yu.

’Nduvita ndo, tan cohon ndo, na cua tsiyo yo ihya.

15

Nu cahan ra Jesucristo tyin cuví ra tumaa yoho tsa cuví uvas

¹Yuhu cuví yoho tsa cuví uvas tsa nditsa. [Tsa cuví uvas cuví tsi tumaa yoho nditsaahan ndivi maa tyin yucu vixi cuví tsi.] Tan Jutu yu cuví ra jahá cuenda yoho can. ²Tsaahnyá ra soco tsa ña tsahá tsiti. Tan nacahnya ra nuu yoho yucu tsa tsahá tsiti, tan janduvahá ra can, tyin tacan tan cuhva cuaha ca tsi tsiti. ³Tsa yaha janduvaha Jutu yu tsi nyooho tsihin tsa jacuahá yu tsi ndo. ⁴Jañihi ca ndo ndu iin ndo tsihin yu, tumaa tsa iin ñi cuví yu tsihin ndo. Tumaa iin soco yoho can ña cuví cuhva tsi tsiti tsa maa ñi maa tsi, tun ña nyanaá tsi tsata yoho cahnu can, tacan nyooho, ña cua cuví javaha ndo tsa vaha tatun ña iin ñi cuví ndo tsihin yu.

⁵Yuhu cuví yoho cahnu. Tan nyooho cuví soco yoho can. Nyivi tsa nyanaá tsi yu, tan nyanaá yu tsi ñi, cuaha tsa vaha javahá ñi. Tyin nduve náa cuví javaha ñi tatun ña nyanaá ñi tsi yu. ⁶Nyivi tsa ña nyanaá tsi yu, cua javita Jutu yu tsi ñi, tumaa javitá yo soco yutun tsa ña tsahá tsiti. Na ityi can tan jatacá yo can, tsahan tsahmí yo.

⁷Tatun tacan ñi nyanaá maa ndo tsi yu, tan ña naa ñi ndo tsa jacuahá yu tsi ndo, tacan tan cuví ndacan ndo náa cuñí maa ndo tsi yu, tan yuhu cua cuhva yu tsa cua ndacan ndo. ⁸Tatun cuaha tsa vaha javahá ndo, jacahnú xaan ndo tsi Jutu yu cuví can. Tan tsihin yacan janahá ndo tyin cuví ndo nyivi tsa nditsa nyicún tsi yu. ⁹Yuhu cuñí yu tsi ndo, tumaa tsa cuñí Jutu yu tsi yu. Ña naa ñi ndo cuhva cuñí yu tsi ndo. ¹⁰Tatun tyaá yahvi ndo tsa caahán yu, ña cua naa ñi ndo tyin cuñí yu tsi ndo. Tumaa tsa javahá maa yu, tyaá yahvi yu tsa caahán Jutu yu. Ña naa ñi yu tsa cuñí xaan ra tsi yu.

¹¹Caahán yu tyehen tsihin ndo tyin na cusii ñi ndo tsihin yu. Tan cusii ca ñi ndo. ¹²Tuhun tsa caahán yu tsihin ndo, yacan cuví tsehe: cuñi tahan ndo tsi ndo, tumaa tsa cuñí maa yu tsi ndo. ¹³Tatun yaha xaan cuñi tahan yo tsi yo, cana maa ñi yo cuhva yo ñayivi iyó yo tsa cuenda inga yo. ¹⁴Nyooho cuví

ra vaha iñi tsi yu tatun javahá ndo tsa caahán yu tsihin ndo. ¹⁵ Ña caahán ca yu tyin musu yu cuví tsi ndo, tyin iin musu ña tsitó ra náa javahá tsitoho ra. Caahán yu tyin ra vaha iñi tsi yu cuví ndo, tyin tandihí tsa caahán Jutu yu tsihin yu tan jacotó yu itsi tsi ndo. ¹⁶ Ñavin nyooho nacatsj tsi yuhu tyin maa yu nacatsj tsi ndo. Tan tavá tyiñu yu tsi ndo tsa cahun ndo tan jaha tyiñu ndo. Tan tyiñu jahá ndo cua quita vaha tsi, tumaa iin itu tsa vaha xaan cuvaha. Tan cuaha xaan niñi cua coo, tan ña cua tiví maa tsi. Tacan tan cua cuhva Jutu yu tandihí tsa ndacan ndo tsi ra tsihin sivi yu. ¹⁷ Tyehen caahán yu tsihin ndo: Cuñi tahan ndo tsi ndo.

Nyivi taahán iñi tsa iyó nu ñuhu ñayivi, ndasi cuñi ñi nyehé ñi tsi ra Jesús tan tsi nyivi nyicún tsi ra

¹⁸ Tatun ndasi cuñi nyivi taahán iñi tsa iyó nu ñuhu ñayivi ihya nyehé ñi tsi ndo, coto ndo tyin jihna ca maa yu ndasi cuñi ñi nyehé ñi. ¹⁹ Tun tsatyin nyivi cuenda nu ñuhu ñayivi ihya cuví ndo, cua cuñi nyivi tsi ndo tumaa tsa cuñi tahan maa ñi tsi ñi. Maa tyin nyooho tsa nacatsj yu tsi ndo mahñu ñi. Yacan cuenda ndasi cuñi ñi nyehé ñi tsi ndo, tyin ñavin ca nyivi cuenda nu ñuhu ñayivi ihya cuví ndo. ²⁰ Nducuhun iñi ndo tsa cahán yu tsihin ndo, tyin ndi iin musu tan ña cahnu ca cuví ra tan ñavin ca tsitoho ra. Tatun tyaá yahvi nyivi tsa caahán yu tsihin ñi, tacan cua tyaá yahvi ndihí ñi tsa jacuahá ndo tsi ñi. Tan tatun ndasi icá ñi tsihin yu, ndasi cua ica ndihí ñi tsihin ndo. ²¹ Tandihí yacan cua ica ñi tsihin ndo tsa catyi yuhu, tyin ña nacotó ñi tsi ra tsa jaquitsi tsi yu.

²² Tun tsatyin ña quitsj yu cahán yu tsihin ñi, nduve cuatyí ñi. Maa tyin vityin nduve náa síqui cua tyaá ñi cuatyí ñi, tyin tsa yahá cahán yu tsihin ñi. ²³ Nyivi tsa ndasi cuñi nyehé tsi yu, ndasi cuñi ndihí ñi nyehé ñi tsi Jutu yu. ²⁴ Nduve cuatyí ñi, tun tsatyin ña javahá yu tsa ña cuví javaha inga nyivi. Maa tyin tsa nyehé ñi tandihí yacan. Vasu ndi maa tsa nyehé ñi can maa tyin ndasi cuñi ñi nyehé ñi tsi yu, tan tsi Jutu yu. ²⁵ Maa tyin tandihí yacan cuví, tyin cuñi tsi cundaa tumaa cuhva caahán nu tutu ley tsa jacuahá ñi tsa caahán tyehen: “Nduve vihi náa tsaha, tan ndasi cuñi ñi nyehé ñi tsi yu”, catyi tsi.

²⁶ Maa tyin cua quitsi Tatyí Ii, ra tsa caahán tsa nditsa. Ra ican cuví ra tsa cua cuhva tunyee iñi tsi ndo. Quivi cua tsaá yu nu nyaá Jutu yu tan cua jaquitsi ndi Tatyí Ii nu yucú ndo. Tan cua cahán ra tumañi iñi tsa cuenda yu.

²⁷ Tan nyooho tucu cua cahán ndo tumañi iñi tsa cuenda yu, tyin yucú ndo tsihin yu nda quivi quitsahá jahá tyiñu yu.

16

¹ Caahán yu tyehen tsihin ndo tyin tacan tan ña jandihí ndo tsa tsinú iñi ndo tsi yu. ² Cua tava cuíi nyivi tsi ndo vehe ñuhu. Tan coo quivi cua cahñi ñi tsi ndo, tan cua cuñi ñi tyin tyiñu Nyoo javahá ñi. ³ Tacan cua ica ñi tyin ña nacoto ñi tsi Jutu yu tan ndi tsi maa yu. ⁴ Caahán yu tsehe tsihin ndo tyin quivi tsa cua cuví tumaa cuhva caahán yu tsihin ndo, cua nducuhun iñi ndo tyin tsa yahá cahán yu tuhun ihya tsihin ndo.

Ña cahán yu tyehen tsihin ndo nda jihna tyin ndi nyíi maa yu tsihin ndo.

Tyiñu jahá Tatyí Ii Nyoo

⁵ Maa tyin vityin cua cahun yu tyin cunyahá yu tsihin ra tsa jaquitsj tsi yu. Ndi intuhun ndo tan ña tsicá tuhun ndo tsi yu nu maa cua cahun yu. ⁶ Tyin tsa nducuihaya cuñi ndo tsa caahán yu tyehen tsihin ndo. ⁷ Caahán yu tsa nditsa tsihin ndo tyin vaha ca tsa cahun yu cuenda tsa vaha tsi maa ndo. Tyin tatun

ña cuhun yu, ña cua quitsi Tatyí lí tsa cua cuhva tunyee ñi tsi ndo. Maa tyin tatun cuhun yu, cua jaquitsi yu tsi ra. ⁸ Tan quiví quitsi ra, cua jacoto ra tsi nyiví iyó nu ñuhu ñayiví ihya tyin iyó cuatyí ñi. Tan cua janaha ra ityi vaha tsi ñi, cuhva coo vaha ñi. Tan cua jacoto ra tsi ñi tyin cua cutuñi ñi nuu Nyoo. ⁹ Cua jacoto ra tsi ñi tyin iyó cuatyí ñi tyin ña tsinú ñi ñi tsi yu. ¹⁰ Cua jacoto ra tsi ñi tyin iyó ityi vaha, cuhva coo vaha ñi tyin yuhu cua cuhun yu nu nyaá Jutu yu tan ña cua nyehe ca ndo tsi yu. ¹¹ Tan cua coto ñi tyin cua jandaa Nyoo cuatyí ñi tyin tsa yahá cundaa cuatyí nu cuví cuihna, nu ndacá ñaha nu ñuhu ñayiví ihya.

¹² Tan cuaha ca tsa nyaá cahan yu tsihin ndo, maa tyin ña cua cutuñi ñi ndo can vityin. ¹³ Quiví quitsi Tatyí lí tsa caahán tsa nditsa, maa ra cua janaha tandihí tsa nditsa tsi ndo. Tyin ñavin cuenda maa ra cua cahan ra, tyin cua cahan ra tandihí tsa tsiní ra. Tan cua jacoto ra náa cua cuví nu cuahán ca tsi ityi nuu. ¹⁴ Cua jacahnu ra tsi yu, tyin cua naquihin ra tuhun yu tan cua janaha ra can tsi ndo. ¹⁵ Tandihí tsa iyó tsi Jutu yu, tsii maa yu cuví ndihí can. Yacan cuenda caahán yu tyin Tatyí lí cua naquihin ra tuhun yu, tan cua janaha ra tsi nyooho.

Ra tsicá tsihin ra Jesús cuiihyá xaan cuñí ra naha, maa tyin nu cuahán ca tsi quiví cua cusí ñi ra naha, catyí ra Jesús

¹⁶ Ña naha cuii ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu, tyin yuhu cua cuhun yu nu nyaá Jutu yu —catyí ra Jesús.

¹⁷ Tacan tan juhva ra tsicá tsihin ra, tsicá tuhun tahan ra naha tan catyí ra naha:

—¿Náa cuñi tsi cahan yacan? Catyí ra tsihin yo tyin ña naha cuii ca tan ña cua nyehe ca yo tsi ra, tan yaha can tan cua nyehe nyico yo tsi ra inga tsaha tyin cua cuhun ra nu nyaá Jutu ra. ¹⁸ ¿Náa cuñi tsi catyí tsa “ña naha cuii ca” can? Ña cutuñi ñi yo náa tuhun caahán ra —catyí ra naha.

¹⁹ Tan tuví ñi ra Jesús tyin cuñi ra naha ndaca tuhun ra naha tsi ra, tan catyí ra:

—Yuhu cahan yu tsihin ndo tyin ña naha cuii ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu. ¿A yacan cuví tsa tsicá tuhun tahan ndo tsi ndo? ²⁰ Tsa nditsa caahán yu tsihin ndo tyin nyooho cua nducuiihya ñi ndo tan cua vacu ndo, maa tyin nyiví cuenda nu ñuhu ñayiví cua cusí ñi ñi. Vasu cuiihya cuñi ndo vityin, tucuiihya ñi can cua nanduví tsi tsa sí. ²¹ Cuhva tsa cua cacu sehe iin ñaha, nyehé ña tundoho. Maa tyin tsa yaha cacu lee can, ndi ña ñuhu ca ñi ña tsa uhvi can tsa cuenda tsa sí cuñi ña tyin cacu iin lee sehe ña. ²² Tacan tucu nyooho vityin, cuiihya xaan cuñi ndo. Maa tyin cua nyehe nyico yu tsi ndo inga tsaha. Tacan tan cua cusí nyico ñi añima ndo. Tan yoñi cuví quihin nyaa tsa sí can tsi ndo.

²³ Quiví can nduve ca tsa cua ndaca tuhun ndo tsi yu. Tsa nditsa caahán yu tsihin ndo tyin Nyoo Jutu yu cua cuhva ra tandihí tsa ndacan ndo tsi ra tsihin síví yu. ²⁴ Nda vityin tan ñaha ca ndacan ndo tsa ndacan ndo tsihin síví yu. Ndacan ndo tan cua ñihi ndo tan cusí xaan ñi ndo.

Ra Jesucristo cuví jaha canaa ra tsa ña vaha iyó nu ñuhu ñayiví

²⁵ Maa ñi maa tsihin tsa jandu inducú yu tuhun jacuahá yu tsi ndo. Maa tyin nu cuahán ca tsi, ñavin ca tsihin cuhva can cua jacuahá yu tsi ndo, maa tyin cua catyí tuhun catsi yu tuhun Jutu yu tsihin ndo. ²⁶ Quiví can tsihin síví yu cua ndacan ndo tsa ndacan ndo tsi ra. Tan ña tsiní ñuhu ca tsa cahan

ndaahvi yu tsihin Jutu yu tsa cuenda ndo. ²⁷ Tyin maa Nyoo Jutu yu cuñí ra tsi ndo. Cuñí ra tsi ndo tyin nyooho cuñí ndo tsi yu, tan tsinú iñi ndo tyin nu nyaá Nyoo quee yu. ²⁸ Nu nyaá Jutu yu quee yu tyin quítsi yu nu ñuhu ñayivi ihya. Maa tyin vityin cua nacoo yu ñuhu ñayivi ihya tyin cua cunuhu nyico yu nu nyaá ra —catyí ra Jesús.

²⁹ Tacan tan catyí ra tsicá tsihin ra:

—Vityin nditsa, caahán catsi un tsihin ndi. Ñavin ca tsihin cuhva caahán un tsihin ndi. ³⁰ Vityin nyehé ndi tyin tsitó un tandihí cuii maa, tan ña tsiñi ñuhu ca tsa ndaca tuhun ndi tsi un tan coto un tsa tsicá iñi ndi. Yacan cuenda tsinú iñi ndi tyin nu nyaá Nyoo quee un —catyí ra naha tsihin ra Jesús.

³¹ Tan catyí ra Jesús:

—Tan vityin ¿a tsinú iñi ndo tsi yu? ³² Maa tyin caahán yu tsihin ndo tyin tsa vatsí hora. Tan vityin cuví hora tsa cua cuhun ndo siin siin ityi. Tan cua nacoo ndo tsi yu. Maa tyin ñavin intuhun ñi yu cua ndoo, tyin Jutu yu nyaá ra tsihin yu. ³³ Caahán yu tandihí tsehe tsihin ndo na coo tsa taxin añima ndo tsa cuenda tsa iin ñi cuví ndo tsihin yu. Nu ñuhu ñayivi ihya cua nyehe ndo tundoho, maa tyin janyee ndo iñi ndo, tyin yuhu tsa jahá canaa yu tsa ña vaha tsa iyó nu ñuhu ñayivi ihya.

17

Nu tsicán tahvi ra Jesús tsi Nyoo tsa cuenda ra tsicá tsihin ra

¹ Tsa yahá cahán ra Jesús yacan, nanyehé ndaa ra ityi andivi tan catyí ra:

—Jutu Mañi yu, tsa tsaá hora vityin. Jacahnu tsi yu tsa cuví yu sehe un, tyin tacan tan jacahnu tucu maa yu tsi un. ² Tyin tava tyiñu un tsi yu tsa quihí ndaha yu tandihí nyivi, tan cuhva yu ñayivi nyitó tsa ña cua naa maa tsi tandihí nyivi tsa tsahá un tsi yu. ³ Tatun nacotó ñi tsi un tyin intuhun ñi maa un cuví Nyoo tsa nditsa, tan nacotó ñi tsi yuhu ra Jesucristo ra tsa jaquítsi un, tacan tan cuví coo ñi ñayivi nyitó tsa ña cua naa maa.

⁴ Tsa jacahnu yu tsi un nu ñuhu ñayivi ihya tan tyiñu tsa tava tyiñu un tsi yu tsa ndihí tsi javahá yu. ⁵ Tan vityin, Jutu Mañi yu, cua quítsi nuhu nyico yu nu nyaá un, tan cuñí yu tyin nacuhva un tsa cahnu cuví yu tsihin un tsi yu, tumaa tsa tsicoo maa tsi yu nda ndi cumañi ca tsinu ñuhu ñayivi.

⁶ Tandihí ra tsa tsahá un tsi yu naha ra, ra tsa natava vaha un mahñu nyivi iyó nu ñuhu ñayivi ihya, jacoto yu tsi ra naha yóo ra cuví yooho. Tsii maa un cuví tsi ra naha tan tsahá un tsi ra naha tsi yu. Tan tyaá yahvi ra naha tsa caahán un. ⁷ Vityin tsitó ra naha tyin tandihí tsa tsahá un tsi yu, nu nyaá un quee tsi. ⁸ Tyin catyí tuhun yu tsihin ra naha tsa cahán un tsihin yu, tan naquihñ vaha ra naha itsi. Tan tsitó ra naha tyin nditsa tsa quee yu nu nyaá un, tan tsinú iñi ra naha tyin maa un jaquítsi tsi yu.

⁹ Yuhu tsicán tahvi yu tsi un tsa cuenda ra naha. Ña tsicán tahvi yu tsa cuenda tandihí nyivi, maa tyin tsicán tahvi yu tsa cuenda ra tsa tsahá un tsi yu naha ra, tyin tsi maa un cuví ra naha. ¹⁰ Tandihí nyivi tsa cuví tsii un, tsahá tucu un tsi ñi tsi yu. Tan maa ñi janahá tsa cahnu cuví yu.

¹¹ Yuhu ña cua ndoo ca yu nu ñuhu ñayivi ihya, maa tyin maa ra naha cua ndoo ra naha nu ñuhu ñayivi ihya. Tan yuhu cua cunyah nyico yu tsihin un. Jaha cuenda tsi ra tsa tsahá un tsi yu tsihin tunyee iñi tsa iyó tsi maa un, Jutu Mañi yu. Tan na iin ñi cuví ra naha, tumaa tsa iin ñi cuví maa yo. ¹² Quivi tsinyi yu nu ñuhu ñayivi ihya tsihin ra naha, jahá cuenda yu tsi ra tsa tsahá

un tsi yu naha ra tsihin tunyee iñi tsa iyó tsi un. Tan jahā cuenda yu tsi ra naha. Tan ndi intuhun ra naha tan ña tsinaa ra naha. Maa tyin ra tsa tsa nyaá maa tsa cunaa, ra ican ñi cuví ra cuanaa tan quitā cuhva tumaa tsa catyí nu tutu maa un.

¹³ Vityin tsa cua quitsí yu nu nyaá un, maa tyin tsitsi tsa ndi nyíi yu nu ñuhu ñayivi ihya, caahán yu tsehe, tyin na cusii iñi ra naha tumaa tsa sii cuñi maa yu. ¹⁴ Yuhu cahān yu tsihin ra naha tsa caahán un, maa tyin nyivi cuenda nu ñuhu ñayivi ndasi cuñi ñi nyehe ñi tsi ra nyicún tsi yo naha ra, tsa cuenda tyin ñavin ra cuenda nu ñuhu ñayivi cuví ra naha. Tumaa yuhu, ñavin ra cuenda nu ñuhu ñayivi cuví yu. ¹⁵ Ña tsicán yu tsi un tsa tava un tsi ra nyicún tsi yo naha ra nu ñuhu ñayivi ihya, maa tyin jahā cuenda tsi ra naha coto náa jahā nu ña vaha tsi ra naha. ¹⁶ Tumaa yuhu ñavin ra cuenda nu ñuhu ñayivi cuví yu, tacan tucu ra ihya naha ra, ñavin ra cuenda nu ñuhu ñayivi cuví ra naha. ¹⁷ Jacu ii tsi ra naha tsihin tsa nditsa, na javaha ra naha maa ñi maa cuhva cuñi maa un. Tyin tsa caahán un, yacan cuví tsa nditsa. ¹⁸ Tumaa tsa jaquitsi un tsi yuhu nu yucú nyivi iyó nu ñuhu ñayivi, tacan cua jacuhun ndihi tucu yuhu tsi ra tsa nyicún tsi yo, nacahan ra naha tuhun yo tsihin nyivi tsa ñaha ca coto tuhun yo. ¹⁹ Tan tsa cuenda tsa vaha tsi maa ra naha, jacu ii maa yu tsi yu tyin tacan tan cuví jacu ii tucu maa ra naha tsi ra naha tsihin tsa nditsa.

²⁰ Ñavin tsa cuenda ra ihya ñi naha ra tsicán tahvi yu tsi un. Tsicán tahvi ndihi tucu yu tsi un tsa cuenda nyivi tsa cua tsinu iñi tsi yu, tsa cuenda tsa cua cahan ra ihya naha ra ityi nuu ca. ²¹ Tsicán yu tsi un na iin ñi cuví ñi tsihin inga ñi. Tan na iin ñi cuví ñi tsihin yo, Jutu Mañi yu. Tumaa yoocho nyaá un tsihin yu tan yuhu nyaá yu tsihin un, na iin ñi cuví ñi tsihin yo, tyin tacan tan tandihi nyivi iyó nu ñuhu ñayivi cua tsinu iñi ñi tyin maa un jaquitsi tsi yu. ²² Yuhu tsaha yu tsa cahnú cuví un tsi ñi nyicún tsi yo. Juvín ñi maa tsa cahnú cuví un tsa tsaha un tsi yu tyin tsihin yacan na iin ñi cuví ñi, tumaa yoocho tsihin yuhu, iin ñi cuví yo. ²³ Yuhu nyíi yu tsihin ñi. Tan yoocho nyaá un tsihin yu tyin tacan tan iin ña nyivi cua cuví ñi. Tan coto tandihi nyivi iyó nu ñuhu ñayivi tyin maa un jaquitsi tsi yu, tan cuñi xaan un tsi ñi nyicún tsi yo, tumaa tsa cuñi maa un tsi yu.

²⁴ Jutu Mañi yu, maa un tsaha tsi ñi tsi yu. Tan cuñi yu tsa cunyaa ñi tsihin yu nu cua cunyaa yu, tan na nyehe ñi tsa cahnú cuví tsa tsaha un tsi yu, tyin cuñi un tsi yu nda ndi cumañi ca tsinu ñuhu ñayivi. ²⁵ Jutu Mañi yu, ra vaha cuví un, tan nyivi cuenda nu ñuhu ñayivi ña tsitó ñi tsi un, maa tyin yuhu tsitó yu tsi un. Tan ra nyicún tsi yo ihya tsitó ra naha tyin maa un jaquitsi tsi yu. ²⁶ Tsa cahān yu tsihin ra naha yóo ra cuví un, tan cua cahan nyico tucu yu inga tsaha, tyin tumaa cuhva cuñi un tsi yu, tacan cua cuñi tahan ra naha tsi ra naha. Tan yuhu cunyaa yu añima ra naha.

18

*Nu cua tyihi ra Israel naha ra tsi ra Jesús vehe caa
(Mt. 26.47-56; Mr. 14.43-50; Lc. 22.47-53)*

¹ Tsa yahā tsa cahān ra Jesús yacan, tacan tan cuahán ra tsihin ra tsicá tsihin ra inga tsiyo yutya Cedrón. Tan ican iyó iin cora yutun tata. Tan ican quihvi ra Jesús tsihin ra tsicá tsihin ra. ² Tan ra Judas, ra tsa xico tsi ra, tsitó ra nu cuahán ra Jesús tyin ican tuhvá ra Jesús tsaahán tsihin ra tsicá tsihin ra. ³ Tan ican tsaá ra Judas tsihin andaru cuaha tan cuaha ra vitya cuenda vehe ñuhu tsa jacuhun ra cuví ityi nuu tsihin jutu naha ra tan ra cuví fariseo

naha ra. Tsaꜗ ra naha ican, nyisó ra naha mityi, tan nyisó ra naha lámpara tan ñuhu yiti. ⁴ Tan ra Jesús tsa tsitó maa ra tandihí tsa cua tahan ra. Quitꜗ ra tan tsicꜗ tuhun ra tsi ra naha:

—¿Yóo nanducú ndo? —catyí ra.

⁵ Tan catyí ra naha tsihin ra:

—Ra Jesús ra ñuu Nazaret.

Tan catyí ra Jesús:

—Yuhu cuví —catyí ra.

Tan ra Judas, ra tsa xico tsi ra Jesús tsi nu xaan ifí tsi ra nahnu, nyí ndihí ra tsihin ra naha. ⁶ Cuhva tsa cahꜗn ra Jesús: “Yuhu cuví”, tandihí ra naha nacacꜗ tsata ra naha tan nduvꜗ ra naha nu ñuhu. ⁷ Tacan tan tsicꜗ tuhun nyico ra Jesús tsi ra naha inga tsaha, tan catyí ra:

—¿Yóo nanducú ndo?

Tan catyí ra naha:

—Ra Jesús ra ñuu Nazaret.

⁸ Tan catyí ra Jesús:

—Tsa cahꜗn yu tsihin ndo tyin yuhu cuví. Tatun yuhu nanducú ndo, jaña ndo tsi ra tsicꜗ tsihin yu naha ra na cunuhun ra naha —catyí ra Jesús tsihin ra naha.

⁹ Yacan cahꜗn ra Jesús tyin na cundaa tsa cahꜗn ra nda ityi tsata ca nu catyí ra: “Ra tsa tsahꜗ Jutu yu tsi yu, ndi intuhun ra naha tan ña tsinaá ra naha.” ¹⁰ Tacan tan tavꜗ ra Simón Pedro mityi tsa ndahá ra tan tsahnyꜗ ra naho cuaha iin ra tsa nañ Malco. Ra ican cuví musu ra jutu tsaahnu tsa cuví ityi nuu tsihin ra jutu naha ra. ¹¹ Maa tyin ra Jesús catyí ra tsihin ra Pedro:

—Natyihí mityi un tsitsi vena un. Tatun Nyoo Jutu yu tan cuñí ra tsa nyehe yu tundohe, taahán tsi tsa nyehe yu can —catyí ra Jesús tsihin ra.

Nu tsindacꜗ ra naha tsi ra Jesús nuu ra cuví ityi nuu tsihin jutu naha ra
(Mt. 26.57-58; Mr. 14.53-54; Lc. 22.54)

¹² Tacan tan andaru can tsihin capitán ra naha, tan vitya cuenda vehe ñuhu naha ra, tñꜗn ra naha tsi ra Jesús, tan tsahñꜗ ra naha tsi ra, ¹³ tacan tan tsindacꜗ ra naha tsi ra yuvehe ra Anás, tyin ra Anás can tyiso ra Caifás cuví tsi ra. Tan cuiya can ra Caifás can cuví ra jutu tsaahnu cuví ityi nuu tsihin jutu. ¹⁴ Ra Caifás can cuví ra tsa cahꜗn tsihin ra cuví ityi nuu tsihin nyivi Israel naha ra tyin vaha ca tsa cúu intuhun ñi rayí tsa cuenda tandihí nyivi ñuu.

Nu caahán ra Pedro tyin ña nacotó ra tsi ra Jesús
(Mt. 26.69-70; Mr. 14.66-68; Lc. 22.55-57)

¹⁵ Ra Simón Pedro tan inga ra tsa tsicꜗ tsihin ra Jesús, nyicún ra naha tsi ra Jesús nu cuahán ra nuquehe yuvehe ra Anás, ra jutu tsaahnu cuví ityi nuu tsihin jutu. Tan nacotó ra jutu can tsi inga ra can. Yacan cuenda quihvꜗ ra can tsihin ra Jesús nuquehe ra jutu can. ¹⁶ Maa tyin ra Pedro ndoꜗ ra ityi tsata vehe. Yacan cuenda quitꜗ ra tsa nacotó ra jutu can, tan cahꜗn ra tsihin ñaha tsa nyaá yuvehe can. Tan jayahꜗ ra tsi ra Pedro ityi tsitsi nuquehe can. ¹⁷ Tacan tan ñaha tsa nyaá yuvehe can tsicꜗ tuhun ña tsi ra Pedro, tan catyí ña:

—¿A ñavin yoohe cuví iin ra tsicꜗ tsihin ra can?

Tan catyí ra Pedro:

—Ñavin. Ñavin yu cuví —catyí ra tsihin ña.

¹⁸ Tacan tan ra cuví musu tan ra vitya naha ra tsa yucú ican, jatahan ra naha ñuhú tyin vitsin xaan. Tan nyecú nyityi ra naha tuñu ra naha ñuhú. Tan nyí ndihi tucu ra Pedro tuñu ra ñuhú tsihin ra naha ican.

Nu janahma ra jutu tsaahnu tsi ra Jesús
(Mt. 26.59-66; Mr. 14.55-64; Lc. 22.66-71)

¹⁹ Tacan tan ra jutu tsaahnu can quitsaha tsicá tuhun ra tsi ra Jesús yoo ra cuví ra tsicá tsihin ra, tan náa jacuahá ra tsi nyívi. ²⁰ Tan catyí ra Jesús tsihin ra:

—Yuhu nuu tandihi nyívi cahan yu. Tan jacuahá yu tsi ñi tsitsi vehe ñuhu ñuu tan ñuu tan tsitsi vehe ñuhu cahnu ñuu ihya nu tuhvá tandihi nyívi Israel ndu iin. Tan nduve nu cahan xeehe yu. ²¹ ¿Nacuenda tsicá tuhun un tsi yuhu? Vaha ca ndaca tuhun un tsi nyívi tsa tsiñi tsa cahan yu, tan maa ñi cua catyí tuhun náa cahan yu tsihin ñi tyin maa ñi tsitó náa cahan yu —catyí ra Jesús tsihin ra.

²² Cuhva tsa caahán ra Jesús yacan, tan iin vitya vehe ñuhu tsa yucu ican, cañi ra iin tsiyo nuu ra Jesús tan catyí ra:

—¿A tacan taahán tsi nacahan un nu caahán ra jutu tsaahnu cuví ityi nuu? —catyí ra tsihin ra Jesús.

²³ Tan catyí ra Jesús:

—Tatun cahan yu iin tsa ña vaha, cahan tsihin yu nda tsa ña vaha cahan yu. Maa tyin tatun cahan yu tsa vaha, ¿nacuvi tyin cañi un tsi yu? —catyí ra Jesús tsihin ra can.

²⁴ Yahá can tan nuuhñi ra Jesús, tan jacuhun ra Anás tsi ra nu nyaá ra Caifás, ra jutu tsaahnu cuví ityi nuu tsihin jutu [cuiya can].

Nu caahán nyico ra Pedro inga tsaha tyin ña nacotó ra tsi ra Jesús
(Mt. 26.71-75; Mr. 14.66-72; Lc. 22.58-62)

²⁵ Tan nyaá nyityi ra Pedro tuñu ra ñuhú. Tan catyí ra naha tsihin ra:

—¿A ñavin yoocho cuví iin ra tsicá tsihin ra can? —catyí ra naha tsihin ra.

Tan ra Pedro tyihí xeehe ra, tan catyí ra:

—Ñavin. Ñavin yu cuví —catyí ra.

²⁶ Tacan tan iin ra cuví musu ra jutu tsaahnu cuví ityi nuu tsihin jutu, iin ra tsa cuví nyívi ra tsa tsahnyá ra Pedro soho, quitsaha tsicá tuhun ra tsi ra tan catyí ra:

—¿Atu ñavin un cuví tsa nyehe yu tsihin ra can tsitsi cora yutun tata can? —catyí ra tsihin ra Pedro.

²⁷ Tan tyihí xeehe nyico ra Pedro inga tsaha. Juvín ñi cuhva can tan navacu ñi iin tsitooho.

Nu cutuñi ra Jesús nuu ra Pilato
(Mt. 27.1-2, 11-14; Mr. 15.1-5; Lc. 23.1-5)

²⁸ Yahá can tan quita ra naha tsihin ra Jesús yuvehe ra Caifás tan tsindaca ra naha tsi ra vehe tyiñu ra ndacá ñaha. Tsa cua cunditsin tan ra Israel ña quihví ra naha tsitsi vehe tyiñu can tyin ñavin vehe nyívi Israel cuví can. Tyin íca tsa quihví ñi Israel vehe ndavaha ñi tyin coto ña cua cuví cuxiñi ñi quivi vico pascua. ²⁹ Yacan cuenda quita ra Pilato tyin cahan ra tsihin ra naha, tan catyí ra:

—¿Náa cuatyí tyaá ndo siqui ra ihya? —catyí ra Pilato tsihin ra cuví ityi nuu tsihin nyívi Israel naha ra.

³⁰ Tan nacahan ra Israel naha ra tan catyí ra naha:

—Tun tsatyin ñavin iin ra iyó cuatyí cuví ra, ña cua cuhva cuenda ndi tsi ra tsi un —catyí ra naha tsihin ra Pilato.

³¹ Tacan tan catyí ra Pilato tsihin ra naha:

—Quihin ndo tsi ra, tan t̄atsi tuñi ndo tsi ra tumaa catyí maa ley ndo.

Tan nacahan ra Israel can naha ra tan catyí ra naha:

—Maa tyin nyuhu nyivi Israel nduve ndatu iyó tsi ndi tsa cahñi ndi tsi nyivi —catyí ra naha.

³² Tacan cundaa tsa cahan ra Jesús nácaa cua cúu ra. ³³ Yahá can tan quihvi nyico ra Pilato tsitsi vehe tyiñu can inga tsaha. Tan cana ra tsi ra Jesús tan tsicá tuhun ra tsi ra:

—¿A yooho cuví rey cuenda nyivi Israel? —catyí ra tsihin ra.

³⁴ Tan catyí ra Jesús:

—¿A tsa cuñi ñi maa un tsicá tuhun un tsehe tsi yu o iyó inga nyivi natyuhu tsi un cuhva cahan un tsihin yu? —catyí ra Jesús tsihin ra Pilato.

³⁵ Tan catyí ra Pilato:

—Ñavin ra ñuu Israel cuví yuhu. Juvín ñi maa ra ñuu maa un naha ra tan ra cuví ityi nuu tsihin jutu ñuu maa un cuví ra tsahá cuenda tsi un tsi yu. ¿Náa javahá un? —catyí ra tsihin ra Jesús.

³⁶ Tacan tan nacahan ra Jesús tan catyí ra:

—Nu ndacá ñaha yu ñavin cuenda nu ñuhu ñayivi ihya cuví tsi. Tun tsatyin ndacá ñaha yu nu ñuhu ñayivi ihya, ra nyicún tsi yu cañi tahan ra naha tyin tacan tan yoñi cua cuhva cuenda tsi yu ndaha ra Israel naha ra. Maa tyin nu ndacá ñaha yu, ñavin cuenda ihya cuví tsi —catyí ra Jesús tsihin ra Pilato.

³⁷ Tacan tan catyí ra Pilato tsihin ra:

—¿Tun tacan, rey cuví maa un? —catyí ra Pilato tsihin ra Jesús.

Tan nacahan ra Jesús tan catyí ra:

—Rey cuví yu tumaa tsa caahán maa un. Yacan cuenda cacu yu tan vatsi yu nu ñuhu ñayivi ihya, tyin cahan yu tsa nditsa. Tandihí nyivi tsa tyaá yahvi tsa nditsa, tyaá soho ñi tsa caahán yu —catyí ra Jesús.

³⁸ Tan catyí ra Pilato tsihin ra:

—¿Tan náa cuví tsa nditsa? —catyí ra.

Tsa yahá tsa tsicá tuhun ra Pilato yacan, quitá ra tsicahan nyico ra tsihin ra Israel naha ra inga tsaha tan catyí ra:

—Yuhu ña nañihi maa yu ndi intuhun cuatyí ra ihya.

Nu cua cahñi ra naha tsi ra Jesús

(Mt. 27.15-31; Mr. 15.6-20; Lc. 23.13-25)

³⁹ Maa tyin nyooho iyó ndo tuhun tsa tsicán ndo na tava yu tsi iin ra nyii vehe caa tsa iyó vico pascua ihya. ¿A cuñi ndo tava yu tsi ra tsa cuví rey cuenda ndo tsa cuví ndo nyivi Israel? —catyí ra Pilato tsihin ra naha.

⁴⁰ Tacan tan quitsahá caná tsaa tandihí ra naha tan catyí ra naha:

—¡Ña tava un tsi ra can! ¡Tava tsi ra Barrabás! —catyí ra naha.

Tan ra Barrabás can cuví ra iin ñasuhu.

19

¹ Tacan tan quihin ra Pilato tsi ra Jesús tan tava tyiñu ra na cañi andaru tsi ra. ² Tan andaru can javahá ra naha iin corona iñu tan tyihí ra naha jiñi ra Jesús. Tan jacunditsi ra naha iin jahma tunduuhva tsi ra, tahan tsa tuhvá ra cuví rey tsinditsi. ³ Tacan tan natuhvá ra naha nu nyáá ra tan caahán nyaa ra naha tsi ra, tan catyí ra naha:

—¡Nacumi tsi un yooho Rey cuenda nyivi Israel! —catyí ra naha, tan cañi ra naha nuu ra.

⁴Tacan tan quita nyico ra Pilato inga tsaha tan catyí ra tsihin ra naha:

—Nyehe ndo tyin cua tava yu tsi ra ityi nuu ndo tyin nyehe ndo tyin ndi iin cuatyí ra ña nañihí yu —catyí ra Pilato tsihin ra naha.

⁵Tan quita ra Jesús yihí corona iñu jiñi ra, tan nditsí ra jahma tunduuhva can. Tacan tan catyí ra Pilato tsihin ra naha:

—¡Ma ra nyaá ihya! —catyí ra tsihin ra naha.

⁶Cuhva tsa nanyehé ra cuví ityi nuu tsihin jutu naha ra tan ra vitya naha ra tsi ra, quitsaha caná tsaa ra naha tan catyí ra naha:

—¡Tyaa tsi ra nu cruu na cúu ra! —catyí ra naha.

Maa tyin catyí ra Pilato tsihin ra naha:

—Quihin ndo tsi ra tan cahñi maa ndo tsi ra nu cruu tyin yuhu ndi intuhun cuatyí ra tan ña nañihí yu.

⁷Maa tyin nacahan ra Israel can naha ra tan catyí ra naha:

—Iyó iin ley tsi ndi, tan cuhva catyí ley ndi, cuñi tsi tsa cúu ra tyin jahá ra tsa Sehe Nyoo cuví tsi ra —catyí ra naha.

⁸Tsa tsiñi ra Pilato yacan, tan nayuhvi xaan ca ra. ⁹Tan quihvi nyico ra inga tsaha tsitsi vehe tyiñu, tan tsicá tuhun ra tsi ra Jesús:

—¿Nu maa quee yooho? —catyí ra tsihin ra.

Maa tyin ra Jesús ña nacahan maa ra.

¹⁰Tacan tan catyí ra Pilato tsihin ra:

—¿Nacuenda ña caahán un tsa caahán yu? ¿A ña tsitó un tyin ra cumi tyiñu cuví yu tan iyó ndatu tsi yu tsa tyaa yu tsi un nu cruu, tan iyó tucu ndatu tsi yu tsa tava nuña yu tsi un? —catyí ra Pilato tsihin ra Jesús.

¹¹Tan nacahan ra Jesús tan catyí ra:

—Tun tsatyin ña tsaha Nyoo tyiñu can tsi un, nduve ndatu cua coo tsi un tsa tatsi tuñi un tsi yu. Yacan cuenda, ra tsa quitsi ndaca tsi yu ndaha un, cahnu ca cuatyí ra can naha ra iyó tan ñavin ca yooho —catyí ra Jesús tsihin ra Pilato.

¹²Tsa ndihi cahan ra Jesús yacan, tan quitsaha nducú ra Pilato cuhva jaña ra tsi ra, maa tyin ra Israel caná tsaa ra naha tsata ra, tan catyí ra naha:

—¡Tatun jaña un tsi ra, ñavin amigo ra César, ra cuví rey cahnu, cuví tsi un! Tyin tandihi ra tsa caahán tyin rey cuví ra naha, ra xaan iñi tsi rey cahnu cuví ra naha —catyí ra naha.

¹³Tacan tan tsa tsiñi ra Pilato yacan, tava tyiñu ra na quita ra Jesús ityi tsata vehe. Tan tsinyaq ra Pilato nu nañi Gabata nu tuhvá ra jandaá cuatyí nyivi. Tan tsihin yuhu hebreo cuñi tsi catyí: “Nu canyí yuu”. ¹⁴Tan cuví tsi iin quivi tsa ndi cumañi ca coo vico pascua, cuhva tsa cua tahan hora. Tacan tan catyí ra Pilato tsihin ra Israel can naha ra:

—¡Ihya nyaá rey ndo!

¹⁵Maa tyin cana tsaa ra Israel naha ra tan catyí ra naha:

—¡Na cúu ra! ¡Na cúu ra! ¡Tyaa tsi ra nu cruu! —catyí ra naha.

Tan catyí ra Pilato tsihin ra naha:

—¿A tyaa yu tsi ra cuví rey ndo nu cruu?

Maa tyin ra cuví ityi nuu tsihin jutu catyí ra naha:

—Yoñi ca rey iyó. Intuhun ñi maa ra César, ra cuví rey cahnu —catyí ra naha.

¹⁶Tacan tan tsaha cuenda ra Pilato tsi ra Jesús tsi ra naha na tyaa ra naha tsi ra nu cruu. Tan quihin andarú tsi ra, cuahán ra tsihin ra naha.

*Nu tsihi ra Jesucristo nu cruu**(Mt. 27.32-44; Mr. 15.21-32; Lc. 23.26-43)*

¹⁷ Tan nyisó ra Jesús cruu ra, cuahán ra iin nu nañi: “Yiqui Jiñi Ndiyi”. Tan tsihin yuhu hebreo nañi tsi Gólgota. ¹⁸ Ndacan tyaa ra naha tsi ra nu cruu tsihin nduyu. Tan tyaa ra naha uvi taahan ca ra naha xiin ra. Ticaa ra naha iin ra nu cruu tsa nyaá tsiyo cuaha ra. Tan inga ra tyaa ra naha tsiyo satyin ra. Tan ticaa ra naha tsi ra Jesús mahñu. ¹⁹ Tan tava tyiñu ra Pilato na cunyaa letra jiñi cruu can. Tan catyi tsi tyehen: “Ra Jesús ra ñuu Nazaret, Rey cuenda nyivi ñuu Israel.” ²⁰ Tan cuaha nyivi Israel cahvi ñi tsa caahán can, tyin yatyin ñi ñuu ñi cuví nu tsaquinyaa ra naha cruu ra Jesús. Tan nyaá letra can tsihin yuhu hebreo, tan yuhu griego, tsihin yuhu latin. ²¹ Yacan cuenda ra cuví ityi nuu tsihin jutu cahán ra naha tsihin ra Pilato:

—Ña tyaa un: “Rey cuenda nyivi ñuu Israel”, vaha ca tyaa un: “Ra ihya catyi ra tyin rey cuenda nyivi ñuu Israel cuví ra” —catyi ra naha.

²² Maa tyin catyi ra Pilato:

—Tsa tsa yaha tyaa yu, nandoo maa tsi tacan —catyi ra tsihin ra naha.

²³ Tsa yaha tyaa ra andaru can naha ra tsi ra Jesús nu cruu, naquihin ra naha jahma ra. Tsa cumi taahan ra naha quihin luxu luxu jahma ra. Tan ndoo jahma ra tsa quicu cañi ñi tsa tsindaşi ra. ²⁴ Tan andaru can natuhún tahan ra naha:

—Ña cua cahnya yo itsi. Jasiqúi suuhva jihna yo na nyehe yo yoo cua jaha canaa jahma can —catyi ra naha.

Tacan cuví tumaa caahán nu tutu Nyoo nu catyi tsi tyehen: “Tsatsa tahan ra naha luxu luxu jahma yu tan jasiqúi suuhva ra naha tsihin tsi, nyehe ra naha yoo ra jaha canaa itsi.” Tan yacan cuví tsa javaha ra andaru can naha ra.

²⁵ Tan nyaá sihi ra Jesús yatyin ñi nu nyaá cruu ra. Tan nyaá tucu tahan ña, tan ña María ñasihi ra Cleofas, tan ña María quee ñuu Magdala. ²⁶ Tan nanyehe ra Jesús tsi sihi ra, nyaá ña yatyin ñi. Tan nanyehe tucu ra tsi ra tsa tsica tsihin ra, ra tsa cuñi xaan ra. Tan catyi ra tsihin sihi ra:

—Miya, va ra sehe un nyaá tsihin un juvin —catyi ra.

²⁷ Tacan tan catyi ra tsihin ra tsa cuñi xaan ra:

—Tsaa, va sihi un nyaá tsihin un juvin —catyi ra tsihin ra.

Nda quivi can tan quihin ra tsi ña, cuahan tsihin ra yuvehe ra. Tan jaha cuenda ra tsi ña.

*Nu tsihi ra Jesús**(Mt. 27.45-56; Mr. 15.33-41; Lc. 23.44-49)*

²⁸ Tsa yaha yacan, tsa nyehe ra Jesús tyin tsa ndihí tyiñu jahá ra. Tacan tan catyi ra:

—Na ityi iñi yu —catyi ra.

Tan tsihin yacan cunda tsa nyaá nu tutu Nyoo nu caahán tsi nácaa cua cúu ra.

²⁹ Tan ican nyaá iin quiyi nu yihí vinu iya. Tacan tan jatyi ra naha tsa cuví yahma tumaa caa catyi tsihin vinu iya can. Tan tyaa ra naha yacan nu iin yutun hisopo. Tan janda ra naha tan tyanaa ra naha can yuhu ra. ³⁰ Tsihi ra Jesús vinu can tan catyi ra:

—Tsa iyó vaha tandihí vityin —catyi ra.

Tacan tan nacañi nuu ra jiñi ra tan tsihi ra.

Nu tutsi ra andaru yoco xaan yiqui naha ra Jesús

³¹ Tsa ndi cumañi intuhun ña quivi tan tahan tsi quivi vico cahnu pascua, tan ra cuvı ityi nuu tsihin nyivi Israel ña cuñi ra naha tsa ndoo cuñu ñuhu ra tsa tsihi can naha ra nu cruu quivi quitatú, tyin quivi quitatú, quivi ii cuvı tsi tsa cuenda ra naha. Yacan cuenda tsican ra naha tumañi iñi tsi ra Pilato na tava tyiñu ra na cahnu andaru sihin ra tsa ticaa nu cruu can naha ra, tyin tacan tan numi ñi cúu ra naha, tan jatsiyo ra naha cuñu ñuhu ra naha. ³² Tacan tan cuahán andaru nu nyecú cruu can. Tan tsahnü ra naha sihin iin ra ticaá iin tsiyo xiin ra Jesús. Tan tsahnü nyico ra naha sihin inga ra tsa ticaa inga tsiyo xiin ra. ³³ Maa tyin cuhva tsa natuhva ra naha nu ticaá ra Jesús, nyehe ra naha tyin tsa tsihi maa ra. Yacan cuenda ña tsahnü ca ra naha sihin ra.

³⁴ Maa tyin iin andaru can tutsi ra yoco xaan yiqui naha ra Jesús. Tan quita niñi tan ndutya. ³⁵ Ra tsa nacatyı tuhun yacan, ra tsa nyehe vaha cuvı ra. Tan tsa nditsa caahán ra, tyin maa ra tsitó tyin tsa nditsa caahán ra, tacan tan tsinu ndihi tucu iñi nyooho. ³⁶ Tacan cuvı tyin tacan tan cundaa tsa catyı tuhun Nyoo nu catyı tsi: “Ndi intuhun yiqui ra tan ña tahnu.” ³⁷ Tan iyó inga nyico nu catyı tsi nu tutu Nyoo tyehen: “Cua nyehe nyivi tsi ra tsa tutsi ra naha yoco xaan.”

Nu quihvi ñuhu ra Jesús

(Mt. 27.57-61; Mr. 15.42-47; Lc. 23.50-56)

³⁸ Tsa yaha yacan, ra José ra ñuu Arimatea tsican ndatu ra tsi ra Pilato na cuhva ra tsa naquihin ra cuñu ñuhu ra Jesús. Tan ra José can cuvı ra iin ra yihı cuenda ra Jesús vasu tsa xeehe ñi tsa cuenda tsa yuuhvi ra tsi ra cuvı ityi nuu tsihin nyivi Israel. Tacan tan tsaha ra Pilato ndatu tsi ra, tan tsahan ra José tsinaquihin ra cuñu ñuhu ra Jesús. ³⁹ Tsahan ndihi tucu ra Nicodemo, ra tsa tsahan tsicahan tsihin ra Jesús tsa tsa cuaa. Tsaá ra tsihin ndutya tami. Tan iin ndutya tami tsa nañi mirra nasaca nuu tsihin inga tsa nañi áloe. Tan quita tsi tumaa oco utsi kilu tsa tandihı tsi. ⁴⁰ Tacan tan ra José tsihin ra Nicodemo quihin ra naha cuñu ñuhu ra Jesús tan cava nuu ra naha tsi ra tsihin jahma cuiñi tsa tyihı ra naha ndutya tami can, tumaa iyó maa nyivi Israel tun cua cutsi ñi ndiyı tsitsi ñuhu. ⁴¹ Yatyin nu tsahñi ra naha tsi ra Jesús nu cruu iyó iin cora yutun tata. Tan tsitsi cora can nyaá iin ñaña tsa nu ñaha ca cuyucu ndi intuhun ndiyı. ⁴² Ican ñi tinyijı ra naha cuñu ñuhu ra Jesús tyin yatyin ñi nyaá ñaña can tan tsa cua tahan tsi quivi quitatú nyivi Israel.

20

Nu nandoto ra Jesús

(Mt. 28.1-10; Mr. 16.1-8; Lc. 24.1-12)

¹ Tsa naa ca tsa cuvı tumingu, ña María quee ñuu Magdala tsahan ña nu ñaña ra Jesús. Tan nyehe ña tyin nduve ca yuu ndası yuhu ñaña can. ² Tacan tan tsinú xaan ña cuahán ña nu nyii ra Simón Pedro tan inga ra tsica tsihin ra Jesús, ra tsa cuñi xaan ra Jesús. Tan catyı ña tsihin ra naha:

—Quihin nyivi cuñu ñuhu Jutu Mañi yo tsitsi ñaña, tan ña tsitó yo nu maa tsindaca ñi itsi —catyı ña María tsihin ra Pedro tan tsihin inga ra can.

³ Tacan tan ra Pedro tan inga ra can cuahán ra naha nu ñaña. ⁴ Tan cuahán nduvi taahan ra naha iin caa ñi, tsinú ra naha. Maa tyin ñihi ca tsinú inga ra can tan ñavin ca ra Pedro, jihna ca ra can tsaá nu ñaña. ⁵ Quitsaha nyehé ihñi ra tsitsi ñaña, tan nyehe ra jahma cuiñi tsa cava nuu cuñu ñuhu ra Jesús, canyı can. Maa tyin ña quihvi ra tsitsi ñaña. ⁶ Yaha can tan tsaá ndihi ra

Simón Pedro tsata ra, tan ra ican quihv̄i ra tsitsi ñaña can. Juvín ñi nyehe ndih̄i ra can jahma can canyí tsi. ⁷ Tan juvín ñi nyehe ndih̄i ra tyin jahma tsa tsindas̄i j̄iñi ra Jesús, ña iin ñi nu canyí can tsihin inga jahma can, yih̄i tahn̄u can tan cayucú siin can. ⁸ Tacan tan quihv̄i ndih̄i inga ra tsic̄a tsihin ra Jesús can, ra tsa tsāa tsa jihna nu ñaña can. Tan nyehe ra tsa cuv̄i can, tan tsin̄u iñi ra. ⁹ Tyin tsa jihna, ña cutuñi iñi ra naha tsa caahán nu tutu Nyoo, tyin ra Jesús cuñi tsi tsa nandoto ra tsa yaha cúu ra. ¹⁰ Tacan tan cuanuhu ra tsic̄a tsihin ra Jesús nda yuvehe ra naha.

*Nu quituv̄i ra Jesús nuu ña María quee ñuu Magdala
(Mr. 16.9-11)*

¹¹ Maa tyin tsa tsāa nyico ña María, ndoo ña nyaá ña tsacú xaan ña ityi tsata ñaña can. Tan tsitsi tsa tsacú ña, nyehé ih̄ni ña tsitsi ñaña can. ¹² Tan nyehe ña uvi taahan ángel nditsi ra naha jahma cuitsin, nyecú ra naha nu tsicav̄a cuñu ñuhu ra Jesús. Iin ra nyaá ityi nu tsicav̄a j̄iñi ra, tan inga ra nyaá ityi nu tsicav̄a tsa ha ra. ¹³ Tan tsic̄a tuhun ra ángel can naha ra tsi ña tan catyí ra naha:

—¿Nacuvi tsacú xaan un?

Tan catyí ña:

—Tsacú maa yu tyin quih̄in nyiv̄i tsi Jutu Mañi yu, tan ña tsitó yu nu maa tinyí ñi tsi ra —catyí ña tsihin ángel can.

¹⁴ Ndi caahán ca ña yacan, tan nanyico coo ña tan nyehe ña tsi ra Jesús ican. Maa tyin ña tsitó ña tatun ra Jesús cuv̄i ra. ¹⁵ Tacan tan tsic̄a tuhun ra Jesús tsi ña:

—¿Nacuenda tsacú un? ¿Yóo nanducú un? —catyí ra tsihin ña.

Cuñi maa ña tyin ra jahá cuenda cora yutun tata can cuv̄i ra. Tan catyí ña:

—Tatta, tatun yooho quih̄in tsi ra Jesús, çahan tsihin yu nu maa tsindaç̄a un tsi ra, tyin cunaquih̄in yu tsi ra —catyí ña tsihin ra.

¹⁶ Tacan tan catyí ra Jesús tsihin ña:

—¡María! —catyí ra tsihin ña.

Tan nanyehe ña tan çahan ña tsihin ra tsihin yuhu hebreo, tan catyí ña:

—¡Raboni! —Tan cuñi tsi catyí can: “Maestro”.

¹⁷ Tan catyí ra Jesús tsihin ña:

—Ña t̄jin un tsi yu, tyin ñaha ca cuhun yu nu nyaá Jutu yu. Maa tyin çuaahan tan çahan un tsihin tandih̄i yañi yu tyin cuahan yu nu nyaá Jutu yu, tan juvín ñi Jutu ndih̄i ndo cuv̄i tsi ra. Cuahan yu nu nyaá Nyoo yu, tan juvín ñi Nyoo ndo cuv̄i tsi ra —catyí ra Jesús tsihin ña.

¹⁸ Tacan tan tsahan ña María ñuu Magdala can tsijacotó ña tsi ra tsic̄a tsihin ra Jesús tyin nyehe ña tsi ra tan çahan ra yacan tsihin ña.

*Nu quituv̄i ra Jesús nuu ra tsic̄a tsihin ra
(Mt. 28.16-20; Mr. 16.14-18; Lc. 24.36-49)*

¹⁹ Juvín ñi maa quiv̄i can nu quítsaha vitya, tsa cua cuaa tan ndu ījn ra tsic̄a tsihin ra Jesús. Tan ndas̄i vaha yuvehe nu yucú ra naha tsa cuenda tsa yuuhv̄i ra naha tsi ra cuv̄i ityi nuu tsihin nyivi Israel. Tan ra Jesús quituv̄i ra tan tsinyāa nyityi ra mah̄nu ra naha. Tan tsah̄a ra nacumi tsi ra naha, tan catyí ra:

—Na coo tsa taxin añima ndo —catyí ra.

²⁰ Tsa yah̄a tsa çahan ra yacan tan janah̄a ra ndaha ra tan xiin ra tsi ra naha. Tan ra ican naha ra s̄i xaan cuñi ra naha tsa nyehe ra naha tsi Jutu Mañi yo. ²¹ Tan catyí nyico ra Jesús inga tsaha tsihin ra naha:

—Na coo tsa taxin añima ndo. Tumaa tsa tava Jutu yu tyiñu tsi yu, tacan tava nyico tucu yuhu tyiñu tsi nyooho —catyí ra tsihin ra naha.

²² Tacan tan tiví ra tsi ra naha tan catyí ra tsihin ra naha:

—Naquihin ndo Tatyí Ii Nyoo. ²³ Nyivi tsa jahá ndo tucahnu iñi, iyó tucahnu iñi tsi ñi. Tan nyivi tsa ña jahá ndo tucahnu iñi, nduve tucahnu iñi iyó tsi ñi —catyí ra Jesús tsihin ra naha.

Nu nyehe ra Tomás tsi Jutu Mañi yo tsa yaha nandoto ra

²⁴ Maa tyin ra Tomás, iin rq tsicá tsihin ra Jesús, ra tsa catyí ñi: “ra tinihi”, yoñi ra nyii tsihin ra naha tsa tsahan ra Jesús. ²⁵ Yaha can tan nacatyí tuhun ra tsicá tsihin ra Jesús tsihin ra:

—Nyehe ndi tsi Jutu Mañi yo —catyí ra naha tsihin ra.

Maa tyin ra Tomás catyí ra:

—Tun ña nyehe yu ndaha ra nu caahví nu quihvi nduyu, tan ña cuaxin yu nundaha yu nu yihí nduyu can, tan ña cuaxin yu ndaha yu yiqui naha ra, ña cua tsinu iñi yu —catyí ra Tomás.

²⁶ Tsa yaha una quivi yucú nyico ra tsicá tsihin ra Jesús tsitsi iin vehe. Tan nyii ra Tomás tsihin ra naha. Tacan tan vasu ndi maa ndasi vaha yuvehe, maa tyin ra Jesús quihvi ra tan tsinyaa nyityi ra mahñu ra naha. Tan tsaha ra nacumi tsi ra naha tan catyí ra:

—Na coo tsa taxin añima ndo.

²⁷ Tacan tan quitsaha catyí ra tsihin ra Tomás:

—Cuaxin nundaha un nu caahví ndaha yu ihya. Tan cuaxin ndaha un yiqui naha yu. Tan ña cuvi un ra ndava iñi. Tsinu iñi —catyí ra Jesús tsihin ra Tomás.

²⁸ Tacan tan nacahan ra Tomás tan catyí ra:

—¡Jutu Mañi yu! ¡Tan Nyoo yu! —catyí ra Tomás.

²⁹ Tan catyí ra Jesús tsihin ra:

—Yooho Tomás, vityin tsinú iñi un tyin nyehé un tsi yu. Si ca cuñi nyivi tsa nduve tsa nyehe tan tsinú iñi ñi —catyí ra Jesús tsihin ra Tomás.

Nu jacoto ra Juan nacuenda tsinu libru ihya

³⁰ Cuaha ca tsa iyo javaha ra Jesús nuu ra tsicá tsihin ra, maa tyin ña tandihi tsi nyaá nu libru ihya. ³¹ Tsinyaa tsa nyaá tyin tacan tan tsinu iñi ndo tyin ra Jesús cuvi ra Cristo, ra cuvi Sehe Nyoo, tan coo ndo ñayivi nyitó tsa ña cua naa maa.

21

Nu quituvi ra Jesús nuu utsa taahan ra tsicá tsihin ra

¹ Tsa yaha can tan quituvi ra Jesús nuu ra tsicá tsihin ra inga tsaha. Tyehen quituvi ra yatin ñi yuhu miñi Tiberias: ² Iin ñi nu yucú ra Simón Pedro tan ra Tomás tsa nañi: “ra tinihi”, tan ra Natanael, ra ñuu Caná nu cuvi Galilea. Tan yucú ndihí sehe ra Zebedeo naha ra tan uvi taahan ca ra tsicá tsihin ra Jesús. ³ Tan catyí ra Simón Pedro tsihin ra naha:

—Cuahan yu cua tiin yu tyaca —catyí ra.

Tan catyí ra naha tsihin ra:

—Cuhun ndihí ndi tsihin un —catyí ra naha.

Cuahan ra naha tan quihvi ra naha tsitsi iin yutun ndoo, maa tyin tsacuaa can ndi intuhun maa tyaca ña ñihí ra naha. ⁴ Tsa cuñi cunditsin tan quituvi ra Jesús nu nyiti yuhu miñi can. Maa tyin ra tsicá tsihin ra, ña nacoto ra naha tsi ra. ⁵ Tacan tan catyí ra tsihin ra naha:

—Nyooho ra cuatyí, ¿a ñaha ca ñihi ndo tyaca?

Tan nacahan ra naha tan catyí ra naha:

—Ñaha ca ñihi ndi.

⁶ Tacan tan nacahan ra Jesús tan catyí ra:

—Cuaxin ndo traya ndo tsiyo cuaha yutun ndoo juvin, tan cua ñihi ndo tyaca —catyí ra Jesús tsihin ra naha.

Tacan icā ra naha. Yaha can tan ndacua ña cuví ca tava ra naha traya can nu ndutya, tsa cuenda tsa cuaha tyaca yihí tsitsi can. ⁷ Tan ra tsa cuñi xaan ra Jesús catyí ra tsihin ra Pedro:

—Jutu Mañi yo cuví ra! —catyí ra tsihin ra Pedro.

Tsa tsiñi ra Simón Pedro tyin Jutu Mañi yo cuví ra, tsinditsi ra jahma ra, tyin tava ra can tsa cua tñn ra tyaca, tan quihvi ra cuahán ra tsitsi ndutya can. ⁸ Tan inga ra tsa tsicā tsihin ra Jesús tsaā ra naha nda yuhu miñi can tsihin yutun ndoo, ixtá ra naha traya can tyin tsitu cuii can tsihin tyaca, tyin yatyin ñi yuhu miñi can yucu ra naha tumaa iin cientu metru ñi. ⁹ Tsa nuu ra naha nu ñuhu, nyehē ra naha iin nu cayú tuun ñuhu. Tan canyii iin tyaca tsihin paan nuu tuun ñuhu can. ¹⁰ Tan catyí ra Jesús tsihin ra naha:

—Ndāca ndo taahan tyaca tsa ndi tñn ndo —catyí ra Jesús tsihin ra naha.

¹¹ Tan ndaa ra Simón Pedro nu yutun ndoo tan quitsahā ixtá caa ra traya tyin tsitu cuii can yihí tyaca nahnu. Cientu uvi xico utsi uñi ti yihí tsitsi can. Tan vasu cuaha xaan ti, maa tyin ña taní traya can. ¹² Tacan tan catyí ra Jesús tsihin ra naha:

—Naha ndo tyin curumusa ndo —catyí ra Jesús tsihin ra naha.

Tan ndi intuhun ra tsicā tsihin ra, ña canā iñi ra naha ndaca tuhun ra naha yoo ra cuví ra tyin tsitó ra naha tyin Jutu Mañi yo cuví ra. ¹³ Tacan tan natuhva ra Jesús tan quihñin ra paan can, tan tsahā ra tsi ra naha. Tan juvin ñi tacan icā ra tsihin tyaca.

¹⁴ Yacan cuví nu tsinu uñi tsaha quituví ra Jesús nuu ra tsicā tsihin ra tsa yahā nandoto ra.

Nu caahán ra Jesús tsihin ra Simón Pedro

¹⁵ Tsa yahā tsa curumusa ra Jesús, tan tsicā tuhun ra tsi ra Simón Pedro:

—Simón, sehe ra Jonás, ¿a cuñi ca un tsi yu tan ñavin ca ra ihya naha ra?

Nacahan ra Pedro tan catyí ra:

—Tacan Jutu Mañi yu, maa un tsitó tyin cuñi yu tsi un —catyí ra Pedro.

Tan catyí ra Jesús tsihin ra:

—Cuhva tsa catsi mbee nyihi jana yu —catyí ra Jesús tsihin ra Pedro.

¹⁶ Tsicā tuhun nyico ra Jesús tsi ra inga tsaha:

—Simón sehe ra Jonás, ¿a cuñi un tsi yu? —catyí ra Jesús tsihin ra.

Nacahan ra Pedro tan catyí ra:

—Jutu Mañi yu, maa un tsitó tyin cuñi yu tsi un —catyí ra Pedro tsihin ra.

Tan catyí ra tsihin ra:

—Jaha cuenda mbee jana yu —catyí ra Jesús tsihin ra.

¹⁷ Tan tsinu uñi tsaha tsicā tuhun nyico ra tsi ra:

—Simón, sehe ra Jonás, ¿a cuñi un tsi yu? —catyí ra Jesús tsihin ra.

Cuhva tsa tsicā tuhun ra tsi ra tsa tsinu uñi tsaha tatun cuñi ra tsi ra, ra Pedro nducuihya xaan cuñi ra, tan catyí ra tsihin ra:

—Jutu Mañi yu, maa un tsitó nácaa añima yu tan maa un tsitó tyin cuñi yu tsi un —catyí ra.

Tan catyí ra Jesús tsihin ra:

—Jaha cuenda mbee jana yu. ¹⁸Tsa nditsa caahán yu tsihin un tyin tsa ndi tyuvaa un tsinditsi maa un jahma un tan cuahán maa un nu cuñi un cuhun un. Maa tyin tatun tsa tsahnu un, cua janacaa un ndaha un tan inga ra cua jacunditsi jahma un tsi un. Tan cua cundaca ra tsi un nu ña cuñi un cuhun un —catyí ra Jesús tsihin ra Pedro.

¹⁹Tsa cahan ra Jesús yacan, cuñi ra cahan ra nácaa cua cúu ra Pedro tan cua jacahnu ra tsi Nyoo tacan. Yaha can tan catyí ra Jesús tsihin ra Pedro: —iNaha quitsi nyicun un tsi yu! —catyí ra tsihin ra.

Nu caahán ra Juan tuhun maa ra

²⁰Tacan tan natsico coo ra Pedro tan nyehe ra tyin nyicún inga ra tsa tsica tsihin ra Jesús tsi ra naha, ra tsa cuñi xaan ra Jesús. Juvín ra tsinyanaa tsi ra Jesús tsa cuxiñi ra quivi can. Tan tsica tuhun ra tsi ra tan catyí ra: “Jutu Mañi yu, ¿yóo ra cua xico tsi un?” catyí ra, tsica tuhun ra quivi tsa ndi cumañi ca cúu ra Jesús. ²¹Cuhva tsa nyehe ra Pedro tsi ra, tsica tuhun ra tsi ra Jesús:

—Jutu Mañi yu, tan ra ihya, ¿náa cua tahan ra? —catyí ra tsihin ra.

²²Nacahan ra Jesús tan catyí ra:

—Tatun cuñi maa yu tsa coo ra nda cuanda quitsi yu inga tsaha, ¿náa cuenda yooho? Cohon yooho tsihin yu —catyí ra Jesús tsihin ra Pedro.

²³Tacan tan iin yaha ñi tsinuhuhun ihya nu nyecú yañi yo tyin ra ican, ña cua cúu ra. Maa tyin ña catyí ra Jesús tsa ña cua cúu ra can. Tyin catyí ra: “Tatun cuñi yuhu tsa coo ra nda cuanda quitsi yu inga tsaha, ¿náa cuenda yooho?”

²⁴Yuhu cuví ra can, ra tsa cahan ra Jesús tuhun. Tan nyehe yu tandihi cuii maa tsa cuví tan tyaa yu nu libru ihya. Yuhu tsitó yu tyin tandihi tsa tyaa yu, tsa nditsa caahán tsi.

²⁵Iyó cuaha ca tsa javaha ra Jesús. Tun tsatyin tsicunyaa tandihi can nu libru, tsicá ñi yu tyin ndi ña cua cutahan can nani cahnu nu ñuhu ñayivi.

Tan na cuvi tsi tacan ñi.

Tyiñu Tsa Javaha Ra Apóstol: Ra Tsa Tava Tyiñu Ra Jesucristo

Nu catyí ra Jesús tyin cua quitsi Tatyí Ii Nyoo

¹ Yooho Teófilo, quivi tsa jacuhun yu tutu tsa jihna ñi can tsi un, tyaá yu tandihi tsa quitsaha javahá ra Jesús tan tandihi tsa jacuaha ra nda quivi jihna ñi, ² tan nda quivi nandaá ra andivi. Tan tsa ndi cumañi ca nandaá ra andivi, nacatsj ra tsi ra apóstol cuenda ra. Tan tshin tunyee iñi Tatyí Ii Nyoo tava tyiñu ra tsi ra naha tyin caca ra naha tyiñu ra. ³ Tan cuaha xaan tundoho nyehe ra Jesús tan tsihi ra. Tan tsa yaha tsa tsihi ra, nandoto ra tan quituvj ra nu yucú ra tsa tava tyiñu ra. Tan tsitsi tsa uvi xico quivi, cuaha xaan tsaha quituvj ra nu yucú ra naha, tyin na coto ra naha tyin nditsa tsa nyito ra. Tan cahan ra Jesús tshin ra naha nácaa ndacá ñaha Nyoo tsi yo.

⁴ Tsa ndi nyii ra Jesús tshin ra naha, tan catyí ra tshin ra naha:

—Ña cua quita ndo Jerusalén ihya, nda cuanda naquihin ndo tsa catyí Jutu yu tyin cuhva ra tsi ndo, tumaa tsa cahan yu tshin ndo quivi can. ⁵ Nditsa tyin tshin ndutya jacoondutya ra Juan tsi nyivi. Maa tyin nyooho ña cuaha ca quivi tan coondutya ndo tshin Tatyí Ii Nyoo —catyí ra Jesús tshin ra naha.

Nu nandaá ra Jesús andivi

⁶ Tsa ndu ijn ra tava tyiñu ra Jesús, tan tsica tuhun ra naha tsi ra tan catyí ra naha:

—Jutu Mañi yu, ¿a vityin ñi cua jacacu un tsi ñuu Israel ihya tsa ña cua cundaca ñaha ca ra ñuu Roma tsi yo? —catyí ra naha.

⁷ Tan nacahan ra Jesús tan catyí ra tshin ra naha:

—Ña taahan tsi coto nyooho ndaa quivi cua cuvi tsa cua javaha Nyoo Jutu yo. Intuhun ñi maa ra cua cahan ama cua cuvi tsi. ⁸ Tyin quivi tsa cua quitsi Tatyí Ii Nyoo siqui ndo cua naquihin ndo tunyee iñi ra, tan cua quita ndo tan cua cahan ndo tuhun yu ñuu Jerusalén ihya tan tandihi ñuu tsa cayucú Judea tan Samaria, tan nda cuanda nani cahnú ñuhu ñayivi —catyí ra Jesús tshin ra naha.

⁹ Tan tsa yaha tsa cahan ra Jesús tuhun ihya, tan tsitsi tsa nyehé ra naha tsi ra, nandaá ra andivi, tan quihvi ra tsitsi vico. Tacan tan ña nyehe ca ra naha tsi ra. ¹⁰ Tan cuhva tsa nyehé ndaa ra naha andivi, quituvj uvi taahan ángel Nyoo tsa nditsi jahma cuitsin yatyin ñi nu nyecú ra naha. ¹¹ Tan catyí ángel can naha ra tshin ra tava tyiñu ra Jesús:

—Nyooho ra Galilea, ¿nacuenda nyehé ndaa xaan ndo andivi? Ra Jesús tsa nyehe ndo nandaá ihya, juvin ra cua quitsi inga tsaha, tan tyehen cua nyehe nyico ndo tsi ra —catyí ángel tshin ra naha.

Nu nacatsj ra tava tyiñu ra Jesús tsi ra Matías tyin jaha tyiñu ra tyiñu tsa javaha ra Judas

¹² Tacan tan quita ra tava tyiñu ra Jesús nu tsiyucú ra naha yucu nu iyó yutun olivo. Tan cuanuhu ra naha ñuu Jerusalén. Tan yatyin ñi canyií ñuu can, tumaa sava hora ñi tan tsaa yo. Tyin sava hora ñi cuvi caca nyivi quivi quitatú ñi, tyin tacan catyí maa ley tsa tyaá ra Moisés. ¹³ Tsa tsaa ra naha ñuu Jerusalén can, ndaa ra naha nu tsinu uvi pisu vehe nu iyó ra naha. Tan ra tsa yucú can, cuvi ra ihya naha ra: ra Pedro, ra Jacobo, ra Juan, ra Andrés,

ra Felipe, ra Tomás, ra Bartolomé, ra Mateo, ra Jacobo sehe ra Alfeo, tan ra Simón ra tsa cuñi tsa nasama ra ndacá ñaha, tan tsihin ra Judas yañi ra Jacobo. ¹⁴Tan tandihí ra ican naha ra ndu iin ra naha tandihí quivi tan tsicán tahvi ra naha tsi Nyoo. Tan yucú ndihí tucu yañi ra Jesús tsihin ra naha, tan tsihin ña María sihi ra, tan cuaha ca maa ñiñaha.

¹⁵Tan tsa tandihí nyivi tsa ndu iin quivi can quitá maa cientu oco ñi. Tacan tan nduvitá ra Pedro. Tan catyí ra tsihin ñi:

¹⁶—Nyooho yañi, tsa nyaá tucu maa tsa tahan ra Jesús cuhva ihya tan vityin tsa cundaá tsa cahán ra David jahá Tatyí Ii Nyoo nu catyí ra tyin ra Judas cua cuhva cuenda ra tsi ra Jesús tsi ra xaan iñi tsi ra. ¹⁷Tan ra Judas cuví ra iin ra tsa tsinyií tsihin yo. Tan iin caa ñi jahá tyiñu ra tsihin yo. ¹⁸Maa tyin tsaahan ra, tan jatá ra ñuhu tsihin xuhun tsa ñihí ra tsa xico ra tsi ra Jesús. Yaha can tan canacavá ra tsihin jiñi ra, tan ndatá tsitsi ra tan quitá tandihí tsiti ra. ¹⁹Tan quivi tsa tsito nyivi iyó Jerusalén ihya tsa tsihi ra, jacunañi ñi ñuhu can Acéldama. Tan tsa tsihin yuhu maa ñi cuñi tsi catyí Ñuhu cuenda tsa Tsañi Niñi Nyivi. ²⁰Tyin nu libru Salmo catyí tsi cuenda ra Judas tyeheh: Na ndoo maa vehe ra.

Tan ña coo nyivi tsitsi vehe can.

Tan catyí tucu tsi:

Inga ra cua jaha tyiñu tyiñu tsa javahá ra.

²¹⁻²² *Tan vityin yucú ra tsa cutahan tsihin yo quivi tsinyií Jutu Mañi yo Jesucristo tsihin yo; nda quivi jacoondutyá ra Juan tsi ra, tan nda quivi nandaá ra cuahán ra andivi. Tan vityin ñiñi cuñi tsi tsi inga ra cuví tsandaa tsihin yo tsa cuenda tsa nandotó ra Cristo —catyí ra Pedro.

²³Tacan tan caná ra naha tsi uvi taahan ra naha. Caná ra naha tsi ra José tsa nañi Barsabás, tan juvin ñi nañi tucu ra Justo; tan caná tucu ra naha tsi ra Matías. ²⁴Tan tsicán tahvi ra naha tsi Nyoo tan catyí ra naha tyeheh:

—Jutu Mañi yu, yooho tsitó un tsa tsicá iñi ndi tsihin añima ndi. Jánaha tsi ndi tsitsi tsa uvi taahan ra ihya naha ra, ndáa ra tsa nacatsi maa un, ²⁵tyin cuiso ra tyiñu tsa jacunaá ra Judas tsa cuenda cuatyí ra, tan cuahán ra nu taahán maa tsi cuhun ra —catyí ra naha, tsicán tahvi ra naha tsi Nyoo.

²⁶Tacan tan tavá cuenda ra naha ndáa ra cua tahan tsi cuiso tyiñu can. Tan tahan tsi tsi ra Matías. Ra ican cuví ra tahan tsi cutahan tsihin tsa utsi iin ra tsa tavá tyiñu ra Jesús.

2

Nu nuu Tatyí Ii Nyoo

¹Tsaá quivi vico Pentecostés, tan ndu iin tandihí nyivi tsa tsinú iñi tsi ra Jesús. ²Tan sana iñi ñi tan tsiñi ñi cucayu ityi andivi. Tumaa cucayu tsa vatsí tatyí xaan. Tan iyo xaan cuví tsitsi vehe nu yucú ñi. ³Tacan tan quituvi tumaa iin ñuhu tan tsaá tsi siqui intuhun intuhun ñi. ⁴Tan tandihí ñi tsitu ñi tsihin Tatyí Ii Nyoo. Tan quitsahá caahán ñi inga yuhu cuhva tsa jacahan maa Tatyí Ii Nyoo tsi ñi.

⁵Tan quivi can cuaha xaan ra ñuu Israel tsaá ra naha ñuu Jersualén. Ra vaha tsicá tsihin Nyoo cuví ra naha. Quee ra naha tandihí ñuu tsa cayucú nu ñuhu ñayivi. ⁶Tan tsa tsiñi ra can naha ra tsa iyo xaan cuví nu yucú nyivi cuenda ra Cristo, tan cuahán ra naha tan ndu iin ra naha tsihin ñi. Tan ña tsitó ra naha náa tsa caca iñi ra naha, tyin intuhun intuhun ra naha tsiñi ra

yuhu ra naha tsa caahán ñi jahá Tatyí li Nyoo. ⁷ Iyo xaan cuñí ra naha tan quitsahá natuhún tahan ra naha tan catyí ra naha:

—¿A ñavin nyívi ñuhu Galilea cuví tandihi ñi tsa caahán ihya? ⁸ ¿Nacuenda tyin tsiñí yo caahán ñi cuhva caahán intuhun intuhun yo? ⁹ Ihya yucú yo tsa cuví yo nyívi quee Partia, Media, Elam, Mesopotamia, Judea, Capadocia, Ponto, Asia, ¹⁰ Frigia, Panfilia, Egipto, tan nyívi quee ityi nuu ca Cirene ityi Africa. Tan yucú tucu yo tsa cuví yo nyívi ñuu Roma tan iyó yo ñuu ihya. Tan juhva yo cuví yo nyívi Israel nda quívi cacú yo. Tan inga yo cuví yo nyívi nanduví cuenda nyívi Israel tan nyicún yo ley tsa tyaa ra Moisés. ¹¹ Iyó tucu yo tsa cuví yo nyívi quee Creta tan Arabia. Maa tyin tandihi yo tan tsiñí yo tyin tsihin yuhu tsa caahán maa yo caahán ñi. Tan nacatyí tuhun ñi tsa cahnu tsa javahá Nyoo —catyí ra naha.

¹² Tandihi ra naha, iyo xaan cuñí ra naha, tan tsicá tuhun tahan ra naha tan catyí ra naha:

—¿Náa cuñí tsi catyi tandihi tsa cuví ihya? —catyí ra naha.

¹³ Maa tyin inga ra jacuñí nyaa ra naha tsi ñi, tan catyí ra naha tyin tsiñí ñi.

Nu caahán ra Pedro tsihin nyívi

¹⁴ Tacan tan nduvitá ra Pedro tsihin tsa utsi iin ca ra tava tyiñu ra Jesús. Tan ñihi cahán ra tan catyí ra:

—Nyooho yañi, tsa cuví ndo ra ñuu Israel, tan tandihi nyooho tsa iyó ñuu Jerusalén ihya. Cuñí tsi tsa coto ndo tuhun ihya. Tan tyaa soho vaha ndo tsa cua cahán yu tsihin ndo. ¹⁵ Tyin cuñí maa ndo tyin tsiñí ndi. Maa tyin ñavin nyixi tsihiñi ndi, tyin ña tuhvá nyívi coho nyixi hora ihya, tyin ndi jatyaan. ¹⁶ Maa tyin tsa cuví ihya cuví tsa cahán ra Joel, ra cuví ndusu yuhu Nyoo tahan tsanaha. Tyin catyí ra:

¹⁷ Nu cua ndihi quívi, catyí Nyoo, cua jaquitsi yu Tatyí li yu siqui tandihi nyívi. Tan cua cahán sehe ndo tsa cuenda yu.

Tan ra cuatyí tan ñi cuatyí cua janaha yu tsa iyo tsi ñi.

Tan nyívi tsahnu cua nyehe ñi ñumaahna jaha yu.

¹⁸ Cua jacuhun yu Tatyí li yu siqui ñi tsa jaha tyiñu tsa cuenda yu.

Tan cua cahán ñi tsa cuenda yu, catyí Nyoo.

¹⁹ Tan catyí ra tyin cua janaha ra tsa iyo cua nyehe nyívi ityi andívi.

Tan ityi nu ñuhu ñayívi cua javaha ra tsa iyo, seña niñi, seña ñuhu, tan vico yuhma.

²⁰ Tan ñicanyii cua ndunaa tsi.

Tan yoo cua nducuaaha tsi tumaa cuaaha niñi.

Tandihi tuhun caahán ra ihya cua cuví tsi tsa ndi cumañi ca tahan tsi quívi quitsi Jutu Mañi yo.

Tan quívi cua quitsi ra, iyo xaan cua cuví.

²¹ Tan tandihi nyívi tsa tsicán tahvi tsi ra cua cacú ñi, catyí ra Joel jahá Nyoo.

²² Tsa yaha nacatyí tuhun ra Pedro yacan, tacan tan catyí ra tsihin ra naha:

—Nyooho ra Israel, tyaa soho ndo tsa cua cahán yu ihya. Ra Jesús, ra ñuu Nazaret, maa Nyoo nacatsí tsi ra, tan tsa janahá Nyoo tsi yo tyin nditsa tsa nacatsí ra tsi ra, tsahá ra tunyee iñi tsi ra tan cuaha xaan tsa iyo tan tsa nyityi tan seña javahá ra. Tan tsa tsitó maa ndo tandihi tsa caahán yu ihya. ²³ Maa tyin quívi nacuhvá cuenda ndo tsi ra, javahá ndo tumaa cuhva tyaa maa Nyoo cuhva nda quívi jihna ñi. Tyin tsahá cuenda ndo tsi ra tsi ra caquiñi. Tan ticaá ra naha tsi ra nu cruu. Tsahñi ra naha tsi ra jahá ndo. ²⁴ Maa tyin Nyoo janandotó ra tsi ra. Jacacú ra tsi ra tyin ña cuví cundaca ñaha tuhun

tsīhi tsi ra. ²⁵ Tyin ra David caḥan ra tuhun cahan ra Cristo taḥan tsanaha, tan catyí ra:

Tacan ñi nyehé yu tsi Nyoo Jutu yu ityi nuu yu.

Maa ra nyaá ra ityi xiin cuaha yu tan nduve náa cuví jayuhvi tsi yu.

²⁶ Yacan cuenda sīi xaan cuñí yu. Tan jacahnú yu tsi Nyoo tsihin tsa sīi cuñí yu.

Tan cuñu ñuhu yu cua quitatu tsi tyin tsitó yu tyin cua nandoto yu inga tsaha.

²⁷ Tyin yooho, Nyoo Jutu yu, ña cua nacoo ihñi un añima yu nu yucú añima nyivi tsa tsihi,

tan ndi ña cua cuhva un tsa tyahyu cuñu ñuhu yu.

Tyin sehe ii maa un cuví tsi yu.

²⁸ Tan janaha un tsi yu ityi nu coo yu ñayivi ña cua naa maa.

Tan cua jacutu un tsi yu tsihin tusīi iñi tyin maa un nyaá tsihin yu, catyí ra David caḥan ra tsa caḥan ra Cristo taḥan tsanaha.

²⁹ Nyooho yañi, tsitó vaha yo tyin ra David tsīi tsaahnu yo tsihi ra tan quihvi ra tsitsi ñuhu. Tan ñaña ra ndi nyaá tsi ihya vityin. ³⁰ Maa tyin ra David cuví ra iin ndusu yuhu Nyoo. Tan tsitó ra tyin Nyoo catyí ra tyin juvin ñi tata

maa ra cua cuví ra Cristo. Tan ra Cristo, cuví ra cua cundaca ñaha tumaa tsa tsindaca ñaha ra David. ³¹ Tan ra David tumaa tsa tyin nyehé ra tsa cua cuví nu cuahán ca tsi ityi nuu. Tan caḥan ra tuhun tsa caḥan ra Cristo. Tan catyí ra tyin ña cua ndoo añima ra nu yucú añima nyivi tsa tsihi. Tan ndi ña cua tyahyu

cuñu ñuhu ra, catyí ra. ³² Tan ra Jesús can janandoto Nyoo tsi ra. Tan tandihi maa ndi cuví ndi tsandaa tsa cuenda tsa nandoto ra. ³³ Jutu Nyoo jacahnú ra tsi ra Jesús, tan tsihin ndaha cuaha ra cañihi ra tsi ra nda gloria. Tan ra Jesús naquihin cuenda ra Tatyí li tsa catyí Jutu yo Nyoo taḥan tsanaha tyin cuhva

ra tsi yo. Tan yacan cuví tsa tsaha ra tsi ndi vityin. Juvín tsi cuví tsa nyehé ndo tan tsiñí ndo. ³⁴ Tyin ñavin ra David nandaá ityi andivi. Maa tyin maa ra David caḥan ra tuhun ra Jesús, tan catyí ra:

Jutu Mañi yo Nyoo catyí ra tsihin Jutu Mañi yu ra Cristo: “Cunya xiin cuaha yu

³⁵ tsitsi tsa cua caquin yu tsi ra xaan iñi tsi un tsaha un”, catyí ra David jaha Nyoo.

³⁶ Tacan caḥan ra Pedro tsihin ra naha, tan catyí tucu ra:

—Nyooho tan tandihi ca nyivi Israel, coto vaha ndo tyin tuhun ra Jesús, yacan cuví tsa caahán yu tsihin ndo ihya. Ticaá ndo tsi ra nu cruu. Maa tyin cuví ra Jutu Mañi yo, tan cuví tucu ra Cristo ra ndacá ñaha tsi yo jaha Nyoo —catyí ra Pedro.

³⁷ Cuhva tsa tsiñi ra naha tsa caḥan ra Pedro tuhun ihya, cuiihya xaan cuñí ra naha cuví. Tan tsica tuhun ra naha tsi ra Pedro tan tsi tandihi ca ra tava tyiñu ra Jesús, tan catyí ra naha:

—Yañi, ¿nácaa javaha ndi vityin? —catyí ra naha tsihin ra tava tyiñu ra Jesús.

³⁸ Tacan tan catyí ra Pedro tsihin ra naha:

—Intuhun intuhun ndo ndu uvi iñi ndo cuatyí ndo tan naḥsama ndo cuhva iyó ndo. Tan qondutya ndo tsihin sivi ra Jesucristo. Tan cua jaha ra tucahnú iñi cuatyí ndo. Tacan tan cua cuhva Nyoo Tatyí li ra tsi ndo. ³⁹ Tyin taḥan tsanaha catyí Nyoo tyin cuhva ra Tatyí li ra tsi yo, tan tsi sehe yo, tan tsi nyivi tsa cañi iyó. Tyin tandihi nyivi tsa cua nacana Jutu Nyoo cua cuhva ra Tatyí li ra tsi ñi —catyí ra Pedro.

⁴⁰ Tsihin tuhun ihya tan tsihin inga ca tuhun, ra Pedro tsahaꝯ cuenda ra tsi ra naha tan catyí ra tsihin ra naha:

—Nduꝯu ndo cuhva na jacacu Nyoo tsi ndo, coto cunaa ndo tsihin nyívi caquiñi iyó nu ñuhu ñayívi ihya —catyí ra tsihin ra naha.

⁴¹ Tacan tan tandihi ra tsa tyaaꝯ yahvi tuhun cahān ra Pedro tsicoondutyā ra naha. Tan quitá tumaa uñi mil nyívi tsa tandihi ñi, tan ndu iin ñi tsihin nyívi yihí cuenda ra Jesucristo. ⁴² Tan tandihi quívi ndu iin tandihi ñi, tan nii iñi ñi tyaaꝯ soho ñi tsa jacuahá tandihi ra tavaꝯ tyiñu ra Jesucristo tsi ñi. Tan iin ñi cuví ñi tsihin tahan ñi, tan tsicān tahvi ñi tan tsatsí ñi paan tan tsihí ñi vinu tyin tacan tan ña cua naa iñi ñi tyin tsihí ra Cristo tsa cuenda cuatyí ñi.

Cuhva iyó nyívi yihí cuenda Jutu Mañi yo Jesucristo quívi can

⁴³ Tan cuaha tsa iyo javahaꝯ tandihi ra tsa tavaꝯ tyiñu ra Jesucristo jahaꝯ Nyoo. Tan tandihi ñi iyo cuñí ñi. ⁴⁴ Tandihi ñi yihí cuenda ra Cristo iin caa ñi iyó ñi tsihin tsa iyó tsi ñi. ⁴⁵ Xicó ñi tsa iyó tsi ñi. Tan tsatsá ñi xuhun ñi tsi nyívi tahan ñi cuhva tsa tsiñi ñuhu tsi intuhun intuhun ñi. ⁴⁶ Tandihi quívi tan ndu iin ñi nda vehe ñuhu cahnu. Tan nda yuvehe ñi iin caa ñi tsatsí ñi paan tan tsihí ñi vinu. Tan sñi cuñí ñi tsatsí ñi tyin iin ñi cuví ñi. ⁴⁷ Tan jacahnú ñi tsi Nyoo. Tan vaha caahán tandihi nyívi tuhun ñi. Tan iin tan iin quívi tan nducuahá ca nyívi quihví cuenda Jutu Mañi yo Jesús tyin jacacú ra tsi ñi.

3

Nu nduvahaꝯ iin ra coxo

¹ Iin quívi cuahán ra Pedro tsihin ra Juan vehe ñuhu cahnu. Cuví tsi cuhva caa uñi tsa tseñi, cuhva tsa tuhvá nyívi Israel cuahán cuandacán tahvi tsi Nyoo. ² Tan iin ra ndaahvi, coxo ra nda quívi cacuꝯ ra, nyaá ra yuhu cora vehe ñuhu cahnu can tandihi maa quívi. Tyin tsindacá ñi tsi ra na ndacan ra xuhun tsi nyívi quihví yuhu cora can, tan nañi tsi Yuhu Cora Sñi Caá. ³ Tacan tan nyehē ra coxo can tsi ra Pedro tsihin ra Juan tsa cua quihví ra naha yuhu cora can. Tan tsicān ra xuhun tsi ra naha. ⁴ Tan nyehē ra Pedro tan ra Juan tsi ra. Tan ra Pedro catyí ra tsihin ra:

—Nyehē tsi ndi —catyí ra.

⁵ Tacan tan quitsahaꝯ nyehé ra coxo can tsi ra naha. Cuñí maa ra tyin iyó tsa cua cuhva ra naha tsi ra. ⁶ Maa tyin ra Pedro catyí ra tsihin ra:

—Nduve xuhun cuitsin tan xuhun cuaan iyó tsi yu, tan cuhva yu tsi un. Maa tyin tsa iyó tsi yu cua cuhva yu tsi un. Tsihin sivi ra Jesucristo ra ñuu Nazaret, nduvita tan çaça —catyí ra Pedro tsihin ra.

⁷ Tacan tan tñn ra Pedro ndaha cuaha ra tan cañihí ra tsi ra. Tan juvin ñi cuhva can nacoꝯ tunyee iñi nduvi taahan tsaha ra tan jucun tsaha ra. ⁸ Tacan tan ra coxo can ndavaꝯ ra, tan nduvitā ra tsinyaā nyityi ra. Tan quitsahaꝯ tsicá ra. Tan quihví ra tsihin ra naha tsitsí cora vehe ñuhu can, tsicá ra, tan ndavá ra, jacahnú ra tsi Nyoo. ⁹ Tandihi nyívi nyehē ñi tsi ra tyin tsicá ra tan jacahnú ra tsi Nyoo. ¹⁰ Tan iyo xaan cuñí ñi tan yuuhví ñi tsa cuenda tsa nduvahaꝯ ra can. Tyin nacotó ñi tsi ra. Tyin juvin ra cuví ra tsa tuhvá tsinyaā Yuhu Cora Sñi Caá can tsicān ra xuhun tsi nyívi.

Nu caahán ra Pedro tuhun ra Cristo tsihin nyívi nu cuví corredor cuenda ra Salomón

¹¹ Ra coxo tsa nduvahaꝯ can, ña jañá maa ra tsi ra Pedro tan ra Juan. Tan tandihi nyívi iyo cuñí ñi, tan tsinú xaan ñi tsaꝯ ñi nu cuví corredor cuenda ra

Salomón tyin cua nyehe ñi tsi ra coxo can tyin tsa nduvahã ra. ¹² Tsa nyehe ra Pedro yacan, tan catyí ra tsihin nyívi can:

—Nyooho ra Israel, ¿nacuenta iyo xaan cuñí ndo? Tan ¿nacuenta nyehé xaan ndo tsi nyuhu? ¿A cuñí maa ndo tyin tsihin tunyee iñi maa ndi, a tsa cuenda tsa catsi iyó ndi nuu Nyoo, tan cuví janduvahã ndi tsi ra coxo ihya? ¹³ Ñavin maa nyuhu janduvahã tsi ra. Nyoo ra cuví Nyoo tsii tsaahnu yo, ra Abraham, ra Isaac tan ra Jacob, ra ican jacahnu tsi Sehe ra tan tsahã ra tunyee iñi tsi ra, ra tsa tsahã cuenda ndo tsi ra Pilato, ra cumí tyiñu. Tan ra Pilato cuñi ra jaña ra tsi ra. Maa tyin nyooho ña tsahã ndo. ¹⁴ Tahã tsi tsa ndacan ndo tsa jaña ra tsi ra vaha, tan ra ii can, maa tyin nyooho tsican ndo tsa jaña ra tsi iin ra tsahñí ndiyi. ¹⁵ Tan nyooho tsahñí ndo tsi ra tsa tsahã ñayívi nyito coo yo tsihin Nyoo. Maa tyin Nyoo Jutu yo janandotó ra tsi ra. Tan ña ndoq ra nu yucú añima nyívi tsa tsihi. Tan nyuhu cuví ndi tsandaa tsa cuenda tsa nandotó ra. ¹⁶ Tan juvin ra Jesús cuví ra tsa tsahã tunyee iñi tsi ra coxo ihya tan nduvahã tsaha ra, tyin tsinú iñi ndi tyin iyó tunyee iñi tsi ra Jesús. Yacan cuenda nduvahã tsaha ra ihya, tan nacotó vaha ndo tsi ra. Tan tandihí nyooho nyehe ndo tyin nduvahã ra tsa cuenda tsa tsinú iñi ndi.

¹⁷ Tsitó yu, —catyí ra Pedro— tyin quívi tsa tsahñí ndo tsi ra Jesús, ña tsitó ndo tyin ña vaha tsa javahá ndo. Tan tacan tucu ra cuví ityi nuu tsihin ndo, ña tsitó ra naha. ¹⁸ Maa tyin tacan jacuví ndo tan cundaq tsa cahã ra cuví ndusu yuhu Nyoo tahã tsanaha, tyin catyí ra naha tyin ra Cristo cua nyehe ra tundoho. ¹⁹ Yacan cuenda ndu uvi iñi ndo cuatyí ndo, tan nacuhva cuenda ndo añima ndo tsi Nyoo, na ndatsi cuatyí ndo. Tacan tan sii xaan cua cuñí añima ndo jaha tunyee iñi Jutu Mañi yo. ²⁰ Tacan tan cua jaquitsi ra tsi ra Jesús ra cuví Cristo, na quitsi ra inga tsaha. Tyin nda quívi jihna ñi tyaa Nyoo cuhva tyin quitsi ra tsa cuenda yo. ²¹ Taahán tsi tsa ndoó ra Jesucristo gloria tsa vityin nda cuanda quívi cua jandutsaa Nyoo tandihí maa tsa iyó. Tumaa cuhva catyí ra cuví ndusu yuhu Nyoo tahã tsanaha. ²² Tyin tacan catyí ra Moisés tsihin tsii tsaahnu yo: “Cua jaquitsi Jutu yo Nyoo tsi ra tsa cua cahan tuhun ra. Tan juvin ñi nyívi yo cua cuví ra. Tan cua cahan ra tuhun Nyoo tsihin ndo tumaa caahán yuhu. Tyaa yahvi ndo tandihí tsa cua cahan ra tsihin ndo. ²³ Tyin tandihí nyívi tsa ña cua tyaa soho tsa cua cahan ra, cua cunaa ñi, tyin ña cua cutahan ñi tsihin nyívi tsa nacatsi Nyoo”, catyí ra Moisés.

²⁴ Tan tacan tucu tandihí ra cuví ndusu yuhu Nyoo nda quívi tsicoq ra Samuel tan nda cuanda vityin, jacotó ra naha tsa cuví vityin. ²⁵ Tandihí tsa catyí Nyoo tyin cuhva ra tsi yo, cahã ra cuví ndusu yuhu Nyoo tahã tsanaha. Tandihí can tsii maa ndo cuví can. Tan tyiñu tsa ndoq Nyoo tsihin ra Abraham tsii tsaahnu yo, juvin ñi tsa cuenda maa ndo cuví yacan. Tyin catyí Nyoo tsihin ra Abraham: “Tandihí nyívi tsa iyó nu ñuhu ñayívi cua nasoco yu tsi ñi tsa cuenda nyívi tata un.” ²⁶ Tan yacan cuenda quívi janandotó Nyoo tsi Sehe ra, jihna ca nu yucú ndo jacuhun ra tsi ra, tyin nasoco ra tsi ndo, tan intuhun intuhun ndo nacoo ndo tsa caquiñi iyó ndo —catyí ra Pedro tsihin ñi.

4

Nu tñin ra cuví ityi nuu vehe ñuhu cahnu naha ra tsi ra Pedro tan ra Juan

¹ Ndi caahán ca ra Pedro tan ra Juan tsihin nyívi, tan tsaa ra cuví jutu naha ra tsihin ra cuví ityi nuu tsihin ra jahá cuenda vehe ñuhu, tan tsihin ra cuví saduceo naha ra. ² Nduxañ xaan ra naha tyin ra Pedro tan ra Juan jacuahá

ra naha tsi nyivi tan catyí ra naha tyin nditsa tsa cua nandoto nyivi tsa tsa tsihi, tyin ra Jesús nandoto ra. ³ Tacan tan tijn ra naha tsi nduvi taahan ra tava tyiñu ra Jesús can naha ra. Tan tyihí ra naha tsi ra naha vehe caa. Tan ndoo ra naha nda cuanda inga quivi tyin tsa cueñi cuví cuhva can. ⁴ Maa tyin cuaha ñi tsa tsiñi tuhun caahán ra Pedro quitsaha tsinú iñi ñi. Tan ndu iin ñi tsihin nyivi yihí cuenda ra Jesús. Tan tsa tandihi ñi quitá maa uhun mil cuví tsa maa ñi maa rayi naha ra.

⁵ Tsa tuvi inga quivi, nda ñuu Jerusalén ndu iin tandihi ra cumí tyiñu cuenda nyivi Israel, tan tsihin ra tsahnu, tan tsihin ra cuví maestro cuenda ley tsa tyaa ra Moisés. ⁶ Tan nyii tucu ra Anás ra jutu tsahnu cuví ityi nuu. Tan nyii tucu ra Caifás, tan ra Juan, tan ra Alejandro. Tan yucu ndihi tucu tandihi rayi tsa cuví nyivi ra jutu tsahnu cuví ityi nuu. ⁷ Tacan tan tava tyiñu ra naha na cuquihin ra naha tsi ra Pedro tan ra Juan. Tan tsindaca ra naha tsi ra naha nda mahñu nu yucu ra naha. Tan tsica tuhun ra naha tsi ra naha, tan catyí ra naha:

—¿Yóo tsaha ndatu tsi ndo tsa janduvaha ndo tsi ra can? ¿Yóo tsaha tunyee iñi tsi ndo tsa javaha ndo tyehen? —catyí ra naha tsihin ra Pedro tan ra Juan.

⁸ Tan ra Pedro tsitú ra tsihin Tatyí Ii Nyoo. Tan nacahan ra tsihin ra naha: —Nyooho ra ndacá ñaha Israel ñuu yo ihya, tan nyooho ra tsahnu. ⁹ Vityin tsicá tuhun ndo tsi ndi tsa cuenda tsa vaha tsa cuví tsi ra coxo ihya, tyin cuñi ndo coto ndo náca nduvaha ra. ¹⁰ Yacan cuenda cua catyí tuhun ndi tsihin ndo na coto tandihi nyivi Israel. Tyin ra ihya nyaá ra nuu tandihi ndo, tyin nduvaha ra tsihin tunyee iñi tsi ra Jesucristo, ra ñuu Nazaret, ra tsa tsaha cuenda ndo na cúu ra nu cruu. Maa tyin Nyoo janandoto ra tsi ra. ¹¹ Tan juven ra Jesús cuví yuu tsa tsiñi ñuhu ca tsa ña cuñi ra javahá vehe cuatyíñu ra, tumaa cuhva catyí nuu tutu Nyoo. Tan nyooho cuví ra javahá vehe tan ña cuñi ndo yuu tsa tsiñi ñuhu ca can. ¹² Yoñi inga ra cuví jacacú tsi yo. Tyin intuhun ñi maa ra tsaha Nyoo tyin jacacu ra tsi yo —catyí ra Pedro tsihin ra can naha ra.

¹³ Tan ra cumí tyiñu can naha ra iyo xaan cuñi ra naha tsiñi ra naha tsa caahán ra Pedro tan ra Juan tyin ñi xaan iñi ra naha caahán ra naha, tan ñavin ra cahvi escuela cuví ra naha. Tacan tan nacoto ra naha tsi ra naha tyin ra ican naha ra cuví ra tsa tsica tsihin ra Jesús quivi can. ¹⁴ Tan ra tsa nduvaha can, nyaá nyityi ra tsihin ra naha. Yacan cuenda ña cuví cahan ra cumi tyiñu can naha ra tsa ndavaha ñi siqui ra Pedro tan ra Juan. ¹⁵ Tacan tan catyí ra cumi tyiñu naha ra tsihin ra naha:

—Quita nduñi taahan nyooho tsata vehe.

Tan quitá ra naha. Tan ndoo ra cumi tyiñu can naha ra natuhún tahan ra naha. ¹⁶ Tan catyí ra naha:

—¿Náa javaha yo tsihin ra ihya naha ra? Tyin tandihi maa nyivi Jerusalén tsitó ñi tsa iyo tsa javaha ra naha. Tan ña cua cuví catyí yo tyin ña nditsa. ¹⁷ Maa tyin ña cuñi yo tsa cuaha ca nyivi coto tuhun ihya, yacan cuenda vaha ca tsa casi yo tsi ra naha, tan cahan yo tsihin ra naha na ña cahan ca ra naha tuhun ra Jesús tsihin nyivi —catyí ra cumi tyiñu naha ra.

¹⁸ Tacan tan cana ra cumi tyiñu tsi ra Pedro tan ra Juan. Tan catyí ra naha tsihin ra naha tyin ndi luxu ca maa tan ña cahan ca ra naha tuhun ra Jesús. Tan na ña jacuaha ca ra naha tsi nyivi. ¹⁹ Maa tyin ra Pedro tan ra Juan nacahan ra naha tan catyí ra naha:

—Tyiḡi tuñi ndo iñi ndo tan nyeḡe ndo tatun vaha ca tsa tyaa yahvi ndi tsi maa ndo o vaha ca tsa tyaa yahvi ndi tsi Nyoo. ²⁰ Tyin nyuhu ña cuví tsa jandihí ndi tsa nacatyí tuhun ndi tsa nyeḡe ndi tan tsa tsiñi ndi —catyí ra naha.

²¹ Tacan tan tyasí nyico ra cumi tyiñu naha ra tsi ra Pedro tan ra Juan. Tan jaña ra naha tsi ra naha tyin ña ñihí ra naha nácaa tatsi tuñi ra naha tsi ra naha. Tyin tandihí nyivi tan jacahnú ñi tsi Nyoo tsa cuenda tsa cuví can. ²² Tyin rayi tsa nduvaha can, tsa yaha uvi xico cuiya ra, tan tacan cuiya taḡan ra tundoho tan nduvaha ra jaha Nyoo.

Nu tsicān nyivi yihi cuenda ra Cristo tunyee iñi Nyoo

²³ Tan tsa quitā ra Pedro tan ra Juan, cuahán ra naha nu yucú nyivi yihi cuenda ra Jesús. Tan nacatyí tuhun ra naha tandihí tsa caḡan ra tsahnu naha ra tan ra jutu tsa cuví ityi nuu naha ra tsihin ra naha. ²⁴ Cuhva tsa tsiñi tandihí ñi, tan iin caa ñi quitsaha tsicān tahvi ñi tsi Nyoo. Tan catyí ñi:

—Jutu Mañi yu, yooḡo javaha un andivi tan ñuhu ñayivi. Javaha un ndutya ñuhu. Tan tandihí ca tsa iyó, maa un javaha. ²⁵ Tan yooḡo tsihin Tatyí Ii un jacahaḡan un tsi ra David taḡan tsanaha. Tan catyí ra:

¿Nacuenda tsa nduxaán nyivi ña tsitó tsi Nyoo?

¿Nacuenda tsicá iñi ñi tuhun tsa nduve yahvi nyaá?

²⁶ Rey naha ra tan tsihin ra tsa ndacá ñaha nu ñuhu ñayivi ihya nduvitā ra naha

siqui un, Jutu Mañi yu, tan siqui ra Cristo, ra nyisó tyiñu maa un, catyí ra David.

²⁷ Jutu Mañi yu, nditsa tyin ra Herodes, tan ra Poncio Pilato ndu iin ra naha ñuu Jerusalén ihya tsihin ra ñuu Roma naha ra tan tsihin ra ñuu Israel naha ra tyin cahñi ra naha tsi ra Jesús Sehe ii un, tsa nacatsi vaha maa un. ²⁸ Tan tacan javaha ra naha, tumaa cuhva tsa catyí maa un taḡan tsanaha tyin cua cuví. ²⁹ Tan vityin, Jutu Mañi yu, nyeḡe tyin cuñi ra naha casí ra naha tsi ndi. Tan cuhva tsa ñi coo iñi ndi tyin tyiñu maa un javahá ndi, Jutu Mañi yu. Tan na ña nayuhvi ndi cahan ndi tuhun maa un. ³⁰ Tan tsihin tunyee iñi maa un tan cua nduvaha nyivi cuuhví, tan cua nyeḡe ndi seña tan tsa iyo tsa cuenda tunyee iñi ra Jesús Sehe ii un —catyí ñi, tsicān tahvi ñi tsi Nyoo.

³¹ Tan cuhva tsa ndihí tsicān tahvi ñi tsi Nyoo tan taḡan nu yucú ñi. Tan tandihí ñi tsitu ñi tsihin Tatyí Ii Nyoo tan caḡan ñi tuhun Nyoo tsihin tsa ña yuhví ñi.

Nduve tsa cumañi tsi nyivi yihi cuenda ra Cristo

³² Tandihí ñi tsa tsinú iñi, iin ñi cuví ñi, tan iin ñi cuhva tsicá iñi ñi. Ndi intuhun ñi tan ña catyí ñi tyin tsa tsii maa ñi cuví tsa iyó tsi ñi, tyin tsii tandihí ñi cuví can. ³³ Tan tsihin tunyee iñi cahnu, caahán ra tava tyiñu ra Jesús tuhun tsa nandoto Jutu Mañi yo Jesús. Tan Nyoo nasocó xaan ra tsi tandihí ra naha.

³⁴ Tan ndi intuhun ñi tan nduve tsa cumañi tsi ñi tyin tandihí ñi tsa iyó vehe o ñuhu ñi, xicó ñi can. Tan cua ndaca ñi xuhun can ³⁵ tsi ra tava tyiñu ra Jesús. Tan maa ra naha natsatsá xuhun can tsi intuhun intuhun nyivi cuhva tsa tsiñi ñuhu tsi ñi. ³⁶ Tacan javaha iin ra tsa nañi José. Ra ican cuví ra tata ra Leví. Tan cacu ra ñuhu Chipre tsa canyí mahñu ndutya ñuhu. Tan ra tava tyiñu ra Jesús jacunañi ra naha tsi ra Bernabé. Tan sivi can cuñi tsi catyí: ra jandu iin iñi nyivi. ³⁷ Tan ra Bernabé can xico ra ñuhu ra. Tan tsaha ra xuhun can tsi ra tava tyiñu ra Jesús.

5

Cuatyi ra Ananías tsihin ña Safira

¹ Maa tyin iin ra tsa nañi Ananías tsihin ña Safira, ñasihi ra, xico ñi iin ñuhu. ² Tan tyihj xeehe ñi juhva xuhun. Tacan tan ra Ananías tsindaca ra xuhun tsa ndoo ña tsi ra tava tyiñu ra Jesús. Tan catyi ra tyin tandihi xuhun tsa cuyahvi ñuhu cuví can. ³ Tacan tan catyi ra Pedro tsihin ra:

—Yooho Ananías, ¿nacuenda tsa tsaha un tsa quihvi nu ña vaha añima un? Tyin cuñi un jandavi ñaha un tsi Tatyí Ii Nyoo, tan catyi un tyin tandihi xuhun tsa cuyahvi ñuhu can cuví tsehe, tan ña nditsa un tyin ndoo juhva xuhun can tsi un. ⁴ Tsii un cuví ñuhu can, tan tsii un cuví xuhun tsa ñihj un cuenda ñuhu can. ¿Nacuenda tsa cuñi un jandavi ñaha un tsi Nyoo tan catyi un tyin tandihi xuhun can tsaha un? Maa tyin ñavin tsi nyuhu jandavi ñaha un, tyin tsi maa Nyoo jandavi ñaha un —catyi ra Pedro tsihin ra Ananías.

⁵ Tsa tsiñj ra Ananías tuhun tsa cahan ra Pedro, nduva ra tan tsihj ra. Tan tsa tsito nyivi tuhun ihya tan nayuhvi xaan ñi. ⁶ Tacan tan tsaq ra cuatyi naha ra tan cava nuu ra naha jahma cuñu ñuhu ra Ananías. Tan tsahan ra naha tsindaca ra naha tsi ra nu ndaa cumi santu. ⁷ Yaha uñi hora tan tsaq ñasihi ra Ananías tan quihvi ña nu yucú ra tava tyiñu ra Jesús, tyin ña tsito ña tsa cuví. ⁸ Tan quitsaha tsicá tuhun ra Pedro tsi ña tan catyi ra tsihin ña:

—¿A tyehen ñi cuví xuhun tsa cuyahvi ñuhu ndo? —catyi ra Pedro tsihin ña.

Tacan tan nacahan ña tan catyi ña tsihin ra:

—Tacan ñi cuví xuhun tsa cuyahvi tsi —catyi ña tsihin ra.

⁹ Tacan tan catyi ra Pedro tsihin ña:

—¿Nacuenda tsa natuhun tahan ndo tan cuñi ndo jandavi ñaha ndo tsi Tatyí Ii Jutu Mañi yo Nyoo? Ican vatsi ra tsa tsahan tsindaca tsi yi un nu ndaa cumi santu. Tan vityin cua cundaca ndihi ra naha tsi un —catyi ra Pedro tsihin ña Safira.

¹⁰ Tan juvin ñi cuhva can tan nduva ña tsaha ra Pedro, tan cueta tsihj ña. Tan quihvi ra cuatyi can naha ra, tan nyehe ra naha tyin canyi ña tsihj ña. Tan cañihj ra naha tsi ña, tan tsindaca ra naha tsi ña nu ndaa cumi sandu. Tan tinyij ra naha tsi ña xiin yi ña. ¹¹ Tan tandihi nyivi yihí cuenda ra Cristo, tan tandihi nyivi tsa tsito tuhun can, nayuhvi xaan ñi.

Cuaha xaan tsa iyo tan seña javaha ra tava tyiñu ra Jesús

¹² Cuaha seña tan tsa iyo javaha ra tava tyiñu ra Jesús nu yucú nyivi. Tan tandihi ñi yihí cuenda ra Cristo ndu iin ñi nu cuví corredor cuenda ra Salomón. ¹³ Tan nyivi tsa inga cuenda ña caná iñi ñi cutahan ñi tsihin ñi yihí cuenda ra Cristo. Maa tyin nyivi can vaha caahan ñi siqui ñi yihí cuenda ra Cristo. ¹⁴ Tan cuaha xaan nyivi quitsaha tsinú iñi tsi Jutu Mañi yo Jesús, tahan ñi rayi tan ñaha. ¹⁵ Tan nda cuanda tava ñi tsi nyivi cuuhvi ityi cahnu, tsaquin ñi ñi nu tsito. Tyin tatun cua yaha ra Pedro tan yaha tixahnu ra siqui ñi cua nduvaha ñi. ¹⁶ Tacan tucu nyivi iyó yatyin ñi ñuu Jerusalén can, cuandacá ñi tsi nyivi cuuhvi tan nyivi tsa yihí tatyí ña vaha. Tan nduvaha tandihi ñi.

Nu nyehé ra Pedro tan ra Juan tundoño

¹⁷ Tacan tan ra jutu tsaahnu tsa cuví ityi nuu, tan ra yihí cuenda ra cuví saduceo naha ra, ndasi cuñi ra naha nyehé ra naha tsi ra tava tyiñu ra Jesús tsa cuenda tsa vaha tsa javahá ra naha tsihin tunyee iñi tsa tsaha Nyoo tsi ra naha. ¹⁸ Tacan tan tñj ra naha tsi ra naha. Tan tyihj ra naha tsi ra naha

vehe caa. ¹⁹ Maa tyin tsa cuaa can quítsi iin ángel tsa jaquítsi Jutu Mañi yo, tan nuñá ra yuvehe caa can. Tan tava ra tsi ra naha. Tan catyí ra tsihin ra naha:

²⁰ —Cuahaan ndo tan cunyacu nyityi ndo vehe ñuhu cahnu. Tan nacatyí tuhun ndo tsihin nyivi nácaa coo ñi ñayivi nyito tsa iyó ndo —catyí ángel can tsihin ra naha.

²¹ Tsa tsiñi ra naha tsa cahān ra ángel can, tan cuahān ra naha. Tan tsa tuvi inga quivi can nañihí nyivi tsi ra naha vehe ñuhu cahnu. Tan quítsaha jacuahá ra naha tsi ñi.

Tan tsitsi tsa jacuahá ra naha tsi ñi, tan ndu iin ra jutu tsaahnu tsa cuví ityi nuu tan ra tsa yucú tsihin ra. Tan canā ra naha tsi ra cumi tyiñu cuenda nyivi Israel tyin coo ra naha junta. Tacan tan tava tyiñu ra naha na cuquihin ra naha tsi ra tava tyiñu ra Jesús nu yucú ra naha vehe caa can. ²² Maa tyin cuhva tsa tsaā ra vitya naha ra tsitsi vehe caa can, ña nañihí ra naha tsi ra naha. Tan cuanuhū ra naha cua nacatyí tuhun ra naha tsihin ra jutu tsaahnu tsa cuví ityi nuu. ²³ Tan catyí ra naha tsihin ra:

—Ndasí yuvehe caa can tan tsaā ndi. Tan andaru, yucú ra naha yuvehe jahá cuenda ra naha. Maa tyin cuhva tsa nuñá ndi yuvehe can, yoñi maa nañihí ndi —catyí ra naha tsihin ra jutu tsaahnu tsa cuví ityi nuu.

²⁴ Tacan tan ra jutu tsaahnu tsa cuví ityi nuu can tsihin ra yihí ndaha tsi tandihí ra tsa jahá cuenda vehe ñuhu can tan tsihin ra jutu tsa cuví ityi nuu naha ra, tsiñi ra naha tsa cahān ra vitya naha ra tsihin ra naha tan iyo xaan cuñí ra naha. Tan natuhun tahan ra naha nácaa javaha ra naha tan cundihi tuhun can. ²⁵ Tacan tan tsaā iin ra tan catyí ra:

—Ra tsa tyihí ndo vehe caa can naha ra, yucú ra naha vehe ñuhu jacuahá ra naha tsi nyivi —catyí ra.

²⁶ Tacan tan ra yihí ndaha tsi ra jahá cuenda vehe ñuhu can, tsaahān ra tsihin ra vitya naha ra, tan tsiquihin ra naha tsi ra tava tyiñu ra Jesús tsihin tsa vii ñi tan ña cañi ra naha tsi ra naha, tyin yuuhví ra naha tsi nyivi coto cañi ñi yuu tsi ra naha. ²⁷ Tsindaca ra naha tsi ra tava tyiñu ra Jesús nuu ra cumi tyiñu vehe ñuhu cahnu. Tan ra jutu tsaahnu tsa cuví ityi nuu catyí ra tsihin ra tava tyiñu ra Jesús:

²⁸ —Nyuhu tsa cahān vaha xaan ndi tsihin ndo tyin ña cahan ca ndo tuhun ra Jesús. Maa tyin nyooho ña tyaa soho ndo tsa cahān ndi. Tan tsa ndihí maa tsitsi ñuu Jerusalén jacotó ndo tuhun ra. Tan cuñí ndo tyaa ndo cuatyí can siqui ndi tyin tsihi ra —catyí ra jutu tsaahnu tsa cuví ityi nuu tsihin ra naha.

²⁹ Tacan tan nacahān ra Pedro tan inga ra tava tyiñu ra Jesús, tan catyí ra naha:

—Taahān tsi tyaa yahvi jihna ndi tsi Nyoo tan ñavin ca tsi nyooho. ³⁰ Nyoo cuenda tsi tsaahnu yo juvin ra janandotó tsi ra Jesús, ra tsa ticaā ndo nu cruu tan tsañi ndo. ³¹ Tan ra Jesús cuví ra tsa jacahnū xaan Nyoo, tan tyaa ra tsi ra xiin cuaha ra, tyin cua cundaca ñaha ra tandihí maa. Tan intuhun ñi maa ra cuví ra jacacú tsi yo. Tyin tacan tsahá ra cuhva tsi yo tsa cuví yo nyivi Israel na ndu uvi iñi yo cuatyí yo tan jaha ra tucahnū iñi cuatyí yo. ³² Tan nyuhu cuví ndi tsandaa tsa cuenda tandihí yacan. Tan tacan cuví tucu Tatyí Ii Nyoo tsa tsahā Nyoo cunyaa añima nyivi tyaa yahvi tsi ra —catyí ra Pedro tsihin ra naha.

³³ Tan tsa tsiñi ra naha tsa cahān ra Pedro, nduxaān xaan ra naha. Tan cuñi ra naha cahñi ra naha tsi ra naha. ³⁴ Maa tyin tsihin ra cumi tyiñu can naha ra nyi iin ra cuví fariseo tsa nañi Gamaliel. Tan cuví ra maestro cuenda ley

Nyoo tsa tyaá ra Moisés. Tan nyívi tyaá yahvi xaan ñi tsi ra. Tan ra Gamaliel can, nduvitá nyityi ra. Tan caahán ra na quita ra tavá tyiñu ra Jesús tañi ñi. Tacan tan quita ra naha. ³⁵ Tan quitsahá caahán ra Gamaliel can tsihin tandihí ca ra cumí tyiñu naha ra, tan catyí ra:

—Yoo, ra tsa ndacá ñaha tsi nyívi Israel, jaha yo cuenda tsi yo tsihin tsa cua javaha yo tsi ra ican naha ra. ³⁶ Nducuhun iñi ndo tyin tsa iyó juhva quívi nduvitá iin ra tsa tsinañi Teudas. Tan catyí ra tyin cuví ra iin ra vaha. Tan quita máa tumaa cumi cientu rayi tsinyicun tsi ra. Maa tyin yaha can tsahñi nyívi tsi ra. Tan tandihí ra tsa tsinyicun tsi ra cuanuhu ra naha ñuu ra naha. Tan tsindihí tuhun can. ³⁷ Yaha can tan nu cuahán ca tsi ityi nuu, quívi nacahvi ra gobiernu tsi nyívi, tan nduvitá ra Judas ra ityi Galilea. Tan cuaha xaan nyívi tsinyicun tucu tsi ra can. Maa tyin juvin ñi tsahñi nyívi tsi ra. Tan tandihí ñi tsa tsinyicun tsi ra cuanuhu ñi ñuu ñi. ³⁸ Yacan cuenda jaña yo tsi ra ihya naha ra. Tan ña cua tyihi yo tsi yo tsihin ra naha tyin tatun tuhun iin rayi ñi cuví tsa jacuahá ra naha, cua cundihi tuhun can. ³⁹ Maa tyin tatun nditsa tyin tuhun Nyoo cuví tsa jacuahá ra naha, ña cua cuví casi yo. Jaha yo cuenda tsi yo tyin ña vaha cañi tahan yo tsihin Nyoo —catyí ra Gamaliel tsihin ra naha.

⁴⁰ Tandihí ra naha ndoo ra naha vaha tsa ña cua cahñi ra naha tsi ra naha. Tacan tan cana ra naha tsi ra tavá tyiñu ra Jesús. Tan catyí ra cumí tyiñu naha ra tsihin ra vitya naha ra na cañi ra naha tsi ra naha. Tan tyasi ra naha nu cahan ra naha tuhun ra Jesús. Tacan tan jaña ra naha tsi ra naha. ⁴¹ Tan quita ra naha nuu ra cumí tyiñu. Tan sii xaan cuñi ra naha tyin tsahá Nyoo ndatu tyin nyehé ra naha tundocho tsa cuenda ra Jesús. ⁴² Tan ña jandihí ra naha tsa caahán ra naha. Tan tandihí quívi jacuahá ra naha tuhun ra Jesucristo vehe ñuhu tan vehe nyívi.

6

Nu nacatsí nyívi yihí cuenda ra Jesús utsa taahan ra naha tyin jaha cuenda ra naha náa tsa tsiñi ñuhu tsi ñi

¹ Tan nu cuahán ca tsi quívi cuaha xaan nyívi yihí cuenda ra Cristo cuví. Tacan tan nyívi tsa caahán yuhu griego quitsahá caahán ñi siqui nyívi tsa caahán yuhu hebreo tan catyí ñi tyin cuhva tsa tsatsá ra naha tsa catsi ñi tandihí quívi ña jahá vaha ra naha cuenda tsi ñi ndaahvi grecia tsa tsihi yí.

² Tacan tan tandihí tsa utsi uvi taahan ra tavá tyiñu ra Jesús jandu iin ra naha tsi tandihí nyívi yihí cuenda ra Cristo. Tan catyí ra naha tsihin nyívi can:

—Ña vaha tsa jandihí ndi tsa caahán ndi tuhun Nyoo tan tsa tsatsá ndi tsa catsi ndo. ³ Yacan cuenda, nyoocho yañi, nanducu ndo utsa taahan ra nu yucú yo ihya, ra vaha iyó tsihin Nyoo, ra tsa iyó tsa tsiñituñi iñi, ra tsitú tsihin Tatyí Ii Nyoo. Tan cuhva yo tyiñu ihya tsi ra naha. ⁴ Tan nyuhu cua jañihi ndi ndacan tahvi ndi tsi Nyoo, tan cua jacuaha ca ndi tuhun Nyoo —catyí ra naha.

⁵ Tandihí ñi tan ndoo ñi vaha. Tan nacatsj ñi tsi ra Esteban. Tyin tsinú xaan iñi ra tsi Nyoo. Tan tsitú ra tsihin Tatyí Ii Nyoo. Tan nacatsj tucu ñi tsi ra Felipe, tan ra Prócoro, tan ra Nicanor, tan ra Timón, tan ra Parmenas, tan ra Nicolás tsa cuví ra iin ra ñuu Antioquía, tan nanduví ra iin ra Israel. ⁶ Tacan tan tsindaca ñi tsi ra naha nu nyecú ra tavá tyiñu ra Jesús. Tan tyiso ndaha ra naha jiñi intuhun intuhun ra naha tan tsican tahvi ra naha tsi Nyoo tsa cuenda ra can naha ra.

⁷ Tan tsityá ca tuhun Nyoo. Tan nducuahá ca ñi yihí cuenda ra Cristo ñuu Jerusalén. Tan cuaha xaan ra cuví jutu cuenda nyivi Israel natsinü ndihi iñi ra naha tuhun ra Cristo.

Nu tyihí ra naha tsi ra Esteban vehe caa

⁸ Ra Esteban cuví ra iin ra tsa tsitú tsihin tunyee iñi Nyoo. Tan vaha xaan nyivi cuví ra tyin tsitú añima ra tsihin tsa vaha tsi Nyoo. Tan cuaha xaan tsa iyo tan seña javahá ra nu yucú nyivi. ⁹ Tacan tan juhva ra tsa tsicá vehe ñuhu ñuu Israel tsa nañi Vehe Ñuhu Cuenda Nyivi Ndoó Nuña cutahan ra naha tsihin juhva ra ñuu Cirene naha ra, tan cutahan ndihi juhva ra ñuu Alejandría naha ra, tan ra ityi Cilicia naha ra, tan ra ityi Asia naha ra. Tan quitsahá caahán yuhu tahan ra naha tsihin ra Esteban. ¹⁰ Maa tyin ña cuví jahá canaa ra naha tsi ra, tyin ra Esteban caahán ra tsihin tsa tsifituñi jiñi ra tsa tsahá Tatyí li Nyoo tsi ra. ¹¹ Tacan tan tyahví ra can naha ra tsi juhva ra na cahan ra naha cuendu siqui ra Esteban tan catyí ra naha tyin ra Esteban caahán ra ndavaha ñi siqui ra Moisés, tan siqui Nyoo. ¹² Yacan cuenda tandihi nyivi can quitsahá cuvaá ñi tan tsihin ra tsahnu naha ra tan ra cuví maestro cuenda ley Nyoo. Tacan tan tñin ra naha tsi ra Esteban. Tan tsahan ra naha tsindacá ra naha tsi ra nu ndu iin ra cumí tyiñu cuenda vehe ñuhu nyivi Israel. ¹³ Tan nducu ra naha tsi ra cahan cuendu siqui ra Esteban. Tan maa ra naha catyí ra naha tyehen:

—Ra Esteban ihya, ña jandihí ra tsa caahán ra ndavaha ñi siqui vehe ñuhu yo tan siqui ley Nyoo tsa tyaa ra Moisés. ¹⁴ Tan tsifñi ndi tsa caahán ra tyin ra Jesús, ra Nazaret can, cua caní ra vehe ñuhu cahnu ihya. Tan cua nasama ra kuhva iyó yo tsa jacuahá ra Moisés tsi yo —catyí ra tsa caahán cuendu siqui ra Esteban.

¹⁵ Tacan tan ra cumí tyiñu naha ra tan ra nyecú ican nyehe ra naha tsi ra Esteban tyin tumaa caá nuu iin ángel, tacan caá nuu ra.

7

Nu caahán ra Esteban tuhun Nyoo tsihin nyivi nducú cahñi tsi ra

¹ Tacan tan ra jutu tsaahnu tsa cuví ityi nuu tsicá tuhun ra tsi ra Esteban, tan catyí ra:

—¿A nditsa tsa caahán ra ihya naha ra siqui un?

² Tacan tan nacahan ra Esteban tan catyí ra:

—Nyooho yañi, tan nyooho ra tsahnu, tyaa soho ndo tuhun tsa cua cahan yu. Jutu yo Nyoo, ra cahnu ca, quituví ra nuu tsi tsaahnu yo, ra Abraham, quivi nyii ra ityi Mesopotamia tsa ndi cumañi ca cahun ra coo ra nda ñuu Harán. ³ Tan catyí ra tsihin ra: “Nacoo ñuu un, tan tsi tandihi nyivi un. Tan cahun cun inga ñuu tsa cua janaha yu tsi un” catyí Nyoo tsihin ra Abraham.

⁴ Tacan tan ra Abraham quitá ra nu iyó nyivi Caldea ityi Mesopotamia, tan cuahán ra nda ñuu Harán. Tan ndacan cuví nu tsihi jutu ra. Yaha can jaquitsj Nyoo tsi ra ñuhu nu iyó yo ihya vityin. ⁵ Maa tyin nduve ñuhu tsahá Nyoo tsi ra quivi can. Ndi luxu maa nu cuañi ra tan ña tsahá Nyoo. Maa tyin catyí ra tsihin ra Abraham tyin cua kuhva ra. Tan tsa cua cúu ra tan Nyoo cua kuhva ra ñuhu tsi sehe ra. Tacan cahan Nyoo tsihin ra Abraham, vasu tsa ñaha ca coo sehe ra quivi can. ⁶ Tan inga tucu tuhun cahan Nyoo tsihin ra tyin nyivi tata ra cua coo ñi inga ñuu. Tan cua cuví ñi musu nyivi ñuu can. Tan maa nyivi ñuu can cua quihí ndaha ñi tsi ñi. Tan cua nyehe ñi tundoho cumi cientu cuiya. ⁷ Maa tyin cahan tucu Nyoo tsihin ra tyehen: “Nyivi tata un cua nyehe

ñi tundoho jaha nyivi ñuu can. Yacan cuenda yuhu cua tatsi tuñi yu tsi nyivi ñuu can. Tan tsa cua yaha yacan tan cua quita nyivi cuvi tata un ñuu can tan cua quitsi ñi ihya. Tan cua jacahnu ñi tsi yu” catyi Nyoo tshin ra Abraham.

8”Tacan natuhun Nyoo tshin ra. Tan ndoo ra tuhun tshin ra. Tan Nyoo tsaha ra iin cuhva tsa cua javaha ñi coto naa iñi ñi tsa cahān ra. Tsaḥa cuenda ra tyin tandiḥi ñi sehe yi ñi tsa cua coo tan cuñi tsi cunyaa tuñi ra itsi naha tsi. Tan tsa yaha una quivi tsa cacu ra Isaac, sehe ra Abraham, tacan javaha ra tsi ra. Tan juvin ñi tacan javaha ndiḥi tucu ra Isaac tsi ra Jacob, sehe ra. Tan ra Jacob tucu tshin utsi uvi taahan sehe ra, tyaa ra tuñi can tsi intuhun intuhun sehe yi ra. Tan ra ican naha ra cuvi tsi tsaahnu yo.

9”Tan tsa utsi iin taahan ca sehe ra Jacob ndasi cuñi ra naha nyehe ra naha tsi ra José yañi ra naha, tsa cuenda tyin cuñi ca jutu ra naha tsi ra can. Yacan cuenda xico ra naha tsi ra José na cuvi ra iin musu nda Egipto. Maa tyin ra José, ña nacoḡ Nyoo tsi ra. 10”Tan jacacu ra tsi ra nu nyehe ra tundoho. Tan tsaha ra tsa nyityi jiñi ra tsi ra José. Tan tsaha ra tsa vaha coo ra nuu ra Faraón, ra cuvi rey Egipto. Tan rey can tsaha ra tsa cuvi ra José ra cumi tyiñu ñuu tsa cayucu Egipto can. Tan tsindaca ñaha ndiḥi tucu ra vehe maa rey.

11”Tacan tan tsicoḡ tama nanñi cahnu ityi Egipto tan ityi Canaán. Tan nyehe xaan nyivi tundoho. Tan tandiḥi tsi tsaahnu yo ña ñiñi ra naha tsa catsi ra naha. 12”Maa tyin quivi tsito ra Jacob tyin iyó tsa catsi ra naha nda Egipto, tan jacuhun ra tsi sehe ra na cunducu ra naha tsa catsi ra naha. Tan tsahan ra naha iin tsaha. 13”Tan tsa tsinu uvi tsaha tsa tsahan ra naha, ra José jacoto ra tsi ra naha tyin yañi ra naha cuvi tsi ra. Tacan tan tsito ra Faraón yoo tata cuvi ra José. 14”Tacan tan tava tyiñu ra José na quitsi ra Jacob jutu ra, tshin tandiḥi nyivi ra. Tan cuvi ñi uñi xico tsahun taahan nyivi. 15”Tan tacan cuvi tsa cuahan ra Jacob cua coo ra ñuhu Egipto can. Yaha can tan tsihi ra ndacan. Tan tsihi ndiḥi tucu tandiḥi sehe ra, ra cuvi tsi tsaahnu yo naha ra. 16”Tacan tan tsaḡ quivi tsa tsindaca ñi yiqui ra Jacob tan yiqui sehe ra nda Siquem. Tan ican quihvi yiqui tandiḥi ra naha tsitsi ñuhu nu jata ra Abraham iin ñaña tsi sehe ra Hamor tahañ tsanaha.

17”Maa tyin tsa ndi cumañi ca quita nyivi Egipto, nyivi ra Abraham tsa iyó Egipto can cuaha xaan ñi cuvi. Tan tsa nyanaa yatyn quivi tsa cua cuhva Nyoo ñuhu tsi ñi tumaa tsa cahān catsi ra tshin ra Abraham. 18”Tacan tan quitsaha ndaca ñaha iin rey tsa ña nacoto tsi ra José. 19”Rey can jandavi ñaha ra nyivi yo. Tan janyehe xaan ra tundoho tsi ñi, tan jañiñi ra tsi ñi na nacoḡ ñi tsi sehe ñi tsa ndi cacu tyin na cúu tsi. 20”Tan juvin ñi quivi can cacu ra Moisés. Tan tahañ xaan iñi Nyoo tsi ra. Tan uñi yoo jacuahnu sihi ra tsi ra nda yuvehe ña. 21”Yaha can ña cuvi ca tyihi xeehe sihi ra tsi ra. Tan nacoḡ ña tsi ra tsitsi iin tyica yuhu yutya. Tacan tan sehe sihi ra rey Egipto can nañiñi ña tsi ra. Tan naquihin ña tsi ra. Tan jacuahnu ña tsi ra, tumaa tsa sehe maa ña cuvi tsi ra. 22”Yacan cutuhva ra Moisés tandiḥi tsa tsitó ñi Egipto. Tan vaha xaan cahān ra tan vaha javaha ra jaha tunyee iñi tsa tsaha Nyoo tsi ra.

23”Tan tsa quita uvi xico cuiya ra Moisés cuñi ra cahun ra cunyehe ra nu iyó nyivi Israel, nyivi ra. 24”Tacan tan iin quivi nyehe ra nu cañi iin ra Egipto can tsi iin ra Israel. Tacan tan tsahñi ra Moisés tsi ra Egipto can tyin cañi xaan ra tsi ra Israel, ra ñuu ra. 25”Cuñi maa ra Moisés can tyin nyivi Israel can cutuñi iñi ñi tyin Nyoo jaquitsi tsi ra tyin jacacu ra tsi ñi. Maa tyin ña tuvñi iñi ñi tsa tacan cua cuvi. 26”Tacan tan tsa inga quivi can nyehe ra Moisés tsi uvi taahan ra Israel, cañi tahañ ra naha. Tan ra Moisés, cuñi ra tsa ña cañi tahañ ca ra naha, tan quitsaha catyi ra: “Ña vaha tsa cañi un tsi ra yañi un” catyi ra tshin ra naha. 27”Tacan tan ra tsa cañi tsi inga ra can tindahñi ra tsi ra Moisés, tan

catyí ra tsihin ra: “¿Yóo tava tyiñu tsi un tyin cundaca ñaha un tan cuvi un juez tsa cuenda ndi?” ²⁸ ¿A cuñi un cahñi un tsi yu tumaa tsa tsaññi un tsi ra Egipto icu?” catyí ra tsihin ra Moisés. ²⁹ Cuhva tsa tsiñi ra Moisés tsa cahñ ra can, tsinu ra. Tan cuahán ra nda ñuu Madián. Ndacan ñihí ra ñasiihi ra. Tan ndacan tsicoo uvi taahan sehe ra.

³⁰ Yahá uvi xico cuiya. Tacan tan iin quivi tsicá nuu ra Moisés nu tsiqui yatyin yucu tsa nañi Sinaí. Tan nyehé ra cayú iin yutun iñu. Tacan tan quituvi iin ángel tsitsi ñuhu tsa cayú can. ³¹ Iyo xaan cuñi ra Moisés tsa nyehé ra yacan. Tan natuhva ra nu cayú iñu can tyin nyehé vaha ra, tan tsiñi ra ndusu Jutu Mañi yo. Tan catyí ndusu can tyehen: ³² “Yuhu cuvi Nyoo cuenda tsi tsaahnu un, Nyoo cuenda ra Abraham, tan ra Isaac, tan ra Jacob” catyí ndusu can tsihin ra. Tacan tan ra Moisés quitsaha ñihí ra tsihin tsa yuuhví ra. Tan ña caná iñi ra nanyehé ra. ³³ Tan quitsaha catyí tucu Jutu Mañi yo tsihin ra: “Tava nditsan tsaha un tyin ñuhu nu tsañi un, ñuhu ii cuví tsi. ³⁴ Yuhu nyehé yu tandihi tundoho tsa nyehé nyivi cuenda yu ñuhu Egipto can. Tan tsiñi yu ndusu ñi tsa tsacú tsa ñi. Yacan vatsí nuú yu tyin jacacu yu tsi ñi. Naha, tyin jacahun yu tsi un nda Egipto” catyí Nyoo tsihin ra Moisés.

³⁵ Quivi can ña cuñi nyivi Israel tsi ra Moisés tsa cundaca ñaha ra tsi ñi, tan catyí ñi tsihin ra: “¿Yóo tava tyiñu tsi un tyin cundaca ñaha un tan cuvi un juez tsa cuenda ndi?”, catyí ñi tsihin ra. Vasu ña cuñi ñi tsa cundaca ñaha ra tsi ñi, maa tyin Nyoo tava tyiñu ra tsi ra tyin cuvi ra nuu tsihin ñi, tan jacacu ra tsi ñi. Tyin tacan catyí ángel tsa quituvi nuu ra nu iñu tsa cayú can. ³⁶ Tan ra Moisés can tava tsi nyivi Israel ñuhu Egipto can tsihin tsa javaha ra tsa iyo tan seña ñuu can, tan nu yaha ñi nda nu Nduya Ñuhu Cuaaha, tan nu tsicá nuu ñi nu tsiqui tsitsi tsa uvi xico cuiya.

³⁷ Tan juvin ñi maa ra Moisés can cuvi ra tsa cahñ tsihin nyivi Israel tan catyí ra tyehen: “Nyoo cua jaquitsi ra tsi iin ra cuví ndusu yuhu ra tumaa jaquitsi ra tsi maa yu. Tan cua cuvi ra iin ra Israel tumaa maa yo. Tan taahán tsi tyaa yahvi yo tsi ra” catyí ra Moisés. ³⁸ Tan maa ra Moisés can cuahán ra tsihin nyivi tsi tsaahnu yo nu tsicá nuu ñi nu tsiqui can. Tan ra ican cuvi ra tsa cahñ ángel tsihin nda yucu Sinaí. Tan ra ican naquihñ cuenda ra tuhun Nyoo nácaa coo nyivi, tan tyaa ra tuhun can nu tutu tyin tacan tan coto yo.

³⁹ Maa tyin nyivi tsi tsaahnu yo ña tyaa yahvi ñi tsi ra. Tava tsiyo ñi tsi ra. Tan cuñi ñi cunuhu ñi nda Egipto. ⁴⁰ Yacan cuenda kuhva tsa nyii ra Moisés yucu Sinaí, tan cahñ nyivi tsihin ra Aarón tan catyí ñi: “Javaha taahan nyoo cuhun ityi nuu ndi. Tyin ña tsitó yo náa tahañ ra Moisés, ra tsa tava tsi yo Egipto” catyí ñi. ⁴¹ Tacan tan javaha ñi iin indiqui xuhun cuaan. Tan tsaññi ñi quitu tyin kuhva cuenda ñi tsi tsitoho can. Tan sii xaan cuñi ñi tsicoo ñi vico cuenda tsitoho tsa javaha ñi tsihin ndaha ñi. ⁴² Tacan tan Nyoo jatsiyo ra tsi ñi. Tan jañá ndaha ra tsi ñi tyin cua jacahnu ñi ñicanyii, tan yoo, tan tandihi tiñuu tsa iyó ityi andivi. Tyin tyehen tyaa ra cuvi ndusu yuhu Nyoo nu libru tahañ tsanaha:

Nyooho nyivi Israel, ¿A tsaññi ndo quitu tyin kuhva cuenda ndo tsi maa yu tsitsi tsa uvi xico cuiya tsa tsicá nuu ndo nu tsiqui? Ñavin.

⁴³ Tyin jacahnu ndo tsi nyoo tsa nañi Moloc, tan jacahnu ndihi tucu ndo tsi nyoo tsa nañi Renfán tsa caá tumaa caá iin tiñuu tsa iyó andivi.

Juvin ñi maa ndo javaha tsitoho can, tan jacahnu tucu ndo. Yacan cuenda yuhu cua tava yu tsi ndo ñuu ndo, tan cua jacahun yu tsi ndo iin nu cañi ca ityi nuu ñuu Babilonia, catyí Nyoo tsihin ñi.

⁴⁴ Nu tsica nuu tsii tsaahnu yo nu tsiqui can, tsicumji ra naha iin vehe ñuhu tsa tsinu tsihin ñi quiiti. Tan tsitsi vehe can tsicumji ra naha tabla yuu tsa nyaá ley Nyoo nuu. Tan ra Moisés tava tyiñu ra na javaha ñi vehe ñuhu can ityi tsata, tumaa cuhva janaha maa Nyoo tsi ra. ⁴⁵ Yaha can tan ra Josué cuvji ra ityi nuu tsihin ñi. Tacan tan quihin ñi vehe ñuhu can tan vatsi ñi tsihin tsi nu iyó yo ihya vityin. Tyin Nyoo tava ra tsi nyivi tsicoo ñuhu ihya tan nacuhva cuenda ra ñuhu ihya tsi ñi Israel, nyivi yo. Tan tsatyin ñi vehe ñuhu can nda cuanda quivi tsicoo ra rey David. ⁴⁶ Tan ra rey David ñihji ra tumañi iñi nuu Nyoo. Tan cuñi ra javaha ra iin vehe vaha nu coo Nyoo. Juvin ñi Nyoo jacahnu ra Jacob tahan tsanaha. ⁴⁷ Maa tyin ra Salomón javaha ra vehe Nyoo. ⁴⁸ Vasu ña iyó Nyoo tsitsi vehe ñuhu tsa javaha nyivi. Tumaa cahan ra cuvji ndusu yuhu Nyoo tahan tsanaha tyehen:

⁴⁹ Andivi cuvji tyayu nu nyaá yu ndaca ñaha yu.

Tan ñuhu ñayivi, yacan cuvji nu tsañi tsaha yu.

Tatun javaha nyooho iin vehe ¿a cuñi maa ndo tyin coo yu tsitsi can?

¿Tan maa nda cua na ica vaha ndo tyin quitatu yu, cuñi maa ndo?

⁵⁰ ¿A ña tsitó ndo tyin maa yu javaha andivi tan ñuhu ñayivi? catyi ra cuvji ndusu yuhu Nyoo jahá Nyoo.

⁵¹ Maa tyin nyooho —catyi ra Esteban— tacan ñi tuhvá maa ndo jandavá ndo iñi ndo. Tan ña cuñi ndo naquihin ndo tuhun caahan Nyoo. Tacan ñi ña nyaá yahvi ndo tsi Tatyí Ii Nyoo. Inducu ñi caá ndo tsihin tsii tsaahnu yo. ⁵² Tsii tsaahnu yo cuxaan ra naha tan tsahñi ra naha tsi tandihi ra cuvji ndusu yuhu Nyoo tahan tsanaha. Tan ra ican naha ra catyi tyin cua quitsi iin ra vaha. Tan tsa quitsi ra vityin, nyooho xico ñaha ndo tsi ra tsi ra xaan iñi tsi ra, tan tsahñi ndo tsi ra. ⁵³ Nyooho naquihin cuenda ndo ley Nyoo tsa tsaha ángel tsi ndo, maa tyin ña cuñi ndo tyaa yahvi ndo tsa caahan ley can —catyi ra Esteban.

Nu tsihi ra Esteban

⁵⁴ Tsa tsiñi ra cumi tyiñu vehe ñuhu cahnu naha ra tuhun ihya, xaan xaan cuñi ra naha, ndacua jacahyu nuhu ra naha nyehé ra naha tsi ra Esteban.

⁵⁵ Maa tyin ra Esteban tsitú ra tsihin Tatyí Ii Nyoo tan nanyehé ra ityi andivi. Tan nyehé ra tsa cahnu cuvji Nyoo. Tan nyehé tucu ra tsi ra Jesús nyaá nyityi ra xiin cuaha Nyoo. ⁵⁶ Tacan tan catyi ra Esteban:

—jijhna ndo! Nyehé yu andivi tan tsihó tsi. Tan nyehé yu tsi ra Jesús, Rayi tsa quee nda gloria, nyaá nyityi ra xiin cuaha Nyoo —catyi ra Esteban.

⁵⁷ Maa tyin ra can naha ra tyasi ra naha soho ra naha, tsa ña cua tyaa soho ra naha tsa caahan ra Esteban. Tacan tan iin vaa ñi cana tsaa ra naha. Tan tandihi ra naha cuahan ra naha siqui ra Esteban. ⁵⁸ Tacan tan tava ra naha tsi ra yuhu ñuu. Tan tsahñi ra naha tsi ra tsihin yuu. Tan ra tsa javaha tsa ña vaha can naha ra, nacoo ra naha jahma tsa nyaá tsata ra naha tyin jaha cuenda iin ra tyuvaa tsa nañi Saulo. ⁵⁹ Tan tsitsi tsa cañi ra naha yuu tsi ra Esteban, quitsaha tsicán tahvi ra Esteban tsi Nyoo, tyin tuví iñi ra tyin tsa cua cúu ra. Tan catyi ra tyehen:

—Jutu Mañi yu Jesús, naquihin aña yu —catyi ra.

⁶⁰ Yaha can, tan tsicuiñi tsiti ra, tan tsaa cana tsaa ra tan catyi ra:

—Jutu Mañi yu, ña tñin cuenda un cuatyí tsa javahá ra naha —catyi ra.

Tsa yaha cahan ra tacan, tan tsihi ra.

8

Nu tsinyaa ndaha ra Saulo tsi nyivi yihí cuenda ra Cristo

¹ Tan ra Saulo ña tsinú iñi ra tsi ra Jesús, tan ndoo ra vaha tsa tsañj ra naha tsi ra Esteban.

Tan juvin ñi quivi can quitsaha nducú xaan nyivi tsi ñi yihí cuenda ra Cristo ñuu Jerusalén tyin cahñi ñi tsi ñi. Tan tandihi ñi yihí cuenda ra Cristo tsinu ñi, cuahán ñi cua coo ñi tandihi ñuu tsa cayucú Samaria, tan tandihi ñuu tsa cayucú Judea. Maa tyin ra tava tyiñu ra Jesús ña quita ra naha. Ndoo ra naha Jerusalén. ² Tan juhva ra tsa nyicún vaha tsi Nyoo ñuu Jerusalén can, tsañan ra naha tsicutsj ra naha cuñu ñuhu ra Esteban nda nu ndaa cumi santu. Tan tsacu xaan ra naha tsa cuenda tsa tsiñj ra. ³ Tan ra Saulo can quitsaha nyaá ndaha ra tsi nyivi yihí cuenda ra Cristo. Tan tsañan ra tan iin tan iin vehe ñi. Tan ixtá caa ra tsi ñi, tan tsañ cuenda ra tsi ñi tyin cahun ñi vehe caa, tahan ñi rayi tan ñaha.

Nu caahán ra Felipe tuhun ra Cristo nu cuví Samaria

⁴ Tan tandihi ñi tsa quita ñuu Jerusalén can, caahán ñi tuhun Nyoo nácaa jacacú ra Cristo tsi yo, tandihi ñi ityi nu cuahán ñi. ⁵ Iin ra tsa nañi Felipe tsañ ra iin ñuu canyí Samaria. Tan quitsaha caahán ra tuhun ra Cristo tsihin nyivi iyó ican. ⁶ Tan tandihi ñi ñi cuñi ñi tan tyaá soho ñi tsa caahán ra. Tyin nyehé ñi tsa iyo tsa javahá ra. ⁷ Tyin cuaha xaan nyivi tsa yihí tatyí ña vaha tan nduvahá ñi; tatyí ña vaha tsa yihí tsi ñi, quita nahnu tan cana tsa nahnu cuahán nahnu. Tan cuaha xaan nyivi coxo tan nyivi tsa ña cuví canda tan ña cuví caca, nduvahá ñi. ⁸ Yacan cuenda nyivi ñuu can, sñi xaan cuñi ñi.

⁹ Tan Samaria can iyó iin ra tasi nañi Simón. Tuhvá ra jandaví ñaha tsi nyivi. Catyí ra tyin cahnu xaan cuví ra. ¹⁰ Tandihi maa nyivi, ñi cuca tan ñi ndaahvi, tyaá soho ñi tsa caahán ra. Tan catyí ñi:

—Nditsa nditsa, tyin tunyee iñi Nyoo iyó tsihin ra ihya —catyí ñi.

¹¹ Tyaá yahvi xaan ñi tsa caahán ra tyin tsa naha xaan jandaví ñaha ra tsi ñi tsihin tsa tasi. ¹² Tacan tan quitsj ra Felipe. Tan jacoto ra tsi ñi nácaa ndacá ñaha Nyoo, tan nácaa cuhva tsa cahnu cuví ra Jesucristo. Tacan tan quitsaha tsinú iñi ñi tsi ra Cristo, rayi tan ñaha. Tan tsicoondutyá ñi. ¹³ Nda cuanda ra Simón can, tan natsinu iñi ra tsi ra Cristo, tan tsicoondutyá ra. Tan quitsaha tsicá nuu ra tsihin ra Felipe. Tan iyo xaan cuñi ra nyehé ra tsa iyo tan seña tsa javahá ra Felipe.

¹⁴ Tacan tan ra tava tyiñu ra Jesús tsa iyó ñuu Jerusalén can ñihj tuhun ra naha tyin tsinú iñi nyivi Samaria tuhun Nyoo. Tacan tan jacuhun ra naha tsi ra Pedro tan ra Juan nda Samaria. ¹⁵ Tan tsa tsañ ra naha, quitsaha tsicán tahvi ra naha tsi Nyoo tsa cuenda nyivi tsa yihí cuenda ra Cristo nda Samaria can tyin na naquihin ñi Tatyí Ii Nyoo. ¹⁶ Tyin ñi can, ñaha ca nuu Tatyí Ii Nyoo siqui ñi. Maa tsa tsicoondutyá ñi ñi tsihin siyi Jutu Mañi yo Jesús. ¹⁷ Tacan tan ra Pedro tan ra Juan tyiso ndaha ra naha jiñi ñi, tan naquihin ñi Tatyí Ii Nyoo. ¹⁸ Tan ra Simón can nyehé ra nu tyisó ndaha ra tava tyiñu ra Jesús jiñi ñi, tan naquihin ñi Tatyí Ii Nyoo. ¹⁹ Tan quitsaha caahán ra Simón tan catyí ra:

—¿Najava xuhun cuñi ndo tan cuhva ndo tunyee iñi tsi yu, cuví tyiso ndaha yu jiñi nyivi, tan naquihin ñi Tatyí Ii Nyoo? —catyí ra Simón tsihin ra naha.

²⁰ Tacan tan nacañan ra Pedro tan catyí ra:

—Jaha cuenda coto cunaa un tsihin xuhun cun. ¿Nacuenda tsicá iñi un tyin cuví jata yo ndatu tsa tsahá Nyoo tsi yo? Ña cuví. ²¹ Yooho, ña taahán tsi tyihi

un tsi un tsihin tyiñu ihya. Tyin añima un ña vaha nuu Nyoo. ²² Ndu uvi iñi cuhva tsicá iñi un, tyin cahnu xaan tsa caquiñi tsicá iñi un. Tan ndaçan tahvi tsi Nyoo na jaha ra tucahnu iñi tsi un tsa cuenda tsa tsicá iñi un tsitsi añima un. ²³ Tyin nyehé yu tyin tsitsi añima un iyó cuaha tsa caquiñi tan nyiyo iñi un. Tan tsa caquiñi can ña tsahá coto un tsa vaha —catyí ra Pedro tsihin ra Simón.

²⁴ Tacan tan nacahan ra Simón tan catyí ra:

—Ndaçan tahvi maa ndo tsi Jutu Mañi yo tsa cuenda yu, na ña quitsi tandihi tsa caahán un tsihin yu siqui yu —catyí ra Simón tsihin ra Pedro.

²⁵ Tsa yahá can tan ra tava tyiñu ra Jesús tsahá cuenda ra naha tandihi tsa nyehé ra naha tsa javahá ra Cristo nu tsicá ra nu ñuhu ñayivi. Tan cahan ra naha tuhun Nyoo. Tacan tan cuanuhu ra naha nda ñuu Jerusalén. Tan tandihi ñuu tsa cayucú Samaria nu yahá ra naha jacoto ra naha nácaa javahá yo tan cacu yo.

Nu caahán ra Felipe tuhun Nyoo tsihin iin ra ñuu Etiopía

²⁶ Tsa yahá yacan tan cahan iin ángel Nyoo tsihin ra Felipe, tan catyí ra:

—Nduvita tan cahun cun ityi sur, ityi queé nda Jerusalén tan cuahán nda Gaza —catyí ángel can tsihin ra.

Yacan cuví ityi tsa yahá nu tsiqui. ²⁷ Tacan tan ra Felipe nduvita ra tan cuahán ra. Tan ityi cuahán ra ñihí tahan ra tsihin iin ra ñuu Etiopía. Tan cuví ra can eunuco [tyin ña cuví coo ñasiihi ra]. Tan cuví ra iin ra cumí tyiñu cahnu ñuu Etiopía, tyin yihí ndaha ra xuhun ña Candace, ñaha tsa cuví reina ñuu Etiopía can. Tan tsahan ra Etiopía can tsijacahnu ra tsi Nyoo nda ñuu Jerusalén. ²⁸ Tan ityi cuanuhú ra nda ñuu ra nyaá ra siqui carreta ra. Tan cahví ra nu libru tsa tyaá ra Isaías, ra cuví ndusu yuhu Nyoo tahan tsanaha.

²⁹ Tacan tan Tatyí li Nyoo cahan tsihin ra Felipe:

—Ñatuhva nu carreta can.

³⁰ Tan cuhva tsa natuhva ra Felipe nu carreta can, tsiñi ra tyin cahví ra Etiopía can nu libru tsa tyaá ra Isaías. Tan tsicá tuhun ra Felipe tsi ra tan catyí ra:

—¿A cutuñi iñi un tsa caahán tsi? —catyí ra.

³¹ Tacan tan nacahan ra Etiopía can tan catyí ra:

—¿Nacaa cutuñi iñi yu tan yoñi jacuahá tsi yu? —catyí ra tsihin ra Felipe.

Tan tsican ra tsi ra Felipe na ndaa ra tan cunyaa ra tsihin ra.

³² Tan nu cuahán cahví ra, catyí tsi tyehen:

Tsahñi ra naha tsi ra tumaa tuhvá ra naha tsahñi mbee ticatyí.

Tyin tumaa ña tsacú mbee tatun cua xatya ra naha ixi ti, tan tumaa tsa ña tsacú ti tun cua cahñi ra naha tsi ti,

tacan cuví ra can tyin nyehé ra tundohe tan nduve náa cahan ra.

³³ Janduluhlu ra tsi ra nuu ra naha tan yoñi cuñi javaha iin tsa vaha tsihin ra.

Tan tsa cuenda nyivi cuví tata ra, yoñi caahán tsa cuenda ñi.

Tyin ña tsicoo sehe ra tan tsihi ra.

Tacan catyí tsi nu tutu tsa cahví ra can.

³⁴ Tacan tan ra Etiopía quitsahá tsicá tuhun ra tsi ra Felipe, tan catyí ra:

—Jaha tumañi iñi tsi yu, tan catyí tuhun un luxu tsihin yu, ¿yóo tuhun caahán ra ndusu yuhu Nyoo ihya? ¿A tuhun maa ra, o yóo tuhun caahán ra? —catyí ra tsihin ra Felipe.

³⁵ Tacan tan ra Felipe quitsahá caahán ra siqui tuhun tsa tsa yahá cahví ra can, tan tsahá cuenda ra tsi ra tyin tuhun ra Jesús caahán ra ndusu yuhu

Nyoo can. Tan tsaḥa cuenda ra tyin ra Jesús cuví ra jacacú tsi yo. ³⁶ Tacan tan tsa cua yaha ra naha nu yihí ndutya. Tan ra Etiopía can quitsaḥa caahán ra tsihin ra Felipe tan catyí ra:

—Ihya yihí ndutya. ¿A ña cuví coondutya yu ihya? —catyí ra.

³⁷ Tacan tan nacahaḥan ra Felipe tsihin ra Etiopía, tan catyí ra:

—Tatun tsinú iñi un tsihin tsa ñi añima un, cuví coondutya un —catyí ra tsihin ra.

Tacan tan nacahaḥan ra can, tan catyí ra:

—Tsinú iñi yu tyin Sehe Nyoo cuví tsi ra Jesucristo —catyí ra.

³⁸ Tacan tan ra can caahán ra tsihin musu ra na jacuñi ra carreta can. Tan nduvi taahan ra naha nuu ra naha. Tan quihvi ra naha tsitsi ndutya. Tacan tan jacoondutya ra Felipe tsi ra Etiopía. ³⁹ Tan cuhva tsa quita ra naha tsitsi ndutya can, tan Tatyí li Jutu Mañi yo naquihñ ra tsi ra Felipe. Tan ra Etiopía can ña nyehē ra numaa ityi cuahán ra Felipe. Maa tyin siḥ xaan cuñí ra, cuanuhú ra. ⁴⁰ Tan ra Felipe tsaḥa ra ñuu Azoto. Tan cuahán ra tan iin tan iin ñuu, tan caahán ra tuhun ra Cristo tsihin nyivi nda cuanda tsa tsaḥa ra ñuu Cesarea.

9

Nu natsinu iñi ra Saulo tsi ra Cristo (Hechos 22.6-16; 26.12-18)

¹ Tan tsicá ra Felipe caahán ra tuhun ra Cristo tsihin nyivi, tan ra Saulo ña jandihí maa ra tsa nducú cañi ra tsi nyivi yihí cuenda Jutu Mañi yo. Tan tsaḥan ra nu nyaá ra jutu tsaahnu cuví ityi nuu, ² tsindacaḥan ra iin tutu tsi ra jutu, tyin nacuhva ra ndatu tsa cuhun ra vehe ñuhu ñuu Damasco, tan tiin ra tsi ñi nyicún tsi ra Cristo, tan quitsi ndaca ra tsi ñi vehe caa ñuu Jerusalén, tahan ñi rayi tan ñaha. Ñihí ra Saulo tutu can tan cuahán ra. ³ Tan tsa cua tsaḥa ra ñuu Damasco, sana iñi ra, tan quitsi ñuhu ityi andivi, jandunditsin tsi tanñi cahnu maa nu cuahán ra. ⁴ Tacan tan ra Saulo nduva ra nu ñuhu. Tan tsinñi ra iin ndusu tsa catyí tyehen:

—Saulo, Saulo, ¿nacuví tyin nyaá ndaha un tsi yu? —catyí ndusu can tsihin ra.

⁵ Tacan tan nacahaḥan ra Saulo:

—¿Yoo cuví yooḥo, taa? —catyí ra, tsicá tuhun ra.

Tacan tan nacahaḥan ndusu can tsihin ra, tan catyí tsi:

—Yuhu cuví ra Jesús, ra tsa nyaá ndaha un. Juvín ñi tsi maa un jañicueehé un, tumaa jañicueehé indiqui tsi ti tsa tsañi ihñi ti nu tsa tutsi ra naha tsi ti —catyí ra Jesús tsihin ra.

⁶ Tacan tan quitsaḥa ñihí ra Saulo tsihin tsa yuuhví ra. Tan catyí ra:

—Jutu Mañi yu, ¿náa cuñí un tyin javaha yu? —catyí ra.

Tacan tan Jutu Mañi yo nacahaḥan ra tsihin ra tan catyí ra:

—Nduvita tan cuhun un tsitsi ñuu Damasco. Tan ican cua cahan iin ra tsa cua cahan tsihin un náa taahán tsi javaha un —catyí ra Jesús tsihin ra Saulo.

⁷ Tan ra tsa cuahán tsihin ra Saulo, nayuhvi xaan ra naha. Tan ña ñihí ra naha náa tuhun cahan ra naha tyin tsinñi ra naha ndusu can maa tyin yoñi nyehē ra naha. ⁸ Tacan tan ra Saulo nduvita ra. Tan tsa nuñá ra tinuu ra, ña cuví maa nanyehé ra tyin cuaḥa ra jaha Nyoo. Yacan cuenda, ra tsa cuahán tsihin ra tñin ra naha ndaha ra tan tsindacaḥa ra naha tsi ra ñuu Damasco. ⁹ Ican tsinyij ra uñi quivi. Tan ña cuví maa nanyehé ra. Tan ña tsatsi ra, tan nduve maa náa tsihí ra.

¹⁰Ñuu Damasco can iyó iin ra tsinú iñi tsi Nyoo, nañi ra Ananías. Tan nyehe ra iin tsa nyehe ra nu cahān Jutu Mañi yo tsihin ra tan catyí ra:

—¡Ananías! —catyí Jutu Mañi yo tsihin ra.

Tacan tan nacahān ra Ananías, tan catyí ra:

—Ihya nyaá yu, Jutu Mañi yu —catyí ra tsihin ra.

¹¹Tacan tan Jutu Mañi yo catyí ra:

—Ndūvita, tan cūhun cun ityi cahnu tsa nañi Ndoó ñi. Tan nanducu un vehe ra tsa nañi Judas. Tan ndāca tuhun un nu maa tahan iyó ra tsa nañi Saulo, ra ñuu Tarso. Tyin tsicán tahvi ra tsi yu. ¹²Tan nyehe ra iin tsa nyehe ra, tan nyehe ra tsi yooho, Ananías, tyin tsaā un nu nyaá ra, tan tyiso ndaha un jiñi ra tyin tacan tan nanyehe ra inga tsaha —catyí Jutu Mañi yo tsihin ra Ananías.

¹³Tacan tan nacahān ra Ananías tan catyí ra:

—Jutu Mañi yu, cuaha xaan nyivi caahán ñi tsihin yu tyin nyivi yihí cuenda un ñuu Jerusalén cuaha xaan tsa ña vaha javahā ra Saulo can tsihin ñi. ¹⁴Tan vityin vatsi ra ihya tyin tsaha ra jutu tsahnu tsa cuví ityi nuu ndatu tsi ra tsa tyihi ra tsi nyivi tsicán tahvi tsi un vehe caa —catyí ra Ananías tsihin Jutu Mañi yo.

¹⁵Maa tyin Jutu Mañi yo catyí ra tsihin ra Ananías:

—Cuaahan tyin yuhu tsa nacatsi vaha yu tsi ra Saulo can, tyin cua cahan ra tuhun yu tsihin nyivi inga ñuu, tan tsihin rey nyivi can, tan juvin ñi cahan ndihi ra tuhun yu tsihin nyivi Israel. ¹⁶Yuhu cua jacuaha yu tsi ra nácaa tsa cuaha tundoho cua nyehe ra tsa cuenda yu —catyí Jutu Mañi yo tsihin ra Ananías.

¹⁷Tacan tan cuahán ra Ananías vehe nu nyí ra Saulo. Tsaā ra yuvehe can tan quihvi ra tsitsi vehe. Tan tyiso ndaha ra jiñi ra Saulo, tan catyí ra tsihin ra:

—Yañi Saulo, Jutu Mañi yo ra Jesús, ra tsa quituvi nuu un ityi vatsi un, ra ican jaquitsi tsi yu tyin nanyehe un inga tsaha. Tan cua jacutu ra tsi un tsihin Tatyí Ii ra —catyí ra Ananías tsihin ra Saulo.

¹⁸Tan juvin ñi cuhva can tan coyō tsa caá tumaa caa yaa tyaca tsa tyasi tinuu ra Saulo. Tacan tan cuví nanyehe ra. Yahā can tan tsicoondutyā ra. ¹⁹Yahā can tan nacatsi ra, tan ndunyeē cuñu ñuhu ra inga tsaha. Tan ndoq ra juhva quivi tsihin nyivi tsa yihí cuenda ra Cristo ñuu Damasco.

Nu quitsahā caahán ra Saulo tuhun ra Cristo tsihin nyivi ñuu Damasco

²⁰Tacan tan numi ñi quitsahā caahán ra Saulo tuhun ra Cristo tsihin nyivi tandihi vehe ñuhu nyivi Israel ñuu Damasco. Tan catyí ra tyin ra Jesús, Sehe Nyoo cuví tsi ra. ²¹Tandihí maa nyivi tsa tsihí tsa caahán ra, iyo xaan cuñi ñi. Tan natuhún tahan ñi tan catyí ñi:

—¿A ñavin ra ihya cuví ra tsa tsinyaā ndaha tsi nyivi tsicán tahvi sivi ra Jesús ityi ñuu Jerusalén? ¿A ñavin juvin ra cuví ra tsa vatsi tin tsi nyivi iyó ihya tyin cuhva cuenda ra tsi ñi tsi ra jutu tsa cuví ityi nuu naha ra? —catyí ñi.

²²Maa tyin ra Saulo ñihi ca caahán ra tuhun ra Cristo tsihin tsa ñi iñi ra. Tan janahá ra tsi nyivi Israel tsa iyó ñuu Damasco tyin ra Jesús cuví ra Cristo, tan Sehe Nyoo cuví tsi ra. Tan ñi Israel ña ñihí ñi nácaa nacahan ñi tsihin ra.

Nu tsinu xeehe ra Saulo nuu ra Israel naha ra

²³Tsa yahā juhva quivi, tan ra Israel tsa ña tsinú iñi tsi ra Cristo natuhun tahan ra naha tyin cua cahñi ra naha tsi ra Saulo. ²⁴Ñiñu tan nduvi ndatú ra naha tsi ra yuvehe cahnu ñuu can. Maa tyin ra Saulo tsito ra tuhun can.

²⁵ Tacan tan nyivi tsa tsinú iñi tsi ra Cristo ñuu can tyihí ñi tsi ra tsitsi iin tyica cahnu. Tan tsacuaa januu ñi tsi ra ityi ventana iin vehe tsa nyaá yuhu cora ñuu can. Tacan tan tsinú ra cuahán ra.

Nu nyii ra Saulo ñuu Jerusalén

²⁶ Quivi tsa tsaá ra Saulo ñuu Jerusalén, cuñi ra ndu iin ra tsihin nyivi tsa yihí cuenda ra Cristo. Maa tyin tandihi maa ñi tan yuuhví ñi nyehé ñi tsi ra. Tyin ña tsinú iñi ñi tsa yihí ra cuenda ra Jesús. ²⁷ Maa tyin iin ra tsa nañi Bernabé, quihñ ra tsi ra. Tan tsaha cuenda ra tsi ra tsi ra tava tyiñu ra Jesús. Tan nacatyí tuhun ra tsihin ra naha nácaa nyehé ra Saulo tsi Jutu Mañi yo ra Cristo ityi ñuu Damasco; tan nacatyí tuhun ra nácaa cahñ Jutu Mañi yo tsihin ra. Tan nácaa cahñ ra tuhun ra Cristo tsihin tsa ña yuuhví ra nda ñuu Damasco.

²⁸ Tacan tan ndoo ra Saulo ñuu Jerusalén tsihin nyivi tsa yihí cuenda ra Cristo.

²⁹ Tan caahán ra tuhun Jutu Mañi yo tsihin tsa ña yuuhví ra. Tan natuhún xaan ra tuhun ra Cristo tsihin ra Israel tsa caahán yuhu griego. Maa tyin ra can naha ra nducú cahñi ra naha tsi ra. ³⁰ Maa tyin tsito ra hermano can naha ra tyin tacan tsicá iñi ra can naha ra. Yacan cuenda tsindacá ra hermano naha ra tsi ra Saulo nda ñuu Cesarea. Tacan tan jacuhñ ra naha tsi ra nda Tarso, ñuu ra.

³¹ Tacan tan nyivi yihí cuenda ra Cristo tsa iyó tandihi ñuu tsa cayucú Judea, tan Galilea, tan Samaria, si xaan cuñi ñi tyin ña cuxaán ca nyivi tsi ñi. Tan ndunyeé ca iñi ñi tsihin tunyee iñi tsi Nyoo tyin tyaá yahvi vaha ñi cuhva cahñ ra, tyin yuuhví ñi coto ña cua javaha ñi cuhva cuñi ra. Iyó ñi tsihin tsa jatyinyeé Tatyí Ii Nyoo tsi ñi. Tan nducuahá ca ñi tan iin tan iin quivi.

Nu nduvahá ra Eneas

³² Tacan cuví tan ra Pedro tuhvá ra cuahán cua nyehé nácaa yucú ra hermano naha ra tan iin tan iin ñuu. Tan tsahñ tucu ra tsinyehé ra nu iyó nyivi yihí cuenda ra Jesucristo ñuu Lida. ³³ Ican nañihí ra tsi iin ra cuuhví, nañi ra Eneas. Tan tsa una cuiya canyíi ra tan ña cuvi maa nacandá ra tyin naxij cuñu ñuhu ra. ³⁴ Tan ra Pedro catyí ra tsihin ra:

—Yooho Eneas, ra Jesucristo janduvahá ra tsi un. Nduvita tan natuvi yuvi un —catyí ra tsihin ra.

Tan juvin ñi cuhva can tan nduvitá ra Eneas. ³⁵ Tan nyehé tandihi nyivi ñuu Lida can tyin tsa nduvahá ra. Tan nyehé tucu nyivi ñuu Sarón. Tacan tan ñi can, natsinú iñi ñi tsi Jutu Mañi yo. Tan nacoó ñi tuhun tsahnu tsa tsinú iñi ñi nda ndi cumañi ca coto ñi tuhun ra Cristo.

Nu nandoto ña Dorcas

³⁶ Quivi can tsicoq iin ñaha tsinú iñi tsi ra Cristo ñuu Jope. Tan nañi ña Tabita, tan tsihin yuhu griego, nañi ña Dorcas. Tan tuhvá ña javahá tsa vaha tsihin nyivi, jatyinyeé ña tsi nyivi ndaahvi. ³⁷ Tan quivi can ña Dorcas quihñ cuehe tsi ña tan tsihí ña. Tan tsa yahá jacutyí ñi tsi ña, tsicaquin ñi tsi ña tsitsi cuarto nu tsinu uvi pisu. ³⁸ Yatyin ñi canyíi ñuu Jope tsihin ñuu Lida, nu nyii ra Pedro. Tan nyivi tsa yihí cuenda ra Cristo ñuu Jope can tsito ñi tyin nyii ra Pedro ñuu Lida. Tacan tan jacuhñ ñi tsi uvi taahan ra na cucana ra naha tsi ra Pedro tyin na cuhun ra ñuu Jope tsa numi ñi. Tan tsaá ra naha nu nyii ra tan catyí ra naha tsihin ra:

—Janumi ñi tan cuhun un tsihin ndi nda ñuu Jope —catyí ra naha tsihin ra.

³⁹ Tacan tan ra Pedro nduvitá ra tan cuahán ra tsihin ra naha. Tan cuhva tsa tsaá ra naha, tsindacá ra naha tsi ra nda cuarto nu canyíi ndiyi can. Tan

tandihí maa ñiñaha tsa tsihí yíi natuhvā ñi tsata ra, tan tsacú tsaā ñi. Tan janahá ñi jahma tsa quicu ña Dorcas tsa tsicoo ña. ⁴⁰ Tacan tan ra Pedro tava ra tsi tandihí nyivi cuarto can. Tan tsicuiñi tsiti ra tan quitsahā tsicán tahvi ra tsi Nyoo. Tacan tan nanyehē ra tsi ñaha tsa tsihí can canyíi ña. Tan quitsahā catyí ra tsihin ña:

—Hermana Tabita, nduvita —catyí ra tsihin ña.

Tacan tan nanyehē ña. Tan tsa nyehe ña tsi ra Pedro, tsinyaā ña. ⁴¹ Tacan tan ra Pedro tñn ra ndaha ña tan janduvita ra tsi ña. Tacan tan canā ra tsi ra hermano naha ra, tan tsihin ñiñaha tsa tsihí yíi. Tan nacuhvā cuenda ra tsi ña tsi ñi tyin tsa nandoto ña. ⁴² Yahā can tan tandihí maa nyivi ñuu Jope tsito ñi tyin nandoto ña can. Tan cuaha xaan ñi natsinu iñi tsi Jutu Mañi yo. ⁴³ Tan ra Pedro ndoo ra juhva quivi ñuu can, nyíi ra yuvehe iin ra tsa janduvitá ñi quiti, nañi ra Simón.

10

Ra Pedro tsihin ra Cornelio

¹ Ñuu Cesarea iyó iin ra tsa nañi Cornelio. Tan cuví ra ra yihí ndaha iin cientu andaru. Tan tsa tandihí andaru tsa yihí ndaha ra can nañi tsi Italiano.

² Tan ra Cornelio can yuuhví ra tsi Nyoo. Maa ra tan tsihin tandihí nyivi ra vaha xaan jacahnú ñi tsi Nyoo. Tan inga tucu tuhun, cuaha xaan xuhun tsahá ra tsi nyivi ndaahvi ñuu Israel, tan tandihí quivi tsicán tahvi ra tsi Nyoo. ³ Tan iin quivi cuhva caa uñi tsa tseñi, nyehe ra iin tsa nyehe ra. Tan ican cuví nu catsi xaan nyehe ra iin ángel tsa jacuhun Nyoo nu nyíi ra, tan catyí tsi tsihin ra:

—¡Yooho Cornelio! —catyí ángel can tsihin ra.

⁴ Tacan tan nanyehē ra Cornelio tsi ángel can. Tan nayuhví xaan ra. Tan quitsahā tsicá tuhun ra tan catyí ra:

—¿Náa tsa cuví ihya, taa? —catyí ra tsihin ángel can.

Tacan tan ángel can quitsahā caahán ra tsihin ra:

—Nyoo tsiñi ra tsa caahán un tan tsa tsicán un tsi ra. Tan taahán iñi ra tyin jatyinyeé xaan un tsi nyivi ndaahvi. ⁵ Tan vityin cuñi tsi tsa tava tyiñu un na cuquihin tyiñu tsi iin ra tsa nañi Simón Pedro nda ñuu Jope. ⁶ Ra ican cua cahan tsihin un náa taahán tsi javaha un. Iyó ra vehe ra tsa nañi tucu Simón, cuví ra ra janduvitá ñi quiti. Tan iyó vehe ra yuhu ndutya ñuhu —catyí ángel can tsihin ra Cornelio, tan cuahán ángel can.

⁷ Tsa yahā cuahán ángel can, ra Cornelio canā ra tsi uvi taahan musu ra, tan tsihin iin andaru tsa jahá cuenda tsi ra. Tan yihí andaru can cuenda Nyoo.

⁸ Tandihí maa tsa cahán ángel can tsihin ra Cornelio tan nacatyí tuhun ra tsihin nduñi taahan ra can naha ra. Tan jacuhun ra tsi ra naha ñuu Jope.

⁹ Tuví inga quivi tan cuahán ra can naha ra. Tan tsa ndi cumañi ca tsaā ra naha ñuu Jope, tan ra Pedro ndaa ra jiñi vehe tyin cua ndacan tahvi ra tsi Nyoo, tan tsa cua tahan hora cuví cuhva can. ¹⁰ Tan tsaā soco tsi ra tan tsisocó xaan ra. Maa tyin tsitsi tsa tsinú tsa catsi ra, quitsahā nyehé ra iin tsa janahá Nyoo tsi ra. ¹¹ Tan nyehe ra tyin ticohó andivi. Tan nyehe ra andivi tyin vatsi nuú iin jahma cahnun xaan tyi nu ñuhu. Tan tandihí tsa cumí tutun tsi nuuhñi nuuhñi ñi. ¹² Tan tsitsi jahma can yihí tandihí maa nuu quiti tsa cumi taahan tsaha, tan tandihí nuu coo, tan saa. ¹³ Tacan tan tsiñi ra iin ndusu tsa caahán tsihin ra:

—Pedro, nduvita tan cahñi quiti ihya, tan catsi un —catyí ndusu can tsihin ra.

¹⁴ Maa tyin ra Pedro nacahan ra tan catyí ra:

—Ña cua catsi yu, Jutu Mañi yu. Yuhu ña tuhvá yu catsi quiti tsa catyí ley tyin ña vaha catsi ndi —catyí ra Pedro.

¹⁵ Tacan tan quitsaha caahan nyico ndusu can tsihin ra inga tsaha:

—Ña catyí un tyin ña catsi un tsa tsa janduvaha yu —catyí ndusu can tsihin ra.

¹⁶ Uñi taahan tsaha nyehe ra yacan jahá Nyoo. Tacan tan jahma cahnu can nandaq nyico can ityi andivi. ¹⁷ Tan tsitsi tsa tsicá iñi ra Pedro náa cuñi tsi catyí tsa nyehe ra can, tsaq musu tsa jacuhun ra Cornelio naha ra. Tan tsicá tuhun ra naha numaa tahan iyó vehe ra nañi Simón. ¹⁸ Tan tsa tsaq ra naha ityi yuvehe tsicá tuhun ra naha tatun ican iyó iin ra tsa nañi Simón Pedro. ¹⁹ Tan ra Pedro tsicá xaan iñi ra náa cuñi tsi catyí tsa nyehe ra. Tacan tan Tatyí li Nyoo quitsaha caahan tsihin ra, tan catyí tsi:

—Nyehe Pedro, uñi taahan ra vatsí nanducú tsi un. ²⁰ Ndúvita tan cahun cun tsihin ra naha, tan ña caca iñi un tyin maa yu jaquitsí tsi ra ihya naha ra —catyí Tatyí li Nyoo tsihin ra Pedro.

²¹ Tacan tan ra Pedro nuq ra nu yucú ra tsa jacuhun ra Cornelio, tan catyí ra tsihin ra naha:

—Yuhu cuví ra tsa nanducú ndo. ¿Náa tyiñu vatsí ndo?

²² Tacan tan nacahan musu ra Cornelio tan catyí ra naha:

—Ra Cornelio, ra yihí ndaha tsi ndi, ra ican jaquitsí tsi ndi. Vaha xaan nyivi cuví ra. Tan tyaá yahvi xaan ra tsi Nyoo. Tan tandihí maa ra ñuu Israel tsa iyó ityi Judea ihya cuñi ra naha tsi ra tsa cuenda tsa vaha nyivi cuví ra. Tan iin ángel Nyoo cahan tsihin ra tyin na cana ra tsi un, tyin cahun un yuvehe ra tyin tacan tan tyaa soho ra tuhun tsa cua cahan un tsihin ra —catyí musu ra Cornelio tsihin ra Pedro.

²³ Tacan tan tsaq ra Pedro quihvi ra naha tsitsi vehe. Tan ndoo ra naha tsihin ra tsacuaa can. Tan tsa tuvi inga quivi tan cuahan ra tsihin ra naha. Tan cuahan juhva ra hermano tsa iyó ñuu Joqe can tsihin ra naha.

²⁴ Tsa inga quivi tsaq ra naha nda ñuu Cesarea nu ndatú ra Cornelio tsi ra naha tsihin tandihí nyivi ra, tan tsihin tandihí ra vaha iñi tsi ra. ²⁵ Cuhva tsa tsaq ra Pedro yuvehe ra Cornelio, quita ra Cornelio tan caahan ra tsihin ra. Tan tsicuiñi tsi ra nuu ra Pedro tan quitsaha jacahnú ra tsi ra. ²⁶ Maa tyin ra Pedro cañihí ra tsi ra, tan catyí ra tsihin ra:

—Ndúvita tyin tahan ñi cuví yoocho cuví tucu yuhu; ñavin Nyoo cuví yu —catyí ra tsihin ra.

²⁷ Tan tsitsi tsa caahan ra Pedro tsihin ra, tan quihvi ra tsitsi vehe tan nanyehe ra tyin cuaha xaan nyivi ndu iin tsitsi vehe can. ²⁸ Tacan tan catyí ra Pedro tsihin ñi:

—Nyoocho tsitó ndo tyin ley nyuhu tsa cuví ndi nyivi Israel, catyí tsi tyin ña taahan tsi tsa ndu iin ndi tsihin nyivi tsa ñavin nyivi Israel cuví. Tan ndi tsitsi vehe ñi ña cuví quihvi ndi. Maa tyin Nyoo janaha ra tsi yu, tan catyí ra: “Yoocho, ña catyí un tsihin nyivi tyin ndi intuhun ñi tan ña vaha ñi” catyí Nyoo tsihin yu. ²⁹ Yacan cuenda quivi tsa cana ndo tsi yu, numi ñi vatsí yu. Tan vityin cuñi yu coto yu nacuenda cana ndo tsi yu —catyí ra Pedro.

³⁰ Tacan tan nacahan ra Cornelio, tan catyí ra:

—Tsa iyó cumi quivi vityin, tumaa cuhva ihya tsa nyaá yu yuvehe tan ña tsatsí yu tan tsicán tahvi yu tsi Nyoo tsa tseñi. Tan quituví iin rayi nuu yu.

Nditsí ra jahma xiñu. ³¹ Tan catyí ra tsihin yu: “Yooho Cornelio, Nyoo tsiñí ra tsa tsicán tahvi un tsi ra. Tan nducuhun iñi ra tsa javahá un tyin jatyinyee xaan un tsi nyívi ndaahvi. ³² Tava tyiñu tsi musu un na cuhun ra naha nda ñuu Jope cuquihin ra naha tsi ra Simón Pedro na quitsi ra ihya. Nyíi ra yuvehe ra tsa nañi Simón, iin ra tsa janduvitá ñi quiti. Tan vehe ra can nyaá tsi yatyin ñi yuhu ndutya ñuhu. Tan na quitsi ra Simón Pedro tan cahan ra tsihin un” catyí ángel can tsihin yu. ³³ Tacan tan numi ñi tava tyiñu yu tyin na cuquihin tyiñu tsi un. Tan vaha tyin vatsí un. Tan vityin tandihi yo ndu iin yo nuu Nyoo. Tan cuñi ndi tyaa soho ndi tandihi tsa catyí Jutu Mañi yo tsihin un tyin cuhva cuenda un tsi ndi —catyí ra Cornelio tsihin ra Pedro.

Nu caahán ra Pedro tuhun ra Cristo yuvehe ra Cornelio

³⁴ Tacan tan quitsahá caahán ra Pedro tan catyí ra:

—Vityin cutuñi iñi yu tyin Nyoo cuñi ra tsi tandihi nyívi, tahān ñi nyívi Israel, tan nyívi tsa ñavin nyívi Israel cuví. Ña tava tsiyo ra tsi ndi intuhun maa yo. ³⁵ Tyin naquihín ra tsi yo tatun tyaá yahvi yo tsi ra, tan javahá yo tsa vaha. ³⁶ Nyoo cahan ra tsihin nyuhu tsa cuví ndi tata ra Israel, tan jacoto ra tyin cuví coo vaha yo tsihin ra tsa cuenda ra Jesucristo. Tan maa ra ndacá ñaha tsi tandihi maa yo. ³⁷ Nyooho tsitó vaha ndo tandihi tsa cuví ñuu nyívi Israel ñuu yu, nácaa quitsahá tsi nu cuví Galilea tsa yahá tsa cahan ra Juan tuhun Nyoo tsihin nyívi, tan jacoondutya ra tsi ñi. ³⁸ Tsitó ndo nácaa tsañá Nyoo tunyee iñi Tatyí Ii ra tsi ra Jesús, ra ñuu Nazaret. Tan tsicā ra javahá ra tsa vaha, janduvahá ra tsi tandihi nyívi tsa nyehé tundoho jahá nu ña vaha. Tyehen javahá ra Jesús tyin Nyoo nyaá ra tsihin ra. ³⁹ Nyuhu cuví ndi tsandaa tsa cuenda tandihi tsa javahá ra Jesús ñuu Jerusalén tsihin tandihi ca ñuu tsa cayucú Judea. Yahá can tan ticaā ra naha tsi ra nu cruu tan tsañi ra naha tsi ra. ⁴⁰ Maa tyin tsa tsinu uñi quívi janandoto Nyoo tsi ra. Tan quituví ra nuu ndi. ⁴¹ Ña quituví ra nuu tandihi nyívi. Maa tyin quituví ra nuu nyuhu tyin nacatsí ra tsi ndi nda tsanaha tyin cuví ndi tsandaa cuenda ra. Nyuhu tsatsí ndi tan tsihi ndi tsihin ra tsa yahá tsa nandoto ra. ⁴² Tan tava tyiñu ra tsi ndi tyin cahan ndi tuhun ra tsihin nyívi. Tan cuví ndi tsandaa tyin Nyoo tava tyiñu ra tsi ra Jesús tyin cuví ra juez tsi nyívi tsa nyito tan nyívi tsa tsihi. ⁴³ Tan tacan tucu nda tsanaha, cahan tandihi ra cuví ndusu yuhu Nyoo tuhun ra Jesús. Tan catyí ra naha tyin tandihi nyívi tsa tsinú iñi tsi ra Jesús, cua jaha Nyoo tucahnu iñi cuatyí ñi tsa cuenda maa ra.

Nu naquihín nyívi Tatyí Ii Nyoo tan ñavin nyívi Israel cuví ñi

⁴⁴ Ndi caahán ca ra Pedro tan nuu Tatyí Ii Nyoo siqui tandihi ñi tsa tyaá soho tsa caahán ra. ⁴⁵ Tan ra Israel tsa yihí cuenda ra Jesús tsa tsaā tsihin ra Pedro iyo xaan cuñi ra naha tyin tsañá ndihi tucu Nyoo Tatyí Ii ra tsi nyívi tsa ñavin nyívi Israel cuví. ⁴⁶ Tyin tsiñí ra naha caahán ñi inga yuhu tan jacahnú ñi tsi Nyoo. ⁴⁷ Tacan tan quitsahá caahán ra Pedro tsihin ra tsa tsaā tsihin ra:

—Ña cuví casi yo nu coondutya nyívi ihya. Tyin tsa naquihín ñi Tatyí Ii Nyoo tumaa tsa naquihín tucu maa yo —catyí ra tsihin ra naha.

⁴⁸ Tacan tan tava tyiñu ra Pedro tsi ñi tsa ndi ñihí Tatyí Ii Nyoo na coondutya ñi tsihin siyi ra Jesucristo. Tacan tan caahán ndaahvi ñi tsihin ra Pedro na ndoo ra taahan quívi tsihin ñi.

11

Nu nacatýi tuhun ra Pedro tsihin ra yihí ndaha vehe ñuhu ñuu Jerusalén nácaa nducuahá tuhun ra Jesucristo inga ñuu

¹ Ra tava tyiñu ra Jesús tan inga ra yihí cuenda ra Jesús tsa iyó Judea, ñihi tuhun ra naha tyin nda cuanda nyivi tsa ñavin nyivi Israel cuví tan naquihín ñi tuhun Nyoo. ² Tacan tan tsaá nyico ra Pedro ñuu Jerusalén. Tan ra tsa catýi tyin tsiñi ñuhu tsa cunyaa tuñi Nyoo tsi tandihi rayi, xaan xaan cuñi ra naha nyehé ra naha tsi ra Pedro. ³ Tan catýi ra naha tsihin ra:

—¿Nacuenda tsaḥan un yuvehe nyivi tsa ñavin nyivi Israel cuví tan tsatsj un tsihin ñi? —catýi ra naha.

⁴ Tacan tan ra Pedro nacatýi tuhun ra nda nu quitsahá tandihi tsa cuví tsi ra, tan catýi ra:

⁵ —Yuhu nyii yu ñuu Jope. Tan tsa tsicán tahvi yu tsi Nyoo tan nyehe yu iin tsa janahá Nyoo tsi yu tyin iin jahma cahnu quee ityi andivi. Tan tandihi tsa cumi tutun tsi nuuhñi nuuhñi ñi tan vatsi nuú tsi ityi nu ñuhu nu nyii yu.

⁶ Tan nyehe vaha yu tsa yihí tsitsi jahma can. Tan nyehe yu quiti tsa cumi tsaha, quiti cuuhu, coo, tan saa. ⁷ Tan tsiñi yu iin ndusu tsa caahán tsihin yu: “Nduvita Pedro. Cahñi quiti ihya tan çatsi un” catýi ndusu can tsihin yu. ⁸ Tan nacahān yu tan catýi yu tyehen: “Jutu Mañi yu, ña catsi yu, tyin ña tuhvá yu catsi quiti tsa catýi ley tyin ña vaha catsi ndi.” ⁹ Tacan tan ndusu can nacahān tsi tsihin yu inga tsaha, tan catýi tsi: “Ña vaha tsa cahan un tyin ña catsi un tsa tsa yahá janduvahá yu” catýi ndusu can tsihin yu. ¹⁰ Uñi tsaha cuví yacan. Yahá can tan nandaá nyico tandihi quiti can tsihin jahma can ityi andivi. ¹¹ Tan juvin ñi cuhva can tsaá uñi taahan ra naha yuvehe nu nyii yu, quee ra naha ñuu Cesarea tan nanducú ra naha tsi yu. ¹² Tan Tatyí Ii Nyoo cahān tsihin yu na cuhun yu tsihin ra naha. Tan catýi ra tsihin yu tyin ña caca iñi yu tsa ñavin ra ñuu Israel cuví ra naha. Yacan cuahán yu. Tan cuahán ndihi iñu taahan ra yañi yo ihya naha ra tsihin yu. Tan tsa tsaá ndi nda ñuu Cesarea, quihvi ndi tsitsi vehe iin ra tsa nañi Cornelio. ¹³ Tan nacatýi tuhun ra can tsihin ndi nácaa nyehe ra tsi iin ángel tsitsi vehe ra. Nyaá nyityi ángel can tan catýi ra tsihin ra tyin na jacuhun ra musu ra ñuu Jope na cucana ra naha tsi yu. ¹⁴ Tyin yuhu cua cuhva cuenda yu tsi ra nácaa cuví cacu ra tsihin tandihi nyivi ra, catýi ángel can tsihin ra, catýi ra tsihin ndi. ¹⁵ Tan javahá ra can tumaa cuhva catýi ángel can tsihin ra. Tan tsa tsaá yu yuvehe ra quitsahá caahán yu tsihin nyivi tsa ndu iin yuvehe ra. Tan quitsj Tatyí Ii Nyoo siqui ñi tumaa tsa nuu tsi siqui yo tsa jihna ñi. ¹⁶ Tacan tan nducuhun iñi yu tsa catýi Jutu Mañi yo quivi can. Tan catýi ra tyehen: “Nditza tyin ra Juan jacoondutya ra tsi nyivi tsihin ndutya. Maa tyin nyoocho cua coondutya ndo tsihin Tatyí Ii Nyoo”, catýi ra. ¹⁷ Nyoo tsahá ndihi tucu ra Tatyí Ii ra tsi ñi can tumaa tsa tsahá ra Tatyí Ii ra tsi yo quivi tsa natsinu iñi yo tsi Jutu Mañi yo Jesucristo. Tan tsa tacan çyoo ra cuví yuhu tan casi yu tsa javahá Nyoo? —catýi ra Pedro tsihin ra hermano can naha ra.

¹⁸ Tacan tan tsa tsiñi ra ñuu Jerusalén tuhun can, ña cahān ca ra naha. Tan jacahnú ra naha tsi Nyoo, tan catýi ra naha:

—Tun tacan cuví, cuñi tsi catýi tyin Nyoo tsahá ndihi tucu ra ndatu tsi nyivi tsa ñavin nyivi Israel cuví tyin na ndu uvi iñi ñi cuatyi ñi, tan coo ñi ñayivi nyito tsa ña cua naa maa —catýi ra naha.

Nyivi yihí cuenda ra Cristo ñuu Antioquia

¹⁹ Quiví tsa tsaññi ra naha tsi ra Esteban, quitsaha nyaá ndaha ra naha tsi inga ca nyivi yihí cuenda ra Cristo. Tan yihí ñi tsinu ñi tan cuahán ñi ityi Fenicia. Tan yihí ñi cuahán ñi iin ñuhu tsa nañi Chipre tsa canyí mahñu ndutya ñuhu. Tan yihí ñi tsañ ñi ñuu Antioquía. Tan tandihí ñi caahán ñi tuhun ra Cristo tsihin nyivi, maa tyin iin ñi maa tsihin nyivi Israel. ²⁰ Tan tsihin ñi tsa cuahán can, yihí nyivi ñuhu Chipre, tan yihí tucu juhva nyivi ñuu Cirene. Tan tsa tsañ ñi ñuu Antioquía, tan quitsaha caahán ñi can tuhun ra Cristo tsihin nyivi tsa ñavin nyivi Israel cuví. Tan jacoto ñi tuhun vaha Jutu Mañi yo ra Jesús. ²¹ Tan tunyee iñi Jutu Mañi yo iyó tsihin ñi. Tan yacan cuenda cuaha nyivi nacoñ ñi tuhun tshanu. Tan quitsaha tsinu iñi ñi tsi Jutu Mañi yo. ²² Tacan tan tsañ tuhun can nda ñuu Jerusalén. Tan nyivi yihí cuenda ra Cristo jacuhun ñi tsi ra Bernabé na cuhun ra nda ñuu Antioquía. ²³ Tan tsa tsañ ra Bernabé Antioquía can, nyehe ra nácaa nasocó Nyoo tsi ñi. Tan sii xaan cuñí ra. Tan catyí ra tsihin ñi na cunyicun ñi tsi Jutu Mañi yo tsihin tsa ñi iñi ñi. ²⁴ Tacan javahá ra Bernabé tyin cuví ra iin ra vaha. Tsitú ra tsihin Tatyí Ii Nyoo, tan tsinu xaan iñi ra tsi Nyoo. Yacan cuenda cuaha xaan nyivi quihví cuenda Jutu Mañi yo. ²⁵ Tsa yaha can tan cuahán ra Bernabé cua nanducu ra tsi ra Saulo nda ñuu Tarso. Tan tsa nañihí ra tsi ra, tsindacá ra tsi ra nda ñuu Antioquía. ²⁶ Tan tsiyucu ra naha tsihin nyivi yihí cuenda ra Cristo ñuu can iin cuiya tan cuaha xaan nyivi jacuahá ra naha tuhun Nyoo. Tan juvin ñi ñuu Antioquía can cuví nu quitsaha catyí nyivi tyin nyivi Cristiano cuví ñi, o ñi yihí cuenda ra Cristo.

²⁷ Tan quiví can tsañ taahan ra cuví ndusu yuhu Nyoo. Quee ra naha ñuu Jerusalén tan tsañ ra naha ñuu Antioquía. ²⁸ Tan iin ra can nañi ra Agabo tsiyucun nyityi ra tyañu nyivi yihí cuenda ra Cristo tan cahan ra tsa tsañ Tatyí Ii Nyoo tsi ra. Tan catyí ra tyin cua quitsi iin tama ñi cahnu nu ñuhu ñayivi. Tan tacan cuví quiví tsa cuví ra Claudio rey cahnu. ²⁹ Tacan tan nyivi yihí cuenda ra Cristo nda ñuu Antioquía natuhun tahan ñi tyin cua cuhva ñi nácaa iyó iñi intuhun intuhun ñi, tyin cua jatyinyee ñi tsi nyivi yihí cuenda ra Cristo tsa iyó ñuu tsa cayucú Judea. ³⁰ Tacan javahá ñi tan jacuhun ñi juhva xuhun tsi ra tsa cuví ityi nuu tsihin nyivi yihí cuenda ra Cristo nda ñuu Jerusalén. Tan ra Bernabé tsihin ra Saulo tsindacá ra naha xuhun can.

12

Nu tsihi ra Jacobo tan nu quihví ra Pedro vehe caa

¹ Tan quiví can quitsaha nyaá ndaha ra cuví rey Herodes tsi juhva nyivi yihí cuenda ra Cristo. ² Tan tava tyiñu ra tyin na cañi ra naha tsi ra Jacobo, yañi ra Juan, tsihin mityi. ³ Tan nyehe ra Herodes tyin tahañ xaan iñi nyivi Israel tsa javahá ra tacan, tan tava tyiñu ra tyin tñi ndihí ra naha tsi ra Pedro. Tan cuví tsi quiví vico pascua nu tuhva nyivi tsatsí paan tsa nduve yutsan iya yihí. ⁴ Tsa yaha tsa tñi ra naha tsi ra Pedro, tyihí ra naha tsi ra vehe caa. Tan cumi taahan andaru jahá cuenda tsi ra tsa iin cuhva. Tan tahan iñu hora tan nasamá ra naha, quihví tucu inga cumi taahan andaru. Tan tyaa ra Herodes cuhva tyin cua cuhva cuenda ra tsi ra Pedro tsi nyivi tsa yaha vico Pascua. ⁵ Tan tacan nyí ra Pedro vehe caa. Tan andaru can jahá cuenda vaha xaan ra naha tsi ra. Maa tyin tsitsi tsa nyí ra ican, nyivi yihí cuenda ra Cristo iyó nyitya ñi tan tsicán tahvi xaan ñi tsi Nyoo tsa cuenda ra tsihin tsa ñi iñi ñi.

Nu jacacū Nyoo tsi ra Pedro vehe caa

⁶ Tan tyaā ra Herodes cuhva tyin inga quivī can cua tava ra tsi ra Pedro nuu nyivī. Tan juvin ñi tsacuaa can, tan ra Pedro quixí xaan ra tyañu uvi andaru can. Nuuhñi ra tsihin uvi cadena. Tan yucú uvi taahan ca andaru jahá cuenda nda yuvehe. ⁷ Tan sana iñi ra tan quituvī iin ángel tsa jacuhun Jutu Mañi yo. Tan ndunditsin tsitsi vehe caa can. Tan ángel can tñin ra xiin ra Pedro, jandoto ra tsi ra. Tan catyí ra tsihin ra:

—Janumi. Nduvita —catyí ángel can tsihin ra.

Tacan tan ndatsi cadena tsa nuuhñi ndaha ra. ⁸ Tan ángel can catyí ra tsihin ra:

—Nacuhñi vaha tsitsi un tan tyihi nditsan un tsaha un —catyí ángel can tsihin ra.

Tacan javaha ra Pedro. Tan catyí ángel tsihin ra:

—Quihin jahma un cunditsi un tan quitsi nyicun un tsi yu —catyí ángel can tsihin ra.

⁹ Tan ra Pedro cuahán ra cuanyicún ra tsi ángel can. Maa tyin ña tsitó ra tatun tsa nditsa o tsa ña nditsa cuví can, tan cuñi maa ra tyin iyó iin tsa janaha Nyoo tsi ra. ¹⁰ Maa tyin cuahán ra tsata ángel can tan yaha ra naha iin nu jahá cuenda ra andaru. Tacan tan yaha tucu ra naha inga nu jahá cuenda ra naha. Yaha can tacan tan tsaā ra naha yuvehe caa cahnu nu quitá nyivī. Tan yuvehe can nuñā maa tsi. Tan quitā ra naha. Tan tsa yaha yaha ra naha iin ityi, tan nacoō ángel can tsi ra. ¹¹ Tacan tan nacoto ra Pedro tyin nditsa, tan quitsaha tsicá iñi ra:

—Vityin tsitó yu tyin tsa nditsa cuví tsi. Maa Jutu Mañi yu jaquitsi iin ángel tyin jacacū ra tsi yu ndaha ra Herodes tan ndaha ra ñuu Israel naha ra —cuñi ra Pedro.

¹² Tsicá iñi ra yacan ityi cuahán ra, tan tsaā ra yuvehe ña María sihi ra Juan Marcos. Tan cuaha xaan nyivī yucú ican tsicán tahvi ñi tsi Nyoo. ¹³ Tan tsa cañi ndaha ra Pedro yuvehe nuquehe, tan quitā iin ñaha tyuvaa tsa nañi Rode, tsinyehē ña yóo cañi ndaha yuvehe can. ¹⁴ Maa tyin cuhva tsa tsiñi ña ndusu ra Pedro, si xaan cuñi ña, tan naā iñi ña nuña ña yuvehe can, tyin tsinú ña cuahán ña cua cahan ña tsihin nyivī tsa yucú tsitsi vehe can. Tan catyí ña tyin ra Pedro nyaá ra yuvehe. ¹⁵ Tacan tan quitsaha catyí ñi tsihin ña:

—Iñi yooho ña vaha cuñi —catyí ñi tsihin ña.

Tan catyí ña tyin nditsa tsa caahán ña. Maa tyin ñi can catyí ñi tyin ñavin ra Pedro cuví ra, iin ángel cuenda ra cuví, catyí ñi tsihin ña.

¹⁶ Tan ra Pedro jañihī ca ra cañi ndaha ra yuvehe. Tan cuhva tsa nuñā ñi yuvehe tan nyehē ñi tsi ra, iyo xaan cuñi ñi tan nayuhvi ñi. ¹⁷ Maa tyin javaha ra seña tsihin ndaha ra na cutaxin ñi. Tan nacatyí tuhun ra tsihin ñi nácaa tava Jutu Mañi yo tsi ra vehe caa. Tan catyí ra tsihin ñi:

—Cahan ndo tuhun ihya tsihin ra Jacobo tan tsihin inga ra yañi yo naha ra —catyí ra Pedro.

Tan quitā ra tan cuahán ra.

¹⁸ Cuhva tsa cunditsin, iyo xaan cuñi ra andaru tsa jahá cuenda tsitsi vehe caa can naha ra, tyin ña tsitó ra naha nácaa quitā ra Pedro. ¹⁹ Tacan tan tava tyiñu ra Herodes na cunanducu ra naha tsi ra, tan ña nañihī ra naha tsi ra. Tacan tan tava tyiñu ra tsi ra naha na cahñi ra naha tsi ra jahá cuenda vehe caa can naha ra. Yaha can tan quitā ra Herodes Judea can tan cuahán ra cua coo ra ñuu Cesarea.

Nu tsihi ra Herodes

²⁰ Tan ra Herodes cuxaán xaan ra tsihin nyivi ñuu Tiro tan nyivi ñuu Sidón. Maa tyin cuñi ñi tsa coo vaha ñi tsihin ra tyin ñuu tsa ndacá ñaha ra, ican quee tsa tsatsí ñi. Tacan tan ndu iin ñi tan cuahán ñi cua cutahan ñi tsihin iin ra tsa nañi Blasto. Ra ican cahnu tyiñu jahá ra, tyin jahá cuenda ra tsi ra Herodes. Tan tsicán ñi tsa na coo vaha ñi tsihin ra Herodes. ²¹ Tacan tan catyí ra Herodes tyin cuhun ñi nu nyaá ra iin quivi. Tan tsaá quivi can tan tsicunditsi ra jahma sii caá ra tsa jahá tyiñu ra. Tan tsicunyaá ra nu tyayu ra. Tan cahan ra tsihin ñi. ²² Tacan tan quitsaha caná tsaá ñi, tan catyí ñi:

—Ra tsa caahán ihya ñavin rayií cuví ra, tyin Nyoo cuví ra —catyí ñi.

²³ Tan juvin ñi cuhva can tan tiin cuehe tsi ra Herodes jahá ángel Jutu Mañi yo tyin tsañá ra tsa catyí nyivi tyin Nyoo cuví ra. Tan quihvi tindacu tsi ra, tan tsihi ra.

²⁴ Maa tyin tuhun Nyoo nducuaḥa ca tsi. Tan jañihí ca nyivi caahán ñi tuhun Nyoo tandihí ñi ityi. ²⁵ Quivi tsa ndihí tyiñu jahá ra Bernabé tsihin ra Saulo nda ñuu Jerusalén, cuanuhu ra naha ñuu Antioquía. Tan cuahán ndihí tucu ra Juan Marcos tsihin ra naha.

13

Nu quitsaha tsicá ra Saulo tan ra Bernabé tyiñu Nyoo

¹ Tsihin nyivi tsa yihí cuenda ra Cristo ñuu Antioquía yihí ra tsa cuví ndusu yuhu Nyoo. Tan yucú tucu ra tsa jacuahá tuhun Nyoo tsi nyivi. Tan ra ican naha ra cuví ra ihya naha ra: Ra Bernabé, ra Simón Tuun, ra Lucio ra ñuu Cirene, ra Manaén tsa tsañu iin nducu ñi tsihin ra Herodes tsa cuví rey ityi Galilea, tan ra Saulo. ² Tan iin quivi yucú tandihí ra naha tan jacahnú ra naha tsi Jutu Mañi yo. Tan iyó nyitya ra naha. Tacan tan cahan Tatyí Ii Nyoo tsihin ra naha:

—Tava siin ndo tsi ra Bernabé tsihin ra Saulo tsa cuenda tyiñu tsa caná yu tsi ra naha —catyí Tatyí Ii Nyoo can tsihin ra naha.

³ Tacan tan tsa ndihí tsicoḡ nyitya ra naha, tan tyiso ndaha ra naha jiñi ra Bernabé tsihin ra Saulo, tan tsican tahvi ra naha tsi Nyoo tsa cuenda ra naha. Tan cahan tsihin tahan ra naha, tsahan cuahán ra naha.

Nu caahán ra tava tyiñu ra Jesús tuhun Nyoo ñuhu Chipre

⁴ Yaha can tan jacuhun Tatyí Ii Nyoo tsi ra Bernabé tan tsihin ra Saulo ñuu Seleucia. Tacan tan cuahán ra naha. Tan ican quihvi ra naha tsitsi iin yutun ndoo tan cuahán ra naha nda ñuhu Chipre tsa canyií mahñu ndutya ñuhu.

⁵ Tacan tan tsaá ra naha ñuu Salamina tsa canyií yuhun ndutya ñuhu. Tan quitsaha caahán ra naha tuhun Nyoo vehe ñuhu ra Israel. Cuahán tucu ra Juan tsihin ra naha tyin cua jatyinyee ra tsi ra naha. ⁶ Tacan tan cuahán ra naha caahán ra naha tuhun Nyoo tan iin tan iin ñuu tsa cayucú Chipre can nda cuanda tsa tsaá ra naha ñuu tsa nañi Pafos. Tan ican nañihí ra naha tsi iin ra ñuu Israel tsa nañi Barjesús. Tan tsitó ra tuhun tasi. Cuví ra iin ra jandaví ñaha tyin catyí ra tyin cuenda Nyoo caahán ra. ⁷ Tan ra tasi can nyaá ra tsihin ra cumí tyiñu Sergio Paulo. Tan ra Sergio cuví ra iin ra catsi iñi. Tan cana ra tsi ra Bernabé tsihin ra Saulo, tyin cuñi ra tyaa soho ra tuhun Nyoo tsa caahán ra can naha ra. ⁸ Tan ra tasi can nañi tucu ra Elimas, tan tyasí xaan ra nu tsinu iñi ra cumí tyiñu can tsi ra Cristo. ⁹ Tacan tan ra Saulo tsa nañi tucu Pablo, tsitú ra tsihin Tatyí Ii Nyoo. Tan ñihi xaan nanyehé ra tsi ra Elimas can. ¹⁰ Tan catyí ra tsihin ra:

—Yooho ra jandaví ñaha, ra vatya. Sehe cuihna cuví tsi un. Tan cuñí un jatívi un tandihí tsa vaha. Tan tacan ñi tyasí un ityi vaha Jutu Mañi yo. ¹¹ Tan vityin Jutu Mañi yo cua tatsi tuñi ra tsi un, tyin cua cuaa un. Tan ña cua cuví nyehe un ñuhu ñicanyii juhva quívi —catyí ra Pablo tshin ra Elimas.

Tacan tan juvin ñi cuhva can cuaa ra. Tan ndoo ra nu naa. Tan nducú ra iin ra tñin ndaha ra tyin ña nditsin nyehé ra. ¹² Tsa nyehe ra cumí tyiñu can tsa cuví tsi ra Elimas, tan natsinu iñi ra tsi ra Jesucristo. Tyin iyo cuñí ra nyehé ra tsa javahá Jutu Mañi yo.

Nu cuahán ra Pablo tan ra Bernabé nda ñuu Antioquía tsa canyii Pisidia

¹³ Ra Pablo tan ra vaha iñi tsi ra quihví ra naha tsitsi iin yutun ndoo ñuu Pafos. Tan cuahán ra naha nda ñuu Perge tsa canyii Panfilia. Maa tyin ra Juan Marcos nacoq ihñi ra tsi ra naha tan cuanuhu ra nda ñuu Jerusalén. ¹⁴ Yahá can tan quee ra naha Perge can, tan cuahán ra naha ñuu Antioquía tsa canyii Pisidia. Ican quihví ra naha tsitsi vehe ñuhu nyívi Israel tan cuví tsi iin quívi quitatú ñi. Tan tsinyecú ra naha. ¹⁵ Tacan tan quitsahá cahví nyívi nu libru ley Nyoo tsa tyaá ra Moisés. Tan cahví tucu ñi libru tsa tyaá ra cuví ndusu yuhu Nyoo tahañ tsanaha. Yahá can tan ra cuví ityi nu vehe ñuhu naha ra catyí ra naha tshin ra hermano tsa nyecú ican, tyin tatun cuñí ra naha cahan ra naha tshin nyívi, cuví cahan ra naha. ¹⁶ Tacan tan nduvitá ra Pablo tan javahá ra iin seña tshin ndaha ra tyin na cutaxin ñi. Tan catyí ra:

—Tyaá soho nyooho, ra ñuu Israel, tan nyooho nyívi tsa tyaá yahvi tsi Nyoo. ¹⁷ Nyoo cuenda yo, tsa cuví yo nyívi Israel, nacatsí vaha ra tsi tsii tsaahnu yo. Tan quívi tsa iyó ca ra naha Egipto, javahá ra iin ñuu cahnu tsi ra naha. Vasu ñavin nyívi ñuu can cuví ra naha, maa tyin janducuahá ra tsi ra naha. Yahá can tan tava ra tsi ra naha ityi can tshin tunyee iñi tsa iyó tsi ra. ¹⁸ Tan cunyeé iñi Nyoo tandihí cuhva tsicoq ra naha nu tsicá nuu ra naha nu tsiqui tsitsi tsa uvi xico cuiya. ¹⁹ Tan janaá ra utsa taahan ñuu nahnu tsa cayucú ñi cahnu Canaán, tyin tsahá ra ñuhu can tsi tsii tsaahnu yo. ²⁰ Yahá can tan quitsahá ndacá ñaha juez tsi nyívi can jahá Nyoo. Tumaa cumi cientu sasava cuiya tsindacá ñaha juez tsi ñi, nda cuanda quívi tsindacá ñaha ra Samuel ra cuví ndusu yuhu Nyoo tsi ñi. ²¹ Tacan tan maa ñi tsican ñi iin rey tsa cundaca ñaha tsi ñi. Tan Nyoo tsahá ra tsi ra Saúl, sehe ra Cis tsi ñi, tyin cundaca ñaha ra tsi ñi. Tan ra Saúl cuví ra tata ra Benjamín. Tan uvi xico cuiya tsindacá ñaha ra tsi ñi. ²² Yahá can tan Nyoo tava ra tsi ra Saúl tsa cuví ra rey. Tan tsahá ra tyiñu can tsi ra David. Tan catyí ra: “Nyehe yu tyin ra David, sehe ra Isaí, cuví ra iin rayí tsa taahán iñi yu cuhva iyó. Tan cua javaha ra tandihí tsa cuñí yu” catyí Nyoo tuhun ra David. ²³ Tan iin ra tsa cuví tata ra David can, juvin ra cuví ra Jesús. Tan maa Nyoo jaquitsí tsi ra tyin jacacu ra tsi yo tsa cuví yo nyívi Israel, tumaa catyí ra tshin tsii tsaahnu yo tahañ tsanaha. ²⁴ Tan ndi cumañi ca quitsi ra Jesús, ra Juan, ra jacoondutya tsi nyívi, cahan ra tshin tandihí nyívi Israel. Tan catyí ra tshin ñi tyin cuñí tsi tsa ndu uvi iñi ñi cuatyí ñi, tan coondutya ñi. ²⁵ Tan tsa cua ndihí tyiñu jahá ra Juan tan catyí ra: “¿A cuñí maa ndo tyin yuhu cuví ra cahnu xaan tsa ndatú ndo? Ñavin yuhu cuví ra cahnu can. Tyin tsata tsa yaha yuhu tan vatsí inga ra. Tan ndi nditsan tsa nyaá tsaha ra, nduve yahvi nyaá yu tan tava yu itsi. Tyin cahnu xaan ra cuví rá”, catyí ra Juan.

²⁶ Tan caahán ca ra Pablo tan catyí ra:

—Yañi, nyooho nyivi tata ra Abraham tan tandihi inga ndo tsa tyaá yahvi tsi Nyoo. Tsa cuenda nyooho cuví tuhun ihya tyin jacuahá Nyoo tsi yo nácaa cacu yo. ²⁷ Nyivi ñuu Jerusalén tan ra cuví ityi nuu tsihin ñi ña tsitó ñi tyin ra Jesús jacacú ra tsi yo. Tan ndi ña cutuñi iñi ñi tuhun tsa tyaá ra cuví ndusu yuhu Nyoo tahañ tsanaha, vasu jacuahá xaan ñi tuhun can tandihi quivi tsa quitatu ñi, maa tyin ña cutuñi iñi ñi. Tan quivi tsañi ñi tsi ra Jesús cuví tsi tumaa cuhva catyí ra cuví ndusu yuhu Nyoo. ²⁸ Tyin vasu nduve cuatyí ra Jesús nañihí ñi, maa tyin tsican ñi tsi ra Pilato na tyihí ra tyiñu tyin cahñi ra naha tsi ra Jesús. ²⁹ Tan tsa yaha janyehe ñi tundoho tsi ra tumaa catyí maa tuhun ra nu libru, tan tsihi ra. Tacan tan januu ñi tsi ra nu cruu. Tan tsicutsj ñi tsi ra. ³⁰ Maa tyin Nyoo janandoto ra tsi ra inga tsaha. ³¹ Tan tsitsi tsa cuaha quivi tan quituvi ra nuu ra tsa cuahán tsihin ra quivi quitá ra ityi Galilea, tan tsaá ra Jerusalén. Tan ra ican naha ra cuví ra tsa caahán tuhun ra tsihin nyivi vityin. ³² Tan yacan cuenda nyuhu caahán ndi tuhun vaha tsa catyí Nyoo tsihin tsii tsaahnu yo tyin cuhva ra tsi yo. ³³ Tyin tsa cuenda tsa vaha tsi maa yo tsa cuví yo nyivi tata ñi, javahá maa Nyoo tsa catyí ra. Tyin janandoto ra tsi ra Jesús tumaa cuhva nyaá nu tsinu uvi salmo nu catyí ra tyehen: “Sehe yu cuví tsi un, tan yuhu tsahá yu ñayivi coo un vityin” catyí Nyoo tsihin ra. ³⁴ Nyoo tyaá ra cuhva tyin janandoto ra tsi ra, tyin tacan tan ña cua tyahyu cuñu ñuhu ra. Tyin catyí nu tutu Nyoo: “Tsi nyooho cua cuhva yu tsa vaha tsa cahan yu tsihin ra David tyin cua cuhva yu tsi ndo.” ³⁵ Yacan cuenda catyí tucu nu inga salmo tyehen. “Ña cua cuhva un tsa tyahyu cuñu ñuhu Sehe ii un” catyí tsi. ³⁶ Ra David jaha tyiñu ra tsa cuenda nyivi tsa tsicoo quivi tsicoo ra, tandihi tsa catyí Nyoo tsihin ra tyin javaha ra, javahá ra. Yaha can tan tsihi ra tan tsicutsj ñi tsi ra tumaa tsicutsj ñi tsi jutu ra. Tan tyahyu cuñu ñuhu ra. ³⁷ Maa tyin ra tsa janandoto Nyoo, ña tyahyu cuñu ñuhu ra. ³⁸ Yañi, cuñí tsi tsa coto ndo tyin tsa cuenda cuatyí yo tan quitsj ra Jesús tan tsihi ra tyin jahá ra tucahnu iñi cuatyí yo. ³⁹ Tan tsa cuenda ra Jesús jahá Nyoo tucahnu iñi tsi tandihi ñi tsa tsinú iñi tsi ra, tyin ley Nyoo tsa tyaá ra Moisés ña cuví janduvaha tsi tsi yo nuu Nyoo. ⁴⁰ Jaha ndo cuenda coto ndoo tsa tyaá ra cuví ndusu yuhu Nyoo siqui ndo. Tyin catyí ra naha tyehen:

⁴¹ Nyehe nyooho, ra tsa tsacú nducu, taahán tsi tsa nayuhvi ndo tan taahán tsi cunaa ndo.

Tyin yuhu cuví Nyoo, tan javahá yu iin tsa cahnu quivi tsa iyó ndo vityin.

Maa tyin ña cua tsinu iñi ndo tandihi tsa javahá yuhu vasu nacatyí tuhun nyivi tsihin ndo, catyí Nyoo.

⁴² Ndihi cahan ra Pablo tan quitá ra tsata vehe ñuhu can tsihin ra vaha iñi tsi ra. Tacan tan nyivi tsa ñavin nyivi Israel cuví quitsahá catyí ñi tsihin ra, tyin na cahan nyico ra tuhun can tsihin ñi inga vitya quivi tsa quitatú ñi. ⁴³ Cuhva tsa ndihí ndu iin ñi, cuaha xaan nyivi Israel tan nyivi tsa yihí cuenda ñi Israel, tsinyicun ñi tsi ra Pablo tan tsi ra Bernabé. Tan catyí ra naha tsihin ñi tyin na cuhun ca ñi ityi nuu tsihin Nyoo. Tan na naquihin vaha ñi tumañi iñi tsa tsahá Nyoo tsi ñi.

⁴⁴ Tsa inga vitya quivi quitatú ñi, ndu iin nyico ñi. Tan tsa yatyin tandihi ña maa nyivi ñuu can ndu iin tsihin ñi tan tyaá soho ñi tuhun Nyoo. ⁴⁵ Maa tyin cuhva tsa nyehe ra Israel naha ra, cuxaán ra naha tyin nyehé ra naha tyin cuaha nyivi nyicún tsi ra hermano can naha ra. Tan quitsahá caahán ra naha tsi ra Pablo, tan cahan ra naha ndavaha ñi siqui ra. ⁴⁶ Maa tyin ra

Pablo tan tsihin ra Bernabé ña yuuhví maa ra naha tan quitsahá caahán ñihi ra naha tsihin ra Israel can naha ra. Tan catyí ra naha:

—Cuñí tsi tsa cahan jihna ndi tuhun Nyoo tsihin nyooho tsa cuví ndo nyívi Israel. Maa tyin ña cuñí ndo naquihin ndo tsa caahán ndi. Tan nyooho ña cuñí ndo tsa coo ñayívi nyito tsa ña cua naa maa tsi ndo. Yacan cuenda cua cahun ndi cucahan ndi tsihin nyívi tsa ñavin nyívi Israel cuví. ⁴⁷ Tyin tacan catyí Jutu Mañi yo tsihin ndi tan catyí ra tyehen:

Tyaá yu tsi un tumaa iin ñuhu tsa jandundítsin nu iyó nyívi nan# cahnu nu ñuhu ñayívi.

Tyin tacan tan cua jacuaha un tsi ñi nácaa jacacu yu tsi ñi, catyí Nyoo.

⁴⁸ Tsa tsiñí ra tsa ñavin ra Israel cuví naha ra, sii xaan cuñí ra naha. Tan quitsahá catyí ra naha tyin tuhun Nyoo vaha xaan tsi. Tan natsinuñ iñi tandihi nyívi tsa nacatsí maa Nyoo, tyin coo ñi ñayívi nyito tsa ña cua naa maa.

⁴⁹ Tacan tan nducuahá ca tuhun Nyoo tandihi ityi ñuu can. ⁵⁰ Maa tyin ra Israel cahan ra naha tsihin juhva ñaha cuca tsa nyicún ley Nyoo tsa tyaá ra Moisés. Catyí ra naha tsihin ñi tyin ña vaha tuhun caahán ra Pablo. Tan caahán tucu ra naha tsihin ra cumí tyiñu ñuu can. Tan ican cuví nu quitsahá nyaá ndaha nyívi tsi ra Pablo tan ra Bernabé, nda cuanda tsa tavá ñi tsi ra naha ñuu can. ⁵¹ Tacan tan naquisí ra naha nyaca tsaha ra naha tumaa iin seña tyin ndoo cuatyí nyívi can siqui maa ñi. Tan cuahán ra naha ñuu Iconio. ⁵² Maa tyin ñi yihí cuenda ra Cristo ñuu Antioquía can sii xaan cuñí ñi. Tan tsitú ñi tsihin Tatyí Ii Nyoo.

14

Nu nyíi ra Pablo tan ra Bernabé ñuu Iconio

¹ Ra Pablo tan ra Bernabé yucú ra naha ñuu Iconio. Tan quihví ra naha tsitsi vehe ñuhu nyívi Israel. Tan vaha xaan cahan ra naha tuhun Nyoo tsihin nyívi can. Tan cuaha xaan ñi natsinuñ iñi ñi tsi ra Cristo, nyívi Israel tan nyívi tsa ñavin nyívi Israel cuví. ² Maa tyin ra Israel tsa ña tsinú iñi tsi ra Cristo natyuhú ra naha tsi nyívi tsa ñavin nyívi Israel cuví tyin na caca ña vaha iñi ñi nyehe ñi tsi ra yihí cuenda ra Cristo. ³ Yacan cuenda ra Pablo tan ra Bernabé ndoo ra naha ican cuaha quívi. Tan tsihin tsa ñi iñi ra naha caahán ra naha tuhun ra Cristo, tyin tsinú xaan iñi ra naha tsi Jutu Mañi yo. Tan Jutu Mañi yo jatyinyee ra tsi ra naha tsa caahán ra naha tuhun ra, nácaa tsa cuñí ra tsi yo. Tan tsahá Jutu Mañi yo tunyee iñi tsi ra naha tyin javaha ra naha seña tan tsa iyo na coto nyívi tyin nditsa tsa caahán ra naha. ⁴ Maa tyin nyívi ñuu ña iin tsicá iñi ñi, tyin juhva ñi yihí cuenda ra Israel naha ra, tan juhva ñi nyicún tsi ra tavá tyiñu ra Jesús. ⁵ Tacan tan ra Israel tan ra tsa ñavin ra Israel cuví, natuhun tahan ra naha tsihin ra cumí tyiñu, tyin cua cahan ra naha ndavaha ñi siqui ra tavá tyiñu ra Jesús, tan cua cañi ra naha yuu tsi ra naha. ⁶ Maa tyin ra Pablo tan ra Bernabé ñihí tuhun ra naha tyin tacan cua javaha ra can naha ra tsi ra naha, tan cuahán ra naha nda ñuu Listra, tan nda ñuu Derbe ityi Licaonia. Tan tsicá nuu ra naha ityi ñuu can. ⁷ Tan cahan nyico tucu ra naha tuhun Nyoo nácaa jacacú ra tsi yo.

Nu cañi nyívi yuu tsi ra Pablo nda ñuu Listra

⁸ Nda Listra iyó iin rayíi tsa coxo tyin nda quívi cacú ra tan ña cuví caca ra, tyin pehe nduvi taahan tsaha ra. ⁹ Tan ra pehe tsaha can tyaá soho ra tsa caahán ra Pablo. Tan ra Pablo, tuví iñi ra tyin tsinú iñi ra can tyin cuví

nduvaha ra. ¹⁰ Tacan tan ra Pablo caahán ra tsihin tsa ñihi ndusu ra, tan catyí ra:

—Ndūvita tan cūnyaa nyityi un —catyí ra Pablo tsihin ra.

Tan ra ican, intuhun ñi ndavaḡ ra, tan tsinyaa nyityi ra. Tan quitsahaḡ tsicá ra. ¹¹ Tsa nyehé nyiví tyin javahaḡ ra Pablo tacan, quitsahaḡ caná tsaá ñi tsihin yuhu Licaonia, tan catyí ñi:

—Ra tsa tsaḡ nu yucú yo ihya, nyoo cuví ra naha, maa tyin tumaa caá rayii, caá ra naha —catyí ñi.

¹² Tan catyí ñi tyin ra Bernabé cuví ra nyoo tsa nañí Júpiter, tan ra Pablo cuví nyoo tsa nañí Mercurio, tyin ra ican cuví ra tsa caahán. ¹³ Tan iyó iin ra cuví jutu tsa jahá cuenda vehe ñuhu tsa nyaá yuhu ñuu ñi can nu jacahnú nyiví tsitoho Júpiter. Tan quitsi ndaca ra indiqui tan ita tyin maa ra tan nyiví cuñí ñi jacahnú ñi tsi ra Pablo tsihin ra Bernabé. Tan cua cahñi ñi indiqui can tyin cua cuhva cuenda ñi tsi ra naha, tyin cuñí ñi tyin nyoo cuví ra naha.

¹⁴ Maa tyin cuhva tsa tuví iñi ra naha tsa tsicá iñi ñi, quitsahaḡ tsaahnyá ra naha jahma ra naha. Tan javahaḡ ra naha tacan tumaa iin seña tyin ña ndoó ra naha vaha. Tan quihví ra naha tyañu nu tuví nyiví, tan caná tsaá ra naha,

¹⁵ Tan catyí ra naha:

—Nyooho tata, ¿nácaa tsa javahá ndo tyeheh? Nyuhu juvin ñi rayii ñuu ñayiví ihya cuví ndi. Tumaa cuví nyooho cuví tucu nyuhu. Tan vatsí cahan ndi tsihin ndo tyin na jaña ndo tsa javahá ndo tyeheh tyin ña tsiñí ñuhu yacan tsi ndo, tan na cunyicun ndo tsi Nyoo nyito. Juvin ra tsa javahaḡ andiví tan ñuhu ñayiví. Tan javahaḡ ra ndutya ñuhu tan tandihí maa tsa iyó tsitsi ndutya ñuhu can. ¹⁶ Tan tahañ tsanaha nda cuanda vityin, Nyoo jañá ndaha ra tsi nyiví na javaha maa ñi cuhva cuñí ñi, ¹⁷ vasu tandihí quiví jacuahá ra tsi ñi tyin ra vaha cuví ra tan javahá ra tsa vaha. Maa ra jacuún ra savi nu yucú yo. Tsaḡá ra tsa coo vaha tsa tatsí yo quiví taahán tsi. Tan tsaḡá ra tsa catsi yo. Tan tsaḡá ra tsa cusí cuñí yo —catyí ra naha tsihin nyiví can.

¹⁸ Maa tyin vasu catyí ra naha tacan, yíi xaan tan tyasí ra naha tsa cahñi ñi indiqui can, tyin cuñí ñi jacahnú ñi tsi ra naha tsihin can.

¹⁹ Tacan tan tsaḡ juhva ra Israel, ra tsa ña tsinú iñi tsi ra Cristo, ra ñuu Antioquía, tan ra ñuu Iconio. Tan natyuhú ra naha tsi nyiví, na cañi ñi yuu tsi ra Pablo. Tan tacan javahaḡ ñi, tan cuñí maa ñi tyin tsa tsiñí ra. Tacan tan ixtá caa ñi tsi ra tan tsindacá ñi tsi ra nda yuhu ñuu. ²⁰ Maa tyin ndu iin ra yihí cuenda ra Cristo nu canyí ra Pablo. Tan nduvitaḡ nyico ra. Tan quihví nyico ra inga tsaha tsitsi ñuu can. Tan tsa inga quiví can cuahán ra ñuu tsa nañí Derbe tan cuahán ra Bernabé tsihin ra.

²¹ Tan cahan tucu ra naha tuhun Nyoo nda ñuu Derbe nácaa jacacú Nyoo tsi yo. Tan cuaha nyiví nacuhvaḡ ñi tsi ñi tsi Nyoo. Yaha can tan cuanuhú ra naha ityi quitsi ra naha. Tan yahaḡ nyico ra naha ñuu Listra tan ñuu Iconio inga tsaha, tan tsaḡ nyico ra naha nda ñuu Antioquía. ²² Tan tandihí ñuu can jandu iin ra naha iñi nyiví tsa yihí cuenda ra Cristo. Tan catyí ra naha tsihin ñi na cuhun ñi ityi nuu ca tsihin tsa tsinú iñi ñi tsi Nyoo. Tan catyí tucu ra naha tsihin ñi tyin tatun cuñí yo tsa cundaca ñaha Nyoo tsi yo, cuñí tsi tsa nyehe yo tundoho. ²³ Tan natyisó ra naha tsi ra cua cuví ityi nuu tsihin nyiví tsa yihí cuenda ra Cristo tan iin tan iin vehe ñuhu. Tan tsioco nyitya ra naha tan tsican tahví ra naha tsi Nyoo tsa cuenda ra tsa cua cuví ityi nuu tsihin nyiví vehe ñuhu can naha ra. Yahaḡ can tan catyí ra Pablo naha ra tsihin ra cuví ityi nuu vehe ñuhu can naha ra:

—Tsjnu iñi ndo tsi Jutu Mañi yo. Tyin maa ra cua jaha cuenda tsi ndo —catyí ra Pablo naha ra tsihin ra naha.

Nu cuanuhu nyico ra Pablo tan ra Bernabé ñuu Antioquía ityi Siria

²⁴ Yahá can tan yahá ra Pablo tsihin ra Bernabé ñuu tsa cayucú Pisidia, tan tsaá ra naha nda cuanda Panfilia. ²⁵ Cahán ra naha tuhun Nyoo ñuu Perge. Yahá can tan tsahán ra naha ñuu Atalia. ²⁶ Ican quihví ra naha tsitsi iin yutun ndoo tan cuanuhu ra naha nda ñuu Antioquía. Ican cuví ñuu nu natyiso ñi tsi ra naha tyin cua javaha ra naha tyiñu Nyoo, tan vityin tsa tsaá nuhu ra naha. ²⁷ Tsa tsaá nyico ra naha ñuu Antioquía jandu iin ra naha tsi nyívi yihí cuenda ra Cristo. Tan nacatyí tuhun ra naha tsihin ñi tandihí tsa javahá Nyoo tsihin ra naha, tan nácaa nuñá Jutu Mañi yo ityi tyin tsinú tucu iñi ñi tsa ñavin nyívi Israel cuví. ²⁸ Tan naha xaan ndoo ra Pablo tan ra Bernabé tsihin ñi yihí cuenda ra Cristo ñuu can.

15

Nu jandaq ra tava tyiñu ra Jesús tyiñu nda ñuu Jerusalén

¹ Ndi nyí ca ra Pablo tan ra Bernabé ñuu Antioquía, tan tsaá taahan ra naha quee ra naha nda Judea. Tan quitsahá jacuahá ra naha tsi ra yihí cuenda ra Cristo. Tan catyí ra naha tyin cuñí tsi tsa cunyaa tuñi Nyoo tsi ra naha, tumaa cuhva catyí ra Moisés, tyin tacan tan cua cacu ra naha. ²⁻³ Tan ñihi xaan cahán yuhu tahan ra Pablo tan ra Bernabé tsihin ra can naha ra tsa cuenda yacan. Tacan tan natyiso ra hermano Antioquía can naha ra tsi ra Pablo tan ra Bernabé tsihin taahan ca ra naha tyin huhun ra naha ñuu Jerusalén, cujandaa ra tyiñu can tsihin ra tava tyiñu ra Jesús tan tsihin ra cuví ityi nuu tsihin nyívi vehe ñuhu ñuu Jerusalén can naha ra. Tacan tan cuahán ra naha. Tan ityi cuahán ra naha, yahá ra naha ityi Fenicia tan Samaria. Tan nacatyí tuhun ra naha tsihin nyívi yihí cuenda ra Cristo nácaa jañá nyívi tsa ñavin nyívi Israel cuví tuhun tsahnu tsa tsinu iñi ñi, tyin nacuhvá cuenda ñi tsi ñi tsi Nyoo. Tan tandihí ra hermano sñi xaan cuñí ra naha tsa tsito ra naha yacan.

⁴ Quívi tsaá ra Pablo tan ra Bernabé ñuu Jerusalén, cuahán ra naha nu ndu iin nyívi yihí cuenda ra Cristo. Tan tandihí ñi tan ra cuví ityi nuu tsihin ñi, tan tsihin ra tava tyiñu ra Jesús, tsahá ñi yaha ra naha tyin nacatyí tuhun ra naha tsa javahá Nyoo tsihin ra naha. ⁵ Maa tyin juhva ra fariseo tsa tsinú iñi tsi ra Cristo, nduvitá ra naha tan catyí ra naha:

—Tandihí ra tsa ñavin ra Israel cuví tan tsinú iñi ra naha tsi ra Jesús, cuñí tsi tsa cunyaa tuñi Nyoo tsi ra naha. Tan cuñí tucu tsi tsa javaha ra naha cuhva catyí ley Nyoo tsa tyaá ra Moisés —catyí ra naha.

⁶ Tacan tan ndu iin ra cuví ityi nuu tsihin ñi yihí cuenda ra Cristo tan ra tava tyiñu ra Jesús tyin natuhun tahan ra naha tuhun can. ⁷ Tsa yahá tsa cahán yuhu xaan ra naha, tan nduvitá ra Pedro, tan catyí ra:

—Yañi, tsitó ndo tyin tsitsi tsa tandihí yo, nacatsí Nyoo tsi yuhu ra ndaahvi quívi can, tyin cahan yu tuhun ra tsa jacacú tsi yo tsihin nyívi tsa ñavin nyívi Israel cuví, tan na tsinu iñi ñi tsi Jutu Mañi yo. ⁸ Tan Nyoo, ra tsitó añima tandihí nyívi, janahá ra tsi yo tyin cuñí ra tsi ñi ican. Yacan cuenda tsahá ra Tatyí li ra tsi ñi, tumaa tsa naquihñ tucu maa yo Tatyí li ra tahán tsanaha. ⁹ Nyoo inducu ñi cuñí ra tsi nyívi. Yacan cuenda ña tyaá tsiyo ra tsi ñi ican tan ndi tsi yoo. Janduvahá ra tsi ñi tsa cuenda tsa tsinú iñi ñi tsi ra tumaa maa yo. ¹⁰ Vityin ¿nacuenda ña tsinú iñi ndo tsa javahá Nyoo tsihin ñi can?

Tyin ña vaha tsa tyisó yo ley Nyoo tsa tyaa ra Moisés siqui ñi. Tyin ndi maa tsii tsaahnu yo tan ndi maa yo tan ña cuví naquihin vaha yo ley can. ¹¹ Ñavin tacan cacú yo. Yoo tsitó yo tyin cacú yo tsihin tumañi iñi tsa javahá Jutu Mañi yo ra Jesús tsihin yo. Tan tacan tucu ñi can —catyi ra Pedro tsihin tandihi ra can naha ra.

¹² Tacan tan taxin ñi cuví tandihi ra naha. Tan tyaa soho ra naha tsa caahán ra Bernabé tan ra Pablo. Tyin nacatyí tuhun ra naha seña tan tsa iyo tsa javahá Nyoo nu cahan ra naha tuhun ra nu yucú nyivi tsa ñavin nyivi Israel cuví. ¹³ Tsa ndihí cahan ra naha, quitsaha caahán ra Jacobo, tan catyi ra:

—Nyooho yañi, tyaa soho ndo tsa cua cahan yu tsihin ndo. ¹⁴ Tsa catyi tuhun ra Simón Pedro tsihin yo nácaa quitsaha tsahá Nyoo tumañi iñi tsi ñi tsa ñavin nyivi Israel cuví. Tyin nacatsí tucu ra tsi juhva ñi tyin cuví ñi nyivi cuenda ra. ¹⁵ Tan ndu iin tuhun ihya tsihin tuhun tsa cahan ra cuví ndusu yuhu Nyoo tahañ tsanaha, tumaa cuhva nyaá maa nu tutu Nyoo nu catyi ra: ¹⁶ Yahá tandihi tuhun ihya tan cua quitsi nyico yu nu yucú ndo.

Quiví tsa tsicoo ra David, vaha xaan jacahnú nyivi tsi yu.

Maa tyin yahá can jandihí nyivi tsa jacahnú ñi tsi yu.

Maa tyin cua quitsi nyico yu inga tsaha tan cua cañihi yu vehe ñuhu ra David. Tyin cua jacahnú nyico nyivi tsi yu.

¹⁷ Tyin tacan tan cuví nanducu tandihi inga ca nyivi tsi yu,

tandihí ñi tsa ñavin nyivi Israel cuví tan tsinú iñi tsi yu.

¹⁸ Tacan catyi Jutu Mañi yo, tan jacuahá ra tuhun ihya tsi nyivi tsicoo tahañ tsanaha tan tsihin nyivi tsa iyó vityin.

¹⁹ Yacan cuenda catyi yu tyin ña vaha tsa jatyañu yo tsi nyivi tsa ñavin nyivi Israel cuví, ñi tsa nacoo tuhun tsahnu ñi tan quihví ñi cuenda ra Cristo. Ña vaha catyi yo tyin cuñi tsi tsa tyaa yahvi ñi ley tsahnu yo. ²⁰ Vaha ñi maa tsihin tsa jacuhun yo carta tsi ñi. Tan catyi yo tsihin ñi tyin ña cua catsi ñi cuñu tsa tsahá cuenda nyivi tsi tsitoho. Tan ña cuví coo rayi tsihin ñaha tun ña tindaha ra. Tan ndi ñiñaha ña cuví coo ñi tsihin rayi tun ña tindaha ñi. Rayi tsa iyó ñasihi ña cuví coo ra tsihin inga ñaha, tacan tucu ñiñaha tsa iyó yi, ña cuví coo ñi tsihin inga rayi. Tan catyi tucu yo tsihin ñi quihví cuenda ra Cristo tan ñavin nyivi Israel cuví ñi tyin ña cua catsi ñi cuñu quiti tsa tsihi tsa cava ñi jucun tatun ña tsatí niñi ti. Tan ña cua catsi ñi niñi quiti. ²¹ Tyin nda tyemu tsahnu tan nda cuenda vityin iyó maa ra jacuahá ley Nyoo tsa tyaa ra Moisés vehe ñuhu nyivi Israel. Tan jacuahá ra naha tuhun can tan iin tan iin ñuu, tan tahan tahan una quivi, quivi tsa quitatú ñi —catyi ra Jacobo tsihin ra naha.

²² Tacan tan ra tava tyiñu ra Jesús tan ra cuví ityi nuu tsihin ñi vehe ñuhu tsihin tandihí ñi yihí cuenda ra Cristo, nacatsí ñi tsi taahan ra naha. Tan yahá can tan jacuhun ñi tsi ra naha tyin cahun ra naha ñuu Antioquia tsihin ra Pablo tan ra Bernabé. Tan ra tsa natyiso ñi cuví ra: Judas tsa nañi Barsabás, tan ra Silas. Ra ican cuví iin ra tsa nyisó tyiñu vehe ñuhu nda ñuu Jerusalén.

²³ Tan tsihin ra naha jacuhun ñi iin carta. Tan catyi carta can tyehen:

“Nyuhu ra tava tyiñu ra Jesús, tan tsihin ra cuví ityi nuu tsihin ñi vehe ñuhu tan tsihin ra yañi ndo cuenda ra Cristo, tandihí ndi tsahá ndi nacumi tsi nyooho tsa ñavin ra Israel cuví ndo. Tyin yañi ndi cuví tsi ndo vasu ñavin nyivi Israel cuví ndo. Tandihí nyooho tsa iyó ndo ñuu Antioquia, tan nyooho nyivi Siria, tan tsihin nyooho nyivi Cilicia, jaquitsí ndi carta ihya tsi tandihí ñi ndo. ²⁴ Tsitó ndi tyin quitá taahan ra ityi nu yucú ndi ihya. Tan vatsí ra naha

nu yucú ndo. Maa tyin ña catyġ nyuhu tyin quitsi ra naha jatyañu ra naha tsi ndo. Tan nasamá ra naha cuhva tsicá iñi ndo tyin catyġ ra naha tyin cuñí tsi tsa cunyaa tuñi Nyoo tsi ndo, tan naquihin vaha ndo ley Nyoo tsa tyaḡ ra Moisés. Maa tyin ñavin nyuhu caḡan tsihin ra naha tyin quitsi cahan ra naha yacan tsihin ndo. ²⁵ Yacan cuenda ndu iġn ndi tan ndoo ndi tuhun cuenda tyiñu can tan tsicá iñi ndi tyin vaha tsa jaquitsi ndi tsi ra hermano ihya naha ra tsihin ra Pablo tan ra Bernabé nu yucú ndo. ²⁶ Nduvi taahan ra ihya nyehé xaan ra naha tundoho tsa cuenda Jutu Mañi yo. Tan vasu cuñi nyivi cañi ñi tsi ra naha, maa tyin ña jandihí ra naha tsa jacotó ra naha tuhun Jutu Mañi yo ra Jesucristo. ²⁷ Yacan cuenda jaquitsí ndi tsi ra Judas tan ra Silas. Tan maa ra naha cua cahan ra naha tsihin yuhu ra naha tsihin ndo, tyin cua cuhva cuenda ra naha tandihí tsa tyaḡ ndi nu tutu ihya. ²⁸ Tyin ndi Tatyí Ii Nyoo tan ndi nyuhu ña cuñí ndi tyiso ndi tundoho siqui ndo. Maa tyin ñiñi ca cuñí tsi tsa naquihin vaha ndo tuhun ihya: ²⁹ Ña cua catsi ndo cuñu tsa tsaḡa cuenda nyivi tsi tsitoho. Tan ña cua catsi ndo ñiñi quiti, ndi cuñu quiti tsa tsiḡ tsa cava ñi jucun tan ña tsatí ñiñi ti. Ña caca nuu ndo tsihin ñaha. Tan nyooho ñiñaha ña caca nuu ndo tsihin rayi. Tatun na quihin vaha ndo tuhun ihya, vaha xaan cua coo ndo. Tan Nyoo na ndoo ra tsihin ndo” catyġ ra naha nu carta can.

³⁰ Tan cuahán ra tsa jacuhun ra naha, tan tsaḡ ra naha ñuu Antioquía. Tan jandu iġn ra naha tsi tandihí nyivi yihí cuenda ra Cristo tan nacuhvaḡ cuenda ra naha carta can. ³¹ Tsa cahvi ñi carta can, si xaan cuñí ñi tyin vaha xaan caahán tsi. ³² Tan ra Judas tsihin ra Silas cuví tucu ra naha ndusu yuhu Nyoo. Tan jandu iġn ra naha iñi nyivi can tsihin tsa caḡan ra naha. ³³ Tan tsa yahaḡ tsiyucu ra naha juhva quivi tan cuanuhu nyico ra naha nda nu yucú nyivi tsa jacuhun tsi ra naha. Tan tandihí nyivi yihí cuenda ra Cristo ñuu Antioquía can catyġ ñi tyin na cuhun vaha ra naha. ³⁴ Maa tyin ra Silas catyġ ra tyin cua ndoo ra. ³⁵ Tan ra Pablo tsihin ra Bernabé ndoo tucu ra naha ñuu Antioquía can. Tan maa ra naha tsihin inga ca ra jañihí ca ra naha caḡan ra naha tuhun Jutu Mañi yo tsihin nyivi can tan jacuahá ra naha tsi ñi.

Nu tsinu uvi tsaha cuahán ra Pablo tuhun Nyoo, tan nu quita tsiyo ra nuu ra Bernabé

³⁶ Tan tsa yahaḡ juhva quivi, tan caḡan ra Pablo tsihin ra Bernabé:

—Cohon inga tsaha cunyehe yo nu yucú nyivi yihí cuenda Jutu Mañi yo ra Cristo tandihí ñuu nu caḡan yo tuhun ra, tyin nyehe yo nácaa yucú ñi —catyġ ra Pablo tsihin ra.

³⁷ Tan ra Bernabé cuñí ra tsa cuhun nyico ra Juan Marcos tsihin ra naha. ³⁸ Maa tyin ra Pablo ña taahán iñi ra tsa cuhun ra Juan tsihin ra naha, tyin nacoḡ ihñi ra tsi ra naha nda Panfilia quivi tsa tsaḡan ra tsihin ra naha. Tan ña tsaḡan ca ra tsijahaḡ tyiñu ra tsihin ra naha. ³⁹ Tan caḡan yuhu tahan ra naha, tan ndusiġn ra naha. Ra Bernabé cuahán ra tsihin ra Juan Marcos. Tan quihvi ra naha tsitsi iin yutun ndoo tan cuahán ra naha ñuhu Chipre. ⁴⁰ Tan ra Pablo nacatsġ ra tsi ra Silas. Tan tsa yahaḡ tsicān tahvi ra hermano naha ra tsi Nyoo tsa cuenda ra naha tyin na jatyinyee Nyoo tsi ra naha, tacan tan cuahán ra naha. ⁴¹ Tan yahaḡ ra naha ñuu tsa cayucú Siria tan Cilicia, tan jandu iġn ra naha iñi nyivi tsa yihí cuenda ra Cristo tan iin tan iin ñuu.

16

Nu cuahán ra Timoteo tsihin ra Pablo tan ra Silas

¹ Ra Pablo tsihin ra Silas tsaꝥ ra naha ñuu Derbe, tan ñuu Listra. Tan ican nañihí ra naha tsi iin ra yihí cuenda ra Cristo. Nañí ra Timoteo. Tan sihi ra cuví ña iin ñaha Israel. Tan yihí ndihí ña cuenda ra Cristo. Maa tyin jutu ra, ra Grecia cuví ra. ² Tan ra Timoteo vaha xaan tsicá ra tuhun Nyoo, catyí nyivi yihí cuenda ra Cristo ñuu Listra tan ñuu Iconio. ³ Tan ra Pablo cuñí ra tsa cuhun ra Timoteo tsihin ra. Tan tyaꝥ ra naha tuñi Nyoo tsi ra Timoteo jahꝥ ra Pablo. Tyin coto ndasi cuñi nyivi Israel nyehe ñi tsi ra. Tyin tandihí ñi tsitó ñi tyin jutu ra cuví ra ra Grecia. ⁴ Tacan tan cuahán ra naha tan iin tan iin ñuu. Tan caahán ra naha tsihin nyivi yihí cuenda ra Cristo tsahá cuenda ra naha tuhun tsa tsahꝥ ra tava tyiñu ra Jesús tan tsihin ra cuví ityi nuu tsihin nyivi vehe ñuhu Jerusalén tsi ra naha. ⁵ Tacan tan ndu iin iñi nyivi yihí cuenda ra Cristo tan ñihí ca tsinú iñi ñi tsi ra Cristo. Tan iin tan iin quivi tan cuahán nducuahá ca ñi.

Nu janahꝥ Nyoo iin tsa janahꝥ ra tsi ra Pablo cuenda iin ra Macedonia

⁶ Ña tsahꝥ Tatyí li Nyoo tsa cahan ra naha tuhun Nyoo ñuu tsa cayucú Asia. Yacan cuenda yahꝥ sava ra naha ñuhu cuenda Frigia tan Galacia. ⁷ Tan tsaꝥ ra naha Misia. Tan cuñí ra naha cuhun ra naha Bitinia, maa tyin Tatyí li ra Jesucristo ña tsahꝥ cuhun ra naha. ⁸ Tacan tan nda sava ñi yahꝥ ra naha ñuu tsa cayucú Misia tan cuahán ra naha ñuu Troas tsa canyíi yuhu ndutya ñuhu. ⁹ Tan yucú ra naha ñuu Troas can, tan iin tsacuaa nyehe ra Pablo iin tsa nyehe ra. Nyehe ra tsi iin ray# tsa iyó iin ñuu tsa canyíi Macedonia. Nyaá nyityi ra nuu ra tan caahán ndaahvi ra tsihin ra, tan catyí ra: “Ñaha ihya, tyin jatynyee un tsi ndi” catyí ra. ¹⁰ Tan tsa nyehe ra Pablo can, yuhu ra Lucas tsihin ra Pablo tan inga ra janduvahꝥ ndí tsi ndi tan cuahán ndi nda Macedonia can. Tyin tsitó vaha ndi tyin Nyoo canꝥ ra tsi ndi, tyin cahan ndi tuhun ra nácaa jacacú ra tsi yo tsihin nyivi ityi can.

Nu nyii ra Pablo tsihin ra Silas ñuu Filipos

¹¹ Quihví ndi iin yutun ndoo ñuu Troas. Tan cuahán ndoo ityi ñi ndi nda Samotracia, iin ñuhu luhlu tsa canyíi mahñu ndutya ñuhu. Tan tsa inga quivi tsaꝥ ndi ñuu Neápolis. ¹² Tan ican queꝥ ndi tan cuahán ndi ñuu Filipos tsa cuví iin ñuu cuenda nyivi Roma. Tan cuví tsi iin ñuu cahnu ca tsa nuu tandihí ñuu tsa cayucú Macedonia. Tan ican tsiyucú ndi taahan quivi. ¹³ Iin quivi tsa quitatú nyivi, tan quitꝥ ndi ityi tsata ñuu, yatyin iin yutya nu tuhvá nyivi tsicán tahvi tsi Nyoo. Tsinyecú ndi, tacan tan cahꝥ ndi tuhun Nyoo tsihin ñiñaha tsa ndu iin ican. ¹⁴ Iin ñaha nañí ña Lidia. Tan ñuu ña cuví Tiatira. Tan tuhvá ña xicó jahma vaha, tsa tunduhva. Yacan cuví tyiñu jahá ña. Tan jacahnú ña tsi Nyoo tumaa jacahnú nyivi Israel. Tan tsiñí ña tsa caahán ra Pablo. Tan Nyoo nuñꝥ ra añima ña na tyaa yahvi ña tsa caahán ra. ¹⁵ Tan tsicoondutyꝥ ña tsihin nyivi ña. Tan yahꝥ can tan cahꝥ ndaahvi ña tsihin ndi, tan catyí ña:

—Tatun nyehé ndo tyin nditsa tsa tsinú iñi yu tsi Jutu Mañi yo, cõhon ndo, ndõo ndo yuvehe yu —catyí ña tsihin ndi.

Tan jañiñí xaan ña tsi ndi na ndoo ndi yuvehe ña.

¹⁶ Tan cuví iin tsaha tsa cuahán ndi nu tsicán tahvi ndi. Tan tsitsi tsa cuahán ndi, tahꝥ ndi tsi iin ñaha tyuvaa tsa yihí tatyí ña vaha tsi. Yacan cuenda cuví

nacoto ña náa ndihí tsa cua cuví ityi nuu. Tan iyó ra cuví tsitoho ña. Tan cuaha xaan xuhun jahá canaa ña tsa cuenda ra naha, tyin cuví nacotó ña. ¹⁷Tan ñaha tyuvaa can quitsahá nyicún ña tsi ndi, nyuhu tsihin ra Pablo. Tan caná tsaá ña tan catyí ña:

—Rayii ihya ra jahá tyiñu tyiñu Nyoo cahnu, cuví ra naha. Tan caahán ra naha tuhun nácaa cuví cacu yo —catyí ña.

¹⁸Cuaha quívi javahá ñaha tyuvaa can tacan. Tacan tan ra Pablo ña cunye ca iñi ra, tan nanyicó coo ra tan catyí ra tsihin tatyí ña vaha tsa yihí tsi ña:

—Tsihin sívi ra Jesucristo, catyí yu tsihin un tyin quita un tsi ñaha tyuvaa ihya —catyí ra.

Tan nu tatyí ña vaha can quita nu tsi ña juvin ñi cuhva can.

¹⁹Maa tyin tsa nyehe ra cuví tsitoho ña tyin ña cua cuví ca jaha canaa ra naha xuhun tsihin ña, tiin ra naha tsi ra Pablo tsihin ra Silas tan tsindaca ra naha tsi ra naha nda vehe tyiñu. ²⁰Tan tsican ra naha cuatyí tsaha ra naha nuu ra cumí tyiñu naha ra. Tan catyí ra naha:

—Ra Israel ihya cuaha xaan tsa caahán ra naha tsihin nyívi ñuu yo tan jatívi ra naha ñuu yo. ²¹Tyin jacuahá ra naha iin cuhva tsa ña cuví coo yo, ndi ña cuví javahá yo tyin nyívi cuenda ñuu Roma cuví yo —catyí ra naha.

²²Tacan tan nduxaān nyívi tsi ra Pablo tan ra Silas. Tan ra cumí tyiñu can tsahnyā ra naha jahma ra Pablo naha ra tan tava tyiñu ra cumí tyiñu na cañi ra vitya tsi ra Pablo naha ra tsihin yutun. ²³Tsa yaha tsa cañi xaan ra naha tsi ra Pablo tan ra Silas, tan tsindaca ra vitya can tsi ra naha vehe caa. Tan tava tyiñu ra vitya tsi ra jaha cuenda tsi ra naha na jaha vaha ra cuenda tsi ra naha. ²⁴Quihñ ra cua jaha cuenda can tyiñu tan tyihí ra tsi ra naha nda tsitsi cuii vehe caa. Tan tyihí vaha ra tsaha ra naha tyañu vitu. ²⁵Yahā can tan maa ñuu ra Pablo tan ra Silas quitsahā tsicán tahvi ra naha tsi Nyoo. Tan quitsahā tsitá xaan ra naha cantu Nyoo. Tan ra yucú vehe caa can naha ra tyaá soho ra naha. ²⁶Tan saná iñi ra naha tan quitsj tsa taán ñihi xaan. Tan naquisi tsi tsaha vehe caa can, tan juvin ñi cuhva can tan nuñā tandihí yuvehe, tan ndatsj cadena tsa yihí tsi tandihí ra tsa yucú vehe caa can naha ra. ²⁷Tan tsa ndoto ra tsa jahá cuenda vehe caa can, nyehe ra tyin ticohó tandihí maa yuvehe can. Tacan tan tava ra mityi ra tyin cua cahñi ra tsi ra. Tyin tsicā iñi maa ra tyin tandihí ra tsa yucú vehe caa can quita. ²⁸Maa tyin ra Pablo cana tsa ra tsi ra, tan catyí ra:

—Ña cahñi un tsi un, tyin tandihí ndi tan yucú ndi ihya —catyí ra tsihin ra.

²⁹Tacan tan ra jahá cuenda vehe caa can tsican ra ñuhū. Tan tsinu ra quihvi ra nu yucú ra naha. Tan nihí ra tsihin tsa yuuhvi ra. Tan tsicuiñi tsiti ra nuu ra Pablo tan ra Silas. ³⁰Numi xaan tava ra tsi ra naha nu yucú ra naha ican. Tan tsicá tuhun ra tsi ra naha tan catyí ra:

—Nyooho tata, ¿nácaa javaha yu tan cacu yu? —catyí ra tsihin ra naha.

³¹Tan ra Pablo tsihin ra Silas nacahan ra naha tan catyí ra naha:

—Tsinu iñi tsi Jutu Mañi yo ra Jesucristo tan cacu un, maa un tan tsihin tandihí nyívi un —catyí ra naha tsihin ra jahá cuenda vehe caa can.

³²Tan cahan ra naha tuhun Jutu Mañi yo tsihin ra tan tsihin tandihí nyívi tsa yucú yuvehe ra. ³³Tan juvin ñi maa tsacuaa can ra jahá cuenda vehe caa can nacatya ra nu uhvi nu cañi ra vitya tsi ra naha. Yahā can tan juvin ñi tsacuaa can tsicoondutya ra tsihin tandihí nyívi ra. ³⁴Tacan tan tsindaca ra tsi ra naha nda vehe ra. Tan tsahā ra tsa catsi ra naha. Tan maa ra tsihin nyívi ra sñi xaan cuñi ñi tyin tsinu iñi ñi tsi Nyoo. Tacan tan cuanuhū ra Pablo

tsihin ra Silas nda vehe caa can coto cuxaan ra cumí tyiñu tsi ra jahá cuenda vehe caa can.

³⁵ Tsa tuvĭ inga quivĭ tan tava tyiñu ra cumí tyiñu tsi ra vitya na cunyehe ra naha nu nyĭi ra jahá cuenda vehe caa can, tan catyĭ ra naha tyin na jaña ra tsi ra Pablo tsihin ra Silas. ³⁶ Tacan tan ra jahá cuenda vehe caa can catyĭ ra tsihin ra Pablo:

—Tsaq tyiñu tsi yu jahā ra cumí tyiñu, tsa jaña yu tsi ndo. Yacan cuenda vityin tsa cuvĭ quita ndo —catyĭ ra tsihin ra naha.

³⁷ Maa tyin ra Pablo catyĭ ra:

—Nyuhu tsa cuvĭ ndi ra cuenda ñuu Roma cañĭ ra naha tsi ndi nu tuvĭ nyĭvi. Tan ndi ña tatsĭ tuñĭ ra naha tsi ndi tumaa cuhva taahán tsi. Tan tyihĭ ra naha tsi ndi vehe caa. Tan vityin cuñĭ ra naha tava xeehe ra naha tsi ndi. Maa tyin ña cuñĭ ndi. Na quitsi tava maa ra naha tsi ndi —catyĭ ra Pablo tsihin ra jahá cuenda vehe caa can.

³⁸ Tan ra vitya nacatyĭ tuhun ra tsihin ra cumí tyiñu naha ra. Tan ra ican naha ra nayuhvĭ xaan ra naha tsa tsito ra naha tyin ra cuenda ñuu Roma cuvĭ ra Pablo. ³⁹ Tan tsaħan ra cumí tyiñu naha ra tsindacan ra naha tucahnu iñi nuu ra Pablo tan ra Silas. Tacan tan ra cumí tyiñu tava ra naha tsi ra Pablo naha ra tan caahán ndaahvi ra naha tsihin ra Pablo naha ra na quita ra naha ñuu can. ⁴⁰ Tan tsa quita ra naha vehe caa can, tsaħan ra naha vehe ña Lidia. Tan yaha can tan tsinyehĕ ra naha tsi ra hermano naha ra tan jandu ĩn ra naha iñi ra naha tan cuahán ra naha.

17

Nu quitsaha caahán yuhu tahan nyĭvi ñuu Tesalónica

¹ Nu cuahán ra Pablo tsihin ra Silas, yaha ra naha ñuu Anfĭpolis, tan ñuu Apolonia. Yaha can tan tsaq ra naha ñuu Tesalónica nu nyaá ĩn vehe ñuhu nyĭvi Israel. ² Tan tsaħan ra Pablo vehe ñuhu can, tumaa cuhva tuhvá maa ra tsaahán tan ĩn tan ĩn ñuu. Tan caħan ra tuhun Nyoo tsihin nyĭvi tsicá vehe ñuhu can uñĭ taahan quivĭ quitatú ñi. ³ Tan cahvĭ ra nu libru Nyoo tan tsaħa cuenda ra tuhun ra Cristo tsi ñi nu catyĭ tsi tyin cua nyehe ra tundoho tan cua cúu ra. Yaha can tan cua nandoto ra. Tan catyĭ ra tsihin ñi:

—Ra Jesús tsa caahán yu tuhun tsihin ndo juvin ra cuvĭ ra Cristo.

⁴ Tan juhva nyĭvi Israel can tsinu ĩñi ñi tsa caahán ra. Tan ndu ĩn ñi tsihin ra naha. Tan cuaha xaan nyĭvi Grecia tsa tuhvá jacahnú tsi Nyoo tan natsinu ndihĭ ĩñi ñi. Tan cuaha ñiñaha cuca tsa iyó ñuu can natsinu ndihĭ ĩñi ñi tsa caahán ra tuhun ra Cristo. ⁵ Maa tyin ra ñuu Israel tsa ña tsinú ĩñi, ndasi cuñĭ ra naha nyehé ra naha tyin cuaha xaan nyĭvi nyicún tsi ra Pablo. Tan jandu ĩn ra naha tsi taahan ra caquiñĭ tsa tsicá nuu jutsan ñi maa. Tan quitsaha caahán yuhu tahan nyĭvi ñuu can jahā ra naha. Tan quihvĭ ra caquiñĭ can vehe ra Jasón, tyin nanducú ra naha tsi ra Pablo tan ra Silas, tyin cuñĭ ra naha tsa quita ra Pablo naha ra. Tyin ra caquiñĭ can cuñĭ ra naha nacuhva cuenda ra naha tsi ra Pablo naha ra tsi nyĭvi. ⁶ Maa tyin tsa ña nañihĭ ra naha tsi ra Pablo tan ra Silas ican, quihĭn ra naha tsi ra Jasón. Tan ixtā caa ra naha tsi ra. Tan quihĭn ndihĭ ra naha tsi taahan ca ra hermano tan cuahán ra naha nuu ra cumí tyiñu ñuu can. Tan canā tsa ra caquiñĭ can naha ra tan catyĭ ra naha:

—Ra ihya naha ra cuvĭ ra tsicá nuu jasaná ĩñi tandihĭ nyĭvi nanĭ cahnu ñuhu ñayĭvi. Tan vityin tsaq ndihĭ tucu ra naha ihya. ⁷ Tan ra Jasón can tsaħa ra yuvehe ra na cuyucu ra naha. Tan tandihĭ maa ra naha tan ña tyaá yahvi

ra naha tsi ra cuví rey cahnu nda ñuu Roma. Tyin catyí ra naha tyin iyó inga rey tsa nañí Jesús —catyí ra naha.

⁸ Tsa tsiñí nyívi tan ra cumí tyiñu tsa caahán ra caquiñi can naha ra quitsaha caahán yuhu tahan ñi. ⁹ Maa tyin ra Jasón tan inga ra naha tsaha ra naha xuhun tan jaña ra cumí tyiñu tsi ra naha.

Nu cuahán ra Pablo tsihin ra Silas ñuu Berea

¹⁰ Tan juvin ñi tsacuaa can jacuhun ra hermano naha ra tsi ra Pablo tsihin ra Silas ñuu Berea. Tan tsa tsaá ra naha, tsahan ra naha vehe ñuhu nyívi Israel. ¹¹ Tan nyívi Israel tsa iyó ñuu Berea can vaha ca nyívi cuví ñi tan ñavin ca nyívi ñuu Tesalónica tyin tsihin tsa nñi iñi ñi tan naquihin ñi tuhun Nyoo. Tan tandihí quívi nanducú ñi nuu tutu Nyoo, nyehé ñi tatun nditsa tsa caahán ra Pablo. ¹² Yacan cuenda cuaha xaan ñi natsinu iñi ñi tsi ra Cristo tsihin tucu nyívi Grecia tahan ñi ñiñaha cuca tan rayi naha ra. ¹³ Maa tyin tsa tsito ra Israel tsa iyó ñuu Tesalónica tyin ra Pablo nyíi ra Berea caahán ra tuhun Nyoo, tan cuahán ra naha tan natyuhu ra naha tsi nyívi Berea can. ¹⁴ Maa tyin ra hermano numi ñi jacuhun ra naha tsi ra Pablo nda ityi yuhu ndutya ñuhu. Maa tyin ra Silas tsihin ra Timoteo ndoq ra naha ñuu Berea. ¹⁵ Tan ra tsa cuahán tsihin ra Pablo tsindaca ra naha tsi ra nda ñuu Atenas. Tacan tan cuanuhu ra naha nda Berea cua nacatyí tuhun ra naha tsihin ra Silas tan ra Timoteo tyiñu tsa cahán ra Pablo tsihin ra naha, tyin na janumi ra naha tan cuhun ra naha nu nyíi ra.

Nu nyíi ra Pablo ñuu Atenas

¹⁶ Tsitsi tsa ndatú ra Pablo tsi ra Silas tan ra Timoteo ñuu Atenas can, ndasi cuñí añima ra tsa nyehé ra tyin cuaha xaan tsitoho iyó ñuu can. ¹⁷ Yacan cuenda cahán ra tsihin ra Israel naha ra, tan tsihin inga ra tsa tuhvá jacahnú tsi Nyoo tsitsi vehe ñuhu can. Tan tandihí quívi caahán ra tsihin nyívi tsa cuahán nuyahví. ¹⁸ Tan ñihí tahan ra tsihin nyívi tsa cahví tuhun tsa jacuahá nyívi tsa nañí epicúreo. Tan ñihí tahan tucu ra tsihin nyívi tsa cahví tuhun tsa jacuahá nyívi tsa nañí estoico. Tan cahán ñi tsihin ra. Tan yihí ra catyí ra naha:

—Ra tsa caahán xaan ihya, ¿náa cua cahán ra tsihin yo? —catyí ra naha.

Tan inga ra naha catyí ra naha:

—Inga nyoo caahán ra ihya tuhun —catyí ra naha.

Tacan cahán ra naha tyin ra Pablo caahán ra tuhun ra Jesús, tan caahán tucu ra tuhun tsa cua nandoto nyívi tatun cua cúu ñi. ¹⁹ Tacan tan tsindaca ra naha tsi ra Pablo iin nu nañí Areópago, nu tuhvá ra cumí tyiñu naha ra ndu iin. Tan catyí ra naha tsihin ra:

—Cuñí ndi coto ndi tuhun tsa tsa jacuahá un. ²⁰ Tyin jacotó un tuhun tsa ña tsitó ndi. Tan cuñí tucu ndi coto ndi náa cuñí tsi catyí tandihí tuhun ihya —catyí ra naha tsihin ra.

²¹ Tyin tandihí nyívi Atenas tan nyívi inga ñuu tsa iyó ican taahán xaan iñi ñi tyaa soho ñi tan nacatyí tuhun ñi náa ndihí tuhun tsa.

²² Tacan tan ra Pablo nduvitá nyityi ra tyañu nu yucú ra naha nu cuví Areópago, tan catyí ra:

—Nyooho ra ñuu Atenas, yuhu nyehé yu tyin cuaha xaan nyoo jacahnú ndo. ²³ Tyin tsahan yu tsinyehé yu nu tuhvá ndo ndu iin. Tan nyehé yu iin altar nu nyaá letra tsa catyí tyehen: “Tsehe cuví cuenda Nyoo tsa ña nacotó yo” catyí letra can. Nyooho jacahnú ndo tsi Nyoo tsa ña nacotó ndo. Juvin Nyoo can cuví tsa caahán yu tuhun tsihin ndo. ²⁴ Nyoo tsa javahá ñuhu ñayívi

tan tandihí tsa iyó nu ñuhu ñayiví ihya, tsii maa ra cuví andiví tan ñuhu ñayiví. Tan ña iyó ra tsitsi vehe ñuhu tsa javahá nyiví. ²⁵ Tan ña nyitá iñi ra tsa jatyinyeé nyiví tsi ra. Tyin maa ra tsahá ñayiví coo tandihí yo. Tan tsahá ra tatyí tsa ixtá tatyí yo. Tan maa ra tsahá tandihí tsa tsiñí ñuhu tsi yo. ²⁶ Javahá Nyoo tsi intuhun rayí. Tan tsa yahá can tsicoo cuaha nyiví tata ra. Tan maa ra naha cuví tsii tsaahnu tandihí yo. Yacan cuenda intuhun ñi ñiñi nyisó tandihí yo. Tan tsahá Nyoo tsa coo yo naní cahnu ñuhu ñayiví. Tsa ndi cumañi ca coo yo tan catyí ra náa cuiya coo intuhun intuhun yó nu ñuhu ñayiví ihya. Tan catyí tucu ra maa nda cua coo intuhun intuhun yo. ²⁷ Tacan javahá ra tyin na quitsaha nanducu yo tsi ra. Tumaa iin ra caaa nanducú tshin ndaha ra tsa nanducú ra, tacan cua nanducu yo tsi ra tan cua nañihí yo tsi ra tyaa ra cuhva. Vasu ndi maa ña cañi nyaá ra tshin intuhun intuhun yo. ²⁸ Tyin iyó yo tan candá yo jahá maa ra. Tumaa catyí tucu iin ra ñuu ndo, tyin catyí ra: “Tata Nyoo cuví tsi yo” catyí ra. ²⁹ Tatun tata Nyoo cuví tsi yo, ña taahán tsi caca iñi yo tyin Nyoo cuví ra iin tsitoho tsa tsinu tshin xuhun cuaan, a xuhun cuitsin, a tshin yuu vaha. Tan ndi ñavin Nyoo tsa tsinu tshin tsa tsiñituñi iñi nyiví cuví ra. ³⁰ Tahán tsanaha Nyoo ña cuxaán ra tsi nyiví tsa tsicá iñi tacan tyin ña tsitó ñi náa tsa javahá ñi. Maa tyin vityin catyí ra tshin nyiví tandihí ñi ityi tyin na ndu uvi iñi ñi cuatyí ñi tan na nasama ñi cuhva iyó ñi. ³¹ Tyin tsa tyaa ra cuhva tyin cua coo iin quiví tsa cua tatsi tuñi ra tsi nyiví iyó nu ñuhu ñayiví. Tan tsa cua tsaa quiví can, ra tsa nacatsí vaha maa ra cua tatsi tuñi tsi ñi jaha ra. Tan tsa janahá ra tsi yo tyin nditsa tsa ra ihya cua tatsi tuñi tsi nyiví, tyin janandotó ra tsi ra can nu tsihí ra —catyí ra Pablo.

³² Tsa tsiñí nyiví tuhun tsa nandotó nyiví tsa tsihí, yihí ñi tsacú nducu ñi, tan yihí tucu nyiví catyí ñi:

—Quitsi un inga tsaha tan çahan un tuhun ihya tshin ndi —catyí ñi.

³³ Tacan tan cuahán ra Pablo. ³⁴ Maa tyin yihí ñi ndu iin ñi tshin ra, tan natsinu iñi ñi tsi ra Cristo. Tan iin ra tsa natsinu iñi, nañi ra Dionisio, tan cuví ra iin ra cumí tyiñu tsa tuhvá ndu iin nda Areópago can. Tan iin ñaha tsa nañi Dámaris natsinu ndihí tucu iñi ña, tan tshin inga ca ñi.

18

Nu nyí ra Pablo ñuu Corinto

¹ Yahá can tan quita ra Pablo ñuu Atenas tan cuahán ra ñuu Corinto. ² Tan ican nañihí ra tsi iin ra Israel tsa nañi Aquila. Tan ñuu Ponto cacú ra. Tan maa ra tshin ñasíhi ra, ña Priscila, quita ñi Italia nu tsicoo ñi, tyin ra Claudio, ra cuví rey cahnu ñuhu can, tavá ra tsi tandihí nyiví Israel. Catyí ra tyin na quita ñi ñuu Roma can. Tan ra Pablo cuahán ra nu iyó ñi ñuu Corinto. ³ Tan iin ñi tyiñu javahá ra tshin ñi. Javahá ñi vehe jahma. Tan ndoo ra tshin ñi tyin jahá tyiñu ra iin caa ñi tshin ñi. ⁴ Tan quiví quitatú nyiví Israel tahan iin vitya, ra Pablo cuahán ra vehe ñuhu ñi. Tan natuhún tahan ra tshin nyiví Israel tan tshin nyiví tsa ñavin nyiví Israel cuví. Tyin nducú ra cuhva tsa tsinu iñi ñi tsi ra Jesucristo.

⁵ Tan quiví tsaá ra Silas tan ra Timoteo tsa quee ra naha Macedonia, ra Pablo nacoó ra tyiñu jahá ra tan intuhun ña tyiñu tsa caahán ra tuhun Nyoo jahá ra. Tan caahán catsi ra tshin nyiví Israel tyin ra Cristo, tsa ndatú xaan ñi, juven ra cuví ra Jesús. ⁶ Maa tyin ñi ican xaan cuñi ñi. Tan quitsahá caahán ñi ndavaha ñi siquí Jutu Mañi yo. Tacan tan ra Pablo naquisí ra jahma ra tumaa iin seña tyin cua ndoo cuatyí ñi siquí ñi. Tan catyí ra tshin ñi:

—Cuatyí maa ndo cuví tatun cuhun ndo anyaya. Ñavin ca cuatyí yuhu tyin tsa cahān yu tsihin ndo tan maa ndo ña tsiñu iñi. Vityin tan ityí nuu ca cua cuhun yu cahān yu tuhun ihya tsihin nyivi tsa ñavin nyivi Israel cuví —catyí ra tsihin ñi.

⁷Tan quitā ra vehe ñuhu can. Tan cuahán ra vehe ra tsa nañí Justo, iin ra tsa jacahnú tsi Nyoo. Tan yatyin ñi vehe ñuhu can nyaá vehe ra. ⁸Tan iin ra tsa nañí Crispo, ra cuví ityí nu vehe ñuhu can, natsinu iñi ra tsi Jutu Mañi yo tan tacan tucu tandihi nyivi ra. Tan cuaha ca nyivi iyó ñuu Corinto can, tsa yaha tsa tsiñi ñi tsa caahán ra Pablo, natsinu iñi ñi tsi ra Jesús, tan tsicoondutyā ñi. ⁹Tacan tan iin tsacuaa nyehe ra Pablo iin tsa janahā Nyoo tsi ra. Tan cahān Jutu Mañi yo tsihin ra, tan catyí ra:

—Ña nayuhvi un. Jañihi ca cahān un tuhun yu tan ña jandihí un tsa cahān un. ¹⁰Tyin yuhu nyaá yu tsihin un, tan yofi cuví javahá tsa caquiñi tsi un. Tyin cuaha xaan nyivi yu iyó ñuu ihya tan nyaá cua jacacu yu tsi ñi —catyí Jutu Mañi yo tsihin ra Pablo.

¹¹Yacan cuenda ra Pablo ndoo ra iin cuiya sasava ñuu Corinto can, jacuahá ra tuhun Nyoo tsi nyivi.

¹²Maa tyin quivi tsa ndacá ñaha ra Galión tsi nyivi ñuu tsa cayucú Acaya, ndu iin ra Israel naha ra siqui ra Pablo. Tan tsicān ra naha cuatyí tsaha ra nuu ra Galión. ¹³Tan catyí ra naha tsihin ra Galión can:

—Ra ihya natyuhú ra tsi nyivi na jacahnu ñi tsi Nyoo iin cuhva tsa ñavin cuhva catyí ley —catyí ra naha.

¹⁴Tacan tan cuhva tsa cua nacahan ra Pablo, tan nacahān ñi ra Galión, tan catyí ra tsihin ra Israel can naha ra:

—Nyooho ra Israel, cuví jandaa yu cuatyí ra tatun cuatyí cahnu o cuatyí ndiyi cuví. ¹⁵Maa tyin maa ñi maa tuhun caahán cuví tuhun ihya. Tan yuhu ña cuñi yu jandaa yu tyiñu ihya, tan inga tucu tuhun tyin cuenda ley maa ndo cuví. Nyehe maa ndo. Jandaa maa ndo tyiñu tyin yuhu ña cuñi yu cuví yu juez tsa cuenda tuhun ihya —catyí ra Galión can tsihin ra naha.

¹⁶Tan tava ra tsi ra Israel naha ra nu cuví vehe tyiñu ra. ¹⁷Tacan tan tandihi ra Grecia tiñ ra naha tsi ra Sóstenes, ra cuví ityí nu vehe ñuhu nyivi Israel. Tan cañi ra naha tsi ra juvin ñi maa nuu ra Galión, ra yihí ndaha tsi nyivi Acaya. Tan ra Galión can ña cahān maa ra.

Nu cuanuhú ra Pablo ñuu Antioquía tan cuahán ra tsa tsinu uñi tsaha cua cahān ra tuhun Nyoo

¹⁸Tan ra Pablo ndoo ra ñuu Corinto can cuaha quivi. Yaha can tan catyí ra tsihin ra hermano naha ra tyin tsa cua cuhun ra. Tan cuahán ra Aquila tan ña Priscila tsihin ra. Tacan tan tsaā ñi ñuu Cencrea. Tan ra Pablo xatyā ndii ra jiñi ra tumaa iin seña tyin tsa yaha javahā ra tsa catyí ra tyin cua javaha ra nuu Nyoo. Tacan tan quihvi ñi tsitsi iin yutun ndoo tsa cuahán nda Siria.

¹⁹Tan tsa tsaā yutun ndoo can nda ñuu Éfeso, quitā ñi. Tan ra Aquila tsihin ña Priscila ndoo ñi ican. Tan ra Pablo cuahán ra vehe ñuhu nyivi Israel, tan cahān ra tsihin nyivi tsa ndu iin ican. ²⁰Tan cahān ndaahvi ñi tsihin ra tyin na ndoo ra taahan ca quivi tsihin ñi. Maa tyin ña cuñi ra. ²¹Tan catyí ra tsihin ñi tyin tsa cuahán ra, tan catyí tucu ra tyehen:

—Cuñi tsi tsa cuhun yu ñuu Jerusalén tyin jacahnu yu vico tsa vatsí tahan. Maa tyin tatun Nyoo cuñi, cua quitsi yu inga tsaha nu yucú ndo —catyí ra tsihin ñi.

Tacan tan cuahán ra, quihví ra tsitsi iin yutun ndoo tsa cuahán nda Siria. ²² Quiví tsa tsaá nyico ra ñuu Cesarea cuenda Siria, tsaḥan ra ñuu Jerusalén tsicuhva ra nacumi tsi nyívi yihí cuenda ra Cristo tsa iyó ican. Yaha can tan cuahán nyico ra ñuu Antioquia. ²³ Tan tsa yaha tsinyii ra juhva quivi ican, quee ra tan cuahán nyico ra tan iin tan iin ñuu tsa cayucú Galacia tan Frigia. Tan jandu iin ra iñi tandihí nyívi yihí cuenda ra Cristo.

Nu caahán ra Apolos tuhun Nyoo ñuu Éfeso

²⁴ Quiví can tsaá iin ra Israel ñuu Éfeso. Nañi ra Apolos, tan ñuu ra cuví Alejandría. Tan vaha xaan caahán ra tuhun Nyoo. Tan tsitó xaan ra tuhun Nyoo tuhun tsaḥnu tsa nyaá nu libru. ²⁵ Tan vaha xaan cutuhva ra tuhun Jutu Mañi yo. Tan caahán ra tsihin tsa ñi iñi ra. Tan catsi xaan jacuahá ra tuhun ra Jesús. Vasu cuhva tsa jacoondutya ra Juan ñi tsitó ra. ²⁶ Tan quitsaha caahán ra tsitsi vehe ñuhu tsihin tsa ñi iñi ra. Tan cuhva tsa tsiñi ra Aquila tan ña Priscila, tava sñin ñi tsi ra tan tsaḥa cuenda vaha ca ñi tuhun Nyoo tsi ra. ²⁷ Tacan tan quitsaha cuñi ra Apolos cuhun ra ityi Acaya. Tan ra hermano jatyinyee ra naha tsi ra. Tan jacuhun ra naha iin carta tsi nyívi yihí cuenda ra Cristo ityi can, tan catyí ra naha tsihin ñi tyin na vaha cahan ñi tsihin ra Apolos nu cua tsa ra. Tacan tan cuahán ra. Tan cuhva tsa tsaá ra Acaya can, jatyinyee xaan ra tsi nyívi yihí cuenda ra Cristo, ñi tsa natsinu iñi tsa cuenda tumañi iñi tsa javaha Nyoo tsi ñi. ²⁸ Tyin nu tuvi nyívi ñihi xaan cahan yuhu ra Apolos tsihin ra Israel naha ra tyin cuhva tsinu iñi nyivi Israel, ña nditsa. Tan jacuahá ra tsa catyí nu tutu Nyoo tyin ra Cristo, ra tsa ndatú xaan ñi, juvin ra cuví ra Jesús.

19

Nu cuahán nyico ra Pablo ñuu Éfeso

¹ Tsitsi tsa nyii ra Apolos ñuu Corinto, ra Pablo yaha ra ityi yucu tan tsaá ra nda ñuu Éfeso. Tan ican nañihí ra tsi taahan ra yihí cuenda ra Cristo. ² Tan tsica tuhun ra tsi ra naha:

—¿A naquihin ndo Tatyí Ii Nyoo quivi tsa natsinu iñi ndo? —catyí ra Pablo tsihin ra naha.

Tan nacahan ra naha tan catyí ra naha:

—Ndi luxu ña tsitó ndi tsa iyó Tatyí Ii Nyoo.

³ Tacan tan ra Pablo tsica tuhun ra tsi ra naha:

—¿Naca tsicoondutya ndo? —catyí ra.

Tan nacahan ra naha tan catyí ra naha:

—Cuhva tsa jacoondutya ra Juan, tacan tsicoondutya ndi —catyí ra naha.

⁴ Tacan tan catyí ra Pablo tsihin ra naha:

—Ra Juan jacoondutya ra tsi nyívi tsa ndu uvi iñi cuatyí. Maa tyin catyí tucu ra tsihin ñi tyin cuñi tsi tsa tsinu iñi ñi tsi ra tsa cua quitsi. Tan ra ican cuví ra Cristo Jesús —catyí ra Pablo tsihin ra naha.

⁵ Tsa tsiñi ra naha tsa cahan ra Pablo tuhun ihya, tacan tan tsicoondutya ra naha inga tsaha tsihin sivi Jutu Mañi yo Jesús. ⁶ Tan tsa tyiso ndaha ra Pablo jiñi ra naha, tacan tan naquihin ra naha Tatyí Ii Nyoo. Tan quitsaha caahán ra naha inga yuhu. Tan tsahá cuenda ra naha tuhun tsa tsaḥa Tatyí Ii Nyoo tsi ra naha tsi nyívi. ⁷ Tan tsa tandihí ra naha quitá maa utsi uvi taahan ra naha.

⁸ Tan tsitsi tsa uñi yoo tsicá ra Pablo vehe ñuhu nyivi Israel ñuu Éfeso, tan caahán ra tuhun ra Cristo tsihin tsa ñi ñi ra. Tan jacuaha ra tsi ñi na nacuhva ñi tsi ñi tsi Nyoo na cundaca ñaha ra tsi ñi. ⁹ Maa tyin yihí ñi jandava ñi aña ñi, tan ña cuñi ñi tsinu ñi ñi. Tan caahán ñi ndavaha ñi siqui tuhun ra Cristo nuu nyivi, tan catyí ñi tyin ña vaha ityi ra Jesús. Tacan tan ra Pablo catsiyo nyaha ra nu yucú ñi. Tan tsindacá ra tsi ñi tsinú ñi tsi ra Cristo nda iin escuela ra tsa nañi Tiranno. Tan ican caahán ra tuhun ra Cristo tsihin nyivi tandihi quivi. ¹⁰ Tan tacan ñi tsicá ra tsitsi tsa uvi cuiya. Tan tandihi nyivi tsa iyó ñuu tsa cayucú Asia, tsiñi ñi tuhun Jutu Mañi yo ra Jesús, tahan ñi nyivi Israel tan nyivi tsa ñavin nyivi Israel cuví. ¹¹ Tan nahnu tsa iyo javahá ra Pablo jahá Nyoo. ¹² Tyin nda cuanda jahma tsa tñin ra Pablo tan tsindacá ñi tsi nyivi tan quitá cuehe tsi ñi, tan quitá ndihi tucu tatyí ña vaha tsi ñi.

¹³ Tan iyó juhva ra Israel tsa tsicá nuu tan iin tan iin ñuu tavá ra naha tatyí ña vaha tsi nyivi. Tan cuñi ra naha cuatyíñu ra naha sivi Jutu Mañi yo Jesús, tyin cua tava ra naha tsi nu tatyí ña vaha. Tan catyí ra naha tsihin nu tatyí ña vaha can nahnu:

—Tsihin sivi ra Jesús tsa caahán ra Pablo tuhun, catyí ndi tsihin ndo tyin quita ndo —catyí ra naha.

¹⁴ Tacan javahá tsa utsa taahan sehe iin ra Israel tsa nañi Esceva. Tan ra Esceva can cuví ra iin ra cuví ityi nuu tsihin ra jutu. ¹⁵ Tan tsa cahán ra can naha ra tsihin nu tatyí ña vaha, nacahán nu tsihin ra naha tan catyí nu:

—Tsitó yu tsi ra Jesús. Tan tsitó yu yóo ra cuví ra Pablo. Tan zyóo ra cuví tucu nyooho? —catyí nu tatyí ña vaha can tsihin sehe ra Esceva naha ra.

¹⁶ Tacan tan ra tsa yihí tatyí ña vaha can ndava ra siqui ra can naha ra. Tan tsihin tsa cuaha tunyee ñi nu tatyí ña vaha can tan cuví cunyee ra tñin tahan ra tsihin tandihi ra can naha ra. Tan tsahnya cuatyí ra jahma ra naha. Tan jañicueehé ra tsi ra naha. Tan jacuhun tandii ra tsi ra naha jahá nu tatyí can.

¹⁷ Tacan tan tandihi nyivi Éfeso, tahan ñi nyivi Israel, tan nyivi tsa ñavin nyivi Israel cuví, tsitó ñi tuhun can. Tan yuuhvi xaan ñi cuví. Tan jacahnú ñi sivi Jutu Mañi yo Jesús.

¹⁸ Tan cuaha xaan nyivi tsa natsinu ñi tsi ra Jesús cuahán ñi cuanahmá ñi cuatyí ñi nuu ra tan nuu nyivi, tandihi maa tsa ña vaha tsa icá ñi tahan tsanaha. ¹⁹ Tan cuaha ñi tsa cahvi tuhun tasi, tsindacá ñi libru ñi. Tan tsahmí ñi libru can nuu tandihi nyivi. Tan tava cuenda ñi nácaa yahvi libru can. Tan yahvi tsa tandihi libru can quitá tsi uvi xico utsi mil xuhun cuitsin. ²⁰ Tan tacan ñi tan cuahán nducuahá ca nyivi tsa yihí cuenda Jutu Mañi yo. Tan tacan nyehé nyivi tyin cahnu xaan tunyee ñi iyó tsi ra.

²¹ Tan tsa yahá tuhun ihya, ra Pablo tyaá ra cuhva tsa cuhun ra ñuu tsa cayucú Macedonia tan Acaya. Yahá can tan cua cuuhu ra nda ñuu Jerusalén, tyaá ra cuhva. Tan catyí ra tyin yahá can tan cuñi tsi tsa cuhun ra nda ñuu Roma. ²² Tacan tan jacuhun ra tsi uvi taahan ra jatyinyee tsi ra nda Macedonia, ra Timoteo tan ra Erasto. Maa tyin tsitsi tsa cuahán ra can naha ra, ndoq maa ra Pablo juhva ca quivi Asia can.

Nu quitsaha cuvaá nyivi Éfeso

²³ Tan juvin ñi quivi can quitsaha cuvaá nyivi ñuu Éfeso tsa cuenda tuhun Nyoo, ²⁴ tyin iin ra tsa nañi Demetrio natyuhú ra tsi ñi. Tyin maa ra tuhvá ra jahá tyiñu tsihin xuhun cuitsin. Javahá ra tsa cuví vehe ñuhu nyihi tsitoho Diana tsihin xuhun cuitsin can. Tan cuaha xuhun jahá canaa ra tan tsihin

ra jatyinyeé tsi ra. ²⁵ Tan canā ra Demetrio can tsi ra tsa jahá tyiñu tsihin ra. Tan canā tucu ra tsi ra tsa jahá tyiñu iin ñi tyiñu can naha ra. Tan catyí ra tsihin ra naha:

—Nyooho tata, tsitó ndo tyin tsihin tyiñu ihya tan iyó vaha xaan yo. ²⁶ Maa tyin nyooho nyehé ndo tan tsiñí ndo nácaa javahá nu Pablo can ñuu yo ihya, tan tandihí ñuu tsa cayucú Asia ihya. Tyin catyí nu tyin tsitoho tsa javahá yo tan tsa javahá inga ca nyivi ñavin Nyoo cuví can. Tan cuaha xaan nyivi tsinú iñi tsa caahán nu. ²⁷ Tan ña vaha tsa javahá nu tyin ña cua cuyahvi ca tsitoho tsa javahá yo. Tan inga tucu tuhun, ña cua jacahnu ca nyivi tsi nyoo Diana tan ña cua jacahnu ñi vehe ñuhu ña, tan ña vaha tacan, tyin ñaha can cahnu xaan cuví ña. Tan tandihí nyivi ñi cahnu Asia tsihin nyivi nani cahnu ñuhu ñayivi jacahnú ñi tsi ña. Tan nu cuahán ca tsi quivi ña cua jacahnu ca ñi tsi ña tatun tsinú iñi ñi tsa caahán nu Pablo —catyí ra Demetrio.

²⁸ Tan cuhva tsa tsiñi ra naha tsa cahan ra, xaan xaan cuñí ra naha. Tan quitsahā caná tsaa ra naha tan catyí ra naha:

—Cahnu xaan cuví ña Diana tsa cuví ña nyoo cuenda yo tsa cuví yo nyivi Éfeso ihya —catyí ra naha.

²⁹ Tan cuvaā tandihí nyivi ñuu can. Tan tññ ñi tsi ra Gayo, tan tsihin ra Aristarco, uvi taahan ra tsa queē Macedonia tan tsicá ra naha tsihin ra Pablo. Tan tandihí ñi can ixtā caa ñi tsi ra naha nda cuanda nu tuhvá ñi ndu iin.

³⁰ Tan ra Pablo cuñí ra quihvi ra nu yucú ñi tyin cahan ra tsihin ñi. Maa tyin ra hermano ña tsahā ra naha tsa cuhun ra. ³¹ Tan tacan tucu taahan ra cumí tyiñu cuenda Asia. Ra vaha iñi tsi ra Pablo cuví ra naha, tan tavā tyiñu ra naha tsi ra tyin ña taahán tsi tyihí ra tsi ra ican. ³² Tan nu ndu iin nyivi ican, juhva ñi caná tsaa iin tuhun, tan inga ñi caná tsaa inga tuhun, tyin cuvaá ñi. Tan cuaha xaan ñi ndi ña tsitó ñi nacuenda yucú ñi ican. ³³ Tacan tan nyivi Israel tavā tyiñu ñi tsi iin ra tsa nañí Alejandro na yaha ra ityi nuu. Tan juhva ñi tsa yucú ican, tsahā cuenda ñi tsi ra nácaa cua cahan ra. Tacan tan javahā ra seña tsihin ndaha ra tyin na cutaxin ñi tyin cuñí ra cahan ra tyin nduve cuatyí nyivi Israel. ³⁴ Maa tyin cuhva tsa tsitó nyivi tyin ra Israel cuví ra, tandihí maa ñi canā tsaa ñi. Tan tsitsi tsa uvi hora caná tsaa ñi, tan catyí ñi:

—Cahnu xaan cuví ña Diana, tsa cuví ña nyoo cuenda yo tsa cuví yo nyivi Éfeso —catyí ñi, caná tsaa ñi.

³⁵ Tacan tan ra secretario ñuu can cuví jacutaxin ra nyivi, tan caahán ra tsihin ñi, tan catyí ra:

—Nyooho nyivi ñuu Éfeso ihya, tandihí nyivi tsitó ñi tyin nyaá tsi siqui yo tsa jahá cuenda yo vehe ñuhu ña Diana, tyin cahnu xaan cuví ña. Tan jahá cuenda yo tsitoho ña tsa queē andiví tan nacavá nu ñuhu ihya. ³⁶ Tan yoñi cuví catyí tyin ña nditsa. Taxin ñi ndo, tan ña ica ndo tatun ña tsitó ndo náa tsa cua javaha ndo. ³⁷ Tyin ra tsa tsindaca ndo ihya nduve náa tsa suhū ra naha vehe ñuhu yo. Tan ndi ña caahán ra naha ndavaha ñi siqui nyoo yo. ³⁸ Tatun ra Demetrio tan ra tsa jahá tyiñu tsihin ra, tsicán ra naha cuatyí tsaha iin ra, na cuhun ra naha nu nyaá ra juez. Cuví ndacan ra naha cuatyí nuu ra can, tan maa ra cuví jandaa ra cuatyí can. ³⁹ Tan tatun inga tuhun tsicán ndo, cuñí tsi tsa ndaca ndo can tsi ra cumí tyiñu, tumaa cuhva catyí ley. ⁴⁰ Tyin tatun coto ra ndacá ñaha tan cana ra tsi yo tsa cuenda tsa cuví ihya, tan ña cua ñihi yo tuhun cahan yo tatun ndaca tuhun ra tsi yo nacuenda cuvaá yo —catyí ra cuví secretario can.

⁴¹ Tan tsa yaha cahan ra, tacan tan catyí ra tyin na cunuhu ñi nda yuvehe ñi.

20

Nu yaha ra Pablo Macedonia tan cuahan nyico ra nda Grecia

¹ Tsa yaha tsa cuvaq nyivi ñuu Éfeso can, cana ra Pablo tsi tandihi nyivi tsa yihí cuenda ra Cristo, tyin cahan ra juhva tsihin ñi tan cuhva ra tunyee iñi tsi ñi, tyin tsa tsaq quivi tsa cua cuhun ra inga ñuu. Tan cahan ra tsihin ñi. Tacan tan cuahan ra Macedonia. ² Tan tsahan ra tandihi ityi can tan tsihin tuhun caahan ra jandu iin ra iñi tandihi nyivi yihí cuenda ra Cristo tsa iyó ityi can. Tacan tan tsaq ra ityi Grecia. ³ Tan ican ndoo ra uñi yoo. Tan tsa nyaá tsa cua quihin ra yutun ndoo tan cuhun ra Siria, tan tsito ra tyin nducú nyivi Israel tsi ra tyin cua cahñi ñi tsi ra. Yacan cuenda tyaq iñi ra tsa cua cuhun ra tsihin tsaha ra ityi nu ñuhu, tan cua yaha nyico ra inga tsaha ityi Macedonia. ⁴ Tan cuahan ra Sópater, ra ñuu Berea tsihin ra. Tan cuahan ndihi ra Aristarco tan ra Segundo. Tan uvi taahan ra ihya, Tesalónica cuví ñuu ra. Tan cuahan ndihi ra Gayo, ra ñuu Derbe, tan ra Timoteo, tan uvi taahan ra quee Asia, ra Tíquico tan ra Trófimo. ⁵ Ra hermano ihya yaha ra naha ityi nuu tan ndatú ra naha tsi ndi nda ñuu Troas. ⁶ Tan nyuhu ndatú ndi nda tsa yaha vico pascua nu tuhvá nyivi Israel tsatsi paan tsa nduve yutsan iya yihí. Tacan tan quee ndi ñuu Filipos tsihin yutun ndoo. Tan nu tsinu uhun quivi tan titahan ndi tsihin ra tsa cuahan ityi nuu nda ñuu Troas naha ra. Tan ican ndoo ndi utsa quivi.

Nu caahan ra Pablo tuhun Nyoo ñuu Troas

⁷ Tan tsa cuví tumingu can ndu iin ndi tsihin nyivi yihí cuenda ra Cristo ñuu Troas can. Tan quivi can cua catsi ndi paan tan coho ndi vinu tyin nducuhun iñi ndi tyin tsihi ra Cristo tsa cuenda cuatyí yo. Tan ra Pablo caahan ra tsihin ñi, tan taha ñuu, tyin tsa nyaá tsa cuhun ndi inga quivi can. ⁸ Yucú ndi iin cuarto nu tsinu uñi pisu. Tan nditsin xaan nu yucú ndi tsitsi vehe can tyin cuaha xaan ñuhu candili cayú. ⁹ Tan iin ra tyuvaa tsa nañí Eutico nyaá ra ventana tyaá soho ra, maa tyin ña cunyeé iñi ra ñumaahna, tyin ra Pablo, naha xaan caahan ra. Quixí ra Eutico, tan ña tsito ra canacava ra. Quee ra nda nu tsinu uñi pisu tan canacava ra nda nu ñuhu. Tan cañihí ra hermano naha ra tsi ra, maa tyin tsa tsihi ra. ¹⁰ Tacan tan ra Pablo nuu ra tan tsaq ra nu canyí ra tyuvaa can. Tan tyihí jucun ndaha ra tsi ra tyuvaa can, tan catyí ra tsihin tandihi ra hermano naha ra:

—Ña nayuhvi ndo, tyin ra ihya nyito ra —catyí ra.

¹¹ Tacan tan ndaa nyico ra Pablo tan tsatsi ndi paan tan tsihi ndi vinu. Tan ra Pablo caahan ca maa ra tuhun Nyoo nda cuanda cunditsin. Tsahan cuahan ra. ¹² Tan ra tyuvaa can nandotó ra tan cuanuhu ra nda yuvehe ra. Tan si xaan cuñi ñi cuví.

Nu quitá ra Pablo ñuu Troas tan cuahan ra nda ñuu Mileto

¹³ Nyuhu yaha ndi ityi nuu tan cuahan ndi tsihin yutun ndoo nda ñuu Asón. Tyin ican cua ñihi tahan ndi tsihin ra Pablo, tyin tacan jandaq maa ndi tyiñu tsihin ra, tyin maa ra cuñi ra cuhun ra ityi nu ñuhu tsihin tsaha ra. ¹⁴ Tan tsa ñihí tahan nyico ndi tsihin ra nda ñuu Asón, quihvi ra tsitsi yutun ndoo tsihin ndi tan cuahan ndi nda ñuu Mitilene. ¹⁵ Tsa quitá ndi ñuu can tacan tan yaha ndi ityi nuu iin ñuhu luhlu tsa nañí Quío, canyí tsi mahñu ndutya ñuhu. Tan tsa inga quivi can tsaq ndi inga ñuhu luhlu tsa nañí Samos. Yaha ndi ican

tan tsaꞥ ndi ñuu Trogilio nu quitatu ndi. Tan tsa inga quivi tsaꞥ ndi nda ñuu Mileto. ¹⁶ Tacan cuvi tyin ra Pablo ña cuñi ra tsa cunyi naha ra ityi Asia. Tan ña cuñi ra cuhun ra ñuu Éfeso tyin numi ñi cuñi ra tsaꞥ ra ñuu Jerusalén, tyin tatun cuhva tsi cuhva, ican nyii ra tan cua coo vico Pentecostés.

Nu caahán ra Pablo tsihin ra ñuu Éfeso naha ra tyin cua cuhun ra tan ña cua quitsi ca ra

¹⁷ Tan tsa yucú ndi ñuu Mileto, canꞥ ra Pablo tsi ra cuvi ityi nuu tsihin nyivi yihí cuenda Nyoo ñuu Éfeso. ¹⁸ Tan tsa tsaꞥ ra naha, tan caahán ra Pablo tsihin ra naha tan catyi ra:

—Maa ndo tsitó ndo nácaa cuhva tsicá yu nda quivi jihna ñi tsa tsaꞥ nuu yu Asia ihya. ¹⁹ Tandihí quivi tsa tsinyii yu tsihin ndo tan tyiñu Jutu Mañi yo jahá yu tsihin tsa nducú yu cuhva tsa ña cahnu xaan ñi cuvi yu, vasu cuaha tundoho tan tucuihya iní nyehe yu. Tan cuaha tundoho quitsi siqui yu jahá nyivi Israel. ²⁰ Maa tyin ña jandihí yu tsa caahán yu tuhun Nyoo tsihin ndo. Tyin yacan cuvi tandihí tsa tsiñi ñuhu tsi ndo tan coo vaha ndo tsihin Nyoo. Tan jacuahá yu tuhun Nyoo tsi ndo nu ndu iín ndo tan nda yuvehe ndo. ²¹ Tan jacuahá yu tuhun ihya tsi nyivi Israel tan tsi nyivi tsa ñavin nyivi Israel cuvi, na nasama ñi cuhva iyó ñi nuu Nyoo tan na tsinu iñi ñi tsi Jutu Mañi yo, ra Jesucristo. ²² Tan vityin cua cuhun yu nda ñuu Jerusalén tyin maa Tatyí Ii Nyoo catyi. Tan ña tsitó yu náa cua cuvi tsi yu ndacan. ²³ Maa tyin intuhun ñi tsa tsitó yu tyin tandihí ñi nu cuahán yu, Tatyí Ii Nyoo caahán tsihin yu tyin ndatú vehe caa tsi yu, tan cuaha tundoho cua nyehe yu. ²⁴ Maa tyin ndi intuhun yacan tan ña tsicá iñi yu. Tan ndi ñayivi yu nduve yahvi nyaá can tsa cuenda yu, tyin tacan tan tsihin tsa siñi cuñi yu tan cuvi jañihí ca yu jahá tyiñu yu tsa cuenda Jutu Mañi yo Jesús, tumaa tavꞥ tyiñu ra tsi yu. Tan jañihí ca yu jacuahá yu tuhun vaha nácaa cuñi maa Nyoo tsi yo.

²⁵ Tan vityin tsitó vaha yu tyin tandihí nyooho tsa cahán yu tuhun Nyoo tsihin ndo, ña cua nyehe ca ndo tsi yu. ²⁶ Yacan cuenda cuñi yu cahan yu tsihin ndo vityin tyin nduve ca cuatyí yuhu tsa cuenda ndi intuhun ndo. ²⁷ Tyin ñiñi cuñi yu tan cahán yu tandihí tuhun Nyoo tsihin ndo tan nduve náa tsa tyihí xeehe yu. ²⁸ Yacan cuenda jahá cuenda ndo tsi ndo. Tan jahá cuenda ndihí ndo tsi tandihí nyivi yihí cuenda Nyoo. Tyin maa Tatyí Ii Nyoo tavꞥ tyiñu tsi ndo na jahá cuenda ndo tsi nyivi tsicá vehe ñuhu Jutu Mañi yo. Maa ra jatꞥ ra tsi ñi tsihin ñiñi ra. ²⁹ Tan tsitó yu tyin quivi cuhun yu, cua quitsi inga ra naha. Tan cua cuñi ra naha jativi ra naha tsi nyivi yihí cuenda Jutu Mañi yo. Tumaa lobo xaan tsa tsahñi tsi mbee, tacan cua quitsi ra can naha ra. ³⁰ Tan juvin ñi nu yucú ndo, cua nduvita taahan ra. Tan cua jacuahá ra naha tsi ndo tuhun tsa ña nditsa tyin cunyicun ndo tsi ra naha. ³¹ Yacan cuenda jahá vaha ndo cuenda. Ndūcuhun iñi ndo tyin tsitsi tsa uñi cuiya ña jandihí yu tsa caahán yu tuhun Nyoo tsihin ndo. Tyin ñiñu tan nduvi caahán yu tsihin intuhun intuhun ndo, tan tsihin tsa cuihya cuñi yu, coto nacoó ihñi ndo tuhun Nyoo.

³² Tan vityin nyooho yañi, tyaá yu tsi ndo ndaha Nyoo. Naquihin vaha ndo tandihí tuhun caahán ra tsihin yo. Tyin jacotó ra tsi yo tyin cuñi xaan ra tsi yo. Tan tuhun ra jandunyeé xaan tsi iñi yo tan tsahá tsi tsa cuvi yo nyivi vaha tsihin tandihí inga nyivi tsa nacuhva cuenda tsi ñi tsi ra. ³³ Yuhu ña nyiyó iñi yu tsa iyó tsi ndi intuhun ndo. Ndi xuhun ndo, ndi jahma ndo. ³⁴ Nyooho tsitó vaha ndo tyin jahá tyiñu xaan yu tsihin ndaha yu tan ñihí yu tsa tsiñi

ñuhu tsi yu tsihin ra tsicá tsihin yu naha ra. ³⁵ Tacan ñi janahá yu tsi ndo tyin cuñí tsi tsa jaha tyiñu ndo tan jatyiñee ndo tsi nyivi iyó náa tsa tsiñi ñuhu tsi ñi. Tan nducuhun iñi ndo tsa caahán Jutu Mañi yo Jesús, nu catyi ra tyehen: “Si ca cuñi nyivi tsa tsahá, tan ñavin ca nyivi tsa ñihí ndaahvi” catyi Jutu Mañi yo.

³⁶ Tsa yaha tsa cahan ra Pablo tuhun ihya, tsicuiñi tsiti ra. Tan tsican tahvi ra tsihin tandiñi ra naha. ³⁷ Tan tandiñi ra naha nducuihya xaan iñi ra naha tan tsacu xaan ra naha. Tan tsinumí nyaa ra naha tsi ra. ³⁸ Tyin ra Pablo catyi ra tyin cua cahun ra inga ñuu tan ña cua cahun ca ra nu yucú ra naha. Tacan tan tsindaca ra naha tsi ra nda nu quihvi ra tsitsi yutun ndoo.

21

Nu cuahán ra Pablo ñuu Jerusalén

¹ Tacan tan nacoq ndi tsi ra hermano naha ra tan quihvi ndi tsitsi yutun ndoo. Tan cuahán ndi ndoo ityi ñi nda Cos, iin ñuhu luhlu tsa canyií mahñu ndutya ñuhu. Tan tsa inga quivi tsa ndi nda Rodas tsa cuvi inga ñuhu luhlu ñi. Tacan tan cuahán ndi nda ñuu Pátara. ² Tan ñuu Pátara, nyehe ndi inga yutun ndoo tsa cuahán nda Fenicia. Tan quihvi ndi tsitsi can, tacan tan cuahán ndi.

³ Tan ityi nu cuahán ndi, nyehe ndi nu canyií ñuhu Chipre ityi ndaha satyin yo. Tan yaha ñi ndi cuahán ndi ityi nuu ca, nda ityi Siria. Tan tsa ndi nda ñuu Tiro tyin ican cua tava ra naha ndaha tyiñu tsa yihí tsitsi yutun ndoo can.

⁴ Tan tsa nañihí ndi tsi nyivi yihí cuenda Nyoo ñuu can, ndoo ndi tsihin ñi utsa quivi. Tan catyi ñi tsihin ra Pablo tyin ña taahán tsi tsa cahun ra ñuu Jerusalén tyin tacan cahan Tatyí li Nyoo tsihin ñi. ⁵ Maa tyin tsa quita utsa quivi can, quita ndi ñuu can. Tan nu cua quita ndi tandiñi ra hermano naha ra tsihin ñasiñi ra naha tan tsihin sehe ra naha tsindaca ñi tsi ndi nda cuenda yuhu ñuu. Tan nu nyiti yuhu ndutya ñuhu can tsicuiñi tsiti ndi, tan tsican tahvi ndi tsi Nyoo. ⁶ Tacan tan tsinumí nyaa tahan ndi tsi ndi. Tsahan quihvi ndi tsitsi yutun ndoo. Tan ra hermano can naha ra cuanuhu ra naha yuvehe ra naha.

⁷ Tan tsa quee ndi ñuu Tiro, cuahán ndi nda ñuu Tolemaida. Tan ican tsaha ndi nacumi tsi nyivi yihí cuenda ra Cristo. Tan ndoo ndi tsihin ñi iin quivi.

⁸ Tan tsa inga quivi quita ndi cuahán ndi nda ñuu Cesarea. Tan ican tsahan ndi vehe ra Felipe, ra tsa jacotó xaan tsi nyivi nácaa jacacú Nyoo tsi yo. Cuví ra iin ra nyisó tyiñu vehe ñuhu tsitsi tsa utsa taahan ra naha. Tan ndoo ndi yuvehe ra. ⁹ Ra Felipe, iyó cumi taahan ñi cuatyí sehe ra tsa ñaha ca tandaha. Tan ndusu yuhu Nyoo cuvi ñi. ¹⁰ Tan tsa cuaha ñi quivi tsa yucú ndi ican, tan tsa iin ndusu yuhu nyoo tsa quee nda Judea. Nañi ra Agabo. ¹¹ Quitsi nyehe ra nu yucú ndi. Tan quihñ ra cinturón ra Pablo, tsáhñi ra tsaha ra tan ndaha ra, tan catyi ra:

—Tatyí li Nyoo catyi tsihin yu tyin tyehen cua cunuhñi tsitoho cinturón ihya nda ñuu Jerusalén. Tan cua cuhva cuenda nyivi Israel tsi ra tsi ra inga ñuu naha ra —catyi ra Agabo.

¹² Tsa tsiñi ndi tsa caahán ra, nyuhu tan ra ñuu Cesarea naha ra caahán ndaahvi ndi tsihin ra Pablo na ña cahun ra ñuu Jerusalén. ¹³ Maa tyin ra Pablo catyi ra:

—¿Nacuenda tsacú ndo tan janducuihyá ndo iñi yu? Yuhu nduve cuenda yu. Ndi maa tsa cua cunuhñi yu, ndi maa cahñi ra naha tsi yu, maa tyin cahun yu tyiñu tsa cuenda Jutu Mañi yo Jesús —catyi ra tsihin ndi.

¹⁴ Tan tsa nyehe ndi tyin ña cuvi tsa jaha ndi tsi ra, jaña ndi. Tan catyi ndi:

—Na cuvi maa cuhva cuñí Jutu Mañi yo.

¹⁵ Tsa yahá yacan na ica vahá ndi tsi ndi tan cuahán ndi nda ñuu Jerusalén.

¹⁶ Tan cuahán taahan ra ñuu Cesarea ra yihí cuenda ra Cristo, tsihin ndi. Tan cuahán tucu iin ra ñuhu Chipre. Nañi ra Mnasón. Cuaha xaan cuiya tsinú iñi ra tsi ra Cristo. Tan tsindacá ra tsi ndi yuvehe ra tsa iyó ñuu Jerusalén tyin cuyucu ndi.

Nu cua nyehe ra Pablo nu nyii ra Jacobo

¹⁷ Tsa tsaá ndi ñuu Jerusalén, nyivi yihí cuenda ra Cristo sii xaan cuñí ñi caahán ñi tsihin ndi. ¹⁸ Tan inga quivi can cuahán ndi tsihin ra Pablo cua nyehe ndi nu nyii ra Jacobo. Tan ican yucú tucu tandihi ra cuvi ityi nuu tsihin nyivi vehe ñuhu. ¹⁹ Tsaahá ra Pablo nacumi tsi ra naha. Yahá can tan nacatyí tuhun ra tandihi nácaa tsatyíñu Nyoo tsi ra nu cahan ra tuhun Nyoo tsihin nyivi tsa ñavin nyivi Israel cuví. ²⁰ Tsa tsiñi ra naha tuhun ihya, jacahnu ra naha tsi Nyoo, tan catyí ra naha tsihin ra Pablo:

—Vaha yañi, nyehé un tyin cuaha xaan nyivi Israel tsinú iñi tsi ra Cristo. Tan tandihi ñi catyí ñi tyin taahán tsi tsa javaha yo cuhva catyí ley tsa tyaá ra Moisés. ²¹ Tan ñihí tuhun ñi tyin yooho jacuahá un tsi tandihi nyivi Israel tsa iyó inga ñuu tyin na ña cuita ca iñi ñi ley tsa jacuahá ra Moisés, tan catyí tucu un tsihin ñi tyin ña cuñí ca tsi tsa cunyaa tuñi Nyoo tsi sehe yii ñi, tan ndi ña cua javaha ca ñi tuhun tsahnu cuhva tsa iyó maa yo tahañ tsanaha. ²² ¿Nacaa javaha yo vityin? Tyin nyivi cua ñihí tuhun ñi tyin tsaá un ihya. ²³ Vaha taxin ca tsa javaha un tsa cua cahan ndi tsihin un. Ihya iyó cumi taahan rayii tsa nyaá javaha tsa catyí ra tsihin Nyoo tyin cua javaha ra naha. ²⁴ Cuaahan tsihin ra naha na nduvaha un nuu Nyoo tsihin ra naha. Tan tyahvi un tsa taahán tsi tyahvi ra naha. Tacan tan maa ra naha cua xatya ndii ra naha jiñi ra naha cuhva catyí ley. Tan tsa javaha un tacan, tan coto tandihi nyivi tyin ña nditsa tsa caahán ñi siqui un, tyin cua nyehe ñi tyin ña nacoó un ley tsa tyaá ra Moisés. ²⁵ Tan tsa cuenda nyivi tsa ñavin nyivi Israel cuví, tan tsinu iñi ñi tsi ra Cristo, tsa jacuhun ndi tutu tsi ñi, tan catyí ndi tsihin ñi tyin ña taahán tsi caca xaan iñi ñi tsa cuenda ley can. Catyí ndi tyin ña cua catsi ñi cuñu tsa jamañi nyivi tsi tsitoho. Ndi ña cua catsi ñi niñi quití, tan ndi cuñu quití tsa cavá ñi jucun tan ña tsatí niñi ti. Tan ndi intuhun ra naha tan ña caca nuu ra naha tsihin ñaha tan ndi ñiñaha tan ña caca nuu ñi tsihin rayii —catyí ra tsahnu vehe ñuhu can naha ra tsihin ra Pablo.

Nu quitsahá caahán yuhu tahañ nyivi Israel siqui ra Pablo

²⁶ Tacan tan tsa tuví inga quivi tan cuahán ra Pablo tsihin tandihi tsa cumi taahan ra can naha ra. Tan janduvahá ra tsi ra nuu Nyoo iin caa ñi tsihin ra can naha ra. Tacan tan quihvi ra tsitsi vehe ñuhu cahnu tyin jacoto ra cuvi jutu ama cundihí tsa utsa quivi tsa nduvaha tsa cumi taahan ra can naha ra, tan cua jamañi ra tsa jamañi ra nuu Nyoo. ²⁷ Tacan tan tsa cuñí ndihi tsa utsa quivi can, tan taahan ra Israel tsa quee nda Asia nyehe ra naha tsi ra Pablo tsitsi vehe ñuhu. Tan cuvaá xaan tandihi nyivi jahá ra naha, tan tñn ra naha tsi ra Pablo. ²⁸ Tan caná tsaá ra naha tan catyí ra naha:

—Nyooho nyivi Israel, jatyinyee ndo tsi ndi. Juvn ra ihya cuví ra tsa tsicá nuu tandihi ñi ityi. Tan jacuahá ra tsi tandihi nyivi. Catyí ra tyin ña vaha cuhva iyó yo. Tan catyí ra tyin ña vaha ley tsa tyaá ra Moisés, tan ña vaha vehe ñuhu ihya. Tan inga tucu tuhun tyin tyihí ra tsi juhva ra Grecia naha ra tsitsi vehe ñuhu yo tan ihya nu ii cuví tsi tan vatsí jatíví ra naha —catyí ra naha caná tsaá ra naha.

²⁹ Tacan catyí ra naha tyin nda nu quítsi tsi nyehe ra naha tsi ra Pablo tsitsi ñuu, tsicá nuu ra tsihin iin ra ñuu Éfeso tsa nañi Trófito. Tan cuñi maa ra naha tyin ra Pablo tsindaca tsi ra tsitsi vehe ñuhu. ³⁰ Tan tandihi nyivi ñuu quítsaha cuvaá ñi. Tan tsinú xaan ñi tsaá ñi. Tacan tan tñin ñi tsi ra Pablo. Tan ixta caa ñi tsi ra cua ndaca ñi ityi tsata vehe ñuhu, tan numi ñi nacasi ñi yuvehe ñuhu can. ³¹ Tsa cuñi cahñi ñi tsi ra, tan ñihí tuhun ra comandante cuenda andaru tyin tandihi nyivi ñuu Jerusalén iyo xaan caahán yuhu tahan ñi. ³² Tacan tan ra comandante can jandu iin ra tsi ra capitán naha ra tan tsihin andaru naha ra. Tan tsinú ra naha cuahán ra naha nu yucú nyivi. Cuhva tsa nyehe ñi tsi ra comandante can tsihin andaru can naha ra, jaña ñi tsa cañi ñi tsi ra Pablo. ³³ Tacan tan natuhva ra comandante can nu nyii ra Pablo. Tan tava tyiñu ra tsi andaru naha ra tyin na tñin ra naha tsi ra, tan na cuhñi ra naha tsi ra tsihin uvi taahan cadena. Yaha can tan tsica tuhun ra comandante can tsi ra yóo ra cuví ra, tan náa javahá ra. ³⁴ Maa tyin nyivi siin siin tuhun caná tsaá ñi. Tan ra comandante can ña cutuñi maa iñi ra tsa cuenda tsatyin ñihi xaan cuvaá jahá ñi. Tan tava tyiñu ra tsi andaru tyin cundaca ra naha tsi ra Pablo nda vehe nu yucú andaru. ³⁵ Cuhva tsa tsaá ra naha nu cuayi vehe can, tan quítsaha nducaña nyivi tan ña cuví ca caca ra Pablo jahá ñi. Yacan cuenda tyiso soco andaru can naha ra tsi ra. ³⁶ Tyin tandihi ñi nyicún ñi tsi ra naha, tan caná tsaá ñi tan catyí ñi:

—¡Na cúu ra! —catyí ñi.

Nu juvin ñi maa ra Pablo jacacú tsi ra nuu nyivi

³⁷ Cuhva tsa cua tyihi ra naha tsi ra Pablo tsitsi vehe can, tan quítsaha caahán ra tsihin ra comandante:

—¿A cuhva un tsa cahan yu tsihin un? —catyí ra tsihin ra.

Tan ra comandante can catyí ra tsihin ra:

—¿A cuví caahán un yuhu griego? ³⁸ Tun tacan caa, ñavin yooho cuví ra ñuu Egipto tsa quítsi quivi can tan jacañi tahan ra tsi nyivi siqui ra ndaca ñaha tan tava ra cumi mil ra tsañi ndiyi tsindaca ra tsi ra naha ityi ñuhu ityi —catyí ra comandante can tsihin ra Pablo.

³⁹ Tacan tan ra Pablo catyí ra tsihin ra:

—Yuhu ra Israel cuví yu tan cacú yu ñuu Tarso tsa cuví iin ñuu cahnu ityi Cilicia. Maa tyin jaha tumañi iñi cuhva un ndatu cahan yu luxu tsihin nyivi —catyí ra Pablo tsihin ra comandante.

⁴⁰ Tacan tan tsa tsaá ra comandante can ndatu tsi ra, nduvita nyityi ra nu cuayi can tan javahá ra iin seña tyin na cutaxin ñi. Tan tsa cutaxin nyivi quítsaha caahán ra tsihin yuhu hebreo, tan catyí ra:

22

¹ —Nyooho tata, tan nyooho yañi, tyaa soho ndo tsa cua cahan yu tsihin ndo tyin cuñi yu tsa coto ndo tyin yuhu nduve cuatyí yu iyó —catyí ra Pablo tsihin nyivi can.

² Tsa tsñiñ ñi tsa caahán ra tsihin ñi tsihin yuhu hebreo, taxin cuii ña tsinyacu ñi. Tan ra Pablo catyí ra:

³ —Yuhu ra Israel cuví yu tumaa maa ndo. Tan cacú yu ñuu Tarso tsa canyí Cilicia. Maa tyin Jerusalén ihya tsañu yu. Tan ra Gamaliel jacuahá ra tsi yu nácaa tyaa yahvi yu ley tsii tsaahnu yo. Tan tacan ñi nducú yu cuhva javahá yu tyiñu nuu Nyoo tsihin tsa n# iñi yu, tumaa tsa javahá ndo vityin ihya. ⁴ Yuhu, nu quítsi tsi tsinyaa ndaha yu tsi nyivi yihí cuenda ra Cristo. Tan tsindaca yu tsí ñi tsa cúu ñi. Tan cuaha ñi ray# tan ñaha tñin yu tsa cahun

ñi tsitsi vehe caa. ⁵ Ra jutu tsaahnu tsa cuví ityi nuu tsihin ra cuví mandoñi naha ra, cuví ra naha tsandaa tyin ra ican naha ra tsaha tutu tsi yu tyin cuví tñin yu tsi ra yañi yo, ra yihí cuenda ra Cristo ñuu Damasco. Tsaħan yu ican tsinanducú yu tsi nyivi tsinú iñi tsi ra Cristo, tyin cua cunuhñi ñi tsihin cadena, tan cua quitsi ndaca yu tsi ñi nda ñuu Jerusalén ihya tyin tatsi tuñi ra tsahnu naha ra tsi ñi.

*Nu nacatyí tuhun ra Pablo nácaa natsinú iñi ra tsi ra Cristo
(Hechos 9.1-19; 26.12-18)*

⁶ Maa tyin cuhva tsa cuahán yu ityi tsa cua tsaá yu ñuu Damasco, maa ora cuví tsi. Tan sana iñi yu tan ndunditsin taniñ cahnu nu cuahán yu jahá iin ñuhu tsa quitsi ityi andivi. ⁷ Tacan tan nduva yu nu ñuhu. Yahá can tan tsiñi yu iin ndusu tsa caahán tsihin yu tan catyí tsi: “Saulo, Saulo, ¿nacuenta nyaá ndaha un tsi yu?” catyí ndusu can tsihin yu. ⁸ Tacan tan tsicá tuhun yu tsi ra tan catyí yu: “¿Yóo yooho cuví un, taa?” Tan catyí ra tsihin yu: “Yuhu cuví ra Jesús, ra ñuu Nazaret, ra tsa nyaá ndaha un” catyí ra. ⁹ Tandihí ra tsa cuahán tsihin yu nyehe ra naha ñuhu can, tan nayuhvi xaan ra naha. Maa tyin ña tsiñi ra naha ndusu tsa caħan tsihin yu. ¹⁰ Tacan tan quitsaha caahán yu tsihin ra tan catyí yu: “Jutu Mañi yu, ¿náa taahán tsi javaha yu?” Tan catyí ra tsihin yu: “Nduvita tan cuhun un nda ñuu Damasco. Tan ican cua caħan iin ra tsihin un tandihí tsa taahán tsi javaha un” catyí Jutu Mañi yo tsihin yu. ¹¹ Tan cuaá yu jahá ñuhu can, yacan cuenda ra tsa cuahán tsihin yu tñin ra naha ndaha yu tan cuahán ndi nda ñuu Damasco.

¹² Tan ican iyó iin ra tsa nañi Ananías. Tan jacahnú xaan ra tsi Nyoo cuhva catyí ley tsa tyaá ra Moisés. Tan tandihí nyivi Israel tsa iyó ñuu Damasco catyí ñi tyin vaha xaan iñi ra. ¹³ Tsaħan ra can tsinyehe ra tsi yu. Tan cuhva tsa tsaá ra, catyí ra tsihin yu: “Yañi Saulo, nanyehe inga tsaha” catyí ra tsihin yu. Tan juvení ñi cuhva can tan nanyehe yu. Tan cuví nyehe yu tsi ra. ¹⁴ Tan catyí ra tsihin yu: “Nyoo cuenda jutu yo nacatsi ra tsi un nda tsanaha, tyin coto un cuhva cuñi ra, tan nyehe un tsi ra Jesucristo tyin ra vaha cuví ra, tan cuñi un ndusu ra. ¹⁵ Tyin yooho cua caħan un tuhun ra nuu tandihí nyivi. Cua nacatyí tuhun un tsa nyehe un tan tsa tsiñi un. ¹⁶ Tan vityin, ña cuatu ca un. Nduvita tan cõndutya un. Tan ndacan tahvi un tsi Jutu Mañi yo tyin na jaha ra tucahnu iñi cuatyí un” catyí ra Ananías tsihin yu —catyí ra Pablo tsihin ñi.

Nu nacatyí tuhun ra Pablo nácaa tsaha Nyoo tyiñu tsi ra tyin cuhun ra inga ñuu cucahan ra tuhun ra Cristo

¹⁷ Yahá can tan vatsi nuhu yu ñuu Jerusalén ihya tan cuhva tsa tsaá yu, tsaħan yu vehe ñuhu cahnu tsindacan tahvi yu tsi Jutu Mañi yo. Tan janaha ra iin tsa nyehe yu. ¹⁸ Nyehe yu tsi ra. Tan catyí ra tsihin yu: “Janumi. Quita ñi ñuu Jerusalén ihya tyin ña cua tsinu iñi nyivi tuhun yu tsa caħan un” catyí ra tsihin yu. ¹⁹ Tacan tan quitsaha caahán yu tsihin ra tan catyí yu: “Jutu Mañi yu, maa ñi tsitó ñi tyin yuhu tsaħan yu tandihí vehe ñuhu. Tan tñin yu tsi ñi tsa tsinú iñi tsi un, tan tyihí yu tsi ñi vehe caa tan cañi yu tsi ñi. ²⁰ Tan quivi tsa tsihi ra Esteban ra tsa caħan cuenda un, yuhu nyii ndihí yu ican. Tan ndog yu vaha tsa tsahñi ra naha tsi ra. Tan jahá cuenda yu jahma ra can naha ra” catyí yu tsihin Jutu Mañi yo. ²¹ Tacan tan catyí ra tsihin yu: “Cuaahan, tyin maa yu jacuhún tsi un. Cañi xaan cua cuhun un tyin cua cuhun un nda nu iyó nyivi tsa ñavin nyivi Israel cuví” catyí Jutu Mañi yo tsihin yu.

Nu nyaá ra Pablo ndaha ra comandante cuenda ñuu Roma

²² Tyaꝯ soho ñi yacan ña tan quitsahꝯ caná tsaꝯ ñi tan catyí ñi:

—¡Cahñi ndo tsi ra! Tyin ña taahán ca tsi tsa coo ra ñayivi —catyí ñi.

²³ Tan caná tsaꝯ ca ñi. Tan javicó ñi jahma ñi. Tan javitá ñi nyahyu nu tatyí tsa cuenda tsa xaan xaan cuñi ñi. ²⁴ Yacan cuenda ra comandante can catyí ra tsihin ra andaru can naha ra tyin na cundaca ra naha tsi ra Pablo tsitsi vehe can. Tan catyí ra tyin na cañi ra naha tsi ra, tyin tacan tan cua cahan ra tsa nditsa nacuenda tsa caná tsaꝯ nyivi tsata ra. ²⁵ Maa tyin tsa yahꝯ tsaññi ra naha tsi ra tan cua cañi ra naha tsi ra, tacan tan ra Pablo cahꝯ ra tsihin ra capitán tsa nyaá nyityi ican tan catyí ra:

—¿A iyó ndatu tsi nyooho tsa cañi ndo tsi yu? Tan yuhu ra cuenda ñuu Roma cuví yu tan inga tucu tuhun, ñaha ca jaquee yuhu ra juez tsi yu, tan cuñi ndo cañi ndo tsi yu —catyí ra Pablo tsihin ra.

²⁶ Tsa tsiñi ra capitán tsa caahán ra Pablo, tsañꝯ ra tsijacotꝯ ra tsi ra cuví comandante. Tan catyí ra tsihin ra:

—Jaha cuenda tsi un tsihin tsa javahá un. Tyin ra can, ra ñuu Roma cuví ra —catyí ra tsihin ra.

²⁷ Tacan tan ra comandante can cuahán ra nu nyii ra Pablo. Tan tsicá tuhun ra tsi ra tatun nditsa tyin ra ñuu Roma cuví ra. Tan ra Pablo catyí ra:

—Juvín.

²⁸ Tacan tan catyí ra comandante can tsihin ra:

—Yuhu cuaha xaan xuhun tyahvi yu tan cuví cuꝯ yu iin ra ñuu Roma.

Tan ra Pablo catyí ra:

—Tan yuhu ra ñuu Roma cuví yu tsa cuenda jutu yu —catyí ra.

²⁹ Tacan tan andaru tsa cua cañi tsi ra jatsiyꝯ nyaha ra naha tsi ra naha nu nyii ra Pablo. Tan nda cuanda ra comandante tan nayuhvi ra tsa cuenda tsa tsaññi ra tsi ra tsihin cadena. Tyin tsa javahá ra tsa tacan tsihin iin ra ñuu Roma cuatyí cuví can.

Nu tsañꝯ ra Pablo nu ndu iin ra ñuu Israel naha ra

³⁰ Tan tsa tuvj inga quivi can tan ra comandante can cuñi ra coto ra náa cuatyí tyaá nyivi Israel tsi ra Pablo. Tan jañꝯ ra tsi ra Pablo. Tan tava tyiñu ra na ndu iin tandihí ra jutu tsa cuví ityi nuu naha ra, tan tsihin tandihí ra cumí tyiñu cuenda nyivi Israel. Tacan tan tava tyiñu ra na quita ra Pablo vehe caa tan cuhun ra nu iyó junta can.

23

¹ Tan ra Pablo nyeheꝯ ra tsi tandihí ra tsa ndu iin can naha ra, tan catyí ra tsihin ra naha:

—Nyooho yañi, tandihí quivi nda cuanda vityin nducú yu cuhva javaha yu cuhva cuñi Nyoo. Yacan cuenda vaha cuñi yu —catyí ra Pablo.

² Tacan tan ra Ananías, ra jutu tsaahnu tsa yihí ndaha tsi inga ca ra naha, tava tyiñu ra tsi ra nyecú yatyin ñi nu nyaá ra Pablo, na cañi ndaha ra naha yuhu ra. ³ Tan ra Pablo nacahꝯ ra tan catyí ra:

—¡Ihna ca tsi maa un cua cañi Nyoo, tyin jahá xaan un tyin ra vaha cuví un nyaá un juvin! ¿A cutuñi yu nuu un tumaa cuhva catyí ley? ¿Nacuenda tsa tava tyiñu un na cañi ra naha tsi yu? Tan ñavin tacan catyí ley —catyí ra Pablo.

⁴ Tacan tan ra nyecú ican catyí ra naha tsihin ra:

—Ña vaha tsa caahán un tacan tsihin ra jutu tsaahnu tyin cahnu cuví ra nuu Nyoo —catyí ra naha tsihin ra Pablo.

⁵ Tacan tan ra Pablo catyí ra:

—Yañi, ña tsitó yu tatun ra ihya cuví ra jutu tsaahnu. Tyin catyí tuhun Nyoo tyin ña cahan nyaa yo tsi ra yihí ndaha ñuu yo —catyí ra.

⁶ Tacan tan tuvji ñi ra Pablo tyin juhva ra cuenda junta can naha ra, yihí ra cuenda ityi ra cuví saduceo naha ra. Tan juhva ra naha yihí cuenda ra cuví fariseo naha ra. Tacan tan cahān ra tsihin tsa ñihi ndusu ra tan catyí ra:

—Nyooho yañi, yuhu ra fariseo cuví yu tumaa jutu yu. Tan tatsí tuñi ndo tsi yu tsatyin tsinú ñi yu tyin nyivi tsa tsihi nandoto ñi —catyí ra Pablo.

⁷ Cuhva tsa cahān ra tuhun ihya, ra tsa cuví fariseo naha ra tan ra saduceo naha ra, quitsahā caahān yuhu tahan ra naha tan natahvī sava ra naha.

⁸ Tyin ra saduceo catyí ra naha tyin ña cua nandoto nyivi tsa tsihi. Tan catyí ra naha tyin nduve ángel tan ndi nduve tatyí ña vaha iyó. Maa tyin ra fariseo naha ra tsinú ñi ra naha tandihi tuhun ihya. ⁹ Tandihī ra naha quitsahā caná tsa ra naha. Tan nduvitā juhva ra cuví maestro cuenda ley tsa tyaā ra Moisés tsa cutahān tsihin ra fariseo naha ra, tan catyí ra naha:

—Nyehe ndo, nduve tsa ña vaha javahá ra ihya, tyin tatun ángel cahān tsihin ra, jahā yo cuenda tyin ña vaha cahan yo siqui Nyoo —catyí ra naha.

¹⁰ Tsa tsiñi tandihī ra naha yacan, quitsahā nduvaá nyico ra naha. Nda cua nayuhvī ra comandante can coto cahnya cuatyí ra naha tsi ra Pablo. Yacan cuenda tavā tyiñu ra na tava andaru tsi ra Pablo nu yucú ra naha, tan cundaca nyico ra naha tsi ra nda tsitsi vehe andaru. ¹¹ Tan tsacuaa can quituvj jutu Mañi yo nuu ra Pablo tan catyí ra tsihin ra:

—Jandu iin ñi un, Pablo. Tyin tumaa caahān un tuhun yu ñuu Jerusalén ihya, tacan cua cahan tucu un nda ñuu Roma —catyí Jutu Mañi yo tsihin ra Pablo.

Nu ndoo ra Israel naha ra tyiñu tyin cua cahñi ra naha tsi ra Pablo

¹² Tsa inga quivi, juhva ra Israel natuhun tahan ra naha tan ndoo ra naha tyiñu. Tan catyí ra naha tyin ña cua catsi ra naha, tan ndi ña cua coho ra naha nda cuanda cahñi ra naha tsi ra Pablo. Tan ndáa ra tsa ña cua javaha tacan, na janaa Nyoo tsi ra naha, catyí ra naha. ¹³ Yaha uvi xico ra naha ndoo ra naha tyiñu ihya. ¹⁴ Tsaahān ra naha nu yucú ra jutu tsa cuví ityi nuu naha ra tan tsihin ra cuví mandoñi cuenda nyivi Israel naha ra. Tan catyí ra naha tsihin ra naha:

—Nyuhu natuhun tahan ndi tan cahān ndi tsihin Nyoo tyin ña cua catsi ndi tan ndi ña cua coho ndi tsitsi tsa ña cua cahñi ndi tsi ra Pablo. Tan na janaa Nyoo tsi ndi tatun ña cua javaha ndi tumaa kuhva catyí ndi. ¹⁵ Tan vityin nyooho jacoto ndo tsi ra comandante. Catyí ndo tsihin ra na quitsi ndaca ra tsi ra Pablo nuu ndo ityaan. Catyí ndo tyin cua jandaa vaha ndo tyiñu, tan nyuhu cua cuatu xeehe ndi tsi ra tan tsa cua yaha ra, tsitsi tsa ndi cumañi ca tsa ra ihya, cua cahñi ndi tsi ra —catyí ra naha tsihin ra jutu naha ra.

¹⁶ Maa tyin sehe kuhva ra Pablo tsiñi ra tsa natuhun tahan ra naha. Tan tsaahān ra vehe andaru nu nyii ra Pablo tsicatyí tuhun ra tsihin ra. ¹⁷ Tacan tan ra Pablo canā ra tsi iin ra capitán. Tan catyí ra tsihin ra:

—Cuandaca tsi ra luhlu ihya nuu ra comandante tyin iyó tsa cuñi ra cahan ra tsihin ra —catyí ra Pablo tsihin ra capitán.

¹⁸ Tacan tan tsindacā ra capitán can tsi ra luhlu can nuu ra comandante. Tan catyí ra tsihin ra:

—Ra Pablo tsa nyii vehe caa canā ra tsi yu tan catyí ra tsihin yu tyin quitsi ndaca yu tsi ra luhlu ihya tyin cuñi ra cahan ra tsihin un.

¹⁹ Tacan tan ra comandante t̄ijn ra ndaha ra luhlu can tan tavā siin ra tsi ra tan catyí ra tsihin ra:

—¿Náa cuñí un cahan un tsihin yu?

²⁰ Tan ra luhlu can catyí ra tsihin ra:

—Ra Israel ndoo ra naha tyiñu tyin cua cahan ra naha tsihin un na cundaca un tsi ra Pablo nu ndu iin ra naha ityaan, tan cuñi maa un tyin cua jandaa ra naha tyiñu tsa cuenda ra Pablo. ²¹ Maa tyin ña cua tsinu iñi un tsa cahan ra naha tyin yaha uvi xico ra naha cua cuatu xeehe tsi ra nu cua yaha ra. Tan cahan ra naha tsihin Nyoo tyin tsitsi tsa ña cua cahñi ra naha tsi ra Pablo, ña cua catsi ra naha tan ña cua coho ra naha. Tan tatun ña cuvi cahñi ra naha tsi ra, vaha taxín ca na cúu tandihí maa ra naha, catyí ra naha. Tan vityin ndatú ra naha nácaa cua cahan un —catyí ra luhlu can.

²² Tacan tan catyí ra comandante tsihin ra luhlu can tyin na ña cahan ra tuhun tsa natuhun ra tsihin ra tsihin nyivi. Yaha can tan jacunuhú ra tsi ra luhlu can.

Nu cacu ra Pablo ndaha ra Israel naha ra tan cuahán ra nuu ra ndacá ñaha tsa nañi Félix

²³ Tacan tan ra comandante caná ra tsi uvi taahán capitán, tan catyí ra tsihin ra naha:

—Janduvaha ndo tsi ndo tyin cuhun ndo ñuu Cesarea cuhva caa iin tsa tsacuaa. Cua cuhun uvi cientu andaru tsihin tsaha ra naha, tan uñi xico utsi ra naha tsihin cuayu, tan uvi cientu ra naha cua cuiiso lanza. ²⁴ Janduvaha ndo cuayu coso ra Pablo. Tan jaha cuenda vaha ndo tsi ra ityi cuhun ndo na tsaa vaha ra nu nyaá ra Félix, ra ndacá ñaha —catyí ra comandante tsihin ra capitán can naha ra.

²⁵⁻²⁶ Tacan tan javahá ra iin carta cundaha ra naha nacuhva ra naha tsi ra Félix. Tan tuhun tsa tyaa ra nu carta, cuví tuhun ihya:

“Yuhu ra Claudio Lisias jaquitsí yu carta ihya tsi un, tyin vaha xaan nyivi cuví un. Ihya vatsí nacumi tsi un.

²⁷ Ra Pablo ihya, t̄ijn ra Israel naha ra tsi ra. Tan cuñí ra naha cahñi ra naha tsi ra. Maa tyin cuhva tsa tsito yu tyin ra ñuu Roma cuví ra, tsahan yu tsihin andaru tan jacacu yu tsi ra. ²⁸ Tan cuñí yu coto yu náa cuatyí tyaa nyivi tsi ra, tsindaca yu tsi ra nu iyó junta tandihí ra cuví mandoñi nyivi Israel. ²⁹ Tan nyehe yu tyin xaan xaan cuví nyivi Israel nyehé ñi tsi ra tyin ña tyaa yahvi ra ley tsa iyó ñi. Maa tyin tsa cuenda ley yoo, nduve cuatyí ra tan cahñi yo tsi ra. Tan ndi ña taahán tsi tsa tyihí yo tsi ra vehe caa. ³⁰ Maa tyin ñihí tuhun yu tyin ra Israel nducú cahñi ra naha tsi ra, yacan cuenda jaquitsí yu tsi ra nuu yooho. Tan catyí tucu yu tsihin ra tsa xicó ñaha tsi ra, na quitsi ndihí ra naha nu nyaá un na cahan ra naha cuatyí ra nuu maa un”, catyí ra Claudio tsihin ra Félix nu carta tsa javahá ra.

³¹ Tacan tan quihñ ra naha tsi ra Pablo tumaa cuhva catyí ra Claudio tsihin ra naha, tan juvin ñi tsacuaa can tsindaca ra naha tsi ra nda ñuu Antípatris.

³²⁻³³ Tsa inga quivi, ra tsa cuahán tsihin tsaha, sava ityi ñi tsahan ra naha, tan tsaá nuhu ra nda vehe nu yucú ra naha. Tan ra tsa yosó cuayu can naha ra cuahán ra can naha ra tsihin ra Pablo nda ñuu Cesarea. Tan cuhva tsa tsaá ra naha, nacuhva ra naha carta can tsi ra Félix, tan tsaá cuenda ndihí ra naha tsi ra Pablo tsi ra. ³⁴ Tsa yahá tsa cahvi ra Félix carta can, quitsahá tsicá tuhun ra tsi ra Pablo nu maa cuví ñuu ra. Tan tsa tsito ra tyin ra Cilicia cuví ra. ³⁵ Tan catyí ra tsihin ra:

—Na quitsi jihna ra tsa xicó ñaha tsi un. Tacan tan cua jandaa yu cuatyí un —catyí ra tsihin ra.

Tacan tan tava tyiñu ra na jaha cuenda andaru naha ra tsi ra nda vehe tyiñu tsa javahá ra Herodes tahañ tsanaha.

24

Nu cutuñi ra Pablo nuu ra Félix

¹ Yaha uhun quivi tan ra Ananías, ra jutu tsaahnu tsa yihí ndaha inga ca ra jutu, tsaá ra ñuu Cesarea can tsihin taahan ra cuví mandoñi naha ra, tan tsihin iin ra tsa nañi Tértulo. Ra tsa caahán ndaahvi tsaha nyivi cuví ra. Tsaá ra can naha ra nuu ra Félix tyin cua ndacan ra naha cuatyí tsaha ra Pablo.

² Tacan tan tava tyiñu ra Félix na quitsi ndaca andaru tsi ra Pablo. Tacan tan quitsahá tsicán ra Tértulo cuatyí tsaha ra. Tan catyí ra tsihin ra Félix:

—Tyahvi nyoo tsi un, tata. Tyin taxin ñi iyó ñuu ndi, tan vaha iyó ndi tyin yihí ndaha vaha un nyivi ñuu ndi. ³ Nacuhvá xaan ndi tyahvi nyoo tsi yooho tata Félix, tyin vaha xaan iñi un. ⁴ Tan ña cuñi yu jatyañu yu tsi un tsihin tsa cuaha tuhun cua cahan yu, yacan cuenda tsicán yu tumañi iñi tsi un na cuhva un ndatu cahan ndi luxu. ⁵ Tyin tsitó ndi tyin rayií ihya ñavin ra vaha cuví ra. Tandihí ñi ityi jacuvaá ra tsi nyivi Israel. Tan juvin ra cuví ityi nuu tsihin nyivi tsa nyicún tsi ra Jesús ra ñuu Nazaret. ⁶ Tan cuñi ra javaha ra tsa ndavaha ñi tsitsi vehe ñuhu cahnu. Tan yacan cuenda tññ ndi tsi ra, tyin tatsi tuñi ndi tsi ra tumaa cuhva catyí ley maa ndi. ⁷ Maa tyin ra Licias, ra cuví comandante ñihi xaan tyasí ra tan quihñ nyaa ra tsi ra tsi ndi. ⁸ Tan catyí ra tyin tun cuñi ndi ndacan ndi cuatyí tsaha ra, cuñi tsi tsa cahan jihna ndi tsihin un. Yacan nyehe maa un vityin. Janahma un tsi ra tan coto un tyin nditsa tsa caahán ndi —catyí ra Tértulo.

⁹ Tacan tan ra Israel tsa yucú ican, catyí ra naha tyin tandihí maa tsa caahán ra Tértulo tan nditsa. ¹⁰ Tacan tan ra Félix janahá ndaha ra nu nyaá ra Pablo tyin nacahan ra. Tan ra Pablo quitsahá caahán ra tan catyí ra:

—Sií xaan cuñi yu tyin nuu maa un cua cutuñi yu vityin tyin tsitó yu tyin tsa cuaha xaan cuiya ndacá ñaha un tsi nyivi iyó ñuu ihya. ¹¹ Tatun cua nducu tuhun un, cua coto un tyin tsa iyó ñi utsi uvi quivi tsa tsahan yu ñuu Jerusalén tsijacahnú yu tsi Nyoo. ¹² Tan ña cahan yuhu tahan yu tsihin ndi intuhun nyivi. Tan ndi ña jacuvaá yu tsi ñi tsitsi vehe ñuhu cahnu. Nduve maa náa javahá yu tandihí ca vehe ñuhu, tan ndi inga ca ityi tsitsi ñuu. ¹³ Tan cuatyí tsa tyaá ra ihya naha ra siqui yu, ña nditsa. Tyin tandihí maa tsa caahán ra tan ñavin tsa nditsa cuví tsi. ¹⁴ Maa tyin tsa cua catyí yu tsihin un cuví tsehe: tyin yuhu jacahnú yu tsi Nyoo. Juvín ra tsa jacahnú tsi tsaahnu yu. Tan jacahnú yu tsi ra tumaa cuhva jacuahá ra Jesucristo. Tan ra ihya naha ra catyí ra naha tyin ña nditsa. Maa tyin yuhu tsitó yu tyin tsa nditsa cuví tsi. Tyin tandihí tsa nyaá nu libru ley tsa tyaá ra Moisés, tan tsinú iñi yu. Tan tandihí tsa tyaá ra cuví ndusu yuhu Nyoo tan tsinú iñi yu. ¹⁵ Tan tsinú iñi yu tumaa tsa tsinú iñi ra ihya naha ra tyin nyivi tsa tsihí cua nandoto ñi inga tsaha, tahan ñi nyivi vaha tan nyivi caquiñi. ¹⁶ Tan yacan tacan ñi nducú yu cuhva tsa javaha yu tsa vaha nuu Nyoo, tan nuu nyivi.

¹⁷ Tan tsa yaha juhva cuiya tsa tsica yu tandihí ñi ityi, tsahan tsaá nuhu yu nda Israel ñuu yu tyin nacuhva cuenda yu xuhun tsa tsahá nyivi tsi yu tsi nyivi ndaahvi tsa yihí cuenda ra Cristo ñuu Jerusalén. Tan iyó tucu tsa cua jamañi yu tsi Nyoo. ¹⁸ Yacan javahá yu tsitsi vehe ñuhu cahnu. Tan tsa yaha

tsa janduvahā yu tsi yu tumaa catyí ley ndi, tan juhva ra Israel ra tsa quee ityi Asia, nyehe ra naha tsi yu ndacan. Maa tyin nduve nyivi cuaha yucú, tan nduve náa javahā ñi. ¹⁹ Tan ra tsa nyehe tsi yu ndacan naha ra, taahán tsi tsa quitsi maa ra naha cahan ra naha náa cuví tsa javahā yu o náa cuatyí tyaá ra naha siquí yu. ²⁰ Tatun ña tacan, na catyí tuhun ra tsa nyecú ihya naha ra tatun náa iin cuatyí yu nañihí ra naha quiví janahmā ra cuví ityi nuu tsihin nyivi Israel naha ra tsi yu. ²¹ ¿A ñavin cuenda tsatyin cahan yu iin tuhun tsihin ra tsa yucú junta can? Tan catyí yu: “¿A tatsí tuñi ndo tsi yu tsa cuenda tyin tsinú iñi yu tsa nandoto nyivi tsa tsihi?” —catyí ra Pablo.

²² Tan tsa tsiñj ra Félix tsa cahan ra tacan, tan catyí ra tsihin ra tsa nyecú can:

—Ña cua jandaa naha yu tyiñu ndo vityin. Ndaha ñi nda quitsi ra comandante Lisias tan cua jandaa yu tuhun ihya —catyí ra.

Cahan ra tacan tyin tsitó ra nácaa cuahán tuhun nyivi nyicún tsi ra Cristo.

²³ Tacan tan tava tyiñu ra Félix tsi ra capitán na tinyii nyico ra tsi ra Pablo vehe caa. Maa tyin ña ñihi xaan cua jaha cuenda ra tsi ra. Tan na cuhva ra ndatu na cuhun ra vaha iñi tsi ra nu nyii ra, tan cahan ra naha tsihin ra.

²⁴ Tsa yahā juhva quiví tan tsaā nyico ra Félix inga tsaha tsihin ña Drusila ñasihi ra. Tan ñaha Israel cuví ña. Tan tava tyiñu ra na quitsi ra Pablo tyin cuñí ñi tyaá soho ñi nácaa tuhun tsa tsinú iñi ra tsi ra Jesucristo. ²⁵ Tan ra Pablo quitsahā caahán ra tuhun nácaa taahán tsi javaha yo tsa vaha cuhva cuñí Nyoo, tan ña cuví javaha yo tsa ña vaha tsa cuñí cuñu ñuhu yo. Tan coo quiví cua tatsi tuñi Nyoo tsi tandihí nyivi. Tan ra Félix nayuhvī xaan ra, tan catyí ra tsihin ra:

—Cuaahan vityin. Tan na nuña jihna yu, tan cana maa yu tsi un inga tsaha —catyí ra tsihin ra.

²⁶ Tan ra Félix cuñí maa ra tyin ra Pablo cua cuhva ra xuhun tsi ra, tyin tacan tan tava ra tsi ra vehe caa. Yacan cuenda cuaha tsaha caná ra tsi ra, tyin natuhun ra tsihin ra. ²⁷ Tan tsa yahā uvi cuiya, tacan tan nacosō tyiñu tsi ra Porcio Festo tyin cundaca ñaha ra. Tyin tsa quitā ra Félix. Tan ra Félix ña cuñí ra tsa cahan nyivi Israel tsi ra, yacan cuenda nacoō ra tsi ra Pablo vehe caa.

25

Nu jandaá ra Festo cuatyí ra Pablo

¹ Tan tsa quihvī ra Festo tsa cua jaha tyiñu ra, tacan tan tsa tsinu uñi quiví quitā ra ñuu Cesarea can tan cuahán ra nda ñuu Jerusalén. ² Tan tsa tsaā ra ñuu Jerusalén, tacan tan tsaā ra jutu tsa cuví ityi nuu, tan ra cumí tyiñu tsa yihí ndaha tsi nyivi Israel. Tan tsican ra naha cuatyí tsaha ra Pablo. ³ Tan tsican ra naha tumañi iñi cahnū tsi ra Festo. Tan catyí ra naha tyin na tava tyiñu ra Festo na quitsi nyico ra Pablo nda ñuu Jerusalén. Tyin ra ican naha ra cua tava tyiñu ra naha na cucahñi ra naha tsi ra Pablo ityi cua quitsi ra. ⁴ Maa tyin ra Festo nacahan ra, tan catyí ra:

—Ra Pablo nyii ra vehe caa nda ñuu Cesarea. Tan yuhu tyaá yu cuhva tsa yatyí ñi cua cunuho nyico yu. ⁵ Yacan cuenda, nyooho tsa cuví ndo ra cumí tyiñu ñuu ihya, cuví cahun ndo tsihin yu, tan ndacan ndo cuatyí tsaha ra tatun iyó tsa ña vaha javahā ra —catyí ra Festo tsihin ra naha.

⁶ Tacan tan ra Festo ndoō ra ñuu Jerusalén una quiví o utsi quiví ñi tan cuanuhū nyico ra nda ñuu Cesarea. Tan tsa inga quiví tsaā ra tsitsi vehe

tyiñu ra tan tsinyaḡ ra tsa cua tatsi tuñi ra tsi ra iyó cuatyi naha ra. Tacan tan tava tyiñu ra na quitsi ra Pablo. ⁷ Cuhva tsa quihvi ra Pablo, nu yucú ra naha natuhva ra Israel tsa queeḡ nda ñuu Jerusalén, tan quitsahaḡ tyaá ra naha cuatyi cahnu siqui ra. Maa tyin nduve tsandaa tavaḡ ra naha. ⁸ Tacan tan cahān ra Pablo tan catyí ra:

—Yuhu ndi intuhun cuatyi ñaha ca javaha yu, ndi siqui ley nyivi Israel, ndi siqui vehe ñuhu cahnu ñuu Jerusalén, ndi siqui ra cuví rey cahnu tsa nyaá ñuu Roma —catyí ra.

⁹ Maa tyin ra Festo cuñi ra coo vaha ra tsihin ra Israel naha ra, yacan cuenda tsicaḡ tuhun ra tsi ra Pablo:

—¿A cuñi un cuhun un ñuu Jerusalén tyin jandaa yu tyiñu un ndacan? —catyí ra tsihin ra.

¹⁰ Tan ra Pablo nacahaḡn ra tan catyí ra:

—Tsa nyaá yu nu maa un. Tan maa un cuví ra cumí tyiñu cuenda rey cahnu tsa nyaá ñuu Roma. Ihya cuví nu taahán tsi tsa cutuñi yu tyin ra ñuu Roma cuví yu. Tan tsitó vaha un tyin nduve náa javahaḡ yu tsi nyivi Israel. ¹¹ Tun tsatyin javahaḡ yu iin cuatyi cahnu tsa taahán tsi cúu yu, ña cua nducu yu cuhva cacu yu. Maa tyin ña nditsa maa tuhun tsa caahán ra ihya naha ra. Ndi nyooho tan ndi intuhun nyivi nduve ndatu tsi ndo tsa nacuhva cuenda ndo tsi yu tsi ra ihya naha ra. Tan yacan tsicán yu tsi un tyin na tatsi tuñi ra cuví rey cahnu tsi yu —catyí ra Pablo tsihin ra Festo.

¹² Tacan tan ra Festo, tsa yahaḡ tsa natuhun tahan ra tsihin ra jatyinyeé tsi ra tsihin tyiñu, tan catyí ra tsihin ra Pablo:

—Tsicán un tsa cutuñi un nuu rey cahnu. Vaha. Cua cuhun un nuu maa ra —catyí ra tsihin ra.

Nu nacatyi tuhun ra Festo tuhun ra Pablo tsihin ra Agripa

¹³ Tsa yahaḡ juhva quivi, tan cuahán ra Agripa, ra cuví rey cuenda nyivi Israel nda ñuu Cesarea. Cuahán ra tsihin ña Berenice nu nyii ra Festo tyin cua cuhva ñi nacumi tsi ra. ¹⁴ Tan ndoo ñi ican juhva quivi, tan ra Festo catyí tuhun ra tsihin ra cuví rey can tuhun ra Pablo. Tan catyí ra:

—Ra Félix nacoḡ ra tsi iin ra vehe caa ihya. ¹⁵ Tan tsa tsahaḡn yu ñuu Jerusalén, ra jutu tsa cuví ityi nuu, tan ra cuví mandoñi nyivi Israel, tsicān ra naha cuatyi tsaha ra can nuu yu tyin na cuhva yu ndatu tsa cúu ra. ¹⁶ Tan yuhu catyí yu tsihin tandihí ra naha tyin ña tuhvaḡ ra cumí tyiñu cuenda ñuu Roma cahñi tsi ndi intuhun nyivi tatun ñaha ca natuhun tahan ñi tsihin ra tsa tsicán cuatyi tsaha ñi, tan nducu ñi cuhva jacacu ñi tsi ñi. ¹⁷ Yacan cuenda, tsa quitsj ra cuví ityi nuu tsihin nyivi Israel can naha ra ihya, ña ndatuḡ yu. Tan juvin ñi inga quivi can tan tsahaḡn yu vehe tyiñu. Tan tsa yahaḡ tsicunyaḡ yu tan canḡ yu tsi ra can. ¹⁸ Maa tyin ra tyaá cuatyi siqui ra, nduve náa tuhun ñiñi cahān ra naha. Tsa cuñi maa yu tyin cahnu cuatyi cua tyaa ra naha siqui ra. ¹⁹ Maa tyin tuhun tsa cahān ra naha cuví tsa cuenda cuhva iyó maa ra naha cuhva tsinú iñi ra naha. Tan cahān ra naha tuhun ra tsa nañi Jesús. Tan catyí ra naha tyin tsa tsihiḡ ra. Maa tyin ra Pablo catyí ra tyin nyito ra. ²⁰ Tan tsa ña ñihí yu nácaa tatsi tuñi yu tsi ra tsa cuenda tuhun can, tsicaḡ tuhun yu tsi ra tan catyí yu tsihin ra tatun cuñi ra cuhun ra cutuñi ra nda ñuu Jerusalén. ²¹ Maa tyin catyí ra tyin vaha ca tatun cutuñi ra nuu ra Augusto nda ñuu Roma. Yacan cuenda tavaḡ tyiñu yu na cunyií ra juhva ca quivi tsitsi vehe caa, nda cuanda cuví jacuhun yu tsi ra nuu ra Augusto —catyí ra Festo tsihin ra Agripa.

²² Tacan tan ra Agripa catyí ra tsihin ra Festo:

—Cuñí tucu yuhu tyaa soho yu tsa caahán ra can —catyí ra.

Tan ra Festo catyí ra tsihin ra:

—Tyaan cua tyaa soho un tsa caahán ra —catyí ra tsihin ra.

²³ Tsa inga quiví can tan tsaá ra Agripa tsihin ña Berenice. Iyo xaan caá ñi quihví ñi tsitsi vehe, tyin rey cuví ñi. Tan quihví ndihí tucu ra comandante tan ra cumí tyiñu ñuu can naha ra. Tacan tan ra Festo tava tyiñu ra na cuquihin ra naha tsi ra Pablo. ²⁴ Tacan tan quitsahá catyí ra Festo:

—Yooho Rey Agripa, tan nyooho tata, tsa yucú ndo ihya. Nyehé ndo tsi ra ihya. Tandihí ra Israel ñuu Jerusalén tan ñuu Cesarea caahán ra naha tyin iyó cuatyí ra. Tan ña jandihí ra naha tsa catyí ra naha tsihin yu tyin taahán tsi cúu ra. ²⁵ Maa tyin tsa cuenda yuhu, nduve cuatyí ra tsa taahán tsi cúu ra. Tan juvin ñi maa ra tsicán tsa cutuñi ra nuu ra Augusto. Yacan cuenda cua jacuhun yu tsi ra ndacan. ²⁶ Maa tyin nduve náa cuatyí ra nañihí yu, yacan cuenda ña ñihí yu tuhun tyaa yu nu carta tsa cua jacuhun yu tsi ra ndacá ñaha tsi yo. Yacan cuenda tava yu tsi ra nuu ndo, tan nuu yooho Rey Agripa, tyin tacan tan ndaca tuhun un tsi ra tan coto yu náa taahán tsi jacoto yu tsi ra rey cahnu. ²⁷ Tyin ña vaha tsa jacuhún yu tsi ra tatun nduve náa tuhun caahán yu náa cuatyí javahá ra.

26

Nu quitsahá caahán ra Pablo nuu ra rey Agripa

¹ Tacan tan ra Agripa catyí ra tsihin ra Pablo:

—Cuví cahan un vityin —catyí ra tsihin ra.

Tan ra Pablo jandaá ra ndaha ra tan catyí ra tyehen:

²—Sii xaan cuñí yu tyin cuví cahan yu nuu yooho, rey Agripa, tan cuví catyí yu tsihin un nácaa tandihí cuatyí tsa tyaá ra Israel naha ra síqui yu. ³ Tyin yooho tsitó un tandihí tuhun tsa iyó yo tsa cuví yo nyívi Israel. Tan tsitó un tuhun tuhvá yo caahán yuhu tahan. Yacan cuenda tsicán yu tsi un tyin tyaa soho vaha un tsa cua cahan yu.

Nu catyí tuhun ra Pablo tsihin ra Agripa nácaa ñayivi tsicoo ra tsa ndi cumañi ca quihvi ra cuenda ra Cristo

⁴ Tandihí nyívi Israel tsitó ñi nácaa tsicoo yu nda ñuu yu quiví tsa ndi luhlu yu. Tan tsitó tucu ñi nácaa tsicoo yu nda ñuu Jerusalén. ⁵ Cuaha xaan cuiya nacotó ñi tsi yu. Tatun cua cuhva cuenda ñi cua catyí ñi tyin fariseo cuví yu nda ndi luhlu yu. Tan ra fariseo cuví ra tsa vaha xaan tyaá yahvi ley tsahnu yo tan ñavin ca tandihí nyívi. ⁶ Tan vityin cuñí nyívi Israel tatsi tuñi ñi tsi yu tsa cuenda tyin tsinú iñi yu tsa cua janandoto Nyoo tsi nyívi tsa tsihí, tumaa catyí ra tsihin tsii tsaahnu yo naha ra tahan tsanaha. ⁷ Tandihí nyívi tsa cuví tata tsa utsi uvi taahan sehe ra Israel ndatú tucu ñi nyehe ñi nu cua janandoto Nyoo tsi nyívi tsa tsihí. Tan yacan cuenda ña jandihí ñi tsa javahá ñi tyiñu nuu Nyoo. Nduvi tan ñiñu jacahnú ñi tsi ra. Tan tsa cuenda tuhun ihya, tyaá ra Israel naha ra cuatyí síqui yu vityin, yooho rey Agripa. ⁸ ¿A ña tsinú iñi nyooho tyin Nyoo cua janandoto ra tsi nyívi tsa tsa tsihí?

Nu tsahá cuenda ra Pablo tsi ra Agripa cuhva tsinyaq ndaha ra tsi nyívi yihí cuenda ra Cristo

⁹ Tahan tsanaha juvin ñi maa yu tsicá iñi yu tyin vaha tsa tatsi tuñi yu tsi nyívi tsinú iñi tsi ra Jesús, ra ñuu Nazaret. ¹⁰ Tan tacan javahá yu nda ñuu

Jerusalén tsihin ndatu tsa tsahá ra jutu tsa cuví ityi nuu naha ra. Tan cuaha nyívi tsa tsínú íñi tsi ra Cristo tyihí yu vehe caa. Tan tatun tsahñí ra naha tsi ñi, vaha xaan cuñí yu. ¹¹ Tan cuaha xaan tundoho nyehe ñi jahá yu. Tan nducu yu cuhva jañíñi yu tsi ñi na jaña ñi tuhun tsa tsínú íñi ñi tsi ra Jesús. Tacan javahá yu tandihí maa vehe ñuhu nyívi Israel. Javahá yu tacan tsa cuenda tsa xaan cuñí yu nyehé yu tsi ñi. Tan tandihí inga ñuu tsahan yu tsinyaá ndaha yu tsi ñi.

Nu nacatyí tuhun nyico ra Pablo nácaa nanduví ra, ra yihí cuenda ra Cristo (Hechos 9.1-19; 22.6-16)

¹² Tan tsa cuenda yacan cuahán yu nda ñuu Damasco quívi can tyin tsahá ra jutu tsa cuví ityi nuu naha ra ndatu tsi yu. ¹³ Maa tyin ityi cuahán yu cuhva ora cuví tsi, yooho Rey. Tan quítsi ñuhú ityi síqui. Tan jandunditsin tsi nu cuahán yu tsihin tandihí ra tsa cuahán tsihin yu. Maa tyin yaha ca nditsin tsi tan ñavin ca ñuhú ñicanyii. ¹⁴ Tacan tan tandihí ndi nduvá ndi nu ñuhu. Tan tsiñi yu iin ndusu tsa caahán tsihin yu, tsihin yuhu yo, tan catyí tsi tsihin yu: “Saulo, Saulo, ¿nacuenta nyaá ndaha un tsi yu? Tumaa iin quíti tsañi nyaa ti tsata tsa xaan tsa jaquihín ityi ra tsi ti, tacan javahá un tyin juvin ñi tsi maa un jañicueehé un”, catyí ndusu can tsihin yu. ¹⁵ Tacan tan catyí yu: “¿Yóo yooho cuví un taa?” Tan Jutu Mañi yo catyí ra tsihin yu: “Yuhu cuví ra Jesús, juvin ra tsa nyaá ndaha un. ¹⁶ Nduvita nyityi. Tyin quituví yu nuu un ihya tyin tacan tan cua jaha tyiñu un nuu yu, tan cua cuví un tsandaa tsa cuenda tsa nyehé un ihya tan tsa cuenda tsa cua nyehe un ityi nuu ca. ¹⁷ Yacan cuenda vityin jacuhún yu tsi un nu iyó nyívi tsa ñavin nyívi Israel cuví tan juvin ñi maa yu cua jacacu yu tsi un ndaha ra Israel naha ra, tan ndaha nyívi tsa ñavin nyívi Israel cuví. ¹⁸ Tan yacan jacuhún yu tsi un tyin nuña un nuu ñi, tan ña caca ca ñi nu naa, tyin cua caca ñi nu nditsin. Tan cua quita ñi ndaha nu ña vaha. Tyin cua tsinu íñi ñi tsi yu tan yuhu cua jaha yu tucáñnu íñi cuatyí ñi. Tan cua naquihin ndihí tucu ñi tsa vaha tsa tsahá Nyoo tsi nyívi tsa nacuhvá cuenda tsi ñi tsi yu”, catyí Jutu Mañi yo tsihin yu.

¹⁹ Yacan cuenda yooho rey Agripa, javahá yu tsa catyí Jutu Mañi yo ra Jesucristo tsihin yu nu janahá ra tsi ra tsi yu. ²⁰ Tacan tan tsa jihna ñi quítsahá caahán yu tuhun ra nda ñuu Damasco. Yahá can tan cahán yu tsihin nyívi ñuu Jerusalén tan tandihí ca ñuu tsa cayucú Judea. Tan caahán ndihí yu tsihin nyívi tsa ñavin nyívi Israel cuví. Tan catyí yu tsihin ñi tyin na ndu uvi íñi ñi cuatyí ñi, tan na tyaa yahví ñi tsi Nyoo na javaha ñi tsa vaha tumaa javahá nyívi tsa tsínú íñi tsi ra Cristo. ²¹ Tan tsa cuenda tuhun ihya tñin ra Israel naha ra tsi yu tsitsi vehe ñuhu cahnu. Tan cuñi ra naha cahñi ra naha tsi yu. ²² Maa tyin maa Nyoo jatynyeé xaan ra tsi yu. Tan iyó ca yu nda vityin. Tan caahán yu tuhun Nyoo tsihin tandihí nyívi, ñi ndaahvi tan ñi cuca. Tan ña caahán yu inga tuhun, tyin tsa catyí ra Moisés tan ra cuví ndusu yuhu Nyoo tyin cua cuví nu cuahán ca tsi, yacan caahán yu. ²³ Tyin catyí ra naha tyin taahán tsi tsa cua nyehe ra Cristo tundoho. Tan tsa yahá tsa cúu ra, cua nandoto ra. Tan jihna ca ra can cua nandoto. Tan cua jandunditsin ra añima nyívi tyin cua jacoto ra nácaa cua cacu ñi, tahan ñi nyívi Israel tan nyívi tsa ñavin nyívi Israel cuví —catyí ra Pablo.

Nu nducú ra Pablo cuhva tsa tsinu íñi ra rey Agripa tsi ra Cristo

²⁴ Cuhva tsa catyí ra Pablo tuhun ihya, ra Festo caná tsaa ra, tan catyí ra: —jiñi yooho ña vaha cuñí, Pablo!, tsa cuenda tsa cuaha xaan cahví un tan ndusaná íñi un —catyí ra Festo tsihin ra.

²⁵ Maa tyin ra Pablo catyí ra tsihin ra:

—Ñavin iñi yu ña vaha cuñí, yooho tata Festo. Tyin tsa caahán yu, maa ñi tsa nditsa tan tsa vaha cuví tsi. ²⁶ Ihya nyaá ra rey Agripa. Tan tsitó vaha ra tuhun ihya. Yacan cuenda ña yí caahán yu tuhun yu tsihin ndo. Tyin tsitó yu tyin tsitó tucu maa ra tuhun ihya, tyin ñavin tuhun xeehe cuví tsi. ²⁷ Yooho rey Agripa, ¿a tsinú iñi un tuhun tsa tyaá ra cuví ndusu yuhu Nyoo tahañ tsanaha? Yuhu tsitó yu tyin tsinú iñi un —catyí ra Pablo tsihin ra Agripa.

²⁸ Tacan tan ra Agripa catyí ra tsihin ra:

—¿A cuñí yooho tsa natsinu iñi yu tsa caahán un tan quihvi yu cuenda ra Jesús? —catyí ra rey Agripa tsihin ra Pablo.

²⁹ Tacan tan ra Pablo catyí ra:

—Na cuhva Nyoo tsa tsinu iñi un, a vityin a ndi cucuee ca. Maa tyin ñavin yooho ñi, tyin na tsinu ndihi tucu iñi tandihi nyivi tsa yucú tyaá soho tsa caahán yu ihya. Intuhun ñi tsa ña cuñí yu, tsa quihí cadena ndaha ndo tumaa maa yu vityin —catyí ra Pablo.

³⁰ Tsa yaha tsa cahan ra Pablo tuhun ihya, nduvita rey tan ra ndacá ñaha tan ña Berenice, tan tandihi ra yucú ican naha ra. ³¹ Tan tsa yaha quita ñi, tan quitsaha natuhún tahan ñi:

—Nduve cuatyí ra ihya tsa ñihi xaan. Ña taahán tsi cúu ra. Tan ndi ña taahán tsi cunyií ca ra vehe caa —catyí ñi.

³² Tan ra Agripa catyí ra tsihin ra Festo:

—Cuví jaña yo tsi ra, tun tsatyin ña tsicān ra tsa cutuñi ra nuu ra cuví rey cahnu —catyí ra.

27

Nu jacuhun ra Festo tsi ra Pablo nda ñuu Roma

¹ Quivi tsa tyaá ra Festo tan ra Agripa cuhva tyin jacuhun ra naha tsi ndi nda ñuu Roma tsa canyií Italia, nacuhva cuenda ra naha tsi ra Pablo tan tsi juhva ra tsa iyó cuatyí naha ra tsi iin ra capitán tsa nañi Julio. Yihí ra batallón andaru, tsa nañi Cuenda Ra Augusto. ² Tan cuahán ndihi tucu ra Aristarco tsihin ndi. Ra tsa quee ñuu Tesalónica tsa canyií ityi Macedonia cuví ra. Tacan tan quihvi ndi tsitsi iin yutun ndoo tsa quee ñuu Adramitio tyin tsa yatyin cuii cahun nyico tsi ñuu tsa cayucú Asia yatyin ñi yuhu ndutya ñuhu. ³ Tsa inga quivi tsaā ndi puerto Sidón. Tan ra Julio vaha nyivi cuví ra tsihin ra Pablo. Tan tsaā ra tsa cahun ra Pablo nu iyó ra vaha iñi tsi ra ñuu can tan jatinyee ra naha tsi ra. ⁴ Yaha can tan quita ndi ñuu Sidón tan jandaā ra naha jahma tsa nyisó yutun ndoo can tan tsihin tsa tandahñi tatyí jahma can tan cuahán ndi. Tan ñihi xaan yihí tatyí ityi nu cuahán ndi. Yacan cuenda yaha tsiyo ndi ityi xiin cuaha ñuhu Chipre, tyin ña ñihi xaan yihí tatyí ityi can. ⁵ Tacan tan yaha sava ndi nu ndutya ñuhu ityi nuu Cilicia tan Panfilia, tan tsaā ndi iin ñuu tsa nañi Mira tsa canyií Licia. Tan quita ndi tsitsi yutun ndoo can.

⁶ Tan ican nañihí ra capitán cuenda andaru inga yutun ndoo tsa quee nda ñuu Alejandría tan cua cahun tsi nda Italia. Tan catyí ra capitán can na quihvi ndi tsitsi yutun ndoo can tyin tsa cua cahun ndi nda nu cuahán ndi. ⁷ Cuaha quivi tsicā ndi tyin cuee ñi cuahán ndi. Tsihin tundoho tan tsaā ndi yatyin ñi ñuu Gnido. Tan tsa cuenda tsa ñihi xaan yihí tatyí tsa vatsí ityi tyisó ñicanyii, ña tsaā tsi tsa cahun ca ndi ityi nuu, tan yaha ndi yatyin ñi ñuu Salmón tsa canyií ñuhu Creta. Tan navico ndi ityi yuhu ñuhu Creta. ⁸ Nducū ndi cuhva tsa

cuhun ndi yuhu ndutya ñuhu, maa tyin tsihin tundoho tan tsaá ndi nu nañi Buenos Puertos yatyin ñi ñuu Lasea.

⁹Tsa cuaha xaan quivi yaha tyin cuee xaan tsicá ndi tsa cuenda tatyí tan ica xaan nanduví tsa yaha ndi nu ndutya ñuhu. Tyin tsa yaha quivi vico nu iyó nyitya nyivi Israel. Tan tsa cua cuyatyin yoo vitsin. Yacan cuenda ra Pablo tsaḥa cuenda ra tsi ra jacacá yutun ndoo can naha ra, ¹⁰tan catyí ra:

—Tandihí nyooho ra yucú ihya, tyaá soho ndo tuhun tsa cua cahan yu. Nyehé yu tyin ica xaan cuhva cuahán yo. Tan tuví ñi yu tyin cua cunaa yutun ndoo tsihin tandihí tsa nyisó tsi, tan nda cuanda maa yo cuví cunaa yo. Vaha ca tatun ndoo yo ihya —catyí ra tsihin ra naha.

¹¹Maa tyin ra capitán cuenda andaru can tyaá yahvi ca ra tsi ra jacacá yutun ndoo tan ra cuví tsitoho yutun ndoo tan ñavin ca tsi ra Pablo. ¹²Ña cuví yaha ndi yoo vitsin ican tyin ñihi xaan tuhvá tatyí yihí, tan ica xaan cuenda yutun ndoo. Yacan cuenda catyí tandihí ra naha:

—Vaha ca tsa quita yo ihya tan nducu yo cuhva cuhun yo nda ñuu Fenice tsa canyíi juvin ñi ñuhu Creta ihya. Yacan cuví iin nu vaha cunyaa yutun ndoo tyin ña ñihi xaan yihí tatyí tyin ñuu can canyíi tsi tsiyo cana ñicanyii —catyí ra naha.

Nu ñihi xaan yihí tatyí nu ndutya ñuhu

¹³Tacan tan quitsaha yihí luxu tatyí tsa quitsí ityi sur. Tan cuñí maa ra naha tyin vaha xaan tyin ñavin tatyí ñihi cuví tsi. Tyin tacan tan cuví cuhun ndi tsihin yutun ndoo yatyin ñi yuhu ñuhu Creta can. ¹⁴Ña cuaha ñi tsicá ndi tan quitsaha yihí tatyí xaan tsa quitsí ityi norte. Tan tandahá tsi yutun ndoo inga ityi. ¹⁵Tan ña cuví ca cuhun ndi ityi nuu ca tsa cuenda tatyí can. Tan jañá ndaha ndi na cuhun maa yutun ndoo tsihin tatyí ndáa ityi cuñí maa tsi. ¹⁶Tan yaha ndi ityi tsata iin ñuhu luhlu tsa nañi Clauda tyin ña ñihi xaan yihí tatyí ityi can. Tan tsihin tundoho naquihín ndi yutun ndoo luhlu tsa ixtá caa yutun ndoo, tan natyihí ndi tsa luhlu can ityi tsitsi yutun ndoo cahnu coto nyee tsi tsitsi ndutya. ¹⁷Tan tsa yaha natyihí ra naha yutun ndoo luhlu can, tacan tan sutyá ra naha xuu yutun ndoo cahnu tan tsañi ra naha yutun ndoo can tsihin taahan yoho tyin coo tunyee ñi itsi. Tan yuuhví ra naha coto tahan ra naha nu yaxin ndutya tan vicun yutun ndoo can tsitsi nyiti vita iyó yuhu ndutya ñuhu nu nañi tsí Sirte. Yacan cuenda januu ra naha jahma yutun ndoo can tan tsaḥa ra naha tsa cuhun tsi cuhva tandahá tatyí. ¹⁸Tan tsa inga quivi juvin ñi ñihi xaan yihí tatyí. Yacan cuenda quitsaha tyihí ra naha carga tsa yihí tsitsi yutun ndoo can nuu ndutya ñuhu. ¹⁹Tan tsa tsinu uñi quivi quihín ndi ndaha tyiñu yutun ndoo can tan tyihí ndi nu ndutya ñuhu. ²⁰Tan cuaha quivi ña nyehé ndi ñicanyii tan ndi tiñuu. Tan ñihi xaan tandahá tatyí tsi ndi. Yacan cuenda ña tyaá ca ndi cuhva tsa cua cacu ndi.

²¹Cuaha quivi yaha tan ña tsatsí ndi. Tacan tan catyí ra Pablo tsihin tandihí ra naha:

—Nyehé ndo, vaha ca tun tsatyin tyaá yahvi ndo tuhun tsa cahan yu quivi can, tan ndoo yo ñuhu Creta. Tan vityin cuaha xaan tundoho nyehé yo tan cuaha xaan ndaha tyiñu jacunaá yo. ²²Tan cua cunaa ndihí yutun ndoo ihya, maa tyin ña caca ñi ndo tyin ndi intuhun yo tan ña cua cúu yo. ²³Tyin Nyoo cuví ra yihí ndaha tsi yu, tan jahatyíñu yu tyiñu ra, juvin ra janaha ra iin tsa janaha tsi yu cuñi. Tan quituví iin ángel nuu yu. ²⁴Tan catyí ángel can tsihin yu: “Ña nayuhvi un, Pablo. Tyin cuñí tsi tsa cahan un tuhun Nyoo nuu ra rey

cahnu Augusto nda ñuu Roma. Tan tsa cuenda un cua jacacu Nyoo tandihí ra yucú tsihin un tsitsi yutun ndoo”, catyí ángel can tsihin yu. ²⁵ Yacan cuenda nyooho tsa yucú tsitsi yutun ndoo ihya jandu iin ndo ñi ndo. Tyin yuhu tsinú ñi yu tsi Nyoo. Tan tsitó vaha yu tyin cua cuvi tumaa cuhva catyí ángel can tsihin yu. ²⁶ Vasu cua nyee yutun ndoo ihya, maa tyin cua tsaá yo iin ñuhu luhlu —catyí ra Pablo tsihin tandihí ndi.

²⁷ Tan tsa ndihí tsahun quívi tsa tsicá ityi ndi. Iin tsacuaa yucú ndi nu ndutya ñuhu Adria. Tan tsata can tsata ihya tandahá tatyí yutun ndoo ndi nu ndutya ñuhu. Tan maa ñuu cuví cuhva can tan tuví ñi ra jacacá yutun ndoo can naha ra tyin cua tsaá ndi iin ñuhu. ²⁸ Tacan tan tyihí cuhva ra naha cuhva cunu yihí ndutya. Tan nyehe ra naha tyin oco tsahun iin taahan metru iyó. Cuahán ndi luxu ca ityi nuu ca. Tan tyihí cuhva ra naha inga tsaha. Tan iyó oco utsa metru. ²⁹ Tan yuuhví ra naha coto ñaí yutun ndoo can tsata yuu. Yacan cuenda januu ra naha cumi taahan caa vee tsa iyó cantsu nuu ityi tsata yutun ndoo tyin na ña cahun ca tsi ityi nuu. Tan tsa cuñí ra naha tsa cunditsin. ³⁰ Tan ra jacacá yutun ndoo can naha ra tyaá ra naha cuhva cunu xeehe ra naha. Tan yacan cuenda quitsahá januu ra naha yutun ndoo luhlu can nu ndutya ityi nuu yutun ndoo can. Tan jahá ñi maa ra naha tyin inga caa cua januu ra naha. ³¹ Maa tyin ra Pablo jacotó ra tsi ra capitán tan tsi andaru tan catyí ra:

—Tatun ña cua ndoo ra can naha ra tsitsi yutun ndoo, nyooho ña cua cuvi cacu ndo —catyí ra tsihin ra naha.

³² Tacan tan andaru tsahnyá ra naha yoho yutun ndoo luhlu can. Tan jacanacava ra naha can nu ndutya. ³³ Tan tsa naa ca ra Pablo catyí ra tsihin tandihí ra naha:

—Tsa iyó utsi cumi quívi tsa ña tsatsi ndo tan ña quixí ndo. ³⁴ Catyí yu tsihin ndo, çatsi ndo vityin. Ñiñi xaan cuñí tsi tsa catsi yo tyin tacan tan ndunyeey cuñu ñuhu yo. Tyin cua cacu yo tan ndi intuhun ixí jiñi yo tan ña cua cunaa.

³⁵ Tan tsa catyí ra Pablo tuhun ihya, quihín ra iin paan tan nacuhvá ra tyahví nyoo tsi Nyoo nuu tandihí ra naha. Tacan tan tahví ra tan quitsahá tsatsí ra. ³⁶ Tacan tan tandihí ra naha ndu iin ca ñi ra naha tan tsatsí ndihí ra naha. ³⁷ Tan tsa tandihí ndi tsa yucú ndi tsitsi yutun ndoo can, quita uvi cientu uñi xico tsahun iin ndi. ³⁸ Cuhva tsa ndihí tsatsj ra naha cuhva cuñí ra naha tan jacuhun ra naha yitin tsa yihí trigu nu ndutya ñuhu na nduyama ca yutun ndoo tyin tacan tan cua nandaa tsi nu ndutya tan cua tsaá tsi yatyin ñi yuhu ndutya.

Nu nyee yutun ndoo

³⁹ Yahá can tan cunditsin. Tan nyehe ra tsa jacacá yutun ndoo iin ñuhu, maa tyin ña nacotó ra naha nu maa cuví can. Nyehe ra naha iin nu iyó nyiti. Tan tyaá ra naha cuhva nyehe ra naha tatun cuví jacuhun ra naha yutun ndoo ícan. ⁴⁰ Tsahnyá ra naha yoho tsa nuuhñí caa vee can. Tan nacoó ra naha can tsitsi ndutya ñuhu. Tan jandutaya ra naha vitu tsa janavicó yutun ndoo. Tacan tan jandaá ra naha jahma tsa tuhvá ticaá ityi nuu tsi. Tan quitsahá quihín tatyí jahma can, tan jacuhún tsi yutun ndoo nda nu iyó nyiti can. ⁴¹ Tan tsaá tsi nu tatahán ndutya. Tan nyee jiñi tsi tsitsi nyiti. Tan ña cuví ca tava ra naha tsi. Tan ityi xuu tsi quitsahá tahví cuatyí can tsa cuenda tsa ñiñi xaan cañí ndutya ñuhu can. ⁴² Tacan tan andaru cuñí ra naha cahñi ra naha tsi ra cuahán cua cutuñi naha ra tyin coto cunu ra naha. ⁴³ Maa tyin capitán andaru cuñí ra jacacu ra tsi ra Pablo. Yacan cuenda ña tsahá ra tsa

cahñi ra naha tsi ra can naha ra. Tan catyi ra tyin ndáa ra tsitó sutya, na cuhun cuee ñi ra naha nu ndutya tan quita ra naha nda ñuhu ityi. ⁴⁴ Tan tandihí ca ra tsa ña cuví sutya, na cuhun ra naha nu vitu tsa nyisó yutun ndoo, tan juhva ra naha na cuhun ra naha tsihin vitu tsa tahvi cuatyí jahá ndutya ñuhu. Tan tacan cacú tandihí ndi tan quita ndi ñuhu ityi.

28

Nu nyii ra Pablo ñuhu Malta

¹ Cuhva tsa tsa yahá cacú ndi tan catyi nyivi iyó ñuhu can tyin nu yucú ndi can nañi tsi Malta, o Melita. ² Tan vaha xaan natuhún ñi tsihin ndi. Tan jatahan ñi ñuhu tyin cuún savi tan vitsin xaan. Tan catyi ñi tsihin tandihí ndi, na natuhva ndi yuhu ñuhu can tyin quita tsa vitsin tsi ndi. ³ Tacan tan ra Pablo naquihín ra juhva nducu ityi. Tan tsitsi tsa tyihí ra can nu ñuhu, quita iin coo tsitsi nducu can, tsa cuenda tsa ihñi. Tan tsatsí yihí ti ndaha ra, tan ticaá tsico ti ndaha ra. ⁴ Cuhva tsa nyehe nyivi ñuhu can tyin ticaá coo can ndaha ra, quitsahá natuhún tahan ñi tan catyi ñi:

—Ra ihya nyivi tsahñi ra, tun cuví, tyin vasu cacú ra nu ndutya ñuhu, maa tyin Nyoo ña tsahá ca ra tsa coo ra tsa cuenda cuatyí ra —catyi ñi.

⁵ Maa tyin ra Pablo naquisí ra tsi coo can, tan canacava ti nu ñuhu, tan nduve náa tahañ ra. ⁶ Tandihí ñi ndatú ñi náa cuhva ndaa nu tyaá ti, a náa cuhva cua cúu ra. Maa tyin tsa yahá ndatú xaan ñi, tan nyehe ñi tyin nduve maa náa tahañ ra. Tacan tan nasamañ ñi cuhva tsicá iñi ñi, tan quitsahá catyi ñi:

—Ra ihya cuví iin nyoo —catyi ñi.

⁷ Yatyin ñi can canyii ñuhu ra yihí ndaha ñuhu can. Tan nañi ra Publio. Tan vaha xaan caahán ra tsihin ndi. Tan vaha xaan tyanuu ra tsi ndi, tsa uñi quivi tsa yucú ndi vehe ra. ⁸ Tan jutu ra ñihi xaan cuuhví ra tsihin cahñi tan tsa tsiyó ra. Tan tsahañ ra Pablo tsinyehe ra nu canyii ra. Tan tsican tahvi ra tsa cuenda ra, tan tyiso ndaha ra jiñi ra. Tacan tan nduvahañ ra. ⁹ Yahá can tan quitsahá tsaá cuaha nyivi cuuhví tsa iyó ñuu can. Tan nduvahañ ndihí ñi. ¹⁰ Tan tandihí ñi vaha xaan tyanuu ñi tsi ndi. Tan quivi quihvi ndi tsitsi iin yutun ndoo tsa cua cuhun ndi, tsahá ñi tandihí tsa cua cutyiñu ndi ityi cuhun ndi.

Nu tsaq ra Pablo ñuu Roma

¹¹ Uñi yoo tsiyucú ndi ñuhu Malta can. Tacan tan quihvi ndi tsitsi iin yutun ndoo tsa quee nda ñuu Alejandría tsa canyii nu cuví Egipto. Tan ndoo tsi Malta nda yahá yoo vitsin. Tan jiñi yutun ndoo can nyecú tsa caá tumaa caá nyoo Cástor tan nyoo Pólux. ¹² Tan tsaq ndi ñuu Siracusa. Tan ican ndoo ndi uñi quivi. ¹³ Tacan tan quita ndi tan cuahán ndi ityi yuhu ndutya ñuhu nda cuanda tsaq ndi ñuu Regio. Tan tsa inga quivi can ñihi xaan yihí tatyí tsa quitsj ityi sur tan tsicá ndi uvi quivi tan tsaq ndi ñuu Puteoli. ¹⁴ Ican ñihí tahan ndi tsihin juhva ra hermano naha ra. Tan catyi ra naha tsihin ndi tyin ndoo ndi iin vitya tsihin ra naha. Yahá can tan cuahán ndi nda ñuu Roma. ¹⁵ Tan nyivi yihí cuenda ra Cristo ñuu Roma can ñihí tuhun ñi tyin cua tsa ndi. Tan tsahañ ñi tsijatahan ñi tsi ndi ityi. Juhva ñi ndatú tsi ndi Nuyahví Apio. Tan inga ñi ñihí tahan ñi tsihin ndi nda nu nañi Tres Tabernas. Tan tsa nyehe ra Pablo tsi ñi, nacuhvañ ra tyahvi nyoo tsi Nyoo. Tan ndu iin ca iñi ra. ¹⁶ Cuhva tsa tsaq ndi ñuu Roma can, ra capitán can nacuhvañ cuenda ra tsi ra iyó cuatyí

can naha ra tsi ra yihí ndaha vehe caa. Tan tsaḥa ra can tsa coo siin ra Pablo. Tan jahá cuenda intuhun ñi andaru tsi ra.

Nu caahán ra Pablo tuhun Nyoo ñuu Roma

¹⁷ Tsa yaha uñi quivi tsa tsaá ndi ican, tacan tan tava ra Pablo tyiñu na quitsi ra cuví ityi nuu tsihin nyivi Israel tsa iyó ñuu Roma can naha ra. Tan cuhva tsa ndu ijin ra naha, quitsaha catyi ra tsihin ra naha:

—Nyooho yañi, vasu nduve náa javaha yu tsi nyivi Israel tahan yo, tan ndi nduve náa javaha yu siqui tuhun tsaḥnu cuhva iyó yo, maa tyin tsaḥa cuenda ra Israel naha ra tsi yu tsi ra ñuu Roma naha ra. Tan tsinyi yu vehe caa ñuu Jerusalén ndaha ra ñuu Roma naha ra. ¹⁸ Tan tsa jaquee yuhu ra naha tsi yu, cuñi ra naha jaña ra naha tsi yu. Tyin ña taahán tsi cúu yu tyin nduve cuatyí javaha yu. ¹⁹ Maa tyin ra Israel tsa iyó nda ñuu Jerusalén naha ra nduxaan xaan ra naha tan yacan cuenda tsican yu tsa cutuñi yu nuu ra cuví rey cahnu. Vasu nduve cuatyí cua tyaa maa yu siqui ra naha. ²⁰ Yacan cuenda caná yu tsi nyooho tyin nacoto yu tsi ndo, tan catyi tuhun yu tsihin ndo tyin nuuhñi yu tsihin cadena vityin tsa cuenda tsa tsinú iñi yu tsi ra tsa ndatú xaan yo tsa cuví yo nyivi Israel —catyi ra Pablo.

²¹ Tacan tan catyi ra Israel naha ra tsihin ra Pablo:

—Ña tsitó ndi tuhun yooho. Tan yoñi jacoto tsi ndi, ndi tsihin carta, tan ndi ra ñuu yo tsa quee nda Judea ña caḥan ra naha tuhun yooho, tan nduve náa caḥan ra naha siqui un. ²² Maa tyin cuñi ndi tyaa soho ndi tuhun tsicá iñi un. Tyin tsitó ndi tyin tandihi ñi ityi tan caahán nyivi siqui tuhun tsa ihya —catyi ra Israel naha ra tsihin ra Pablo.

²³ Tacan tan natuhun tahan ra naha ndaa quivi cua cuhun ra naha inga tsaḥa. Tsa tsaá quivi can, tsaá cuaha nyivi nu iyó ra Pablo. Tan quitsaha caahán ra nda tsa tui tan nda cuanda tsacuaa nácaa ndacá ñaha Nyoo. Tan tsihin ley Nyoo tsa tyaa ra Moisés tan tuhun tsa tyaa ra cuví ndusu yuhu Nyoo tahan tsanaha, jacuahá ra tsi ñi tyin ra Jesús cuví ra tsa jacacú tsi yo. Tan tacan javaha ra Pablo tyin cuñi ra tsa tsinu iñi ñi tsi ra Jesús. ²⁴ Yihí ñi tsinú iñi ñi tsa caahán ra. Tan inga ñi ña tsinú iñi ñi. ²⁵ Tan ña iin tsicá iñi ñi, siin siin tuhun caahán ñi. Tan quitsaha tsinuhú ñi. Tan ra Pablo catyi ra tsihin ñi:

—Nditsa tsa caḥan Tatyí Ii Nyoo tsihin ra Isaías ra cuví ndusu yuhu ra tahan tsanaha, tyin na caḥan ra tsihin tsi saahnu yo. Tan catyi ra:

²⁶ Cuaahan tan caḥan un tyehen tsihin nyivi ihya:

Nyooho cua cuñi ndo tuhun Nyoo, maa tyin ña cua cutuñi iñi ndo. Cua nyehe ndo tsihin tinuu ndo tsa cua javaha Nyoo, maa tyin ña cua nacoto ndo tsa nyehe ndo.

²⁷ Tyin añima ñi tsa ndundava xaan tsi.

Tsiñi ñi, maa tyin ña tyaá yahvi ñi.

Tan ndasí tinuu ñi, tyin tacan tan ña cua cuví nyehe ñi.

Tan ña cua cuñi ñi tsihin soho ñi.

Tan ña cua cutuñi iñi ñi tsihin añima ñi.

Yacan cuenda ña cuñi ñi quihvi ñi tsitsi ndaha yu na janduvaha yu tsi ñi.

Tacan catyi ra Isaías jahá Tatyí Ii Nyoo tahan tsanaha.

²⁸ Coto vaha nyooho tyin vityin tan ityi nuu ca cuhun yu cua jacoto yu tsi nyivi tsa ñavin nyivi Israel cuví tyin jacacú Nyoo tsi ñi. Tan maa ñi cua tyaa soho ñi —catyi ra Pablo tsihin ñi.

²⁹ Cuhva tsa catyi ra Pablo tyehen, ra Israel cuahán ra naha juvin ñi caahán yuhu tahan ra naha tsa cuenda tuhun tsa caḥan ra Pablo tsihin ra naha.

³⁰ Uvi cuiya ndoo ra Pablo vehe nu nyí ra cuenda yoo ñuu Roma can. Tan vaha caahán ra tsihin tandihí nyivi cuahán vehe ra. ³¹ Tan tsihin tsa nñi ñni ra tan caahán ra tuhun nácaa ndacá ñaha Nyoo tsi yo. Tan jacuahá ra tuhun Jutu Mañi yo ra Jesucristo. Tan yoñi tyasí nu caahán ra.

Carta Tsa Jacuhun Ra Pablo Tsi Nyivi Yihi Cuenda Nyoo Ñuu Roma

Nu quitsahq̄ tyaa ra Pablo carta

¹ Yuhu ra Pablo cuví yu iin ra jahá tyiñu tyiñu ra Jesucristo. Canā Nyoo tsi yu, tan nacatsj ra tsi yu tyin caca yu jacoto yu tuhun tsa jacacú ra tsi yo tsi nyivi. ² Tan tuhun ihya cuví tsa cahān Nyoo tsihin ra cuví ndusu yuhu ra tahañ tsanaha tyin tyaa ra naha nu tutu ra. ³ Juvín tuhun ihya caahán tyin Jutu Mañi yo Jesucristo, Sehe Nyoo, quitsj ra nu ñuhu ñayivi tan nanduvj ra tumaa maa yo. Tan cuvj ra tata ra rey David. ⁴ Tan Nyoo jacoto ra tsi yo tsihin Tatyí Ii ra tyin Sehe ra cuví tsi ra tsa cuenda tsa janandoto ra tsi ra tsihin tunyee iñi tsa iyó tsi ra. ⁵ Tan tsa cuenda ra Jesucristo tsahā Nyoo tumañi iñi tsi ndi tsa caca ndi tyiñu ra, tyin na tsinu iñi nyivi iyó nanñi cahnu nu ñuhu ñayivi tsi ra tan na tyaa yahvi ñi tsi ra. ⁶ Tan juhva ñi ican cuví tucu nyooho tyin tsa nacatsj ra Jesucristo tsi ndo tyin cuví ndo nyivi cuenda ra.

⁷ Jaquitsí yu carta ihya tsi tandihí nyooho tsa iyó ñuu Roma. Nyoo cuñí xaan ra tsi ndo tan canā ra tsi ndo tyin cuví ndo nyivi ra tan jacahnu ndo tsi ra. Naquihin ndo tsa vaha tan na coo tsa taxin añima ndo jahá Jutu yo Nyoo tan Jutu Mañi yo Jesucristo.

Nu catyí ra Pablo tyin cuñí ra cuhun ra ñuu Roma

⁸ Tsa jihna ñi, tsahá yu tyahvi nyoo tsi Nyoo tsihin sivi ra Jesucristo tsa cuenda tandihí nyooho tyin tandihí ñi ityi caahán nyivi tyin tsinú xaan iñi ndo tsi ra Jesucristo. ⁹ Jahá tyiñu yu tyiñu Nyoo tsihin tsa ñi iñi añima yu. Tan caahán yu tsihin nyivi nácaa jacacú Sehe ra tsi yo. Tsandaa cuví maa Nyoo tyin tsa tsicán tahvi yu tsi ra, tsicán tahvi yu tsa cuenda ndo. ¹⁰ Tan tsicán yu tsi ra na cuví cuhva cuñí ra, tan quitsi yu nu yucú ndo, tyin tsanaha xaan cuñí yu quitsi yu. ¹¹ Tyin cuñí yu jatynyee yu tsi ndo, tan naquihin ndo tsa vaha tsa tsahá ra tsi yo tan cunyicun ñihi ca ndo tsi ra. ¹² Tsa cuñí yu cahan yu tsihin ndo cuví tuhun ihya: tsa jandu iin tahan yo iñi yo tsihin tsa tsinú iñi yo tsi ra.

¹³ Yañi, cuñi yu tsa coto ndo tyin cuaha xaan tsaha cuñi yu quitsi yu quitsi nyehe yu nu yucú ndo, maa tyin nda cuanda vityin tan ñaha ca cuhva tsi cuhva tsi yu. Cuñi yu quitsi yu ñuu ndo tyin cuñi yu cahan ca yu tuhun Nyoo tsihin nyivi tyin tacan tan nducuaaha ca ñi tsinu iñi tsi ra, tumaa javahā yu tsihin nyivi inga ca ñuu. ¹⁴ Tyin tsa ñiñi cuñi tsi cahan yu tuhun tsa jacacú ra Cristo tsi yo tsihin nyivi Grecia tan nyivi inga ñuu; tahan ñi nyivi tsa tsitó xaan tan nyivi soho. ¹⁵ Yacan cuenda, cuñi yu cahan yu tuhun ra Cristo tsihin nyooho tsa iyó ndo Roma ihya.

Tuhun Nyoo iyó xaan tunyee iñi itsi

¹⁶ Yuhu ña cahán nuu yu caahán yu tuhun ra Cristo, tyin tunyee iñi Nyoo cuví tsi tan jacacú tsi tsi tandihí nyivi tsa tsinú iñi tsi ra Cristo. Tsa jihna ñi maa ñi maa tsihin nyivi Israel cahān ndi tuhun ra Cristo, maa tyin vityin caahán ndihí tucu ndi tsihin nyivi tsa ñavin nyivi Israel cuví. ¹⁷ Tyin tuhun Nyoo ihya, janahá tsi tsi yo nácaa janduvahá Nyoo tsi yo. Tan juvín ñi tsahá cuenda tucu tsi tsi yo, tyin janduvahá ra tsi yo tsa cuenda tsa tsinú iñi yo tsi

ra tan ñavin náa inga ca cuenda. Catyí nu tutu ra: “Nyívi tsa janduvahá Nyoo añima, iyó ñi ñayívi tsa tsihin tsa tsinú iñi ñi tsi ra.”

Tandihí nyívi tan iyó cuatyí ñi

¹⁸ Nyehé yo tyin Nyoo, ra nyaá gloria, tatsí tuñi ra tsi nyívi ña vaha tsa javahá tsa caquiñi, tyin tsa caquiñi tsa javahá ñi tyasí can nu tsinu iñi inga ca nyívi tsa nditsa. ¹⁹ Tsitó ñi tsa iyó Nyoo tyin juvin ñi maa ra janahá can tsi ñi. ²⁰ Ña cuví catyí yo tyin nduve Nyoo iyó tyin vasu ndi maa ña nyehé yo tsi ra, maa tyin cuví coto yo tsa iyó ra tsihin tsa nyehé yo tandihí tsa javahá ra. Tsanaha javahá ra ñuhu ñayívi tan yacan janahá tsi yo tyin iyó Nyoo tan iyó tunyee iñi tsi ra. Nyívi tsa ña cuñí coto tsi Nyoo ña cua coo tucahnu iñi tsi ñi. ²¹ Vasu ndi maa tsitó ñi tsa iyó Nyoo tsihin tsa nyehé ñi tandihí tsa javahá ra, ña cuñí ñi jacahnu ñi tsi ra tumaa taahán maa tsi jacahnu yo tsi ra. Ña tsahá ñi tyahví nyoo tsi Nyoo tyin maa ñi maa tsa iyó nu ñuhu ñayívi tyaá jiñi ñi. Tan tsa cuenda yacan ndusohó ñi. ²² Vasu ndi maa catyí ñi tyin tsitó xaan ñi, maa tyin ña nditsa tyin nduve náa tsitó ñi. ²³ Ña jacahnú ñi tsi Nyoo nyito, ra vaha tsa ña cua cúu; maa tyin jacahnú ñi tsitoho tsa caá tumaa caá nyívi tuhvá tsihi, tan nda cuanda tsitoho tsa caá tumaa caá saa, tan coo, tan quití iyó cumi tsaha.

²⁴ Yacan cuenda nacoó Nyoo tsi ñi nu tsa caquiñi tsa javahá ñi. Tan javahá ndihí tucu ñi tsa caquiñi tsihin cuñu ñuhu iñi ñi tan inga ñi tan cuví can ticanuu. ²⁵ Ña cuñí ñi tsinú iñi ñi tuhun Nyoo tsa nditsa, maa tyin tsinú iñi ñi tsa ña nditsa. Tyaá yahví ñi tsa javahá Nyoo tan jacahnú ñi can, tan ña jacahnú ñi tsi maa ra. Tan intuhun ñi maa ra cuñí tsi jacahnu yo tacan ñi maa. Na cuví tsi tacan.

²⁶ Yacan cuenda jañá ndaha Nyoo tsi ñi na javaha ñi tsa tsahá ticanuu tsi ñi. Tyin nda cuanda ñiñaha tan tsicoó ñi tsihin ñi nduyii, tan ña vaha tacan. ²⁷ Tan juvin ñi tacan javahá tucu rayii, nacoó ra naha tsa iyó ra naha tsihin ñasiihi ra naha, tan iyó ra naha tsihin ra ndusiihi naha ra tan tsahá ra naha ticanuu tsi yañi ra naha. Tan tsa cuenda can tatsí tuñi Nyoo tsi ra naha tan tiví ra naha tsa cuenda tsa caquiñi tsa javahá ra naha.

²⁸ Tan tsa cuenda tsa ña cuñí ca ra can naha ra tan ñi ican naha ñi nacoto ñi tsi Nyoo, nacoó ra tsi ñi naha ñi na caca iñi ñi tsa cuñí maa ñi. ²⁹ Tyin tandihí nuu tsa ña vaha javahá ñi. Ñiñaha tsicoó ñi tsihin rayii tan ña tindahá ñi. Rayii tsicoó ra naha tsihin ñaha tan ña tindahá ra naha. Maa ñi tsa caquiñi javahá ñi. Cuñi ñi coo cuaha ndaha tyiñu ñi. Javahá ñi tsa ndavaha ñi. Nyiyo iñi ñi tsa iyó tsi inga nyívi. Tsahñí ñi nyívi. Cañi tahan ñi tsihin nyívi ñi. Jandaví ñaha ñi. Quiñi iyó ñi tan caahán ñi cuendu. ³⁰ Caahán ñi ndavaha ñi siqui inga nyívi. Ndasí cuñí ñi nyehe ñi tsi Nyoo. Caahán nyaa ñi tsi nyívi. Tan cahnu jahá ñi tsi ñi tan yaa xaan ñi. Janducuahá ca ñi tsa caquiñi. Ña tyaá yahví ñi tsi jutu ñi, tan ndi tsi sihi ñi. ³¹ Ña cuñí ñi cutuñi iñi ñi. Ña javahá ñi tsa catyí ñi tyin cua javaha ñi. Ña cuñí maa ñi tsi ndi intuhun nyívi. Ña tsitó ñi jahá ñi tucahnu iñi tan ña cundaahví iñi ñi nyehe ñi tsi nyívi. ³² Tsitó vaha ñi tyin Nyoo ña cuñí ra tsa javahá ñi tacan. Tan tsitó tucu ñi tyin nyívi tsa javahá tsa caquiñi can, taahán tsi cúu ñi. Maa tyin ña jandihí ñi tsa javahá ñi can, tan tatun inga nyívi javahá tacan, sii xaan cuñí ñi.

2

Tatsí tuñi Nyoo tsi nyivi maa tyin tsihin tsa nditsa

1 Nyooho tsa nyehé cuatyí tsa javahá inga nyivi, iyó cuatyí ndo tyin jacutuñi ndo tsi ñi tsa cuenda cuatyí javahá ñi. Yoñi jaha ndáa nyooho cuví ndo. Tyin tsa jacutuñi ndo tsi ñi, juvin ñi tsi maa ndo jacunaá ndo. Tyin nda maa ndo tan javahá ndihi ndo cuatyí tsa javahá ñi. 2 Tsitó yo tyin Nyoo tatsi tuñi ra tsi nyivi tsa javahá tacan, maa tyin tsihin tsa ndaa tan tsa nditsa cua tatsi tuñi ra. 3 Nyooho tsa jacutuñi tsi nyivi tan javahá ndo juvin ñi tsa javahá ñi, cua tatsi tuñi Nyoo tsi ndo. 4 ¿Nacuenda ña taahán iñi ndo tsa vaha iñi Nyoo? Tan cunyeé xaan iñi ra nyehe ra tsi yo tsa cuenda tsa cuñi ra tsa nasama ndo cuhva iyó ndo. 5 Maa tyin nyooho jandavá xaan ndo añaima ndo. Tan ña cuñi ndo nasama ndo cuhva iyó ndo. Tan tsa javaha ndo tacan, Nyoo cuxaán ra tan ñihi ca cua tatsi tuñi ra tsi ndo tsa cuenda can quivi cua tatsi tuñi ra tsi nyivi tsihin tsa ndaa tan tsa nditsa. 6 Tan cua tyahvi ra tsi intuhun intuhun yo nácaa taahán maa tsi tsi yo tsa cuenda tsa javahá yo. 7 Nyoo cua cuhva ra ñayivi tsa ña cua naa maa coo nyivi tsa javahá tsa vaha tan nducú ñi tsa cahnu cuví ra tan nducú ñi jacahnu ñi tsi ra, tan cuñi ñi coo cuivi ñi tsihin ra. Cua ñihi ñi tandihi yacan tyin nanducú ñi can. 8 Maa tyin cuaha ca tsa uhvi cua janyehe ra tsi nyivi tsa javahá tsa cuñi maa ñi, ñi tsa ña tyaá yahvi tuhun nditsa, tan javahá ñi tsa ña vaha. 9 Cuaha xaan tundoho tan tsa uhvi cua nyehé tandihi nyivi tsa javahá tsa ña vaha. Tsa jihna ñi cua tatsi tuñi ra tsi nyivi Israel, nyivi cuenda ra. Tan tsa tsinu uvi cua tatsi tuñi ndihi ra tsi nyivi tsa ñavin ñi Israel cuví. 10 Maa tyin tandihi nyivi tsa javahá tsa vaha, cua cuhva Nyoo tsa cahnu cuví ra tsi ñi. Cua jacahnu ra tsi ñi tan cua cuhva ra tsa taxin coo añaima ñi. Jihna ca nyivi Israel cua ñihi tandihi tsa caahán ra tuhun. Tan tsa tsinu uvi, ñi tsa ñavin ñi Israel cuví, cua ñihi ndihi ñi tandihi can.

11 Tyin Nyoo inducu ñi cuñi ra nyehé ra tsi iin yo tan tsi inga yo. Ña tavá tsiyo ra ndí intuhun yo. 12 Tyin nyivi tsa ñavin ñi Israel cuví, ñi tsa ña tsitó ley Nyoo tsa tyaá ra Moisés, tan javahá ñi tsa ña vaha, cua cunaa ñi, maa tyin ñavin tsa cuenda tsa ña tyaá yahvi ñi ley can. Tan nyivi Israel tsa tsitó ley can, tan javahá ñi tsa ña vaha, cua tatsi tuñi Nyoo tsi ñi tumaa catyí maa ley can. 13 Tyin nyivi tsa javahá cuhva catyí ley Nyoo, ñi ican cuví nyivi vaha nuu ra. Maa tyin nyivi tsa tsitó ñi maa ley tan ña javahá ñi tsa catyí ley can, ña cua cacu ñi. 14 Nyivi tsa ñavin ñi Israel cuví ña tsitó ñi ley, maa tyin tun tacan ñi javaha maa ñi tsa catyí ley, juvin ñi maa ñi cuví ley ñi. 15 Tyin tsihin cuhva iyó ñi, janahá ñi tyin iyó ley Nyoo tsitsi añaima ñi. Tsa tsiñi tuñi tsa iyó tsi ñi cuví tsandaa tsa cuenda ñi, tyin tuví iñi ñi tatun vaha o ña vaha javahá ñi. 16 Tacan cua cuví quivi cua jacutuñi ra Jesucristo cuatyí tandihi nyivi jaha Nyoo. Cua cutuñi tandihi maa nyivi tsa javahá xeehe cuhva tsicá iñi ñi. Tumaa catyí tuhun Nyoo tsa caahán yu tsihin ndo.

Nyivi Israel nyicún ñi ley Nyoo tsa tyaá ra Moisés

17 Maa tyin nyooho nyivi Israel cuví ndo, catyí ndo. Tan nyitá iñi ndo ley Nyoo tsa tyaá ra Moisés. Tan nduyaá ñi maa ndo tyin catyí ndo tyin nyivi Nyoo cuví ndo. 18 Tan tsitó ndo cuhva cuñi Nyoo tan ley can janahá tsi tsi ndo tsa nacatsi ndo tsa vaha. 19 Tan cuñi tucu ndo tyin vaha jaquihín ityi ndo tsi nyivi cuaa, ñi tsa ña tsitó ley. Jandunditsín ndo nu yucú nyivi nu naa, cuñi maa ndo. 20 Tan cuñi tucu ndo tyin tsitó ndo tandihi ley Nyoo tan jaquihín ityi ndo tsi nyivi tsa ña tsitó, ñi tsa ñaha ca caca vaha tsihin Nyoo. 21 Tatun

tsitó ndo jacuahá ndo tsi inga nyívi, ¿nacuenda ña jacuahá ndo tsi maa ndo? Catyí ndo tyin ña vaha suhu yo, ¿nacuenda tyin suhú ndo? ²² Juvín ñi catyí ndo tyin ña vaha coo inga ñaha tsi iin rayíi, o inga rayíi tsi iin ñaha, ¿nacuenda tyin maa ndo javahá ndo tacan? Ndasí cuñi ndo nyehe ndo tsitoho, ¿nacuenda tyin suhú ndo ndaha tyíñu tsa iyó tsitsi vehe ñuhu can? ²³ Nduyaa ndo tsihin tsa tsitó ndo ley Nyoo, tan tsahá ndo ticanuu tsi ra tyin ña tyaá yahvi ndo ley ra. ²⁴ Yacan cuenda catyí tuhun Nyoo tyehen: “Nyívi tsa ñavin nyívi Israel cuví, caahán ñi ndavaha ñi siqui Nyoo tsacatyí nyoooho.”

²⁵ Nditisa tyin circuncición tsa cuví tuñi Nyoo, tsa janahá tyin cuví yo nyívi ra, cuví jatyinyee tsi tsi ndo. Jatyinyee tsi tsi ndo tun tyaá yahvi ndo ley Nyoo tsa tyaá ra Moisés. Tun ña tyaá yahvi ndo tsa catyí ley can, nduve náa catyí nyisó ndo tuñi can. ²⁶ Maa tyin rayíi tsa nduve tuñi Nyoo nyisó, tan javahá ra cuhva catyí ley can, cua naquihin Nyoo tsi ra tumaa tsatyin nyisó ra tuñi can. ²⁷ Ra tsa ña nyisó tuñi can, tan tyaá yahvi ra ley Nyoo, cua jacutuñi ra tsi nyoooho tsa tsitó ley tan ña tyaá yahvi ndo tsa catyí tsi, vasu ndi maa nyisó ndo tuñi Nyoo. ²⁸ Vasu ndi maa cuví ndo nyívi Israel tan nyisó ndo tuñi ra, ña cuví cuví ndo nyívi Nyoo tun nduve ley ra iyó añima ndo. ²⁹ Tyin nyívi iyó ley Nyoo añima, ñi ican cuví nyívi Nyoo. Tyin maa Tatyí Ii Nyoo tyaá tuñi ra añima ñi, tan ñavin cuñu ñuhu ñi. Tatyí Ii Nyoo javahá can, ñavin ley tsa tyaá ra Moisés. Nyívi ihya cua cuví nyívi vaha nuu Nyoo, tan ñavin nuu nyívi.

3

¹ ¿Náca jatyinyee tsa cuví yo nyívi Israel tsi yo? ¿O náca jatyinyee tuñi Nyoo tsi yo? ² Cuaha cuhva jatyinyee tsi tsi yo. Iin cuhva jatyinyee tsi tsi yo tyin Nyoo tsahá ra ley maa ra tsi yo tsa cuví yo nyívi Israel. ³ ¿Náca cua cuví? ¿A cua jandihí Nyoo tsa javaha ra tsa catyí ra tyin javaha ra tun juhva yoo tan ña tsínú iñi yo tsi ra? ⁴ ¡Na cua jandihí ra! Na cutuñi iñi yo tyin Nyoo ña vatya ra. Vasu ndi maa tandihí nyívi vatya ñi, ra ican javahá ra tandihí tsa caahán ra. Tyin catyí nu tutu ra tyehen: Jutu Mañi yu, cua nyehe nyívi tyin ña vatya un. Tan cua coto ñi tyin nditsa tsa caahán un.

⁵ Tsa caquiñi tsa javahá tandihí yoo, tsa iyó nu ñuhu ñayivi ihya, janahá tyin Nyoo vaha ra. [Tumaa iin jahma nyahyu tan iin jahma cuitsin; tsa nyahyu iin jahma can janahá tyin inga tsi ña nyahyu tsi. Tacan cuví yo tsihin Nyoo.] Tun tacan ¿a cua catyí yo tumaa catyí nyívi tyin ña vaha tsa tatsi tuñi Nyoo tsi yo tyin janahá yo tyin vaha ra? ⁶ Nyívi catyí ñi tyin ña vaha tatsi tuñi Nyoo tsi yo. Maa tyin ña nditsa ñi tyin Nyoo iyó ndatu tsi ra tsa tatsi tuñi ra tsi tandihí yo.

⁷ Tatun javahá nyívi tsa ña vaha tan yacan janahá tyin Nyoo vaha ra, ¿a taahán tsi tatsi tuñi ra tsi ñi? Catyí ñi tyin ña taahán tsi, maa tyin ña nditsa. ⁸ Tun tsatyin nditsa tsa caahán ñi can, vaha ca javaha yo maa ñi maa tsa caquiñi tacan tan nyehe nyívi tyin Nyoo vaha ra. Yihí ñi catyí ñi tyin tacan jacuahá ndi. Tan ñi tsa caahán tyehen cua tatsi tuñi Nyoo tsi ñi tsacatyí tsa caahán ñi cuendu siqui ndi.

Tandihí yo tan iyó cuatyí yo

⁹ Tan náca ¿a vaha ca yoo tsa cuví yo nyívi Israel tan ñavin ca inga nyívi? Ña vaha ca yo. Tyin tsa yahá janahá yu tsi ndo tyin tandihí yo tan iyó cuatyí yo. An cuví yo nyívi Israel, o ña cuví yo nyívi Israel, maa tyin ndacá ñaha cuatyí tsi yo. ¹⁰ Tacan catyí nu tutu Nyoo, nu catyí tsi tyehen:

Ndi intuhun nyivi vaha nduve iyó.

¹¹ Nduve nyivi cuñí cutuñi ñi tuhun Nyoo.

Yoñi cuñí nanducu tsi ra.

¹² Tandihí ñi nacoo ñi tsi Nyoo, tan tandihí ñi tan cuanaa ñi.

Ndi intuhun ñi tan ña javahá ñi tsa vaha.

¹³ Jucun ñi cuví tsi tumaa iin ñaña ndiyi tsa ticohó.

Tan tsihin yaa ñi caahán ñi cuendu.

Yihí venenu coo yuhu ñi tyin caahán ñi tsi tahan ñi.

¹⁴ Maa ñi tsa ndvaha ñi caahán ñi.

¹⁵ Yatyi xaan tsahñí ñi tsi tahan ñi.

¹⁶ Janyehé ñi tundoho tan tucuiihya ñi tsi nyivi tsihin cuhva iyó ñi.

¹⁷ Tan ña tsitó ñi nácaa coo taxin ñi tsihin Nyoo, tan ndi tsihin nyivi.

¹⁸ Ndi ña tsicá ñi ñi tatun coo iin quivi cua tatsi tuñi Nyoo tsi ñi, catyí tuhun Nyoo nu tutu ra.

¹⁹ Tsitó yo tyin tandihí tsa caahán ley Nyoo tsa tyaá ra Moisés, cuví tsi tsa cuenda nyivi tsa yihí ndaha ley can, tyin tacan tan ña cuví catyi ñi tyin nduve cuatyí ñi iyó. Maa tyin coto tandihí nyivi iyó nu ñuhu ñayivi tyin cua tatsi tuñi Nyoo tsi ñi tsa cuenda cuatyí ñi. ²⁰ Ley can ña cuví janduvaha tsi tsi ndi intuhun yo nuu Nyoo. Iyó tsi tyin tacan tan coto yo tyin iyó cuatyí yo.

Tsa cuenda tsa tsinú ñi yo tsi Nyoo tan nduvaha yo nuu ra

²¹ Maa tyin vityin Nyoo janahá ra tsi yo nácaa janduvahá ra tsi yo nuu ra. Tan janahá ra tsi yo tyin ñavin tsa cuenda ley tan nduvahá yo. Ley ihya tan ra cuví ndusu yuhu Nyoo janahá nácaa coo vaha yo tsihin Nyoo. ²² Tyin tsa cuenda tsa tsinú ñi yo tsi ra Jesucristo tan naquihín Nyoo tsi yo tumaa tsatyin vaha yo. Tan ña nacatsí ra tsi yo an cuví yo nyivi Israel o ñavin. ²³ Tandihí yo tan iyó cuatyí yo, tan tsa cuenda yacan ña cuví quihvi yo nu ndacá ñaha Nyoo. ²⁴ Maa tyin tsahá maa ra tsa vaha ra tsi yo, tan yacan jahá tsa naquihin cuenda ra tsi yo tumaa tsatyin vaha yo, tyin tsa yahá tyahví ra Cristo Jesús tsa cuenda cuatyí yo. Tan yacan cuenda ña tsicán ca ra yahvi tsi yo. ²⁵ Nyoo jaquitsi ra tsi ra Cristo tyin cúu ra nu cruu tan cati ra ñiñi ra tsa cuenda cuatyí yo. Tan vityin jaha Nyoo tucahnu ñi tsi yo tatun tsinú ñi yo tsi ra Cristo. Tacan cuví, tyin nyehe nyivi tyin Nyoo javahá ra tsa vaha. Tahan tsanaha, Nyoo ña tñin cuenda ra cuatyí nyivi tsa cuenda tyin cua quitsi ra Cristo tan janaa ra cuatyí ñi. ²⁶ Tan tacan cuví tyin vityin nyehé nyivi tyin Nyoo tacan ñi maa vaha ra, tan naquihín ra tsi tandihí yo tsa tsinú ñi tsi ra Jesús tumaa tsatyin vaha yo.

²⁷ ¿A cuví nduyaa yo vityin? Ña cuví. ¿Nacuenda? Tsa cuenda tyin ña cuví catyi yo tyin javahá yo tandihí tsa catyí ley tan yacan cuenda vaha yo nuu Nyoo. Tyin nduvahá yo nuu ra tsa cuenda tsa tsinú ñi yo tsi ra. ²⁸ Tsa tsitó yo vityin tyin Nyoo naquihín cuenda ra tsi yo tumaa tsatyin vaha yo tsa cuenda tsa tsinú ñi yo tsi ra Cristo, tan ñavin tsa cuenda tsa javahá yo tsa catyí ley o ña javahá yo itsi.

²⁹ ¿A Nyoo cuenda nyivi Israel ñi cuví Nyoo? ¿A ñavin juvin ñi cuví tucu ra Nyoo nyivi tsa ñavin ñi Israel cuví? Juvín ñi cuví tucu ra Nyoo ñi can. ³⁰ Tyin intuhun ñi maa ra iyó. Tan naquihín cuenda ra tsi yo tumaa tsatyin vaha yo tsa cuenda tsa tsinú ñi yo tsi ra, a iyó tuñi ra cuñu ñuhu yo tumaa tsa iyó tsi tsi nyivi Israel, o nduve. ³¹ Tatun tacan, ¿a cuñí tsi catyi tyin nduve ca yahvi

nyaá ley tsahnu can? ¡Ñavin tsa nduve yahvi nyaá tsi! Cahnu cuví tsi, tan vityin tsihin tunyee iñi maa ra Cristo janahá yo tyin nditsa tsa cahnu cuví tsi.

4

Cuhva tsicoq ra Abraham janahá tsi tsi yo nácaa nduvahá yo nuu Nyoo

¹¿Náa catyí yo tsa cuenda ra Abraham, tsii tsaahnu yo? ¿Nacuenda naquihín cuenda Nyoo tsi ra tumaa tsatyin vaha ra? ²Tun tsatyin naquihín cuenda Nyoo tsi ra tsa cuenda tsa javahá ra tsa vaha, cuví nduyaa ra tsihin can, maa tyin ñavin nuu Nyoo. ³¿Náa catyí nu tutu Nyoo? Catyí tsi tyin ra Abraham tsinú iñi ra tsi Nyoo, tan tsa cuenda yacan, Nyoo naquihín ra tsi ra tumaa tsatyin vaha ra. ⁴Vaha, vityin cua cuhva yu iin cuhva tsi ndo: Ra jahá tyiñu, quihín ra yahvi tsa cuenda tyiñu jahá ra tan ña tuhvá nyívi cuhva maa xuhun tsi ra tun ña jahá tyiñu ra. ⁵Maa tyin iin ra tsa ña jahá tyiñu tan ñihi ra tsa ñihi ra, ñihi ndaahvi ra itsi cuví can. Tacan cuví nyívi iyó cuatyí tsa ña nducú cacu tsihin tsa javahá ñi cuhva catyí ley, tan tsinú iñi ñi tyin Nyoo naquihín cuenda ra tsi yo tumaa tsatyin vaha yo tun tsinú iñi yo tsi ra. ⁶Ra David cahan ra síqui tsa sii cuví tsi nyívi tsa naquihín cuenda Nyoo tumaa tsatyin vaha ñi tan ña tíin cuenda ra cuatyí tsa javahá ñi. ⁷Tyehen catyí ra David: Sii xaan cuví tsi nyívi tsa jahá Nyoo tucahnu iñi tan ña jahá ra cuenda cuatyí ñi.

⁸Sii xaan cuví tsi ñi tsa ña tíin cuenda Nyoo cuatyí.

⁹¿A cuñí maa ndo tyin tsa cuenda nyívi nyisó tuñi Nyoo ñi cuví tusii iñi ihya, o cuví tucu tsi tsa cuenda nyívi ña nyisó tuñi can? Tsa yahá catyí yo tyin Nyoo jahá ra tyin vaha ra Abraham tsa cuenda tsa tsinú iñi ra tsi ra. ¹⁰¿Ama javahá Nyoo yacan tsihin ra Abraham? ¿A tsa ndi cumañi ca cunyaa tuñi can tsi ra, o tsa tsa yahá? Ñavin tsa tsa yahá, tyin tsa ndi cumañi ca. ¹¹Yahá tsa naquihín Nyoo tsi ra Abraham tumaa tsatyin vaha ra, tacan tan tsinyaa tuñi can tsi ra tumaa iin seña tyin tsa yahá nduvahá ra nuu Nyoo tsa cuenda tsa tsinú iñi ra tsi ra. Tan tsa cuenda yacan cuví ra Abraham tumaa jutu tandihi yoo tsa tsinú iñi tsi Nyoo vasu ndi maa ña nyisó yo tuñi Nyoo. Tan yacan cuenda Nyoo jahá ra tyin vaha yo. ¹²Nditsa tyin ra Abraham cuví tucu ra jutu nyívi Israel, tandihi ñi tsa nyisó tuñi Nyoo tan tsinú tucu iñi ñi tsi Nyoo tumaa tsa tsinú iñi maa ra Abraham, tsii tsahnu yo, quívi tsa ñaha ca cunyaa tuñi can tsi ra.

Tsihin tsa tsinú iñi yo ñihí yo tsa tsahá Nyoo tsi yo

¹³Nyoo catyí ra tsihin ra Abraham tan tsihin tata ra tyin cua cuhva ra tsa cua cundaca ñaha ñi ñuhu ñayívi tsihin ra. Maa tyin tsa cahan Nyoo can tsihin ra, ñavin tsa cuenda tyin javahá ra tsa catyí ley, maa tyin tsa cuenda tyin tsinú iñi ra tsi Nyoo, tan Nyoo naquihín ra tsi ra tumaa tsatyin vaha ra. ¹⁴Tun tsatyin maa ñi maa nyívi tsa javahá cuhva catyí ley, cua ñihi tsa cua cuhva Nyoo, nduve náa catyí tsinú iñi yo tsi ra, tan nduve yahvi nyaá tsa catyí ra tyin cuhva ra tsa cua cuhva ra tsi yo tun tsinú iñi yo tsi ra. ¹⁵Tyin ley can janahá tsi tyin taahán tsi tatsi tuñi Nyoo tsi yo tatun ña javahá yo cuhva catyí tsi. Maa tyin tun tsatyin nduve ley iyó, ña cua coo cuatyí yo.

¹⁶Yacan cuenda ñihí yo tsa catyí Nyoo tyin cuhva ra tsi yo tsa cuenda tsa tsinú iñi yo tsi ra, tyin tacan tan cuví tsi cumañi iñi tsa tsahá ra tsi tandihi yoo tsa cuví tata ra Abraham. Ñavin maa ñi nyívi tsinú iñi tsi Nyoo tan tyaá yahvi ley tsa tyaá ra Moisés cua ñihi tsa cua cuhva Nyoo, tyin cua ñihi ndihi tucu nyívi tsa ña nyitá iñi ley, tatun tsinú iñi ñi tsi ra tumaa tsa tsinú iñi ra

Abraham. Ra ihya cuví jutu tandihí nyívi tsa tsinú íñi tsi Nyoo. ¹⁷ Tyin catyí ra nu tutu ra tyehen: “Yooho cua cuví tumaa jutu nyívi cuaha tsa cua coo nu ñuhu ñayívi”, catyí ra tsihin ra Abraham. Tan tsa catyí ra tacan, cuñí tsi catyí tyin cuví yo tata ra Abraham nuu Nyoo. Tsinú íñi ra tsi Nyoo, tyin Nyoo janandotó ra ndiyí tan caahán ra tuhun tsa ñaha ca coo tumaa tsatyin tsa iyó tsi.

¹⁸ Ra Abraham tsa tsahnu xaan ra quívi tsa catyí Nyoo tyin cua coo sehe ñasiíhi ra, tan tsitó ra tyin ña cuví ca coo sehe ñi. Maa tyin tsinú íñi ra tan ñihí ra tsa cahán Nyoo tsihin ra. Tan cuví ra jutu nyívi cuaha, tumaa cahán maa Nyoo tsihin ra: “Tyehen cua nducuaha nyívi tata un”. ¹⁹ Vasu ndi maa tsa yatyin ña iin cientu cuiya ra Abraham, ña jandihí ra tsa tsinú íñi ra. Tahan ñi maa ra tan ña Sara ñasiíhi ra, ña cuví ca coo sehe ñi, tyin tsa cuyatyin cuui cúu ñi tyin tsahnu xaan ñi. ²⁰ Maa tyin ña ndu uví íñi ra tsa cua ñihí ra tsa catyí Nyoo tyin cuhva ra tsi ra. Tsinú íñi ra tsihin tsa ñi íñi añima ra. Tan ña jandihí ra tsa nyitá íñi ra tsi Nyoo. Tan jacahnú ra tsi Nyoo, ²¹ tsa cuenda tyin tsitó vaha ra tyin Nyoo iyó tunyee íñi tsi ra tsa javaha ra tsa catyí ra tsihin ra. ²² Yacan cuenda Nyoo naquihín ra tsi ra tsa cuenda tsa tsinú íñi ra tsi ra.

²³ Tuhun tsa nyaá nu tutu Nyoo tsa catyí tyin naquihín Nyoo tsi ra Abraham tsa cuenda tsa tsinú íñi ra tsi ra, ñavin tsa cuenda ra Abraham ñi cuví tsi, ²⁴ tyin tsinyaq tucu tsi tsa cuenda yoo. Tyin naquihín Nyoo tsi yo tsa cuenda tsa tsinú íñi yo tsi ra, tyin juvin ra janandotó tsi ra Jesús, Jutu Mañi yo. ²⁵ Ra Jesús quítsi ra quítsi cúu ra tsa cuenda cuatyí yo, tan nandotó ra tyin tacan tan cuvi nduvaha yo nuu Nyoo.

5

Tsa cua ñihí yo tsa cuenda tsa nacoq vaha yo tsihin Nyoo

¹ Tsa yahá nduvahá yo nuu Nyoo tsa cuenda tsa tsinú íñi yo tsi ra. Tan vityin iyó vaha yo tsihin ra jahá Jutu Mañi yo Jesucristo. ² Tyin tsa cuenda ra Cristo ñihí yo tsa vaha Nyoo tyin tsinú íñi yo tsi ra. Tan iin cuñí yo tyin tsa naquihín yo can. Tan sii cuñí yo tyin cua cuhva ra tsa cahnu cuví yo tan javaha yo tsa cuñí maa ra tyin javaha yo. ³ Tan ñavin tsa cuenda yacan ñi taahán tsi cusí íñi yo, tyin taahán tucu tsi cusí íñi yo tun nyehé yo tundoho. Tyin tsitó yo tyin tun cunyeé íñi yo nyehé yo tundoho, tacan cua cunyeé íñi yo cuatu yo nda cuenda ñihí yo tsa cua cuhva Nyoo tsi yo. ⁴ Tatun cunyeé íñi yo yahá yo tandihí tundoho, sii cuñí Nyoo tsihin yo. Tan tsa cuenda yacan tsitó vaha yo tyin cua quita vaha yo nuu ra. ⁵ Tatun tsitó yo tyin cua quita vaha yo nuu ra, ña taahán tsi nducahan nuu yo nyehé yo tsi ra, tyin Tatyí Ii ra tsa tsahá ra coo añima yo janahá tsi tsi yo tyin cuñí xaan ra tsi yo.

⁶ Tsanaha yoo ña ñihí yo cuhva jacacu maa yo tsi yo. Tacan tan quívi tahañ maa tsi quítsi ra Cristo, quítsi cúu ra tsa cuenda cuatyí yo. ⁷ Tsitó yo tyin ndi intuhun yo tan ña cana íñi yo cúu yo tsa cuenda inga nyívi, vasu ndi maa vaha ñi. Maa tyin tun vaha xaan íñi nyívi can vasiqui cahnya íñi iin yo cúu yo tsa cuenda ñi. ⁸ Maa tyin Nyoo jaquítsi ra tsi ra Cristo, tan yacan janahá tsi yo tyin cuñí xaan ra tsi yo. Quítsi ra quítsi cúu ra tsa cuenda yo vasu ndi maa iyó xaan cuatyí yo. ⁹ Tan tsa cuenda tsa tsihi ra Cristo, nacoq vaha yo tsihin Nyoo. Tan vityin tsitó vaha yo tyin cua cacu yo tan ña cua cahun yo anyaya quívi cua tatsi tuñi Nyoo tsi nyívi ña tsinú íñi tsi ra. ¹⁰ Tahan tsanaha xaan íñi yo tsi Nyoo, maa tyin vityin iyó vaha yo tsihin ra tsa cuenda tsa tsihi ra Cristo, Sehe ra. Yacan cuenda tsa nyitá vaha íñi yo tyin cua jacacu ra tsi yo

tsa cuenda tsa iyó yo ñayivi Sehe ra, tyin tsa iyó vaha yo tsihin ra. ¹¹Tan ñavin yacan ñi, taahán tucu tsi cusii ñi yo tsihin Nyoo tyin tsa cuenda Jutu Mañi yo Jesucristo tan nduvahá iyó yo tsihin ra.

Ra Adán tan ra Cristo

¹²Tsanaha intuhun ñi rayii tsicoo cuatyí, tan tsa cuenda intuhun ñi ra can tsaá cuatyí nanii ñuhu ñayivi tan tsicoo tuhun tsiihí. Tan tuhun tsiihí can nacuñá can tyin tandihi nyivi tan tsicoo cuatyí ñi. ¹³Tsanaha tsa ndi cumañi ca cuhva Nyoo ley ra tsi ra Moisés tan tsa iyó maa cuatyí nyivi, maa tyin ña tiín cuenda Nyoo cuatyí ñi tsa cuenda tyin nduve ley iyó. ¹⁴Maa tyin nda cuanda quivi tsicoo ra Adán tan nda cuanda quivi tsicoo ra Moisés, tsindaca ñaha tuhun tsiihí tsi tandihi nyivi tyin iyó cuatyí tandihi ñi, vasu ndi maa ña javahá ñi tumaa javahá ra Adán tsa ña tyaá yahvi ra tsa cahan Nyoo tsihin ra. Ra Adán quitsj ra tsihin cuatyí, maa tyin ra Cristo quitsj ra jacacú ra tsi yo.

¹⁵Maa tyin cuatyí ra Adán ña cuví jandu inducu yo can tsihin tsa tsahá Nyoo tsi yo. Tyin tsa cuenda cuatyí intuhun ra can, tan tsihí cuaha nyivi. Tacan tucu vityin, Nyoo jacacú ra tsi yo tsa cuenda intuhun rayii, ra Jesucristo. Tan cahnu ca cuví tsa tsahá Nyoo tsi yo, tan tsa vaha tsi tandihi nyivi cuví tsi. ¹⁶Cuatyí ra Adán ña cuví jandu inducu yo can tsihin tsa jacacú Nyoo tsi yo. Tyin tsa cuenda intuhun ñi cuatyí can, Nyoo tatsí tuñi ra tsi tandihi nyivi. Maa tyin vityin Nyoo ña cuñi ra yahvi tan jacacú ra tsi yo. Naquihín ra tsi yo tumaa tsatyin vaha yo, vasu ndi maa cuaha cuatyí yo tsicoo. ¹⁷Nditsa tyin quitsahá ndacá ñaha tuhun tsiihí tsi tandihi nyivi jahá cuatyí tsa javahá ra can, maa tyin vityin ña cuví ca quihí ndaha can tsi ñi tsa tsa nduvahá nuu Nyoo, ñi tsa iin nyita ñi naquihín tsa vaha ra. Ñi ican iyó ñi ñayivi tsa tan yihí ndaha ñi tsi ñi tan tsi nu ña vaha jahá intuhun rayii, ra Jesucristo.

¹⁸Nyoo tatsí tuñi ra tsi tandihi nyivi iyó nu ñuhu ñayivi tsa cuenda cuatyí ra Adán. Maa tyin vityin tsahá ra tsa coo vaha yo tsihin ra tan coo yo ñayivi nyito tsa cuenda tsa vaha tsa javahá ra Jesucristo. ¹⁹Cuñi tsi catyí tyehen: Tsa cuenda tsa ña tyaá yahvi iin rayii tsa cahan Nyoo, cuaha xaan nyivi tsicoo cuatyí. Ra ican cuví ra Adán. Tan vityin cuaha xaan nyivi cua nduvaha nuu Nyoo tsa cuenda tsa tyaá yahvi inga ra tsa cahan Nyoo. Tan ra ican cuví ra Cristo.

²⁰Nyoo tsahá ra ley tsi ra Moisés tyin tacan tan coto nyivi tyin iyó cuatyí ñi. Tan vasu ndi maa nducuahá ca cuatyí tsa cuenda ley can, tsa vaha Nyoo nducuahá tucu tsi tyin cahnu ca tucahnu ñi iyó tsi ra tsihin yo. ²¹Tahan tsanaha, cuatyí yo quitsj ndaca tuhun tsiihí, tan yacan yihí ndaha tsi yo. Maa tyin vityin tsa vaha Nyoo jahá tsa iyó vaha yo tsihin ra tan yihí ndaha tsi tsi yo. Tan tsa tacan yihí ndaha tsi tsi yo, tsahá Nyoo ñayivi nyito tsa ña cua naa maa coo yo tsa cuenda Jutu Mañi yo Jesucristo.

6

Ña cua javaha ca yo tsa caquiñi tyin cua javaha yo cuhva catyí ra Cristo

¹¿Náa cua javaha yo vityin? ¿A cua javaha ca yo cuatyí tyin tacan tan janaha Nyoo tyin iyó xaan tucahnu ñi tsi ra tsihin yo? ²Ña vaha. Tyin yoo tsa tsa ndu uví ñi cuatyí tumaa tsa tsihí cuatyí yo cuví can. Tan yacan cuenda, ña cuví ca javaha yo tsa caquiñi vityin. ³¿A ña tsitó ndo tyin tsa tsicoondutyá yo janahá tsi tyin ndu iin yo tsihin ra Cristo Jesús? Yacan cuñi tsi catyí tyin tsa yahá tsihí yo tsihin ra. ⁴Tsa quihví yo tsitsi ndutya tsa tsicoó ndutya yo

tsa ña cua naa maa coo yo tsa cuenda tsa iin ñi cuví yo tshih ra Cristo Jesús, Jutu Mañi yo.

7

Ley tsahnu ña ndacá ñaha ca tsi tsi nyivi yihí cuenda ra Cristo

¹ Yañi, nyooho tsa tsitó ley, tsitó ndo tyin tsitsi tsa ndi nyito nyivi yihí ndaha ley tsi ñi. ²⁻³ Tumaa iin ñaha tsa iyó yii, catyí ley tyin coo ña tshih yii ña nda cuanda cúu ra. Maa tyin juvin ñi catyí tucu ley tun cúu yii ña tan nandoo ndaahvi ña, ña cua quihí ndaha ca ley can tsi ña. Tan cuví tindaha ña tshih inga rayii tan ña cua coo cuatyí ña. Maa tyin tsitsi tsa ndi iyó yii ña, ña cuví coo ña tshih inga rayii, tyin tun cua javaha ña tacan, cua coo cuatyí ña nuu Nyoo.

⁴ Tan tacan tucu nyooho yañi. Tsanaha ley Nyoo tsa tyaá ra Moisés yihí ndaha tsi tsi ndo tumaa yihí ndaha iin rayii tsi ñasihi ra. Maa tyin vityin tsa yahá tshihí ndo tan ña ndacá ñaha ca ley can tsi ndo. Tyin vityin ndacá ñaha inga rayii tsi ndo tan juvin ra cuví ra Cristo, ra tsa nandoto jahá Nyoo. Tyehen cuví tsehe tyin tacan tan cuatyíñu Nyoo tsi yo. ⁵ Tahán tsanaha tsicoo yo kuhva cuñí cuñu ñuhu yo tan ley tsahnu tsa tyaá ra Moisés catyí tsi tyin ña vaha javaha yo tsa caquiñi. Tan tsa caahán tsi tacan, yoo quitsahá cuñí ca yo javaha yo tsa caquiñi tsa cuñí cuñu ñuhu yo. Tan yacan tsahá tuhun tsihi tsi yo. ⁶ Maa tyin vityin ña ndacá ñaha ca ley tsahnu can tsi yo, tyin tsa yahá tshihí cuñu ñuhu cuatyí yo tshih ra Cristo. Tan vityin tsa iyó yo ñayivi nyito tsa tsahá Tatyí Ii Nyoo tsi yo, na jaha tyiñu yo tyiñu Nyoo tan ña javaha ca yo tumaa javahá yo quivi yihí ndaha ley tsahnu tsi yo.

Ley Nyoo janahá tyin iyó cuatyí yo

⁷ ¿Náa cua catyí yo? ¿A catyí yo tyin ña vaha ley can? Ñavin tsa ña vaha tsi. Vaha tsi. Tyin tun tsa ña tsahá Nyoo ley can, ña cua coto yo náa cuví cuatyí. Tan ndi ña cua coto yo tyin ña vaha nyiyo iñi yo tsa tsii inga nyivi, tun tsatyin ña catyí ley can tyin ña vaha nyiyo iñi yo. ⁸ Tun tsatyin nduve ley can iyó, ña cua coto yu náa cuví cuatyí, tan ña cua cuñi yu javaha yu tsa ña vaha. Maa tyin quivi tsa tsitó yu ley Nyoo, quivi can quitsahá tsicá iñi yu javahá yu tsa ña vaha. Nu nduve ley iyó, ña tsitó nyivi náa cuví tsa ña vaha. ⁹ Quivi tsa ña tsitó yu náa cuñi tsi catyí ley Nyoo tsa tyaá ra Moisés, nyito yu. Maa tyin quivi cutuñi iñi yu tsa caahán ley can, cutuñi iñi yu tyin nuu Nyoo tsa tshihí yu jahá cuatyí yu. ¹⁰ Catyí ley can tyin tatun tyaá yahvi nyivi itsi, cua coo cuñi ñi ñayivi nyito. Maa tyin yuhu tshihí yu nuu Nyoo jahá ley can tyin ña tyaá yahvi yu itsi. Tyin catyí tsi tyin nyivi tsa ña tyaá yahvi itsi, taahán tsi cunaa ñi nuu Nyoo. ¹¹ Cuatyí yu tsatyíñu can ley can, tan jandaví ñaha can tsi yu, tyin catyí ley tyin tatun ña tyaá yahvi yo itsi, taahán tsi cunaa yo nuu Nyoo.

¹² Ley can ii xaan tsi tyin tuhun tsahá maa Nyoo cuví tsi, tan tandihí tsa catyí ra tyin javaha yo, vaha tsi, tan cuñi xaan tsi. ¹³ Tan ñavin ley vaha ihya jacunaa tsi yu. Tyin tsa ña vaha tsa javahá yu, yacan jacunaa tsi yu. Yacan cuenda cunaa yu nuu Nyoo tyin ley vaha can janahá tsi yu tyin cuatyí cuví tsa javahá yu tsa ña vaha. Tacan tucu vityin ley can janahá tsi tsi yo tyin yaha xaan ña vaha cuví cuatyí javahá yo.

Nu tsahá cuenda ra Pablo tsi yo kuhva iyó yo tun ña tsahá yo cundaca ñaha ra Jesucristo tsi yo

¹⁴ Tan tsitó yo tyin maa Tatyí li Nyoo tsaḥa ley can, yacan cuenda vaha tsi. Maa tyin yuhu iyó cuatyí yu tyin ra ñayivi cuví yu. Javahá yu tsa caquiñi tyin maa cuatyí can ndacá ñaha tsi yu. ¹⁵ Ña cutuñí iñi yu náa taahán yu, tyin tsa vaha tsa cuñí yu javaha yu, ña javahá yu can. Maa tyin javahá yu tsa ña vaha tsa ña cuñí yu javaha yu. ¹⁶ Tan tsa javahá yu tsa ña cuñí yu javaha yu, tsihin yacan nacotó yu tyin ley Nyoo vaha tsi. ¹⁷ Yacan cuñí tsi catyí tyin ñavin maa yu javahá tsa ña vaha, tyin cuatyí tsa iyó tsi yu, yacan javahá tsa ña vaha. ¹⁸ Yuhu tsitó yu tyin cuñu ñuhu yu nduve tsa vaha iyó. Vasu ndi maa cuñí yu javaha yu tsa vaha, ña cuví javaha yu can. ¹⁹ Ña javahá yu tsa vaha tsa cuñí yu javaha yu, jañihí ca yu javaha yu tsa ña vaha tsa ña cuñí yu javaha yu. ²⁰ Tan tatun javahá yu tsa ña cuñí yu javaha yu, ñavin ca maa yu javahá can, tyin cuatyí tsa yihí ndaha tsi yu, yacan javahá can.

²¹ Nacotó yu tsa taahán yu: tun cuñí yu javaha yu tsa vaha, yatyi xaan ca javahá yu tsa ña vaha. ²² Tsitsi añima yu taahán xaan iñi yu ley Nyoo. ²³ Maa tyin iyó inga ley tan yacan yihí ndaha cuñu ñuhu yu tsihin añima yu. Ña tsahá can tsa javahá yu tsa taahán iñi añima yu. Tan ñihi yihí ndaha can tsi yu tumaa yihí ndaha ra vitya tsi iin ra nyíí vehe caa. ²⁴ ¡Ndahvi yuhu ra ndaahví! ¿Yóo cua jacacu tsi yu ndaha tsa ña vahá tsa cuñí cuñu ñuhu yu tan ña cahun yu anyaya? ²⁵ Tsahá yu tyahvi nyoo tsi Nyoo tsa cuenda ra Jesucristo tyin intuhun ñi maa ra cuví jacacu tsi yu. Vityin cutuñí iñi yu tyin cuñí tsi tyaa yahvi yu ley Nyoo. Maa tyin tun ña tyaa yahvi yu tsi ra Jesucristo, tandihí tsa ña vaha tsa cuñí cuñu ñuhu yu javaha yu, yacan cua quihí ndaha tsi yu.

8

Tatyí li Nyoo jatyinyeé tsi tsi yo tan cuví coo yo ñayivi tsa

¹ Maa tyin vityin, Nyoo ña tatsi tuñi ca ra tsi nyivi tsa iin ñi cuví tsihin ra Cristo Jesús, ñi tsa ña iyó ca cuhva cuñí cuñu ñuhu ñi tyin iyó ñi cuhva cuñí Tatyí li ra. ² Tacan tucu yoo, ña ndacá ñaha ca cuatyí tan tuhun tsihi tsi yo tyin vityin ndacá ñaha Tatyí li Nyoo tsi yo. Tan juvin tsi tsahá ñayivi tsa coo yo tsa cuenda tsa iin ñi cuví yo tsihin ra Cristo Jesús. ³ Nyoo javahá ra tsa ña cuví javaha ley tsa tyaa ra Moisés. Ley tsa tyaa ra Moisés ña cunyeé tsi jandihí tsi cuhva iyó nyivi. Yacan cuenda Nyoo jaquitsí ra tsi Sehe ra. Cuví ra tumaa rayñi ñuu ñayivi tan tyahvi ra tsa cuenda cuatyí yo tyin tacan tan cundihí tsa javahá yo cuhva cuñí cuñu ñuhu yo. ⁴ Javahá ra tyehen tyin tacan tan cuví javaha yo cuhva catyí ley tan ñavin cuhva cuñí cuñu ñuhu yo tyin vityin iyó yo cuhva cuñí Tatyí li Nyoo.

⁵ Nyivi tsa iyó cuhva cuñí cuñu ñuhu, maa ñi cuhva cuñí cuñu ñuhu ñi tsicá iñi ñi, maa tyin nyivi tsa iyó cuhva cuñí Tatyí li Nyoo tsicá iñi ñi cuhva cuñí Tatyí li Nyoo. ⁶ Nyivi tsa tsicá iñi maa ñi maa tsa cuñí cuñu ñuhu ñi, cua cunaa ñi. Maa tyin yoo tsa tsicá iñi cuhva cuñí Tatyí li ra, cua coo yo ñayivi tsa, tan cua coo tsa taxin añima yo. ⁷ Nyivi tsa tsicá iñi cuhva cuñí cuñu ñuhu ñi, ñi xaan iñi tsi Nyoo cuví ñi can, tyin ña cuñí ñi javahá ñi cuhva catyí ley ra tan ndi ña cuví javaha ñi can. ⁸ Yacan cuenda nyivi tsa nducú tsa cuñí cuñu ñuhu ñi, ña cuví javaha ñi cuhva taahán iñi Nyoo.

⁹ Maa tyin nyooḥo ña iyó ca ndo cuhva cuñí cuñu ñuhu ndo, tyin iin ñi cuví ndo tsihin Tatyí li Nyoo, tun nditsa tsa iyó Tatyí li Nyoo añima ndo. Nyivi tsa nduve Tatyí li ra Cristo iyó añima, ñavin nyivi cuenda ra Cristo cuví ñi. ¹⁰ Maa tyin tun iyó ra Cristo añima ndo, nyitó añima ndo tyin janduvahá Nyoo tsi

ndo nuu ra. Maa tyin cuñu ñuhu ndo tumaa tsa tsihi tsi jahā cuatyí. ¹¹ Nyoo janandoto ra tsi ra Jesús tsa yaha tsihi ra. Tan tacan tucu nyooho, tatun iyó Tatyí Ii ra añima ndo, cua janandoto ra cuñu ñuhu ndo tsihin Tatyí Ii ra tsa iyó añima ndo.

¹² Tan tacan yañi, nyaá javaha yo tsa javaha yo, maa tyin ñavin tsa javaha yo kuhva cuñi cuñu ñuhu yo. ¹³ Tyin tatun maa ñi maa kuhva cuñi cuñu ñuhu ndo iyó ndo, cua cunaa ndo nuu Nyoo. Maa tyin tatun tsihin Tatyí Ii Nyoo tan cuahán jandihí ndo tsa javahá ndo tsa caquiñi tsa cuñi cuñu ñuhu ndo, cua coo nyito ndo.

¹⁴ Tyin tandihí yoo tsa javahá kuhva jaquihín ityi Tatyí Ii Nyoo, sehe Nyoo cuví tsi yo. ¹⁵ Nyooho ña naquihín cuenda ndo Tatyí Ii Nyoo tsa cundaca ñaha tsi ndo tan cuví ndo tumaa musu. Tyin naquihín ndo Tatyí Ii Nyoo tsa tsahá tsa cuví ndo sehe Nyoo. Tan juvin ñi Tatyí Ii Nyoo tsahá tsa cahan yo tyehen tsihin Nyoo: “Tyatya”. Yacan cuenda ña taahán tsi nayuhvi ndo. ¹⁶ Tan Tatyí Ii ra tsa naquihín yo ndu iin tsi tsihin tsa nyito yo tan jacotó tsi naha tsi tsi yo tyin cuví yo sehe Nyoo. ¹⁷ Tan tsa cuenda tsa cuví yo sehe ra, iyó ndatu tsi yo tsa naquihín yo tsa vaha tsa catyí Nyoo tyin kuhva ra tsi yo iin caa ñi tsihin ra Cristo. Tyin tun nyehé yo tundoho tumaa tsa nyehé ra Cristo tundoho, quivi cua tahan tsi, Nyoo cua jacahnu ra tsi yo iin caa ñi tsihin ra Cristo.

¹⁸ Tsitó yu tyin tundoho tsa nyehé yo vityin, luhlu cuii ñi cuví tsi tan ña cuví jandu inducu yo itsi tsihin tsa sii caá tsa cua nyehé yo quivi tahan tsi. ¹⁹ Nyoo cua janaha ra tandihí sehe ra tsi tandihí tsa javahā ra tyin ndatu tsi tan cuñi tsi naha tsi nyehé tsi naha tsi tsi nyivi cuví sehe ra. ²⁰ Tandihí tsa javahā ra, tsa iyó nu ñuhu ñayivi tan andivi, tsa tiví tsi. Vasu ña cuñi tsi tiví tsi, maa tyin Nyoo tsahā ra tsa tiví tsi tsa cuenda cuatyí tsa javahā nyivi. Maa tyin catyí ra tyin coo quivi cua ndutsaa nyico tsi. ²¹ Tandihí tsa javahā Nyoo tan cua ndutsaa tsi inga tsaha, cua quita nuña tsi tan ña cua tiví ca tsi, tyin cua nasama Nyoo kuhva caá tsi vityin. Tan sii xaan cua cuñi tsi iin caa ñi tsihin tandihí sehe Nyoo tyin ña cua tiví ca tsi. ²² Tsitó yo tyin tandihí tsa javahā Nyoo tan nyehé xaan tsi tundoho tumaa tsa nyehé ñaha ñuhú sehe tundoho tun cua cacu sehe ña. ²³ Tacan tucu yoó tsa naquihín cuenda Tatyí Ii tsa tsahā jihna ñi Nyoo tsi yo, nyehé ndihí yo tundoho, maa tyin tsa cuenda tsa cuñi yo tsa tahan ñi tsi quivi tsa nasama Nyoo kuhva iyó cuñu ñuhu yo tan nyehé tandihí tsa javahā ra tyin cuví yo sehe ra. ²⁴ Vasu ndi maa ñaha ca ñihi yo tandihí can maa tyin tsitó yo tyin cua ñihi yo can tyin tsinú iñi yo. Tyin juvin ñi tsihin tsa tsinú iñi yo tan cacú yo. Tatun tsa nyehé yo tsa ndatú yo, nduve yahvi nyaá cuatu ca yo can tyin tsa iyó maa can tsi yo. ²⁵ Maa tyin ndita iñi yo tsa cua ñihi yo tsa ña nyehé yo, cuñi tsi tsa cunyeé iñi yo cuatu yo can.

²⁶ Tan juvin ñi tacan jatyinyeé Tatyí Ii Nyoo tsi yo tun nduve tunyee iñi iyó tsi yo tan ña tsitó yo nácaa ndacan tahvi yo tsi Nyoo kuhva taahán maa tsi. Tatyí Ii tsa iyó añima yo tsicán tahvi tsi tsi Nyoo tsa cuenda yo tsihin tuhun tsa ña cutuñi iñi yo. ²⁷ Tsitó maa Nyoo náa iyó añima yo, tan tsitó ra náa tsicán Tatyí Ii ra, tsa cuenda yoo tsa cuví yo nyivi ra tyin tsicán tsi kuhva cuñi maa ra ndacan yo tsi ra.

Tsa cuenda ra Cristo tan cuví jaha canaa yo siqui tundoho

²⁸ Tsitó yo tyin tandihí tundoho tsa nyehé nyivi tsa cuñi tsi Nyoo jatyinyeé can tsi ñi, tyin maa Nyoo cuví ra nacatsí tsi ñi, tumaa kuhva tyaá maa ra kuhva. ²⁹ Tyin nda quivi jihna ñi, tan tsa tsitó Nyoo yóo nyivi cua cunyicun tsi ra. Tan tyaá ra kuhva tyin cuví ñi sehe ra tan coo ñi kuhva cuñi ra. Maa tyin

ra Jesucristo cuví ra cua cuvi ra tsitsa tsa nuu tandihí ca yañi ra. Tan yañi ra cuví ñi yihí tuhun Nyoo. ³⁰ Tan ñi tsa tyaa Nyoo cuhva tyin cuvi ñi sehe ra, cana ra tsi ñi. Tan ñi tsa cana ra, naquihín cuenda ra tsi ñi tumaa tsatyin vaha ñi. Tan ñi tsa naquihín cuenda ra tsaha ra tsa cahnu cuvi ñi tsihin ra.

³¹ Yacan cuenda, ¿náa cua catyi yo? Tatun Nyoo tan nyaá ra tumañi iñi tsihin yo, ¿yóo cuví jaha canaa tsi yo? Yoñi. ³² Nyoo ña catyi ra tsa ña cua cuhva cuenda ra Sehe ra, tyin tsaha cuenda ra tsi ra tyin cúu ra tsa cuenda tandihí yo. Tun tacan tsaha ra Sehe ra tsa cuenda yo, ¿a ña cua cuhva ra tandihí ca tsa tsiñí ñuhu tsi yo? Cuhva ra. ³³ ¿Yóo cuví xico ñaha tsi yo tsa cuví yo nyivi nacatsj Nyoo? Yoñi. Tyin Nyoo tsa naquihín cuenda ra tsi yo tumaa tsatyin vaha yo. ³⁴ ¿Yóo cuví catyi tyin cuhun yo anyaya? Yoñi. Tyin ra Cristo tsa tsihí ra tsa cuenda cuatyí yo, tan nandotó ra tan vityin nyaá ra xiin cuaha Nyoo, tan tsicán tahvi ra tsi Nyoo tsa cuenda yo. ³⁵ Nduve náa cuví quihin nyaá tsa cuñí xaan ra Cristo tsi yo. ¿A cuví quihin nyaá tundoho itsi, a tsihí, a tsa caahán nyivi tsi yo tsa cuenda tuhun Nyoo, a tama, a tun nduve jahma yo, a tsa yuuhví, a tuhun tsihí? Ndi intuhun tsehe tan ña cuví quihin nyaá can tsa cuñí ra Cristo tsi yo. ³⁶ Tumaa catyi nu tutu Nyoo tyehen: Jutu Mañi yu, tandihí ñi quivi tan cuñí nyivi cahñi ñi tsi ndi tsa cuenda un. Tumaa javahá ñi tsihin mbee tsa cua cahñi ñi, tacan javahá ñi tsihin ndi, catyi tsi.

³⁷ Vasu ndi maa cuaha tundoho yahá yo, maa tyin tandihí ñi tsaha tsa nyehé yo tundoho tan jahá canaa yo, tyin ra tsa cuñí xaan tsi yo jatyinyeé tsi yo.

³⁸ Yacan cuenda tsitó vaha yo tyin nduve maa náa cuví quihin nyaá tsa cuñí xaan Nyoo tsi yo. Ndi tuhun tsihí, ndi ñayivi iyó yo, ndi ángel, ndi tatyí ña vaha, ndi tsa cuví vityin, ndi tsa cua cuví ityi nuu ca, ndi intuhun can tan ña cuví jandusiñ can tsi yo tsihin Nyoo. ³⁹ Ndi tsa iyó nu sucun, ndi tsa iyó nu cunu, ndi inga tsa javahá Nyoo, ña cuví jandusiñ can tsi yo tsihin Nyoo, ra tsa cuñí xaan tsi yo tsa cuenda ra Cristo Jesús Jutu Mañi yo.

9

Nyoo nacatsj ra tsi nyivi Israel

¹ Yuhu tsinú iñi yu tsi ra Cristo tan caahán yu tsa nditsa. Ña jandavi ñaha yu, tyin maa Tatyí Ii Nyoo jaquihín ityi tsa tsicá iñi yu. Yacan cuenda tsitó vaha yo tyin tsa nditsa caahán yu tun catyi yu ² cuiihya xaan cuñí yu tan uhvi xaan cuñí añima yu ³ tsa cuenda nyivi ñuu yu, ñi Israel. Cuñí xaan yu tsi ñi. Tan nda cuanda cuhva yu tsa cunaa añima yu tan cuhun tsi nu uhvi nu nduve ra Cristo tun tsatyin cuví cacu ñi tsihin can. ⁴ Tata ra Israel cuví ñi. Tan Nyoo naquihín cuenda ra tsi ñi tumaa tsa sehe ra tsi ñi. Tan janaha ra tsa cahnu cuví ra tsi ñi, tyin tsinyaá ra tsihin ñi. Tan ndoo ra tuhun tsihin ñi, tan tsaha ra ley ra tsi ra Moisés na cuhva ra tsi ñi. Tan janaha ra tsi ñi nácaa cuñí ra tsa jacahnu ñi tsi ra. Tan catyi ra tsihin ñi nácaa cua javaha ra tsa vaha tsihin ñi nu cuahán ca tsi. ⁵ Tata tsii tsaahnu yo cuví tsi ñi, tan tacan tucu ra Cristo cuenda cuñu ñuhu ra. Ra ican cuví Nyoo. Tan juvin ra ndacá ñaha tandihí tsa iyó. ¡Na jacahnu yo tsi ra tacan ñi maa! ¡Tan na cuví tsi tacan ñi!

⁶ ¿A catyi yu tyin ña javahá Nyoo tumaa cuhva catyi ra tsihin nyivi Israel tahan tsanaha? Ñavin. Cuñí tsi coto yo tyin ña tandihí nyivi Israel tan cuví ñi nyivi Israel tsa nditsa. ⁷ Tan tacan tucu ña tandihí tata ra Abraham tan cuví ñi tata ra tsa nditsa. Tyin tsa cahán Nyoo tsihin ra, cahán tsi tuhun intuhun ñi sehe ra. Tyin catyi Nyoo tsihin ra tyehen: “Tsa cuenda ra Isaac sehe un tan

cua coo nyivi tata un.”⁸ Tsehe janahá tsi yo tyin ñavin tsa cuenda tsa cuví ñi nyivi tata ra Israel tan cuví ñi nyivi Nyoo. Tyin nyivi tsa tsinú iñi tsa cahān Nyoo tyin cua javaha ra, ñi ican cuví sehe ra. Tumaa ra Abraham, tyin ra Abraham tsinú iñi ra tsa cahān Nyoo tsihin ra.⁹ Tan tyehen cahān Nyoo tsihin ra: “Tyambu vityin inga cuiya, cua quitsi nyico yu nu yucú ndo tan ña Sara tsa iyó iin sehe ña tacan”, catyí Nyoo tsihin ra.

¹⁰ Tan ñavin yacan ñi. Tyin cahān ndihi tucu ra tuhun ra Esaú tan ra Jacob, sehe ña Rebeca, iin ñi jutu ra naha, ra cuví tsi tsaahnu yo, ra Isaac.¹¹⁻¹² Maa tyin tsa ndi cumañi ca cacu ra naha tan tsa ndi ñaha ca javaha ra naha tsa vaha, tan tsa ña vaha, catyí Nyoo tsihin ña Rebeca tyin ra Esaú, sehe nuu ña, cua cuví ra musu ra tsa tsinu uvi. Javahā Nyoo tacan tyin nacatsi ra tsi nyivi tsa cuñi maa ra nacatsi ra, tan ñavin tsa cuenda tsa javahá ñi.¹³ Tumaa catyí ra nu tutu ra tyehen: “Cuñi ca yu tsi ra Jacob, tan ñavin ca ra Esaú.”

¹⁴ ¿Tun tacan náa cua catyí yo? ¿A catyí yo tyin ña vaha tsa javahá Nyoo? ¡Ña cuví! ¹⁵ Tyin catyí ra tsihin ra Moisés: “Cua cundaahvi iñi yu yóo nyivi cuñi maa yu cundaahvi iñi yu.” ¹⁶ Tacan javahá ra; cundaahvi iñi ra tsi nyivi tsa cuñi maa ra cundaahvi iñi ra. Tan ña cundaahvi iñi ra tsi ñi tsa cuenda tsa javahá ñi tan ndi ñavin tsa cuenda tsa nducú ñi cuhva. Tyin maa ra cuví ra cundaahvi iñi yóo cuñi maa ra. ¹⁷ Tumaa catyí nu tutu ra, nu caahán ra tyehen tsihin ra rey ñuhu Egipto: “Tsaḥa yu tsa cuví un rey tyin tacan tan coto un tyin iyó tunyee iñi tsi yu. Tan nacoto tucu tandihi nyivi yóo ra cuví yuhu”, catyí Nyoo. ¹⁸ Tan tsihin tsehe tsitó yo tyin Nyoo cundaahvi iñi ra tsi nyivi cuñi maa ra. Tan jandundavá tucu ra añima nyivi cuñi maa ra jandundavá ra añima.

¹⁹ Tan vasiqú yooho cua catyí un: “Yoñi cuví javaha tsa cuñi maa ñi javaha ñi tun ña tsaḥa Nyoo tyin javaha ñi can.” ¿Nacuenda tyin tyaḥ Nyoo cuatyí siqú ñi? ²⁰ Maa tyin ña vaha tun tsicá iñi un tacan. Tyin yoñi cuví catyí tyin ña vaha tsa javahá Nyoo. ¿Yóo ra cuví yooho tan nacahan un nu caahán Nyoo? ¿A cuví catyí iin quisí tsihin ra javahā itsi: “Ña taahán iñi yu cuhva javahā un tsi yu”? Ña cuví. ²¹ Tyin nyivi tsa javahá ndaha tyiñu, iyó ndatu tsi ñi tsa javaha ñi náa cuñi maa ñi tsihin ñuhu quisí can. Tan iin ñi ñuhu quisí can tsatyíñú ñi juvin ñi tsihin can javaha ñi quisí vaha tan quisí peehe.

²² Ña cuví catyí yo tyin ña vaha Nyoo tsa cuenda tsa tsatyíñú ra tsi nyivi tsa cua cuhun anyaya tan cunyeé iñi ra nyehé ra tsi ñi, tyin tsihin ñi can janahá ra tunyee iñi tsa iyó tsi ra tan janahá ra tyin cua tatsi tuñi ra tsi nyivi caquiñi.

²³ Javahá ra tacan tyin tacan tan coto yoo tsa cuví yo nyivi tsa cundaahvi iñi ra tyin nda tsanaha tan tsa nacatsi maa ra tsi yo tyin cuhva ra tsa cahnu cuví ra tsi yo. ²⁴ Yacan cuenda nacatsi ra tsi yo. Tan yihí yo cuví yo nyivi Israel, tan nyivi tsa ñavin ñi Israel cuví. ²⁵ Tumaa catyí Nyoo nu tutu tsa tyaḥ ra Oseas: Nyivi tsa ñavin nyivi ñuu yu cuví cua catyí yu tyin nyivi yu cuví ñi.

Ñi tsa ña cuñi yu, cua cuñi yu tsi ñi, catyí Nyoo.

²⁶ Tan nu catyí Nyoo: “Nyooḥo ñavin nyivi yu cuví ndo.” Juvin ñi ican cua catyí ra tsihin ñi: “Yuhu cuví Nyoo nyito, tan nyooḥo cuví sehe yu.” ²⁷ Maa tyin ra Isaías catyí ra tyehen tsa cuenda nyivi Israel: “Vasu ndi maa cuaha xaan nyivi tata ra Israel cua coo, tumaa tsa cuaha nyiti iyó yuhu ndutyá ñuhu, juhva ñi ñi cua cacu. ²⁸ Tan tsa yatyin cuii cua jandaa Jutu Mañi yo tandihi tsa cahān ra tan cua tatsi tuñi ra tsi tandihi nyivi iyó nu ñuhu ñayivi.” ²⁹ Tumaa catyí tucu ra Isaías tahān tsanaha:

Tun tsatyin Jutu Mañi yo, ra ndacá ñaha tandihí tsa iyó andiví, tan ña jacacu
ra tsi juhva yo, tsa naa tandihí yo,
Tumaa naa nyívi ñuu Sodoma tan ñuu Gomorra tahān tsanaha.

Nyívi Israel ña ñihí ñi cuhva nduvaha ñi nuu Nyoo,

³⁰ ¿Náa cua catyí yo? Nyívi tsa ñavin ñi Israel cuví, ña nducu ñi cuhva coo vaha ñi tsihin Nyoo, maa tyin Nyoo naquihín cuenda ra tsi ñi tumaa tsatyin vaha ñi tsa cuenda tsa tsinú iñi ñi tsi ra. ³¹ Tan nyívi Israel tsa nducú coo vaha tsihin Nyoo tsihin tsa javahá ñi cuhva catyí ley, ña cuví coo vaha ñi tsihin ra. ³² ¿Nacuenda? Tsa cuenda tyin cuñí ñi nduvaha ñi nuu Nyoo tsihin tsa javahá ñi, tan ñavin tsihin tsa tsinú iñi ñi tsi ra. Yacan cuenda tumaa tsa catyihí tsaha ñi yuu tan nduva ñi cuví can. ³³ Yuu can caahán Nyoo tuhun nu tutu ra tan catyí ra:

Tsaquín nyaa yu iin yuu nda ñuu Sión, tan janduvá tsi tsi nyívi.

Tan yuu can cuví ra Jesucristo.

Tan nyívi tsa tsinú iñi tsi ra tsa cuví yuu can, ña cua nduva ñi, catyí Nyoo nu tutu ra.

10

¹ Yañi, tsihin tsa ñi iñi añima yu tan tsicán tahvi yu tsa cuenda nyívi Israel tyin cuñí yu tsa cacu ñi. ² Tsandaa cuví yu tyin cuñí ñi jacahnú ñi tsi Nyoo, maa tyin ña ñihí ñi cuhva javahá ñi can. ³ Tyin ña tsitó ñi tyin juvin ñi maa Nyoo cuví ra janduvahá tsi nyívi nuu ra, tan tsa cuenda tsa ña tsitó ñi yacan, nducú ñi cuhva janduvaha ñi tsi ñi. Tan ña tsahá cuenda ñi tsi ñi tsi ra na janduvaha maa ra tsi ñi. ⁴ Tyin ra Cristo tsa quítsi ra tan javahá ra tandihí tsa catyí ley, tyin tacan tan tandihí nyívi tsa cua tsinu iñi tsi ra, naquihín cuenda Nyoo tsi ñi tumaa tsatyin vaha ñi.

⁵ Catyí ra Moisés tyin cuví nduvaha nyívi nuu Nyoo, tatun tyaá yahvi ñi tandihí tsa catyí ley, tyin tyaá ra tyehen: “Nyívi tsa tyaá yahvi tandihí tsa catyí ley, cua coo ñi ñayívi tsa ña cua naa maa.” ⁶ Maa tyin tsa cuenda tsa nduvahá yo nuu Nyoo tsihin tsa tsinú iñi yo tsi ra Cristo, catyí tutu ra tyehen: “Ña catyí un: ¿Yóo cundaa andiví? tyin tun cahan un tacan cuñí tsi catyí tyin januu un tsi ra Cristo nda nu ñuhu ñayívi tan jacacu ra tsi yo.” Ña cahan un tacan tyin ra Cristo tsa yahá quítsi ra. ⁷ Tan ndi ña catyí un: “Cuñí tsi tsa nuu iin ra nda nu yucú ndiyi tsitsi ñuhú tan janandoto ra tsi ra Cristo”. Ña cahan un tacan, tyin ra Cristo tsa yahá nandoto ra. ⁸ Ña catyí un tacan tyin tyehen catyí nu tutu Nyoo: “Tuhun Nyoo yatyin iyó tsi tsihin ndo, iyó tsi yuhu ndo tan tsitsi añima ndo.” Tuhun ihya taahán tsi tsinu iñi ndo tyin juvin ñi tsi jacuahá tucu nyuhu. ⁹ Tatun catyí un tsihin yuhu un tyin ra Jesús cuví Jutu Mañi yo, tan tsinu iñi un tsihin añima un tyin Nyoo janandoto tsi ra tsa yahá tsihi ra, cua cacu un. ¹⁰ Tyin tsihin añima yo cuñí tsi tsinu iñi yo tsi ra Cristo tan cuví nduvaha yo nuu Nyoo, tan tsihin yuhu yo cuñí tsi catyí yo tyin tsinú iñi yo, tyin tacan tan cacu yo. ¹¹ Tuhun Nyoo catyí tsi tyehen: “Ndi intuhun nyívi tsa tsinú iñi tsi ra tan ña cua tahan ñi ticanuu.” ¹² Tyin Nyoo inducu ñi cuñí ra nyehé ra tsi nyívi Israel tan nyívi inga ñuu. Tyin intuhun ñi maa ra ndacá ñaha tsi tandihí yo. Tan nasocó ra tsi tandihí nyívi tsa tsicán tahvi tsi ra. ¹³ Tyin tyehen catyí tuhun Nyoo: “Tandihí nyívi tsa tsicán tahvi tsi Jutu Mañi yo cua cacu ñi.” ¹⁴ Maa tyin ¿nácaa cua ndacan tahvi ñi tsi ra tatun ñaha ca tsinu iñi ñi tsi ra? Tan ¿nácaa cua tsinu iñi ñi tsi ra tatun ñaha ca cuñí ñi tuhun ra? Tan ¿nácaa cua cuñí ñi tuhun ra tatun yoñi cahan tuhun ra tsihin ñi? ¹⁵ Tan ¿nácaa

cuhun nyiví cahan ñi nácaa coo taxin nyiví, taton yoñi jacuhun tsi ñi? Tumaa catyí nu tutu Nyoo: “Sii xaan cuví nu tsaá ñi caahán tuhun vaha.” ¹⁶ Maa tyin ña tandihí nyiví tan tyaá yahví ñi tuhun tsa jacacú Nyoo tsi yo. Tumaa catyí ra Isaías: “Jutu Mañi yu, yoñi cuñí tsinu iñi tuhun caahán ndi”, catyí ra. ¹⁷ Yacan cuenda cuñí tsi tsa tyaa soho jihna yo tuhun ra Cristo, tacan tan tsinu iñi yo tsi ra.

¹⁸ Maa tyin tsicá tucu iñi yu: ¿A ña tsiñí nyiví Israel tuhun Nyoo? ¡Tsiñí ñi! Tumaa catyí nu tutu Nyoo:

Jutu Mañi yu, nyiví tsa jacotó tuhun un tsa jacotó ñi tuhun un nanií cahnu nu ñuhu ñayiví,

tan ña nacoó ihñi ñi ndi intuhun ñuu luhlu, catyí tsi nu tutu Nyoo.

¹⁹ Tan tsicá nyico tucu iñi yu: ¿A ña cutuñí iñi nyiví Israel tyin cua cacu nyiví tsa ñavin ñi Israel cuví? ¡Cutuñí iñi ñi! Tyin tsa jihna ñi ra Moisés tyaa ra tuhun cahan Nyoo tsihin ñi Israel nu tutu tyehen:

Nyooho, ndasi cua cuñi ndo tyin cua cuhva yu tsa vaha tsi nyiví tsa ñavin nyiví ñuu yu cuví.

Tan cua cúu ndo tsihi nyehé ndo tsi ñi, catyí Nyoo.

²⁰ Tan ra Isaías caná iñi ra cahan ra:

“Nyiví tsa ña nanducú tsi Nyoo, nañihí ñi tsi ra.

Tan janahá ra tsi ra tsi ñi tsa ña tsicá tuhun tuhun ra.”

²¹ Tan tyaa tucu ra Isaías tuhun cahan Nyoo tsihin ñi Israel tyehen: “Tandihí ñi quiví caná yu tsi nyiví yu, na nacuhva cuenda ñi tsi ñi tsi yu, maa tyin ña tyaa yahví ñi. Tan jandavá xaan ñi iñi ñi”, catyí Nyoo.

11

Nyiví Israel tsa ñihí cuhva cacu

¹ ¿A ña cuñí ca Nyoo tsi nyiví Israel? Ñavin tsa ña cuñí ca ra tsi ñi, tyin juvin ñi ra Israel cuví tucu yuhu. Tyin tata ra Abraham tan tata ra Benjamín cuví yu. ² Tahan tsanaha nacatsí Nyoo tsi ñi Israel tyin cuví ñi nyiví ra. Tan vityin ñavin tsa jatsiyó cuí ra tsi ñi. ¿A ña ñuhú iñi ndo tyin catyí nu tutu Nyoo tyin ra Elías, ra cuví ndusu yuhu Nyoo, catyí ra tyin ña vaha nyiví Israel tan tsicán tahví ra tsi Nyoo tyehen? ³ “Jutu Mañi yu, nyiví Israel tsahñí ñi tsi ra cuví ndusu yuhu maa un naha ra, tan tsanjí ñi nu jacahnú nyiví tsi un. Tan intuhun ña maa yu ndoo, tan cuñí ndihí ñi cahñí ñi tsi yu”, catyí ra. ⁴ Maa tyin nacahan Nyoo tan catyí ra tsihin ra Elías: “Ñavin maa ñi maa un ndoo. Tyin utsa mil ca nyiví naquihín vaha yu, ñi tsa ña jacahnú maa tsitoho Baal”, catyí Nyoo tsihin ra. ⁵ Tan juvin ñi tacan vityin, ndoo juhva nyiví jacahnú tsi Nyoo. Tan tsa cuenda tsa vaha Nyoo nacatsí ra tsi ñi tyin jaha ra tucahnu iñi tsi ñi. ⁶ Tan ña jahá ra tucahnu iñi tsi yo tsa cuenda tsa javahá yo tsa vaha. Tyin tun tsatyin jahá Nyoo tucahnu iñi tsi yo tsa cuenda tsa javahá yo tsa vaha, cuñí tsi catyí tyin ña jacacú ra tsi yo tsihin tsa vaha ra.

⁷ Tan ¿nácaa? Nyiví Israel nducú ñi cuhva nduvaha ñi nuu Nyoo, maa tyin ña ñihí ñi cuhva. Juhva ñi ñihí ñi cuhva. Tan ñi tsa ñihí cuhva can cuví ñi tsa nacatsí maa Nyoo. Tan ñi tsa ña ñihí cuhva cacu, ndundavá añima ñi. ⁸ Tumaa catyí nu tutu Nyoo tyehen: “Nyoo tsahá ra tsa ña cutuñí iñi ñi. Tan vasu ndi maa iyó tinuu ñi, ña tsahá ra tsa nyehé ñi. Iyó soho ñi, maa tyin ña cutuñí iñi ñi tsa tsiñí ñi. Tacan iyó ñi nda cuenda vityin.” ⁹ Tan juvin ñi catyí tucu ra David tyehen:

Javahá ñi vico tan cusii iñi ñi, maa tyin yacan cua jatívi tsi ñi.

Tan cua tatsi tuñi Nyoo tsi ñi tyin cuví can tumaa iin trampa tsa cuenda ñi.

¹⁰ Tan cua cuaa ñi na ña nyehe ca ñi tsa nditsa.

Tan nacosó tsa vee síqui ñi, catyí ra David tuhun nyívi Israel tsa ña tsinú iñi tsi Nyoo.

Nacaa nduvahá nyívi tsa ñavin ñi Israel cuví nuu Nyoo

¹¹ Tan vityin tsicá tuhun yu: ¿A tsa cuenda tsa ña tyaá yahvi nyívi Israel tsa cahán Nyoo, tan ndoó cuii ñi tsa ña cua cacu ñi? Ñavin tsa ndoo cuii ñi. Ndoq nuu ñi maa ñi, tyin jacacú jihna Nyoo tsi nyívi tsa ñavin ñi Israel cuví. Tyin tacan tan tsa cua nyehe ñi yacan, ndasi cuñi ñi tan natsinu ndihí iñi ñi tsi Nyoo. ¹² Tatun cuaha nyívi tsa ñavin ñi Israel cuví tan natsinu iñi ñi tsi Nyoo tsa cuenda cuatyí tsa javaha ñi Israel, cuaha ca ñi cua natsinu iñi quívi tsa cua cuví nyico tandihí nyívi Israel nyívi Nyoo.

¹³ Cuñi yu cahan yu juhva tsihin nyooho tsa ñavin ñi Israel cuví. Ra Jesús tava tyiñu ra tsi yu tsa quitsi yu nu iyó ndo. Tan tsitó yu tyin cuñi tsi tsa javaha yu tyiñu ihya tyin cahnu xaan cuví tsi. Cahnu jahá yu itsi ¹⁴ tan caahán yu tuhun Nyoo tsihin ndo tyin na nyehe nyívi ñuu yu, ñi Israel, nácaa tsinú iñi ndo tsi Nyoo, tyin vasiqui tacan tan natsinu ndihí iñi ñi tan cacu ñi. ¹⁵ Tyin tun tsa cuenda tsa ña natiñ cuenda Nyoo tsi nyívi Israel tan nduvahá iyó nyívi inga ñuu tsihin Nyoo, quívi cua naquihin cuenda ra tsi ñi cua cuví tsi tumaa tsa cua nandoto ñi, tyin cuaha ca ñi cua tsinu iñi tan ñavin ca tsa jihna ñi. ¹⁶ Iin cuhva tatun vaha quitá paan tsa javaha yo tsa jihna ñi tsihin yutsan paan, vaha tandihí ca yutsan can. Tan tatun iin yoho yutun tan vaha tun, vaha tandihí ca soco tun. Tacan tucu nyívi Israel nyaá yahvi ñi nuu Nyoo tyin tsii tsaahnu ñi yihí ra naha cuenda ra.

¹⁷ Tan nyívi Israel cuví ñi tumaa soco yutun olivo. Tan nyooho cuví ndo tumaa soco yutun olivo cuuhu. Tumaa tuhvá nyívi tsaahnya iin soco yutun tan natyaa ñi inga soco yutun, tacan javaha Nyoo tyin jatsiyó ra tsi nyívi Israel tan tyaá ra tsi nyooho tsa cuví ndo nyívi inga ñuu. Tacan cuví tan tsaá ndo cuví ndo nyívi cuenda Nyoo tan naquihin ndo tandihí tsa vaha tsa iyó tsi ra. ¹⁸ Maa tyin na ña cuñi ndo tyin vaha ca ndo tan ñavin ca ñi Israel tsa cuví soco yutun olivo vaha. Tatun tsicá iñi ndo tacan nducuhun iñi ndo tyin ñavin maa ndo nyisó yoho yutun can, tyin yoho yutun can nyisó tsi ndo.

¹⁹ Vasiqui cua catyí ndo: “Juvín, maa tyin Nyoo tsahnya ra soco yutun can tan natyaa ra tsi nyuhu.” ²⁰ Nditsa. Maa tyin jatsiyó nuu ñi ra tsi nyívi Israel tsa cuenda tsa ña tsinú iñi ñi tsi ra. Tan tyacu ra tsi nyooho tsa cuenda tsa tsinú iñi ndo tsi ra. Yacan jaha ndo cuenda tsa ña nduyaa ndo tsihin can. ²¹ Tyin tatun ña jahá Nyoo tucahnu iñi tsi ñi tsa cuví soco vaha can, ndi nyooho tan ña cua jaha ra tucahnu iñi tatun ña tsinú vaha iñi ndo tsi ra. ²² Nyehe ndo tyin vaha xaan iñi Nyoo, maa tyin xaan tucu ra tsihin nyívi tsa ña naquihin cuenda tumañi iñi tsa tsahá ra tsi ñi. Vaha iñi ra tsihin nyooho yacan tyaá yahvi ndo tsa vaha tsa tsahá ra tsi yo. Tyin tatun ña tyaá yahvi ndo itsi, cua jatsiyó nyico ra tsi ndo tsaha yutun olivo ra. ²³ Tyin tatun natsinu nyico iñi nyívi Israel inga tsaha, cua cunyaa nyico ñi tsaha yutun olivo nu coyó ñi. Tyin Nyoo iyó tunyee iñi tsi ra tsa natyaa tahan nyico ra tsi ñi inga tsaha. ²⁴ Nyooho tsa ñavin Israel cuví, cuví ndo tumaa soco yutun olivo cuuhu, maa tyin Nyoo naquihin ra tsi ndo tan tyaá tahan ra tsi ndo tsihin yutun olivo vaha tsa cumí ra. Tacan cua javaha ra quívi cua cuñi ra iin yaha ñi cua tyaá tahan nyico ra soco yutun vaha nu tsinyaa jihna maa tsi.

Nyívi Israel cua cacu nda nu ndihí

²⁵ Yañi, cuñi yu tsa coto ndo iin tsa xeehe tsa javahá Nyoo, tyin tacan tan ña caca iñi ndo tyin tsitó xaan ndo. Cuaha xaan nyivi Israel ndundava ña ña ñi, nda cuanda cacu tandihi nyivi inga ñuu tsa nyaa tyin cacu. ²⁶ Tsa yaha cua cacu ñi, tacan tan cua cacu tandihi nyivi Israel tyin catyí nu tutu Nyoo tyehen: Ra tsa jacacú tsi nyivi, nda Sión cua quee ra. Tan cua quihin nyaa ra cuatyí nyivi ra Jacob.

²⁷ Tuhun ihya cuví tsa cua ndoo yu tsihin ñi quivi cua quihin nyaa yu cuatyí ñi, catyí Nyoo nu tutu ra.

²⁸ Cuxaán xaan nyivi Israel tsihin Nyoo tsa cuenda tuhun vaha ra Cristo tsa cacú yo. Tyin tacan tan cuví tsinu iñi nyooho. Tahan tsanaha nacatsi Nyoo tsi ra Abraham, tan ra Isaac, tan ra Jacob tyin tsinu iñi ra naha tsi ra. Tan cuñi ndihi ra tsi nyivi Israel tyin tata ra naha cuví tsi ñi. ²⁹ Tyin tsa tsa tsaha Nyoo, ña quihin nyaa nyico ra can. Tyin yoo tsa cuví nyivi Nyoo, ña tuhvá ra cahan tyin ñavin nyivi ra cuví yo. ³⁰ Tsanaha nyooho ña tyaá yahvi ndo tsi Nyoo. Maa tyin vityin tyaá yahvi ndo tsi ra tan cundaahvi iñi ra nyehé ra tsi ndo tsa cuenda tsa ña tyaá yahvi nyivi Israel tsi ra. ³¹ Nyivi Israel ña tyaá yahvi ñi tsi Nyoo vityin tumaa tsa ña tyaá yahvi nyooho tsi ra tahan tsanaha. Maa tyin cua cundaahvi iñi ra nyehe ra tsi ñi tumaa tsa cundaahvi iñi ra nyehé ra tsi nyooho. ³² Yihí tsaha tandihi nyivi tan nacoó ñi tsa tyaá yahvi ñi tsi Nyoo. Tсахá ra ndatu tsi ñi tsa javahá ñi tacan, tyin tacan tan iin caa ñi cua cuví cundaahvi iñi ra tsi tandihi yo.

³³ ¡Cahnu xaan cuví tsa cuca tan tsa tsitó Nyoo tan tsa tsiñi tuñi tsa iyó tsi ra! Yoo ña cuví nacatyí tuhun yo cuhva tsicá iñi ra, tan ndi iin sava quivi ña cua cutuñi iñi yo tandihi cuhva javahá ra. ³⁴ ¿Yóo cutuñi iñi cuhva tsicá iñi Jutu Mañi yo? ¿O yóo jacuahá tsi ra? Yoñi. ³⁵ Tyin yoñi cuví cuhva jhna iin tsa vaha tsi ra, tan tsa cuenda can tan cuíta iñi ñi tyin cua naquihin ñi yahvi cuenda can. ³⁶ Tyin tandihi maa tsa iyó, maa Nyoo javahá itsi, tan iyó tsi tsa cuenda ra. ¡Na jacahnu yo tsi Nyoo tacan ñi maa! Tan na cuví tsi tacan.

12

Na javaha yo cuhva cuñi Nyoo tsihin ñayivi iyó yo

¹ Yacan cuenda yañi, tsitó ndo tyin cundaahvi xaan iñi Nyoo nyehé ra tsi yo, tan tsa cuenda yacan caahán ndaahvi yu tsihin ndo. Cuhva cuenda ndo cuñu ñuhu ndo tsi Nyoo, tan cuví tsi iin tsa nyito tsa jamañi ndo, tyin tsa javahá yo tacan janahá tsi tyin nditsa tsa jacahnú yo tsi ra. Yacan cuví tsa taahán iñi ra. ² Ña cõo ca ndo cuhva iyó nyivi ñuu ñayivi ihya. Cuhva ndo tsa nasama Nyoo cuhva tsicá iñi ndo, tan cuhva iyó ndo, tyin tacan tan coto ndo javaha ndo tsa taahán iñi maa ra: náa ndihi tsa vaha tan tsa cuíti.

³ Nyoo, tsa cuenda tsa vaha iñi ra, tan tava tyiñu ra tsi yu tyin cuví yu iin ra caca tyiñu ra Jesucristo. Yacan cuenda catyí yu tsihin tandihi nyooho tyin ndi intuhun ndo tan ña caca iñi ndo tyin vaha xaan ndo. Maa tyin caca iñi ndo nácaa iyó ndo tan náa cuví tsa vaha tsa tsaha Nyoo tsi ndo iin caa ñi tsihin tsa tsinu iñi ndo tsi ra. ⁴ Tumaa soho yo tan tinuu yo iin ñi cuví tsi tsihin tandihi ca tahan tsi tsa iyó iin cuñu ñuhu. Tan tsa intuhun intuhun tsi siin siin tyiñu javahá tsi. ⁵ Tacan tucu yoo, cuaha xaan yo maa tyin iin ñi cuñu ñuhu cuví yo tyin iin ñi cuví yo tsihin ra Cristo. Tan tsa tacan, iin ñi cuví tucu yo tsihin inga tahan yo tyin iin ñi cuñu ñuhu cuví yo.

⁶ Siin siin ndatu tsahá Nyoo tsi tsa intuhun intuhun yo, tsahá ra tsi yo ndáa tsa cuñi maa ra cuhva ra tsi yo, tan na cuatyíñu yo itsi. Tatun tsahá ra tsa

cuvi yo ndusu yuhu ra, na tsinu iñi yo tyin tyiñu can tsahá ra tsi yo, tan na javaha yo itsi. ⁷ Tatun tsahá ra ndatu tsi iin yo tsa jatyinyee yo tsi nyivi, na javaha yo itsi tsihin tsa nñi iñi añima yo. Tatun tsi inga yo tsahá ra tsa jacuahá yo tsi nyivi, na jacuahá yo tsi ñi tsihin tsa nñi iñi yo. ⁸ Tatun tsahá ra tsi inga yo tsa cuvi jandu iin yo iñi nyivi, na jandu iin yo iñi ñi tsihin tsa nñi iñi añima yo. Tatun inga yo ñihí tsa jatyinyee yo tsi nyivi tsihin xuhun, na jatyinyee yo tsi ñi, maa tyin ña cuita iñi yo tyin natyahvi ñi tsi yo. Tatun inga yo ñihí tsa jaquihín ityi yo tsi nyivi yihí cuenda Nyoo tsihin yo, na jaha yo cuenda cuhva jaquihin ityi yo tsi ñi. Tatun inga yo ñihí tsa jatyinyee yo tsi nyivi tsa iyó tsa tsiñi ñuhu, na jatyinyee yo tsi ñi tsihin tsa sñi cuñi yo.

Náa taahán tsi javaha nyivi yihí cuenda ra Cristo

⁹ Cuñi tahan ndo tsi ndo tsihin tsa nñi iñi añima ndo. Ndasí cuñi ndo nyehé ndo tsa ña vaha. Tan cūanyicun ndo tsa vaha. ¹⁰ Cuñi tsi tsa cuñi tahan yo tsi yo tumaa tsa cuñi yo tsi nyivi yo. Tan tyaa yahvi tahan ndo tsi ndo tan jaha tahan ndo tsa ñayivi tsi ndo.

¹¹ Ndūcu ndo tunyee iñi tsa iyó tsi Nyoo. Ña utsan jaha ndo tsi ndo. Tan jaha tyiñu ndo tyiñu Jutu Mañi yo tsihin tsa nñi iñi añima ndo.

¹² Coo ndo ñayivi ihya tsihin tsa sñi, tyin tsitó ndo tyin cua coo ndo tsihin Nyoo nu cuahán ca tsi. Janyee ndo iñi ndo nyehé ndo tundoho. Tan ndacan tahvi ndo tsi Nyoo iin nyita ñi.

¹³ Cuhva ndo tsa tsiñi ñuhu tsi nyivi yihí cuenda Nyoo tsihin ndo. Vaha tyanu ndo tsi nyivi tsaá vehe ndo.

¹⁴ Tatun caahán nyivi ndavaha ñi tsi ndo, vaha cahan ndo tsihin ñi, tan ña cahan ndasí ndo tsi ñi. Ndacan tahvi ndo tsi Nyoo tsa cuenda ñi, na nasoco ra tsi ñi.

¹⁵ Sñi cuñi ndo tsihin nyivi sñi cuñi. Vācu ndo tsihin nyivi tsa tsacú jahá tucuihya iñi.

¹⁶ Ña cañi tahan ndo. Iin ñi cuvi ndo tsihin tahan ndo. Ña cahnu jaha ndo tsi ndo; jandundaahvi ndo tsi ndo tumaa iyó nyivi ndaahvi; ña jaha ndo tsa tsitó xaan ndo.

¹⁷ Ña javaha ndo tsa ña vaha tsihin nyivi tsa javahá tsa ña vaha tsihin ndo. Jañiñi ndo tsi ndo tan javaha ndo tsa vaha tsihin tandihí nyivi. ¹⁸ Ndūcu ndo cuhva coo taxin ndo tsihin tandihí nyivi. ¹⁹ Yañi, cuñi yu tsi ndo. Tatun javahá nyivi tsa ña vaha tsihin ndo, ña tatsi tuñi ndo tsi ñi; natyaa cuenda ndo tsi ñi ndaha Nyoo na tatsi tuñi maa ra tsi ñi. Tyin nu tutu ra catyí tsi tyehen: “Yuhu taahán tsi tatsi tuñi tsi nyivi tan tyahvi tsi ñi”, catyí Jutu Mañi yo. ²⁰ Tan juvin ñi catyí tucu ra: “Tatun nyivi xaan iñi tsi ndo tan tsihocó ñi, cuhva ndo tsa catsi ñi, tan tatun na ityi iñi ñi, cuhva ndo ndutyá coho ñi. Tyin tsa javaha ndo tacan, cuaaha tacan ña nuu ñi cua cuvi, tyin cua nducahan nuu ñi.” ²¹ Ña cuhva ndo tsa cundaca ñaha tsa ña vaha tsi ndo, maa tyin jandu iin ndo iñi añima ndo. Javaha ndo tsa vaha tan cañi ndo nu vatsí tsa ña vaha tsihin can.

13

¹ Tandihí nyivi cuñi tsi tsa tyaa yahvi ñi tsi ra cumi tyiñu cuenda ra ndacá ñaha naha ra. Tyin tandihí maa ra cumi tyiñu tan Nyoo tsahá tyiñu can tsi ra naha. Ra cumi tyiñu tsa iyó, maa Nyoo tsahá tsi ra naha tsa cuvi ra naha tyiñu. ² Yacan cuenda, nyivi tsa ña tyaa yahvi tsi ra naha, cuñi tsi catyí tyin ña tyaa yahvi ñi tsa caahán Nyoo. Ñi tsa javahá tacan, tsicoo cuatyí ñi tsa cuenda can, tan cua cutuñi ñi. ³ Tyin ra ndacá ñaha naha ra, ña nyisó tyiñu ra naha

tsa jayuhvi ra naha tsi nyivi tsa javahá tsa vaha. Nyisó tyiñu ra naha tsa tatsi tuñi ra naha tsi nyivi tsa javahá tsa ña vaha. Tun ña cuñi un tsa jayuhvi ra cumi tyiñu naha ra tsi un, ço vaha, tyin tacan tan cua nyehe ra naha tyin vaha iyó un tan vaha nyivi cuví un. ⁴ Tyin ra cumi tyiñu naha ra iyó ra naha tsa javahá ra naha tyiñu Nyoo tsa cuenda tsa vaha tsi maa yo. Maa tyin tatun ña catsi iyó un, yacan nditsa cuví nayuhvi un tsi ra naha. Tyin ñavin nyecú taxin ñi maa ra naha vehe tyiñu. Nyecú ra naha tsa tatsi tuñi ra naha tsi nyivi javahá tsa ña vaha, tyin tyiñu can tyaa Nyoo tsi ra naha. ⁵ Yacan cuenda ñiñi cuñi tsi tsa tyaa yahvi ndo tsi ra cumi tyiñu naha ra, ñavin ñi tsa cuenda tsa cuví tatsi tuñi ra naha tsi ndo, maa tyin tsa cuenda tyin tsitó ndo tyin tacan taahán tsi javaha ndo. ⁶ Tan inga tuhun tsa cuenda can tyahvi ndo xuhun tsa taavá ra cumi tyiñu naha ra tsa cuenda tsa janduvahá ra naha ñuu ndo. Jahá tyiñu ra naha tyiñu Nyoo, tyin yacan tyiñu nyecú ra naha.

⁷ Cuhva ndo tsa taahán tsi tsi intuhun intuhun nyivi. Tyahvi ndo náa taahán tsi tyahvi ndo tsa cuenda tsa vaha tsi ñuu ndo. Tyaa yahvi ndo tsi nyivi tsa taahán tsi tyaa yahvi ndo. Jaha ndo tsa ñayivi tsi nyivi tsa taahán tsi jaha ndo tsa ñayivi tsi. ⁸ Ña cunyaa cuenda ndo tsi ndi intuhun nyivi. Maa tyin cuñi tahan ndo tsi ndo, tyin tsa cuñi tahan yo tsi yo, javahá yo tandihi tsa catyí ley Nyoo tsa tyaa ra Moisés tyin javaha yo. ⁹ Catyí ley Nyoo tyehen: “Tun iyó ñasihi ndo o yíi ndo ña ço inga ñaha o rayíi tsi ndo. Ña cahñi ndo. Ña sũhu ndo. Ña çahan ndo cuendu siqui ndi intuhun nyivi. Ña nyiyo iñi ndo tsa tsii inga nyivi.” Tandihi tsehe tan inga ca ley javahá ndo itsi tatun cuñi ndo tsi tahan ndo tumaa tsa cuñi ndo tsi maa ndo. ¹⁰ Tatun cuñi ndo tsi tahan ndo, ña javaha ndo tsa ña vaha tsihin ñi. Tsihin tsa cuñi tahan yo tsi yo, javahá yo tandihi tsa catyí ley Nyoo tsa tyaa ra Moisés.

¹¹ Tsihin tuhun ihya jaha ndo cuenda tsi ndo quivi iyó ndo vityin. Tyin tsa tahan tsi cuhva tsa taahán tsi ndoto yo. Tyin vityin tsa yatyin cuii ca cua cunuhu añima yo nu nyaá Nyoo tan ñavin ca quivi tsa quihvi yo tuhun ra. ¹² Tsa yahá tsa tsacuaa, tan tsa cua tuvi. Yacan cuenda cuñi tsi jandihí ndo tsa javahá ndo tsa javahá nyivi iyó nu naa. Tan jaha tyiñu ndo tsihin tsa vaha tsa tsahá Nyoo tsi ndo; javaha ndo cuhva javahá nyivi iyó nu nditsin. ¹³ Cuñi tsi cuii coo yo tyin nu nditsin Nyoo iyó yo. Tan ña çoho ndo nyixi, ña javaha ndo vico tan çoho ndo nyixi. Nyooho rayíi, ña ça nuu ndo tsihin ñaha. Tan nyooho ñaha ña ça nuu ndo tsihin rayíi. Ña ço viciu tsi ndo. Tan ña ndasi cuñi ndo nyehe ndo tsi nyivi. Tan ña nyiyo iñi ndo tsa iyó tsi ñi. ¹⁴ Maa tyin ço ndo tsihin Jutu Mañi yo Jesucristo, tumaa tsinditsí yo jahma tacan na cunditsi yo tsi ra. Tan ña çaça iñi ndo javaha ndo cuhva cuñi cuñu ñuhu ndo.

14

Na ña cahan nyaa yo tsi nyivi

¹ Tatun iin nyivi yihí cuenda Nyoo tan luxu ñi tsinú iñi ñi tsi ra, ña vaha tsa ña naquihin cuenda ndo tsi ñi. Naquihin cuenda ndo tsi ñi, maa tyin ña çahan ndo tsa luxu tuhun Nyoo tsa ña cutuñi vaha iñi yo tsihin ñi coto ndu uvi iñi ñi. ² Cua cuhva yu iin cuhva tsi ndo: Tsa cuenda juhva nyivi cuví catsi maa ñi tandihi maa nuu tsa iyó. Tan tsa cuenda tucu inga ñi, maa ñi maa yucu cuví catsi ñi, cuñi ñi. Ñi ihya cuví ñi tsa ña ñihi vaha nyaá tsihin Nyoo. ³ Maa tyin ñi tsa tsatsí tandihi can, taahán tsi naquihin cuenda ñi tsi ñi tsa tsatsí yucu ñi. Tan ñi tsa tsatsí yucu, na ña cahan nyaa ñi tsi inga ñi can. Tyin Nyoo

naquihín cuenda ra tsi ñi can. ⁴ Tan ζyóo nyivi cuví yooho tan cahan nyaa un tsi musu inga ra? Tyin tun vaha o ña vaha javahá ñi, nyehe maa tsitoho ñi tshin ñi. Tan vaha cua quita ñi tyin Jutu Mañi yo, iyó tunyee iñi tsi ra tan cua jatyinyee ra tsi ñi na quita vaha ñi.

⁵ Inga tucu cuhva: Yihí nyivi jacahnú ñi iin quivi tan ñavin ca inga quivi. Tan tsa cuenda inga nyivi nduce quivi cahnu cuví tan quivi ña cahnu cuví. Inducu ñi quivi cuñi ñi, yacan cuenda intuhun intuhun maa yo tan cuñi tsi tyihí tuñi vaha iñi yo. ⁶ Ñi tsa naquihín vaha quivi, naquihín vaha ñi can tsa cuenda tsa jacahnú ñi tsi Jutu Mañi yo. Ñi tsa ña naquihín vaha can, juven ñi jacahnú tucu ñi tsi Nyoo tyin ña naquihín vaha ñi can. Tan ñi tsa tsatsí tandihí can, juven ñi tsatsí tucu ñi tsa cuenda tsa jacahnú ñi tsi Jutu Mañi yo, tan nacuhvá ñi tyahvi nyoo tsi ra tyin tsahá ra tsa catsi ñi. Tan ñi tsa ña tsatsí tandihí, ña tsatsí ñi tsa cuenda tsa jacahnú ñi tsi Jutu Mañi yo tan juven ñi nacuhvá tucu ñi can tyahvi nyoo tsi ra.

⁷ Tyin ndi intuhun yo tan ña iyó yo tshin tunyee iñi maa yo. Tan ndi ñavin tsa cuenda maa yo tsiihí yo. ⁸ Tyin tatun iyó yo, iyó yo tsa jaha tyiñu yo tyiñu Nyoo. Tan tatun tsiihí yo, tsiihí yo tsa cuenda Jutu Mañi yo tan naquihín ra añima yo. Yacan cuenda tsii maa Jutu Mañi yo cuví tsi yo vasu ndi maa nyito yo o tsiihí yo. ⁹ Tyin ra Cristo tsihí ra tan nandoto ra tyin cundaca ñaha ra tsi nyivi nyito tan nyivi ña nyito.

¹⁰ Maa tyin yooho, ¿nacuenta nyehé nyaa un tsi ra yañi un? ¿O nacuenta ña naquihín cuenda un tsi ra?, tan tsitó vaha un tyin tandihí yo tan cua tahan tsi quivi cuhva cuenda yo tsi yo nuu ra Cristo tyin tatsi tuñi ra tsi yo. ¹¹ Tumaa tsa catyí Nyoo nu tutu ra tyehen:

Yuhu nditsa tsa nyito yu. Tan tumaa tsa nditsa tsa nyito yu, tacan nditsa tsa cuñi tsi cuiñi tsiti tandihí nyivi nuu yu.

Tandihí ñi tan cua nacoto ñi tsi yu tsa cuví yu Nyoo.

Tan nuu tandihí nyivi cua jacahnu ñi tsi yu, catyí Nyoo.

¹² Yacan cuenda intuhun intuhun yo tan cua nacuhva cuenda yo tyiñu javahá yo tsi Nyoo.

Ña janacava ndo tsi yañi ndo nu cuatyí

¹³ Yacan cuenda, ña taahán tsi cahan nyaa ca ndo tsi nyivi. Maa tyin nducu ndo cuhva tsa ña janacava ndo tsi ñi nu cuatyí coto jandihí ñi tsa tsinú iñi ñi tsi ra Cristo. ¹⁴ Yuhu tsitó yu tyin cuví catsi yo tandihí tyin tsinú vaha iñi yu tsi Jutu Mañi yo Jesucristo, tan maa ra jacuahá tsi yu. Maa tyin ñi tsa tsicá iñi tyin ña cuví catsi ñi tandihí, tsa cuenda maa ñi ña cuví catsi ñi can. ¹⁵ Maa tyin tatun tsa cuenda tsa tsatsí ndo tan ndasi cuñi yañi yo, ña nditsa tsa cuñi ndo tsi ra. Ña cuhva ndo tsa tiví yañi yo tshin tsa tsatsí ndo tyin ra Cristo tsihí ra tsa cuenda ra. ¹⁶ Ña cuhva ndo tsa cahan nyivi ndavaha ñi siqui tsa tsahá Nyoo ndatu tyin catsi yo. ¹⁷ Tatun ndacá ñaha Nyoo tsi yo ña ñiñi xaan náa tsatsí yo o náa tsihí yo. Tsa ñiñi ca cuví tsa vaha iyó yo nuu ra, tan tshin tsa si cuñi yo, tan taxin iyó añima yo jahá Tatyí li ra. ¹⁸ Nyivi jahá tyiñu tyiñu ra Cristo tacan, si cuñi Nyoo nyehé ra tsi ñi, tan tacan tucu nyivi si cuñi ñi nyehé ñi tsi ñi.

¹⁹ Yacan cuenda cuñi tsi jañiñi yo tsi yo tan coo vaha yo tshin nyivi. Tyin tacan tan cuví jatyinyee tahan yo tsi yo na cuahnu ca yo tshin tuhun Nyoo.

²⁰ Ndi intuhun ndo tan ña jativi ndo tyiñu jahá Nyoo tsitsi añima inga nyivi tshin tsa tsatsí ndo. Nditsa tyin tandihí tsa tsatsí yo tan vaha tsi. Maa tyin

ña vaha tsa catsi yo iin tsa tsatsí yo tatun tsihin can janacava yo tsi nyívi nu cuatyí. ²¹ Yacan cuenda, vaha tsa ña catsi yo cuñu, ndi ña coho yo vinu tatun ndasi cuñi yañi yo nyehe ra tyin javahá yo can. Na ña janacava yo tsi ra yañi yo nu cuatyí. Na ña casi yo nu tsinú iñi ra tsi Nyoo tsihin iin tsa javahá yo. ²² Cuhva tsa tsinú iñi yo tsa cuenda tandihí yacan ña çahan yo tuhun can tsihin inga nyívi. Na coto intuhun ñi maa yo can tsihin Nyoo. Sii xaan cuñí yo tatun ña uvi tsicá iñi yo javahá yo tsa tsahá Nyoo ndatu tyin javahá yo. ²³ Maa tyin nyívi tsa tsatsí náa tsatsí, tan uvi tsicá iñi ñi, tsicoo cuatyí ñi tyin ña tsinú vaha iñi ñi tyin cuví catsi ñi can. Tan tandihí tsa javahá yo tsihin tsa ña tsiñú iñi yo tyin tsahá Nyoo ndatu javaha yo can, cuatyí cuví.

15

Na javaha yo tsa taahán iñi nyívi yihí tuhun Nyoo tsihin yo, tan ñavin tsa taahán iñi ñi maa yo

¹ Yoo tsa vaha cuanyicún tsi Nyoo, cuñí tsi tsa jatyinyee yo tsi nyívi tsa ñaha ca tsinú vaha iñi tsi ra. Jatyinyee yo tsi ñi na tsinu ca iñi ñi. Tan na ña nducu yo maa ñi maa tsa taahán iñi maa yo. ² Intuhun intuhun yo cuñí tsi tsa javaha yo cuhva taahán iñi inga nyívi tatun cuví tsi tsa vaha cuenda ñi, tyin tacan tan cuví cuahnu ca ñi tsihin tuhun Nyoo. ³ Tyin ndi ra Cristo tan ña javahá ra cuhva taahán iñi maa ra, maa tyin taahan ra tumaa catyí nu tutu Nyoo tyehen: “Tandihí tsa ndavaha ñi tsa çahan nyívi siqui Nyoo, siqui ra Cristo ndoo can”, catyí tsi. ⁴ Tyin tandihí tsa tsinyaa nu tutu Nyoo taahan tsanaha, tsinyaa tsi tsa cuenda tsa cutuhva yo itsi. Tan juvin tsi jatyinyee tsi yo tsa cunyeé iñi yo cuatu yo tsa cua cuhva Nyoo tsi yo. Tyin tun cahvi yo itsi jandu iin tsi iñi yo. ⁵ Tan juvin ñi maa ra tsahá tsa cunyeé iñi yo cuatu yo, tan tsahá ra tsa vaha cuñí añima yo. Na jatyinyee ca ra tsi yo coo vaha yo tan iin ñi cuví yo tumaa taahán iñi ra Cristo Jesús. ⁶ Tacan tan tandihí yo iin caa ñi jacahnu yo tsi Nyoo Jutu ra Jesucristo Jutu Mañi yo.

Nyívi tsa ñavin ñi Israel cuví, cua coto ñi tuhun Nyoo

⁷ Yacan cuenda naquihin cuenda tahan ndo tsi ndo, tumaa naquihín cuenda ra Cristo tsi yo, tyin tun javaha yo tacan, jacahnu yo tsi Nyoo. ⁸ Tan catyí yu tsihin ndo: ra Cristo quitsi ra quitsi jatyinyee ra tsi nyuhu tsa cuví nyívi Israel, tyin tacan catyí Nyoo tsihin tsii tsahnu ndi tyin cua javaha ra. Tan tacan janahá ra Cristo tyin tandihí tsa catyí Nyoo tyin cua javaha ra, javahá ra itsi. ⁹ Quitsi ra Cristo tyin tacan tan jacahnu tucu nyívi tsa ñavin ñi Israel cuví tsi Nyoo, tsa cuenda tsa cundaahví iñi ra nyehe ra tsi ñi, tumaa catyí nu tutu ra tyehen:

Yacan cuenda cua jacahnu yo tsi un tan cua nyehe tandihí nyívi tsa ñavin ñi Israel cuví.

Cua jacahnu yu tsi un tan cata yu yaa tsa cuenda un, catyí tsi.

¹⁰ Tan inga tucu nu catyí tsi tyehen:

Nyooho tsa ñavin ñi Israel cuví, sii cuñi ndo tsihin ñi Israel, nyívi Nyoo.

¹¹ Tan inga tucu nu catyí tsi tyehen:

Jacahnu ndo tsi Jutu Mañi yo, nyooho nyívi tsa ñavin ñi Israel cuví.

Çata tandihí ndo yaa tan jacahnu ndo tsi ra.

¹² Ra Isaías tyaa tucu ra nu tutu Nyoo tyehen:

Cua cacu iin ra tsa cuví tata ra Isaf.

Cua quitsi ra cua cundaca ñaha ra tsi nyívi tsa ñavin ñi Israel cuví.

Tan cua cuita iñi ñi tyin cua jacacu ra tsi ñi.

¹³ Juvín ñi maa Nyoo tsahá tunyee iñi tsi yo tan tsitó yo tyin cua cuhva ra tsa cuhva ra tsi yo. Na jacutu ra tsi ndo tsihin tusi iñi ra. Tan na coo taxin añima ndo tsa cuenda tsa tsinú iñi ndo tsi ra, tyin tacan tan tsihin tunyee iñi Tatyí li ra tan cuita vaha iñi ndo tyin cua ñihi ndo tsa cua cuhva ra tsi ndo.

¹⁴ Yañi, tsitó vaha yu tyin nyoocho vaha iñi ndo tan cutuñi vaha iñi ndo, tan tsitó vaha ndo cuhva cuhva cuenda tahan ndo tsi ndo. ¹⁵ Maa tyin nu carta ihya ñihi xaan caahán yu siqui juhva tsa tyaá yu tyin tacan tan ña naa iñi ndo can. Tyehen javahá yu tsa cuenda tyin Nyoo tsahá ra tsa vaha ra tsi yu ¹⁶ tsa jaha tyiñu yu tyiñu ra Jesucristo nu iyó nyivi tsa ñavin ñi Israel cuví. Tan tyiñu tsa javahá yu cuví tsa caahán yu tuhun Nyoo nácaa jacacú ra tsi nyivi. Tyehen javahá yu tyin tacan tan cuví cuhva cuenda yu tsi ñi tsi Nyoo tan cuví ñi iin ofrenda tsa taahán iñi ra, tyin tsa nduvahá ñi nuu ra jahá Tatyí li ra.

¹⁷ Yuhu tsa tsinú iñi yu tsi ra Cristo Jesús, si cuñi yu jahá tyiñu yu tyiñu Nyoo tyin tsitó yu tyin tyiñu vaha javahá yu. ¹⁸ Yuhu ña caná iñi yu cahan yu tsa ña javahá ra Cristo tsihin yu. Maa tyin tsahá cuenda yu tsi ndo tyin nyivi tsa ñavin ñi Israel cuví, tsinú iñi ñi tsi Nyoo tyin Nyoo tsatyiñu ra tsi yu tan vityin tyaá yahvi ñi tsi ra tsa cuenda tsa tsinú iñi ñi tuhun cahan yu tan nyehe ñi tsa javahá yu ¹⁹ tsihin tunyee iñi seña tan tsa iyo tsa javahá yu jahá Tatyí li Nyoo. Tsihin tandiñi yacan cunyeé cahan yu tuhun ra Cristo tan nácaa jacacú ra tsi yo tsihin nyivi. Quitsahá yu nda Jerusalén tan inga ca ñuu nda cuanda tsaá yu ñuu tsa cayucú Ilírico. ²⁰ Tacan nducú yu cuhva caahán yu tsa jacacú ra Cristo tsi yo nu ñaha ca coto nyivi tuhun ra, tyin ña cuñi yu jaha tyiñu yu nu tsa yaha cahan inga ra tuhun ra Cristo. ²¹ Tumaa catyí nu tutu Nyoo tyehen:

Nu nduve maa tuhun Nyoo iyó, cua tsa tuhun Nyoo tan cua cutuñi iñi nyivi iyó can itsi, catyí tsi.

Nu tyaá ra Pablo cuhva tyin cuhun ra ñuu Roma

²² Yacan cuenda ña cuví quitsi yu quitsi nyehe yu nu yucú ndo, vasu ndi maa cuaha xaan tsaha cuñi yu quitsi yu. ²³ Maa tyin vityin tsa ndiñi jahá tyiñu yu ityi ñuu ihya. Tan tsa cuaha xaan cuiya cuñi yu quitsi yu nu yucú ndo tan ndoo yu juhva quivi tsihin ndo. ²⁴ Nyehe jihna yo tatun cuví yaha yu nu yucú ndo quivi cua cuhun yu España. Tsa yaha tsa cunyi yu juhva quivi tsihin ndo, nyehe yo tatun cuví jatynyee ndo tsi yu tan tsaá yu nu cuhun yu. ²⁵ Maa tyin vityin cuahán yu ñuu Jerusalén tan nyisó yu ofrenda tsa cuenda nyivi yihí cuenda ra Cristo tsa iyó ndacan. ²⁶ Tyin nyivi tsicá vehe ñuhu tsa iyó ityi Macedonia tan ityi Acaya natuhun tahan ñi tan tava ñi juhva xuhun jacuhun ñi tsi nyivi ndaahvi tsa iyó Jerusalén, ñi yihí cuenda ra Cristo. ²⁷ Tyehen cuñi ñi javahá ñi. Tan nditsa tyin taahán tsi javaha ñi tacan. Tyin nyivi Israel, ñi tsinú iñi tsi ra Cristo, tsahá ñi tuhun ra Cristo tsi ñi. Yacan cuenda taahán tucu tsi tsi maa ñi tsa jatynyee ñi tsi ñi Israel tsihin tsa iyó tsi ñi. ²⁸ Yacan cuenda, tatun tsa yaha jandaa yu tyiñu ihya, tan tsa yaha nacuhva cuenda yu xuhun ihya tsi nyivi Jerusalén, tacan tan cuhun yu nda España tan cua yaha yu nu yucú ndo. ²⁹ Tsitó vaha yu tyin quivi cua quitsi yu nu yucú ndo, cuaha tsa vaha cua cuhva Nyoo tsi yu tyin nacuhva cuenda yu tsi ndo.

³⁰ Yañi, Tatyí li Nyoo tsahá tsa cuñi ndo tsi yu tan tsi ra Jesucristo, yacan cuenda caahán ndaahvi yu tsihin ndo ndacan tahvi ndo tsi Nyoo tsa cuenda yu tan tsa cuenda tyiñu jahá yu. ³¹ Ndacan tahvi ndo tsa cuenda yu, na jacacu Nyoo tsi yu ndaha nyivi Judea tsa ña tsinú iñi tsi ra Cristo. Tan ndacan tahvi ndo tsa cuenda nyivi yihí cuenda ra Cristo ñuu Jerusalén, na tñin cuenda vaha

ñi ofrenda tsa ndahá yu. ³² Tan ndacan tahvi ndo na cuvi cuhva cuñi Nyoo tan cuvi quitsi yu quitsi nyehe yu nu yucú ndo tsihin tsa siñi cuñi yu tan cuvi quitatu vaha yu. ³³ Tan Nyoo, ra tsahá tsa taxin coo añima yo, na cunyaa ra tsihin tandihí ndo. Tan na cuvi tsi tacan.

16

Nu tsahá ra Pablo nacumi tsi nyívi vaha iñi tsi ra

¹ Jacotó yu tsi ndo tyin ña hermana Febe jatyinyeé xaan ña tsi nyívi yihí cuenda Nyoo ñuu Cencrea. ² Naquihin vaha ndo tsi ña tumaa naquihín Jutu Mañi yo tsi yo, tumaa taahán tsi javaha ñi yihí cuenda Nyoo. Jatyinyee ndo tsi ña tsihin tandihí tsa tsiñi ñuhu tsi ña, tyin maa ña cuaha xaan nyívi jatyinyeé ña, tan nda cuanda maa yu.

³ Cuhva ndo nacumi tsi ña Priscila tan tsi ra Aquila, ñi tsa cutahan tsihin yu nu jahá tyiñu yu cuenda ra Cristo Jesús. ⁴ Tsahnya iñi ñi ñayívi ñi quívi jacacu ñi tsi yu. Yacan cuenda tsahá yu tyahvi nyoo tsi ñi. Tan ñavin yuhu ñi, tyin tandihí tucu nyívi tsa ñavin ñi Israel cuví, ñi tsa yihí cuenda Nyoo, tsahá ñi tyahvi nyoo tsi ñi. ⁵ Cuhva tucu ndo nacumi tsi ñi yihí cuenda Nyoo tsa ndú iin vehe ña Priscila tan ra Aquila. Vatsí tucu nacumi tsi ra Epeneto, yañi yu. Juvín ra cuví ra tsa tsinú jihna iñi tsi ra Cristo ityi Acaya. ⁶ Cuhva ndo nacumi tsi ña María. Jahá tyiñu xaan ña nu yucú ndo. ⁷ Cuhva ndo nacumi tsi nyívi ñuu yu, ra Andrónico tan ra Junias, ra yañi yu tsa tsiyucu tsihin yu vehe caa. Cahnu tyiñu jahá tyiñú ra naha cuenda Jutu Mañi yo tsihin tandihí ca ra jahá tyiñu cuenda Nyoo. Tan jihna ca ra naha natsinú iñi tsi ra Cristo tan ñavin ca yuhu.

⁸ Cuhva ndo nacumi tsi ra Amplias ra vaha iñi tsi yu cuenda Jutu Mañi yo. ⁹ Cuhva ndo nacumi tsi ra Urbano, ra yañi yo cuenda tyiñu ra Cristo Jesús, tan tacan tucu ra Estaquis, ra yañi yu. ¹⁰ Cuhva ndo nacumi tsi ra Apeles. Nyehé yo tyin nditsa tsa tsinú iñi ra tsi ra Cristo. Tan tsahá tucu yu nacumi tsi nyívi ra Aristóbulo. ¹¹ Cuhva ndo nacumi tsi ra Herodión ñuu yu tan tsi nyívi ra Narciso, ñi tsa tsinú iñi tsi Jutu Mañi yo. ¹² Vatsí nacumi tsi ña Trifena tan tsi ña Trifosa, ñi tsa jahá tyiñu tyiñu Jutu Mañi yo. Tan ña hermana Pérsida, ñaha tsa jahá tyiñu xaan tyiñu Jutu Mañi yo. ¹³ Cuhva ndo nacumi tsi ra Rufo, iin ra cahnu cuví nuu Nyoo. Tsinú vaha iñi ra tsi Jutu Mañi yo. Tan vatsí tucu nacumi tsi sihi ra, ña tsa cuví tumaa sihi yu. ¹⁴ Cuhva ndo nacumi tsi ra Asíncrito, tsi ra Flegonte tan tsi ra Hermas, tan tsi ra Patrobas, tan tsi ra Hermes, tan tsi ra hermano tsa yucú tsihin ra naha. ¹⁵ Cuhva tucu ndo nacumi tsi ra Filólogo tan tsi ña Julia tan tsi ra Nereo tsihin cuhva ra, tan tsi ra Olimpas tan tsi tandihí ñi yihí cuenda Nyoo tsa yucú tsihin ñi.

¹⁶ Cuhva tahan ndo nacumi tsi ndo. Tandihí nyívi yihí cuenda ra Cristo tsa iyó ityi ihya jaquitsi ñi nacumi tsi ndo.

¹⁷ Yañi, caahán ndaahvi yu tsihin ndo, jaha ndo cuenda tsi ndo tsihin ñi cuñi jasín tsi ndo, tan nducú ñi cuhva tsa nduva ndo tsihin tuhun Nyoo, tyin ñavin tacan cutuhva ndo tuhun ra Cristo. Ña cutahan ndo tsihin ñi can. ¹⁸ Tyin ñi can ñavin tyiñu Jutu Mañi yo Jesucristo jahá tyiñu ñi, maa ñi cuhva cuñi maa ñi javahá ñi. Tan jandahví ñaha ñi añima nyívi ndaahvi tsihin tsa vita caahán ñi. ¹⁹ Tandihí nyívi tsitó ñi tyin tyaá yahvi ndo tsi Nyoo. Yacan cuenda siñi xaan cuñi yu tsihin ndo, tan cuñi yu tsa yatyi javaha ndo tsa vaha. Maa tyin ña yatyi javaha ndo tsa ña vaha. ²⁰ Nyoo ra iyó tandihí tsa taxin

añima, na cuhva ra tsa jaha canaa ndo tsi nu ña vaha tsa yatyi, tan na cuhva ra tsa cuañi ndo siqui nu. Na nasoco Jutu Mañi yo Jesucristo tsi ndo.

²¹ Ra Timoteo ra cutahán tshin yu nu jahá tyiñu ndi tyiñu Nyoo, jaquitsí ra nacumi tsi ndo. Tan tacan tucu ra Lucio, tan ra Jasón, tan ra Sosípater; tandihí ra ñuu yu can jaquitsí ra naha nacumi tsi ndo.

²² Yuhu ra Tercio javahá yu tutu ihya tsa cuenda ra Pablo, juvin ñi jaquitsí tucu yu nacumi tsi ndo tyin iin caa ñi yihí yo cuenda Jutu Mañi yo.

²³ Jaquitsí tucu ra Gayo nacumi tsi ndo. Vehe ra iyó yu. Juvin ñi ihya ndú iin tandihí ñi yihí cuenda Nyoo. Ra Erasto ra cuví tesorero ñuu ihya, jaquitsí ra nacumi tsi ndo, tan yañi yo ra Cuarto tucu.

²⁴ Na ndoo Jutu Mañi yo Jesucristo tshin tandihí ndo. Tan na cuví tsi tacan ñi.

Na ndihí caahán ra Pablo tan jacahnú ra tsi Nyoo

²⁵ Tan vityin na jacahnu yo tsi Nyoo, tyin maa ra cuví ra cua cuhva tsa ndu iin iñi añima ndo, tyin tacan tan ña jandihí ndo tsa tsinú iñi ndo tuhun ra tsa jacacú tsi yo. Tsehe cuví tuhun caahán yu tan tuhun tsa jacuahá yu tsa cuenda ra Jesucristo. Iin ñi cuví tsi tshin tuhun tsa ñuhú xeehe tahañ tsanaha nda ndi cumañi ca tsinu ñuhu ñayivi. ²⁶ Maa tyin vityin jacuahá Nyoo tsi yo tsa cuenda tutu tsa nacoꝝ ra cuví ndusu yuhu ra, ra tsahá cuenda tuhun ra tahañ tsanaha. Catyí Nyoo, ra tsa ña cua cundihí maa, tyin vityin taahán tsi coto tandihí nyivi tyin tacan tan tsinu iñi ñi tsi ra tan tyaa yahvi ñi tsa caahán ra. ²⁷ Intuhun ñi maa Nyoo iyó, tan iyó xaan tsa tsiñi tuñi tsi ra. Tan na ña jandihí yo tsa jacahnú yo tsi ra tsa cuenda ra Jesucristo.

Tan na cuví tsi tacan ñi.

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Corinto

Nu tyaá ra Pablo iin carta tsa cuenda nyivi yihí cuenda Nyoo ñuu Corinto

¹ Yuhu ra Pablo, cana Nyoo tsi yu tyin caca yu tyiñu ra Jesucristo. Yuhu tsihin ra Sóstenes, ra yañi yo, ² jaquitsí ndi carta ihya tsi ndo tsa yucú ndo vehe ñuhu cuenda Nyoo ñuu Corinto. Nyivi Nyoo cuví ndo vityin, tyin tsa ndu iin ndo tsihin ra Cristo Jesús. Nyoo cana ra tsi ndo tyin nanduvi ndo nyivi vaha cuenda ra, tsihin tandihí nyivi tsa jacahnú tsi Jutu Mañi yo Jesucristo tandihí ñi ityi. Tyin cuví ra Nyoo cuenda ñi tan cuenda tucu maa yo. ³ Naquihin ndo tsa vaha tan tsa taxin tsahá Nyoo Jutu yo tan Jutu Mañi yo Jesucristo coo añima ndo.

Nacaa nasocó Nyoo tsi nyivi yihí cuenda ra

⁴ Tandihí ñi quivi tsahá yu tyahvi nyoo tsi Nyoo tsa cuenda ndo, tyin ñihi ndo tsa vaha Nyoo tsa cuenda tsa ndu iin ndo tsihin ra Cristo Jesús. ⁵ Tan tsa iin ñi cuví ndo tsihin ra Cristo, Nyoo tsahá ra tunyee iñi tsi ndo tsa cahan ndo tuhun ra. Tan tsahá ndihí tucu ra tsa coto xaan ndo. ⁶ Tan tandihí tuhun ra Cristo tsa cahan ndi tsihin ndo tsa ndunditsin tsi tyin tsa nasama ndo kuhva iyó ndo. ⁷ Tan yacan cuenda nduve tsa cumañi tsi ndo tyin iyó tandihí tsa vaha Nyoo tsi ndo jahá ra tsitsi tsa ndatú ndo quivi quitsi Jutu Mañi yo Jesucristo. ⁸ Nyoo cua jaha cuenda ra tsi ndo nda cuanda naa ñuhu ñayivi tyin tacan tan yoñi cuví tya cuatyí tsi ndo quivi cua quitsi Jutu Mañi yo Jesucristo. ⁹ Nyoo tacan ñi maa javahá ra kuhva catyí ra. Tan maa ra cuví ra cana tsi ndo tyin ndu iin ndo tsihin Sehe ra, ra Jesucristo, Jutu Mañi yo.

Nyivi yihí cuenda Jutu Mañi yo, ña vaha quita sñin ñi

¹⁰ Yañi, tsicán yu tsi ndo tsihin sivi Jutu Mañi yo Jesucristo, na iin ñi cuví ndo tan ña cusñin ndo. Tan iin ñi kuhva çaça iñi ndo, tan iin ñi tuhun quihí iñi ndo. ¹¹ Caahán yu tacan tsihin ndo, yañi, tyin catyí nyivi ra Cloé tsihin yu tyin iyó tsihi nu yucú ndo. ¹² Tyin nyooho sñin sñin kuhva caahán ndo. Yihí ndo catyí ndo: “Cuenda ra Pablo yihí yu”; inga ndo: “Cuenda ra Apolos”; inga tucu ndo: “Cuenda ra Pedro”; tan inga tucu ndo catyí ndo: “Cuenda ra Cristo yihí yu.” ¹³ ¿A cuñi ra Cristo tsa quita sñin yo? ¿A maa yu tsihi nu cruu tsa cuenda ndo? ¿A tsicoondutyá ndo tsihin sivi yu? Ñavin. ¹⁴ Tyahvi nyoo tsi Nyoo tyin ra Crispo tan ra Gayo ñi jacoondutyá yu tan ña jacoondutyá yu tsi ndi intuhun ca nyooho, ¹⁵ yacan ña cuví cahan ndo tyin tsicoondutyá ndo tsihin sivi yu. ¹⁶ Aan, jacoondutyá tucu yu tsi nyivi ra Estéfanas, maa tyin ña nducuhún iñi yu tun jacoondutyá yu tsi inga ndo. ¹⁷ Tyin ra Cristo ña tava tyiñu ra tsi yu tsa jacoondutyá yu. Tava tyiñu ra tsi yu tsa cahan yu nácaa jacacú ra tsi yo. Tan ñavin tsihin tsa tsiñi tuñi tsa iyó nu ñuhu ñayivi ihya caahán yu, tyin coto catyí nyivi tyin nduve yahvi nyaá tsa tsihi ra Cristo cuenda cuatyí yo.

Vaha ca tsa tsiñi tuñi Nyoo tan ñavin ca tsa tsiñi tuñi nyivi iyó nu ñuhu ñayivi

¹⁸ Nyivi tsa cua cahun anyaya tsiñi ñi tuhun tsa tsihi ra Cristo nu cruu, tan ña tsinú iñi ñi tsi ra, yacan cuenda cuñi maa ñi tyin nduve yahvi nyaá tsa tsihi

ra. Tan tsa cuenda yoo tsa cua cacu, tunyee iñi Nyoo cuví tsa tsihí ra. ¹⁹ Tyin tacan catyí maa tuhun Nyoo:

Cua janaa yu tsa nyityi jiñi ra tsitó xaan.

Tan ña cua cahan yu tsa caahán ra, catyí Nyoo.

²⁰ Nduve yahvi nyaá ra tsa tsitó xaan, tan ra maestro, tan ra caahán náa ndihi tuhun tsa iyó nu ñuhu ñayivi ihya. Tyin tsa tsiñi tuñi tsa iyó nu ñuhu ñayivi ihya, tuhun nduve yahvi nyaá nanduví can jahá Nyoo. ²¹ Nyoo tsihin tsa tsiñi tuñi tsa iyó tsi ra tyaá ra cuhva tyin ña cuví nacoto nyivi tsi ra tsihin tsa tsiñi tuñi tsa iyó nu ñuhu ñayivi ihya. Maa tyin tyaá tucu ra cuhva tsa jacacu ra tsi nyivi tsa tsinú iñi tuhun ra vasu ndi maa inga ca nyivi cuñi ñi tyin nduve yahvi nyaá tsi.

²² Nyivi Israel cuñi ñi nyehe ñi tsa iyo. Tan nyivi Grecia maa ñi maa tsa tsiñi tuñi tsa iyó nu ñuhu ñayivi ihya nanducú ñi. ²³ Maa tyin nyuhu jacotó ndi tuhun ra Cristo, ra tsa tsihí na cruu. Tan tsa tsiñi nyivi Israel tuhun ra ndasi xaan cuñi ñi. Tan ñi tsa ñavin ñi Israel cuví, cuñi ñi tyin nduve yahvi nyaá tsi. ²⁴ Maa tyin tsa cuenda nyivi tsa nacatsj Nyoo, cuví ñi nyivi Israel, a nyivi Grecia, ñi ican cutuñi iñi tyin ra Cristo iyó tandihi tunyee iñi Nyoo tsi ra, tan tsahá ra tsa cutuñi iñi ñi tsa tsiñi tuñi Nyoo. ²⁵ Vasu ndi maa inga nyivi cuñi tyin nduve yahvi nyaá tsa tsiñi tuñi Nyoo, maa tyin nyaá yahvi ca tsi tan ñavin ca tsa tsiñi tuñi tsa iyó nu ñuhu ñayivi ihya. Tan cuñi tucu ñi tyin ña ñihi tunyee iñi Nyoo. Maa tyin ñihi ca tsi tan ñavin ca tunyee iñi tsa iyó nu ñuhu ñayivi ihya. ²⁶ Yañi, cuñi tsi tsa cutuñi iñi ndo tyin Nyoo nacatsj ra tsi ndo vasu ndi maa ña cuaha ndo cuví nyivi tsitó, tan nyivi cahnu cuví o nyivi ndacá ñaha nu ñuhu ñayivi ihya. ²⁷ Nacatsí ra tsi nyivi tsa catyí nyivi tyin soho xaan ñi, tyin cuhva ra ticanuu tsi nyivi tsitó xaan. Tan nacatsí ra tsi nyivi nduve tunyee iñi iyó tsi tyin cuhva ra ticanuu tsi nyivi cuñi tyin iyó xaan tunyee iñi tsi ñi. ²⁸ Tan nacatsí ra tsi nyivi ndaahvi tsa cuñi nyivi tyin ña tsiñi ñuhu ñi, tan nyivi tsa ña cuñi nyivi nyehe ñi, tan janduluhlú ra tsi nyivi jahá tyin cahnu cuví ñi. ²⁹ Javahá ra tacan tyin tacan tan yoñi cuví nduyaa nuu ra. ³⁰ Tan juvin ñi maa ra jandu jin tsi yo tsihin ra Cristo Jesús. Tan tsahá ra Cristo tsa tsiñi tuñi tsi yo, tan tsa cuenda tsa jatá ra tsi yo tsihin niñi ra, quihjin nyaa ra tsi yo ndaha nu ña vaha tan cacu yo tan nduvahá yo jahá ra tan jacu íi ra tsi yo. ³¹ Yacan cuenda na javaha yo cuhva catyí tuhun Nyoo nu catyí tsi tyehen: “Ña cuví nduyaa yo tsihin tsa javahá maa yo, maa tyin tatun cua nduyaa yo, na nduyaa yo tsihin tsa javahá Nyoo tsihin yo.”

2

Tuhun ra Cristo, ra tsihí nu cruu

¹ Maa tyin yañi, quivi tsa quitsj yu cahan yu tuhun Nyoo tsihin ndo, ña cahan yu tuhun tsa tsiñi tuñi tsa iyó nu ñuhu ñayivi ihya tumaa caahán ra tsitó xaan naha ra. ² Tyin maa ñi maa tuhun ra Jesucristo, nácaa tsihí ra nu cruu tsa cuenda cuatyí yo tyaá iñi yu tan cahan yu tsihin ndo. ³ Tan tsa tsaá yu nu yucú ndo ñihi nihi yu jahá tsa yuuhví yu. ⁴ Tan tsa cahan yu tsihin ndo, ña cahan yu tsihin tuhun sñi caa tumaa caahán ra tsitó xaan naha ra. Maa tyin tsihin tunyee iñi Tatyí Ii Nyoo cahan yu tsihin ndo. ⁵ Tyin tacan tan tsinu iñi ndo tsi Nyoo tsa cuenda tunyee iñi maa ra, tan ñavin tsa cuenda tsa tsiñi tuñi tsa iyó nu ñuhu ñayivi ihya.

Juvin ñi maa Tatyí Ii Nyoo tsahá tsa nacoto yo tsi Nyoo

⁶ Maa tyin nditsa caahán ndi tuhun tsa tsiñi tuñi tsihin nyivi tsa ñihi nyaá tsihin tuhun Nyoo. Maa tyin ñavin tsa tsiñi tuñi tsa iyó nu ñuhu ñayivi ihya, tan ndi ñavin tsa tsiñi tuñi ra ndacá ñaha naha ra tsa cua cundihi ñi maa, tyin caahán ndi tsa tsiñi tuñi Nyoo ⁷ tsa tsicumj xeehe ra tsa ndi cumañi ca javaha ra ñuhu ñayivi ihya. Tyaá ra cuhva tsa jacacu ra tsi yo tan cunyecu cuji yo tsihin ra nda gloria. ⁸ Tan ndi intuhun ra ndacá ñaha nu ñuhu ñayivi ihya tan ña cutuñi iñi ra naha can. Tun tsatyin cutuñi iñi ra naha can, ña cua tyaa ra naha tsi Jutu Mañi yo, ra ndacá ñaha gloria, nu cruu. ⁹ Maa tyin cuvji tsi tumaa catyí maa tuhun Nyoo:

Yoñi nyehe tan yoñi tsiñi tan tsicá iñi tuhun vaha

tsa javahá Nyoo tsa cuenda nyivi cuñi tsi ra, catyí tsi.

¹⁰ Maa tyin Nyoo tsahá ra Tatyí Ii ra tsi yo tan jacotó Tatyí Ii ra tuhun ihya tsi yo, tan juvin ra jacotó tandihi ca tuhun xeehe tsa tsicá iñi Nyoo tsi yo.

¹¹ Intuhun intuhun yo tsitó yo nácaa tsicá iñi yo, maa tyin inga nyivi ña tsitó ñi tsa tsicá iñi yo. Tan tacan tucu intuhun ñi Tatyí Ii Nyoo tsitó ra tsa tsicá iñi maa Nyoo. ¹² Yoo ñavin tsa tsiñi tuñi tsa iyó nu ñuhu ñayivi naquihin yo, tyin naquihin yo Tatyí Ii Nyoo, tan juvin ra jacotó tandihi tsa ñihi yo jahá Nyoo.

¹³ Tan tsa caahán ndi tsihin ndo ihya, tuhun tsa jacuahá maa Tatyí Ii Nyoo tsi ndi cuví. Ñavin tsa cutuhvá maa ndi tsihin tsa tsiñi tuñi jiñi ndi. Nacatyí tuhun ndi tsa jacuahá Tatyí Ii Nyoo tsi ndi tsi nyivi tsa yihí Tatyí Ii Nyoo.

¹⁴ Maa tyin nyivi tsa nduve Tatyí Ii Nyoo iyó tsihin, ña naquihin vaha ñi tan ndi ña cutuñi iñi ñi tsa jacuahá Tatyí Ii Nyoo tsi ñi. Tan cuñi maa ñi tyin nduve yahvi nyaá tsi, tyin nduve Tatyí Ii Nyoo iyó tsihin ñi. ¹⁵ Maa tyin nyivi yihí Tatyí Ii Nyoo cuví cutuñi iñi ñi. Tan tsitó ñi tatun vaha a ña vaha náa iin tuhun. Maa tyin ña cuví catyí inga nyivi tatun vaha a ña vaha tsa iyó añima ñi. ¹⁶ Tyin tuhun Nyoo catyí tsi: “Yoñi tsitó tsa tsicá iñi Jutu Mañi yo Nyoo. Yoñi cuví jacuahá tsi ra”, catyí tuhun Nyoo. Maa tyin yoó tsitó yo tsa tsicá iñi ra tyin iyó tsa tsiñi tuñi ra Cristo tsi yo.

3

Ña taahán tsi cunyicun yo tsi iin ra yihí tuhun Nyoo tsihin yo, na cunyicun yo tsi Nyoo

¹ Yañi, quivi tsa quitsj yu nu yucú ndo ña cuví cahán yu tsihin ndo tumaa caahán yu tsihin nyivi jaquihín ityi Tatyí Ii Nyoo. Cahán yu tsihin ndo tumaa caahán yu tsihin nyivi ña tsitó tsi Nyoo, tyin ndi lee xaan ndo tsihin ra Cristo.

² Cahán yu tsihin ndo tsihin tuhun tsa ña yí ñi cutuñi iñi ndo. Tumaa tsahá yo letsí coho lee tsa ñaha ca cuví catsi nyayu, tacan javahá yu tsihin ndo, tyin nyooho ñaha ca cuví cutuñi vaha iñi ndo. ¡Tan ndi vityin tan ña cutuñi iñi ndo!

³ Tyin ndi tsicá ca iñi ndo tsa cuñi cuñu ñuhu ndo. Nyiyó iñi ndo, tan iyó tsihi nu yucú ndo, tan ndusiin ndo. Ndi tsicá iñi ndo tuhun tsicá iñi nyivi cuenda nu ñuhu ñayivi ihya, tan javahá ndo tumaa cuñi cuñu ñuhu ndo. ⁴ Tyin yihí ndo catyí ndo: “Cuenda ra Pablo yihí yu.” Tan inga ndo catyí ndo: “Cuenda ra Apolos yihí yu.” Yacan cuñi tsi catyí tyin javahá ndo tumaa javahá nyivi iyó ityi tsata.

⁵ Tyin zyóo ra cuví yuhu, ra Pablo? Tan zyóo ra cuví ra Apolos? tyin cañi tahan ndo tsaha ndi. ¿A ñavin musu Nyoo ñi cuví ndi? Juvin. Tan cahán ndi tuhun Nyoo tsihin ndo tan natsinü iñi ndo tsi Jutu Mañi yo. Tyin tan iin tan iin ndi javahá ndi tyiñu tsa catyí maa Nyoo tyin javaha ndi. ⁶ Yuhu tatsj tuhun

Nyoo ańima ndo, tan ra Apolos tyosó. Maa tyin Nyoo jacuahnu ra tuhun ra ańima ndo. ⁷ Tan yacan cuenda ndi ra tsa tatsi tan ndi ra tsa tyosó, nduve ra cuvı ra. Maa tyin Nyoo cuvı ra tandihi tyin maa ra jacuahnu tuhun ra ańima yo. ⁸ Ra tsa tatsi tan ra tsa tyosó, iin ńi ra cuvı ra naha. Tan Nyoo cua tyahvi tsi intuhun intuhun ra naha cuhva tyińu jahá ra naha. ⁹ Tan nyuhu, cuvı ndi musu tan jahá tyińu ndi tyińu Nyoo. Tan nyoocho cuvı ndo tumaa ńuhu nu jahá tyińu Nyoo.

Cuvı tucu ndo tumaa iin vehe tsa javahá Nyoo. ¹⁰ Tsańa Nyoo tsa vaha tsi yu tyin yuhu cuvı yu tumaa iin ra cuvı ityi nuu tsa samá vehe. Tyin tsaquin yu cuhva vehe can tan tyihı yu tsaha tsi tsitsi ńuhu. Tan inga ra tsa cua sama ityi siqui cuvı ra jacuahá, tan cuńi tsi jahá ra cuenda nácaa jacuahá ra tuhun Nyoo. ¹¹ Tan yońi cuvı caquin inga cuhva tyin tsa canyiı cuhva can. Tan yacan cuvı ra Jesucristo. ¹² Tan siqui cuhva can cuvı sama ra jacuahá tsihin xuhun cuaan, tsihin xuhun cuitsin, tsihin yuu vaha. Tan cuvı tucu javaha ra vehe tsihin yutun, tsihin vitsin, a tsihin tiyama. ¹³ Maa tyin quivı nacuhva cuenda ra jacuahá tsa cuvı tumaa ra samá can tyińu can tsi ra Cristo, cua yaha tyińu can nu ńuhu. Tan ńuhu can cua nducu cuhva tsi tyińu javahá ra naha. ¹⁴ Tan vehe tsa ńa cua cayu, cua ndoo tsi. Tan ra tsa javahá vehe can cua naquihin ra yahvi tsa taahán tsi tsi ra. ¹⁵ Maa tyin tun ndihi tyińu javahá ra naha cayu, nduve náa cua ńihi ra naha. Vasu cua cacu maa ra naha tumaa cacu iin ra tsa cuńi cayu tan tsinu ra nu cayú ńuhu.

¹⁶ ;A ńa tsitó ndo tyin vehe ńuhu Nyoo cuvı ndo, tan iyó Tatyı Iı Nyoo tsitsi ańima ndo? ¹⁷ Tatun iin nyivi jativi vehe ńuhu ra, cua janaa ra tsi ńi, tyin vehe ńuhu ra, ii tsi. Tan vehe ńuhu can, cuvı maa yo.

¹⁸ Ndi intuhun ndo tan ńa jandavi ńaha ndo tsi ndo. Tyin tatun cuńi ndo tyin tsitó xaan ndo tsihin tsa tsińi tuńi tsa iyó nu ńuhu ńayivi ihya, cuńi tsi tsa jandusoho ndo tsi ndo tumaa ra tsa ńa tsitó maa. Tacan tan Nyoo cua cuhva ca ra tsa tsińi tuńi vaha tsi ndo. ¹⁹ Tyin tsa tsińi tuńi tsa iyó nu ńuhu ńayivi ihya nduve yahvi nyaá can nu Nyoo. Tyin catyi tuhun Nyoo: “Janacavá ra tsi ra tsitó, juvin ńi maa nu tsa nyityi javahá ra.” ²⁰ Tan catyi tucu tsi: “Jutu Mańi yo tsitó ra tyin tsa tsicá ińi ra tsitó, nduve yahvi nyaá can.” ²¹ Yacan cuenda ndi intuhun ndo tan ńa taahán tsi cu iyo ińi ndo nyehe ndo tsi iin ra jacuahá tsi ndo tyin maa Nyoo tsańa tsi ra naha tsa jacuahá ra naha tuhun vaha tsi ndo tan tsańa ndihi ra tandihi tsa iyó tsi ndo. ²² Yuhu ra Pablo, ra Apolos, ra Pedro, maa Nyoo tsańa tsi ndi tsa cahan ndi tuhun ra tsihin ndo. Tan ńuhu ńayivi ihya, tan ńayivi iyó yo, tan tuhun tsihi, tan tsa cuvı vityin, tan tsa cua cuvı nu cuahán ca tsi, tandihi maa tuhun ihya tsańa Nyoo tsi ndo. ²³ Tan inga tucu tuhun tyin cuvı ndo tsa tsiı ra Cristo, tan ra Cristo, tsiı Nyoo cuvı ra.

4

Ña jachanu yo tsi yo tan ndi tsi yańi yo

¹ Yacan cuenda ńa taahán tsi nyehe ndo tsi ndi tumaa nyehe ndo tsi ra Cristo, tyin musu ńi ra cuvı ndi. Tyin tavá tyińu Nyoo tsi ndi tsa jacuahá ndi tuhun xeehe ra. ² Tan ra tsa tavá tyińu Nyoo cuńi tsi tsa tyaá yahvi ra tandihi tsa caahán ra tsihin ra. ³ Yacan ńa ndihi ińi yu tsa caahán ndo tsi yu, o tatun cutuńi yu nuu ra cumı tyińu. Tyin ndi maa yu tan ńa caná ińi yu cahan yu tun vaha yu o ńa vaha yu. ⁴ Vasu ndi maa tuvı ińi yu tyin nduve cuatyı yu, maa tyin ńa cuńi tsi catyi tyin nduve cuatyı yu nuu Nyoo. Tyin maa Jutu Mańi yo cua catyi tun iyó cuatyı yu o nduve. ⁵ Yacan cuenda, ńa cahan ndo tsi yu.

Cuatu ndo nda tahan maa tsi quitsi ra Cristo, tyin maa ra cua tava tsa yihí xeehe nu naa nu nditsin, tan cua jaquituvi ra tsa iyó añima intuhun intuhun yo. Tacan tan cua jacahnu Nyoo tsi intuhun intuhun yo cuhva tsa taahán tsi.

⁶ Yañi, caahán yu tuhun ihya tsihin ndo tsa cuenda tsa vaha tsi maa ndo. Nyehé ndo cuhva iyó yu, tan cuhva iyó ra Apolos tyin ña cahnu jahá ndi tsi ndi. Tan tacan tucu maa ndo, nducu ndo cuhva javaha ndo tumaa catyi tuhun Nyoo, tan ña cuñi ndo tsi intuhun ñi nyivi. Inducu ñi cuñi ndo tsi tandihí nyivi. ⁷ Ndi intuhun ndo tan ña cahnu ca ra cuví ndo tan ñavin ca inga ndo, tyin tsa iyó tsi ndo maa ñi maa tsa tsahá Nyoo cuví. Yacan cuenda ña taahán tsi tsa jacahnú ndo tsi ndo, tyin maa Nyoo tsahá can tsi ndo.

⁸ Tan cuñi ndo tyin tsa tsitó maa ndo tandihí tuhun Nyoo, yacan nduve ca tsa cumañi tsi ndo. Tan cuñi tucu ndo tyin cuví ndo rey, tan ña tsiñi ñuhu ca nyuhu tsi ndo. Vaha xaan tun tsatyin nditsa tsa cuví ndo rey, tyin tacan tan rey cuví tucu nyuhu. ⁹ Nyuhu tsa cuví ndi ra tsicá tyiñu ra Cristo, tumaa tsa nacoꝝ Nyoo tsi ndi nda tsata ca, tan cuví ndi tumaa nyivi tsa taahán tsi cúu. Tan cuaha xaan nyivi tan ángel nyehé tsa taahán ndi. ¹⁰ Nyivi tsicá iñi maa ñi tyin tsa cuenda ra Cristo tan ndusoho ndi. Tan nyooho iyo xaan cuñi ndo tsa caahán ñi tyin tsitó xaan ndo tuhun ra Cristo. Nyuhu nduve maa tunyee iñi iyó tsi ndi tan nyooho iyo xaan cuñi ndo tyin iyó tunyee iñi tsi ndo. Tun ndasi cuñi nyivi nyehé ñi tsi nyuhu, jaha xaan ca ñi tsa ñayivi tsi nyooho. ¹¹ Nda cuanda vityin nyehé ndi tundoho; tsisocó ndi, tan na ityi iñi ndi, cumañi jahma ndi, nduve vehe ndi iyó, tan nyivi jacuu ñi tsa uhvi tsi ndi. ¹² Tan tsitatú ndi tsa jahá tyiñu ndi tsihin ndaha ndi. Caahán nyivi tsi ndi, maa tyin nacahán ndi tsihin tsa vaha nu caahán ñi tsi ndi. Nyaá ndaha ñi tsi ndi, maa tyin cunyeé iñi ndi. ¹³ Caahán ñi ndavaha ñi tsi ndi, maa tyin ña nduxaan ndi, tan vii vii ñi tsahá cuenda ndi tsi ñi. Cuví ndi tsahan tsa ña tsiñi ñuhu ca jahá ñi nda cuanda vityin ihya.

¹⁴ Tyaá yu tuhun ihya tsa cuenda ndo, maa tyin ñavin tsa cuñi yu cuhva yu ticanuu tsi ndo. Tyin tsahá cuenda vaha yu tsi ndo tsa cuenda tsa cuñi yu tsi ndo tyin cuví ndo tumaa sehe yu. ¹⁵ Vasu ndi maa utsi mil ra jacuahá tuhun ra Cristo tsi ndo, maa tyin intuhun ñi jutu ndo iyó. Tan yuhu cuví jutu ndo tyin juvin yu cahān tuhun ra Cristo Jesús tsihin ndo nda jihna ñi tan natsinu iñi ndo tsi ra. ¹⁶ Tan tsa cuenda tsehe tsicán yu tsi ndo tsa javaha ndo tumaa javahá maa yu.

¹⁷ Yacan cuenda jaquitsí yu tsi ra Timoteo, sehe yu cuenda Jutu Mañi yo, nu yucú ndo. Nii xaan iñi ra nyicún ra tsi Nyoo, tan cuñi xaan yu tsi ra. Maa ra cua janducuhun iñi tsi ndo cuhva iyó yu tsihin ra Cristo tan cuhva jacuahá yu tandihí ñi vehe ñuhu nu cuahán yu. ¹⁸ Yihí ndo cahnu jahá ndo tsi ndo tyin cuñi maa ndo tyin ña cua quitsi ca yu nu yucú ndo. ¹⁹ Maa tyin tun Jutu Mañi yo tan cuñi ra, yatyi cua quitsi nyehé yu nu yucú ndo. Tacan tan cua nyehé yu tatun nditsa tsa iyó tunyee iñi Nyoo tsi ra tsa cahnu xaan jahá tsi naha ra, o tatun caahán ñi maa ra naha. ²⁰ Tyin tun nditsa tsa tsahá ra naha tsa cundaca ñaha Nyoo tsi ra naha, ña cua cahan ñi ra naha. Maa tyin cua tuvi iñi yo tyin nditsa iyó tunyee iñi Nyoo tsi ra naha. ²¹ ¿Náa cuñi ndo javaha yu tsa quitsi yu? ¿A cuñi ndo tsa cuxaan yu tsi ndo, o cuñi ndo tsa cahan vii yu tsihin ndo?

5

Nu tava tyiñu ra Pablo tyin cutuñi iin ra tsicoꝝ tsihin sihi quiin

¹ Ñihí tuhun yu tyin iin ra nyí tsihin ndo iyó ra tsihin sihi quiin ra. Tan yacan cuví cuatyí cahnu xaan, tyin ndi nyívi iyó ityi tsata tan ña javahá ñi tacan tyin tsitó ñi tyin ña vaha. ² Taahán tsi cuiihyá cuñí ndo tsa cuenda cuatyí can tan ña nduyaa ndo. Tava ndo tsi ra tsa javahá tacan nu yucú ndo. Tan ña cutahan ca ra tsihin ndo. ³⁻⁴ Vasu nduve yu nyí tsihin ndo, maa tyin tumaa tsa nyí ñi yu tsihin ndo tyin ñuhú ñi yu tsi ndo, tan tsihin sivi Jutu Mañi yo Jesucristo jandaq yu tyiñu ra tsa javaha cuatyí can. Yacan cuñí tsi tsa ndu iin ndo. Tan jaha ndo tuhun tyin nyí yu tsihin ndo. Tan cunyaa tunyee ñi Jutu Mañi yo Jesús tsihin ndo. ⁵ Tacan tan cuhva ndo tsa javaha nu ña vaha tsa cuñi maa nu tsihin cuñu ñuhu ra tsa javahá tsa caquiñi ihya, tyin vasiqui tacan tan cua jandihí ra tsa javahá ra can. Tacan tan quivi quitsi Jutu Mañi yo Jesucristo cacu aña maa ra.

⁶ Ña vaha tsa jacahnu xaan ndo tsi ndo tyin ña jahá ndo cuenda tsa javahá ra yucú vehe ñuhu ndo. ¿A ña tsitó ndo tyin vasu luxu ñi yutsan iya, jandaá tsi tandihí yutsan paan? Tan tacan ñi cuñí yo cuví tucu yacan. ⁷ Tava ndo yutsan iya tsahnu tsa jativí tsi ndo. Tacan tan cuví ndo tumaa paan tsa tuhvá nyívi javahá vico pascua, tyin paan can nduve yutsan iya yihí tsihin tsi. Tsa nditsa tyin tacan taahán tsi cuví tucu nyooho tyin maa ra Cristo cuví mbee ticatyí luhlu tsa tsihi tsa cuenda cuatyí yo. ⁸ Yacan cuenda taahán tsi catsi coo yo tyin tsihi ra Cristo tsa cuenda yo. Tan jandoó yo tsa caquiñi tsa javaha yo ityi tsata tsa cuví tumaa yutsan iya tsahnu. Tan cahan yo maa ñi maa tsa nditsa tsihin tsa ñi ñi yo tyin cuví tsi tumaa paan tsa nduve yutsan iya yihí.

⁹ Nu inga carta tsa jaquitsi yu tsi ndo, catyí yu tyin ña taahán tsi cunyanaa ndo tsi ra tsicá nuu tsihin ñaha. ¹⁰ Tan tsa caahán yu tyehen tsihin ndo, ñavin tsa cunu ndo nu nyívi tsa iyó ityi tsata, ñi tsa iyó tsihin rayii a ñaha, ñi tsa nyiyó ñi, ñi suhú, tan ñi jacahnú tsitoho, tyin tun cunu ndo nu iyó ñi ihya, cuñí tsi tsa quita ndihí ndo nu ñuhu ñayivi ihya. ¹¹ Maa tyin tsa cuñí yu catyí yu tsihin ndo ña cunyaa naa ndo tsi nyívi tsa catyí: “Hermano cuví yu”, tan tsicá nuu ra tsihin ñaha, o ñaha tsicá nuu ña tsihin rayii, o nyiyó ñi ñi, o jacahnú ñi tsitoho, o caahán ñi cuendu, o tsihi ñi nyixi, o suhú ñi. Ñi tsa javahá iin tsa ña vaha ihya, ndi ña cunyecu ndo catsi ndo tsihin ñi. ¹²⁻¹³ Tyin yoo ña taahán tsi tatsi tuñi yo tsi nyívi ña tsitó tsi Nyoo. Nyoo cuví ra cua tatsi tuñi tsi ñi can. Maa tyin nyooho cuñí tsi tatsi tuñi ndo tsi nyívi yihí cuenda Nyoo. Yacan cuenda tava ndo tsi ra iyó cuatyí nu yucú ndo.

6

Ña cua ndacan yo cuatyí tsaha iin yañi yo cuenda Nyoo nuu ra cumí tyiñu

¹ ¿Nacuenda tyin tsicán ndo cuatyí tsaha yañi ndo nuu ra cumí tyiñu tsa ña yihí cuenda Nyoo tsihin ndo, tan ña jacoto ndo tsi ra yihí cuenda Nyoo, tan nyehe maa ra naha ndáa ra iyó cuatyí? ² ¿A ña tsitó ndo tyin juvin ñi maa yo cua jandaq cuatyí tandihí nyívi iyó nu ñuhu ñayivi ihya nu cuahán ca tsi? Tan tatun maa yo cua jandaq cuatyí can, ¿nacuvi tyin ña cuví jandaq ndo cuatyí nyihí ihya? ³ ¿A ña tsitó ndo tyin cua jandaq yo cuatyí nda cuanda ángel? Tun tacan, ¿a yii jandaq yo cuatyí nyihí tsa iyó nu ñuhu ñayivi? ¿Ña yii jandaq yo can! ⁴ Yacan cuenda tatun iyó tsihi nu yucú ndo, ¿nacuenta tyin cuahán ndo nuu ra cumí tyiñu tsa ña yihí tuhun Nyoo? ⁵ Caahán yu tyehen tsihin ndo na nducahan nuu ndo. ¿A nduve cuii vasu intuhun ra jandaq cuatyí yañi ndo nu

yucú ndo? ⁶ Tyin cuahán ndo cua ndacan ndo cuatyí tsaha yañi ndo cuenda Nyoo nuu iin ra cumí tyiñu tsa ña tsinú iñi tsi Nyoo.

⁷ Ña vaha tsa iyó tsihi nu yucú ndo. Vaha taxin ca cunyeet iñi ndo tatun javaha nyivi tsa ña vaha tsi ndo. Tan jaña ndo na suhu maa ñi tsa tsii ndo. ⁸ ¡Maa tyin nyoooh javahá ndo tsa ña vaha tan suhú ndo nda cuanda tsa tsii yañi ndo!

⁹⁻¹⁰ ¿A ña tsitó ndo tyin nyivi quiñi iyó ña cua quihvi ñi nu ndacá ñaha Nyoo? Ña jandavi ñaha ndo tsi ndo. Ña cua quihvi ra tsa tsicá nuu tsihin ñaha o ñaha tsa tsicá nuu tsihin rayii, ndi ñi jacahnú tsitoho, ndi ra iyó ñasihi tan iyó inga ñaha tsi ra, tacan tucu ñiñaha tsa iyó yii tan iyó inga rayii tsi ñi, ndi ra ndusihi, ndi ñi nduyii, ndi ñi suhú, ndi ñi nyiyó iñi, ndi ñi caahán cuendu, ndi ñi tuhva tsihi nyixi, tan ndi ñi tsit; o jandavi ñaha. Tandihí maa nyivi ihya ña cua ñihi ñi nu ndacá ñaha Nyoo cuhun ñi. ¹¹ Tyin tacan javahá juhva nyoooh. Maa tyin tsa ndatsi cuatyí ndo tan ndu ii ndo tan nduvahá ndo nuu Nyoo jahá Jutu Mañi yo Jesucristo tan Tatyí Ii Nyoo.

Cuñu ñuhu yo cuví vehe ñuhu Nyoo

¹² Catyí tsi tyin nuña maa javaha yo tandihí náa cuñí maa yo. Tan nditsa tucu maa, maa tyin ña tandihí tan vaha. Cuví javaha yo náa cuñí maa yo, maa tyin cuñí tsi jaha yo cuenda tun vaha a ña vaha, tan ña cuhva yo tsa cundaca ñaha can tsi yo. ¹³ Catyí nyivi tyin Nyoo javahá ra tsa tsatsí yo tsa cuenda tsitsi yo. Tan javahá ra tsitsi yo tsa cuenda tsa tsatsí yo. Tan nditsa. Maa tyin Nyoo cua janaa ra nduvi tsehe quivi cua naa ñayivi. Tan tsa cuenda cuñu ñuhu yo ña nditsa tsa javahá ra itsi tyin coo yo tsihin ñaha a tsihin rayii, tyin cuenda Jutu Mañi yo cuví cuñu ñuhu yo. Tan maa Jutu Mañi yo cuví ra cuenda cuñu ñuhu yo. ¹⁴ Tan Nyoo cua janandoto ra tsi yo tsihin tunyee iñi ra tumaa tsa janandoto ra tsi ra Cristo Jesús.

¹⁵ ¿A ña tsitó ndo tyin tandihí yoo tsa yihí cuenda ra Cristo cuví yo intuhun ña cuñu ñuhu tsihin ra tan luxu luxu cuñu ñuhu ra cuví tsa intuhun intuhun yo? ¿A cuví quihin yu luxu cuñu ñuhu ra Cristo tan jatívi yu tsihin iin ñaha tsicá nuu? Ña taahán tsi javaha yu tacan. ¹⁶ ¿A ña tsitó ndo tyin tun iin rayii tan iyó ra tsihin iin ñaha tsicá nuu intuhun ña cuñu ñuhu nanduví ra tsihin ña? Tyin nu tutu Nyoo catyí tsi tyeheh: “Tsa nduvi ñi, iin ña nyivi cuví ñi.” ¹⁷ Maa tyin tatun iin nyivi tan nacuhva ñi añima ñi tsi Jutu Mañi yo, iin ñi cuví ñi tsihin ra tyin quihvi Tatyí Ii ra añima ñi.

¹⁸ Jandihí ndo tsa iyó ndo tsihin ñaha a tsihin rayii tun ñavin ñasihi ndo a ñavin yii ndo cuví. Tyin tandihí inga nu cuatyí tsa javahá nyivi ña jatívi can cuñu ñuhu ñi. Maa tyin tsa tsicá nuu ñi tsihin ñaha a tsihin rayii, jatívi can cuñu ñuhu ñi. ¹⁹ ¿A ña tsitó ndo tyin cuñu ñuhu yo cuví vehe ñuhu Tatyí Ii tsa tsahá Nyoo, tyin coo tsihin yo? Ñavin maa yo ndacá ñaha tsi yo; Nyoo cuví ra ndacá ñaha tsi yo. ²⁰ Tyin Nyoo yahvi xaan jatá ra tsi yo. Yacan cuenda taahán tsi jacahnú yo tsi ra tsihin cuñu ñuhu yo, tan tacan tucu ñi tsihin tsa tsiñi tuñi iñi yo tyin nduvi taahan tuhun ihya tsii maa Nyoo cuví.

7

Nu tsahá cuenda ra Pablo nácaa taahán tsi coo nyivi tindahá

¹ Tan vityin cua cahan yu tsa tsicá tuhun ndo tsi yu nu carta tsa jaquitsi ndo tsi yu. Nditsa tyin vaha tsa ña tindaha yo. ² Maa tyin cuaha xaan ra naha tsicá nuu ra naha tsihin ñaha, o ñiñaha tsicá nuu ñi tsihin rayii. Yacan cuenda

cuñí tsi tsa coo ñasihi tsa intuhun intuhun ra naha, tacan tucu ñiñaha taahán tsi coo yí tsa intuhun intuhun ñi. ³ Na javaha rayí cuhva taahán tsi tsihin ñasihi ra. Tan tacan tucu maa ñaha, na javaha ña cuhva taahán tsi tsihin yí ña. ⁴ Ñiñaha ña cuvi cundaca ñaha ñi maa ña cuñu ñuhu ña, tyin tsii yí ña cuví cuñu ñuhu ña. Tacan tucu maa yí ña, ña cuvi cundaca ñaha ñi maa ra cuñu ñuhu ra tyin tsii ñasihi ra cuví cuñu ñuhu ra. ⁵ Ña vaha tun ña cuhva iin ndo tsi ndo tsi inga ndo. Tatun cuñi ndo coo ndo oración, vaha ca natuhun tahan jihna ndo tyin ña cua coo tsihin tahan ndo quiví tsa cua nanducu ndo tsi Nyoo. Yaha can tan coo tsihin tahan nyico ndo tyin coto nducu rayí inga ñaha o ñaha nducu ña inga rayí tan javaha ndo tsa ña vaha jaha nu ña vaha.

⁶ Tsa caahán yu tyehen tsihin ndo ñavin tsa caahán yu tyin tindaha ndo. Ña jañiñi yu tsi ndo tsa tindaha ndo. Maa tyin cuví tindaha ndo tatun cuñi ndo. ⁷ Tsa cuenda yuhu, vaha ca coo ndo tumaa iyó maa yu. Maa tyin siin siin tunyee iñi tsahá Nyoo tsi tsa intuhun intuhun yo. Yihí yo tsahá ra tunyee iñi tsa ña coo ñasihi yo. Tan yihí yo tsahá ra tunyee iñi tsa coo ñasihi yo.

⁸ Tsahá cuenda yu tuhun ihya tsi tandihí nyooho tsa ñaha ca tindaha tan nyooho ñi tsihí yí tyin vaha ca cuví tsi ndo tun ña tindaha ndo tumaa maa yu. ⁹ Maa tyin tatun ña cunyee iñi ndo coo tacan ñi ndo, vaha ca tsa tindaha ndo tan ñavin ca tsa ndoo ndo tsihin tsa cuñi ndo tindaha ndo.

¹⁰ Maa tyin caahán yu tsehe tsihin nyooho ñiñaha tsa tsa tindaha: ña naco ndo yí ndo tyin tuhun caahán yu ihya, ñavin tsa cuñi maa yu cuví, tyin maa Jutu Mañi yo tsahá itsi tyin cuhva cuenda yu tsi ndo. ¹¹ Maa tyin tatun iin ñaha tan naco ña yí ña, cuñí tsi tsa ndoo ña cunyaa ña tsa ña cua tindaha ca ña, o cunuhu nyico ña tsihin yí ña. Tan tacan tucu rayí, ña taahán tsi naco ra ñasihi ra.

¹² Tan cuñi yu cahan yu inga tuhun ihya tsihin inga ndo, maa tyin ñavin Nyoo tsahá itsi. Tatun iin ra hermano tan ña tsinú iñi ñasihi ra tsi Nyoo, maa tyin ndoo ña vaha tsa cunyaa ña tsihin ra, nduve ndatu tsa naco ra tsi ña.

¹³ Tan tatun iin ña hermana, tan ña tsinú iñi yí ña tsi Nyoo, ndoo ra vaha tsa cunyaa ra tsihin ña, nduve ndatu tsa naco ña tsi ra. ¹⁴ Tyin tsa yahá nasoco Nyoo tsi rayí tsa ña tsinú iñi can tsa cuenda tsa iin ñi cuví ra tsihin ñaha tsa tsinú iñi. Tan tsa yahá nasoco tucu Nyoo tsi ñaha tsa ña tsinú iñi tsi Nyoo tsa cuenda tsa iin ñi cuví ña tsihin ra tsinú iñi. Yacan cuenda sehe ñi ña cuví tsi naha tsi tumaa cuví sehe nyiví tsa ña tsinú iñi tsi Nyoo, tyin tsa nasoco ndihí Nyoo itsi naha tsi. ¹⁵ Maa tyin tatun rayí an ñaha tsa ña tsinú iñi tsi Nyoo, tan cuñí ñi naco ñi tsi tahan ñi tsa tsinú iñi tsi Nyoo, na naco maa ñi. Tacan tan ra hermano a ña hermana ndoo nuña ñi. Tyin maa Nyoo cuñí tsa coo vaha yo tsihin tsa nduve tsihi. ¹⁶ Tyin ña tsitó iin ñaha tatun cacu yí ña. Tan ndi rayí ña tsitó ra tatun cacu ñasihi ra.

¹⁷ Tan catyí yu tsihin ndo coo ndo tsihin ndatu tsa tsahá Jutu Mañi yo tsi ndo tan cuhva iyó ndo quiví caná ra tsi ndo. Tan tsehe cuví tsa jacuahá yu tandihí vehe ñuhu tan iin tan iin ñuu. ¹⁸ Tatun tsa yaha tsinyaa tuñi Nyoo cuñu ñuhu ndo tan caná Nyoo tsi ndo ña çaca iñi ndo tsa cuenda yacan. Maa tyin tun ña tyaá ñi tuñi can tsi ndo, tan caná Nyoo tsi ndo, nduve cuenda; ña javaha ca ndo can. ¹⁹ Ña ñiñi xaan tsa coo tuñi can tsi yo, o tsa ña coo tsi. Tyin tsa ñiñi ca, cuví tsa tyaá yahvi yo tuhun caahán Nyoo. ²⁰ Tan intuhun intuhun ndo taahán tsi jahá tyiñu ndo juven ñi tyiñu tsa tuhvá ndo javahá quiví tsa caná Nyoo tsi ndo. ²¹ Tyin tatun musu cuví ndo quiví tsa caná Nyoo tsi ndo, ña çaca iñi ndo. Maa tyin tatun tsahá tsi cuhva tsa ndoo nuña ndo,

nducu ndo cuhva. ²² Iin ra tsa cuví musu tan quihví ra cuenda Jutu Mañi yo iyó nuña ra nuu ra vityin. Tan iin ra tsa iyó nuña tan quihví ra cuenda Jutu Mañi yo, vityin cuví ra musu tsa cuenda ra. ²³ Nyoo yahvi xaan jata ra tsi yo, yacan cuenda ña taahán tsi cuhva yo tsa cundaca ñaha ra ñuu ñayivi naha ra tsi yo. ²⁴ Tan catyí yu tsihin ndo, yañi, jaha tyiñu ndo tyiñu tsa tuhvá ndo javahá quivi cana Nyoo tsi ndo.

²⁵ Tan tsa cuenda nyivi tsa ñaha ca tindaha, nduve tuhun tsaha Jutu Mañi yo tsi yu tsa cuenda ñi. Maa tyin cua cahan yu cuhva tsa tsicá iñi maa yu tsihin ñi. Tan cuví cuita iñi ñi tuhun caahán yu tyin Nyoo tsaha ra tucahnu iñi tsi yu tan maa ra yihí ndaha tsi yu. ²⁶ Tsa cuenda yuhu, vaha ca ña tindaha ñi can, tyin vityin cuaha xaan tundoho ñayivi iyó. ²⁷ Maa tyin tatun tsa iyó ñasihi ndo, ña nducu ndo cuhva tsa nacoo ndo tsi ñi. O tatun nduve ñasihi ndo iyó, vaha ca ña tindaha ndo. ²⁸ Maa tyin tatun tindaha ndo, ñavin cuatyí cuví. Tan tacan tucu tun tindaha iin ñaha yoco juvin ñi ñavin cuatyí cuví. Maa tyin nyivi tsa tindaha cuaha xaan tundoho cua nyehe ñi ñayivi ihya. Tan yacan cuenda catyí yu tsihin ndo tyin vaha ca tsa ña tindaha ndo. Tyin ña cuñí yu tsa nyehé ndo tundoho.

²⁹ Yañi, cuñí yu cahan yu tuhun ihya tsihin ndo: Juhva cuii ña quivi iyó yo. Yacan vityin tan ityí nuu tandihí ra tsa iyó ñasihi cuñí tsi tsa jaha tyiñu ra naha tyiñu Nyoo tumaa tsa nduve ñi ñasihi ra naha iyó. ³⁰ Tan nyooho tsa iyó tucuihya iñi, ña tyaa yahvi ndo tucuihya iñi can. Tan nyooho tsa si cuñi, ña tyaa yahvi ndo tusi iñi can. Tan nyooho tsa jata ndaha tyiñu taahán tsi coo ndo tumaa tsa nduve ndaha tyiñu ndo. ³¹ Tan nyooho tsa iyó vaha nu ñuhu ñayivi ihya, coo ndo tumaa tsa nduve ñi tsa iyó tsi ndo, tyin tsa cua ndihí ñuhu ñayivi ihya.

³² Cuñí yu tyin nyooho ña caca xaan iñi ndo tuhun tsa iyó nu ñuhu ñayivi ihya; iin ñi maa tuhun Nyoo caca iñi ndo. Iin ra yoco tsa ñaha ca tindaha tsicá iñi ra nácaa javaha ra cuhva cuñí maa Jutu Mañi yo. ³³ Maa tyin tatun tsa tindaha ra, tsicá iñi ra nácaa coo vaha ra nu ñuhu ñayivi ihya cuhva taahán iñi ñasihi ra. ³⁴ Tan tacan tucu ñiñaha, siin siin cuhva iyó ñi, tyin ñaha tsa ñaha ca tindaha, maa ñi tuhun Jutu Mañi yo tsicá iñi ña. Tan nducú ña cuhva jachanu ña tsi Nyoo tsihin cuñu ñuhu ña, tan tsihin tsa ñi iñi añima ña. Maa tyin ñaha tsa iyó yii, maa ñi cuhva coo vaha ña tsihin yii ña nducú ña.

³⁵ Caahán yu tuhun ihya tsihin ndo tsa cuenda tsa vaha tsi maa ndo, ñavin tsa jañiñí yu tsi ndo. Maa tyin coo ndo iin ñayivi cuiti tsihin tsa nduve tsa jatyañú tsi ndo. Tan javaha ndo iin ñi tyiñu Nyoo.

³⁶ Maa tyin ndáa nyooho tsicá iñi tyin vaha tsa tindaha sehe ndo tyin tsa cua yaha cuiya tsi; vaha maa, na tindaha maa tsi tun cuñí tsi; ñavin cuatyí cuví can. ³⁷ Maa tyin ndáa nyooho tsicá iñi tyin ña cua tindaha sehe ndo, tan tacan tucu tsicá iñi maa tsi, vaha maa. ³⁸ Ñi tsa cuñí tindaha sehe ñi, vaha javahá ñi. Tan ñi tsa ña cuñí tindaha sehe ñi, vaha ca javahá ñi.

³⁹ Maa tyin ley Nyoo catyí tsi na cundaca ñaha rayii tsi ñasihi ra tsitsi tsa ndi iyó ra. Tatun tsa tsihi ra, tacan tan cuví ndoo nuña ña tan tindaha ña yóo tsihin cuñí maa ña. Maa tyin tun cua tindaha ña, na tindaha ña tsihin ra yihí tuhun Nyoo. ⁴⁰ Maa tyin sii xaan ca cua cuví tsi ña tun ña tindaha ña inga tsaha. Tsehe cuví tsa tsicá iñi maa yu. Tan cuñí yu tyin maa Tatyí li Nyoo, tsaha tuhun ihya tsi yu, tan tsahá cuenda yu tsi ndo.

ndaha ndi tan jata ndi tsa tsiñi ñuhu tsi ndi? ¿A ña taahán tsi nacoo ndi tyiñu can tan cahan ndi maa ñi tuhun Nyoo? ⁷ Ra tsa cuví andaru iyó yahví ra naha. Tan ra tsa tatsí yava nducuaa tsatsí ra tucuaa tsa quee nu nducuaa ra. Tan ra tsa jahá cuenda indiqui tsihí ra letsí ti. ⁸ Tan ña cuñi ndo tyin tuhun ihya tsa tsiñi tuñi jiñi maa yu cuví, tyin nu ley Nyoo tsa tyaá ra Moisés catyí tsi tyehen: ⁹ “Ra tsa tatsí trigu ña taahán tsi tyihi ra yoho yuhu indiqui tsa janduvahá trigu can, tyin taahán maa tsi catsi ti juhva trigu nu jahá tyiñu ti.” Ndi tsa tyin Nyoo ña cahan ra tyehen tsa cuenda indiqui ñi. ¹⁰ Maa tyin na cutuñi iñi yo tyin tumaa ra tahví ñuhu tan ra tatsí, nyita iñi ra naha tyin cua naquihin ra naha tsa cua quee nuu tsa tatsí ra naha. ¹¹ Tan tacan cuví tucu nyuhu, quitsi cahan ndi tuhun Nyoo tsihin ndo, tumaa tsa quitsi tatsí ndi tsiñi tsiñi añima ndo cuví can. Tan taahán tsi tsa jatyinyeé ndo tsi ndi tsa cuenda tsa jacotó ndi tuhun Nyoo tsi ndo. ¹² Tatan jatyinyeé ndo tsi inga ra tsa ña quitsi tyihi tuhun Nyoo nu yucú ndo, taahán tsi tsa cuaha ca jatyinyeé ndo tsi nyuhu, tyin nyuhu tyihí tuhun Nyoo nu yucú ndo.

Maa tyin ña caahán ndi, tan cunyeé iñi ndi tandihí. Ña tsiacán ndi tsa tsiñi ñuhu tsi ndi tsi ndo tyin coto jandihí ndo tsa tyaá yahví ndo tuhun ra Cristo tsa jacuahá ndi. ¹³ Tsiótó ndo tyin ra jahá tyiñu vehe ñuhu nyivi Israel, iyó ra naha tsihin tsa iyó vehe ñuhu can. Tyin taahán tsi tavá siin ra naha juhva cuñu quiñi tyin catsi ra naha. Tan tandihí ca cuñu can cua cahmi ra naha tumaa catyí maa Nyoo tsihin ra naha. ¹⁴ Tan juvin ñi tacan caahán Jutu Mañi yo, tyin taahán tsi jatyinyeé ñi yihí cuenda Nyoo tsi ra caahán tuhun Nyoo tsihin ñi. ¹⁵ Maa tyin yuhu, ndi iin tsaha tan ñaha ca ndacan yu tsa taahán tsi tsi yu. Tan ndi ña tyaá yu tuhun ihya tyin cuñi yu tsa cuhva ndo tsa cuhva ndo tsi yu. Vaha taxin ca nacúu maa yu jaha soco tan ñavin ca tsa ndihí tsa siñi cuñi yu caahán yu tuhun ra Cristo tsihin ndo vasu ndi maa nduve náa jatyinyeé ndo tsi yu.

¹⁶ Ña cuví nduyaa yu tsihin tsa caahán yu tuhun Nyoo tyin maa ra Cristo tavá tyiñu tsi yu tsa cahan yu tuhun ra. Maa tyin ndahví yu tun ña cahan yu tuhun Nyoo ihya. ¹⁷ Yacan cuenda tatun cahan yu tsihin tsa ñi iñi yu, cua ñihi yu yahví yu. Vasu ña cuñi yu cahan yu, tsa ñiñi cuñi tsi cahan yu, tyin tyiñu tsahá maa Nyoo tsi yu cuví tsi. ¹⁸ Tan tsa siñi cuñi yu caahán yu tuhun ra Cristo yacan cuví yahví yu. Tan ña tsiacán yu tsa taahán tsi tsi yu tsa cuenda tsa caahán yu tuhun ra.

¹⁹ Vasu ñavin musu cuví yu, maa tyin nanduví yu musu tandihí nyivi tyin tacan tan cuví jaha canaa yu cuaha ca nyivi cuenda ra Cristo. ²⁰ Tatan nyii yu nu yucú ra Israel naha ra, nanduví yu tumaa maa ra naha tyin ra can naha ra iyó ra naha cuhva catyí ley Nyoo tsa tyaá ra Moisés. Tan tsa cuñi yu jaha canaa yu tsi ra naha cuenda ra Cristo, javahá yu tsa catyí ley vasu ndi maa ña ñiñi tsa javaha yu tan cacu yu. ²¹ Maa tyin tacan cuñi yu jaha canaa yu tsi nyivi tsa ña nyitá iñi ley ra Moisés, javahá yu tumaa javahá ñi, tyin tacan tan cuví jaha canaa yu tsi ñi. Tan tsa javahá yu cuhva javahá ñi, ña cuñi tsi catyí tyin ña tyaá yahví yu ley Nyoo tyin tyaá yahví yu ley ra Cristo. ²² Tatan nyii yu tsihin ra tsa ñaha ca coo vaha tunyee iñi Nyoo tsihin, nanduví yu tumaa maa ra naha, tyin tacan tan cuví cahan yu tuhun Nyoo tsihin ra naha, tan ndunyeé ca iñi ra naha tsihin tunyee iñi Nyoo. Nanduví yu tumaa iyó intuhun intuhun nyivi, tyin tacan tan tyaá soho ñi tuhun Nyoo tsa caahán yu tsihin ñi tan cacu ñi. ²³ Javahá yu tacan tyin tacan tan cacu nyivi tan nasoco ndihí tucu maa Nyoo tsi yu.

²⁴ Tsitó ndo tyin tatun cua cunu suuhva nyivi, tandihi ñi tsinú, maa tyin intuhun ñi ñi jaha canaa. Tacan tucu maa yo, cuñí tsi tsa ñihi cunyicun yo tsi Nyoo tyin tacan tan cuví jaha canaa yo tsa vaha ca tsa tsahá ra tsi yo. ²⁵ Tandihí nyivi tsa tsinú suuhva, nacoó ñi tandihí tsa jatyañú tsi ñi tyin cuñí ñi jahá canaa ñi. Tan nyivi can cua jaha canaa ñi intuhun corona ndaha yutun tsa iin yaha ñi na ityí. Maa tyin yoo nducú yo cuhva jaha canaa yo tsa ña cua tiví maa. ²⁶ Tsa cuenda yuhu ña tsinú soho ñi yu, tan ndi ña cañí tahan soho ñi yu. ²⁷ Maa tyin ñihi ndacá ñaha yu tsi cuñu ñuhu yu. Tan jañiñí yu tyaá yahvi yu tsi Nyoo, coto juvin ñi maa yu tsa yaha jacuahá yu tsi inga nyivi, tan ndoo yu.

10

Nu jacuahá ra Pablo tyin ña vaha jacahnú yo tsitoho

¹⁻² Yañi, ña cuñí yu tsa naa iñi ndo tsa cuví tsi tsii tsaahnu yo tahan tsanaha. Nyoo jacuhun ra iin vico ityí nuu ñi. Tan yahá sava ñi nu ndutya ñuhu iin caa ñi tsihin ra Moisés, ra cuví ityí nuu tsihin ñi. Tan tsa tacan, tumaa tsa tsicoondutya ñi tsihin vico tan tsihin ndutya ñuhu tan ndu iin ñi tsihin ra Moisés. ³ Tan Nyoo tsahá ra iin ñi tsa tsatsí tandihí ñi. ⁴ Tan tsihí ñi ndutya tsa quita tsata cava tsa cuahán tsihin ñi tan cava can cuví ra Cristo, tan tandihí ñi iin ñi ndutya can tsihí ñi. ⁵ Maa tyin vasu cuaha tsa iyo javahá Nyoo nyehe ñi, cuaha ñi ña tyaá yahvi ñi tuhun cahán ra tsihin ñi. Tan tsihí ñi nu tsiqui can.

⁶ Tandihí tuhun ihya tsahá tsi iin cuhva tsi yo tyin tacan tan ña cuñi yo javaha yo tsa caquiñi tumaa tsa javahá ñi can. ⁷ Yacan cuenda ña jacahnu ndo tsitoho, tumaa javahá juhva ñi can, tyin catyí nu tutu Nyoo tyehen: “Tsinyecú ñi, tsatsí ñi, tan tsihí ñi. Yahá can tan nduvita ñi, tsahan quitsaha tsañi ñi [jacahnú ñi indiqui xuhun cuaan tsa javahá ñi].” ⁸ Ña ço ndo tsihin iin ñaha tun ñavin ñasihi ndo cuví. Tacan tucu ñiñaha ña taahán tsi coo ñi tsihin rayi tumaa javahá nyivi can. Tan tsihí oco uñi mil ñi tsa iin quivi. ⁹ Jutu Mañi yo vita xaan iñi ra, maa tyin ña taahán tsi nducú cuhva yo tsi ra tumaa javahá juhva ñi can. Tan tsihí ñi tsa cañ coo tsi ñi. ¹⁰ Tan ña cahán ndo ndavaha ñi siqui Nyoo, tumaa tsa cahán juhva ñi can. Tan jaquitsí ra ángel ra tsahñi tsi ñi.

¹¹ Tandihí yacan tahan tsii tsaahnu yo tsa tsicoo tahan tsanaha. Tan tsinyaa tsi nu libru Nyoo tyin tacan tan yoo tsa iyó yo nu cua ndihi ñuu ñayivi ihya vityin coto yo tyin ña taahán tsi javaha yo tandihí tsa javahá ñi can. ¹² Tan nyooho tsa cuñí tyin vaha cuahán ndo tsihin Nyoo, jaha ndo cuenda coto nduva ndo [jaha nu ña vaha]. ¹³ Tundoho tsa nyehé ndo, cuñí maa ndo tyin intuhun ñi maa ndo nyehé can. Maa tyin inducu ñi nyehé tandihí ca nyivi. Cuita iñi ndo tsi Nyoo, tyin ña tuhvá ra cuhva tsa nyehé ndo tundoho tsa ña cuví cunyeé iñi ndo. Tyin tun nyehé ndo tundoho, nducú ra cuhva tsa quita ndo tsitsí tundoho can tan cunyeé iñi ndo.

¹⁴ Yacan cuenda yañi, ña jacahnu ndo tsitoho. ¹⁵ Caahán yu tsihin ndo tumaa caahán yu tsihin ra tsa cutuñí iñi. Yacan cuenda jaha ndo cuenda tsa caahán yu tsihin ndo tan nyehe ndo tun nditsa a ña nditsa tsa caahán yu. ¹⁶ Quivi tsa nducuhún iñi yo tyin tsihí ra Cristo nu cruu, tsihí yo vinu tan tsatsí yo paan. Tan vinu can cuñí tsi catyí tyin iin ñi cuví yo tsihin ra Cristo tsa cuenda ñiñi ra. Tan paan can cuñí tsi catyí tyin iin ñi cuví yo tsihin ra tsa cuenda cuñu ñuhu ra. ¹⁷ Tyin vasu cuaha yo, maa tyin tandihí yo tan tsatsí yo

intuhun ñi paan. Tan yacan cuenda cuví yo intuhun ñi cuñu ñuhu tsa cuenda ra.

¹⁸ Tyjhi tuñi iñi ndo cuhva iyó nyivi Israel. Tsatsí ñi quití tsa jamañi ñi nuu Nyoo, tan tsihin yacan janahá ñi tyin iin ñi cuví ñi tsihin ra. ¹⁹ Ñavin caahán yu tyin iyó yahvi nyaá tsitoho tsa jacahnú nyivi tsa ña tsitó tsi Nyoo. Nduve yahvi nyaá yacan, tan ndi cuñu tsa jamañi ñi nuu can. ²⁰ Tsa caahán yu cuví: Tun jamañi nyivi tsa ña tsitó tsi Nyoo tsa jamañi ñi, nuu tatyí ña vaha jamañi ñi can tan ñavin nuu Nyoo. Tan ña taahán tsi tsa iin ñi cuví ndo tsihin tatyí ña vaha. ²¹ Tyin ña cuví coho yo copa Nyoo tan juvin ñi cuhva can tan coho tucu yo copa nu ña vaha. Tan ña cuví catsi yo nu mesa Nyoo tan juvin ñi cuhva can catsi yo nu mesa nu ña vaha. ²² Ña cuhva yo tisihi tsi Jutu Mañi yo tyin maa ra iyó ca tunyee iñi tsi ra tan ñavin ca maa yo.

Tun cua javaha yo náa javaha yo, na javaha yo tsa cuenda tsa vaha tsi inga ca nyivi

²³ Nditza tsa caahán nyivi: “Cuví javaha yo náa cuñi maa yo.” maa tyin ña tandihi can tan jacuahnú can tsi yo tsihin Nyoo tan ndi ña cuví can tsa vaha tsi yo. ²⁴ Ña cuví caca iñi yo tsa cuenda maa ñi maa yo, tyin cuñi tucu tsi tsa caca iñi yo tsa cuenda inga ca nyivi tan nducu yo tsa vaha tsi ñi.

²⁵ Catsby nyoooho tandihi cuñu tsa cuyahví nu nuyahvi. Tan ña nducu tuhun ndo náa cuñu cuví can tyin tacan tan ña cua jatyañu tsa tsicá iñi ndo tsi ndo. ²⁶ Tyin ñuhu ñayivi tan tandihi tsa iyó nuu tsi, tsii maa Nyoo cuví.

²⁷ Tan tatun iin nyivi tsa ña tsinú iñi tsi Nyoo, tan cana ñi tsi ndo tsa cucatsi ndo yuvehe ñi, tun cuñi ndo cuhun ndo, vaha maa cuhun ndo, catsby nyoooho tandihi tsa cua cuhva ñi catsi ndo. Tan ña nducu tuhun ndo tun jamañi ñi cuñu can nuu tsitoho. ²⁸⁻²⁹ Maa tyin tatun ndáa nyivi caahán tyehen tsihin ndo: “Nyayu ihya, nyayu tsa jamañi nyivi nuu tsitoho cuví tsi”; ña catsby ndo tyin coto nduva ñi tsa caahán tacan tsihin ndo tan ndoo tsa tuñu cuñi ñi jaha can.

Maa tyin yihí ndo cua catyi ndo: “¿Nacuenda cuñi tsi tsa jahá yu cuenda tsi yu tsa catyi tsa tsicá iñi inga ca nyivi? ³⁰ ¿Tan nacuenda ña cuví catsi yu can?, tan maa ñi tsahá yu tyahvi nyoo tsi Nyoo tan tsatsí yu”, catyi ndo. ³¹ Vaha maa, tun tsatsí ndo, tan tsihi ndo, o javahá ndo inga ca tsa javahá ndo; javaha nyoooho maa tyin cuhva taahán iñi Nyoo. ³² Tan ña javaha ndo tsa cuví janduva tsi inga ca nyivi, ndi ñi Israel, tan ndi ñi tsa ñavin ñi Israel cuví, tan ndi ñi yihí cuenda Nyoo. ³³ Tumaa yuhu, ña nducú yu tsa vaha tsi maa yu. Maa tyin nducú yu tsa vaha tsi inga nyivi tan nácaa cuví cacu añima ñi.

11

¹ Nyehe ndo tumaa javahá yu cuhva javahá ra Cristo, tacan taahán tucu tsi javaha nyoooho cuhva javahá yuhu.

Nacaa taahán tsi javaha ñiñaha nu iyó culto

² Yañi, sií xaan cuñi yu tyin tacan ñi nducuhún iñi ndo tsi yu. Tan tyaá yahvi ndo tsa jacuahá yu tsi ndo. ³ Maa tyin cuñi yu tsa coto ndo tyin ra Cristo cuví jiñi tsihin intuhun intuhun rayi tyin juvin ra cuví ityi nuu tsihin ra, tan rayi cuví jiñi tsihin ñasihi ra, tumaa cuví Nyoo jiñi tsihin ra Cristo. ⁴ Tatun iin rayi tyasi ra jiñi ra tan tsicán tahvi ra o tsahá cuenda ra tuhun tsa tsahá Nyoo tsi ra, tsahá ra ticanuu tsi ra Cristo tyin juvin ra cuví jiñi tsihin ra. ⁵ Maa tyin

tun iin ñaha tan ña tyasí ña jiñi ña tsa tsicán tahvi ña, o tsa tsahá cuenda ña tuhun tsa tsahá Nyoo tsi ña, tumaa tsa xatya ndii jiñi ña cuví can. Tan tsahá ña ticanuu tsi yí ña tyin juvin ra cuví jiñi tsihin ña. ⁶ Tatun iin ñaha tan ña tyasí ña jiñi ña, vaha taxin ca xatya ña tandihi xixi jiñi ña. Maa tyin tun cahán nuu ña tsa xatya jiñi ña, nacasi ña jiñi ña. ⁷ Ña taahán tsi tsa casi rayii jiñi ra. Tyin cuhva caá Nyoo caá ra, tyin ndacá ñaha ra tsi ñasiihi ra, tumaa tsa ndacá ñaha maa Nyoo tsi ra. Maa tyin iin ñaha jacahnu ña tsi yí ña tsihin tsa tsahá ña tsa cundaca ñaha ra tsi ña. ⁸ Tyin quivi javahá Nyoo tsi rayii, ña javahá ra tsi ra tsihin yiqui naha ñaha. Tyin tsihin yiqui naha rayii javahá ra tsi ña. ⁹ Tan tsacatyí rayii, tan tsinu ñaha, tan ñavin tsacatyí ñaha tan tsinu rayii. ¹⁰ Yacan cuenda ñiñaha cuñi tsi tsa cundasi jiñi ñi. Tyin cuñi tsi catyi tyin ndacá ñaha yii ñi tsi ñi. Tan cuví tsi tsa vaha tsi ra ángel naha ra. ¹¹ Maa tyin tyaa Nyoo cuhva tyin tsiñi ñuhu rayii tsi ñaha. Tan tsiñi ñuhu ñaha tsi rayii. ¹² Ndotsa tyin ñaha tsinu ña tsihin yiqui naha rayii jahá Nyoo. Maa tyin nda cuanda quivi can tan quitsahá tsahá Nyoo tsa coo sehe yí ña. Tan nda cuanda vityin juvin ñi maa Nyoo tsahá tsa coo nduvi taahan ñi, rayii tan ñaha.

¹³ Tyihí tuñi jihna iñi ndo tsa cuenda tuhun ihya. ¿A vaha tsa ña ndasi jiñi ñaha tan tsicán tahvi ña tsi Nyoo tsitsi vehe ñuhu? ¹⁴ Tsitó yo tyin ticanuu cuví tsi tsa cuenda rayii tatun nañi jiñi ra. ¹⁵ Maa tyin ñiñaha, vaha tsa nañi jiñi ñi tyin Nyoo tsahá ra tsa ndunañi tsi tan casi tsi jiñi ñi. ¹⁶ Maa tyin tatun yóo cuñi cañi tahan tsa catyi tuhun ihya, cuñi tsi coto ndo tyin ndi nyuhu tan ndi vehe ñuhu Nyoo, nduve inga ca tuhun iyó.

Nu caahán ra Pablo tsihin nyivi Corinto tyin ña vaha cuhva tsatsí ñi Santa Cena

¹⁷ Yañi, inga tuhun cua cahan yu tsihin ndo tyin ña sii cuñi yu tsihin ndo; tyin tsa javahá ndo nu ndu iin ndo, ña tsahá tsi tsa vaha tsi ndo, tan jativi tsi tsi ndo. ¹⁸ Tyin catyi nyivi tsihin yu tyin cuhva tsa ndu iin ndo tsa cua coo ndo culto, tan natahvi sava ndo. Tan tsicá tucu iñi yu tyin vasiqui nditsa tsa caahán ñi. ¹⁹ ¡Vasiqui cuñi maa ndo tyin tsihin tsa natahvi sava ndo tan quituvi ndáa nyooho tsinu vaha iñi tsi Nyoo! ²⁰ Maa tyin tatun tacan ñi iyó tsihi nu yucú ndo, ñavin Santa Cena cuví can. ²¹ Tyin cuhva tsa cua catsi ndo, tsatsí ñi ndo tsa ndahá ndo. Tan ña ndatú ndo nda cuanda ndu iin tandihi nyivi. Tan yihí ndo cuaha tsatsí ndo, tan nda cuanda tsiñi ndo tsihin vinu. Tan yihí nyivi ña ñihí ñi tsa catsi ñi jahá ndo. ²² ¿A nduve yuvehe ndo catsi ndo tan coho ndo? Tyin tsa javahá ndo tacan, ndasi cuñi ndo nyehé ndo vehe ñuhu Nyoo cuví can. Tan tsahá ndo ticanuu tsi nyivi nduve tsa iyó tsi. ¿A taahán tsi catyi yu tsihin ndo tyin vaha cuhva javahá ndo, cuñi maa ndo? Ña taahán tsi, tyin ña vaha tsa javahá ndo.

Ra Pablo tsahá cuenda ra tsi ñi, nácaa taahán tsi coo ñi Santa Cena (Mt. 26.26-29; Mr. 14.22-25; Lc. 22.14-20)

²³ Tyin Jutu Mañi yo jacuahá tuhun ihya tsi yu. Tan juvin yacan tsa yaha jacuahá yu tsi ndo. Tyin tsacuaa tsa ndi cumañi ca nacuhva cuenda ra Judas tsi Jutu Mañi yo tsi nu xaan iñi tsi ra, quihñ ra iin paan. ²⁴ Tan tsa yaha nacuhva ra tyahvi nyoo tsi Nyoo tan tsahnu ra paan can. Tan catyi ra: “Catsi ndo paan ihya tyin cuví tsi tumaa cuñi ñuhu yu tyin tsa cuenda ndo tan cua cúu yu. Javaha ndo tyehen tan nducuhun iñi ndo tsi yu”, catyi ra Jesús. ²⁵ Tan tsa yaha tsa cuxiñi ra naha tan quihñ ra Jesús vasu vinu tan catyi ra: “Tsihin vinu ihya ndoó Nyoo tyiñu tsihin ndo vityin, tyin vinu tsa yihí tsitsi vasu

ihya, niñi yu cuví. Tahan ñi tsaha tsa cua coho ndo, coho ndo tsa cuenda tsa nducuhun iñi ndo tsi yu”, catyi ra Jesús tsacuaa can. ²⁶ Tan tahan ñi tsa ndu iin yo tan tsatsi yo paan tan tsihi yo vinu jacotó yo tsi nyivi tyin tsacatyí cuatyí yo tsihi Jutu Mañi yo. Tan tacan jacotó yo tsi nyivi nda cuenda quivi quitsi nyico ra.

Ra Pablo tsahá cuenda ra tsi yo nácaa taahán tsi coo yo Santa Cena

²⁷ Tatun tsatsi yo paan tan tsihi yo vinu cuhva tsa ña taahán iñi Nyoo, tsicoó cuatyí yo. Tyin ña tyaá yahvi yo tsa tsihi ra Cristo nu cruu tan tsa tsati niñi ra.

²⁸ Yacan cuenda cuñi tsi jaha yo cuenda tatun vaha cuahán yo tsihin Nyoo tsa ndi cumañi ca catsi yo paan tan coho yo vinu. ²⁹ Tyin Nyoo tatsi tuñi ra tsi yo tun tsatsi yo tan tsihi yo tan ña tsicá iñi yo tsa cuenda tsa tsihi ra Cristo.

³⁰ Tan tsa cuenda yacan cuaha xaan ndo cuuhví ndo tan nduve tunyee iñi iyó tsi ndo, tan juhva nyivi tahan ndo tsa yahá tsihi ñi. ³¹ Maa tyin tatun jaha vaha ndo cuenda tsi ndo, Jutu Mañi yo ña cua tatsi tuñi ra tsi ndo. ³² Maa tyin tatun tatsi tuñi Jutu Mañi yo tsi yo tacan, javahá ra tacan tyin tacan tan ña cunaa yo tsihin nyivi iyó cuenda nu ñuhu ñayivi ihya.

³³ Tan tacan nyooho yañi, tatun cua ndu iin ndo tsa cua catsi ndo Santa Cena, cuatu tahan ndo tsi ndo tan catsi ndo tan coho ndo iin caa ñi. ³⁴ Maa tyin tatun ndaa nyooho tsisocó ndo, catsi jihna ndo nda yuvehe ndo tyin tacan tan ña cua tatsi tuñi Nyoo tsi ndo.

Nda quivi tsa quitsi nyehe yu nu yucú ndo tan jandaa yu inga ca tuhun.

12

Ndatu tsa tsahá Tatyí Ii Nyoo tsi yo

¹ Yañi, cuñi yu tsa coto ndo náa ndihi ndatu tsahá Tatyí Ii Nyoo tsi tsa intuhun intuhun yo.

² Tsitó ndo tyin quivi tsa ñaha ca nacoto ndo tsi Nyoo, tsahá ndo tsa cundaca ñaha tsitoho tsa ña cuví cahan tsi ndo. ³ Yacan cuenda cuñi yu tsa coto ndo tyin ra tsa caahán tyin ña vaha ra Jesús, ñavin Tatyí Ii Nyoo jacahán tsi ra. Maa tyin ra tsa jacahán Tatyí Ii Nyoo catyí ra tyin ra Cristo cuví Jutu Mañi yo.

⁴ Siin siin ndatu naquihín intuhun intuhun yo, maa tyin iin ñi Tatyí Ii Nyoo tsahá itsi yo. ⁵ Siin siin cuhva jahá tyiñu yo maa tyin tyiñu intuhun ñi maa Jutu Mañi yo javahá yo. ⁶ Siin siin tyiñu javahá tsa intuhun intuhun yo. Maa tyin intuhun ñi maa Nyoo cuví ra jatyinyeé tsi tandihi yo tan javahá yo can. ⁷ Tan tsahá ra tunyee iñi Tatyí Ii ra tsi intuhun intuhun yo tyin tacan tan jatyinyee yo tsi tandihi ca nyivi yihí cuenda ra. ⁸ Tsi juhva yo tsahá Tatyí Ii Nyoo tsa cahan yo tsihin tsa tsiñi tuñi tsa iyó tsi ra. Tan tsi inga yo tsahá ra tsa nacoto yo tsa ña tsitó yo. ⁹ Tan tsi inga yo tsahá ra tsa tsinú xaan iñi yo tsi ra. Tan juven ñi maa Tatyí Ii ra tsahá tunyee iñi tsi inga yo tsa janduvaha yo tsi nyivi cuuhví. ¹⁰ Tan tsi inga yo tsahá ra tunyee iñi tsa cuví javaha yo tsa iyo. Tan inga yo tsahá ra tsa cahan yo tuhun tsa tsahá ra tsi yo tyin jacoto yo tsi inga ca nyivi. Tan tsi inga yo tsahá ra tsa cuví nacoto yo tun Tatyí Ii Nyoo a tatyí ña vaha caahán. Tan tsi inga yo tsahá ra tunyee iñi tsa cuví cahan yo inga yuhu tsa ña tsitó yo. Tan tsi inga yo tsahá ra tunyee iñi tsa cuví nacoto yo tan nacatyí tuhun yo náa caahán tsa caahán inga nyivi. ¹¹ Tan tandihi yacan tsahá intuhun ñi maa Tatyí Ii Nyoo. Maa tyin siin siin tsa tsahá ra tsi tsa intuhun intuhun yo, nácaa cuñi maa ra.

Tandihí yo tan cuví yo intuhun ñi cuñu ñuhu tsihin ra Cristo

¹² Tumaa cuñu ñuhu yo iyó jiñi tsi, iyó ndaha tsi, iyó tsaha tsi, maa tyin tandiñi tsi tan cuví tsi intuhun ñi cuñu ñuhu. Tan tacan cuví tucu maa yo tshin ra Jesucristo; vasu cuaha xaan yo, maa tyin intuhun ña cuñu ñuhu ra cuví yo. ¹³ Tan tacan tucu tandiñi yo, a cuví yo nyivi Israel, a ñi Grecia, a ñi iyó tsitoho, a ñi nduve tsitoho, maa tyin tsa tsicoondutya yo tan nanduví yo intuhun ña cuñu ñuhu ra Cristo tyin tsaha ra intuhun ñi maa Tatyí li ra coo tshin tandiñi yo.

¹⁴ Tyin cuñu ñuhu yo ña cuví cuví tsi intuhun ñi maa tinuu tyin cuñí tsi tsa cunyecu tandiñi ca tsa cutahan tshin tsi tan cuví tsi cuñu ñuhu ñi. ¹⁵ Tun tsatyin cuví cahan tsaha yo tan catyí tsi: “Yuhu nduve yahvi nyaá yu tyin ñavin ndaha cuví yu.” Ñavin tsa cua cahan tsi tacan tan ña cua cutahan ca tsi tshin cuñu ñuhu can. ¹⁶ O tun tsatyin cuví cahan soho yo tan catyí tsi: “Yuhu nduve yahvi nyaá yu tyin ñavin tinuu cuví yu.” Ñavin tsa cua cahan tsi tacan tan ña cutahan ca tsi tshin cuñu ñuhu can. ¹⁷ Tun tsatyin nanñi cuñu ñuhu yo cuví tsi tinuu tan nduve soho yo, ¿nácaa cua cuñi yo? O tun tsatyin nanñi cuñu ñuhu yo cuví tsi soho, ¿nácaa cua tahñi yo? ¹⁸ Maa tyin Nyoo tyaá ra tan iin tan iin can nu cuñí maa ra. ¹⁹ Tatun nduve tsa intuhun intuhun tsa cutahán tshin cuñu ñuhu can, ñavin cuñu ñuhu cuví can. ²⁰ Maa tyin tsa ndu iin soho, tinuu, jiñi, ndaha, tan tandiñi ca maa, tacan tan cuví tsi intuhun cuñu ñuhu.

²¹ Tinuu yo ña cuví catyí tsi tshin ndaha yo: “Ña tsiñí ñuhu yooho tsi yu.” Tan ndi jiñi yo tan ña cuví catyí tsi tshin tsaha yo: “Ña tsiñí ñuhu yooho tsi yu.” ²² Ña vaha tsa cahan tsi tacan tyin vasu iin tsa lihli tsa cuñí maa yo tyin ña tsiñí ñuhu tsi yo, yacan cuví tsa tsiñí ñuhu ca. ²³ Tan nu cuñí yo tyin ña sii caá, tyasí yo. Tan nu ña taahán tsi nyehé nyivi, yacan tyasí vaha ca yo. ²⁴ Tan nu sii caá, ña tyasí yo. Tacan javahá Nyoo cuñu ñuhu yo, tyin tacan tan jacahnú ca yo nu cuñí maa yo tyin ña sii caa. ²⁵ Tan tsa intuhun intuhun tsa iyó cuñu ñuhu yo, jahá cuenda tahan maa tsi itsi, yacan cuenda ña cuví cusñin tsi. ²⁶ Tatun luxu cuñu ñuhu yo nyehé tundoho, nyehé ndiñi tanñi ca cuñu ñuhu yo tundoho. Tan tatun sii cuñí luxu tsi, sii cuñí tanñi tsi.

²⁷ Tan maa yo cuví yo cuñu ñuhu ra Cristo. Tan luxu luxu cuñu ñuhu ra cuví tsa intuhun intuhun yo. ²⁸ Tan Nyoo natyisó ra tsi intuhun intuhun yo vehe ñuhu tyin tacan tan jatyinyee tahan yo tsi yo. Tsa jihna ñi natyisó ra tsi ra caca tyiñu ra. Tsa tsinu uvi, natyisó ra tsi ra cuví ndusu yuhu ra. Tan tsa tsinu uñi, natyisó ra tsi ra jacuaha. Yahá can, tan natyisó ra tsi ra tsa javaha tsa iyo, tan natyisó tucu ra tsi ra tsa janduvaha nyivi cuuhví, tan ra tsa jatyinyee tsi nyivi, tan ra jaha cuenda vehe ñuhu, tan ra caahán inga yuhu tsa ña tsitó ra. ²⁹ Ña tandiñi yo tan tsicá yo tyiñu ra Cristo. Ña tandiñi yo tan cuví yo ndusu yuhu ra. Ña tandiñi yo tan cuví yo ra jacuahá. Ña tandiñi yo tan javahá yo tsa iyo. ³⁰ Ña tandiñi yo tan tsahá Nyoo tunyee iñi tsa janduvahá yo tsi nyivi cuuhví. Ña tandiñi yo tan caahán yo inga yuhu tsa ña tsitó yo. Ña tandiñi yo tan cuví nacotó yo tan nacatyí tuhun yo náa cuñí tsi catyí tsa caahán inga nyivi. ³¹ Nducu ndo cuhva naquihin ndo tsa vaha ca tsa tsahá Nyoo. Maa tyin cua janaha yu iin cuhva vaha ca tsi ndo.

13

Nu janahá ra Pablo nácaa taahán tsi cuñi yo tsi nyivi

¹ Tatun yuhu tan cuví cahan yu cuaha ñi yuhu tsa caahán nyivi iyó nu ñuhu ñayivi ihya, tan cuví cahan tucu yu yuhu tsa caahán ángel, maa tyin tatun ña

cuñi yu tsi Nyoo tan ndi tsi nyivi, cuvi yu tumaa tyombo tsa nañi ñi maa o iin caa tsa tsacu ndaxin ñi maa. ² Tatun cuvi cuhva cuenda yu tuhun caahan Nyoo, tan cuvi coto yu tandihi tuhun xeehe, tan tsito yu tandihi tuhun, maa tyin tatun ña cuñi tucu yu tsi Nyoo tan ndi tsi nyivi, nduve naa catyi javaha yu tandihi yacan. Tatun tsinu xaan iñi yu tsi Nyoo nda cuanda cuvi cahan yu tsihin yucu na cuhun tsi inga ityi, tan cua cuhun tsi, maa tyin tatun ña cuñi yu tsi Nyoo tan ndi tsi nyivi, nduve naa ra cuvi yu. ³ O tatun cuhva yu tandihi tsa iyó tsi yu tsi nyivi ndaahvi, tan cuhva yu nda cuanda ñayivi yu tyin cucayu cuñu ñuhu yu, maa tyin tatun ña cuñi yu tsi Nyoo tan ndi tsi nyivi, nduve naa cua jatinyee can tsi yu.

⁴ Tatun nditsa tsa cuñi yo tsi Nyoo tan tsi nyivi, ña tyixin yo, vaha iñi yo; ña nyiyó iñi yo tsa tsahá ra tsi inga ñi, ña cahnu jahá yo tsi yo, tan ña yaa yo.

⁵ Tatun nditsa tsa cuñi yo tsi Nyoo tan tsi nyivi, ña siqui iñi yo, tan ña nducú yo maa ñi tsa vaha tsi maa yo, ña cuxaán yo, tan ña ndoo tsihi tsitsi añima yo.

⁶ Tatun nditsa tsa cuñi yo tsi Nyoo tan tsi nyivi, ña sii cuñi yo naa ndihi tsa ña vaha javahá ñi, maa tyin cusii iñi yo tsihin tsa vaha tan tsa nditsa. ⁷ Tatun nditsa tsa cuñi yo tsi Nyoo tan tsi nyivi, cunyeé iñi yo nyehe yo tundoho jahá ñi, tan tsinu iñi yo tyin cua javaha ñi tsa vaha tan ndatú yo tsa nasama ñi cuhva iyó ñi, tan ña cundihí iñi yo.

⁸ Tsa cuñi yo tsi Nyoo tan tsi nyivi ña cua cundihí maa tsi, maa tyin coo quivi tsa ña cua cuhva cuenda ca yo tsa caahan Nyoo, tan ña cua cahan ca yo inga yuhu, tan tsa tsito yo vityin ña tsiñi ñuhu ca can tsi yo. ⁹ Nyoo tsahá ra tsa coto yo luxu ñi vityin tan tsahá tucu ra luxu ñi tsa cuhva cuenda yo tsi nyivi, ¹⁰ maa tyin quivi quitsi nyico ra Cristo, cua cundihí tsa tsito yo luxu ñi tyin cua coto yo tandihí maa.

¹¹ Quivi tsa luhlu yu caahan yu tumaa caahan ra nyihi tan tsicá iñi yu tumaa tsicá iñi ra nyihi, maa tyin quivi tsahnú yu nacoó yu tsa yu cuhva javahá ra nyihi. ¹² Tan tacan tucu vityin tsito yo tuhun Nyoo tumaa tsa nyehé yo nu inu tun tsa ndihí tsi yaa. Maa tyin quivi cua quitsi ra Cristo, cua coto yo tandihí maa. Luxu ñi tsito yu vityin, maa tyin quivi quitsi nyico ra, tandihí cuii maa tan cua coto yu, tumaa nacoó maa ra tsi yu vityin. ¹³ Iyó uñi taahan tsa ña cua ndihí maa: tsa tsinu iñi yo tsi Nyoo, tsa tsito yo tyin nditsa tsa cua ñihi yo tandihí tsa cahan Nyoo tyin cuhva ra tsi yo, tan tsa cuñi yo tsi Nyoo tan tsi nyivi. Tan tsitsi tsa nduñi taahan tsehe, tsa tsiñi ñuhu ca cuvi tsa cuñi yo tsi Nyoo tan tsi nyivi.

14

Nu jacuahá ra Pablo nácaa cahan yo inga yuhu tsa ña tsitó yo

¹ Jañihi ca ndo cuñi ndo tsi Nyoo tan tsi nyivi. Tan nducu ndo cuhva naquihin ndo ndatu tsa tsahá Tatyí Ii Nyoo tsi yo. Nducu jihna ndo tsa cuhva cuenda ndo tuhun Nyoo tsi nyivi. ² Tyin tun caahan yo inga yuhu tsa ña tsitó yo, tsihin Nyoo caahan yo, tan ñavin tsihin nyivi. Tyin ndi intuhun ñi tan ña cutuñi iñi ñi, tyin tuhun xeehe caahan yo jahá Tatyí Ii Nyoo. ³ Maa tyin tun tsahá cuenda yo tuhun Nyoo tsi nyivi, cutuñi iñi ñi tan ñihi ca tsahnú ñi tsihin tuhun Nyoo. Tan ndu iin ca iñi ñi jahá yo tan ndunyeé ca iñi ñi. ⁴ Tatun caahan yo inga yuhu tsa ña tsitó yo, maa ñi maa yo tsahnú tsihin can. Maa tyin tun tsahá cuenda yo tuhun caahan Nyoo tsihin yo tsihin nyivi, tandihí ñi tsahnú.

⁵ Yuhu cuñi yu tsa cahan tandihí ndo inga yuhu tsa ña tsitó ndo. Maa tyin vaha xaan ca tun cuvi cuhva cuenda ndo tsa caahan Nyoo, tyin jatinyee

ca yacan tsi ñi yucú vehe ñuhu tan ñavin ca tsa cahan yo inga yuhu. Maa tyin tatun iin ndo cuví nacoto ndo nácaa caahán inga ndo tsihin inga yuhu, naçatyí tuhun ndo tsihin ñi. Tacan tan cuví jatyinyee tsi tsi tandihí ñi. ⁶ Yacan cuenda yañi, tatun yuhu tan tsaá yu nu yucú ndo, tan cahan yu inga yuhu, ña cua jatyinyee tsi tsi ndo. Maa tyin tun cahan yu tsa janaha Nyoo tsi yu, o tsa jacoto ra tsi yu, o tsa tsahá ra tyin cuhva cuenda yu tsi ndo, o tsa jacuahá yu tsi ndo, cua jatyinyee tsi tsi tandihí ndo.

⁷ Tatun tiví yo cutu, o javacú yo guitarra, tan ña quitá vaha ndusu can jahá yo, ña cua coto yo náa yaa javacú yo. ⁸ Tan tatun nu iyó cuatyí tan ña vaha tiví ra cutu, yoñi cua coto náa cuhva cua cañi tahan ra naha. ⁹ Tan tacan tucu yoo, tatun caahán yo inga yuhu tsa ña cutuñí iñi nyiví, ña cua coto ñi náa caahán yo. Tan cua catyí ñi tyin jiñi yo ña vaha cuñí, yacan caahán maa yo. ¹⁰ Cuaha xaan yuhu caahán nyiví nu ñuhu ñayiví ihya. Tan intuhun intuhun nuu yuhu tan iyó iyó ñi tsa cuñí tsi catyí. ¹¹ Maa tyin tun ña cutuñí iñi yu yuhu tsa caahán inga nyiví tsihin yu, ña cuví natuhun yu tsihin ñi. Tan ndi maa ñi ña cuví natuhun ñi tsihin yu. Cuví ñi tumaa nyiví inga ñuu tsa cuenda yu. ¹² Yacan cuenda nyooho tsa cuñí xaan naquihin ndatu tsa tsahá Tatyí Ii Nyoo, nducu ndo cuhva naquihin ndo tunyee iñi tsa cuví jatyinyee vaha ca tsi nyiví yucú vehe ñuhu.

¹³ Tacan tucu nyooho tsa caahán inga yuhu, ndacan ndo tsi Nyoo na cuhva ra ndatu tsa nacatyí tuhun ndo tsihin nyiví náa cuñí tsi catyí. ¹⁴ Tyin tatun tsicán tahví yu tsi Nyoo tsihin iin yuhu tsa ña cutuñí iñi yu, añima yu tsicán tahví tsi Nyoo, maa tyin tsa tsihí tuñi jiñi yu ña cutuñí iñi tsi. ¹⁵ Yacan cuenda cuñí tsi tsa ndacan tahví yu tsi Nyoo tsihin inga yuhu. Tan ndacan tahví tucu yu tsi ra tsihin yuhu tsa cutuñí iñi yu. Tan cuñí tsi tsa cata yu yaa tsihin yuhu tsa ña cutuñí iñi yu. Tan cata ndihí tucu yu yaa tsihin yuhu tsa cutuñí iñi yu. ¹⁶ Tyin tatun jacahnú un tsi Nyoo tsihin maa ñi maa yuhu tsa tsahá Tatyí Ii Nyoo tsi un, ña cua cutuñí iñi nyiví tsa ña tsitó náa cuví yacan. Tan ña cua cuví jacahnu ñi tsi Nyoo tsihin un. ¹⁷ Vasu ndi maa vaha tsa caahán un, cuhva tsa nacuhvá un tyahví nyoo tsi Nyoo, maa tyin ña jatyinyee tsi tsi inga nyiví tyin ña cutuñí iñi ñi tsa caahán un. ¹⁸ Tan yuhu nacuhvá yu tyahví nyoo tsi Nyoo tyin cuaha ca tsaha caahán yu inga yuhu tan ñavin ca tandihí nyooho. ¹⁹ Maa tyin vaha ca cuñi yu cahan yu vasu uhun taahan ñi tuhun tsitsi vehe ñuhu tan ñavin ca tsa cahan yu utsi mil tuhun tsihin inga yuhu, tyin vasu cuaha tuhun cua cahan yu tsihin ndo ña cua jatyinyee can tsi ndo tyin ña cutuñí iñi ndo.

²⁰ Tsahnu çaca iñi ndo, yañi. Tan ña lee xaan çaca iñi ndo. Maa tyin tatun javaha ndo náa javaha ndo, javaha ndo tumaa javahá lee tyin lee ña javahá tsi tsa caquiñi. ²¹ Catyí Nyoo nu libru ley ra tyehen: “Cua cahan yu tsihin nyiví ihya tsihin yuhu nyiví inga ñuu tan tsihin inga yuhu tsa ña tsitó ñi. Maa tyin vasu ndi maa tsa cua javaha yu tacan, ña cua tyaa yahví maa ñi tsi yu”, catyí Jutu Mañi yo. ²² Yacan cuenda tsa caahán yo inga yuhu cuví tsi tumaa iin seña tsa cuenda nyiví tsa ña tsinú iñi tsi ra Cristo. Maa tyin tsa tsahá cuenda yo tsa caahán Nyoo, cuví tsi cuenda nyiví tsa tsinú iñi tsi ra. ²³ Tyin tatun tandihí ndo caahán ndo inga yuhu nu ndu iin ndo, tan quihví iin nyiví tsa ña yihí cuenda Nyoo, o ñi tsa ña cutuñí iñi tuhun Nyoo, cua catyí ñi tyin jiñi ndo ña vaha cuñí. ²⁴ Maa tyin tatun tandihí ndo tsahá cuenda ndo tsa caahán Nyoo tan quihví iin nyiví tsa ña yihí cuenda Nyoo, a ñi tsa ña cutuñí iñi tuhun Nyoo, cua coto ñi tyin iyó cuatyí ñi tsa cuenda tsa cutuñí iñi ñi tsa caahán ndo.

²⁵ Tan tandihí tsa iyó tsitsi añima ñi cua nacoto ñi, tan cua cuiñi tsiti ñi jacahnu ñi tsi Nyoo. Tan cua catyi ñi tyin nditsa nditsa cuii tsa nyaá Nyoo tsihin ndo.

Nacaa javahá yo culto iin cuhva vaha

²⁶ Yacan cuenda yañi, tatun cua ndu iin ndo, tan tsahá Nyoo tsa tsahá ra tsi tsa intuhun intuhun ndo, cuhva cuenda ndo itsi; a tsahá ra tsa cata ndo yaa, o tsa jacuahá ndo, o náa tsa janahá ra tsi ndo, o jacoto ra tsi ndo, o cua cahan ndo inga yuhu, o nacatyí tuhun ndo naa cuñí tsi catyi inga yuhu can. Maa tyin tandihí yacan taahan tsi cuvi tsi iin tsa tsahá tunyee iñi maa Nyoo tsi tandihí ndo tsa yihí ndo cuenda ra. ²⁷ Tatun cua cahan ndo inga yuhu nu ndu iin ndo, cuñí tsi tsa cahan uvi ndo a uñi ñi ndo, maa tyin intuhun intuhun ñi ndo çahan; ña çahan tandihí ndo juvin ñi cuhva tsa caahán inga ndo. Tan inga tucu tuhun cuñí tsi tsa nacatyí tuhun inga ndo tsa caahán ndo. ²⁸ Maa tyin tun yoñi cuvi nacatyí tuhun tsa caahán ndo, vaha taxin ca, ña çahan ndo tsihin inga yuhu nu ndu iin ndo. Çahan ndo tsihin Nyoo tsihin inga yuhu tun cuñí ndo, maa tyin ndihí cuhva tsiñi ñi maa ndo. ²⁹ Tacan tucu tatun tsahá cuenda yo tsa caahán Nyoo. Çahan uvi ndo, a uñi ñi ndo. Tan tandihí ca ndo jaha ndo cuenda tun vaha tsa caahán yañi ndo. ³⁰ Maa tyin tatun jacoto Nyoo náa inga ca tuhun tsi inga nyivi tsa yucú tsiñi tuhun caahán ndo, tacan tan ra tsa nyaá caahán can, cuñí tsi jandihí ra tsa caahán ra tan cahan inga ñi. ³¹ Tan tacan tandihí nyooho tsa naquihín tuhun tsa tsahá Nyoo cuvi nacatyí tuhun intuhun intuhun ndo, tyin tacan tan cutuhva tandihí nyooho tsa ndu iin vehe ñuhu tan ndu iin ca iñi ndo. ³² Nyooho tsa tsahá cuenda tsa caahán Nyoo, cuvi cuatu nuu ndo nda cuanda ndihí cahan inga nyivi, ³³ tyin Nyoo ña cuñí ra tsa tavi tahan ña cahan ndo, tyin maa ra catsi iyó ra.

Qujihin ndo cuhva iyó inga ca vehe ñuhu nu ndu iin nyivi yihí cuenda ra Cristo, ³⁴ tyin ñiñaha taxin ñi nyecú ñi tsitsi vehe ñuhu tyin tyaá yahvi ñi tsi yii ñi tumaa catyi ley Nyoo. Tan tacan taahán tucu tsi javaha nyooho. ³⁵ Tatun náa cuñí ñi coto ñi, na ndaca tuhun ñi tsi yii ñi nda yuvehe ñi, tyin ña vaha tsa cahan ñiñaha nu ndu iin ndo.

³⁶ Tatun sñn cuhva tsicá iñi ndo, cuñí tsi nducuhún iñi ndo tyin ñavin nu yucú ndo quitsahá tuhun Nyoo. Tan ñavin nyooho ñi naquihín tuhun Nyoo. ³⁷ Tatun ndáa nyooho cuñí tyin ndusu yuhu Nyoo cuvi ndo, o cuñí ndo tyin Tatyí Ii Nyoo jaquihín ityi tsi ndo, tun nditsa tsa cuvi ndo yacan, cua nacoto ndo tyin tsa caahán yu tsihin ndo ihya, tsa tsahá maa Jutu Mañi yo tyin cuhva cuenda yu tsi ndo cuvi. ³⁸ Maa tyin tatun ña cuñí ndo naquihín ndo tuhun ihya, ndi nyuhu tan ña cua naquihín ndi tuhun caahán nyooho.

³⁹ Tan tacan, yañi, nducu ndo cuhva cuhva cuenda ndo tuhun Nyoo tsi nyivi. Tan ña çasi ndo nu cahan nyivi inga yuhu. ⁴⁰ Maa tyin javaha ndo tandihí tsihin tsa vii tan tsa catsi.

15

Nacaa nandoto ra Cristo

¹ Vityin yañi, cuñí yu tsa nducuhun iñi ndo tuhun ra Cristo, tsa jacacú tsi yo, tsa çahan yu tsihin ndo quivi can. Tan naquihín ndo itsi tan nñi iñi añima ndo tsinú iñi ndo. ² Tan juvin tsa cuenda tuhun ra Cristo cacú añima ndo tun ndi tsinú iñi ndo cuhva jacuahá yu tsi ndo. Maa tyin tun ña tsinú ca iñi ndo cuhva jacuahá yu tsi ndo, nduce yahvi nyaá tsa natsinú iñi ndo tsi ra Cristo.

³ Tsa jihna ñi jacoto yu tuhun tsa jacuahá ra Cristo tsi yu tsi ndo. Tan catyi yu tyin tsihi ra tsacatyí cuatyí yo, tumaa catyi nu libru Nyoo tyin cua cuvi.

⁴ Tan quihv̄i cuñu ñuhu ra tsitsi ñuhu. Maa tyin tsinu uñi quiv̄i nandoto ra tumaa catyí nu libru Nyoo. ⁵ Tan tsa yaha tan quituv̄i ra nuu ra Pedro tan quituv̄i ndih̄i ra nuu tandih̄i ra tsicá tyiñu ra. ⁶ Yaha can tan quituv̄i ra nuu yaha ca uhun cientu nyiv̄i yih̄i cuenda ra. Tan juhva ñi can tsa tsih̄i ñi, maa tyin ndi iyó cuaha ca ñi nda cuanda vityin. ⁷ Yaha can tan quituv̄i ra nuu ra Jacobo. Tacan tan quituv̄i ndih̄i ra nuu tandih̄i ra tsicá tyiñu ra.

⁸ Tan nu ndih̄i ña quituv̄i ndih̄i ra nuu yuhu, tsa cuv̄i yu tumaa iin lee tsa cacu yutya. ⁹ Tyin tsa nuu tandih̄i ca ra tsicá tyiñu ra Cristo nduve yahvi nyaá yuhu. Tan ndi ña taahán tsi tsa cuv̄i yu ra tsicá tyiñu ra tyin tsinyaá ndaha xaan yu tsi nyiv̄i yih̄i cuenda ra. ¹⁰ Maa tyin Nyoo vaha iñi ra tsihin yu. Yacan cuenda tsaḥa ra ndatu tsa cuv̄i yu ra tsicá tyiñu ra tan ña cuatu tsaḥa ra tyiñu tsi yu, tyin cuaha ca tyiñu javahá yu tsihin tsi tan ñavin ca tandih̄i ra naha. Maa tyin ñavin tsihin tunyee iñi maa yu javahá yu can tyin maa tunyee iñi Nyoo tsa iyó tsihin yu javahá can. ¹¹ Maa tyin nduve cuenda tun yuhu, a inga ra caahán tsihin ndo, tyin tuhun caahán ndi tsihin ndo, yacan cuv̄i tuhun tsa tsinú iñi ndo.

Nu jacuahá ra Pablo tyin nditsa tsa cua nandoto ndiyi

¹² Tsa caahán ndi tsihin ndo yacan cuv̄i tsa nandoto ra Cristo tsa yaha tsihi ra tan ¿Nacuenda yih̄i ndo catyí ndo tyin ña nandoto ndiyi? ¹³ Tyin tatun ña cua nandoto ndiyi, ndi ra Cristo tan ña nandoto ra quiv̄i can. ¹⁴ Tun tsatyin ña nandoto ra Cristo, nduve yahvi nyaá tsa caahán ndi tsihin ndo. Tan ndi nduve yahvi nyaá tsa tsinú iñi ndo tsi ra. ¹⁵ Tan tun tsatyin ña nditsa tsa janandoto Nyoo tsi ra Cristo, cuv̄i ndi iin ra vatya tyin catyí ndi tyin janandoto Nyoo tsi ra. Tan tatun ña nditsa tsa nandoto ndiyi, ña nditsa tsa janandoto Nyoo tsi ra Cristo. ¹⁶ Tyin tun ña cua nandoto ndiyi, ndi ra Cristo tan ña nandoto ra. ¹⁷ Tan tatun ña nandoto ra Cristo, ndi iyó cuatyí ndo, tan nduve yahvi nyaá tsinú iñi ndo tsa jahá ra tucahnu iñi cuatyí ndo. ¹⁸ Tan ndi nyiv̄i tsa tsih̄i tsa yih̄i cuenda ra ña cacu ñi tun ña nditsa tsa nandoto ra. ¹⁹ O tun nu ñuhu ñayiv̄i ihya ñi jatinyeé ra tsi yo, tan ña cua quitsi ra inga tsaha, nduve yahvi nyaá tsinú iñi yo tan cuv̄i yo nyiv̄i soho ca tsa nuu tandih̄i ca nyiv̄i.

²⁰ Maa tyin tsitó vaha yo tyin nditsa tsa nandoto ra Cristo. Tan juven ra cuv̄i ra tsa nandoto jihna ca tsitsi tsa tandih̄i ca ndiyi tsa cua nandoto. ²¹ Tyin tsacatyí cuatyí ra Adán tan tsicoḡ tuhun tsihi. Tan yacan tsihi nyiv̄i nda cuenda vityin. Maa tyin tsa cuenda tsa nandoto ra Cristo cua nandoto tandih̄i nyiv̄i yih̄i cuenda ra. ²² Tyin tumaa tsa tandih̄i yo tsihi tyin cuv̄i yo tata ra Adán, tacan tucu cua nandoto tandih̄i yo tan coo yo ñayiv̄i nyito tyin cuv̄i yo nyiv̄i ra Cristo. ²³ Maa tyin cua nandoto yo quiv̄i taahán tsi tsi yo. Jihna ca ra Cristo nandoto. Tan quiv̄i quitsi ra inga tsaha cua nandoto ñi yih̄i cuenda ra. ²⁴ Yaha can tan cua naa ñuhu ñayiv̄i ihya tan ña cua cundaca ñaha ca ra cumí tyiñu naha ra, tan ndi nu tatyí ña vaha nahnu ña cua cundaca ñaha ca nahnu. Tyin ra Cristo cua quihin nyaá ra tunyee iñi tsa iyó tsi tandih̄i nahnu, tan ca nacuhva cuenda ra can tsi Nyoo Jutu ra. ²⁵ Tyin ra Cristo cua cundaca ñaha ra nda cuanda quiv̄i cuhva Nyoo tsa cuv̄i jaha canaa ra tsi tandih̄i nu xaan iñi tsi ra nahnu. ²⁶ Tan nu tsa cua janaa ra nu ndih̄i ña, nu ican cuv̄i tuhun tsihi. ²⁷ Tyin tsa tsaḥa Nyoo tsa quih̄i ndaha ra tandih̄i maa tsa iyó. Maa tyin nu catyí tyin tandih̄i nacuhva cuenda Nyoo tsi ra Cristo, ña cuñi tsi catyí tyin quih̄i ndaha ndih̄i ra tsi maa Nyoo tyin maa Nyoo cuv̄i ra tsaḥa tsa quih̄i

ndaha ra tandihi maa tsa iyó. ²⁸ Maa tyin quivi jaha canaa ra Cristo tandihi can, tacan tan maa ra, tsa cuví ra Sehe Nyoo, cua nacuhva cuenda nyico ra tandihi tsa tsaḥ Nyoo tsi ra. Tyin tacan tan cundaca ñaha Nyoo tandihi maa tsa iyó.

²⁹ Tun tsatyin ña nandoto ndiyi, ¿nacuenda tyin juhva nyivi tsicoondutyá ñi tsa cuenda ndiyi? ¿Tan nacuenda javahá ñi tyehen tun ña tsinú iñi ñi tyin coo quivi cua nandoto ndiyi?

³⁰ Tan tacan tucu maa ndi, tun ña cua nandoto ndi, ¿nacuenda tyin ndoó ndi vaha tsa nyehé ndi tundoho ndihi quivi ñi? ³¹ Tandihi ñi quivi nducú nyivi tsi yu cahñi ñi, tan tsa nditsa cuví tsi, yañi, tumaa tsa nditsa tsa siñi cuñi yu tsihin ndo, tsa cuenda tsa tsinú iñi ndo tsi Jutu Mañi yo Jesucristo. ³² Nduve náa catyí tsa nyehé yu tundoho tsa cuñi cahñi nyivi tsi yu ñuu Éfeso tun ña cua nandoto yo. Tatun tacan, nditsa maa tsa caahán nyivi: “Catsi yo, cōho yo tyin tyaan isa cua cúu yo”, catyí ñi tsa ña tsitó.

³³ Tan catyí tucu ñi tyin: “Tun cutahán yo tsihin nyivi caquiñi jatívi ñi cuhva vaha iyó yo.” Tan tsehe cuví tsa nditsa. Yacan jaha ndo cuenda tsi ndo tan ña cuhva ndo tsa jandavi ñaha nyivi tsi ndo. ³⁴ Jaha ndo cuenda cuhva iyó ndo, tan ña javaha ca ndo tsa caquiñi. Tyin tsihin tsa javahá ndo tan nacotó yu tyin ña tsitó ndo tsi Nyoo. Caahán yu tyehen tsihin ndo na nducahan nuu ndo.

Nu jacuahá ra Pablo nácaa cua janandoto Nyoo tsi yo quivi quitsi nyico ra Cristo

³⁵ Maa tyin yihí ndo cua ndaca tuhun ndo: “¿Nacaa cua nandoto ndiyi? ¿Nacaa cuñu ñuhu ñi cua cuví?” ³⁶ ¿Nacaa tsa soho xaan ndo? ¿A ña tsitó ndo tyin tatun tatsi yo iin tsiti, cuñi tsi tsa tyahyu jihna tsi? Tacan tan cana nuu tsi.

³⁷ Tyin tsa tatsi yo nuñi, ñavin tsa cuví maa tsi itu tan tatsi yo. Tyin nuñi cuví tsi tatsi yo tan tacan ñi cuñi tucu yo tsihin náa inga ca tsiti. ³⁸ Nyoo javahá ra nácaa cuñi maa ra tsihin tsa intuhun intuhun tsiti can, yacan cuenda tsa cana tsi cuví tsi tsa taahán maa tsi cuví tsi. Tan ña cuví nanduvi tsi inga ca tsiti.

³⁹ Tan tacan tandihi cuñu ñuhu, ña inducu caá tsi, tyin cuñu ñuhu nyivi, siñ caá tsi, tan cuñu ñuhu quiti nahnu, siñ caá tucu can, tan cuñu ñuhu saa, siñ caá tucu yacan, tan tyaca siñ caá tucu can. ⁴⁰ Tan tacan tucu tsa iyó andívi, siñ caá tsi. Tan siñ caá tucu tsa iyó nu ñuhu ñayivi ihya. Siñ xaan caá tsa iyó nda andívi, tan siñ tyaqui tucu tsa iyó nu ñuhu ñayivi ihya. ⁴¹ Tsa nditsin ñicanyii, tan tsa nditsin yoo ña inducu tsi. Tan ña inducu tsi tsihin tsa nditsin tiñuu. Tan tsa nditsin tiñuu ña inducu tsi tsihin inga nyico tiñuu. ⁴² Tan tacan tucu tuhun tsa cua nandoto ndiyi. Tuhvá yo tsicutsí cuñu ñuhu tan tyaahyú tsi. Maa tyin tsa cua nandoto yo ña cua cúu ca yo. ⁴³ Cuñu ñuhu tsa iyó tsi yo vityin nduve tunyee iñi iyó tsi can, nacuhví can, tan tsihih can. Maa tyin cua nandoto iin tsa siñ caá tan iyó ca tunyee iñi tan ña cua cúu ca can. ⁴⁴ Tsa tsihih yo tsicutsí yo cuñu ñuhu tsa naquihñin yo nu ñuhu ñayivi ihya. Maa tyin tsa cua nandoto yo cua cuhva Nyoo inga cuñu ñuhu tsi yo. Iyó cuñu ñuhu cuenda nu ñuhu ñayivi. Tan iyó tucu cuñu ñuhu cuenda gloria.

⁴⁵ Catyí tutu Nyoo tyin ra Adán ra tsa tsicoo tsa jihna ñi, tsaḥ Nyoo ñayivi coo ra. Tan ra Cristo cuví ra tumaa ra Adán maa tyin ñavin cuñu ñuhu tsaḥ ra tsi yo tyin tsaḥ ra ñayivi nyito coo yo, tyin juvin ra cuví Tatyí Ii. ⁴⁶ Tsa jihna ñi taahán tsi coo yo tsihin cuñu ñuhu cuatyí yo, yaha can tan coo yo cuenda Tatyí Ii Nyoo. ⁴⁷ Rayi tsa tsinu tsa jihna ñi, tsihin nyaca ñuhu tsinu ra. Tan cuví ra cuenda ñuhu ñayivi. Maa tyin ra Cristo cuví ra tumaa rayi tsa tsinu

uvi tan cuví ra cuenda gloria. ⁴⁸ Tandihí yo iyó cuñu ñuhu yo tumaa tsicoo cuñu ñuhu ra Adán tsa tsinu tsihin nyaca ñuhu. Maa tyin tsa cua nandoto yo cuñu ñuhu yo cua nanduvi tsi tumaa cuñu ñuhu ra Cristo ra iyó nda andivi. ⁴⁹ Tumaa ndacu yo tsi rayi, ra tsa tsinu tsihin nyaca ñuhu, tacan tucu cua ndacu yo tsi ra Cristo ra iyó nda gloria.

⁵⁰ Tan cuñí yu cahan yu tsihin ndo, yañi, tyin cuñu ñuhu yo ña cuví quihvi tsi nu ndacá ñaha Nyoo, tyin iin tsa yatyi tiví ña cuví quihvi can nu yihí tsa ña tuhvá tiví. ⁵¹ Tan cuñí tucu yu tsa coto ndo iin tsa xeehe tsa yoñi maa tsitó. Ña tandihí yo cua cúu, maa tyin tandihí yo tan cua nasama cuhva caá yo. ⁵² Tan nu cua ndihí tiví ángel trompeta, cua nandoto ndiyi iin yaha cuii ñi tumaa tsa ndaahvá tinuu yo. Tyin cua tiví ra trompeta tan cua nandoto nyivi tsihí tsa ña cua cúu ca maa. Tan Nyoo cua nasama ra cuhva caá yo tun ndi iyó ca yo. ⁵³ Tyin cuñí tsi tsa nasama Nyoo cuñu ñuhu yo tsihin iin tsa ña cua naa maa. ⁵⁴ Tan quivi cua nasama cuñu ñuhu yo tan cua ñihi yo iin tsa ña cua tiví maa, cua cundaa tsa caahán tuhun Nyoo nu catyi tsi tyehen: “Nyoo jahá canaa ra tsi tuhun tsiihí.”

⁵⁵ Yooho, Tuhun Tsiihí, ¿náa tunyee iñi tsa tsicoo tsi un tyin cahñi un tsi ndi? ¿Náa jahá canaa un, yooho Tuhun Tsiihí?

⁵⁶ Tyin cuatyí yo tsahá can tsa cahñi tuhun tsiihí tsi yo, tyin ley tsahnu tsahá tunyee iñi tsi can. ⁵⁷ Maa tyin tyahví nyoo tsi Nyoo, yañi, tyin jaquitsi ra tsi Jutu Mañi yo Jesucristo tan tsahá ra tunyee iñi tsi yo tsa jaha canaa yo tsi nu tuhun tsiihí can.

⁵⁸ Yacan cuenda yañi, cunyaa naa vaha ndo tsi Nyoo tsihin tsa ñi iñi añaima ndo. Tan jañihi ca ndo jaha tyiñu ndo tyiñu Jutu Mañi yo. Tyin tun jahá tyiñu yo tyiñu Jutu Mañi yo, ña jahá tyiñu cuatu yo.

16

Nu tsahá cuenda ra Pablo tsi nyivi nácaa taahán tsi jatyinyee ñi tsi inga ñi yihí cuenda Nyoo

¹ Tan tuhun tsa jatyinyeé ndo xuhun tsi nyivi ndaahvi, ñi yihí cuenda Nyoo, javaha ndo tumaa tsahá cuenda yu tsi nyivi tsicá vehe ñuhu ñuu tsa cayucú Galacia. ² Jandu iin ndo xuhun tsa taahán tsi cuhva ndo tsi ñi tahan tahan una quivi nácaa tsahá maa Nyoo tsi ndo. Tan ña cuatu ndo nda tsa yu. ³ Tan nacatsi ndo ndáa ra cuñí maa ndo tyin cundaca xuhun can. Tan tsa tsa yu, cua javaha yu iin carta tyin cundaha ndihí ra naha tan jacuhun yu tsi ra naha tyin cundaca ra naha can tsi ñi tsicá vehe ñuhu Jerusalén. ⁴ Tan tatun tahan tucu tsi tsa cuhun yu, cuhun ra naha tsihin yu.

Nu caahán ra Pablo ndáa ndihí nu cua cahan ra tuhun ra Cristo

⁵ Tsa cua quitsi yu nu yucú ndo ñuu Corinto, cua yaha yu ityi Macedonia. ⁶ Tatun cuhva tsi cuhva cua ndoo yu tsihin ndo nda cuanda yaha yoo vitsin, tacan tan cuví jatyinyeé ndo luxu tsi yu tan cuhun yu inga ñuu. ⁷ Ña iin yaha ñi cua yaha yu nu yucú ndo tyin cuñí yu ndoo yu juhva quivi tsihin ndo tatun Jutu Mañi yo tan cuñí ra. ⁸ Maa tyin cua cunyii yu ñuu Éfeso ihya nda cuanda yaha quivi vico Pentecostés tsa jacahnú nyivi Israel. Tacan tan cua quitsi yu nu yucú ndo. ⁹ Cua ndoo yu juhva quivi ihya tyin tsahá xaan tsi cuhva caahán yu tuhun Nyoo tsihin nyivi vasu ndi maa cuaha ñi ña taahán iñi ñi tuhun ra.

¹⁰ Tatun tsa ra Timoteo nu yucú ndo, na cunyii ra tsihin ndo. Tan vaha tyānuu ndo tsi ra tyin juvin ñi tyiñu Jutu Mañi yo jahá tyiñu ra tumaa maa

yu. ¹¹ Tan vaha cuñi ndo nyehé ndo tsi ra. Tan jatyinyee ndo tsi ra na quitsi ra nu nyii yu tyin ndatú yu tsi ra tsihin inga ca ra yañi yo naha ra.

¹² Tan ra Apolos yañi yo, cahān ndaahvi xaan yu tsihin ra na quitsi ra nu yucú ndo tsihin inga ca ra yañi yo naha ra. Maa tyin ña cuñi ra quitsi ra. Catyí ra tyin quitsi maa ra nda cuhva tsi cuhva tsi ra.

Nu tsahá ra Pablo nacumi tsi tandihí nyivi yihí cuenda Nyoo ñuu Corinto

¹³ Jañihi ca ndo tsinú iñi ndo tsi Nyoo. Tan jandu iin ca ndo iñi ndo, tan na coo ca tunyee iñi Nyoo tsi ndo. ¹⁴ Tandihí tsa javahá ndo, javaha ndo tsa cuenda tsa cuñi ndo tsi Nyoo tan tsi nyivi yihí cuenda ra.

¹⁵ Yañi, tsitó ndo tyin jihna ca nyivi ra Estéfanas natsinú iñi tsi ra Cristo ityi Acaya nu yucú ndo. Tan vityin javahá ñi tyiñu nuu ra hermano. ¹⁶ Tan cuñi yu tsa jaha ndo tsa ñayivi tsi nyivi tsa iyó tumaa iyó nyivi ra Estéfanas, tan tsi tandihí ca ñi tsa jatyinyee tan jahá tyiñu cuenda Nyoo. ¹⁷ Tan sii xaan cuñi yu tyin quitsi ra Estéfanas, ra Fortunato, tan ra Acaico. Tan jatyinyee ra naha tsi yu tyin nyooho ña cuví quitsi ndo tyin cañi xaan ñuu ndo. ¹⁸ Maa tyin maa ra naha quitsi ra naha. Tan jandunyeé ca ra naha iñi yu tsihin tuhun Nyoo, tumaa tsa jandunyeé tucu ra naha iñi nyooho. Tan vaha cuñi ndo nyehé ndo tyiñu jahá ra naha tyin iin ñi tsi maa Nyoo nyicún ra naha.

¹⁹ Tan vatsí nacumi tsi ndo jahá tandihí nyivi yihí cuenda Nyoo ñuu tsa cayucú Asia ihya. Tan vatsí tucu nacumi tsi ndo jahá ra Aquila tan ña Priscila, tan ñi yihí cuenda Nyoo tsa ndu iin yuvehe ñi. ²⁰ Vatsí nacumi tsi ndo jahá tandihí ra yañi yo, tan cuhva ndo nacumi tsi tsa intuhun intuhun ndo nu yucú ndo juvin.

²¹ Tan yuhu ra Pablo tsahá yu nacumi tsi ndo tan tyaá yu itsi tsihin ndaha yu.

²² Tatun ndáa nyivi ña cuñi tsi Jutu Mañi yo Jesucristo, na cuhun ñi anyaya. Maa tyin yuhu catyí yu: ¡Jutu Mañi yu, naha!

²³ Tan na nasoco Jutu Mañi yo Jesucristo tsi tandihí ndo. ²⁴ Tan catyí yu tsihin ndo tyin yuhu cuñi yu tsi tandihí ndo tsa cuenda ra Cristo Jesús.

Tan na cuví tsi tacan ñi.

Carta Tsinu Uvi Tsa Jacuhun Ra Pablo Tsi Nyivi Yihí Cuenda Nyoo Ñuu Corinto

Nu tyaá ra Pablo iin carta cuenda nyivi yihí cuenda Nyoo ñuu Corinto

¹ Yuhu ra Pablo, cuví yu iin ra tava tyiñu ra Cristo Jesús tyin maa Nyoo nacatsj tsi yu. Yuhu tan ra Timoteo, yañi yo, jaquitsi ndi carta ihya tsi ndo tsa cuví ndo nyivi yihí cuenda Nyoo tsa iyó ñuu Corinto tsa canyii Acaya, tan tsi tandihí ca nyivi yihí cuenda Nyoo tsa iyó inga ñuu tsa cayucú nanií cahnu Acaya. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu nyehé xaan ra Pablo tundoho nu tsicá ra caahán ra tuhun ra Cristo

³ Na jacahnu yo tsi Nyoo Jutu ra Jesucristo Jutu Mañi yo. Tyin juvin ra cuví Nyoo Jutu yo. Tan cundaahví xaan iñi ra nyehé ra tsi yo. Tan jandusí ra iñi yo tandihí ñi tsaha. ⁴ Nyuhu nyehé xaan ndi tundoho maa tyin maa ra jandusí iñi ndi. Tyin tacan tan cuví jandusí ndi iñi nyivi nyehé tundoho tumaa jandusí maa ra iñi ndi. ⁵ Tyin nyehé ndi tundoho tsa cuenda ra Cristo, tan juvin ñi tsa cuenda ra jandusí Nyoo iñi ndi. ⁶ Yacan cuenda tatun nyehé ndi tundoho tsa cuenda tsa jacotó ndi tuhun ra Cristo tsi ndo, nyehé ndi tundoho tsa cuenda tsa vaha tsi ndo tyin tacan tan jandusí Nyoo iñi ndo, tan jacacu ra tsi ndo. Tatun jandunyeé Nyoo iñi ndi, javahá ra tacan tyin tacan tan ndunyeé tucu iñi nyooho tan jacacú ra tsi ndo tan cuví cunyeé iñi ndo nyehé ndo tahan tundoho nyehé ndi. ⁷ Tyin tsitó vaha ndi tyin jandusí ra iñi ndo tyin nyehé ndo tundoho tsa cuenda ra Cristo tumaa tsa nyehé tucu nyuhu tundoho.

⁸ Yañi, cuñi ndi tsa coto ndo tyin cuaha xaan tundoho nyehé ndi tsa tsiyucu ndi ñuhu Asia. Ñihi xaan nducyí cuhva nu ña vaha tsi ndi tan tsicá iñi ndi tyin ña cua cunyeé maa iñi ndi cuyucu ndi ican. Tan cuñi maa ndi tyin cua cúu ndi tsa ndi cumañi ca quita ndi ican. ⁹ Tsa nyehé ndi tyin tsa cuñi cúu ndi tan ña cuví jacacu ndi tsi ndi tsihin tunyee iñi maa ndi. Tacan tan cutuñi iñi ndi tyin cuñi tsi tsa cuita ca iñi ndi tsi Nyoo, ra janandotó ndiyi, tan ña cuita iñi ndi tsi maa ndi. ¹⁰ Nyoo jacacú tsi ndi quivi can, tan juvin ra jacacú tsi ndi nda cuanda vityin. Tan tsitó ndi tyin tacan ñi maa cua jacacu ra tsi ndi, ¹¹ tun nyooho tan ña jandihí ndo tsa jatyinyeé ndo tsi ndi tsihin tsa tsicán tahvi ndo tsi ra tsa cuenda ndi. Tyin tatun cuaha nyivi tsicán tahvi tsa cuenda ndi, tsa cua ñihi tuhun ñi tyin tsahá xaan Nyoo tsa vaha tsi ndi, cuaha ñi tan cua cuhva ñi tyahvi nyoo tsi Nyoo.

Nu caahán ra Pablo nacuenda ña tsahán ra ñuu Corinto

¹² Iyó iin tuhun tsa tsahá tsa sii xaan cuñi ndi tan tuhun ihya cuví tsa cuiti iyó ndi, tan ndaa iyó ndi tsihin tandihí nyooho, tan tsihin tucu inga ca nyivi. Maa tyin ñavin tsihin tsa tsiñi tuñi maa ndi iyó ndi tacan, iyó ndi tacan tsa cuenda tyin maa Nyoo tsahá tsa vaha tsa iyó tsi ra tsi ndi. ¹³⁻¹⁴ Nu tutu tsa tsa yaha jaquitsj ndi tsi ndo, tyaá ndi maa ñi maa tuhun tsa cuví cahvi ndo tan cuví cutuñi iñi ndo. Vityin tsa tsa cutuñi iñi ndo juhva. Tan cuñi ndi tsa cutuñi vaha ca iñi ndo tandihí tuhun can tyin tacan tan sii cua cuñi ndo tsihin

ndi quiví quitsi Jutu Mañi yo Jesucristo. Tan sñi cua cuñi tucu nyuhu tsihin nyooho.

¹⁵⁻¹⁶ Tsa cuenda tsa tsitó vaha yu tyin tacan cua cuvi: tyaa yu kuhva tyin tsa cua cuhun yu Macedonia tan cua yaha jihna yu nu yucú ndo. Tan quitsi nyico yu nu yucú ndo tsa yaha cuhun yu Macedonia tyin tacan tan cuvi cusñi iñi ndo. Tan tsicá tucu iñi yu tyin yaha can tan cuvi jatyinyee ca ndo tsi yu tan cuhun yu Judea. Tyehen tyaa yu kuhva javaha yu, maa tyin ña cuvi. ¹⁷ ¿A cuñi maa ndo tyin ña tyaa yu kuhva quitsi yu nu yucú ndo? Ñavin. Tyin yuhu ña javahá yu tumaa javahá nyiví tuhvá jandaví ñaha. Catyí ñi tyin vaha, maa tyin tsitsi añima ñi catyí ñi tyin ña vaha. Caahán ñi nduví tuhun can tsa iin ñi kuhva. ¹⁸ Tsitó maa Nyoo tyin nditsa tsa caahán yu tsa ña tuhvá yu javaha tumaa javahá ñi can; ñavin jandaví ñaha yu. ¹⁹ Tyin ra Silvano, ra Timoteo tan yuhu, maa ñi tuhun ra Cristo sehe Nyoo caahán ndi. Ra Cristo ña caahán ra tumaa tuhvá nyiví can caahán; maa ñi maa tsa nditsa caahán ra. ²⁰ Tan tsa cuenda ra ñihí yo tandihí tsa vaha tsa catyí Nyoo tyin kuhva ra tsi yo. Yacan cuenda tsa jacahnú yo tsi Nyoo, catyí yo tyehen: “Na cuvi tsi tacan”. Tyin tsitó yo tyin tsahá ra tsa vaha tsi yo tsa cuenda ra Cristo. ²¹ Nyoo cuvi ra tsahá tunyee iñi tsi nyuhu tsa cuenda ra Cristo, tan tsahá ndihí tucu ra tunyee iñi tsi nyooho. Nacatsí ra tsi yo, ²² tan tsahá ra Tatyí Ii ra coo añima yo, tan cuvi tsi tumaa iin tuñi tsa tyaa ra tsi yo tan janahá tsi tsi yo tyin cua ñihí yo tsa cua kuhva ra tsi yo.

²³ Ñaha ca maa quitsi nyico yu nu yucú ndo, tyin ña cuñi yu janducuihya yu iñi ndo. Tsitó maa Nyoo tyin nditsa tsa caahán yu. Tan tatun ña nditsa yu, na nyehe maa Nyoo náa cuñi ra tsihin yu. ²⁴ Caahán ndi tandihí tuhun ihya tsihin ndo tsa cuenda tsa cuñi ndi jatyinyee tahan yo tsi yo tan coo ca tusñi iñi Nyoo tsi ndo. Ña cuñi ndi quihí ndaha ndi tsi ndo tyin nyooho tsa tsinú vaha maa iñi ndo tsi Nyoo.

2

¹ Yacan cuenda ña cuñi yu quitsi yu tyin tacan tan ña kuhva ca yu tucuihya iñi tsi ndo. ² Tyin tatun yuhu tan janducuihyá yu iñi ndo, yoñi cua jandusñi iñi tsi maa yu. Tyin nyooho ña cuvi ca jandusñi ndo iñi yu tun tsa yahá janducuihya yu iñi ndo. ³ Yacan cuenda carta ñi jaquitsí yu tsi ndo. Ña cuñi yu quitsi yu tyin ña cuñi yu janducuihya ndo iñi yu tsihin kuhva iyó ndo. Tyin taahán tsi jandusñi ndo iñi yu. Tyin tatun sñi cuñi yuhu, tsitó yu tyin tandihí yo tan sñi cuñi yo. ⁴ Quiví tsa tyaa yu carta can tsa cuenda ndo, tsicá xaan iñi yu. Cuihya xaan cuñi yu tan nda cuanda tsacu yu. Jaquitsí yu carta can tsi ndo maa tyin ñavin tsa cuenda tsa janducuihya yu iñi ndo. Jaquitsí yu can tsa cuenda tsa cuñi yu tsa coto ndo tyin cuñi xaan yu tsi ndo.

Nu tsahá cuenda ra Pablo tsi nyiví nácaa taahán tsi jaha ñi tucahnu iñi

⁵ Ra tsa tsahá tucuihya iñi, ñavin yuhu ñi janducuihyá ra iñi. Tyin janducuihyá tucu ra luxu iñi nyooho. Caahán yu tyehen tyin tacan tan ña cuñi ndo tyin ña cuvi coo tucahnu iñi tsi ra javahá tacan. ⁶ Tsa iyó vaha ñi. Ña cahan ca ndo tsi ra can. Ña tatsi tuñi ca ndo tsi ra. ⁷ Vityin taahán tsi jaha ndo tucahnu iñi tsi ra tan naquihin ndaahví ndo tsi ra, tyin tacan tan ña cuihya xaan ca cuñi ra. ⁸ Yacan cuenda cuñi yu tsa cahan ndo tsihin ra tan janaha ndo tsi ra tyin ndi cuñi ndo tsi ra. ⁹ Jaquitsí yu carta can tsi ndo quiví can tyin cuñi yu coto yu tatun cua tyaa yahví ndo tsa tsahá cuenda yu tsi ndo. ¹⁰ Tan

vityin nyivi tsa jahá nyooho tucahnu iñi, jahá tucu yuhu tucahnu iñi tsi ñi. Tatun iyó ñi tsa taahán tsi jaha yo tucahnu iñi, jahá yu tucahnu iñi tsi ñi tsa cuenda tsa vaha tsi maa ndo. Tacan javahá yu nuu ra Cristo. ¹¹ Tyin tacan tan ña cuví jaha canaa nu ña vaha tsi yo. Tyin tsitó vaha yo nácaa cuñí nu jandavi ñaha nu tsi yo.

Ra Pablo ña ndoo ra ñuu Troas tyin ña nañihí ra tsi ra Tito

¹² Quivi tsaq yu ñuu Troas tsa cua cahan yu tuhun tsa jacacú ra Cristo tsi yo, tsahá xaan tsi cuhva tsi yu tsa jahá tyiñu yu tyiñu Jutu Mañi yo. ¹³ Maa tyin tuñu xaan cuñí yu, tyin ña nañihí yu tsi ra Tito, yañi yo. Yacan cuenda vatsí yu ityi Macedonia ihya tan ña ndoo yu ndacan cahan yu tsihin nyivi.

Nu caahán ra Pablo tuhun ra Cristo tsihin tsa ñi iñi añima ra

¹⁴ Maa tyin tyahvi nyoo tsi Nyoo tyin tacan ñi jahá canaa yo tsihin tunyee iñi ra Cristo Jesús tan tsahá ra tsa caahán ndi tuhun ra tsihin nyivi. Tan tuhun ra tsa caahán ndi, cuví tsi tumaa iin xico tami tsa caná tandihí ñi ityi nu cuahán ndi. ¹⁵ Tyin nyuhu cuví ndi tumaa xico tami ra Cristo tsa cuenda Nyoo. Tan tandihí ñi ityi cuahán ndi tan ñihí nyivi xico tami can, tahan ñi nyivi tsa cua cacu tan ñi tsa ña cua cacu. ¹⁶ Maa tyin tsa cuenda nyivi tsa ña cua cacu, ndasi caná tsi, tan cuñí maa ñi tyin tuhun tsa jacotó ndi tsi ñi caná tsi tumaa caná xico ndiyi. Tyin jacotó ndi náa cua tahan ñi tyin ña tsinú iñi ñi tsi ra Cristo. Maa tyin tsa cuenda nyivi tsa cua cacú, tami xaan tsi, tyin jacotó ndi nácaa cua coo ñi ñayivi tsa ña cua naa maa. Maa tyin *zyóo* cuví jaha tyiñu tyiñu ihya? ¹⁷ Nyuhu ña javahá ndi tumaa javahá ra tsicá nuu cuaha naha ra. Ra ican naha ra cuñí ra naha xuhun. Maa tyin ña taahán tsi xico yo tuhun ra Cristo. Nyuhu caahán ndi tuhun ra tsihin tsa ñi iñi añima ndi tyin iin ñi cuví ndi tsihin ra tan maa Nyoo tavá tyiñu tsi ndi tsa cahan ndi tyin cuenda ra Cristo yihí ndi.

3

Tuhun tsa tsa ndoo ra Cristo tsihin yo

¹ Tsa caahán ndi tuhun ihya, ¿a cuñí maa ndo tyin caahán ndi tacan tsa cuñí ndi nduyaa ndi? Ñavin. ¿A cuñí tsi cuhva ndi iin carta tsa catyí tyin vaha nyivi cuví ndi? ¿O cuñí tsi ndacan ndi carta tsi ndo tumaa javahá juhva nyivi? ² Ña cuñí tsi. Tyin tsa tyaq Nyoo tsi ndo añima ndi, tan maa ndo cuví carta tsa cuenda ndi. Yacan cuenda ña tsiñi ñuhu ca carta tsi ndi. Tyin tsihin tsa nyehé nyivi nácaa nasama Nyoo cuhva iyó ndo, tan tsitó ñi tyin maa ñi maa tsa vaha jacuahá ndi tsi ndo. ³ Tan catsi nyehé ñi tyin cuví ndo carta tsa tyaq ra Cristo tsa cuenda ñi, tan nyuhu nacuhva cuenda ndi carta can tsi ñi. Tan ña tyaq ra Cristo itsi tsihin tyinta maa tyin tyaq ra itsi tsitsi añima ndo tsihin Tatyí ñi Nyoo nyito. Tan ñavin nu yuu tsinyaq tsi.

⁴ Caahán ndi tyehen tyin tsitó vaha ndi tyin Nyoo cua cuhva ra tsa quita vaha tyiñu javahá ndi, tyin jatyinyeé ra Cristo tsi ndi. ⁵ Ña cana iñi ndi caca iñi ndi tyin javahá ndi náa javahá ndi tsihin tunyee iñi maa ndi. Tyin tsitó ndi tyin tandihí tsa javahá ndi tan maa Nyoo javahá can. ⁶ Tan tsahá ra tunyee iñi tsi ndi tsa cahan ndi tuhun ra Cristo, tan tuhun ihya cuví tuhun tsa tsa tsahá ñayivi tsa coo yo tyin iyó Tatyí ñi ra añima yo. Ley tsa tsahá Nyoo tsi ra Moisés ña tsahá tsi ñayivi tsa coo yo tyin janahá ñi tsi tsi yo tyin iyó cuatyí yo tan taahán tsi cúu yo.

⁷Ley tsahnu can tsinyaꝯ nu yuu tsihin letra, tan cahnu xaan cuví tsi. Yacan cuenda tsa tsaꝯ ra Moisés tsihin tsi nu yucú nyívi Israel, nayuhví xaan ñi nyehe ñi nuu ra tyin xiñu xaan nuu ra cuví. Maa tyin tsindihí tsa xiñu can. Tatun tacan cuví quívi quítsi ley tsa tsahá tuhun tsihi, ⁸iyaha ca cahnu cuví tuhun tsa ndoó Nyoo tsihin yo tsa tsahá Tatyí li ra tsi yo! ⁹Tatun cahnu cuví ley tsahnu tsa jacuhún tsi yo anyaya, yaha ca cahnu cuví tuhun tsa tsa ndoó Nyoo tsihin yo tyin janduvahá tsi tsi yo nuu ra. ¹⁰Nditsa tyin cahnu cuví ley tsahnu can. Maa tyin vityin tsitó yo tyin yaha ca cahnu cuví tuhun ra Cristo tsa jacacú tsi yo nuu Nyoo. ¹¹Tyin tatun cahnu cuví tsa tsicoꝯ juhva ñi tyembu, yaha ca cahnu cuví tsa ña cua cundihí maa.

¹²Tsitó vaha ndi tyin ña cua cundihí tsi. Yacan cuenda caahán ndi tsihin tsa ña iñi añima ndi. Ña cahan nuu ndi tan ña yuuhví ndi caahán ndi. ¹³Tan ña javahá ndi tumaa javahá ra Moisés. Tyin ra Moisés tyasí ra nuu ra tsihin jahma, tyin tacan tan ña nyehe nyívi Israel nu cua naa tsa xiñu nuu ra. ¹⁴Quívi can ña cutuñí iñi ñi. Nda cuanda vityin tan ña cutuñí iñi ñi. Tyin tatun cahví ñi ley tsahnu ña cutuñí iñi ñi itsi tyin ndasí tsa tsiñi tuñi jiñi ñi tumaa tsindasí nuu ra Moisés quívi can. Yoñi maa cuví jatsiyo yacan tyin intuhun ñi maa ra Cristo cuví jatsiyo can. ¹⁵Nda cuanda vityin tan ña cutuñí iñi ñi ley tsa tyaꝯ ra Moisés tun cahví ñi itsi. Tyin ndasí tsa tsiñi tuñi iñi ñi. ¹⁶Maa tyin tatun nacuhva cuenda ñi tsi ñi tsi Jutu Mañi yo, maa ra cua nuña tsa tsiñi tuñi iñi ñi. ¹⁷Tyin Jutu Mañi yo, Tatyí li cuví ra. Tan tatun iyó Tatyí li Jutu Mañi yo añima yo, tsitó yo tyin ña yihí ndaha ca ley tsahnu tsi yo. ¹⁸Yacan cuenda tandihí yo tan ña ndasí ca nuu yo. Tan vityin cuví yo tumaa inu, tyin cuví nyehe nyívi tsa cahnu cuví Jutu Mañi yo jahá yo. Tan cuahán nduvahá ca yo jahá Tatyí li ra.

4

¹Nyoo nyehe ndaahvi ra tsi ndi, tan tavá tyiñu ra tsi ndi tsa cahan ndi tuhun ra tsihin nyívi yacan cuenda ña ndu uvi iñi ndi. ²Tandihí tsa javahá ndi, ña tuhvá ndi javahá xeehe itsi, tan ndi ña javaha ndi tsa tsahá ticanuu. Ña tsicá nuu ndi jandaví ñaha ndi tsi nyívi. Maa ñi maa tuhun Nyoo jacuahá ndi. Ña sacá nuu ndi tuhun Nyoo tsihin inga ca tuhun. Tan caahán ndaahvi ndi tsihin tandihí ñi nyívi, na jaha vaha ñi cuenda tyin tandihí tsa caahán ndi, tan nda maa nuu Nyoo javahá ndi, tan maa ñi maa tsa nditsa cuví tsi. ³Nyuhu ña tyihí xeehe ndi tuhun Nyoo. Maa tyin yihí xeehe tsi tsa cuenda nyívi ndasí tsa tsiñi tuñi iñi, ñi tsa cua cunaa. ⁴Nu ña vaha, nu ndacá ñaha tsi nyívi iyó nu ñuhu ñayívi ihya, juvin nu tyasí tsa tsiñi tuñi iñi ñi, tyin tacan tan ña tsinu iñi ñi tsi Nyoo, tan ña nyehe ñi tsa nditsin ra, tan ña cutuñí iñi ñi nácaa jacacú ra Cristo tsi yo, ra iin ñi cuví tsihin Nyoo. ⁵Ñavin tuhun maa ndi caahán ndi. Tyin tuhun ra Jesucristo caahán ndi tsihin nyívi tyin juvin ra cuví Jutu Mañi yo. Tan nyuhu musu ñi ndo cuví ndi tyin cuñí ndi tsi ra. ⁶Nyoo catyí tyin ndunditsin nu naa quívi tsinu ñuhu ñayívi. Tan juvin ñi ra jandunditsin tsitsi añima yo tsihin ñuhu ra tyin tacan tan tsihin tsa nditsin can cuví coto yo tsa cahnu cuví ra tsa nduxiñú nuu ra Cristo.

Iyó yo ñayívi tsa tsihin tsa tsinú iñi yo tsi Nyoo

⁷Tsa cuca Nyoo, tsa cuví tunyee iñi cahnu ra, yihí tsi tsitsi cuñu ñuhu yo tan nasamá tsí cuhva iyó yo tyin cuví yo tumaa quívi ñuhu tan naquihín yo

itsi. Juvín tsi janahá tsi nyívi tyín maa Nyoo tsahá tunyee íñi ra tsi yo tan ñavin tunyee íñi maa yo cuví tsi. ⁸ Yacan cuenda vasu ndi maa nyehé xaan ndi tundoho tandíhi ñi nu cuahán ndi, ña ndu uví íñi ndi. Yihí tsaha ña tsitó ndi nácaa quita ndi nu tundoho nyehé ndi, maa tyín nyitá íñi ndi tyín cua quita vaha ndi. ⁹ Vasu ndi maa nyaá ndaha nyívi tsi ndi, maa tyín ña nacoo ihñi Nyoo tsi ndi, tacan ñi iyó maa ra tsihin ndi. Nduvá ihñi ndi jahá nyívi, maa tyín ña tsihi ndi. ¹⁰ Tandíhi ñi nu cuahán ndi tan nyicún tuhun tsihi tsi ndi tsa cuenda tsa caahán ndi tuhun ra Jesús. Tyín tacan tan nyehe nyívi tyín iyó ndi ñayívi ra. ¹¹ Tsitsi tsa ndi iyó ndi nu ñuhu ñayívi ihya tandíhi ñi quívi tan ndatú ndi tuhun tsihi tyín tandíhi ñi quívi tan nducú nyívi cahñi ñi tsi ndi tsa cuenda ra Cristo. Tan tsihin tsa taahán ndi janahá tyín iyó ñayívi ra aña ndi. ¹² Yacan cuenda nyuhu tandíhi ñi tsaha nyicún tuhun tsihi tsi ndi tyín caahán ndi tuhun ra Cristo tsihin nyívi. Maa tyín nyooho, iyó ndo ñayívi ra Cristo tsa cuenda tuhun ra tsa cahan ndi tsihin ndo.

¹³ Tsinú íñi ndi tsi Nyoo tumaa tsinú íñi ra David tsi ra. Tumaa catyí ra nu libru Salmos: “Tsinú íñi yu tsi Nyoo, yacan cuenda caahán yu tuhun ra”. Tacan tucu nyuhu; tsinú íñi ndi tsi Nyoo, yacan cuenda caahán ndi tuhun ra. ¹⁴ Tyín tsitó ndi tyín Nyoo, ra janandotó tsi Jutu Mañi yo Jesucristo, cua janandoto ndíhi ra tsi ndi. Tan cua ndu iin ndo tsihin ndi, tsahan cua cundaca ra tsi yo iin caa ñi nda gloria. ¹⁵ Tandíhi tuhun ihya cuví tsa cuenda tsa vaha tsi nyooho tan tsa vaha tsi cuaha ca nyívi. Tyín tun cuaha ndo naquihin tsa vaha Nyoo, cuaha xaan ndo cua nacuhva tyahvi nyoo tsi ra, tan cua jacahnu ndo tsi ra.

¹⁶ Yacan cuenda ña ndu uví maa íñi ndi, vasu ndi maa cuahán ndutsahnú cuñu ñuhu ndi, tyín ñayívi tsa tsa iyó ndi ndutsaá tsi tan iin tan iin quívi. ¹⁷ Tundoho tsa nyehé ndi nu ñuhu ñayívi ihya, tsa yahá ñi maa cuví tsi. Tan tsahá tsi tsa coo cuii ndi tsihin Nyoo nda gloria. ¹⁸ Yacan cuenda ña tyaá íñi ndi tsa cuví nyehe yo. Tyín nyitá íñi ndi tsa ña cuví nyehé yo. Tyín tsa cuví nyehé yo juhva cuii ñi tyembu tsicoó can. Maa tyín tsa ña cuví nyehé yo, ña cua cundíhi maa tsa iyó tsi.

5

¹ Tsitó yo tyín quívi cúu yo, cua tyahyu cuñu ñuhu yo. Tyín cuví tsi tumaa iin vehe tsa tañi ñi tsicoó. Maa tyín Nyoo cumí vaha ra inga cuñu ñuhu tsa ña cua cundíhi maa tsa cuenda intuhun intuhun yo. Tan ican cua cuyucu aña yo. Iyó can nda gloria tan ñavin ra ñuhu ñayívi ihya javahá can. ² Nditsa tyín tsitsi tsa ndi iyó yo tsitsi cuñu ñuhu yo, caahán yuhu yo tyín tsa cuñí yo cuhun yo coo yo tsitsi cuñu ñuhu vaha tsa cua cuhva Nyoo tsi yo. ³ Cuhun aña yo tsitsi tsa tsahá Nyoo. Tan cua cunditsi yo itsi tumaa nditsi yo jahma tyín tacan tan ña cua cutandíhi aña yo. ⁴ Tsitsi tsa iyó yo tsitsi cuñu ñuhu yo tsa cuví tumaa vehe, ndaahvi cuñí yo. Maa tyín ña ndaahvi cuñí yo tsa cuenda tsa cuñí yo quita aña yo tsitsi cuñu ñuhu yo tan cutandíhi tsi. Ndaahvi cuñí yo tsa cuenda tsa cuñí yo coo aña yo tsitsi tsa ña cua cundíhi maa, tyín tacan tan coo cuii yo. Tan cua cundíhi tsa tañi ñi tsicoó jaha tsa ña cua cundíhi maa. ⁵ Tan Nyoo tyaá ra cuhva tyín tacan cua javaha ra tsihin yo. Tan tsahá jihna ñi ra Tatyí lí ra tsi yo tyín tacan tan cuita íñi yo tyín cua cuhva ra tandíhi ca tsa cua cuhva ra tsi yo.

⁶ Yacan cuenda nyitá íñi ndi tsi Nyoo tsihin tsa ñi íñi aña ndi tsa nducuhún íñi ndi tyín tsitsi tsa iyó yo tsitsi cuñu ñuhu yo, ña iyó yatyin yo nu iyó Jutu Mañi yo nda gloria. ⁷ Vasu ndi maa ña cuví nyehe yo tsi ra, maa

tyin iyó yo nu ñuhu ñayiví ihya tshin tsa tsinú íñi yo tsi ra. ⁸ Nyitá íñi ndi tsi ra tan cuñí ndi quita ndi tsitsi cuñu ñuhu ihya tan cuhun ndi coo ndi tshin Jutu Mañi yo. ⁹ Yacan cuenda tsitsi tsa ndi iyó ndi tshin cuñu ñuhu ihya, jañihí ca ndi nducú ndi cuhva javahá ndi tsa taahán íñi Jutu Mañi yo tan tacan ñi maa vasu nduve ca ndi tyin tsa cuahán ndi tshin Jutu Mañi yo nda gloria. ¹⁰ Tyin tandihí yo tan cua cuhun yo nu nyaá ra Cristo nu cua jacutuñi ra tsi yo. Tan cua nacuhva cuenda intuhun intuhun yo nácaa tsa vaha a tsa ña vaha tsa javahá yo quiví tsicoo yo tsitsi cuñu ñuhu yo cuenda nu ñuhu ñayiví ihya.

Nu tsahá cuenda ra Pablo nácaa cuví coo vaha yo tshin Nyoo

¹¹ Tsitó ndi tyin Jutu Mañi yo cua tatsi tuñi ra tsi ndi tatun ña cua javaha ndi tsa caahán ra. Yacan cuenda nducú ndi cuhva cahan ndi tshin nyiví na nacuhva cuenda ñi tsi ñi tsi Nyoo. Tan Nyoo tsitó vaha ra tyin tacan javahá ndi, tan cuñí ndi tsa coto tucu nyooho. ¹² Caahán ndi tyeheh, maa tyin ñavin tsa cuñí ndi nduyaa ndi tyin caahán ndi tsa cuenda tsa cuñí ndi tsa nducuhun íñi ndo tyin caahán ndi tsa nditsa, tan cusí ca íñi ndo tan ñihí ndo cuhva cahan ndo tshin inga ca ra tsa nduyaá naha ra. Catyí ra naha tyin vaha iyó ra naha tshin Nyoo, maa tyin tsitsi añima ra naha maa ñi tsa ña nditsa iyó. ¹³ Tatun caahán ndi tuhun Nyoo, catyí juhva nyiví tyin jiñi ndi sana. Nditsa, sana íñi ndi maa tyin tsa cuenda Nyoo, tyin tuhun maa ra caahán ndi. Tan tatun vaha cuñí ndi, tsa cuenda nyooho vaha cuñí ndi. ¹⁴ Tan tsitó ndi tyin intuhun ñi ra Cristo tshihí tsa cuenda tandihí nyiví ñuu ñayiví. Tacan tan tshihí tandihí yo. [Tsa tshihí yo cuñí tsi catyí tyin nacoó yo tsa javahá yo cuhva cuñí maa yo.] Tan tsa tyeheh tsitó yo tsa tshihí ra Cristo tsa cuenda tsa cuñí xaan ra tsi yo, jañihí tsi tsi yo tsa cahan yo tuhun ra tshin nyiví. ¹⁵ Ra Cristo tshihí ra tsa cuenda tandihí yo tyin tacan tan coo yo cuhva cuñí maa ra tan ñavin cuhva cuñí maa yo tyin tshihí ra tan nandotó ra tsa cuenda tandihí yo. ¹⁶ Vityin tan ityi nuu, ña caca ca íñi yo nyehe yo cuhva iyó nyiví tumaa tsicá íñi nyiví ña tsitó tsi Nyoo. Tsicoo quiví tacan tsicá íñi yo nyehe yo tsi ra Cristo cuñi yo tyin ra ñuhu ñayiví ñi cuví ra. Maa tyin vityin ña tsicá ca íñi yo tacan. ¹⁷ Tyin quiví nacuhvā cuenda yo tsi yo tsi ra Cristo, jandutsaa ra añima yo. Tan nanduvj yo nyiví tsaa jahá ra. Tan tandihí tuhun tsa tsicá íñi yo nu quitsj ca tsi, ña tsicá ca íñi yo can vityin ihya tyin tsahá ra tsa tsiñi tuñi tsaa tsi yo.

¹⁸ Maa Nyoo javahá tandihí yacan tyin vityin iyó vaha yo tshin ra jahá ra tsa cuenda ra Cristo Jesús. Tsahá cuenda ra tsi yo tyin cuñí tsi jacoto yo tsi nyiví nácaa javaha ñi tan cuví coo vaha ñi tshin ra. ¹⁹ Tyin maa ra tsa yahá nduvahá iyó ra tshin ñi tsa cuenda tsa tshihí ra Cristo tsa cuenda cuatyí ñi. Nyoo jahá ra tyin nduve ca cuatyí ñi nuu ra. Tan tava tyiñu ra tsi yo tsa jacoto yo tuhun ihya tsi ñi. ²⁰ Yacan cuenda cuví ndi ra tava tyiñu ra Cristo. Tan caahán ndaahvi Nyoo tshin ndo tshin yuhu ndi. Yacan cuenda caahán ndahvi ndi tshin ndo tshin siví ra Cristo, na nduvaha coo ndo tshin Nyoo. ²¹ Ra Cristo ña javahá ra ndi intuhun cuatyí. Maa tyin Nyoo jaquitsj ra tsi ra nu ñuhu ñayiví ihya; quitsj cúu ra tsa cuenda tandihí cuatyí yo. Tyin tacan tan cuví jacacu ra tsi yo, tan tsa cuenda ra Cristo, nduvahá yo jahá tsa vaha Nyoo.

6

¹ Yañi, iin caa ñi jahá tyiñu yo tyiñu Nyoo. Yacan cuenda caahán ndaahvi xaan ndi tshin ndo tyin cuatyíñu ndo tandihí tsa vaha tsa tsahá ra tsi intuhun intuhun ndo. ² Tyin catyí Nyoo nu tutu ra tyeheh:

Quivi tahañ tsi tsa jacacu yu tsi un, tsiñi yu tsa cahañ un tan jatyinyee yu tsi un, catyí Nyoo.

Jaha ndo cuenda tyin vityin cuví quivi taahán tsi. Tan vityin cuví quivi jacacú Nyoo tsi yo.

³ Nducú xaan ndi cuhva tsa ña javaha ndi náa javaha ndi tyin tacan tan ña cahan nyaa nyivi tyiñu Nyoo tsa javahá ndi. ⁴ Tan cuñi ndi tsa nyehé ñi tyin nditsa tsa musu Nyoo cuví ndi. Yacan cuenda cunyeé iñi ndi náa ndihí tsa taahán ndi, náa tundoho, tan náa tsihi. ⁵ Vasu ndi maa cañi nyivi tsi ndi, tyihí ñi tsi ndi vehe caa, tsacú nducu ñi tsi ndi, maa tyin cunyeé xaan iñi ndi. Tan ñihi xaan jahá tyiñu ndi nda cuanda tsicoó nyito ndi, tan tsisocó ndi. ⁶ Janahá tucu ndi tyin nditsa tsa musu Nyoo cuví ndi tsihin tsa catsi iyó ndi, tsihin tsa tsitó ndi tsa nditsa tan tsihin tsa cunyeé xaan iñi ndi nyehé ndi tandihí maa nuu tundoho tan ña tsihi ndi tsihi. Vaha iñi ndi, tan cuñi xaan ndi tsi nyivi tyin iyó Tatyí Ii Nyoo añima ndi. ⁷ Caahán ndi maa ñi maa tuhun Nyoo tsa nditsa. Iyó tunyee iñi ra tsihin ndi. Tan tsatyíñu ndi tandihí tsa vaha tsa tsahá ra tsi ndi, tyin tacan tan cuví jaha canaa ndi tsi nu ña vaha. ⁸ Yihí quivi vaha cuñi nyivi nyehé ñi tsi ndi, tan iyó tucu quivi ndasi cuñi ñi nyehé ñi tsi ndi. Iyó tsaha vaha caahán ñi tuhun ndi, inga tucu tsaha caahán ñi ndavaha ñi siqui ndi. Yihí tsaha catyí ñi tyin cuendu caahán ndi tan inga tucu tsaha catyí ñi tyin tsa nditsa caahán ndi. ⁹ Iyó tsaha jahá ñi tyin ña nacotó ñi tsi ndi, tan yihí tsaha jacahnú tucu ñi tsi ndi. Iyó quivi tsa yatyin ña cúu ndi, maa tyin ña tsihi ndi tan ndi iyó ca ndi. Iyó quivi tatsí tuñi nyivi tsi ndi, maa tyin ña tsahñi tucu ñi tsi ndi. ¹⁰ Vasu ndi maa cuihya cuñi ndi iyó tsaha, maa tyin ña tsindihí tsa sii cuñi ndi. Iyó tsaha ndaahvi ndi, maa tyin cuaha nyivi janducucá ndi tsihin tuhun Nyoo. Vasu nduve náa iyó tsi ndi, maa tyin tandihí maa tsa iyó tan tsi maa ndi cuví.

¹¹ Nyooho nyivi ñuu Corinto; caahán catsi ndi tsihin ndo tsihin tsa ñi iñi añima ndi tyin nditsa tsa cuñi xaan ndi tsi ndo. ¹² Nyuhu, ña ndasi cuñi ndi nyehe ndi tsi ndo. Maa ndo cuví ndo ndasi cuñi nyehe tsi ndi. ¹³ Caahán ndaahvi yu tsihin ndo tumaa caahán ndaahvi iin ra tsihin sehe ra; nuña ndo añima ndo, tumaa tsa javahá maa yu tsihin ndo. Tan ña ndasi ca cuñi ndo nyehe ndo tsi ndi, tyin maa ndi ña ndasi cuñi ndi nyehé ndi tsi ndo.

Vehe Nyoo nyito cuví yo tyin iyó ra añima yo

¹⁴ Ña ndu iin ndo tsihin nyivi ña tsinú iñi tsi Nyoo tyin ña nacatsi tahañ añima ndo tsihin añima ñi. Tyin tsa vaha ña cuví ndu iin tsi tsihin tsa ña vaha. Tan ndi tsa nditsin tan ña cuví ndu iin tsi tsihin tsa naa. ¹⁵ Tyin ra Cristo ña ndu iin ra tsihin nu ña vaha. Tan tacan tucu yoo tsa tsinú iñi tsi ra, ña cuví ndu iin yo tsihin nyivi ña tsinú iñi tsi ra. Tyin tun ndu iin yo tsihin ñi ña cua nacatsi tahañ coo yo tsihin ñi. ¹⁶ Tyin ndi vehe Nyoo tan ña cuví nacatsi tahañ tsi tsihin tsitoho. Yacan ndi ña jacahnu ndo tsitoho tyin vehe Nyoo nyito cuví yo, tumaa catyí maa ra tuhun yo tahañ tsanaha:

Cua coo yu añima ñi, tan cua cuhun yu tsihin ñi nu cuhun ñi.

Maa yu cua cuví Nyoo ñi,

tan maa ñi cua cuví nyivi yu, catyí ra.

¹⁷ Yacan cuenda catyí ra:

Quita ndo mahñu nyivi ña tsinú iñi tsi yu.

Ña cõtahan ndo tsihin ñi.

Ña javaha ndo tsa ña vaha.

Tacan tan naquihin yu tsi ndo.

¹⁸ Tan cuvi yu jutu ndo.
Tan cuvi ndo sehe yu,
catyí Jutu Mañi yo, ra iyó tandihí tunyee iñi tsi.

7

¹ Yañi, yacan cuví tsa tshahá Nyoo tsi yo, yacan cuenda cuñí tsi nducu yo cuhva nduvaha vaha ca yo. Tan ña javaha ca yo tsa caquiñi tan ña caca ca iñi yo tsa ña vaha. Cuiñi coo yo tyin tyaá yahvi yo tsi Nyoo.

Nu nacatyí tuhun ra Pablo nácaa nasama cuhva iyó nyivi yihí cuenda Nyoo ñuu Corinto

² Yañi, caahán ndaahvi yu tsihin ndo, vaha cuñi ndo nyehe ndo tsi ndi tyin nduve maa náa javahá ndi tsi ndi intuhun ndo. Tan ndi ña jatíví ndi tsi ndi intuhun ndo. Tan ña jandaví ñaha ndi tsi ndi intuhun ndo. ³ Tsa caahán yu tyehen tsihin ndo ñavin tsa caahán yu tsi ndo cuví. Tyin tsa yaha catyí yu tsihin ndo nda nu quítsi ca tsi, tyin nditsa tsa cuñi yu tsi ndo. Tyin iin caa ñi iyó yo tsihin Nyoo. Tatun iyó yo, iin ñi cuví yo tsihin ra; o tatun cúu yo, iin ñi cua cuví tucu yo tsihin ra. ⁴ Tsitó vaha yu tyin cua javaha ndo tsa vaha, yacan cuenda sii xaan cuñi yu nyehé yu tsi ndo. Vasu ndi maa nyehé xaan ndi tundoho, maa tyin ndu iin ca iñi añima ndi. Tan sii xaan ca cuñi ndi.

⁵ Nda quivi tsaá ndi Macedonia ihya, tan ñaha ca maa quitatu ndi. Tyin cuaha xaan tsihi tan tundoho nyehé ndi tandihí ñi ityi cuahán ndi. Cañi tahan nyivi tsihin ndi. Tan tsicá xaan iñi ndi tyin ña tsitó ndi tun cua quita vaha tyiñu jahá ndi. ⁶ Maa tyin Nyoo, tacan ñi maa jandu iin ra iñi yo tun cuiihya cuñi yo. Tan jandu iin xaan ra iñi ndi quivi tsaá ra Tito nu yucú ndi ihya. ⁷ Tan ñavin tsa cuenda tsa tsaá ñi ra, maa tyin sii cuñi tucu ndi tsa cuenda tsa jandu iin xaan ndo iñi ra. Nacatyí tuhun ra tsihin ndi tyin cuñi xaan ndo nyehe ndo tsi ndi. Tan catyí tucu ra tyin tsacú xaan ndo tsa cuenda tsa cuiihya cuñi ndo. Tan ñuhú xaan iñi ndo tsi yu. Tsa tsitó yu yacan, sii xaan ca cuñi yu cuví.

⁸ Quivi can tsica xaan iñi yu tyin tsaá yu tucuiihya iñi tsi ndo tsihin carta tsa jaquítsi yu tsi ndo. Tan ndu uví iñi yu tsa jaquítsi yu carta can tsi ndo. Maa tyin juhva ñi quivi nducuiihya iñi ndo. Tan vityin ña tsicá ca iñi yu tsa cuenda tucuiihya iñi tsa tsaá yu tsi ndo. ⁹ Tan vityin sii xaan cuñi yu. Ñavin tsa cuenda tsa tsicoo ndo tucuiihya iñi, tsa cuenda tsa ndu uví iñi ndo cuatyí ndo jahá tucuiihya iñi can. Tan cunyeé xaan iñi ndo nyehé ndo tucuiihya iñi cuhva taahán maa iñi Nyoo. Yacan cuenda vaha javahá ndi tsa tsaá ndi tucuiihya iñi tsi ndo. ¹⁰ Tyin tun cunyee iñi yo nyehe yo tucuiihya iñi cuhva cuñi maa Nyoo, cua nasama cuhva iyó yo tacan tan cua cacu yo. Yacan cuenda na sii cuñi yo tun nyehé yo tucuiihya iñi cuhva cuñi maa Nyoo. Tyin tucuiihya iñi tsa iyó tsi nyivi tsa ña tsitó tsi Nyoo maa ñi anyaya ñihí ñi tsihin can. ¹¹ Nyooho cunyeé iñi ndo nyehé ndo tucuiihya iñi tumaa cuhva taahán iñi maa Nyoo. Tan vityin, nyehe ndo tyin cuaha xaan tsa vaha ñihí ndo tsa cuenda tucuiihya iñi can. Jandaá vaha ndo cuatyí ra can. Cuxaan ndo tsi ra. Tan nayuhví tucu ndo tsi Nyoo. Tsaá cuenda vaha ndo nácaa cuahán tyiñu can. Yaha can tan nda cuenda cuñi ndo nyehe ndo tsi yu. Tan tatsi tuñi ndo tsi ra can. Tan tsa cuenda tsa javahá ndo tumaa cuñi maa Nyoo, cuñi tsi catyí tyin nduve cuatyí ndo tsa cuenda yacan. ¹² Yacan cuenda quivi jaquítsi yu carta can tsi ndo ña jaquítsi yu itsi tsa cuenda tsa tsicá xaan iñi yu cuenda ra tsa javahá cuatyí can. Tan ndi ñavin tsa cuenda ra tsa tahan ticanuu can.

Maa tyin tsa cuenda maa ndo, tyin cuñi yu tsa coto ndo nácaa ñuhú iñi ndo tsi ndi nuu Nyoo tan nácaa cuñi ndo jatyinyeé ndo tsi ndi. ¹³ Yacan cuenda nduvaha cuñi añima ndi. Tan si# xaan cuñi ndi tyin tsitó ndi tyin cuñi ndo tsi ndi.

Tsa nyehe ndi tyin si# xaan cuñi ra Tito, ndusi# ca iñi ndi tyin tsaḥa xaan ndo tynyeé iñi tsi ra. Tan vaha xaan naquihin cuenda ndo tsi ra. ¹⁴ Catyi yu tsihin ra Tito tsa ndi cumañi ca quitsi ra nu yucú ndo tyin cua tyaa soho vaha ndo tuhun tsa jaquitsi yu tsihin ra. Tan vityin si# cuñi yu tyin cundaḥ tsa caḥan yu tsihin ra. Tyin maa ñi maa tsa nditsa tuhvá yu caahán. Tan tacan tucu ndunditsa tsa caḥan yu tsihin ra. ¹⁵ Cuñi xaan ra tsi ndo tsa nducuhún iñi ra tyin javaha ndo tandi#i cuii maa tsa caḥan ra tsihin ndo. Tan tsa tsaḥa ra nu yucú ndo, ndaahvi jahá ndo tsi ndo nuu ra. Tan vaha xaan caḥan ndo tsihin ra. Tan vaha xaan tyaa yahvi ndo tsi ra. ¹⁶ Tan si# xaan cuñi yu tyin tsitó yu tyin tacan ñi javahá ndo tsa vaha.

8

Na jatyinyeé yo tsi nyivi yihí cuenda Nyoo tsihin tsa ni# iñi añima yo

¹ Vityin yañi, cuñi ndi nacatyí tuhun ndi tsihin ndo nácaa jatyinyeé xaan Nyoo tsi nyivi yihí cuenda ra, ñi iyó ñuu tsa cayucú Macedonia ihya. ² Vasu ndi maa cuaha xaan tundoho nyehe ñi, maa tyin si# cuñi ñi tsihin Nyoo. Ndaahvi xaan ñi, maa tyin cuaha tsa iyó tsi ñi tsaḥá ñi, tumaa tsatyin cuca ñi. ³ Tan cuví yu tsandaa tyin nyehe yu tyin tsaḥá ñi cuaha tsa iyó tsi ñi tsihin tsa ni# iñi ñi tan nda cuanda yaha ca tsaḥá ñi. ⁴ Caahán ndaahvi xaan ñi tsihin ndi na cuhana ndi ndatu tsa jatyinyeé ndi#i ñi tsi nyivi yihí cuenda Nyoo tsa iyó ñuu Jerusalén. ⁵ Cuaha ca javaha ñi tan ñavin ca tsa tsica iñi maa ndi. Tyin tsa jihna ñi, nacuhva cuenda ñi tsi ñi tsi Nyoo tsihin tsa ni# iñi añima ñi. Tacan tan nacuhva cuenda tucu ñi tsi ñi tsi nyuhu tsa quihí ndaha ndi tsi ñi tumaa cuñi maa Nyoo. ⁶ Tsa nyehe yu tyin tacan javahá nyivi Macedonia, tacan tan catyi yu tsihin ra Tito tyin na quitsi ra nu yucú ndo tan janumi ra tsi ndo jacatsi tahan ndo xuhun tsa quitsaha tava ndo jahá ra. ⁷ Tyin nyooho vaha xaan javahá ndo tandi#i tyiñu. Tsinú xaan iñi ndo tsi Nyoo. Vaha xaan caahán ndo tuhun ra. Vaha cutuñi iñi ndo. Tan tsihin tsa ni# iñi añima ndo javahá ndo tyiñu ra. Tan cuñi xaan ndo tsi ndi. Tan juvin ñi tacan taahán tucu tsi jatyinyeé ndo tsi nyivi ndaahvi, tsa yihí cuenda Nyoo.

⁸ Ña jañiñi yu tsi ndo tsa javaha ndo tsa caahán yu. Caahán yu tyehen tsihin ndo tsa cuenda tsa cuñi yu tsa nyehe ndo tsa vaha javahá nyivi yihí cuenda Nyoo Macedonia. Tyin tacan tan javaha ndi#i ndo tsa vaha tumaa javahá maa ñi. Tan tsihin yacan cua janaha ndo tyin nditsa tsa vaha xaan iñi ndo. ⁹ Tyin tsa tsitó maa ndo nácaa tsa vaha iñi Jutu Mañi yo Jesucristo tsihin yo. Maa ra cuca xaan ra, maa tyin quitsi ra nu ñuhu ñayivi ihya tan jandundaahvi ra tsi ra tsa cuenda tsa cuñi ra tsi yo tyin tacan tan cuví janducuca ra tsi yo.

¹⁰ Yuhu cuñi yu tsa vaha tsa cuenda ndo, yacan cuenda cua cahan yu tsihin ndo tsa tsicá iñi yu tsa cuenda tuhun ihya. Nyooho cuví nyivi tsa quitsaha jandu iin jihna xuhun cuyava. Ñavin nyivi tava tyiñu tsi ndo javaha ndo tacan. Javahá ndo tacan tyin tacan tsicá iñi maa ndo. ¹¹ Yacan vityin cuñi yu tsa jañihi ca ndo javaha ndo tumaa javahá maa ndo nda nu quitsaha nda cuanda nacatsi tahan xuhun can jaha ndo. Cuhva nyooho nácaa iyó maa tsi ndo. ¹² Tyin tatun iin nyivi tan cuñi ñi cuhva ñi tandi#i cuhva iyó tsi ñi tan cuhva

ñi can tsihin tsa nñi iñi añima ñi, Nyoo cua naquihín cuenda ra tsa cua cuhva ñi tyin Nyoo ña jañiñi ra tsi yo cuhva yo tun nduve náa iyó tsi yo.

¹³ Caahán yu tyehen tsihin ndo, maa tyin ñavin tsa cuenda tsa cuñi yu tsa jatyinyee ndo tsi nyivi tan ndoo ndaahvi ndo tan ñi ican coo tsa coo tsi ñi. ¹⁴ Tyin vityin tsa iyó luxu tsi ndo, taahán tsi jatyinyee ndo tsi nyivi ndaahvi tsihin can. Tyin tacan tan inducu ñi coo tandihí yo. Tan inga tsaha, maa ñi cua jatyinyee tucu tsi maa ndo tun cumañi tsa cumañi tsi ndo. Tyehen taahán tsi jatyinyee tahan yo tsi yo tsihin tsa iyó tsi yo tyin tacan tan ña nyehe ndi intuhun yo tundoho. ¹⁵ Tumaa catyí nu tutu Nyoo tyehen: “Ra tsa cuaha xaan tsa iyó tsi, ña jativi ra itsi. Tan ra tsa iyó luxu ñi tsa iyó tsi, ña cumañi tsa cumañi tsi ra”, catyí tsi nu tutu Nyoo.

Nu tyaá ra Tito naha ra cuhva cuhun ra naha ñuu Corinto

¹⁶ Tyahvi nyoo tsi Nyoo tyin tsaḥa ra tsa vaha iyó añima ra Tito tan tsicá iñi ra tuhun ndo tumaa tsicá iñi maa yu tuhun ndo. ¹⁷ Tsa caḥan yu tsihin ra tyin quitsi ra nu yucú ndo, ndoo ra tyiñu tsa quitsi ra, tyin tuñu cuñi tucu maa ra ñuhú iñi ra tsi ndo. Yacan cuenda vityin vatsí ra nu yucú ndo tsihin tsa iyó iñi maa ra.

¹⁸ Jaquitsí ndi tsi iin ra yañi yo iin caa ñi tsihin ra Tito. Vaha xaan tsinú iñi ra tsi Nyoo, tan tacan caahán tucu tandihí nyivi yihí cuenda Nyoo. ¹⁹ Tan inga tucu tuhun tyin nacatsj vaha nyivi yihí cuenda Nyoo tsi ra yañi yo ihya tyin cuhun ndihí ra tsihin ndi cundaca ndi xuhun tsi nyivi ndaahvi iyó ñuu Jerusalén. Cuñi xaan ndi jachnú ndi tsi Jutu Mañi yo tsihin tsa javahá ndi tyiñu ihya. Tan tacan tucu cuñi xaan ndi jatyinyee ndi tsi tandihí nyivi yihí cuenda Nyoo. ²⁰ Tsihin cuenda xaan javahá ndi tyiñu ihya, tyin tacan tan ña cahan nyivi tsi ndi tsa cuenda tsa tavá ndi xuhun cuenda nyivi ndaahvi. ²¹ Tacan ñi nducú xaan ndi cuhva javahá ndi tyiñu. Tatun cua javaha ndi náa iin tsa can javaha ndi, javahá ndi can tsihin tsa catsi iyó ndi ityi nuu Jutu Mañi yo tan ñavin ityi nuu Jutu Mañi yo ñi tyin ityi nuu tucu nyivi.

²² Tan juvin ñi jaquitsí tucu ndi inga ra yañi yo tsihin ra Tito naha ra tyin nyehé ndi tyin nñi xaan iñi ra. Tan cuaha ñi tsaha janahá ra tyin cuñi xaan ra tsi Jutu Mañi yo. Tan vityin tsa tsa tsitó ra tuhun ndo, sñi cuñi ra tyin tsitó ra tyin cua javaha ndo tsa vaha nuu Nyoo. ²³ Tatun yóo tsicá tuhun tuhun ra Tito, çatyí ndo tsihin ñi tyin ra vaha iñi tsi yu cuví ra, tan jahá tyiñu ra tsihin yu, tan jatyinyee ra tsi ndo tsihin tuhun Nyoo. Tatun tsicá tuhun tucu ñi tuhun inga uví ca ra yañi yo ihya naha ra, çatyí ndo tyehen tsihin ñi:

—Maa nyivi yihí cuenda Nyoo jaquitsj tsi ra naha. Tan vaha xaan jahá tyiñu ra naha tyiñu ra Cristo —çatyí ndo.

²⁴ Yacan cuenda janaha ndo tsi ra ihya naha ra nu tuvi tyin nditsa tsa cuñi ndo tsi ra naha. Tyin tacan tan coto tandihí nyivi yihí cuenda Nyoo tyin nditsa tsa caahán yu tyin vaha javahá ndo.

9

Nu tsahá cuenda ra Pablo nácaa taahán tsi jatyinyee yo tsi nyivi ndaahvi yihí cuenda Nyoo

¹ Tan cuenda xuhun tsa jandu iin ndo tsa cuenda nyivi ndaahvi yihí cuenda Nyoo, ña ñiñi xaan cuñi tsi cahan yu tuhun can tsihin ndo. ² Tyin tsitó yu tyin cuñi xaan ndo javaha ndo tsa vaha. Yacan cuenda sñi cuñi yu nacatyí tuhun yu tuhun ndo tsihin nyivi iyó Macedonia, tyin nyooho tsa iyó ñuu

Corinto tsa canyíi Acaya, nda cuyava tan quitsahā cuñí ndo jatyinyeé ndo tsi nyívi ndaahvi. Tan tsa cuenda yacan cuaha xaan nyívi yihí cuenda Nyoo Macedonia ndu iin ca iñi ñi tan cuñí ndihí tucu maa ñi jatyinyeé ñi tsi nyívi ndaahvi. ³ Vasu ndi maa tsitó yu tyin vaha tsicá iñi ndo, maa tyin jaquitsí yu tsi ra yañi yo ihya naha ra nu yucú ndo, tyin jatyinyee ra naha tsi ndo tan janumi ndo jandu iin ndo xuhun, tumaa tsa caahán yu tuhun ndo tyin cuñí ndo javaha ndo tsa vaha. Tyin tacan tan ña cua catyí nyívi Macedonia tyin ña nditsa yu tsa caahán yu. ⁴ Tyin coto cusana quitsi iin ra Macedonia tsihin yu, tan nyehe ra tyin nduve xuhun jandu iin ndo. Tan tahan yu ticanuu tsa cuenda tsa nduve náa javahā ndo. Tan vihi ca maa ndo. Tyin tsa yaha catyí yu tyin cuñí xaan ndo jatyinyee ndo tsi nyívi ndaahvi. ⁵ Yacan cuenda tsicá iñi yu tyin vaha ca tsa quitsi jihna ra yañi yo ihya naha ra nu yucú ndo tyin tacan tan jatyinyee ra naha tsi ndo tsa jandu iin ndo xuhun tsa tyihí ndo cuhva tyin cuhva ndo. Tyin tacan tan quívi quitsi yu tandihí tsi tan tsa iyó vaha tsi. Tyin tsa cacú iñi maa ndo tan javahá ndo cuhva can, tan ñavin nyuhu jañíi tsi ndo.

⁶ Ndūcuhun iñi ndo tuhun tsa catyí tyehen: Ra tsa tatsí luxu ñi, luxu ñi tsiti naquihín ra. Maa tyin ra tsa tatsí cuaha, cuaha tsiti naquihín ra. ⁷ Tan intuhun intuhun yo cuñí tsi cuhva yo cuhva iyó iñi maa yo. Ñavin uvi caca iñi yo tan cuhva yo o cuhva yo tsa cuenda tyin jañíi nyívi tsi yo. Tyin Nyoo cuñí ra tsi nyívi tsahá tsihin tsa sii cuñí ñi. ⁸ Nyoo cuví cuhva ra tandihí nuu tsa vaha tsi ndo, tyin tacan tan ña cumañi náa cumañi tsi ndo. Tan cuví jatyinyee tucu maa ndo tsi inga ca nyívi. ⁹ Tumaa catyí tuhun Nyoo tyehen: Iin ra vaha tsahá ra, tsihin tsa ñi iñi ra, tsa iyó tsi ra tsi nyívi ndaahvi. Tan tumañi iñi tsa javahá ra, ña tsinaá tsi nuu Nyoo, catyí tsi.

¹⁰ Nyoo, ra tsahá tsiti tatsí yo, tsahá tucu ra tandihí tsa tsatsí yo. Tan cua cuhva tucu ra cuaha ca tsiti tsa tatsi ndo tan vaha cua cuvaha tsi jaha ra. Tan tsa tacan tsahá ndo cua jatyinyee ca ra tsi ndo javaha ndo tsa vaha tsihin nyívi. ¹¹ Tan coo ca tandihí nuu tsa cuca tsi ndo, tyin tacan tan cuví jatyinyee ca ndo tsi nyívi yihí cuenda Nyoo tsihin yo. Tan maa ñi, cua nacuhva ñi tyahvi nyoo tsi Nyoo tsa cuenda xuhun tsa jacuhun ndo tsi ñi. ¹² Tyin tsa jatyinyeé yo tsi nyívi yihí cuenda Nyoo tsihin tsa tsahá yo tsa tsíñi ñuhu tsi ñi, tsahá tucu yo tsa nacuhva ñi tyahvi nyoo tsi Nyoo. ¹³ Tan cua jacahnu ñi tsi Nyoo. Tyin tsihin tsa jatyinyeé ndo tsi ñi, nyehé ñi tyin nditsa tsa tyaá yahvi ndo tuhun ra Cristo. Tan juvin ñi cua jacahnu ñi tsi Nyoo tsa cuenda tsa jatyinyeé xaan ndo tsi maa ñi tan tsi tandihí ca nyívi. ¹⁴ Cua ndacan tahvi ñi tsi Nyoo tsa cuenda ndo. Tan cua cuñi xaan ñi tsi ndo tsa cuenda tsa vaha tsa tsahá ndo tsi ñi jahá Nyoo. ¹⁵ Tyahvi nyoo tsi Nyoo tyin tsahá ra tsa vaha xaan tsi yo, tan nda cuanda ña ñihí yo cuhva nacatyí tuhun yo itsi.

10

Ra Pablo iyó ndatu tsi ra tsa jaha cuenda ra tsi nyívi tsa jacotō ra tuhun Nyoo

¹ Yuhu ra Pablo tsihin tsa vaha iñi ra Cristo caahán ndaahvi yu tsihin ndo, tyin yihí ndo catyí ndo tyin tun tsahá cuenda yu tsi ndo tsihin carta, ñihí xaan caahán yu tsihin ndo, maa tyin tun nyíi yu tsihin ndo, ndaahvi xaan jahá yu tsi yu, catyí ndo. ² Vaha. Maa tyin jaha ndo cuenda tan ña jañíi ndo tsi yu tsa cuxaan yu tsi ndo quívi quitsi yu nu yucú ndo tyin tsitó yu tyin cuñí tsi tsa

cuxaan ñihi yu tsi juhva ndo. Tyin yihí ndo catyí ndo tyin javahá yu tumaa javahá ra ña yihí cuenda ra Jesucristo. ³ Nditza tyin ra ñuu ñayivi cuví ndi. Maa tyin ña cañi tahan ndi tumaa cañi tahan nyivi iyó nu ñuhu ñayivi ihya. ⁴ Tyin tsa xaan tsa tsatyíñu ndi tsa cañi tahan ndi, ñavin tsa xaan tsa iyó nu ñuhu ñayivi ihya cuví tsi. Tyin maa tunyee iñi maa Nyoo cuví tsi, tyin cuví jaha canaa ndi siqui tandihi ca tunyee iñi tsihin tsi tan nda cuanda tunyee iñi tsa iyó tsi tatyí ña vaha. ⁵ Tan tacan cuví jaha canaa ndi tsi tandihi tsa caahán ndasi nyivi siqui tuhun Nyoo, tan tandihi tsa ña vaha tsa tyaá nu tyaa yahvi nyivi tuhun Nyoo. Tan tsahá ndi tsa cundaca ñaha ra Cristo tandihi cuhva tsicá iñi ndi tyin tacan tan tyaá yahvi ca ndi tsi ra. ⁶ Quivi cutuhva tandihi nyooho tsa iyó Corinto tyaa yahvi vaha ndo tsi ra Cristo, tatun ndoo inga ndo tsa ña cuñi tyaa yahvi tsi ra, tyaá ndi cuhva tsa tatsi tuñi ndi tsi ndo.

⁷ Nyooho jahá ndo cuenda cuhva iyó nyivi. Tan ña jahá ndo cuenda nácaa iyó añima ñi. Tatun tsitó vaha ndo tyin cuenda ra Cristo yihí ndo, taahán tsi coto ndihi tucu ndo tyin cuenda ra yihí tucu nyuhu. ⁸ Ña cahán nuu yu caahán yu tsa tsahá Nyoo ndatu tsi yu tsa quihí ndaha yu tsi ndo, vasu ndi maa yahá caahán yu juhva tyin tsitó yu tyin tsa vaha tsi maa ndo cuví, tan ña javahá yu can tsa cuenda tsa cuñi yu jativi yu tsi ndo. ⁹ Ña cuñi yu tsa catyí ndo tyin jayuhví yu tsi ndo tsihin tsa caahán yu nu carta tsa jaquitsí yu tsi ndo. ¹⁰ Tyin yihí ndo catyí ndo tyin nu carta tsa jaquitsí yu tsi ndo ñihi xaan caahán yu tsihin ndo. Maa tyin tatun maa yu tsaá nu yucú ndo, nduve yahvi nyaá yu, catyí ndo. Tan catyí tucu ndo tyin nduve yahvi nyaá tuhun caahán yu. ¹¹ Maa tyin nyooho tsa caahán tacan cuñi tsi coto ndo tyin tumaa caahán yu nu carta, tacan ca javaha tucu yu tsa tsaá yu nu yucú ndo.

¹² Nditza ña caná iñi ndi jandu inducu ndi tsi ndi tsihin ra nduyaá naha ra. Tyin ra can naha ra juvin ñi maa ra naha catyí tyin vaha ra naha. Tan tsa caahán ra naha tacan, nduve yahvi nyaá caahán ra naha can tyin javahá ra naha cuhva javahá inga nyivi tan ñavin cuhva cuñi Nyoo. Tan cuñi ra naha tyin vaha tsa jandu inducú ra naha tsi ra naha tsihin inga nyivi. ¹³ Nyuhu ña cua nduyaa ndi tsihin tsa ña taahán tsi tsi ndi. Nyoo cuví ra jahahá náa tyiñu taahán tsi javahá yo. Tan maa ra jaquitsí tsi ndi ñuu Corinto nu yucú ndo. ¹⁴ Tun tsatyin ña jihna ca maa ndi cahán tuhun Nyoo tsihin ndo, ña taahán tsi jahá cuenda ndi tsi ndo. Maa tyin taahán tsi jahá cuenda ndi tsi ndo tyin jihna ca maa ndi tsindaca tuhun ra Cristo nu yucú ndo. ¹⁵ Nyuhu ña nduyaá ndi tsihin tyiñu javahá inga ca ra naha. Ña catyí ndi tyin tyiñu maa ndi cuví tsi. Maa tyin nyitá iñi ndi tyin cua natsinu vaha ca iñi ndo tsi Nyoo. Tan tatun tsa tsinú vaha ca iñi ndo, tacan tan cua cuví jacuaha cuaha ca ndi tuhun ra Cristo tsi ndo, maa tyin tandihi ñi tsaha tsa cua jacuaha ndi tsi ndo maa ñi tsa caahán Nyoo cua cahan ndi. ¹⁶ Tan tsicá iñi ndi cuhun ndi cucahan ndi tuhun ra Cristo nu ña tsitó nyivi tuhun ra. Tyin tacan tan ña cua catyí nyivi tyin nduyaá ndi tsihin tyiñu javahá inga ra naha.

¹⁷ Nyooho tsa cuñi nduyaa, nduyaa ndo tsihin tsa javahá Jutu Mañi yo tan ñavin tsihin tsa javahá maa ndo. ¹⁸ Tyin ra tsa catyí tyin vaha ra, ña quitá vaha ra nuu Nyoo. Maa tyin ra tsa catyí Nyoo tyin vaha, ra ican cua quita vaha nuu Nyoo.

11

Nu tsahá cuenda ra Pablo tsi nyivi ñuu Corinto na jaha cuenda ñi tsi ñi na ña

jandaví ñaha ra vatya naha ra tsi ñi

¹ Vaha xaan tun ña cundihi iñi ndo tyaa soho ndo tsa cua cahan yu tsa tsicá iñi maa yu tsihin ndo. Ña cundihi iñi ndo tsihin yu vasu ndi maa tuhun maa yu cuví tsi. ² Yuhu cuiñú xaan yu tsi ndo. Tan maa Nyoo tsahá tsa cuiñu yu tsi ndo, tyin juvin yu cahan tuhun ra Cristo tsihin ndo nda jihna. Tan cuñi yu tsa cuñi ndo tsi intuhun ñi maa ra tumaa cuñi iin ñaha yoco tsi ra tsa cua cuví yí ña. Tyin iin ñaha yoco cuñi ña tsi intuhun ñi maa ra tsa cua cuví yí ña. ³ Maa tyin tsicá xaan iñi yu tsa cuenda ndo, coto tahan ndo tumaa tahan ña Eva. Tyin ña Eva jandaví ñaha nu coo tsi ña tsihin maña nu. Tan yuhu ña cuñi yu tsa jandaví ñaha nyivi tsi ndo tan nasama ndo cuhva tsicá iñi ndo tuhun ra Cristo, tan jandihi ndo tsa jacahnú ndo tsi intuhun ñi maa ra. ⁴ Tyin nyooho yatyi xaan nasamá ndo cuhva tsinú iñi ndo tuhun ra Jesús tun siin cuhva caahán nyivi tuhun ra. Tyin ñavin tuhun ra Jesús tsa jacotó ndi tsi ndo cuví can. Tan taahán xaan iñi ndo caca iñi ndo tuhun tsa ña nacatsí tahan tsihin tuhun Tatyí Ii Nyoo tsa naquihjin ndo nda jihna. Yatyi xaan natsinú iñi ndo tuhun caahán nyivi tan ñavin tuhun, tsa jacacú ra Cristo tsi yo, tsa cahan ndi tsihin ndo. ⁵ Ra tsa catyí, “Nyuhu cuví ndi ra vaha caahán tuhun ra Cristo”, tsicá iñi yu tyin ña cahnu ca cuví ra can naha ra tan ñavin ca maa yu. Tan nyooho nyicún ndo tsi ra naha. ⁶ Vasu ndi maa ña ñihí vaha yu cuhva caahán yu, maa tyin cutuñi vaha iñi yu tuhun Nyoo. Tan yacan cuví tsa jacuahá ndi tsi ndo tsihin tandihi cuhva javahá ndi.

⁷ ¿O cuñi maa ndo tyin ña vaha javahá yu tsa ña quihjin yu yahvi quivi cahan yu tuhun tsa jacacú Nyoo tsi yo tsihin ndo? Tacan javahá yu tyin tacan tan ña cahnu xaan jaha ndo tsi yu tan nducahnu maa ndo nuu Nyoo. ⁸ Nyivi tsa tsicá tuhun Nyoo vehe ñuhu inga ñuu jatyinyee tsi yu tsihin xuhun. Tan xuhun tsa tsahá ñi tsi yu tsatyíñu yu can quivi quitsj yu quitsj cahan yu tuhun ra Cristo tsihin ndo. ⁹ Vasu ndi maa yihí tsaha cumañi tsa cumañi tsi yu tsa tsinyij yu tsihin ndo, maa tyin ña tsahá yu tundoho tsi ndi intuhun maa ndo. Tyin ra yañi yo tsa quee nda Macedonia, juvin ra naha tsahá tandihi tsa cumañi tsi yu. Tacan jahá cuenda yu tsi yu tyin ña cuñi yu cuhva yu tundoho tsi ndo. Tan tumaa tsa javahá yu nda vityin tacan ñi maa cua javaha yu. ¹⁰ Tumaa tsa nditsa yu tyin nacotó vaha yu tuhun nditsa ra Cristo, tacan nditsa yu tsa ña cua ndacan yu xuhun, ndi tsi nyooho tan ndi tsi inga nyivi iyó nanñ Acaya. ¹¹ ¿Nacuenda caahán yu tyehen cuñi maa ndo? ¿A tsa cuenda tsa ña cuñi yu tsi ndo? Ñavin. Tyin nda maa Nyoo tan tsitó ra tyin cuñi xaan yu tsi ndo.

¹² Ña cua jandihi yu javahá yu tsa tuhvá yu javahá. Tyin tacan tan ña coo ndatu cahan ra tsicá nuu naha ra tyin javahá ra naha tumaa javahá ndi tyin ña nditsa maa ra naha tsa caahán ra naha. ¹³ Catyí ra naha tyin ra tsicá tyiñu ra Cristo cuví ra naha, maa tyin ña nditsa ra naha. Tyin jandaví ñaha ra naha tan jahá ra naha tyin ra tsicá tyiñu ra Cristo cuví ra naha. ¹⁴ Tan tsa javahá ra ican naha ra ñavin tsa iyo cuñi yo cuví can. Tyin nda maa nu ña vaha tan jahá nu tyin ángel Nyoo tsa xiñu xaan cuví nu. ¹⁵ Yacan cuenda ña iyo cuñi yo tun ra nyicún tsi nu tan jahá ra naha tyin javahá ra naha tsa vaha. Coo quivi cua tatsi tuñi Nyoo tsi ra naha tsa cuenda tsa ña vaha tsa javahá ra naha.

Tundoho tsa nyehé ra Pablo nu tsicá ra caahán ra tuhun Nyoo

¹⁶ Inga tsaha caahán yu tsihin ndo: Ndi intuhun ndo tan ña çaca iñi ndo tyin sana iñi yu tsa caahán yu tyehen. Maa tyin tun tacan tsicá iñi ndo, cuhva ndo cahan yu tsihin ndo tumaa caahán ra sana iñi. Tyin tacan tan cuví nduyaa

ndihi tucu yuhu luxu. ¹⁷ Caahán yu tumaa caahán ra sana iñi tyin tacan tan cuvi nduyaa yu. Ñavin maa Jutu Mañi yo catyí tsihin yu tsa javahá yu tyehen. ¹⁸ Cuaha xaan ra naha catyí ra naha tyin cahnu cuví ra naha tan nduyaa ra naha tsihin tsa iyó nu ñuhu ñayivi ihya. Yacan cuenda cua jacahnu ndihi tucu yuhu tsi yu. ¹⁹ Nyooho catyí ndo tyin tsitó xaan ndo. Tun nditsa ndo, ñacuenda tyin yatyi xaan tyaá soho ndo tsa caahán ra sana iñi can naha ra? ²⁰ Tan cunyeé xaan iñi ndo nyehé ndo tsi ra naha tan cuaha tsa javahá ra naha tsi ndo. Jañiñi ra naha tsi ndo tsa cuví ndo musu ra naha. Suhú ra naha tsa tsii ndo. Ndacá ñaha ra naha tsi ndo. Ndasí cuñí ra naha nyehé ra naha tsi ndo. Tan nda cuanda cañi ndaha ra naha nuu ndo. ²¹ ¿A taahán tsi nducahan nuu ndi tsa ña javahá ndi tacan tsihin ndo?

Tatun inga ra can naha ra tan ña cahán nuu ra naha caahán ra naha tuhun maa ra naha tsihin ndo, tacan tucu yuhu ña cua nducahan nuu yu cahán yu tuhun maa yu tsihin ndo vasu ndi maa cahán ndo tyin sana iñi yu. ²² Catyí ra can naha ra tyin nyivi Hebreo cuví ra naha; tacan tucu yuhu, ra Hebreo cuví yu. Ra ican naha cuví ra naha nyivi Israel; juvin ra Israel cuví tucu yuhu. Cuví ra naha tata ra Abraham; tata ra Abraham cuví tucu yuhu. ²³ Tan tatun ra can naha ra tan jahá tyiñu ra naha tyiñu ra Cristo, yaha ca jahá tyiñu yuhu tyiñu ra Cristo. Tsa caahán yu tyehen caahán yu tumaa caahán ra sana iñi, maa tyin nditsa tsa ñihi ca jahá tyiñu yu tan ñavin ca ra can naha ra. Tan cuaha ca tsaha cañi nyivi tsi yu tsihin yoho tan ñavin ca ra can naha ra. Cuaha ca tsaha tsinyij yu vehe caa. Tan cuaha tsaha cuñi cúu yu, maa tyin ña tsihi yu. ²⁴ Uhun tsaha cañi ra Israel naha ra tsi yu tsihin yoho. Tan tsa iin tsaha cañi ra naha tsi yu, cañi ra naha oco tsahun cumi tsaha tsata yu. ²⁵ Uñi tsaha cañi ra naha tsi yu tsihin yutun. Iin tsaha cañi ra naha tsi yu tsihin yuu. Tan uñi tsaha nyee yutun ndoo tsa cuahán yu tsihin. Tan tsa uñi tsaha tsa nyee yutun ndoo tsitsi ndutya, iin tsaha ndoo yu nu ndutya ñuhu iin quivi tan iin tsa cuaa. ²⁶ Tandihí ñi tsaha tsa cuahán yu tyiñu ra Cristo tan yahá yu tundoho. Cuaha ñi tsaha cuñi tañi yu. Cuaha tsa tañan yu. Quita ñasuhu nuu yu ityi cuahán yu. Nda cuanda ra ñuu yu, ra Israel naha ra, tan jayuhvi ra naha tsi yu. Tan juvin ñi tacan javahá nyivi inga ñuu tsihin yu. Cuaha tsa tañan yu tsitsi ñuu, nu tsiqui, nu ndutya ñuhu. Cuaha tsa tañan yu jahá ra catyí tyin yañi yo cuvi tsi ra naha tan ña nditsa ra naha. ²⁷ Ñihi jahá tyiñu yu tan tsitatú yu. Cuaha xaan tsaha tsicoo nyito yu. Tsisoco yu tan ña ñihi yu ndutya coho yu. Cuaha tsaha tsicoo nyitya yu. Cuaha tsaha yahá yu tsa vitsin tan cumañi jahma tsi yu.

²⁸ Ñavin tuhun ihya ñi tyin cuaha inga ca tuhun. Tsicá tucu iñi yu tuhun tandihí nyivi yihí cuenda Nyoo, nyooho tan nyivi inga ñuu tucu. ²⁹ Tyin tun iin ndo tan vita cuñi ndo, tacan vita cuñi tucu yuhu. Tatun javahá iin ndo tsa ña vaha jahá nyivi, cahán nuu yu tan xaan cuñi yu. ³⁰ Tatun cuñi tsi nduyaa yu tan coto ndo tyin nditsa tsa cuví yu musu Nyoo, cua nduyaa yu tsihin tuhun yu tsa janahá tyin ña cuví javahá yu náa javaha yu tsihin tunyee iñi maa yu. ³¹ Nyoo, Jutu ra Jesucristo Jutu Mañi yo, ra taahán tsi jacahnú yo tacan ñi maa, tsitó ra tyin tsa nditsa caahán yu tan ñavin jandaví ñaha yu. ³² Quivi tsinyij yu ñuu Damasco ra cumi tyiñu tsa jahá tyiñu tyiñu ra rey Aretas, tyacu ra andaru yuhu cora ñuu can, tyin jaha cuenda ra naha coto quita yu tan tñiñ ra naha tsi yu tan cundaca ra naha tsi yu vehe caa. ³³ Maa tyin nyivi iyó vehe tsa cacu tsihin cora can januu ñi tsi yu ityi ventana tsihin iin tyica cahnu. Tacan jacacu Nyoo tsi yu ndaha ra cumi tyiñu ñuu can.

12

Tsa nyehe ra Pablo nda nu tsinu uñi gloria jahá Nyoo

¹ Nduve náa ñihí yo tsihin tsa cahan yo tuhun maa yo, maa tyin cua nacatyí tuhun yu tsihin ndo tsa janahá Jutu Mañi yo tsi yu tan tsa nyehe yu jahá ra. ² Nacotó yu iin ra yihí cuenda ra Cristo tsa tsahan andivi. Tsa iyó utsi cumi cuiya tsa quihin Nyoo tsi ra tsahan ra nda nu tsinu uñi andivi. Maa tyin ña tsitó yu tatun tsahan ra tsihin cuñu ñuhu ra o ñavin. Intuhun ñi maa Nyoo cuví ra tsitó. ³⁻⁴ Tsitó yu tyin tsindacá Nyoo tsi ra nda paraiso nu iyó nyivi tsihí tsa tsinu iñi tsi Nyoo. Maa tyin ña tsitó yu tatun tsahan ra tsihin cuñu ñuhu ra o ñavin. Intuhun ñi maa Nyoo cuví ra tsitó. Nu tsahan ra can tsiñi ra tuhun tsa ña cuví nacatyí tuhun yo, tan ndi ña ñihí ndatu nyivi tsa nacatyí tuhun ñi tuhun can. ⁵ Cuví nduyaa yu tsihin tsa janahá Nyoo tsi yu quivi can. Maa tyin ña nduyaá yu tsihin tsa javahá yu tyin nduyaá yu maa ñi maa tsihin tsa nduve tunyee iñi maa yu iyó tsi yu. ⁶ Tatun cua cahan yu tuhun maa yu, ñavin tsa soho cua cuví can. Tyin tun cua cahan yu can maa ñi maa tsa nditsa cua cahan yu. Maa tyin ña cuñi yu cahan yu can coto cahnu xaan jaha nyivi tsi yu. Vaha ca nanyehe maa ñi cuhva iyó yu tan cuhva jacuahá yu, tacan tan coto ñi tatun vaha yu o ña vaha yu.

⁷ Nyoo ña cuñi ra tsa nduyaa yu tsihin tsa janahá ra tsi yu. Yacan cuenda tsahá ra tsa nyehé xaan yu tundoho jahá nu ña vaha. Tan uhvi xaan yu tumaa uhvi nu tyisó iñu cuñu ñuhu yo. Tyin tacan tan ña cuví nduyaa yu tsihin tsa janahá Nyoo tsi yu. ⁸ Tan tsican yu uñi tsaha tsi Jutu Mañi yo na quihin nyaa ra tundoho can siqui yu. ⁹ Maa tyin catyí Jutu Mañi yo tyehen tsihin yu: “Yuhu cuñi xaan yu tsi un, tan yacan ñi cuví tsa tsiñi ñuhu tsi un. Tyin nyivi tsa nduve tunyee iñi maa ñi iyó tsihin ñi, nyaá tunyee iñi maa yu tsihin ñi”, catyí ra. Yacan cuenda sii xaan cuñi yu tyin nyaá tunyee iñi ra Cristo tsihin yu tyin nduve tunyee iñi maa yu iyó tsihin yu. ¹⁰ Yacan cuenda sii xaan cuñi yu tsa nduve tunyee iñi maa yu iyó tsi yu. Vasu ndi maa caahán nyivi tsi yu, tan nyaá ndaha ñi tsi yu, vasu ndi maa nduve tsa iyó tsi yu, vasu ndi maa cuaha tsa cuví tsi yu, maa tyin sii xaan cuñi yu tsa nyehé yu tundoho tsa cuenda ra Cristo. Tyin tsa nduve tunyee iñi maa yu iyó tsi yu, nyaá tunyee iñi Nyoo tsihin yu.

Tsicá iñi ra Pablo tuhun nyivi yihí cuenda Nyoo ñuu Corinto

¹¹ Tsa caahán yu tuhun maa yu nanduví yu tumaa ra sana iñi. Maa tyin maa ndo cuñi tsa cahan yu tacan tyin ña jahá ca ndo tsa ñayivi tsi yu. Maa ndo taahán tsi vaha cahan tuhun yu, vasu ndi maa ña cahnu xaan cuví yu. Tatun yuhu tan ña cahnu cuví yu, vihi ca ra tsa catyí tyin tyiñu ra Cristo tsicá ra naha, tan ña nditsa ra naha. Cuñi maa ra naha tyin vaha xaan ca ra naha tan ñavin ca inga ra tsicá tyiñu Nyoo. ¹² Yuhu cunyeé xaan iñi yu nyehe yu tandihí tundoho quivi tsinyi yu jahá tyiñu yu tyiñu Nyoo nu yucú ndo. Cuaha xaan tsa iyo javahá yu jahá Nyoo tyin tacan tan coto ndo tyin nditsa tsa cuví yu ra tavá tyiñu ra. ¹³ ¿A vaha ca tyaá nuu yu tsi inga nyivi tsa iyó inga ñuu tan ñavin ca nyooho? Ñavin. Inducu ñi tyaá nuu yu tsi tandihí ndo. Intuhun ñi tsa ña javahá yu tsihin ndo tsa tsinyi yu tsihin ndo cuví tsa ña tsican yu xuhun cuita catsi yu tsi ndo. Ña taahán tsi ndacan yu tucahnu iñi tsi ndo tyin tsitó ndo tyin vaha javahá yu.

¹⁴ Vityin tsa iyó vaha tandihí tsa tsii yu, tsa quitsi yu nu yucú ndo tsa tsinu uñi tsaha. Ña cua cuhva yu tundoho tsi ndo tyin ña cua quitsi yu quitsi nducu

yu tsa iyó tsi ndo tyin maa yu cua jatyinyee tsi ndo. Tyin iin ra iyó sehe, ñavin sehe ra tsahá tsa tsiñí ñuhu tsi ra. Tyin maa ra taahán tsi cuhva tsa tsiñí ñuhu tsi sehe ra. Tan tacan yuhu. ¹⁵ Sii xaan cuñi yu cua janaa yu tsa iyó tsi yu tsa cuenda tsa vaha tsi ndo. Tan nda cuanda cuhva yu ñayivi yu tsa cuenda ndo. Tan tsicá tucu iñi yu tyin tun jañihí ca yu cuñi yu tsi ndo, nyooho ña cuñi vaha ndo tsi yu.

¹⁶ Tandihí ndo tan tsitó ndo tyin ña tsahá yu tundoho tsi ndo. Tan vasu ndi maa tsitó ndo yacan, vatu ñi tyin catyí juhva ndo tyin jandaví ñaha yu tsi ndo tan ña jahá ndo cuenda. ¹⁷ ¿O cuñi maa ndo tyin cahan yu cuendu tsihin ra jaquitsi yu nu yucú ndo tan jandaví ñaha ra naha tsi ndo jahá yu? ¹⁸ ¿A jandaví ñaha ra Tito tan inga ra naha tsi ndo quivi quitsi ra naha nu yucú ndo jahá yu? Ña jandaví ñaha ra naha tsi ndo tyin nyuhu ña tuhvá ndi jandaví ñaha. ¿A ña tsitó ndo tyin ra Tito tan yuhu inducu ñi javahá ndi, tan iin ñi Tatyí Ii Nyoo iyó tsi nduvi ndi?

¹⁹ Vasiqui tsicá iñi maa ndo tyin tandihí tsa caahán ndi, tan caahán ndi can tsa cuñi ndi tsa vaha cahan ndo tuhun ndi, maa tyin ñavin tacan tsicá iñi ndi. Tyin tandihí tsa caahán ndi tan tsa vaha tsi maa ndo cuví can tyin tacan tan cunyicun vaha ca ndo tsi Nyoo. Nda nuu Nyoo tan tsihin tunyee iñi ra Cristo caahán ndi tyin nditsa tsa cuñi xaan ndi tsi ndo. ²⁰ Tsicá iñi yu coto ña cua tahan iñi yu cuhva yucú ndo quivi tsa yu. Tan ndi maa ndo tan ña cua tahan iñi ndo cuhva cua cahan yu tsihin ndo. Yuuhví yu coto coo tsihi, tan nyiyo iñi ndo tsa iyó tsi inga ndo, tan cuxaan tahan ndo tsi ndo, tan nducu ndo maa ñi maa tsa vaha tsi maa ndo, tan cahan ndo cuendu, tan cahan nyaa tahan ndo tsi ndo, tan nduyaa ndo. Tan yuuhví tucu yu coto tsa yu nu yucú ndo tan ña cuñi ña ndaa yucú ndo. ²¹ Tan yuuhví yu quitsi yu nu yucú ndo, tyin coto cuhva Nyoo tsa tahan yu ticanuu tsa cuenda ndo. Tan tsicá tucu iñi yu tyin coto vacu yu jaha ndo. Tyin yihí ndo ña jandihí ndo tsa javahá ndo tsa ña vaha tsa quitsahá javahá ndo nu quitsi ca tsi tyin rayi ndi tsicá nuu ra tsihin ñaha tan ñaha ndi tsicá nuu ña tsihin rayi tan náa ndihí ca maa tsa ña vaha.

13

Nu tsahá cuenda ra Pablo tsi nyivi Corinto, na jaha vaha ñi cuenda tsi ñi tatun vaha cuahán ñi tsihin Nyoo

¹ Tsinu uñi tsaha cuví tsi tsa cua quitsi yu ihya. Nda tacan tan cuví cundaa tyiñu ñi tsa javahá tsa ña vaha. Maa tyin cuñi tsi uvi o uñi taahan ra cua cuví tsandaa. ² Tyin quivi quitsi yu nu yucú ndo, catyí yu tsihin nyivi javahá tsa ña vaha, tyin jandihí ñi tsa javaha ñi tsa ña vaha. Tan vityin catyí tucu yu inga tsaha tsihin ñi, tan tsihin tandihí ndo, tyin tun cua quitsi yu inga tsaha nu yucú ndo, tan ndi javahá ca ndo tsa ña vaha, ña cua cundaahvi iñi yu nyehe yu tsi ndo. ³ Tacan tan cua coto ndo tsa cuñi xaan ndo coto ndo: Tyin nditsa nditsa tsa caahán ra Cristo tsihin yuhu yu. Tyin ra Cristo cuví ra iin ra iyó tunyee iñi tsi tan iyó ra aña ndo. Tyin iyó xaan tunyee iñi ra tsi ndo. ⁴ Nditsa tyin tsihi ra nu cruu tumaa iin ra nduve tunyee iñi iyó tsi. Maa tyin nandoto ra, tan vityin iyó ra tsihin tunyee iñi Nyoo. Tan tacan tucu nyuhu; vasu ndi maa nduve tunyee iñi maa ndi iyó tsi ndi, maa tyin iin ñi cuví ndi tsihin ra Cristo. Tan iyó ndi tsihin tunyee iñi maa Nyoo tyin tacan tan cuví jatyinyee ndi tsi nyooho.

⁵ Nducu cuhva ndo tsi ndo tun iin iñi ndo tsinú iñi ndo tsi ra Cristo. ¿A ña tsitó ndo tyin iyó ra Cristo aña ndo tun nditsa tsa tsinú iñi ndo tsi ra? ⁶ Maa

tyin cuñí yu tsa coto ndo tyin nyuhu ña vatya ndi. ⁷ Tan tsicán tahvi xaan ndi tsi Nyoo tsa cuenda ndo, tyin tacan tan ña javaha ndo tsa ña vaha. Ña caahán ndi tyehen tyin cuñí ndi catyi nyívi tyin vaha ndi. Caahán ndi tyehen tyin cuñí ndi tsa javaha ndo maa ñi maa tsa vaha. Nduve cuenda ndi tun catyí nyívi tyin vaha ndi o ña vaha ndi. ⁸ Tyin nyaá tsi síqui ndi tsa javaha ndi tsa vaha. Ña cuví tyihi xeehe ndi tsa nditsa. Intuhun ñi tsa cuví javaha ndi, yacan cuví tsa jacuaha ndi tsa nditsa. ⁹ Yacan cuenda síi cuñí ndi tsa nduve tunyee íñi iyó tsi ndi, tan nyee cuñí nyooho tsihin tunyee íñi Nyoo. Tan tacan ñi tsicán tahvi ndi tsi Nyoo tsa cuenda ndo na cunyicun vaha ca ndo tsi ra nda cuanda ña cumañi ca tsa cumañi tsi ndo. ¹⁰ Jaquitsí yu carta ihya tsi ndo tsa ndi cumañi ca quitsi yu nu yucú ndo tyin jánduvaha ndo tsi ndo. Tyin tacan tan ña cua cuñi tsi cuxaan yu tsi ndo quívi tsaá yu nu yucú ndo. Tyin nditsa tsa tsahá Nyoo ndatu tsi yu tsa quíhi ndaha yu tsi ndo. Maa tyin ña tsahá ra ndatu can tsi yu tsa janducuiiya ndihi ca yu íñi ndo. Ñihí yu ndatu can tsa cuenda tsa jatyinyee yu tsi ndo.

¹¹ Yañi, nu ndihi caahán yu ihya, catyí yu tsihin ndo, nducu ndo cuhva ña cumañi tsa cumañi tsi ndo nuu Nyoo. Síi cuñi ndo. Jándu iin ndo íñi ndo. Coo mañi tahan ndo. Tan Nyoo, ra cuñí xaan tsi ndo tan tsahá tsa taxin coo añaíma yo, na cunyaa ra tsihin ndo. ¹² Cuhva tahan ndo nacumi tsi ndo tsihin tsa síi cuñí ndo nyehé ndo tsi ndo. ¹³ Tan jaquitsí tandihi nyívi yíhi cuenda Nyoo ñuu ihya nacumi tsi ndo.

¹⁴ Naquihin ndo tsa vaha coo añaíma ndo jaha Jutu Mañi yo Jesucristo. Tan na coto ndo tyin Nyoo cuñí xaan ra tsi ndo. Tan nacoto tucu ndo tyin iyó Tatyí lí ra tsihin ndo.

Tan na cuví tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Cayucú Galacia

Nu tyaá ra Pablo iin carta tsa cuenda nyivi yihí cuenda Nyoo ñuu cayucú Galacia

¹ Yuhu ra Pablo cuví yu iin ra tsa tava tyiñu ra Jesucristo. Ñavin nyivi jaquitsi tsi yu tyin maa ra Jesucristo tan maa Nyoo Jutu yo jaquitsi tsi yu tan tsaḡa ra tyiñu ihya tsi yu. Tan juvin ra cuví ra tsa janandoto tsi ra Cristo tsa yaha tsihi ra. ² Yuhu tan tsihin tandihi ra yañi yo tsa yucú tsihin yu, tyaá ndi carta ihya tsa cuenda nyooho nyivi yihí cuenda Nyoo tandihi vehe ñuhu iyó ñuu cayucú Galacia. ³ Naquihin ndo tsa vaha tan tsa taxin tsa tsaḡa Nyoo Jutu yo tan Jutu Mañi yo Jesucristo tsi yo coo añima ndo. ⁴ Maa ra Jesucristo nacuhva cuenda ra tsi ra nu cruu tsacatyí cuatyí yo Tan javaha ra tacan tyin maa Nyoo Jutu yo tsa cahan tsihin ra. Tyin tacan tan jacacú ra tsi yo nu yucú yo tsihin nyivi caquiñi iyó nu ñuhu ñayivi ihya. ⁵ Yacan cuenda na jacahnu yo tsi maa Nyoo tacan ñi maa. Tan na cuví tsi tacan.

Nduve ca inga cuhva cuví cacu yo

⁶ Iyo xaan cuñi yu tyin nyooho numi xaan nacoo ndo tsi Nyoo. Juvín ra nacana tsi ndo tyin coo vaha ndo tsihin ra tsa cuenda tsa javaha ra Cristo tsa cuenda yo. Tan vityin siin tuhun tsinú iñi ndo. Cuñi maa ndo tyin cua jacacu yacan tsi ndo. ⁷ Maa tyin nduve ca inga cuhva cuví cacu yo. Vasu ndi maa yihí ra naha jatyañu ra naha tsi ndo. Tan cuñi ra naha jativi ra naha tuhun Nyoo tsa jacacú ra Cristo tsi yo. ⁸ Tun iyó yóo caahán tuhun ra Cristo tsihin ndo tan ña nacatsi tahan can tsihin tuhun tsa cahan ndi tsihin ndo, na cuhun ñi anyaya. Yofñi jaha, vasu maa ndi cuví, o iin ángel quee andivi cuví. ⁹ Tsa yaha cahan yu tuhun ihya tsihin ndo, maa tyin cuñi yu cahan nyico yu itsi tsihin ndo inga tsaḡa. Tatun yóo nyivi caahán tuhun Nyoo tsihin ndo tan siin cuhva caahán ñi, na jacuhun Nyoo tsi ñi anyaya.

¹⁰ Ña caahán yu tacan tsihin ndo tsa cuenda tsa cuñi yu tsa vaha cahan nyivi tuhun yu. Tyin yuhu nducú yu tsa coo vaha yu nuu Nyoo. Tyin tun cuñi yu cuví yu nyivi vaha nuu nyivi, ñavin ra jahá tyiñu tyiñu ra Cristo cuví yu.

Nacaa quitsaha tsicá ra Pablo tyiñu Nyoo

¹¹ Cuñi yu tsa coto ndo yañi, tyin tuhun ra Cristo tsa caahán yu tsihin ndo, ñavin tuhun nyivi cuví tsi. ¹² Ñavin nyivi tsaḡa tuhun ihya tsi yu. Tyin juvin ñi maa ra Cristo jacotó itsi tsi yu.

¹³ Nyooho tsiñi ndo nácaa javaha yu quivi can. Tan tsitó ndo tyin tsinyaa ndaha xaan yu tsi nyivi yihí cuenda Nyoo quivi tsa tsinyi yu cuenda ñi Israel ñuu yu. Tan nducú yu cuhva jandu uvi yu iñi ñi tsinú iñi tsi ra Cristo. ¹⁴ Tan tsicoo yu cuhva iyó ñi Israel, tan yuhu cuví ra cuahán ityi nuu ca tan ñavin ca juhva ra yihí tahan tsihin yu tsa iin ñi cuiya ndi. Tyin yuhu cuñi xaan ca yu javaha yu cuhva javaha tsi saahnu ndi. ¹⁵ Maa tyin tsa ndi cumañi ca cacu yu tan Nyoo tsa nacatsi maa ra tsi yu tyin cuñi xaan ra tsi yu. Tan nda tsa tsaḡa maa quivi tsa tyaḡa ra cuhva, tan nacana ra tsi yu. ¹⁶ Tacan tan janaha ra tsi Sehe ra tsi yu tan nacoto yu tsi ra, tyin tacan tan cuví cahan yu tuhun ra nácaa

jacacú ra tsi yo tshin nyívi tsa ñavin nyívi Israel cuví. Tan quívi can ña nducú yu nyívi jacuaha tsi yu nácaa taahán tsi javaha yu. ¹⁷ Tan ndi ña tsahan yu ñuu Jerusalén nu yucú ra tsa tava tyiñu jihna ra Cristo tsa ñaha ca tava tyiñu ra tsi yu. Maa tyin numi ñi tsahan yu nda Arabia. Tacan tan cuanuhú nyico yu inga tsaha nda ñuu Damasco.

¹⁸ Tsa yaha uñi cuiya tan tsahan yu nda Jerusalén, tan nacoto yu tsi ra Pedro. Tan ndoo yu tshin ra tsahun quívi. ¹⁹ Maa tyin ña nyehe yu tsi inga ra tsa tava tyiñu ra Cristo. Intuhun ñi ra Jacobo yañi Jutu Mañi yo, nyehe yu. ²⁰ Tan nda nuu Nyoo tan caahán yu tshin ndo tyin tuhun tsa tyaá yu nu tutu ihya, tsa nditsa cuví tsi.

²¹ Tsa yaha tsa tsahan yu ñuu Jerusalén tan tsahan yu nda Siria tan nda Cilicia. ²² Tan ra yañi yo tsa yucú vehe ñuhu ra Cristo tsa iyó ñuu tsa cayucú Judea, ña nacoto ra naha tsi yu. ²³ Maa tyin ñihí tuhun ra naha tsa caahán nyívi tuhun yu, tyin catyí ñi: “Ra tsa tsinyaá ndaha tsi yo quívi can, vityin caahán ndihi ra tshin nyívi na tsinu ifñi ñi tsi ra Cristo. Tan quívi can cuñi ra jatívi ra tuhun ra Cristo”, catyí ñi, ñihí tuhun ra naha. ²⁴ Tan jacahnú ra naha tsi Nyoo tsa cuenda tsa javaha Nyoo tshin yu.

2

Ra cuví ityi nuu tshin nyívi vehe ñuhu ñuu Jerusalén, ndoo ra naha vaha cuhva jahá tyiñu ra Pablo

¹ Tsa yaha utsi cumi cuiya, tan tsahan yu ñuu Jerusalén inga tsaha tshin ra Bernabé. Tan tsahan ndihi tucu ra Tito tshin ndi. ² Tsahan yu ndacan tyin maa Nyoo janaha tsi yu tyin taahán tsi tsa cuhun yu. Tan ndacan quita siin yu tshin ra cuví ityi nuu tshin nyívi vehe ñuhu naha ra. Tan tsaha cuenda yu tsi ra naha nácaa tuhvá yu caahán tuhun ra Cristo tshin nyívi tsa ñavin ñi Israel cuví. Tyin tacan tan coto yu tun ndoo ra naha vaha tshin cuhva jacuahá yu. Tyin tun ña ndoo ra naha vaha, cuatu xaan jahá tyiñu yu. ³ Maa tyin ndoo ra naha vaha. Tan ña jañiñi ra naha tsa cunyaa tuñi Nyoo tsi ra Tito, tan ñavin ra Israel cuví ra. ⁴ Nditsa tyin juhva ra naha cuñi ra naha tsa cunyaa tuñi can tsi ra Tito. Tan ra ican naha ra quihví xeehe ra naha nu yucú ndi, tan jahá ra naha tyin yihí ra naha cuenda ra Cristo, maa tyin ña nditsa tyin ra tsacú nducú cuhva iyó nuña yo jahá ra Cristo cuví ra naha. Tan cuñi ra naha tyin taahán tsi tsa cundaca ñaha ley tsahnu tsi yo. ⁵ Maa tyin ndi luxu tan ña tsaha ndi tsa cundaca ñaha ra can naha ra tsi ndi. Tyin ña cuñi ndi tsa jaña ndo tuhun nditsa tsa jacacú ra Cristo tsi yo.

⁶ Maa tyin ra cuví ityi nuu tshin nyívi vehe ñuhu, nduve tuhun tsaa tsaha ra naha tsi yu. Tan vasu cahnu tyiñu nyisó ra can naha ra, maa tyin tsa cuenda yuhu, yoñi jaha. Tyin ña cahnu cuví yo nuu Nyoo vasu ndi maa tsa cahnu tyiñu nyisó yo. ⁷ Ra cuví ityi nuu vehe ñuhu naha ra, nduve inga tuhun tsaha cuenda ra naha tsi yu tyin nacoto ra naha tyin maa Nyoo jaquitsi tsi yu tyin cahan yu tuhun ra Cristo tshin nyívi tsa ñavin nyívi Israel cuví. Tumaa tsa jaquitsi ra tsi ra Pedro tyin cahan ra tshin nyívi Israel. ⁸ Tyin juven ñi maa Nyoo tava tyiñu tsi ra Pedro tyin cahan ra tuhun ra Cristo tshin nyívi Israel. Tan tava tyiñu tucu ra tsi yuhu tyin cahan yu tuhun ra tshin nyívi tsa ñavin nyívi Israel cuví.

⁹ Yacan cuenda ra cuví ityi nuu naha ra, ra Jacobo, ra Pedro tan ra Juan, nacoto ra naha tyin Nyoo tsahá ra tunyee ifñi tsi yu tsa cahan yu tuhun ra Cristo tshin nyívi. Tan tsaha ra naha ndaha ra naha tñin ndi, tshin ra

Bernabé tyin ndoo ra naha vaha tsa cahan ndi tuhun ra Cristo tsihin nyivi tsa ñavin nyivi Israel cuví, tan maa ra naha cahan tucu ra naha tsihin nyivi Israel. ¹⁰ Tan cahan ra naha iin tuhun tsihin ndi, na nducuhun iñi ndi tsi nyivi ndaahvi tan na jatinyee ndi tsi ñi. Tan yacan cuví tsa nducú xaan yu cuhva javahá yu tandihi ñi quivi.

Nu nduxaḡn ra Pablo tsi ra Pedro tyin ña vaha tsa javahá ra

¹¹ Maa tyin quivi tsahan ra Pedro ñuu Antioquía, nuu nuu ra tan cuxaḡn yu tsi ra tyin ña vaha tsa javahá ra. ¹² Tyin tsa jihna ñi vaha javahá ra tyin tsatsi ra tsihin ñi tsa ñavin nyivi Israel cuví. Maa tyin tsa tsaḡ juhva ra Israel naha ra tsa jaquitsi ra Jacobo, tacan tan quitsahaḡ jatsiyó ra tsi ra tan ña cuñi ca ra catsi ra tsihin ñi ícan. Javahá ra tacan tyin yuuhvi ra coto cuxaan ra tsa tsaḡ can naha ra tsi ra tyin ndi nyitá iñi ra can naha ra tuñi Nyoo. ¹³ Tacan tan inga ra Israel tsa yihí cuenda ra Cristo, ndu iin ra naha tsihin ra Pedro. Tan javahá ndihi ra naha tsa ña vaha can. Tyin javahá ra naha tumaa javahá ra Pedro vasu tsitó ra naha tyin ña vaha can. Tan nda cuanda ra Bernabé tan ndu iin ra tsihin ra naha. ¹⁴ Tan nyehe yu tyin ña vaha javahá ra naha. Ñavin tumaa cuhva catyi tuhun ra Cristo. Yacan cuenda cahan yu tsihin ra Pedro nuu tandihi ra yucú ícan: “Yoocho cuví un iin ra Israel. Tan iyó un tumaa iyó nyivi tsa ñavin nyivi Israel cuví. ¿Nacaa tsa cuñi un jañiñi un tsi nyivi tsa ñavin nyivi Israel cuví na coo ñi cuhva iyó ñi Israel? [Tan ndi maa un tan ña javahá un tacan]”, catyi yu tsihin ra.

¹⁵ Maa yo nda ndi cacú yo tan cuví yo ra ñuu Israel ña javahá xaan yo cuatyí tumaa javahá ñi tsa ñavin nyivi Israel cuví. ¹⁶ Maa tyin tsitó yo tyin ña cuví janduvaha yo tsi yo nuu Nyoo tsihin tsa nducú yo cuhva tyaa yahvi yo ley tsahnu tsa tyaa ra Moisés. Tan nduvahá yo nuu Nyoo tsa cuenda tsa tsinú ñi iñi yo tsi ra Jesucristo. Yacan cuenda tsinú iñi yo tsi ra, tyin tacan tan coo vaha yo tsihin ra, tan ñavin tsa cuenda tsa nducú yo cuhva tyaa yahvi yo tsa catyi ley can. Tyin ndi intuhun yo tan ña nduvahá yo nuu Nyoo tsihin tsa nducú yo cuhva javaha yo cuhva catyi ley tsahnu can.

¹⁷ Maa tyin vityin tatun nducú yo cuhva nduvaha yo nuu Nyoo tsa cuenda ra Cristo, cuñi tsi catyi tyin nacoto yo tyin iyó tucu cuatyí yo tumaa iyó cuatyí ñi tsa ñavin nyivi Israel cuví. Tatun tacan, ¿a cuñi tsi catyi tyin iyó cuatyí yo jahá maa ra Cristo tyin nacoto yo tyin iyó cuatyí yo? Ñavin tacan. ¹⁸ Maa tyin tun cua cuita nyico iñi yo ley tsa tsa yahá nacoḡ yo, yacan nditsa cua coo cuatyí yo. ¹⁹ Tyin ley can janahá tsi tsi yu tyin taahan tsi cúu yu tsa catyi cuatyí yu, tan yacan cuenda ña nducú ca yu cuhva cacú yu tsihin ley can, tyin tacan tan cuví coo yu tsa cuenda Nyoo. ²⁰ Yuhu, tumaa tsa iin caa ñi tsihi yu nuu cruu tsihin ra Cristo. Tan ñavin ca maa yu iyó, tyin ra Cristo iyó aña yu vityin. Tan cuhva iyó yu vityin, iyó yu tsihin tsa tsinú iñi yu tsi ra tsa cuví ra Sehe Nyoo. Tyin maa ra cuñi ra tsi yu, tan tsihi ra tsacatyí cuatyí yu. ²¹ Ña cuñi yuhu tyaa tsiyo yu tunyee iñi tsa tsaha Nyoo tsi yo. Tyin tun tsatyin cuví cacú yo jaha ley tsahnu, nduve nacatyí tsihi ra Cristo.

3

Naquihín yo Tatyí Ii Nyoo tsa cuenda tsa tsinú iñi yo tsi ra Cristo

¹ ¡Náa tsa soho iyó nyoocho, nyivi Galicia! ¿Yóo tsa jativi tsi ndo tan ña tyaa yahvi ca ndo tsa nditsa? Catsi xaan tsaha cuenda ndi tuhun ra Jesucristo tsi ndo. Tan cutuñi vaha iñi ndo nacuenta tsihi ra nu cruu. ² Intuhun ñi tsa

cuñí yu nducu tuhun yu tsi ndo. ¿A naquihín ndo Tatyí li Nyoo tsa cuenda tsa javahá ndo tsa catyí ley ra Moisés, a tsa cuenda tsa tsiñi ndo tuhun ra Cristo tan tsinú ifni ndo tsi ra? ³ ¿Nacaa tsa soho xaan iyó ndo vityin? Tan quivi jihna ñi vaha xaan tyaá yahvi ndo tsi Nyoo tsihin tunyee ifni Tatyí li ra. Tan vityin, ¿nacaa cuñí ndo coo ndo tsihin tunyee ifni maa ndo? ⁴ ¿A tsa cuatu ñi nyehe ndo nacaa jatinyeyé Tatyí li Nyoo tsi ndo nu nyehe ndo tundoho? Ñavin tsa cuatu ñi cuví yacan, cuñí yuhu. ⁵ ¿Nacaa tsahá Nyoo Tatyí li ra tsi ndo, tan javahá ra tsa iyo nyehé ndo? Ñavin tsa cuenda tsa nducú ndo cuhva javaha ndo tsa catyí ley tan javahá ra yacan tsihin ndo; javahá ra yacan tyin tsiñi ndo tuhun ra Cristo tan tsinú ifni ndo tsa caahán ra.

⁶ Ra Abraham, tsinú ifni ra tsa cahan Nyoo tsihin ra, yacan cuenda Nyoo naquihín tsi ra tumaa tsatyin vaha ra. ⁷ Yacan cuenda taahán tsi coto ndo tyin nyivi tsa nditsa cuví tata ra Abraham, juven ñi cuví ñi tsa tsinú ifni tsi Nyoo. ⁸ Tan tsanaha ndoo tuhun Nyoo nu tutu. Tan catyí tsi tyin nu cuahán ca tsi quivi, cua janduvaha Nyoo tsi nyivi tsa ñavin nyivi Israel cuví tsa cuenda tsa tsinú ifni ñi tsi ra. Yacan cuenda catyí Nyoo tsihin ra Abraham tsanaha: “Tandihí maa nyivi cua nasoco yu tsi ñi tsa cuenda un”, catyí Nyoo tsihin ra. ⁹ Yacan cuenda ñi tsa tsinú ifni tsi ra Cristo, Nyoo nasocó ra tsi ñi iin caa ñi tsihin ra Abraham, tyin tsinú ifni tucu maa ra.

¹⁰ Nyivi tsa nyitá ifni ley tsa tyaá ra Moisés, cua tatsi tuñi Nyoo tsi ñi. Tyin tuhun Nyoo catyí tsi. “Tandihí nyivi tsa ña tyaá yahvi tandihí ley tsa nyaá nu libru ley Nyoo, cua tatsi tuñi Nyoo tsi ñi.” ¹¹ Tan nditsa tyin yoñi nduvahá jaha Nyoo tsa cuenda tsa nyitá ifni ñi ley can. Tyin tuhun Nyoo catyí tsi: “Ra tsa nduvahá nuu Nyoo tsa cuenda tsa tsinú ifni ra, juven ra cua coo ñayivi tsa ña cua naa maa”, catyí tuhun Nyoo. ¹² Tan ley ra Moisés ña catyí tsi tun taahán tsi tsinu ifni yo. Tyin catyí ley can: “Nyivi javahá tsa catyí ley ihya, coo ñi ñayivi nyito tsa cuenda can”, catyí tsi.

¹³ Ley can catyí tyin taahán tsi cúu yo tsa cuenda cuatyí yo, tan ña ndacá ñaha ca tsi tsi yo tyin ra Cristo tsa tava nuña ra tsi yo. Tan maa ra naquihín tandihí cuatyí yo. Tyin catyí tuhun Nyoo: “Tandihí maa ra tsa ticaá nu yutun, tatsi tuñi Nyoo tsi ra.” ¹⁴ Tacan cuví tyin tsa cuenda ra Cristo Jesús tan nasocó Nyoo tsi nyivi tsa ñavin nyivi Israel cuví, tumaa catyí ra tsihin ra Abraham tyin cua nasoco ra tsi ra. Tan tsa cuenda tsa tsinú ifni yo tsi Nyoo, naquihín yo Tatyí li tsa catyí Nyoo tyin cuhva ra tsi yo.

Ley tsahnu janahá tsi tsi yo tyin iyó cuatyí yo, maa tyin ña jacacú tsi tsi yo

¹⁵ Yañi, cua cahan yu iin cuhva tsihin ndo, cuhva iyó yo nu ñuhu ñayivi ihya. Tatun iin ra tan catyí ra tyin cua cuhva ra tsa cuhva ra tsi inga ra, tan tatun tsa yahá tyihí ra firma ra, yoñi ca cuví quihin nyaa can. Tan yoñi ca cuví natyiso juhva ca siqui can. ¹⁶ Tan Nyoo catyí ra tyin cua cuhva ra tsa cuhva ra tsi ra Abraham tan tsi inga ra tsa cuví tata ra. Ña catyí tsi nu tutu Nyoo tun cuhva ra tsi tandihí ra cuví tata ra, tyin intuhun ñi ra cua cuhva ra. Tan juven ra can cuví ra Cristo. ¹⁷ Tsa caahán yu, cuví tsehe: Nyoo natuhun tahan ra tsihin ra Abraham. Tan ndoo vaha ra tuhun tsihin ra. Tacan tan yahá cumi cientu oco utsi cuiya tan tsaá ley tsa tyaá ra Moisés. Maa tyin ña cuví caní ley can tuhun tsa ndoo Nyoo tsihin ra Abraham. Tan ña cuví casi tsi nu naquihín yo tsa catyí Nyoo tyin cuhva ra tsi yo. ¹⁸ Tun tsatyin tsa cuenda ley ra Moisés tan naquihín yo tsa taahán tsi tsi yo, cuatu xaan ndoo Nyoo tuhun tsihin yo. Maa tyin tsitó yo tyin ñihí ra Abraham tsa ñihí ra tyin tsahá Nyoo tsa catyí ra tyin cuhva ra tsi ra.

¹⁹ Tatun tacan, ¿nacuenda vaha ley ra Moisés? Tsa jihna ñi Nyoo catyi ra tyin cuhva ra tsa vaha tsi ra Abraham. Yaha can tan tsaha ra ley can tsi ra Moisés tan janahá tsi tyin iyó cuatyí yo. Tan ángel Nyoo tsaha cuenda ley can tsi ra Moisés. Tan ra Moisés tsaha cuenda can tsi nyivi. Tan ndoq tsi nda cuanda quivi tsa quitsi ra Cristo, ra cuví tata ra Abraham. Juvín ra cuví ra tsa catyi Nyoo tyin cua cuhva tsa vaha tsi yo. ²⁰ Tan juvín ñi maa Nyoo cahan tsihin ra Abraham quivi can. Tan ña tsiñi ñuhu tsa nducu siin ra iin ra nacatyí tuhun tsihin ra Abraham.

²¹ ¿A cuñi tsi catyi tyin ley tsa tyaq ra Moisés ña nacatsi tahan tsi tsihin tsa catyi Nyoo tyin cuhva ra tsi yo? Ñavin. Tun tsatyin cuvi coo yo ñayivi nyito jaha ley can, cuvi nduvaha yo nuu Nyoo tsa cuenda tsi. Maa tyin ña cuvi. ²² Tyin catyi nu tutu Nyoo tyin iyó cuatyí tandihi nyivi. Tyin tacan tan nyivi tsa tsinú iñi tsi ra Jesucristo cuví ñihi ñi ñayivi nyito tsa catyi Nyoo tyin cuhva ra tsi yo.

²³ Tsa ndi cumañi ca tsinú iñi yo tsi ra Cristo, ley can yihí ndaha tsi yo tumaa tsa tsinyi yo vehe caa. Tacan cuvi nda cuanda janahá Nyoo tsi yo nácaa tan tsinu iñi yo tsi ra. ²⁴ Tan ley can cuví tsi tumaa iin nyivi jahá cuenda tsa nyihí. Tyin jaha cuenda tsi tsi yo nda cuanda quivi quitsi ra Cristo. Tan cuvi tsinu iñi yo tsi ra tan nduvaha yo nuu Nyoo. ²⁵ Tan vityin tsa tsaq quivi tsa tsinú iñi yo tsi ra Cristo, yacan cuenda ña jahá cuenda ca ley can tsi yo.

²⁶ Tyin tandihi yo cuví yo sehe Nyoo tyin tsinú iñi yo tsi ra Cristo Jesús. ²⁷ Tan tandihi yo tsicoondutya yo tan ndu iin yo tsihin ra Cristo, tan nanduvi yo tumaa maa ra. ²⁸ Ña ñiñi xaan ca tsa cuví yo nyivi Israel, a cuví yo nyivi Grecia; a cuví yo musu, a ñavin musu cuví yo; a cuví yo rayii, a ñaha. Yoñi ca caahán tuhun yacan, tyin tsa iin ñi cuví yo tsihin ra Cristo, intuhun ña nyivi cuví yo tsihin ra. ²⁹ Tan tatun cuenda ra Cristo yihí ndo, nditsa tsa tata ra Abraham cuví ndo. Tan ñihí ndo tsa catyi Nyoo tsihin ra Abraham tyin cuhva ra tsi ra.

4

¹ Cua cahan yu iin cuhva tsihin ndo. Tatun iin ra luhlu tan tsihi jutu ra, tan nacoq jutu ra tandihi tsa cuca ra tsi ra, ra luhlu can cua cutyiñu ra can nda cuahnu ra. Tan tsitsi tsa ndi cumañi ca cuahnu ra, cuví ra tumaa iin musu ñi. Vasu tsii maa ra cuví tandihi tsa cuca jutu ra. ² Iyó ra jahá cuenda tsi ra nda cuanda tsa cuviya ra tsa catyi jutu ra tyin cua naquihin ra ndaha tyiñu tsa nacoq ra tsi ra. ³ Tan tacan cuvi maa yo. Tsa ndi cumañi ca quitsi ra Cristo, cuvi yo musu cuhva iyó nyivi iyó nu ñuhu ñayivi ihya. ⁴ Maa tyin quivi tahañ tsi, Nyoo jaquitsi ra tsi Sehe ra. Tan jacacu iin ñaha tsi ra. Tan tsindaca ñaha ley tsahnu Nyoo tsi ra. ⁵ Jaquitsi Nyoo tsi ra tyin jacacu ra tsi yo tsa ña quihí ndaha ca ley tsi yo. Tyin tacan tan naquihín cuenda Nyoo tsi yo tumaa sehe ra.

⁶ Tan tsa cuenda tsa nanduvi yo sehe ra, Nyoo jaquitsi ra Tatyí Ii ra Cristo cunyaa añima yo. Tan tsa cuenda Tatyí Ii ra caná tsa yo tsi Nyoo tan catyi yo: “Tyatya”. ⁷ Yacan cuenda sehe Nyoo cuví yo tan ña cuví ca yo tumaa iin musu. Tan tsa cuenda tsa cuví yo sehe Nyoo, tsahá ra tsa cuca ra tsi yo tsa cuenda ra Cristo.

Tsicá iñi ra Pablo tsa cuenda nyivi yihí cuenda Nyoo

⁸ Tan quivi tsa ñaha ca nacoto ndo tsi Nyoo, cuvi ndo musu tsitoho tsa ñavin Nyoo cuví. ⁹ Maa tyin vityin tsa nacotó ndo tsi Nyoo. Vaha ca catyi yu, maa Nyoo nacotó ra tsi ndo. ¿Nacaa tsa cuñi ndo quihin nyico ndo tuhun ndaahvi

tsa nduve tunyee iñi iyó tsi, tan cuvi nyico ndo musu? ¹⁰ Nyooho ndi jacahnú ca ndo quiví vico, quiví nduyutyá yoo, tan vico tandihí ñi cuiya. ¹¹ Yuuhví xaan yu coto iin tsa cuatu ñi cuví tyiñu jahá yu tsihin ndo.

¹² Yañi, caahán ndaahví yu tsihin ndo çoo ndo tumaa iyó maa yu. Tyin yuhu ña yihí ndaha ca ley tsahnu tsi yu. Tumaa tsa ña yihí ndaha ley tsahnu tsi maa ndo. Tan tsa tacan iyó yu, ña cuñi yu tsa caca iñi ndo tyin jatívi ndo tsi yu. ¹³ Tan tsa tsitó ndo tyin quiví quitsí jihna yu ñuu ndo iyó iin cuehe tsi yu, yacan cuenda ndoo yu juhva quiví tsihin ndo, tan cahan yu tuhun ra Cristo tsihin ndo. ¹⁴ Tan vasu ndi maa tsa cuuhví yu tsihin cuehe can vaha naquihín cuenda ndo tsi yu tan ña tyaa tsiyo ndo tsi yu. Naquihín cuenda ndo tsi yu tumaa tun cuví yu iin ángel tan tumaa tun ra Cristo cuví yu. ¹⁵ Tan vityin çnumaa cuahán tsa sñi xaan cuñi ndo tsihin yu quiví can? Tyin yuhu cuví yu tsandaa tyin quiví can, nda cuanda cuñi ndo tava ndo tinuu ndo tan cuhva ndo tsi yu, tun tsatyin cuví nduvaha yu tsihin yacan. ¹⁶ Tan vityin, ça nanduví yu ra xaan iñi tsi ndo tsa cuenda tsa caahán yu tsa nditsa tsihin ndo? Ñavin.

¹⁷ Nyiví can, cuñi xaan ñi tsi ndo catyí ñi. Maa tyin ña nditsa ñi. Caahán ñi tacan tyin cuñi ñi tsa cunyicun ndo tsi ñi tan ña tsinu ca iñi ndo tuhun caahán yu. ¹⁸ Vaha tsa cuñi yo tsi nyiví, maa tyin cuñi yo tsi ñi tsihin tsa vaha, tan ña cuñi yo tsi ñi tañi ñi cuhva tsa tyin nyíi ñi yu tsihin ndo. ¹⁹ Nyooho ra cuatyí sehe yu, nyehé nyico yu tundoho tan tsa uhví tsa catyí ndo. Tumaa nyehé iin ñaha tundoho tun cua cacu sehe ña. Tacan nyehé yu tundoho. Tan ndi nyaá ca cua nyehe yu tundoho nda cuanda cuahnu ndo tsihin tunyee iñi maa ra Cristo. ²⁰ Vaha xaan tun tsatyin cuví cunyí yu tsihin ndo vityin ihya. Tyin tacan tun cuví nasama yu cuhva cahan yu tsihin ndo. Tyin vityin ña tsitó yu náa caca iñi yu tsa cuenda ndo.

Na coo yo tsa cuenda Nyoo tan ñavin tsa cuenda ley tsahnu

²¹ ¿A ñaha ca cahví ndo tsa caahán ley tsa tsahá Nyoo tsi ra Moisés? tyin cuñi ndo cundaca ñaha can tsi ndo, çatyí tuhun ndo tsihin yu tun ñaha ca cahví ndo can. ²² Catyí tsi tyin ra Abraham tsicoo uvi taahan sehe ra. Tsicoo iin sehe ra tsihin ña Agar tsa cuví musu ñasihi ra. Tan tsicoo inga sehe ra tsihin ña Sara ñasihi vaha maa ra. ²³ Cacú sehe ñaha tsa cuví musu can tumaa cacú tandihí ca maa lee. Maa tyin sehe ñasihi ra Abraham cacú ra tumaa catyí maa Nyoo tsihin ra tyin cua cuví. ²⁴ Tan tuhun can iyó tsa cuñi tsi catyí tsi tsihin yo. Nduví taahan ñi ñaha can cuví ñi tumaa nduví taahan tuhun tsa ndoo Nyoo tuhun tsihin yo. Intuhun tuhun can cuví cuenda yucu Sinaí. Tan nyiví yihí cuenda ley can cuví ñi tumaa ña Agar, tyin iin musu ñi cuví ña tsihin sehe ña. ²⁵ Tumaa ña Agar, tan tumaa yucu Sinaí tsa canyí Arabia, tacan cuví ñuu Jerusalén nda quiví vityin. Tyin nyiví ñuu can yihí ndaha ley tsahnu tsi ñi. Tan cuví ñi tumaa musu ley can. ²⁶ Maa tyin nda gloria iyó inga Jerusalén, tsa cuví ñuu yoo. Tan ñuu can iyó nuña tsi. Yacan cuenda yoo iyó nuña yo tyin ñuu can cuví tumaa sihi yo. ²⁷ Tan catyí tuhun Nyoo tyehen:

Çusí iñi yooho, ñaha tsa ña cuví coo sehe. Yooho tsa nduve sehe iyó.

Çana tsa tsihin tsa sñi cuñi un, tyin ña tsitó un tsa uhví cacú sehe un.

Çusí iñi tyin cua cuhva cuaha ca yu sehe un

tan ñavin ca ñaha iyó yí, catyí tuhun Nyoo.

²⁸ Yañi, yoo cuví yo tumaa ra Isaac, sehe ra Abraham tyin cacú ra cuhva catyí maa Nyoo tsihin jutu ra. ²⁹ Ra sehe ñaha tsa cuví musu can, xaan iñi ra tsi ra Isaac sehe ñasihi ra Abraham. Tacan cuví tucu vityin ihya. Ra tsa

cuñí tyin javaha yo tsa catyí ley, xaan iñi ra naha tsi yo tsa cuví yo nyívi cacú tsa tsihin Tatyí Ii Nyoo. ³⁰ Tan ¿náa catyí tuhun Nyoo? Catyí tsi: “Tava tsiyo tsi ñaha tsa cuví musu can tsihin sehe ña, tyin ña cuví naquihin sehe ña tsa taahán tsi tsi sehe ñaha tsa ñavin musu cuví”, catyí tuhun Nyoo. ³¹ Yacan cuenda, yañi, ña cuví yo tumaa cuví sehe ñaha tsa cuví musu can. Tyin cuví yo tumaa cuví sehe ñasihi ra Abraham, tyin ñavin musu cuví yo. [Tan Nyoo naquihin cuenda ra tsi yo tyin tsinú iñi yo tsi ra tan ñavin tsa cuenda tsa tyaá yahvi yo ley tsahnu.]

5

Na tyaá yahvi yo tuhun ra Cristo tan ña cuhva yo cundaca ñaha ley tsahnu tsi yo

¹ Ra Cristo tsa yaha jacacu ra tsi yo ndaha ley tsahnu can. Yacan cuenda jaha ndo cuenda tsi ndo, coto nanduvi ndo musu inga tsaha.

² Tyaá soho ndo, yuhu ra Pablo caahán tsihin ndo. Taton cuhva ndo tsa cunyaa tuñi Nyoo tsi ndo tan cuñi ndo tyin cua jacacu yacan tsi ndo, ña cua cuví jatyinyee ra Cristo tsi ndo. ³ Cuñi yu cahan yu tsihin ndo inga tsaha tuhun ihya: Tandihí ra tsa cuñi cacu tsihin tsa cunyaa tuñi Nyoo tsi ra naha, cuñi tsi javaha ra naha tandihí maa tsa catyí ley ra Moisés. ⁴ Tandihí nyooho tsa nducú nduvaha nuu Nyoo tsihin tsa javaha ndo cuhva catyí ley can, tsa quita tsiyo ndo nuu ra Cristo. Tan jaña ndaha ndo tsa vaha tsa tsahá Nyoo tsi ndo. ⁵ Maa tyin yoo tsihin tsa jatyinyeé Tatyí Ii Nyoo tsi yo tan tsinú iñi yo tsi ra Cristo, tan nyitá iñi yo nduvahá yo nuu Nyoo. ⁶ Tyin tatun iin ñi cuví yo tsihin ra Cristo Jesús, yoñi jaha tun nyaá tuñi Nyoo tsi yo, o nduve. Tyin cahnu ca cuví tsa tsinú iñi yo tsi ra Cristo. Tan tsihin tsa tsinú iñi yo cuví coo yo, tan cuñi tahan ca yo tsi yo.

⁷ Nyooho vaha xaan cuahán ndo quívi can. ¿Tan vityin yóo jandu uvi iñi ndo? Tan ña tyaá yahvi ca ndo tsa nditsa. ⁸ Tuhun tsa janahá ñi can, ñavin tuhun Nyoo, ra tsa caná tsi yo, cuví can. ⁹ Tyin tumaa ndaá yutsan paan jahá luxu ñi yutsan iya, tacan cuví iin nyívi caquiñi, cuaha ca nyívi cuví jatívi ñi. ¹⁰ Nyoo cua tatsi tuñi ra tsi nyívi jandu uvi iñi ndo. Nduve cuenda ra yóo ñi cuví ñi. Maa tyin yuhu tsitó vaha yu tyin Jutu Mañi yo cua jatyinyee ra tsi ndo tan ña cua tyaá iñi ndo inga cuhva tsa ña janahá yu tsi ndo.

¹¹ Tan tsa cuenda yuhu, yañi, tun tsatyin catyí yu tyin ra tsinú iñi tsi ra Cristo cuñi tsi tsa cunyaa tuñi Nyoo tsi ra, ra Israel can naha ra ña cua cunyaa ndaha ra naha tsi yu. Tan ña ndasi cua cuñi ra naha tsa caahán yu tuhun ra Cristo, ra tsa tsihi nu cruu tsacatyí cuatyí yo. ¹² Maa tyin ra tsa cuñi jandu uvi iñi tsi ndo, vaha taxin ca na quita tsiyo ra naha nu yucu ndo, tyin tacan tan ña cua cuví ca jandu uvi iñi ra naha tsi ndo.

¹³ Nyooho, yañi, caná Nyoo tsi ndo tsa ña cundaca ñaha ca ley tsi ndo. Tan ñavin tsa cuenda tsa iyó nuña ndo tan cuví javaha ndo náa ndihí tsa cuñi cuñu ñuhu ndo. Maa tyin taahán tsi tsa jatyinyee tahan ndo tsi ndo tsa cuenda tsa cuñi tahan ndo tsi ndo. ¹⁴ Tyin iyó iin ley Nyoo, tan catyí tsi: “Cuñi tahan ndo tsi ndo tumaa cuñi ndo tsi maa ndo”, catyí tsi. Tan tatun nditsa tsa cuñi tahan yo tsi yo, tsa javahá ndihí yo tandihí ca tsa caahán ley tsahnu. ¹⁵ Jaha ndo cuenda tyin tatun caahán nyaá tahan ndo tsi ndo tan ndasi cuñi ndo nyehe tahan ndo tsi ndo, cua tiví nu yucú ndo.

Cuhva cuñi cuñu ñuhu yo tan cuhva iyó yo tsihin Tatyí Ii Nyoo

¹⁶ Tsa cuñí yu cahan yu tsihin ndo cuví tuhun ihya: Ço ndo tsihin tunyee iñi Tatyí Ii Nyoo. Tacan tan ña cua javaha ca ndo tsa ña vaha tsa cuñí cuñu ñuhu ndo. ¹⁷ Tyin tsa javahá yo tsa ña vaha tsa cuñí cuñu ñuhu yo, ñavin cuhva cuñí Tatyí Ii Nyoo javahá yo. Tyin Tatyí Ii Nyoo cuñí tsi tsa javahá yo tsa vaha. Tan cuñu ñuhu yo ña cuñí tsi javahá tsi cuhva cuñí Tatyí Ii Nyoo. Tsa cuñí Tatyí Ii Nyoo cañí tahan can tsihin tsa cuñí cuñu ñuhu yo. Yacan cuenda yíi javaha yo tsa cuñí yo javaha yo. ¹⁸ Maa tyin tatun tsahá yo tsi yo tsa jaquihin ityi Tatyí Ii Nyoo tsi yo, ña cua cundaca ñaha ca ley tsahnu tsi yo.

¹⁹ Ña yíi nacoto yo tsi nyívi javahá cuhva cuñí cuñu ñuhu ñi. Yihí rayíi, iyó ñasíi ra naha tan iyó inga ñaha tsi ra naha. Tan yihí ñiñaha iyó yíi ñi tan iyó inga rayíi tsi ñi. Tan yihí rayíi quixí ra tsihin ñaha tan ña cuñí ra tindaha ra tsihin ña, tan juvin ñi tacan javaha juhva ñiñaha. ²⁰ Yihí ñi jacahnú ñi tsitoho. Yihí ñi tasi ñi. Yihí ñi ndasi cuñí ñi nyehe ñi nyívi. Yihí ñi cañí tahan ñi. Yihí ñi cuiñu ñi. Tan yihí ñi iin yaha ñi cuxaan ñi. Yihí ñi tsicá iñi ñi maa ñi tsa vaha tsi maa ñi. Tan yihí ñi natahví sava ñi nu yucu ñi tyin cañí tahan ñi. Tan tacan tan quita sín ñi. ²¹ Tan yihí ñi nyiyó iñi ñi tsa iyó tsi inga nyívi. Tan yihí ñi tsahñí tahan ñi. Tan yihí ñi tuhva ñi tsiñi. Tan yihí ñi cuaha xaan tsatsí ñi. Tan javahá ñi cuaha ca tsa javahá ñi. Tan caahán yu tsihin ndo tumaa tsa cahan yu tsihin ndo quiví can. Tyin tandíhi ñi tsa javahá yacan, ña cua cuví naquihin cuenda ñi nu ndacá ñaha Nyoo.

²² Maa tyin tsa tsahá Tatyí Ii Nyoo tsi yo, cuví tsa cuñí yo tsi Nyoo tan tsi nyívi, tsa síi cuñí yo, tsa taxin cuñí añima yo, tsa nyee xaan iñi yo, tsa vaha iñi yo, tsa vaha nyívi cuví yo, tsa ña cundíhi iñi yo javahá yo tsa vaha tsihin nyívi, tsa tsinú iñi yo tsi ra Cristo. ²³ Tan inga tsa tsahá Tatyí Ii Nyoo tsi yo, yacan cuví tsa ndaahvi jahá yo tsi yo, tsa ña javahá yo cuhva cuñí cuñu ñuhu yo. Tatun javahá yo tandíhi tsa vaha ihya, ndi intuhun ley tan ña cua cuví catyi tsi tyin iyó cuatyí yo. ²⁴ Tan yoo tsa yihí cuenda ra Cristo Jesús, tsa yaha jandíhi yo tuhun tsa javaha yo tsa ña vaha tsa cuñí cuñu ñuhu yo. ²⁵ Tan tumaa tsa iyó yo ñayívi nyito tsa cuenda Tatyí Ii Nyoo, tacan cuñí ndíhi tucu tsi tsa tyaá yahvi yo tsa janahá ra tsi yo.

²⁶ Na ña cahnu jaha yo tsi yo. Tan ña jacañi tahan yo tsi nyívi. Tan na ña nyiyo iñi yo tsa tsii inga nyívi.

6

Taahán tsi jatyinyee tahan yo tsi yo

¹ Yañi, tatun nyehé ndo javahá iin ra yañi yo cuatyí, nyooho tsa ñihi nyaá Tatyí Ii Nyoo tsihin, jatyinyee ndo tsi ra na nduvaha ra inga tsaha. Maa tyin cuñí tsi cahan vii ndo tsihin ra tsihin tsa vita iñi ndo. Tan cuñí tsi jahá xaan ndo cuenda tsi ndo coto nducu cuhva ndíhi nu ña vaha tsi ndo. ² Na jatyinyee tahan yo tsi yo náa tundoho taahán yo. Tyin tatun javahá yo tacan, cuñí tsi catyi tyin tyaá yahvi yo tsi ra Cristo.

³ Tatun ndáa yo cuñí maa yo tyin cahnu nyívi cuví yo, tan nduve náa cuví yo, juvin ñi tsi maa yo jandaví ñaha yo. ⁴ Na jaha jihna yo cuenda tatun vaha tsa javahá yo. Tacan tan coto yo tatun vaha javahá yo tan cusí iñi yo. Tan ña taahán tsi nyehe yo náa javahá inga nyívi. ⁵ Tyin intuhun intuhun maa yo tan taahán tsi cunyee iñi yo cuiso yo tsa taahán tsi tsi yo.

⁶ Tan cuñí tsi tsa jatyinyeé ndo tsi ra jacuahá tuhun Nyoo tsi ndo. Cuhva ndo náa tsiñí ñuhu tsi ra.

⁷ Tan ña jandavi ñaha ndo tsi juven ñi maa ndo. Tyin Nyoo yoñi cuví vacu nducu tsi ra. Tyin tandihí tsa tatsí nyívi, yacan cua naquihin ñi. Tyin tatun javahá ñi tsa vaha, tsa vaha cua naquihin ñi. ⁸ Tacan tucu tatun iin nyívi tan javahá ñi tsa ña vaha tsa cuñí cuñu ñuhu ñi, juven ñi maa tsa javahá ñi cua jatívi tsi ñi. Maa tyin tatun javahá ñi cuhva cuñí Tatyí Ii Nyoo, Tatyí Ii Nyoo cua cuhva ñayívi nyito tsa ña cua naa maa coo ñi. ⁹ Yacan cuenda janyee ndo iñi ndo javaha ndo tsa vaha. Tyin tatun ña jandihí yo tsa javahá yo tacan, cua naquihin yo tsa vaha na tahan tsi quívi. ¹⁰ Yacan cuenda tandihí ñi tsaha tsa cuví javaha yo tsa vaha, na javaha yo itsi tsihin tandihí ñi nyívi. Tan tsa jihna ñi taahán tsi javaha yo tsa vaha tsihin nyívi yihí cuenda Nyoo.

S# xaan cuñí ra Pablo tyin nyehé ra tundoho tsa cuenda ra Cristo

¹¹ Nyehe ndo tsa nahnu letra tyaá yu tsihin ndaha yu nu tutu ihya vityin. ¹² Ra tsa jañiñí tsi ndo tsa cunyaa tuñi Nyoo tsi ndo, tacan javahá ra naha tyin cuñí ra naha na catyí nyívi tyin vaha xaan ra naha. Tan ña cuñí ra naha nyehe ra naha tundoho tsa cuenda ra Cristo, ra tsa tsihí nu cruu tsa cuenda yo. ¹³ Tyin ndi maa ra tsa nyisó tuñi Nyoo tan ña tyaá yahvi ra naha tandihí tsa caahán ley. Cuñí ra naha tsa cunyaa tuñi Nyoo tsi nyooho. Tyin tacan tan cuví jacahnu ra naha tsi maa ra naha tyin javahá ndo cuhva caahán ra naha. ¹⁴ Maa tyin yuhu ña cuñí yu cu iyo iñi yu tsi yu tsa cuenda náa ndihí tuhun. Maa tyin cu iyo iñi yu tyin tsihí Jutu Mañi yo Jesucristo nu cruu tsa cuenda yu. Tan maa ra ndacá ñaha tsi yu, tan ña cuñí ca yu tsa iyó ñuu ñayívi ihya tyin ña ndaca ñaha ca yacan tsi yu. ¹⁵ Tyin tatun nyícún yo tsi ra Cristo Jesús, ña ñiñi xaan ca tsa cunyaa o tsa ña cunyaa tuñi Nyoo tsi yo. Tyin tsa ñiñi ca cuví, tsa nanduví yo iin nyívi tsa tsa cuenda ra. ¹⁶ Tandihí nyooho tsa iyó tacan, naquihin ndo tsa taxin coo aña ndo. Tan na cundaahvi iñi Nyoo nyehe ra tsi tandihí ndo, tyin nditsa tsa cuví ndo nyívi cuenda ra.

¹⁷ Vityin tan nu cuahán tsi ityí nuu, ndi intuhun ndo tan ña cua cuhva ca ndo tsihí tsi yu. Tyin tandihí paa tsa nyecú cuñu ñuhu yu, cuñí tsi catyí tsi tyin nditsa tsa cuví yu iin ra tsicá tyiñu Jutu Mañi yo Jesús.

¹⁸ Yañi, na nasoco Jutu Mañi yo Jesucristo tsi tandihí ndo. Tan na cuví tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Éfeso

Nu quitsahá javahá ra Pablo carta

¹ Yuhu ra Pablo cuví yu iin ra tsicá tyiñu ra Jesucristo tyin tacan cuñí maa Nyoo. Nyooho nyivi ñuu Éfeso tsa yihí cuenda Nyoo tan tsinú iñi ndo tsi ra Cristo Jesús, jaquitsí yu carta ihya tsi ndo. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Tsa iin ñi cuví yo tsihin ra Cristo, Nyoo nasocó xaan ra tsi yo

³ Na jacahnu yo tsi Nyoo, jutu ra Jesucristo Jutu Mañi yo. Tyin nasocó xaan ra tsi yo tsihin tandihí nuu tsa vaha tsa iyó gloria tsa cuenda tsa iin ñi cuví yo tsihin ra Cristo. ⁴ Tsa ndi cumañi ca javaha ra ñuhu ñayivi tan nacatsj ra tsi yo tyin ndu iin yo tsihin ra Cristo. Tyin tacan tan cuiti coo yo nuu ra tan ña coo ca cuatyí yo. ⁵ Tsa cuenda tsa cuñí ra tsi yo, tyaa ra cuhva tahañ tsanaha tyin nanduvi yo sehe ra tsa cuenda ra Jesucristo. Tacan javahá ra tyin tacan cacu iñi maa ra. ⁶ Yacan cuenda taahán tsi jacahnu xaan yo tsi ra, tyin tsahá ra tsa vaha tsa iyó tsi ra tsi yo nu jandu iin ra tsi yo tsihin Sehe ra, ra tsa cuñí xaan ra. ⁷ Nyoo cuñi xaan ra tsi yo. Tan yacan cuenda tyahvi ra tsihin niñi Sehe ra tsa cuenda cuatyí yo. Tan jahá ra tucahnu iñi tsi yo. Tan tavá nuña ra tsi yo. ⁸ Tan tsa janahá ra tsi yo tyin cuñi xaan ra tsi yo, tsahá ra tsa nyityi ra tan tsa tsiñi tuñi ra coo tsi yo. ⁹ Tan tsahá ra tsa nacotó yo tuhun tsa tyihj ra cuhva tahañ tsanaha tyin javaha ra tsihin ra Cristo. Tan tandihí tuhun can tsicumj xeehe ra tan ña jacotó ra can tsi nyivi tahañ tsanaha. ¹⁰ Maa tyin tsa cua tahañ tsi quivi cundaa tuhun tsa tyihj ra cuhva, cua jandu iin ra tandihí tsa iyó nu ñuhu ñayivi ihya tan andivi, tan cua nacuhva cuenda ra tandihí can tsi ra Cristo tyin quihí ndaha ra.

¹¹ Tan tsa cuenda tsa iin ñi cuví yo tsihin ra Cristo, ñihí ndihí yo tsa ñihí ra, tyin maa Nyoo cuñi tacan. Yacan cuenda nacatsj ra tsi yo, tyin tacan tyihj ra cuhva tyin javaha ra tyin maa ra javahá tandihí cuhva nyehé ra tyin vaha. ¹² Javahá ra tyehen tyin nyuhu tsa natsinu jihna iñi tsi ra Cristo jacahnu ndi tsi Nyoo tsa cuenda tsa cahnu cuví ra. ¹³ Tan tacan tucu nyooho natsinu iñi ndo tsi ra Cristo, tan ndu iin ndo tsihin ra quivi tsa tsiñi ndo tuhun Nyoo tsa cuví tsa nditsa, tan nácaa jacacú ra tsi yo. Tan tsahá ra Tatyí Ii ra coo añima ndo, tumaa catyi ra tyin cua javaha ra tan yacan cuñi tsi catyi tyin cuví ndo nyivi yihí cuenda ra. ¹⁴ Nyoo jihna ca Tatyí Ii ra tsahá ra tsi yo tyin tacan tan cuita iñi yo tandihí ca tsa cua cuhva ra tsi yo quivi jandu iin ra tandihí nyivi tsa cua cacu. Tyin tacan tan jacahnu yo tsi ra, tyin cahnu xaan cuví ra.

Nu tsicán ra Pablo tsi Nyoo na cuhva ra tsa tsiñi tuñi tsi nyivi tsa tsinú iñi

¹⁵⁻¹⁶ Yacan cuenda, tsa ñihj tuhun yu tyin tsinú vaha iñi ndo tsi Jutu Mañi yo ra Jesucristo, tandihí ñi tsaha tsa tsicán tahvi yu tsi ra tan tsahá yu tyahvi nyoo tsi ra tsa cuenda ndo tan tsa cuenda tyin cuñi tahañ xaan ndo tsi ndo tsa yihí ndo tuhun Nyoo. ¹⁷ Tsicán yu tsi Nyoo Jutu ra Jesucristo, ra cuví Nyoo Jutu yo tsa cahnu ca cuví, tyin na cuhva ra tsa cutuñi iñi ndo tsa janahá ra tsi yo tsihin Tatyí Ii ra, tacan tan nacoto vaha ca ndo tsi ra. ¹⁸ Tan tsicán yu tsi ra, na cuhva ra tsa cutuñi vaha iñi ndo, tyin tacan tan coto ndo nacuenda cana

ra tsi ndo, tan náa cuví tsa cua cuhva ra tsi ndo ityi nuu ca tyin tsa cua cuhva ra tsi nyívi cuenda ra, sîi xaan caá can tan cuca xaan can. ¹⁹ Tan cahnu xaan cuví tunyee íñi tsa iyó tsi ra, tan ña cuví cutuñi íñi yo nácaa tsa cahnu cuví can. Tan yacan cuví tsa jahá tyiñu tsihin yoo tsa tsinú íñi tsi ra. Tan juvin ñi maa tsihin tunyee íñi cahnu can ²⁰ janandoto Nyoo tsi ra Cristo. Tan tyaá ra tsi ra xiin cuaha ra nda gloria. ²¹ Tan yacan cuví nu jacahnu xaan ca Nyoo tsi ra Cristo tan ñavin ca tandihí ca ra ndacá ñaha nu ñuhu ñayívi ihya tan nda andívi. Tyin yoñi yóo ra cahnu ca cuví ñuu ñayívi ihya tan ndi ñayívi tsa cua coo, tyin intuhun ñi maa ra Cristo cuví ra cahnu ca cuví. ²² Tan tandihí cuii maa tsa iyó tsahá Nyoo tyin cundaca ñaha ra Cristo. Tan tsahá Nyoo tsa cuví ra jíñi tsihin nyívi tsa yihí cuenda ra. ²³ Tyin yoo, tsa yihí yo cuenda ra, cuví yo cuñu ñuhu ra. Tan maa ra tsihin yo cuví tsi intuhun ña cuñu ñuhu. Tan juvin maa ra janduní ra tandihí tsa iyó.

2

Jacacú Nyoo tsi yo tsa cuenda tsa cuñi ra tsi yo

¹ Nyoo tsahá ra ñayívi nyito coo ndo quívi ndu iin ndo tsihin ra Cristo. Maa tyin tsa ndi cumañi ca tsinu íñi ndo tsi ra Cristo ña nyito añima ndo tyin ndi iyó cuaha cuatyí ndo. ² Tan quívi can ndi javahá ndo cuhva javahá nyívi ña tsitó tsi Nyoo. Ndi tyaá yahví ndo tsi nu ña vaha tsa ndacá ñaha tsi nu tatyí ña vaha tsa natyuhú tsi nyívi tsa ña tyaá yahví tsi Nyoo. ³ Tan juvin ñi tacan tsicoq tucu yo quívi can, tyin javahá yo tsa ña vaha tsa cuñi cuñu ñuhu yo tan cuhva tsicá íñi yo. Tan tsa cuenda tsa javahá yo tacan, taahán tsi tatsi tuñi Nyoo tsi yo iin caa ñi tsihin tandihí ca nyívi tsa javahá tsa ña vaha. ⁴ Maa tyin Nyoo cundaahví xaan íñi ra nyehe ra tsi yo tsa cuenda tsa cuñi xaan ra tsi yo. ⁵ Tan vasu tsa tsihi añima yo jahá cuatyí yo, Nyoo janandoto ra añima yo tan tsahá ra ñayívi nyito coo yo nu jandu iin ra tsi yo tsihin ra Cristo. Tan cacú yo jahá tsa cuñi xaan Nyoo tsi yo. ⁶ Tan tsa janandoto ra tsi yo iin caa ñi tsihin ra Cristo Jesús tyaá ra tsi yo tsihin ra nda gloria. ⁷ Tan javahá Nyoo tyehen tyin tacan tan nu cuahán ca tsi ityi nuu cua coto tandihí ca tsa cua coo tyin vaha xaan íñi ra tsihin yo tan cahnu xaan tumañi íñi tsahá ra tsi yo tsa cuenda ra Cristo Jesús. ⁸ Tyin tsa cuenda tsa vaha tsa tsahá Nyoo tsi yo tan cacú yo. Tan ñihí yo tumañi íñi ihya jahá tsa tsinú íñi yo tsi ra Cristo. Tan ñavin tsihin tsa javahá yo tan ñihí yo can, tyin maa Nyoo tsahá can tsi yo. ⁹ Ñavin tsihin tsa javahá yo tsa vaha tan cuví cacu yo. Yacan cuenda ndi intuhun yo tan ña taahán tsi cu iyo íñi yo tyin cacú yo tsihin tsa javahá yo tsa vaha. ¹⁰ Nyoo janduvahá ra añima yo tsihin tsa ndu iin yo tsihin ra Cristo Jesús. Tacan javahá ra tyin tacan tan javaha yo tsa vaha, tyin nda tsanaha tan tyaá ra cuhva tyin coo yo tacan.

Cuví yo nyívi Israel, a cuví yo nyívi inga ñuu, maa tyin tsa cuenda ra Cristo iin ñi nyívi cuví tandihí yo

¹¹ Catyí ra Israel naha ra tyin ña vaha nyoocho tsa ñavin nyívi Israel cuví, tyin ña tsinyaá tuñi Nyoo cuñu ñuhu ndo tumaa maa ra naha. Cuñi maa ra naha tyin vaha ra naha nuu Nyoo tan nyoocho ña vaha ndo. ¹² Tan nducuhun tucu íñi ndo tyin nu quítsi tsi tahán tsanaha, nduve ra Cristo iyó añima ndo. Tan ndi ña iin ñi cuví ndo tsihin nyívi Israel. Tan ña tsitó ndo tsihin tsa ndoq Nyoo tsihin ra Abraham tan tsihin nyívi tata ra. Tyin iyó soho ñi maa ndo quívi can, tan nduve Nyoo nyaá tsihin ndo. Yacan cuenda nduve náa cua

ñihi ndo. ¹³ Tyin ndi luxu tuhun Nyoo tan ña tsitó ndo taħan tsanaha, maa tyin vityin ndu iin ndo tsihin ra Cristo Jesús tyin quitsi ra tsati ra ñiñi ra tsa cuenda ndo. ¹⁴ Tyin juvin ra Cristo tsaħa tsa taxin coo yo tan jandu iin ra tsi nyooħo tsa ñavin nyivi Israel cuví tsihin nyuhu tsa cuví nyivi Israel. Vityin iin ña nyivi cuví yo, tyin jandihí ra tsa xaan cuñi yo nyehé tahan yo tsi yo. ¹⁵ Tan tsa quitsi ra Cristo tsihi ra nu cruu, tsindihí tuhun tsahnu tsa iyó ndi tsa tyasi nu ndu iin ndi tsihin ndo, tan jandu iin ra tsi ndo tsihin ndi. Tan vityin iin ña nyivi cuví yo nuu ra, tan iyó yo tsihin tsa taxin. ¹⁶ Tan tsihin tsa tsihi ra nu cruu tsindihí tsa ña caahán tsihin tahan yo, tan nacoo vaha yo tsihin Nyoo jahá ra, iin ña nyivi cuví yo vityin.

¹⁷ Ra Cristo quitsi ra caħan ra tyin cuví coo vaha yo tsihin Nyoo tan tsihin tahan yo: Caħan ra tsihin ndi tsa cuví ndi nyivi Israel tsa tsa tsitó maa tuhun Nyoo tan tsihin nyooħo tsa ña tsitó ndi luxu maa tuhun Nyoo taħan tsanaha. ¹⁸ Tan tsa cuenda tsa quitsi ra Cristo tsihi ra nu cruu, nduyatyin nyecú yo tsihin Nyoo Jutu yo. Tyin iin ñi Tatyí li ra iyó ańima yo: a cuví yo nyivi Israel, o ñavin nyivi Israel cuví yo. ¹⁹ Yacan cuenda nyooħo ñavin ca nyivi inga ñuu cuví ndo, tyin iin ña nyivi cuví ndo tsihin nyivi yihí cuenda Nyoo. Tan cuví ndo nyivi maa ra. ²⁰ Tan cuví ndo tumaa iin vehe. Tan nyecú ndo nu sama ra tava tyińu ra Cristo tan ra ndusu yuhu Nyoo. Tan yuu tsa nyecú ndo tsata, yacan cuví ra Cristo Jesús. ²¹ Tan tsata yuu tsa cuví ra Cristo, si xaan cua quita vehe tsa ndi cuahán tsinú, tyin tandihí maa yo cuví nama vehe tsa ndi tsinú can. Tan tsa cua quita tsi, cua cuví tsi iin vehe ñuhu ii tan cua ndu iin tsi tsihin Jutu yo Nyoo. ²² Tan tacan tucu nyooħo ndu iin ndo tsihin tandihí nyivi yihí cuenda ra Cristo jahá Tatyí li ra, tyin tacan tan cua cuví ndo vehe nu coo Nyoo.

3

Nyoo tava tyińu tsi ra Pablo tyin caħan ra tuhun ra Cristo tsihin nyivi tsa ñavin nyivi Israel cuví

¹ Yacan cuenda yuhu ra Pablo nyii yu vehe caa ihya tyin jacotó yu tuhun ra Cristo Jesús tsi nyooħo tsa ñavin nyivi Israel cuví. ² Taahán tsi coto ndo tyin cahnu xaan tunyee ińi tsaħa ra tsi yu tsa cuenda tsa vaha tsi ndo, tyin jacotó yu tuhun ra tsi ndo. ³ Tan Nyoo janaha ra tuhun xeehe tsa tsicumí ra tsi yu, tan tyaá yu juhva tuhun can nu carta ihya tyin coto ndo. ⁴ Tan tsa cua cahvi ndo tuhun tsa tyaá yu ihya cua coto ndo nácaa tsaħa Nyoo tyin cutuńi ińi yu tuhun ra Cristo tsa tsicumí xeehe ra. ⁵ Tyin nu quitsi tsi taħan tsanaha, ña janaha Nyoo tuhun xeehe can tsi nyivi, tumaa tsa janaha Tatyí li ra tuhun can tsi ra tava tyińu ra Jesucristo tan ra cuví ndusu yuhu Nyoo. ⁶ Tan tuhun xeehe can, cuñi tsi catyi tyehen: Nyivi tsa ñavin nyivi Israel cuví cua ñihi ndihí ñi tsa cua ñihi nyivi Israel tyin iin ña cuńu ñuhu cuví yo vityin tsa cuenda tsa jacacu ra Cristo tsi yo. Tan cua ñihi yo tsa catyi Nyoo tyin cuhva ra tsi yo tyin natsinú ińi yo tsi maa ra Cristo Jesús.

⁷ Nyoo tsaħa ra tsa vaha tsi yu tan jatyinyeé ra tsi yu tyin tacan tan jacoto yu tuhun vaha ihya tsi nyivi. ⁸ Yuhu luhlu xaan ra cuví yu tan ñavin ca tandihí nyivi tsa yihí cuenda Nyoo. Maa tyin Nyoo tsaħa ra tumańi ińi cahnu ihya tsi yu tyin caħan yu tuhun ra Cristo tsihin nyivi tsa ñavin ñi Israel cuví. Tyin na coto ñi tsa cuca tsa cua cuhva ra Cristo tsi ñi. ⁹ Tava tyińu Nyoo tsi yu na jacoto yu tsi tandihí nyivi nácaa tyaá ra cuhva tsa cua javaha ra tsa ndi cumańi ca

javaha ra tandihí tsa iyó, tyin tsanaha ña jacoto ra tuhun tsa tsicumí xeehe ra tsi nyívi. ¹⁰ Tacan cuví tan vityin tandihí ra ndacá ñaha nda andívi cua nyehe tsa vaha tsa javahá Nyoo tsihin yo tsa cuví yo nyívi yihí cuenda ra. Tan cua coto ra naha tyin iyó xaan tsa tsífi tuñi tsi Nyoo. ¹¹ Tandihí tuhun ihya nacatsí tahan tsi tsihin tsa tyaá Nyoo cuhva tyin javaha ra tsihin Jutu Mañi yo Jesucristo tsa cuenda tsa vaha tsi yo. ¹² Tan tsa cuenda tsa tsinú iñi yo tsi ra Cristo, tsahá Nyoo ndatu tsi yo tsa cunyanaa ca yo tsi ra. Yacan cuenda ña yuuhví yo natuhvá yo nu nyaá ra. ¹³ Tan tsa cuenda tsa tsahá ra ndatu can tsi yo caahán ndaahvi yu tsihin ndo na ña ndu uvi iñi ndo tsa nyehé yu tundoho tsa cuenda ndo. Tyin tsa tyehen nyehé yu tundoho tsa cuenda ndo, tsa vaha tsi maa ndo cuví can.

Tsicán tahvi ra Pablo tyin na nacoto vaha ca nyívi tsi ra Cristo

¹⁴ Tan tsa cuenda tsa nducuhun iñi yu tumañi iñi tsa javahá Nyoo, Jutu ra Jesucristo Jutu Mañi yo tsihin yo, tsicuíñi tsiti yu nuu ra. ¹⁵ Tyin juvin ra cuví Jutu tandihí nyívi: ñi tsa cuahán andívi, tan ñi tsa yucú nu ñuhu ñayívi ihya. ¹⁶ Tan tsicán yu tsi ra na jandunyeexaan ra iñi ndo tsihin Tatyí Ii ra tsa iyó añima ndo. ¹⁷ Tan na coo ra Cristo añima ndo tsihin tsa tsinú iñi ndo tsi ra. Tacan tan cua cuñi xaan ndo tsi tandihí nyívi, tyin nyanaá vaha ndo tsi Nyoo. ¹⁸ Tacan tan cua cutuñi vaha iñi ndo tsihin tandihí ñi yihí cuenda ra nácaa tsa cahnu xaan tsa cuñi ra Cristo tsi yo. Tan ndi ña cua ñihi ndo cuhva nacatyí tuhun ndo tsihin nyívi nácaa tsa cuñi ra tsi ndo. ¹⁹ Tsicán yu tsi Nyoo na coto ndo nácaa tsa cahnu xaan tsa cuñi ra tsi ndo. Nyoo nyaá maa ra tsihin ndo.

²⁰ Tan vityin na jacahnu yo tsi Nyoo, ra tsa iyó xaan tunyee iñi tsi. Tan cuaha xaan ca tsa cuví javaha ra tan ñavin ca cuhva tsa tsicán yo tsi ra, a cuhva tsa tsicá iñi yo. Tyin juvin ñi tsihin tunyee iñi maa ra tsa tsahá ra tsi yo, javahá ra tandihí. ²¹ Yoo tsa cuví yo nyívi tsinú iñi tsi Nyoo, na jacahnu yo tsi ra tacan ñi maa, tsa cuenda tsa javahá ra Cristo Jesús. Tan na cuví tsi tacan.

4

Iin ñi cuví tandihí yo tsa yihí yo cuenda ra Cristo jahá Tatyí Ii Nyoo

¹ Yacan cuenda yuhu, tsa nyívi yu vehe caa tsa cuenda Jutu Mañi yo, caahán ndaahvi yu tsihin ndo na catsi coo ndo tumaa cuhva taahán tsi coo nyívi tsa nacana Nyoo. Tyin nacana ra tsi ndo na cuví ndo nyívi ra. ² Yacan cuenda jandundaahvi ndo tsi ndo nuu nyívi, tan vita cuhun iñi ndo. Tan ña cutyixin ndo tsihin ñi, tan ña cundihi iñi ndo nyehé ndo tsi ñi tyin tacan tan coto ñi tyin cuñi ndo tsi ñi. ³ Tyin tsa taxin tsa tsahá Nyoo coo añima yo jandu iin tsi tsi yo tan yacan cuenda nducu vaha ndo cuhva tan iin ñi cuví ndo tsihin tsa jatyinyee Tatyí Ii Nyoo tsi ndo. ⁴ Tandihí yoo tsa tsinú iñi tsi ra Cristo Jesús cuví yo intuhun ña cuñu ñuhu tsa cuenda ra. Tan tandihí yo intuhun ñi Tatyí Ii Nyoo iyó tsihin yo, tan catyí Nyoo tsihin tandihí yo tyin nditsa tsa cua ñihi yo ñayívi nyito coo yo. ⁵ Iyó intuhun ñi Jutu Mañi yo ndacá ñaha tsi yo. Tan intuhun ñi tsi maa ra tsinú iñi yo. Tan intuhun ñi tsa cuenda maa ra tsicoondutyá yo. ⁶ Iyó intuhun ñi Nyoo tan maa ra cuví ra Jutu tandihí yo. Tan ndacá ñaha ra tsi tandihí yo, tan iyó ra añima tandihí yo, tan tsatyíñu ra tsi tandihí yo, tan jahá tyiñu yo tyiñu ra.

⁷ Tan tsahá ra Cristo ndatu tsi tsa intuhun intuhun yo cuhva cuñi maa ra. ⁸ Yacan cuenda catyí tsi nu tutu Nyoo tuhun ra Cristo tyehen:

Cunyeē ra jahā canaa ra tsi nu xaan iñi tsi ra, tan quih̄in nyaa ra tsi nyivi tsa yih̄i ndaha nu tan nandaā ra andivi tsihin ñi.

Tan tsahā ra ndatu tsi yo tsa jaha tyiñu yo tyiñu ra, catyí tsi.

⁹ ¿Tan náa cuñí tsi catyí tsa “nandaā ra”? Cuñí tsi catyí tyin nuu jihna ra nu ñuhu ñayivi. ¹⁰ Ra tsa nuu can, juvin ñi ra cuví ra tsa nandaā nda gloria. Tyin tacan tan jandunii ra tandihí maa tan cunyaa ra tsihin yo tandihí ñi ityi. ¹¹ Tan juvin ñi maa ra Cristo tsahā ndatu tsi yo. Tsi juhva yo tava tyiñu ra tsi yo tsa caca yo tyiñu ra. Tan tsi inga yo tsahā ra tsa cuví yo ndusu yuhu ra. Tan tsi inga yo tsahā ra tyin jacoto yo tsi nyivi nácaa jacacú ra tsi yo. Tan tsi inga yo tsahā ra tsa jaha cuenda yo tsi ñi yihí cuenda ra, tan tsi inga yo tsahā ra tsa cuví jacuaa yo tuhun ra tsi ñi. ¹² Tacan tsahā Nyoo ndatu can tsi yo tyin jatyinyee tahan yo tsi yo tan tsi inga ca nyivi tyin tacan tan cuahnu ca yo tsihin ra Cristo. ¹³ Nda cuanda ndu iin tandihí yo jaha tsa tsinú iñi yo tsi Sehe Nyoo. Tan nacoto vaha yo tsi ra. Tan cutsa vaha yo nda cuanda tsaa yo cuví yo tumaa cuví maa ra Cristo. ¹⁴ Tacan tan ña cua cuví ca yo tumaa tsa nyihí. Tyin tsa nyihí yatyi xaan tsinú iñi tsi náa luxu tsa ñihí tuhun tsi. Tan na ña cuví yoo tacan tyin coto jandavi ñaha nyivi tsi yo. ¹⁵ Maa tyin tyehen cua javaha yo: cua cuñí yo tsi nyivi tan cua cahan yo tsa nditsa tsihin ñi. Tan ndunyee ca añima yo tsihin tandihí tsa vaha tsa iyó tsi Nyoo. Tan cuahnu yo tan cuví yo tumaa maa ra Cristo, ra cuví ityi nuu tsihin yo. ¹⁶ Tan tsa cuenda ra Cristo tandihí yo tsa cuví yo cuñu ñuhu ra, iin ñi cuví yo. Tumaa yihí tahan iin cuñu ñuhu, tan tsa iin tsa iin nu yihí tahan tsi vaha jahá tyiñu tsi. Tan tacan jatyinyee tsi tsi nanii cuñu ñuhu can, na coo vaha tsi tan cuahnu tsi. Tan tacan tucu yoo, tsahnú yo tsihin tsa cuñí tahan yo tsi yo tan jatyinyee tahan yo tsi yo.

Tsahā ra Cristo ñayivi nyito coo yo

¹⁷ Tuhun ihya cuví tsa tsahá cuenda yu tsi ndo, catyí Jutu Mañi yo. Ña coo ca ndo tumaa iyó nyivi ña nacotó tsi Nyoo. Tyin maa ñi maa tsa ña jatyinyee tsi ñi tsicá iñi ñi. ¹⁸ Tan ña cutuñí iñi ñi, tyin ñavin ñayivi Nyoo iyó ñi. Tyin ña tsitó ñi, tsa cuenda tsa ndava añima ñi. ¹⁹ Ña cahán ca nuu ñi javahá ñi tsa ña vaha. Tan nacuhva cuenda ñi tsi ñi tsi tsa caquiñi. Maa ñi tsa ña vaha cuñí ñi javaha ñi. ²⁰⁻²¹ Maa tyin tatun nditsa tsa tsiñi ndo tuhun ra Cristo, cua nducuhun iñi ndo tyin ñavin tacan taahán tsi coo ndo. Tyin tsiñi ndo tan cutuhva ndo tsa nditsa cuví tuhun maa ra Cristo. ²² Yacan cuenda ña coo ca ndo cuhva tsicoo ndo quivi can, tan ña javaha ca ndo tsa caquiñi tsa cuñí cuñu ñuhu ndo, tyin tsanaha, jandavi ñaha xaan can tsi ndo. ²³ Nacuhva cuenda ndo tsi ndo tsi Nyoo na nasama ra cuhva tsicá iñi ndo. ²⁴ Tan coo ndo ñayivi nyito tyin vityin nyivi tsa cuví ndo jahā Nyoo. Tan javaha ndo maa ñi tsa vaha na nyehe nyivi tyin iyó ndo ñayivi nyito tyin catsi tan cuiti iyó ndo.

²⁵ Yacan cuenda ña cahan ca ndo cuendu. Cahán ndo maa ñi tsa nditsa tsihin nyivi tyin iin ña cuñu ñuhu cuví tsa tandihí yo.

²⁶ Tatun cuxaan ndo, jaha ndo cuenda coto javaha ndo tsa ña vaha. Juhva ñi cuhva cuxaan ndo. Tan ña quihí tsihi tsi ndo nduvi. ²⁷ Tan ña cuhva ndo ndatu tsi nu ña vaha tsa nducu cuhva nu tsi ndo.

²⁸ Ra tsa tuhva suhu quivi can, na ña suhu ca ra vityin. Na jaha tyiñu ra tsihin ndaha ra. Tacan tan coo tsa tsii ra, tan cuví jatyinyee ra tsi nyivi tsa iyó tsa tsiñi ñuhu tsi ñi.

²⁹ Ña cahan ndo tsa ndavaha ñi. Cahán ndo, maa ñi tsa vaha tsa cua jatyinyee tsi nyivi tsa tsiñi tsa caahán ndo. ³⁰ Tan ña cuhva ndo tucuihya

iñi tsi Tatyi Ii Nyoo tyin Tatyi Ii ra cuví tuñi tsa tyaá ra añima yo nda cuanda ndihi jacacu ra tsi yo quivi cua quitsi ra.

³¹ Ña cahun iñi ndo tsihi. Tan ña cuxaan ndo. Tan ña cuvi ndo nyivi tyixin. Tan ña cahan nyaa ndo tsi nyivi, tan ndi ña cahan ndo tsa ndavaha ñi. ³² Maa tyin cuvi ndo nyivi vaha, tan cundaahvi iñi ndo tsi nyivi. Tan jaha ndo tucahnu iñi tsi ñi, tumaa jaha Nyoo tucahnu iñi tsi maa ndo tsa cuenda ra Cristo.

5

Naca taahán tsi coo nyivi yihí cuenda Nyoo

¹ Ndücu ndo cuhva coo ndo tumaa iyó maa Nyoo, tyin sehe ra cuví tsi yo, tan cuñi xaan ra tsi yo. ² Cuñi yo tsi nyivi tumaa tsa cuñi maa ra Cristo tsi yo tan quitsi ra tsihi ra nu cruu tsa cuenda yo. Tumaa jamañi ra cuví jutu mbee ticatyí luhlu nuu Nyoo, tacan jamañi ra Cristo tsi ra tsa cuenda yo. Tan sii xaan cuñi Nyoo tsihin ra tsa cuenda tsa javahá ra tacan.

³ Vityin tsa cuví yo nyivi yihí cuenda Nyoo, ña taahán tsi javahá ndo tsa caquiñi tsihin cuñu ñuhu ndo, tan ndi ña cuñi ndo coo cuaha ndaha tyiñi ndo. Tan ña taahán tsi caca iñi ndo ndi intuhun tuhun ihya. ⁴ Ña cahan ndo tuhun tsa tsahá ticanuu tsi yo. Tan ndi ña cahan ndo tsa nduve yahvi nyaá. Tyin ña taahán tsi cahan yo tacan. Vaha ca cuhva ndo tyahvi nyoo tsi Nyoo. ⁵ Tyin tsa tsitó ndo tyin tandihi nyivi tsa javahá tsa caquiñi, ña cua quihvi ñi nu ndacá ñaha ra Cristo tsihin Nyoo. Ra tsa iyó tsihin ñaha tan ñavin ñasiihi ra cuví ña, a ñaha iyó tsihin rayi tan ñavin yii ña cuví ra, tan nyivi tsa cuñi xaan coo cuaha ndaha tyiñu, ña cua quihvi ñi nu ndacá ñaha Nyoo tyin tumaa tsa jacahnú ñi tsitoho cuví can, tyin maa ñi yacan tsicá iñi ñi tan ña jacahnú ñi tsi maa Nyoo. ⁶ Ña cuhva ndo tsa jandavi ñaha nyivi tsi ndo tsihin tuhun tsa nduve yahvi nyaá tsa caahán ñi tyin tsa cuenda tandihi tsa ña vaha can cua tatsi tuñi Nyoo tsi nyivi tsa ña tyaá yahvi tsi ra. ⁷ Yacan cuenda ña cütahan ndo tsihin ñi.

⁸ Nyooho tsicoo ndo nu naa quivi can. Tan vityin ña taahán ca tsi coo ndo nu naa tyin Jutu Mañi yo tsa tava ra tsi ndo nu nditsin. Yacan cuenda taahán tsi javaha ndo tumaa cuñi maa Nyoo. ⁹ Tyin Nyoo jandunditsin ra añima yo tan janduvahá ra añima yo, yacan cuenda javaha ndo tsa vaha tan cahan ndo maa ñi maa tsa nditsa. ¹⁰ Jañiñi ndo cutuhva ndo cuhva taahán iñi Jutu Mañi yo. ¹¹ Ña javaha ndo cuhva javahá nyivi iyó nu naa. Tyin nduve náa tsa vaha ñihí ñi tsihin can. Vaha ca jacoto ndo tsi ñi tyin ña vaha tsa javahá ñi. ¹² Tyin cahan nuu yo cahan yo tsa javahá xeehe ñi. ¹³ Maa tyin quivi quita tsa yihí xeehe nu nditsin, tacan tan catsi xaan cua nyehe yo. Tyin tsa nditsin Nyoo cua tava tsi tandihi tsa yihí xeehe. ¹⁴ Yacan cuenda iyó nu catyí tsi: Ndoto yooho tsa quixí un, nduvita mahñu nu yucú ndyi.

Tan ra Cristo cua jandunditsin ra ñuhu nu cuahán un, catyí tsi.

¹⁵ Yacan cuenda jaha ndo cuenda cuhva iyó ndo. Tan ña coo ndo tumaa iyó ra soho. Coo ndo tumaa iyó ra tsitó. ¹⁶ Tan ndücu ndo cuhva cahan ndo tuhun Nyoo tsihin nyivi tandihi ñi cuhva tsa nuña ndo, cahan ndo tyin vityin maa ñi maa tsa caquiñi javahá ñi. ¹⁷ Yacan cuenda ña soho coo ndo. Ndücu ndo cuhva cutuñi iñi ndo cuhva cuñi maa Jutu Mañi yo. ¹⁸ Ña coho ndo nyixi tan cuvi ndo ra tsifi tyin cuvi jativi yacan tsi ndo. Maa tyin cuhva ndo tsi ndo cundaca ñaha Tatyi Ii Nyoo. ¹⁹ Cahan ndo tsihin tahan ndo maa ñi tsa vaha, tan jacahnu ndo tsi Nyoo. Çata ndo salmo cuenda ra; çata ndo yaa Nyoo;

çata ndo tsa tsahá Tatyí lí tsi ndo; jachahnu ndo tsi Jutu Mañi yo tshin tandihí añaíma ndo. ²⁰ Tacan ñi načuhva ndo tyahvi nyoo tsi Nyoo Jutu yo tsa cuenda tandihí maa, a sîi cuñí ndo, o nyehé ndo tundoho. Naçuhva ndo tyahvi nyoo tsi ra tshin ndatu tsa tsahá Jutu Mañi yo Jesucristo tsi yo.

Nacaa taahán tsi coo yo tshin nyívi yo

²¹ Tyaá yahvi tahan ndo tsi ndo, tyin tun javahá ndo tacan, tshin yacan janahá ndo tyin tyaá yahvi ndo tsi Nyoo

²² Nyoocho tsa iyó yîi, tyaá yahvi ndo tsa caahán yîi ndo tumaa tsa tyaá yahvi ndo tsa caahán Jutu Mañi yo. ²³ Tyin rayîi cuví ityi nuu tshin ñasiîhi ra, tumaa cuví ra Cristo ityi nuu tshin nyívi yîhí cuenda ra. Juvín ñi maa ra jacacú tsi yo tsa cuví yo cuñu ñuhu ra. ²⁴ Yacan cuenda tumaa tsa cuví ra Cristo ityi nuu tshin nyívi yîhí cuenda ra, tacan taahán tsi tyaá yahvi ñaha tsi yîi ña.

²⁵ Tan nyoocho rayîi, cuñí tsi tsa cuñí ndo tsi ñasiîhi ndo tumaa cuñí ra Cristo tsi yo tsa yîhí yo cuenda ra, tan tsahá ra ñayívi ra tsa cuenda yo. ²⁶ Tacan javahá ra tan jandundí ra añaíma yo tshin tuhun caahán ra tsa cuví tumaa ndutya, tan nacatya ra tsi yo quívi tsa natsinu íni yo tsi ra. ²⁷ Ndoq añaíma yo tumaa ndoó iin jahma, ña nyayu ca tsi, ña tiyi ca tsi. Tyin ra Cristo jandundí ra tsi yo tsa cuví yo nyívi yîhí cuenda ra. Tyin tacan tan cuví nacuhva cuenda ra tsi yo tsi Nyoo, tyin vaha yo, tan nduve ca cuatyí yo. ²⁸ Tacan taahán tsi cuñí rayîi tsi ñasiîhi ra, tumaa tsa cuñí ra cuñu ñuhu maa ra. Tyin tatun cuñí ra tsi ñasiîhi ra, cuñí ra tsi maa ra. ²⁹ Tyin ndí intuhun yo tan ña cuví tsa ña cuñí yo cuñu ñuhu yo, tyin jacatsí yo tan jacunditsí yo cuñu ñuhu yo. Tan ra Cristo juvín ñi tacan javahá ra tshin nyívi yîhí cuenda ra. ³⁰ Tyin cuñu ñuhu ra cuví yo. Tan intuhun intuhun yo cuví yo juhva cuñu ñuhu ra tan yiquí ra. ³¹ Catyí tuhun Nyoo: “Rayîi taahán tsi nacoo ra tsi jutu ra tan tsi síhi ra, tan ndu iin ra tshin ñasiîhi ra. Tan intuhun ña cuñu ñuhu cua cuví tsa nduvi ñi.” ³² Xeehe xaan tan cahnu xaan tuhun ihya, tan catyí yu tyin cuñí tsi catyi tyin ra Cristo ndu iin ra tshin nyívi yîhí cuenda ra tumaa ndu iin iin rayîi tshin ñasiîhi ra. ³³ Tan inga tucu tuhun, cuñí tsi catyi tyin intuhun intuhun ndo taahán tsi tsa cuñí ndo ñasiîhi ndo, tumaa cuñí ndo tsi maa ndo. Tan nyoocho ñiñaha, tyaá yahvi ndo tsi yîi ndo.

6

¹ Nyoocho tsa nyíhi, tyaá soho ndo tsa caahán jutu ndo tan síhi ndo. Tyin tacan taahán tsi javaha ndo. ²⁻³ Tyin nu tutu Nyoo catyí tsi tyeheh: “Jaha tsa ñayívi tsi jutu un tan síhi un”, tan tuhun ihya cuví tsa jihna ñi catyí Nyoo tyin javaha yo tan cua ñihi yo tsa cua cuhva ra tsi yo. Tyin tyaá ra cuhva tyin tun javaha yo tacan, sîi xaan cua coo yo tan cuaha xaan quívi cua coo yo nu ñuhu ñayívi ihya.

⁴ Tan nyoocho tsa iyó sehe, ña javaha ndo tsa ña vaha tsi sehe ndo tan cuxaan íni tsi tsi ndo. Maa tyin jacuaha ndo tuhun Nyoo itsi naha tsi, tan na cutuhva tsi tyaá yahvi tsi tsi ndo tan tsi Nyoo.

⁵ Tan nyoocho tsa cuví musu, tyaá yahvi ndo tsi ra yîhí ndaha tsi ndo nu ñuhu ñayívi ihya. Jaha ndo tsa ñayívi tsi ra naha tshin tsa ñi íni añaíma ndo. Tan nducu ndo cuhva tyaá yahvi ndo tsi ra naha tumaa tyaá yahvi ndo tsi ra Cristo.

⁶ Jaha tyiñu vaha ndo. Ñavin tsa nyehé ñi tsitoho ndo tan vaha jaha tyiñu ndo tan catyi tsitoho ndo tyin vaha xaan ndo. Jaha tyiñu vaha nyoocho tumaa

tsatyin tyiñu ra Cristo javahá ndo. Tacan tan cua javaha ndo cuhva cuñí Nyoo tsihin tsa nñi ñiñi añima ndo. ⁷ Jaha tyiñu ndo tsihin tsa sñi cuñí ndo tumaa tun jahá tyiñu ndo cuenda Jutu Mañi yo tan ñavin tsa cuenda nyivi. ⁸ Tyin tsitó ndo tyin Jutu Mañi yo cua tyahvi ra tsi intuhun intuhun ndo tun javahá ndo tsa vaha, vasu ndi maa musu cuví ndo o ñavin musu cuví ndo.

⁹ Tan nyooho tsa iyó musu, javaha ndo tsa vaha tsihin musu ndo. Tan ña jayuhvi ndo tsi ñi. Tyin tsitó ndo tyin nuu Jutu Mañi yo iin ñi cuví ndo tsihin musu ndo, tyin ña sñin caá iin nyivi tan inga ñi nuu ra.

Tunyee ñiñi tsa tsahá Nyoo tsi yo tsa yihí yo cuenda ra

¹⁰ Tan vityin coo ndo tsihin tunyee ñiñi tsa tsahá Jutu Mañi yo tsi ndo tyin iin ñi cuví ndo tsihin ra. Tyin cahnu xaan tunyee ñiñi iyó tsi ra. ¹¹ Jaha cuenda vaha ndo tsi ndo tsihin tunyee ñiñi tsa tsahá Nyoo tsi ndo tumaa jahá cuenda iin andaru tsi ra. Tacan taahán tsi jaha cuenda ndo tsi ndo tyin tacan tan ña jandavi ñaha nu ña vaha tsi ndo tyin nu ican nyityi xaan nu. ¹² Yacan jaha vaha ndo cuenda tsi ndo tsihin tunyee ñiñi Nyoo tyin cañí tahan yo, maa tyin ñavin tsihin ra ñuu ñayivi, tyin cañí tahan yo tsihin nu ña vaha tsa ña cuví nyehe yo. Tan nu ican yihí ndaha tsi nyivi caquiñi. ¹³ Yacan cuenda jaha cuenda vaha ndo tsi ndo tsihin tandihí tsa jatyinyee Nyoo tsi yo. Tyin tacan tan cunyee ñiñi ndo quivi nducu cuhva nu ña vaha tsi ndo. Tan ña cua nduva ndo jaha nu. ¹⁴ Ñihi cunyaa ndo tsihin tuhun Nyoo tumaa nyaá listu vaha iin andaru tun tsa yihí cinturón tsitsi ra. Tan caça vaha ndo ityi tsa nditsa cuví ityi Nyoo tyin yacan cuví tsa tyasí yiqui nyica ndo tumaa iin andaru iyó tsa tyasí yiqui nyica ra tan nduve náa taahán ra. ¹⁵ Tacan tucu nyooho janduvaha ndo tsi ndo tumaa tsa janduvahá ra andaru tsi ra tan tyihí ra zapatu tsaha ra tun tsa cua cuhun ra cuatyí. Tacan taahán tsi janduvaha ndo tsi ndo tsa cua cahan ndo tuhun Nyoo tsihin nyivi. ¹⁶ Tan çasi vaha ndo tsi ndo tumaa tyasí ra andaru tsi ra tsihin iin caa tan ña nañi ndaha nduva tsa cayú tsi ra. Tacan taahán tsi cunyecu ñihi ndo tsihin tsa tsinú ñiñi ndo, tan ña cuhva ndo tsa jaha canaa nu ña vaha tsi ndo. ¹⁷ Ra andaru iyó iin caa ndasí jiñi ra tan jacacú can tsi ra, tacan cuví tsa jacacú Nyoo tsi yo. Cuatyíñu vaha ndo tuhun Nyoo tyin yacan cuví tumaa mityí tsahá Tatyí Ii Nyoo tsi ndo. ¹⁸ Tan ña jandihí ndo tsa tsicán tahvi ndo tsi Nyoo tan tsa caahán ndaahvi ndo tsihin ra tumaa jaquihín ityi maa Tatyí Ii ra tsi ndo. Yacan cuenda ña ndu uvi ñiñi ndo tan coo nyito vaha ndo, ndaçan tahvi ndihí ndo tsi Nyoo tsa cuenda tandihí nyivi yihí cuenda ra. ¹⁹ Tan ndaçan tahvi ndo tsi ra tsa cuenda yu, na ñihi ca yu tuhun cahan yu, tan na ña nayuhvi yu jacoto yu tuhun ra Cristo tsi nyivi. Tyin tsanaha yihí xeehe tuhun ihya tan vityin cua nacoto ñiñi tsi. ²⁰ Tan tsa cuenda tsa jacotó yu tuhun ra Cristo, nyíi yu vehe caa ihya vityin. Ndaçan tahvi ndo tsa cuenda yu, na ña nayuhví yu, tan cahan yu cuhva taahán maa tsi cahan yu.

Nu jacuhún ra Pablo tsi ra Tíquico nu yucú nyivi yihí cuenda ra Cristo

²¹ Tan ra Tíquico, ra yañi yo, cua nacatyí tuhun ra tandihí tuhun yu tsihin ndo. Nñi xaan ñiñi ra jahá tyiñu ra cuenda Jutu Mañi yo, tan cuñí xaan yo tsi ra. ²² Jaquitsí yu tsi ra nu yucú ndo tyin jacoto ra tsi ndo nácaa iyó ndi ihya, tyin tacan tan ndu iin ñiñi ndo.

²³ Na cuhva Nyoo Jutu yo tan Jutu Mañi yo Jesucristo tsa taxin coo añima tandihí ra yañi yo naha ra tan na tsinu ca ñiñi ra naha tsi ra tan na cuñi ra naha

tsi nyivi. ²⁴Tan na nasoco xaan Nyoo tsi tandihi nyooho tsa cuñi tsi Jutu Mañi
yo Jesucristo. Ña jandihi ndo tsa cuñi ndo tsi ra.
Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Filipos,

Nyíi ra Pablo vehe caa, tan javahá ra iin carta tan jacuhun ra tsi nyivi yihí cuenda Nyoo ñuu Filipos

¹ Yuhu ra Pablo tan ra Timoteo, cuví ndi musu ra Jesucristo. Tan javahá ndi carta ihya tsa cuenda tandihí ndo tsa yucú ndo ñuu Filipos tan cuví ndo nyivi cuenda Nyoo tan iin ñi cuví ndo tsihin ra Cristo. Tan yacan jaquitsí ndi carta ihya tsi tandihí ndo tsihin ra cuví ityi nuu tsihin nyivi vehe ñuhu naha ra, tan tsihin ra jahá tyiñu vehe ñuhu naha ra. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima.

Nu tsicán tahvi ra Pablo tsa cuenda ñi yihí cuenda Nyoo ñuu Filipos

³ Tandihí ñi tsaha tsa nducuhún iñi yu tsi ndo, nacuhvá xaan yu tyahvi nyoo tsi Nyoo tsa cuenda ndo. ⁴ Tan tandihí tsa tsicán tahvi yu tsi Nyoo tan tsicán tahvi yu tsa cuenda tandihí ndo tsihin tsa sii cuñí añima yu. ⁵ Tyin nda quivi jihna tsa tsiñi ndo tuhun ra Cristo tan nda vityin tan ña jandihí ndo tsa jatyinyeé ndo tsi yu. Tyin iin caa ñi jacotó yu tuhun ra Jesucristo tsi nyivi. ⁶ Tsitó vaha yu tyin tumaa tsa quitsahá javahá Nyoo tsa vaha tsitsi añima ndo, tacan cua javaha ca ra nda cuanda quivi quitsi ra Jesucristo inga tsaha. ⁷ Taahán tsi tsa caca iñi yu tacan tsa cuenda ndo, tyin cuñí xaan yu tsi ndo. Tyin iin caa ñi nasocó Nyoo tsi yo. Vasu ndi maa tsa nyíi yu vehe caa ihya, tan vasu ndi maa cahun yu nuu ra cumí tyiñu naha ra, maa tyin jacotó yu tuhun Nyoo tsi ra yucú vehe caa ihya naha ra, tan tsihin ra cumí tyiñu naha ra, na coto ra naha tyin nditsa tuhun ra Cristo. ⁸ Nyoo tsitó ra tyin cuñí xaan yu tsi tandihí nyooho tumaa tsa cuñí maa ra Jesucristo tsi ndo. ⁹ Tan tsicán tahvi xaan yu tsi Nyoo na cuñi ca ndo tsi ra fan na cundahvi ca iñi ndo tsi nyivi. Tan nacoo ca tsa nyityi Nyoo tsi ndo, tan cutuñi ca iñi ndo, ¹⁰ tyin tacan tan cuví ñihi ndo tsa vaha tsi Nyoo. Tan ña cua coo ca cuatyí ndo tan cuví coo vaha ndo tsihin tuhun Nyoo nda cuanda quivi quitsi ra Cristo. ¹¹ Maa ra cua jatyinyeé tsi ndo. Tan tacan ñi cua javaha ndo maa ñi maa tsa vaha, tan tsa ndaa. Tacan tan cua jacahnu nyivi tsi Nyoo tyin cahnu xaan ra cuví ra.

Maa ñi maa tyiñu Nyoo javahá ra Pablo tyin iyó ra Cristo añima ra

¹² Yañi, cuñi yu tsa coto ndo tyin tandihí tundoho taahán yu, jatyinyeé xaan tsi tyin nducuaaha ca nyivi tsinú iñi tuhun Nyoo. ¹³ Tan tandihí andaru tsa iyó vehe ra cuví rey tan tandihí nyivi iyó ihya tsitó ñi tyin nyíi yu vehe caa tsa cuenda tsa nyicún yu tsi ra Cristo. ¹⁴ Tan cuaha xaan ra yañi yo cuenda Jutu Mañi yo naá tsa yuuhví ra naha tsa nyehé ra naha tyin jatyinyeé Nyoo tsi yu nu nyíi yu vehe caa. Yacan cuenda jañihí ca ra naha caahán ra naha tuhun Nyoo tsihin nyivi.

¹⁵ Tan nditsa tyin yihí ra naha, caahán ra naha tuhun ra Cristo tsa cuenda tyin cuñi ra cunyicun nyivi tsi maa ra naha. Tan yihí tucu ra naha caahán ra naha tuhun ra Cristo tsihin nyivi maa tyin tsihin tsa ñi iñi ra naha. ¹⁶⁻¹⁷ Yihí ra caahán ra tuhun ra Cristo, tyin tsitó ra naha tyin maa Jutu Mañi yo jaquitsi tsi yu ihya. Tyin cahan yu tuhun ra tan jacotó yu tsi nyivi tyin nditsa tsa

jacacú ra tsi yo. Tan tsa cuenda tsa cuñí ra naha tsi ra Cristo, yacan caahán ra naha tuhun ra. Maa tyin inga ra can naha ra ñavin tsa nñi iñi ra naha tan caahán ra naha tuhun ra Cristo, tyin cuñí ra naha na cunyicun cuaha nyivi tsi ra naha tan cuñí ra naha vacu nducva ra naha tsi yu nu nyii yu vehe caa ihya. ¹⁸ Tan ña ndihi iñi yuhu tatun juhva ra naha caahán ra naha tuhun ra Cristo tsihin tsa ña nñi iñi ra naha. Maa tyin yuhu sñi xaan cuñí yu tyin tuhun ra Cristo caahán tandihi ra naha, cuví ñi tsa nñi iñi ra naha caahán ra naha o ñavin.

Tan ndusñi ca cuñí yu ¹⁹ tyin tsitó yu tyin maa Nyoo cua jacacu tsi yu. Tyin tsicán tahvi xaan ndo tsi ra tsa cuenda yu, tan inga tuhun tyin jatyinyeé xaan Tatyí li ra Cristo tsi yu. ²⁰ Tsitó vaha yu tyin Nyoo cua jatyinyee ra tsi yu tan ña cua nducahan nuu yu, tan ña cua nayuhvi yu cahan yu tuhun ra Cristo tsihin tsa nñi iñi yu. Tan ña ndihi iñi yu, an coo ca yu ñayivi, o cúu yu, maa tyin cuñí yu cahan yu tuhun ra, tahan ñi cuhva tsa tuhvá yu caahán, na nyehe nyivi cuhva iyó yu tan coto ñi tyin ra Cristo cahnu xaan ra cuví ra. ²¹ Tyin tsa cuenda yuhu ñayivi tsa iyó yu vityin, ñayivi ra Cristo cuví. Maa tyin tatun cúu yu, cua ñihi yu tsa sñi caa tsa iyó gloria. ²² Tan tatun coo ca yu, vaha xaan. Tyin tacan tan cuví jañihi ca yu jahá tyiñu yu tyiñu Jutu Mañi yo. Tan cua cuví tsi tsa vaha tsa cuenda ra. Yacan cuenda ña tsitó yu nda ityi cahun yu, a cúu yu, a cahun yu cucahan ca yu tuhun Nyoo tsihin nyivi, ña tsitó yu. ²³ Yñi xaan cuñí yu tan quihin yu ndáa ityi cahun yu tyin tsa cuñí yu cahun yu cunyaa yu tsihin ra Cristo. Tyin vaha ca yacan. ²⁴ Maa tyin tsa cuenda nyooho, vaha ca tsa ña cúu naha yu tyin tacan tan cuví cunyaa yu tsihin ndo tan coto ca ndo tuhun Nyoo. ²⁵ Yacan cuenda tsitó yu tyin cua ndoo yu juhva ca quivi ihya. Tyin cuñí tsi tsa jatyinyeé ca yu tsi ndo tan cuvi cahun ndo ityi nuu ca tan cusñi ca iñi ndo tsihin tsa tsinú iñi ndo tsi Nyoo. ²⁶ Tacan tan cua nyehe ndo tsi yu inga tsaha, tan sñi xaan ca cua cuñi ndo tsa cuenda yu tyin iin caa ñi iyó yu tsihin ra Cristo.

²⁷ Cuñí tsi tsa coo yo cuhva taahán tsi coo nyivi yihí cuenda ra Cristo. Vasu nyaá yu tsihin ndo, a cañi nyii yu, maa tyin cuñí yu coto yu tuhun ndo tyin nyooho vaha cuahán ndo tsihin Nyoo. Tan iin caa ñi jahá tyiñu tandihi ndo tyin tacan tan cua tsinu iñi nyivi tuhun ra Cristo. ²⁸ Maa tyin nyivi xaan iñi tsi ndo, cuaha xaan tsa cua jacuu ñi tsi ndo maa tyin ña nayuhvi ndo. Tyin tsa tacan, catsi xaan janahá tsi tyin cunaa ñi can. Tan janaha tucu tsi tyin tsa cacu nyooho jahá Nyoo. ²⁹ Tyin tsahá ra ndatu tsa tsinú iñi tandihi yo tsi ra Cristo, tan tacan tucu tsahá Nyoo ndatu tsa nyehé yo tundoho tsa cuenda maa ra Cristo. ³⁰ Iin caa ñi nyehé yo tundoho tan jacotó yo tuhun ra Cristo. Tan tsa tsitó ndo nácaa nyehé yu tundoho, tan vityin tsitó tucu ndo tyin ña jandhi yu tsa caahán yu tuhun Nyoo.

2

Cuca xaan ra Cristo, maa tyin quitsi cúu ra tumaa iin ra ndaahvi

¹ Nditsa tyin ra Cristo jandu iin xaan ra iñi yo tsa iin ñi cuví yo tsihin ra. Tan vaha cuñí yo tsa cuenda tsa cuñí ra tsi yo. Tan nditsa tucu tyin iyó Tatyí li Nyoo tsihin yo. Tan nditsa tucu tsa ndaahvi cuñí yo nyehé yo tsi nyivi tahan yo. Tatun nditsa tandihi yacan, ² cuhva ndo tsa cusñi ca iñi yu tsihin tsa vaha iyó ndo. Tan cuñi tahan ndo tsi ndo tumaa tsa cuñí ra Cristo tsi yo. Tan iin ñi cuhva caca iñi ndo. Tan iin ñi tsa vaha javaha ndo. ³ Ña javaha ndo maa ñi tsa jatyinyee tsi maa ndo, javaha ndo tsa vaha tsi inga nyivi. Tan náa javaha ndo,

ña cahnu jaha ndo tsi ndo. Ndaahvi jaha yo tsi yo. Tan intuhun intuhun yo na jaha yo tyin vaha ca inga nyivi tan ñavin ca maa yo. ⁴ Tan intuhun intuhun yo caca iñi yo tsa cuenda tsa vaha tsi inga nyivi, tan ñavin tsa cua jatyinyee tsi maa ñi maa yo.

⁵ Caça iñi yo tumaa tsicá iñi maa ra Cristo Jesús. ⁶ Tyin nu quitsj tsi tsanaha tsa ndi cumañi ca quitsi ra nu ñuhu ñayivi, cuví ra tahan ñi maa cuví Nyoo. Maa tyin ña tsicá iñi ra tsa nacoo ra yacan. ⁷ Tan tyaá tsiyo ra tandihí tunyee iñi ra tan tandihí tsa cuca ra. Tan quitsj ra nanduví ra iin nyivi ndaahvi nu ñuhu ñayivi ihya quivi tsa cacú ra. ⁸ Tan tsa nanduví ra iin rayi, tan ndaahvi jahá ra tsi ra tan tyaá yahvi vaha ra tsi Nyoo nda cuenda tsahá ra tsa cahñi nyivi tsi ra nu cruu. Tumaa iin ra caquiñi, tacan jahá ñi tsi ra, tan tahan ra ticanuu tyin tsahñi ñi tsi ra nu cruu. ⁹ Yacan cuenda Nyoo jacahnú xaan ra tsi ra. Tan tsahá Nyoo iin sivi tsi ra, iin sivi tsa cahnu xaan ca cuví tan ñavin ca tandihí sivi. ¹⁰ Tyin tatun tsifi yo sivi ra Jesucristo, tandihí yo tan cua cuiñi tsiti yo. Tan tandihí tucu tsa iyó andivi, tan tsa iyó nu ñuhu ñayivi, tan tsitsi ñuhú, tandihí yacan cua jacahnu tsi ra. ¹¹ Tyin tandihí tsa iyó, cua nacoto tan cua cahan tyin ra Jesucristo cuví ra ndacá ñaha tsi tandihí maa tsa iyó. Tacan tan cua nyehe tsi tyin cahnu xaan ca cuví maa Nyoo Jutu yo.

Nyivi yihí cuenda Nyoo cuví ñi tumaa iin ñuhu tsa jandunditsin nu ñuhu ñayivi ihya

¹² Yacan cuenda, yañi tsa cuñi xaan yu, tumaa tsa tyaá yahvi ndo tsi yu quivi tsa tsinyi yu tsihin ndo, tacan ñi taahán tsi tyaá yahvi ndo tsi yu vasu ndi maa tsa cañi nyi yu vityin. Ndücu ndo cuhva na nyehe nyivi tyin nditsa tsa jacacú Nyoo tsi yo. Tan jahá vaha ndo cuenda cuhva coo ndo tsihin ra. ¹³ Tyin maa Nyoo tyihí tsa vaha añima ndo. Tan jatyinyee ra tsi ndo tyin tacan tan cuví tyaá yahvi ca ndo tsa caahán ra tan javahá ndo cuhva cuñi ra.

¹⁴ Tatun cua javaha ndo náa tsa cua javaha ndo, ndücu jihna ndo cuhva tsa ña cahan yuhu tahan ndo. Tan ña cañi tahan ndo. ¹⁵ Tacan tan ña cua coo cuatyí ndo. Taahán tsi cuví ndo nyivi cuiti iyó, taahán tsi cuví ndo nyivi nduve cuatyí, tumaa tsa taahán tsi coo nyivi cuenda Nyoo tyañu nyivi caquiñi ihya. Cuñi tsi tsa cuví ndo tumaa iin ñuhu tsa jandunditsin nu naa nu ñuhu ñayivi ihya. ¹⁶ Cahan yo tuhun Nyoo tsihin nyivi tyin yacan tsahá ñayivi nyito tsa iyó yo. Javaha ndo tacan, tan quivi cua quitsi ra Cristo, yuhu nñi vaha cua cuñi yu tsa cuenda ndo, tyin ña jacoto cuatu yu tuhun Nyoo tsi ndo. ¹⁷ Tan vasu cahñi nyivi tsi yu tsa catyi tuhun Nyoo, maa tyin cua cuví tsi iin tsa cua jamañi yu tsi Nyoo tan tsihin tsa tsinú iñi ndo tsi ra. Tan iin caa ñi cusii iñi yo tsihin ra. ¹⁸ Tan yacan cuenda taahán tsi tsa cusii iñi ndo tsihin yu.

Nu jacuhun ra Pablo tsi ra Timoteo tan ra Epafrodito ñuu Filipos

¹⁹ Tatun Jutu Mañi yo tan cuñi ra, cua jaquitsi yu tsi ra Timoteo naquitsi nyehe ra nu yucú ndo. Tan quivi tsa ra inga tsaha nu nyi yu sñi xaan cua cuñi yu. Tyin cua nacatyí tuhun ra tsihin yu nácaa yucú ndo. ²⁰ Tyin intuhun ñi ra tsicá iñi tumaa tsa tsicá iñi yu tsa cuenda ndo. Tan yofi inga ra tsa tsicá iñi tacan. ²¹ Tyin tandihí ca ra naha, maa ñi maa tsa cuenda tsi maa ra naha nanducú ra naha. Tan ña nanducú ra naha cuhva cuñi ra Cristo Jesús. ²² Maa tyin tsitó ndo tyin ra Timoteo, vaha cuahán ra tsihin Nyoo, tan tsa cuenda yuhu, cuví ra tumaa sehe yu. Tan jatyinyee xaan ra tsi yu tsa caahán ndi tuhun ra Cristo tsihin nyivi. ²³ Tan nyaá tsa cua jaquitsi yu tsi ra nu yucú ndo. Maa tyin nda coto jihna yu nácaa cua cahan ra cumí tyiñu, tatun ña naha ca

cunyii yu ihya. ²⁴ Tyin tsitó vaha yu tyin Jutu Mañi yo numi ñi cua cuhva ra tsa quitsi nyehe yu nu yucú ndo.

²⁵ Tan ra Epafrodito, yañi yo tsa jaquitsi ndo tsa jatyinyee tsi yu tsihin tyiñu tsa javahá yu, iin caa ñi cuví ndi andaru ra Cristo tsihin ra. Tan vityin cua jaquitsi nuhu yu tsi ra inga tsaha nu yucú ndo. ²⁶ Cuñi xaan ra quitsi nuhu ra nu yucú ndo, tyin tsicá xaan iñi ra tsa tsító ndo tyin nacuhvi ra. ²⁷ Nditsa ñihi xaan nacuhvi ra tan tsa cua cúu maa ra cuví. Maa tyin Nyoo cundahvi iñi tsi ra, tan tsii tucu yuhu tyin na ña nducuiihya xaan ca iñi yu. ²⁸ Yacan cuenda, yuhu cuñi xaan yu tsa quitsi nuhu ra nu yucú ndo. Tyin tacan tan sii xaan cua cuñi ndo tsa cua nyehe ndo tsi ra inga tsaha. Tan yuhu ña cua coo ca yu tucuiihya iñi, tyin cua nyehe ndo tyin ra Epafrodito iyó vaha ra. ²⁹ Yacan cuenda, naquihin ndo tsi ra tsihin tsa sii cuñi ndo, tyin yañi yo tsa cuenda maa Jutu Mañi yo cuví tsi ra. Tan tacan ñi taahán tucu tsi tsa jaha ndo tsa ñayivi tsi ra yañi yo naha ra tsa iyó tumaa cuhva iyó ra. ³⁰ Tyin tsa yatyin maa cúu ra tsa cuenda tsa javahá ra tyiñu ra Cristo. Tyin vasu ndi maa cuuhvi xaan ra, maa tyin ña cuñi ra jandihí ra tsa jatyinyee ra tsi yu. Tyin maa ndo ña cuví quitsi ndo tan jatyinyee ndo tsi yu tyin cañi xaan yucú ndo.

3

Nu janahá ra Pablo nácaa nduvaha yo nuu Nyoo

¹ Tan vityin yañi, cusii iñi ndo tsihin Jutu Mañi yo. Tsa cuenda yuhu nduve tsihi cuví tsi tsa cua tyaa yu inga tsaha tuhun ihya tsi ndo. Tyin tsa vaha tsi maa ndo cuví tsi. ² Jaha ndo cuenda tsi ndo tsihin ra icá tumaa icá ina, ra caquiñi naha ra. Javahá ra naha tsa ña vaha. Tyin catyi ra naha tyin cuñi tsi cunyaa tuñi Nyoo tsi yo, tacan tan cacu yo. ³ Maa tyin yoo nyisó yo tuñi tsa nditsa tyin maa Nyoo tyaa tuñi ra tsitsi añima yo quivi nacuhva cuenda yo tsi yo tsi ra. Tan jacahnú yo tsi ra tsihin Tatyí Ii ra tsa iyó añima yo. Tan cusii iñi yo tyin cuenda maa ra Cristo Jesús yihí yo. Tan ña nyitá iñi yo tyin cacu yo tsihin náa cunyaa cuñu ñuhu yo. ⁴ Tun tsatyin nditsa tsa cuví cacu yo tsihin tsa javahá yo yacan, jihna ca yuhu tsa yaha cacu tan ñavin ca tandihí ra tsa javahá yacan vityin. ⁵ Tyin una quivi yu tan tsinyaa tuñi Nyoo tsi yu. Tyin tata ra Israel cuví yu. Tan tata ra Benjamín sehe ra Israel cuví ndihí yu. Juvín ñi tata nyivi caahán yuhu hebreo cuví yu. Yacan cuenda nditsa tyin hebreo cuví yu. Tan inga tucu tuhun, tyaa yahvi xaan yu ley tsahnu quivi can, tyin ra fariseo cuví yu. ⁶ Tan tsa cuenda tsa cuñi yu tyaa yahvi yu ley, tan tsinyaa ndaha xaan yu tsi ñi yihí cuenda ra Cristo. Tan tyaa yahvi yu tandihí maa ley tsahnu, tyin nducu xaan yu cuhva tyaa yahvi yu tsa caahán ley can. ⁷ Maa tyin tandihí tsa cuñi maa yu tyin cahnu xaan cuví quivi can, vityin nduve ca yahvi nyaá yacan tsa cuenda yu. Tyin vityin maa ra Cristo cuví ra tsa nyitá iñi yu. ⁸ Tan inga tucu tuhun, tandihí tsa javahá yu, tsitó maa yu tyin nduve ca yahvi nyaá yacan tyin tsa nacoto yu tsi ra Cristo Jesús, Jutu Mañi yu. Tyin yacan cuví tsa cuca xaan ca. Tan tsa cuenda ra Cristo tandihí tsa javahá yu quivi quitsi tsi ityi tsata, cuví tsi iin tsa cuatu ña vityin. Yacan cuenda tyaa tsiyo yu tandihí can. Tyin cuñi yu coto vaha ca yu tsi ra Cristo. ⁹ Tan cuñi yu ndu iin ca yu tsihin ra. Tsinú iñi yu tyin jacacú ra tsi yu, yacan cuenda nduvahá iyó yu nuu Nyoo. Ñavin tsa cuenda tsa tyaa yahvi yu ley Nyoo tan vaha iyó yu, maa tyin tsa cuenda tyin tsinú iñi yu tsa caahán ra, tyin jacacú ra tsi yo tan vaha iyó yu nuu ra. Tan tsa cuenda tsa tsinú iñi yo, ra Cristo

naquihín cuenda ra tsi yo. ¹⁰ Tsa coto vaha ca yu tsi ra Cristo, yacan cuví tsa cuñí yu. Tyin Nyoo janandotoḡ ra tsi ra Cristo tsihin tunyee iñi ra. Tan cuñí yu tyin coo ca tunyee iñi can tsi yu. Tan cuñí yu cunyeé iñi yu tundoho tsa taahán tsi nyehé yu tsa cuenda ra. Tan cuñí yu nacuhva cuenda yu tsi yu tumaa maa ra Cristo nacuhva cuenda ra tsi ra tan tsihí ra. ¹¹ Tyin nducú xaan yu cuhva nandoto yu tsa yaha cúu yu.

Nacaa cunyicun ñihi ca yo tsi Nyoo

¹² Ña catyí yu tyin nduve ca tsa cumañí tsi yu, tan vaha xaan yu. Maa tyin cuahán yu ityi nuu ca. Tyin cuñí yu naquihin yu tsa cahan ra Cristo tyin cuhva ra tsi yu. Tyin jihna ca maa ra cahan tsihin yu. ¹³ Yañi, ña catyí yu tsihin ndo tyin tsa ñihí yu tandihí tsa vaha can. Maa tyin iyó intuhun ñi tsa javahá yu; nacoó yu ityi tsata tandihí tsa javahá yu, tan jañiñí yu cuhun yu ityi nuu ca. ¹⁴ Tyin tacan tan tsaá yu nu nyaá tsa taahán tsi tsi yu. Tyin caná Nyoo tsi yo nda gloria. Tyin naquihin yo tsa catyí ra tsihin yo tyin cuhva ra tsi yo tsa cuenda tsa iin caa ñi iyó yo tsihin ra Cristo Jesús.

¹⁵ Tacan taahán tsi caca iñi tandihí nyívi tsa ñihi nyaá tsihin Nyoo. Maa tyin tatun ñavin tacan tsicá iñi ndáa nyooho, Nyoo cua cuhva ra tsa cutuñí iñi ndo.

¹⁶ Maa tyin iyó iin tsa cuñí tsi tsa tyaa yahví vaha yo, tuhun tsa tsa yaha jacoto Nyoo tsi yo.

¹⁷ Yañi, javaha ndo cuhva iyó yu tan cuhva caahán yu. Tan nyehe vaha ndo cuhva iyó nyívi iyó cuhva janahá ndi tsi tandihí nyívi. ¹⁸ Tyin cuaha xaan tsaha caahán yu tsihin ndo, tan vityin cua cahan yu inga tsaha tsihin tsa cuiihya cuñí yu tyin cuaha xaan ra naha janahá ra naha tsihin cuhva iyó ra naha tyin ra xaan iñi tsi ra Cristo cuví ra naha tyin tumaa tsa ña cahnu cuví tsa tsihí ra Cristo nu cruu jahá ra naha. ¹⁹ Maa tyin quívi quitsi ra Cristo inga tsaha, ra ican naha ra cua cuhun anyaya. Tyin javahá ra naha cuhva cuñí cuñu ñuhu ra naha. Tan cahnu jahá ra naha tsi ra naha tsihin tsa taahán tsi coo ticanuu tsi ra naha. Tan nyitá iñi ra naha maa ñi maa tsa iyó ñuu ñayívi ihya. ²⁰ Maa tyin yoo nda gloria cuví nu iyó ñuu yo. Tan ndatú yo quívi quitsi nyico Jutu Mañi yo Jesucristo, ra jacacú tsi yo. ²¹ Tan cua quihin ra cuñu ñuhu ndaahví yo, tan cua jananduvi ra tsi yo tumaa cuñu ñuhu maa ra. Tan cua javaha ra tacan tsihin tunyee iñi tsa iyó tsi ra. Tan juvin ñi tsihin tunyee iñi can ndacá ñaha ra tandihí tsa iyó.

4

Tacan ñi maa na cusí iñi yo tsihin Jutu Mañi yo

¹ Yañi, cuñí yu tsi ndo. Tan cuñí xaan yu nyehe yu tsi ndo. Sii xaan cuñí yu tsihin ndo. Tan tsitó yu tyin ña cahan cuatu yu tuhun Nyoo tsihin ndo. Tyin ñí xaan iñi ndo nyicún ndo tsi ra. Tan jañihi ca ndo cunyicun ndo tsi ra.

² Tan vityin tsicán yu tsi ña Evodia, tan ña Síntique, na ña cahan yuhu tahan ñi, tan coo vaha ñi cuhva cuñí Jutu Mañi yo. ³ Tan yooho, yañi, tsa iin caa ñi jahá tyiñu tsihin yu, cuñí yu tyin jatyinyee un tsi ñi cuhva yo ihya. Tyin juvin ñi jatyinyee xaan tsi yu nu cahan yu tuhun Nyoo, maa tyin ñavin intuhun ñi yu jatyinyee ñi, tyin jatyinyee ndihí ñi tsi ra Clemente tan tsi tandihí ca ra tsa cutahán tsihin ndi. Tan sívi tandihí ñi tsa nyaá nuu tutu Nyoo nda gloria.

⁴ Cusí iñi ndo tsihin Jutu Mañi yo tandihí ñi quívi. Tan caahán yu tsihin ndo inga tsaha, cusí iñi ndo tsihin ra. ⁵ Coo vaha ndo tyin tacan tan nyehe

tandihí nyívi tyin nditsa tyin nyívi vaha cuví ndo. Tan nducuhun íñi ndo tyin tsa yatyin cua quítsi Jutu Mañi yo.

⁶ Tan ña caca íñi ndo náa taahán ndo. Iin nyita ñi ndaçan tahvi ndo tsi Nyoo náa ndihí tundoho tsa iyó ndo. Tan ndaçan ndo tsi ra nacuhva ra tandihí tsa tsiñi ñuhu tsi ndo. Tacan tan ña nacoó ndo tsa tsahá ndo tyahvi nyoo tsi ra.

⁷ Tan Nyoo cua cuhva ra tsa taxin coo añima ndo. Tan cahnu xaan tsa vaha cuví yacan. Tan yofiñi cuví cutuñi íñi nácaa tsa cahnu tsi. Tan tsa taxin iyó tsi Nyoo cua jaha cuenda añima ndo tan tsihin tsa tsiñi tuñi jiñi ndo, tyin iin caa ñi iyó ndo tsihin ra Cristo Jesús.

Na caca íñi yo maa ñi maa tsa vaha

⁸ Nu cua ndihí tuhun, yañi, çaca íñi ndo maa ñi tsa nditsa, maa ñi tsa ndaa, tsa cuiti iyó, tan tsa ndoo iyó. Ña caca íñi ndo tsa caquiñi. Çaca íñi ndo tsa sñi caa, maa ñi tsa vaha, tan maa ñi cuhva cuví jacahnu ndo tsi Nyoo.

⁹ Javaha ndo tsa jacuahá yu tsi ndo. Tuhun tsa cahan yu tsiñi ndo, tan tsa javahá yu nyehe ndo, yacan taahán tsi javaha ndo. Tan Nyoo ra tsahá tsa taxin coo añima yo, cua cunyaa ra tsihin ndo.

Nu jatyinyee nyívi ñuu Filipos tsi ra Pablo tsihin tsa iyó tsi ñi

¹⁰ Sñi xaan cuñi yu. Tan jacahnú yu tsi Jutu Mañi yo tsa cuenda tsa jatyinyee xaan ndo tsi yu inga tsaha. Tan tsitó yu tyin ndihí ñi tsaha tan cuñi ndo jatyinyee ndo tsi yu. Maa tyin tsicoo juhva quívi ña tsahá tsi cuhva tsa jatyinyee ndo tsi yu. ¹¹ Ñavin tyin iyó tsa tsiñi ñuhu tsi yu tan caahán yu tsihin ndo, tyin yuhu tsa cutuhvá maa yu tsa cusñi íñi yu tsihin náa tsa iyó tsi yu.

¹² Tyin yuhu tsa tsitó maa yu nácaa coo ndaahvi yu tan nácaa coo cuca yu. Tyin tsa caan maa yu tun iyó tsa catsi yu a nduve, tyin tun ndoo ca tsa catsi yu, quívi tsa iyó, o nduve tsa catsi yu, ndoo maa yu vaha. ¹³ Tandihí tan cuví jaha yu tsihin tunyee íñi tsa tsahá ra Cristo tsi yu. ¹⁴ Tan nyooho yañi, vaha xaan tsa javahá ndo tyin jatyinyee ndo tsi yu quívi tsa tsicoo yu tundoho.

¹⁵ Tsa tsitó nyooho nyívi Filipos nácaa cuví quívi quítsahá caahán yu tuhun Nyoo tsihin ndo. Tacan tan quee yu Macedonia nu iyó ndo tan cuahán yu cua jacoto yu tuhun Nyoo inga ñuu. Tan nyooho cuví nyívi tsa jatyinyee tsi yu tsihin xuhun, tyin vaha xaan cuñi ndo tsa cahan yu tuhun Nyoo tsihin ndo. ¹⁶ Tan tsitsi tsa nyíi yu ñuu Tesalónica, ñavin intuhun ñi tsaha jatyinyee ndo tsi yu. ¹⁷ Ñavin tsa tsicá íñi yu tsa jatyinyee ndo tsi yu, tyin tsa cuñi yu tsa jatyinyee ndo tsihin tyiñu Nyoo, tacan tan cuaha ca cua nasoco Nyoo tsi ndo.

¹⁸ Tan vityin, nduve tsa cumañi tsi yu. Nda cua ndoo ca tsa jaquítsi ndo tsi yu tsihin ra Epafrodito. Tan tsa tsahá ndo can cuví tsi tumaa xico tami, xico vaha tsa tsaá nuu Nyoo. Yacan cuví tsa taahán íñi ra. ¹⁹ Tan Nyoo cua cuhva ra tandihí tsa tsiñi ñuhu tsi ndo. Tan tandihí tsa cuca tsa iyó tsi ra Cristo nda gloria tandihí yacan tan cua cuhva ra tsi ndo. ²⁰ Na jacahnu yo tsi Nyoo Jutu yo tacan ñi maa. Tan na cuví tsi tacan ñi.

Nu jacahún ra Pablo nacumi tsi nyívi ñuu Filipos

²¹ Tsahá yu nacumi tsi tandihí ndo tsa yíhi ndo cuenda ra Cristo ñuu Filipino. Tan jaquítsi tucu ra yañi yo tsa yucú tsihin yu ihya nacumi tsi ndo. ²² Tan nyívi cuenda Nyoo tsa yucú vehe ra ndacá ñaha ñuu Roma ihya, tan tandihí ca nyívi yíhi cuenda Nyoo ñuu ihya jaquítsi ñi nacumi tsi ndo.

²³ Na nasoco maa Jutu Mañi yo Jesucristo tsi tandihí ndo.

Tan na cuví tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Colosas

Nu quitsaha javahá ra Pablo carta

¹⁻² Yuhu ra Pablo cuví yu iin ra tava tyiñu ra Jesucristo, tyin tacan cuñí maa Nyoo tyin caca yu tyiñu ra. Yuhu tan ra Timoteo, yañi yo, jaquitsí ndi carta ihya tsi nyooho nyivi ñuu Colosas tsa iin iñi yihí cuenda Nyoo tan cuenda ra Cristo. Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo aña ndo.

Nu tsicán tahvi ra Pablo tsa cuenda nyivi yihí cuenda ra Cristo

³ Tandihí ñi tsaha tsa tsicán tahvi ndi tsa cuenda ndo, tan nacuhvá ndi tyahvi nyoo tsi Nyoo Jutu ra Jesucristo Jutu Mañi yo tsa cuenda ndo. ⁴ Tyin ñihí tuhun ndi tyin tsinú xaan iñi ndo tsi ra Cristo Jesús, tan cuñí xaan ndo tsi tandihí nyivi tsa yihí cuenda Nyoo. ⁵ Tacan javahá ndo tyin tsitó vaha ndo tyin cua coo ndo tsihin Nyoo nda gloria. Nda quivi tsiñi ndo tuhun Nyoo tsa nditsa tyin jacacú ra Cristo tsi ndo tan quitsaha nyitá iñi ndo tsi Nyoo. ⁶ Tan juvin ñi maa tuhun ra Cristo tsa cahan ra Epafra tsihin ndo, yacan nacutyá tandihí ñi ityi, tumaa tsa tsityá tucu tsi nu iyó ndo ihya. Tan cuaha nyivi nacuhvá cuenda ñi tsi ñi tsi Nyoo, tumaa nacuhvá cuenda maa ndo tsi ndo. Tyin quivi tsa tsiñi ndo tuhun ra Cristo tsitó ndo tyin nditsa tsa cuñí Nyoo tsi ndo. ⁷ Yacan janaha ra Epafra tsi ndo, tyin iin ñi tyiñu Nyoo jahá tyiñu ndi tsihin ra. Tan juvin ra cuví musu vaha ra Cristo tsa cuenda ndo. ⁸ Tan juvin ra catyí tuhun tsihin ndi tyin cuñí xaan ndo tsi nyivi tahan ndo, tyin maa Tatyí li Nyoo tsahá tsa vaha can coo aña ndo.

⁹ Yacan cuenda nda quivi tsa ñihí tuhun ndi tyin tacan javahá ndo, ña jandihí ndi tsa tsicán tahvi ndi tsi Nyoo tsa cuenda ndo. Tan tsicán ndi tsi Nyoo na cuhva ra tsa tsiñi tuñi tsa iyó tsi ra tsi ndo, tan na cutuñi iñi ndo jahá Tatyí li ra tan coto vaha ndo náa ndihí tsa cuñí ra tyin javahá ndo. ¹⁰ Tacan tan cuví coo ndo tumaa taahán maa tsi coo nyivi yihí cuenda Jutu Mañi yo. Tan javaha ndo tumaa cuñí maa ra, tan javaha ndo tandihí nuu tsa vaha tan nacoto vaha ca ndo tsi ra. ¹¹ Tan tsicán tucu ndi tsi ra na jatyiñee ca ra tsi ndo tsihin tunyee iñi cahnu tsa iyó tsi ra tan ña cundihí iñi ndo tsa yaha ndo tandihí tundo, tan na cusii iñi ndo. ¹² Tan na cuhva ndo tyahvi nyoo tsi Nyoo Jutu yo, tyin maa ra tsa janduvaha ra tsi yo tyin tacan tan cuví ñihí yo tsa cua ñihí nyivi tsicá nu nditsin, tan cuñí tsi catyí nyivi tsa cuiti iyó nuu ra. ¹³ Tyin Nyoo tava ra tsi yo nu naa tan nacuhvá cuenda ra tsi yo tsi Sehe ra tsa cuñí xaan ra tyin cundaca ñaha ra tsi yo. ¹⁴ Tan jatá ra tsi yo tsihin ñihí Sehe ra tan jahá ra tucahnu iñi tsi yo.

Tsa cuenda tsa tsihi ra Cristo nu cruu tsacatyí cuatyí yo tan nduvahá iyó yo tsihin Nyoo

¹⁵ Nyoo ña nyehé yo tsi ra. Maa tyin nanduví ra nyivi tan cuví nacoto yo tsi ra. Tan juvin ra cuví ra Cristo Sehe Nyoo. Nda ndi cumañi ca tsinu ñuhu ñayivi tan tsa iyó maa ra Cristo. ¹⁶ Tan maa ra javahá tandihí tsa iyó andivi tan nu ñuhu ñayivi jahá Nyoo. Javahá ra tsa cuví nyehe yo tan tsa ña cuví nyehe yo. Javahá ra tandihí tatyí vaha tan tatyí ña vaha tsa ndacá ñaha andivi tan nu

ñuhu ñayivi ihya. Tan tandihi yacan javaha ra tyin cuatyíñu ra cuhva cuñi ra. ¹⁷Tan tsa iyó maa ra tsa ndi cumañi ca coo tandihi maa tsa iyó. Tan tandihi tsi jahá tyiñu vaha tsi jahá ra. ¹⁸Tan yoo tsa yihí cuenda ra Cristo cuví yo cuñu ñuhu ra, tan maa ra cuví jñi tsihin yo, tan tsahá ra tsa coo nyito yo. Tan juvin ra cuví tsa nandoto tsa jihna ca, tyin tacan tan quihí ndaha ra tandihi tsa iyó. ¹⁹Tyin Nyoo cuñi ra tsa cuví ra Cristo tumaa cuví maa ra. ²⁰Tan tsaha ra tsi ra Cristo tsa cúu ra nu cruu tyin tacan tan cuví coo vaha tandihi tsa iyó tsihin ra, tahan ñi tsa iyó nu ñuhu ñayivi tan andivi.

²¹⁻²²Tahan tsanaha javaha ndo tsa ña vaha tan xaan cuñi ndo nyehe ndo tsi Nyoo. Maa tyin Nyoo jaquitsi ra tsi ra Cristo, Sehe ra tan tsaha cuenda ra cuñu ñuhu ra tan tsihi ra nu cruu. Tan janacoo vaha ra tsi ndo tsihin Nyoo, tan cua nacuhva cuenda ra tsi ndo tsi ra tsihin tsa nduve ca cuatyí ndo tan cuiti vaha cua coo ndo nuu ra. ²³Yacan cuenda jañihi ca ndo tsinú iñi ndo. Tan cuita iñi ndo tyin cua tsaa ndo nu nyaá Nyoo tun ña jandihí ndo tsa tsinú iñi ndo tuhun ra Cristo tsa tsiñi ndo tyin cua jacacu ra tsi ndo. Tuhun ihya cuví tsa caahán ra naha tani cahnu ñuhu ñayivi. Tan yuhu ra Pablo jatyinyeé yu caahán yu tuhun ihya tsihin nyivi.

Nu catyí ra Pablo tyin nyaá siqui ra tsa janahá ra tuhun ra Cristo tsi tandihi nyivi tsicá vehe ñuhu

²⁴Vityin sñi cuñi yu tsa cuenda tsa nyehé yu tundoho tsihin cuñu ñuhu yu tsa cuenda ndo. Tyin taahán tsi tsa nyehé yu tundoho tsa cuenda nyivi yihí cuenda ra Cristo tyin maa ra cuaha xaan tundoho nyehe ra tsa cuenda yo tsa cuví yo cuñu ñuhu ra. Tacan tan cua jaquita ndihi yu tundoho tsa nyehe ra. ²⁵Yuhu cuví iin ra caahán tuhun ra Cristo tyin tacan jatyinyeé yu tsi tandihi nyivi yihí cuenda ra. Tyin maa ra Nyoo catyí tsa cahan yu tandihi tuhun ra tsa cuenda tsa vaha tsi ndo. ²⁶Jacuahá yu tuhun tsa tsicumj xeehe Nyoo tahan tsanaha, tsa ndi cumañi ca javaha ra ñuhu ñayivi. Tan vityin tsahá ra tsa nacoto nyivi yihí cuenda ra itsi. ²⁷Tan nyooho tsa ñavin nyivi Israel cuví cuñi ndihi ra jacoto ra tuhun xeehe can tsi ndo. Tan tuhun xeehe can cuví tsehe: ra Cristo iyó ra añima nyooho ñi yihí cuenda ra. Tan tsa cuenda maa ra cua ñihi ndo gloria nu cua coo ndo tsihin Nyoo.

²⁸Tuhun maa ra Cristo caahán ndi. Tan tsahá cuenda ndi tuhun ihya tsi tandihi nyivi. Tan jacuahá ndi tsi tandihi ñi na cutuñi iñi ñi, tan cutsa vaha ñi tyin iin ñi cuví ñi tsihin ra Cristo. ²⁹Tan tsa cuenda tsa cuñi yu tsa cuahnu vaha ñi ñihi xaan jahá tyiñu yu tsihin tunyee iñi ra Cristo tsa tsahá ra tsi yu.

2

¹Tan cuñi yu tsa coto ndo tyin tsicá iñi yu tsa cuenda ndo. Tan tsicán tahvi xaan yu tsi Nyoo tsa cuenda tandihi ndo tan tsa cuenda nyivi ñuu Laodicea, tan tsa cuenda tandihi nyivi tsa ñaha ca nyehe tsi yu. ²Tsicán yu tsi ra na jandu iin ra iñi añima ndo, tan jandu iin ra tsi ndo tsihin tsa cuñi tahan ndo tsi ndo. Tan na cuhva ra tsa cutuñi vaha iñi ndo nacuenta jaquitsi ra tsi ra Cristo, tyin tacan tan cua nacoto vaha ca ndo tsi ra. Tyin juvin tuhun ra Cristo cuví tsa tsicumj xeehe Nyoo tahan tsanaha, tan vityin jacoto ra itsi tsi yo. ³Tyin tsi intuhun ñi maa ra Cristo iyó tsa tsiñi tuñi tan tsahá ra itsi tsi yo na cutuñi iñi yo tsi Nyoo. ⁴Caahán yu tyehen tsihin ndo tyin tacan tan ña jandavi ñaha nyivi tsi ndo tsihin tuhun tsa sñi natuhún ñi. ⁵Vasu nduve yu nyii tsihin ndo, maa tyin ñuhú xaan iñi yu tsi ndo. Tan sñi xaan cuñi yu tsa nducuhún iñi yu

cuhva iyó nu yucú ndo tyin vaha xaan icá ndo. Tan tsinú vaha xaan iñi ndo tsi ra Cristo.

⁶ Yacan cuenda tumaa natsinú iñi ndo tsi ra Cristo quivi nañihí ndo tsi ra, tacan cuñí tsi coo ndo tsihin ra. ⁷ Tan cunyaa naa vaha ndo tsi ra, na cuhva ra tunyee iñi ra tsi ndo. Tan ndu iin ca iñi ndo jahá tsa tsinú iñi ndo tsi ra, tumaa cutuhvá ndo. Tan iin nyita ñi nacuhvá ndo tyahvi nyoo tsi Nyoo.

Ñayivi nyito tsa tsahá ra Cristo tsi yo

⁸ Jahá ndo cuenda tsi ndo coto jandavi ñaha nyivi tsa caahán tsa ña nditsa tsi ndo. Tyin ñi ican ña nacoto ñi tsi ra Cristo. Tyin maa ñi cuhva iyó nyivi tsitó ñi tan tsinú iñi ñi cuhva tsicá iñi nyivi.

⁹ Yacan ña tsinu iñi ndo tsa caahán ñi tyin ra Cristo juvin ra cuví Nyoo tan cuví tucu ra nyivi. ¹⁰ Tan tsitu ndo tsihin Nyoo tyin iin ñi cuví ndo tsihin ra Cristo. Tan maa ra ndacá ñaha tandihí tsa ndacá ñaha nu ñuhu ñayivi tan tandihí tatyí tsa ña nyehé yo. ¹¹ Tan tsa iin ñi cuví ndo tsihin ra Cristo, nda quivi natsinú iñi ndo tsi ra, tan nanduví ndo nyivi ra. Maa tyin ña nanduví ndo nyivi ra tsa cuenda tsa tsinyaa tuñi ra cuñu ñuhu ndo, tyin jacacú ra tsi ndo ndaha tsa caquiñi tsa javahá ndo jahá cuñu ñuhu ndo. Tsehe cuví tuñi tsa tyaá ra Cristo tsi ndo: ¹² Quivi tsicoondutya ndo tsitsi ndutya, tumaa tsa tsihi ndo tsihin ra Cristo tan quihvi ndo tsitsi ñuhu cuví can. Tacan tan nandotó tucu ndo tsihin ra tyin tsinú iñi ndo tyin Nyoo janandotó tsi ra tsihin tunyee iñi ra. ¹³ Tahán tsanaha cuví ndo tumaa nyivi tsihi jahá cuatyí ndo, tyin nduve Nyoo nyaá añima ndo tan ña tsinyaa tuñi Nyoo cuñu ñuhu ndo. Maa tyin vityin Nyoo jahá ra tucahnu iñi tandihí cuatyí ndo. Tan tsahá ra tsa coo ndo ñayivi nyito tsihin ra Cristo. ¹⁴ Tyin ley tsahnu jaquituví tsi cuatyí yo. Tan catyí tsi tyin taahán tsi cahun yo anyaya tyin ña tyaá yahvi yo itsi. Maa tyin ra Cristo tsihi ra nu cruu jahá Nyoo tan tsindihí tsa cahun yo anyaya. ¹⁵ Tan tsa tsihi ra nu cruu jahá canaa ra tsi nu ña vaha tan tandihí ca tatyí ña vaha tsa ndacá ñaha. Tacan tan tsindacá ra tsi nu nuu tandihí nyivi tan nuu ángel tyin na nyehe ñi tyin cahnu ca cuví maa ra, yacan cuenda jahá canaa ra.

Na nanducú yo tsa vaha tsa tsahá Nyoo

¹⁶ Yacan cuenda ña taahán tsi tyaá nyivi cuatyí tsi ndo tsa cuenda tsa tsatsi ndo a tsa cuenda tsa tsihi ndo, o tsa cuenda tsa ña naquihín vaha ndo iin quivi vico tsa jacahnú nyivi Israel; cuví ñi quivi tsa nduyutya yoo, o quivi quitatú ñi. ¹⁷ Tandihí tsehe ña jacacú can tsi yo tyin cuví can tumaa tixahñu tsa cua quitsi ra Cristo. Tan vityin tsa yahá quitsi ra, tan juvin ra jacacú tsi yo. ¹⁸ Ña cuhva ndo tsa casí nyivi nu naquihin ndo tsa tsahá Nyoo tsi ndo. Tyin ndaahvi jahá ñi tsi ñi nu Nyoo, maa tyin ña nditsa ñi. Jacahnú ñi tsi ángel, tan catyí ñi tyin cuaha tsa vaha janahá Nyoo tsi ñi tan ña nditsa, tyin tsa tsicá iñi ñi maa ñi nduyaá ñi tsihin can. ¹⁹ Ñi ican ñavin ra Cristo nyicún ñi. Maa tyin yoo tsa nyicún tsi ra cuví yo cuñu ñuhu ra, tan maa ra cuví jiñi tsihin yo. Tan jandu iin ra tsi tandihí yo. Tan jacuahnú ra tsi yo tsihin tunyee iñi ra tumaa cuhva cuñí maa Nyoo.

²⁰ Tumaa tsa tsihi cuñu ñuhu cuatyí ndo tsihin ra Cristo cuví can. Tan ña ndacá ñaha ca tuhun ñuhu ñayivi ihya tsi ndo. ¿Nacuenda tyin iyó ca ndo tumaa iyó nyivi tsa ña nacotó tsi Nyoo? Tan tyaá yahvi ndo tsa caahán ñi tsa javahá tuhun tsahnu. ²¹ Tyin catyí ñi tsihin ndo tyehen: “Ña tñin un tsehe tsihin ndaha un, ña catsi un tsehe, coto ña cacu un”, catyí ñi tsihin ndo. ²² Maa tyin ña taahán tsi casí ñi nu javahá ndo yacan tyin tsa jacuahá ñi, maa ñi

tsa tsicá iñi nyivi cuví can. Tyin tsa tsatsí yo tsa iin yaha ñi cuví can, tan ña cuví jatívi can tsi ndo nuu Nyoo. ²³ Ñi tsa javahá tandíhi can tsicá iñi ñi tyin tacan vaha jacahnú ñi tsi Nyoo. Tan nditsa tyin tumaa tsa vaha javahá ñi tyin jandundaahví ñi tsi ñi tan janyehé ñi tundoho cuñu ñuhu ñi. Maa tyin nduve náa catyí javahá ñi tacan, tyin ña cuví quinyaa can tsa caquiñi tsa tsicá iñi ñi.

3

¹ Tsaḥa Nyoo ñayívi nyito coo yo tyin nandotoḡ ra Cristo, tan vityin nyaá ra xiin cuaḥa Nyoo nda gloria. Yacan cuenda nanducu ndo tsa vaha tsa tsahá ra tsi yo. ² Caça iñi ndo yacan, tan ña caça xaan iñi ndo tuhun tsa iyó nu ñuhu ñayívi ihya. ³ Tyin vityin ña javahá ca ndo tsa javahá ndo taḥan tsanaha, tyin tsa tsiḥi ndo iin caa ñi tsihin ra Cristo cuví can. Tan vityin iyó ndo iin caa ñi tsihin ra tsihin Nyoo. ⁴ Tan quívi cua quítsi nyico ra Cristo, ra tsa tsahá ñayívi nyito tsa iyó yo, tacan tan cua nyehe nyívi tyin maa ra cahnu ca cuví ra. Tan cua nyehe tucu ñi tsi nyooḥo iin caa ñi tsihin ra.

Nacaa tsicoḡ yo nu quítsi tsi ityi tsata tan nácaa cuñi tsi coo yo tsihin Nyoo vityin

⁵ Yacan cuenda jandíhi ndo tandíhi tsa ña vaha tan tsa caquiñi tsa cuñi cuñu ñuhu ndo. Tan ña cusu ndo tsihin iin ñaha tun ñaha ca tindaha ndo, taḥan ñi rayi tan ñaha. Tan ña cuñi ndo coo cuaḥa ndaha tyiñu ndo tyin tun tsicá iñi ndo yacan, tsitoho jacahnú ndo tan tyaá tsiyo ndo tsi Nyoo cuví can. Tyin tacan javahá nyívi tsa ña yihí tuhun Nyoo, maa tyin nyooḥo ña taahán tsi javaha ndo tacan. ⁶ Tsa cuenda tandíhi tsa caquiñi ihya cuxaán xaan Nyoo tsi nyívi tsa ña tyaá yahvi tsa caahán ra. Tan cua tatsi tuñi ra tsi ñi. ⁷ Tan juvin ñi tacan javahá tucu maa yo quívi tsa ña nacotoḡ yo tsi Nyoo. ⁸ Maa tyin vityin ña javaha ca ndo tandíhi tsa ña vaha can: ña cuxaan ca ndo. Ña xaan cuñi ndo nyehe ndo tsi nyívi taḥan ndo, tan ña jacuñi nyaa ndo tsi ñi, tan ña caḥan ndo cuendu siqui ñi. Tan ña caḥan ca ndo tsa ndavaha ñi. ⁹ Ña caḥan taḥan ca ndo cuendu siqui iin ndo tan inga ndo. Tyin tsa nacoḡ ndo tandíhi tsa ña vaha tsa javahá ndo taḥan tsanaha. ¹⁰ Tyin vityin tsa nanduví yo nyívi tsa tan iyó yo ñayívi nyito. Tan ndutsaá ca yo tumaa caá Nyoo, ra javahá tsi yo, nda cuanda coto vaha ca yo tsi ra. ¹¹ Ña ñiñi tsa cuví yo nyívi Israel, o nyívi Grecia, o nyívi inga ñuu. Tan ña ñiñi tatun tyaá ñi tuñi Nyoo tsi yo, o ña tyaá ñi; a cuví yo iin nyívi catsi iñi, o cuví yo iin ñi soho; a iyó tsitoho yo, o yoñi ndacá ñaha tsi yo, ña ñiñi xaan ca tuhun can. Ñiñi ca tsa iin ñi cuví tandíhi yo tsihin ra Cristo, tyin maa ra cuví tandíhi tan iyó ra tsihin tandíhi yo.

¹² Nyoo cuñi ra tsi yo tan nacatsi vaha ra tsi yo tyin cuví yo nyívi ra. Yacan cuenda coo ndo ñayívi nyito tumaa taahán tsi coo nyívi yihí cuenda ra; cundaahvi iñi ndo nyehe ndo tsi nyívi taḥan ndo; cuví ndo nyívi vaha tan ndaahvi jaha ndo tsi ndo nuu Nyoo; ndumasu ndo; cunyeet iñi ndo nyehe ndo tandíhi tsihi tan tundoho tsihin tsa si cuñi ndo. ¹³ Ña cundihi iñi ndo tsihin nyívi taḥan ndo. Jaha ndo tucahnu iñi tsi ñi tatun náa javahá ñi tsi ndo. Tumaa ra Cristo jaha ra tucahnu iñi tsi maa ndo, tacan cuñi tsi javahá tucu maa ndo tsihin nyívi. ¹⁴ Tyin tsa cuñi taḥan yo tsi yo, yacan cuví tsa ñiñi ca cuñi tsi. Tyin yacan cuví tsa jandu iin tsi yo. ¹⁵ Tan cuhva ndo tsa cundaca ñaha tsa taxin Nyoo añima ndo, tan na jaquihin ityi tsi tsi ndo. Tyin tsa cuenda yacan, cana Nyoo tsi ndo tan jandu iin ra tsi ndo tsihin ra Cristo. Tan cuhva ndo tyahvi nyoo tsi Nyoo.

¹⁶ Tan na cutu añima ndo tsihin tuhun ra Cristo, tan jacuaha tahan ndo tuhun ra tsi ndo. Tan jandu iin tahan ndo iñi ndo tsihin tandihí tsa tsiñi tuñi tsa tsahá Nyoo tsi ndo. Čata ndo yaa tan salmo. Tan čata ndo yaa tsa tsahá Tatyí Ii Nyoo tsi ndo tsihin tsa niñi iñi añima ndo. Tan tacan ñi nacuhva ndo tyahví nyoo tsi Nyoo. ¹⁷ Tatun náa tyiñu cua javaha ndo, o náa cua cahan ndo, javaha ndo can tsihin sivi Jutu Mañi yo Jesús. Tan juvin ñi cuhva can nacuhva ndo tyahví nyoo tsi Nyoo tsa cuenda maa ra Cristo.

Nu tsahá cuenda ra Pablo nácaa nducú yo cuhva coo vaha yo tsihin nyivi

¹⁸ Nyooho tsa iyó yíi cuhva ndo tsa cundaca ñaha yíi ndo tsi ndo. Tacan taahán tsi coo ndo, tyin yihí ndo cuenda Jutu Mañi yo. ¹⁹ Tan nyooho rayii, cuñi ndo tsi ñasihí ndo. Tan ña cundihi iñi ndo nyehé ndo tsi ñi. ²⁰ Nyooho tsa nyihí tyaa yahví ndo tsi jutu ndo tan tsi sihi ndo, tyin sii xaan cuñi Jutu Mañi yo tun javahá ndo tacan. ²¹ Nyooho tsa cuví ndo jutu tan sihi, ña yaha xaan jacuxaan ndo tsi sehe ndo, tyin coto nducuihya xaan iñi tsi. ²² Tan nyooho tsa cuví musu, tyaa yahví ndo tsi ra yihí ndaha tsi ndo. Ñavin tsa nyehé ñi ra tsi ndo tan tyaa yahví ndo tsi ra naha, tan catyi ra naha tyin vaha xaan ndo. Tyaa yahví nyooho tsi ra naha tsihin tsa niñi iñi añima ndo vasu ña nyehé ra naha, tyin Nyoo nyehé ra. ²³ Tandihí ñi tyiñu javahá ndo, javaha ndo can tsihin tsa sii cuñi ndo tumaa tsa jahá tyiñu ndo cuenda Jutu Mañi yo tan ñavin cuenda nyivi. ²⁴ Tyin tsitó ndo tyin maa Jutu Mañi yo ra Cristo cua cuhva ra tsa taahán tsi tsi ndo tyin maa ra cuví ra yihí ndaha tsi ndo tsa nditsa. ²⁵ Tan tatun javahá ndo tsa ña vaha, Nyoo cua tatsi tuñi ra tsi ndo tsa cuenda tsa ña vaha tsa javahá ndo, tyin ña siñ caá iin yo tan inga yo nuu Nyoo, tyin tandihí yo tan inducu ñi caá yo.

4

¹ Nyooho tsa iyó musu, cuñi tsi cuví ndo nyivi vaha tsihin musu ndo. Ndūcuhun iñi ndo tyin iyó ra yihí ndaha tucu tsi maa ndo nda gloria. Tan maa ra nyehé ra tsi ndo.

² Ndācan tahvi ndo tsihin tsa niñi iñi ndo. Čoo nyito ndo tan nacuhva ndo tyahví nyoo tsi Nyoo tsa cuenda tandihí maa. ³ Ndācan tahvi ndo tsa cuenda ndi, tyin na nuña Jutu Mañi yo añima nyivi tan tyaa soho ñi tuhun xeehe ra Cristo tsa caahán ndi tsihin ñi. Tsacatyí tuhun ihya nyii yu vehe caa. ⁴ Ndācan tahvi ndo tsa cuenda yu na cuví jacuaha yu tsi nyivi cuhva cuví cutuñi vaha iñi ñi tuhun ra Cristo, tumaa taahán maa tsi javahá yu.

⁵ Cuiiti čoo ndo tsihin nyivi tsa ña yihí tuhun Nyoo, tyin tacan tan cuví cahan ndo tuhun Nyoo tsihin ñi. ⁶ Tan maa ñi tuhun vaha čahan ndo tsihin ñi. Tan taahán tsi coto ndo nácaa cua nacahan ndo tatun nducu tuhun ñi náa nducu tuhun ñi tsi ndo.

Nu tsahá ra Pablo nacumi tsi nyivi yihí cuenda Nyoo ñuu Colosas

⁷ Ra Tíquico, ra yañi yo, ra jahá tyiñu tyiñu Jutu Mañi yo tsihin yu, cua nacatyí tuhun ra tsihin ndo nácaa iyó yu. ⁸ Yacan cuenda jaquitsí yu tsi ra nu yucú ndo na jandu iin ra iñi ndo tan catyi tuhun ra tsihin ndo nácaa yucú ndi. ⁹ Tan vatsí ndihí ra Onésimo, ra ñuu ndo, tsihin ra. Vaha xaan tsinú iñi ra tsi ra Cristo, tan cuñi xaan yo tsi ra. Cua catyi tuhun maa ra naha tsihin ndo tandihí tsa cuví nu nyii yu ihya.

¹⁰ Ra Aristarco, ra nyii tsihin yu vehe caa ihya, jaquitsí ra nacumi tsi ndo. Tan ra Marcos, tsatsin ra Bernabé, jaquitsí ra nacumi tsi ndo. Tan tsa jacoto

yu tsi ndo tyin tun tsaa ra Marcos nu yucú ndo, vaha çahan ndo tsihin ra. ¹¹Vatsí tucu nacumi tsi ndo jahá ra Jesús, ra tsa nañí tucu Justo. Tan tsitsi tsa tandihi ra Israel tsa yihí cuenda Nyoo, uñi taahan ñi ra ihya naha ra jahá tyiñu tyiñu Nyoo tsihin yu. Tan jandu iín xaan ra naha iñi yu. ¹²Vatsí tucu nacumi tsi ndo jahá ra Epafra, ra ñuu ndo. Musu ra Cristo cuví ra. Ña jandihí ra tsa tsicán tahvi ra tsi Nyoo tsa cuenda ndo na caca vaha ndo tsihin Nyoo. Tan coto vaha ca ndo nácaa taahán tsi javaha ndo tandihi cuhva cuñí ra. ¹³Yuhu cuví tsandaa tyin ra Epafra tsicán tahvi xaan ra tsa cuenda ndo, tan tsa cuenda nyivi tsa yucú ñuu Laodicea tan ñuu Hierápolis. ¹⁴Vatsí tucu nacumi tsi ndo jahá ra Lucas, ra tsa cuví doctor tsa cuñí xaan yo, tan ra Demas tucu.

¹⁵Cuhva ndo nacumi tsi ra yañi yo naha ra tan tsi ñi cuhva yo naha ñi tsa yucú ñuu Laodicea. Tan cuhva ndihí ndo nacumi tsi ña Ninfas tan tsi tandihi nyivi yihí cuenda Nyoo tsa ndu iín yuvehe ña. ¹⁶Tatun ndihí cahvi ndo carta ihya, tan jacuhun ndo itsi tsi nyivi yihí cuenda Nyoo nda ñuu Laodicea na cahvi ndihí ñi itsi. Tan na cuhva ñi carta tsa jacuhun yu tsi ñi, cahvi ndo. ¹⁷Çahan ndo tsihin ra Arquipo tan çatyí ndo: “Javaha vaha tyiñu tsa tsaha Jutu Mañi yo tsi un tyin javaha un.”

¹⁸Yuhu ra Pablo tyaá yu nacumi ihya tsi ndo. Na ña naa iñi ndo tyin nyii yu vehe caa tsa cuenda ra Cristo. Tan na nasoco Nyoo tsi ndo. Tan na cuvi tsi tacan ñi.

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Tesalónica

Nu tyaq ra Pablo tan ra cutahán tshin ra iin carta cuenda nyivi yihí tuhun Nyoo

¹ Yuhu ra Pablo ra Silvano tan ra Timoteo, jaquitsi ndi carta ihya tsi ndo tsa cuví ndo nyivi yihí cuenda Nyoo ñuu Tesalónica. Tyin iin caa ñi iyó ndo tshin Nyoo Jutu yo tan tshin Jutu Mañi yo Jesucristo. Naquihin ndo tsa vaha tan tsa taxin tsa tsahá ra naha coo añima ndo.

Vaha xaan tsinú iñi nyivi Tesalónica tsi Nyoo

² Tandihí ñi quiví tsahá ndi tyahví nyoo tsi Nyoo tsa cuenda tandihí ndo. Tan iin nyita ñi tsicán tahví ndi tsi ra tsa cuenda ndo. ³ Tan nducuhún iñi ndi tuhun ndo nuu Nyoo Jutu yo tyin ñi iñi ndo tsinú iñi ndo tsi ra tan jahá tyiñu ndo tyiñu ra. Tan iin nyita ñi jahá tyiñu ndo tsa cuenda tsa cuñí ndo tsi ra. Tan tshin tsa ñi iñi ndo ndatú ndo tsa ñihi ndo tsa cua cuhva Jutu Mañi yo Jesucristo tsi ndo. ⁴ Tyin tsitó ndi tyin Nyoo cuñí xaan ra tsi ndo, nyooho yañi, tan maa ra nacatsi vaha tsi ndo. ⁵ Tyin quiví cahān ndi tuhun Nyoo, nácaa jacacú ra tsi yo, tshin ndo, cahān ndi tuhun tshin tunyee iñi Tatyí Ii Nyoo, tan tsitó vaha ndi tyin tuhun nditsa cuví tsi. Tan ñavin tuhun caahān ñi cuví tsi. Tan nyehe ndo nácaa tsicoq ndi quiví tsiyucú ndi tshin ndo. Tsicoq ndi tacan tsa cuenda tsa vaha tsi maa ndo.

⁶ Tan quitsaha iyó ndo cuhva iyó ndi, tan cuhva iyó Jutu Mañi yo. Tyin naquihin cuenda ndo tuhun Nyoo, vasu cuaha tundoho nyehe ndo tsa cuenda tsi. Maa tyin sii xaan cuñí ndo tyin maa Tatyí Ii tsahá can tsi ndo.

⁷ Tan tsa tacan iyó ndo, jatyinyeé xaan ndo tsi tandihí nyivi yihí cuenda Nyoo tanñi cahnu Macedonia tan tanñi cahnu Acaya ihya, tyin nyehe ñi cuhva iyó ndo tshin Nyoo. ⁸ Ñavin Macedonia tan Acaya ñi, maa tyin tandihí ñi ityi nu tsiñi nyivi tuhun ndo tsitó ñi tuhun Jutu Mañi yo tan tsitó ñi tyin tsinú xaan iñi ndo tsi Nyoo. Tan yacan cuenda nda cuanda ña ñiñi ca cuñí tsi cahan ndi tuhun Nyoo tshin ñi. ⁹ Tyin juvin ñi maa ñi nacatyí tuhun tshin ndi nácaa tsa vaha xaan naquihin cuenda ndo tsi ndi. Nacatyí tuhun ndihí tucu ñi tshin ndi nácaa jandihí ndo tsa jacahnú ndo tsitoho tan quitsaha jahá tyiñu ndo tyiñu Nyoo nyito. ¹⁰ Tan nacatyí tuhun tucu ñi nácaa ndatú ndo quiví quitsi ra Jesús Sehe Nyoo inga tsaha tsa cua queue ra andivi. Ra ican cuví ra tsa janandoto Nyoo. Tan maa ra cuví ra jacacú tsi yo tsa ña tatsi tuñi ca Nyoo tsi yo quiví cua tatsi tuñi ra tsi nyivi.

2

Tyiñu jahá ra Pablo ñuu Tesalónica

¹ Nyooho yañi, tsitó ndo tyin ñavin tsa cuatu quitsi ndi cahān ndi tuhun Nyoo ñuu ndo. ² Tyin tsitó ndo nácaa nyehe ndi tundoho jahā nyivi ñuu Filipino tsa ndi cumañi ca tsaaq ndi ñuu ndo. Tan vasu nyehe xaan ndi tundoho ñuu can, maa tyin quiví tsaaq ndi ñuu ndo cahān ndi tuhun Nyoo tshin ndo tshin tsa ña yuuhví ndi. Tan vasu xaan xaan cuñi nyivi ñuu ndo, maa tyin jatyinyee xaan Nyoo tsi ndi tan ñi iñi ndi jacotoq ndi tsi ndo cuhva jacacú ra tsi yo. ³ Tyin

tuhun tsa tsahá cuenda ndi tsi ndo maa ñi maa tsa nditsa cuví tsi. Tan nduve tsa caquiñi tsicá iñi ndi. Tan ndi ñavin tsa cuñí ndi jandavi ñaha ndi tsi ndo. ⁴ Nduve tsa ña vaha cahán ndi, tyin Nyoo nyehé ra tsi ndi, tan maa ra tava tyiñu tsi ndi tsa jacoto ndi tsi ndo nácaa jacacú ra tsi yo. Tan tacan caahán ndi tumaa tava tyiñu maa ra tsi ndi. Tyin ña cuñí ndi tsa vaha cahán nyívi tuhun ndi, maa tyin cuñí ndi tsa vaha cahán Nyoo tuhun ndi, tyin maa ra nyehé ra cuhva iyó yo. ⁵ Tan tsitó ndo tyin ndi iin tsaha tan ña cahán ndi tsihin tuhun tsa tyaqui xaan tsa cuñí ndi jandavi ñaha ndi tsi ndo. Tan ndi ñavin tsa cuñí ndi jaha canaa ndi xuhun tan cahán ndi tuhun Nyoo tsihin ndo. Maa Nyoo cuví tsandaa tyin nditsa tsa caahán ndi ihya. ⁶ Tan ndi iin tsaha ña nducú ndi cuhva jacahnu nyívi tsi ndi, ndi nyooho, ndi inga ñi. Nditsa, iyó ndatu ndi tsi ndi tsa jacahnu ndo tsi ndi tyin maa ra Cristo tava tyiñu tsi ndi, maa tyin ña cuñí ndi tsa javaha ndo tacan tsihin ndi. ⁷ Tan vita cahán ndi tsihin ndo. Tumaa iin ñaha iyó sehe jahá cuenda vaha ña sehe ña. Tacan cuñí ndi jatyinyee ndi tsi ndo. ⁸ Cuñí xaan ndi tsi ndo, tan yacan cuenda ñavin tuhun Nyoo ñi cuñí ndi cuhva ndi tsi ndo, tyin cuñí ndi cuhva tucu ndi nda cuanda ñayívi iyó ndi tsa cuenda tsa cuñí ndi tsi ndo. ⁹ Nyooho yañi, nducuhún iñi ndo nácaa jahá tyiñu ndi tan tsatsj ndi quívi tsiyucú ndi tsihin ndo. Jahá tyiñu ndi tsinu cahñi tan tsacuaa tyin ña cuñí ndi jatyañu ndi tsi ndo tsitsi tsa caahán ndi tuhun Nyoo tsihin ndo.

¹⁰ Tan nyooho cuví ndo tsandaa, tan tacan tucu Nyoo, tyin maa ñi tsa vaha tan tsa ndaa javahá ndi quívi tsiyucú ndi tsihin ndo tsa cuví ndo nyívi tsinú iñi tsi ra Cristo. Maa tyin maa ñi maa cuhva cuñí Nyoo javahá ndi, tan yacan cuenda ña cuví cahán ndo tsi ndi. ¹¹ Tan tsitó tucu ndo nácaa jandu iin ndi iñi intuhun intuhun ndo tsihin tuhun tsa tsahá cuenda ndi tsi ndo. Tsahá ndi tunyee iñi tsi ndo tumaa iin rayi tsa iyó sehe tsahá ra tunyee iñi tsi sehe ra. ¹² Tan catyi ndi tsihin ndo, catsi coo ndo tumaa taahán tsi coo nyívi yihí cuenda Nyoo. Tyin maa Nyoo caná tsi ndo tyin coo ndo nu ndacá ñaha ra, tan nyehé ndo tsa cahnu cuví ra.

¹³ Yacan cuenda iin nyita ñi tsahá ndi tyahvi nyoo tsi Nyoo, tyin quívi tsiñi ndo tuhun ra tsa cahán ndi tsihin ndo, naquihín cuenda ndo tuhun can tyin nacoto ndo tyin tuhun Nyoo cuví tsi tan ñavin tuhun ra ñayívi cuví tsi. Tan nditsa tsa tuhun Nyoo cuví tsi, tyin quitsahá tsinú iñi ndo tsi Nyoo tan nasamá cuhva iyó ndo. ¹⁴ Yahá can tan nyehé tucu maa ndo tundoho jahá nyívi ñuu ndo. Tumaa tsa nyehé nyívi yihí cuenda ra Cristo Jesús ñuu tsa cayucú Judea. Tacan nyehé ñi can tundoho jahá nyívi Israel. ¹⁵ Tan ñi Israel can tsahñi ñi tsi Jutu Mañi yo Jesús tumaa tsahñi ñi tsi ra cuví ndusu yuhu Nyoo tahán tsanaha. Ñi Israel can tsinyaa ndaha ñi tsi ndi. Ñavin cuhva cuñí Nyoo iyó ñi. Tan xaan iñi ñi tsi tandihí maa nyívi. ¹⁶ Tatun cuñí ndi cahán ndi tuhun Nyoo tsihin nyívi tsa ñavin ñi Israel cuví na jacacu Nyoo tsi ñi, ña tsahá ñi Israel can cahán ndi. Tan tsa cuenda tsa tyasí ñi nu caahán ndi, nducuaaha ca cuatyí ñi. Tan vityin nu ndihí tuhun tatsí tuñi xaan Nyoo tsi ñi.

Nu cahán ra Pablo tyin cuñí ra cunyehe ra nu yucú nyívi Tesalónica inga tsaha

¹⁷ Nyooho yañi, tsa yahá tsa quitá ndi ñuu ndo juhva quívi, vasu ndi maa ña nyehé ndi tsi ndo, maa tyin ñuhú xaan iñi ndi tsi ndo. Tan tsihin tsa nñi iñi ndi cuñí ndi cunyehe ndi nu yucú ndo inga tsaha. ¹⁸ Tan nducú ndi cuhva quitsi ndi, maa tyin ña cuví. Yuhu ra Pablo, cuaha xaan tsaha nducú yu cuhva quitsi ndi, maa tyin tandihí ñi tsaha tsa cuñí ndi quitsi ndi, ña tsahá nu ña

vaha. ¹⁹ Maa tyin ¿náa ndatú ndi? Tan ¿yóo cuenda cusii iñi ndi, tan vaha cuñi ndi? ¿A ñavin tsa cuenda maa ndo cua cusii xaan iñi ndi nuu Jutu Mañi yo Jesucristo quivi quitsi ra inga tsaha? ²⁰ Tyin tsa cuenda tsa vaha cuahán ndo tsihin Nyoo tan nyehé yo tyin ña cuatu jahá tyiñu ndi. Tan sii xaan cuñi ndi tsa cuenda yacan.

3

¹ Tan ña cunyeē ca iñi ndi tsa cuñi ndi coto ndi nácaa cuahán tsinú iñi ndo tsi Nyoo. Tan tyaa ndi cuhva tsa ndoo intuhun ñi maa yu ñuu Atenas. ² Tan jaquitsi yu tsi ra Timoteo yañi yo, na quitsi nyehé ra nu yucú ndo. Ra ican cuvi musu Nyoo tyin inducu ñi jahá tyiñu ra tsihin ndi caahán ra tuhun Nyoo nácaa jacacú ra Cristo tsi yo. Jaquitsi ndi tsi ra nu yucú ndo na jandu iin ca ra iñi ndo tan cuhva ca ra tunyee iñi tsi ndo na tsinú ca iñi ndo tsi Nyoo. ³ Tyin tacan tan ndi intuhun ndo tan ña ndu uvi iñi ndo tsihin tsa nyehé ndo tundoho. Tyin nyooho tsitó ndo tyin nyaá tsa nyehé yo tundoho. ⁴ Tyin nda ndi yucú ca maa ndi tsihin ndo, tan cahan ndi tsihin ndo tyin nyaá cua nyehé yo tundoho. Tan tsitó vaha maa ndo tyin tacan cuvi. ⁵ Ña cunyeē ca iñi yu tsa cuñi yu coto yu nácaa yucú ndo. Yacan cuenda jaquitsi yu tsi ra Timoteo na nyehé ra tun vaha tsinú iñi ndo tsi Nyoo. Tyin yuuhvi yu coto jandavi ñaha nu ña vaha tsi ndo tan javaha nyico ndo tsa ña vaha. Tun tacan cua cuvi, tsa cuatu ñi jahá tyiñu ndi nu yucú ndo.

⁶ Maa tyin vityin tsa tsaá nuhu ra Timoteo tsa quitsi ra nu yucú ndo. Tan nacatyí tuhun ra tsihin ndi tyin nii xaan iñi ndo tsinú iñi ndo tsi Nyoo. Tan cuñi tahan xaan ndo tsi ndo. Tan catyí ra tyin ñuhú xaan iñi ndo tsi ndi tan cuñi xaan ndo nyehé ndo tsi ndi; tumaa tsa cuñi tucu maa ndi nyehé ndi tsi ndo. ⁷ Yacan cuenda, nyooho yañi, vasu ndi maa cuaha tsa taahán ndi tan cuaha tundoho nyehé ndi, maa tyin vaha xaan cuñi ndi tsa tsitó ndi tyin nyooho vaha tsinú iñi ndo tsi Nyoo tan ña nacoó ndo tsi ra. ⁸ Tyin tumaa tsa ndutsaa ñayivi iyó ndi cuñi ndi tsa tsitó ndi tyin nyooho vaha tsinú iñi ndo tsi Nyoo. ⁹ Ndi ña ñihí ca ndi cuhva cuhva ndi tyahvi nyoo tsi Nyoo tsa cuenda ndo. Tyin sii xaan cuñi ndi nuu Nyoo tsa cuenda tyin vaha cuahán ndo tsihin ra. ¹⁰ Tsicán tahvi xaan ndi tsi Nyoo tsinu cahñi tan tsacuaa, tyin cuñi xaan ndi quitsi nyehé ndi tsi ndo. Tacan tan cuvi jandu iin vaha ndi iñi ndo tan tsinú vaha ca iñi ndo tsi ra, tan ña cumañi ca tsa cumañi tsi ndo tsihin cuhva tsinú iñi ndo tsi ra.

¹¹ Tan vityin ndatú ndi tunyee iñi Nyoo Jutu yo tan Jutu Mañi yo Jesucristo, maa ra naha cua jatyinyee tan cuvi quitsi ndi nu yucú ndo. ¹² Tan na jatyinyee ca Jutu Mañi yo Jesucristo tsi ndo na cuahnu ca ndo tsihin tuhun ra, tyin tacan tan cuñi tahan ca ndo tsi ndo tan cuñi tucu ndo tsi tandihí ca nyivi tumaa tsa cuñi maa ndi tsi ndo. ¹³ Tyin tacan tan cuvi coo ndo tsihin ra tyin tsa yahá janduvahá ra añima ndo. Tan ña cua coo ca cuatyí ndo nuu Nyoo Jutu yo quivi quitsi Jutu Mañi yo Jesucristo tsihin tandihí nyivi yihí cuenda ra.

4

Nacaa taahán iñi Nyoo coo yo

¹ Vityin nyooho yañi, tsihin sivi ra Jesús caahán ndaahvi xaan ndi tsihin ndo tan tsicán ndi tsi ndo tsa ña jandihí ndo tsa iyó ndo tumaa tsa janahá ndi tsi ndo. Jañihi ca ndo nducu ndo cuhva coo vaha ndo nuu Nyoo tumaa taahán iñi maa ra.

² Tyin nyooho tsa tsitó maa ndo nácaa tava tyiñu ndi tsi ndo tumaa tava tyiñu maa Jutu Mañi yo Jesús tsi ndi. ³ Tyin tsa taahán iñi ra javaha yo yacan cuví tsa cuita iñi yo tsi intuhun ñi maa ra, tan nducu yo cuhva nduvaha añima yo nuu ra. Tan nyooho, rayii, ña coo ndo tsihin ñaha tun ñavin ñasihi ndo cuví ña, tan ñiñaha na ña coo ñi tsihin rayii tun ñavin yii ñi cuví ra. ⁴ Tan nyooho yañi, intuhun intuhun ndo cuñí tsi coto ndo nácaa coo vaha ndo tsihin ñasihi ndo. Iin ñi maa ña cuñi ndo tan jaha ndo tsa ñayivi tsi ña tan ña nducu ndo inga ñaha. ⁵ Ña caca caquiñi iñi ndo nyehe ndo tsi ñasihi ndo, ña javaha ndo tumaa javahá nyivi ña yihí tuhun Nyoo. ⁶ Ndi intuhun ndo tan ña jandavi ñaha ndo tsi inga ca rayii tan coo ndo tsihin ñasihi ra naha. Tyin tun javaha ndo tacan, ñihi xaan cua tatsi tuñi Jutu Mañi yo tsi ndo, tumaa tsa cahán ndi tsihin ndo. ⁷ Tyin Nyoo caná ra tsi yo tsa coo yo cuhva cuñi maa ra, tan ña javaha yo tsa caquiñi. ⁸ Yacan cuenda nyivi ña cuñi tyaa soho tuhun caahán ndi, ñavin tuhun caahán ndi ña naquihin ñi, tyin ña naquihin ñi tuhun caahán Nyoo ra tsa tsahá Tatyí Ii ra tsi yo. ⁹ Maa tyin tuhun tsa cuñi tahan yo tsi yo ña tsiñi ñuhu tsa tyaa yu itsi nu carta ihya. Tyin tsa janaha maa Nyoo tsi yo nácaa taahán tsi cuñi tahan yo tsi yo. ¹⁰ Tan nyooho tsa tsitó maa ndo tuhun can tyin cuñi ndo tsi tandihi nyivi yihí tuhun Nyoo tsa iyó Macedonia nu iyó ndo. Maa tyin caahán ndaahvi yu tsihin ndo, yañi, tyin na jañihi ca ndo cuñi tahan ndo tsi ndo tsa intuhun intuhun quivi. ¹¹ Nducu ndo cuhva coo taxin ndo. Tan ña tyihi ndo tsi ndo nu ña taahán tsi quihvi ndo. Jaha tyiñu ndo iin ñi tyiñu maa ndo. Tan jaha tyiñu ndo tsihin ndaha ndo tumaa cahán ndi tsihin ndo quivi can. ¹² Tacan javaha ndo tyin tacan tan nyivi ña nacotó tsi Nyoo cua jaha ñi tsa ñayivi tsi ndo. Tan ña cua cumañi tsa cumañi tsi ndo.

Nacaa cua cuví quivi quitsi Jutu Mañi yo Jesús inga tsaha

¹³ Nyooho yañi, cuñi ndi tsa coto ndo nácaa taahán nyivi tsa tsa tsihi, tyin tacan tan ña nducuihya iñi ndo tumaa cuihya cuñi nyivi ña cua nandoto tsa ña cua coo tsihin Nyoo. ¹⁴ Tumaa tsa tsinú iñi yo tyin tsihi ra Jesús tan nandoto ra, tacan tsinú tucu iñi yo tyin Nyoo cua janandoto ra tsi nyivi tsinú iñi tsi ra tun tsa tsihi ñi.

¹⁵ Yacan cuenda catyí ndi tsihin ndo tumaa jacuahá Jutu Mañi yo tsi ndi, tyin yoo tsa nyito nda quivi quitsi ra, ña jihna ca yo cua cuhun tan nacoo yo tsi nyivi tsa tsihi. ¹⁶ Tyin juvin ñi maa Jutu Mañi yo cua nuu, tan cua cana tsaa ra tyin maa ra ndacá ñaha. Tan cua cana tsaa ra cuví itiyi nuu tsihin ángel. Tan cua navacu trompeta Nyoo. Tacan tan nyivi tsa tsinú iñi tsi ra Cristo tan tsihi ñi, jihna ca ñi cua nandoto. ¹⁷ Yahá can tan yoo tsa ndi nyito cua ndaa yo iin caa ñi tsihin ñi nu vico, nu cua ñihi tahan yo tsihin Jutu Mañi yo. Tacan tan cua coo cuii yo tsihin ra. ¹⁸ Yacan cuenda jandu iin tahan ndo iñi ndo tsihin tuhun ihya.

5

¹ Nyooho yañi, ña ñiñi cuñi tsi jacoto yu tsi ndo ama cua cuví tandihi tsa tsa yahá cahán yu tuhun tsihin ndo. ² Tyin tsa tsitó maa ndo tyin ña cua coto yo náa cuhva, náa quivi cua quitsi Jutu Mañi yo. Tyin sana iñi yo cua quitsi ra tumaa sana iñi yo quihvi ñasuhu yuvehe yo tsa tsacuaa tacan cua cuví. ³ Tyin quivi tsa catyí nyivi tyin taxin ñi caa, tan nduve maa tsa yuuhvi ñi, tacan tan sana iñi ñi tan cua quitsi tundoho siqui ñi. Tumaa iin ñaha ñuhú sehe, sana iñi ña tan quitsahá cuuhvi tsitsi ña. Tan tacan cua tahan nyivi quivi quitsi Jutu Mañi yo, tyin ña cua cuví ca cunu xeehe ñi. ⁴ Maa tyin nyooho yañi, quivi

quitsi Jutu Mañi yo ña cua tahan ndo tumaa taahán nyívi, tun sana iñi ñi tan quihví ñasuhu yuvehe ñi tyin nyooho ñavin ca nu naa iyó ndo. ⁵ Tyin tandihi yo tsitó yo nácaa taahán tsi coo yo tyin jandunditsín Nyoo añima yo, tan ña iyó ca yo nu naa tumaa iyó nyívi ña nacotó tsi Nyoo. ⁶ Yacan cuenda catsi coo ndo cçonyito ndo tan ña cusu ndo tumaa iyó nyívi ña nacotó tsi Nyoo, tyin ñi ican ña tyaá yahvi ñi tsa cua quitsi Jutu Mañi yo inga tsaha. ⁷ Tyin nyívi quixí, quixí ñi tsacuaa, tan nyívi tuhva tsihí nyixi, tsiñi ñi tsacuaa. ⁸ Maa tyin yoo tsa cuví yo nyívi iyó tsinu cahñi, na catsi coo yo. Tumaa iyó iin andaru tyin iin andaru jahá cuenda ra tsi ra tsihin iin caa tsa yihí yiqui nyica ra, tacan taahán tsi jaha yo cuenda tsi yo tsihin tsa tsinú iñi yo tsi Nyoo, tan tsihin tsa cuñi yo tsi tandihi nyívi. Tan na jaha tucu yo cuenda tsi yo tumaa jahá cuenda andaru jiñi ra tsihin iin caa, tacan taahán tsi cuita iñi yo tyin cua cacu yo. ⁹ Tyin Nyoo ña nacatsi ra tsi yo tsa tatsi tuñi ra tsi yo, nacatsi ra tsi yo tyin jacacu Jutu Mañi yo Jesucristo tsi yo jaha ra. ¹⁰ Tyin ra Jesucristo tsihí ra tsa cuenda yo tyin tacan tan coo yo iin caa ñi tsihin ra. Yoñi jaha vasu tsa tsihí yo, a nyito yo, maa tyin tandihi yo cua coo yo iin caa ñi tsihin ra. ¹¹ Yacan cuenda jandu iin ndo iñi nyívi yihí tuhun Nyoo tsihin ndo tan cuhva tahan ndo tunyee iñi tsi ndo, tumaa javahá ndo nda vityin.

Nu tsahq cuenda ra Pablo tsi nyívi yihí cuenda Nyoo

¹² Nyooho yañi, caahán ndaahvi xaan ndi tsihin ndo, jaha ndo tsa ñayívi tsi ra jahá tyiñu, ra cuví ityi nuu nu yucú ndo. Tan tsahá cuenda ra naha cuhva coo ndo tyin tyiñu Jutu Mañi yo javahá ra naha. ¹³ Cuñi tsi tsa jaha xaan ndo tsa ñayívi tsi ra naha. Tan cuñi ndo tsi ra naha. Tyin tyiñu Jutu Mañi yo javahá ra naha. Tan ña cañi tahan ndo.

¹⁴ Tavá tucu ndi tyiñu tsi ndo yañi, jacahan ndo tsi nyívi ña cuñi jaha tyiñu. Tan jandu iin ndo iñi nyívi tsa ndu uvi xaan iñi. Tan jatinyee ndo tsi nyívi ña ñihi vaha cuahan tsihin Nyoo, ñi tsa ñaha ca tsinu vaha iñi tsi ra. Tan ña cundihí iñi ndo tsihin nyívi.

¹⁵ Jaha ndo cuenda coto javaha ndo tsa ndavaha ñi tsihin nyívi javahá tsa ña vaha tsihin ndo. Nducu ndo cuhva javaha ndo tsa vaha tsihin nyívi yihí tuhun Nyoo tsihin ndo tan tsihin tandihi ca nyívi.

¹⁶ Cusi iñi ndo tandihi ñi quivi. ¹⁷ Tan ña jandihí ndo tsa tsicán tahvi ndo tsi Nyoo. ¹⁸ Cuhva ndo tyahvi nyoo tsi Nyoo vasu ndi maa nyehé ndo tundoho. Tyin tacan cuñi maa Nyoo javaha yo tsa cuví yo nyívi tsinú iñi tsi ra Cristo Jesús.

¹⁹ Ña ndahva ndo ñuhu Tatyí Ii Nyoo tsa iyó añima ndo. ²⁰ Ña vacu nducu ndo tsa caahán ra cuví ndusu yuhu Nyoo. ²¹ Nyehé jihna ndo tun tandihi tsa caahán ra tan vaha tsi tumaa tsa taahán tsi nyehe ndo tandihi inga ca tuhun. Tan naquihin ndo tsa vaha. ²² Ña tyihi ndo tsi ndo nu iyó tsa ña vaha.

²³ Tan maa Nyoo, ra tsahá tsa taxin coo añima yo, na janduvaha ca ra tsi ndo tan cuhva cuenda vaha ca ndo tsi ndo tsi ra. Tan na jaha cuenda ra añima ndo tan tsihin tsa tsiñi tuñi iñi ndo tan tsihin tsa tsicá iñi ndo tan tsihin cuñu ñuhu ndo tyin tacan tan ña coo ca cuatyí ndo quivi quitsi Jutu Mañi yo Jesucristo inga tsaha. ²⁴ Ra tsa caná tsi yo, cuví cuita iñi yo tsi ra, tyin maa ra cua javaha tandihi maa tsa caahán yu ihya.

Nu ndihí cahñ ra Pablo tan tsahq ra nacumi tsi nyívi

²⁵ Yañi, ndacan tahvi ndo tsa cuenda ndi.

²⁶ Tan cuhva ndo nacumi tsi tandihi nyívi yihí cuenda Nyoo.

²⁷ Tává tyĩñu yu tsi ndo tsihin sivi Jutu Mañi yo na cahvi ndo carta ihya nuu tandihĩ nyivi tsa yihĩ cuenda Nyoo.

²⁸ Tan maa Jutu Mañi yo Jesucristo nasoco tsi ndo. Tan na cuvi tsi tacan ñi.

Carta Tsinú Uvi Tsa Jacuhun Ra Pablo Tsi Nyívi Yihí Cuenda Nyoo ñuu Tesalónica

Nu tyaq ra Pablo, tan ra cutahán tsihin ra, tsa tsinu uvi carta tsa cuenda nyívi yihí tuhun Nyoo ñuu Tesalónica

¹ Yuhu ra Pablo, ra Silvano tan ra Timoteo jaquitsí ndi carta ihya tsi ndo tsa cuví ndo nyívi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan Jutu Mañi yo Jesucristo. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu cahān ra Pablo nácaa cua tatsi tuñi Nyoo tsi nyívi iyó cuatyí quívi quitsi ra Cristo

³ Nyooho yañi, cuñí tsi tsa nacuhva ndi tyahvi nyoo tsi Nyoo tsa cuenda ndo tandihí ñi quívi, tyin tacan taahán maa tsi javahá ndi tyin ñihi xaan cuahán tsinú iñi ndo tsi Nyoo tsa iin iin quívi, tan cuñí xaan ndo tsi nyívi yihí tuhun Nyoo tsihin ndo. ⁴ Yacan cuenda sñi xaan cuñí ndi caahán ndi tuhun ndo tsihin nyívi yihí cuenda Nyoo inga ca vehe ñuhu. Tyin nyooho tunyee xaan iñi ndo nyicún ndo tsi Nyoo tan vaha xaan tsinú iñi ndo tsi ra vasu ndi maa nyehé xaan ndo tundoho jahá nyívi. ⁵ Tandihí yacan janahá tyin Nyoo cuiñi xaan jacutuñi ra tyin cua catyi ra tyin taahán maa tsi cuhun nyooho tsa nyehé xaan tundoho nu ndacá ñaha ra tyin tsa cuenda ra nyehé xaan ndo tundoho.

⁶ Tan tsa cuenda maa Nyoo, taahán tsi janyehe ra tundoho tsi nyívi tsa janyehe xaan tundoho tsi ndo. ⁷ Tan nyooho tsa nyehé xaan tundoho jahá nyívi, cua cuhva ra quitatu ndo iin caa ñi tsihin ndi quívi cua quitsi nyico Jutu Mañi yo Jesucristo tsa quee ra andívi tsihin ñuhu tan tsihin ángel tsa iyó tunyee iñi maa ra. ⁸ Tyin tatsi tuñi ra tsi nyívi tsa ña nacotó tsi Nyoo, ñi tsa ña tyaá yahvi tuhun tsa jacacú ra tsi yo. ⁹ Ñi ican cua janyehe Nyoo tundoho tan ña cua cundihí maa tsa nyehe ñi tundoho, ña cua nyehe ñi tsi Jutu Mañi yo Jesucristo tan ña cua nyehe ñi tsa cahnu cuví ra tsihin tunyee iñi tsa iyó tsi ra ¹⁰ quívi cua quitsi ra. Tyin quívi can nyívi yihí cuenda ra, ñi tsinú iñi tsi ra, cua jacahnu ñi tsi ra. Tan iyo xaan cua cuñi ñi nyehe ñi tsi ra. Tan tyañu nyívi can, cua cuyucu tucu nyooho tyin tsinú iñi ndo tuhun tsa cahān ndi tsihin ndo.

¹¹ Yacan cuenda tsicán tahvi ndi tsi Nyoo tsa cuenda ndo tandihí ñi quívi, na jatinyee ra tsi ndo. Tacan tan catyi ra tyin taahán tsi tsi ndo tsa cuví ndo nyívi canā maa ra. Tan tsicán tahvi tucu ndi tsi ra na jatinyee ra tsi ndo tan cuví javaha ndo tsa vaha tsa cuñí ndo javaha ndo. Tan na quita vaha tandihí tyiñu ra tsa javahá ndo tsihin tunyee iñi tsahá ra tsi ndo tyin tsinú iñi ndo tsi ra. ¹² Tacan tan cua jacahnu nyívi sivi Jutu Mañi yo Jesucristo, tyin nyehé ñi cuhva iyó ndo. Tan cua jacahnu tucu maa ra tsi ndo nuu nyívi tsa cuenda tumañi iñi tsa tsahá ra tsi yo jahá Nyoo.

2

Ra tsa nduve ley Nyoo iyó añima

¹ Nyooho yañi, vityin cuñi yu cahan yu tsihin ndo tsa cuenda quívi quitsi nyico Jutu Mañi yo Jesucristo tan ndu iin yo tsihin ra. Caahán ndaahvi xaan

ndi tsihin ndo, ² ña numi xaan sama ndo cuhva tsicá iñi ndo. Tan ña nayuhvi ndo tatun quita tuhun jaha tatyí ña vaha tyin tsa tahañ tsi quiví quitsi Jutu Mañi yo; vasu ndi maa nyivi caahán can, a jaquitsí ñi carta tsi ndo tan catyi ñi tyin yuhu jaquitsí carta can tsi ndo. Ña tsinu iñi ndo tandihí yacan. ³ Ndi iin tsaha tan ña cuhva ndo jandavi ñaha nyivi tsi ndo. Tyin tsa ndi cumañi ca tahañ tsi quiví quitsi Jutu Mañi yo, cuaha xaan nyivi, xaan cua cuñi ñi nyehe ñi tuhun Nyoo, tan cua quituvi rayi tsa nduve ley Nyoo iyó aña, ra tsa nyaá maa cuhun anyaya. ⁴ Ra ican cuví ra xaan iñi tsi Nyoo. Cua cañi tahañ ra tsihin tandihí tsa nyisó sivi Nyoo; tan cua cañi tahañ ra tsihin tandihí tsa jacahnú tsi Nyoo. Tan nda cuanda tsitsi vehe ñuhu cahnu Nyoo tan cua cunyaa ra tan cua cundaca ñaha ra, cua jaha ra tyin Nyoo cuví ra.

⁵ ¿A ña nducuhún iñi ndo tyin nda ndi nyií ca yu tsihin ndo tan cahañ yu tuhun ihya tsihin ndo? ⁶ Maa tyin nyooho tsitó ndo náa tsa tyasí tan ñaha ca quituvi ra. Nda tahañ maa tsi quituvi ra tan cua quituvi ra. ⁷ Vityin tsa iyó tatyí tsa ña tsahá tyaá yahvi nyivi tsi Nyoo, maa tyin ndi nyií xeehe nu, tyin iyó iin ra tsa ña tsahá quituvi nu. Maa tyin quiví cua quita ra tan cundihí tsa tyasí ra, tacan tan cua quituvi nu. ⁸ Tacan tan cua quituvi ra tsa nduve ley Nyoo iyó aña, maa tyin Jutu Mañi yo Jesús cua cahñi ra tsi ra tsihin tuhun quitá yuhu ra tan cua janaa ra tsi ra tsihin tsa xiñu tsa cahnu cuví ra quiví quitsi ra inga tsaha. ⁹ Ra ña vaha can, nu ña vaha cua jaquitsí tsi ra. Tan cua cuhva nu tandihí tsa nyityi nu, coo tsi ra, tan tsihin seña tan tsa iyo cua javaha ra cua jandavi ñaha ra tsi nyivi. ¹⁰ Cua cuatyíñu ra tandihí nuu tsa ña vaha tan tsihin yacan cua jandavi ñaha ra tsi nyivi tsa ña cua cacu. Tyin ñi can ña cuñi ñi naquihin cuenda ñi tuhun Nyoo tsa nditsa tan cacu ñi. ¹¹ Tan yacan cuenda cua cuhva Nyoo ndatu tsa jandavi ñaha tatyí ña vaha can tsi ñi. Tan cua tsinu iñi ñi tsa ña nditsa. ¹² Tacan tan cua tatsi tuñi ra tsi tandihí ñi tyin ña cuñi ñi tsinu iñi ñi tuhun nditsa. Tyin taahán ca iñi ñi javahá ñi tsa ña vaha.

Nu cahañ ra Pablo tuhun nyivi tsa nacatsí Nyoo tyin cacu ñi

¹³ Maa tyin tandihí quiví cuñi tsi cuhva ndi tyahvi nyoo tsi Nyoo tsa cuenda nyooho yañi. Tyin cuñi xaan Jutu Mañi yo tsi ndo. Tan nacatsí ra tsi ndo nda jihna, [nda ndi cumañi ca tsinu ñuhu ñayivi], tyin tsihin tsa janduvahá Tatyí Ii ra aña ndo tan tsihin tsa tsinú iñi ndo tuhun nditsa cuví cacu ndo. ¹⁴ Yacan cuenda cana Nyoo tsi ndo quiví tsa cahañ ndi tuhun ra tsihin ndo tyin tacan tan ñihi ndo tsa cahnu cuví Jutu Mañi yo Jesucristo coo tsi ndo.

¹⁵ Yacan cuenda nyooho yañi, jandu iin ndo iñi ndo. Tan ña naa iñi ndo tandihí tsa tsahá cuenda ndi tsi ndo tan jacuahá ndi tsi ndo nda ndi yucú ca maa ndi tsihin ndo. Tan ña naa iñi ndo tandihí tuhun tsa tyaá ndi nu carta tsa jaquitsí ndi tsi ndo. ¹⁶ Jutu Mañi yo Jesucristo tan Nyoo Jutu yo, juvin ra cuñi tsi yo; tan tsahá ra tunyee iñi tsi yo tandihí tyembu, tan tsahá ra naha tsa cuita iñi yo coo yo tsihin ra. Tandihí yacan tsahá ra tsi yo quiví tsahá ra tsa vaha tsa iyó tsi ra tsi yo. ¹⁷ Na cuhva ra tsa sii cuñi aña ndo. Tan jandu iin ra iñi ndo, tacan tan cua cahan ndo tan javaha ndo tandihí tsa vaha.

3

Nu tsicán ra Pablo na ndacan tahvi nyivi tsi Nyoo tsa cuenda ra naha

¹ Tan inga tuhun, nyooho yañi, ndacan tahvi ndo tsa cuenda ndi tyin tacan tan numi ñi cua tsaa tuhun Jutu Mañi yo tandihí ñi ityi. Tan na tyaá yahvi nyivi tuhun ra tan naquihin cuenda ñi itsi tumaa tsa naquihin cuenda maa

ndo itsi. ² Ndacan tahvi tucu ndo na jacacu Nyoo tsi ndi ndaha nyivi ña vaha. Tyin ña tandihi ñi tan tsinu iñi ñi tsi Jutu Mañi yo. ³ Maa tyin Jutu Mañi yo javahá ra tsa catyí ra tyin javaha ra. Tan maa ra cua jandu iin iñi ndo, tan cua jaha cuenda ra tsi ndo tyin tacan tan ña tün nu ña vaha tsi ndo. ⁴ Tan nditá xaan iñi ndi tsi Jutu Mañi yo tyin tsitó ndi tyin jatyinyeé ra tsi ndo tan javahá ndo tsa catyi ndi tyin javaha ndo. Tan tsitó tucu ndi tyin ña cua tandihi ndo tsa javaha ndo tacan. ⁵ Tan na jatyinyee ca Jutu Mañi yo tsi ndo tan cuñi ca ndo tsi nyivi tumaa tsa cuñi maa Nyoo tsi yo tsihin ñi, tan cunyeé ca iñi ndo nyehé ndo tundoho, tumaa tsa cunyeé iñi maa ra Cristo nyehé ra tundoho.

Taahán tsi tsa jaha tyiñu yo

⁶ Tan vityin nyooho yañi caahán ndi tsihin ndo tsihin sivi Jutu Mañi yo Jesucristo, ña cunyaa naa ndo tsi ra yañi yo tsa ña cuñi jaha tyiñu, tan ña cuñi ra coo ra tumaa jacuahá ndi tsi ndo. ⁷ Tyin tsitó maa ndo nácaa taahán tsi coo ndo tumaa tsicoo maa ndi tsa tsiyucu ndi tsihin ndo. Tyin nyuhu ña tsicá nuu utsan ndi tyin jahá tyiñu ndi. ⁸ Tan tandihi tsa tsatsi ndi, maa ñi maa tyahvi ndi tsi ndo. Tyin jahá tyiñu ndi tsinu cahñi tan tsacuaa tyin ña cuñi ndi tsa coso tundoho can siqui ndi intuhun ndo. ⁹ Vasu ndi maa iyó ndatu tsi ndi tsa ndacan ndi tsa jatyinyee ndo tsi ndi, maa tyin nyuhu jahá tyiñu ndi tyin cuñi ndi janaha ndi nácaa taahán tsi coo ndo. ¹⁰ Tyin quivi tsiyucu ndi tsihin ndo, cahán ndi tsihin ndo tyin nyivi ña cuñi jaha tyiñu, na ña catsi ñi. ¹¹ Caahán ndi yacan tyin ñihí tuhun ndi tyin yihí ndo tsicá nuu ñi maa ndo tan tyihí ndo tsi ndo nu ña taahán tsi quihvi ndo tan ña jahá tyiñu ndo. ¹² Nyooho tsa iyó tacan, tavá tyiñu ndi tsi ndo tsihin ndusu yuhu Jutu Mañi yo Jesucristo, jahá tyiñu ndo, tan coo tsa catsi ndo.

¹³ Nyooho yañi, ña cundihi iñi ndo javaha ndo tsa vaha. ¹⁴ Tatun iyó iin ra ña cuñi tyaa yahvi tuhun caahán ndi nu carta ihya, jahá ndo cuenda ndáa ra cuví ra, tan ña cunyanaa ndo tsi ra na nducahan nuu ra. ¹⁵ Maa tyin ña cuxaan iñi ndo tsi ra. Cuhva cuenda ndo tsi ra tyin yañi yo tsi ra.

Nu ndihi cahán ra Pablo

¹⁶ Jutu Mañi yo ra iyó tsa vaha tsi, juvin ñi maa ra cuhva tsa vaha coo añima ndo tandihi ñi quivi tan tandihi ñi tsaha vasu ndi maa nyehé ndo tundoho. Tan Nyoo ndoo tsihin tandihi ndo. ¹⁷ Yuhu ra Pablo tyaá yu nacumi tsi ndo nu tutu ihya tsihin ndaha yu, tan tsihin letra yu. Tyehen tyihí yu firma yu tandihi carta yu. Tan tyehen tyaá yu. ¹⁸ Tan na nasoco Jutu Mañi yo Jesucristo tsi tandihi ndo.

Tan na cuví tsi tacan ñi.

Carta Tsa Jihna Ñi Tsa Jacuhun Ra Pablo Tsi Ra Timoteo

Nu tyaq ra Pablo iin carta tsa cuenda ra Timoteo

¹ Yuhu ra Pablo cuví yu iin ra tava tyiñu ra Jesucristo, tyin Nyoo catyí tyin caca yu tyiñu ra. Maa ra cuví ra tsa jacacú tsi yo. Tan ra Cristo cuví ra tsa nyitá iñi yo. ² Tyaá yu carta ihya tsa cuenda un, yooho Timoteo, tyin sehe yu cuví tsi un tsa cuenda tsa natsinú iñi un tuhun ra Cristo tsa jacoto yu tsi un. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na nyehe ndaahvi ra tsi un.

Nu tsahq cuenda ra Pablo tyin jaha cuenda yo tsi yo tan ña cunycun yo tsa ña nditsa

³ Quivi quita yu ñuu Éfeso tan vatsi yu Macedonia nu nyii yu ihya, tava tyiñu yu tsi un tsa ndoo un ñuu Éfeso tyin cahan un tsihin nyivi jacuahá inga ca tuhun. Catyí yu tsihin un tyin catyí un tsihin ñi na ña jacuaha ñi tsa ña nditsa. Tan vityin juven ñi tacan caahán nyico yu tsihin un. ⁴ Cahan tsihin ñi na ña tyaa iñi ñi cuendu, na ña tyaa iñi ñi tuhun nyivi tsicoo tahañ tsanaha. Tyin tun, maa ñi yacan tyaá iñi ñi maa cua cahan yuhu tahan ñi ñi. Tan ña cua jatinyeé can tsi ñi tan quita vaha tyiñu tsa tsahá Nyoo tsi ñi. Tyin tyiñu can tsihin tsa tsinu iñi yo tan cuvi quita vaha tsi.

⁵ Tatun javahá yo tsa tava tyiñu Nyoo tsi yo tyin javaha yo, cua cuñi tahan yo tsi yo, tsihin tsa nñi iñi añima yo tsa janduvaha Nyoo. Cua cuñi yo tsi ñi tsihin tsa vaha caca iñi yo tan tsihin tsa nditsa tsinú iñi yo tsi Nyoo. ⁶ Maa tyin yihí nyivi nacoo ihñi ñi yacan, tan tsinaq ñi jahá tsa caahán yuhu tahan ñi. ⁷ Cuñi ñi cuvi ñi maestro cuenda ley tsahnu, maa tyin ndi maa ñi tan ña cutuñi iñi ñi tuhun caahán ñi tan nñi xaan iñi ñi jacuahá ñi tuhun can.

⁸ Tsitó yo tyin ley can, vaha tsi, maa tyin cuñi tsi cuatyíñu vaha yo itsi tumaa taahán maa tsi. ⁹ Cuñi tsi coto yo tyin ndi intuhun ley tan ña iyó tsi tsa cuenda nyivi vaha. Tyin ley can iyó tsi tsa cuenda nyivi javahá tsa ña vaha, ñi ña tyaá soho tsa caahán Nyoo, nyivi iyó cuatyí, nyivi caquiñi, nyivi ña tyaá yahvi tsi Nyoo. Iyó tucu tsi tsa cuenda nyivi tsahñi tsi jutu ñi, tsi sihi ñi, tan tsa cuenda tandihi nyivi tsahñi nyivi. ¹⁰ Iyó ley can tsa cuenda nyivi iyó tsihin rayi a ñaha tan ñavin yi ña a ñasihi ra cuví. Iyó tsi tsa cuenda ra ndusihi, tan tsa cuenda nyivi tyihí xeehe nyivi tan xicó ñi, tan iyó tsi tsa cuenda nyivi vatya, tan iyó tsi tsa cuenda nyivi tsa catyí: “Naha Nyoo”, tan ña nditsa tsa caahán ñi. Tan juven ñi iyó tucu ley can tsa cuenda nyivi caahán ndavaha ñi siqui tuhun Nyoo tsa cutuhva yo. ¹¹ Tuhun Nyoo ihya, iin ñi cuví tsi tsihin tuhun cahnu xaan tsa jacacú ra Jesús tsi yo. Nyoo tava tyiñu ra tsi yu tsa jacuaha yu tuhun ihya tsi nyivi. Tan intuhun ñi maa ra taahán tsi jacahnú yo.

Tsahá ra Pablo tyahvi nyoo tsi Nyoo tyin nyehé ndaahvi ra tsi ra

¹² Tsahá xaan yu tyahvi nyoo tsi Jutu Mañi yo Jesucristo tyin tsahq ra tunyee iñi tsi yu, tan nyehe ra tsi yu tan tsitó ra tyin tsinú vaha iñi yu tsi ra, tan tsa cuenda yacan tava tyiñu ra tsi yu tsa jaha tyiñu yu tyiñu ra. ¹³ Tacan javahá ra tsihin yu, vasu ndi maa nu quitsi tsi quivi, yuhu cahan nyaa xaan yu tsi ra. Tan tsinyaq ndaha yu tsi nyivi yihí cuenda ra, tan tsacu nducu yu tsi

ra. Maa tyin Nyoo cundaahvi xaan iñi ra nyehe ra tsi yu, tyin quivi can ñaha ca tsinu iñi yu tsi ra, tan ña tsitó yu náa javahá yu. ¹⁴ Tacan tsaha Jutu Mañi yo Jesucristo tsa vaha ra tsi yu. Tan tsinú xaan iñi yu tsi ra jahá ra. Tan cuñi xaan yo tsi nyivi tyin iin ñi cuvi yo tsihin ra Cristo Jesús.

¹⁵ Tan tuhun cua cahan yu ihya tsa nditsa vaha cuvi tsi. Taahán tsi tsinu iñi yo itsi tan catyi tsi tyehen: Ra Cristo Jesús quitsi ra nu ñuhu ñayivi ihya tyin jacacú ra tsi nyivi iyó cuatyi. Tan yuhu cuvi iin ra caquiñi ca tan ñavin ca tandihi nyivi. ¹⁶ Yacan cuenda, tava Nyoo tsi yu nu caquiñi tan cundahvi iñi ra tsi yu tyin tacan tan janaha ra Jesucristo tsi nyivi tyin cuñi xaan ra tsi ñi tan cunyeé iñi ra ndatú ra nda cuenda nacuhva cuenda ñi tsi ñi tsi ra. Tyin tacan tan cua tsinu iñi ñi tsi ra tan cua coo ñi ñayivi nyito tsa ña cua naa maa. ¹⁷ Yacan cuenda na jacahnu yo tsi ra yihí ndaha tsi yo tandihi ñi quivi, ra nduve tuhun tsihi iyó tsi, ra ña cuvi nyehe yo, ra tsa intuhun ñi maa cuvi Nyoo tan tsitó ra tandihi. Na cuvi tsi tacan.

¹⁸ Yooho Timoteo sehe yu, tava tyiñu yu tsi un, cañi tahan vaha tsihin nu tatyí ña vaha. Cuatyíñu tsa tsinú iñu un tsi Nyoo tan tsihin tsa tsitó un tyin vaha cuahán un tsihin Nyoo; tumaa tsaha cuenda ra yañi yo naha ra tsi un quivi cahan ra naha tuhun un jahá Nyoo. ¹⁹ Ña jandihí un tsa tsinú iñi un tsi Nyoo tan ña jandihí un tsa javahá un tumaa catyi maa Nyoo tyin javaha un, ñacoto vaha tsitsi añima un tyin vaha cuahán un tsihin Nyoo. Tyin juhva ra naha nacoq ra naha tandihí yacan, yacan cuenda ña tsinú ca iñi ra naha tumaa taahán maa tsi. ²⁰ Tacan javahá ra Himeneo tan ra Alejandro. Yacan cuenda tsaha cuenda yu tsi ra naha tsi nu ña vaha, tyin tacan tan coto ra naha tyin ña vaha cahan yo ndavaha ñi siqui tuhun Nyoo.

2

Nu jacuaha ra Pablo nácaa taahán tsi ndacan tahvi yo tsi Nyoo

¹ Tshahá cuenda yu tsi tandihí nyivi yihí cuenda Nyoo tyin ñiñi xaan cuñi tsi ndacan tahvi yo tsi Nyoo tsa cuenda tandihí nyivi. Tan nacuhva yo tyahvi nyoo tsi Nyoo tsa cuenda ñi. ² Na ndacan tahvi yo cuenda ra ndacá ñaha naha ra tan cuenda tandihí ra cumí tyiñu naha ra. Ndacan tahvi yo tsa cuenda ra naha tyin tacan tan coo yo tsihin tsa vaha, coo taxin yo, tan coo yo iin ñayivi vaha nuu Nyoo tan nuu nyivi. Tacan tan cua jaha ñi tsa ñayivi tsi yo. ³ Tyin tacan taahán iñi Nyoo, ra tsa jacacú tsi yo. ⁴ Tyin cuñi ra tsa cacu tandihí nyivi. Tan cuñi ra tsa coto ñi tuhun nditsa. ⁵ Tyin intuhun ñi maa Nyoo iyó. Tan iyó intuhun ñi ra cuvi cahan ndaahvi tsa cuenda yo nuu Nyoo. Ra ícan cuvi ra Cristo Jesús. Tan cuvi ra iin nyivi tumaa maa yo. ⁶ Juvín ra Jesucristo tsihi tsa cuenda tandihí nyivi. Tyahvi ra tsa cuenda cuatyí tandihí yo tyin tacan tan cuvi cacu yo. Tan cundaa can quivi tyaa maa Nyoo cuhva. ⁷ Tsa cuenda yacan, tava tyiñu Nyoo tsi yu, tyin cahan yu tuhun ra, tan caca yu tyiñu ra, tan jacuaha yu tsi nyivi tsa ñavin nyivi Israel cuvi nácaa tsinu iñi ñi tsa nditsa. Tan nyooho tsitó ndo tyin tsa nditsa caahán yu tyin ña tuhvá yu jandavi ñaha tyin cuenda ra Cristo yihí yu.

⁸ Yacan cuenda cuñi yu tsa ndacan tahvi rayi naha ra tsi Nyoo tandihí ñi ityi. Tan coo vaha ra naha nuu ra. Tan cañihi ra naha ndaha ra tan jacahnu ra naha tsi Nyoo tsihin tsa vaha caca iñi ra naha. Tan tsihin tsa ña ñuhú tsihi iñi ra naha. Tan ña cahan yuhu tahan ra naha. Tacan taahán tsi coo ra naha tan ndacan tahvi ra naha tsi Nyoo. ⁹ Tacan tucu ñiñaha. Catsi vaha cunditsi ñi jahma ñi, tumaa taahán maa tsi cunditsi nyivi yihí cuenda Nyoo.

Na ña cunditsi ñi jahma iyo xaan caa. Ña iyo xaan janduvaha ñi jiñi ñi. Ñavin tsihin xuhun cuaan, ndi tsihin yuu xiñu, tan ña cunditsi ñi jahma yahvi xaan. ¹⁰Maa tyin na janduvaha ñi tsi ñi tsihin tsa catsi coo ñi tan tsihin tsa javaha ñi tsa vaha, tumaa taahán maa tsi javaha nyivi nacuhva cuenda tsi ñi tsi Nyoo. ¹¹Tan cunyecu taxin ñi tyaa soho ñi tuhun Nyoo. Tan jaha ñi tsa ñayivi tsi ra tsahá cuenda tuhun Nyoo tsi ñi. ¹²Tyin ña tsahá yu jacuaha ñiñaha nuu nyivi cuaha. Ndi ña tsahá yu tsa cundaca ñaha ñi tsi rayi. Taxin ñi na cunyecu ñi. ¹³Tyin jihna ca ra Adán javaha Nyoo, yaha can tan javaha ra tsi ña Eva. ¹⁴Tan ñavin tsi maa ra Adán jandavi ñaha nu ña vaha, tyin tsi ña Eva ñasihi ra jandavi ñaha nu tan tsicoo cuaty ña. ¹⁵Maa tyin ñiñaha nduve tsa cua tahan ñi tsa cua cacu sehe ñi, tatun jacuahnú vaha ñi tsi sehe ñi, tan tsinú vaha iñi ñi tsi Nyoo tan cuñi ñi tsi ra tan tsi nyivi, tan catsi coo ñi nuu Nyoo tan nuu nyivi.

3

Nacaa taahán tsi coo ra cuví ityi nuu tsihin nyivi vehe ñuhu

¹Tuhun ihya tuhun nditsa cuví tsi: Tatun iin ndo cuñi ndo cuví ndo ityi nuu tsihin nyivi vehe ñuhu, vaha xaan tyiñu cuñi ndo javaha ndo. ²Maa tyin ñiñi cuñi tsi tyin ra cuví ityi nuu tsihin nyivi vehe ñuhu cuñi tsi cuví ra iin ra catsi iyó tyin tacan tan ña cuví tyaa nyivi cuatyí tsata ra. Tan cuñi tsi tsa coo intuhun ñi ñasihi ra. Tan cuñi tsi tsa cuví ra iin ra tsitó vaha cuhva coo, iin ra vaha nuu nyivi. Tan cuñi tsi vaha cahan ra tsihin nyivi tsaá yuvehe ra, tan cuví ra iin ra tsitó vaha jacuaha tsi nyivi. ³Iin ra cuví ityi nuu tsihin nyivi vehe ñuhu ña taahán tsi coho ra nyixi, tan ña taahán tsi cuví ra iin ra nanducú tsihi. Tan ña taahán tsi cuví ra iin ra nducú xuhun tsihin tsa ña taahán tsi. Cuñi tsi tsa cuví ra iin ra vaha iñi, iin ra ña tuhvá cañi tahan. Tan cuví ra iin ra ña nyiyo iñi xuhun. ⁴Cuñi tsi tsa cuví ra iin ra yihí ndaha vaha tsi ñasihi ra tan tsi sehe ra, iin ra ndacá ñaha tsi sehe ra tan tyaa yahvi vaha sehe ra tsi ra, tan jahá ñi tsa ñayivi tsi ra. ⁵Tyin tatun ña tsitó ra cundaca ñaha ra nyivi vehe ra, ¿nácaa cua quihí ndaha ra nyivi tsicá vehe ñuhu Nyoo? ⁶Tan iin ra ndi tsaa xaan tsihin tuhun Nyoo ña taahán tsi cuví ra ityi nuu tsihin nyivi vehe ñuhu tyin coto nduyaa ra, tan tatsi tuñi Nyoo tsi ra, tumaa tatsi tuñi Nyoo tsi nu ña vaha tsa cuenda tsa cahnu xaan jahá nu tsi nu. ⁷Tan cuñi tucu tsi tsa cuví ra iin nyivi vaha nuu nyivi tsa ña yihí tuhun Nyoo, tyin tacan tan ña ñihi ñi náa cuatyí tyaa ñi tsata ra tan ña cuví jaha canaa nu ña vaha tsi ra.

Nacaa taahán tsi coo ra jahá tyiñu vehe ñuhu

⁸Tan tacan tucu ra jahá tyiñu vehe ñuhu naha ra. Na catsi coo ra naha. Na ña cumañi ra naha tsihin tuhun caahán ra naha, tan ña cuví ra naha ra tuhvá tsihi nyixi. Tan ndi ña nyiyo iñi ra naha jaha canaa ra naha xuhun tsihin tsa ña taahán tsi. ⁹Cuñi tsi tsa cutuñi vaha iñi ra naha nácaa taahán tsi tsinu iñi yo tsi Nyoo tan coto vaha ra naha tyin vaha cuahán ra naha tsihin Nyoo. ¹⁰Tan cuñi tucu tsi tsa nyehe jihna yo tatun vaha cuahán ra naha tsihin Nyoo, tacan tan cuví jaha tyiñi ra naha vehe ñuhu. ¹¹Tan tacan tucu ñiñaha, cuñi tsi cuví ñi nyivi vaha nuu nyivi. Ña cahan ñi cuendu. Catsi coo ñi. Tan tyaa nuu vaha ñi tandihí tyiñu. ¹²Ra jahá tyiñu vehe ñuhu na coo intuhun ñi ñasihi ra. Tan cuñi tsi tsa coto vaha ra cundaca ñaha ra tsi sehe ra tan nyivi vehe ra. ¹³Tyin ra jahá tyiñu vehe ñuhu, tan vaha tyanuú ra tyiñu tsa nyisó ra, cuahán ca ra

ityi nuu tsihin Nyoo. Tan tsihin tsa n̄i iñi ra caahán ra tuhun Nyoo tyin tsinú vaha iñi ra tsi ra Cristo Jesús.

Nu caahán ra Pablo síqui tuhun xeehe cuhva tsinú iñi yo

14-15 Vasíqui numi ñi cua quitsi nyehe yu nu nyíi un. Maa tyin tun ña cuvi quitsi yu tsa numi ñi, yoñi jaha, vaha tyin tsa tyaá yu tuhun ihya tyin coto un nácaa taahán tsi coo yo tsa cuví yo nyívi cuenda Nyoo. Tyin maa yo cuví vehe ñuhu Nyoo nyito. Tan cuñi tsi tsa jañihi ca yo janaha yo tuhun Nyoo tsi nyívi. Tan naquihin vaha yo tyin tuhun nditsa cuví tsi. 16 Tsa nditsa tyin yaha xaan cahnu cuví tuhun xeehe tsa jaquituvj Nyoo, tyin coo yo tumaa iyó maa ra: Nyoo nanduvj ra rayi tan tsicoo ra, tsicoo cuñu ñuhu ra tumaa tsa iyó cuñu ñuhu maa yo.

Tan catyí Tatyí Ii Nyoo tyin ra nduve cuatyí cuví ra.

Tan nyehe ra cuví ángel naha ra tsi ra.

Tanñi cahnu nu ñuhu ñayívi caahán nyívi tuhun ra.

Tan tsinú iñi nyívi tsi ra tanñi cahnu nu ñuhu ñayívi.

Tan cuanuhú ra nda gloria.

4

Nu catyí ra Pablo tyin nu cuahán ca tsi quívi yihí nyívi ña cua tsinu ca iñi ñi tsi ra Cristo

1 Maa tyin caahán catsi Tatyí Ii tan catyí ra tyin nu cua ndihi tyembu yihí nyívi ña cua tsinu ca iñi ñi tsi ra Cristo, tyin cua tyaa soho ñi tuhun caahán tatyí ña vaha tsa jandaví ñaha. Tan cua cunyicun ñi ndusu yuhu nu ña vaha. 2 Cua tyaa soho ñi tuhun caahán nyívi jandaví ñaha. Tan ñi can ña tuví iñi ñi náa javahá ñi tyin tsa ndundavá xaan añima ñi. Tumaa tsa cayu añima ñi jahá iin caa ihñi tan ndundavá tsi. 3 Cua casi ñi nu tindaha nyívi. Tan cua catyí ñi tyin ña vaha catsi yo juhva nuu nyayu. Vasu tsitó yo tyin tandihí nuu tsa tsatsí yo, Nyoo javahá itsi. Tan tandihí yoo tsa tsinú iñi tsi ra tan tsitó yo tsa nditsa, tsatsí yo can tan tsahá yo tyahví nyoo tsi ra. 4 Tyin tandihí tsa javahá Nyoo tan vaha tsi. Tan ña taahán tsi catyí yo tyin ña vaha tsi. Tan cuví catsi yo tandihí tsi tun tsahá yo tyahví nyoo tsi Nyoo tsa cuenda tsi. 5 Tyin ndu ii tsi jahá tuhun Nyoo tan tsa tsicán tahvi yo tsi ra tan tsahá yo tyahví nyoo tsi ra.

Nacaa iyó ra vaha jahá tyiñu tyiñu ra Jesucristo

6 Tatun jacuahá un tandihí tsa caahán yu ihya tsi tandihí nyívi yihí tuhun Nyoo tsihin yo, cua cuví un iin musu vaha ra Cristo Jesús. Tan tuhun tsa tsinú iñi yo, tsihin tandihí tuhun ra Cristo tsa nyicún yo, cua jatyinyee tsi tsi un tan cuahnu ca un tsihin tuhun Nyoo. 7 Maa tyin ña tyaa yahvi un tsa cuví xembulu, tuhun sana, tan tuhun tsahnu cuhva iyó nyívi. Vaha ca jañiñi un tsi un tan javaha un maa ñi maa cuhva cuñi maa Nyoo. 8 Tsa jañiñi yo coo tunyee iñi cuñu ñuhu yo, juhva ñi jatyinyee tsi tsi yo. Maa tyin tsa jañiñi yo javahá yo tandihí cuhva cuñi Nyoo, jatyinyee tsi tsi yo iin cahnu ñi, tyin jatyinyee tsi tsi yo nu ñuhu ñayívi ihya. Tan jatyinyee tucú tsi tsi yo tsa coo vaha yo nu cua tsaa yo nda gloria. 9 Tan nditsa, tyin tsa nditsa cuví tsi tan tandihí yo taahán tsi tsa tsinú iñi yo itsi. 10 Tan juvin ñi tsa cuenda yacan jahá tyiñu yo tan nyehé yo tundoho tyin ndatú yo tsa naquihin yo tsa vaha tsa tsahá Nyoo nyito tsi yo. Tyin maa ra cuví ra jacacú tsi tandihí nyívi, tan jihna ca yoo tsa tsinú iñi yo tsi ra jacacú ra.

¹¹ Tuhun ihya jacuaha un tsi nyivi yihí cuenda Nyoo, tan jañiñi un tsi ñi na cutuhva ñi itsi. ¹² Catsi jaha un tsi un coto ña cua jaha nyivi tsa ñayivi tsi un tsa cuenda tsa ndi tyuvaa xaan un. Jacuaha tsi ñi tshin cuhva iyó un, tan tshin cuhva caahán un. Jacuaha tsi ñi tshin tsa cuñi un tsi Nyoo tan tsi nyivi, tshin cuhva tsicá iñi un, tshin cuhva tsinú iñi un, tan tshin cuhva javahá un maa ñi maa tsa vaha. ¹³ Tan tsitsi tsa ndi cumañi ca tsaa yu nu yuí un, çhvi tuhun Nyoo tshin ñi yihí tuhun Nyoo. Cuhva cuenda ñihi tsi ñi, tan jacuaha tsi ñi nácaa cunyicun vaha ñi tsi Nyoo. ¹⁴ Jaha cuenda vaha tunyee iñi tsa tsahá Nyoo tsi un quivi tyiso ndaha ra nyisó tyiñu vehe ñuhu naha ra jiñi un tan cahan ra naha tsa tsahá cuenda Nyoo tsi ra naha. ¹⁵ Tyaa vaha iñi tuhun can tan javaha cuhva catyí tsi. Tacan tan cua nyehe tandihi nyivi nácaa cuahán un ityi nuu ca tshin Nyoo. ¹⁶ Jaha cuenda tsi un tshin cuhva iyó un. Tan jaha cuenda cuhva jacuahá un tsi nyivi. Tan ña nacoo ihñi un tsa vaha. Tatun javahá un tacan, cua cacu un, tan cua cacu tucu nyivi tyaaá soho tuhun jacuahá un.

5

Nu tsahá cuenda ra Pablo tsi ra Timoteo nácaa cuhva cuenda ra tsi nyivi yihí cuenda ra Cristo

¹ Ña cuxaan un tsi iin ra tsahnu, maa tyin cuhva cuenda tsi ra tan jaha tsa ñayivi tsi ra tyin tumaa cuví jutu un cuví tsi ra. Tan ra cuatyí naha ra, cuhva cuenda tsi ra naha tumaa tsa yañi un cuví tsi ra naha. ² Tan ñi tsahnu cuhva cuenda tsi ñi tumaa tsa sihi un cuví tsi ñi. Tan ñi cuatyí, cuhva cuenda tsi ñi tumaa tsa cuhva un cuví tsi ñi. Javaha tandihi tsa caahán yu ihya tshin tsa vaha tsicá iñi un.

³ Jatyinyee tsi ñiñaha ndaahvi tsa tshij yí tatun nduve nyivi ñi cuví jatyinyee tsi ñi. ⁴ Maa tyin tatun iyó iin ñaha tshij yí tan iyó sehe ña, a sehe yañi ña, cuñi tsi cutuhva jihna maa ñi can jatyinyee ñi tsi ña. Na nducuhun iñi ñi nácaa jahá cuenda sihi ñi tsi ñi tsa ndi nyihí ñi. Tan tacan taahán tsi tsa jaha cuenda tucu ñi tsi ña vityin. Tun tacan javaha ñi, vaha xaan, tyin tacan taahán iñi maa Nyoo. ⁵ Tan ñaha tsa tshij yí tan ndoo ndaahvi intuhun ña maa ña, iin ña Nyoo tyaaá iñi ña tan tsicán tahvi ña tsi ra tsinu cahñi tan tsacuaa. ⁶ Maa tyin ñaha tshij yí tsa cusí iñi tshin tsa iyó nu ñuhu ñayivi ihya, vasu nyito ña maa tyin tshij ña cuenda Nyoo. ⁷ Jacoto tucu tuhun ihya tsi ñi cuhva yo tyin tacan tan ña ñihi nyivi cuhva cahan ñi ndavaha ñi tsi ñi. ⁸ Maa tyin tatun yihí yo iyó nyivi yo tan ña tsicá iñi yo jatyinyee yo tsi ñi, ña vaha tacan. Tyin tatun ña jatyinyee yo tsi nyivi vehe yo, tumaa tsa ña tsinú iñi yo tsi Nyoo cuví can. Tan cahnu ca cuatyí yo iyó tan ñavin ca nyivi tsa ña tsinú iñi tsi Nyoo.

⁹ Nu tutu tsa nyaá sivi ñi tshij yí, na cunyaa sivi ñi tsahnu tsa iyó ndaahvi, tatun tsa yahá uñi xico cuiya ñi, tan intuhun ñi yí ñi tsicoq. ¹⁰ Tan tatun tsitó vaha nyivi tsi ñi tsa cuenda tsa vaha tsa javahá ñi; tan jacuahnu vaha ñi sehe ñi, tan tsahá ñi tsa catsi nyivi tsaa yuvehe ñi, tan jahá tyiñu ñi tyiñu nyivi yihí cuenda Nyoo tshin tsa nñi iñi añima ñi, tan jatyinyee ñi tsi nyivi nyehé tundoho. Tun tacan javahá ñi tandihi tsa vaha, cuví cunyaa sivi ñi.

¹¹ Maa tyin ña tyaa ndo sivi ñiñaha tsa ñaha ca quita uñi xico cuiya, coto coo quivi tan cuñi ñi coo nyico yí ñi tan cuñi ñi tindaha ñi inga tsaha tan jandihí ñi tsa jahá tyiñu ñi tyiñu ra Cristo. ¹² Tan coo cuatyí ñi tyin ña javahá ñi cuhva

cahan ñi tsa cua javaha ñi. ¹³ Tan inga tucu tyiñu tatun tsicá nuu jutsan ñi maa ñi tan iin tan iin vehe nyivi quihvi ñi. Tan ñavin yacan ñi maa tyin tsicá nuu tucu ñi caahán ñi cuendu. Tan tyihí ñi tsi ñi nu ña taahán tsi quihvi ñi, tan caahán ñi tsa ña taahán tsi cahan ñi. ¹⁴ Vaha taxin ca na tindaha ñi inga tsaha. Na coo sehe ñi. Na jaha cuenda vaha ñi vehe ñi. Tan ña cuhva ñi cahan nyaa nyivi xaan iñi tsi yo tsi yo. ¹⁵ Caahán yu tandihí tuhun ihya tsihin un tyin yihí ñi tsa nacoq ñi tsi Nyoo tan nycicún ñi tsi nu ña vaha. ¹⁶ Tatun ñi yihí cuenda Nyoo tan iyó iin nyivi ñi tsa tsihj yíi, cuñí tsi tsa jatyinyee maa ñi tsi ñi can, tan ña tyiso ñi itsi siqui vehe ñuhu. Tyin tacan tan cuví jatyinyee vehe ñuhu tsi inga ñi tsihj yíi tsa nduve ca maa nyivi iyó.

¹⁷ Ra tsahnu ra nyisó tyiñu vehe ñuhu, cuñí tsi tsa jaha xaan nyivi vehe ñuhu tsa ñayivi tsi ra, tan tsa jihna ñi na jaha ñi tsa ñayivi tsi ra caahán tuhun Nyoo tan jacuahá ra naha tsi ñi. ¹⁸ Tyin tuhun Nyoo catyí tsi tyehen: “Ña tyihí un yoho yuhu indiqui nu jahá tyiñu ti, tacan tan cuví catsí ti luxu.” Tan catyí tucu tuhun Nyoo tyehen: “Iyó ndatu tsa ñihí ra jahá tyiñu yahvi ra.”

¹⁹ Tatun tyaa nyivi cuatyí tsi iin ra tsahnu tan ña quita uvi a uñi taahan tsandaa, ña tyaa yahvi un tsa caahán ñi. ²⁰ Maa tyin nyivi tsa jañihí ca javahá tsa ña vaha, cuñí tsi tsa cahan ndo tsihin ñi nuu tandihí nyivi yucú vehe ñuhu. Tacan tan nayuhvi tandihí ca ñi tan ña javaha ñi tsa ña vaha. ²¹ Tavá tyiñu yu tsi un nuu Nyoo tan nuu Jutu Mañi yo Jesucristo, tan nuu ángel tsa nacatsi ra. Tan caahán yu tsihin un tyaa yahvi tsa caahán yu ihya, inducu ñi cuñi un nyehe un tsi tandihí nyivi. ²² Ña numi xaan cuhva un tyiñu tsi iin ra cuví ra ityi nuu tsihin nyivi vehe ñuhu. Coto cuhun cuatyí javaha ra siqui un. Jaha cuenda vaha tsi un tsihin tandihí tsa javahá un tan ña cuhva un ndatu tsi nu ña vaha tsa nducu cuhva nu tsi un.

²³ Tan tsa cuenda tsa uhvi tsitsi un, ña coho ca un maa ñi maa ndutyá, coho luxu vñu na nduvaha tsitsi un.

²⁴ Yihí nyivi quituví cuatyí ñi tsa ndi cumañi cutuñi ñi. Tan yihí ñi quituvi cuatyí ñi tsa yaha cutuñi ñi. ²⁵ Tan tacan tucu tatun javahá yo tsa vaha, ña cuxeehe tsi. Vasu ña quituví tsi tsa numi ñi, maa tyin ña cuví ndoo xeehe tsi.

6

¹ Nyivi yihí cuenda Nyoo tsa cuví musu, cuñí tsi tyaa yahvi vaha ñi tsi tsitoho ñi. Tyin tacan tan ña ñihí nyivi cuhva cahan ñi ndavaha ñi siqui Nyoo, tan siqui tuhun ra tsa jacuahá yo. ² Tan tatun iin musu tan yihí tsitoho ra cuenda Nyoo, taahán tsi tsa jaha ra tsa ñayivi tsi ra ican tyin yañi ra cuenda Nyoo cuví tsi ra. Cuñí tsi tsa vaha ca jahá tyiñu ra tyiñu tsitoho ra, tyin tsinú tucu iñi maa ra can tsi ra Cristo, tan Nyoo cuñí ra tsi ra ican. Jacuahá yacan tsi nyivi yihí cuenda Nyoo tan cuhva cuenda tsi ñi na javaha ñi cuhva catyí tsi.

Cuhva iyó yo tsihin Nyoo tan na cusñi iñi yo tsihin tsa tsahq ra tsi yo

³ Tatun iyó iin ra jacuahá inga tuhun tsa ña nacatsi tahan tsihin tuhun vaha tsa jacuahá Jutu Mañi yo Jesucristo; tan ña nacatsi tahan can tsihin cuhva vaha iyó yo tsihin Nyoo, ⁴ cuví ra iin ra nduyaá ñi maa, iin ra ña tsitó. Tan tsa caahán yuhu ra siqui iin tsa ñavin ñi tsa cahan yo tuhun, cuví can tumaa cuehe tsi ra. Tan tsa cuenda yacan cacú tsihi tan nyiyo iñi nyivi tsa iyó tsi inga ñi, tan tsa caahán nyaa tahan ñi tsi ñi, tacan tan ndasi cuñí nyivi nyehe tahan ñi tsi ñi. ⁵ Tan maa ñi cañí tahan nyivi jahá can tyin quiñi tsicá iñi ñi, tyin ña tsitó ñi tsa vaha. Cuñí maa ñi tyin cua jaha canaa ñi xuhun tsihin

tuhun Nyoo. Ña cutahan un tsihin ñi can. ⁶ Ndotsa tyin tsa javahá yo cuhva catyí Nyoo tan sii cuñi yo tsihin tsa tsaha ra tsi yo, cuví tsi tumaa iin tsa cuca iyó tsi yo. ⁷ Tyin nduve náa tsaá tsihin yo quivi cacu yo nu ñuhu ñayivi ihya. Tan nduve náa cuhun tsihin yo quivi cúu yo. ⁸ Maa tyin tatun iyó tsa catsi yo tan iyó jahma cunditsi yo, na cusii iñi yo, tan na ndoo yo vaha tsihin yacan. ⁹ Maa tyin nyivi cuñi nducuca, nducú cuhva nu ña vaha tsi ñi. Tan nacava ñi tsitsi xayí nu. Jandusohó nu tsi ñi tsihin tsa cuñi ñi coo cuaha tsa coo tsi ñi. Tan jativí can tsi ñi. Tan nu ndihi tuhun cua tiví ndihi ñi tan cua cuhun ñi anyaya. ¹⁰ Tyin tsa cuñi xaan yo xuhun, yacan cuví yoho tandihi ca nuu tsa ña vaha. Tan yihí nyivi tsa cuenda tsa cuñi xaan ñi xuhun, tan jandihí ñi tsa tsinú iñi ñi tuhun Nyoo. Tan janyehé ñi tundoho tsi juvin ñi maa ñi tsihin yacan.

Naca cañi tahan yo tsihin nu ña vaha tsihin tsa tsinú iñi yo tsi Nyoo

¹¹ Maa tyin yooho cuví un iin rayii cuenda Nyoo. Quita tsiyo nuu tandihi tsa caquiñi. Coo cuiti vaha nuu Nyoo. Cuanycun tsi Nyoo tsihin tsa nii iñi un. Cuñi tsi nyivi. Cunyee iñi tsihin tsa vita iñi un nyehe un tandihi tsa cua tahan un. Tan ña cahnu jaha un tsi un. ¹² Cañi tahan vaha tsihin nu ña vaha tsihin tsa tsinú iñi un tsi Nyoo. Ña jaña ndaha un ñayivi nyito tsa ña cua naa maa tsa tsaha Nyoo tsi yo. Tyin tsa cuenda can, cana Nyoo tsi un, tan tacan catyí un quivi cahan catsi un nuu tandihi ra cuví tsandaa naha ra, catyí un tyin tsinú iñi un tsi Nyoo. ¹³ Tan vityin nuu Nyoo, ra tsa tsahá ñayivi coo tandihi tsa iyó, tan nuu ra Cristo Jesús ra tsa tsaha cuenda vaha tuhun nditsa nuu ra Poncio Pilato, caahán yu tsihin un, ¹⁴ javaha tandihi tsa catyí yu tsihin un tyin javaha un tyin tacan tan ña cuví cahan nyaa nyivi tsi un nda tahan tsi quivi quitsi Jutu Mañi yo Jesucristo. ¹⁵ Nda tsaa maa quivi, tan cua jaquitsi Nyoo tsi ra Cristo inga tsaha. Ra ican cuví ra jacahnú yo, tan intuhun ñi maa ra cuví Nyoo, ra iyó xaan tunyee iñi. Rey cahnu cuví ra nuu tandihi ca ra cuví rey. Tan ra ndacá ñaha cahnu cuví ra nuu tandihi ca ra ndacá ñaha. ¹⁶ Intuhun ñi maa ra cuví ra tsa nduve tuhun tsiihi iyó tsi. Tan iyó ra nu nditsin nu ña cuví cutuhva nyivi. Tan ndi intuhun nyivi ñaha ca nyehe tsi ra. Tan ndi ña cuví nyehe ñi tsi ra. Na jacahnu yo tsi maa ra. Tan na cundaca ñaha ra tsi yo tandihi tyembu. Tan na ña cundihí maa tsa ndacá ñaha ra tsi yo. Na cuví tsi tacan. ¹⁷ Tan cahan tsihin nyivi tsa iyó tsa cuca ñuu ñayivi ihya, na ña cahnu xaan jaha ñi tsi ñi. Tan ña cuita iñi ñi tsa cuca tsa iyó tsi ñi. Tyin tsa cuca can cua ndihi can. Na cuita iñi ñi tsi Nyoo nyito, tyin maa ra cuví ra tsahá tandihi tsi yo. Tan cuví cusii iñi yo tsihin tsi. ¹⁸ Cahan tsihin ñi cuca na javaha ñi tsa vaha tan nducuca ñi nuu Nyoo tsihin tsa javahá ñi tsa vaha. Tan na cuhva ñi tsa iyó tsi ñi tsihin tsa nii iñi ñi tan ñavin tsihin tsa cuihya cuñi ñi. ¹⁹ Tacan tan coo tsa cuca tsa ña cuanaa maa tsi ñi, tan jatinyee tsi tsi ñi nu cuahán quivi ityi nuu. Tan coo ñi ñayivi nyito tsa ña cua naa maa.

Nu ndihí tsahá cuenda ra Pablo tsi ra Timoteo

²⁰ Yooho Timoteo, jaha cuenda vaha tyiñu tsa tsaha Nyoo tsi un. Ña tyaa soho un tuhun nu ñuhu ñayivi ihya, tuhun nduve yahvi nyaá. Ña tyaa yahvi un tuhun tsa catyí nyivi tyin tsitó xaan ñi tan ña nditsa. ²¹ Tyin tsa cuenda yacan, yihí nyivi tsa naco ihñi ñi tuhun Nyoo. Tan ña tsinú vaha ca iñi ñi tsi ra vityin.

Coo tsihin tsa vaha tsa iyó tsi Nyoo tsa tsaha ra tsi un.
Tan na cuví tsi tacan ñi.

Carta Tsinu Uvi Tsa Jacuhun Ra Pablo Tsi Ra Timoteo

Nu tyaq ra Pablo inga carta tsa cuenda ra Timoteo

¹ Yuhu ra Pablo cuví yu iin ra tava tyiñu ra Jesucristo, tyin tacan cuñi maa Nyoo. Tyin cuñi ra tsa jacoto yu tsi nyivi tyin tsahá ra ñayivi nyito coo tandihi ñi tsa iin ñi cuví tsihin ra Cristo Jesús. ² Jaquitsí yu carta ihya tsi yooho Timoteo. Tan cuñi xaan yu tsi un tyin tumaa cuví sehe yu cuví tsi un. Tan naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na cundaahvi iñi ra tsi un.

Nu caahán ra Pablo tsihin ra Timoteo na cattyi tuhun ra tsihin nyivi tyin cuenda ra Cristo yihí ra

³ Tandihí ñi quivi nducuhún iñi yu tsi un tan tsicán tahvi yu tsi Nyoo tsinu cahni tan tsacuaa. Tan tsahá yu tyahvi nyoo tsi ra tsa cuenda un. Tyiñu maa ra jahá tyiñu yu tumaa jahá tyiñu tsi tsaañu yu tyiñu Nyoo tsanaha. Tan vaha cuñi añima yu tyin vaha iyó yu nuu ra. ⁴ Nducuhún xaan iñi yu nácaa tsacu un quivi quita yu nu nyii un. Tan vityin cuñi xaan yu nyehe yu tsi un inga tsaha tan cusii iñi yu. ⁵ Tan nducuhún xaan iñi yu tyin tsinú ñi vaha iñi un tsi Nyoo. Tumaa tsa tsinu iñi ña Loida tsitan un tan ña Eunice sihi un. Ñi ícan vaha xaan tsinu iñi ñi tsi Nyoo, tan tsitó yu tyin tacan tsinú iñi maa un tsi Nyoo vityin.

⁶ Yacan cuenda tsahá cuenda yu tsi un jandu iin ca iñi un tan cūatyíñu ndatu tsa tsahá Nyoo tsi un tsa cahan yu tuhun ra. Yacan cuví ndatu tsa tsahá ra tsi un quivi tyiso ndaha yu jiñi un. ⁷ Nyoo ña tsahá ra tatyí ña vaha tsa jayuhvi tsi yo. Tsahá ra Tatyí Ii ra tsi yo tyin coo tunyee iñi cahnu tsi yo, tan cuñi tahan yo tsi yo. Tan tsahá ra tunyee iñi tsi yo tyin tacan tan cundaca ñaha vaha yo tsi yo. ⁸ Yacan cuenda ña nducahan nuu un cahan un tuhun Jutu Mañi yo. Tan ndi ña nducahan nuu un tsa nyii yu vehe caa tsa cuenda ra. Cūatyíñu tunyee iñi tsa tsahá Nyoo tsi un tan ndoo un vaha tsa nyehe un tundoho tsa vatsí siqui yo tsa cuenda tuhun Nyoo. ⁹ Tyin juven ra jacacu tsi yo. Tan cana ra tsi yo tyin coo yo ñayivi ii. Ñavin tsa cuenda tsa vaha tsa javahá yo tan cana ra tsi yo. Cana ra tsi yo tyin tacan tyaq maa ra cuhva javaha ra nda ndi cumañi ca tsinu ñuhu ñayivi. Tyin nda quivi can tyaq ra cuhva tsa cuhva ra tsa vaha tsa iyó tsi ra tsi yo tsa cuenda ra Cristo Jesús. ¹⁰ Tan vityin tsitó yo tsa vaha can tyin tsa quitsi ra Jesucristo jacacu ra tsi yo. Tan quihin nyaa ra tandihí tunyee iñi tuhun tsihi. Cahán ra tuhun vaha, tan tava nditsin ra tuhun tsa coo yo ñayivi nyito tsa ña cua naa maa.

¹¹ Nyoo tava tyiñu ra tsi yu tsa cahan yu tuhun can tsihin nyivi. Tava tyiñu ra tsi yu tsa caca yu tyiñu ra, tan jacuaha yu tuhun can tsi nyivi tsa ñavin nyivi Israel cuví. ¹² Yacan cuenda nyehé yu tandihí tundoho. Maa tyin ña nducahan nuu yu tsa tacan nyehé yu tundoho, tyin tsitó yu yoo tsinú iñi yu. Tyin nacuhva cuenda yu tsi yu tsi ra, tan tsitó vaha yu tyin cuví jaha cuenda ra tsi yu nda cuanda quivi quitsi ra inga tsaha.

¹³ Cūanyicun tuhun vaha tsa tsahá cuenda yu tsi un. Tan cōo tsihin tsa tsinú vaha iñi un tsi Nyoo. Cuñi tsi ra, tan tsi nyivi. Tyin tacan taahán tsi coo

yoo tsa iyó iin caa ñi tsihin ra Cristo Jesús. ¹⁴ Tan na jatyinyee maa Tatyí li tsa iyó añima yo tsi un tan jaha cuenda vaha un tsa vaha tsa tsaha Nyoo tsi un.

¹⁵ Tsa tsitó un tyin nacoó ihñi ra Figelo tan ra Hermogenes tsi yu tan tandihi ca maa ra iyó ityi Asia. ¹⁶ Maa tyin ra Onesíforo na cundaahvi iñi Jutu Mañi yo tsi ra tan tsi nyívi ra tyin cuaaha xaan tsaha quítsi ra jatyinyee ra tsi yu. Tan ña cahán nuu ra tsa tyehen nyíi yu vehe caa. ¹⁷ Tan quívi tsinyijí ra ñuu Roma ihya, ña jandihí maa ra tsa nanducú ra tsi yu nda cuanda tsa nañihí ra tsi yu. ¹⁸ Maa Jutu Mañi yo na cundaahvi iñi ra nyehe ra tsi ra quívi cua jacutuñi ra tsi yo. Tsitó maa un nácaa jatyinyee xaan ra Onesíforo tsi yo quívi tsiyucú yo ñuu Éfeso.

2

In andaru vaha ra Jesucristo

¹ Tan yoohe sehe yu, janyee iñi tsihin tunyee iñi Nyoo tsa tsahá ra Cristo Jesús tsi un tsa cuenda tsa iin ñi cuví yo tsihin ra. ² Tuhun tsa tsiñi un cahān yu nuu nyívi cuaaha, jacuaaha yacan tsi nyívi tsa ñi iñi tsinú iñi tsi Nyoo, ñi tsa cuví jacuaaha tsi inga nyívi.

³ Tan cunyee iñi nyehe tundoho tumaa iin andaru vaha ra Jesucristo. ⁴ Ndi intuhun ra cuví andaru tan ña cuví jatyañu xaan ra tsi ra tsihin inga ca tyiñu. Tyin cuñi tsi tsa javaha ra maa ñi maa tsa caahán ra cuví ityi nuu tsihin ra.

⁵ Tan tacan tucu ra jasiquí tsihin balón, ña cuví jaha canaa ra tatun ña cunyee iñi ra jasiqui ra tumaa taahán maa tsi. ⁶ Iin ra jahá tyiñu tsitsi cuhu, taahán tsi tsa jaha tyiñu jihna ra, tacan tan cuví catsi jihna ca maa ra tsa quitá nu jahá tyiñu ra. ⁷ Tyihi tuñi vaha iñi tsa caahán yu tsihin un ihya, tan maa Jutu Mañi yo cua cuhva tsa cutuñi iñi un tandihi tsi.

⁸ Ndūcuhun iñi tsi ra Jesucristo, ra tsa nandotó tsa yaha nyehe ra tundoho tan tsihí ra. Cuví ra tata ra rey David. Tan tuhun ra cuví tuhun tsa jacacú Nyoo tsi yo tsa tsahá cuenda ra tsi yu tyin cahān yu tsihin nyívi. ⁹ Tan tsa cuenda tuhun can cunyeé iñi yu nyehé yu tandihi tundoho nda cuanda nuuhñí yu tsihin cadena vityin tumaa tsatyin cuví yu iin ra caquiñi. Tyin iin ra caquiñi tacan javahá ra naha tsihin ra. Maa tyin tuhun Nyoo ña nuuhñí tsi. ¹⁰ Yacan cuenda cunyeé iñi yu nyehé yu tandihi tundoho tsa cuenda tsa vaha tsi tandihi ca nyívi tsa nacatsj maa Nyoo, tyin tacan tan cua cacu ñi iin caa ñi tsihin yo tsa cuenda ra Cristo tan cua ñihí yo nu sii caá tsa ña cua ndihí maa coo yo. ¹¹ Tuhun ihya tuhun nditsa cuví tsi tan cua cundaa tsi: Tatun tsihí yo cuenda cuñu ñuhu yo, coo nyito tucu yo tsihin ra.

¹² Tatun nyehé yo tundoho tsa cuenda ra, cua cundaca ñaha ndihí yo tsihin ra.

Tatun catyí yo tyin ñavin cuenda ra yihí yo, cua catyi tucu maa ra tyin ñavin nyívi yihí cuenda ra cuví yo.

¹³ Tatun jandihí yo tsa tsinu iñi yo tsi ra, maa ra tacan ñi maa javahá ra tsa caahán ra.

Tyin maa ra ña tuhvá ra nasama tuhun caahán ra.

Tatun jahá tyiñu vaha yo, cua quita vaha yo

¹⁴ Janducuhun iñi tuhun ihya tsi ra jacuahá tuhun Nyoo, tan catyi tsihin ra naha nuu Jutu Mañi yo, na jandihí ra naha tsa caahán yuhu tahan xaan ra naha tsihin tsa nduve yahví nyaá. Tyin tsa caahán yuhu tahan ra naha tacan, nduve maa ndáa tsiñi ñuhu can. Tyin tsihin yacan jatívi ra naha tsi

nyivi tyaa soho tsa caahán ra naha. ¹⁵ Jañiñi tan nacuhva cuenda un tsi un nuu Nyoo tumaa iin ra jahá tyiñu vaha. Tyin tatun tsatyiñu vaha un tuhun nditsa cuhva taahán maa tsi, ña cua nducahan nuu un. ¹⁶⁻¹⁷ Ña tyaa soho un tsa ña vaha tan tsa ñavin ñi tsa cahan yo tuhun tsa caahán nyivi. Tyin cuví can tumaa cuehe xaan tsi ñi. Tan yaha ca cuhva cua tiví ñi jahá can. Yacan cuví tsa tahán ra Himeneo tan ra Fileto. ¹⁸ Tyin quitá tsiyo ra naha ityi vaha tan catyi ra naha tyin tsa yaha nandoto yo tan ña cua nandoto ca cuñu ñuhu yo inga tsaha. Tan tsihin yacan jandoyó ñuhu ra naha tsi juhva nyivi tsa tsinú iñi tsi Nyoo. ¹⁹ Vasu yihí juhva ñi tacan quitá tsiyo ñi, maa tyin Nyoo tsaquín ra tsa nditsa, tan yacan cuví tsa ña cua nasama maa. Tan nyaá iin seña tsa catyi: “Jutu Mañi yo nacotó ra tsi nyivi yihí cuenda ra tsa nditsa.” Tan catyi tucu tsi: “Tandihi ñi nyisó sivi ra Cristo na quita ñi nu iyó tsa ña vaha.”

²⁰ Tsitsi iin vehe cahnu, ñavin maa ñi maa ndaha tyiñu tsinú tsihin xuhun cuaan tan xuhun cuitsin iyó tsatyiñu nyivi. Tyin tsatyiñu tucu ñi tsa tsinú tsihin vitu tan tsihin ñuhu quisi. Yihí can tsatyiñu ñi can cuenda tyiñu nahnu, tan yihí can ndáa tahan ñi maa tsi tsatyiñu ñi can. ²¹ Tacan tucu maa yo tatun jahá vaha yo cuenda tsi yo, cuví yo iin nyivi tsa tsatyiñu Nyoo. Tan cuví yo tumaa iin vasu xuhun cuaan tsa ndoq vaha, tacan tan cuví cuatyíñu ra tsi yo tsa cuenda tandihi tyiñu vaha.

²² Ña caca iñi un tumaa tsicá iñi ra cuatyí iyó nu ñuhu ñayivi ihya. Tyin ra ihya naha ra maa ñi maa tsa caquiñi tsicá iñi ra naha. Maa tyin yoocho çoq iin ñayivi cuiti. Tsinu vaha iñi tsi Nyoo. Cuñi tsi Nyoo tan tsi nyivi. Çoq vaha tsihin tandihi nyivi yihí cuenda Nyoo, tandihi ñi tsa tsicán tahvi tsi Jutu Mañi yo, ñi iyó añima vaha. ²³ Tan ña tyaa soho un tsa nduve yahvi nyaá tsa caahán yuhu tahan nyivi. Tyin tsitó un tyin tsihin yacan nducuaaha ca tsihi. ²⁴ Tan iin ra cuví musu Jutu Mañi yo, ña taahán tsi cañi tahan ra. Taahán tsi tsa vaha nyivi cuví ra tsihin tandihi nyivi. Tan cuñí tsi tsa ñihi vaha ra cuhva jacuaha ra tuhun Nyoo tsi nyivi. Tan cuñí tucu tsi tsa cunyeet iñi ra tsihi tsahá nyivi. ²⁵ Tan tsihin tsa vita iñi ra cuñí tsi janaha vaha ra cuhva coo nyivi ndava iñi. Tan cuatu ra tatun ndu uvi iñi ñi tan coto ñi tsa nditsa. ²⁶ Tacan tan cua cutuñi iñi ñi tan quita ñi tsitsi xayí nu ña vaha tyin tsa vityin javahá maa nu cuhva cuñí nu tsihin ñi.

3

Nacaa cua coo nyivi nu cua ndihi quivi

¹ Tan cuñí tucu tsi çoto un tyin nu cua ndihi tyembu cua coo quivi tsa yii xaan cua coo yo. ² Tyin cua coo nyivi nyiyo iñi, maa ñi tsa tsii maa ñi cua cuñí ñi coo. Tan cua cuñi xaan ñi xuhun. Tan yaa xaan cua jaha ñi tsi ñi, cahnu cua jaha ñi tsi ñi. Cua cahan ñi ndavaha ñi tsi Nyoo. Tan ña cua tyaa yahvi ñi tsa caahán jutu ñi tan sihi ñi. Ña cua nacuhva ñi tyahvi nyoo tsi Nyoo, tan ndí tsi nyivi ñi. Ña cua tyaa yahvi ñi tsi Nyoo. ³ Ña cua cuñi ñi tsi nyivi ñi. Ña cua cuhva maa ñi coo taxin nyivi. Cua cahan ñi cuendu. Ña cua cuví cundaca ñaha ñi cuñu ñuhu ñi. Xaan xaan ñi cua cuví. Tan ña cua cuñi ñi nyehe ñi tsa vaha. ⁴ Cua xico ñi tsi nyivi ñi. Tan cua cana iñi ñi javaha ñi náa ndihi tsa cuñí maa ñi. Tan cahnu cua jaha ñi tsi ñi. Tan maa ñi maa tsa cuñí maa ñi cua nanducu ñi, tan ña cua nanducu ñi tsi Nyoo. ⁵ Cua cunyicun ñi tsi Nyoo tumaa tsa tsinú iñi ñi cua jaha ñi tsi ñi, maa tyin ña nditsa. Tyin tyasí ñi nu janahá Nyoo tunyee iñi ra tyin ña tsinú iñi ñi tsi ra.

Ña cutahan un tsihin nyivi javahá tacan. ⁶ Tyin tyañu ñi ican iyó ra tsa quihví tsitsi vehe, tan jandaví ñaha ra tsi ñiñaha tsa nduve maa tsa tsiñi tuñi iñi ñi. Tan cuaha cuatyí ñi can iyó, tan cuaha tsa ña vaha cuñí ñi. ⁷ Cuahán ñi cua tyaa soho ñi tuhun tsa, maa tyin ña cuví maa cutuñi iñi ñi tsa cuví tsa nditsa. ⁸ Tan nyivi cua coo, cua cuví ñi tumaa ra Janes tan ra Jambres, ra tasi tsa tsicoo tsanaha naha ra. Tyin cuñi ra naha jaha canaa ra naha tsi ra Moisés. Tan tacan tucu nyivi cua coo nu cuahán ca tsi ityi nuu. Cua cahán ñi ndavaha ñi siqui tuhun Nyoo. Quiñi xaan cua caca iñi ñi. Tan ña cua quita vaha ñi tsihin cuhva tsinu iñi ñi. ⁹ Maa tyin tsa cua janaha ñi, ña cua cuví nducuaaha can tyin ña xeehe caa tyin iin tsa nduve yahvi nyaá cua cuví can, tumaa tsa javahá tucu ra Janes tan ra Jambres.

Nu ndihí tavq tyiñu ra Pablo tsi ra Timoteo

¹⁰ Maa tyin yooho tsitó vaha un tyin yuhu ñavin tacan iyó yu. Tan nyicún un tuhun tsa jacuahá yu, tan cuhva iyó yu. Tan tsitó un nacuenta iyó yu tacan, tan nácaa tsinú iñi yu tsi Nyoo. Tan tsitó tucu un nácaa cunyeé iñi yu tsa cuxaán nyivi tsi yu, tan nácaa cuñi yu tsi ñi. ¹¹ Tan tsitó un nácaa cunyeé iñi yu nyehé yu tundoho tsa tsinyaá ndaha nyivi tsi yu. Tsitó un tsa tahañ yu, tandihí tundoho tsa nyehe yu tsacatyí tuhun Nyoo nda ñuu Antioquía, tan ñuu Iconio, tan ñuu Listra. Maa tyin Jutu Mañi yo jacacu ra tsi yu tsitsi tandihí tundoho can. ¹² Tsa nditsa tyin tandihí yoo tsa cuñi coo cuhva cuñi ra Cristo Jesús cua janyehe nyivi tundoho tsi yo. ¹³ Maa tyin nyivi caquiñi tan nyivi jandaví ñaha, quiñi xaan ca cua coo ñi. Tyin cua jandaví ñaha ñi tsi nyivi tan cua jandaví ñaha tucu maa nyivi tsi ñi.

¹⁴ Maa tyin yooho jañiñi tsi un tan coo un tsihin tsa cutuhva un. Tyin tsitó un yóo jacuahá tsi un tan tsitó un tyin tsa nditsa cuví tsa cutuhva un. ¹⁵ Nda ndi luhlu un tan tsitó un tuhun nyaá nu tutu Nyoo. Tan yacan cuví tsa tsahá tsa cutuñi iñi un tan cacu un tsa cuenda tsa tsinú iñi un tsi ra Cristo Jesús. ¹⁶ Tandihí tuhun tsa nyaá nuu tutu Nyoo, maa Nyoo tsahá tsi. Tan jatyinyeé xaan tsi tsi yo tsa nacoto yo nácaa taahán tsi tsinú iñi yo. Janahá tsi tsi yo tyin iyó cuatyí yo. Natyisó vaha tsi tsi yo. Jacuahá tsi tsi yo nácaa coo cuiti vaha yo nuu Nyoo. ¹⁷ Tacan jatyinyeé tuhun Nyoo tsi yo tyin tacan tan ña cumañi tsa cumañi tsi yo tan cuví yo iin ra cuiti yihí cuenda Nyoo tan javaha yo tandihí tsa vaha.

4

¹ Tavá tyiñu yu tsi un nuu Nyoo tan nuu Jutu Mañi yo Jesucristo, tyin maa ra cua jandaa cuatyí nyivi nyito tan nyivi tsihi quivi cua quitsi ra cundaca ñaha ra tsihin tunyee iñi tsa iyó tsi ra. ² Cahán tuhun Nyoo tsihin nyivi. Tan ña jandihí un tsa jañiñi un javaha un tacan. Cahán tuhun Nyoo tsihin ñi tatun tsahá tsi cuhva tan vasu ña tsahá tsi cuhva. Cuhva cuenda tsi ñi, cahán tsihin ñi tatun ña vaha javahá ñi, tyin tacan tan cunyicun vaha ñi tsi ra Cristo. Tan cunyeé iñi cuatu nda nasama ñi cuhva iyó ñi. Tan jacuahá tsi ñi nácaa taahán tsi coo ñi. ³ Tyin coo quivi ña cua cunyeé ca iñi nyivi tyaa soho ñi tsa vaha. Cua nducu ñi cuaha maestro tsa jacuahá tsi ñi maa ñi maa tsa taahán iñi maa ñi tyaa soho ñi. ⁴ Tan cua tyaa tsiyo ñi tsa nditsa. Tan cua tyaa soho ñi tsa ña nditsa. ⁵ Maa tyin yooho jaha cuenda tsi un tsihin tsa vaha tsicá iñi un. Cunyeé iñi nyehe fundoho. Cahán tuhun Nyoo tsihin nyivi. Vaha javaha un tyiñu tsa tsahá Nyoo tsi un.

⁶ Yuhu tsa yatyin cua nacuhva cuenda yu ñayivi iyó yu tsa cuenda tuhun Nyoo, tyin tsa cuyatyin cúu yu. ⁷ Tsa yahá cañi tahan yu tumaa taahán maa

tsi, tan tsa ndihí javahá yu tyiñu tsa tsaḥá Nyoo tsi yu tumaa iin ra tsinú suuhva, tun tsa tsaá ra nu taahán tsi cucuiñi ra. Tan tacan ñi maa tsinú iñi yu tsi Nyoo. ⁸ Tan vityin nu cuahán ca quiví, ndatú vaha yu tsa taahán tsi tsi yu tsa cua cuhva Jutu Mañi yo tsi yu tsa cuenda tsa vaha tsicoo yu nuu ra. Tan ñavin maa ñi maa yu cua cuhva ra itsi, cua cuhva tucu ra itsi tsi tandihí ca nyiví tsa ndatú tsi ra quiví cua quitsi ra. Tyin intuhun ñi maa ra cuví ra tatsí tuñi vaha.

Inga tyiñu tava ra Pablo tsi ra Timoteo

⁹ Janumi tan quitsi ñi un, quitsi nyehe un nu nyií yu. ¹⁰ Tyin ra Demas nacoo ihñi ra tsi yu tyin cuñi ca ra tsa iyó ñuu ñayiví ihya. Tan cuahán ra nda ñuu Tesalónica. Tan ra Crescente cuahán ra Galacia. Tan ra Tito cuahán ra Damacia. ¹¹ Intuhun ña ra Lucas nyií tsihin yu. Nanducu tsi ra Marcos tan quihin tsi ra quitsi tsihin un quiví quitsi un. Tyin cuví jatyinyee ra tsi yu tsihin tyiñu Nyoo. ¹² Jacuhun yu tsi ra Tíquico ñuu éfeso. ¹³ Quiví quitsi un yaha un naquihin un jahma vixin yu tsa nacoo yu ñuu Troas vehe ra Carpo. Tan naquihin un tandihí libru yu, cundaha un quitsi tsihin un. Tsa ñiñi ca cuñi tsi cundaha un, yacan cuví tandihí tutu yu.

¹⁴ Ra Alejandro, ra cañi caa, cuaha xaan tsa ña vaha javahá ra tsi yu. Maa Jutu Mañi yo cua natyahvi tsi ra tsa cuenda tandihí tsa javahá ra. ¹⁵ Jaha cuenda vaha tsi un coto náa javaha ra tsi un. Tyin xaan xaan cuñi ra cuenda tuhun Nyoo tsa caahán yo.

¹⁶ Tsa jihna ñi jacacu yu tsi yu nuu ra cumí tyiñu naha ra, yoñi maa jatyinyee tsi yu. Tandihí ra naha nacoo ihñi ra naha tsi yu. Na jaha Nyoo tucahnu iñi tsi ra naha tsa cuenda yacan. ¹⁷ Vasu ndi maa tandihí ra naha nacoo ihñi tsi yu, maa tyin Jutu Mañi yo jatyinyee xaan ra tsi yu. Tan tsaḥá ra tunyee iñi tsi yu tan cuví cahan catsi yu tuhun ra nuu nyiví. Tan tsiñi tandihí nyiví tsa ñavin ñi Israel cuví tsa caḥan yu. Tan jacacu Nyoo tsi yu tan ña tsatsj ndicaha can tsi yu. ¹⁸ Tan maa Nyoo cua jacacu tsi yu ndaha tandihí tsa ña vaha. Tan cua jaha cuenda ra tsi yu tsa cuenda tsa cua naquihin vaha ra tsi yu, tan cua cunyaa yu tsihin ra nu ndacá ñaha ra nda gloria. Tan taahán tsi jacahnu yo tsi ra tandihí ñi tyembu. Tan na cuví tsi tacan.

Nu ndihí caḥan ra Pablo tan tsaḥá ra nacumi tsi nyiví

¹⁹ Cuhva nacumi tsi ña Prisca tan tsi ra Aquila tan tsi nyiví ra Onesíforo. ²⁰ Tan jacotó ndihí yu tsi un tyin ndoo ra Erasto ñuu Corinto. Tan ndoo ra Tróximo ñuu Mileto tyin cuuhví ra. ²¹ Janumi un tan quitsi un tsa ndi cumañi ca tahan tsi tyembu vitsin.

Tan nacumi tsi un catyí ra Eubulo tan ra Pudente tsihin ra Lino tsihin ña Claudia tan tandihí ca nyiví yihí cuenda Nyoo tsihin yo.

²² Na quihí ndaha Jutu Mañi yo Jesucristo tsi un. Tan Nyoo nasoco tsi tandihí ndo.

Tan na cuví tsi tacan ñi.

Carta Tsa Jacuhun Ra Pablo Tsi Ra Tito

Nu tyaq ra Pablo carta tsa cuenda ra Tito

¹ Yuhu ra Pablo jahá tyiñu yu tyiñu Nyoo. Tan tsicá yu tyiñu ra Jesucristo, tyin tava tyiñu ra tsi yu tsa jatyinyee yu tsi nyivi nacatsj Nyoo, na tsinu iñi ñi tsi ra, tan nacoto ñi tsa nditsa, tan coto ñi nácaa taahán tsi coo yo cuhva cuñi Nyoo. ² Tan cuita iñi ñi tsa cua coo ñi ñayivi nyito tsa ña cua naa maa nda gloria. Tyin nda ndi cumañi ca tsinu ñuhu ñayivi tan catyj Nyoo tyin cuhva ra ñayivi nyito coo yo. Tan ña jandaví ñaha ra. ³ Tan vityin tsa tahañ tsi quivi tsa tyaq Nyoo cuhva tyin coto yo tuhun ra. Maa ra cuví ra jacacú tsi yo, tan tava ra tyiñu tsi yu tsa cahan yu tuhun ra tsihin nyivi. ⁴ Jaquitsí yu carta ihya tsi un, Tito, tyin nditsa tyin cuví un tumaa sehe yu tsa cuenda tuhun Nyoo, tyin inducu ñi tsinú iñi yo tsi ra Jesucristo. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo ra jacacú tsi yo, coo aña un. Tan na cundaahvi iñi ra nyehe ra tsi un.

Tyiñu tsaha ra Pablo tsi ra Tito tyin jaha tyiñu ra tyiñu Nyoo ñuu tsa cayucú ñuhu Creta

⁵ Nacoq yu tsi un ñuhu Creta tyin jandaa un tyiñu Nyoo tsa nyaá cundaa. Tan na tyiso un tsi ra tsahnu cuví ityi nuu tsihin nyivi vehe ñuhu intuhun intuhun ñuu, tumaa tsa catyj maa yu tsihin un. ⁶ Tyin ra tsahnu cuví ityi nuu tsihin nyivi vehe ñuhu, cuñi tsi cuví ra iin ra iyó intuhun ñi ñasihi, tan tsinú iñi tandihi sehe ra tsi Nyoo, tan catsi iyó sehe ra tsihin ra, tan ña ndava iñi sehe ra, tan ña tuhvá nyivi tyaa cuatyi siqui sehe ra. Tun tacan iyó ra, cuví cuví ra ityi nuu tsihin nyivi vehe ñuhu. ⁷ Tyin ra cuví ityi nuu tsihin ñi yihí cuenda Nyoo, maa Nyoo tsaha tyiñu can tsi ra. Yacan cuenda ñiñi cuñi tsi tsa cuví ra iin ra cuñi iyó nuu Nyoo. Iin ra cahnu jahá tsi ña cuví cuví ra ityi nuu tsihin nyivi vehe ñuhu, ndi iin ra ndihi iñi, ndi iin ra tuhvá tsihi, ndi iin ra nducú tsihi, ndi iin ra jaha canaa xuhun tsihin iin cuhva ña vaha. ⁸ Maa tyin cuñi tsi cuví ra iin ra sii cuñi tatun tsa nyivi yuvehe ra. Tan taahán tsi cuhva ra nu ndoo ñi cusu ñi. Cuñi tsi cuví ra iin ra javahá tsa vaha, iin ra tsicá iñi tsa vaha, iin ra tsa nacuhva cuenda vaha tsi ra tsi Nyoo, iin ra tsitó cundaca ñaha tsi maa ra. ⁹ Cuñi tsi cunyicun vaha ra tuhun nditsa tsa jacuahá yo tsi ra. Tacan tan coto ra jandu iin ra iñi nyivi tsihin tuhun vaha ihya, tan ñihi ra cuhva jacuaha ra tsi nyivi caahán tyin ña nditsa tuhun caahán yo. ¹⁰ Tyin cuaha xaan ra ndava iñi iyó, cuaha ra caahán tsa nduve yahvi nyaá, cuaha ra jandaví ñaha. Tan vihi ca ra nyicún costumbre tsaahnu nyivi Israel, yaha ca cuhva caahán ra can naha ra. ¹¹ Cuñi tsi tsa casi yo nu caahán ra naha, tyin cuaha xaan nyivi tan vehe tan vehe ñi jandoyó ñuhu ra naha. Tyin jacuahá ra naha iin tsa ña taahán tsi tsi ñi tsa cuenda tsa cuñi ra naha xuhun.

¹² Tan juvin ñi maa iin ra Creta, iin ra tsitó xaan, cahañ ra tuhun nyivi ñuu maa ra catyj ra tyehen: “Nyivi Creta, vatya xaan ñi. Cuví ñi tumaa cuví quití. Cuaha xaan tsatsi ñi tan jutsan xaan ñi”, catyj ra. ¹³ Tan nditsa tsa cahañ ra. Yacan cuenda cuñi tsi tsa cahan ñihi un tsihin ñi, na nasama ñi cuhva iyó ñi tyin tacan tan vaha tsinu iñi ñi tsi ra Cristo. ¹⁴ Tan ña tyaa soho ca ñi cuendu tsa caahán nyivi Israel. Tan ndi ña tyaa soho ca ñi tsa caahán nyivi tsa ña cuñi coto tsa nditsa.

¹⁵ Tsa cuenda nyivi tsa vaha tsicá iñi ñi, tandihí maa náa tsa iyó tan vaha tsi cuñí ñi. Maa tyin tsa cuenda nyivi tsa ña tsinú iñi tan ña vaha tsicá iñi, nduve maa iin tsa vaha cuñí ñi, tyin nda cuanda cuhva tsicá iñi ñi tan tsa tsifí tuñi iñi ñi tan ña vaha. ¹⁶ Catyí ñi tyin tsitó ñi tsi Nyoo, maa tyin tsihin tsa ña vaha javahá ñi, nyehé yo tyin ña nditsa ñi. Tyin ndasi tsicá iñi ñi tan ndava iñi ñi. Tan ña cuví javaha ñi tsa vaha.

2

Tuhun vaha tsa tsahq Nyoo tyin jacuaha yo

¹ Maa tyin yooho, jacuaha tsa vaha tsa nacatsí tahan tsihin tsa jacuahá Nyoo tsi yo. ² Jacuaha tsi ra tsahnu naha ra, na catsi coo ra naha, tyin tacan tan cua jaha nyivi tsa ñayivi tsi ra naha. Tan tacan vaha caca iñi ra naha. Vaha cuhun ra naha tsihin tsa tsinú iñi ra. Cuñí tsi tsa cuñi ra naha tsi Nyoo tan tsi nyivi. Tan cunyee iñi ra naha tandihí náa tundoho nyehé ra naha. ³ Tan tacan tucu ñiñaha tsahnu. Cahan tsihin ñi na coo ñi tumaa taahán iñi maa Nyoo. Tan ña cahan ñi cuendu. Ña coho ñi nyixi. Na janaha ñi tsa vaha tsi nyivi tsihin cuhva iyó ñi. ⁴ Tyin tacan, jacuahá vaha ñi tsi ñiñaha cuatyí tsa ndi tindaha, na cuñi ñi tsi yí ñi tan tsi sehe ñi. ⁵ Na caca vaha iñi ñi. Tan jaha vaha ñi cuenda cuhva iyó ñi. Na jaha cuenda vaha ñi vehe ñi. Tan na cuví ñi nyivi vaha. Na cuhva ñi tsa cundaca ñaha yí ñi tsi ñi, tyin tacan tan ña cuví cahan nyivi ndavaha ñi siqui tuhun Nyoo tsa cuenda cuhva iyó ñi.

⁶ Tacan tucu ra cuatyí naha ra. Cuhva cuenda tsi ra naha na catsi coo ra naha. ⁷ Tan maa un cuñí tsi tsa janaha un maa ñi maa tsa vaha tsi ra naha tsihin cuhva iyó un. Jacuaha tsi ra naha tsihin tsa vii tan tsihin tsa vaha. ⁸ Maa ñi tuhun vaha cahan un tyin tacan tan yoñi cuví tyaa cuatyí siqui un. Tan ra xaan iñi tsi ndó naha ra ña cua ñihi ra naha cuhva cahan ra naha ndavaha ñi siqui ndo tan cua nducahan nuu ra naha.

⁹ Cuhva cuenda tsi ra yañi yo, ra cuví musu naha ra, na tyaa yahvi ra naha tsi tsitoho ra naha. Na javaha ra naha tandihí tsa caahán tsitoho ra naha. Tan na ña nacahan ra naha nu caahán tsitoho ra naha. ¹⁰ Tan na ña suhu ra naha tsa tsii tsitoho ra naha. Na jaha vaha ra naha cuenda tandihí ndaha tyiñu tsitoho ra naha, tyin tacan tan nyehe nyivi tyin vaha xaan tuhun Nyoo, ra jacacú tsi yo.

¹¹ Tyin Nyoo janahá ra tsa vaha tsa iyó tsi ra tsi nyivi tan cuñí ra jacacu ra tsi tandihí ñi. ¹² Tsihin yacan jacuahá Nyoo tsi yo tyin taahán tsi nacoo yo tsa caquiñi tsa javahá nyivi tsa ña tsitó tsi ra, tan nacoo tucu yo tsa cuñí ñi can. Tan cuiti coo yo nu ñuhu ñayivi ihya, na cundaca ñaha vaha yo tsi yo tumaa cuñí maa Nyoo. ¹³ Tan janahá tucu ra tsi yo nácaa cuatu yo tsa vaha tsa cua ñihi yo quivi quitsi ra Jesucristo inga tsaha. Tyin sii xaan cua cuñi yo nyehe yo tsa sii caá quivi quitsi ra cuví Nyoo yo, ra cahnú cuví, ra jacacú tsi yo. ¹⁴ Tsahá ra ñayivi ra tsa cuenda yo tyin tacan tan jacacu ra tsi yo ndaha tandihí tsa caquiñi. Tan nacatyá ra tsi yo na cuví yo nyivi vaha, tan cuví yo tsii maa ra, tan javaha yo maa ñi maa tsa vaha. ¹⁵ Yacan cuñí tsi jacuaha un tsi nyivi. Jandu iin iñi ñi. Tan cahan tsihin ñi tsihin sivi Nyoo. Tan ña javaha un tsa ña vaha tyin tacan tan ña ñihi nyivi nácaa cahan nyaa ñi tsi un.

3

Cuhva taahán tsi javaha nyivi yihí cuenda Nyoo

¹ Janducuhun iñi tsi nyivi yihí cuenda Nyoo tsihin yo na tyaa yahvi ñi tsi ra ndacá ñaha tan ra cumí tyiñu naha ra. Tan na javaha ñi tyiñu catyí ra cumí tyiñu tyin javaha ñi tsihin tsa ñi iñi ñi. ² Tan ña cahan ñi ndavaha ñi siqui nyivi. Ña cañi tahan ñi tsihin nyivi. Na cuvi ñi nyivi vaha. Na masu jaha ñi añima ñi tsihin tandihí nyivi.

³ Tyin nda cuanda maa yo tan ña vaha javahá yo nu quitsi tsi. Soho xaan tsicoo yo. Ndava xaan iñi yo. Ña tsicá yo ityi vaha tyin jandavj ñaha xaan nu ña vaha tsi yo. Tan tsindacá ñaha tandihí tsa ña vaha tsa cuñi cuñu ñuhu yo tsi yo. Tan javahá yo tandihí cuhva cuñi maa yo. Tan cuñi yo coo tandihí tsa iyó tsi inga nyivi tsi yo. Ndasí tsicá iñi yo nyehe yo tsi nyivi yo. Tan tacan tucu maa nyivi ndasí cuñi ñi nyehe ñi tsi yo. ⁴ Maa tyin Nyoo vaha xaan iñi ra tan jacacú ra tsi yo. Tsihin yacan janahá ra tsi yo tyin cuñi ra tsi tandihí nyivi. ⁵ Ñavin tsa cuenda tsa vaha javahá yo tan jacacú ra tsi yo, tyin jacacú ra tsi yo tsa cuenda tsa cundaahvi iñi ra nyehe ra tsi yo. Tan tsihin niñi ra Jesús nacatyá ra cuatyí yo, tan nacacú tsaá yo jahá Tatyí li ra, tan tsahá ra ñayivi nyito coo yo. ⁶ Tan tsa cuenda ra Jesucristo, ra jacacú tsi yo, tsahá xaan Nyoo tsa coo Tatyí li ra añima yo. ⁷ Tsihin tsa vaha maa ra tan janduvahá ra tsi yo nuu ra. tyin tacan tan naquihin cuenda yo ñayivi nyito tsa ña cua ña maa tsa ndatú yo. ⁸ Tandihí tuhun ihya tuhun nditsa cuví tsi. Tan cuñi yu tsa jañiñi xaan un cuhva cuenda un tuhun ihya tsi nyivi tsinú iñi tsi Nyoo tan na jaha cuenda ñi tsi ñi, tan javaha ñi tsa vaha. Vaha xaan tuhun ihya. Cua jatinyee tsi tsi tandihí nyivi tatun tyaá yahvi ñi itsi. ⁹ Maa tyin ña tyaa soho un nu caahán yuhu tahan nyivi siqui tsa nduve yahvi nyaá. Ña tyaa soho un tsa caahán ñi tyin ñi ican cuñi ñi coto ñi nácaa vatsí tata nyivi. Ña tyihí un tsi un tsihin nyivi cañi tahan tsa cuenda ley tsa tyaa ra Moisés tsanaha. Tyin nduve náa jatinyee yacan. Tan nduve tsa tsiñi tuñi tsahá can.

¹⁰ Tatun iyó nyivi cuñi natahvi sava tsi nyivi tsicá vehe ñuhu, çana tsi ñi iin tsaha a uvi tsaha tan cahan un tsihin ñi tyin ña vaha tsa javahá ñi tacan. Tan tatun ña tyaá yahvi ñi tsa caahán un, çasi nu caca ñi vehe ñuhu. ¹¹ Tyin tsihin tsa javahá ñi tacan, tsa tsitó un tyin ña vaha añima ñi tyin tsicoo cuatyí ñi. Tan juvin ñi maa ñi jacunaá tsi ñi tsa tacan javahá ñi.

Tyiñu tavq ra Pablo tsi ra Tito

¹² Cua jaquitsi yu tsi ra Artemas, a ra Tíquico nu nyi un. Tan quivi tsaá ra, nducu cuhva tan cūhun un nda ñuu Nicópolis tyin ndacan cua ñihi tahan yo. Tyin tyaá yu cuhva tsa ndoo yu ndacan yoo vitsin. ¹³ Nducu cuhva jatinyee un tsi ra Zenas ra tuhvá caahán ndaahvi tsaha nyivi, tan tsi ra Apolos. Tan cūhva tsa tsiñi ñuhu tsi ra naha nu tsicá ra naha caahán ra naha tuhun Nyoo. Tacan tan ña cumañi tsa cumañi tsi ra naha. ¹⁴ Na cutuhva nyivi yihí cuenda Nyoo javaha ñi tsa vaha tan jatinyee ñi tsi inga nyivi tatun iyó tsa cumañi tsi ñi. Tacan tan ña cuatu nyicún ñi tsi Nyoo.

Nu ndihí cahan ra Pablo

¹⁵ Tandihí ra yucú tsihin yu, tsahá ra naha nacumi tsi un. Tan cuhva nacumi tsi tandihí nyivi cuñi tsi yo tsa cuenda tsa iin ñi cuví yo cuenda Nyoo. Tan Nyoo nasoco tsi tandihí ndo.

Tan na cuvi tsi tacan ñi.

Carta Tsa Jacuhun Ra Pablo Tsi Ra Filemón

Nu quitsaha tyaá ra Pablo carta cuenda ra Filemón

¹ Yuhu ra Pablo, nyii yu vehe caa tsa cuenda tsa caahán yu tuhun ra Cristo. Yooho Filemón tyaá yu carta ihya tsa cuenda un. Tan jaquitsí yu nacumi tsi un. Tan catyí tucu ra Timoteo tyin jaquitsí ndihi ra nacumi tsi un. Cuñi xaan ndi tsi un tsa cuenda tsa iin ñi tyiñu ra Cristo jahá tyiñu yo.

Nu quitsaha tyaá ra Pablo carta cuenda ra Filemón

² Tan tyaá yu carta ihya tsa cuenda ña Apia tan ra Arquipo tyin jatyinyee xaan ñi tsi yo tsihin tyiñu jahá yo, tan tyaá tucu yu itsi tsa cuenda tandihi nyivi ndu iin yuvehe un. ³ Na nasoco xaan Nyoo tan Jutu Mañi yo Jesucristo tsi ndo, na cuhva ra naha tsa taxin coo aña ndo.

Ra Filemón tsinú xaan iñi ra tsi ra Jesús tan cuñi xaan ra tsi nyivi

⁴ Tandihí ñi tsaha tsa tsicán tahvi yu tsi Nyoo tan nducuhún iñi yu tsi un, ⁵ tyin ñihí tuhun yu tyin tsinú xaan iñi un tsi ra Jesús tan cuñi xaan un tsi tandihí nyivi yihí cuenda ra. ⁶ Tan tsicán yu tsi Nyoo tsa cuenda tandihí nyivi tsa natsinú iñi tsi ra Jesús jahá un tsihin tsa tsinú iñi un, tyin na cutuñi iñi ñi tandihí tsa vaha tsa iyó tsi yo tsa cuenda ra Jesucristo. ⁷ Tan sñi xaan cuñi yu tan iin xaan cuñi yu tsa cuenda tsa cuñi xaan un tsi nyivi tsa yihí cuenda ra Cristo tan jandu iin xaan un iñi ñi.

Nu tsicán ra Pablo tumañi iñi tsi ra Filemón tsa cuenda ra Onésimo

⁸ Yuhu iyó ndatu tsi yu tsa tava tyiñu yu tsi un javaha un cuhva taahán maa tsi tyin ra tsicá tyiñu ra Cristo cuví yu. ⁹ Maa tyin yuhu cuñi xaan yu tsi un, yacan cuenda ña cua tava tyiñu yu tsi un tyin cuñi yu ndacan yu iin tumañi iñi tsi un. Tan tsa tsitó maa un tyin yuhu tsa tsahnu xaan yu tan nyii yu vehe caa ihya tsa cuenda ra Cristo. ¹⁰ Tan yacan tsicán yu tumañi iñi tsi un tsa cuenda ra Onésimo, tyin vityin cuví ra tumaa iin sehe yu tsa cuenda Nyoo tyin cahan yu tuhun ra Cristo tsihin ra nu nyii yu vehe caa ihya.

¹¹ Tahán tsanaha cuví ra musu un tan ña jahá tyiñu vaha ra. Maa tyin vityin vaha xaan cua jatyinyee ra tsi yo, tahan ñi tsi yooho tan yuhu. ¹² Yacan jaquitsí nyico yu tsi ra yuvehe un tan cuñi yu tsa naquihin cuenda un tsi ra tumaa tsa maa yu cuví ra. ¹³ Tsicá tucu iñi yu tsa ndoo ra nu nyii yu vehe caa ihya tan jatyinyee ra tsi yu cahan yu tuhun Nyoo tsitsi tsa nduve un. ¹⁴ Maa tyin ña cuñi yu jandoo yu tsi ra tyin ña tsitó yu nácaa cua cahan un. Tan ña cuñi yu jañiñi yu tsi un tun ña cuhva un tsa cunyi ra. Vaha ca jaquitsi nyico maa un tsi ra tun cacu iñi un tsa cuhva un tsi ra tsa jaha tyiñu ra tsihin yu. ¹⁵ Vasiqwi maa Nyoo cuñi tsa cunu ra nuu un juhva quivi tan vityin cua tsa nyico ra yuvehe un tan coo cuii ra tsihin un. ¹⁶ Tan vityin naquihin cuenda tsi ra tumaa yañi un tsa cuenda ra Cristo; tan ñavin tumaa musu. Yuhu cuñi xaan yu tsi ra, yacan yooho taahán tsi tsa cuñi ca un tsi ra tan ñavin ca yuhu, tyin vityin ñavin musu ñi un cua cuví tsi ra tyin cuví tucu ra yañi un tsa cuenda ra Cristo.

¹⁷ Tun nditsa un tsa cuñi un tsi yu tsa cuenda tsa yihí yo cuenda ra Cristo, naquihin cuenda tsi ra tumaa tsa cua naquihin cuenda un tsi maa yu tatun tsa yu yuvehe un. ¹⁸ Tatun javaha ra iin tsa ña vaha tsi un o nyaá cuenda ra tsi un, tyahvi maa yu can. ¹⁹ Yuhu ra Pablo tyaá yu letra ihya tsihin ndaha yu

tyin cua tyahvi maa yu tsi un, tan ña cua cahan yu tsihin un tyin nyaá tucu cuenda maa un nda cuanda ñayivi iyó un tsi yu. ²⁰ Yañi, javaha tumañi iñi ihya tsi yu, tumaa ra yihí cuenda ra Cristo; na cusii iñi yu tan na ndu iin iñi añaima yu tsihin tsa cua javaha un.

²¹ Jaquitsí yu carta ihya tsi un tyin tsitó yu tyin cua tyaa yahvi un tsa caahán yu tan cua javaha un tsa tsicán yu, tan cuaha ca tsa cua javaha un. ²² Tan cuñí tucu yu tyin janduvaha un nu cusu yu yuvehe un tyin nyitá iñi yu tyin Nyoo cua cuhva ra tsa quitsi nyehe yu tsi ndo, tyin tsicán tahvi ndo tsi ra.

Nu ndihí tyaa ra Pablo carta tsa cuenda ra Filemón tan tsahá ra nacumi tsi ra tan jacuhún tucu inga ra naha nacumi tsi ra

²³ Ra Epafra tsa nyii ndihí vehe caa ihya tyin caahán ra tuhun ra Cristo Jesús jaquitsí ra nacumi tsi un. ²⁴ Ra Marcos, ra Aristarco, ra Demas, tan ra Lucas tsahá ra naha nacumi tsi un. Ra ihya naha ra jatyinyeé xaan tsi yu tsihin tyiñu. ²⁵ Na nasoco xaan Jutu Mañi yo Jesucristo tsi ndo.

Tan na cuvi tsi tacan ñi.

Carta Tsa Tsinyaa Tsa Cuenda Nyivi Israel, Ñi Caahán Yuhu Hebreo

Caahán Nyoo tsihin yo tsihin yuhu Sehe ra

¹ Tahañ tsanaha cuaha xaan tsaha, tan cuaha xaan cuhva cahañ Nyoo tsihin tsi tsaahnu yo. Tsa jihna ñi tsatyíñu ra tsi ra cuví ndusu yuhu ra. Juvín ra can naha ra tsaha cuenda tsi nyivi tuhun caahán Nyoo. ² Tan vityín, nu cua ndihi tyembu ihya tsatyíñu ra tsi Sehe ra tsa caahán ra tsihin yo. Iin ñi cuví ra tsihin Sehe ra tan javaha ra tandihi tsa iyó. Tan nacuhva cuenda ra tandihi can tsi Sehe ra. ³ Tan maa Sehe ra janahá ra tsa sii caá ra, tyín juvín ra Sehe ra cuví tixahñu ra tyín juvín ñi cuhva caá maa ra caá ra Sehe ra. Tan tsihin tunyee iñi tuhun caahán ra, yihí ndaha ra tandihi tsa iyó. Tsa yaha tsa nacatya ra cuatyí yo, tan tsinyaa ra xiin cuaha Nyoo nda gloria.

Cahnu ca cuví Sehe Nyoo tan ñavin ca ángel

⁴ Sehe Nyoo cahnu xaan ca cuví ra tan ñavin ca ángel. Tan cahnu ca tyiñu ñihí ra jahá tyiñu ra tan ñavin ca ángel. ⁵ Tyín Nyoo ña catyí ra ndi iin tsaha tsihin ndi intuhun ángel tyehen:

Yooho cuví Sehe yu.

Tan tsahá yu ñayivi coo un vityín.

Tan ndi ña cahañ ra tuhun ndi intuhun ángel tyehen:

Yuhu cua cuví Jutu ra.

Tan maa ra cua cuví Sehe yu.

⁶ Maa tyín quivi jaquitsí Nyoo tsi Sehe mañi ra nu ñuhu ñayivi, catyí ra:

Tyín tandihi ángel ra taahán tsi jacahnu ra naha tsi Sehe ra.

⁷ Tan cahañ tucu ra tuhun ángel tan catyí ra:

Ángel yu cuví ra naha tumaa iin tatyí jahá yu,

jahá tyiñu ra naha tyiñu yu, tan cuví tucu ra naha tumaa ñuhu, catyí Nyoo.

⁸ Maa tyín tuhun Sehe ra catyí ra tyehen:

Nyoo cuví un, tan ña cua cundihí maa tsa ndacá ñaha un. Tan tsa ndacá ñaha un ndaa tsi tan nditsa tsi.

⁹ Tyín cuñí un tsa vaha tan ndasi cuñí un nyehé un tsa ña vaha.

Yacan cuenda yuhu, tsa cuví yu Nyoo un, tsahá yu cuaha ca tsa sii cuñí un, tan ñavin ca tsi ra cutahán tsihin un naha ra.

¹⁰ Tan catyí tucu Nyoo tsihin Sehe ra tyehen:

Yooho cuví Jutu Mañi tandihi nyivi. Quivi jihna ñi juvín un javaha ñuhu ñayivi, tan tsihin ndaha un javaha un andivi.

¹¹ Ñuhu ñayivi tan andivi tan tandihi maa tsa iyó cua cundihí tsi, maa tyín yooho, ña cua cundihí un, tyín tacan ñi iyó maa un.

Tandihí maa can cua ndutsahnu can tumaa ndutsahnú jahma.

¹² Tan cua quihí tahnu can tumaa tyihí tahnu yo iin jahma.

Tan cua nasama can tumaa nasamá nyivi jahma ñi.

Maa tyín yooho iin ñi maa ra cuví un tan ña cua nasama un.

Tan ña cua cundihí maa ñayivi un tyín tacan ñi iyó maa un, catyí Nyoo tsihin Sehe ra.

¹³ Nyoo ndi iin tsaha ña cahañ ra tsihin ndi intuhun ángel tumaa cahañ ra tsihin Sehe ra tyehen:

Cunyaaxiin cuaha yu ihya
tsitsi tsa nacuhva cuenda yu tsi nu xaan iñi tsi un nahnu tsi un.

¹⁴ Tandihí ángel, tatyí cuví ra naha. Tavaḡ tyiñu Nyoo tsi ra naha tsa caca ra naha tyiñu ra tan jatyinyee ra naha tsi nyivi tsa cua cacu.

2

Cahnu xaan cuví tsa jacacú Nyoo tsi yo

¹ Yacan cuenda cuñí tsi tyaa yahvi xaan ca yo tuhun nditsa tsa tsiñi yo, coto nacoó ihñi yo itsi. ² Tahañ tsanaha tsaḡa cuenda ángel ley Nyoo tsi ra Moisés. Tan janahá Nyoo tyin nditsa tan taahán tsi tyaa yahvi nyivi itsi. Tan nyivi tsa tsicoḡ cuatyí tan ña tyaa yahvi ley can, tatsi tuñi ra tsi ñi tumaa catyí maa ley can. ³ Tun tacan tahañ ñi can quivi can *znácaa* cua javaha yoo vityin, tan cuví cacu yo tatan ña tyaa yahvi yo tsa jacacú Nyoo tsi yo?, tan cahnu xaan ca cuví tuhun ihya. Juvín ñi maa Jutu Mañi yo Jesucristo cuví ra tsa caḡan jihna tyin cuví cacu yo. Yahaḡ can tan caḡan nyivi tsa tsiñi tsa caḡan ra. Nyeḡe ñi tyin nditsa tan nacatyí tuhun ñi itsi tsihin yo. ⁴ Tan siin tyin Nyoo janahá catsi ra tsi yo tyin nditsa tsa jacacú ra tsi yo. Janahá ra can tsi yo tsihin tsa javahaḡ ra cuaha tsa iyo. Tan tsaḡa tucu ra Tatyí li ra tsi yo tyin jatyinyee tsi tsi yo tsa javaha yo tyiñu tsa cuñi ra javaha yo. Tan tsihin tandihí yacan janahá ra tsi yo tyin nditsa tsa jacacú ra tsi yo.

Ra Jesucristo quitsi ra cuví ra rayi nu ñuhu ñayivi ihya

⁵ Nyoo ña tsaḡa ra tsa cundaca ñaha ángel ñuhu ñayivi tsa tsa cua coo tsa caahán yo tuhun vityin. ⁶ Tyin iyó iin nu tyaa iin ra nu tutu Nyoo tyehen: Nyoo Jutu yu *zyóo* ra cuví rayi nu ñuhu ñayivi ihya tyin ñuhú iñi un tsi ra? *¿Tan yóo ra cuví ra tyin cutuñu iñi un tsa cuenda ra?*

⁷ Tyin ndaahvi ca jahá un tsi ra juhva tyembu, tan ñavin ca ra ángel naha ra. Maa tyin jacahnú un tsi ra. Tan jahá un tsa ñayivi tsi ra. Tan tsaḡa un tsa quihí ndaha ra tandihí tsa javahaḡ un.

⁸ Tandihí can tyaa cuenda un ndaha ra.

Tan nduve maa náa ña tsaḡa cuenda Nyoo quihí ndaha ra. Tan ñaha ca nyehé yo tyaa yahvi tandihí yacan tsi ra. ⁹ Maa tyin nyehé yo tsi ra Jesús tyin nduluhlu ra jahá Nyoo juhva tyembu tan ñavin ca ra ángel naha ra. Tan janduluhlu Nyoo tsi ra tsa cuenda tsa cuñi xaan ra tsi yo. Tan tsaḡa ra tsi ra Jesús quitsi ra quitsi cúu ra tsa cuenda tandihí yo. Tan vityin jahá xaan Nyoo tsa cahnu tsi ra tan jacahnú xaan ra tsi ra tsa cuenda tundoho tsa nyehé ra quivi can.

¹⁰ Tandihí maa tsa iyó, tsa cuenda maa Nyoo cuví tsi. Maa ra javahaḡ itsi. Tan cuñi ra cuhva ra tandihí tsa si caá tsa iyó andivi tsi tandihí sehe ra. Yacan cuenda janyehé ra tundoho tsi ra Jesucristo, ra tsa jacacú tsi yo, tan tsihin yacan janduvahaḡ ra tsi ra. ¹¹ Ra Cristo tsa jacacú tsi yo, Sehe Nyoo tsi ra. Tan juvín ñi sehe Nyoo nanduví yoo tsa tsinú iñi tsi ra. Yacan cuenda ña caḡan nuu ra Cristo tsa caahán ra tyin yañi ra tan cuhva ra cuví tsi yo, tyin iin ñi Jutu yo tsihin ra. ¹² Tyin catyí ra Cristo nu tutu Nyoo tyehen: Cua cahan yu tuhun un tsihin yañi yu.

Tan cua jacahnú yu tsi un tsihin yaa nu ndu iin yo.

¹³ Catyí tucu ra tyehen:

Yuhu nyitá iñi yu tsi Nyoo.

Tan catyí tucu ra:

Ihya nyaá yu tsihin sehe Nyoo, tsa tsaḡa ra tsi yo, catyí ra.

¹⁴ Yoo tsa cuví yo nyívi ñuhu ñayívi, iyó cuñu ñuhu yo tan niñi yo. Tacan cuví ra Cristo, tyin tun tsa ña tsicoo cuñu ñuhu ra tan niñi ra, ña cua cuvi cúu ra tan janaa ra tsi nu ña vaha, nu tsa tsahñí tsi nyívi. ¹⁵ Tacan javahá ra tan jacacu ra tsi nyívi tsa tsicoo yuuhví jahá tuhun tsihí. Cuví ñi tumaa musu nu ña vaha tyin tandíhi ñi quívi tsicoo yuuhví ñi. ¹⁶ Tan tsa nditsa vaha tyin ña quítsj ra quítsj jatyinyee ra tsi ángel. Tyin quítsj ra quítsj jatyinyee ra tsi nyívi tata ra Abraham. ¹⁷ Yacan cuenda ñiñi cuñí tsi tsa cuvi ra tumaa yoo tsa cuví yo yañi ra tan cuhva ra tyin tacan tan cuvi ra iin ra cundaahvi iñi tsi yo, tan cuvi ra jutu tsaahnu cuví ityi nuu tsa cuenda yo nuu Nyoo tyin jandaá ra tandíhi maa tan quiñin nyaa ra cuatyí yo tsihin tundoho tsa nyehe ra. ¹⁸ Tan tsa cuenda tsa nyehe ra tundoho quívi nducu cuhva nu ña vaha tsi ra, tsitó ra nácaa cuñí yo tun nyehé yo tundoho. Yacan vityin nyaá ra tsa jatyinyee ra tsi yo tun nyehé yo tundoho tsa nducu cuhva nu ña vaha tsi yo.

3

Cahnu ca cuví ra Jesús tan ñavin ca ra Moisés

¹ Nyooho, yañi, tsa jandu ií Nyoo, tan tsa nacatsj ra tyin coo ndo tsihin ra nda gloria, nyehe vaha ndo cuhva iyó ra Cristo Jesús, juvin ra jaquítsj Nyoo tyin caca ra tyiñu ra tan cuví ra jutu tsaahnu cuví ityi nuu tsa cuenda yoo tsa tsinú iñi tuhun ra. ² Ra Cristo javahá ra tandíhi tsa cañan Nyoo tyin javaha ra, tumaa javahá tucu ra Moisés tyiñu tsa tsahá Nyoo tsi ra tsa jaha cuenda ra vehe Nyoo tsa cuví nyívi Israel. ³ Ra Jesucristo cahnu ca ra cuví ra, tan ñavin ca ra Moisés, tyin cuví ra tumaa iin ra javahá vehe. Tyin ra tsa javahá vehe cahnu ca ra cuví ra tan ñavin ca maa vehe tsa javahá ra. ⁴ Tyin maa ñi iyó ra javahá intuhun intuhun vehe, maa tyin Nyoo cuví ra tsa javahá tandíhi maa tsa iyó. ⁵ Ra Moisés tyaa yahví ra tsi Nyoo tan javahá ra tyiñu tsa tsahá Nyoo tsi ra tyin jahá cuenda vaha ra vehe Nyoo tsa cuví nyívi Israel, tan juvin ñi jacotó tucu ra tsi nyívi tsa cua javaha Nyoo nu cuahán ca tsi. ⁶ Maa tyin ra Cristo, Sehe Nyoo, tyaa yahví tucu maa ra tsi Nyoo tan juvin ra cuví ra ndacá ñaha vehe Nyoo vityin. Vehe can cuví yoo tun iin ñi cuñí yo nyicún yo tsi Nyoo tan nyitá vaha iñi yo tsi ra nda cuanda nu ndíhi, tan tacan ñi sñi cuñí yo ndatú yo tsa cua ñihi yo.

Nyívi tsinú iñi tsi Nyoo, quitatú ñi tsihin ra

⁷ Yacan cuenda cuñí tsi jaha cuenda vaha yo tsi yo tumaa catyí Tatyí Ii Nyoo tyehen:

Tatun tsiní ndo tsa caahán Nyoo tsihin ndo vityin,

⁸ ña jandava ndo añima ndo, tumaa javahá nyívi tsa ña tyaa yahví tsi Nyoo quívi nducu cuhva ñi tsi ra nu tsicá ñi nuu tsiqui.

⁹ Tyehen catyí Nyoo:

Tsii tsaahnu ndo nducu cuhva ñi tsi yu, vasu ndi maa nyehe ñi tsa javahá yu tsitsi tsa uvi xico cuiya.

¹⁰ Yacan cuenda cuxaān yu tsihin nyívi can, tan catyí yu tyehen: “Ña iin maa cuñí nyívi ihya tan ña cuñí ñi cunyicun ñi ityi janahá yu tsi ñi.”

¹¹ Yacan cuenda cuxaān yu tsihin ñi, tan cañan catsi yu tsihin ñi, tyin ña cua quitatu ñi tsihin yu, catyí Nyoo.

¹² Yacan cuenda yañi, jahá ndo cuenda tsi ndo tan ña caca uvi iñi ndo tsitsi añima ndo coto jandíhi ndo tsa tsinú iñi ndo tsi Nyoo nyito tan coto nacoo ndo

tsi ra. ¹³ Maa tyin jandu iin tahan ndo iñi ndo tandihi ñi quivi, tsitsi tsa tsahá tsi kuhva tsi ndo vityin. Tyin tacan tan ña cua ndundava añima ndo, tan ndi intuhun ndo tan ña cua jandavi ñaha tsa caquiñi tsi ndo. ¹⁴ Tyin tun ña jandihí yo tsa nyitá iñi yo tsi Nyoo nda cuando naa ñuhu ñayivi tumaa javahá yo nda quivi quitsahá yo, cua ñihi yo tsa vaha iin caa ñi tsihin ra Cristo tyin cunyeé iñi yo ndatu yo tsi ra.

¹⁵ Yacan tacan cuñi tsi jaha yo cuando tsi yo tumaa catyí tutu Nyoo: Tatun tsiñi ndo tsa caahán Nyoo tsihin ndo vityin

Ña jandava ndo añima ndo, tumaa javahá nyivi tsa ña tyaa yahvi tsi Nyoo —catyí tutu Nyoo.

¹⁶ ¿Yóo nyivi cuví ñi tsiñi tsa cahan Nyoo tan ña tyaa soho ñi? Nyivi ihya cuví nyivi Israel tsa tavá ra Moisés Egipto tahan tsanaha. Juvín ñi can ña tyaa soho. ¹⁷ Tan ¿yóo nyivi cuxaan Nyoo tsitsi tsa uvi xico cuiya? Juvín ñi maa ñi tyin tsicoq cuatyí ñi. Tan tsihi ñi nu tsiqui, juvín ñi maa nu tsicá ñi. ¹⁸ ¿Tan yóo tsihin cahan catsi Nyoo tyehen?:

—Ña cua quitatu ndo tsihin yu.

Juvín ñi tsihin ñi tsa ña tyaa soho can. ¹⁹ Ihya nyehé yo tyin ña cuví ñihí ñi quitatu ñi tsihin Nyoo tyin ña tsinu iñi ñi tsi ra.

4

¹ Yacan cuando, tsitsi tsa ndi iyó ndatu tsa quitatu yo tsihin Nyoo, jaha ndo cuando tsi ndo tyin tacan tan ndi intuhun ndo tan ña cua ndoo ihñi ndo.

² Vityin yoo tsiñi tucu yo tuhun Nyoo tsa jacacú ra tsi yo, tumaa tsa tsiñi tucu maa nyivi Israel can. Tsiñi ñi itsi, maa tyin nduve nacatyí tsa tsiñi ñi itsi tyin ña tsinu iñi ñi itsi. ³ Yoo tsa tsinu iñi tsi Nyoo, quitatu yo tsihin ra. [Maa tyin ña quitatu nyivi tsa ña tsinu iñi tsi ra] tyin catyí ra:

Yuhu cuxaan yu tsihin ñi tan cahan catsi yu tsihin ñi tyin ña cua quitatu ñi tsihin yu, catyí ra.

Vasu ndi maa [tacan cahan Nyoo tsihin ñi ican], maa tyin [tsa iyó tuhun tsa cuví quitatu yo tsihin Nyoo nda quivi] ndihí jahá tyiñu ra javahá ra ñuhu ñayivi. ⁴ Tyin yihí nu tutu Nyoo caahán tsi tyehen tuhun tsa tsinu utsa quivi nu ndihí vitya:

Tsa ndihí jahá tyiñu Nyoo, quitatu ra tsa tsinu utsa quivi.

⁵ Tan catyí tucu tsi tyehen:

Ña cua quitatu ñi tsihin yu, catyí Nyoo.

⁶ Nyivi tsa tsiñi jihna tuhun tsa jacacú Nyoo tsi yo ña cuví quitatu ñi tsihin ra, tsa cuando tsa ña tyaa yahvi ñi tsa cahan ra tsihin ñi. Maa tyin vityin ndi iyó ndatu tsa quitatu inga nyivi tsihin ra. ⁷ Tsa yaha tsa ña tyaa yahvi nyivi Israel tsa cahan Nyoo, tan tyaa ra inga quivi cuví quitatu yo tsihin ra, tan quivi can cuví tyembu vityin. Tacan caahán Nyoo nu tutu ra nu tyaa ra David tyehen: Vityin tatun nyooho tan tsiñi ndo tsa caahán yu,

Ña jandava xaan ndo añima ndo, catyí Nyoo.

⁸ Tun tsatyin tsahá ra Josué nu quitatu nyivi Israel, ña cua cahan Nyoo tsa cuando inga quivi. ⁹ Yacan cuando cuví quitatu nyivi yihí cuando ra tsihin ra. ¹⁰ Tyin nyivi quitatu tsihin Nyoo, ña tsicá iñi ñi tsa cuando tyiñu jahá ñi tyin quitatu añima ñi tumaa quitatu Nyoo quivi ndihí jahá tyiñu ra. ¹¹ Cuñi tsi jañiñi yo nducu yo kuhva quitatu yo tsihin Nyoo, tyin tacan tan ndi intuhun yo tan ña javaha yo tumaa javahá nyivi tsicoq tsanaha tsa ña cuñi tsinu iñi tsi ra.

¹² Tyin tuhun Nyoo, nyito tsi, tan iyó tunyee ifni itsi. Tan xaan ca tsi tan ñavin ca mityi tsa xaan nduvi tsiyo yuhu. Tan jasiin tsi tsa tsiñi tuñi jiñi yo tan tsa nyito yo, tan nu yihí tahan yiqui yo tan susun yihí tsitsi yiqui yo. Tan janahá tsi tun vaha o ña vaha tuhun xeehe tsa iyó añima yo tan tsa tsicá ifni yo. ¹³ Nduve maa tsa javahá Nyoo tan cuví cunu xeehe can nuu ra, tyin tandihi maa tan nyehé ra. Tan juvin tsi ra cua cuhva cuenda yo tsa javahá yo.

Ra Jesús cuví jutu tsaahnu cuví ityi nuu tsa caahán ndaahvi tsihin Nyoo tsa cuenda yo

¹⁴ Ra Jesús Sehe Nyoo, juvin ra cuví jutu tsaahnu cuví ityi nuu tsa cuenda yo, tyin quihvi ra nu nyaá Nyoo nda gloria tan caahán ndaahvi ra tsaha yo. Yacan cuenda na ña jandihí yo tsa tsinú ifni yo tsi ra. ¹⁵ Tyin ra tsa cuví jutu tsa cuenda yo cuví naquihin ndaahvi ra tsi yo tatun cuihya cuñi yo, tyin tsitó ra nácaa cuñi yo tun nyehe yo tundoho tyin maa ra nyehe tucu maa ra tandihi nuu tundoho quivi nducu cuhva nu ña vaha tsi ra, maa tyin ña tsicoo cuatyí ra. ¹⁶ Yacan cuenda cuñi tsi nducu yo tsi Nyoo tan ndacan yo tsi ra tsihin tsa ña yuuhvi yo na cundaahvi ifni ra nyehe ra tsi yo tan cuhva ra tunyee ifni tsa iyó tsi ra tsi yo, tan jatyinyee ra tsi yo quivi nyehé yo tundoho.

5

¹ Tandihí ñi jutu tsaahnu tsa cuví ityi nuu tsa nacatsi Nyoo tsitsi tsa tandihí nyivi Israel, nacatsi ra tsi ra naha tyin cahan ndaahvi ra naha tsaha ñi, tan cuhva cuenda ra naha tsa jamañi ñi tsi Nyoo, tan cahñi ra quiti tsa cuenda cuatyí ñi. ² Tan vatsi tsaha juvin ñi ndaahvi cuñi ra cuví jutu quivi nducu cuhva nu ña vaha tsi ra, yacan cuenda cuví cundaahvi ifni ra nyehé ra tsi nyivi ña cutuñi vaha ifni tuhun Nyoo tan nyivi ña nyicún vaha tsi Nyoo. ³ Tan yacan cuenda tsahñi ra quiti tan jamañi ra can nuu Nyoo tsa cuenda cuatyí maa ra tan tsa cuenda cuatyí nyivi.

⁴ Ndi intuhun maa nyivi tan ña cuví cuví ñi jutu tun ñavin maa Nyoo nacatsi tsi ñi. Tyin maa Nyoo cuví ra nacatsi tsi ra cua cuví jutu, tan tsahá ra ndatu tsi ra tsa cuví ra jutu, tumaa javahá ra tsihin ra Aarón tahan tsanaha. ⁵ Tan tacan tucu ra Cristo, ñavin maa ra tyaq tyiñu can tsi ra, tyin maa Nyoo tsahá tsa cuví ra jutu tsaahnu tsa cuví ityi nuu, tumaa catyí ra: Yooho cuví Sehe yu.

Yuhu tsahá yu ñayivi coo un vityin, catyí Nyoo tsihin ra Cristo.

⁶ Tumaa catyí tucu ra tsihin ra nu inga nu caahán tsi tyehen:

Ña cua cundihí maa tsa cuví yooho jutu,
tumaa cuví ra Melquisedec.

⁷ Quivi tsicoo ra Cristo nu ñuhu ñayivi ihya, tsican tahvi ra tsi Nyoo, tsacu xaan ra cahan ra tsihin Nyoo tyin juvin ra cua jacacu tsi ra ndaha tuhun tsiihi tsihin tunyee ifni tsa iyó tsi ra. Tsiñi Nyoo tuhun caahán ra tsa cuenda tyin javahá ra tandihí tsa catyí Nyoo tyin javaha ra. ⁸ Yacan cuenda vasu ndi maa Sehe Nyoo tsi ra Cristo, cutuhva ra tyaá yahvi ra tsi Nyoo tsihin tsa nyehe ra tundoho. ⁹ Tsa yahá tsa javahá ra tandihí cuhva cuñi Nyoo tyin javaha ra, tacan tan tsahá Nyoo tsi ra tsa jacacú ra tsi tandihí nyivi tsa tyaá yahvi tsa caahán ra tyin tacan tan coo cuiñi ñi tsihin Nyoo. ¹⁰ Tyin maa Nyoo tava tyiñu tsi ra tsa cuví ra jutu tsaahnu cuví ityi nuu, tumaa cuví ra Melquisedec.

Na ña jandihí yo tsa tsinú ifni yo tsi Nyoo

¹¹ Cuví cahan cuaha yo siqui tuhun ihya, maa tyin yíi xaan nacatyí tuhun yu nácaa cuahán tsi, tyin nyooho ña cuñí ndo cutuñi iñi ndo. ¹² Tsa naha xaan yíhí ndo cuenda ra Cristo, yacan tsa taahán tsi jacuaha ndo tsi inga nyívi. Maa tyin nyooho cuví ndo tumaa cuví lee tsa tyaxín tsa ñaha ca cuví catsí tyin cuñí tsi tsa tyaa soho nyico ndo tuhun tsa tsiñi ndo tsa jihna ñi. ¹³ Tyin nyívi cuñí tyaa soho tuhun tsa ña yíi cuví ñi tumaa lee tsa tyaxín tyin ñaha ca cutuñi vaha iñi ñi nácaa coo vaha ñi tsihin Nyoo. ¹⁴ Maa tyin nyívi tsa cutuñi vaha iñi tan tsahnú ñi tsihin tuhun Nyoo, juvin ñi cuví tumaa iin nyívi tsa tsatsí nyayu tyin nacotó ñi ndáa tsa vaha tan ndáa tsa ña vaha.

6

¹ Yacan cuenda ña ndoo yo vaha maa ñi maa tsihin tuhun ra Cristo tsa cutuhva yo tsa jihna ñi; na cuhun yo ityi nuu ca tyin tacan tan cuahnu ca yo tsihin tuhun Nyoo. Na ña ndoo yo vaha tsihin tsa tsa yaha cutuhva yo: tsa ña nducu yo cuhva nduvaha yo nuu Nyoo tsihin tsa javahá yo, tan tsa jacacú Nyoo tsi yo tsihin tsa tsinú iñi yo tsi ra. ² Tan na ña ndoo yo vaha tsihin tuhun tsa cutuhva yo cuenda tsa tsicoondutya yo, tan tsa tyisó ndaha yo siqui nyívi tsinú iñi tsi Nyoo na nasoco ra tsi ñi, tan tsa cuenda tsa cua nandoto tandihi nyívi tsa yaha cúu ñi, tan tsa cuenda tucu tsa cua cutuñi tandihi nyívi nuu Nyoo tan yíhí ñi cua cuhun cuii ñi anyaya. Na ña ndoo yo vaha tsihin yacan ñi. ³ Nacuhun ca yo ityi nuu tatun Nyoo tsaha ra ndatu.

⁴ Tyin nyívi tsa tsa yaha naquihín cuenda tsa nditsin Nyoo tsitsi añima ñi, nacotó ñi tsa tsahá Nyoo, tan iyó Tatyí li Nyoo añima ñi. ⁵ Tan tsitó ñi tyin vaha tuhun Nyoo. Tan tsa nyehé ñi juhva nácaa cua cuví tsa cua coo yo nu ñuhu ñayívi tsaa, tyin ñihí ñi tunyee iñi tsa iyó tsi Nyoo. ⁶ Tatun tsa naquihín cuenda ñi tandihi yacan, yaha can tan jandihí ñi tsa tsinú iñi ñi tsi Nyoo, ña cua cuví ca ndu uvi iñi ñi inga tsaha. Tyin tumaa tsa tyaá ñi tsi ra Cristo nu cruu inga tsaha cuví can, tyin tsacú nducu ñi tsi ra nu tuvi nyívi. ⁷ Añima nyívi cuví tsi tumaa ñuhu nu jahá tyiñu nyívi, tyin tandihí ñi tsaha tsa cuñ saví, nacohó ñuhu can ndutya saví can. Tatun vaha ñuhu can, vaha tsicoó tsa tatsí nyívi, tan nasocó Nyoo ñuhu can. ⁸ Maa tyin tatun caná maa ñi maa yutun tsa nduve tsiti tsahá tan caná iñu nuu tsi, nduve yahvi nyaá tsi. Ña nasocó Nyoo itsi, tan cua cahmi ra itsi. Tacan cua tahan nyívi tsa jandihí tsa tsinú iñi tsi Nyoo.

⁹ Yañi, vasu ndi maa caahán ndi tacan, maa tyin tsitó vaha ndi tyin nyooho nasocó Nyoo tsi ndo tyin jacacú ra Cristo tsi ndo. ¹⁰ Tyin Nyoo, vaha xaan ra cuví ra, tan ña naá iñi ra tsa javahá ndo. Nyehé ra tyin cuñí xaan ndo tsi nyívi yíhí cuenda ra, tan nyehé tucu ra tyin tsa yaha xaan jatyinyee ndo tsi ñi, tan ndi jatyinyee ca ndo tsi ñi vityin. ¹¹ Cuñí ndi tsa jañihí ca ndo ndu iin iñi ndo nda cuanda quitsi Jutu Mañi yo, tyin tacan tan ñihí ndo tandihí tsa ndatú ndo. ¹² Ña cuñí ndi tsa jutsan xaan jaha ndo tsi ndo, maa tyin cuñí ndi tsa coo ndo tumaa iyó nyívi tsa tsinú vaha iñi tsi Nyoo tan javaha ndo tumaa javahá ñi. Tyin ñi ican cunyeé xaan iñi ñi ndatú ñi, tan ñihí ñi tsa catyí Nyoo tyin cuhva ra tsi yo.

¹³ Tyin quívi tyihí Nyoo cuhva tyin cuhva ra tsa cua cuhva ra tsi ra Abraham, tsatyíñu ra juvin ñi sívi maa ra, tyin ña cuví cuatyíñu ra náa inga ca sívi tyin nduve nyívi cahnu ca cuví tan ñavin ca maa ra. ¹⁴ Tan catyí ra tsihin ra Abraham tyehen: “Tsa nditsa tyin cua nasoco xaan yu tsi un tan cuaha xaan tata un cua cuví jaha yu”, catyí ra tsihin ra. ¹⁵ Ra Abraham ñihí ra tsa

catyí Nyoo tsihin ra tyin cuhva ra tsi ra tsa cuenda tsa tsinú iñi ra tan cunyeeg iñi ra ndatú ra can. ¹⁶ Iin nyívi tun tyihí ñi cuhva tsa cuhva ñi tsa cua cuhva ñi tsi yo, tsatyíñú ñi sívi iin nyívi cahnu ca cuví tan ñavin ca maa ñi. Tsihin yacan ndoo ñi tuhun tsihin yo. ¹⁷ Nyoo tsatyíñú ra juvin ñi sívi maa ra quívi catyí ra tyin cuhva ra tsa cuhva ra tsi nyívi ra. Javahá ra tacan tyin cuñi ra tsa coto ñi tyin cua jandaa ra tsa cahán ra tsihin ñi tan ña cua nasamá tuhun cahán ra. ¹⁸ Tan iyó uvi taahan tsa ña cuví nasama. Iin tsi cuví tsa cuhva Nyoo tsa catyí ra tyin cuhva ra tsi yo, tan inga tsi cuví tsa tsatyíñú ra juvin ñi sívi maa ra. Nyoo ña vatya ra. Yacan cuenda tandihi yoo tsa nyanaá tsi ra, ñi cuñi yo nyitá iñi yo tsi ra, tan ndatú yo tsa ñihi yo tsa catyí ra tyin cuhva ra tsi yo. ¹⁹ Tumaa iin yutun ndoo tsa tsicá nuu ndutya ñuhu nuuhñi tsi tsihin iin caa vee coto cuhun tsi tsihin tatyí, tacan nyitá iñi yo tsa jacacú ra Cristo tsi yo. Tan tsa nyitá iñi yo tsi ra, cuví tsi tumaa tsa nuuhñi yo tsihin Nyoo ra nyaá Nu Ii Xaan inga tsiyo nu natahvi sava jahá jahma. ²⁰ Ican quihvi ra Jesús tyin tacan tan nuña ra ityi cuhun yo nu nyaá Nyoo. Tan ña cua cundihí maa tsa cuví ra Jesús jutu tsaahnu cuví ityi nuu, tumaa cuví ra Melquisedec.

7

Ra Jesús cuví ra jutu tumaa cuví ra Melquisedec

¹ Ra Melquisedec tsa caahán yu tuhun ihya, juvin ra cuví rey ñuu Salem, tan cuví tucu ra jutu cuenda Nyoo, ra cahnu ca cuví tan ñavin ca tandihi tsa iyó. Quívi tsa vatsi nuhu ra tsa yaha tsahan ra naha tsicahí tahan ra naha tsihin ra cuví rey naha ra, tan jahá canaa ra naha, ra Melquisedec jatahan ra tsi ra naha tan nasocó ra tsi ra Abraham. ² Tan cuaha tsa ñihí ra Abraham nu tsahan ra tsicahí tahan ra. Tsitsi tsa utsi utsi nuu tsa ñihí ra, tsahá ra intuhun intuhun can tsi ra Melquisedec. Melquisedec cuñi tsi catyi: “Rey tsa javahá tsa vaha.” Tan juvin ñi cuví tucu ra rey ñuu Salem, tan Salem cuñi tsi catyi “tsa taxin”. Yacan cuenda cuví ra: “Rey tsahá tsa taxin.” ³ Ra Melquisedec nduve jutu ra tan síhi ra. Ña caahán tsi tun iyó nyívi ra, tan ndi ña caahán tsi ama cacú ra, tan ama tsihi ra. Yacan cuenda cuví jandu inducu yo tsi ra tsihin Sehe Nyoo, tyin ña tsindihí maa tsa cuví ra jutu.

⁴ Nyehé yo ihya vityin tyin cahnu xaan cuví ra Melquisedec, tyin tsahá ra Abraham juhva tsa ñihí ra nu tsicahí tahan ra tsi ra. ⁵ Tun tsatyin tata ra Abraham cuví ra Melquisedec, tan cuví ra jutu, ña iyo cua cuñi yo tsa tsahá ra Abraham juhva tsa ñihí ra tsi ra, tyin tsa yahá cuaha cuiya tan tsahá Nyoo ley tsi nyívi tata ra Abraham. Tan catyí ley can tyin taahán tsi cuhva juhva tsa ñihí ñi tsi ra jutu tsa cuví tata ra Leví naha ra, vasu ndi maa iin ñi nyívi cuví ñi tsihin ra naha tyin juvin ñi tata ra Abraham cuví ra naha. ⁶ Ra Melquisedec, vasu ndi maa ñavin tata ra Leví, tan tata ra Abraham cuví ra, maa tyin naquihín cuenda ra juhva tsa ñihí ra Abraham. Tan nasocó ra Melquisedec tsi ra Abraham, ra tsa catyí Nyoo tsihin tyin cua cuhva ra tsa cuhva ra. ⁷ Tan tsitó catsi yo tyin cahnu ca cuví ra tsa nasocó, tan ñavin ca ra tsa nasocó ra. ⁸ Nyehé yo tyin cahnu ca cuví ra Melquisedec tan ñavin ca tandihi ra tsa quihín cuenda intuhun intuhun tsitsi tsa utsi utsi tsa ñihí nyívi, tyin rayi ñuhu ñayívi ihya ñi cuví ra naha, tan tuhvá ra naha tsiihí. Maa tyin caahán tsi nu tutu Nyoo tan catyí tsi tyin ra Melquisedec nyito ra. ⁹ Ra Leví tsihin sehe ra, tata ra Abraham cuví ra naha. Juvin ra naha cuví jutu tsa naquihín tsa intuhun intuhun tsitsi tsa utsi utsi tsa ñihí nyívi. Cuví catyi yo tyin tandihi ra can naha ra tyahvi ndihi ra naha tsi ra Melquisedec quívi

tyahví ra Abraham tsi ra. ¹⁰ Cuví catyi yo tyin tyahví ndihi tata ra Leví tsi ra Melquisedec quivi ñihi tahan ra tsihin ra Abraham tyin tata ra Abraham tsi ra naha vasu ndi maa ñaha ca coo ra naha quivi can.

¹¹ Ra jutu tata ra Leví tsa cuví tucu tata ra Aarón, juvin ra naha jacuahá ley tsahnu Nyoo tsi yo. Vaha vityin; tun tsatyin cuví janduvahá ra jutu can naha ra tsi nyívi nyicún ley can, ña ñiñi cuñí tsi quitsi inga jutu, ñavin jutu tumaa ra Aarón maa tyin jutu tumaa ra Melquisedec. ¹² Tyin tun nasamá Nyoo tsi ra cuví jutu, nasamá tucu ra ley ra. ¹³ Jutu Mañi yo tsa caahán tutu Nyoo tuhun, tata inga ra sehe ra Israel cuví ra. Tan ndi intuhun tata ra can tan ña cuví ra naha jutu. ¹⁴ Tsitó vaha yo tyin Jutu Mañi yo tata ra Judá tsi ra, tan ra Moisés ña cahan ra tuhun tata ra Judá quivi cahan ra tuhun ra cuví jutu naha ra.

¹⁵ Ndítsa tsa nasamá Nyoo tsi ra jutu tyin jaquitsi ra iin jutu tumaa ra Melquisedec. ¹⁶ Ra jutu ihya ña quitsi ra tumaa catyi ley tsahnu, tyin ley can catyi tsi tyin maa ñi tata ra Leví taahán tsi cuví jutu, tan ra can ñavin tata ra Leví cuví ra. Maa tyin iyó tunyee ñi tsi ra tsa coo cuíi ra, yacan cuenda juvin ra jaquitsi Nyoo. ¹⁷ Tyin tyehen caahán Nyoo tuhun ra:

Yooho ña cua ndihi maa tsa cuví un jutu,
tyin cuví un jutu tumaa ra Melquisedec.

¹⁸ Yacan cuenda nacoq Nyoo ley tsahnu can tyin ña cuví jatyinyeé tsi tsi nyívi, tan ña cuví cacu nyívi jahá tsi. ¹⁹ Ley can ña cuví janduvahá tsi tsi nyívi nu Nyoo. Yacan cuenda tsahá ra inga tsa vaha ca tsi yo. Tan tsa vaha ihya jatyinyeé tsi tsi yo tsa cuví natuhún yo tsihin Nyoo. Yacan cuenda nyitá ñi yo tuhun can, tan tuhun can cuví ra Cristo.

²⁰ Nyoo cahan catsi ra tyin tacan cua cuví, tan tacan cuví. ²¹ Tandihí ca maa ra jutu tsa iyó vityin naha ra nduve náa cahan Nyoo tuhun ra naha. Maa tyin quivi tsahá Nyoo tsi ra Cristo tsa cuví ra jutu, cahan catsi ra tsihin ra tumaa caahán nu tutu ra tyehen:

Cahan catsi Jutu Mañi yo, tan ña nasama ra tsa cahan ra nu catyi ra tyehen:
“Yooho ña cua ndihi maa tsa cuví un jutu,
tyin cuví un jutu tumaa ra Melquisedec”, catyi Nyoo.

²² Tsa cuenda tsa javahá ra Cristo, tan tsitó yo tyin vaha ca tyiñu ndoo Nyoo tsihin yo tan ñavin ca tsa jihna ñi can. ²³ Jutu tsa cuví tata ra Leví cuaha xaan ra naha tsa cuenda tyin tun tsiihí iin ra, nacosó inga ra. ²⁴ Maa tyin ra Jesús nduve tuhun tsihi iyó tsi ra, yacan cuenda ña tsindihí tsa cuví ra jutu. ²⁵ Tan tsa cuenda yacan cuví jacacu ra tsi nyívi tsa nanducú tsi Nyoo. Tan tsahá ra tsa coo cuíi ñi tsihin Nyoo tyin tacan ñi iyó maa ra tan tsicán tahvi ra tsi Nyoo tsa cuenda ñi.

²⁶ Ra Jesús cuví jutu tsaahnu cuví ityi nuu tsa tsiñiñuhú tsi yo tyin ii ra, tan ña javahá ra tsa caquiñi, tan nduve cuatyí ra iyó tan quitá tsiyo ra nu iyó nyívi iyó cuatyí tan nandaá ra ityi siquí andívi. ²⁷ Ra Jesús ñavin tumaa inga ra jutu tsaahnu can naha ra cuví ra, tyin ra ican naha ra cuñí tsi cahñi ra naha quiti tan jamañi ra naha nuu Nyoo tandihí ñi quivi. Jihna ca jamañi ra naha quiti tsa cuenda cuatyí maa ra naha, yaha tan jamañi ra naha tsa cuenda cuatyí tandihí nyívi. Maa tyin ra Jesús iin tsaha ñi jamañi ra juvin ñi tsi maa ra nuu Nyoo tan tsa cuenda cuatyí tandihí yo. ²⁸ Ley Nyoo tsa naquihín cuenda ra Moisés, tsahá tsi ndatu tsa cuví ra naha jutu tsaahnu vasu ndi maa iyó cuatyí ra naha. Maa tyin tsa yaha quitsi ley can, cahan catsi Nyoo tan ndoo ra iin tuhun tsa tsihin yo. Tan tsahá ra tsi Sehe ra tsa cuví ra jutu tsaahnu cuví ityi nuu ca. juvin ra cuví ra vaha tan ña cua cundihí maa tsa vaha ra.

8

Quivi tsihi ra Jesús tsa cuenda yo tan ndoo Nyoo tuhun tsa tsihin yo

¹ Yacan tuhun ihya cuví tsa ñiñi ca caahán yu: Ra jutu tsaahnu tsa iyó tsi yo ndi intuhun cuatyí ra nduve iyó, tan juvin ra tsinyaa nu tyayu tsa nyaá xiin cuaha Nyoo nda gloria. ² Tan ra jutu ihya jahá tyiñu ra vehe ñuhu nu nyaá Nyoo. Vehe ñuhu tsa juvin ñi maa Nyoo Jutu yo javahá tan ñavin vehe ñuhu tsa javahá nyívi. Tyin vehe ñuhu tsa javahá nyívi cuví tsi tixahñu tsa vaha tsa iyó nda gloria. ³ Tandihí ra jutu naha ra, cuñí tsi cahñi ra naha quiti tan jamañi ra naha nu Nyoo tyin jaha Nyoo tucahnu iñi tsi ra naha tan tsi nyívi. Yacan cuenda cuñí tsi jamañi ra Jesucristo tsa jamañi ra nuu Nyoo. ⁴ Tun tsatyin nyii ra nu ñuhu ñayívi ihya, ndi ña cuví cuví ra jutu. Tyin nu ñuhu ñayívi ihya, iyó ra jutu tsa jamañi nuu Nyoo tsa catyí ley tsa tyaa ra Moisés tyin jamañi ra naha. ⁵ Ra jutu tsa iyó nu ñuhu ñayívi ihya naha ra, jahá tyiñu ra naha tsitsi vehe ñuhu tsa cuví tixahñu tsa iyó nda gloria. Tan tsitó yu tyin tixahñu ñi cuví tsi, tyin tahán tsanaha quivi tsa cua javaha ra Moisés vehe ñuhu jahma, catyí Nyoo tsihin ra tyehen: “Jaha cuenda vaha, tan javaha tandihí tumaa janahá yu tsi un quivi tsahan un yucu Sinaí”, catyí Nyoo tsihin ra. ⁶ Maa tyin ra Cristo ra cuví jutu tsaahnu cuví ityi nuu tsa cuenda yo, vaha ca tyiñu javahá ra tan ñavin ca tsa javahá inga ca ra jutu naha ra, tyin tsa cuenda maa ra, ndoo Nyoo tuhun vaha xaan ca tsihin yo, tan vaha ca tsa tsahá ra tsi yo.

⁷ Tun tsatyin cuví cacu yo jahá tuhun tsa ndoo jihna Nyoo tsihin yo, ña cuñí tsi tsa ndoo ra inga tuhun tsa tsihin yo. ⁸ Maa tyin Nyoo nyehe ra tyin ña vaha javahá nyívi can tsihin tuhun tsa ndoo jihna ra tsihin ñi, tacan tan caahán ra tuhun ñi nu tutu ra tan catyí ra tyehen:

Cua tsa quivi

cua ndoo yu tuhun tsa tsihin nyívi Israel tan nyívi Judá.

⁹ Maa tyin ñavin tumaa tuhun tsa ndoo yu tsihin tsii tsaahnu ñi, quivi tñin yu ndaha ñi tan tava yu tsi ñi ñuhu Egipto.

Ña javahá ñi tuhun ndoo yu tsihin ñi,

yacan nacoo ihñi yu tsi ñi, catyí Nyoo Jutu yo.

¹⁰ Tuhun tsa tsa cua ndoo yu tsihin nyívi Israel nu cuahán ca tsi ityi nuu, cuví tsehe, catyí Nyoo Jutu yo:

Cua tyihi yu ley yu tsitsi tsa tsiñi tuñi jiñi ñi,

tan cua tyaa tucu yu itsi añima ñi.

Tacan tan cua cuví yu Nyoo ñi,

tan maa ñi cua cuví nyívi yu.

¹¹ Tacan tan ña ñiñi ca tsa jacuahá ñi tsi inga ñi, na nacoto ñi tsi yuhu tsa cuví yu Nyoo ñi.

Tyin tandihí ñi tan cua nacoto ñi tsi yu,

ñi nyihi tan nda cuanda ñi tsahnu.

¹² Cua jaha yu tucahnu iñi tsi ñi vasu ndi maa cuaha tsa caquiñi javahá ñi.

Tan ña cua nducuhun ca maa iñi yu cuatyí ñi, catyí Nyoo Jutu yo.

¹³ Quivi tsa cahán Nyoo tyin cua ndoo ra tuhun tsa tsihin yo, tsa jandut-sahnú ra tuhun tsa jihna ñi can. Tan tuhun tsa ndutsahnú tsa cua cundihi tsi.

9

Nu janahá tsi nácaa iyó vehe ñuhu tsa iyó nu ñuhu ñayívi tan vehe ñuhu nu cuví nda gloria

¹ Quiví ndoo Nyoo tuhun tsa jihna ñi tsihin nyivi, tsaha ra cuhva nácaa jacahnu ñi tsi ra, tsitsi vehe ñuhu tsa tsicoo nu ñuhu ñayivi ihya tahañ tsanaha.

² Tyehen tsicoo vehe ñuhu can: Tsitsi vehe tsa jihna ñi nyaá candileru, tan nyaá mesa nu yucu paan ii. Tan yacan tsinañi Vehe Ii. ³ Tan vehe tsa tsinu uvi tsinañi Vehe Ii Xaan. ⁴ Tsitsi vehe can tsinyaa altar xuhun cuaan nu tsahmí ra jutu cutu. Tan tsinyií tucu tsatun cuenda tsa ndoo Nyoo tuhun tsihin yo, tsa ndasí tsihin xuhun cuaan. Tsitsi tsatun can tsinyií yatsin xuhun cuaan nu yihí maná. Tan tsinyií yutun tsa tsindahá ra Aarón tsa quita ita nuu. Tan tsiyucu tucu yuu nu nyaá tsa utsi ley Nyoo. ⁵ Tan siqui tsatun can tsinyaa tsa caá tumaa caá ángel, tan cuñí tsi catyí tyin nyaá Nyoo ican. Nditsein ángel can tyasi nu tuhvá Nyoo jahá tucahnu iñi tsi nyivi. Tsa vityin ña cuví nacatyí tuhun ca ndi siqui tuhun ihya.

⁶ Tacan tsicoo vehe ñuhu can. Tandihí ñi quivi quihví ra jutu naha ra tsitsi Vehe Ii, tan jacahnú ra naha tsi Nyoo. ⁷ Maa tyin Vehe nu Ii Xaan, intuhun ñi maa ra jutu tsaahnu cuví ityi nuu cuví quihví ican, tan iin tsaha ñi taahán tsi quihví ra tsa iin cuiya. Tsa cua quihví ra, cuñí tsi cundaha ra niñi quití tyin jamañi ra itsi tsi Nyoo tsa cuenda cuatyí maa ra tan cuenda cuatyí nyivi, ñi tsa javahá soho ñi maa cuatyí. ⁸ Tan tsa tacan tsicoo yacan Tatyí Ii Nyoo janahá ra tsi yo tyin tsitsi tsa ndi jacahnú ra jutu naha ra tsi Nyoo tsitsi Vehe Ii cuñí tsi catyí tyin ñaha ca nuña ityi quihví ndáa nyivi tahañ ñi maa tsi tsitsi Vehe nu Ii Xaan. ⁹ Tandihí yacan cuví can tumaa tixahñu tuhun tsa tsa ndoo Nyoo tsihin yo vityin. Tahañ tsanaha jamañi nyivi tsa jamañi ñi nu Nyoo maa tyin ña jatyinyee can tsi nyivi tsa jacahnú tsi Nyoo tsihin can, tsa caca vaha iñi ñi. ¹⁰ Tyin tandihí tsa javahá nyivi can caahán tsi maa ñi tsa cuenda tsa tsaha Nyoo ndatu catsi ñi, tan coho ñi, tan nácaa nduvaha cuñu ñuhu ñi nuu ra. Tsaha ra tsa javahá ñi tacan tsa numi ñi, nda tahan maa tsi quivi cuhva ra tsa vaha ca.

¹¹ Vityin tsa yaha quitsi ra Cristo tsa cuví jutu tsaahnu cuví ityi nuu tsa cuenda tuhun vaha ca tsa ndoo Nyoo tsihin yo. Quihví ra tsitsi vehe ñuhu vaha ca, tan ii ca. Tan ña quihví ra tsitsi vehe ñuhu tsa javahá nyivi. Yacan cuñí tsi catyí tyin ñavin vehe ñuhu iyó nu ñuhu ñayivi ihya cuví nu quihví ra. ¹² Ra Cristo quihví ra tsitsi Vehe Ii Xaan. Maa tyin ña quihví ra tsihin tsa jamañi ra niñi mbee lee, o niñi indiqui lee. Quihví ra tsihin niñi maa ra, tan iin tsaha ñi quihví ra tan ña cuñí ca tsi tsa cuenda quihví ñi ra tyin jamañi ra niñi maa ra. Tsihin yacan jacacú cuii ra tsi yo. ¹³ Ra jutu naha ra tuhvá ra naha quití niñi toro, niñi mbee, tan nyaá nu cayú indiqui lee tsi nyivi. Tsihin yacan nduvahá ñi nuu Nyoo, maa tyin maa ñi cuñu ñuhu ñi nduvaha, tan ña nduvahá añima ñi. ¹⁴ Tun tacan jatyinyee niñi quití can tsi nyivi, cuñí tsi catyí tyin jamañi ra Cristo cahnú ca tunyee iñi iyó itsi! Tyin nduve cuatyí ra tsicoo tan jamañi ra juven ñi tsi maa ra nuu Nyoo jahá Tatyí Ii tsa ña cua cúu maa. Tan niñi ra quihín nyaá tsa ña vaha tsa iyó añima yo tyin tacan tan ña cuita ca iñi yo ley tsa tsahá tuhun tsihí tsi yo, tan cuví jaha tyiñu yo tyiñu Nyoo nyito.

¹⁵ Yacan cuenda ra Jesucristo cuví ra caahán ndaahvi tsaha yo tsa cuenda tuhun tsa tsa ndoo Nyoo tsihin yo. Tan tsa cuenda tsa tsihí ra, jahá Nyoo tucahnu iñi tsi yo tsa cuenda cuatyí tsa javahá yo quivi yihí ndaha tuhun jihna ñi can tsi yo. Tyin tacan tan yoo, tsa caná Nyoo cuví naquihin cuenda yo ñayivi tsa ña cua naa maa coo yo, tsa catyí ra tyin cuhva ra tsi yo. ¹⁶ Tun iin nyivi tsihí tan nacoo ñi iin tutu nu tsahá cuenda ñi yoo nyivi cua naquihin tsa iyó tsi ñi, nyivi tsa cua naquihin ndaha tyiñu can cuví naquihin ñi can,

maa tyin cuñí tsi janaha ñi iin tutu cuví tsandaa tyin nditsa tsa tsa tsihí ra tsa javahá tutu can. ¹⁷ Maa tyin tun ndi nyito ra jatsii ndaha tyiñu can, ña cuvi naha naquihin ñi ndaha tyiñu ra. ¹⁸ Yacan cuenda quivi ndoo Nyoo tuhun tsahnu can tsihin nyivi Israel, tsahñi ra jutu naha ra quití tan tsatí niñi ti naha ti. ¹⁹ Tsa ndihi tsahá cuenda ra Moisés ley Nyoo tsi tandihi nyivi, tan quihín ra jahma cuaaha tsa tsinu tsihin ixi mbee ticatyí tan iin soco yutun luhlu tsa nañí hisopo, jatyij ra can tsitsi nu yihí niñi indiqui lee tan niñi mbee luhlu tsa sacá nuu tsihin ndutya. Tacan tan quití ra niñi can nu libru nu nyaá ley Nyoo tan quití ndihi tucu ra can tsi nyivi. ²⁰ Tacan tan catyí ra tsihin ñi tyehen: “Niñi ihya cuví tsandaa tsa cuenda tsa ndoo Nyoo tuhun tsihin yo”, catyí ra. ²¹ Tan juven ñi quití tucu ra Moisés niñi can vehe ñuhu jahma can tan tandihi ndaha tyiñu tsa tsatyíñu ra jutu naha ra tsa jacahnú ra naha tsi Nyoo. ²² Tacan javahá ra naha tyin catyí ley Nyoo tyin tsa yatin tandihi tsa iyó tan cuñí tsi nduvaha can nuu Nyoo tsihin niñi. Juvin ñi catyí tucu tsi tyin tun ña cati niñi ña cua jaha Nyoo tucahnu iñi tsi nyivi.

Niñi ra Cristo nacatyá cuatyí yo

²³ Javahá ra jutu naha ra tacan tyin cuñí tsi tsa nduvaha tandihi ndaha tyiñu tsa cuví tixahñu tsa iyó nda gloria tsihin niñi quití. Maa tyin tandihi tsa iyó nda gloria, cuñí tsi nduvaha can tsihin niñi vaha ca, ñavin tsihin niñi quití ñi. ²⁴ Ra Cristo ña quihví ra tsitsi vehe ñuhu tsa javahá nyivi tsa cuví tixahñu vehe ñuhu tsa nditsa. Tyin quihví ra tsitsi vehe ñuhu tsa nditsa tsa cuví gloria. Tan vityin nyaá ra caahán ndaahvi ra tsihin Nyoo tsa cuenda yo. ²⁵ Ra jutu tsaañu cuví ityi nuu cuenda nyivi Israel quihví ra naha tsitsi Vehe Ii Xaan iin tsaha ñi tsa iin iin cuiya tyin jamañi ra naha niñi tsa ñavin niñi maa ra naha cuví. Maa tyin ra Cristo, ña cuñí tsi tsa jamañi ra tsi ra tañi tañi ñi nuu Nyoo. ²⁶ Tun tsatyin tacan, cuñí tsi tsa cuenda quitsi ñi ra nyehe ra tundoho tan cúu ra nda tsa tsinu ñuhu ñayivi tan nda cuenda vityin. Maa tyin vityin tsa tsa cuyatyn cundihí ñuhu ñayivi ihya, iin tsaha ñi quitsi ra Cristo, tan jamañi ra tsi ra tyin tacan tan cuví quihin nyaa ra cuatyí yo. ²⁷ Tumaa cua tahan yo: iin tsaha ñi cua cúu yo. Yaha can tan cua cutuñi yo. ²⁸ Tacan iin tsaha ñi tsihí ra Cristo, tan quihin nyaa ra cuatyí cuaaha xaan nyivi. Yaha can tan cua quitsi ra tsinu uvi tsaha, ñavin ca tsa quitsi jamañi ra tsi ra tsa cuenda cuatyí, tyin cua quitsi ra quitsi jacacu ra tsi nyivi ndatú tsi ra.

10

¹ Ley Nyoo tsa tyaa ra Moisés cuví tsi tumaa iin tixahñu tsa vaha ca tsa cua quitsi. Tsa catyí ley can, ña cuví janduvaha tsi tsi nyivi nanducú tsi Nyoo tyin maa ñi maa niñi quití jamañi ra jutu tsaañu cuví ityi nuu naha ra tan iin tan iin cuiya. Tan ña cuví cacu yo tsihin yacan. ² Tun tsatyin cuví janduvaha ley can tsi nyivi, cua cundihí tsa jamañi ra jutu naha ra niñi quití tandihi ñi cuiya. Tyin tun tsa nduvahá nyivi tsa tsahá quití can iin tsaha tsa cuenda tandihi maa, ña cua caca ca iñi ñi tun iyó cuatyí ñi tan ña cuñí ca tsi tsa jamañi ra jutu niñi quití tsa cuenda ñi inga tsaha. ³ Maa tyin tsa jamañi ra jutu naha ra niñi quití tan iin tan iin cuiya, janducuhún iñi tsi tsi nyivi tyin iyó cuatyí ñi. ⁴ Tyin niñi indiqui tan niñi mbee lee, ña cuví nacatya can cuatyí nyivi.

⁵ Yacan cuenda catyí tutu Nyoo tyin ra Cristo cañan ra tyehen tsihin Nyoo: Ña cuñi un tsa jamañi nyivi quití nuu un, yacan cuenda tsahá un tsa coo cuñu ñuhu yu.

6 Tyin ña taahán iñi un tsa cahmi ñi quiti tan jamañi ñi nuu cun tan quihin nyaa un cuatyí ñi.

7 Tacan tan catyí yu: “Nyoo Jutu yu, va yu ihya, vatsí yu vatsí javahá yu cuhva cuñí maa un

tumaa nyaá tuhun yu nu libru ley maa un”, catyí ra Jesucristo.

8 Tsa jihna ñi, catyí ra Jesucristo tyin Nyoo, ña taahán iñi ra tsa jamañi nyivi quiti nuu ra. Ndi tsa cahmi ñi quiti tan quihin nyaa ra cuatyí ñi. Ndi intuhun yacan tan ña taahán iñi ra vasu ndi maa catyí ley tsahnu tyin cuñí tsi jamañi nyivi quiti nuu ra, catyí ra. ⁹ Yahá can tan catyí tucu ra: “Nyoo Jutu yu, va yu ihya, vatsí yu vatsí javaha yu cuhva cuñí maa un.” Tuhun ihya cuñí tsi catyí tyin quitsi ra jatsiyó cuii ra tsa jamañi nyivi tan jamañi ra tsa vaha ca. ¹⁰ Tsa cuenda tsa javahá ra Jesucristo cuhva cuñí jutu ra tan janduvahá jutu ra tsi yo. Tsa javahá ra cuvi tsa jamañi ra juvin ñi tsi maa ra. Javahá ra tacan iin tsaha ñi tsa cuenda cuatyí nyivi.

¹¹ Tandihí ñi quivi tan jamañi ra jutu cuenda nyivi Israel naha ra quiti nuu Nyoo, tan cuahá xaan tsaha jamañi ra naha iin ñi maa nuu quiti maa tyin ña cuvi quihin nyaa can cuatyí nyivi. ¹² Maa tyin ra Jesucristo, iin tsaha ñi jamañi ra tsi ra nuu Nyoo tsa cuenda cuatyí yo. Tacan tan tsinyaa ra nu tyayu nyaá xiin cuaha Nyoo. ¹³ Tan ndatú ra nda cuenda caquin Nyoo tsi nu xaan iñi tsi ra nahnu tsaha ra tyin cuañi ra siqui nahnu. ¹⁴ Tyin tsihin tsa jamañi ra tsi ra iin tsaha ñi tan janduvahá ra tsi nyivi yihí cuenda ra yoso cuahán quivi. ¹⁵ Tatyí Ii Nyoo juvin ñi janahá tucu ra yacan tsi yo. Tsa jihna ñi catyí ra tsihin yo tyehen:

¹⁶ Tuhun tsa tsa cua ndoo yu tsihin nyivi quivi can, tyehen cua cuvi tsi, catyí Jutu Mañi yo:

Cua tyihí yu ley yu tsitsi añima ñi,

tan cua tyaa yu itsi tsitsi tsa tsiñi tuñi iñi ñi, catyí ra.

¹⁷ Tan juvin ñi catyí tucu ra:

Ña cua nducuhun ca maa iñi yu cuatyí ñi, tan ndi tsa caquiñi javahá ñi, catyí Jutu Mañi yo.

¹⁸ Yacan cuñí tsi catyí tyin tsa yahá jahá Nyoo tucahnu iñi tsi yo. Yacan cuenda ña cuñí ca tsi cahñi yo quiti, tan jamañi yo nuu Nyoo tsa cuenda cuatyí yo.

Cuñí tsi nanducu yo tsi Nyoo

¹⁹ Yacan cuenda yañi, vityin cuvi quihvi yo tsitsi Vehe Ii Xaan nu nyaá Nyoo, tsa cuenda niñi ra Jesucristo tsa tsati. Tsihin niñi can nacatyá ra cuatyí yo. ²⁰ Tan nuñá ra ityi tsa, tan iin ityi cuhun yo nu coo nyito yo. Tyin cuhva tsa tsihi ra tan ndata jahma tsa tyasí tsa ña cuvi quihvi yo nu nyaá Nyoo. Tsa ndata jahma can, cuvi tsa tsihi ra Cristo, tyin tacan tan cuvi cuhun yo nu nyaá Nyoo. ²¹ Ra Jesús cuvi jutu tsaahnu cuvi ityi nuu tsa ndacá ñaha tsi nyivi yihí cuenda Nyoo. ²² Yacan cuenda cuñí tsi nanducu yo tsi Nyoo tsihin tsa nditsa tan tsihin tsa niñi añima yo tsinú iñi yo tsi ra. Tyin maa ra janduvahá añima yo, yacan cuenda tsitó yo tyin nduve ca cuenda yo nyaá tsi ra tsa cuenda cuatyí yo, tan tumaa tsa nacatyá ra cuñu ñuhu yo tsihin ndutya cuii, tan nduvahá yo nuu Nyoo. ²³ Na ndu iin ca iñi yo tsinú iñi yo tsi Nyoo tan na ña ndu uví iñi yo, tyin Nyoo cua cuhva ra tsa catyí ra tyin cuhva ra tsi yo. ²⁴ Tan cuñí tsi nanducu yo cuhva jatyinyee tahan yo tsi yo, na cuñi tahan ca yo tsi yo tan javaha yo tsa vaha. ²⁵ Ña taahán tsi jandihí ndo tsa tsicá ndo tuhun Nyoo tumaa javahá inga nyivi tsa ña tsicá vaha. Tyin cuñí tsi jandu

iin tahan yo iñi yo. Vityin tsa tsa nyehé yo tyin tsa cuyatyin quitsi nyico Jutu Mañi yo tan cua jacutuñi ra tandihí nyívi, cuñi tsi tsa jatyinyee tahan ca yo tsi yo.

²⁶ Tyin tun tsa tsitó yo tsa nditsa tan javaha ca maa yo tsa ña vaha, nduve ca nácaa javaha yo tan cuvi jaha Nyoo tucahnu iñi tsi yo. ²⁷ Cua tatsi tuñi Nyoo tsi yo. Tan cua tyihi ra tsi yo nu yucu nyívi xaan iñi tsi ra. Tan ícan cua cayu yo iin caa ñi tsihin ñi. ²⁸ Tatun iin nyívi tsa nyitá iñi ley Nyoo tsa tyaá ra Moisés tan ña tyaá yahvi ñi tsa catyí ley can, tan tatun iyó uvi o uñi ra cuvi tsandaa tsa cuenda tsa javahá ñi, cua cúu ñi tsa cuenda cuatyí ñi, tan yofni maa cua cundaahví iñi tsi ñi. ²⁹ Tan yaha ca cua tatsi tuñi Nyoo tsi nyívi caahán ndavaha ñi siqui Tatyí li ra tsa tsahá tsa vaha ra tsi yo, tan jandihí ñi tsa tsinú iñi ñi tsi Sehe ra tan jahá ñi tyin nduve yahvi nyaá niñi Sehe ra tsa janduvahá añima ñi. Tan tsihin niñi can nudoꝝ Nyoo tuhun tsihin yo. ³⁰ Tsitó yo tyin catyí Jutu Mañi yo tyehen: “Maa yu taahán tsi tatsi tuñi tsi nyívi; tan juvin yu cua cahan náa taahán tsi tahan ñi.” Juvin ñi catyí tucu ra tyin maa ra taahán tsi jacutuñi tsi nyívi ra. ³¹ ¡Cahnu xaan tundoho cua nyehe nyívi yosó ica tsi Nyoo nyito tsa cuenda cuatyí ñi!

³² Maa tyin nyooho nducuhun iñi ndo nácaa cunyeé xaan iñi ndo nyehe ndo tundoho tsa yahá naquihín cuenda ndo tsa nditsin Nyoo tsitsi añima ndo.

³³ Yihí nyooho cahán nyívi tsi ndo, tan janyehe ñi tundoho tsi ndo nu tuvi nyívi. Tan yihí ndo cundaahví iñi ndo nyehe ndo tsi nyívi vaha iñi tsi ndo tsa tahan juvin ñi tacan. ³⁴ Tan cundaahví iñi ndo nyehe ndo tsi nyívi tsiyucú vehe caa. Cunyeé iñi ndo nyehe ndo tundoho tsihin tsa si cuñi ndo quivi quihín nyaá nyívi ndaha tyiñu ndo, tyin tsitó ndo tyin gloria iyó tsa vaha ca tsa cuenda ndo, tan yacan ña cua cundihi maa can. ³⁵ Yacan cuenda ña jandihí ndo tsa nyitá iñi ndo tsi ra Cristo, tyin nu cuahán ca tsi tan cua ñihi ndo tsa vaha ca tyin tsinú iñi ndo tsi ra. ³⁶ Cuñi tsi coo tsa taxin añima ndo tsitsi tsa cunyeé iñi ndo tyin tacan tan cuví javaha ndo cuhva cuñi Nyoo, tan naquihin ndo tsa catyí ra tyin cuhva ra tsi yo. ³⁷ Tyin nu tutu Nyoo catyí tsi tyehen:

Ña naha ca

tan quitsi ra tsa nyaá quitsi, tan ña cua cucuee ca ra.

³⁸ Tan catyí Jutu Mañi yo tyehen: “Nyívi naquihín cuenda yu tumaa tsatyin vaha ñi, tsihin tsa tsinú iñi ñi tsi yu tan cua coo nyito ñi.

Maa tyin tatun jandihí ñi tsa tsinú iñi ñi, ña si cua cuñi yu tsihin ñi”, catyí Nyoo.

³⁹ Maa tyin yoo ña javahá yo tumaa javahá nyívi jandihí tsa tsinú iñi tsi Nyoo, tyin yoo tacan ñi maa tsinú iñi yo tsi ra tan tsa cuenda tsa tsinú iñi yo cua cacu añima yo.

11

Cuhva cuñi tsi tsa tsinu iñi yo tsi Nyoo

¹ Tsa tsinú iñi yo tsi Nyoo cuví tsa tsitó vaha yo tyin cua ñihi yo tsa ndatú yo; tan tsitó vaha yo tyin cua ñihi yo iin tsa nditsa tsa ñaha ca nyehe yo, tyin tsinú iñi yo tsi Nyoo. ² Juhva nyívi yo tsa tsicoꝝ tahan tsanaha quitá vaha ñi nuu Nyoo tyin tsinu iñi ñi tsi ra.

³ Tsa cuenda tsa tsinú iñi yo tsi Nyoo, tan tsitó yo tyin javahá ra ñuhu ñayivi tsihin tuhun caahán ra. Tan tsitó yo tyin tahan tsanaha tsinu tandihí tsa nyehé yo vityin tsihin tsa ña nyehé yo.

⁴ Tsa cuenda tsa tsinü iñi ra Abel tsi Nyoo, tan jamañi ra tsa vaha ca nuu Nyoo tan ñavin ca ra Caín, yañi ra. Tsa cuenda yacan naquihin cuenda Nyoo tsi ra tumaa tsatyin vaha ra, tan naquihin cuenda tucu ra tsa jamañi ra. Vasu ndi maa ña nyito ca ra Abel, maa tyin tsiñi yo nácaa tsinü iñi ra.

⁵ Tsa cuenda tsa tsinü xaan iñi ra Enoc tsi Nyoo, tan naquihin Nyoo tsi ra tyin tacan tan ña nyehe ra tuhun tsihih. Tan ña nañihí ca nyivi tsi ra, tyin cuanuhü ra tsihin Nyoo. Catyi tsi nu tutu Nyoo tyin tsa ndi cumañi ca naquihin Nyoo tsi ra, maa ñi maa cuhva taahán iñi Nyoo javaha ra. ⁶ Maa tyin ña cuvi javaha yo tsa taahán iñi Nyoo tatun ña tsinü iñi yo tsi ra. Tyin tatun cuñi yo nanducu yo tsi ra, cuñi tsi tsinu jihna iñi yo tyin iyó ra, tan tsahá ra tsa vaha tsi nyivi nanducú tsi ra.

⁷ Tahán tsanaha jacoto Nyoo tsi ra Noé náa cua cuvi ityi nuu. Vasu ndi maa ñaha ca coo can nyehe ra Noé, tsinü iñi ra tan javaha ra yutun ndoo tan ican cacu ra tsihin nyivi vehe ra. Nyivi tsa ña tyaa yahvi tsa cahán Nyoo, tatsj tuñi ra tsi ñi. Maa tyin jacacu ra tsi ra Noé tan nduvaha ra nuu ra tsa cuenda tsa tsinü iñi ra tsi ra.

⁸ Ra Abraham tsinü iñi ra tan tyaa yahvi ra tsi Nyoo quivi cana Nyoo tsi ra. Quita ra nu ñuhu ra tan cuahán ra nu ñuhu tsa cua cuhva cuvi Nyoo tsi ra. Vasu ndi maa ña tsitó ra nu maa cuahán ra, maa tyin quita ra nu ñuhu ra tan cuahán ra. ⁹ Tsa cuenda tsa tsinü iñi ra Abraham tsi Nyoo, tsicoo ra nu ñuhu tsa ñaha ca nacuhva cuenda Nyoo tsi ra. Tsicoo ra tsitsi vehe jahma ñi. Juvín ñi tacan tsicoo tucu ra Isaac, sehe ra, tan ra Jacob, sehe ra Isaac. Tyin juvín ñi catyi tucu Nyoo tsihin nduvi taahan ra can naha ra tyin cua cuhva ra ñuhu can tsi ra naha. ¹⁰ Ra Abraham ndatu ra coo ra iin ñuu tsa ña cua naa maa; iin ñuu tsa vaha ca tsa cua cuhva Nyoo tsi ra. Tan ñuu tsa ndatu ra maa Nyoo tsaquín cuhva tsaha tsi tan samá itsi.

¹¹ Tan juvín ñi tsa cuenda tsa tsinü iñi ña Sara tsa cahán Nyoo tsihin ña, tsicoo iin sehe ña. Vasu ndi maa tsa tsahnu xaan ña, cuvi tsicoo sehe ña tyin maa Nyoo tsahá tunyee iñi ra tsi ña. Tacan cuvi tyin tsinü iñi ña tyin cua cundaa tsa cahán Nyoo tsihin ña. ¹² Yacan cuenda vasu ndi maa tsa cuñi cúu cuvi ña ra Abraham, maa tyin tsicoo sehe ñasiihi ra. Yahá can tan tsicoo cuaha nyivi tata ra. Tan yoñi maa cuvi nacahvi tsi ñi tyin cuaha xaan ñi, tumaa cuaha tiñuu iyó andivi tan tumaa cuaha nyiti iyó yuhu ndutya ñuhu.

¹³ Tandihí nyivi can tan nyivi tata ñi tsihi ñi tsa ndi cumañi ca naquihin cuenda ñi tsa catyi Nyoo tsihin ñi tyin cuhva ra tsi ñi. Vasu ndi maa ña ñihí ñi can, tsinü iñi ñi tyin cua cuhva Nyoo can. Yacan cuenda sii cuñi ñi tyin tsitó ñi tyin coo quivi cua nyehe ñi can. Tan sii tucu cuñi ñi caahán ñi tyin yahá ñi maa ñi nu ñuhu ñayivi ihya. ¹⁴ Tan tsa caahán ñi tacan, cuñi tsi catyi tyin ndi tsicá ñi nanducú ñi iin nu vaha ca coo ñi. ¹⁵ Tun tsatyin ñuhú iñi ñi ñuu ñi nu quita ñi, cuvi cunuhu nyico ñi iin yaha ñi. ¹⁶ Maa tyin ña tsinuhü ñi ñuu ñi tyin cuñi ñi coo ñi ñuu vaha ca, tuhun ihya cuñi tsi catyi tyin cuñi ñi coo ñi nda andivi. Tan tsa tacan nducú ñi coo ñi nda gloria, ña cahán nuu Nyoo tsa cuvi ra Nyoo ñi tyin tsa janduvaha ra iin ñuu nu coo ñi.

¹⁷ Tsa cuenda tsa tsinü iñi ra Abraham tsi Nyoo, tyaa yahvi ra tsa cahán Nyoo tsihin ra tan jamañi ra tsi ra Isaac, sehe mañi ra, quivi nducu cuhva Nyoo tsi ra tun nditsa tsa tsinü iñi ra tsi ra. Javaha ra tacan vasu ndi maa catyi Nyoo tyehen tsihin ra: ¹⁸ “Tsa cuenda ra Isaac tan cua coo nyivi tata un.” ¹⁹ Vasu ndi maa cahán ra tacan tsihin ra Abraham, ra Abraham ña nayuhvi ra tsa cuhva cuenda ra sehe ra tsi Nyoo, tyin tsitó ra tyin iyó tunyee iñi tsi Nyoo tsa janandoto ra ndiyi. Quivi can tsa nyaá ra Abraham tsa cahni ra tsi

ra Isaac, sehe ra. Maa tyin Nyoo nacuhvā cuenda nyico ra tsi ra Isaac tsi ra. Tan cuvī can tumaa tsa janandoto Nyoo tsi ra.

²⁰ Juvín ñi tsa cuenda tsa tsinū tucu iñi ra Isaac tsi Nyoo, tan catyi ra tyin ra Jacob tan ra Esaú, sehe ra, cua ñihi ra naha tsa vaha nu cuahán ca tsi. ²¹ Tsa cuenda tsa tsinū iñi ra Jacob tsi Nyoo, tan catyi ra tyin nduvi taahan sehe ra José cua ñihi ra naha tsa vaha jaha Nyoo. Tan nyaá naa ñi ra yutun tsa tsindahá ra tan jacahnū ra tsi Nyoo tyin tsa tsahnū xaan ra. ²² Juvín ñi tsa cuenda tsa tsinū iñi ra José tsi Nyoo, catyi ra tsa tsa cuñi cúu ra tyin cua quita nyivi ra, ñi Israel, ñuhu Egipto. Tan tsaḥa cuenda tucu ra tsi nyivi tyin quivi quita ñi na quihin ñi yiqui ra cuhun tsihin ñi.

²³ Tsa cuenda tsa tsinū iñi jutu ra Moisés tan sihi ra tsi Nyoo, tyihī xeehe ñi tsi ra uñi yoo tyin nyehe ñi tyin si xaan caá ra. Ña nayuhvi ñi tsa cahan ra rey tyin cuñi tsi cúu tandihi sehe yii nyivi [tsa cuenda tyin tsitó ñi tyin cua jacacu Nyoo tsi ra]. ²⁴ Tsinū tucu iñi ra Moisés tsi Nyoo. Yacan cuenda quivi tsahnū ra, ña cuñi ca ra cuvī ra sehe ñaha cuvī sehe ra rey ñuhu Egipto. ²⁵ Tan nacoḡ ra ñuhu Egipto can tyin ña cuñi ra cusii iñi ra tsihin tsa javaha ra tsa caquiñi. Tan nacatsi ra tsa cua nyehe ra tundoho tsihin nyivi Nyoo tan ñavin ca tsa cusii iñi ra tsihin tsa tsindihí ñi maa. ²⁶ Tsa cuenda ra Moisés, vaha ca tsa cuca ra Cristo tan ñavin ca tandihi tsa cuca tsa iyó Egipto. Yacan cuenda sii cuñi ra nyehe ra ticanuu tsa cuenda ra Cristo tyin tsitó ra tyin cua ñihi ra tsa cua cuhva Nyoo tsi ra. ²⁷ Juvín ñi tsa cuenda tsa tsinū iñi ra Moisés tsi Nyoo, ña nayuhvi ra quitā ra ñuhu Egipto, vasu ndi maa cuxaan ra rey tsi ra. Tan cunyeē xaan iñi ra tyin tumaa tsatyin nyehe ra tsi Nyoo tsa ña nyehé yo.

²⁸ Juvín ñi tsa cuenda tsa tsinū iñi ra tava tyiñu ra na jacahnū tandihi nyivi Israel vico tan cahñi ñi iin mbee ticatyī luhlu. Tan tava tyiñu tucu ra na cahyi ñi niñi mbee can quisiyu yuvehe ñi, tyin tacan tan tsa cua yaha ángel Nyoo cahñi ra sehe nuu nyivi Egipto, ña cahñi ra ndi intuhun sehe nuu maa ñi.

²⁹ Tsa cuenda tsa tsinū iñi ñi Israel tsi Nyoo tan yaha sava ñi nu Nduitya Ñuhu Cuaaha tumaa nu ñuhu ityi. Ra Egipto naha ra cuñi ndihi tucu ra naha yaha ra naha, maa tyin ña cuvī yaha ra naha tyin nacasi Nyoo ndutyā ñuhu can siqui ra naha tan tsihī ra naha jahā ndutyā can.

³⁰ Juvín ñi tsa cuenda tsa tsinū iñi ñi tsicoḡ nduvi ñi utsa tsaha tsata ñuu Jericó, tan tandihi cuii maa nu sama tsaha ñuu can tani. ³¹ Juvín ñi tsa cuenda tsa tsinū iñi ña Rahab, ñaha sii iñi tsicā nuu tsa tsicoḡ Jericó, tan ña tsihī ña quivi tsihī tandihi nyivi ñuu ña. Ña tsihī ña tyin jatyinyeē ña tsi ra Israel ra tsa tsahan naha ra tsinyehe ñuu ña. Tandihi ca ñi tsihī ñi tsa cuenda tsa ña tyaa yahvi ñi tsi Nyoo.

³² ¿Náa ca cua cahan yu vityin? Tyin ña cuyatyī yu cahan yu tuhun tandihi ra naha, tumaa ra Gedeón, ra Barac, ra Sansón, ra Jefté, ra David, tan ra Samuel, tan ra cuvī ndusu yuhu Nyoo naha ra tahañ tsanaha. ³³ Tsa cuenda tsa tsinū iñi ra naha tsi Nyoo, tan yihí ra naha jahā canaa ra naha tsi inga ñuu nahnu. Tan yihí ra naha vaha xaan tsindacā ñaha ra naha nyivi cuenda Nyoo. Yihí ra naha ñihī ra naha tsa catyi Nyoo tyin cuhva ra tsi ra naha. Yihí ra naha jatyinyeē Nyoo tsi ra naha quivi nducū cahñi ndicaha tsi ra naha. ³⁴ Yihí ra naha ña cayu ra naha jahā ñuhu tsitsi ono nu tyihī nyivi tsi ra naha. Yihí ra naha naha cacū ra naha tan ña tsahnū nyivi tsi ra naha tsihin mityi. Yihí ra naha tsahā Nyoo tunyee iñi tsi ra naha quivi nduve tunyee iñi tsicoḡ tsi ra naha, tan cuvī cañi tahan ra naha tsihin nyivi xaan iñi tsi ra naha tan jahā canaa ra naha tsi ñi. ³⁵ Tsicoḡ juhva ñiñaha, tsa nandoto nyivi.

Juhva nyivi tsinuhñi ñi tan ndoho ñi jahā nyivi, maa tyin vasu ndi maa tacan tahan ñi, cunyeē xaan iñi ñi tan ña cuñi ñi ndoo nuña ñi. Nyivi can catyi ñi tyin tun nacoo ñi tsi Nyoo ña cua nyehe ca ñi tundoho, maa tyin ñi ican ña cuñi ñi tyin tsitó ñi tyin vasu ndi maa cúu ñi, cua nandoto ñi inga tsaha tan cua coo ñi iin ñayivi vaha ca. ³⁶ Inga ñi nyehe ñi tundoho jahā nyivi tyin caahán nyaa nyivi can tsi ñi tan cañi ñi tsi ñi. Inga tucu ñi tsinuhñi ñi tsihin cadena tan tsiyucu ñi vehe caa. ³⁷ Yihí ñi tsahñi nyivi tsi ñi tsihin yuu. Yihí ñi tsahnyā sava nyivi tsi ñi tsihin cierra. Yihí ñi nducu cuhva nyivi tsi ñi. Yihí ñi tsahñi nyivi tsi ñi tsihin mityi. Yihí ñi tsinditsi ñi ñi mbee ticatyi tan ñi mbee; nduve jahma vaha ñi tsicoo tan ndi nduve vehe ñi. Ndaahvi xaan tsicoo ñi, tan tsicoo xaan ñi tucuihya iñi, tan nyehe ñi tundoho jahā nyivi tsa ña tsitó tsi Nyoo. ³⁸ Tan nyivi ndaahvi can vaha ca ñi nuu Nyoo tan ñavin ca inga ca nyivi. Tsica nuu ndaahvi ñi nu tsiqui tan nu iyó yucu. Tsicoo ñi tsitsi cava tan tsitsi ñuhu. ³⁹ Tandihí maa nyivi ndaahvi can vasu ndi maa vaha cahan Nyoo tuhun ñi tsa cuenda tsa tsinu iñi ñi tsi ra, maa tyin ña ñihí ñi tsa catyi ra tyin cuhva ra. ⁴⁰ Tyin cuñi ra tsa ñihí ndihí ñi tsa vaha ca tsa tyaa ra cuhva tyin cuhva ra tsi yoo tyin tacan tan nduvaha ñi nuu ra iin caa ñi tsihin yo.

12

Na cuita iñi yo tsi intuhun ñi maa ra Jesús

¹ Tandihí nyivi can quita vaha ñi nuu Nyoo tyin tsinu iñi ñi tsi ra. Tan vityin jandu iin ñi iñi yo tsihin can, tan ndatú ñi nyehe ñi tatun quita vaha yo. Yacan cuenda cuñi tsi nacoo yo tandihí tsa jatyañú tsi yo, tan tandihí cuatyí tsa tuhvá jandavi ñaha tsi yo. Tan na cunyeē iñi yo cuhun yo ityi nuu ca tsihin Nyoo tsihin tsa taxin iyó añima yo. ² Na nyehe yo tsi intuhun ñi maa ra Jesús tyin juvin ra jatyinyeē tsi yo tsa tsinú iñi yo tsi ra, tan tsahā tucu ra tandihí cuhva taahán tsi tsinu iñi yo. Ra Jesús cunyeē xaan iñi ra nyehe ra tundoho tan ña tyaa yahvi ra ticanuu tsa cua tahan ra tsa cúu ra nu cruu tumaa tsiihí iin nyivi iyó cuatyí. Yacan cuenda, vityin nyaá ra xiin cuaha Nyoo nda gloria. Tyin tsa ndi cumañi ca cúu ra, tan tsa tsitó maa ra tyin si xaan cua cuñi ra tsa yaha cúu ra.

³ Jaha ndo cuenda cuhva tsicoo ra Jesús, tyin ra Jesús nyehe xaan ra tundoho jahā nyivi iyó cuatyí, maa tyin cunyeē iñi ra. Tacan tucu nyooho, ña cundihí iñi ndo tan ña ndu uvi iñi ndo tsa nyicún ndo tsi ra. ⁴ Tyin nyooho ñaha ca nyehe ndo tundoho tumaa nyehe ra Cristo tundoho tsa cañi tahan ra tsihin tsa caquiñi tan tsihi ra. Tyin ñaha ca cúu ndo jaha tsa cañi tahan ndo tsihin tsa caquiñi. ⁵ ¿A tsa naa iñi ndo nácaa jaquihín ityi Nyoo tsi yo tsa cuví yo sehe ra? Catyi ra nu tutu ra tyehen:

Sehe luhlu yu, ña cuxaan un tatun tsahá cuenda yu tsi un nácaa taahán tsi javaha un.

Tan ña nducuihya iñi un tatun cuxaán yu tsi un.

⁶ Tyin yuhu jaquihín ityi yu tsi nyivi cuñi yu, tan tatsí tuñi yu tsi nyivi cuví sehe yu, catyi Nyoo.

⁷ Janyee ndo iñi ndo tan nducu ndo cuhva cutuhva ndo tun jaquihín ityi Nyoo tsi ndo. Tyin Nyoo, jaquihín ityi ra tsi sehe vaha ra tumaa javaha tandihí nyivi iyó sehe, jaquihín ityi ñi tsi sehe ñi. ⁸ Tyin tatun ña jaquihín ityi Nyoo tsi yo, ñavin sehe vaha ra cuví yo. Maa tyin tatun jaquihín ityi ra tsi yo, juvin sehe vaha ra cuví yo. ⁹ Tan inga tucu tuhun, tsa ndi nyihi yo, jutu yo nu ñuhu ñayivi ihya jaquihín ityi ra naha tsi yo, tan jahā yo tsa ñayivi tsi ra naha. Tan vihi ca

cuñi tsi tyaa yahvi yo tsi Jutu yo Nyoo, tyin tacan tan cuvi coo cuii yo. ¹⁰ Jutu yo tsa iyó nu ñuhu ñayivi ihya, jaquihín ityi ra naha tsi yo tsa cuenda juhva ñi quivi, tan javahá ra naha can cuhva cuñi maa ra naha tyin vaha tsa cuenda yo. Maa tyin Nyoo jaquihín ityi vaha ca ra tsi yo, tan tsahá ra tsa ndu ii yo tumaa ii maa ra. ¹¹ Nditsa tyin tsa ndi cuxaán Nyoo tsi yo nyehé yo tundoho. Maa tyin tun cutuhva yo javaha yo tsa vaha tsihin tsa nyehe yo tundoho can, cua quita vaha yo.

Ica xaan tun ña tyaa yahvi yo tsa caahán Nyoo tsihin yo

¹² Yacan cuenda ña ndu uvi iñi ndo tsa javaha ndo tsa cuñi Nyoo javaha ndo, tan ña nducuihya iñi ndo. ¹³ Ndücu ndo cuhva coo vaha ndo tsihin Nyoo, tan cuhva caca vaha ndo tsihin ra. Tyin tacan tan cuhva ra tunyee iñi tsi ndo tan nduvaha ndo nuu ra tan ña cuihya ca cua cuñi ndo.

¹⁴ Jañiñi ndo tsi ndo tan coo vaha ndo tsihin tandihi nyivi. Nacoo ndo tandihi tsa ña vaha. Tyin nyivi tsa ña nacoo tsa ña vaha ña cuvi nyehe ñi tsi Nyoo Jutu yo. ¹⁵ Jaha cuenda vaha ndo tsi ndo tyin tacan tan ña ndoo ihñi ndi intuhun ndo tyin tandihi ndo tan cua ñihi ndo tunyee iñi tsa tsahá Nyoo, tan ña cua ndoo tsa xaan tsitsi añima ndo tan ña cua tiví ndo nuu Nyoo, tyin jahá cuenda vaha ndo tsi ndo. ¹⁶ Nyoooho rayi ndi intuhun ndo tan ña çaca nuu ndo tsihin ñaha. Tacan tucu nyoooho ñaha, ña çaca nuu ndo tsihin rayi. Tan ña çaca iñi ndo tyin nduve yahvi nyaá tuhun Nyoo, tumaa tsica iñi ra Esaú, tyin ra Esaú xico ra tsa cuví ra ra tsitsa tsacatyí tsa catsi ra. ¹⁷ Tsitó ndo tyin tsa yaha yacan tan cuñi ra Esaú tsa nasoco jutu ra tsi ra, maa tyin ña cuvi. Tsacu xaan ra, maa tyin ña ñihi ca ra cuhva nasama ra tsa tsa yaha javahá ra.

¹⁸ Nyoooho ña taahán tsi javaha ndo tacan tyin tsaq ndo nuu Nyoo, maa tyin ñavin tumaa tsaq nyivi Israel nuu Nyoo quivi tsahan ñi yucu Sinaí tsa cuvi nyehe yo. Nyehe ñi cayu ñuhu, tan ñihi xaan yihí fatyi xaan, tan naa xaan cuvi. ¹⁹ Tan tsiñi ñi ndusu trompeta tan cahan Nyoo tsihin ñi. Tan cahan ndaahvi ñi tsihin ra na ña cahan ca ra tsihin ñi, tyin yuuhví xaan ñi ²⁰ tsa cuenda tyin ña cunyeé iñi ñi tsa tsaha cuenda ra tsi ñi Tyin catyi ra tyehen: “Nyivi natuhva tan cuañi tsaha yucu ihya çahñi ndo tsi ñi tsihin yuu o tsihin lanza, tahan ñi nyivi tan quiti”, catyi Nyoo tsihin ñi. ²¹ Nayuhví xaan ñi tsa nyehe ñi yacan, nda cuenda ra Moisés tan catyi ra: “Ñihi xaan nihí yu jahá tsa yuuhví yu”, catyi ra.

²² Maa tyin nyoooho ña nyehe ndo tsa yuuhví can tyin tsaq ndo yucu nañi Sión tsa cuvi ñuu Nyoo nyito. Tuhun ihya cuñi tsi catyi ñuu Jerusalén tsa canyíi nda gloria, nu iyó cuenda mil ángel. ²³ Ndu iin ndo ican tsihin tandihi sehe Nyoo tsa iyó sivi nu libru nda gloria tan jacahnu ndo tsi ra. Natuhva ndo nuu Nyoo, ra cuvi juee [tsa jandaa cuatyí] tandihi nyivi, tan natuhva ndo nuu tandihi añima nyivi vaha tsa janduvahá Nyoo. ²⁴ Natuhva tucu ndo nuu ra Jesús, ra caahán ndaahvi tsihin Nyoo tsa cuenda yo vityin tsa ndoo Nyoo tuhun tsaa tsihin yo. Tan niñi ra Jesús tsa tsati tsahá tsa vaha ca tsi yo tan ñavin ca niñi ra Abel. [Tyin niñi ra Abel tsican tsi cuatyí tsaha ra yañi ra. Maa tyin niñi ra Jesús, jahá tucahnu iñi cuatyí yo.]

²⁵ Yacan cuenda cuñi tsi jaha yo cuenda tsi yo tan tyaa yahvi yo tsi ra caahán tsihin yo. Tyin tacan tan ña tahan yo tumaa tahan juhva nyivi Israel tsa ña tyaa yahvi tsa cahan Nyoo quivi cahan ra yucu Sinaí nu ñuhu ñayivi ihya. Tan vihi ca yo, tun ña tyaa yahvi yo tsi ra nyaá nda gloria tsa caahán tsihin yo vityin, ña cua cuvi maa cacu yo. ²⁶ Tahan tsanaha jacanda Nyoo ñuhu ñayivi tsihin ndusu ra. Tan catyi ra tyehen vityin: “Cua jacanda yu iin

tsaha ca ñuhu ñayivi, maa tyin ñavin ñuhu ñayivi ñi, tyin cua jacanda ndihi yu nda cuanda andivi.” ²⁷ Tsa caahán ra tyin cua jacanda ra inga tsaha, cuví cutuñi iñi yo tyin cua catsiyo tandihi tsa javahá ra tsa cuví nacanda. Tan cua ndoo tsa ña cuví nacanda. ²⁸ Nu ndacá ñaha Nyoo nu tsahá ra cunyecu yo tsihin ra, ña cuví nacanda can. Na cuhva yo tyahvi nyoo tsi ra tsa cuenda yacan tan na jacahnu yo tsi ra tsihin tsa ñi iñi añima yo, tan tyaa yahvi yo tsi ra, tyin yacan cuví tsa taahán iñi ra. ²⁹ Tyin Nyoo yo cuví ra tumaa ñuhu tsa tsahmí, tan cua janaa ra tandihi maa tsa ña vaha.

13

Na coo yo cuhva taahán iñi Nyoo

¹ Ña jandihí ndo tsa cuñi ndo tsi tandihí nyivi yihí cuenda Nyoo tyin cuví ñi tumaa nyivi ndo. ² Ña ñaa iñi ndo tyaa nuu vaha ndo tsi nyivi tsaá vehe ndo, tyin tun javaha yo tacan nda cuanda cua cuhva yo nu coo ángel Nyoo, vasu ndi maa ña tsitó yo tun ángel cuví ra naha tumaa javahá juhva nyivi.

³ Ña ñaa iñi ndo tsi nyivi yucú vehe caa tumaa tsatyin yucú ndihí ndo tsihin ñi. Ndūcuhun iñi ndo tsi nyivi nyehé tundoho jahá nyivi. Cūndaahvi iñi ndo tsi ñi tan jatyinyee ndo tsi ñi. Tyin tsitó ndo nácaa cuñi yo tun nyehe yo tundoho.

⁴ Nyooho nyivi tsa tsa tindaha, jaha tahan ndo tsa ñayivi tsi iin ndo tan tsi inga ndo. Tan coo vaha ndo tyin Nyoo cua tatsi tuñi ra tsi rayi tsicá nuu tsihin naha tan rayi iyó ñasiihi tun coo ra tsihin inga ñaha. Tan juvin ñi cua tatsi tuñi tucu ra tsi ñaha tsicá nuu tsihin rayi tan ñaha tsa iyó yi tun coo ña tsihin inga rayi.

⁵ Ña çaca iñi ndo nácaa javaha ndo tan cuví coo cuaha ca xuhun tsi ndo. Ndo ndo vaha tsihin tsa iyó tsi ndo, tyin catyí Nyoo tyehen: “Tandihí ñi tsaha nyaá yu tsihin un, tan ña cua nacoo ihñi maa yu tsi un”, catyí ra. ⁶ Tsa cuenda yacan cuví caahán yo tyehen tsihin tsa ñi iñi añima yo: Jutu Mañi yu juvin un jatyinyeé tsi yu, Yacan cuenda ña yuuhvi yu tun javahá nyivi náa javahá ñi tsi yu.

⁷ Ndūcuhun iñi ndo tsi ra cuví ityi nuu vehe ñuhu, ra tsa caahán tuhun Nyoo tsihin ndo. Nyehe ndo tyin vaha iyó ra naha nuu Nyoo, tan cūnyicun ndo cuhva vaha tsinú iñi ra naha tsi Nyoo.

⁸ Ra Jesucristo ña nasamá ra. Juvin ra iyó nda tsanaha, tan juvin ra iyó vityin. Tan juvin ra cua coo yoso cuahán quivi. ⁹ Ña cuhva ndo jandavi ñaha nyivi tsi ndo tsihin tsa siin siin tsa jacuahá ñi. Vaha ca jandu iin ndo iñi ndo tsihin tsa vaha tsa tsahá Nyoo coo añima yo, tyin vaha ca yacan tan ñavin ca tsa jacuahá ñi ican. Tyin ñi ican jacuahá ñi maa ñi maa tsa cuenda náa tsatsí yo. Tan ña jatyinyeé can ndi tsi maa ñi.

¹⁰ Tsatj niñi ra Cristo nu cruu tsa cuenda yo. Tan ra jutu tsa nyitá iñi ley tsahnu naha ra ña cuví jatyinyee ra Cristo tsi ra naha. ¹¹ Ra jutu tsaahnu cuví ityi nuu cuenda nyivi Israel tsindacá ra naha niñi quití tsitsi Vehe Ii Xaan tsa cuenda cuatyí nyivi, maa tyin cuñu ti tuhvá can cayú ityi tsata ñuu. ¹² Tacan tucu ra Jesús, tavá tyiñu Nyoo tsi ra tsa nyehe ra tundoho tan cúu ra ityi tsata ñuu Jerusalén, tyin tacan tan janduvaha ra tsi yo tsihin niñi ra. ¹³ Na cūnyicun yo tsi ra Cristo tan ña nducahan nuu yo vasu ndi maa vacu nducu nyivi tsi yo. ¹⁴ Tyin tsa cuenda yoo nduve ñuu tsa ña cua cundihí maa nu ñuhu ñayivi ihya. Yacan cuenda nanducú yo iin ñuu tsa cua quitsi, tsa yaha naa ñuhu ñayivi

ihya. ¹⁵ Yacan cuenda vityin tsa iyó ra Cristo añima yo, taahán tsi jañiñi yo tsi yo tan jacahnu yo tsi Nyoo tsihin tsa cata yo yaa ra, tan tsihin tsa caahán yo.

¹⁶ Ña naa iñi ndo javaha ndo tsa vaha. Tan jatyinyee tahan ndo tsi ndo tsihin tsa iyó tsi ndo, tyin yacan cuví tsa taahán iñi Nyoo.

¹⁷ Tyaa yahvi ndo tsi ra jaquihín ityi tsi ndo naha ra; cuhva ndo tsi ndo cundaca ñaha ra naha tyin juvin ra naha jahá cuenda añima ndo. Tan coo quivi cua cuhva cuenda ra naha tyiñu jahá ra naha tsi Nyoo. Nducu ndo cuhva javaha ndo tsa vaha, tyin tacan tan sii cua cuñi ra naha cuhva cuenda ra naha tsi ndo tsi Nyoo. Maa tyin tun ña javahá ndo tsa vaha, cua cuhva cuenda ra naha tsi ndo tsi Nyoo tsihin tucuiihya iñi, tan ña cua quita vaha ndo nuu ra.

¹⁸ Ndācan tahvi ndo tsi Nyoo tsa cuenda ndi tyin tsitó ndi tyin vaha cuahán ndi tsihin ra, tyin maa ñi maa tsa vaha cuñi ndi javaha ndi. ¹⁹ Tan tsicán yu tsa ndacan tahvi tucu ndo tsa cuenda yu na cuhva Nyoo quitsi yu inga tsaha tsa numi ñi nu yucú ndo tan cunyii yu tsihin ndo.

Nu ndihí cahan ra tan tsahá ra nacumi tsi ñi

²⁰ Jutu Mañi yo Jesucristo tsa janandoto Nyoo, ra tsahá tsa taxin coo añima yo, juvin ra jahá cuenda tsi yo tsa cuví yo tumaa mbee jana ra. Tsihin niñi ra Cristo tsa tsatj, ndoo Nyoo tuhun tsa tsa ña cua cundihi maa tsihin yo.

²¹ Tandihí tsa cuñi Nyoo javahá ra tsihin tandihí yo, maa ra Jesucristo javahá can jahá ra. Tan na javaha ra tsihin yo tsa cuñi ra javaha ra. ¡Na jacahnu yo tsi ra Cristo yoso cuahán quiv! ¡Na cuvi tsi tacan ñi!

²² Yañi, caahán ndaahví yu tsihin ndo; janyee ndo iñi ndo tan javaha ndo tsa tsahá cuenda yu tsi ndo tsihin tsa taxin iyó añima ndo, tyin ña cuaha xaan tuhun tyaa yu tsa cuenda ndo. ²³ Cuñi yu tsa coto ndo tyin ra Timoteo, yañi yo, tsa quita ra vehe caa. Tatun yatyi tsa ra, cua quitsi ra tsihin yu na quitsi yu quitsi nyehe yu nu yucú ndo.

²⁴ Cuhva ndo nacumi tsi tandihí ra jaquihín ityi tsi ndo, tan tsi tandihí nyivi yihí cuenda ra Cristo. Nyivi Italia nu nyii yu, tsahá ñi nacumi tsi ndo.

²⁵ Tan na nasoco Nyoo tsi tandihí ndo. Na cuvi tsi tacan ñi.

Carta Tsa Jacuhun Ra Santiago Tsi Nyivi Israel Tsa Yihí Cuenda Ra Cristo

Nu tsahá ra Santiago nacumi tsi nyivi

¹ Yuhu ra Santiago cuví yu iin ra jahá tyiñu tyiñu Nyoo tan Jutu Mañi yo Jesucristo. Jaquitsi yu nacumi tsi tandihí nyooho tsa cuví ndo tata tsa utsi uvi ra sehe ra Israel tan iyó ndo ñuu nyivi tsa ñavin tata ra Israel cuví.

Tsa tsiñi tuñi tsa tsahá Nyoo tsi yo

² Yañi, cusii iñi ndo tun cuaha tundoho nyehé ndo. ³ Tyin tsitó ndo tyin tsihin tsa nyehé ndo tundoho tan cua cuahnu ca ndo tsihin tsa tsinú iñi ndo. Tan cua cunyeé iñi ndo nyehe ndo náa ndihí ca tundoho vatsí siqui ndo. ⁴ Jañá ndo na quitsi maa tundoho can siqui ndo, tyin tun tsa cunyeé iñi ndo yaha ndo tundoho can, cua cuví ndo nyivi tsitsa tsihin tuhun Nyoo, tan nduve ca náa cua cumañi tsi ndo tan cua cunyeé ndo yaha ndo tandihí maa tundoho tsa cua quitsi siqui ndo.

⁵ Ndáa nyooho cumañi tsa tsiñi tuñi tsi, ndacan ndo itsi tsi Nyoo, tan Nyoo cua cuhva ra itsi tsi ndo, tyin maa ra tsahá ra tsa tsicán tandihí nyivi tan ña tuhvá ra tyicuhvá itsi, tan ndi ña cuxaán ra tsi ñi tun tsicán ñi náa tsicán ñi tsi ra. ⁶ Maa tyin cuñi tsi ndacan yo itsi tsihin tsa tsinú vaha iñi yo. Tan ña caca iñi yo tyin ña cua cuhva ra itsi tsi yo. Tyin tun caca iñi yo tyin ña cua ñihi yo tsa tsicán yo, cuví yo tumaa ndutya ñuhu tsa tandahá tatyí ityi ihya tan ityi can. ⁷ Ra tsa javahá tacan, ña taahán tsi caca iñi ra tyin cua cuhva Nyoo tsa tsicán ra. ⁸ Tyin uvi xaan tsicá iñi ra. Ña tyaá iñi ra tsa tsicán ra, tyin ña iin cuñi ra. Vityin cuñi ra tsa cuñi ra, tan inga tsa cuñi tucu ra tyaan. ⁹ Tatun iyó iin ra yañi yo, ndaahvi ra, na cusii iñi ra tyin cahnu cuví ra jahá Nyoo. ¹⁰ Tatun iin ra yañi yo, tan cuca ra, tun cua ndundaahvi ra nu ñuhu ñayivi ihya, taahán tsi cusii iñi ra tsihin Nyoo tyin tsitó ra tyin cuví ra tumaa cuví ita tsa iyó tsitsi cuhu, tyin ita can iin yaha ñi cucoyó can. ¹¹ Tyin ihñi xaan cuví tsitsi cuhu jahá ñicanyii. Tacan tan na ityí ita can. Tan canacavá can tan ndihí tsa sii caá can. Tan tacan cuví ra cuca, tyin cua quitsi tuhun tsihí tsi ra tan cua cundihí tsa cuca ra.

Naca cunyeé iñi yo nyehé yo tundoho

¹² Sii xaan cuví tsi ra tsa cua cunyeé iñi nyehe tundoho tyin tsa yaha nyehe ra tundoho cua ñihi ra ñayivi nyito tsa catyi Nyoo tyin cuhva ra tsi ñi tsa cuñi tsi ra. ¹³ Tatun ndáa nyooho tsicá iñi ndo tsa javaha ndo tsa ña vaha, ña cuñi ndo tyin Nyoo tsahá tsa caca iñi ndo tacan. Tyin Nyoo ña tsicá iñi ra javaha ra tsa ña vaha. Tan ndi ña tyuhú ra tsi yo tsa javaha yo tsa ña vaha. ¹⁴ Maa tyin nyooho tsa javahá tsa ña vaha, javahá ndo can tyin cuñi ndo javaha ndo can. Tan yacan cuenda tsicoó cuatyí ndo. ¹⁵ Tatun cua cuhva yo tsa caca iñi yo tuhun ña vaha, coo quivi cua javaha yo cuhva tsicá iñi yo tan cua coo cuatyí yo. Tan tatun maa ñi yacan cua javaha yo, cua tatsi tuñi Nyoo tsi yo tsa cuenda can tan cua cuu yo.

¹⁶ Yañi, cuñi xaan yu tsi ndo. Ña jandavi ñaha ndo tsi ndo. ¹⁷ Tandihí tsa vaha tan tsa vii tsa ñihí yo, queé tsi ityi siqui tyin maa Nyoo Jutu yo tsahá itsi. Tan maa ra javahá ñuhu tsa iyó andivi: tiñuu, tan yoo, tan ñicanyii. Tan maa ra tacan ñi cuví ra Nyoo, tyin ndi luxu ña tuhvá ra nasama. ¹⁸ Tan tsahá ra

ñayivi tsaá tsa iyó yo tsa cuenda tsa nditsa tsa caahán ra. Tyin jihna ca yo jandutsaá ra tsa nuu tandihi ca tsa javahá ra, tyin tacan cuñi maa ra.

Tyi nditsa tsa taahán tsi cuhun yo

¹⁹ Yacan cuenda yañi, intuhun intuhun yo tan taahán tsi cuhun iñi yo tsa tyaá soho yo, maa tyin ña yatyi xaan nacahan yo tan ndi ña yatyi xaan cuxaan yo. ²⁰ Tyin nyivi tsa cuxaán, ña javahá ñi tsa taahán iñi Nyoo. ²¹ Yacan cuenda jaña ndo tsa ña vaha tan tsa caquiñi tsa iyó cuaha nu ñuhu ñayivi ihya. Ndaahvi jaha ndo tsi ndo tan tñin cuenda vaha ndo tuhun Nyoo tsa tatsj ra añima ndo. Tyin tuhun Nyoo can iyó tunyee iñi itsi tsa jacacú tsi tsi yo. ²² Javaha ndo cuhva caahán tuhun Nyoo, tan ña tyaá soho ñi maa ndo itsi, tyin tatun tyaá soho ñi maa ndo itsi juvin ñi tsi maa ndo jandaví ñaha ndo. ²³ Tyin nyivi tsa tyaá soho tuhun Nyoo tan ña javahá ñi cuhva caahán tsi, cuví ñi tumaa nyivi nyehé nuu ñi nu inu. ²⁴ Tyin nyehé ñi cuhva caá ñi, yaha can tan cuahán ñi tan naá nyico iñi ñi cuhva caá ñi. ²⁵ Maa tyin nyivi tsa iin nyita ñi tyaá soho tuhun Nyoo tsa tavá nuña tsi yo ndaha nu ña vaha tan ña naá iñi ñi itsi tan javahá ñi cuhva caahán tsi, sñi cua cuví tsi ñi ican tan cua quita vaha tandihi tsa javahá ñi. ²⁶ Tan nyivi tsa catyí tyin tuhun Nyoo yihí ñi, maa tyin yatyi xaan yuhu ñi cahan ñi tsa caquiñi, nduve nacatyí tsicá ñi tuhun Nyoo tyin juvin ñi tsi maa ñi jandaví ñaha ñi. ²⁷ Tyin tsa cuenda Nyoo, nyivi tsa nditsa tsinú iñi tsi ra juvin ñi cuví ñi tsa javahá tyeheh: Jatyinyee ñi tsi nyivi ndaahvi tsa tsihí yñi, tan jahá cuenda ñi tsi tsa nyihi tsa nduve ca sihi tan jutu, tan jahá cuenda ndihi tucu ñi tsi maa ñi tsa ña javaha ñi tsa ña vaha.

2

Na inducu ñi cuñi yo tsi nyivi tyin ña sñin caá intuhun ñi tan inga ñi

¹ Yañi, nyooho tsinú iñi ndo tsi Jutu Mañi yo Jesucristo, ra tsa cahnu xaan cuví, yacan cuenda ña taahán tsi cahnu jaha ndo tsi iin nyivi tan ñavin ca inga ñi. ²⁻³ Tatun cua quihvi iin ra yihí iin xehe xuhun cuaan ndaha tsitsi vehe ñuhu nu yucú ndo, tan nditsi ra jahma xiñu, ¿ñácaa cua cahan ndo tsihin ra? ¿A ña cua catyí ndo, “Cunyaá nu tyayu vaha ihya”? Tan juvin ñi cuhva can tan quihvi tucu iin ra ndaahvi nditsi ra jahma tyaahnyá, tan catyí ndo tsihin ra, “cunyaá nyityi juvin o cunyaá nu ñuhu ihya”. ⁴ Ña vaha tsa javahá ndo tacan, tyin ña inducu jahá ndo tsa ñayivi tsi ra naha, tan tsicá iñi ndo tsa ña vaha.

⁵ Yañi tsa cuñi xaan yu, tyaá soho ndo tuhun ihya: Nyoo nacatsj ra tsi nyivi ndaahvi nu ñuhu ñayivi ihya, tyin nducuca ñi tsihin tsa tsinú iñi ñi tsi ra, tan cua ñihi ñi tsa vaha nu ndacá ñaha ra tyin xaan cuví tsa catyí ra tyin cuhva ra tsi nyivi tsa cuñi tsi ra. ⁶ Maa tyin nyooho tsahá ndo ticanuu tsi nyivi ndaahvi. ¿A ña tsitó ndo tyin juvin nyivi cuca tsahñi ndaahvi tsi ndo, tan tsindacá ñi tsi ndo nuu ra cumí tyiñu? ⁷ Tan ¿a ña tsitó ndo tyin nyivi can caahán ñi ndavaha ñi sivi ii ra Cristo, ra yihí ndaha tsi ndo?

⁸ Ley Nyoo tsa ñiñi ca catyí tsi: “Cuñi ndo tsi nyivi tumaa tsa cuñi ndo tsi maa ndo.” Tatun javahá ndo tsa catyí ley can, vaha javahá ndo. ⁹ Maa tyin tun intuhun ñi nyivi cuñi ndo, tan ña cuñi ndo tsi inga ñi, tsicoó cuatyí ndo tyin catyí ley Nyoo tyin iyó cuatyí nyivi javahá tacan. ¹⁰ Tyin tatun iin nyivi tsa tyaá yahvi tandihi ley, tan ña tyaá yahvi ñi intuhun tsi, cuví tsi tumaa tsa ña tyaá yahvi ñi tandihi ley. ¹¹ Tyin Nyoo catyí ra tyin ña coo inga ñaha tsi rayñi, tun iyó ñasñihi ra. Tacan tucu ñiñaha, tsa iyó yñi, ña cuví coo inga rayñi tsi

ñi. Tan juvin ñi catyí tucu ra tyin ña cahñi yo nyívi. Yacan cuenda tatun iin ra nduve inga ñaha tsi ra, maa tyin tsahñi ra iin nyívi, juvin ñi ña tyaá yahvi ra tsa catyí ley. ¹² Maa tyin ley ra Cristo tsa jacacú tsi yo cua catyí tun vaha o ña vaha javahá yo. Yacan cuenda nducu ndo cuhva cahan ndo tan cuhva coo ndo. ¹³ Tyin nyívi tsa ña cundaahví iñi tsi tahan ñi, Nyoo cua tatsi tuñi ra tsi ñi, tan ña cua cundaahví iñi ra tsi ñi. Maa tyin ñi tsa cundaahví iñi tsi inga ñi, cua quita vaha ñi quívi cutuñi ñi.

¿Ndáa tsa jacacú tsi yo, tsa tsinú iñi yo tsi ra Cristo o tsa javahá yo tsa vaha?

¹⁴ Yañi, nduve nacatyí tsinú iñi ndo tsi Nyoo, tun ña javaha ndo tsa vaha. ¿A jacacu tsa tsinu iñi yo tsi Nyoo ñi tsi yo? ¹⁵ Na jaha yo tuhun: Iin tsaha iin ra yañi yo nduve jahma ra tan nduve tsa catsi ra tan tsahan ra yuvehe un, ¹⁶ Maa tyin yooho ña tsaha un jahma ra tan ndi tsa catsi ra tan catyí un tsihin ra: “Cuaahan tan Nyoo cuhun tsihin un. Na coo ca jahma un tan tsa catsi un”, catyí un. Nduve nacatyí cahan un tacan tyin ña tsaha un tsa tsiñi ñuhu tsi ra. ¹⁷ Tan tacan ñi cuñi tucu yo tsihin tsa tsinú iñi yo, tun catyí yo tyin tsinú iñi yo tsi Nyoo tan ña jatyinyee yo tsi nyívi, nduve yahvi nyaá catyí yo tyin tsinú iñi yo.

¹⁸ Yihí ndo cua catyí ndo: “Yooho tsinú iñi un tsi Nyoo tan yuhu javahá yo tsa vaha. Tan catyí un tyin tsihin tsa tsinú iñi ñi yo tan cuví cacu yo.” Maa tyin yuhu catyí yo tyin juvin ñi cahnu cuví tucu tsa javahá yo tsa vaha. Tyin yooho ña cuví janaha un tsa tsinú iñi un tsi Nyoo tsi yo tun ña javaha un tsa vaha. Maa tyin yuhu cuví janahá yo tsa tsinú iñi yo tsi Nyoo tsi un tsihin tsa javahá yo tsa vaha. ¹⁹ Nditsa tsa tsinú xaan iñi un tyin iyó intuhun ñi maa Nyoo. Vaha tyin tsinú iñi un. Maa tyin nu ñavaha nahnu tsinú tucu iñi nahnu tyin iyó intuhun ñi Nyoo. Tan yacan cuenda ñihí nahnu tsihin tsa yuuhví nahnu tyin ña cua cacu nahnu. ²⁰ Ña soho xaan çaça iñi un. Cutuñi iñi tyin tun tsinú iñi yo tan ña javahá yo tsa vaha, nduve yahvi nyaá tsa tsinú iñi yo. ²¹ Ra Abraham, tsi saahnu yo, cuví ra iin ra vaha nuu Nyoo tyin jamañi ra tsi ra Isaac, sehe ra, tumaa catyí maa Nyoo tsihin ra. ²² Ihya nyehé yo tyin tsa cuenda tsa tsinú iñi ra Abraham tsi Nyoo javahá ra tsa catyí ra tsihin ra tyin javaha ra. Tan tsa javahá ra yacan, quituví vaha tsa tsinú iñi ra tsi Nyoo. ²³ Tacan tan cundaá tsa catyí nu tutu Nyoo tyehen: “Ra Abraham tsinú iñi ra tsi Nyoo, yacan cuenda cuví ra ra vaha nuu Nyoo.” Tan iyó tucu inga nu catyí tsi: “Ra Abraham, cuví ra ra vaha iñi tsi Nyoo.”

²⁴ Tan ihya cuví nu cutuñi iñi yo tyin vaha yo nuu Nyoo tatun tsinú iñi yo tsi ra tan javahá yo tsa vaha tan ñavin tsihin tsa tsinú iñi ñi yo tsi ra. ²⁵ Tan tacan tucu ña Rahab tsa tsicá nuu tsihin rayii. Yahá tsa javahá ña cuatyí, javahá ña tsa vaha quívi tsahá ña nu tsiyucu xeehe ra tsa jacuhun ra Josué. Tan jatyinyee ña tsi ra naha tsa cuhun ra naha inga ityi. Tan tsa cuenda yacan, catyí Nyoo tyin vaha ña. ²⁶ Tan tacan tucu cuví cuñi ñuhu nyívi. Tatun nduve ca tsa nyitó ñi iyó tsitsi cuñi ñuhu can, nduve ca yahvi nyaá can. Tan tacan cuví tucu yoo, tatun ña javahá yo tsa vaha, nduve yahvi nyaá tsa tsinú iñi yo.

3

Nacaa jaha cuenda yo cuhva caahán yo

¹ Nyooho yañi, ña yatyi xaan cuñi ndo cuví ndo ra cahan tuhun Nyoo. Tyin tsitó ndo tyin nyuhu tsa caahán ndi tuhun Nyoo, tatun ña vaha cahan ndi, ñihi ca cua tatsi tuñi Nyoo tsi ndi tan ñavin ca nyívi tsa ña caahán tuhun Nyoo.

² Tyin tandihí maa yo tan tsicoó cuatyí yo, maa tyin ra tsa ña javahá cuatyí tsihin tsa caahán ra, juvin ra cuví ra vaha tyin cuví ndaca ñaha ra nanií cahnu cuñu ñuhu ra. ³ Tumaa ra tsa tyihí yoho yuhu cuayu cuví ndaca ñaha ra tsi tí, vasu ndi maa cahnu tí. ⁴ Tan tacan tucu iin yutun ndoo tsa tsicá nu ndutya ñuhu, vasu cahnu tsi maa tyin tsihin vitu luhlu tsa nyaá ityi xuu tsi, cuví jacahun ra jacacá itsi ndáa ityi cuñí maa ra, vasu ñihi xaan yihí tatyí. ⁵ Tan tacan tucu yaa yo, luhlu xaan tsi. Maa tyin cuaaha tsa caquiñi cuví cahán yo tsihin tsi. Tumaa nu natiñn iin ñuhu luhlu iin cuhu cahnu tan cayu tandihí maa yutun. ⁶ Tacan tucu yaa yo cuví tsi tumaa iin ñuhu luhlu. Tan cuví tucu tsi tumaa iin tsa quiñi cahnu tsa jativí tsi nanií cahnu cuñu ñuhu yo tan tandihí cuhva iyó yo ñayiví ihya, tyin juvin ñi maa nu ña vaha natyuhú itsi. ⁷ Nyiví cuví jandumasu ñi tandihí maa nuu quiñi tsa iyó: saa, coo, tan quiñi tsa iyó tsitsi ndutya ñuhu. ⁸ Maa tyin yoñi cuví jandumasu yaa yo tyin cuví tsi iin tsa ña vaha tan ña tsahá tsi cundaca ñaha yo itsi. Tumaa iin coo tyihí tí venenu tí tsi nyiví, tan tsiihí ñi. Tacan cuví yaa yo. ⁹ Tyin juvin ñi tsihin yaa yo jacahnú yo tsi Nyoo Jutu yo. Tan juvin ñi tsihin can caahán tucu yo ndavaha ñi siqui nyiví tsa javahá Nyoo tumaa caá maa ra. ¹⁰ Juvin ñi tsihin yuhu yo jacahnú yo tsi Nyoo. Tan juvin ñi tsihin can caahán yo tsa caquiñi. Maa tyin yañi, ña taahán tsi tsa javahá ndo tacan. ¹¹ Tyin, ¿a cuví quita ndutya cuii tan ndutya uva tsitsi iin ñi ndohyo? Ña cuví. ¹² Yañi, ¿a cuví cuhva tumangu iin paya, o cuví cuhva tupaya iin mangu? Ña cuví. Tan tacan ña cuví quita ndutya uhva tan ndutya cuii tsitsi iin ndohyo.

Tsa tsiñi tuñi tsa vaha ca

¹³ Tatun yihí ndo tsitó ndo tan iyó tsa tsiñi tuñi tsi ndo, janaha ndo can tsihin tsa catsi iyó ndo. Tan ña nduyaa ndo javahá ndo tsa vaha tyin javahá ndo can tsihin tsa tsiñi tuñi Nyoo tsa iyó tsi ndo. ¹⁴ Maa tyin tatun nyiyo iñi ndo tsitsi añima ndo tan cuñí xaan ndo nduvaha ndo nu nyiví, ña cahnu jaha ndo tsi ndo tan catyi ndo tyin iyó tsa tsiñi tuñi tsi ndo. Tyin tun cahnu jahá ndo tsi ndo, tyihí xeehe ndo tsa nditsa, cuví can. ¹⁵ Tyin tun tacan tsicá iñi ndo, ñavin tsa tsiñi tuñi Nyoo cuví can, tyin cuhva tsicá iñi nyiví ña tsitó tsi Nyoo tan cuhva tsica iñi nu ña vaha cuví can. ¹⁶ Tyin tatun nyiyó iñi ndo tan cuñí ndo nduvaha ndo nuu nyiví, ticaña xaan tsicá iñi ndo. Tan iyó tucu tandihí inga nuu tsa ña vaha nu yucú ndo. ¹⁷ Maa tyin tatun iyó tsa tsiñi tuñi Nyoo tsi ndo, cuiñi iyó ndo, catsi iyó ndo. Tan nducú ndo cuhva coo vaha ndo tsihin nyiví tsihin tsa vita iñi ndo, tan vaha nyiví cuví ndo. Tan catsi vaha tsicá iñi ndo, tan cundaahví iñi ndo tsi nyiví, tan caahán ndo tsa nditsa tsihin ñi, tan nducú ndo tsa vaha tsi ñi tsihin tsa nñi iñi ndo. ¹⁸ Tatun iyó vaha yo tsihin nyiví, tan iyó taxin yo tsihin ñi, cua coo yo ñayiví cuiñi.

4

Ña taahán tsi javaha yo cuhva cuiñi cuñu ñuhu yo

¹ ¿Nacuenta iyó tsihí nu yucú ndo? ¿Nacuenta iyó cuatyí? Tsa cuenta tyin tsitsi añima ndo tsicá iñi ndo maa ñi maa tsa ña vaha. ² Iyó tsaha nda cuando tsahñí ndo nyiví tyin cuñí ndo tsa cuñí ndo tan ña ñihí ndo can. Tatun tsehé ndo náa cuví can nyehé ndo, nyiyó iñi ndo can tan tsa ña ñihí ndo can quitsaha cañi tahan ndo. Ña ñihí ndo tsa cuñí ndo tyin ña tsicán ndo can tsi Nyoo. ³ Tatun tsicán ndo tsa tsicán ndo tsi ra tan ña ñihí ndo can, ña tsahá ra can tsi ndo tyin tsitó ra tyin cua jativí ndo can tsihin tsa taahán iñi

ndo. ⁴ ¿Nacuenda javahá ndo cuhva cuñí nyívi, nyooho tsa ña tsinú vaha íñi tsi Nyoo? ¿A ña tsitó ndo tyin tun javahá yo cuhva cuñí nyívi, ñi xaan íñi tsi Nyoo cuví yo? ⁵ Tan yacan iyó cuenda catyí nu tutu Nyoo tyin Tatyí Ii tsa tsahá ra coo añima yo, cuñí xaan tsi tsi yo tan cuiñu xaan tsi tsi yo tyin cuiñí tsi tsa jacahnu yo tsi intuhun ñi maa ra. ⁶ Tan jatyinyeé xaan Nyoo tsi yo tsa nacuhvá yo tsi yo tsi ra. Tyin catyí ra tyin jatyinyeé ca ra tsi nyívi ndaahvi tsa tsitó tyin tsíñi ñuhu ra tsi ñi. Tan ña cuñí ra nyehe ra tsi ra tsa cahnú jahá tsi. ⁷ Yacan ñacuhva vaha ndo tsi ndo tsi Nyoo. Ña tyaa yahvi ndo nu caahán nu ña vaha tyin tun ña jahá ndo cuenda nu caahán nu, tacan tan cua cunu nu nyehe nu tsi ndo. ⁸ Nducu ndo cuhva cunyanaa vaha ca ndo tsi Nyoo tyin tacan tan natuhva ra tsi ndo. Nyooho, nyívi iyó cuatyí, jandundíi ndo tsi ndo. Tan nyooho tsa tsicá íñi tyin cuví javaha ndo tsa iyó nu ñuhu ñayívi ihya tan juvin ñi cuhva can tan jacahnu tucu ndo tsi Nyoo, jandu iin ndo íñi ndo tan cùhva ndo añima ndo jacutu Nyoo tsa vaha, tyin tacan tan ndundíi ndo nuu ra. ⁹ Cuiihya cuñi ndo. Vacu ndo. Na nacoto ndo tyin ña vaha cuhva iyó ndo. Tsa nuu tsa vacu naaha ndo tsihin tsa síi cuñí ndo, vacu ndo tsihin tsa cuiihya cuñi ndo. Tan tsa síi cuñí ndo na nanduvi tsi tucuiihya íñi. ¹⁰ Ndaahvi jahá ndo tsi ndo nuu Jutu Mañi yo, tyin tacan tan janducahnu ra tsi ndo.

Ña çahan nyaa ndo tsi nyívi

¹¹ Yañi, ña çahan ndo ndavaha ñi siqui iin yañi yo. Tyin nyívi caahán ndavaha ñi siqui nyívi, o caahán nyaa ñi nyívi, siqui ley Nyoo caahán ñi ndavaha ñi tan caahán nyaa ñi cuví can. Tyin tun caahán nyaa yo ley Nyoo, juez jahá yo tsi yo tsa nuu tsa tyaa yahvi yo tsa caahán ley can. ¹² Tyin intuhun ñi ra tsahá ley can. Tan juvin ñi ra cuví Juez. Tan juvin ra cuví ra jacacú tsi yo, o jacunaá tsi yo. Tan ¿yooho yoo ra cuví un tyin çahan nyaa un tsi inga nyívi, tan tatsi tuñi un tsi ñi tan jaha un tsi un tumaa juez?

Ña tsitó yo náa cua cuví tsi yo tyaan, yacan cuenda ña taahán tsi cahnú jaha yo tsi yo

¹³ Yihí ndo catyí ndo: “Vityin o tyaan cahun yo ñuu can, o inga ñuu can. Tan ndoo yo ican iin cuiya tan jaha tyiñu yo tan jaha canaa yo xuhun”, catyí ndo. Maa tyin tyaa soho ndo tsa cua çahan yu ihya: ¹⁴ Ñayívi tsa iyó yo cuví tsi tumaa vico nuhu tsa tuhvá yihí tan iin yaha ñi naa ihñi nyico. Ndi ña tsitó ndo tsa cua cuví tyaan tan catyí ndo tyin cahun ndo. ¹⁵ Vaha ca çahan ndo tyehen: “Coo yo juhva ca quiví tan javaha yo tsehe o yacan, tun Jutu Mañi yo tan cuñí ra.” ¹⁶ Maa tyin nyooho ña caahán ndo tacan, tan cahnú xaan jahá ndo tsi ndo. Tan Nyoo ña taahán íñi ra nyehe ra tsi nyívi javahá tacan. ¹⁷ Tyin yoo tsa tsitó javaha tsa vaha tan ña javahá yo can, tsicoó cuatyí yo.

5

Nu tsahá cuenda ra Santiago náa cua tahan nyívi cuca

¹ Tyaa soho ndo tuhun caahán yu ihya, nyooho nyívi cuca! Vacu ndo tsihin tsa cuiihya cuñí ndo, çana tsa ndo tsa cuenda tundoho tsa cua nyehe ndo. ² Tyin tsa cuca tsa jacayá ndo, tsa ndihi can tyaahyú. Tan jahma vaha ndo, tsa ndihi maa can tsatsj tiquixin. ³ Xuhun cuaan tan xuhun cuitsin ndo tsa ndihi can cuxí. Tan cuxí can tsahá cuenda can tyin ña vaha javahá ndo tsihin xuhun ndo. Tan juvin can cuví tumaa ñuhu tsa cua cahmi tsi ndo. ¿Nacuenda jacayá ndo tsa cuca nu cua ndihi quiví ihya? ⁴ Tan ña tyahví ndo yahvi tsa

taahán tsi tsi nyívi ndaahvi tsa jahá tyiñu tyiñu ndo. Tan vityin tsicán ñi cuatyí tsaha ndo nuu Jutu Mañi yo, ra ndacá ñaha tandihí ángel tsa cuví andaru cuenda ra. Tan maa Jutu Mañi yo tsiñí ra tuhun caahán ñi ndaahvi can. ⁵ Iyó vaha xaan ndo nu ñuhu ñayívi ihya tyin cuca ndo. Tan javahá ndo cuhva cuñí maa ndo. Tumaa tuhvá nyívi janduxaahán quini tyin cuu ti, tacan javahá ndo tsihin ndo. Tan vityin tsa tsaá quívi tsa cua cuu ndo. ⁶ Tyin tyaá ndo cuatyí tsaha nyívi vaha tan tsahñi ndo tsi ñi. Tan ndi ña cahan ñi cuatyí siqui ndo.

Na cunyeé iñi yo cuatu yo tsi ra Cristo

⁷ Yacan cuenda, yañi, janyee ndo iñi ndo cuatu ndo nda cuanda quitsi nyico Jutu Mañi yo. Tumaa ra tsa jahá tyiñu tsitsi cuhu ndatú ra nda cuun savi tsa jihna tan nda ndihí cuun nyico tsi, tan naquihin ra tsa tatsi ra. ⁸ Tan tacan taahán tsi cunyeé iñi yo cuatu yo tsi Jutu Mañi yo. Jandu iin ndo iñi ndo tyin tsa yatin cuí quitsi ra.

⁹ Yañi, ña tyaá ndo cuatyí tsi yañi ndo, coto tatsi tuñi Nyoo, ra cuví Juez, tsi ndo, tyin tsa nyaá ra tsa cuñí quitsi ra. ¹⁰ Yañi, quihin cuenda ndo cuhva tsicoq ra cuví ndusu yuhu Nyoo tahañ tsanaha. Tyin ra ican naha ra cunyeé xaan iñi ra naha nyehe ra naha tundoho quívi tsaha cuenda ra naha tuhun Jutu Mañi yo. ¹¹ Tsitó yo tyin sii xaan cuñí ra tsa cunyeé iñi nyehé tandihí nuu tundoho, tumaa tsa cunyeé xaan iñi ra Job nyehe ra tundoho. Tan nu ndihí ña, cuaha xaan tsa vaha tsaha Jutu Mañi yo tsi ra, tyin Jutu Mañi yo iyó xaan tucahnu iñi tsi ra. Tan cundaahví iñi ra nyehé ra tsi yo. ¹² Maa tyin yañi, ña cahan ndo: “Naha Nyoo maa”. Tan ña cahan ndo: “Tsitó vaha maa ra nyaá gloria”, tan ndi ña cahan ndo: “Tsitó vaha maa ra javahá ñuhu ñayívi”, tan ndi ña cahan ndo inga ca tuhun tahan can. Tatun nditsa tuhun caahán ndo, “nditsa” çatyi ndo. Maa tyin tatun tsitó ndo tyin ña nditsa, çatyi ndo tyin “ña nditsa”, coto tatsi tuñi Nyoo tsi ndo.

¹³ Tun ndáa nyooho nyehé tundoho, ndacan tahvi ndo tsi Nyoo. Tan nyooho tsa sii cuñí, cata ndo yaa Nyoo. ¹⁴ Tan nyooho tsa cuuhví, cana ndo tsi ra tsahnu vehe ñuhu naha ra tyin ndacan tahvi ra naha tsa cuenda ndo tan tyihí ra naha acetye tsi ndo tsihin sivi ra Cristo. ¹⁵ Tan tatun tsinú iñi ra naha tsi Nyoo cuhva tsa tsicán tahvi ra naha, nyívi cuuhví can cua nduvaha ñi. Tan Jutu Mañi yo cua janduvita ra tsi ñi. Tan tatun tsicoq ñi cuatyí, Nyoo cua jaha ra tucahnu iñi tsi ñi. ¹⁶ Yacan cuenda nahma ndo cuatyí ndo tsi iin ndo tan tsi inga ndo. Tan ndacan tahvi ndo tsi Nyoo tsa cuenda inga ca nyívi na nduvaha ñi. Tyin nu tsicán tahvi iin ra vaha tsicá tsihin Nyoo, iyó xaan tunyee iñi Nyoo. ¹⁷ Tumaa ra Elías ra cuví ndusu yuhu Nyoo tahañ tsanaha. Cuví ra iin rayi tumaa maa yo. Tan tsicán tahvi ra tsi Nyoo tyin na ña cuun savi. Tan ña cuun savi uñi cuiya sasava. ¹⁸ Yaha can tan tsicán tahvi nyico ra tsi Nyoo inga tsaha tyin na cuun savi. Tan cuun tsi inga tsaha. Tan tsahnu tsiti tsa tatsi nyívi.

¹⁹ Yañi, tatun iin nyívi tahan ndo nacoq ñi tuhun nditsa Jutu Mañi yo, tan cuanuhu ñi ñayívi inga tsaha, tan jatyinyeé ndo tsi ñi tsa nanducu nyico ñi ityi Nyoo, ²⁰ coto ndo tyin tsa javahá ndo tacan tsihin ñi, jacacu ndo añima ñi tan ña cua cuhun ñi anyaya. Tan jahá Nyoo tucahnu iñi cuatyí ñi jahá ndo.

Carta Tsa Jihna Ñi Tsa Jacuhun Ra Pedro Tsi Nyivi Yihí Cuenda Nyoo

Nu quitsahq̄ tyaá ra Pedro carta tsa cuenda nyivi yihí cuenda Nyoo

¹ Yuhu ra Pedro tava tyiñu ra Jesucristo tsi yu na caca yu tyiñu ra. Tyaá yu carta ihya tsa cuenda nyooho tsa iyó ñuu tsa cayucú Ponto, tan Galacia, tan Capadocia, tan Asia tan Bitinia tsa ñavin ñuu ndo cuví. ² Tyin nda tsanaha tan nacatsj̄ vaha maa Nyoo Jutu yo tsi nyooho tyin cuví ndo nyivi ra. Tan tsa cuenda tsa nacatsj̄ ra tsi ndo, jatyinyee Tatyí Ii ra tsi ndo tan nacuhvā ndo tsi ndo tsi ra, tan tyaá yahvi ndo tsi ra Jesucristo vityin, tan ndundí̄ ndo tshin niñi ra. Naquihin ndo cuaha ca tsa vaha tan tsa taxin tsa tsahá Nyoo tsi yo coo añima ndo.

Cuita iñi ndo tyin cua ñihi yo ñayivi tsa coo yo

³ Jacahnu ndo tsi Nyoo Jutu ra Jesucristo Jutu Mañi yo tyin ndaahvi xaan cuñi ra nyehé ra tsi yo. Tan tsahá ra tsa nacacu tsa yo inga tsaha tyin janandot̄o ra tsi ra Jesucristo. Yacan cuenda cuita iñi yo tyin cua ñihi yo ñayivi tsa tsa ña cua naa maa. ⁴ Tan tsa cuenda tsa nacacu tsa yo, Nyoo cua cuhva ra tandihí tsa cumí vaha ra nda gloria tsi yo. Tan ña cua naa maa tsi, tan ndi ña cua tiví tsi, tan ndi ña cua ndahva tsi tumaa ndaahvá ita. ⁵ Tan tsa cuenda tsa tsinú iñi yo tsi Nyoo, jahá cuenda ra tsi yo tshin tunyee iñi ra nda cuanda ndihí cacu yo. Tan cua janaha ra tsi yo náa cuñi tsi catyi tsa cacú yo nu cua ndihí tyembu tyin tsa ndatú vaha can tsi yo.

⁶ Yacan cuenda s̄ī cuñi ndo, vasu ndi maa nyehé ndo tandihí nuu tundoho juhva quiví vityin. ⁷ Tyin tandihí maa tundoho can tan taahán tsi nyehe yo can tyin tacan tan coto vaha yo tun nditsa tyin tsinú iñi yo tsi Nyoo. [Tyin tsa tsinú iñi yo cuví tsi tumaa xuhun cuaan.] Tan tumaa tsahmí yo xuhun cuaan tun cuñi yo coto yo tun juvin xuhun cuaan vaha cuví can, tacan cuví can. Tyin tsa tsinú iñi yo cahnu xaan ca cuví can tan ñavin ca xuhun cuaan tyin xuhun cuaan tsindihí ñi maa can. Maa tyin tun ña jandihí yo tsa tsinú iñi yo tsi Nyoo, cua quituvi yo nuu ra tan cua jacahnu nyivi tsi maa ra tan tsi maa yo quiví quitsi Jutu Mañi yo Jesucristo inga tsaha.

⁸ Nyooho cuñi ndo tsi ra Jesucristo vasu ña nyehé ndo tsi ra. Tan tsinú iñi ndo tsi ra vasu ña nyehé ndo tsi ra vityin. Tan s̄ī xaan s̄ī xaan cuñi ndo nda cuanda ña cuví ñihi ndo cuhva catyí ndo najava cuhva tsa s̄ī cuñi ndo, ⁹ tyin nu ndihí cua cacu ndo tan yacan cuví tsa cua ñihi ndo jahá tsa tsinú iñi ndo tsi Nyoo.

¹⁰ Ra ndusu yuhu Nyoo tsa tsicoq̄ taḡan tsanaha nduc̄u tuhun ra naha nácaa cua cacu yo. Tan nduc̄u ra naha cuhva coto ra naha náa cuví tsi. Tyaá ra naha nu tutu cuenda tsa vaha tsa cua cuhva Nyoo tsi yo. ¹¹ Tan Tatyí Ii ra Cristo tsa iyó tshin ra naha jacot̄o tsi tsi ra naha náa ndihí tundoho cua nyehe ra Cristo, tan nácaa cua jacahnu Nyoo tsi ra. Tan nduc̄u xaan ra naha cuhva coto ra naha yóo ra cua cuví ra Cristo tsa cua taḡan tacan, tan ama cua cuví tuhun tsa catyí Tatyí Ii tshin ra naha. ¹² Maa tyin jacot̄o Nyoo tsi ra naha tyin tyiñu tsa javahá ra naha, ñavin tsa vaha tsi maa ra naha cuví can, tyin tsa vaha tsi maa yo cuví can. Tan tandihí tsa caḡan ra naha juvin tsi cuví tuhun tsa jacacú ra Jesucristo tsi yo tsa tsa yaha tsiñī ndo. Tan ra tsa caḡan

tuhun ihya naha ra, maa Tatyí li Nyoo jacahan tsi ra naha. Tan ra ángel naha ra cuñí xaan ra naha coto ra naha tuhun ihya.

Nyoo caná ra tsi yo tyin coo yo ñayivi cuiți

¹³ Yacan cuenda jaha vaha ndo cuenda tsi ndo tsihin tsa javaha ndo. Cuiți coo ndo. Cuița iñi ndo tyin quivi quitsi ra Jesucristo inga tsaha cuaha tsa vaha cua cuhva Nyoo tsi yo tsa cuenda tsa vaha iñi ra. ¹⁴ Coo ndo tumaa iyó tsa nyihi tsa tyaá yahvi tsi jutu. Ña coo ndo tumaa tsicoo ndo quivi tsa ndi cumañi ca nacoto ndo tsi Nyoo tyin tsanaha tsindaça ñaha tsa ña vaha tsa cuñí cuiñu ñuhu ndo tsi ndo. ¹⁵ Maa tyin vityin coo ndo ñayivi cuiți tyin maa Nyoo, ra tsa caná tsi ndo, cuiți iyó ra. ¹⁶ Tyin tacan catyí ra nu tutu ra: “Cuiți coo ndo tyin maa yu cuiți iyó yu”, catyí Nyoo.

¹⁷ Tatum tuhvá ndo tsicán tahvi tsi Nyoo tan catyí ndo tsihin ra “Jutu Mañi yu”, jaha cuenda ndo tsi ndo tan jaha ndo tsa ñayivi tsi ra tsitsi tsa iyó ndo nu ñuhu ñayivi ihya. Tyin Nyoo jahá ra cuenda cuhva iyó tsa intuhun intuhun yo, an cuvi yo nyivi cuca, an nyivi ndaahvi. ¹⁸ Nyoo nasama ra cuhva tsa ña vaha tsicoo ndo, cuhva tsa janaha tsi tsaahnu ndo tsi ndo. Tan tsitó vaha ndo tyin ñavin tsihin xuhun cuaan o xuhun cuitsin tsa tsindihí ñi maa tyahvi ra tan cacú yo, ¹⁹ tyin tyahvi ra tsihin niñi ra Cristo, tan yacan cuví tsa yahvi xaan ca. Ra Cristo cuví ra tumaa iin mbee ticatyí luhlu tsa ña pehe [tsa tuhvá nyivi Israel jamañi nuu Nyoo], tan tsihi ra vasu ndi maa nduve cuatyí ra. ²⁰ Tsa ndi cumañi ca tsinu ñuhu ñayivi tsinyaá cuhva tyin tyehen cua tahan ra Cristo. Maa tyin ña cuví tsi tsa numi ñi. Nda cuenda vityin nu cua ndihí quivi, cuví tandihí can tsa cuenda tsa vaha tsi maa yo. ²¹ Tsa cuenda ra Cristo tan tsinú iñi ndo tsi Nyoo tyin juvin ra janandoto tsi ra Cristo tsa yaha tsihi ra tan jacahnú ra tsi ra. Tan yacan cuenda tsinú iñi ndo tsi Nyoo tan nyitá iñi ndo tyin cua naquihin ra tsi ndo.

²² Tsihin tunyee iñi Tatyí Iin Nyoo tyaá yahvi ndo tuhun nditsa. Tan tsa ndundú ndo jahá Nyoo tsa cuenda tsa tyaá yahvi ndo tuhun nditsa can. Tyin tacan tan cuví cuiñi tahan ndo tsi ndo tsihin tsa nditsa. Yacan cuñi tahan ndo tsi ndo tsihin tsa niñi iñi ndo, tan tsihin tandihí tunyee iñi tsa iyó tsi ndo. ²³ Tyin tsa nacacú tsa ndo, maa tyin ñavin tumaa cacú nyivi nu ñuhu ñayivi ihya, tyin jutu ndo cacú ra naha jahá sihi ra naha tan tsihi ra naha. Tan nyooho vityin nacacú tsa ndo tsihin Nyoo tsa ña cua cundihí maa, tyin tacan ñi cua coo maa tsi. ²⁴ Tyin catyí tuhun Nyoo tyehen:

Tandihí nyivi tsa iyó nu ñuhu ñayivi ihya cuví ñi tumaa cuhu.

Tan tsa cahnu tsa javahá ñi cuví tsi tumaa ita.

Tyin cuhu can na ityí can, tan cucoyó ita can. [Tacan cuví nyivi, tyin iin yaha ñi tsihi ñi.]

²⁵ Maa tyin tuhun Jutu Mañi yo tacan ñi iyó maa tsi.

Tan tuhun ihya cuví tuhun vaha tsa jacacú Nyoo tsi yo tsa caahán ndi tsihin ndo.

2

¹ Yacan cuenda naçoo ndo tandihí nuu tsa caquiñi. Ña jandavi ñaha ndo tsi nyivi, ña jaha ndo tyin vaha ndo tan ña nditsa, ña nyiyo iñi ndo nyehe ndo tsa iyó tsi inga nyivi, ña çahan ca ndo cuendu. ² Javaha ndo tumaa javahá lee, tyin lee tsa ndi cacú nanducú tsi tsa caxin tsi, tacan taahán tucu tsi nanducu nyooho tuhun Nyoo tyin juvin tsi cua jacuahnu tsi ndo tan nacoto vaha ca

ndo tsi Nyoo nda cuanda ndihi cacu ndo, ³ tun nditsa tyin tsitó ndo tyin Jutu Mañi yo, vaha xaan ra cuví ra.

Ra Cristo cuví yuu nyito

⁴ Cunyaa naa ndo tsi Jutu Mañi yo. Tyin juvin ra cuví yuu nyito tsa ña cuñí nyívi cuatyíñu ñi. Maa tyin Nyoo nacatsj ra tsi Jutu Mañi yo tyin juvin ra cuví yuu sii caá tsa yahvi nyaá tsa cuenda ra. ⁵ Tatun nyaa naa vaha yo tsi ra Cristo, cua cuví yo tumaa iin vehe tyin maa Nyoo cuví ra tumaa ra javahá vehe. Cuhva ndo tsa jandu iin Nyoo tsi ndo tsihin ra Cristo tyin tun tsa nyaa naa vaha ndo tsi ra, cua cuví ndo tumaa ra jutu tsa javahá maa ñi tyiñu Nyoo. Cua jacahnu ndo tsi ra tan sii xaan cua cuñi ra. ⁶ Tyin catyí tucu nu tutu ra tyehen:

Yuhu nacatsj yu iin yuu tsa tsiñí ñuhu ca tan sii ca caá, tan tsaquín yu yuu can nu cua javaha yu vehe yu nda Sión.

Tan nyívi tsa tsinú iñi tsi ra tsa cuví yuu can, ña cua tahan ñi ticanuu. Tacan catyí Nyoo tuhun ra Cristo nu tutu ra.

⁷ Maa tyin tsa cuenda yoo tsa tsinú iñi tsi ra Cristo, ra cuví yuu can, tsiñí ñuhu xaan ra tsi yo. Tan tsa cuenda nyívi tsa ña tsinú iñi tsi ra, cuví ra tumaa iin yuu tsa caahán Nyoo tuhun nu tutu ra tan catyí tsi tyehen:

Yuu tsa ña cuñí ra javahá vehe cuatyíñu ra, yacan cuví yuu tsa tsiñí ñuhu ca, catyí tsi.

⁸ Tan catyí tucu tsi:

Ra ican cuví yuu tsa cuaha xaan nyívi cua nañi tsaha tan nduva ñi.

Cuví ra iin cava tsa janduvá tsi ñi, catyí tsi nu tutu Nyoo.

Nduva nyívi can tyin tsiñí ñi tuhun Nyoo, tan ña tyaá yahvi ñi itsi tyin tacan nyaá tyin cua javaha ñi.

Nyívi yihí cuenda Nyoo

⁹ Maa tyin nyooho cuví ndo nyívi nacatsj maa Nyoo. Tan cuví ndo tumaa jutu tyin javahá ndo tyiñu nuu ra tyin juvin ra ndacá ñaha tsi yo. Tan cuví ndo nyívi ii ityi nuu ra tan cuví ndo nyívi maa ra, tacan tan cahan ndo tuhun vaha tsa javahá ra. Tyin juvin ra tava tsi yo nu naa tan tyihí ra tsi yo nu nditsin tan nu sii caá. ¹⁰ Tsa ndi cumañi ca cuví ndo nyívi Nyoo, nduve yahvi nyaá ndo. Maa tyin vityin nyívi Nyoo cuví ndo. Quívi can yoñi cundaahví iñi tsi ndo, maa tyin vityin Nyoo cundaahví iñi ra tsi ndo.

Nu catyí ra Pedro tyin coo yo, tan javaha yo tyiñu nuu Nyoo

¹¹ Yañi, cuñí xaan yu tsi ndo, tan caahán ndahvi yu tsihin ndo tumaa tsa ñavin ca ra ñuhu ñayívi cuví ndo, tyin nda gloria cuví ñuu ndo. Yacan cuenda ña javaha ndo cuhva cuñí cuñu ñuhu ndo. Tyin cañi tahan cuñu ñuhu ndo tsihin añima ndo. ¹² Jaha cuenda ndo tsi ndo nu iyó ndo tyañu nyívi tsa ña tsitó tsi Nyoo. Tyin vasu caahán ñi ndavaha ñi siqui ndo, tan catyí ñi tyin ña vaha ndo, maa tyin quívi quitsi nyehe Nyoo tyiñu javahá yo cua nyehe ñi tyin vaha tsa javahá ndo tan cua jacahnu ñi tsi Nyoo.

¹³ Tyaa yahvi ndo tsi ra cumí tyiñu nu iyó ndo tsa cuenda tsa cuñí ndo tsi Nyoo. Tyaa yahvi ndo tsi ra cumí tyiñu, a cuví ra rey cahnu ca, ¹⁴ a iin ra jaquitsj ra rey tyin tatsi tuñi ra tsi ra iyó cuatyí naha ra tan naquihin ndaahvi ra tsi yoo tsa javahá tsa vaha. ¹⁵ Tyin Nyoo cuñí ra tsa javaha yo maa ñi maa tsa vaha tyin tacan tan ña ñihi ca nyívi soho tan nyívi ña tsitó náa cahan ñi siqui yo.

¹⁶ Coo ndo tumaa iyó nyívi tsa iyó nuña, maa tyin ñavin tsa tacan coo nuña ndo tan javaha ndo tsa ña vaha. Javaha ndo tyiñu nuu Nyoo tyin cuví ndo musu ra. ¹⁷ Jaha ndo tsa ñayívi tsi tandihi ñi nyívi. Cuñi ndo tsi ñi yihí cuenda Nyoo. Jaha ndo tsa ñayívi tsi ra ndacá ñaha, tyin Nyoo nyehé ra tandihi tsa javahá yo.

Uvi taahan cuhva nyehé yo tundoho

¹⁸ Nyooho tsa cuví musu, cuhva ndo tsa cundaca ñaha tsitoho ndo tsi ndo, tyaa yahvi ndo tsi ra naha, vasu xaan ra naha a vasu vaha iñi ra naha. ¹⁹ Tyin tatun cunyeé iñi yo nyehé yo tundoho tsa janyehé nyívi tsi yo tsa cuenda tsa javahá yo tsa vaha nuu Nyoo, cua tsa can nuu ra. ²⁰ Maa tyin tatun tatsí tuñi nyívi tsi ndo tsa cuenda tsa javahá ndo tsa ña vaha tan cunyeé iñi ndo nyehé ndo tundoho, nduve náa catyi. Maa tyin tatun ña cundihi iñi ndo tan cunyeé iñi ndo nyehé ndo tundoho tsa cuenda tsa javahá ndo tsa vaha, yacan cuví tsa vaha nuu Nyoo. ²¹ Tumaa tsa nyehé maa ra Cristo tundoho tsa cuenda yo, tacan taahán tsi cunyeé iñi yo nyehé yo tundoho tyin tsa cuenda yacan cana Nyoo tsi yo. ²² Ra Cristo ndi intuhun cuatyí ña javaha ra. Tan ndi iin tsaha tan ña jandavi ñaha ra tsi nyívi. ²³ Quiívi jacuñi nyaa ñi tsi ra, ña jacuñi nyaa ra tsi ñi. Quiívi tsa janyehé ñi tundoho tsi ra ña jayuhvi ra tsi ñi. Tyin intuhun ñi maa Nyoo cuví ra tuhvá jacutuñi tsi nyívi tsihin tsa ndaa tan tsihin tsa nditsa. Yacan cuenda natyaa ra tsi ra ndaha Nyoo. ²⁴ Tyin cuhva tsa ticaá ra Cristo nu cruu can, tsicoso tandihi cuíi maa cuatyí yo tsata ra. Tacan cuví tyin tacan tan ña javaha ca yo cuatyí, tan coo yo ñayívi cuíi. Tyin tsihin tsa ñicuehe ra, tan nduvaha yo. ²⁵ Tyin quiívi can tsica nuu yo cuví yo tumaa mbee tsa ndog ihñi, tsa nduve tsitoho. Maa tyin vityin nacuhva cuenda yo tsi yo tsi ra Cristo, tan jahá cuenda ra añaima yo. Cuví ra ityi nuu tsihin yo.

3

Nacaa taahán tsi coo nyívi tindaha

¹ Tacan tucu nyooho, ñiñaha tsa iyó yíi. Tyaa yahvi ndo tsi yíi ndo tyin tatun ña tsinú iñi ra tsi ra Cristo, cua tsinu ndihi iñi ra tsi ra Cristo tsihin cuhva javahá ñi ndo tyin nyehé ra tyin vaha tsahá ndo tsa quihi ndaha ra tsi ndo. Tan ña cuñi tsi cuaha xaan cahan ndo tsihin ra, ² tyin nyehé ra tyin catsi iyó ndo tan jahá ndo tsa ñayívi tsi ra. ³ Ña çaça xaan iñi ndo janduvaha ndo tsi ndo ityi tsata ñi, tyin ña ñiñi xaan cuñi tsi tsa iyo xaan janduvaha ndo jiñi ndo, tan cuatyíñu ndo tsa cuví xuhun cuaan tan cunditsi ndo jahma xiñu xaan. Ña nducu ndo tandihi yacan. ⁴ Maa tyin jandutyacuñi ndo tsi ndo tsihin tsa quitá añaima ndo tyin tun cuíi iyó yo tan vita iñi yo, tan taxin iyó yo, yacan cuví tsa sá ca caá nuu Nyoo. Tan ña cua tiví maa can. ⁵ Tyin tsihin tsehe ndutyacuñi ñiñaha tsa nacoto tsi Nyoo, ñi tsa tsicoo tahan tsanaha. Nyita iñi ñi tsi Nyoo tan tyaa yahvi ñi tsi yíi ñi. ⁶ Tumaa ña Sara, tyaa yahvi ña tsi ra Abraham yíi ña. Tan catyi ña: “Tata”, tsihin ra. Tatun nyooho tan javahá ndo tsa vaha tan ndi luxu maa tan ña nayuhvi ndo, cua cuví ndo tumaa maa ña.

⁷ Tan tacan tucu nyooho, ra iyó ñasihi naha ra, cutuñi iñi ndo cuhva coo ndo tsihin ñasihi ndo. Jaha ndo tsa ñayívi tsi ñi tsa cuenda tsa vita ca cuñu ñuhu ñi tan ñavin ca cuñu ñuhu nyooho tan tsa cuenda tyin iin caa ñi tsahá ra tumañi iñi tsi ndo, tan yacan cuví ñayívi iyó ndo. Javaha ndo tyehen tyin tacan tan tñin cuenda Nyoo tuhun caahán ndo tsihin ra.

Nu tsahá cuenda ra Pedro nácaa taahán tsi coo yo

⁸ Nu ndihí tuhun, iin ñi cuhva çaca iñi tandihí ndo. Cundaahvi tahan iñi ndo tsi ndo. Cuñi tahan ndo tsi ndo tumaa tsa cuñi ndo tsi yañi ndo tsa cacu tsihin ndo. Vita çahan ndo tsihin tahan ndo, tan ña cahnu jaha ndo tsi ndo; cuvi ndo nyivi vaha. ⁹ Ña javaha ndo tsa ña vaha tsihin nyivi tsa javahá tsa ña vaha tsihin ndo. Ña çahan ndo tsi ñi tatun caahán ñi tsi ndo, tyin Nyoo cana ra tsi ndo tyin javaha ndo tsa vaha tsihin ñi tyin tacan tan cua nasoco ra tsi ndo. ¹⁰ Tyin tuhun Nyoo catyi tsi tyeheh:

Nyivi tsa cuñi coo ñayivi tsihin tsa sii,
cuñi tsi jaha ñi cuenda yaa ñi, tan ña çahan ñi tsa ndavaha ñi,
tan ndi ña çahan ñi cuendu.

¹¹ Jandihí ndo tsa javahá ndo tsa ña vaha, tan javaha ndo tsa vaha.
Nducu ndo cuhva coo taxin ndo, tan çoo ndo tacan.

¹² Tyin Jutu Mañi yo jahá cuenda ra tsi nyivi vaha.

Tatun caahán ñi tsihin ra, tyaá soho ra tsa caahán ñi.

Maa tyin nyivi javahá tsa ña vaha, ña cuñi ra nyehé ra tsi ñi.

¹³ Ndi intuhun maa nyivi tan ña cuvi javaha ñi tsa ña vaha tsihin ndo tatun nyooho tan maa ñi tsa vaha nanducú ndo. ¹⁴ Cusi iñi ndo vasu ndi maa nyehé ndo tundoho tsa cuenda tsa javahá ndo tsa vaha. Tan ña nayuhvi ndo tun jayuhvi nyivi tsi ndo. ¹⁵ Jachahu ndo tsi ra Cristo tsitsi añima ndo. Cuhva ndo tsa cundaca ñaha ra tsi ndo. Çaca iñi ndo tuhun Nyoo tyin tatun ndaca tuhun nyivi tsi ndo nacuenda tsinú iñi ndo tsi ra, cuvi cuhva cuenda ndo tsi ñi. Tan javaha ndo can tsihin tsa ña cahnu jahá ndo tsi ndo tan jaha ndo tsa ñayivi tsi ñi. ¹⁶ Catsi çoo ndo tyin tun catsi iyó ndo ña cua nducahan nuu ndo nuu Nyoo. Tan tatun caahán nyivi ndavaha ñi siqui ndo tsa cuenda tyin vaha cuahán ndo tsihin ra Cristo, juvin ñi maa ñi tan cua nducahan nuu ñi tsa cuenda tsa çahan ñi siqui ndo. ¹⁷ Vaha ca nyehé yo tundoho tsa cuenda tsa javahá yo tsa vaha tatun Nyoo cuñi, tan ñavin ca tsa nyehe yo tundoho cuenda tsa ña vaha.

¹⁸ Tyin ra Cristo nyehé ra tundoho tan tsihi ra iin tsaha ñi tsa cuenda cuatyin tandihí yo. Ra vaha cuvi ra maa tyin nyehé ra tundoho tan tsihi ra tsa cuenda yo tsa cuvi yo nyivi caquiñi, tyin tacan tan cuvi tsaa yo nu nyaá Nyoo. Tsihi cuñu ñuhu ra, maa tyin nandoto nyico ra tsihin Tatyí Ii ra. ¹⁹ Tacan tan tsihin Tatyí Ii ra tsahan ra tsicahan ra tsihin añima nyivi tsa yucú anyaya. ²⁰ Tan ñi ícan cuvi ñi tsa ña tyaá yahvi tsi Nyoo quivi tsicoo ra Noé tahan tsanaha, tyin ñi tsinú yutun ndoo tacan tsa ndatu Nyoo tsa ndu uvi iñi ñi cuatyí ñi. Maa tyin ña cuaha ñi cacu quivi cuun savi cahnu tsa tsahñi ndutyá ñuhu tsi ñi. Una taahan ñi ñi cacu tsitsi yutun ndoo tyin nandaá yutun ndoo can nu ndutyá ñuhu. ²¹ Tan tacan tucu maa yo tumaa tsa cacu ñi ícan, tacan cacu yo quivi tsicoondutyá yo. Maa tyin ñavin nyahyu yo nacatyá ndutyá can tsa tsicoondutyá yo. Yacan cuñi tsi catyi tsa tsicán tahvi yo tsi Nyoo na nacatyá ra añima yo tan cacu yo jahá tsa nandoto ra Jesucristo. ²² Tan nandaá ra nda gloria, tan nyaá ra xiin cuaha Nyoo vityin. Ndacá ñaha ra tsi ángel tan tandihí tatyí ña vaha tsa ndacá ñaha tsi nyivi.

4

Jaha tyiñu ndo nuu nyivi yihí tuhun Nyoo tsihin ndo nácaa tsahá maa Nyoo tsi ndo.

¹ Yacan cuenda janyee ndo iñi ndo nyehe ndo tundoho tumaa nyehé ra Cristo tundoho tsihin cuñu ñuhu ra. Tyin nyivi tsa nyehé tundoho tsihin cuñu ñuhu ñi, ña javahá ca ñi tsa caquiñi tsa cuñi cuñu ñuhu ñi. ² Tyin tacan tan tandihí quivi coo ñi cua javaha ñi cuhva cuñi Nyoo, tan ñavin cuhva cuñi cuñu

ñuhu ñi. ³ Vityin tsindihĩ tsa javahá ndo tsa caquiñi tsa taahán iñi nyivi tsa ña tsitó tsi Nyoo. Tsicoo ndo cuhva cuñi ndo, cuaha tsa caquiñi javahá ndo, tan javahá ndo tsa caquiñi tsa cuñi cuñu ñuhu ndo. Javahá ndo vico tan tsiñi ndo. Tan jacahnu ndo tsitoho tsa ña taahán tsi jacahnu ndo. ⁴ Tan vityin tsa ña cutahán ca ndo tsihin ñi tan ña javahá ca ndo tsa caquiñi tsa javahá ñi, iyo cuñi ñi. Tan caahán ñi ndavaha ñi siqui ndo. ⁵ Maa tyin tandihĩ tsa caahán ñi tan tsa javahá ñi cua nacuhva cuenda ñi can tsi ra cua jacutuñi tsi nyivi nyitó tan nyivi tsihi. ⁶ Yacan cuenda jacoto ra Cristo tuhun vaha tsi ndiyi. Tyin tacan tan cuvi coo aña ñi tumaa iyó Nyoo, vasu ndi maa tsihi ñi nu ñuhu ñayivi ihya tumaa tsihi tandihĩ ca nyivi.

⁷ Tsa yatyin cui cundihĩ tandihĩ maa tsa iyó nu ñuhu ñayivi ihya. Yacan cuenda catsi coo ndo tan ña jandihĩ ndo tsa ndacan tahvi ndo tsi Nyoo. ⁸ Tsa jihna ñi taahán tsi tsa cuñi tahan ndo tsi ndo, tyin tatun cuñi tahan yo tsi yo, cuaha tsaha cua jaha yo tucahnu iñi tsi ñi. ⁹ Tatun tsaá iin nyivi vehe ndo, vaha tyannu ndo tsi ñi tan ña caca iñi ndo tyin jatyañu ñi tsi ndo. ¹⁰ Tan cuñi tsi tsa jaha tyiñu intuhun intuhun ndo nuu nyivi tahan ndo nácaa tsahá maa Nyoo tsi ndo. Tyin siin siin tsa tsahá Nyoo tsi tsa intuhun intuhun yo. Tan taahán tsi cuatyñu yo can tsihin tahan yo. ¹¹ Tatun tsahá Nyoo tuhun cahan un tsihin nyivi, cahan, maa tyin maa ñi tuhun tsa tsahá ra tsi un. Tatun tsahá ra tyin javaha un tyiñu nuu nyivi, javaha tsihin tunyee iñi tsa tsahá maa ra. Tandihĩ tsa catyí Nyoo tyin javaha ndo, javaha ndo can, tyin tacan tan jacahnu nyivi tsi Nyoo tsa cuenda ra Jesucristo. Tyin intuhun ñi maa Nyoo taahán tsi jacahnu yo. Tan na cundaca ñaha ra tsihin tunyee iñi ra tacan ñi maa. Tan na cuvi tsi tacan.

Sii cuñi ndo tun nyehé ndo tundoho tsa cuenda ra Cristo

¹² Yañi tsa cuñi xaan yu, ña iyo xaan cuñi ndo tatun vatsi tundoho ñihi siqui ndo. Ña cuñi ndo tyin ña taahán tsi nyehe ndo tundoho. ¹³ Cu sii iñi ndo tyin cuvi nyehe ndo tundoho tumaa nyehe ra Cristo tundoho. Tyin tacan tan quivi quitsi nyico ra Cristo inga tsaha, sii cua cuñi ndo nyehe ndo tsa cahnu cuvi ra. ¹⁴ Tatun caahán nyivi ndavaha ñi siqui ndo tyin nyicún ndo tsi ra Cristo, sii cuñi ndo, tyin nyaá Tatyí Ii Nyoo tsihin ndo. Maa ñi caahán ñi ndavaha ñi siqui ra Cristo, maa tyin nyooho jacahnu ndo tsi ra. ¹⁵ Tatun nyehé ndo tundoho tsa cuenda yacan, vaha, tan ñavin ca tsa nyehé ndo tundoho tsa cuenda tsa tsahñi ndo, o tsa suhu ndo, o javahá ndo tsa ña vaha, o tsa tyihĩ ndo tsi ndo nu ña taahán tsi. ¹⁶ Maa tyin tun nyehé ndo tundoho tsa cuenda tsa yihĩ ndo cuenda ra Cristo, ña nducahan nuu ndo. Jacahnu ndo tsi Nyoo, tyin tsahá tsi cuhva tsa nyehe ndo luxu tundoho tsa cuenda ra.

¹⁷ Tyin tsa tsaá quivi tsa quitsahá jacutuñi Nyoo tsi tandihĩ nyivi. Tan jihna ca yoo tsa yihĩ cuenda ra cua cutuñi. Tatun tyehen tatsi tuñi Nyoo luxu ñi tsi yoo, ¿nácaa cua tatsi tuñi ra tsi nyivi tsa ña tyaá yahvi tuhun caahán ra? ¹⁸ Tatun yhi cacú aña nyivi vaha, ¿nácaa cua cacú aña ñi quiñi iyó, ñi ña vaha? ¹⁹ Yacan cuenda tatun nyehé ndo tundoho cuhva cuñi Nyoo, cuñi tsi tsa jañihi ca ndo javaha ndo tsa vaha. Tan tyaa cuenda ndo aña ndo ndaha ra tyin maa ra javahá tsi yo, tan cua javaha ra tumaa caahán ra.

5

Nu tsahá cuenda ra Pedro tsi yo nácaa coo yo

¹ Yacan cuenda tsahá cuenda yu tsi ra tsahnu yucú vehe ñuhu tsihin ndo, tyin ra tsahnu cuví tucu maa yu. Tan cuví yu tsandaa tyin nyehe yu tandihí tundoho tsa tahañ ra Cristo. Tan cua cutahan yu tsihin tandihí ca ra naha quiví quitsi ra Cristo inga tsaha tsihin tsa cahnú cuví ra. ² Jaha cuenda ndo tsi nyívi yihí tuhun Nyoo tsa yihí ndaha ndo, tumaa jahá cuenda vaha iin ra mbee jana ra. Javaha ndo can tsihin tsa níi ñiñi añima ndo tan ñavin tsihin tsa ñiñi, maa tyin cuhva cuñí Nyoo. Ña javaha ndo can tsa cuenda tsa cuñí ndo xuhun. Tandihí tyiñu javahá ndo, javaha ndo can tsihin tsa cacu ñiñi ndo. ³ Tyin tun vaha iyó ndo nyehé ñi, tacan cua coo ndihí ñi tyin nyehe ñi tyin ña ndacá ñaha ñihí ndo tsi ñi. ⁴ Tacan tan quiví cua quitsi ra cuví ityi nuu tsihin nyooho tsa jahá cuenda mbee jana Nyoo, cua cuhva ra tsa sñi caá tsa ña cua tiví maa tsi ndo.

⁵ Tacan tucu nyooho, ra cuatyí tan ñi cuatyí, tyaa yahvi ndo tsi ra tsahnu naha ra. Tan tandihí ndo ndaahvi jaha ndo tsi ndo tan tyaa yahvi tahan ndo tsi ndo. Tyin catyí nu tutu Nyoo tyehen: Nyoo ña cuñí ra nyehe ra tsi nyívi tsa yaa xaan, Maa tyin jatyinyeé ra tsi ñi tsa ña yaa.

⁶ Yacan cuenda ndaahvi jaha ndo tsi ndo nuu Nyoo. Cuhva ndo tsi ndo cundaca ñaha ra tsihin tunyee ñiñi tsa iyó tsi ra, tyin tacan tan cuví jacahnu ra tsi ndo quiví cua tahan tsi. ⁷ Tyaa cuenda ndo tandihí tsa tsicá xaan ñiñi ndo ndaha Nyoo tyin maa ra jahá cuenda tsi ndo.

⁸ Catsi cùhun ñiñi ndo tan jaha vaha ndo cuenda ndaa tsa vaha tan ndaa tsa ña vaha, tyin nu ña vaha, nu xaan ñiñi tsi yo, tsicá nuu nu nanducú nu yóo jaha canaa nu tumaa tsicá nuu ndicaha xaan nanducú ti tsa catsi ti. ⁹ Ñihí cunyecyecu ndo tsihin tsa tsinú ñiñi ndo tsi Nyoo tyin tacan tan cuví jaha ndo tsi nu ña vaha. Tyin juvin ñi tundoho tsa nyehé nyooho tan nyehé tucu tandihí ca nyívi yihí cuenda ra Cristo taniñi cahnú nu ñuhu ñayivi. ¹⁰ Maa tyin Nyoo jatyinyeé ra tsi yo, tan tsa yaha nyehe ndo tundoho juhva quiví, Nyoo cua jacutsa ca ra tsi ndo, ñihí cunyecyecu ndo tsihin tsa tsinú ñiñi ndo, tan cua cuhva ca ra tunyee ñiñi tsa iyó tsi ra tsi ndo. Tan juvin Nyoo cuví ra tsahá tandihí tsa vaha tsi yo, tan maa ra cana tsi yo tyin ndu iin yo tsihin ra Cristo tyin coo yo nu sñi caá tsihin ra tacan ñi maa. ¹¹ Na jacahnu yo tsi ra tan na cundaca ñaha maa ra tacan ñi maa. Tan na cuví tsi tacan.

Nu tsahá ra Pedro nacumi tsi nyívi nu ndihí ña

¹² Jaquitsí yu carta ihya tsi ndo tsihin ra Silvano, yañi yo. Tyin tsitó yu tyin níi xaan ñiñi ra nyicún ra tsi ra Cristo. Tan tsahá cuenda yu juhva tsi ndo nu carta ihya tyin tsa vaha tsa ñihí ndo janahá tsi tyin nditsa tsa cuñí xaan Nyoo tsi yo. Yacan cuenda ña ñacoo ndo itsi.

¹³ Nyívi yihí cuenda Nyoo ñuu Babilonia tsa nacatsí Nyoo tumaa nacatsí ra tsi nyooho, jaquitsí ñi nacumi tsi ndo. Tan ra Marcos, sehe yu tsa cuenda Jutu Mañi yo, jaquitsí ndihí ra nacumi tsi ndo.

¹⁴ Cuñi tahan ndo tsi ndo tan cuhva tahan ndo nacumi tsi ndo.

Na coo ca tsa taxin añima tandihí nyooho tsa iin ñi cuví tsihin ra Jesucristo. Tan na cuví tsi tacan ñi.

Carta Tsinu Uvi Tsa Jacuhun Ra Pedro Tsi Nyivi Yihí Cuenda Nyoo

Nu tyaá ra Pedro inga carta tsa cuenda nyivi yihí cuenda Nyoo

¹ Yuhu ra Simón Pedro cuví yu musu ra Jesucristo, tan cuví yu iin ra tava tyiñu ra tyin caca yu tyiñu ra. Tyaá yu carta ihya tsa cuenda nyooho tsa natsinū vaha iñi tsi Nyoo tumaa tsa tsinú iñi nyuhu. Inducu ñi tsinú iñi yo tsi Nyoo jahá ra Jesucristo tsa cuenda tsa vaha ra. Juvín ra cuví Nyoo, tan juvín ra cuví ra jacacú tsi yo. ² Naquihin ca ndo tsa vaha tsa tsahá Nyoo tsi yo coo tsitsi añima ndo tan na coo taxin ca tsi. Yacan ñihí ndo tsa cuenda tsa nacotó ndo tsi ra tan tsi Jutu Mañi yo Jesús.

Nacaa taahán tsi coo nyivi yihí cuenda Nyoo

³ Nyoo, tsihin tunyee iñi tsa iyó tsi ra, tsaha ra tandihí tsa tsiñi ñuhu tsi yo tyin tacan tan coo yo ñayivi tsa iyó ra tan cuví yo tumaa maa ra. Tandihí tsehe ñihí yo tsa cuenda tsa tsaha ra tsa nacotó yo tsi ra tsa caná tsi yo. Tyin caná ra can tsi yo tsihin tsa cahnu cuví ra tan tsihin tsa iyo tsa javahá ra. ⁴ Tan tsihin tandihí tsa vaha can, tsaha tucu ra tsa catyi ra tyin cuhva ra tsi yo. Maa tyin cahnu xaan tan yahvi xaan can. Maa tyin tsaha ra can tsi yo tyin tacan tan cuví coo yo tumaa maa ra tyin tsa nacoq yo tandihí tsa caquiñi tsa javaha yo, tan ña cua tiví yo tumaa tiví nyivi nyicún tsa ña vaha tsa iyó nu ñuhu ñayivi ihya. ⁵ Yacan cuenda cuñi tsi tsinú ca iñi yo tsi Nyoo tan ñavin yacan ñi tyin cuñi tucu tsi nducu yo cuhva coo cuñi yo. Tan cuñi tucu tsi nducu yo cuhva cutuñi vaha iñi yo cuhva cuñi Nyoo tsihin yo. ⁶ Yaha can tan nducu yo cuhva cundaca ñaha yo cuñu ñuhu yo tan cuhva tsicá iñi yo. Yaha can tan nducu yo cuhva tsa ña yatyi xaan cundihí iñi yo. Yaha can tan nducu yo cuhva coo yo ñayivi iyó Nyoo. ⁷ Yaha can tan nducu yo cuhva tsa cuñi tahan yo tsi yo. Yaha can tan nducu tucu yo cuhva cuñi yo tsi nyivi tumaa tsa cuñi maa Nyoo tsi tandihí yo.

⁸ Tatun tacan iyó ndo tan tacan nducú ndo cuhva tsa coo tandihí tsehe tsi ndo, cua cutyiñu xaan Nyoo tsi ndo. Tan ña cuatu nacotó ndo tsi Jutu Mañi yo Jesucristo tyin javahá ndo tandihí yacan. ⁹ Maa tyin nyivi tsa nduve yacan iyó tsi, cuví ñi tumaa iin ra cuaa. Ña cutuñi iñi ñi tsa taahán tsi coto ñi. Tan tsa naq iñi ñi tyin ndatsi Nyoo cuatyí ñi tahan tsanaha. ¹⁰ Nyoo caná tsi ndo tan nacatsi ra tsi ndo. Yacan cuenda yañi, tun javahá ndo tandihí tsa caahán yu tuhun ihya, ña cua nduva ihñi ndo. ¹¹ Tacan tan ña yihí cua quihvi ndo nu ndacá ñaha ra Jesucristo, ra cuví Jutu Mañi yo tan ra jacacú tsi yo. Tan cua coo cuñi ndo tsihin ra.

¹² Yacan cuenda ña jandihí yu tsa janducuhún iñi yu tuhun ihya tsi ndo, vasu tsa tsitó maa ndo itsi, tan vasu ñi cuñi ndo javahá ndo tuhun nditsa tsa cutuhvá ndo. ¹³ Tan cuñi yu tyin vaha tsa janducuhún iñi yu tuhun ihya tsi ndo tsitsi tsa ndi iyó ca yu. ¹⁴ Tyin tsa jacotó Jutu Mañi yo Jesucristo tsi yu tyin ña naha ca tan cua nacoq yu ñuhu ñayivi ihya. ¹⁵ Tan cua jañiñi yu tsi yu tsa janducuhún iñi yu tuhun ihya tsi ndo tyin tacan tan quivi cúu yu ña naa iñi ndo itsi.

Nu nacatyí tuhun ra Pedro nácaa nyehe ra naha tsa cahnu cuví ra Cristo

¹⁶ Ñavin tsa nandacuj iñi ñi maa ndi tan cahān ndi tsihin ndo quivī jacotoj ndi tuhun Jutu Mañi yo Jesucristo tsi ndo. Tsa nditsa cuvī tsi tyin tsihin tinuu ndi nyehej ndi tsa cahnu cuvī ra. Tan jacotoj ndi tsi ndo tyin iyó xaan tunyee iñi tsi ra tan cua quitsi ra inga tsaha. ¹⁷ Tyin nyehej ndi nu jacahnū Nyoo Jutu yo tsi ra tan nyehej ndi nu janduxiñū ra cuhva caá ra. Tan sīi xaan cuvī nu cahān Nyoo tan catyī ra: “Ra ihya cuvī Sehe yu, tan cuñī xaan yu tsi ra. Tan sīi xaan cuñī yu tsihin ra”, catyī Nyoo tuhun ra Jesús quivī can. ¹⁸ Juvīn nyuhu tsiñī ndusu Nyoo tsa quitsī ityī andivī quivī tsiyucuj ndi yucu ii tsihin Jutu Mañi yo.

¹⁹ Tuhun ihya janahá tyin nditsa tsa tyaaj ra cuvī ndusu yuhu Nyoo nu tutu tahān tsanaha. Tatun tyaa yahvi vaha ndo tuhun can, vaha javahá ndo. Tyin tuhun can cuvī tsi tumaa iin ñuhū tsa jandunditsīn tsa naa ca. Maa tyin ra Jesucristo cuvī ra tumaa tiñuu cahnu tsa caná tsa cua tuvi tyin jandunditsīn ra tsitsi añima yo. ²⁰ Maa tyin cuñī tsi cotoj ndo tyin ña cuvī nacatyī tuhun tsa intuhun ñi maa yo tsa cuñī tsi catyī tsa tyaaj ra ndusu yuhu Nyoo. ²¹ Tyin ra cuvī ndusu yuhu Nyoo tahān tsanaha ña cahān ra naha cuhva cuñī maa ra naha. Maa tyin cahān ra naha cuhva cuñī Nyoo tyin maa Tatyī Ii Nyoo jaquihīn ityī tsi ra naha.

2

Ra jacuahá tsa ña nditsa (Judas 4-13)

¹ Maa tyin tsiicoj tucu ra cahān cuendu naha ra nu tsiicoj nyivī Israel tahān tsanaha. Catyī ra naha tyin cuvī ra naha ndusu yuhu Nyoo tan ña nditsa. Tan tacan cua coo tucu ra vatya naha ra nu yucúj ndo. Xeehe xaan cua jacuahā ra naha tsa ña nditsa tsa cuvī jativī tsi ndo. Tan cua catyī ra naha tyin ña nditsa tuhun Jutu Mañi yo tan juvīn ra jatā tsi ra naha. Yacan cuenda numi ñi cua cunaa ra can naha ra. ² Tan cuaha xaan nyivī cua cunyicun tsi ra naha tsihin tsa caquiñi tsa javahā ra naha. Tan cuaha xaan ñi cua cahān ndavaha ñi siqui tuhun tsa nditsa vaha ra Cristo. ³ Tan tsa cuenda tsa cuñī ra naha xuhun, cua nducu ra naha cuhva jandavi ñaha ra naha tsi ndo tsihin tsa jacuahā ra naha maa ñi tsa ña nditsa. Maa tyin ndatú Jutu Mañi yo tatsi tuñi ra tsi ra naha tyin tsanaha iyó maa tuhun tsa cua cunaa ra naha.

⁴ Tyin ndi ña jahā Nyoo tucahnu iñi tsi ángel tsa tsiicoj cuatyī tahān tsanaha. Jacuhūn ra tsi nahnu anyaya. Tsaññi ra tsi nahnu tsihin cadena, tan nacooj ra tsi nahnu nu naa nda cuanda tahan tsi jacutuñi ra tsi nahnu. ⁵ Tan ndi ña jahā ra tucahnu iñi tsi nyivī ña vaha tsa tsiicoj tsanaha. Jacuñn ra savi xaan tsaññi tsi ñi. Maa tyin jacacuj ra tsi intuhun ñi ra Noé tsihin utsa taahan nyivī ra. Ra ican cahān ra tsihin nyivī na nducu ñi cuhva coo vaha ñi tsihin Nyoo. ⁶ Tacan javahā tucu ra tsihin ñuu Sodoma tan ñuu Gomorra, janaaj ra itsi. Tsañmī ra ñuu can tan nanduvj tsi nyaa, tyin coto nyivī caquiñi tsa iyó vityin tan nyivī tsa cua coo náa cua tahan ñi. ⁷ Maa tyin jacacuj ra tsi ra Lot tyin vaha iyó ra nuu ra. Cuiihya cuñī ra Lot nyehé ra cuhva iyó nyivī caquiñi can. ⁸ Tandihī quivī tsa tsiicoj ra Lot ñuu can, cuiihya cuñī añima ra tsa cuenda tsa tsiñī ra tan nyehé ra tsa caquiñi javahá ñi can. Tyin maa ra, ra vaha cuvī ra, tan ñi ican maa ñi tsa ña vaha javahá ñi. ⁹ Tacan jacacu Nyoo tsi yo tatun vaha iyó yo nuu ra. Maa tyin naquihīn vaha ra tsi nyivī caquiñi nda cuanda tahan tsi quivī cutuñi ñi.

¹⁰ Yaha ca cua tatsi tuñi Nyoo tsi nyivī tsa javahá tsa ña vaha tsa cuñī cuñū ñuhu ñi, ñi tsa ña cuñī cundaca ñaha Jutu Mañi yo tsi ñi. Tan ra vatya tsa yaa

xaan naha ra, javahá ra naha cuhva cuñí maa ra naha. Tan ña yuuhví ra naha caahán ra naha ndavaha ñi siqui ra iyó ca tunyee iñi tsi tumaa Nyoo a ángel, a tatyí ña vaha. ¹¹ Tan ángel, vasu ndi maa iyó ca tunyee iñi tsi ra naha tan ñavin ca nyívi, maa tyin ña caná iñi ra naha cahan ra naha ndavaha ñi siqui ra can naha ra nuu Jutu Mañi yo.

¹² Maa tyin ra vatya can naha ra cuví ra naha tumaa quití tsa ña cutuñí iñi tan javahá ti naha ti tsa cuñí maa ti naha ti. Tyin quití, ¿náa cuenda iyó ti? Iyó ti tyin tñin yo tsi ti, tan cahñi yo tsi ti. Tacan ra can naha ra: Caahán ra naha ndavaha ñi siqui tsa ña cutuñí iñi ra naha, tan cua cúu ra naha tumaa tsihi quití can naha ti. ¹³ Cua nyehe ra naha tundoho tsa cuenda tsa janyehé ra naha tundoho tsi inga nyívi. Si; xaan cuñí ra naha tsihin tsa caquiñi javahá ra naha nu tovi. Tshá ra naha ticanuu nu yucú ndo nu iyó vico tatun cutahán ra naha tsihin ndo. Nyaá xaan ra naha tusii iñi. Maa tyin juvin ñi tsi maa ra naha jandaví ñaha ra naha.

¹⁴ Tandihí ñaha tsa nyehé ra naha, cuñí ra naha coo ra naha tsihin ñi. ña quitatú ra naha tsa javahá ra naha tsa caquiñi. Jandaví ñaha ra naha tsi nyívi tsa ña ñihi nyaá tsihin Nyoo. Yatyí xaan nducú ra naha maa ñi maa tsa cuenda maa ra naha. Maa tyin nyaá tsa cua cunaa ra naha. ¹⁵ Nacoq ra can naha ra ityi vaha tan naquiñin ra naha ityi tsa cuahán nu cua cunaa ra naha tyin javahá ra naha tumaa javahá ra Balaam, sehe ra Beor. Tyin ra Balaam cuñí ra jaha canaa ra xuhun tsihin tsa ña vaha tsa javaha ra. ¹⁶ Tacan tan nacahan burru jana ra tsihin ra, tumaa caahán nyívi, tan tsa nacahan ti ña tshá ti cahun ra javaha ra tsa ña vaha tsicá iñi ra.

¹⁷ Tan tacan tucu maa ra can naha ra. Cuví ra naha tumaa iin soco ityi nu nduve ndutya yihí. Tan cuví tucu ra naha tumaa vico tsa tindahá tatyí ñihi. Maa tyin tsa nyaá tsa cua cahun ra naha nu naa xaan tan ican cuví nu cua ndoo cuii ra naha. ¹⁸ Yaa xaan caahán ra naha. Maa tyin tandihí tsa caahán ra naha nduve yahvi nyaá can. Tan tsihin tandihí tsa ña vaha tsa javahá ra tan tsihin tsa ña vaha tsa cuñí cuñu ñuhu ra naha jandaví ñaha ra naha tsi nyívi tsa tsa yahá quitá mahñu nyívi tsa javahá tsa caquiñi. ¹⁹ Catyí ra naha tsihin ñi tyin cua coo nuña ñi. Maa tyin juvin ñi maa ra naha tshá tsa cundaca ñaha tsa caquiñi tsi ra naha. Tyin tatun tshá yo tsa cundaca ñaha tsa cundaca ñaha tsi yo, musu can cuví yo. ²⁰ Tyin nyívi tsa nacoto tsi Jutu Mañi yo Jesucristo, ra jacacú tsi yo, tsa yahá nacoq ñi tsa caquiñi tsa iyó nu ñuhu ñayívi ihya maa tyin tatun javaha nyico ñi tsa caquiñi, cahnu ca cuatyí ñi cua coo nu Nyoo. ²¹ Vaha ca tun tsatyin ña nacoto ñi ityi vaha, tan ñavin ca tsa nacoq ihñi ñi tsa tshá Nyoo tsi ñi tsa tsa yahá nacoto ñi tsi ra. ²² Maa tyin cundaq tsa tuhvá nyívi caahán: “Ina tsatsi nyico ti tsa ndutsan ti. Tan quini tucu, tun tsa yaha tsityí ti, quihví nyico ti nu xahan nyahyu.” Tacan cuví ñi can tyin javahá nyico ñi tsa javahá ñi nda jihna.

3

Quívi cua quitsi nyico Jutu Mañi yo

¹ Yañi, cuñí xaan yu tsi ndo. Carta ihya cuví carta tsinu uvi tsa jaquitsí yu tsi ndo. Tan nu nduvi taahan carta ihya tshá cuenda yu tsi ndo na caca vaha iñi ndo tan ña naa iñi ndo tsa cutuhva ndo. ² Nducuhun iñi ndo tsa cahan ra cuví ndusu yuhu Nyoo tahanan tsanaha. Tan nducuhun tucu iñi ndo tsa jacuahá ndi tsi ndo. Tyin cuví ndi ra tavá tyiñu Jutu Mañi yo Jesucristo, ra jacacú tsi yo.

³ Coto jihna ndo tyin nu cua ndihi quivi cua quitsi nyivi cua vacu nducu tuhun Jutu Mañi yo. Tan cua coo ñi cuhva ña vaha cuñi cuñu ñuhu ñi. ⁴ Tan cua catyi ñi: “¿Náa ra Jesucristo tsa catyi tyin cua quitsi ra inga tsaha? ¿Numaa nyii ra? Tyin nda quivi tsa tsihi tsi tsaahnu yo tan nda cuanda tsa tsinu ñuhu ñayivi tan nda vityin caá ñi maa tahan ñi caá”, cua catyi ñi. ⁵ Tyin maa ñi ña cuñi ñi coto ñi tyin nda tyembu tsahnu cahán Nyoo tan javahá ra andivi tan ñuhu ñayivi. Quita ñuhu ñayivi tsitsi ndutya, tan tsihin ndutya tsinu tsi. ⁶ Tsa yaha javahá Nyoo ñuhu ñayivi juvin ñi maa tsihin ndutya naa ñuhu ñayivi quivi cuun savi xaan. ⁷ Maa tyin andivi tan ñuhu ñayivi tsa iyó vityin ndatú tsi tsa cayu tsi tumaa catyi maa Nyoo. Cua cayu andivi tan ñuhu ñayivi tsihin ñuhu quivi cua cutuñi nyivi tan cua naa nyivi caquiñi.

⁸ Maa tyin nyooho yañi yu tsa cuñi xaan yu, ña naa iñi ndo tyin tsa cuenda Jutu Mañi yo tsa iin quivi cuví tsi tumaa mil cuiya, tan tsa mil cuiya cuví tsi tumaa tsa iin quivi tsa cuenda ra. ⁹ Vasiqui yihí ndo tsicá iñi ndo tyin maa Jutu Mañi yo ña cuñi naha quitsi. ñaha ca quitsi ra tyin ndatú jihna ra nda ndu uví iñi tandihí nyivi tan nasama ñi cuhva iyó ñi tyin ña cuñi ra tsa cunaa ndi intuhun yo.

¹⁰ Maa tyin quivi cua quitsi Jutu Mañi yo, yoñi maa cua coto tyin cua quitsi ra quivi tsa ña ndatú yo tsi ra. Cua quitsi ra tumaa iin ñasuhu. Tan ñihi cunahma tan cua naa andivi. Tan cua janaa ñuhu tandihí tsa iyó ityi siqui. Tan ñuhu ñayivi cua cayu tsi tsihin ñuhu tsihin tandihí tsa iyó nuu tsi.

¹¹ Tacan cua naa tandihí tsa iyó. Yacan cuenda cuñi tsi cuiti coo yo tumaa iyó maa Nyoo. ¹² Cuatu ndo quivi quitsi Nyoo. Nducu ndo cuhva quitsi ñi ra tyin quivi tsa cua quitsi ra cua naa andivi jaha ñuhu. Tan tandihí tsa iyó cua naa tsi tsihin tsa ihñi ñuhu can. ¹³ Maa tyin yoo ndatú yo andivi tsa tan ñuhu ñayivi tsa tsa catyi Nyoo tyin cuhva ra tsi yo. Tan maa ñi maa tsa vaha tsi Nyoo cua coo ican.

¹⁴ Yacan cuenda yañi, tsitsi tsa ndatú yo tsi Jutu Mañi yo, nducu ndo cuhva coo vaha ndo tsihin Nyoo, tyin tacan tan quivi quitsi ra, sií cua cuñi yo tan cua coo taxin añima yo tyin nduve ca cuatyí yo iyó. ¹⁵ Coto ndo tyin Jutu Mañi yo ña cundiñi iñi ra ndatú ra tsi yo tyin cuñi ra tsa cacu cuaha nyivi. Juvín ñi tyehen caahán tucu ra Pablo yañi yo nu carta tsa jaquitsi ra tsi ndo. Tyaá ra itsi tsihin tsa tsiñi tuñi tsa tsaha Nyoo tsi ra. ¹⁶ Tandihí ñi nu carta ra tan caahán ra tuhun ihya. Vasu yihí tsa yíi xaan cutuñi iñi yo. Tan nyivi tsa ña cutuñi iñi, ñi tsa ña ñihi nyaá tsihin Nyoo, siin cuhva cutuñi iñi ñi itsi. Juvín ñi tacan javahá ñi tsihin tuhun Nyoo tsa tyaá inga ca ra naha. Tan tsa tacan javahá ñi, juvin ñi tsi maa ñi jacunaá ñi.

¹⁷ Yacan cuenda yañi, vityin tsa tsitó ndo tuhun ihya tsa ndi cumañi ca cuví tsi, jaha ndo cuenda tsi ndo tan cuñi yu tsa coto ndihi ndo cuhva jandaví ñaha ra caquiñi can naha ra, tyin tacan tan ña nacoo ndo cuhva vaha tsa cuahán ndo. ¹⁸ Maa tyin cuñi tucu tsi nacoto vaha ca ndo tsi Jutu Mañi yo ra Jesucristo, ra jacacú tsi yo. Tan cuahnu ca ndo tsihin tsa vaha ra tsa tsahá ra tsi yo. Na jacahnu yo tsi ra vityin tan tacan ñi maa.

Tan na cuví tsi tacan ñi.

Carta Tsa Jihna Ñi Tsa Tyaá Ra Juan

Cua coo yo ñayivi nyito

¹ Ihya tyaá ndi tuhun ra tsa iyó nda ndi cumañi coo tandihí tsa iyó. Tsiñi ndi tsa caħan ra quivi tsica ndi tsihin ra. Nyehe ndi tsi ra tsihin tinuu ndi tan cutuñi iñi ndi yóo ra cuví ra. Tan tiin ndi tsi ra tsihin ndaha ndi. Maa ra cuví Tuhun Caahán Nyoo tsihin yo. Tan tsaha ra ñayivi nyito iyó yo. ² Tan quivi tsaá ra nyehe ndi ñayivi nyito can tan cuví ndi tsandaa tsa cuenda can. Tan jacotó ndi tsi ndo náa cuví ñayivi tsa ña cua naa tyin iyó tsi tsihin Jutu yo Nyoo, tan tsaá tsi nu iyó yo. ³ Nacatyí tuhun ndi tsihin ndo tsa nyehe ndi tan tsa tsiñi ndi. Tyin tacan tan cuví ndu iin ndo tsihin ndi, tumaa tsa iin ñi cuví maa ndi tsihin Jutu yo Nyoo tan tsihin ra Jesucristo, Sehe ra. Tan nditsa tsa iin ñi cuví ndi tsihin ra. ⁴ Tan tyaá ndi tuhun ihya tsa cuenda ndo tyin tacan tan coto ndo tandihí tsa tsahá Nyoo tsi ndo tan si xaan cua cuví tsi ndo.

Nyoo, ñuhu cuví ra

⁵ Vityin nacatyí tuhun ndi tsihin ndo tsa caħan ra Cristo tsihin ndi. Catyí ra tsihin ndi tyin Nyoo ñuhu cuví ra. Tan nduve tsa naa tsi ra, [nduve tsa ña vaha tsicá iñi ra cuví can]. ⁶ Tun catyí yo tyin iin ñi cuví yo tsihin ra, tan ndi iyó ca maa yo nu naa, jandaví ñaha yo tan ña javahá yo tsa nditsa. ⁷ Maa tyin tatun iyó yo nu nditsin, tumaa tsa iyó maa Nyoo nu nditsin, tacan tan iin ñi cuví yo tsihin nyivi yihí tuhun Nyoo tsihin yo, tan nacatyá ra Jesucristo Sehe Nyoo tandihí cuatyí yo tsihin niñi ra.

⁸ Tatun catyí yo tyin nduve cuatyí yo, juven ñi maa yo jandaví ñaha yo, tan nduve tsa nditsa iyó añima yo. ⁹ Maa tyin tatun naahmá yo cuatyí yo nuu Nyoo, cuví cuita iñi yo tsi ra tyin cua jaha ra tucahnu iñi tsi yo tsa cuenda cuatyí yo tan cua nacatyá ra tandihí cuatyí yo tyin maa ra vaha ra tan javahá ra cuhva catyí ra tyin ña vatya ra. ¹⁰ [Nyoo catyí ra tyin iyó cuatyí yo], tan tatun catyí yo tyin nduve cuatyí yo iyó, jahá yo tyin vatya Nyoo. Tan nduve tuhun caahán ra, iyó añima yo.

2

Ra Cristo cuví ra caahán ndaahvi tsaha yo

¹ Sehe nyihi yu, caahán yu tandihí tuhun ihya tsihin ndo, tyin tacan tan ña javahá ca ndo tsa ña vaha. Maa tyin tatun iin ndo tan javaha ndo tsa ña vaha, ña nayuhvi ndo tsa ña cuví ca nduvaha ndo nuu Nyoo, tyin iyó iin ra caahán ndaahvi tsaha yo nuu Nyoo. Tan ra ican cuví ra Jesucristo, ra cuiti iyó. ² Juvín ra jahá tucahnu iñi tsi yo tyin tsihi ra nu cruu tsa cuenda cuatyí yo. Tan ñavin tsa cuenda maa ñi maa yo tsihi ra, tyin tsihi ra tsa cuenda tandihí cuivi nyivi iyó nu ñuhu ñayivi.

³ Tatun tyaá yahvi yo tsa caahán Nyoo, nacotó yo tsi ra. ⁴ Maa tyin tatun iin ra tsa catyí tyehen: “Yuhu tsitó yu tsi Nyoo”, tan ña tyaá yahvi ra tsa caahán Nyoo, cuví ra iin ra vatya. Tan nduve tsa nditsa iyó añima ra. ⁵ Nyivi javahá tsa caahán Nyoo, ñi ican cuví ñi cuñi tsi ra tsihin tsa ñi iñi añima ñi. Tan tsihin yacan tsitó yo tyin iin ñi cuví ñi tsihin ra. ⁶ Nyivi catyí tyin iin caa ñi iyó ñi tsihin Nyoo, taahán tsi coo ñi tumaa tsicoo maa ra Jesucristo quivi quitsi ra nu ñuhu ñayivi ihya.

Taahán tsi tsa cuñí tahan yo tsi yo

⁷ Yañi, ñavin tuhun tsaac jacotó yu tsi ndo, tyin cuví tsi tuhun tsahnu tsa tsa tsitó maa ndo nda quítsi ca tsi. Tan juvin tsi cuví tsa tsa yahá tsiñi ndo. ⁸ Maa tyin ña tsindihí tsa tsaac tsi tyin tyaá yahví yo itsi tan tsa tyaá yahví yo itsi, cuñí tahan yo tsi yo tumaa javahá maa ra Cristo. Tan tsihin yacan cuahán nduluhlu tsa naa tan nduñihí ca jandunditsín ñuhu tsa nditsa.

⁹ Nyooho tsa catyí tyin iyó ndo nu nditsin, tan ndasi cuñí ndo nyehe ndo tsi nyívi yihí tuhun Nyoo tsihin ndo, ndi iyó ndo nu naa. ¹⁰ Maa tyin nyívi tsa cuñí tsi nyívi yihí tuhun Nyoo tsihin ñi, iyó ñi nu nditsin. Tan nduve maa cuatyí cuví janduva tsi ñi. ¹¹ Maa tyin nyívi ndasi cuñí nyehe tsi nyívi yihí tuhun Nyoo tsihin ñi, iyó ñi nu naa. Tan ña tsitó ñi numaa cuahán ñi tyin ña nditsin nyehe ñi tyin tumaa tsa cuaq ñi jahá tsa naa can.

¹² Jaquitsí yu tandihí tuhun ihya tsi nyooho tsa ndi nacuhva cuenda tsi ndo tsi Nyoo. Tyin tsa yahá jahá Nyoo tucahnu iñi cuatyí ndo tsa cuenda tsa tsihi ra Jesucristo cuenda yo. ¹³ Nyooho tsa tsa tsahnú tsihin tuhun Nyoo, tyaá yu carta ihya tsa cuenda ndo, tyin nacotó ndo tsi ra iyó nda ndi cumañi ca tsinu ñuhu ñayívi. Tan tyaá tucu yu itsi tsa cuenda nyooho ra tsa ndi cuahan cutuñi vaha iñi tuhun ra Cristo tyin jahá canaa ndo tan ndi jahá canaa ca ndo tsi nu ña vaha.

Tan tyaá tucu yu itsi tsa cuenda nyooho, tsa ndi nacuhva cuenda tsi ndo tsi Nyoo, tyin nacotó ndo tsi Nyoo Jutu yo. ¹⁴ Jaquitsí yu carta ihya tsi nyooho tsa tsa tsahnú tsihin tuhun Nyoo, tyin nacotó ndo tsi ra tsa iyó maa tan tsinu ñuhu ñayívi. Tan jaquitsí yu carta ihya tsi nyooho tsa ndi cuahan cutuñi vaha iñi tuhun ra Cristo, tyin iyó xaan tunyee iñi tsi ndo jahá tuhun Nyoo tsa iyó añima ndo. Tan jahá canaa ndo tsi nu ña vaha.

¹⁵ Ña cuñi ndo tsa caquiñi tsa iyó nu ñuhu ñayívi ihya. Tyin nyívi cuñí tandihí yacan, ña cuñí ñi tsi Nyoo Jutu yo. ¹⁶ Tyin tandihí tsa ña vaha tsa iyó nu ñuhu ñayívi ihya, tsa cuñí cuñi ñuhu yo, tsa nyehe yo tan cuñi yo coo tsi yo, tan tsa cuñi yo nduyaa yo tsihin tsa iyó tsi yo, tandihí yacan tsahá ñuhu ñayívi ihya tsi yo, tan ñavin Nyoo Jutu yo tsahá can. ¹⁷ Ñuhu ñayívi ihya cua cundihí can, tan cua cundihí ndihí tucu tandihí tsa caquiñi tsa cuñí nyívi javaha ñi. Maa tyin nyívi tsa javahá cuhva cuñí Nyoo, cua coo cuiñi ñi tsihin ra.

Nu tsa ndasi cuñi nyehe tsi ra Cristo

¹⁸ Nyooho, tsa cuví ndo tumaa sehe yu, coto ndo tyin tsa cua ndihí quívi. Tan nyooho tsiñi ndo tyin vatsi nyívi tsa ña cuñí nyehe tsi ra Cristo, tan vityin tsa nducuahá xaan ñi. Tan tsa tacan tsa iyó cuaha ñi. Tsihin yacan nacotó yo tyin tsa tahan tsi cundihí quívi. ¹⁹ Nyívi can ña yihí ca ñi tuhun Nyoo tsihin yo, tyin ñavin cuenda yo cuví ñi. Tyin tun nditsa ñi tyin cuenda yo cuví ñi, ña cua quita ñi tuhun Nyoo. Maa tyin tacan cuví tyin tacan tsa coto yo tyin ñavin nyívi yihí tuhun Nyoo tsihin yo cuví ñi.

²⁰ Maa tyin nyooho tsa tsitó ndo tsa caahán Nyoo tyin tsahá ra Cristo Tatyí Ii Nyoo iyó añima ndo tan jacotó tsi tandihí tsi ndo. ²¹ Jaquitsí yu carta ihya tsi ndo tsa cuenda tsa tsitó ndo tsa nditsa tan ñavin tsa cuenda tsa ña tsitó ndo. Tan tsitó ndo tyin ña cuví quita tuhun vatya tsihin tuhun nditsa.

²² ¿Yóo cuví nyívi vatya? Nyívi vatya cuví ñi catyí tyin ra Jesús ñavin ra Cristo cuví ra. Tan juvin ñi ican cuví ñi ndasi cuñí nyehe tsi ra Cristo. Tyin ña tsinú iñi ñi tsi Jutu yo Nyoo, tan tsi ra Jesucristo Sehe ra. ²³ Tan tandihí nyívi tsa ña tsinú iñi tsi Sehe Nyoo, nduve Nyoo Jutu yo iyó tsihin ñi. Maa tyin nyívi

tsa caahán tsihin tsa n̄i iñi añima ñi tsihin nyivi tyin ra Jesucristo cuví Sehe Nyoo, iyó Nyoo Jutu yo tsihin ñi.

²⁴ Yacan cuenda naquihin vaha ndo tsitsi añima ndo tandihi tsa tsiñi ndo nda quivi jihna ñi. Tyin tun naquihin vaha ndo itsi tsitsi añima ndo, cua coo ndo iin caa ñi tsihin Nyoo Jutu yo tan tsihin Sehe ra. ²⁵ Tan ñayivi nyito can cuví tsa catyi ra Jesucristo tyin cuhva ra tsi yo.

²⁶ Tyaá yu tuhun ihya tyin cahvi ndo itsi tsa cuenda tyin tsa iyó cuaha nyivi cuñi jandavi ñaha tsi ndo. ²⁷ Maa tyin ra Jesucristo tsaḥa ra Tatyí Ii Nyoo iyó añima ndo, yacan cuenda ña tsiñi ñuhu ca tsa jacuaha nyivi tsi ndo. Tyin juvin ñi maa Tatyí Ii Nyoo jacuahá tandihi maa tyiñu tsi ndo. Tan tsa nditsa cuví tsi, ñavin cuendu cuví tsi. Yacan cuenda jañihi ndo cunyanaa vaha ndo tsi ra Cristo tumaa janahá maa Tatyí Ii Nyoo tsi ndo.

²⁸ Tan vityin nyooḥo, tsa cuví tumaa sehe yu, cunyanaa vaha ca ndo tsi ra Cristo tyin tacan tan quivi quitsi ra, iin cuñi yo tsihin ra. Tan iin cuñi tucu maa ra tsihin yo. Tan inga tucu tuhun ña cua tahan yo ticanuu nuu ra quivi tsa ra. ²⁹ Vityin tsa tsa tsitó ndo tyin vaha ra Cristo, cuñi tsi coto ndihi ndo tyin tandihi nyivi javahá tsa vaha, sehe Nyoo tsi ñi.

3

Nyivi cuví sehe Nyoo

¹ Nyehe ndo, Nyoo Jutu yo cuñi xaan ra tsi yo, tyin jacunañi ra sehe Nyoo tsi yo. Tan cuví yo sehe ra. Tan tsa cuenda yacan, nyivi taahán iñi tsa iyó nu ñuhu ñayivi ihya ña cutuñi iñi ñi cuhva tsicá iñi yo tyin ña nacoto ñi tsi maa ra. ² Nyooḥo yañi, tsa cuví yo sehe ra vityin, maa tyin ñaha ca coto yo náa cua cuví yo. Maa tyin tsitó yo tyin quivi quitsi ra Jesucristo, cua cuví yo tumaa cuví maa ra, tyin cua nyehe vaha yo tsi ra tan cua nyehe tucu yo náca caá ra. ³ Tandihi yoo tsa ndatú tsa cua cuví tacan, nducú yo cuhva janduvaha yo tsi yo, tan cuví yo tumaa maa Jutu Mañi yo Jesucristo, tyin maa ra cuiti iyó ra.

⁴ Tandihi nyivi tsa tsicoó cuatyí, ñi ican cuví ñi tsa ña tyaá yahvi ley Nyoo. Tyin tun javahá yo tsa ña vaha, cuñi tsi catyi tyin ña tyaá yahvi yo ley Nyoo.

⁵ Nyooḥo tsa tsitó tyin ra Cristo quitsi ra nu ñuhu ñayivi ihya tyin quinaa ra cuatyí yo, tan tsitó tucu ndo tyin maa ra nduve cuatyí ra. ⁶ Tandihi yoo tsa iyó iin caa ñi tsihin ra, ña jañihí ca yo javahá ca yo tsa ña vaha. Maa tyin nyivi javahá tsa ña vaha, ñaha ca nyehe ñi tsi ra, tan ñaha ca coto ñi tsi ra. ⁷ Nyooḥo, tsa cuví tumaa sehe yu, coto jandavi ñaha nyivi tsi ndo. Tyin nyivi javahá tsa vaha, cuví ñi nyivi vaha, tumaa vaha maa ra Cristo. ⁸ Tyin nyivi javahá tsa ña vaha, cuenda nu ña vaha cuví ñi. Tyin nu ña vaha javahá nu tsa ña vaha nda quivi jihna ñi. Yacan cuenda quitsi ra Jesucristo, Sehe Nyoo, tyin janaa ra tandihi tsa javahá nu.

⁹ Tandihi yoo tsa tsa yahá nacacu tsa jahá Nyoo, ña taahán ca iñi yo javahá yo tsa ña vaha, tyin iyó yo ñayivi tsaḥa Nyoo tsi yo. Yacan cuenda ña javahá ca yo tsa ña vaha, tyin tsa yahá nacacu tsa yo tan vityin cuví yo sehe Nyoo.

¹⁰ Cuví nacotó yo ndáa nyivi cuví sehe Nyoo, tan ndáa nyivi cuví sehe nu ña vaha, tyin tandihi nyivi tsa ña javahá tsa vaha tan ña cuñi tsi nyivi yihí cuenda Nyoo, ñavin sehe Nyoo tsi ñi.

Na cuñi tahan yo tsi yo

¹¹ Tyin tsa tsiñi ndo nda quivi jihna ñi cuví: Tsa cuñi tahan yo tsi yo. ¹² Ña taahán tsi javaha yo tumaa javahá ra Caín, tyin ra Caín cuví ra iin ra cuenda

nu ña vaha. Tan tsahñi ra tsi yañi ra. ¿Náa cuenda tsahñi ra tsi yañi ra? Tsa cuenda tyin ra yañi ra javahá ra tsa vaha, tan maa ra javahá ra tsa ña vaha.

¹³ Nyooho yañi, ña iyo cuñi ndo tun ndasi cuñi nyivi ña yihí tuhun Nyoo nyehé ñi tsi ndo. ¹⁴ Yoo tsa cuñi tsi nyivi yihí tuhun Nyoo tsitó yo tyin iyó yo ñayivi nyito, tyin juvin tsi janahá tsi yo tyin ña cuví ca yo nyivi tsihi. Maa tyin nyivi ña cuñi tsi nyivi yihí tuhun Nyoo, cuví ñi tumaa nyivi tsihi. ¹⁵ Nyivi ndasi cuñi nyehé tsi nyivi, cuví ñi tumaa nyivi tsahñi nyivi. Tan tsitó ndo tyin ndi intuhun ñi tsahñi nyivi, tan ña cua cuhva Nyoo ñayivi nyito coo ñi. ¹⁶ Tsitó yo náa cuví tsa cuñi tahan yo tsi yo tyin tsa yahá janahá ra Jesucristo tsi yo nácaa taahán tsi cuñi tahan yo tsi yo. Tyin maa ra nda cuanda tsahá ra ñayivi ra tsa cuenda yo tsa catyi tsa cuñi ra tsi yo. Tacan taahán tsi javaha tucu maa yo. Cuñi tsi cuhva yo nda cuanda ñayivi iyó yo tsa cuenda nyivi yihí tuhun Nyoo. ¹⁷ Tatun yihí yo tan iyó luxu tsa iyó tsi yo, tan nyehé yo tyin cumañi tsa cumañi tsi inga nyivi, tan jahá yo tumaa tsa ña nyehé ñi yo, ¿a cuñi yo tsi Nyoo tsa tacan javahá yo? Ña cuñi yo tsi ra. ¹⁸ Nyooho tsa cuví ndo tumaa sehe yu, na ña cuñi yo tsi nyivi tsihin tuhun caahán ñi yo, na cuñi tahan yo tsi yo tsihin tsa quitá tsitsi añima yo tan javahá yo tumañi iñi tsihin tsa ñi iñi yo.

Nacaa javaha yo tan coo vaha yo tsihin Nyoo

¹⁹ Tatun javahá yo tacan, tsitó yo tyin iyó vaha yo tsihin tsa nditsa. Tan vaha iyó yo tsihin Nyoo. ²⁰ Tatun tuví iñi tsitsi añima yo tyin iyó cuatyí yo, na ña cuíta iñi yo yacan. Na cuíta iñi yo tsi Nyoo tyin juvin ra tsitó tandihi tsa iyó añima yo tan cahnu ca cuví ra tan ñavin ca añima yo. ²¹ Yañi, tatun tuví iñi yo tyin nduve cuatyí yo, na ña nayuhvi yo nyehe yo tsi Nyoo. ²² Tan tandihi tsa cua ndacan yo tsi ra, cua cuhva ra can tsi yo, tyin tyaá yahvi yo tsa caahán ra, tan javahá yo cuhva taahán iñi ra. ²³ Tyin tyiñu tsa tsahá ra tsi yo yacan cuví tsa tsjnu iñi yo tyin ra Jesucristo cuví Sehe ra, tan tsa cuñi tahan yo tsi yo, tumaa tavá tyiñu ra tsi yo. ²⁴ Nyivi tyaá yahvi tyiñu tsahá ra tsi ñi, iyó ñi tsihin ra, tan iyó tucu maa ra tsitsi añima ñi. Tan tsitó yo tyin iyó ra tsihin yo tsa cuenda Tatyí Ii ra tsa tsahá ra tsi yo.

4

Tatyí Ii Nyoo tan tatyí nu ña vaha

¹ Nyooho yañi tsa cuñi xaan yu, ña tsjnu iñi ndo tsa caahán nyivi catyí tyin tuhun Nyoo caahán ñi. Nyehe jihna ndo tatun nacatsi tahan tsa caahán ñi tsihin tuhun Nyoo. Tyin vityin cuaha xaan nyivi jandaví ñaha iyó. Catyí ñi tyin Nyoo caahán tsa caahán ñi tan ña nditsa ñi. ² Cuví nacoto ndo tsi nyivi tun juvin Tatyí Ii Nyoo jacahán tsi ñi o ñavin. Ñi tsa iyó Tatyí Ii Nyoo tsihin, catyí ñi tyin quee ra Jesucristo nda gloria tan quitsj ra nu ñuhu ñayivi ihya, tan cuví ra iin rayi tumaa maa yo. ³ Maa tyin tandihi nyivi tsa catyí tyin ñavin tacan cuví, ñavin Nyoo jacahán tsi ñi. Tatyí ña vaha, tsa ndasi cuñi nyehé tsi ra Cristo, jacahán tsi ñi. Tsa tsitó ndo tyin nyaá tsa cua quitsi nu jandaví ñaha can. Tan vityin tsa iyó nu nu ñuhu ñayivi ihya tan jandaví ñaha nu tsi nyivi.

⁴ Nyooho tsa cuví ndo tumaa sehe yu, nyivi cuenda Nyoo cuví ndo. Tan tsa yahá jahá canaa ndo tsi nu caahán tsa ña nditsa. Tyin Nyoo iyó ra añima ndo tan cahnu ca cuví ra tan ñavin ca nu ña vaha, tsa iyó añima nyivi tsa taahán iñi tsa iyó nu ñuhu ñayivi ihya. ⁵ Ñi ican, cuenda nu ñuhu ñayivi ihya cuví ñi. Yacan cuenda caahán ñi cuenda tsa iyó nu ñuhu ñayivi ihya. Tan inga nyivi

cuenda nu ñuhu ñayivi ihya tyaá soho ñi tsa caahán ñi ican. ⁶ Maa tyin yoo cuví yo nyivi cuenda Nyoo. Tan nyivi nacotó tsi Nyoo tyaá soho ñi tsa caahán yo. Tan nyivi tsa ña tsitó tsi Nyoo, ña cuñi ñi tyaá soho ñi tsa caahán yo. Tsihin yacan cuví nacoto yo ndáa nyivi iyó Tatyí Ii Nyoo tsihin, tan caahán ñi tsa nditsa tan ndáa nyivi yihí tatyí ña vaha tan jandaví ñaha ñi.

Nyoo cuñi xaan ra tsi tandihi nyivi

⁷ Nyooho yañi, na cuñi tahan yo tsi yo, tyin Nyoo janahá ra tsi yo nácaa taahán tsi cuñi tahan yo tsi yo. Tyin tandihi yoo tsa cuñi tsi nyivi, sehe Nyoo cuví tsi yo, tan nacotó yo tsi Nyoo. ⁸ Nyivi ña cuñi tsi inga nyivi, ña nacotó ñi tsi Nyoo, tyin Nyoo cuñi xaan ra tsi yo tan tsi tandihi nyivi. ⁹ Nyoo janahá ra tsi yo tsa cuñi ra tsi yo tsihin tsa tsaḥa ra Sehe mañi ra quitsi nu ñuhu ñayivi ihya, tyin cuhva ra ñayivi nyito coo yo. ¹⁰ Nyehe ndo, nácaa tsa cuñi Nyoo tsi yo. Ñavin jihna ca maa yo cuñi tsi ra, tyin jihna ca maa ra cuñi tsi yo. Tan jaquitsi ra Sehe ra tyin tacan tan cúu ra tsa cuenda yo tan quinyaa ra cuatyí yo.

¹¹ Nyooho yañi, tatun tacan cuñi Nyoo tsi yo, juvin ñi tacan taahán tsi tsa cuñi tucu maa yo tsi nyivi tumaa tsa cuñi maa Nyoo tsi yo. ¹² Ndi intuhun maa nyivi, tan ñaha ca maa nyehe ñi tsi Nyoo, maa tyin tatun cuñi tahan yo tsi yo, iyó Nyoo añima yo. Tan ñi vaha ñi yo cuñi yo tsi ra tan tsi nyivi. ¹³ Tan tsitó yo tyin iyó vaha yo tsihin ra tan maa ra iyó ra añima yo, tyin tsaḥa ra Tatyí Ii ra iyó añima yo. ¹⁴ Nyuhu nyehe vaha ndi tan cuví ndi tsandaa tyin jaquitsi Nyoo Jutu yo tsi Sehe ra tyin jacacu ra tsi yo tsa cuví yo nyivi iyó nu ñuhu ñayivi ihya. ¹⁵ Tandihi nyivi tsa tsinú ñi tan caahán tyin ra Jesús cuví Sehe Nyoo, iyó Nyoo añima ñi. Tan iyó ñi iin caa ñi tsihin ra.

¹⁶ Yoo tsitó yo tan tsinú ñi yo tyin Nyoo cuñi ra tsi yo, tan cuñi ra tsi tandihi nyivi. Tan tandihi yoo tsa cuñi tahan yo tsi yo, iyó yo iin caa ñi tsihin Nyoo; tan Nyoo iyó ra tsitsi añima yo. ¹⁷ Tyin tatun cuñi yo tsi Nyoo tsihin tsa ñi ñi añima yo, ña cua nayuhvi yo nyehe yo tsi ra na tahan tsi quivi cutuñi tandihi nyivi nuu ra. Tyin tumaa iyó ra Jesucristo, tacan iyó yo nu ñuhu ñayivi ihya. ¹⁸ Nyoo cuñi ra tsi yo, tan tatun cuñi yo tsi ra, nduve tsa nayuhvi yo. Tatun ñi ñi yo cuñi yo tsi Nyoo ña nuña ca nu quihvi tuhun yuuhvi can añima yo, tyin Nyoo jatsiyó ra tandihi maa yacan. Tyin tatun yuuhvi yo, yihí can tyin tuví ñi yo tyin iyó cuatyí yo. Tan yuuhvi yo tsa cua tatsi tuñi Nyoo tsi yo. Tyin tatun yuuhvi cuñi yo, yuuhvi yo tyin ñaha ca cuñi yo tsi Nyoo tumaa taahán maa tsi cuñi yo tsi ra.

¹⁹ Yoo cuñi yo tsi Nyoo tyin jihna ca maa ra cuñi tsi yo. ²⁰ Tatun iin nyivi tan catyí ñi: “Yuhu cuñi yu tsi Nyoo”, tan ndasi cuñi ñi nyehé ñi tsi nyivi tahan ñi, nyivi vatya cuví ñi. Tyin tatun ndasi cuñi yo nyehé yo tsi nyivi tahan yo tsa tuhvá yo nyehé, ¿nácaa cua cuñi yo tsi Nyoo tsa ña cuví nyehe yo? Ña cua cuví. ²¹ Tavá tyiñu Nyoo tsi yo tyin tun cuñi yo tsi ra, tacan cuñi tsi tsa cuñi tahan yo tsi yo.

5

Tatun ñi ñi yo tsinú ñi yo tsi Nyoo cuví jaha canaa yo tsi tsa ña vaha

¹ Tandihi nyivi tsa tsinú ñi tyin ra Jesús cuví ra Cristo ra quee nda gloria jahá Nyoo, juvin ñi cuví sehe Nyoo. Tyin tatun cuñi yo tsi iin ra iyó sehe, cuñi ndihi yo tsi sehe ra. ² Tatun cuñi yo tsi Nyoo tan javahá yo tsa caahán ra, cua cuñi ndihi yo tsi nyivi cuví sehe ra. ³ Tyin tsa cuñi yo tsi Nyoo yacan cuví

tsa tyaá yahvi yo tsa tsahá cuenda ra tsi yo. Tan tandihí tsa tsahá cuenda ra tsi yo, ña yí javaha yo can. ⁴ Tyin tandihí yoo tsa cuví sehe Nyoo, jahá canaa yo tsi tsa ña vaha tsa iyó nu ñuhu ñayivi ñayivi ihya. Cuví jaha canaa yo can tyin tsinú iñi yo tsi Nyoo. ⁵ Maa ñi maa nyívi tsa tsinú iñi tyin ra Jesús cuví Sehe Nyoo, ñi ican cuví ñi cuví jahá canaa tsa ña vaha tsa iyó nu ñuhu ñayivi ihya.

Tatyí Ii Nyoo cuví tsandaa cuenda ra Jesús Sehe Nyoo

⁶ Ra Jesucristo quítsj ra nu ñuhu ñayivi ihya. Tan tsa tsicoondutyá ra tshin ndutyá tan tsa tsatj ñiñi ra janahá tyin Sehe Nyoo cuví tsi ra. Ñavin tsa tsicoondutyá ñi ra. tyin nda cuenda tsa tsatj ñiñi ra. Tan juvin ñi maa Tatyí Ii Nyoo cuví tsandaa tyin tacan cuví. Tan Tatyí Ii Nyoo ña jandaví ñaha tsi. ⁷ Nda andívi iyó uñi taahan tsa cuví tsandaa: maa Nyoo Jutu yo tan ra Cristo ra cuví Tuhun tsa Caahán Nyoo, tan Tatyí Ii Nyoo. Tsa nduñi taahan ra naha, iin ñi cuví ra naha. ⁸ Tan nu ñuhu ñayivi ihya iyó tucu uñi tsandaa: Tatyí Ii Nyoo tsa iyó añima yo caahán tyin ra Jesús cuví Sehe Nyoo. Tsa tsinu uvi cuví nu tsicoondutyá ra Jesús, nu catyj Nyoo tyin juvin ra Jesús cuví Sehe ra. Tan tsa tsinu uñi cuví nu tsatj ñiñi ra Jesús. Tan tsa nduñi taahan yacan nacatsí tahan caahán can. ⁹ Yoo naquihín yo tsa caahán ra cuví tsandaa nu ñuhu ñayivi ihya. Tan Nyoo cahnu ca cuví ra tan ñavin ca ra ñuu ñayivi ihya. Yacan cuenda taahán tsi naquihin yo tsa caahán ra, tan juvin ñi maa ra catyj tyin Sehe ra cuví tsi ra Jesús. ¹⁰ Nyívi tsa tsinú iñi tyin Sehe Nyoo cuví tsi ra Jesús, tsitó ñi tsitsi añima ñi tyin nditsa. Nyívi tsa ña tsinú iñi tsi ra, jahá ñi tyin vatya Nyoo, tyin ña cuñi ñi tsinu iñi ñi tsa caahán Nyoo tsandaa cuenda Sehe ra. ¹¹ Tan tyehe caahán Nyoo tshin yo: Catyj ra tyin tsahá ra ñayivi nyito coo yo tan ñihi yo itsi tatun tsinú iñi yo tyin ra Jesucristo cuví Sehe ra. ¹² Nyívi iyó Sehe Nyoo añima, iyó ñi ñayivi nyito. Tan nyívi nduve Sehe Nyoo iyó añima, ña iyó ñi ñayivi nyito.

Nu ndihí cahan ra Juan tan nu tsahá ra tyiñu tsi nyívi

¹³ Tyaá yu tuhun ihya tsa cuenda nyooho tsa tsinú iñi tsi ra Jesús Sehe Nyoo, tyin tacan tan coto ndo tyin tsa iyó ndo ñayivi nyito tsa ña cua naa maa.

¹⁴ Ndita iñi yo tsi Nyoo tyin tatun tsicán yo tsa tsicán yo tsi ra tan cuhva cuñi maa ra tsicán yo, tsitó yo tyin maa ra tsiñi ra tsa caahán yo. ¹⁵ Tan tsa tsitó yo tyin tsiñi ra tsa tsicán yo, tsitó tucu yo tyin tsa ñihj yo tsa tsicán yo tsi ra.

¹⁶ Tatun iin nyívi tan nyehe yo tyin javahá ñi cuatyí tsa ña taahán tsi cúu ñi, taahán tsi cahan ndaahvi yo tshin Nyoo tsa cuenda ñi na jaha ra tucahnu iñi tsi ñi tsa cuenda cuatyí can. Maa tyin tatun javahá ñi cuatyí tsa taahán tsi cúu ñi, ña ndacan tahvi yo tsa cuenda ñi. ¹⁷ Tandihí tsa caquiñi tsa javahá nyívi, cuatyí cuví can. Tan iyó tucu cuatyí tsa ña jaha Nyoo tucahnu iñi.

¹⁸ Tsitó yo tyin nyívi tsa nacacü tsa jahá Nyoo, ña jañihí ca ñi javaha ñi cuatyí. Tyin jahá cuenda Sehe Nyoo tsi ñi tan ña tsahá ra tsa tñin nu ña vaha tsi ñi.

¹⁹ Yoo tsa tsitó yo tyin cuenda Nyoo yihí yo. Tan tandihí nyívi tsa taahán iñi tsa iyó nu ñuhu ñayivi ihya, nu ña vaha ndacá ñaha tsi ñi.

²⁰ Tan tsitó tucu yo tyin quítsj Sehe Nyoo, tan tsahá ra tsa cutuñi iñi yo tsa caahán ra tyin tacan tan nacoto yo tsi Nyoo, ra cuví tsa nditsa. Tan ra cuví tsa nditsa can, cuví ra Jesucristo Sehe Nyoo. Tan iyó yo iin caa ñi tshin ra. Tan juvin maa ra cuví Nyoo tsa nditsa. Tan iyó ra ñayivi nyito tsa ña cua naa maa.

²¹ Nyooho tsa cuví tumaa sehe yu, jaha cuenda ndo tsi ndo tsihin tsitoho tsa jacahnú nyivi, tyin ñavin Nyoo cuví can.
Tan na cuví tsi tacan ñi.

Carta Tsinu Uvi Tsa Tyaá Ra Juan

Nu caahán ra Juan tyin cuñi xaan ra tsi nyivi yihi cuenda Nyoo

¹ Yuhu ra tsahnu cuenda vehe ñuhu, jaquitsi yu carta ihya tsi yooho, cuhva yu, tan tsi sehe un tyin cuvi un ñaha tsa nacatsi maa Nyoo. Cuñi xaan yu tsi ndo tsihin tsa ñi ñi ñi añima yu. Tan cuñi ndihi tucu tandihi nyivi tsa tsitó tsa nditsa tsi ndo, yacan ñavin yuhu ñi cuñi tsi ndo. ² Cuñi ndi tsi ndo tsa cuenda tsa nditsa tsa iyó tsitsi añima yo. Tan tacan ñi maa cua coo tsa nditsa can tsihin yo. ³ Tan na nasoco Nyoo Jutu yo tan Jutu Mañi yo Jesucristo Sehe Nyoo tsi ndo. Tan na cundaahvi ñi ra tsi ndo, tan na coo ca tsa taxin ra añima ndo. Iyó can tsi yo tyin iyó yo tsihin tsa nditsa tan tsihin tsa cuñi xaan ra tsi yo.

⁴ Si xaan cuñi yu tyin tsitó yu tyin juhva sehe un vaha xaan nyicún ñi tsa nditsa, tumaa tavá tyiñu maa Nyoo Jutu yo tsi yo. ⁵ Hermana, caahán ndaahvi yu tsihin un vityin, na cuñi tahan yo tsi yo. Tyiñu ihya cuñi yu cahan yu tsihin un, yacan cuenda jaquitsi yu carta ihya tsi un. Ñavin tuhun tsa ndi tsahá Nyoo tsi yo cuvi tsi. Tyin tsa iyó maa tsi nda nu quitsahá. ⁶ Tsa cuñi yo tsi Nyoo, yacan cuvi tsa javahá yo tandihi tsa tavá tyiñu ra tsi yo. Tan yacan cuvi tsa cahan Nyoo tyin javaha yo. Tan juvin tsi cuvi tsa tsiñi ndo nda quivi jihna ñi: Coo ndo tsihin tsa cuñi ndo tsi Nyoo tan tsi nyivi.

Nu tsahá cuenda ra Juan nácaa jaha cuenda yo tsi yo tsihin nyivi jandavi ñaha

⁷ Caahán yu tyehen tsihin un tyin cuaha xaan nyivi jandavi ñaha iyó nanii cahnu nu ñuhu ñayivi. Catyi ñi tyin ña nditsa tsa quitsi ra Jesucristo cacu ra tsihin cuñu ñuhu tan cuvi ra ra ñayivi. Nyivi tsa caahán tacan, ñi jandavi ñaha cuvi ñi. Tan ñi ndasi cuñi nyehé tsi ra Cristo cuvi ñi. ⁸ Yacan cuenda, jaha xaan ndo cuenda tsi ndo tsihin tsa jacuahá ñi coto jacunaa ndo tsa vaha tsa javahá ndo, tan coto ña ñihi ca ndo tandihi tsa cua cuhva Nyoo tsi ndo.

⁹ Tandihi nyivi tsa ña naquihín vaha tuhun tsa jacuahá ra Cristo tsi yo, tan jacuahá ñi inga ca tuhun, nduve Nyoo iyó tsihin ñi. Maa tyin nyivi naquihín vaha tuhun jacuahá ra Cristo tan tyaá yahvi ñi itsi, iyó Jutu yo Nyoo tan ra Jesucristo Sehe ra tsihin ñi. ¹⁰ Tatun tsaa nyivi yuvehe ndo, tan cuñi ñi jacuahá ñi tsi ndo tsa ña jacuahá ra Jesucristo, ña cuhva ndo cunyecu ñi yuvehe ndo tan ndi ña cuhva ndo nacumi tsi ñi. ¹¹ Tyin tun cuhva yo nacumi tsi ñi, cuñi tsi catyi tyin javahá ndihi yo tsa ña vaha tsa javahá ñi.

Nu ndihi cahan ra Juan

¹² Iyó cuaha ca tuhun cuñi yu cahan yu tsihin ndo. Maa tyin ña cuñi yu cahan yu can tsihin carta. Tyin tyaá yu cuhva tsa quitsi yu nu yucú ndo. Tyin tacan tan natuhun vaha ca maa yo, tan cusii ca ñi yo.

¹³ Ihya vatsi nacumi tsi un jahá sehe ña tahan un tsa nacatsi ndihi maa Nyoo.

Tan na cuvi tsi tacan ñi.

Carta Tsinu Uñi Tsa Tyaa Ra Juan

Nu caahán ra Juan tyin vaha cuahán ra Gayo tsihin Nyoo

¹ Yooho Gayo, yuhu tsa cuví yu ra tsahnu cuenda vehe ñuhu, jaquitsí yu carta ihya tsi un, tyin cuví un iin ra vaha iñi tsi yu tan tsa tsitó maa un tyin cuñi xaan yu tsi un tyin iin caa ñi nyicún yo tsa nditsa.

² Yañi, tsicán tahvi xaan yu tsi Nyoo tsa cuenda un tyin na coo vaha ca un. Tumaa tsa vaha cuahán un tsihin Nyoo, na nasoco ra tsi un tacan tan coo vaha un tan ña cuhvi un. ³ Yuhu sii xaan cuñi yu quivi quitsi juhva ra yañi yo naha ra nu nyí yu. Tan nacatyí tuhun ra naha tsihin yu tyin nditsa tsa iyó un cuhva jacuahá ra Cristo, tan nyicún un tsa nditsa. ⁴ Nduve inga ca tsa sii cuñi yu tumaa tsa sii cuñi yu tsa tsitó yu tyin sehe yu cuenda Nyoo nyicún ñi tsa nditsa.

⁵ Yañi, cuñi xaan yu tsi un. Vaha xaan javahá un, tyin jatyinyeé un tsi ra yañi yo naha ra. Tsa vaha ca javahá un cuví tsa jatyinyeé un tsi ra yañi yo tsa quee inga ñuu. naha ra. ⁶ Tandihí ra naha, tan nacatyí tuhun ra naha nuu tandihí nyívi tsicá vehe ñuhu tyin cuñi xaan un tsi ra naha. Jaha tumañi iñi, jatyinyeé ca tsi ra yañi yo naha ra, cuhva tsa tsiñi ñuhu tsi ra naha tumaa taahán iñi maa Nyoo. Tyin tacan tan jañihí ca ra naha cuhun ra naha cahan ra naha tuhun Nyoo. ⁷ Tyin tyiñu ra Jesucristo tsicá ra naha. Tan ña cuñi ra naha tsa jatyinyeé nyívi tsa ña tsitó tsi Nyoo tsi ra naha. ⁸ Yacan cuenda maa yo taahán tsi jatyinyeé tsi ra naha tsihin tsa tsiñi ñuhu tsi ra naha. Tan tacan tan cutahan yo tsihin ra naha nu caahán ra naha tuhun nditsa.

Nu caahán ra Juan tyin ña vaha javahá ra Diótfrefes

⁹ Yuhu jacuhun yu iin carta tsi nyívi tsicá vehe ñuhu, maa tyin ra Diótfrefes ña cuñi ra tyaa soho ra tsa caahán yu tyin cuñi xaan maa ra cuví ra ityi nuu tsihin nyívi. ¹⁰ Yacan cuenda tatun quitsi yu nu yucú ndo cua jandaa yu tyiñu tsihin ra tsa cuenda tsa caahán ra, tyin caahán xaan ra ndavaha ñi tsata yo. Tan inga tucu tuhun tyin ña naquihín vaha ra tsi ra hermano tatun tsaá ra naha. Tan tatun cuñi nyívi tsicá vehe ñuhu naquihín vaha ñi tsi ra hermano can naha ra, tyasí ra Diótfrefes tsi ñi, tan tavá ra tsi ñi vehe ñuhu.

¹¹ Yooho yañi yu tsa cuñi xaan yu ña javaha un tsa ña vaha tumaa javahá ra can, maa tyin javaha tsa vaha. Tyin ra javahá tsa vaha, cuenda Nyoo cuví ra, tan ra javahá tsa ña vaha, ña tsitó ra tsi Nyoo.

Nu caahán ra Juan tyin vaha xaan tsinú iñi ra Demetrio tsi Nyoo

¹² Tandihí nyívi tan vaha caahán ñi tuhun ra Demetrio. Tan vaha xaan tyaa yahvi ra tuhun Nyoo, tan juvin ñi maa tuhun Nyoo janahá tyin ra vaha cuví ra. Tan juvin ñi cuví tucu nyuhu tsandaa tsa cuenda ra, tan tsitó ndo tyin tsa nditsa caahán ndi.

Nu ndihí cahán ra Juan

¹³ Cuaha xaan tuhun cuñi yu jacoto yu tsi un, maa tyin ña cuñi yu jacoto yu can tsi un tsihin carta. ¹⁴ Tyin tyihí yu cuhva tsa quitsi yu nu iyó un tsa numi ñi, tyin tacan tan natuhun vaha ca maa yo. ¹⁵ Na coo tsa taxin aña un. Ra vaha iñi tsi yo tsa iyó ityi ihya jaquitsí xaan ra naha nacumi tsi un. Tan cuñi yu jaha un tumañi iñi cuhva un nacumi tsi tsa intuhun intuhun ra vaha iñi tsi yo.

Carta Tsa Jacuhun Ra Judas Tsi Nyivi Yihí Cuenda Nyoo

Nu tyaá ra Judas carta tsa cuenda nyivi cana Nyoo

¹ Yuhu ra Judas cuví yu musu ra Jesucristo. Tan cuví yu yañi ra Jacobo. Tyaá yu carta ihya tsa cuenda nyooho tsa cana Nyoo Jutu yo. Cuñi xaan ra tsi ndo tan jahá cuenda vaha ra tsi ndo tyin iin ñi cuví ndo tsihin ra Jesucristo.

² Na nyehe ndaahvi Nyoo tsi ndo. Tan na cutuñi ca iñi ndo nácaa tsa cuñi ra tsi yo. Tan na naquihin ca ndo tsa taxin tsahá ra tsi yo coo añima ndo.

*Nu caahán ra Judas tuhun nyivi tsa jacuahá tsa ña nditsa
(2 Pedro 2.1-17)*

³ Tyihí yu kuhva tyaa yu iin carta tsa cuenda ndo yañi, tyin cuñi yu cahan yu tsihin ndo nácaa jacacú Nyoo tsi yo. Maa tyin vityin tyaá yu nu carta ihya tan jañiñi yu tsi ndo na ña kuhva ndo tsa sama kuhva tsinú iñi ndo tsa vaha tsa tsahá Nyoo tsi yo tsa cuví yo nyivi yihí cuenda ra. Tyin iin tsaha ñi janahá ra nácaa tsinu iñi yo tsi ra tan ña cua nasama ra itsi. ⁴ Yacan cuenda jahá cuenda vaha ndo tsi ndo tyin quihví xeehe juhva ra jandaví ñaha naha ra. Catyi ra naha tyin tsa yahá jahá Nyoo tucahnu iñi tsi yo, tan yacan cuenda cuví ñi javaha maa yo tsa cuñi yo. Tan ña tsinú iñi ra naha tsi Nyoo, ra ndacá ñaha tsi yo, ndi ña tsinú iñi ra naha tsi Jutu Mañi yo Jesucristo. Maa tyin catyi Nyoo tahañ tsanaha tyin ra tsa javahá tacan, cua cunaa ra naha.

⁵ Vasu ndi maa tsa tsitó ndo tsa javahá Nyoo tahañ tsanaha, maa tyin cuñi yu janducuhun iñi yu tsi ndo tyin Jutu Mañi yo tava ra tsi nyivi Israel ñuhu Egipto, jacacú ra tsi ñi ndaha nyivi Egipto can. Maa tyin tsa yahá can janaa ra tsi tandihí maa ñi tsa ña tsinu iñi tsi ra. ⁶ Tan juvin ñi tacan javahá tucu Nyoo tsihin ángel tsa ña tyaá yahví tsi ra. Tsahá ra tyiñu tsi nahnu, maa tyin nacoó nahnu can. Tan yacan cuenda tsahñi ra tsi nahnu tsihin cadena nu naa tan jahá cuenda ra tsi nahnu nda tahan tsi quivi cutuñi nyivi. ⁷ Tacan tucu nyivi ñuu Sodoma tan ñuu Gomorra, tan nyivi ñuu nyihí tsa tsicoo nicanduvi ñuu can. Janaa Nyoo tsi ñi tsa cuenda tsa caquiñi tsa javahá ñi. Tyin rayi can naha ra tsicoo ra naha tsihin ñaha. Tan ñiñaha tsicoo ñi tsihin iin rayi tan inga ra. Tan cuaha ca tsa caquiñi javahá ñi tyin rayi tsicoo ra naha tsihin ra ndusihi. Tan tsa cuenda yacan, nyehe ñi tundoho nu cayu ñi quivi tsahmi Nyoo ñuu ñi. Tan yacan janahá tsi yo tyin nyivi javahá tsa caquiñi, cua cayu ñi tsihin ñuhu tsa ña cua ndahva maa.

⁸ Vasu ndi maa tacan cuví, vityin ndi iyó ra jandaví ñaha naha ra. Cuñi ra naha tyin vaha javahá ra naha. Maa tyin jatívi ra naha cuñu ñuhu ra naha tan ña tsahá ra naha tsa cundaca ñaha Jutu Mañi yo tsi ra naha. Caahán ra naha ndavaha ñi siqui ra iyó ca tunyee iñi tsi tan ñavin ca maa ra naha. ⁹ Tan ndi ángel Miguel tsa cahnu cuví nuu Nyoo, ña cana iñi ra javahá ra tacan. Tyin quivi caní tahan ra tsihin nu ña vaha tsa cuenda cuñu ñuhu ra Moisés, ña cana iñi ra cahan ra ndavaha ñi siqui nu. Intuhun ñi tsa catyi ra tsihin nu: “Na tatsi tuñi Jutu Mañi yo tsi un” catyi ángel Miguel can tsihin nu ña vaha. ¹⁰ Maa tyin ra tsa jatyañ tsi ndo can naha ra, caahán ra naha ndavaha ñi tyin ña tsitó ra naha. Tan javahá ra naha tumaa javahá quiti, tyin quiti ña cutuñi iñi ti. Ica ñi maa ti naha ti tsa cuñi cuñu ñuhu ti nahá ti. Tan tacan tucu ra can naha ra. Tsihin tsa caquiñi tsa javahá ra naha jatívi ra naha juvin ñi tsi maa ra naha.

¹¹ jNdahvi ra ndaahvi can naha ra! tyin javahá ra naha tumaa javahá ra Caín. Tan tsa cuenda tsa cuñi ra naha jaha canaa ra naha xuhun, nacoq ra naha ityi Nyoo tumaa javahá ra Balaam. Tan cua cunaa ra naha tumaa cunaq ra Coré, tyin tsihi ra can tsa cuenda tsa ña tyaq yahvi ra tsa cahán ra cuví ityi nuu tsihin ra. ¹² Ra tsa jatyañú tsi ndo naha ra tsahá ra naha ticanuu tsi ndo nu ndu iin ndo. Tyin tsatsi ra naha tan tsihi ra can naha ra naha tsihin tsa sii cuñi ra naha, tan ña cahán nuu ra naha tsa ña jahá ra naha tsa ñayivi tsi Nyoo. Cuví ra naha tumaa ra tsa ña jahá cuenda vaha mbee, tyin juvin ñi tsi maa ra naha jahá cuenda ra naha. Cuví ra naha tumaa vico tsa yihí ityi siqui tun tsa cua cuun savi tan cuahán tsi tsihin tatyí tan ña cuun savi. Cuví ra naha tumaa yutun tsa ña tsahá tsiti. Tyin yutun tsa ña tsahá tsiti cuví tun tumaa yutun tsa tsa tsihi vasu ndi nyitó tun. Tan tumaa tsa uvi tsaha cua cúu tun tyin cua tyahnya cuui yoho tun. ¹³ Tan juvin ñi cuví tucu ra can naha ra tumaa ndutya ñuhu xaan tsa nacoó tiñuu nu nyiti tyin tsahá ra naha ticanuu. Tan cuví tucu ra naha tumaa tiñuu tsa iyó andivi tsa tsinaq. Tsa nyaá maa tsa cua ndoo cuui ra naha nu naa. Tacan ñi maa tsa cua tahan ra naha.

¹⁴ Tuhun ra can naha ra cahán ra Enoc tahan tsanaha. Ra Enoc tsa tsinu utsa tsa cuví tata ra Adán. Cahán ra tuhun tsa tsahá maa Nyoo tsi ra, tan catyi ra: “Nyehe yu nu vatsí Jutu Mañi yo tan cuenda mil ángel ra vatsí tsihin ra ¹⁵ tyin vatsí ra vatsí tatsí tuñi ra tsi nyivi caquiñi tsa cuenda tandihi tsa ña vaha tsa javahá ñi, tan nyivi caahán ndavaha ñi siqui ra”, catyi ra Enoc tahan tsanaha. ¹⁶ Ra tsa jatyañú tsi ndo naha ra, ña ndoó ra naha vaha tsihin tsa tsahá Nyoo tsi ra naha. Caahán ra naha tan catyi ra naha: “Yi xaan, cahnu xaan tundoho nyehé yo.” Javahá ra naha tsa cuñi cuñu ñuhu ra naha. Yaa xaan caahán ra naha. Tan tsa caahán ra naha tsa vaha tsihin nyivi, javahá ra naha can tyin cuñi ra naha tsa cahán nyivi tyin vaha xaan iñi ra naha.

Nu tsahá cuenda ra Judas tsi nyivi yihí cuenda Nyoo

¹⁷ Yañi, ña tyaq yahvi ndo tsi ra can naha ra. Maa tyin nducuhun iñi ndo tuhun tsa cahán ra tsa tava tyiñu Jutu Mañi yo Jesucristo, ¹⁸ tyin catyi ra naha tyehen: “Nu cua ndihi quivi cua coo ra vacu nducu tuhun Nyoo. Cua coo ra naha tsihin tsa ña vaha tsa tsicá iñi ra naha.” ¹⁹ Ra tsa cahán ra naha tuhun cuví ra cuñi jasiin tsi yo. Tyin tyaá yahvi ra naha cuhva cuñi cuñu ñuhu ra naha tan nduve Tatyí Ii Nyoo iyó tsihin ra naha.

²⁰ Maa tyin nyooho yañi, jandu iin ndo iñi ndo tsihin tsa tsinú iñi ndo tsi ra Cristo. Nďacan tahvi ndo tsi ra tsihin tunyee iñi Tatyí Ii maa ra. ²¹ Nďucu ndo cuhva cunyanaa vaha ca ndo tsi Nyoo, tyin tacan tan coto ndo tyin cuñi xaan ra tsi yo. Tan cuatu ndo quivi cuhun yo coo cuui yo tsihin ra. Tyin yacan cuví tsa cua cuhva Jutu Mañi yo Jesucristo tsi yo tsa cuenda tsa cundaahvi iñi ra tsi yo.

²² Cahán yuhu ndo tsihin nyivi tsa ña tsinú iñi, na tsinu iñi ñi. ²³ Nďucu ndo cuhva cacu ñi tsa cua cayu. Cundaahvi tucu iñi ndo nyehe ndo tsi inga ñi tsa javahá tsa caquiñi. Maa tyin jaha ndo cuenda tsi ndo tsa ña cua javaha ndo tsa caquiñi tsa javahá ñi, tyin nda cuanda jahma nditsí ñi tan ña vaha can.

Nu ndihi cahán ra Judas tan jacahnú ra tsi Nyoo

²⁴⁻²⁵ Intuhun ñi Nyoo iyó, tan iyó xaan tsa tsiñi tuñi tsi ra. Ra ican cuví ra tsa jacacú tsi yo. Tan iyó xaan tunyee iñi tsi ra tsa jahá cuenda ra tsi yo tsa ña coo ca cuatyí yo quivi cua cuhun yo tsihin ra nu cahnu cuví nu nyaá ra. Tan sii xaan cua cuñi yo.

Na coto yo tsa cahnu xaan cuví ra. Na jacahnu yo tsi intuhun ñi maa ra tyin cahnu xaan cuví ra. Tan iyó xaan tunyee iñi tsi ra. Na cundaca ñaha intuhun ñi maa ra tandihi. Tyin nda nu quitsi tsi, tan vityin, juvin ra ndacá ñaha tan tacan ñi maa cua cundaca ñaha ra.

Tan na cuvi tsi tacan ñi.

Tsa Janaha Ra Jesucristo Tsi Ra Juan

Tsa nyehe ra Juan

¹ Nyoo tava tyiñu ra tsi ra Jesucristo tyin cuhva cuenda ra tsi ra jahá tyiñu tyiñu ra tyin tsa cuyatyin cuii javaha ra tsa cua javaha ra. Tan jaquitsi ra Jesucristo iin ángel ra tan tsaḥa cuenda ra tandiḥi tsa cua cuvi tsi yuhu, ra Juan, ra cuvi musu ra. ² Tan caahán yu tandiḥi tsa nyehe yu. Tan cuvi yu tsandaa tsa cuenda tuhun Nyoo tsa jacotó ra Jesucristo tsi yu.

³ Si xaan cuvi tsi nyivi tsa cua cahvi tuhun Nyoo tsa nyaá nu tutu ihya tan cuñi ñi tuhun caahán tsi tan tyaa yahvi ñi itsi, tyin tandiḥi tuhun tsa nyaá nu tutu ihya, tsa yatyin cuii cundaa tsi.

Nu jacuhun ra Juan tutu tsi nyivi tsa utsa taahan vehe ñuhu

⁴ Yuhu ra Juan jaquitsi yu tutu ihya tsi nyooḥo, nyivi tsicá tsa utsa vehe ñuhu tsa cayucú ityi Asia. Na nasoco Nyoo tsi ndo. Tan tacan tucu tsa utsa tatyí i tsa iyó nu ndacá ñaha ra. Tan na coo tsa taxin añima ndo jahá ra. Nyoo tacan ñi iyó maa ra, juvin ra cuvi Nyoo nda tsanaha, tan vityin, tan juvin ra cua quitsi. ⁵ Tan naquihin tucu ndo tsa vaha jahá ra Jesucristo. Tyin ra ican cuvi ra tsandaa tan tsa nditsa. Juvín ra cuvi ra tsa nandotó tsa jihna ñi. Tan ndacá ñaha ra tsi ra cuvi rey tsa iyó nu ñuhu ñayivi ihya naha ra. Tan cuñi xaan ra tsi yo, tan nacatya ra tsi yo tsihin niñi ra. ⁶ Tan tsaḥa ra tsa cuvi yo rey tan cuvi yo jutu tyin jahá tyiñu yo tyiñu Nyoo Jutu ra. ¡Na jacahnu yo tsi ra tan na ña cundiḥi maa tsa ndacá ñaha ra! Tan nacuvi tsi tacan.

⁷ ¡Nyehe jihna ndo! ¡Tsa vatsí ra Cristo nu vico andivi! Tandihí nyivi cua nyehe ñi tsi ra nda cuanda nyivi tsa jañicuehe tsi ra tan cua nyehe ñi tsi ra. Tan tandihí ñi cua vacu xaan ñi tyin cua nayuhvi ñi nyehe ñi tsi ra inga tsaha tyin juvin ñi maa ra cuvi. Nditsa, tacan cua cuvi, tan na cuvi tsi tacan ñi.

⁸ Catyí Jutu Mañi yo:

—Yuhu cuvi ra jihna ñi, tan yuhu cuvi ra cua coo nu cua ndihí quivi, tumaa letra A tan Z —catyí Jutu Mañi yo, ra iyó tandihí tunyee iñi tsi. Tacan ñi iyó maa ra: Juvín ra cuvi Nyoo nda tsanaha, tan vityin, tan juvin ra cua quitsi.

Nu nyehe ra Juan tsa iyo caá ra Cristo

⁹ Yuhu ra Juan cuvi yu yañi ndo. Tan iin caa ñi nyehe yu tundoho tsihin ndo, tan ndacá ñaha Nyoo tsi yo, tan iin caa ñi cunye xaan iñi yo náa cuvi tsi yo tyin jatyinyeé ra Jesucristo tsi yo. Nyii yu vehe caa ñuhu Patmos tsa canyii mahñu ndutya ñuhu. Nyii yu vehe caa tsa cuenda tsa caahán yu tuhun Nyoo tsa jacuahá ra Jesucristo. ¹⁰ Tan iin tumingu quivi jacahnú yo tsi Jutu Mañi yo, tuvj iñi yu tsa nyaá Tatyí Ii Nyoo tsihin yu. Tan tsiñi yu iin ndusu ñihi xaan ityi tsata yu, tumaa ndusu trompeta. ¹¹ Tan catyí tsi tsihin yu tyehen:

—Yooḥo, Juan. Yuhu cuvi ra jihna ñi, tan yuhu cua coo nu cua ndihí quivi. Tyaa nu iin tutu tandihí tsa cua nyehe un. Tan jacuhun itsi vehe ñuhu tsa utsa ñuu tsa cayucú ityi Asia: vehe ñuhu ñuu Éfeso, vehe ñuhu ñuu Esmirna, vehe ñuhu ñuu Pérgamo, vehe ñuhu ñuu Tiatira, vehe ñuhu ñuu Sardis, vehe ñuhu ñuu Filadelfia, tan vehe ñuhu ñuu Laodicea —catyí ndusu can tsihin yu.

¹² Tacan tan nyicó coo yu tyin cuñi yu nyehe yu yóo caahán tsihin yu. Tan nyehe yu utsa taahan candileru xuhun cuaan. ¹³ Tan mahñu tsa utsa taahan candileru can, nyehe yu nyaá iin ra tsa caá tumaa caá rayiñi ñuhu ñayivi ihya.

Nditsi ra jahma cañi nda nu tsaha ra. Tan yihí iin cinturón xuhun cuaan yiqui nyica ra. ¹⁴Tan ixi jiñi ra cuitsin tsi, tumaa cuitsin ixi mbee, tan tumaa cuitsin catyi. Tan tinuu ra caá tsi tumaa caá nu cayú ñuhu. ¹⁵Tan xiñú xaan tsaha ra tumaa xiñú iin caa tsa nañi bronce tsa tuhvá yo nacuhvá tsa yaha quita can tsitsi ono nu cayú ñuhu. Tan ñihi xaan ndusu ra tumaa ndusu ndutya cuaha. ¹⁶Tan ndaha cuaha ra nyecú tsa taahan tiñuu andivi. Tan tuhun quitá yuhu ra caá tsi tumaa caá mityú tsa xaan nduvi tsiyo yuhu. Tan nuu ra caá tsi tumaa caá tun ñihi xaan nyehé ñicanyii.

¹⁷Cuhva tsa nyehe yu tsi ra, nduva yu tsaha ra tumaa tsa tsihi yu. Maa tyin tyiso ra ndaha cuaha ra siqui yu, tan catyi ra tsihin yu:

—Ña nayuhvi un. Yuhu cuví ra jihna ñi, tan yuhu cua coo nu cua ndihi quivi. ¹⁸Yuhu nyito yu vasu tsihi yu, maa tyin vityin ña cua cundihi maa tsa iyó yu. Tan iyó ndatu tsi yu tsa catyi yu ama taahán tsi cúu nyivi, tan tatun cuhun ñi anyaya o ña cuhun ñi. ¹⁹Tyaa nu libru tandihi tsa nyehe un, tan tsa iyó vityin, tan tsa cua coo nu cuahán ca tsi. ²⁰Tuhun ihya cuví tuhun xeehe cuenda tsa utsa tiñuu tsa nyecú ndaha cuaha yu, tan tsa cuenda tsa utsa candileru xuhun cuaan can: Tsa utsa tiñuu can caahán tsi cuenda tsa utsa ra caahán tuhun yu tsa utsa vehe ñuhu. Tan tsa utsa candileru can cuñi tsi catyi tsa utsa vehe ñuhu.

2

Nu quitsahq tsahá cuenda ra Cristo tsi nyivi tsicá tsa utsa vehe ñuhu: Tsa tsahq cuenda ra tsi nyivi tsicá vehe ñuhu ñuu Éfeso

¹Jacuhun tutu tsi ra caahán tuhun yu tsihin nyivi tsicá vehe ñuhu ñuu Éfeso. Tan catyi tsihin ra tyehen: “Tyehen catyi ra tsa nyecú utsa tiñuu ndaha cuaha, tan tsicá nuu ra mahñu tsa utsa candileru xuhun cuaan: ²Yuhu tsitó yu tandihi tsa javahá ndo. Tan nyehé yu tyin ñihi xaan jahá tyiñu ndo tan cunyeé xaan iñi ndo. Tan tsitó yu tyin ña cuñi ndo nyehé ndo tsi nyivi caquiñi. Tan tsitó yu tyin tuhvá ndo nducu cuhva tsi ra tsa catyi tyin ra tsicá tyiñu Nyoo cuví ra naha, tan tsitó ndo tyin ña nditsa ra naha. ³Cunyeé xaan iñi ndo. Tan nyehé xaan ndo tundoho tan jahá tyiñu xaan ndo tsa cuenda yu tsihin tsa ña ndu uvi iñi ndo. ⁴Maa tyin iyó iin tsa ña vaha javahá ndo, tyin ña cuñi ca ndo tsi yu vityin tumaa tsa cuñi ndo tsi yu quivi jihna ñi. ⁵Yacan cuenda nducuhun iñi ndo numaa nda nduva ndo. Tan nasama ndo cuhva iyó ndo, tan javaha nyico ndo tumaa javahá ndo quivi naquihñ cuenda ndo tsi Nyoo. Tatun ña nasama ndo cuhva iyó ndo, tsa nyaá tsa cua quitsi yu nu yucú ndo, tan quinyaa yu candileru ndo nu nyaá tsi. Maa tyin tatun ndu uvi iñi ndo cuatyí ndo, ña cua quitsi yu quinyaa yu itsi. ⁶Cuaha tsa ña vaha javahá ndo, maa tyin iyó tucu tsa vaha javahá ndo, tyin ña cuñi ndo nyehe ndo tsa caquiñi tsa javahá nyivi yihí cuenda ra Nicolás. Tacan tucu yuhu ña taahán iñi yu nyehé yu yacan. ⁷Nyooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu. Catyi ra tyehen: Tatun cuvi jaha canaa ndo tsi nu ña vaha, cuhva yu tsa catsi ndo tsiti yutun tsa tsahá tsa coo nyito añima ndo. Tan yutun can nyaá tun nda nu iyó Nyoo nda gloria, tyin ndacan, maa ñi maa tsa vaha iyó.”

Tsa tsahq cuenda ra Jesucristo tsi nyivi tsicá vehe ñuhu ñuu Esmirna

⁸Jacuhun ndihi tutu tsi ra caahán tuhun yu tsihin nyivi tsicá vehe ñuhu ñuu Esmirna, tan catyi tsihin ra tyehen: “Tyehen catyi ra cuví tsa jihna ñi, ra

cua coo nu cua ndihi quivi, ra tsa tsihi tan nandoto: ⁹ Yuhu nyehé yu tandihi tsa javahá ndo. Tan tsitó yu tyin nyehé xaan ndo tundoho. Tan tsitó yu tsa ndaahvi ndo, maa tyin tsihin tuhun Nyoo cuca ndo. Tan tsitó yu tsa caahán nyivi Israel ndavaha ñi siqui ndo. Tan ndi ñavin ñi Israel cuví ñi tsitsi añima ñi tyin cuenda nu ña vaha, nu nañi Satanás, cuví ñi. ¹⁰ Maa tyin ña nayuhvi ndo tsa nyehé ndo tundoho. Tyin nu ña vaha cua tyihi nu tsi juhva ndo vehe caa, tyin cua nducu cuhva nu tsi ndo tatun cua jaña ndo tsi Nyoo. Tan utsi quivi cua nyehe ndo tundoho. Maa tyin cüanyicun vaha ndo tsi Nyoo nda cuanda cúu ndo. Tan yuhu cua cuhva yu ñayivi coo ndo tsihin Nyoo. ¹¹ Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu. Catyí ra tyehen: Tatun cuví jaha canaa ndo tsi nu ña vaha, ña cua cuhun ndo anyaya, quivi cúu nyivi tsa jahu uvi tsaha.”

Tsa tsahá cuenda ra Jesucristo tsi nyivi tsicá vehe ñuhu ñuu Pérgamo

¹² Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Pérgamo. Tan catyí tsihin ra tyehen: “Tyehen catyí ra tsa ndahá mityí tsa xaan nduvi tsiyo yuhu: ¹³ Yuhu nyehé yu tandihi tsa javahá ndo. Tan tsitó yu tyin vaha javahá ndo tyin ña jandihí ndo tsa tsinú iñi ndo tsi yu. Tan tacan ñi tsinú maa iñi ndo tsi yu vasu ndi maa iyó ndo nu iyó nu Satanás, nu ndacá ñaha nu, nu tsahñi nyivi tsi ra Antipas, ra tsa cuví tsandaa cuenda yu. ¹⁴ Maa tyin quituví juhva tsa javahá ndo nuu yu: Tyin ñuu Pérgamo nu yucú ndo ihya, yihí ra tsa ña cuñi jandihí cuhva tsa javahá ra Balaam, ra tsicoo tsanaha. Tyin ra Balaam natyuhu ra tsi ra Balac, na jacatsí ra cuñu quiti tsa jamañi nyivi nu tsitoho tsi nyivi Israel. Tan natyuhu ra tsi ra na catyí ra tsihin ñi tyin ñavin cuatyí cuví tun iin ñaha tan iyó ña tsihin iin rayi vasu ña tindaha ñi, tan tacan tucu ñi rayi. ¹⁵ Tan juven ñi iyó tucu juhva nyivi tsa ña cuñi nacoo tsa jacuahá ra yihí cuenda ra Nicolás. Tan yuhu ndasi cuñí yu nyehe yu tsa jacuahá ra can naha ra. ¹⁶ Yacan cuenda janumi ndo nasama ndo cuhva iyó ndo. Tyin tatun ña nasama ndo cuhva iyó ndo, cua quitsi yu nu yucú ndo tsa numi ñi tan cua cañi tahan yu tsihin nyivi tsa javahá tacan tsihin mityí [tsa cuví tuhun] quitá yuhu yu. ¹⁷ Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu: Tatun cuví jaha canaa ndo tsi nu ña vaha, cua cuhva yu tsa catsí ndo paan tsa cuví maná tsa nyii xeehe. Tan cua cuhva yu iin yuu cuitsin tsi ndo. Tan nu yuu can nyaá iin sivi tsa tsa yofi tsitó; intuhun ñi nyivi tsa cua naquihin yuu can cua coto sivi can.”

Tsa tsahá cuenda ra Jesucristo tsi nyivi tsicá vehe ñuhu ñuu Tiatira

¹⁸ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Tiatira. Tan catyí tsihin ra tyehen: “Tyehen catyí Sehe Nyoo, ra tsa caá tinuu tumaa caá nu cayú ñuhu. Tan tsaha ra caá tumaa caá caa bronze tsa xiñu xaan. ¹⁹ Yuhu nyehé yu tandihi tsa javahá ndo. Tan tsitó yu tsa cuñi xaan ndo tsi nyivi. Tan tsitó yu tyin tsinú xaan iñi ndo tsi yu, tan jatyinyeé ndo tsi nyivi, tan cunyeé xaan iñi ndo. Tan tsitó yu tyin cuaha ca tsa vaha javahá ndo vityin tan ñavin ca nu quitsi tsi. ²⁰ Maa tyin iyó juhva tsa cuñi yu cahan yu tsihin ndo: Nyehé yu tyin tsahá ndo ndatu tsi [ñaha tsa javahá tumaa javahá] ña Jezabel [tsa tsicoo tahan tsanaha]. Ña ican jacuaha tsi ndo, catyí ña tyin Nyoo tsahá tuhun caahán ña, maa tyin jandaví ñaha ña tsi nyivi tsa jahá tyiñu tyiñu yu tsihin tuhun jacuahá ña. Tyin catyí ña tyin ñavin cuatyí cuví tsa coo iin rayi tsihin ñaha o iin ñaha tsihin rayi tun ña tindaha ñi. Tan jacuahá ña tyin cuví catsí ñi nyayu tsa jamañi nyivi tsi tsitoho. ²¹ Yuhu tsa ndatu xaan

yu tsa nasama ña cuhva iyó ña, maa tyin ña cuñí ña javaha ña can. Ña cuñí ña jandihí ña tsa tsicá nuu ña tsihin rayíi. ²² Tan vityin cua quihin cuehe tsi ña tan ña cua cuví nduvita ña. Tan nyivi javahá tsa caquiñi tsihin ña, cua cuhva yu tundoho nyehe ñi tatun ña ndu uvi iñi ñi tsa javahá ñi. ²³ Tan cua cahñi yu sehe ña. Tacan tan cua coto tandihí nyivi tsicá vehe ñuhu, tyin yuhu tsitó yu tandihí tsa tsicá iñi ñi, tan tandihí tsa iyó añima ñi. Tan tsa intuhun intuhun nyoocho cua cuhva yu tsa taahán tsi tsi ndo tsa cuenda tsa javahá ndo. ²⁴ Maa tyin tandihí ca nyoocho tsa iyó ñuu Tiatira, nyoocho tsa ña naquihín cuenda cuhva jacuahá ña, ndi ña javahá ndo tsa catyí nyivi tyin cuví tuhun xeehe cuenda nu ña vaha, ña tyaá yu inga tsa yí siqui ndo. ²⁵ Maa tyin jañihi ndo javaha ndo tsa vaha nda cuanda quitsi nyico yu. ²⁶ Tan nyoocho tsa jaha canaa tsi nu ña vaha, tan javahá ndo cuhva cuñí yu nda cuanda nu ndihí tuhun, cua cuhva yu ndatu tsi ndo tsa cundaca ñaha ndo tsi nyivi iyó nu ñuhu ñayivi ihya. ²⁷ Tumaa tsahá Jutu yu ndatu tsi yu tsa cundaca ñaha yu, tacan cua cundaca ñaha ndo. Tan tsihin iin tatun tsa cuví caa cua tatsi tuñi ndo tsi nyivi. Tan cua tahvi cuatyí ndo tsi ñi tumaa tsa tahví cuatyí yo quisí. ²⁸ Tan cua cuhva yu tiñuu cahnu tsa caná tsa naa ca coo tsihin ndo. ²⁹ Nyoocho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu.”

3

Tsa tsahá cuenda ra Jesucristo tsi nyivi tsicá vehe ñuhu ñuu Sardis

¹ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Sardis. Tan catyí tsihin ra tyehen: “Tyehen catyí ra tsa iyó tsa utsa tatyí ii Nyoo tan tsa utsa tiñuu: Yuhu nyehé yu tandihí tsa javahá ndo. Tan vasu catyí nyivi tyin nyito ndo, maa tyin tsa cuenda yuhu, tsa tsihi ndo. ² Jaha cuenda vaha ndo tsa vaha tsa iyó luxu ca tsi ndo. Tyin coto ndihí ndihí tuhun yu nu yucú ndo. Nyehé yu tyin nuu Nyoo ña vaha maa tsa javahá ndo. ³ Nducuhun iñi ndo tsa vaha tsa cutuhvá ndo. Cuanycun ndo can, tan ñasama ndo cuhva iyó ndo. Tyin tun ña naquihín vaha ndo tsa vaha, sana iñi ndo tan cua quitsi yu nu yucú ndo, tumaa iin ñasuhu. ⁴ Maa tyin iyó juhva nyoocho, nyivi Sardis, tsa ña janyahyu jahma; ña javahá ndo tsa caquiñi cuví can. Tan juvin nyoocho cua cunditsi jahma cuitsin tsihin yu, tan cua caca ndo tsihin yu, tyin tacan taahán tsi tsi ndo. ⁵ Tan nyoocho tsa cua cuví jaha canaa tsi nu ña vaha, cua cunditsi ndo jahma cuitsin tsihin yu. Tan ña cua janaa yu sivi ndo nu libru nu nycú sivi tandihí nyivi cua coo nyito tsihin Nyoo. Tan cua catyí yu tsihin Jutu yu, tan ángel ra tyin nacotó yu tsi ndo. ⁶ Nyoocho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu.”

Tsa tsahá cuenda ra Jesucristo tsi nyivi tsicá vehe ñuhu ñuu Filadelfia

⁷ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Filadelfia. Tan catyí tsihin ra tyehen: “Tyehen catyí ra ii, ra nditsa, ra yihí ndaha ndaha tucu ra rey David, ra tsa nuñá yuvehe tan ndi intuhun nyivi tan ña cuví nacasi. Tan tatun nacasi ra, ndi intuhun ñi tan ña cuví nuña ñi. Tyehen catyí ra: ⁸ Yuhu nyehé yu tandihí tsa javahá ndo. Tan nuña yu iin yuvehe tsa cuenda ndo tan yoñi cuví nacasi itsi, [tyin tsahá yu tsa cahan ndo tuhun Nyoo tsihin nyivi, tan yoñi cuví casi tsi ndo]. Tan iyó luxu tunyehé iñi tsi ndo, tan tyaá yahvi ndo tsa caahán yu, tan ña catyí ndo tyin ña nacotó ndo tsi yu. ⁹ Tan nyivi yihí cuenda nu ña vaha, ñi vatya, ñi catyí tyin nyivi Israel cuví ñi, maa tyin ñavin nyivi Israel cuví ñi tsitsi añima ñi; cua jacuiñi tsiti yu tsi ñi

nuu ndo, tyin tacan tan coto ñi tyin yuhu cuñi yu tsi ndo. ¹⁰ Tyin cunyeé xaan iñi ndo tumaa catyi yu tsihin ndo tyin cunyeé iñi ndo. Tan yacan cuenda cua jaha cuenda yu tsi ndo tan nduve náa cua tahan ndo quivi cua jaquitsi yu tundoho cahnu siqui tandihi nyivi, tyin cua nducu cuhva yu tsi tandihi ñi iyó nu ñuhu ñayivi. ¹¹ Yatyí cua quitsi yu nu yucú ndo. Jaha cuenda vaha ndo cuhva iyó ndo, tyin coto quinyaa nyivi tsa vaha tsa cua ñihi ndo. ¹² Nyooho tsa cua cuvi jaha canaa tsi nu ña vaha, cahnu tyiñu Nyoo cua jaha tyiñu ndo. Cua cuhva yu tsa cuví ndo tumaa ticoo tsa nyisó vehe ñuhu Nyoo yu. Tan ña cua quita maa ndo nu nyaá Nyoo. Tan cua tyaa yu sivi Nyoo yu tsi ndo, tan sivi ñuu Nyoo yu, ñuu Jerusalén tsaa tsa cua quee nda andivi, tan juvin ñi cua tyaa tucu yu sivi tsaa yu tsi ndo. ¹³ Nyooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu.”

Tsa tsahá cuenda ra Jesucristo tsi nyivi tsicá vehe ñuhu ñuu Laodicea

¹⁴ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Laodicea. Tan catyi tsihin ra tyehen: “Tyehen catyí ra tsa nditsa, ra jandaá tsa caahán ra tyin javaha ra, tan tsihin ra javaha Nyoo tandihi maa tsa iyó: ¹⁵ Yuhu nyehé yu tandihi tsa javahá ndo. Tan cuví ndo tumaa ndutya tsa ña vitsin tan ndi ña ihñi, tyin ndi ña tsinú vaha iñi ndo tsi yu, tan ndi ña jandihi tucu ndo tsa tsinú iñi ndo tsi yu. Vaha ca tsa tsinu vaha iñi ndo tuhun caahán yu, o jandihi cuvi ndo tsa tsinú iñi ndo tsi yu. ¹⁶ Maa tyin tsa cuenda tsa cuví ndo tumaa ndutya vixin ñi ndi ña vitsin tan ndi ña ihñi ndo, cua ndutsan yu tsi ndo. ¹⁷ Tyin nyooho catyí ndo tyehen: ‘Yuhu cuca xaan yu, vaha xaan iyó yu. Nduve náa cumañi tsi yu,’ catyí ndo. ¿A ña jahá ndo cuenda tyin cuihya cuñi ndo nyehé ndo tundoho tsitsi añima ndo, ndaahvi ndo, cuaa ndo, tan tandihi ndo tsitsi añima ndo? ¹⁸ Yacan cuenda tsahá cuenda yu tsi ndo tyin tsi maa yu jata ndo xuhun cuaan tsa cayu tan naa tsa nyahyu tsi, tyin tacan tan nducua ndo. Tan jata ndo jahma cuihsin nu nyaá yu tyin cunditsi ndo, tyin tacan tan ña cua nducahan ca nuu ndo tsa tandihi ndo. Tan jata ndo numeri quihvi tinuu ndo tyin tacan tan cuví nyehe ndo. ¹⁹ Yuhu tsahá cuenda yu tan tatsi tuñi yu tsi tandihi nyivi tsa cuñi xaan yu. Yacan cuenda catyí yu tsihin ndo: Jandu iin ndo iñi ndo tsihin tsa ñi iñi añima ndo tan javaha ndo tsa vaha. ²⁰ ¡Nyehe jihna! Yuhu nyaá yu yuvehe tan cañi ndaha yu. Nyivi tsa cua cuñi ndusu yu, tan nuña ñi yuvehe, cua quihvi yu tan cuxiñi yu tsihin ñi. Tan maa ñi cuxiñi ñi tsihin yu. ²¹ Cua cuhva yu tsa cunyeecu ndo tsihin yu nu ndacá ñaha yu tatun cuví jaha canaa ndo tsi nu ña vaha. Tumaa tsa jahá canaa yu tsi nu, tan vityin nyaá yu tsihin jutu yu nu ndacá ñaha ra. ²² Nyooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu” —catyí ra Jesucristo.

4

Tsa cuví nda gloria

¹ Tsa yahá can, tan nyehe yu ticoho iin yuvehe nda andivi. Tan tsiñi yu ndusu tsa caahán jihna tsihin yu, ndusu tumaa ndusu trompeta, tan catyí tsi tsihin yu:

—Ndaa nyehe tan janaha yu tsi un tsa cua cuvi nu cuahán ca tsi —catyí ndusu can tsihin yu.

² Tan juvin ñi cuhva can tan tuví iñi yu tsa nyaá Tatyí li Nyoo tsihin yu. Tan nyehe yu nyaá iin tyayu nda gloria. Tan nu tyayu can nyaá iin ra nyaá. ³ Tan nuu ra tsa nyaá nu tyayu can, xiñu tsi tumaa xiñu yuu vaha tsa nañi jaspe tan

tumaa xiñu yuu cornalina. Tan tanii cahnu yuhu tyayu can tsinú nduvi coo cuiya, tan xiñu ti tumaa xiñu yuu vaha tsa nañi esmeralda. ⁴ Tan nyehe yu nyecú oco cumi ca tyayu nu nyecú oco cumi ra tsahnu naha ra, tsinu nduvi tyayu can nu nyaá tyayu tsa nyaá mahñu can. Nditsi ra naha jahma cuitsin. Tan yihí corona xuhun cuaan jiñi intuhun intuhun ra naha. ⁵ Tan nu nyaá tyayu tsa nyaá mahñu can, quitá tatsa tan ñihi cuvaa tan ñihi caahán savi. Tan cayú utsa ñuhu ityi nuu tyayu can, tan tsa utsa ñuhu can cuví tsa utsa tatyí ii Nyoo. ⁶ Tan ityi nuu tyayu can iyó tucu iin tsa caá tumaa caá ndutya ñuhu, tan xiñu xaan can tumaa xiñu yutyí.

Ñi canduvi yuhu tyayu can tan mahñu tyayu can, nyecú cumi tsa nyito. Tan cuaha xaan tinuu tsa nyito can iyó, ityi nuu can tan ityi tsata can. ⁷ Iin tsa nyito can caá can tumaa caá ndicaha. Tan tsa tsinu uvi tumaa caá indiquí lee. Tan tsa tsinu uñi, tumaa caá nuu rayii caá nuu can. Tan tsa tsinu cumi tumaa caá tasu tsa cuahán ndavá. ⁸ Tan iyó iñu nditsin tsa intuhun intuhun tsa nyito can. Tan tanii cahnu tsi nyecú tinuu tsi, tahan ñi ityi tsata tan ityi tsitsi tsi. Tan ña jandihí tsi tsa caahán tsi tyehen nduvi tan ñiñu:

Ra ii cuví un; ra ii cuví un; ra ii cuví un.

Jutu Mañi yu, Nyoo, iyó tandihí tunyee iñi tsi un.

Tacan ñi iyó maa un, juvin un cuví Nyoo nda tsanaha tan vityin, tan juvin un cua quitsi.

⁹ Tan jacahnú tsa cumi tsa nyito can tsi Nyoo, tan nacuhvá tsi naha tsi tyahvi nyoo tsi ra nyaá nu tyayu can, ra tsa iyó tandihí tyembu. Tan tahan ñi tsaha tsa javahá tsi naha tsi tacan, ¹⁰ tsa oco cumi ra tsahnu can naha ra tsicuiñi tsiti ra naha tan jacahnú ra naha tsi ra iyó tandihí tyembu. Tan tsaquín ra naha corona ra naha nu nyaá tyayu can. Tan catyí ra naha:

¹¹ Jutu Mañi ndi, Nyoo ndi cuví un.

Yooho taahán tsi jacahnú ndi.

Tan taahán tsi tsi un tsa cundaca ñaha un.

Tyin maa un javahá tandihí tsa iyó.

Tan tsa cuenda tsa iyó iñi maa un, tan tsicoo tandihí tsa iyó, catyí ra naha.

5

Nu nyehe ra Juan iin tutu tan Mbee Ticatyi Luhlu tsa cuví ra Jesucristo

¹ Tacan tan nyehe yu tyin ra tsa nyaá nu tyayu can ndahá ra iin tutu tsihin ndaha cuaha ra. Tan yihí tuvi tutu can tan nyaá letra ityi nuu tan ityi tsata can. Ndasí tsi tsihin utsa sellu. ² Tan nyehe yu iin ángel tsa nyee xaan. Tan caná tsaa ra tan catyí ra:

—¿Yóo taahán tsi nacani tutu ihya tan jocon sellu ihya? —catyí ra.

³ Maa tyin ndi intuhun tsa iyó andivi tan nu ñuhu ñayivi, tan tsitsi ñuhu, tan cuví nacani tutu can. Nduve maa náa cuví nyehe nuu tsi. ⁴ Tan tsacú xaan yu, tsa tsito yu tyin yoñi maa cuví nacani tutu can tan cuví cahvi, tan cuví nyehe nuu tsi. ⁵ Tacan tan catyí iin ra tsahnu tsa nyaá can tsihin yu:

—Ña vacu ca un. Tyin ra cuví Ndicaha [o cuñi tsi catyí, ra ndacá ñaha], ra cuví tata ra Judá, tan tata ra rey David, ra ican jahá canaa tan juvin ra cua nacani tutu can tan jocon tsa utsa sellu tsa ndasí tutu can —catyí ra.

⁶ Tacan tan mahñu tyayu can tan mahñu tsa cumi tsa nyito can, tan mahñu ra tsahnu can naha ra, nyehe yu nyaá nyityi iin Mbee Ticatyi Luhlu. Tan caá ti tumaa caá iin mbee tsa tsahñi nyivi tan jamañi ñi. Tacan caá ti. Tan

iyó utsa ndiqui ti tan nyecú utsa tinuu ti. Tan tinuu can cuví tsa utsa tatyí ii tsa jacuhun Nyoo tanií cahnu nu ñuhu ñayivi. ⁷ Tan ra Mbee Ticatyi Luhlu can tsahan ra nu nyaá ra nyaá nu tyayu can tan quihin ra tutu tsa ndahá ra can nu ndaha cuaha ra. ⁸ Cuhva tsa quihin ra tutu can, tandihi tsa cumi tsa nyito can tan tandihi tsa oco cumi ra tsahnu can tsicuiñi tsiti ra naha nuu ra. Tan tsa intuhun intuhun ra tsahnu can naha ra ndahá ra naha arpa tsa iyó cuerda tumaa iyó cuerda nuu guitarra. Tan tsitu cutu tsitsi copa xuhun cuaan ndahá ra naha. Tan cutu can cuví tandihi tsa tsicán tahvi nyivi yihí cuenda Nyoo. ⁹ Tan tsitá ra naha iin yaa tsaa, tan catyí ra naha:

Yooho cuví ra taahán tsi quihin tutu ihya tan jocon un tsa utsa sellu tsa ndasí itsi.

Tyin tsahñi nyivi tsi un. Tan tsihin niñi un jatá un tsi ndi tyin coo vaha ndi tsihin Nyoo.

Tan cuví ndi nyivi ñuu nyihi tan ñuu nahnu tsa iyó tanií cahnu nu ñuhu ñayivi, nyivi caahán siin siin yuhu, tan nyivi siin siin tata.

¹⁰ Tsaḥá un tsa cuví ndi rey tan jutu tsa cuenda Nyoo Jutu yo.

Tan cua cundaca ñaha ndi tsi nyivi iyó nu ñuhu ñayivi, catyí ra naha, tsitá ra naha.

¹¹ Yahá can tan tsiñi yu ndusu tan nyehe yu nyecú cuenda millón ángel tanií canduvi nu nyecú ra tsahnu can naha ra, nu nyecú tsa cumi tsa nyito, tan xiin tyayu can. ¹² Tan ñihi caahán ángel can naha ra, tan catyí ra naha:

Ra Mbee Ticatyi Luhlu tsa tsahñi nyivi,

juvin ra taahán tsi cundaca ñaha, tan naquihin cuenda tsa cuca.

Tan juvin ñi ra taahán tsi naquihin cuenda tsa tsiñi tuñi tan tandihi tunyee iñi.

Na jacahnu yo tsi ra tan na jacahnu tandihi nyivi tan tandihi tsa iyó tsi ra, tyin cahnu xaan cuví ra, catyí ángel can naha ra.

¹³ Tan tsiñi tucu yu tsa caahán tandihi tsa javahá Nyoo; tandihi tsa iyó andivi, tan nu ñuhu ñayivi, tan tsitsi ñuhu, tan tsitsi ndutya ñuhu; tan catyí tsi naha tsi:

Cahnu xaan cuví ra tsa nyaá nu tyayu.

Cahnu xaan cuví ra Mbee Ticatyi Luhlu.

Tan tunyee iñi tsa iyó tsi ra naha ña cua cundihí maa tsa iyó tsi.

Tan taahán tsi tsa jacahnu yo tan tyaa yahvi yo tsi ra naha tacan ñi maa —catyí tandihi tsa javahá Nyoo.

¹⁴ Tan catyí tsa cumi tsa nyito can:

—¡Na cuví tsi tacan! —catyí tsi naha tsi.

Tan tsicuiñi tsiti tsa oco cumi ra tsahnu can naha ra tan jacahnú ra naha tsi ra tsa ña cua cundihí maa.

6

Nu jocon ra Jesucristo tsa utsa sellu tsa ndasí tutu can

¹ Tacan tan nyehe yu nu jocon ra Mbee Ticatyi Luhlu can sellu tsa jihna ñi tsitsi tsa utsa sellu can. Tan tsiñi yu ndusu iin tsa nyito can tan ndusu tsi cuví tumaa nu caahán savi, tan catyí tsi:

—¡Naha, tan nyehe un! —catyí tsi tsihin yu.

² Tacan tan nanyehe yu tan nyehe yu iin cuayu cuitsin, tan ra yosó tsi ti ndahá ra iin nduva. Tan ñihí ra iin corona yihí jiñi ra, yacan jahá canaa ra, tan ndi nyaá ca cua jaha canaa ca ra.

³ Tan tsa joçon ra Mbee Ticatyi Luhlu can tsa tsinu uvi sellu can, tsiñi yu tsa caahán inga tsa nyito can tan catyí tsi:

—iNaha, tan nyehe un! —catyí tsi tsihin yu.

⁴ Tan quita iin cuayu cuaaha. Tan ra tsa yosó tsi ti ñihj ra ndatu tsa quinyaa ra tsa taxin iyó nu ñuhu ñayivi, tyin tacan tan cahñi tahan nyivi tsi ñi. Tan ñihj ndihí ra iin mityi cahnu cundahá ra.

⁵ Tan tsa joçon ra Mbee Ticatyi Luhlu can tsa tsinu uñi sellu can, tsiñi yu tsa caahán inga tsa nyito can tan catyí tsi:

—iNaha, tan nyehe un! —catyí tsi tsihin yu.

Tan nanyehe yu, tan nyehe yu iin cuayu tuun. Tan ra yosó tsi ti, ndahá ra iin ticatya. ⁶ Tan tsiñi yu caahán iin ndusu mahñu tsa cumi tsa nyito can, tan catyí tsi:

—Tumaa tyahví nyivi tsi iin musu tsa iin quivi, tacan yahvi tsa intuhun ñi kilu nuñi. Tacan tucu ñi tsa uñi kilu cebada. Tan ña jativi ndo aceteye tan vinu —catyí ndusu can.

⁷ Tan tsa joçon ra Mbee Ticatyi Luhlu can tsa tsinu cumi sellu can, tsiñi yu tsa caahán intuhun ca tsa nyito can, tan catyí tsi:

—iNaha, tan nyehe un! —catyí tsi tsihin yu.

⁸ Tan nanyehe yu, tan nyehe yu iin cuayu cuaan. Tan ra yosó tsi ti nañi ra Tuhun Tsihi. Tan tsata ra can vatsi inga ra tsa nañi Nu Yucú Añima Ndiyi. Tan ñihj ra naha tunyee iñi tsa cahñi ra naha tsa cuaa nyivi iyó nu ñuhu ñayivi. Tyin tsitsi tsa sava nyivi iyó nu ñuhu ñayivi, cua cahñi ra naha sava ñi. Tan cua cahñi ra naha tsi ñi tsihin tsa jacoo ra naha cuatyí, tan tsihin tama, tan tsihin cuehe, tan tsihin quití xaan iyó nu ñuhu ñayivi.

⁹ Tan tsa joçon ra Mbee Ticatyi Luhlu can tsa tsinu uhun sellu can, nyehe yu xuu altar. Tan ican yucú añima nyivi tsa tsihi tsa cuenda tsa jacoto ñi tuhun Nyoo. ¹⁰ Tan caná tsa ñi tan catyí ñi tyehen:

—Jutu Mañi ndi, ra ii cuví un, tan jandaá un tandihí tsa caahán un tyin javaha un. ¿Ama cua tatsi tuñi un tsi nyivi tsa tsañi tsi ndi tsa cuenda un? —catyí ñi.

¹¹ Tacan tan ñihj intuhun intuhun ñi jahma cuitsin tsa cunditsi ñi. Tan catyí ra tsihin ñi na quitatu ñi tan cuatu ñi juhva ca quivi, nda cuanda cahñi nyivi tsi tandihí ca ñi tsa jahá tyiñu tyiñu ra Cristo, ñi tsa taahán tsi cúu tumaa tsihi tucu maa ñi.

¹² Tan tsa joçon ra Mbee Ticatyi Luhlu can tsa tsinu iñu sellu can, nyehe yu tyin ñihí xaan taán. Tan ndutuun ñicanyii tumaa tuun jahma nyivi iyó tucuihya iñi. Tan yoo nducuaaha tsi tumaa cuaaha ñiñi. ¹³ Tan tiñuu cucoyo tsi nu ñuhu ñayivi tumaa cucoyó tsiti yutya yutun tatun ñihí yahá tatyí. ¹⁴ Tan andivi tsiquihí tuvi tsi tumaa tyihí tuvi yo iin ndaha tutu. Tan tandihí yucu tan ñuhu nyihí tsa cayucú mahñu ndutya ñuhu nasamá nu cayucú tsi. ¹⁵ Tan tandihí rey tsa iyó nu ñuhu ñayivi tsihin ra nahnu naha ra, tan ra cuca naha ra, tan ra cuví ityi nuu tsihin andaru naha ra, tan ra iyó xaan tunyee iñi tsi naha ra, tan tandihí nyivi tsa cuví musu, tan ñi tsa ñavin musu cuví, quihvi xeehe ñi tsitsi yavi yuu tan tyañu cava tsa iyó yucu nahnu. ¹⁶ Tan catyí ñi tsihin yucu can tan tsihin yuu can:

—Cucoyo ndo tsata ndi, na ña nyehe ra nyaá nu tyayu can tsi ndi tan coto tatsi tuñi ra Mbee Ticatyi Luhlu can tsi ndi.

¹⁷ Tyin tsa tsaá quivi cahnu tsa cua tatsi tuñi ra tsi ndi, tan yoñi cunyee iñi can —catyí ñi.

7

Nu ñihí nyívi Israel tuñi cunyaq nutyaan ñi

¹ Tsa yaha can tan nyehe yu nyecú cumi ángel tsa ndihí tsa cumi tutun ñuhu ñayívi ityi nu tuhvá tatyí queé tyin tacan tan ña yaha tatyí nu ñuhu ñayívi tan nu ndutya ñuhu tan nu yutun. ² Tan nyehe tucu yu quee inga ángel, ityi nu caná ñicanyii, tan ndahá ra tuñi Nyoo nyito. Tan cana tsa ra tsi tsa cumi ángel tsa ñihí ndatu tsa jatívi nu ñuhu ñayívi tan nu ndutya ñuhu. Tan catyí ra tsihin ra naha:

³ —Ña jatívi naha ndo nu ñuhu ñayívi, ndi nu ndutya ñuhu, tan ndi nu yutun tsa ndi cumañi ca janaha ndi yóo nyívi cuví musu Nyoo, tyin cua tyaa ndi tuñi nutyaan intuhun intuhun ñi —catyí ángel can.

⁴ Tan catyí ra tsiñi yu tyin cientu uvi xico cumi mil cuví nyívi Israel tsa tsinyaq tuñi can. ⁵ Utsi uvi mil nyívi tata ra Judá tsinyaq tuñi, tan utsi uvi mil nyívi tata ra Rubén, tan utsi uvi mil nyívi tata ra Gad, ⁶ tan utsi uvi mil nyívi tata ra Aser, tan utsi uvi mil nyívi tata ra Neftalí, tan utsi uvi mil nyívi tata ra Manasés, ⁷ tan utsi uvi mil nyívi tata ra Simeón, tan utsi uvi mil nyívi tata ra Leví, tan utsi uvi mil nyívi tata ra Isacar, ⁸ tan utsi uvi mil nyívi tata ra Zabulón, tan utsi uvi mil nyívi tata ra José, tan utsi uvi mil nyívi tata ra Benjamín. Tandihí ñi can tan tsinyaq tuñi Nyoo tsi ñi.

Nu nyehe ra Juan tsi nyívi nditsí jahma cuitsin

⁹ Tsa yaha can tan nyehe yu yucú cuaha nyívi. Tan yoñi maa cuví nacahvi tsi ñi, tyin cuaha xaan ñi. Yucú nyívi quee tandihí ñuu nyihi tan ñuu nahnu tsa iyó tanñi cahnu nu ñuhu ñayívi. Tan yucú nyívi caahán siin siin yuhu. Tan yucú nyívi siin siin tata. Tan nyecú ñi nuu ra nyaá nu tyayu, tan nuu ra Mbee Ticatyí Luhlu. Nditsí ñi jahma cuitsin. Tan ndahá ñi ndaha ndicaha. ¹⁰ Tan tandihí ñi caná tsa ñi tan catyí ñi:

Nyoo Jutu yo, ra nyaá nu tyayu, tan ra Mbee Ticatyí Luhlu, juvin ra naha jacacu tsi yo —catyí ñi caná tsa ñi.

¹¹ Tan tandihí ángel naha ra nyecú ra naha tani canduvi nu nyaá tyayu, nu nyecú ra tsahnu naha ra, nu nyecú tsa cumi tsa nyito. Tan tsicuiñi tsiñi ra naha tan tsaquin ra naha nuu ra naha nda nu ñuhu ityi nuu ra nyaá nu tyayu can. Tan jacahnú ra naha tsi ra tyin juvin ra cuví Nyoo. ¹² Tan catyí ra naha: Tyehen taahán tsi jacahnu ndi tsi un, Jutu Mañi ndi tyin iyó xaan tsa tsiñi tuñi tsi un:

Nacuhvá xaan ndi tyahvi nyoo tsi un.

Tan jacahnú ndi tsi un tyin iyó xaan tunyee iñi tsi un, Nyoo Jutu ndi.

Tan na cuvi tsi tacan tandihí tyembu, catyí ra naha.

¹³ Tacan tan tsica tuhun iin ra tsahnu can tsi yu tan catyí ra:

—¿Yóo nyívi cuví ñi nditsí jahma cuitsin ihya? ¿Tan ndáa ityi quee ñi? —catyí ra.

¹⁴ Tan catyí yu tsihin ra:

—Maa un tsitó, tata.

Tan catyí ra tsihin yu:

—Nyívi ihya cuví ñi nyehe tundoho cahnu. Maa tyin nacatya ñi jahma ñi tsihin ñiñi ra Mbee Ticatyí Luhlu tan nducuitsin tsi. ¹⁵ Yacan cuenda nyecú ñi ityi nuu tyayu nu nyaá Nyoo. Tan jahá tyiñu ñi tyiñu ra nduvi tan ñiñu tsitsi vehe ñuhu ra. Tan ra tsa nyaá nu tyayu can jahá cuenda ra tsi ñi tsihin tsa nyaá ra tsihin ñi. ¹⁶ Tan ña cua cusoco ca ñi, ndi ña cua na ityi ca iñi ñi. Ña

cua cahmi ca ñicanyii tsi ñi. Tan ndi ña tuñu ca cuñi ñi tsihin tsa ihñi. ¹⁷ Tyin ra Mbee Ticatyí Luhlu tsa nyaá mahñu tyayu can cua jaha cuenda ra tsi ñi, tumaa jahá cuenda yo mbee. Tan cua cundaca ra tsi ñi nu coho ñi ndutya tsa tsahá tsa coo cuii ñi. Tan Nyoo cua nacuhva ra tandihi ndutya nuu ñi —catyí ra tsihin yu.

8

Nu jocõn ra Jesucristo tsa tsinu utsa sellu tan nu quitá iin ángel tsihin iin cuu xuhun cuaan

¹ Tan tsa jocõn ra Mbee Ticatyí Luhlu tsa tsinu utsa sellu tsa ndasí tutu can, ndutaxin nda andivi tumaa sava hora.

² Yahá can tan nyehe yu nyecú utsa ángel ityi nuu Nyoo. Tan intuhun intuhun ra naha quihin cuenda ra naha iin trompeta. ³ Yahá can tan tsaa inga ángel tsa ndahá iin cuu xuhun cuaan. Tan tsinyaq nyityi ra ityi nuu altar can. Tan quihin cuenda ra cuaha xaan cutu, tyin cuhva cuenda ra itsi iin caa ñi tsihin tsa tsicán tahvi nyivi tsi Nyoo nuu altar xuhun cuaan tsa nyaá ityi nuu tyayu Nyoo. ⁴ Tan quitá yuhma cutu tan yuhma tsa tsicán tahvi nyivi tsi Nyoo ndaha ra, tan cuahán yuhma can nu nyaá Nyoo. ⁵ Tacan tan ángel can quihin ra cuu can tan jacutu ra can tsihin tuun ñuhu tsa quitá nu altar can. Tan tyoso ra can nu ñuhu ñayivi. Tan quitsahá caahán savi, tan iyo cuvi. Tan ñihi tatsa, tan quitsahá taán.

Nu tiví ángel naha ra trompeta

⁶ Tacan tan tsa utsa ángel tsa ndahá trompeta can, ndatú ra naha tsa tiví ra naha can.

⁷ Tsa tiví iin ángel can trompeta tsa ndahá ra, quitsahá cuún savi tan cucoyó yuu savi, ñihi cayú ñuhu tan sacá nuu ñiñi tsihin can. Tan tsa yatyin cayú sava ñuhu ñayivi, tan tsa yatyin tucu sava cuhva nyaá cuhu tsitsa tan tandihi cuhva nyaá cuhu cuii.

⁸ Tan tsa tiví tsa tsinu uvi ángel can trompeta tsa ndahá ra, nyehe yu cayú tumaa iin yucu cahnu. Tan nacava can mahñu ndutya ñuhu. Tan tsa yatyin sava ndutya ñuhu can nanduví tsi niñi. ⁹ Tan tsa tandihi quiti iyó tsitsi ndutya ñuhu can tsihí tsa yatyin sava ti naha ti. Tan tahvi cuatyí tucu tsa yatyin sava yutun ndoo cuaha tsa iyó tsitsi ndutya ñuhu can.

¹⁰ Tan tsa tiví tsa tsinu uñi ángel can trompeta tsa ndahá ra, nacava iin tiñuu cahnu. Cayú tsi tumaa cayú yiti. Tan nacava tsi siqui tsa yatyin ña sava yutya nahnú tan tsa yatyin ña sava nu ndohyo. ¹¹ Tan sivi tiñuu cahnu can cuví Ajenjo. Tan tsa yatyin ña sava ndutya tsa iyó, ndu uvá tsi tumaa tsa uva xaan ajenjo can. Tan cuaha xaan nyivi tsihí tyin tsihí ñi ndutya tsa ndu uvá can.

¹² Tan tsa tiví tsa tsinu cumi ángel can trompeta tsa ndahá ra, ndu naq tsa yatyin ña sava ñicanyii, tan tsa yatyin ña sava yoo, tan tsa yatyin ña sava tiñuu ndunaq tsi naha tsi. Tan tsa cuenda tsa ndunaq juhva ñicanyii, ndunaq nu ñuhu ñayivi cumi hora tsa iin iin nduvi. Tan tsa cuenda tsa tiví juhva yoo tan tiñuu, ña ndunditsin maa nu ñuhu ñayivi cumi hora tsa iin iin tsacuaa.

¹³ Yahá can tan nyehe yu iin ángel ndavá ra mahñu andivi tan tsiñi yu tsa caahán ra. Tsihin tsa ñihi ndusu ra catyí ra:

—iNdahvi nyivi iyó nu ñuhu ñayivi tsa cua tiví tsa uñi ca ra ángel naha ra trompeta tsa ndaha ra naha! —catyí ángel can.

9

¹ Tacan tan tsa tiví tsa tsinu uhun ángel can trompeta tsa ndahá ra, nyehe yu quee iin tiñuu ityi andivi. Tan nacava can nu ñuhu ñayivi. Tan quihín cuenda can ndaha tucu tsa cuenda yavi cunu tsa nduve maa nuu tsindihi. ² Tacan tan nuña can yuhu yavi can. Tan quitá cuaha yuhma tumaa quitá yuhma tsitsi iin ono cahnu. Tan tyasi yuhma can nuu ñicanyii tan nasaca nuu can tsihin tatyí. Tan ndunaá nu ñuhu ñayivi. ³ Tan tsitsi yuhma can quitá tica xama. Tan ndava ti naha ti nu ñuhu ñayivi. Tan ñihí ti naha ti ndatu tsa tyaa ti naha ti tsi nyivi tumaa tyaa tujuhma tsa iyó nu ñuhu ñayivi. ⁴ Quihín ti naha ti tuhun tyin na ña jativi ti naha ti cuhu tsa iyó nu ñuhu ñayivi, ndi cuhu cuii, tan ndi yutin. Maa tyin na tyaa ti naha ti tsi nyivi tsa nduve tuñi Nyoo nyaá nutyaan. ⁵ Ña ñihí ndatu ti naha ti tsa cahñi ti naha ti tsi nyivi, tyin tyaa ñi maa ti naha ti tsi ñi. Tan quihí xico ti tsi ñi uhun yoo. Tan xico uhvi can uhvi tsi tumaa uhvi nyivi tsa tyaa tujuhma. ⁶ Quivi can nyivi cua nanducu ñi tuhun tsiihi. Maa tyin ña cua nañihi ñi can. Tan vasu ndi maa cuñi ñi cúu ñi, tuhun tsiihi cua cunu tsi nuu ñi tyin ña cua cúu ñi.

⁷ Tica xama can caá ti tumaa caá cuayu tsa tsicá cuatyí. Tan jiñi ti naha ti yihí tsa caá tumaa caá corona xuhun cuaan. Tan nuu ti naha ti caá tumaa caá nuu nyivi. ⁸ Tan ixí jiñi ti naha ti caá tumaa caá ixí jiñi ñaha. Tan nuhu ti naha ti caá can tumaa caá nuhu ndicaha. ⁹ Tan soo ti naha ti caá tumaa caá caa. Tan ñihi xaan cundatsán nditsin ti naha ti, tumaa cundatsán carreta cuayu cuaha tsa tsinú nu iyó cuatyí. ¹⁰ Tan juhma ti naha ti caá tumaa caá juhma tujuhma, tyin yihí iñu can. Tan tsihin can cua tyaa ti naha ti tsi nyivi tsitsi tsa uhun yoo. ¹¹ Tan iyó iin nu cuví ityi nuu tsihin tica xama can naha ti. Tan nu ican cuví tatyí tsa ndacá ñaha yavi cahnu tan cunu tsa nduve maa nu tsindihi. Tan tsa tsihin yuhu hebreo nañi nu Abadón. Tan tsihin yuhu griego nañi nu Apolión, tan cuñi tsi catyí: Nu Janaá.

¹² Tsa yaha iin tundoho, tan cumañi uvi taahan ca.

¹³ Tan tsa tiví tsa tsinu iñu ángel can trompeta tsa ndahá ra, tsiñi yu iin ndusu tsa quitá tsitsi tsa cumi ndiqui tsa nyecú tutun altar xuhun cuaan tsa nyaá ityi nuu Nyoo. ¹⁴ Tan ndusu can caahán tsi tsihin tsa tsinu iñu ángel tsa ndahá trompeta can, tan catyí tsi:

—Ndatsi tsi tsa cumi ángel tsa nuuhñi yatyin yuhu yutya cahnu Eufrales —catyí ndusu can.

¹⁵ Tacan tan ndatsj ra tsi tsa cumi ángel can, tyin tsa ndatu xaan ra naha ora can, qui vi can, yoo can, cuiya can, tyin cahñi ra naha tsi tsa yatyin sava nyivi iyó nu ñuhu ñayivi. ¹⁶ Tan tsiñi yu tyin uvi cientu millón andaru tsa yosó cuayu.

¹⁷ Tacan nyehe yu cuayu jaha Nyoo. Tan ra yosó cuayu can naha ra nyaá caa cuaaha, azu tan cuaan yiqui nyica ra naha. Tan jiñi cuayu ra naha caá tumaa caá jiñi ndicaha. Tan tsitsi yuhu ti naha ti quitá ñuhu tan yuhma tan azufre. ¹⁸ Tan tsa yatyin sava nyivi iyó nu ñuhu ñayivi tsihi tsihin tsa uñi tsa quitá yuhu cuayu can naha ti: ñuhu tan yuhma tan azufre. ¹⁹ Tyin iyó tunyee iñi tsi ti naha ti tsitsi yuhu ti naha ti tan nu juhma ti naha ti. Tyin juhma ti naha ti caá tumaa caá coo tan nuu juhma ti naha ti caá tumaa caá jiñi coo. Tan tsihin yacan jañicuehé ti naha ti tsi nyivi.

²⁰ Maa tyin tandihi ca nyivi tsa ndoo, ñi tsa ña tsihi tsihin tundoho can, ña jandihí ñi tsa javahá ñi tsa ña vaha. Ndi tsa jacahnú ñi tatyí ña vaha tan ndi tsi tsitoho tsa tsinú tsihin xuhun cuaan, xuhun cuitsin, bronce, yuu, tan yutin:

tsitoho tsa ña cuví nyehe, ndi ña tsiñí, ndi ña cuví caca. ²¹ Ndi ña jandihí ñi tsa tsahñí ñi nyívi, tan javahá ñi tsa tasi. Tan ñiñaha ña jandihí ñi tsa tsicá nuu ñi tshin rayii, tan rayii ña jandihí ra naha tsa tsicá nuu ra naha tshin ñaha vasu ndi maa ña tindahá ñi. Tan ña jandihí ñi tsa suhú ñi.

10

Ángel tsa ndahá libru luhlu

¹ Tacan tan nyehe yu inga ángel tsa iyó xaan tunyee iñi. Quee ra ityi andívi tan vatsí nuú ra tsitsi vico. Tan nyaá coo cuiya jiñi ra. Tan nuu ra xiñu xaan can tumaa xiñu ñicanyii. Tan tsaha ra caá tumaa nyaá nyityi ñuhu tsa cayú. ² Tan ndahá ra iin libru luhlu nuñá nuu tsi. Tan tsañí tsaha cuaha ra nu ndutya ñuhu tan tsaha satyin ra nu ñuhu ñayívi. ³ Tacan tan caná tsaa ra, tumaa taná ndicaha tsa cuxaán ti. Tan cuhva tsa caná tsaa ra, tsiñí yu utsa ndusu tumaa cuví nu caahán savi, tan intuhun intuhun tsi caahán tshin ndusu maa tsi. ⁴ Tsa yahá tsa tsiñí yu tsa utsa ndusu can, tan cua tyaa yu can nu tutu. Maa tyin tsiñí yu caahán iin ndusu nda andívi, tan catyí tsi tshin yu: —Ñaquihin xeehe tuhun tsa cahán tsa utsa ndusu can. Tan ña tyaa un can nu tutu —catyí ndusu can.

⁵ Tacan tan ángel tsa nyehe yu tsa tsañí nu ndutya ñuhu tan nu ñuhu ñayívi, jandaa ra ndaha cuaha ra ityi andívi. ⁶ Tan ángel can catyí ra:

—Na nyehe maa Nyoo ra ña cua cundihi maa, ra tsa javahá andívi tan ñuhu ñayívi tan ndutya ñuhu tan tandíhi tsa iyó nuu tsi tyin nduve ca tsa cucuee. ⁷ Tyin cuhva tsa cua quitsaha tiví tsa tsinu utsa ángel can trompeta tsa ndahá ra, cuhva can cua cundaa tuhun xeehe tsa catyí Nyoo tyin javaha ra, tumaa cahán ra tshin ra jahá tyiñu tyiñu ra, ra cuví ndusu yuhu ra —catyí ángel can.

⁸ Tan ndusu tsa quitá andívi, tsa cahán jihna tshin yu, juvin tsi caahán tshin yu tyehen:

—Cuaahan cuaquihin libru luhlu tsa nandicá tsa ndahá ra ángel tsa tsañí nu ndutya ñuhu tan nu ñuhu ñayívi —catyí tsi.

⁹ Tacan tan tsahán yu nu nyaá ángel can tan tsicán yu libru luhlu can tsi ra, tan catyí ra tshin yu:

—Juhun, çatsi itsi. Vixi xaan tsi cua cuví tsitsi yuhu un, tumaa vixi ndutya ñuñu. Maa tyin cua ndu uva tsi tsitsi un —catyí ra tshin yu.

¹⁰ Tacan tan quihin yu libru luhlu tsa ndahá ra, tsatsj yu. Tsa ndi nyí tsi tsitsi yuhu yu, vixi xaan tsi tumaa vixi ndutya ñuñu. Maa tyin tsa coco yu itsi, ndu uvá tsi tsitsi yu. ¹¹ Tacan tan catyí ra naha tshin yu:

—Cuñí tsi tsa cahán nyico un inga tsaha tuhun tsa caahán Nyoo siqui nyívi tsa iyó ñuu nyihi tan ñuu nahnu, tan nyívi caahán siin siin yuhu, tan siqui ra cuví rey naha ra —catyí ra tshin yu.

11

Nduvi ra tsa cuví tsandaa naha ra

¹ Tacan tan tsahá ra naha iin ndoo tsi yu. Caá tsi tumaa caá yutun tsa tuhvá yo tyihí cuhva tshin. Tan catyí ra naha tshin yu:

—Nduvita tan tyihí cuhva un vehe ñuhu Nyoo tan altar ra, tan çahvi najava taahan nyívi jacahnú tsi ra tsitsi vehe can. ² Maa tyin ña tyihí cuhva un nuquehe vehe ñuhu can, tyin tsa cuenda nyívi inga ñuu cuví can. Cua vaca tsaha ñi nu ñuu ii tsitsi tsa uñi cuiya sasava. ³ Tan yuhu cua jacuhun yu uvi

ra tsa cua cuvi tsandaa tan cahan tuhun yu tsitsi tsa mil uvi cientu uñi xico quivi. Tan cunditsi ra naha jahma tucuihya iñi.

⁴ Tan tsa nduvi tsandaa can cuví uvi yutun olivo tan uvi candileru tsa nyecú nu Jutu Mañi yo, ra ndacá ñaha nu ñuhu ñayivi. ⁵ Tan nyivi tsa cua cuñi jañicueehe tsi ra cuví tsandaa can naha ra, cua naa cuii nuu ñi. Tyin cua quita ñuhü yuhu ra naha, tan tshihin can cua cahmi ra naha tsi tandihi nyivi xaan iñi tsi ra naha. ⁶ Tan iyó ndatu tsi ra naha tsa casi ra naha nu cuun savi tandihi quivi tsa cua cuhva cuenda ra naha tuhun caahán Nyoo tshihin ra naha tsi nyivi. Tan iyó tucu ndatu tsi ra naha tsa jananduvi ra naha ñiñi ndutya. Tan iyó tucu ndatu tsi ra naha tsa janyehe ra naha tundoho tsi nyivi iyó nu ñuhu ñayivi tshihin tandihi nuu cuehe. Tan cuví javaha ra naha yacan najava tsaha cuñi maa ra naha. ⁷ Maa tyin tsa cua ndihi cuhva cuenda ra naha tuhun Nyoo tsi nyivi, cua quita quiti xaan yavi cunu can, tan cua cañi tahan ti tshihin tsa nduvi taahan ra cuví tsandaa can. Tan cua jaha canaa ti tsi ra naha. Tan cua cahñi ti tsi ra naha. ⁸ Tan cua cava cuñu ñuhu ra naha tsitsi calle ñuu nu tsahñi nyivi tsi Jutu Mañi yo tan tyaa ñi tsi ra nuu cruu. Tan cua cuvi ñuu can tumaa ñuu Sodoma tan ñuhu Egipto, [tsa cuenda tsa ña vaha tsa cua javaha nyivi ñuu can]. ⁹ Tan tsitsi tsa uñi quivi sasava, cua nyehe tandihi nyivi cuñu ñuhu ra naha; nyivi iyó tandihi ñuu nyihi, nyivi tandihi ñi tata, tan ñi caahán siñ siñ yuhu, tan ñi iyó ñuu nahnu, cua nyehe ñi cuñu ñuhu ra naha. Tan ña cua cuhva ñi tsa quihí xeehe cuñu ñuhu ra naha tsitsi ñuhu. ¹⁰ Tan sii xaan cua cuñi ñi tsa cuenda tsa cua cúu ra can naha ra. Tan nda cuanda cua jacuhun ñi regalo tsi tahan ñi tsa cuenda tsa sii cuñi ñi tsa cua cúu nduvi taahan rayi tsa cahan tuhun Nyoo tshihin ñi. Tyin cuñi maa ñi tyin tsahá xaan ra naha tundoho tsi ñi. ¹¹ Maa tyin tsa cua yaha tsa uñi quivi sasava, Nyoo cua janandoto ra tsi ra naha, tan nduvita nyico ra naha inga tsaha. Tan tandihi nyivi tsa cua nyehe tyin cua nandoto ra naha, cua nayuhvi xaan ñi. ¹² Tan tsa yahá tsa tsihí ra naha tan nyehe yu nandoto ra naha, tan catyí iin ndusu ityi andivi tshihin ra naha:

—Ñaha ndo nyehe

Tacan tan nandaá ra naha ityi andivi tsitsi vico. Tan nyehe nyivi xaan iñi tsi ra naha nu nandaá ra naha. ¹³ Tan ñihi xaan taan cuhva can. Tan tsitsi ñuu can taní cuaha xaan vehe. Tsitsi tsa utsi utsi vehe, taní intuhun intuhun tsi. Tan tsihí utsa mil nyivi jahá tsa taan can. Tan nyivi tsa ña tsihí, jacahnü ñi tsi Nyoo, ra nyaá andivi, tsa cuenda tsa yuuhvi ñi.

¹⁴ Yacan cuví tundoho tsa tsinu uvi tsa nyehe nyivi, maa tyin tsa vatsí tsa tsinu uñi.

Nu tiví tsa tsinu utsa ángel trompeta tsa ndahá ra

¹⁵ Tan tsa tiví tsa tsinu utsa ángel can trompeta tsa ndahá ra, tsiñi yu ndusu ñihi xaan ityi andivi, tan catyí tsi:

Tandihí nu ndacá ñaha rey nu ñuhu ñayivi, tsa yahá nanduví tsi tsa tsii Nyoo Jutu yo tan ra Cristo.

Tan ña cua ndihí maa tsa ndacá ñaha ra naha, catyí ndusu can.

¹⁶ Tacan tan tsa oco cumi ra tsahnü tsa nyecú nu nyaá Nyoo, tsicuiñi tsiti ra naha tan tsaquín ra naha nuu ra naha nda nu ñuhu. Tan jacahnü ra naha tsi Nyoo. ¹⁷ Tan catyí ra naha:

Jutu Mañi ndi Nyoo ndi. Ra iyó tandihí tunyee iñi tsi.

Tacan ñi iyó maa un. Juvín un cuví Nyoo nda tsanaha tan vityin, tan juvin un cua quitsi.

Tsahá xaan ndi tyahvi nyoo tsi un,

Tyin tsa naquih̄in cuenda un tunyee iñi un.

Tan tsa quitsah̄a ndacá ñaha un.

¹⁸ Tan vasu ndi maa cuxaán nyivi iyó tandihi ñuu nahnu.

Maa tyin tsa tsāa quivi tatsi tuñi un tsi ñi.

Tan tsa tsāa quivi tsa jacutuñi un tsi ndiyi.

Tan cuhva un tsa vaha tsa taahán tsi tsi nyivi jah̄a tyiñu tyiñu un, ñi tsāa cuenda tuhun caahán un,

ñi tsa nacuhv̄a cuenda añima ñi tsi un, tan jacahnú ñi sivi un.

Vasu ndi maa cahnu cuví ñi o ndaahvi ñi.

Tan tsa tsāa cuhva tsa janaa un tsi nyivi jatíví tsi nyivi iyó nu ñuhu ñayivi, catyí ra naha.

¹⁹ Tacan tan nuñ̄a yuvehe ñuhu Nyoo tsa iyó gloria, tan tsitsi vehe ñuhu can quituv̄i tsatun cuenda tsa ndoo ra tyiñu tsihin yo. Tan quihv̄i tatsa. Tan ñihí cuvaá tan caahán savi. Tan tāan. Tan ñihi xaan cucoyo yuu savi.

12

Nu nducú coo xaan tsa iyó ndaha tsi ñaha

¹ Tacan tan quituv̄i tsa iyó cahnu ityi andivi. Quit̄a iin ñaha tan nditsi ña ñicanyii tumaa nditsi yo jahma. Tan tsañí ña nu yoo. Tan yihí iin corona tsa utsi uvi tiñuu jiñi ña. ² Tan ñaha ihya ñuhú sehe ña. Tan tsacú xaan ña tsihin tsa cuuhví tsitsi ña, tyin nyehé xaan ña tundocho. ³ Tacan tan quit̄a inga tsa iyo ityi andivi. Tan nyehe yu iin coo xaan tsa iyó ndaha. Cuaaha ti tan cahnu ti. Tan iyó utsa jiñi ti, tan utsi ndiqui ti. Tan yihí corona intuhun intuhun jiñi ti. ⁴ Tan tsihin juhma ti jacoyo ti tsa yatyin sava tiñuu tsa iyó andivi nu ñuhu ñayivi. Tan coo can tsicuiñi ti nuu ñaha tsa cua cacu sehe, tyin cuñi ti catsi ti sehe ña náa cuhva cacu ñi maa tsi. ⁵ Tan ñaha can jacacú ña iin rayii. Tan juvin ra cua cundaca ñaha tandihi nyivi iyó nu ñuhu ñayivi. Ñihi xaan cua cundaca ñaha ra tumaa tsa tsihin iin tatun tsa cuví caa. Tan tsa yah̄a cacú ra, naquih̄in Nyoo tsi ra cuahán ra nu nyaá ra nu tyayu ra. ⁶ Tan cuahán ñaha can tsinú xeehe ña ñuhu ityi, nu janduvah̄a Nyoo coo ña, tyin ican cua cuhva ra tsa catsi ña tsitsi tsa miñ uvi cientu uñi xico quivi.

⁷ Yah̄a can tan tsicoo cuatyí nda andivi, cañi tahan ángel Miguel tan tandihi ángel tsa cutahán tsihin ra tsihin coo xaan can. Tan coo can tsihin tandihi tatyí ña vaha tsa cutahán tsihin ti, cañi tahan ti tsihin ángel Miguel. ⁸ Maa tyin ña cuv̄i jah̄a canaa ti tsa cañi tahan ti. Tan ña ñih̄i ca ti nu ndoo ti nda andivi tsihin tatyí ña vaha tsa cutahán tsihin ti. ⁹ Tacan tan tav̄a Nyoo tsi nu coo xaan can, nu Coo Tsaahnu, tan juvin ñi nu cuví nu ña vaha tan Satanás, juvin nu jandaví ñaha tsi tandihi nyivi iyó nu ñuhu ñayivi. Maa nu tan tatyí ña vaha tsa cutahán tsihin nu cucoyo nahnu nda nu ñuhu ñayivi.

¹⁰ Tacan tan tsiñ̄i yu iin ndusu ñihi xaan ityi andivi, tan catyí tsi:

—Vityin tsa tsāa quivi tsa jacacú Nyoo tsi nyivi. Tsa jah̄a canaa tunyee iñi Nyoo. Maa ra tan ra Cristo, Sehe ra, ndacá ñaha ra naha tyin tsa tav̄a ra naha tsi nu tsa tyāa xaan cuatyí siqui ñi nuu ra naha nduvi tan ñiñu. ¹¹ Tan jaha canaa ñi tsi nu tsihin ñiñi ra cuví Mbee Ticatyí Luhlu, tan tsihin tuhun Nyoo tsa cah̄an ñi tsihin nyivi. Ña nayuhv̄i ñi cúu ñi tan tsāa cuenda ñi ñayivi ñi. ¹² Yacan cuenda cus̄i iñi nyoocho tsa iyó andivi. Maa tyin jindahvi nyivi tsa iyó nu ñuhu ñayivi tan nu ndutya ñuhu! Tyin nu ña vaha nacav̄a nu nu ñuhu ñayivi nu yucú ñi. Tan xaan xaan cuñi nu tyin tsitó nu tyin ña cuaaha ca quivi tan cundih̄i tsa jandaví ñaha nu tsi ñi.

¹³ Tan tsa nyehe nu coo xaan tsa iyó ndaha can tyin nacava nu nu ñuhu ñayivi, quitsaha nyaá ndaha nu tsi ñaha tsa tsicoo sehe yíi can. ¹⁴ Maa tyin tsicoo uvi nditsin nahnu ñaha can tan caá can tumaa caá nditsin tasu. Tsicoo can tyin tacan tan cuví ndava ña tan cuhun ña cunu xeehe ña nu tsiqui nu ña cuví ñihi coo can tsi ña. Ican cuví nu cua ñihi ña tsa catsi ña tsitsi tsa uñi cuiya sasava. ¹⁵ Tan nu coo can tava nu ndutya tsihin yuhu nu, tyin coo yutya cahnu, tan tañi ñaha can tsitsi yutya can. ¹⁶ Maa tyin ñuhu ñayivi jatyinyee tsi tsi ña, tyin ndata tsi tan nanyee yutya tsa javaha nu coo tsihin ndutya tsa quita yuhu nu. ¹⁷ Tan tsa ña cuví jaha canaa nu tsi ña, quitsaha cañi tahan nu tsihin nyivi cuví tata ña, ñi tsa tyaá yahvi tuhun caahán Nyoo, tan nyicún ñi tsihin tsa ñi ñi añima ñi tsa nditsa tsa caahán ra Jesucristo.

13

Nu nyehé ra Juan uvi quiti caquiñi

¹ Tan tsinyaá nyityi yu nu nyiti yuhu ndutya ñuhu, nyehe yu quita iin quiti caquiñi nu ndutya ñuhu can. Tan iyó utsa jiñi ti, tan utsi ndiqui ti. Tan iin tan iin ndiqui ti yihí iin corona. Tan intuhun intuhun jiñi ti nyaá iin sivi tsa caahán ndavaha ñi tsi Nyoo. ² Quiti caquiñi can caá ti tumaa caá cuñi. Tsaha ti caá tumaa caá tsaha oso. Tan yuhu ti caá tumaa caá yuhu ndicaha. Tan nu coo xaan tsa iyó ndaha can tsaha nu ndatu tsi quiti caquiñi can tsa cunyaa ti nu tyayu nu. Tan tsaha nu ndatu tsi ti tsa cundaca ñaha ti. ³ Tan nyaá iin nu caahvi tsa cua cañi tsi ti jiñi ti, maa tyin ndaha nu caahvi can. Tan tsa nyehe nyivi iyó nu ñuhu ñayivi ihya can, iyo xaan cuñi ñi. Tan quitsaha nyicún ñi tsi ti. ⁴ Tan jacahnú ñi tsi nu coo xaan can, tyin tsaha nu ndatu tsi quiti can. Tan jacahnú tucu ñi tsi quiti can, tan catyí ñi:

—¿Yoñi maa cuví tumaa cuví quiti ihya? ¿Tan yoñi cuví cañi tahan tsihin ti? —catyí ñi.

⁵ Tan ñihí tucu quiti can ndatu tsa cahan ndasi ti tan cahan ti ndavaha ñi siqui Nyoo. Tan cua cundaca ñaha ti uvi xico uvi yoo. ⁶ Tacan javaha ti: Cahán ti tsi Nyoo. Cahán ti ndavaha ñi nu iyó ra, tan sivi ra, tan tsa iyó andivi. ⁷ Tan tsicoo tucu ndatu tsi ti tsa cañi tahan ti tsihin nyivi yihí cuenda Nyoo nda cuanda cuví jaha canaa ti tsi ñi. Tan ñihí ndatu tucu ti tsa quihí ndaha ti tsi nyivi ndihí ñi tata, nyivi caahán siin siin yuhu, nyivi iyó tandihí ñi ñuu nyihí, tan ñuu nahnu. ⁸ Tan nyivi tsa ña cua coo ñayivi tsa tsihin ra cuví Mbee Ticatyí Luhlu, ra tsa tsihí, ña cua coo ñi ñayivi tsa can tsa cuenda tyin ña tsinyaá sivi ñi nu libru ra tsa ndi cumañi ca tsinu ñuhu ñayivi. Tandihí maa ñi can cua jacahnu ñi tsi quiti caquiñi can.

⁹ Tatun yihí ndo iyó soho ndo, tyaá soho ndo tuhun ihya: ¹⁰ Nyivi tyihí tsi inga nyivi vehe caa, cua cuhun tucu maa ñi vehe caa. Tan nyivi tsa tsahñi tsihin tsa xaan, juvin ñi maa tsihin can cua cúu ñi. Yacan cuenda nyooho tsa yihí cuenda Nyoo cuñi tsi cunyeé ñi ndo tan tsjnu ñi ndo tsi ra.

¹¹ Yahá can tan nyehe yu quita inga quiti caquiñi tsitsi ñuhu. Tan iyó uvi ndiqui ti, caá can tumaa caá ndiqui mbee ticatyí luhlu. Maa tyin caahán ti tumaa caahán coo xaan tsa iyó ndaha can. ¹² Tan ndacá ñaha ti tumaa ndacá ñaha inga quiti caquiñi can. Tan nyehé inga quiti can tsa ndacá ñaha ti. Tan natyuhú ti tsi ñuhu ñayivi tan nyivi iyó nu tsi na jacahnu ñi tsi inga quiti caquiñi tsa cuñi cúu jaha tsa caahvi tsa tsinyaá tsi ti. ¹³ Tan cuaha xaan tsa iyo javaha ti nda cuanda quita ñuhu andivi tan janacava ti can nu ñuhu ñayivi tyin nyehe nyivi. ¹⁴ Tan jandaví ñaha ti tsi nyivi iyó nu ñuhu ñayivi

tsihin tsa iyo tsa cuví javaha ti nuu quití caquiñi tsa jihna ñi. Tava tyiñu ti na javaha ñi iin tsitoho quití caquiñi tsa tyahnya caahvi tsihin mityi, tan ña tsihi ti. ¹⁵ Tan quití caquiñi tsa tsinu uvi can tsicoo ndatu tsi ti tsa cuhva ti tsa coo nyito tsitoho quití caquiñi tsa jihna can tyin tacan tan cuví cahán tsi tan cahñi tsi tsi tandihi nyivi tsa ña cua jacahnú itsi. ¹⁶ Tan siin tyin catyí tsi tyin cunyaa tuñi tsi tandihi nyivi; nyivi nyihi, nyivi tsahnu, nyivi cuca, nyivi ndaahvi, nyivi iyó nuña, tan nyivi iyó tsitoho. Tan cua cunyaa tuñi can ndaha cuaha ñi a nutyaan ñi. ¹⁷ Tan yoñi maa cuví jata tan xico tatun nduve tuñi can nyaá tsi ñi, o tatun nduve sivi ti, o número sivi ti nyaá tsi ñi. ¹⁸ Tuhun ihya cuñi xaan tsi tsa tsiñi tuñi. Nyivi cutuñi iñi, na jaha cuenda ñi número quití caquiñi can. Tyin número rayi cuví can. Tan número can cuví iñu cientu uñi xico iñu.

14

Nu tsitá cientu uvi xico cumi mil nyivi iin yaa tan jacahnú ñi tsi Nyoo

¹ Yahá can tan nyehe yu tsi ra cuví Mbee Ticatyí Luhlu, nyaá nyityi ra jiñi yucu Sión. Tan yucú cientu uvi xico cumi mil rayi tsihin ra. Ra ihya naha ra cuví ra tsa nyaá sivi ra tan sivi Jutu ra nutyaan. ² Tacan tan tsiñi yu cucayú ityi andivi, tumaa cucayú yutya nahnu, tan tumaa caahán savi tsa ñihi xaan, o tumaa cuví nu javacu ra naha guitarra cuaha. ³ Tan tsitá ra naha iin yaa tsa nu nyaá Nyoo nu tyayu ra, tan nu nyecú tsa cumi tsa nyito, tan nu nyecú tandihi ra tsahnu naha ra. Tan yoñi maa cuví cutuhva yaa can, maa ñi maa tsa cientu uvi xico cumi mil rayi tsa cacú nu ñuhu ñayivi cuví tsitá can. ⁴ Ra ihya naha ra cuví ra tsa ña tsica nuu tsihin ñaha, tyin ii ra naha. Tan nyicún ra naha tsi ra cuví Mbee Ticatyí Luhlu tandihi ñi ityi cuahán ra. Cacú ra naha tan juvin ra naha jamañi tsi ra naha nuu Nyoo tan nuu ra cuví Mbee Ticatyí Luhlu tsa jihna ñi. ⁵ Yoñi cuví catyí tyin vatya ra naha, tyin tsa cuenda Nyoo nduve ca cuatyí ra naha iyó tan yucú ra naha nu nyaá ra nu tyayu ra.

Tuhun tsa jacoto uñi ángel

⁶ Tacan tan nyehe yu ndavá inga ángel ityi andivi. Tan nyisó ra tuhun Nyoo tsa ña cua cundihi maa, tan tuhun can cuví tsa jacacú ra Cristo tsi yo. Tyin jacoto ra tuhun can tsi nyivi iyó nu ñuhu ñayivi; nyivi iyó tandihi ñi ñuu nahnu, tan ñuu nyihi, nyivi tandihi ñi tata, tan nyivi caahán siin siin yuhu. ⁷ Tan ñihi xaan cahán ra tan catyí ra:

—Nayuhvi ndo tsi Nyoo, tan jacahnu ndo tsi ra. Tyin tsa tahán tsi cuhva tsa cua cutuñi nyivi. Jacahnu ndo tsi ra javaha andivi tan ñuhu ñayivi, tan ndutya ñuhu tan ndohyo —catyí ángel can.

⁸ Tan catyí inga ángel tsa vatsí nyicún tsi ra:

—Tsa nduva ñuu Babilonia tsa cuví ñuu cahnu, tsa taní tsi. Tyin nyivi iyó ñuu can jacuahá ñi tsa caquiñi tsa javahá ñi tsi inga nyivi iyó nu ñuhu ñayivi. Tumaa tsa tsiñi ñi tsihin vinu ña vaha, jahá ñi Babilonia cuví can —catyí ángel can.

⁹ Tacan tan vatsí tsa tsinu uñi ángel, tan ñihi cahán ra tan catyí ra:

—Tatun ndáa nyivi jacahnu tsi quití caquiñi can tan tsitoho ti, o cuhva ñi tsa cunyaa tuñi ti nutyaan ñi o ndaha ñi, ¹⁰ cua nyehe xaan ñi tundoho tyin cua tyihi Nyoo tsi ñi nu ñuhu, tan nu azufre. Tumaa tsa cua jacho ra vinu xaan tsi ñi nuu ángel tan nuu ra cuví Mbee Ticatyí Luhlu cuví can. ¹¹ Tan ña cua cundihi maa tsa quita yuhma nu nyehé ñi tundoho, tan ña cua quitatu maa ñi nduvi tan ñiñu. Ñi ihya cuví ñi tsa jacahnú tsi quití caquiñi can tan tsi tsitoho ti, tan tsahá ñi tsi ñi cunyaa tuñi sivi ti. ¹² Yacan cuenda nyivi yihí

cuenda Nyoo, tan tyaá yahvi ñi tuhun caahán ra, tan tsinú iñi ñi tsi ra Jesús, cuñí tsi tsa cunyeé iñi ñi —catyí ángel tsa tsinu uñi can.

¹³ Tacan tan tsiñi yu iin ndusu tsa quee nda andivi, tan catyí tsi tsihin yu:

—Tyaá tuhun ihya: “Vityin tan ityi nuu, sií xaan cua cuvi tsi nyivi cua cúu tun tsinú iñi ñi tsi Jutu Mañi yo.”

Tan catyí Tatyí Ii Nyoo:

Nditsa, sií xaan cua cuvi tsi ñi tyin cua quitatu ñi tan ña cua jaha tyiñu ca ñi. Tan cua coo tsa vaha tsa javahá ñi tsihin ñi.

Nu cua tatsi tuñi Nyoo tsi nyivi

¹⁴ Tacan tan nyehe yu iin vico cuitsin. Tan nu vico can nyaá iin ra caá tumaa caá ra ñuu ñayivi. Yihí corona xuhun cuaan jiñi ra. Tan ndahá ra iin mityi yacua tan xaan. ¹⁵ Tan quitá inga ángel tsitsi vehe ñuhu tan ñihi xaan caná tsaa ra tsi ra nyaá nu vico can. Tan catyí ra:

—Vityin jaha tyiñu tsihin mityi un, jataca cosecha un tsa iyó nu ñuhu ñayivi. Tyin tsa tsaa cuhva, tan tsa iyó nu ñuhu ñayivi tsa tsityí tsi —catyí ra.

¹⁶ Tacan tan ra tsa nyaá nu vico can jayahá ra mityi ra nu ñuhu ñayivi, tan naquihin ra tsa iyó nuu tsi.

¹⁷ Tacan tan quitá inga ángel tsitsi vehe ñuhu tsa iyó andivi. Tan juvin ñi ndahá tucu ra iin mityi yacua tsa xaan. ¹⁸ Tan quitá inga ángel nu nyaá altar, tan ra ihya iyó ndatu tsi ra tsa cundaca ñaha ra ñuhu tsa cayú. Tan caná tsaa ra tsi ra tsa ndahá mityi yacua tsa xaan can. Tan catyí ra tsihin ra:

—Jaha tyiñu tsihin mityi xaan tsa ndahá un juvin, tan cahnya cuenda ndoco yucu vixi tsa nañi uvas tsa iyó nu ñuhu ñayivi, tyin tsa tsityí tsi —catyí ra.

¹⁹ Tan jayahá ángel can mityi ra nu ñuhu ñayivi tan tsahnya ra uvas can. Tan tyihí ra itsi iin nu tyihí ra tyin cua cuhñi ra itsi tan quita ndutya tsi. Tan yacan cuñí tsi catyí tsa cua tatsi tuñi Nyoo tsi nyivi. ²⁰ Tan nacuhñi ra uvas can ityi tsata ñuu, tan cuñí tsi catyí tyin cuaha xaan nyivi tsihi, tan nu cuví can, cuaha xaan cuaha xaan ñihi ñi tsatí. Tan tsaa tsi nda nu sucun nu yihí frenu yuhu cuayu, tan tsinú tsi tumaa uñi cientu kilómetro.

15

Nu quitá ndihi utsa taahan ña tundoho tsa cua nyehe nyivi

¹ Nyehe yu inga tsa iyo cahnu andivi tan nayuhvi xaan yu, nyehe yu utsa ángel tsa vatsí ndacá utsa taahan ña tundoho. Tsihin tundoho ihya cua cundihí tsa xaan cuñí Nyoo nyehe ra tsi nyivi tsa ña tyaá yahvi tuhun caahán ra.

² Tan nyehe tucu yu iin tsa caá tumaa caá ndutya ñuhu tsa tsinú tsihin yutyi. Tan tumaa tsa nasacá ñuhu tsihin tsi. Tan nyivi tsa cunyeé jahá canaa tsi quitá caquiñi can tan tsi tsitoho ti, tan ña tsinyaá número sívi ti tsi ñi, tandihí ñi tan yucú ñi yuhu tsa nyehe yu can. Tan ndahá ñi tsa caá tumaa guitarra tsa tsahá Nyoo tsi ñi. ³ Tan tsitá ñi yaa ra Moisés, ra jahá tyiñu tyiñu Nyoo, tan yaa ra cuví Mbee Ticatyi Luhlu. Tan catyí yaa can tyehen: Cahnu tan iyo xaan caá tandihí maa tsa javahá un, Nyoo, Jutu ndi, iyó tandihí tunyee iñi tsi un. Ndoó xaan tan nditsa xaan ityi un,

Yooho Rey cuenda tandihí nyivi iyó nu ñuhu ñayivi.

⁴ ¿Yóo ña cua nayuhvi tsi un, yooho Jutu Mañi ndi?

¿Yóo ña cua jacahnu tsi un?

Tan intuhun ñi maa un cuví ra ii.

Tan cua quítsi nyívi quee tandíhi maa ñuu, tan cua jacahnu ñi tsi un, tyin nyehe ñi tsa vaha tsa javahá un, catyí yaa tsitá ñi.

⁵ Tacan tan nyehe yu nuñá yuvehe ñuhu tsa nyaá nda andívi nu yucú vaha nduvi tabla tsa nyaá ley Nyoo nuu. ⁶ Tan quitá utsa ángel tsa vatsí ndacá tsa utsa tundoho can tsitsi vehe ñuhu can. Ndítsi ra naha jahma vaha, cuitsin tan xiñu. Tan yíhí cinturón xuhun cuaan yíqui nyica tsa intuhun intuhun ra naha. ⁷ Tacan tan iin tsa nyito can, tsaḥa can intuhun intuhun coho xuhun cuaan tsi tsa intuhun intuhun tsa utsa ángel can. Tan tsitú maa can tsihin tsa xaan Nyoo tsa cua tatsi tuñi ra tsi nyívi. Ra ican ña cua cundihi maa tsa iyó ra. ⁸ Tan tsitú maa tsitsi vehe ñuhu can tsihin yuhma tsa cuenda tsa cahnu xaan cuví Nyoo tan tsa cuenda tunyee iñi tsa iyó tsi ra. Tan yoñi maa cuví quihvi tsitsi vehe ñuhu can tsitsi tsa ndi cumañi ndíhi tsa utsa tundoho tsa vatsí ndacá tsa utsa ángel can.

16

Coho tsa yíhí tundoho tsa cua jaquítsi tsa utsa ángel

¹ Tacan tan tsíñi yu iin ndusu ñihi xaan tsa quitá tsitsi vehe ñuhu nu nyaá Nyoo. Tan catyí tsi tyehen tsihin tsa utsa ángel can:

—Cūacoyo ndo tsa yíhí tsitsi coho ndahá ndo juven siqui nyívi iyó nu ñuhu ñayívi, tyin Nyoo cua tatsi tuñi ra tsi ñi —catyí ndusu can.

² Tacan tan tsaḥan iin ángel can tsicoyo ra tsa yíhí tsitsi coho ra siqui nyívi tsa nyaá tuñi quiti caquiñi can tan jacahnú ñi tsitoho ti. Tan quitá nu caahvi xaan tan uhvi xaan tsi ñi.

³ Tacan tan coyó tsa tsinu uvi ángel can tsa yíhí tsitsi coho ra nu ndutya ñuhu. Tan ndutya ñuhu can nanduví tsi niñi tumaa niñi ndíyi, tan tandíhi tsa nyito tsa iyó tsitsi ndutya ñuhu can tsihí tsi.

⁴ Tacan tan coyó tsa tsinu uñi ángel can tsa yíhí tsitsi coho ra nu yutya nahnu tan nu ndohyo tan nanduví tsi niñi. ⁵ Tacan tan tsíñi yu tsa caahán ángel cuenda ndutya tan catyí ra:

—Jutu Mañi yu, yooho vaha xaan un tyin tatsí tuñi un tsi nyívi tyehen. Jutu Mañi yu, Nyoo ii cuví un tyin nda nu quítsahá tandíhi tan nda cuenda vityin tacan ñi iyó maa un. ⁶ Tatsí tuñi un tsi ñi tyin maa ñi tsatj ñi niñi nyívi yíhí cuenda un tan niñi ra cuví ndusu yuhu un. Tan vityin yooho tumaa tsa jacohó un niñi tsi ñi tyin tacan taahán maa tsi tsi ñi —catyí ángel can.

⁷ Tan tsíñi tucu yu nacahán inga ndusu ityí nu nyaá altar Nyoo tan catyí tsi tyehen:

—Ndítsa, Nyoo, Jutu Mañi yu, ra iyó tandíhi tunyee iñi tsi, vityin tsa tatsí tuñi un tsi nyívi tsihin tsa ndítsa tan tsihin tsandaa —catyí ndusu can.

⁸ Tan coyó tsa tsinu cumi ángel can tsa yíhí tsitsi coho ra nu ñicanyii. Tacan tan tsicoo ndatu tsi ñicanyii can tsa cahmi tsi tsi nyívi tsihin ñuhu tsi. ⁹ Tan tandíhi nyívi ndasi xaan cayú ñi jahá ñicanyii can. Maa tyin vasu ndi maa tacan tahán ñi, ña nasamá ñi cuhva tsicoo ñi, tan ndi ña jacahnú ñi tsi Nyoo. Tan cahán ñi ndavaha ñi siqui Nyoo, ra tsa jaquítsi tundoho can siqui ñi.

¹⁰ Tan coyó tsa tsinu uhun ángel can tsa yíhí tsitsi coho ra siqui tyayu quiti caquiñi can. Tan ndunaá nu ndacá ñaha ti. Tan nyívi cuenda ti, nda cuanda tsatsj yíhí ñi yaa ñi tsa cuenda tsa nyehe xaan ñi tsa uhvi. ¹¹ Maa tyin vasu ndi

maa tacan cuvī, ña jandihī ñi tsa javahá ñi tsa ña vaha. Tan cahān ñi ndavaha ñi siqui Nyoo, ra nyaá andivī, tsa cuenda tsa uhvi nu caahvi ñi.

¹² Tan coyo tsa tsinu iñu ángel can tsa yihí tsitsi coho ra nu yutya Eufrates cahnu. Tan ndoco ndutya can tyin tacan tan nuña ityi nu cua yaha ra rey tsa quee ityi nu caná ñicanyii naha ra. ¹³ Tacan tan nyehe yu quitá tatyí ña vaha tsa caá tumaa caá sahva yuhu tsa intuhun intuhun quití. Iin can quitá yuhu quití caquiñi, inga can quitá yuhu coo xaan tsa iyó ndaha inga can quitá yuhu tsa cuvī ndusu yuhu vatya. ¹⁴ Tatyí ña vaha can cuvī tatyí nu ña vaha, tan nahnu tsa nyityi javahá nahnu. Quitá nahnu, jandu iin nahnu tandihī rey tsa iyó nu ñuhu ñayivī, tyin cañi tahan ra naha quivī tsa quivī janaha Nyoo tyin iyó tandihī tunyee iñi tsi ra. ¹⁵ Tan catyí ra Cristo:

—Nyehe ndo tyin tsa vatsí yu tumaa vatsí iin ñasuhu tyin iin ñasuhu sana iñi ndo tan quihví ra tsitsi vehe ndo tacan yuhu. Sii xaan cua cuvī tsi nyivī ndatú quivī quitsi yu tan tsa iyó vaha jahma ñi tyin quivī cua tsa yu ña cua nducahan nuu ñi tyin ña tandii ñi —catyí ra Cristo.

¹⁶ Tan cua ndu iin ra cuvī rey naha ra nu nañí Armagedón tsihin yuhu hebreo.

¹⁷ Tan coyo tsa tsinu utsa ángel can tsa yihí tsitsi coho ra nu tatyí, tacan tan quitá iin ndusu nu nyaá tyayu Nyoo tsitsi vehe ñuhu tsa nyaá nda andivī. Caná tsa tsi tan catyí tsi:

—Tsa iyó vaha vityin.

¹⁸ Tacan tan vaa ña maa cuvī tan caahán savi tan cañi tatsa. Tan ñihi xaan tañ nu ñuhu ñayivī. Tan ña tuhvá maa taán tacan tsa ndi quitsahá iyó nyivī nu ñuhu ñayivī. ¹⁹ Tan uñi nu ndatá ñuu cahnu Babilonia can, jahá tsa tañ. Tan tandihī ca ñuu tsa cayucú nu ñuhu ñayivī tanj tsi. Nyoo ña naá maa iñi ra tsa javahá nyivī Babilonia. Yacan cuenda janyehé xaan ra tundoho tsi ñi. ²⁰ Tandihī maa ñuhu tsa iyó tsitsi ndutya ñuhu tan tandihī yucu, tandihī maa tsi tsinaá. ²¹ Tan cucoyo cuaha yuu savi nahnu xaan tsa quee andivī siqui nyivī. Vee xaan tsi. Tumaa vee uvi xico kilu, tacan vee tsa intuhun intuhun yuu savi can. Tan nyivī cahān ñi ndavaha ñi siqui Nyoo tsa cuenda tundoho yuu savi can, tyin cuvī tsi iin tundoho cahnu xaan tsa cuenda ñi.

17

Nu cua tatsi tuñi Nyoo tsi ñuu ña vaha

¹ Tacan tan quitá iin ángel tsitsi tsa utsa ra tsa ndahá coho can naha ra, natuhvá ra nu nyaá yu, tan catyí ra tsihin yu:

—Ñaha tyin janaha yu tsi un nácaa cua cutuñi ñaha ña vaha tsa tsicá nuu tsihin rayii, ña tsa nyaá nu ndutya cuaha. ² Tyin ra cuvī rey nu ñuhu ñayivī tsioco ra naha tsihin ña, tan tsa cuenda ña tivī tandihī nyivī iyó nu ñuhu ñayivī —catyí ra tsihin yu.

³ Tacan tan nyehe yu iin tsa janahá Tatyí Ii Nyoo tsi yu, tan tsindaca ángel can tsi yu nu tsiqui nu nduve maa nyivī iyó, tan juvin ñi ican nyehe yu iin ñaha yosó iin quití cuaaha caquiñi. Nyecú sivi tsa caahán ndavaha ñi tsi Nyoo tsi ti. Iyó utsa jifñi ti tan utsi ndiqui ti. ⁴ Tan ñaha can nditsí ña jahma tijinda tan cuaaha. Tan cuaha xaan xuhun cuaan iñi tsi ña, tan yuu vaha, tan perla. Tan ndahá ña iin taza xuhun cuaan tsitú tsihin tsa ña vaha tan tsa caquiñi tsa javahá ña. ⁵ Tan nyaá iin sivi tsa cuvī iin tuhun xeehe tsa ña cutuñi iñi nyivī nutyaan ña. Tan catyí can tyehen: “Ñaha ihya cuvī ñuu Babilonia cahnu, sihi tandihī ñiñaha tsa tsicá nuu tsihin rayii tan sihi tandihī tsa ña vaha tsa iyó nu

ñuhu ñayivi.” ⁶ Tacan tan nyehe yu tyin tsiñi ñaha can jahā tsa tsihi ña niñi nyivi yihí cuenda Nyoo, ñi tsa tsihi tsa cuenda tsa cahān ñi tuhun ra Jesús. Tsa nyehe yu tsi ña, iyo xaan cuñi yu. ⁷ Tacan tan catyí ángel can tsihin yu:

—¿Nacuenda iyo xaan cuñi un? Cua jacoto yu tsi un náa cuñi tsi catyí tuhun xeehe ñaha ihya tan quití caquiñi tsa yosó ña, quití tsa iyó utsa jiñi tan utsi ndiqui. ⁸ Quití caquiñi tsa nyehe un can, juvin ti cuví quití tsa tsicoo tan vityin nduve ca ti iyó. Maa tyin cua quita ti tsitsi yavi cunu tsa nduve nu tsindihi. Ican nyíi ti tsa ndi cumañi ca cuhun ti nu cua cundihi cuii ti. Nyivi iyó nu ñuhu ñayivi, ñi tsa nduve sivi nyaá nu libru Nyoo nda quivi tsinu ñuhu ñayivi, iyo xaan cua cuñi ñi nyehe ñi tsi quití can. Libru can catyí yóo nyivi cua coo cuii.

⁹ Tuhun ihya cuñi tsi tsa cutuñi iñi yo itsi: Tsa utsa jiñi quití can cuñi tsi catyí tsa utsa yucu tsa nyaá ñaha can nuu. ¹⁰ Tan juvin ñi cuñi tucu tsi catyí can utsa rey. Uhun ra naha tsa yaha tsindaca ñaha ra naha. Tan tsa tsinu iñu rey ndacá ñaha ra vityin. Tan ra tsa tsinu utsa ndi cumañi cundaca ñaha ra. Quivi quitsi ra, ña naha cua cundaca ñaha ra. ¹¹ Tan quití caquiñi tsa tsicoo tan vityin nduve ca ti iyó, juvin ti cuví iin rey tsitsi tsa utsa taahan rey can, tan cua cuví tucu ti rey tsa tsinu una. Tsa yaha cundaca ñaha nyico ti, tacan tan cua cuhun ti nu cua cundihi cuii ti.

¹² Tan tsa utsi ndiqui tsa nyehe un can, cuñi tsi catyí utsi rey tsa ndi cumañi cundaca ñaha. Cua coo ndatu tsi ra naha tsa cundaca ñaha ra naha iin ora, iin caa ñi tsihin quití caquiñi can. ¹³ Tsa utsi rey can inducu ñi cua caca iñi ra naha. Tan cua nacuhva ra naha tunyee iñi tsa iyó tsi ra naha tsi quití caquiñi can. Tan tandihi ndatu tsa iyó tsi ra naha cua nacuhva ra naha tsi ti. ¹⁴ Tan cua cañi tahan ra naha tsihin ra Mbee Ticatyi Luhlu. Maa tyin ra Mbee can, cua jaha canaa ra tsi ra naha. Tyin juvin ra yihí ndaha tsi tandihi ra ndacá ñaha. Tan yihí ndaha tucu ra tsi tandihi ra cuví rey naha ra. Tan nyivi yihí cuenda ra, maa Nyoo canā tsi ñi tan nacatsj ra tsi ñi. Tan nñi xaan cuñi ñi nyicún ñi tsi ra.

¹⁵ Tan catyí tucu ángel can tsihin yu:

—Ndutya cuaha tsa nyehe un can, nu nyaá ñaha tsicá nuu can, yacan cuví nyivi iyó tandihi ñuu nyihi tan ñuu nahnu, ñi caahán siin siin yuhu. ¹⁶ Rey tsa cuví tsa utsi ndiqui quití caquiñi tsa nyehe un can, ndasi cua cuñi ra naha nyehe ra naha tsi ñaha tsicá nuu can. Cua nacooh iñi ra naha tsi ña. Tan cua jatandii ra naha tsi ña; tan cua catsi ra naha cuñu ñuhu ña. Tan cua cahmi ra naha tsi ña. ¹⁷ Tyin Nyoo tsahā ra tsa caca iñi rey can naha ra tyin javaha ra naha cuhva cuñi maa Nyoo. Tyin iin ñi cuhva cua caca iñi ra naha, tan cua cuhva ra naha ndatu tsi quití caquiñi can tsa cundaca ñaha ti tumaa rey nda cuanda cundaa tuhun caahán maa Nyoo. ¹⁸ Ñaha tsa nyehe un can, juvin ña cuví ñuu cahnu tsa ndacá ñaha tsi tandihi ra cuví rey nu ñuhu ñayivi.

18

Nu naá ñuu Babilonia

¹ Tsa yaha yacan tan nyehe yu quee inga ángel ityi andivi tan iyó xaan tunyee iñi tsi ra. Tan ndunditsin ñuhu ñayivi jahā tsa nditsin ra. ² Tan canā tsa ra tsihin tsa ñihi ndusu ra, tan catyí ra:

—Tsa tsindihi nuu ñuu Babilonia cahnu. Nanduvj tsi nu iyó tatyí ña vaha, vehe tandihi nuu tatyí ña vaha, tan taca saa ña vaha tsa ña taahán iñi nyivi.

³ Tyin tandihi nyivi tiví ñi tsa cuenda cuatyi javahá ñuu Babilonia can. Ra cuví rey nu ñuhu ñayivi naha ra tumaa tsa tsicoo ra naha tsihin ñaha tsa cuví ñuu

Babilonia can. Javahá ra naha cuatyí tsihin ña. Tan nyívi ñuhu ñayívi nducucá ñi tsihin tsa cuaha xaan tsa yahvi tsa jatá nyívi ñuu can.

⁴Tacan tan tsiñi yu ndusu Nyoo ityi andívi, tan catyí tsi:

—Quita ndo ñuu ihya, nyooho tsa cuví nyívi yu, ña cutahan ndo tsihin nyívi ihya tan ña javaha ndo cuatyí tumaa javahá ñi cuatyí, tyin tacan tan ña nyehe ndo tundoho tumaa nyehé maa ñi. ⁵Tyin tsa canyíi tucuíti cuatyí nyívi iyó ñuu can, nda cuanda tsaá can nu nyaá yu. Tan ñuhú iñi yu tsa ña vaha javahá ñi. ⁶Cuhva ndo juvin ñi maa tsa tsaha ñi tsi inga nyívi tsi ñi; cuhva ndo uvi ca tsaha siqui tsa javahá ñi. Tacan janyehe ndo tundoho tsi ñi. Cuhva ndo tundoho nyehe ñi tsa ñihi uvi ca tsaha tan ñavin ca tsa tsaha maa ñi tsi inga nyívi. ⁷Yacan cuenda cuhva ndo tsa iyo xaan tahan ñi tsihin tundoho nyehe ñi jaha ndo. Tahan ñi cuhva tsa jacahnú xaan ñi tsi ñi tan cusíi xaan iñi ñi juvin cuhva can janyehe ndo tundoho tsi ñi. Tyin tsicá iñi tsitsi añima ñi: “Ihya nyecú yo tumaa iin reina. Ñavin ñaha ndaahvi cuví yo, tan ndi ña cua nyehe yo tundoho”, cuñi ñi, tsicá iñi ñi. ⁸Yacan cuenda iin quívi ñi cua quitsi tundoho siqui ñuu can, cua quitsi tuhun tsihí, tucuihya iñi, tama, tan cua cayu tsi tsihin ñuhu. Tyin yuhu iyó xaan tunyee iñi tsi yu tsa cuví yu Nyoo, Jutu ndo tan maa yu cua tatsi tuñi tsi nyívi ñuu can —catyí Nyoo.

⁹Ra cuví rey nu ñuhu ñayívi ihya tumaa tsa tsicoo ra naha tsihin ñaha tsa cuví ñuu can, cua vacu xaan ra naha, tan cuihya cua cuñi ra naha na nyehe ra naha yuhma tsa cayu ñuu can. ¹⁰Tan tsa cuenda tsa yuuhví ra naha tundoho can, nda sava ñi cua cunyecu ra naha. Tan cua catyí ra naha:

—¡Ndahvi yooho, ñuu cahnu Babilonia, ñuu tsa tsicoo cuaha tunyee iñi tsi! Tyin iin yaha ñi tsaá tundoho nyehé un —cua catyí ra naha.

¹¹Tan ra tsa xicó ndaha tyiñu naha ra, juvin ñi cua vacu xaan ra naha tan cuihya cua cuñi ra naha tsa cuenda ñuu can. Tyin yoñi ca cua jata tsa xico ra naha. ¹²Tyin xicó ra naha xuhun cuaan, xuhun cuiñin, yuu sii caá, perla, jahma linu, jahma seda, tan jahma tijinda cuaaha. Tan xicó tucu ra naha tandíhi nuu vitu tami tan náa ndíhi tsa tsinú tsihin yiqui nuu landa, tan vitu sii caá, tan caa tsa cuví bronce, tan caa tsa cuví hierro, tan yuu tsa cuví mármol. ¹³Tan xicó tucu ra naha canela, náa ndíhi ca yucu tsa quihví tsihin tsa tsatsí yo, tan tsa tami tumaa cutu, tumaa mirra, tan tumaa ndutya tami. Tan xicó tucu ra naha vinu, aceteye, yutyí paan vaha, tan trigo. Tan juvin ñi xicó tucu ra naha quiti cuenda carga, tan mbee, cuayu, carreta, tan nda cuanda nyívi tsa cuví musu tan xicó ra naha. ¹⁴Tan catyí ra naha tsihin nyívi ñuu can tyehen:

—Nduve ca tsa sii caá tsa tsicoo tsi un, tsa taahán xaan iñi un. Tan tsa tsindíhi tandíhi tsa cuca un. Tan ña cua ñihi ca maa un tandíhi yacan —catyí ra naha.

¹⁵Ra tsa xicó tandíhi can, nducucá ra naha tsa cuenda tsa jatá nyívi ñuu Babilonia can tsa xicó ra naha. Nda sava cua cunyecu ra naha tsa cuenda tsa yuuhví ra naha tsa cua nyehe nyívi can tundoho. Tan cua vacu xaan ra naha tan cuihya cua cuñi ra naha. ¹⁶Tan cua catyí ra naha:

—¡Ndahvi ñuu cahnu can! Cuví tsi tumaa iin ñaha tsa nditsí jahma linu, jahma tijinda cuaaha. Tan cucutú ña tsihin xuhun cuaan, tan yuu sii caá tan perla. ¹⁷¡Tan iin yaha ñi ndíhi tsa cuca xaan can! —cua catyí ra xicó can naha ra.

Tan tandíhi ra cuví capitán tsa jacacá yutun ndoo nu ndutya, tsihin nyívi yucú tsitsi can tan tandíhi ra jahá tyiñu nu ndutya ñuhu naha ra, nda sava

cua ndoo ñi. ¹⁸ Tan tsa cua nyehe ñi yuhma tsa cayú ñuu can, cua cana tsaa ñi, tan cua catyi ñi:

—¿Náa inga ñuu tsicoo tumaa ñuu cahnu ihya? Nduve —cua catyi ñi.

¹⁹ Tan cua coso ñi nyaca jiñi ñi, tan cua vacu xaan ñi. Tan cuihya cua cuñi ñi, cua cana tsaa ñi, tan cua catyi ñi:

—¡Ndahvi ñuu cahnu can! Tyin tsihin tsa cuca tsi tan nducuca tandihí yoo tsa tsicá nuu nu ndutya ñuhu tsihin yutun ndoo. ¡Tan vityin iin yaha ñi naa tsi! —cua catyi ñi.

²⁰ Maa tyin nyooho cusii iñi ndo nyehe ndo tsa taahán ñuu can, nyooho tsa iyó andívi, tan nyooho ra tsicá tyiñu ra Cristo tan nyooho ra cuví ndusu yuhu Nyoo, tan tandihí ca nyooho tsa yihí cuenda Nyoo. Cusii iñi ndo tyin tsa cuenda tsa javahá ñi tsa ña vaha tsihin ndo tan tatsí tuñi Nyoo tsi ñi.

²¹ Tacan tan iin ángel tsa iyó xaan tunyee iñi tsi, cañihí ra iin yuu tsa caá tumaa caá iin yoso cahnu xaan, tan jacuhun ra can tsitsi ndutya ñuhu, tan catyi ra:

—Tyehen cua cundihí nuu ñuu Babilonia cahnu. Tan ndi iin tsaha ca tan ña cua nyehe ca ndo itsi. ²² Yoñi ca cua cata yaa tsitsi ñuu can, tan yoñi ca cua javacu arpa, tan yoñi ca cua tiví tiyoo, tan ndi caa. Tan ndi ña cua coo ca ra jahá tyiñu náa ndihí ca tyiñu. Tan ndi ña cua cucayu ca molino. ²³ Tan ndi ñuhú tyuma, tan ña cua cayu ca tsitsi ñuu can. Ndi ña cua cuñi ca yo ndusu nyívi nu iyó vico tindaha. Tacan cua cuví vasu ndi maa ra xico tsa tsicoo ñuu can naha ra, cahnu xaan tunyee iñi tsicoo tsi ra naha, tan jandaví ñaha xaan nyívi iyó ñuu can tsi tandihí nyívi iyó nu ñuhu ñayívi tsihin tuhun tasi.

²⁴ Tyin cuaha xaan niñi ra cuví ndusu yuhu Nyoo canyíi tsitsi ñuu can tyin tsahñi ñi tsi ra naha. Tan canyíi tucu niñi inga ca nyívi yihí cuenda Nyoo, tan niñi tandihí nyívi tsa tsahñi nyívi nanií cahnu nu ñuhu ñayívi.

19

¹ Tsa yahá yacan, tan tsiñi yu ndusu nyívi cuaha ityi andívi. Tan catyi ñi: ¡Cahnu xaan cuví Nyoo! Jutu Mañi yo, Nyoo cuví ra ra jacacú tsi yo. Tan tsi maa ra taahán tsi jacahnu yo, tyin iyó xaan tunyee iñi tsi ra.

² Tyin tsihin tsa vaha tan tsandaa tan tsa nditsa jacutuñi ra.

Tatsí tuñi ra tsi ñaha tsicá nuu tsa cuví ñuu Babilonia

tsa jatívi xaan tsi nyívi iyó nu ñuhu ñayívi tsihin tsa caquiñi tsa javahá ña tsihin ñi.

Tan tatsí tuñi ra tsi ña tsa cuenda tsa tsahñi ña tsi nyívi jahá tyiñu tyiñu ra.

³ Tan catyi ñi inga tsaha:

—¡Cahnu xaan cuví Nyoo! Yuhma tsa cayú ña, ña cua cundihí maa tsa ndaa tsi ityi siqui —catyi ñi.

⁴ Tan tsa oco cumi ra tsahnu tan tsa cumi tsa nyito tsa nyecú nu nyaá tyayu Nyoo, tsicuiñi tsiti ra naha nda nu ñuhu. Tan jacahnu ra naha tsi Nyoo nu nyaá ra nu tyayu ra. Tan catyi ra naha:

—¡Cahnu xaan cuví Nyoo! ¡Na cuví tsi tacan! —catyi ra naha.

⁵ Tan nu nyaá tyayu Nyoo, nacahan iin ndusu, tan catyi tsi:

Jacahnu ndo tsi Nyoo Jutu yo

tandihí nyooho tsa jahá tyiñu tyiñu ra,

tan tyaá yahvi ndo tsi ra, nyooho nyívi nyihi tan nyívi tsahnu.

Nu iyó vico tindaha ra Mbee Tícatyi Luhlu tan nyívi tsinú iñi tsi ra

⁶ Tan tsiñi tucu yu ndusu tumaa cuví nu cuaha xaan nyívi yucú, o tumaa ndusu nu cuaha xaan yutya o tsa ñihi xaan caahán savi. Tan catyi tsi:

¡Cahnu xaan cuví Nyoo Jutu yo, ra iyó tandihí tunyee ifní tsi! Tyin tsa quitsahá ndacá ñaha ra.

⁷ Na cusii ifní yo tan na cutu yo tshin tsa sii. Na jacahnu yo tsi ra, Tyin tsa tsaá cuhva tsa coo yo vico tindaha ra Mbee Ticatyi Luhlu.

Tan yoo cua cuví yo tumaa ñasiihi ra, tan ndatú yo quivi tindaha yo tshin ra.

⁸ Tyin tsa ñihí ndatu yo tsa cunditsi yo jahma cuitsin tsa ña nyahyu ca tsa cuví jahma linu.

Tyin jahma linu can cuñí tsi catyi tsa vaha tsa javahá nyivi yihí cuenda ra.

⁹ Tacan tan quitsahá catyi ángel can tshin yu:

—Tyaa tyehen nu tutu: “¡Sii xaan cuví tsi nyivi tsa cua cuhnu nu tindaha ra Mbee Ticatyi Luhlu!”

Tan catyi tucu ra tyehen:

—Tuhun ihya cuví tuhun nditsa Nyoo —catyi ra tshin yu.

¹⁰ Tacan tan tsicuiñi tsi ti yu nuu ángel Nyoo can tsa cua jacahnu yu tsi ra. Maa tyin catyi ra tshin yu:

—Ña jacahnu un tsi yuhu, tyin yuhu musu Nyoo ñi cuví tucu yu tumaa yooho, tan tumaa tandihí ra yañi un tsa tsinú ifní tuhun nditsa tsa cañan ra Jesucristo. Tsi Nyoo taahán tsi jacahnu yo —catyi ra tshin yu.

Tyin tsa cañan ra Jesús, yacan cuví tsa jandu ifn ifní tsi ra cuví ndusu yuhu ra, ra tsahá cuenda tuhun caahán Nyoo tshin yo.

Nu nyehe ra Juan tsi ra tsa yosó cuayu cuitsin

¹¹ Tacan tan nyehe yu ticohó andivi. Tacan tan quituvi iin cuayu cuitsin. Tan ra yosó tsi ti nañi ra Ra Nditsa Tsa Nii Ifní Jahá Tyiñu Tyiñu Nyoo. Tyin tshin tsa ndaa jacutuñi ra tsi nyivi, tan ndaa javahá ra tsa cañi tahan ra.

¹² Tan tumaa caá nu cayú ñuhu, tacan caá tinuu ra. Tan cuaha xaan corona yihí jifni ra. Tan intuhun ñi maa ra tsitó iin sivi tsa nyaá tsi ra. ¹³ Tan nditsi ra jahma cahyi tshin niñi. Tan nañi ra Tuhun Nyoo. ¹⁴ Tan nyicún andaru andivi tsi ra, nditsi ra naha jahma vaha tsa cuví linu, cuitsin tsi tan ña nyahyu tsi. Tan yosó ra naha cuayu cuitsin. ¹⁵ Tan quitá iin mityi xaan yuhu ra, yacan cuví Tuhun Nyoo; tshin yacan cua jañicueehe ra tsi nyivi iyó nu ñuhu ñayivi. Tan ñihí cua cundaca ñaha ra tsi ñi tshin tatun tsa cuví caa. Cua tatsi tuñi ra tsi ñi tumaa javahá ra tavá ndutya yucu vixi tsa cuví uva tshin tsaha ra. Tan cua jacoho ra vinu tsa tsinú tshin uva tsi ñi, tsehe cuñí tsi catyi tyin cuxaán Nyoo tshin ñi tan cua tatsi tuñi ra tsi ñi tyin tsahá xaan ñi tsihi tsi Nyoo, ra iyó tandihí tunyee ifní tsi. ¹⁶ Nu jahma ra tan nu sihin ra can nyaá letra tsa catyi tyehen: “Ra ihya cuví ityi nuu tshin tandihí rey. Tan juven ñi ra cuví ityi nuu tshin tandihí ra ndacá ñaha naha ra.”

¹⁷ Tacan tan nyehe yu nyaá nyityi inga ángel nu ñicanyii. Tan ñihí xaan cana tsa ra tsi tandihí saa tsa ndavá ityi andivi, tan catyi ra tshin ti naha ti:

—Nuu ndo tan ndu iin ndo tan cuxiñi ndo tsa tsahá Nyoo catsi ndo. ¹⁸ Cua catsi ndo cuñu ra cuví rey naha ra tan ra cuví ityi nuu tshin andaru naha ra tshin tucu ra xaan naha ra. Tan catsi ndo cuñu cuayu tan cuñu ra tsicoso tsi ti naha ra. Catsi ndo cuñu tandihí ra naha, ra iyó tsitoho tan ra nduve tsitoho, tahan ñi nyivi nyihi tan nyivi tsahnu —catyi ra tshin saa can naha ti.

¹⁹ Tacan tan nyehe yu quitá caquiñi can tshin ra cuví rey tsa iyó nu ñuhu ñayivi tshin andaru cuenda ra naha. Ndu iin ra naha tsa cua cañi tahan ra naha tshin ra yosó cuayu cuitsin can tan andaru cuenda ra. ²⁰ Tiiñ ra yosó cuayu cuitsin can tsi quitá caquiñi can iin caa ñi tshin ra cuví ndusu yuhu vatya can, tyin nuu quitá caquiñi can javahá ra vatya can tsa nyityi, tan tshin

yacan jandaví ñaha ra tsi nyívi tsa tsahá cunyaa tuñi quití caquiñi can, tan tsi ñi jacahnú tsitoho ti. Tan jacuhun nyito ra tsi nduvi taahan ra naha nu ñuhu tsa cayú tshin azufre. ²¹ Tan tandihí ca ñi tsihí ñi tshin mityi xaan tsa quitá yuhu ra yosó cuayu cuitsin can. Tan tandihí maa saa, tsatsí xaan ti naha ti cuñu ñi.

20

Nu nyehe ra Juan tsa cuenda tsa mil cuiya

¹ Tsa yaha can tan nyehe yu quee iin ángel ityi andívi, ndahá ra ndaha tucu yuvehe yavi cunu tsa nduve maa nu tsindihí. Tan ndahá tucu ra iin cadena cahnu. ² Tiiñ ángel can tsi nu coo xaan tsa iyó ndaha, tsa cuví Coo Tsaahnu can, tan cuví tucu nu ña vaha, tan nañi nu Satanás. Tsahñi ra tsi nu tshin cadena iin mil cuiya. ³ Tan jacuhun ra tsi nu tsitsi yavi cunu xaan can. Nacasi ra yuhu yavi can, tan tyaa ra iin sellu yuhu can tyin tacan tan ña jandavi ñaha ca nu tsi nyívi iyó nu ñuhu ñayívi, nda yaha mil cuiya. Tsa yaha mil cuiya can, cua ndatsi nyico nu juhva ca quiívi.

⁴ Yaha can tan nyehe yu nyecú cuaha tyayu. Tan nuu can nyecú nyívi tsa ñihí ndatu tyin tatsi tuñi ñi tsi nyívi. Tan nyehe tucu yu añima nyívi tsahnya nyívi jiñi tsa cuenda tsa cahan ñi tuhun Nyoo tsa tsahá cuenda ra Jesús tsi ñi. Nyívi ihya ña jacahnú ñi tsi quití caquiñi can, ndi tsi tsitoho ti, tan ndi ña tsahá ñi cunyaa tuñi ti nutyaan ñi, tan ndaha ñi. Nyehe yu nandotó ñi can tan tsindaca ñaha ñi tshin ra Cristo tsitsi tsa mil cuiya can. ⁵ Ñi ihya cuví ñi tsa nandotó tsa jihna ñi. Maa tyin inga ndiyi ña nandotó ñi tyin cua nandoto ñi nda yaha mil cuiya can. ⁶ Jsiñ xaan cuví tsi ñi tsa nandoto jihna tyin nacatsí Nyoo tsi ñi! Tan ña cua cuhun ñi anyaya nu tatsi tuñi Nyoo añima ña vaha tsa cua cúu nyívi tsinu uvi tsaha. Tyin cua jaha tyiñu ñi cuenda Nyoo tan cuenda ra Cristo. Cua cuví ñi tumaa jutu tan cua cundaca ñaha ñi tshin ra Cristo mil cuiya.

⁷ Tsa yaha mil cuiya can, cua ndatsi Satanás nu nyíi nu nuuhñi nu. ⁸ Cua quita nu, jandavi ñaha nu tsi nyívi Gog tan Magog, ñi xaan iñi tsi Nyoo tsa iyó nanñi cahnu nu ñuhu ñayívi. Cua jandu iin nu tsi andaru ñi can tyin cuhun ra naha cuatyí. Cuaha xaan ra naha, tumaa cuaha nyiti yuhu ndutya ñuhu.

⁹ Tacan tan nyehe yu quee ra naha nanñi cahnu nu ñuhu ñayívi. Tan tyasi nduvi ra naha nu iyó nyívi yihí cuenda Nyoo ñuu Jerusalén tsa cuñi xaan Nyoo. Maa tyin Nyoo januu ra ñuhu tsa quee andívi tan tsahmí tsi tsi tandihí ra naha. ¹⁰ Tan nu ña vaha tsa jandaví ñaha tsi ñi, jacuhun Nyoo tsi nu anyaya nu cayú ñuhu tshin azufre, nu jacuhun ra tsi quití caquiñi can tan ndusu yuhu vatya can. Ican cua nyehe nahnu tundofo tacañ ñi maa, nduvi tan ñiñu.

Nu cutuñi nyívi ityi nu nyaá tyayu cuitsin nu nyaá Nyoo

¹¹ Tacan tan nyehe yu iin tyayu cuitsin cahnu. Tan nyehe yu tsi ra nyaá nuu can. Tan nyehe ra nu naa ñuhu ñayívi tan andívi. Tan ña ñihí tsi numaa cava tsi. ¹² Tan nyehe yu tandihí añima nyívi tsihí, tahan ñi nyívi tsahnu tan nyívi nyihi, nyecú nyityi ñi ityi nuu Nyoo. Tacan tan nuña libru tsa nyaá tandihí tsa javahá ñi quií tsicoo ñi. Tan nuña tucu inga libru nu nyecú sivi nyívi tsa cua coo nyito tshin Nyoo. Ndiyí can cua cutuñi ñi tsa cuenda náa ndihí ca tsa javahá ñi tsa nyaá nu libru can. ¹³ Tan ndutya ñuhu nacuhva cuenda tsi añima nyívi tsa tsihí tsa cumí tsi. Tan nu yucú añima nyívi tsihí tan Tuhun Tsiihí, nacuhva cuenda nahnu añima nyívi tsa yihí ndaha nahnu. Tan tandihí

ñi cua tahan ñi nácaa javahā maa ñi. ¹⁴ Tacan tan Tuhun Tsiihí can tan nu yucú añima nyívi tsihí can cua jacuhun ndihí Nyoo nduvi taahan can anyaya cahnu nu cayú ñuhú. Tan tsehe cuví tuhun tsiihí tsa tsinu uvi. ¹⁵ Juvín ñi ican jacuhun ra tsi nyívi tsa nduve sívi nyaá nu libro nu nyecú sívi nyívi cua coo nyito tsihin Nyoo tacan ñi maa.

21

Nu nyehé ra Juan andívi tsa tan ñuhu ñayívi tsa

¹ Yahā can tan nyehe yu iin andívi tsa tan iin ñuhu ñayívi tsa, tyin andívi tan ñuhu ñayívi tsa tsicoo jihna naā tsi. Tan tacan tucu ndutya ñuhu naā tsi.

² Yuhu ra Juan nyehe yu ñuu ii tsa cuví Jerusalén tsa tsa quee nda nu nyaá Nyoo andívi, nyehe yu nuū tsi. Tan sii xaan caā cucutú tsi tumaa cucutú iin ñaha cua tindaha. ³ Tan tsiñi yu iin ndusu ñihi tsa quitā nda andívi, tan catyí tsi:

—Nyehé jihna! Iyó Nyoo mahñu nyívi. Cua coo ra tsihin ñi. Maa ñi cua cuví ñi nyívi ra. Tan cua cunyaa ra tsihin ñi, tan cua cuví ra Nyoo cuenda ñi. ⁴ Juvín ñi maa ra cua nacuhva ndutya nuu ñi. Ña cua coo ca tuhun tsiihí tan ndi tucuihya iñi. Ña cua vacu ca nyívi tyin ña cua nyehe ca ñi tundoho. Tan ña cua nyehe ca ñi tsa uhvi. Tyin tandihí tsa tsicoo, tsa tsindihí tsi —catyí ndusu can.

⁵ Tacan tan ra nyaá nu tyayu cahnu can, catyí ra:

—Nyehé jihna. Jandutsaa yu tandihí maa tsa tsicoo.

Tan catyí tucu ra:

—Tyaa tuhun caahán yu ihya, tyin tuhun nditsa cuví tsi. Cúita iñi tuhun ihya tyin cua cundaa tsi —catyí ra tsihin yu.

⁶ Tsa yahā cahān ra yacan tan catyí tucu ra:

—Tsa iyó vaha tandihí vityin. Yuhu cuví ra jihna ñi, tan yuhu cuví ra cua coo nu cua ndihí quívi: tumaa letra A cuví tsi letra jihna ñi tan tumaa letra Z cuví tsi letra nu ndihí ña. Nyívi tsa na ityi iñi cua cuhva yu ndutya coho ñi; tuhun ihya cuñi tsi catyí: Ñi cuñi tyaa soho tuhun yu, cua cuhva yu ñayívi tsa ña cua naa maa coo ñi, tan nduve yahví tsi cua coo. ⁷ Nyívi jahá canaa tsi nu ña vaha, cua ñihi ñi tandihí tsa caahán yu tuhun ihya, tan cua ndoo ñi tsihin can. Tan yuhu cua cuví yu Nyoo ñi tan maa ñi cua cuví ñi sehe yu. ⁸ Maa tyin nyívi yuuhvi xaan, ñi ña tsinú iñi, ñi quiñi iyó, ñi tsahñi, ñiñaha tsicá nuu tsihin rayii, tan rayii tsicá nuu tsihin ñaha, ñi tasi, ñi jacahnú tsitoho, ñi vatya; tandihí maa nyívi ihya taahán tsi cuhun ñi anyaya cahnu nu cayú ñuhú tsihin azufre, nu cuví tsa tsinu uvi tuhun tsiihí, nu tatsí tuñi Nyoo añima ña vaha.

Nu nyehé ra Juan nácaa cua cuví ñuu Jerusalén tsa

⁹ Tacan tan tsitsi tsa utsa ángel tsa ndahá coho tsitú tsihin tundoho, quitā iin ra tan natuhvā ra nu nyaá yu tan catyí ra:

—Cohon tsihin yu tan janaha yu nyívi yihí cuenda ra Cristo tsi un, ñi tsa cuví tumaa ñasihi ra Mbee Ticatyi Luhlu —catyí ra tsihin yu.

¹⁰ Tan janahā Tatyí Ii Nyoo tsi yu tyin tsindacā ángel can tsi yu iin yucu sucun tan cahnu. Tan janahā ra ñuu ii, ñuu Jerusalén cahnu can tsi yu. Juvín ñi cuhva tsa vatsí nuu tsi tsa quee tsi andívi nu nyaá Nyoo. ¹¹ Xiñu xaan ñuu can tsihin tsa sii caā Nyoo. Xiñu xaan tumaa iin yuu vaha tan sii caā, tumaa yuu jaspé, tumaa nyehé yo tsa nyaá inga tsiyo tsihin yutyi, tacan caā tsi. ¹² Nñi canduvi ñuu can nyaá iin cora sucun xaan. Tan iyó utsi uvi yuhu tsi. Tan

nyaá nyityi iin ángel tsa intuhun intuhun yuhu can. Tan yuhu can nyecú sivi tsa utsi uvi sehe ra Israel ra cuví tsií tsaahnu yo naha ra. ¹³Uñi yuhu cora can nyecú ityi nu caná ñicanyii. Tan uñi tsi nyecú ityi norte. Tan uñi tsi nyecú ityi sur. Tan uñi tsi nyecú ityi nu tyisó ñicanyii. ¹⁴Utsi uvi yuu yihí nu cacu tsaha tsi. Tan nuu yuu can nyecú sivi tsa utsi uvi ra tsa tavá tyiñu ra Mbee Ticatyí Luhlu.

¹⁵Tan ángel tsa cahān tsihin yu, ndahá ra iin metru tsa tsinḡ tsihin xuhun cuaan, tsihin yacan tyihí cuhva ra ñuu can, tan yuhu cora can tan nanii canduvi cora ñuu can. ¹⁶Iyó cumi taahan tutun ñuu can. Tan inducu ñi tsa quiihin tan tsa cañi tsi. Tan tyihḡ cuhva ángel can ñuu can tsihin metru xuhun cuaan can. Tan quita uvi mil uvi cientu kilómetro. Iin ñi cuhva tsa cañi tan tsa sucun tan tsa quiihin. ¹⁷Tacan tan tyihḡ cuhva ra cora ñuu can. Tan quita uñi xico cumi metru tsa quiihin, tyihḡ cuhva ra tumaa tyihí cuhva nyivi.

¹⁸Tsihin yuu jaspe samā cora ñuu can. Tan maa ñi maa xuhun cuaan cuví ñuu can. Tan caá tsi tumaa caá yutyi tun ndoó vaha tsi. ¹⁹Tan tsaha cora can samā tsi tsihin tandihí ñi nuu yuu sii caá: yuu tsa jihna ñi cuví jaspe; tsa tsinu uvi cuví zafiro; tsa tsinu uñi cuví ágata; tsa tsinu cumi cuví esmeralda; ²⁰tan tsa tsinu uhun cuví ónice; tsa tsinu iñu cuví cornalina; tsa tsinu utsa cuví crisólito; tsa tsinu una cuví berilo; tsa tsinu ñn cuví topacio; tsa tsinu utsi cuví crisoprasa; tsa tsinu utsi iin cuví jacinto; tan yuu nu ndihí ña cuví amatista. ²¹Tsa utsi uvi yuhu cora can tsinú tsi tsihin utsi uvi perla. Intuhun ñi perla cuví tsa intuhun intuhun tsi. Tan nu cuví ityi cahnu ñuu can, maa ñi maa xuhun cuaan cuví tsi, tumaa iin yutyi. Tyin iin yutyi cuví nyehe yo tsa nyaá inga tsiyo tsi tsihin tsi, tacan caá tsi.

²²Ña nyehé maa yu ndi intuhun vehe ñuhu tsitsi ñuu can, tyin maa Nyoo Jutu yo, ra iyó tandihí tunyee iñi tsi, tan ra Mbee Ticatyí Luhlu cuví vehe ñuhu ñuu can. ²³Ña tsiñi ñuhu tsa jandunditsín ñicanyii ñuu can tan ndi tsa jandunditsín yoo. Tyin juven ñi maa tsa nditsín Nyoo tan tsa nditsín ra Mbee Ticatyí Luhlu jandunditsín tsitsi ñuu can. ²⁴Tandihí nyivi tsa cacu añima, cua caca nuu ñi nu nditsín can. Tan ra cuví rey nu ñuhu ñayivi naha ra cua cundaca ra naha tsa cuca ra naha tan tandihí tsa cahnu cuví ra naha ñuu can. ²⁵Ña cua cundasi yuhu cora tsa tsinu cahñi, tan ña cua coo tsacuaa ñuu can. ²⁶Tan tandihí tsa cuca, tan tsa cahnu, tsa iyó nu ñuhu ñayivi cua tsaa tsi ñuu can. ²⁷Maa tyin ña cua cuví quihvi tsa caquiñi, ndi intuhun nyivi javahá tsa caquiñi, tan ndi ñi vatya. Intuhun ñi maa nyivi iyó sivi nu libru ra Mbee Ticatyí Luhlu cua cuví quihvi, tan cua coo nyito tsihin ra tacan ñi maa.

22

¹Tacan tan janahá ángel can iin yutya cuii xaan tsi yu. Nduytya tsa tsahá tsa coo nyito yo cuví. Cuii xaan tsi tumaa cuii iin yutyi vaha. Tan quita nduptya can nuu nyaá tyayu Nyoo tan nu nyaá ra Mbee Ticatyí Luhlu. ²Mahñu tsitsi ityi cahnu ñuu can tan nduvi tsiyo xiin yutya can, nyecú yutun tsa tsahá tsa coo nyito yo. Tsahá tun naha tun tsiti tan iin tan iin yoo. Tan tsa iin cuiya tsahá tun naha tun tsiti utsi uvi tsaha. Tan ndaha numa tun vaha tsi cuví tsi numeri tsi nyivi iyó nu ñuhu ñayivi. ³Nduve maa tsa ña vaha cua coo ñuu can tyin ican nyaá tyayu Nyoo nu nyaá ra tan cua cundaca ñaha ra tsihin ra Mbee Ticatyí Luhlu. Tan cua jacahnu nyivi yihí cuenda ra tsi ra. ⁴Tan cua nyehe tsihin nuu ñi tsi ra. Tan cua cunyaa sivi ra nutyaan ñi. ⁵Ña cua coo ca tsacuaa ican. Tan nyivi tsa cua coo ican ña tsiñi ñuhu ñuhḡ candili tsi ñi, ndi

ñuhū ñicanyii, tyin Nyoo Jutu yo cua jandunditsin nu cua coo ñi. Tan maa ñi cua cundaca ñaha ñi tsihin ra tacan ñi maa.

Nu janahá tsi tyin tsa cuyatyin quitsi ra Cristo

⁶ Tacan tan catyí ángel can tsihin yu:

—Tuhun ihya cuví tuhun nditsa, tan cuví cuita iñi un itsi tyin cua cundaa tsi. Maa Nyoo Jutu yo ra cañan tsihin ra cuví ndusu yuhu ra tañan tsanaha, juven ra jacuhun ángel ra, tyin janaha ra tsi nyívi jahá tyiñu tyiñu ra náa cua cuví tsa numi ñi —catyí ra.

Tan catyí Jutu Mañi yo:

⁷ —¡Tsa cuyatyin quitsi yu! —catyí ra.

¡Sii xaan cuví tsi nyívi tsa javahá cuhva caahán tuhun Nyoo tsa nyaá nu libru ihya!

⁸ Yuhu ra Juan, tsiñi yu tan nyehe yu tandihi tuhun ihya. Tsa yaha nyehe yu tan tsiñi yu itsi, tsicuñi tsiti yu tsaha ángel tsa janahá itsi tsi yu, tyin jacahnu yu tsi ra. ⁹ Maa tyin catyí ra tsihin yu:

—Ña jacahnu un tsi yuhu, tyin yuhu, musu Nyoo ñi cuví yu, tumaa yooho tan tandihi ca ra yañi un tsa cuví ndusu yuhu Nyoo, tan tumaa tandihi ca nyívi tyaá yahvi tuhun nyaá nu libru ihya. Intuhun ñi Nyoo taahán tsi jacahnu yo —catyí ra tsihin yu.

¹⁰ Tan catyí tucu ra tsihin yu:

—Ña tyihi xeehe un tuhun Nyoo tsa nyaá nu libru ihya, tyin tsa yatyin cuii cundaa tsi. ¹¹ Maa tyin jaña ndaha tsi nyívi caquiñi, na javaha maa ñi cuhva cuñi maa ñi. Tan nyívi iyó cuatyí, na coo ca cuatyí ñi. Maa tyin nyívi javahá tsa vaha, na jañihi ca ñi javaha ñi tsa vaha. Tan nyívi tsa jandu íi Nyoo, na cunyicun vaha ca ñi tsi ra —catyí ra tsihin yu.

¹² Tan Jutu Mañi yo catyí ra:

—Nyehé ndo. Tsa cuyatyin quitsi yu. Tan tyahvi yu tsi intuhun intuhun nyívi tsa cuenda tsa javahá ñi, a javahá ñi tsa vaha o tsa ña vaha. ¹³ Yuhu cuví ra jihna ñi, tan yuhu cuví ra cua coo nu cua ndihi quívi, tsa iyó maa yu nda nu quitsahá tandihi tan tacan ñi maa cua coo yu nu cua ndihi tumaa letra A cuví tsi letra jihna ñi tan letra Z cuví tsi letra nu ndihi ña —catyí Jutu Mañi yo.

¹⁴ Sii xaan cuví tsi nyívi tsa nacatyá jahma, [ñi janduvahá añima], tyin cua ñihi ñi ndatu catsi ñi tsiti yutun tsa tsahá tsa coo nyito añima yo. Tan cuví quihvi ñi yuhu cora ñuu can. ¹⁵ Maa tyin nyívi javahá tsa caquiñi, tumaa ñi tasi, rayi tsa tsicá nuu tsihin ñaha tan ñiñaha tsa tsicá nuu tsihin rayi, tan ñi tsahñi, tan ñi jacahnú tsitoho, tan tandihi ñi vatya, tan ñi jandaví ñaha; tandihi maa ñi can, ña cua quihvi ñi tsitsi ñuu can.

¹⁶ Tan catyí tucu Jutu Mañi yo:

—Yuhu ra Jesús, jacuhun yu ángel yu tyin jacoto ra tandihi tuhun ihya tsi nyívi tsicá vehe ñuhu. Yuhu cuví nyívi tsahnu ra rey David. Tan cuví tucu yu tata ra. Tan cuví tucu yu tiñuu cahnu tsa xiñu xaan, tsa caná tsa naa ca —catyí ra.

¹⁷ Tatyí Ii Nyoo tan nyívi yihí cuenda ra, ñi tsa cuví tumaa ñasihi ra Mbee Ticatyí Luhlu, catyí ñi tyeheh:

—Ñaha ñi, Jutu Mañi yu —catyí ñi.

Tan nyívi tsa tsiñi tuhun ihya, na catyí ndihi ñi:

—Ñaha.

Tan nyiví na ityi iñi tan tandihí nyiví cuñí quitsi, na quitsi ñi tan coho ñi ndutya tsa tsahá tsa coo nyito añima yo, tan nduve náa cua tyahvi ñi.

¹⁸ Tan tandihí nyooho tsa tsiñi tuhun Nyoo tsa nyaá nu libru ihya, cuñí yu catyí yu tsehe tsihin ndo: Nyiví tsa cua janducuaha ca tuhun ihya, Nyoo cua janducuaha ca ra tundoho tsa nyaá nu libru ihya síqui ñi. ¹⁹ Tan nyiví tsa cua quinyaa juhva tuhun Nyoo tsa nyaá nu libru ihya, Nyoo cua quinyaa ra tsa taahán tsi tsi ñi tsa nyaá nu libru tsa caahán yóo nyiví cua coo nyito, tan ña cua cuhva ca ra coo ñi ñuu ii. Tan ña cua ñihi ñi tsa vaha tsa caahán libru ihya tuhun. ²⁰ Tan Jutu Mañi yo, ra tsa tsahá cuenda tuhun ihya catyí ra tyehen:

—Tsa nditsa tyin tsa cuyatyin quitsi yu —catyí ra.

Tan yuhu catyí yu:

—Na cuvi tsi tacan. Naha ñi, Jutu Mañi yu, Jesús —catyí yu.

²¹ Na naquihin tandihí ndo tsa vaha tsa tsahá Jutu Mañi yo Jesucristo tsi yo. Tan na cuvi tsi tacan ñi.